

儒

藏

儒藏

精華編三九冊
經部禮類

儒藏



北京大學《儒藏》編纂與研究中心

圖書在版編目 (CIP) 數據

儒藏.精華編.三九/北京大學《儒藏》編纂與研究中心編.—北京:北京大學出版社,
2018.11

ISBN 978-7-301-11757-6

I. ①儒… II. ①北… III. ①儒家 IV. ①B222

中國版本圖書館 CIP 數據核字 (2018) 第 249237 號

- | | |
|-------|--|
| 書名 | 儒藏 (精華編三九) |
| | RUZANG |
| 著作責任者 | 北京大學《儒藏》編纂與研究中心 編 |
| 責任編輯 | 王琳 |
| 標準書號 | ISBN 978-7-301-11757-6 |
| 出版發行 | 北京大學出版社 |
| 地址 | 北京市海澱區成府路 205 號 100871 |
| 網址 | http://www.pup.cn 新浪微博: @北京大學出版社 |
| 電子信箱 | dianjiwenhua@163.com |
| 電話 | 郵購部 010-62752015 發行部 010-62750672 編輯部 010-62756449 |
| 印刷者 | 北京中科印刷有限公司 |
| 經銷者 | 新華書店 |
| | 787 毫米 × 1092 毫米 16 開本 65.5 印張 1000 千字 |
| | 2018 年 11 月第 1 版 2018 年 11 月第 1 次印刷 |
| 定價 | 1200.00 元 |

未經許可, 不得以任何方式複製或抄襲本書之部分或全部內容。

版權所有, 侵權必究

舉報電話: 010-62752024 電子信箱: fd@pup.pku.edu.cn

圖書如有印裝質量問題, 請與出版部聯繫, 電話: 010-62756370

《儒藏》精華編凡例

一、中國傳統文化以儒家思想為中心。《儒藏》為儒家經典和反映儒家思想、體現儒家經世做人原則的典籍的叢編。收書時限自先秦至清代結束。

二、《儒藏》精華編為《儒藏》的一部分，選收《儒藏》中的精要書籍。

三、《儒藏》精華編所收書籍，包括傳世文獻和出土文獻。傳世文獻按《四庫全書總目》經史子集四部分類法分類，大類、小類基本參照《中國叢書綜錄》和《中國古籍善本書目》，於個別處略作調整。凡單書已收入入選的個人叢書或全集者，僅存目錄，並注明互見。出土文獻單列為一個部類，原件以古文字書寫者一律收其釋文文本。韓國、日本、越南儒學者用漢文寫作的儒學著作，編為海外文獻部類。

四、所收書籍的篇目卷次，一仍底本原貌，不選編，不改編，保持原書的完整性和獨立性。

五、對入選書籍進行簡要校勘。以對校為主，確定內容完足、精確率高的版本為底本，精選有校勘價值的版本為校本。出校堅持少而精，以校正誤為主，酌校異同。校記力求規範、精煉。

六、根據現行標點符號用法，結合古籍標點通例，進行規範化標點。專名號除書名號用角號（《》）外，其他一律省略。

七、對較長的篇章，根據文字內容，適當劃分段落。正文原已分段者，不作改動。千字以內的短文一般不分段。

八、各書卷端由整理者撰寫《校點說明》，簡要介紹作者生平、該書成書背景、主要內容及影響，以及整理時所確定的底本、校本（舉全稱後括注簡稱）及其他有關情況。重複出現的作者，其生平事蹟按出現順序前詳後略。

九、本書用繁體漢字豎排，小注一律排為單行。

《儒藏》精華編第三九冊

經部禮類

周禮之屬

周禮正義(卷一—卷三十一)(清)孫詒讓

目錄

三九冊

校點說明 一

敘 一

周禮正義略例十二凡 一

周禮正義卷一 一

天官冢宰 一

敘官 七

周禮正義卷二 四八

大宰 四八

周禮正義卷三 七四

大宰 七四

周禮正義卷四 九六

大宰 九六

周禮正義卷五 一二九

小宰 一二九

周禮正義卷六 一五六

宰夫 一五六

官正 一七五

周禮正義卷七 一八九

宮伯 一八九

膳夫 一九四

庖人 二一二

周禮正義卷八 二二一

內饗 二二一

外饗 二二八

亨人 二三二

甸師 二三四

獸人 二四四

廋人 二四七

鼈人 二五〇

腊人 二五三

周禮正義卷九 二五八

醫師 二五八

食醫……………二六一

疾醫……………二六四

瘍醫……………二七三

獸醫……………二七八

酒正……………二七九

周禮正義卷十……………二九九

酒人……………二九九

漿人……………三〇一

凌人……………三〇四

籩人……………三一〇

醢人……………三二二

周禮正義卷十一……………三三六

醢人……………三三六

鹽人……………三三七

冢人……………三三九

宮人……………三四一

掌舍……………三四六

幕人……………三五一

掌次……………三五四

大府……………三六三

周禮正義卷十二……………三六九

玉府……………三六九

內府……………三八二

外府……………三八三

司會……………三八八

司書……………三九一

職內……………三九五

職歲……………三九七

職幣……………三九八

周禮正義卷十三……………四〇一

司裘……………四〇一

掌皮……………四一六

內宰……………四一八

周禮正義卷十四……………四三九

內小臣……………四三九

閹人……………四四一

寺人……………四四七

內豎……………四四八

九嬪……………四五〇

世婦……………四五四

女御	四五六
女祝	四五八
女史	四六〇
典婦功	四六一
周禮正義卷十五	四六五
典絲	四六五
典枲	四六八
內司服	四七〇
縫人	四八六
周禮正義卷十六	四九二
染人	四九二
追師	四九五
屨人	五〇六
夏采	五一六
周禮正義卷十七	五二二
地官司徒	五二二
敘官	五二二
周禮正義卷十八	五六一
大司徒	五六一
周禮正義卷十九	五九二

大司徒	五九二
周禮正義卷二十	六二九
小司徒	六二九
周禮正義卷二十一	六六六
鄉師	六六六
鄉大夫	六八二
周禮正義卷二十二	七〇〇
州長	七〇〇
黨正	七〇五
族師	七一三
閭胥	七一八
比長	七二一
封人	七二三
周禮正義卷二十三	七三〇
鼓人	七三〇
舞師	七四〇
牧人	七四三
牛人	七五一
充人	七五七
周禮正義卷二十四	七六二

載師.....七六二

周禮正義卷二十五.....七九二

閭師.....七九二

縣師.....七九七

遺人.....八〇二

均人.....八〇六

師氏.....八一〇

周禮正義卷二十六.....八二一

保氏.....八二一

司諫.....八二八

司救.....八三〇

調人.....八三二

媒氏.....八三九

周禮正義卷二十七.....八五六

司市.....八五六

質人.....八七四

廛人.....八七七

周禮正義卷二十八.....八八三

胥師.....八八三

賈師.....八八四

司競.....八八五

司稽.....八八六

胥.....八八七

肆長.....八八七

泉府.....八八八

司門.....八九三

司關.....八九六

掌節.....九〇一

周禮正義卷二十九.....九〇九

遂人.....九〇九

遂師.....九二七

遂大夫.....九三三

縣正.....九三六

鄙師.....九三七

鄭長.....九三七

周禮正義卷三十.....九三九

里宰.....九三九

鄰長.....九四一

旅師.....九四二

稍人.....九四六

周禮正義卷三十一

委人	九五〇
土均	九五五
草人	九五七
稻人	九六二
土訓	九六七
誦訓	九六九
山虞	九七一
林衡	九七六
川衡	九七七
澤虞	九七七
迹人	九七九
升人	九八一
角人	九八一
羽人	九八二
掌葛	九八三
掌染草	九八四
掌炭	九八五
掌茶	九八五
掌蜃	九八六

四〇冊

圉人	九八八
場人	九八九
廩人	九九〇
舍人	九九四
倉人	九九九
司祿闕	一〇〇〇
司稼	一〇〇〇
春人	一〇〇三
饔人	一〇〇四
稿人	一〇〇四
周禮正義卷三十二	一〇〇七
春官宗伯	一〇〇七
敘官	一〇〇七
周禮正義卷三十三	一〇四八
大宗伯	一〇四八
周禮正義卷三十四	一〇八八
大宗伯	一〇八八

周禮正義卷三十五	一一一六
大宗伯	一一一六
周禮正義卷三十六	一一五〇
小宗伯	一一五〇
周禮正義卷三十七	一一八五
肆師	一一八五
鬱人	一二〇五
鬯人	一二一一
雞人	一二二一
周禮正義卷三十八	一二二四
司尊彝	一二二四
司几筵	一二四六
天府	一二六五
周禮正義卷三十九	一二七三
典瑞	一二七三
典命	一二九八
周禮正義卷四十	一三一一
司服	一三一一
周禮正義卷四十一	一三四四

司服	一三四四
典祀	一三五五
守祧	一三五六
世婦	一三六四
內宗	一三六七
外宗	一三六九
冢人	一三七一
墓大夫	一三八〇
職喪	一三八一
周禮正義卷四十二	一三八五
大司樂	一三八五
周禮正義卷四十三	一四二四
大司樂	一四二四
周禮正義卷四十四	一四四四
樂師	一四四四
大胥	一四六九
小胥	一四七六
周禮正義卷四十五	一四八四
大師	一四八四
小師	一五〇三

瞽矇……………一五一〇

眡瞭……………一五一四

周禮正義卷四十六

……………一五一七

典同……………一五一七

磬師……………一五二三

鍾師……………一五二七

笙師……………一五三四

搏師……………一五三九

鞀師……………一五四〇

旄人……………一五四一

籥師……………一五四二

籥章……………一五四三

周禮正義卷四十七

……………一五五四

鞮鞻氏……………一五五四

典庸器……………一五五五

司干……………一五五七

大卜……………一五五八

卜師……………一五七六

周禮正義卷四十八

……………一五七九

龜人……………一五七九

華氏……………一五八三

占人……………一五八六

籒人……………一五九〇

占夢……………一五九三

眡侵……………一六〇二

周禮正義卷四十九

……………一六〇八

大祝……………一六〇八

周禮正義卷五十

……………一六四六

小祝……………一六四六

喪祝……………一六五五

甸祝……………一六六四

詛祝……………一六六八

司巫……………一六七〇

男巫……………一六七八

女巫……………一六八一

周禮正義卷五十一

……………一六八四

大史……………一六八四

小史……………一六八九

馮相氏……………一七〇三

保章氏……………一七一二

周禮正義卷五十二

內史……………一七二四

外史……………一七三〇

御史……………一七三二

巾車……………一七三四

周禮正義卷五十三

典路……………一七七五

車僕……………一七七七

司常……………一七八一

都宗人……………一七九九

家宗人……………一八〇三

神仕……………一八〇四

四一冊

周禮正義卷五十四

夏官司馬……………一八〇九

敘官……………一八〇九

周禮正義卷五十五

大司馬……………一八四五

周禮正義卷五十六

大司馬……………一八七九

周禮正義卷五十七

小司馬……………一九一四

軍司馬闕……………一九一五

輿司馬闕……………一九一五

行司馬闕……………一九一五

司勳……………一九一五

馬質……………一九二一

量人……………一九二四

小子……………一九三一

羊人……………一九三七

司燿……………一九三九

掌固……………一九四四

周禮正義卷五十八

司險……………一九四九

掌疆闕……………一九五一

候人……………一九五一

環人……………一九五二

挈壺氏……………一九五四

射人	一九五九
服不氏	一九七七
射鳥氏	一九七九
羅氏	一九八一
掌畜	一九八四
周禮正義卷五十九	一九八六
司士	一九八六
諸子	二〇〇一
司右	二〇〇八
虎賁氏	二〇一〇
旅賁氏	二〇一二
節服氏	二〇一四
方相氏	二〇一六
大僕	二〇一九
周禮正義卷六十	二〇三一
小臣	二〇三一
祭僕	二〇三三
御僕	二〇三五
隸僕	二〇三六
弁師	二〇四〇

周禮正義卷六十一	二〇五九
司甲闕	二〇五九
司兵	二〇五九
司戈盾	二〇六二
司弓矢	二〇六四
繕人	二〇七八
稟人	二〇八二
戎右	二〇八四
齊右	二〇八七
道右	二〇八九
大馭	二〇九〇
周禮正義卷六十二	二〇九九
戎僕	二〇九九
齊僕	二一〇〇
道僕	二一〇一
田僕	二一〇二
馭夫	二一〇四
校人	二一〇五
趣馬	二一一一
巫馬	二一二三

牧師……………二二三

廋人……………二二四

圉師……………二二七

圉人……………二二九

周禮正義卷六十三……………二三一

職方氏……………二三一

周禮正義卷六十四……………二六一

職方氏……………二六一

土方氏……………二七八

懷方氏……………二八〇

合方氏……………二八一

訓方氏……………二八二

形方氏……………二八三

山師……………二八四

川師……………二八五

遼師……………二八五

匡人……………二八六

撝人……………二八六

都司馬……………二八七

周禮正義卷六十五……………二九〇

秋官司寇……………二九〇

敘官……………二九一

周禮正義卷六十六……………二九一

大司寇……………二九一

小司寇……………二九三

周禮正義卷六十七……………二五〇

士師……………二五〇

鄉士……………二六〇

遂士……………二六六

縣士……………二六九

方士……………二七二

訝士……………二七四

周禮正義卷六十八……………二七八

朝士……………二七八

司民……………二九一

司刑……………二九三

司刺……………二九七

司約……………三〇一

周禮正義卷六十九……………三〇六

司盟……………三〇六

周禮正義卷七十

職金	一三一〇
司厲	一三一五
犬人	一三一八
司圜	一三二〇
掌囚	一三二二
掌戮	一三二五
司隸	一三三〇
罪隸	一三三一
蠻隸	一三三二
閩隸	一三三三
夷隸	一三三三
貉隸	一三三四
布憲	一三三五
禁殺戮	一三三六
禁暴氏	一三三七
野廬氏	一三三八
蜡氏	一三四三
雍氏	一三四五
萍氏	一三四八

周禮正義卷七十一

司寤氏	一三四九
司烜氏	一三五一
條狼氏	一三五六
脩閭氏	一三五六
冥氏	一三六一
庶氏	一三六二
穴氏	一三六四
翬氏	一三六四
柞氏	一三六五
薙氏	一三六六
哲族氏	一三六八
翦氏	一三六九
赤友氏	一三七〇
蠲氏	一三七二
壺涿氏	一三七三
庭氏	一三七四
銜枚氏	一三七六
伊耆氏	一三七七
大行人	一三七九

周禮正義卷七十二……………二四一九

小行人……………二四一九

司儀……………二四三一

周禮正義卷七十三……………二四七〇

行夫……………二四七〇

環人……………二四七二

象胥……………二四七三

掌客……………二四七五

掌訝……………二四九七

掌交……………二五〇〇

掌察闕……………二五〇二

掌貨賄闕……………二五〇二

朝大夫……………二五〇二

都則闕……………二五〇四

都士闕……………二五〇四

家士闕……………二五〇四

周禮正義卷七十四……………二五〇五

冬官考工記……………二五〇五

總敘……………二五〇九

周禮正義卷七十五……………二五三九

輪人……………二五三九

周禮正義卷七十六……………二五七一

輿人……………二五七一

輿人……………二五八一

周禮正義卷七十七……………二五九二

輶人……………二五九二

周禮正義卷七十八……………二六一九

輶人……………二六一九

築氏……………二六二一

冶氏……………二六二二

桃氏……………二六三〇

鳧氏……………二六三五

桌氏……………二六四五

段氏闕……………二六五四

周禮正義卷七十九……………二六五五

函人……………二六五五

鮑人……………二六六〇

鞞人……………二六六四

韋氏闕……………二六七一

裘氏闕……………二六七一

畫續	二六七一	周禮正義卷八十四	二七八七
鍾氏	二六七六	匠人	二七八七
筐人闕	二六八〇	周禮正義卷八十五	二八一二
幌氏	二六八一	匠人	二八一二
周禮正義卷八十	二六八五	車人	二八三四
玉人	二六八五	周禮正義卷八十六	二八四二
柳人闕	二七〇七	車人	二八四二
雕人闕	二七〇七	弓人	二八五四
磬氏	二七〇七		
周禮正義卷八十一	二七一三		
矢人	二七一三		
陶人	二七二〇		
瓶人	二七二三		
梓人	二七二七		
周禮正義卷八十二	二七四一		
梓人	二七四一		
廬人	二七五二		
匠人	二七六〇		
周禮正義卷八十三	二七六六		
匠人	二七六六		

周禮正義

〔清〕孫詒讓 撰

王文錦

陳玉霞 校點

喬秀岩

目錄

三九冊

校點說明.....一

敘.....一

周禮正義略例十二凡.....一

周禮正義卷一.....一

天官冢宰.....一

敘官.....七

周禮正義卷二.....四八

大宰.....四八

周禮正義卷三.....七四

大宰.....七四

周禮正義卷四.....九六

大宰.....九六

周禮正義卷五.....一二九

小宰.....一二九

周禮正義卷六.....一五六

宰夫.....一五六

宮正.....一七五

周禮正義卷七.....一八九

宮伯.....一八九

膳夫.....一九四

庖人.....二一二

周禮正義卷八.....二二一

內饗.....二二一

外饗.....二二八

亨人.....二三二

甸師.....二三四

獸人.....二四四

廋人.....二四七

鼈人.....二五〇

腊人.....二五三

周禮正義卷九.....二五八

醫師.....二五八

食醫……………二六一

疾醫……………二六四

瘍醫……………二七三

獸醫……………二七八

酒正……………二七九

周禮正義卷十……………

酒人……………二九九

漿人……………三〇一

凌人……………三〇四

籩人……………三一〇

醢人……………三二二

周禮正義卷十一……………

醢人……………三三六

鹽人……………三三七

冪人……………三三九

宮人……………三四一

掌舍……………三四六

幕人……………三五一

掌次……………三五四

大府……………三六三

周禮正義卷十二……………

玉府……………三六九

內府……………三八二

外府……………三八三

司會……………三八八

司書……………三九一

職內……………三九五

職歲……………三九七

職幣……………三九八

周禮正義卷十三……………

司裘……………四〇一

掌皮……………四一六

內宰……………四一八

周禮正義卷十四……………

內小臣……………四三九

閹人……………四四一

寺人……………四四七

內豎……………四四八

九嬪……………四五〇

世婦……………四五四

女御	四五六	大司徒	五九二
女祝	四五八	周禮正義卷二十	六二九
女史	四六〇	小司徒	六二九
典婦功	四六一	周禮正義卷二十一	六六六
周禮正義卷十五	四六五	鄉師	六六六
典絲	四六五	鄉大夫	六八二
典泉	四六八	周禮正義卷二十二	七〇〇
內司服	四七〇	州長	七〇〇
縫人	四八六	黨正	七〇五
周禮正義卷十六	四九二	族師	七一三
染人	四九二	閭胥	七一八
追師	四九五	比長	七二一
屨人	五〇六	封人	七二三
夏采	五一六	周禮正義卷二十三	七三〇
周禮正義卷十七	五二二	鼓人	七三〇
地官司徒	五二二	舞師	七四〇
敍官	五二二	牧人	七四三
周禮正義卷十八	五六一	牛人	七五一
大司徒	五六一	充人	七五七
周禮正義卷十九	五九二	周禮正義卷二十四	七六二

載師……………七六二

周禮正義卷二十五……………七九二

閭師……………七九二

縣師……………七九七

遺人……………八〇二

均人……………八〇六

師氏……………八一〇

周禮正義卷二十六……………八二一

保氏……………八二一

司諫……………八二八

司救……………八三〇

調人……………八三二

媒氏……………八三九

周禮正義卷二十七……………八五六

司市……………八五六

質人……………八七四

廛人……………八七七

周禮正義卷二十八……………八八三

胥師……………八八三

賈師……………八八四

司競……………八八五

司稽……………八八六

胥……………八八七

肆長……………八八七

泉府……………八八八

司門……………八九三

司關……………八九六

掌節……………九〇一

周禮正義卷二十九……………九〇九

遂人……………九〇九

遂師……………九二七

遂大夫……………九三三

縣正……………九三六

鄙師……………九三七

鄫長……………九三七

周禮正義卷三十……………九三九

里宰……………九三九

鄰長……………九四一

旅師……………九四二

稍人……………九四六

槁人	鯁人	春人	司稼	司祿闕	倉人	舍人	廩人	場人	圉人
一〇〇四	一〇〇四	一〇〇三	一〇〇〇	一〇〇〇	九九九	九九四	九九〇	九八九	九八八

大宗伯

周禮正義卷三十五	一一一六
大宗伯	一一一六
周禮正義卷三十六	一一一〇
小宗伯	一一五〇
周禮正義卷三十七	一一八五
肆師	一一八五
鬱人	一二〇五
鬯人	一二一一
雞人	一二二一
周禮正義卷三十八	一二二四
司尊彝	一二二四
司几筵	一二四六
天府	一二六五
周禮正義卷三十九	一二七三
典瑞	一二七三
典命	一二九八
周禮正義卷四十	一三一一
司服	一三一一
周禮正義卷四十一	一三四四

司服	一三四四
典祀	一三五五
守祧	一三五六
世婦	一三六四
內宗	一三六七
外宗	一三六九
冢人	一三七一
墓大夫	一三八〇
職喪	一三八一
周禮正義卷四十二	一三八五
大司樂	一三八五
周禮正義卷四十三	一四二四
大司樂	一四二四
周禮正義卷四十四	一四五四
樂師	一四五四
大胥	一四六九
小胥	一四七六
周禮正義卷四十五	一四八四
大師	一四八四
小師	一五〇三

瞽矇	一五一〇	華氏	一五八三
眡瞭	一五一四	占人	一五八六
周禮正義卷四十六	一五一七	簪人	一五九〇
典同	一五一七	占夢	一五九三
磬師	一五二三	眡侵	一六〇二
鍾師	一五二七	周禮正義卷四十九	一六〇八
笙師	一五三四	大祝	一六〇八
搏師	一五三九	周禮正義卷五十	一六四六
鞀師	一五四〇	小祝	一六四六
旄人	一五四一	喪祝	一六五五
籥師	一五四二	甸祝	一六六四
籥章	一五四三	詛祝	一六六八
周禮正義卷四十七	一五五四	司巫	一六七〇
鞀鞀氏	一五五四	男巫	一六七八
典庸器	一五五五	女巫	一六八一
司干	一五五七	周禮正義卷五十一	一六八四
大卜	一五五八	大史	一六八四
卜師	一五七六	小史	一六九九
周禮正義卷四十八	一五七九	馮相氏	一七〇三
龜人	一五七九	保章氏	一七一二

周禮正義卷五十二

內史

一七二四

外史

一七三〇

御史

一七三二

巾車

一七三四

周禮正義卷五十三

典路

一七七五

車僕

一七七七

司常

一七八一

都宗人

一七九九

家宗人

一八〇三

神仕

一八〇四

四一冊

周禮正義卷五十四

夏官司馬

一八〇九

敘官

一八〇九

周禮正義卷五十五

大司馬

一八四五

周禮正義卷五十六

大司馬

一八七九

周禮正義卷五十七

小司馬

一九一四

軍司馬闕

一九一五

輿司馬闕

一九一五

行司馬闕

一九一五

司勳

一九一五

馬質

一九二一

量人

一九二四

小子

一九三一

羊人

一九三七

司燿

一九三九

掌固

一九四四

周禮正義卷五十八

司險

一九四九

掌疆闕

一九五一

候人

一九五一

環人

一九五二

挈壺氏

一九五四

射人……………一九五九

服不氏……………一九七七

射鳥氏……………一九七九

羅氏……………一九八一

掌畜……………一九八四

周禮正義卷五十九

司士……………一九八六

諸子……………二〇〇一

司右……………二〇〇八

虎賁氏……………二〇一〇

旅賁氏……………二〇一二

節服氏……………二〇一四

方相氏……………二〇一六

大僕……………二〇一九

周禮正義卷六十

小臣……………二〇三一

祭僕……………二〇三三

御僕……………二〇三五

隸僕……………二〇三六

弁師……………二〇四〇

周禮正義卷六十一……………二〇五九

司甲闕……………二〇五九

司兵……………二〇五九

司戈盾……………二〇六二

司弓矢……………二〇六四

繕人……………二〇七八

稟人……………二〇八二

戎右……………二〇八四

齊右……………二〇八七

道右……………二〇八九

大馭……………二〇九〇

周禮正義卷六十二

戎僕……………二〇九九

齊僕……………二一〇〇

道僕……………二一〇一

田僕……………二一〇二

馭夫……………二一〇四

校人……………二一〇五

趣馬……………二一一一

巫馬……………二一二三

牧師……………二二三

廋人……………二二四

圉師……………二二七

圉人……………二二九

周禮正義卷六十三……………二二三一

職方氏……………二三一

周禮正義卷六十四……………二六一

職方氏……………二六一

土方氏……………二七八

懷方氏……………二八〇

合方氏……………二八一

訓方氏……………二八二

形方氏……………二八三

山師……………二八四

川師……………二八五

遼師……………二八五

匡人……………二八六

撝人……………二八六

都司馬……………二八七

周禮正義卷六十五……………二九〇

秋官司寇……………二九〇

敘官……………二九一

周禮正義卷六十六……………二九一

大司寇……………二九一

小司寇……………二九三

周禮正義卷六十七……………二九五〇

士師……………二九五〇

鄉士……………二六〇

遂士……………二六六

縣士……………二六九

方士……………二七二

訝士……………二七四

周禮正義卷六十八……………二七八

朝士……………二七八

司民……………二九一

司刑……………二九三

司刺……………二九七

司約……………三〇一

周禮正義卷六十九……………三〇六

司盟……………三〇六

周禮正義卷七十

職金	二二一〇
司厲	二二一五
犬人	二二一八
司圜	二二二〇
掌囚	二二二二
掌戮	二二二五
司隸	二二三〇
罪隸	二二三一
蠻隸	二二三二
閩隸	二二三三
夷隸	二二三三
貉隸	二二三四
布憲	二二三五
禁殺戮	二二三六
禁暴氏	二二三七
野廬氏	二二三八
蜡氏	二二四三
雍氏	二二四五
萍氏	二二四八

周禮正義卷七十一

司寤氏	二二四九
司烜氏	二二五一
條狼氏	二二五六
脩閭氏	二二五九
冥氏	二三六一
庶氏	二三六二
穴氏	二三六四
翬氏	二三六四
柞氏	二三六五
雉氏	二三六六
哲族氏	二三六八
翦氏	二三六九
赤友氏	二三七〇
蠲氏	二三七二
壺涿氏	二三七三
庭氏	二三七四
銜枚氏	二三七六
伊耆氏	二三七七
大行人	二三七九

周禮正義卷七十二 二四一九

小行人 二四一九

司儀 二四三一

周禮正義卷七十三 二四七〇

行夫 二四七〇

環人 二四七二

象胥 二四七三

掌客 二四七五

掌訝 二四九七

掌交 二五〇〇

掌察闕 二五〇二

掌貨賄闕 二五〇二

朝大夫 二五〇二

都則闕 二五〇四

都士闕 二五〇四

家士闕 二五〇四

周禮正義卷七十四 二五〇五

冬官考工記 二五〇五

總敘 二五〇九

周禮正義卷七十五 二五三九

輪人 二五三九

周禮正義卷七十六 二五七一

輪人 二五七一

輿人 二五八一

周禮正義卷七十七 二五九二

輶人 二五九二

周禮正義卷七十八 二六一九

輶人 二六一九

築氏 二六二一

冶氏 二六二二

桃氏 二六三〇

鳧氏 二六三五

桌氏 二六四五

段氏闕 二六五四

周禮正義卷七十九 二六五五

函人 二六五五

鮑人 二六六〇

鞞人 二六六四

韋氏闕 二六七一

裘氏闕 二六七一

畫續	二六七一
鍾氏	二六七六
筐人闕	二六八〇
幌氏	二六八一
周禮正義卷八十	二六八五
玉人	二六八五
柳人闕	二七〇七
雕人闕	二七〇七
磬氏	二七〇七
周禮正義卷八十一	二七一三
矢人	二七一三
陶人	二七二〇
瓶人	二七二三
梓人	二七二七
周禮正義卷八十二	二七四一
梓人	二七四一
廬人	二七五二
匠人	二七六〇
周禮正義卷八十三	二七六六
匠人	二七六六

周禮正義卷八十四	二七八七
匠人	二七八七
周禮正義卷八十五	二八一二
匠人	二八一二
車人	二八三四
周禮正義卷八十六	二八四二
車人	二八四二
弓人	二八五四

校點說明

孫詒讓（一八四八—一九〇八），字仲容，號籀廬，浙江瑞安人。著《周禮正義》、《墨子閒詁》、《契文舉例》、《名原》、《札迻》、《籀膏述林》等，學術成就顯赫，此外在政治、實業、教育方面也很有作為。舊有章太炎的《傳》及朱芳圃《孫仲容先生年譜》，近有今人整理的孫延釗《孫衣言孫詒讓父子年譜》。

《周禮正義》是他為《周禮》作的一部新疏。是書草創於同治十一年（一八七二），「始為長編數十巨冊」。光緒十五年（一八八九），張之洞致信孫詒讓，商擬將其刻版印行。當孫詒讓「寫成一帙」，於翌年往見張之洞時，卻因種種原因無法付梓。此後，孫詒讓又有所修訂，「繼復更張義例，剝繇補闕，廿年以來，藥艸屢易」，直至光緒三十一年（乙巳），

才親手校訂，鉛版印行，凡八十六卷。從草創到印行，歷時三十餘年。

歷代註釋和研究《周禮》的著作卷帙浩繁，孫詒讓以二十四歲之齡草此新疏，野心不可謂不大。孫氏對以往經說的整理客觀精密，不僅能準確地概括經學問題，且能從叢脞的討論中梳理出清晰井然的思路。這種對三禮駕輕就熟、全面通盤的把握能力使本書大獲成功，在諸種清人新疏中脫穎而出，號為殿軍。

本書的版本有以下幾種。孫氏家印本，或稱乙巳本。乙巳本印數應當不少，至今傳本甚多，而早印本較少見。常見後印本，卷十五第七葉、卷三十七第八葉、卷三十八第十五葉、卷七十五第八葉，共四葉，皆木刻補版，補版部分較多錯訛，不足據。一九三一年湖北笛湖精舍又有木刻本，簡稱楚本。楚本經過積極校勘，糾正乙巳本不少錯訛的同時也有擅改孫氏原文之處，對乙巳本中的古體字也進行了規範化整理。楚本傳本較少，然而版面清晰，便於

閱讀，先後出版的幾種影印本無不採用楚本。此外有一九三三年商務印書館《萬有文庫》以及一九三六年中華書局《四部備要》兩種排印本。一九八七年中華書局出版了由陳玉霞、王文錦先生整理完成的點校本，學者稱便。

作為孫氏的家印定本，乙巳本自應作為校點的底本。但是此本不僅小字密排，難施標點，而且印製粗劣，往往認不清筆畫，不少古體字要換成通行繁體，均需一一重寫，以示排版人員，如此一來，幾乎等於是新的手抄本，難以起到底本應有的作用。

王文錦老師在整理時便以乙巳本做底本，以楚本做工作本，用乙巳本和楚本逐字對校，先用鉛筆把楚本改成乙巳本，然後再施點校。本書卷帙繁多。在將楚本改為乙巳本的過程中不免有所疏漏。慮及王老師的點校已為本書的整理打下了良好基礎，近三十年來為學界提供莫大便利，若另起爐灶，不僅事倍功半，也難免因底本模糊、密排而產生更多新的錯訛。因此，此次整理便以中華書局本為工作

本，乙巳本為底本，參校楚本。以期解決底本問題，並在已有的點校成果上有所進步。具體做法是，凡底本不誤而中華本誤者，徑改不出校；底本誤而楚本不誤者，則據楚本改並出校。另外，書中引文疑有訛誤，據他書改動者也出校。校記依《儒藏》體例，務求簡明，凡楚本已改正者，校記僅稱「從楚本改」，不詳記依據；據他書改字者，皆參考諸本不疑之處，故不羅列具體版本。孫詒讓所據版本容或與我們所見不同，所以我們迴避單單根據一個版本校改文字。

三校完成後，蒙汪少華老師惠賜顏春峰先生與汪老師合著《周禮正義點校考訂》一書（二〇一七年中華書局出版），喬秀岩據以檢查全稿，得以糾正大量失誤。記此致謝。

王文錦 陳玉霞 點校

陳玉霞 喬秀岩 馮茜 劉千惠 覆校

敘

粵昔周公，續文武之志，光輔成王，宅中作雒，爰述官政，以垂成憲，有周一代之典，炳然大備。然非徒周一代之典也，蓋自黃帝、顓頊以來，紀於民事以命官，更歷八代，斟酌損益，因襲積紒，以集於文武，其經世大法，咸粹於是。故雖古籍隳佚，百不存一，而其政典沿革，猶約略可攷。如《虞書》義和四子，爲六官之權輿，《甘誓》六卿爲夏法，《曲禮》六大五官，鄭君以爲殷制，咸與此經多相符會，是職名之本於古也。至其閱章縉典，并苞遠古，則如五禮六樂三兆三易之屬，咸肇耑於五帝而放於二王，以逮職

方州服，兼綜四朝，大史歲年，通咳三統。若斯之類，不可殫舉。蓋鴻荒以降，文明日啓，其爲治，靡不始於羸輶而漸進於精詳。此經上承百王，集其善而革其弊，蓋尤其精詳之至者，故其治躋於純太平之域。作者之聖，述者之明，蟠際天地，經緯萬端，究其條緒，咸有原本，是豈皆周公所臆定而手勑之哉。

其閱意眇眇，通關常變，權其大較，要不越政教二科。政則自典法刑禮諸大端外，凡王后世子燕游羞服之細，嬪御閭閻之昵，咸隸於治官，官府一體，天子不以自私也。而若國危、國遷、立君等非常大故，無不曲爲之制，豫爲之防。三詢之朝，自卿大夫以逮萬民，咸造在王庭，與決大議。又有匡人、撝人、大小行人、掌交之屬，巡行邦國，通上下之志。而小行人獻五物之書，王

以周知天下之故。大司寇、大僕樹肺石，建路鼓，以達窮遽。誦訓、土訓夾王車，道圖志，以詔觀事辨物。所以宣上德而通下情者無所不至，君民上下之間，若會四枝百岬而達於凶，無或離閔而弗鬯也。其爲教，則國有大學、小學。自王世子公卿大夫士之子，臬夫邦國所貢，鄉遂所進賢能之士咸造焉。旁及宿衛士庶子、六軍之士，亦皆輩作輩學，以德行道藝相切劘。鄉遂則有鄉學六，州學三十，黨學百有五十，遂之屬別如鄉。蓋郊甸之內，距王城不過二百里，其爲學率較已三百七十有奇，而郊里及甸公邑之學，尚不與此數。推之郛縣置之公邑采邑，遠極於畿外邦國，其學蓋十百倍蓰於是。無慮大數九州之內，意當有學數萬。信乎教典之詳，殆莫能尚矣。其政教之備如是，故以四海之大，無不受職之民，無不

造學之士，不學而無職者則有罷民之刑，賢秀挾其才能，愚賤貢其忱悃，咸得以自通於上，以致純太平之治，豈偶然哉。

此經在西周盛時，蓋百官府咸分秉其官法以爲司存，而大宰執其總會，司會、天府、大史臧其副貳。成康既沒，昭夷失德，陵遲以極於幽厲之亂，平之東遷，而周公之大經良法，蕩滅殆盡。然其典冊散在官府者，世或猶尊守勿替，雖更七雄去籍之後，而齊威王將司馬穰苴，尚推明《司馬法》，爲兵家職志；魏文侯樂人竇公，猶褒《大司樂》一經於兵火喪亂之餘。它如朝事之儀，大行之贊，述於大、小戴《記》，《職方》之篇列於《周書》者，咸其枝流之未盡漸滅者也。其全書經秦火而幾亡，漢興，景武之間，五篇之經復出於河間，而旋入於祕府，西京禮家大師多未之見。至劉歆、杜子春始通其

章句，著之竹帛，三鄭、賈、馬諸儒賡續詮釋，其學大興。而儒者以其古文晚出，猶疑

信參半。今文經師何休、臨碩之倫，相與擯席之。唐趙匡、陸淳，以逮宋元諸儒，皆議之者尤衆。或謂戰國瀆亂不經之書，或謂莽、歆所增傳。其論大都逞臆不經，學者率知其謬，而其抵巇索疇，至今未已者，則以巧辭袞說附託者之爲經累也。蓋秦漢以後，聖哲之緒，曠絕不續，此經雖存，莫能通之於治。劉歆、蘇綽託之以左王氏、宇文氏之篡，而卒以踣其祚。李林甫託之以修《六典》而唐亂，王安石託之以行新法而宋亦亂。彼以其詭譎之心，刻覈之政，偷效於旦夕，校利於黍秒，而謬託於古經以自文，上以誣其君，下以斂天下之口，不探其本而飾其末，其僥倖一試，不旋踵而潰敗不可振，不其宜哉。而懲之者遂以爲此經詬病，即

一二閎覽之士，亦疑古之政教不可施於今，是皆膠柱鼓瑟之見也。

夫古今者，積世積年而成之者也。日月與行星，相攝相繞，天地之運猶是也。圓顙而方趾，橫目而直軀，人之性猶是也，所異者，其治之迹與禮俗之習已耳。故畫井而居，乘車而戰，裂壤而封建，計夫而授田，今之勢必不能行也，而古人行之。祭則坐孫而拜獻之以爲王父尸，昏則以姪娣媵而從姑姊，坐則席地，行則立乘，今之情必不能安也，而古人安之。凡此皆迹也，習也。沿襲之久而無害，則相與遵循之；久而有所不安，則相與變革之，無勿可也。且古人之迹與習，亦有至今不變者。日月與地行同度則相掩蝕，地氣之蒸盪則爲風雨，人之所稔知也，而薄蝕則拜跪而救之，湛旱則號呼而祈之，古人以爲文，至今無改也。祝啟拊

搏，無當於鏗鎗之均，血腥全烝，無當於飲食之道，而今之大祀，猶沿而不廢。然則古人之迹與習，不必皆協於事理之實，而於人無所厭惡，則亦相與守其故常，千百歲而無變。彼夫政教之閱意眇眇，固將貫百王而不敝，而豈有古今之異哉。今泰西之強國，其爲治，非嘗稽覈於周公、成王之典法也，而其所爲政教者，務博議而廣學，以息通道路，嚴追胥，化土物升之屬，咸與此經冥符而遙契。蓋政教修明，則以致富強。若操左契，固寰宇之通理，放之四海而皆準者，此又古政教必可行於今者之明效大驗也。

詒讓自勝衣就傅，先太僕君即授以此經，而以鄭注簡奧，賈疏疏略，未能盡通也。既長，略窺漢儒治經家法，乃以《爾雅》、《說文》正其詁訓，以《禮經》、大、小戴《記》證其制度，研擗彙載，於經注微義，略有所寤。

竊思我朝經術昌明，諸經咸有新疏，斯經不宜獨闕。遂博采漢唐宋以來，迄於乾嘉諸經儒舊詁，參互證繹，以發鄭注之開奧，裨賈疏之遺闕。艸芻於同治之季年，始爲長編數十巨冊，綴輯未竟，而舉主南皮張尚書議集刊國朝經疏，來徵此書，乃櫟栝臆理，寫成一帙以就正。然疏悟甚衆，又多最錄近儒異義，辯論滋繇，私心未慙也。繼復更張義例，剟繇補闕，廿年以來，稟艸屢易，最後迻錄爲此本。其於古義古制，疏通證明，校之舊疏，爲略詳矣。至於周公致太平之迹，宋元諸儒所論多閎侈，而駢拇枝指，未盡揭其精要。顧惟秉資疏闊，素乏經世之用，豈能有所發明，而亦非箋詁所能鉤稽而揚榷也。故略引其尙而不敢馳騁其說，覬學者深思而自得之。中年早衰，倏然孤露，意思零落，得一遺十。復以海疆多故，世變日亟，

緒二十有五年八月，瑞安孫詒讓敘。

睠懷時局，撫卷增喟。私念今之大患，在於政教未修，而上下之情睽闕不能相通。故民窳而失職，則治生之計陞隘，而譎觚干紀者衆。士不知學，則無以應事偶變，效忠厲節，而世常有乏才之憾。夫舍政教而議富強，是猶泛絕潢斷港而蘄至於海也。然則處今日而論治，宜莫若求其道於此經。而承學之士，顧徒奉周經漢注爲攷證之淵藪，幾何而不以爲已陳之芻狗乎。既寫定，輒略刺舉其可剴今而振敝一二犖犖大者，用示櫟梲，俾知爲治之迹，古今不相襲，而政教則固百世以俟聖人而不惑者。世之君子，有能通天人之故，明治亂之原者，儻取此經而宣究其說，由古義古制以通政教之閱意眇指，理董而講貫之，別爲專書，發揮旁通，以俟後聖，而或以不佞此書爲之擁篲先導，則私心所企望而且莫遇之者與！光

周禮正義略例十二凡

經本以唐石經爲最古，注本以明嘉靖放宋本爲最精。此本原出北宋槧，雖明刻，而在諸宋本之上。近黃丕烈有重校刊本。今據此二本爲主，閒有譌脫，則以孟蜀石經元石久佚，今僅存宋拓《秋官》上下二卷，首尾亦有殘闕，拓冊臧湖州張氏。今據湖南周編修鑾詒景寫本校。又馮登府《石經考異》載有《夏官》殘拓，今未見。此刻之佳，在兼載鄭注；惟讎勘極疏，譌踏脫衍，不可枚舉，又多妄增助語，蓋沿唐季俗本，難以依據。及宋槧諸本阮元《校勘記》所據，有宋刻小字、大字本，余仁仲本，岳珂本。黃丕烈《札記》所據，有宋紹興董氏本，互注本。今所據，有陽湖費編修念慈所校宋婺州唐氏本，建陽本，附釋音本，巾箱本。又有明汪道昆放岳本，與阮、黃校岳本小異。參校補正，箸其說於疏。凡嘉靖本注譌脫顯然，它本咸不誤者，今徑補正，不箸於

疏。唯衆本是非錯出及文通義短，據善本校改者，始箸之。至版本文字異同，或形體譌別，既無關義訓，且已詳阮、黃兩記，今並不載，以祛鯁冗。近胡培暉《儀禮正義》、阮福《孝經義疏補》、陳立《公羊傳義疏》，並全錄阮記，俗本譌文，塵穢簡牘，非例也。

陸氏《釋文》，成於陳隋閒，其出最先，與賈疏及石經閒有不同，所載異本異讀，原流尤古。今並詳議其是非，箸之於疏，《釋文》據盧文弨校本，兼以阮氏《校勘記》及賈昌朝《羣經音辨》參訂之。以存六朝舊本之辜較。

賈疏蓋據沈重《義疏》重修，據馬端臨《文獻通攷》引董道說。《隋書·經籍志》載沈重《周官禮義疏》四十卷，與賈本卷帙並同，董說不爲無據。唐修經疏大都沿襲六朝舊本。賈疏原出沈氏，全書絕無援引沈義，而其移改之跡，尚可推案。如《載師》疏引《孝經援神契》一節，本《草人》注「黃白宜以種禾之屬」句釋義，賈移入《載師》而忘刪其述注之文，是其證。至董氏謂賈兼據陳劭《周禮異同評》，則臆揣，不足據也。在唐人經疏中，尚爲簡

當。今據彼爲本，疏據阮校宋十行本。近德化李氏有宋刊八行本殘帙，遠出十行本之前，未能段校也。訂譌補闕。凡疏家通例，皆先釋經，次述注。然鄭注本極詳博，賈氏釋經，隨文闡義，或與注複，而釋注轉多疏略；於杜鄭三君異義，但有糾駁，略無申證，故書今制，掣覈闕如。今欲摘斯失，釋經唯崇簡要，注所已具，咸以省約，注文則與，則詳爲疏證。蓋注明即經明，義本一也。今疏於舊疏甄采精要，十存七八。雖間有刪剝移易，而絕無臆改。且皆明揭賈義，不敢攘善。唐疏多乾沒舊義，近儒重修，亦或類此，胡氏《儀禮正義》，間襲賈釋；郝懿行《爾雅義疏》，亦多沿邵義。竊所未安。非膚學所敢效也。

唐疏例不破注，而六朝義疏家則不盡然。孔氏《禮記正義敘》偶皇侃時乖鄭義，《左傳正義敘》偶劉炫習杜義而攻杜氏，是也。鄭學精卅羣經，固

不容輕破。然三君之義，後鄭所讚辨者，本互有是非。乾嘉經儒攷釋此經，間與鄭異，而於古訓古制，宣究詳塙，或勝注義。今疏亦唯以尋繹經文，博稽衆家爲主，注有悞違，輒爲匡糾。凡所發正數十百事，匪敢破壞家法，於康成不曲從杜、鄭之意，或無諄爾。

古經五篇，文繇事富，而要以大宰八灋爲綱領，衆職分陳，區畛靡述。其官屬一科，《敘官》備矣。至於司存攸寄，悉爲官職；總揭大綱，則曰官灋；若《大宰》六典八則之類。詳舉庶務，則曰官常；若《大宰》「正月之吉始和布治于邦國都鄙」以下至職末，皆是也。而官計、官成、官刑，亦錯見焉。若《大宰》職末受會，則官成也。大計羣吏，則官計也。詔王廢置、誅賞，則官刑也。六者自官職、官常外，餘雖或此有彼無，詳略互見，而大都分繫當職，不必旁稽。唯官聯條緒

紛緜，脈絡隱互，敝見百職，鉤覈爲難。今略爲甄釋，雖復疏闕孔多，或亦稽古論治之資乎。

議禮羣儒，昔偁聚訟。此經爲周代法制所總萃，閱章縟典，經曲畢咳。而侯國軍賦，苞、何膠於舊聞；明堂辟廡，服、蔡騰其新論。兩漢大師，義詁已自舛互。至王肅《聖證》，意在破鄭，攻瑕索瘡，偏戾尤甚。然如郊社、禘祫，則鄭是而王非；廟制、昏期，則王長而鄭短。若斯之倫，未容偏主。唐疏各尊其注，每多曲護，未爲闕通。今並究極諸經，求厥至當，無所黨伐，以示折衷。

此經在漢爲古文之學，與今文家師說不同。大、小戴《記》及《公羊春秋》，並今文之學，故與此經義多不合。先秦古子及西漢遺文，所述古制，純駁襍陳，尤宜精擇。今廣徵羣籍，甄其合者，用資符驗。其不合者，則爲疏通別

白，使不相殺抵。近儒攷釋，或綴粹古書，曲爲傳合，非徒於經無會，彌復增其紛紜，如惠士奇《禮說》，義證極博，而是非互陳，失在緜襍。至沈夢蘭《周禮學》，而新奇繆盭甚矣。又陳奐《毛詩傳疏》及鄒漢勛《讀書偶識》諸書，說禮亦多此失，學者詳之。今無取焉。

經文多存古字，注則多以今字易之。如獻漁、濃法、聯連、頒班、于於、攷考、元祗、眡視、政征、敍序、袞邪、裁災、蠡鮮、蠶桑、臯罪、狸埋、劓刮、壹一、臬栗、虢暴、覈核、毓育、胥省、媿美、媿姻、匱樞、囂艱、馭御、馼繫、敏叩、彊強、簪筮、飄風、果裸、鬻煮、噉呼、雷雷、磬韶、①侑宥、歛吹、幽邠、虞鑊、尠兆、蓐夢、揅拜、誦稽、遼原、參三、凡四十餘字，並經用古字，鄭則改用今字以通俗。今字者，漢人常用之字，不拘正段也。《考工記》字例，與五官又不盡同。如殺作弑，擊作毆之類。又五篇古字，如敍、攷、晦、于、臯諸文，《記》並從今字，疑故書本如是矣。

①「磬」，原作「磬」，今據楚本改。

宋元刻本，未通此例，或改經從注，或改注從經，遂滋岐互，非復舊觀。段玉裁《漢讀考》及阮、黃兩記，舉正頗多，尚有未盡。今通校經注字例，兼采衆本，理董畫一。或各本並誤，則仍之而表明於疏。經注字體，咸依唐石經、嘉靖本、岳本，參互校定。注疏中間有隋唐以來相沿俗書，如總摠、畝畝、訛亂之類，形聲省別，以承習既久，姑仍其舊。唯疏中蒙案，間用六書正字，以崇古雅，此自是鄙書私定義例，不敢以是盡改古書也。至經注傳譌，或遠在陸、賈以前，爲段、阮諸家及王引之《經義述聞》所刊正者，則不敢專輒改定，並詳著其說於疏，俾學者擇焉。

此經舊義，最古者則《五經異義》所引古《周禮》說，謂古文《周禮》說也。或出杜、鄭之前。次則賈逵、馬融、干寶三家佚詁，亦多存古訓。無論與鄭異同，並爲攷拾。近世所傳有唐杜牧《攷工記注》二卷，義愜舛陋，多襲宋林希逸《考工

記解》說，僞託顯然，今並不取。至於六朝、唐人禮議經疏，多與此經關涉，義既精博，甄錄尤詳；凡錄舊說，唐以前皆備舉書名。宋元以後，迄於近代，時代未遠，篇帙見存，則唯箸某云，以省繇碎。大氏宋元明舊說，多采之王與之《訂義》、陳友仁《集說》及官纂義疏。至國朝諸儒攷釋，則以廣東《學海堂經解》、江蘇南菁書院《續經解》爲淵藪。此外如吳廷華《疑義》、李光坡《述注》、李鍾倫《纂訓》、方苞《集注》、《析疑》、莊有可《集說》、蔣載康《心解》及林喬蔭《三禮陳數求義》、黃以周《禮書通故》之類，^①唯吳書僅見傳鈔殘帙，莊書亦未有梓本，餘咸世所通行，故疏中並唯箸姓名，不詳篇目也。至如許珩《注疏獻疑》之疏淺，莊有可《指掌》之武斷，若斯之屬，雖覽涉所及，亦無譏焉。間有未允，則略爲辨證，用釋疑悟。宋元諸儒說，於周公致太平之迹，推論至詳，而於周制漢詁，或多疏繆，今所摭擇，百一而已。宋元迄今，訓釋既多，唯擇其義據通深者錄之。或一條之中，是非錯出，則爲芟剝瑕類，以歸純

①「書」，原作「經」，今據黃氏原書名改。

粹。凡有繆迕，悉不暇論也。

天筭之學，古疏今密。然此經遠出周初，鄭詁如圜率則徑一圍三，天行則四游升降，並據《九章》、《考靈曜》，雖法數疏闊，而以古術釋古經，致爲塙當。今疏惟《考工》一篇，輪蓋周徑，校密率於圜觚，柯櫛倨句，證弧角於西筭；餘咸據古毖緯史志及唐以前筭經占經爲釋。後世新法，古所未有，不可以釋周經及漢注也。如鄒伯奇《學計一得》，以西法推《大司徒》土圭測景，謂非營維時實測。雖據密率，然非周漢人所知也。

二鄭釋經，多徵今制，攷之馬、班史志，衛、應官儀，率多符合。良以舊典隊文，留遺因襲，時代匪遙，足相比況。晉宋而降，去古彌遠，政法滋更；北周、李唐，建官頒典，雖復依放六職，而揆之禮經，多不相應。故此疏於魏晉以後儀制，槩不援證。惟州國

山川，宜詳因革，故職方輿地，備釋今名，以昭徵實之學。

舉證古書，咸揭篇目，以示審塙。所據或宋元舊槧，或近儒精校，擇善而從，多與俗本不同。其文義殊別，有關指要者，則於疏中特箸某本，非恒例也。佚書則咸詳根氏，或兩書同引，而互有省改，宜兼采者，則兩箸之。用懲臆造，兼資覆勘。近代佚書輯本甚夥，然多舛誤難據。若劉逢祿《論語述何》，以何晏《論語集解》爲何休說佚文，乃沿《北堂書鈔》陳禹謨本之誤。陳氏《詩疏》以《儀禮經傳通解》說五門制爲《尚書大傳》佚文，乃沿董豐垣輯本《書傳》之誤。並由討覈不審，故有茲失。昔儒說解，援據古籍，或尚沿俗本及刪改舊文，義旨未備者，今並檢元書勘正，此迺校讐，非改竄也。

周禮正義卷一

天官冢宰第一 《鄭目錄》云：「象天所立之官。冢，大

也。宰者，官也。天者，統理萬物，天子立冢宰使掌邦治，亦所以總御衆官，使不失職。不言司者，大宰總御衆官，不使主一官之事也。」【疏】「天官冢宰第一」者，陸氏《釋文》云：「本或作『冢宰上』，非。餘卷放此。」案：《漢書·藝文志》云：「《周官經》六篇」，此其舊題也。《漢志》著錄本於劉歆《七略》，是西漢經本皆官別爲篇。東漢以後，賈、馬諸儒爲之傳注，每篇析爲二卷，至於篇題，相承無改。鄭君作注，揭署亦同。故《士冠禮》賈疏引鄭序云「凡著《三禮》七十二篇」。蓋合《儀禮》十七篇、《禮記》四十九篇數之。厥後陸音、賈釋及唐開成、宋嘉祐兩石經，錄目並同。《釋文》所載或本，篇別上下而無「第一」之題，蓋傳錄者所改易，非周經漢注之舊。故陸、賈諸儒並不從也。「鄭目錄」者，《隋書·經籍志》云：「《三禮目錄》一卷，鄭玄撰。」《唐書·經籍志》同。

故與經注別行，宋以後單行本久佚。此《周禮目錄》六篇，賈氏於六官篇首具列舊文，爲之疏義，今亦據而釋焉。云「象天所立之官」者，六官分象天地四時，冢宰爲六官之首，總建六典，故象天也。云「冢，大也」者，《爾雅·釋詁》文。《尚書·周官》孔穎達疏引馬融《周禮注》同。賈疏云：「下注對大宰，則云冢者大之上，此不對大宰，故云冢大也。」云「宰者官也」者，《說文·宀部》云：「宰，皐人在屋下執事者。」引申之，凡官吏皆得稱宰。此經有大宰、小宰、宰夫、內宰、里宰，《春秋》卿大夫家臣采邑之長，亦多稱宰，則宰之名通於尊卑矣。《春秋繁露·三代改制質文篇》說文王受命改制之事，云「名相官曰宰」。據此，是相官名宰，始於周代。《曲禮》云：「天子建天官先六大，曰大宰、大宗、大史、大祝、大士、大卜，典司六典。天子之五官，曰司徒、司馬、司空、司士、司寇，典司五衆。」大宰不與五官同舉，鄭注以爲並殷制。然孔穎達疏引《鄭志》，崇精問焦氏云：「鄭云三王同六卿，殷應六卿，此云五官，何也？」焦氏答曰：「殷立天官與五行，其取象異耳。」是鄭意殷五官亦並大宰爲六卿，大宰殷時已爲天官，總攝六職；董子以相官名宰，爲周之改制，殆未足信。《太平御覽·職

官部《引仲長統》昌言云「冢宰，堯官也」，亦不知何據。班固《白虎通義·爵篇》云：「所以名之爲冢宰何？冢者，大也。宰者，制也。大制事也。」《書疏》引馬融云：「冢，大也。宰，治也。大治者，兼萬事之名也。」《公羊》僖九年何休注，《呂氏春秋·季秋紀》、《淮南子·時則訓》高誘注，並訓宰爲治，與馬說同。《釋文》引干寶《周禮注》云：「濟其清濁，和其剛柔，而納之中和曰宰。」諸家之說，並偏舉一端，不若鄭義之闡通也。云「天者統理萬物，天子立冢宰，使掌邦治，亦所以總御衆官，使不失職」者，明冢宰象天，取兼總六職之義。《荀子·王制篇》云：「本政教，正法則，兼聽而時稽之，度其功勞，論其慶賞，以時慎修，使爲吏免盡，而衆庶不偷，^①冢宰之事也。」云「不言司者，大宰總御衆官，不使主一官之事也」者，《春秋繁露·五行之義篇》云：「人官之大者，不名所職，相其是矣。」大宰即王之相，故亦不以職事名也。賈疏云：「此官不言司，對司徒、司馬、司寇、司空皆云司，以其各主一官，不兼羣職，故言司。此天官則兼攝羣職，故不言司也。若然，則春官亦不言司者，以其祭祀鬼神，非人所主，故亦不言司也。」

周禮【疏】「周禮」者，全經之大名也。漢以前經本，並小

題在上，大題在下，故此題在篇第下。陸氏《毛詩釋文》云「馬融、盧植、鄭玄注《三禮》，並大題在下」是也。此經，《史記·封禪書》、《漢書·禮樂志》及《河間獻王傳》，並稱《周官》。《藝文志》本於《七略》，則稱《周官經》。斯蓋西漢舊題。《隋書·經籍志》云「《周官》，蓋周公所建官政之法」，是也。若鄭衆以爲即《尚書·周官》，則賈疏引馬融及鄭序，已席其失矣。其曰「周禮」者，荀悅《漢紀·成帝篇》云：「劉歆以《周官經》六篇爲周禮，王莽時，歆奏以爲禮經，置博士。」《釋文·敘錄》亦云：「王莽時，劉歆爲國師，始建立《周官經》爲《周禮》。」案：《漢書·王莽傳》，歆爲國師，在始建國元年；而居攝三年九月，歆爲義和，與博士諸儒議莽母功顯君服，已云發得《周禮》，以明殷監。又引《司服職》文，亦稱《周禮》。然則歆建《周官》以爲《周禮》，疑在莽居攝、歆爲義和以前。陸謂在爲國師以後，未得其實。通覈諸文，蓋歆在漢奏《七略》時，猶仍《周官》故名，至王莽時，奏立博士，始更其名爲《周禮》，殆無疑義。《左》文十八年傳，季文子曰：「先君周公制周禮曰：則

①「庶」，原作「度」，今據楚本改。

以觀德，德以處事，事以度功，功以食民。」又閔元年傳，齊仲孫湫曰：「魯猶秉周禮。」昭二年傳，晉韓起見《易象》與《魯春秋》，曰：「周禮盡在魯矣。」歆蓋以《周官》故名與《尚書》淆混，而此經為周公遺典，與《士禮》同為正經，因采左氏之文，以為題署，義實允當。東漢之初，杜、馬諸儒，咸傳歆學。鄭序謂鄭少贛、鄭仲師、衛敬仲、賈景伯、馬季長，皆作《周禮》解詁，而馬氏自序則稱《周官傳》，鄭仲師《諸子》、《帙氏》兩注亦稱《周官》。諸家解詁久佚，其題《周禮》與否，今無可質證。若鄭君作注，則正題《周禮》，故《冢宰》注云：「周公居攝，而作六典之職，謂之《周禮》。」又《冬官目錄》云：「古《周禮》六篇畢矣。」其二《禮》之注，援舉此經，咸不云《周官》。《隋經籍志》載漢晉諸家注，並題《周官禮》，蓋唐人兼采二名，用以著錄，非其舊題。要《周禮》之目，始於劉歆，而定於東漢經師，其輾躓固可尋也。又《禮器》云：「經禮三百，曲禮三千。」鄭彼注云：「經禮謂《周禮》也，《周禮》六篇，其官有三百六十。曲猶事也，事禮謂《今禮》也。」案：鄭意蓋以此經為經禮，《儀禮》為曲禮。《曲禮》孔疏云：「《周禮》見於經籍，其名異者有七處。《孝經說》云『禮經三百』，一也。《禮器》云『經禮三百』，二

也。《中庸》云『禮儀三百』，三也。《春秋說》云『禮義三百』，四也。《禮說》云『有正經三百』，五也。《周官外題》謂為《周禮》，六也。《漢藝文志》云『《周官經》六篇』，七也。七者皆云三百，故知俱是《周官》。」今案：《漢藝文志》亦云：「禮經三百，威儀三千。」顏師古注從韋昭說，亦以禮經為《周禮》。又引臣瓚云：「《禮經》三百，謂冠昏吉凶。《周禮》三百，是官名也。」瓚說最析，足正鄭、韋之誤。蓋《周禮》乃官政之法，《儀禮》乃禮之正經，二經並重，不可相對而為經曲。《中庸》禮儀、威儀，咸專屬《禮經》，與《周禮》無涉。《孝經》《春秋》《禮說》所云禮經、禮義、正經者，亦無以定其必為此經。鄭、韋、孔諸儒，並以三百大數巧合，遂為皮傳之說，殆不足馮。《荀子·正名篇》云：「刑名從商，爵名從周。」楊倞注云：「爵名謂五等諸侯及三百六十官也。」然則秩官之制，莫備於周。此經建立六典，洪纖畢貫，精意眇指，彌綸天地，其為西周政典，焯然無疑。故劉歆以為周公致太平之道，鄭申其說，定為周公攝政六年所制，具詳後注。至其傳授耑緒，則賈《序廢興》引馬融傳云：「秦自孝公已下，用商君之法，其政酷烈，與《周官》相反。故始皇禁挾書，特疾惡，欲絕滅之，搜求焚燒之

獨悉，是以隱藏百年。孝武帝始除挾書之律，開獻書之路，既出於山巖屋壁，復入於祕府，五家之儒，莫得見焉。至孝成皇帝，達才通人劉向、子歆，校理祕書，始得列序，著於錄略。然亡其《冬官》一篇，以《考工記》足之。時衆儒並出共排，以爲非是。唯歆獨識，其年尚幼，務在廣覽博觀，又多銳精於《春秋》。末年，乃知其周公致太平之道，迹具在斯。奈遭天下倉卒，兵革並起，疾疫喪荒，弟子死喪。徒有里人河南緱氏杜子春尚在，永平之初，年且九十，家於南山，能通其讀，頗識其說，鄭衆、賈逵往受業焉。衆、逵洪雅博聞，又以經書記轉相證明爲解，逵解行於世，衆解不行。兼攬二家爲備，多所遺闕。然衆時所解說，近得其實，獨以《書序》言成王既黜殷命，還歸在豐，作《周官》，則此《周官》也，失之矣。逵以爲六鄉大夫則冢宰以下，及六遂爲十五萬家，緇千里之地，甚謬焉。此比多多，吾甚閔之久矣。」又云：「至六十，爲武都守。郡小少事，乃述平生之志，著《易》、《尚書》、《詩》、《禮》傳，皆訖。惟念前業未畢者唯《周官》，年六十有六，目瞑意倦，自力補之，謂之《周官傳》也。」案：賈所引馬傳，蓋即《周禮傳序》之佚文。其言《周官》晚出，五家之儒莫得見者，五家蓋謂

高堂生、蕭奮、孟卿、后倉、戴德、戴聖，《禮記正義》孔序引《六藝論》所謂高堂生及五傳弟子是也。馬序所述此經隱顯原流，最爲綜析，且去古未遠，當得其實。《漢書·河間獻王傳》云：「獻王所得書，皆先秦舊書，《周官》、《尚書》、《禮》、《禮記》、《孟子》、《老子》之屬。」攷獻王以孝景前二年立，立二十六年，武帝元光五年薨。然則獻王之得《周官》，與《周官》之人祕府，不知其孰先孰後，要與馬序所云武帝時始出之語不相牾也。《釋文·敍錄》載或說云：「河間獻王開獻書之路，時有李氏上《周官》五篇，失《事官》一篇，乃購千金，不得，取《考工記》以補之。」《隋經籍志》云：「李氏上於河間獻王，獻王補成，奏之。」杜佑《通典·禮篇》說同。《左傳序》孔疏亦云：「漢武帝時河間獻王獻《左氏》及《古文周官》。」此則祕府之本，即獻王所奏，但馬序絕未之及，不知果足馮否。至馬序云「出山巖屋壁」，祇謂埋藏荒僻，與淹中孔壁絕無關涉。《釋文·敍錄》引鄭《六藝論》云：「後得孔氏壁中、河間獻王古文《禮》五十六篇，《記》百三十一篇，《周禮》六篇。」審繹鄭君論意，蓋因古《禮》出於孔壁，《禮記》、《周禮》則得之河間，故兼游二原，不分區畛。又云《周禮》六篇者，亦由渾舉大數，《冬

官闕篇，偶未析別。鄭君禮學，受之馬氏，鄭《論》所說，與馬序固無戾也。而《曲禮》孔疏乃謂《六藝論》云：《周官》壁中所得六篇，《後漢書·儒林傳》亦謂孔安國獻《禮古經》五十六篇及《周官經》六篇，斯並誤會鄭旨，妄滋異論。《太平御覽·學部》引楊泉《物理論》云：「魯恭王壞孔子舊宅，得《周官》，闕，無《冬官》，漢武購千金而莫有得者，遂以《考工記》備其數。」楊氏疑亦因《六藝論》文，妄撰此說。《漢書·藝文志》、《楚元王傳》、劉歆《讓太常博士書》及許君《說文敍》，備舉孔壁所得經傳，而並無《周官》，足證范蔚宗及楊泉之誤。況武帝本不信此經，購補之事，必是虛妄。《禮器》孔疏又謂，漢孝文帝時，求得《周官》，不見《冬官》一篇，乃使博士作《考工記》補之。此尤繆悠之說，絕無根據者也。惟《漢禮樂志》載孝文時，得魏文侯樂人竇公，獻其書，乃《周官·大宗伯》之「大司樂」章。是時此經未出，而得以校竇公之書者，考《漢藝文志》，說河間獻王與諸儒采《周官》、諸子作《樂記》，劉向《別錄》亦載獻王所修《樂記》，其第二十二篇曰《竇公》。是蓋竇公獻書雖當孝文，逮獻王得經後，用相勘驗，始知其原本。是則獻之與校，本不同時，不得據此而疑孝文時已得《周官》。

也。此經在漢為古文之學，故《說文敍》稱《周官》為古文，《五經異義》亦多稱古《周禮》說。書既晚出，西漢之世，絕無師說，表章之功，實賴向、歆父子。東漢之初，博士罷廢。袁宏《後漢紀》載章帝建初八年，《周官》與《古文尚書》、《毛詩》同置弟子，厥後傳授漸盛。而今文經師，若何休、臨碩之徒，並發難端，競相排席。唐趙匡《五經辨惑》、陸淳《春秋纂例》復謂此經為後人附益。宋元諸儒，重性貽謬，異論彌夥。汪中云：「漢以前《周官》傳授原流，皆不能詳，故為衆儒所排。攷之於古，凡得六徵。《逸周書·職方篇》即《夏官·職方職》文，一也。《藝文志》：六國之君，魏文侯最為好古。孝文時，得其樂人竇公，獻其書，乃《周官·大宗伯》之「大司樂」章也。二也。《大戴禮·朝事》載《典瑞》、《大行人》、《小行人》、《司儀》四職文，三也。《禮記·燕義》、《夏官·諸子職》文，四也。《內則》「食齊視春時」以下，《天官·食醫職》文；「春宜羔豚膳膏薺」以下，《庖人職》文；「牛夜鳴則廋」以下，《內饗職》文，五也。《詩·生民》傳，「嘗之曰泣卜來歲之芑」以下，《春官·肆師職》文，六也。遠則西周之世，王朝之政典，大史所記，及列國之官世守之以食其業，官失而師儒傳之，七十子後學

者繫之於六藝。其傳習之緒，明白可據如是，而以其晚出疑之，斯不學之過也。若夫古之典籍，自四術以外，不能盡人而誦習之，故孟子論井地爵祿，漢博士作《王制》，皆不見《周官》，不可執是以議之也。古今異宜，其有不可通者，信古而闕疑可也。」案：汪說最允。今檢校周秦先漢諸書，《毛詩傳》及《司馬法》與此經同者最多，其它文制契合經傳者尤衆，難以悉數。然則其爲先秦古經，周公致太平之法，自無疑義。而俗儒不寤，猶復妄有詰難，皆鄉壁虛造不經之論，等諸自郢，蓋無譏焉。

鄭氏注【疏】范氏《後漢書》云：「鄭玄字康成，北海高密人也。少造太學受業，師事京兆弟五元，先通《京氏易》、《公羊春秋》、《三統歷》、《九章算術》。又從東郡張恭祖，受《周官》、《禮記》、《左氏春秋》、《韓詩》、《古文尚書》。西入關，因涿郡盧植，事扶風馬融。公車徵爲大司農，以病自乞還家。建安五年卒。凡玄所注《周易》、《尚書》、《毛詩》、《儀禮》、《禮記》、《論語》、《孝經》、《尚書大傳》、《中候》、《乾象歷》，又著《天文七政論》、《魯禮緯稽義》、《六藝論》、《毛詩譜》、《駁許慎五經異義》、《答臨孝存周禮難》，凡百餘萬言。」案：本傳載鄭諸經注，

《儀禮》當作《周禮》，其云《禮記》，則通《禮經》及《小戴記》言之。今本乃俗儒臆改，非其舊也。王溥《唐會要》司馬貞《孝經鄭注議》引鄭自序云：「遭黨錮之事，逃難注《禮》。」則鄭注《三禮》，並在遭黨錮時。賈《序廢興》引鄭序云：「世祖以來，通人達士大中大夫鄭少贛及子大司農仲師、故議郎衛次仲、侍中賈君景伯、南郡太守馬季長，皆作《周禮》解詁。」又云：「玄竊觀二三君子之文章，顧省竹帛之浮辭，其所變易，灼然如晦之見明，其所彌縫，奄然如合符復析，斯可謂雅達廣攬者也。然猶有參錯，同事相違，則就其原文字之聲類，考訓詁，摭祕逸。謂二鄭者，同宗之大儒，明理於典籍，恠識皇祖大經《周官》之義，存古字，發疑正讀，亦信多善，徒寡且約，用不顯傳於世。今讀而辨之，庶成此家世所訓也。」又云：「斯道也，文武所以綱紀周國，君臨天下，周公定之，致隆平龍鳳之瑞。」案：此鄭《周禮序》佚文，《詩·鄭譜序》孔疏所云「鄭於《三禮》、《論語》爲之作序」是也。舊蓋附《三禮目錄》，今亦並佚。賈氏所引，亦非全文，又與賈辨證語淆混莫辨。今稽覈文例，審定錄之。據《禮》序所述，則鄭本從張恭祖受此經，而所見解說，則有二鄭、衛、賈、馬五家之學。蓋此經自劉歆立博士，

至東漢初，而其學大興。《漢藝文志》有《周官傳》四篇，不著撰人，疑即歆所傳也。歆傳杜子春，子春傳鄭興、賈逵，而興傳其子衆，衆又自學於子春。故《釋文·敘錄》云：「杜子春受業於歆，還家以教門徒，好學之士鄭興父子等多往師之。」《後漢書·賈逵傳》又云：「父徽，從劉歆兼習《周官》，逵於章帝建初元年，詔令作《周官解詁》。」是劉歆別授賈徽，徽子逵又傳徽之學。然則逵雖受業杜君，亦自受其父學，與鄭仲師同也。鄭君此經之學雖受之張氏，然鄭序不與二鄭、衛、賈、馬諸君並舉，蓋唯有傳授，無訓釋之書。而《後漢書·董鈞傳》又云「鄭衆傳《周官經》，馬融作傳，授鄭玄」，則鄭又別傳馬氏之學。羣書援引馬傳佚文，與鄭義往往符合，而今注內絕無揭著馬說者，蓋漢人最重家法，凡稱述師說，不嫌蹈襲，故不復別白也。鄭所述舊說，惟杜子春、鄭少贛、仲師三家最多，自序所謂「二鄭存古字，發疑正讀，亦信多善，今讀而辨之」者也。至賈景伯說見於注者，止《韞人》一事。或以賈、馬說解，其時盛行，故不備述，杜、鄭之義，不顯傳於世，故甄采較詳與？又西漢傳注，皆與經別行。《詩·國風·周南》孔疏引馬融《周禮注》云：「欲省學者兩讀，故具載本文。」此蓋亦馬序

佚文。據其所說則馬氏解詁，始以注附經，鄭君作注，實沿馬例。本傳載鄭又著《答臨孝存周禮難》。賈《序廢興》云：「林孝存以爲武帝知《周官》末世瀆亂不驗之書，故作十論七難以排棄。何休亦以爲六國陰謀之書。唯有鄭玄徧覽羣經，知《周禮》者乃周公致太平之迹，故能答林碩之難，義得旁通。」今案：臨林字通。《後漢書·孔融傳》、《三國志·魏志》裴松之注引《續漢書》，並云北海臨孝存，孝存即碩字也。碩與鄭爲同里後進，而所學殊異，乃妄奮論難，排竿古經。鄭隨事規駁，持論尤正。其書久佚。今惟《女巫》及《夏官·敘官》賈疏、《詩·衛風·伯兮》、《大雅·棫樸》、《禮記·王制》孔疏，引其佚文各一事，餘並不傳，莫詳其說。馬、鄭之後訓釋《周禮》者，《釋文·敘錄》所載，有王肅注十二卷，干寶注十三卷。《隋志》又有伊說注十二卷，崔靈恩集注二十卷。今亦並佚。馬傳干注，羣書間有徵引，孤文碎義，無關指要。惟鄭注博綜衆家，孤行百代，周典漢詁，斯其淵藪矣。

惟王建國，建，立也。周公居攝而作六典之職，謂之《周禮》，營邑於土中。七年，致政成王，以此禮授之，

使居維邑治天下。《司徒職》曰：「日至之景尺有五寸，謂之地中，天地之所合也，四時之所交也，風雨之所會也，陰陽之所和也，然則百物阜安，乃建王國焉。」【疏】「惟王建國」者，此以下《天官》一篇之序目也。《釋文》引干寶云：「王，天子之號，三代所稱。」《說文·口部》云：「國，邦也。」案：《大宰》注云：「大曰邦，小曰國，邦之所居亦曰國。」此「建國」即建「邦之所居」，謂營都也。周公制官政之法，在營維之後，故五篇之敘並以建國發端。注云「建，立也」者，《大宗伯》、《量人》注同。《說文·廌部》云：「建，立朝律也。」引申之，凡立皆爲建。云「周公居攝而作六典之職，謂之《周禮》」者，此鄭依劉歆說，以《周禮》爲周公致太平之道也。《明堂位》云：「武王崩，成王幼弱，周公踐天子之位，以治天下。六年，朝諸侯於明堂，制禮作樂，頒度量，而天下大服。」鄭意作六典之職，即制禮之一端也。《明堂位》孔疏云：「周公制禮攝政，孔鄭不同。孔以武王崩，成王年十三。至明年，攝政，管叔等流言，故《金縢》云：『武王既喪，管叔及其羣弟流言於國曰：公將不利於孺子。』時成王年十四，即位。攝政之元年，周公東征管蔡，後二年，克之，故《金縢》云：『周公居東二年，則罪人斯得。』除往年，時成王年十六，攝政之三年也，故《詩序》云：『周公東

征三年而歸。」攝政七年，營洛邑，封康叔，而致政，時成王年二十，故孔注《洛誥》以時成王年二十是也。鄭則以爲武王崩，成王年十歲。《周書》以武王十二月崩，至成王年十二，十二月喪畢，成王時即位，稱己小，求攝，周公將代之，管蔡等流言，周公懼之，辟居東都。故《金縢》云：「武王既喪，管叔等流言，周公乃告二公曰：我之不辟，無以告我先王。」「既喪」謂喪服除，「辟」謂辟居東都。時成王年十三。明年，成王盡執拘周公屬黨，故《金縢》云「周公居東二年，則罪人斯得」，罪人謂周公屬黨也。時成王年十四。至明年秋大熟，有雷風之異。故鄭注《金縢》云：「秋大熟謂二年之後。」明年秋，迎周公而反，反則居攝之元年，時成王年十五，《書傳》所謂「二年救亂」。明年誅武庚、管、蔡等，《書傳》所謂「二年克殷」。明年自奄而還，《書傳》所謂「三年踐奄」。四年封康叔，《書傳》所謂「四年建侯衛」，時成王年十八也。故《康誥》云「孟侯」，《書傳》云：「天子太子十八稱孟侯。」明年營洛邑，故《書傳》云「五年營成周，六年制禮作樂，七年致政於成王」年二十一，明年乃即政，時年二十二也。案：《詩·豳譜》孔疏引王肅《金縢》注云：「武王九十三而崩，其明年稱元年，周公攝政，遭流言，作《大誥》而東征。二年，克殷，殺管蔡。三年而歸，制禮作樂，出入四年，

至六年而成。」即《書》偽孔傳所本。鄭說本於伏傳。然伏傳所云「一年救亂」，即指武王崩之次年；「六年制禮作樂」，即救亂後六年。鄭君則謂武王崩，三年喪畢，周公辟居東都二年，至第三年，成王迎周公反而居攝，是為周公居攝元年，至六年而制禮作樂。則六年為武王崩後之十年，說與伏傳又異。考《史記·周本紀》及《魯世家》，並不云周公辟居東都，反而後居攝。《金縢》「居東二年，^①罪人斯得」，即《大傳》所云「二年克殷」，罪人自指武庚、管、蔡而言。鄭以居東二年在居攝之前，說殊未安。竊謂周公攝政之年，當以伏傳為正，鄭王之說，並失之矣。云「營邑於土中」者，釋經「建國」即指營雒之事也。《說文·邑部》云：「邑，國也。」營邑與建國義同。賈疏云：「即《召誥》云：『王來紹上帝，自服於土中』是也。立國必居地中者，案：《尚書·康誥》云：『惟三月哉生魄，周公初基，作新大邑于東國洛。』鄭注云：『岐鎬之域，處五岳之外。周公為其於政不均，故東行於洛邑，合諸侯，謀作天子之居。』據鄭此言，則文武所居，為非地中，政教不均，故居地中也。案：桓二年《左氏傳》云「昔武王克商，遷九鼎於洛邑」，則居洛本是武王之意。至成王、周公時，恐天下為疑，更與諸侯謀定之也。」云「七年致政成王」者，亦《明堂位》文。鄭彼注云：

「致政，以王事歸授之王。」賈疏云：「必七年者，《洛誥》云：『誕保文武受命惟七年。』鄭注以文武受命七年而崩，周公不敢過其數也。」云「以此禮授之，使居雒邑治天下」者，《釋文》云：「雒，水名也。本作『洛』，後漢都洛陽改為雒。」案：雒邑之雒，不當作洛，雒非後漢所改，詳《職方氏》疏。賈疏云：「此鄭解周公制禮，必兼言建國於洛邑之意。案《尚書·洛誥》云『周公曰，孺子，來相宅，亂為四方新辟』，是使居洛邑也。下云『惠篤敘，無有違自疾』，是授以此禮使行之也。」案：賈說《洛誥》，蓋櫟括鄭《書注》義。

《洛誥》：「周公曰，王肇稱殷禮。」孔疏引鄭《書注》云：「王者未制禮樂，恒用先王之禮樂。」孔申其義云：「周公制禮樂既成，不使成王即用周禮仍用殷禮者，欲待明年即政，告神受職，然後班行《周禮》。班訖，始得用周禮。故告神且用殷禮也。」據鄭義，《洛誥》是周公攝政七年所作，而尚稱殷禮，則周公作《周禮》雖在六年，其班行則在致政時，故《明堂位》孔疏亦謂成王即位乃用周禮是也。雒邑即王城。伏傳云：「營成周者，下都也。」《洛誥》：「周公曰：予惟乙卯朝至于洛師，我乃卜澗水東，澗水西，惟洛食。我又卜澗

① 「二」，原作「三」，今據楚本改。

水東，亦惟洛食。」《詩·王譜》孔疏引鄭《書注》云：「灋水東既成，名曰成周，今洛陽縣是也。召公所卜處，名曰王城，今河南縣是也。」《御覽·州郡部》引《帝王世紀》云：「周后稷始封邰，及公劉徙邑於豳。至太王避狄，徙邑於岐山之陽，南有周原，故始改號曰周。王季徙程。暨文王受命，徙都於鄠。武王自鄠居鎬，諸侯宗之，是為宗周。及武王伐紂，營洛邑而定鼎焉。周公相成王，以鄠鎬偏處西方，職貢不均，乃使邵公卜居洛水之陽，以即土中。於是遂築新邑，營定九鼎，以為王之東都洛邑，是為王城，名曰西周。故《公羊傳》曰：『王城者何？西周也。成周者何？東周也。』《地理志》：『王城本郊廓之地。是以或謂之郊廓，故《春秋傳》曰『成王定鼎於郊廓』，河南是也。成王既卜營洛邑，建明堂，朝諸侯，復還鄠鎬，故《書序》曰『成王既黜殷命，還歸在鄠』。至懿王徙犬丘，平王即位，徙居洛邑。及敬王避子朝之亂，東居成周。至赧王又徙居西周而失位。」案：皇甫謐所述，最為詳析。蓋周公營王城，將使成王遷都之。然成王不果遷，仍居鎬京。至平王東遷，乃居之。其成周本營以遷殷民。至敬王，始從王城遷成周，遂為王都。至赧王，復徙都王城而亡。王城於《職方氏》九州，在豫州之域，在今河南洛陽縣城內西偏，成周在縣城東二十

里。引《司徒職》文者，證建國即營雒也。並詳本職。賈疏云：「鄭引此者，破賈馬之徒建國為諸侯國。」詒讓案：《考工記》「匠人建國」，注云「立王國若邦國者」，是建國本含兩義。鄭以下文云「辨方正位」，故以此建國為營雒，不從賈馬說也。辨方正位，辨，別也。鄭司農云：「別四方，正君臣之位，君南面臣北面之屬。」玄謂《考工》：「匠人建國，水地以縣，置槷以縣，視以景。為規識日出之景與日入之景。晝參諸日中之景，夜考之極星，以正朝夕。」是別四方。《召誥》曰：「越三日戊申，大保朝至于雒，卜宅，厥既得卜，則經營。越三日庚戌，大保乃以庶殷攻位於雒汭。越五日甲寅，位成。」正位謂此定宮廟。【疏】「辨方正位」者，《釋文》云：「辨，本亦作辯。」盧文弨云：「《說文》：『辨，判也。辯，治也。』後來多通用。」詒讓案：辨正字，辯借字。魏徵《羣書治要》引亦作「辯」。《文選》張衡《東京賦》云「辯方位而正則」，正本此經。《呂氏春秋·慎勢篇》云：「古之王者，擇天下之中而立國，擇國之中而立宮，擇宮之中而立廟。」《晏子春秋·內篇·雜下》云：「齊景公新成柏寢之臺，師開曰：『室夕。』公召大匠曰：『室何為夕？』大匠曰：『立室以宮矩為之。』於是召司空曰：『立宮何為夕？』司空曰：『立宮以城矩為之。』然則辨方正位者，所以

定城矩與宮矩，使無朝夕也。互詳《大司徒》、《匠人》疏。注云「辨，別也」者，《小爾雅·廣言》文。《賈師》、

《大司馬》注並同。鄭司農云「別四方」者，《後漢書·鄭興傳》云：「興子衆，字仲師。建初六年，代鄧彪爲大司農。」

案：仲師作《周禮解詁》，見鄭敘。與鄭大夫興爲二鄭。敘所謂「同宗之大儒」，故稱官以致敬。司農亦釋辨爲別，與後鄭說同。《太平御覽·皇親部》引干寶注云：「辨方謂別東西南北之名，以表陰陽也。」干亦從二鄭義。云「正君臣之位，君南面、臣北面之屬」者，先鄭以正位爲正朝位。《御覽》引干注云：「正位謂若君南面當陽，臣北面即陰，居后北宮以體太陰，居太子於東宮以位少陽之類。」說亦與先鄭同。後鄭不從。賈疏云：「案《易緯乾鑿度》云：『不易者，天在上，地在下，君南面，臣北面，父坐子伏。』司農據而言焉。」云「玄謂《考工》匠人建國，水地以縣，置槷以縣，視以景，爲規識日出之景與日人之景，畫參諸日中之景，夜考之極星，以正朝夕，是別四方」者，此後鄭讀辨先鄭義，故稱名以別之。先鄭釋辨方爲別四方，而不詳其法，後鄭引《匠人》文，增成其義。並詳本職。視，本職作眡，此引作視者，眡視古今字，經例用古字，注例用今字也。詳《大宰》疏。引《召誥》曰「越三日戊申，大保朝至于雒，卜宅，厥既得卜，

則經營」者，雒，僞孔本作「洛」，非，下並同。案：此即周公居攝五年營雒邑之事也。《召誥》上文云：「惟二月既望，越六日乙未，王朝步自周，則至于豐。惟太保先周公相宅，越若來三月，惟丙午朏。」僞孔傳云：「朏，明也。月三日，明生之名。三月丙午朏。於朏三日，三月五日。召公早朝，至于洛邑，相卜所居。其已得吉卜，則經營規度城郭、郊廟、朝市之位處。」云「越三日庚戌，大保乃以庶殷攻位於雒，越五日甲寅位成」者，於《書》作「于」。此經例用古字作「于」，注例用今字作「於」。此注引《書》，與上文于於錯出，疑鄭本通作於也。詳《醴人》疏。僞孔傳曰：「於戊申三日庚戌，以衆殷之民治都邑之位於洛水北，今河南城也。於庚戌五日，所治之位皆成。」孔疏引鄭《書注》云：「汭，隈曲中也。」云「正位謂此定宮廟」者，明此正位與《召誥》「攻位」「位成」義同，破先鄭正君臣朝位之說。匠人營國，左祖右社，面朝後市，即宮廟之位也。《書·盤庚下》篇云：「盤庚既遷，奠厥攸居，乃正厥位。」孔疏引鄭《書注》云：「正宗廟朝廷之位。」又《周書·作雒篇》云：「乃作大邑成周于土中，乃位五宮、大廟、宗宮、考宮、路寢、明堂。」足證營雒即正宮廟之位也。體國經野，體猶分也，經謂爲之里數。鄭司農云：「營國方九里，國中九經九緯，左

祖右社，面朝後市，野則九夫爲井，四井爲邑之屬是也。」
 【疏】「體國經野」者，方位既定，次乃分國野疆域，使內外別異也。

注云「體猶分也」者，《墨子·經上》篇云：「體分於兼也。」案：此據引申之義也。《說文·骨部》云：

「體，總十二屬也。」本無分義，以總爲一體，分爲衆體，展轉引申，亦得訓爲分，故云猶分也。凡杜鄭訓義之言「猶」者，並本訓不同，而引申假借以通其義。《釋文》引干注云：

「體，形體。」義本《遂人》。蓋分邦國之形體謂之體國，猶制四方之形體謂之形方，干義與此注亦相成也。《羣書治要》

注云：「體猶分邦畿之度。」亦與鄭義略同。云「經謂爲之

里數」者，《遂人》云：「以土地之圖經田野，造縣鄙形體之灋。」鄭彼注云：「經形體皆謂制分界也。」又《遂師》云「經

牧其田野」，注云：「經牧，制田界與井也。」此「經野」亦謂制其里數，爲之疆界，若方里爲井是也。《羣書治要》注

云：「經野，疆理其井廬也。」說亦略同。鄭司農云「營國方

九里，國中九經九緯，左祖右社，面朝後市」者，據《匠人》營國文。彼營國廟社朝市等，皆分別營之，即此所謂體國，故引以爲證。並詳本職疏。云「野則九夫爲井，四井爲邑之

屬是也」者，據《小司徒》文。此即經野爲之里數之事，故引以爲證，亦詳本職疏。賈疏云：「案《載師職》云：「家邑任

稍地，小都任縣地，大都任疆地。」是畿內鄉遂及四等公邑，皆爲溝洫法，無此方里爲井之事。家邑、小都、大都三等采地，乃有方里爲井之屬。但郊外曰野，大總言耳，散文國外則曰野，故《鄉大夫職》云「國中七尺，野自六尺」，是城外。

則經中野對國言之，謂國外則曰野，但鄭據《小司徒》成文而言。案：此野爲國城外至五百里疆之通稱，經野實兼溝洫、井田二法言之，先鄭偏舉一端以見義耳。又鄉遂以外

四等公邑亦當制井田，鄭、賈謂公邑無井田，非也。詳《小

司徒》、《匠人》疏。設官分職，鄭司農云：「置冢宰、司

徒、宗伯、司馬、司寇、司空，各有所職而百事舉。」【疏】「設

官分職」者，國野既分，又廣設百官府以爲治也。注鄭

司農云「置冢宰、司徒、宗伯、司馬、司寇、司空，各有所職而百事舉」者，《戰國策·秦策》高誘注云：「設，置也。」《說

文·言部》云：「設，施陳也。」《白部》云：「官，吏事君也。」

《爾雅·釋詁》云：「職，主也。」官，通公卿大夫士，謂治事

之人。職，通三百六十職，謂所主之事。《大宰》八法之「官

職」是也。^①以爲民極。極，中也。令天下之人各得其

①「法」，原作「則」，今據本書《大宰》改。

中，不失其所。【疏】注云「極，中也」者，《續漢書·五行志》劉昭注引《洪範五行傳》文，《臬氏》注同。《說文·木部》云：「極，棟也。」棟在室之正中，故引申之中並謂之極。云「令天下之人各得其中，不失其所」者，賈疏云：「案《尚書·洪範》云：『皇建其有極，惟時厥庶民於汝極。』謂皇建其有中之道，庶民於之取中；於下之人，各得其中，不失所也。」論讓案：極訓中，猶言中正。《漢書·兒寬傳》：「天子建中和之極。」顏師古注云「極，正也」，引《周禮》此文。顏訓與鄭義亦相成也。乃立天官冢宰，使帥其屬而掌邦治，以佐王均邦國。掌，主也。邦治，王所以治邦國也。佐猶助也。鄭司農云：「邦治謂摠六官之職也，故《大宰職》曰『掌建邦之六典，以佐王治邦國』。六官皆摠屬於冢宰，故《論語》曰『君薨，百官摠己以聽於冢宰』。言冢宰於百官無所不主。《爾雅》曰：『冢，大也。』冢宰，大宰也。」【疏】「乃立天官冢宰」者，賈疏云：「據下注而言，則此言冢宰者，據摠攝六職，若據當職則稱大宰也。」云「使帥其屬而掌邦治」者，《說文·自部》云：「帥，佩巾也。」《是部》云：「達，先道也。」凡經達領字，通段帥爲之。屬者，《說文·尾部》云：「屬，連也。」《釋名·釋親屬》云：「屬，續

也，恩相連續也。」^①此經官屬，亦謂同官尊卑以職事相連屬。六官並以正長帥領其屬官。大宰爲天官之正，天官全職咸屬焉。自小宰至胥徒，又爲當官之屬，大宰並帥領之也。賈疏云：「案《小宰》『六屬』而言，則此屬唯指六十官之屬也。掌邦治者，掌，主也。言主治則兼六官，以其五官雖有教、禮、政、刑、事不同，皆是治法也。」云「以佐王均邦國」者，《詩·小雅·節南山》云「秉國之均」，毛傳云：「均，平也。」賈疏云：「以大宰掌均節財用故也。《周禮》以『邦國』連言者，據諸侯也。單言『邦』單言『國』者，多據王國也。然不言『均王國』而言『均邦國』者，王之冢宰，若言王國，悉不兼諸侯；今言邦國，則舉外可以包內也。」注云「掌，主也」者，《小爾雅·廣言》文。云「邦治，王所以治邦國也」者，即本職云「佐王治邦國」是也。云「佐猶助也」者，《肆師》注義同。《說文》無佐字，《左部》云：「左，手相左助也。」佐即左之俗。左本訓手相助，引申之，凡助並謂之左。《廣雅·釋詁》云：「佐，助也。」鄭司農云「邦治謂摠六官之職也」者，摠，俗總字。冢宰雖專掌治職，而總攝六官，凡教、禮、政、刑、事五職，無所不統也。云「故《大宰職》

① 「連續」，原作「連屬」，今據楚本改。

曰，掌建邦之六典，以佐王治邦國」者，以《司徒·敘官》「掌邦教」等，五官各掌一典，惟大宰總建六典，明即總六官之職，故引以爲證。云「六官皆摠屬於冢宰，故《論語》曰，君薨，百官摠己以聽於冢宰，言冢宰於百官無所不主」者，明大宰雖帥本屬六十官，實則統屬六官也。「君薨百官摠己以聽於冢宰三年」，《論語·憲問篇》文。何晏《集解》引孔安國云：「冢宰，天官卿，佐王治者。」引之者，亦證六官總屬大宰之事。《白虎通義·爵篇》云：「所以聽於冢宰三年者何？以爲冢宰職在制國之用，是以由之也。」班說偏隘，非《論語》義。引《爾雅》曰「冢，大也」者，《釋詁》文。《書·舜典》孔疏引舍人注云：「冢，封之大也。」云「冢宰，大宰也」者，此云冢宰，本職作大宰，一官二名，故引《爾雅》而釋之。《鄭目錄》及《白虎通義》、《書疏》引馬融《周禮注》，並訓冢爲大。詳前疏。又《釋文》引鄭云：「宰，主也。」案：鄭全經六篇注，無宰主之訓。陸氏蓋以注有「冢宰於百官無所不主」之文，而推其義。

治官之屬：

大宰，卿一人；小宰，中大夫二人；宰夫，下大夫四人，上士八人，中士十有六人，

旅下士三十有一人，變冢言大，進退異名也。百官摠焉則謂之冢，列職於王則稱大。冢，大之上也。山頂曰冢。旅，衆也。下士，治衆事者。自大宰至旅下士，轉相副貳，皆王臣也。王之卿六命，其大夫四命，士以三命而下爲差。【疏】「治官之屬」者，自小宰至夏采，並屬於大宰，即《大宰》八法之「官屬」也。云「大宰卿一人」者，此以下敘治官之目。敘之通例，皆先揭官名，次陳爵等，次紀員數。「大宰」爲治官之正，「卿」其爵也。《說文·卯部》云：「卿，章也。六卿，天官冢宰，地官司徒，春官宗伯，夏官司馬，秋官司寇，冬官司空。」即據此經。《白虎通義·爵篇》云：「《王度記》曰：『天子冢宰一人，爵如天子之大夫。』」或曰：冢宰視卿，《周官》所云也。」班氏以《王度記》說與經不合，故兩存之。臧琳謂《白虎通·封公侯篇》引《別名記》，司馬爲天官，故謂冢宰非六卿之長，其爵但爲大夫，此蓋夏殷之制，與《周禮》不合。案：臧說近是。《左·定四年傳》，說成王時，周公爲大宰。又《書·顧命》，成王召六卿，僞孔傳說大保召公爲冢宰。《詩·小雅·十月之交》云「冢伯維宰」，《漢書·古今人表》作大宰冢伯，鄭《詩箋》亦以爲冢宰。又《春秋》桓四年經有宰渠伯糾，《左傳》僖五年有宰周公，亦曰宰孔，文二年有大宰王子虎，《國語·周語》有大宰忌父，

並即大宰卿也。云「小宰中大夫二人」者，治官之貳也。自此以下至旅下士，於大宰並爲當官之屬，爵位以等遞降，而員數則以次倍增。六官之屬皆如此。賈疏云：「小宰與大宰同名，大小爲異，故鄭注《禮記·王制》，引此六卿下中大夫十二人爲十二小卿。」云「宰夫下大夫四人」者，治官之攷也。賈疏云：「宰夫是大宰之考，謂若地官之考爲鄉師，春官之考爲肆師，夏官之考爲軍司馬，秋官之考爲士師，冬官之考爲匠師。以其掌事不與大官同，故異大官也。宰者，調和之名。夫者，治也。以其治此一官所主事也。」胡匡衷云：「宰夫四人，而《雜記》祫禮云「宰夫五人舉以東」者，宰夫下尚有上中下士也。」論讓案：大宰、小宰、宰夫，或單稱宰，詳《宰夫》疏。此經王官之爵凡七等：曰公，曰卿，曰中大夫，曰下大夫，曰上士，曰中士，曰下士，而無上大夫。沈彤云：「上大夫即孤卿也。《大戴禮記·盛德篇》云：「三少皆上大夫也。《王制》云：「諸侯之上大夫，卿。」天子亦然。」案：沈說是也。《士相見禮》云：「上大夫相見以羔。」注云：「上大夫，卿也。」孤即六卿之中執政者之稱，蓋無專職，亦無員數，而爵等則與卿同，故五官之敘不見，詳《掌次》疏。其命數則中下大夫亦同。《國語·周語》襄王曰「外官不過九品」者，疑即據七等之爵而益以孤與庶子。韋

昭注以爲九卿，未塙。又《左》桓三年傳，說侯國有上卿、下卿、上大夫。又成三年傳云：「次國之上卿，當大國之中，中當其下，下當其上大夫；小國之上卿，當大國之下卿，中當其上大夫，下當其下大夫。」則卿有上中下，大夫有上下而無中，並與此異。然成二年傳載晉三帥同三命，與《典命》公之卿三命文合，上大夫亦與此經中大夫相當，然則彼制與此經異而實同也。凡諸官中大夫，《書·牧誓》、《立政》謂之亞旅。僞孔傳云：「亞，次。旅，衆也。衆大夫，其位次卿。」《左傳》文十五年杜注云：「亞旅，上大夫也。」又成二年傳，魯賜晉三帥三命之服，亞旅皆一命之服，亦次於卿也。下大夫又謂之嬖大夫。《左》昭元年傳，鄭子產數子南曰：「子皙上大夫，女嬖大夫，而弗下之。」又《國語·吳語》「嬖大夫提鼓」，即《大司馬》旅帥下大夫執鰲是也。云「上士八人，中士十有六人」者，凡諸官上士，《王制》謂之元士，又謂之適士，中下士又謂之官師。《祭法》云：「適士二廟，官師一廟。」注云：「適士，上士也。官師，中士、下士。」《吳語》「官師撝鐸」，亦即《大司馬》兩司馬中士執鐸是也。杜預《春秋釋例》以官師爲上士、中士，恐非。上士或又謂之列士，詳後疏。凡大宰所屬，上士以下，亦繫宰爲稱。隱元年「天王使宰咺來歸惠公仲子之賵」，《公羊傳》云「宰，士

也」，是也。云「旅下士三十有二人」者，唐石經三十作「卅」，全經六篇並同，今從宋本。賈疏云：「凡官尊者少，卑者多，以其卑者宜勞，尊者宜逸，是以下士稱旅，以其理衆事，故特言旅也。」詒讓案：大宰下士又謂之宰旅，凡諸官下士或謂之庶士，並詳後疏。 注云「變冢言大，進退

異名也」者，以上云「佐王均邦國」，則稱冢宰，此敍官及本職，又變文稱大宰，五官咸無此例，故特釋之。云「百官摠焉，則謂之冢」者，《荀子·王制篇》楊注云：「總，領也。」冢宰雖爲天官卿，實總領六官之事，即上注云「六官皆總屬於冢宰」，是進異名也。云「列職於王則稱大」者，賈疏云：

「不總百官，與五卿並列，各自治六十官，則退異名也。若然，總百官則稱冢者，以其天官，象天覆萬物。案經《大宰職》曰：『凡邦之小治，冢宰聽之。』是專國小治而稱冢也。

《司書職》曰：『掌六典八法八則之貳，以詔王及冢宰。』是貳王事總衆職而稱冢也。又《宰夫職》曰：『乘其財用之出入，凡失財用物辟名者，以官刑詔冢宰而誅之。』是總衆官誅賞而稱冢也。又《司會職》曰：『以周知四國之治，以詔王及冢宰廢置。』是總四國之治而稱冢也。若主當官不兼他職則言大者，謂若下文大喪贊贈玉、含玉，賓客贊玉几、玉爵，祀五帝則泣卜，如此之類，與諸官並有事，則稱大

也。案：賈說是也。《宰夫》以官刑詔冢宰，則稱冢宰；而從大宰祗滌濯，則稱大宰。一職之中，二文殊別，其義尤顯較矣。又冢宰在王朝爲大宰之尊稱，而侯國亦以此稱上卿，故《聘禮》注云「侯國謂司徒爲宰」，而左《昭元年傳》趙文子亦稱鄭子皮曰冢宰，則猶言冢卿爾。云「冢，大之上也」者，謂冢既訓大，又有高而在上之義，爲大中之最上也。云「山頂曰冢」者，《爾雅·釋山》云：「山頂，冢。」《釋名·釋山》云：「山頂曰冢。冢，腫也，言腫起也。」此釋冢爲大之上之義。云「旅，衆也」者，《爾雅·釋詁》文，《掌次》及《司士》注並同。云「下士，治衆事者」者，《宰夫》八職，「四曰旅，掌官常以治數」。注云：「旅，辟下士也。」又《左》襄二十六年傳：「晉韓宣子聘於周，王使請事，對曰：晉士起將歸時事於宰旅。」杜預注云：「宰旅，冢宰之下士。言獻職貢於宰旅，不敢斥尊。」可與此互證。又《燕禮》、《大射儀》，士之外別有士旅食，即下府史及不命之士，與此旅下士異。云「自大宰至旅下士，轉相副貳，皆王臣也」者，莊存與云：「大宰爲正，小宰爲貳，宰夫爲攷，庶士爲股，庶人爲輔。」賈疏云：「大卿一人，小卿則二人，已下皆去上一倍者，是轉相副貳也。言王臣者，自士以上，得王簡策命之，則爲王臣也。對下經府史胥徒，不得王命，官長自辟除者，

非王臣也。」云「王之卿六命，其大夫四命」者，賈疏云：「《典命》文。大夫無中下之別。案《序官》則有中下大夫，則四命大夫自分爲中下，似若侯伯同七命，子男同五命，爵則有高下不同也。」云「士以三命而下爲差者，《大宗伯》注云：「王之上士三命，中士再命，下士一命。」是其差也。府六人，史十有二人，府，治藏；史，掌書者。凡府史皆其官長所自辟除。」疏「府六人，史十有二人」者，此以下陳大宰當官之屬，庶人給事者之員數也。此亦並屬宰夫，故《燕禮》云「宰夫有司薦」，注云：「宰夫之吏也。」即此。又《左》哀三年傳云：「命宰人出禮書。」杜注云：「宰人，冢宰之屬。」《國語·魯語》韋注云：「宰人，吏人也。」蓋亦即通大宰之屬吏言之。凡府史以下，亦謂之庶士。《祭法》「庶士，庶人無廟」，注云：「庶士，府史之屬。」《國語·魯語》云：「列士朝服，庶士以下各衣其夫。」韋注以列士爲上士，庶士爲下士，與鄭說不同。《詩·周南·葛覃》孔疏援鄭難韋，未知孰是也。注云「府，治藏者」者，《釋文》出「府藏」二字，疑陸本作「府治府藏」。案《宰夫》八職云「五曰府，掌官契以治藏」，則陸本非是。《說文·广部》云：「府，文書藏也。」《一切經音義》引《三蒼》云：「府，文書財物藏也。」是凡財物所藏，並謂之府。因之凡治藏之

吏，亦通謂之府也。又府與庫亦通稱。《檀弓》說趙文子所舉於晉國管庫之士七十有餘家。注云：「管庫之士，府史以下，官長所置也。管，鍵也。庫，物所藏。」管庫與治藏義略同，故鄭亦以府史爲釋也。云「史，掌書者」者，《宰夫》八職云：「六曰史，掌官書以贊治。」《說文·史部》云：「史，記事者也。」是史本記事之官，因之凡掌治文書之吏，亦通謂之史也。云「凡府史，皆其官長所自辟除」者，明府史即庶人在官者，不命於王也。官長，謂當官之長。《地官·敘官》注云：「自胥師以及司稽，皆司市所自辟除也。」又《士冠禮》注云：「有司，羣吏有事者，謂主人之吏，所自辟除府史以下。」然則辟除府史，皆當官之長主之，故《特牲饋食禮》注於士私臣，亦云「自己所辟除者」，是職長或爲士，亦得自辟除屬吏矣。《王制》注云：「庶人在官，謂府史之屬，官長所除，不命於天子國君者。」孔疏云：「官長謂冢宰爲天官之長，司徒爲地官之長；或若大府爲府藏官之長，大司樂爲樂官之長是也。」其說最析。賈疏乃云「官長謂一官之長，若治官六十，其下府史皆大宰辟召」，是謂非六官正長，不得辟除府史，失鄭旨矣。又府史班秩，在胥徒之上，《大宰》「施法於官府」所謂「置其輔」也。蓋選擇民之有才藝者充之，與胥徒給役者不同，故官長以禮辟除，明不以役

法徵發之也。凡辟除者，謂辟召除署。《漢書·景帝紀》云「初除之官」，顏注引如淳云：「凡言除者，除故官就新官也。」《王制》疏云：「謂所命之官除去其舊名籍。」賈疏則釋除為除其課役而使之。案：此府史，《大司徒》十二職事謂之「服事」，《鄉大夫職》云「國中服公事者皆舍」，則府史宜有除課役，然非此注辟除之義也。又案：府史與胥徒皆無爵，同為庶人在官者。析言之，則府史尊於胥徒，亦得與不命之士同稱士，故《燕禮》、《大射儀》謂之士旅食矣。賈疏又云：「《周禮》大例，皆府少而史多，而府又在史上。唯有御史百有二十人，特多而在府上。鄭云：『以其掌贊書數多也。』又有府兼有史，以其當職事繁故也。或空有史而無府者，以其當職事少，得史即足故也。至於角人、羽人等，直有府無史，以其當職文書少，而有稅物須藏之，故直有府也。腊人、食醫之等府史俱無者，以其專官行事，更無所須故也。《周禮》之內，唯有《天府》一官，特多於史，以其所藏物重故也。」王引之云：「《天官·掌次》府四人，史二人；《春官·鬱人》府二人，史一人；《司尊彝》府四人，史二人；《司几筵》府二人，史一人；《司服》府二人，史一人；《醫師》府四人，史二人；《典庸器》府四人，史二人。皆府多於史，而賈曰『唯有《天府》一官，府多於史』，則其餘皆

否。若如今本，《掌次》等官皆府多於史，賈氏不應獨舉《天府》一官。竊疑《掌次》等官，府四人史二人，府二人史一人，人數皆上下互譌，唐石經已如是。」胥十有二人，徒百有二十人。此民給徭役者，若今衛士矣。胥讀如謂，謂其有才知，為什長。【疏】「徒百有二十人」者，《說文·走部》云：「徒，步行也。」此徒亦步行給役者，故以為名。唐石經二十作「廿」，全經六篇並同。今從宋本。

注云「此民給徭役者」者，①徭，明閩刻注疏本作徭。案：徭即《說文·人部》徭字之隸變。《地官·敘官》、《大司徒》、《小司徒》、《鄉師》、《載師》注，並段繇為之。此作徭者，②徭之俗也。鄭以胥徒卑於府史，非官長所辟除，乃平民來應徵調，供公家徭役者。《鄉大夫》云：「國中自七尺以及六十，野自六尺以及六十有五，皆征之。」鄭司農云：「征之者，給公上事也。」《王制》孔疏引鄭《駁五經異義》云：「《周禮》所謂皆征之者，使為胥徒，給公家之事，如今之正衛耳。」是胥徒，國野之人來給役者也。賈疏云：「案下《宰夫》八職云『七曰胥，掌官敍以治敍，八曰徒，掌官令以徵

①「民」，原脫，今據注文補。

②「徭」，原作「徭」，今據楚本改。

令。鄭云：「治敘，次序官中，如今侍曹伍伯傳吏朝也。徵令，趨走給招呼。」案《禮記·王制》云：「下士視上農夫，食九人，祿足以代耕」，則府食八人，史食七人，胥食六人，徒食五人祿，其官並亞士，故號庶人在官者也。」詒讓案：府史胥徒並有稟食而無祿，《王制》云祿者，即稟食。故府史及不命之士，《燕禮》、《大射儀》通謂之士旅食，注云：「旅，衆也。謂未得正祿所謂庶人在官者也。」其胥徒雖亦爲庶人在官，而不得爲士，以其爲受役之民也。稟食，詳《宮正》疏。云「若今衛士矣」者，舉漢法以況周也。鄭《駁異義》亦謂胥徒如漢正衛，與此注義同。衛宏《漢舊儀》云：「民年二十三爲正，一歲而以爲衛士，一歲爲材官，五十六老衰乃得免爲庶民。」《漢書·貢禹傳》云：「諸離宮及長樂宮衛，可減大半，寬繇役。」是漢衛士亦民來給徭役者，但漢衛士一歲而更，《周官》胥徒給役更上之制無可攷耳。云「胥讀如謂，謂其有才智爲什長」者，段玉裁校改「讀如」爲「讀爲」，云：「《說文·言部》曰：「謂，知也。」凡易其本字曰「讀爲」。凡言「爲」者，皆主謂變化。此「讀爲」各本作「讀如」，誤也。《大行人》注：「胥讀爲謂，象謂，謂象之有才知者也。」可據以正此矣。《小雅》「君子樂胥」，箋：「胥，有才知之名也。」不言「讀爲謂」者，省文。」賈疏云：「胥有才知

爲什長，徒給使役，故一胥十徒也。案《周官》之內，稱胥者多，謂若大胥、小胥、胥師之類，雖不爲什長，皆是有才智之稱。彼不讀從謂，從此讀可知。唯有追胥，胥是伺搏盜賊，非有才知也。《易·歸妹》六二「以須」注云：①「須，才智之稱。天文有須女，屈原之姊名女須。」彼須字與此異者，蓋古有此二字通用，俱得爲有才智也。《周禮》上下文，有胥必有徒，胥爲什長故也。腊人之類，空有徒，無胥者，得徒則足，不假長帥故也。食醫之類，胥徒並無者，以其專官行事，不假胥徒也。」詒讓案：以上府史胥徒四者皆無爵，所謂庶人在官者也。其四者之外，在官庶人見於五官者，別有賈，有工，有奄。又天官之閹人、內豎、地官之胥師、賈師、司隸、司稽、胥、肆長、鄰長、春官之瞽矇、眡瞭、韎師、舞者、神士、夏官之虎士、狂夫、馬醫、圉師、圉人、秋官之罪隸、蠻隸、閹隸、夷隸、貉隸，皆是。以上諸吏徒，自奄閹五隸爲刑虜外，或官長辟除，或民共徭役，要皆府史胥徒之倫比矣。

宮正，上士二人，中士四人，下士八人，府二人，史四人，胥四人，徒四十人。正，長也。

①「一」，賈疏諸版本均如此。

宮正，主宮中官之長。【疏】「宮正」者，《說文·宮部》云：

「宮，室也。」此與宮伯，並掌王宮政令宿衛之官。大宰職兼

官府，故二官屬焉。《釋文》云：「此以下，鄭總列六十職

序，干注則各於其職前列之。」臧琳云：「康成於每官前總

列六十職序，當是古本如此。干氏於各職前列之，蓋亦如

《詩三百篇序》別爲卷，毛公冠於每篇之前，《書百篇序》

馬、鄭、王爲一卷，僞孔移於每篇首。皆變亂舊章，非其本

真也。」云「上士二人，中士四人，下士八人，府二人，^①史四

人，胥四人，徒四十人」者，賈疏云：「宮正上士二人爲官

首，中士四人爲之佐，下士八人理衆事，府二人主藏文書

也，史四人主作文書，胥四人爲什長，徒四十人給徭役。諸

官皆放此。《周禮》之內，宗伯之類，諸言伯者，伯，長也，以

尊長爲名。縣師之類言師者，皆取可師法也。諸稱人者，

若輪人、車人、腊人、鼈人之類，即《冬官》鄭云「其曰某人

者，以其事名官」。言氏者有二種，謂若桃氏爲劍，築氏爲

削之類，鄭注《冬官》「族有世業，以氏名官」。若馮相氏、保

章氏、師氏、保氏之類，鄭注引《春秋》「官有世功，則有官

族」是也。諸稱司，若司裘、司市之類，言司者，皆是專任其

事，事由於己，故以司言之也。諸典婦功、典絲、典枲之類，

言典者，出入由己，課彼作人，故謂之爲典也。諸稱職者，

謂若職幣、職內、職歲，財不久停，職之而已。凡云掌者有三義：一者，他官供物，己則整掌之而已，若幕人供帷幕幄帟，掌次張之也。二則掌徵斂之官，若掌皮、掌染草之類是也。三者，掌非己所爲，則掌節、掌固、掌疆，本非己造，廢壞修之而已也。自外不稱典司職掌者，皆逐事立名，以義銓之可曉也。凡六官序官之法，其義有二：一則以義類相從，謂若宮正、宮伯，同主宮中事；膳夫、庖人、外內饗，同主造食。如此之類，皆是類聚羣分，故連類序之。二則凡次序六十官，不以官之尊卑爲先後，皆以緩急爲次第，故此宮正之等士官爲前，內宰等大夫官爲後也。《曲禮》孔疏引干注云：「凡言司者，總其領也。凡言師者，訓其徒也。凡言職者，主其業也。凡言衡者，平其政也。凡言掌者，主其事也。凡言氏者，世其官也。凡言人者，終其身也。不氏不人，權其材也。通權其材者，既云不世，又不終身，隨其材而權暫用也。」案：賈釋官名之義，略本《考工記·總敘》注說，干氏說亦略同。然以諸職攷之，似皆隨事立名，本無定例。如同一鄉遂官也，而州比鄰稱長，黨縣稱正，族鄙稱師，閭稱胥，里稱宰，尊卑不嫌同名。又遂人爲六遂之

①「府二人」，原脫，今據楚本補。

長，既非以事名官，亦未必終身任職，則鄭、干之說，皆不可通矣。況全經之中，如內饗，本職稱饗人；甸師，《大祝職》稱甸人；大僕，《射人職》稱僕人；大馭等五馭，《校人職》稱僕夫；與本職亦不必同。至《儀禮》、《禮記》、《左傳》、《國語》官名，與此經復多歧互。如宗伯或稱宗人，鍾師或稱鍾人，司關或稱關人，鄉大夫或稱鄉正，遂人或稱隧正，庖人或稱庖正，墓大夫或稱司墓，宮人或稱司宮，甸師或稱甸師氏，大史或稱大史氏，若此類甚多。是官名可以互稱，尤可證其本無定例。又諸官稱氏者，亦不必皆世官，詳《春官·敘官》疏。莊存與云：「宮正、宮伯佐小宰治宮中之令，上士二人職在王宮，常日得休沐相代。下二職同。」

注云「正，長也」者，《爾雅·釋詁》文。云「宮正，主宮中官之長」者，賈疏云：「此宮正并下宮伯，雖俱訓爲長，其義則異。若宮正則主任三宮卿大夫士之身，爲宮中官之長，故其職云『以時比宮中之官府』。宮伯所掌者亦掌之，故言正長也。宮伯云長者，直主宮中卿大夫士之適子庶子，行其秩敘，授其舍次之事，亦得爲長，故云伯長也。」

宮伯，中士二人，下士四人，府一人，史二人，胥二人，徒二十人。伯，長也。【疏】注云「伯，長也」者，《爾雅·釋詁》文。《春官·敘官》注同。

膳夫，上士二人，中士四人，下士八人，府二人，史四人，胥十有二人，徒百有二十人。膳之言善也。今時美物曰珍膳。膳夫，食官之長也。

鄭司農以《詩》說之曰「仲允膳夫」。【疏】「膳夫上士二人」者，以下至亨人五官，並掌膳食之官。王之服御，以膳食爲重，故次官衛諸官之後。膳夫，《燕禮》謂之膳宰，注云「膳宰，天子曰膳夫，掌君飲食膳羞者」是也。胡匡衷云：「膳宰亦通稱宰夫，如《左傳》稱『膳宰屠蒯』，而《檀弓》云『黃也，宰夫也』。《左傳》稱『宰夫胹熊蹯不熟』，而《公羊傳》云『膳宰熊蹯不熟』。是其確證。膳夫亦稱爲膳宰，《玉藻》云『皆造於膳宰』，《國語》云『膳宰不致餼』是也。《左傳》所云『宰夫將解龜』，「宰夫和之」之類，皆指謂膳宰。韋昭注《國語》云「膳宰掌賓客之牢禮」，以《宰夫職》釋膳宰。皆由後世膳宰通稱宰夫，不能辨別，遂誤合爲一。案：胡說是也。膳夫，《大戴禮記·保傳篇》又謂之大宰，亦與冢宰異，互詳本職疏。云「中士四人下士八人」者，《燕禮記》云：「羞卿者小膳宰也。」注云：「膳宰之佐也。」案：小膳宰即此中士以下是也。云「胥十有二人」者，《大射儀》云：「宰胥薦脯醢。」注云：「宰胥，宰官之吏也。」即此膳夫之胥也。

注云「膳之言善也」者，以聲類爲訓也。凡鄭云「之言」者，並取聲義相貫。《說文·肉部》云：「膳，具食也。从肉善聲。」鄭《燕禮》注亦云「君物曰膳，膳之言善也」。云「今時美物曰珍膳」者，據漢時語爲說。《續漢書·百官志》云「少府卿掌中服御諸物，衣服寶貨珍膳之屬」是也。云「膳夫，食官之長也」者，《小宰》六屬云「大事則從其長」，注云：「若庖人、內外饗與膳夫共王之食。」是膳夫即庖人、內外饗、亨人諸食官之長也。云「鄭司農以《詩》說之曰，仲允膳夫」者，《小雅·十月之交》篇文。鄭彼箋云：「仲允，字膳夫，上士也，掌王之飲食膳羞。」先鄭引彼以證仲允所爲，即此膳夫也。《左》莊十九年傳又有膳夫石速。

庖人，中士四人，下士八人，府二人，史四人，賈八人，胥四人，徒四十人。庖之言苞也。裹肉曰苞苴。賈主市賈，知物賈。【疏】「庖人中士四人」者，《左》哀元年傳有庖正，杜注云「掌膳羞之官」。案：庖正蓋庖人之長，即此中士是也。注云「庖之言苞也」者，亦以聲類爲訓也。《說文·广部》云：「庖，廚也。」字亦作「胞」，《祭統》云：「胞者，肉吏之賤者也。」庖苞胞聲類並同。《呂覽·本味篇》又作「燂人」，高注云：「燂猶庖也。」

案：庖燂亦音近假借字。云「裹肉曰苞苴」者，裹，嘉靖本誤作「在」，今據宋紹興董氏本，婺州唐氏本，建陽本正。《曲禮》注云：「苞苴，裹魚肉者也。或以葦，或以茅。」又《少儀》注云：「苞苴，謂編束葦葦以裹魚肉也。」《莊子·列禦寇篇》釋文引司馬彪云：「苞苴，有苞裹也。」云「賈，主市賈，知物賈」者，《爾雅·釋言》云：「賈，市也。」《聘禮》：「賈人西面坐，啓櫝取圭。」注云：「賈人，在官知物賈者也。」《國語·晉語》韋注云：「《周禮》府藏皆有賈人，以知物賈。」案：知物賈，謂知賈直之貴賤。其字今別爲價，古通以賈爲之。此賈亦庶人在官者。凡諸官有市賈之事者，並有賈，列府史下，胥徒之上。此及大府、玉府、職幣、典婦功、典絲、泉府、馬質、羊人、巫馬、犬人十一職是也。賈疏云：「下文九職，鄭注『行曰商，處曰賈』。賈乃在市而處者，故知物賈。此特有賈人者，庖人性當市之故也。」

內饗，中士四人，下士八人，府二人，史四人，胥十人，徒百人。饗，割烹煎和之稱。內饗所主在內。【疏】「內饗」者，本職亦稱饗人，蓋通官長及徒屬言之。《左》襄二十八年傳亦云「饗人竊更之以鶩」。云「府二人史四人」者，《公食大夫禮》云：「雍人以俎人，陳于

鼎南。旅人南面，加匕于鼎。」注云：「旅人，雍人之屬，旅食者也。」案：雍人即饗人，旅人即此官府史之屬。《少牢饋食禮》有雍人、雍正、雍府，蓋大夫家臣亦有主饗之官，雍正爲長，雍府即其府也。注云「饗，割烹煎和之稱」者，據本職文。《說文·食部》云：「饗，熟食也。」饗即饗之隸變。凡熟食，必有割烹煎和，故謂之饗。字亦省作饗，隸變作雍。《國語·周語》云：「佐饗者嘗焉。」韋注云：「饗，烹煎之官也。」賈疏云：「饗，和也。熟食曰饗。熟食須調和，故號曰饗。」案：賈說亦通。云「內饗所主在內」者，賈疏云：「以其掌王及后世子及宗廟，皆是在內之事。」案：內饗官寺所在，鄭賈並無說。攷《少牢》、《特牲饋食禮》，雍饗並在廟門外，則此官所居，疑亦當在王宮內路門外，與廟寢並相邇也。

外饗，中士四人，下士八人，府二人，史四人，胥十人，徒百人。外饗，所主在外。【疏】注

云「外饗，所主在外」者，賈疏云：「案其職云『掌外祭祀及邦饗孤子耆老割烹』，皆是在外之事，故云所掌在外也。」案：外饗官寺所在，鄭賈亦無說。攷此官掌外祭祀，兼有社稷，大社在治朝之右，則此官疑亦當在應門內外。其有事於四郊丘兆、王社、明堂、大學等，則各隨其地而掌事焉。

亨人，下士四人，府一人，史二人，胥五十人，徒五十人。主爲外內饗煮肉者。【疏】注云「主爲外內饗煮肉者」者，《內饗》注云：「亨，煮也。」據本職云：「職外內饗之饗亨。」以饗人雖外內事殊，而亨煮之事則同，故總設一官不分內外也。

甸師，下士二人，府一人，史二人，胥三十人，徒三百人。郊外曰甸。師猶長也。甸師，主共野物官之長。【疏】甸師者，以下至腊人，皆掌共野物之官。本職云「帥其徒以薪蒸役外內饗之事」，故次於此。此官與饗人、亨人等職事相通，故《公食大夫禮》云「甸人陳鼎七」，注云：「甸人，冢宰之屬，兼亨人者。」是諸侯禮甸師兼亨人也。云「徒三百人」者，賈疏云：「特多者，天子藉田千畝，藉此三百人耕耨，故多也。」注云「郊外曰甸」者，謂即《大宰》邦甸之地，在四郊之外者也。本職注云：「甸在遠郊之外。」《通典·凶禮》引盧植《禮記注》說甸人云：「郊外曰甸，去天子城二百里內也。」與鄭說同。《爾雅·釋地》云：「郊外謂之牧。」陸《釋文》云：「李本牧作田。」案：田甸字通。《素問·六節藏象論》王冰注引《爾雅》作「郊外爲甸」，甸外爲牧，雖與李巡本不同，而田正作甸。盧、鄭疑

①「象」，原作「義」，今據《素問》改。

兼本彼文。賈疏云：「案《載師》云『任近郊遠郊之地』，次即云『公邑之田任甸地』，甸地即在百里遠郊外，天子藉田又在南方甸地，故稱此官爲甸師也。然此官主地事不在地官者，以其供野之薦，又給薪蒸以供亨飪，故在此次亨人也。」詒讓案：甸師主田野之物，非取郊外距國二百里之甸地以爲名也。《大祝職》及《燕禮》、《大射儀》、《公食大夫禮》、《士喪禮》、《文王世子》、《喪大記》、《左》成十年傳、《國語·周語》並謂之甸人。《士喪》注云：「甸人，有司主田野者。」彼甸人即甸師之屬，鄭以主田野釋之，則不爲郊外之地可知。《左傳》「使甸人獻麥」，杜注云：「甸人主爲公田者。」藉田即公家田也。省文亦稱甸，《穀梁》桓十四年傳：「甸粟而內之三宮。」范甯注云：「甸，甸師，掌田之官也。」並與《士喪》注說略同。又《少儀》云：「臣爲君喪，納貨貝於君，則曰納甸於有司。」注云：「甸謂田野之物。」此官主藉田及其野物，自當以《士喪》注「主田野」之說爲正。此注別援「郊外爲甸」爲說，與彼不合，蓋偶有不照。賈疏曲申其說，乃謂天子藉田在南方甸地，故官稱甸師，則尤誤之甚者也。攷《祭統》云：「天子親耕於南郊，以共齊盛，諸侯耕於東郊。」孔疏云：「鄭云王藉田在遠郊，故甸師氏掌之。天子太陽，故南也；諸侯少陽，故東也。」據孔說，是鄭本謂

藉田在南方之遠郊。《國語·周語》云：「宣王即位，不藉千畝。三十九年，戰於千畝，王師敗績於姜氏之戎。」《詩·小雅·祈父》孔疏引孔晁《國語》注云：「宣王不耕藉田，神怒民困，爲戎所伐，戰於近郊。」孔晁謂藉田在近郊，雖與鄭、孔少異，要其在郊則同。賈氏本職疏，亦從《祭統》在南郊之說，此疏又云「在南方甸地」，以傳合「郊外曰甸」之義，而忘其與《祭統》之文，顯相違鑿，不亦疏乎！竊謂《周語》說耕藉之禮云：「王即齊宮，王乃淳濯饗醴；及期，王裸鬯，饗醴乃行；及藉畢，宰夫陳饗，王歆大牢。」然則由國以至藉田之地，必道塗不遠，故崇朝往反，可以逮事。孔晁謂在近郊，揆之事理，實爲允愜。若在遠郊，則至近亦必在五十里之外，甸則又在百里之外，古者吉行，日五十里，必竟日而後至其地，於事徒勞，義又無取，必不然矣。至《白虎通義·耕桑篇》云：「耕於東郊何？東方少陽，農事始起，故《曾子問》曰：『天子耕東田而三反之。』《公羊》桓十四年傳，何注亦云：『禮，天子親耕東田千畝，諸侯百畝。』」此又謂天子諸侯親耕同在東郊，亦誤。又案：鄉遂不制井田，四郊制同。故藉田千畝，即十夫之田，《遂人》云「十夫有溝」是也，與井田一井九百畝異，此亦足證郊田爲溝洫法也。云「師猶長也」者，《地官·敘官》注義同。《漢書·百

官公卿表》注引應劭云：「師者，長也。」《文王世子》云：「師者，教之以事而喻諸德者也。」《周書·謚法篇》云：「教誨不倦曰長。」是師長並有表率教訓之義。故《曲禮》孔疏引干氏謂「凡言師者訓其徒也」，義亦與鄭略同。云「甸師，主共野物官之長」者，莊存與云：「獸人以下四官屬甸師。」賈疏云：「或云與地官掌葛、掌炭、掌蜃、委人等同掌供野物，故與彼官爲長。若然，彼屬地官，此屬天官，越分相領，恐理不愜。此甸師當與下獸人已下亦供野物爲長也。故下數職注不言長，明甸師與之爲長。但獸人等中士，此爲下士，下士得與中士爲長者，如大史下大夫，內史中大夫，鄭云「大史，史官之長」。彼下大夫與中大夫爲長，此下士亦與中士爲長，有何嫌也。」案：賈謂甸師下士，得與獸人、獸人等中士爲長，於理究未合。竊疑甸師職任頗重，下士或當爲上中士之誤。春官內史則非大史之屬官，不足取證，詳《春官·敘官》疏。

獸人，中士四人，下士八人，府二人，史

四人，胥四人，徒四十人。【疏】「獸人」者，掌共野

獸之官也。凡野獸謂之獸，與家畜爲性別。《特性饋食禮》云：「實獸于楸上，東首，牲在其西，北首東足。」《內則》云：「三牲用藪，獸用梅。」《爾雅·釋獸》《釋畜》亦分二

篇，是也。獸人，《國語·魯語》亦謂之獸虞，詳本職疏。

獸人，中士二人，下士四人，府二人，史

四人，胥三十人，徒三百人。【疏】「獸人」者，《釋

文》云：「獸音魚，本又作『魚』，亦作『鮒』，同。又音御。」

案：《說文·魚部》云：「漁，捕魚也。重文漁，篆文漁，从

魚。」又《竹部》云：「簾，禁苑也。《春秋傳》曰：『澤之舟

簾。』重文簾，簾或作𦨇，從又，從魚。」莊述祖云：「𦨇即𦨇，

讀御，蓋古音也。昭二十年《左傳》：『澤之萑蒲，舟𦨇守

之。』注：「舟𦨇，官名。𦨇當爲𦨇之譌。」案：莊說是也。

《王維集·京兆尹張公德政碑》亦有「舟漁衡鹿」之文，可證

唐本《左傳》尚有作「𦨇」者。但《左傳》舟𦨇，自是澤虞，非

獸人也。詳《地官·敘官》疏。此獸、𦨇，並𦨇之別體，古段

爲捕魚字。《石鼓文》漁字作「𦨇」，即从𦨇之變體。釋慧苑

《華嚴經音義》云：「漁，《聲類》作獸𦨇二體。」張參《五經文

字》亦云「漁獸同」。凡經用古字作獸，注用今字作漁。本

職先鄭注及《禮運》後鄭注引，並作漁人，用正字也。《釋

文》別本作魚，亦漁之段字。《國語·魯語》又有「水虞」，韋

注亦謂即漁師，詳本職疏。云「中士二人，下士四人」者，

《穀梁》隱五年傳云：「魚，卑者之事也。」故以中下士掌之。

云「徒三百人」者，賈疏引馬融云：「池塞苑囿，取魚處多

故也。」

鼈人，下士四人，府二人，史二人，徒十

有六人。【疏】「鼈人」者，《說文·黽部》云：「鼈，甲蟲

也。」此官掌共介物，與下膳人皆有府史徒而無胥，與它職不同。沈彤云：「五官之有徒而無胥者，殆其事易供，而無庸有才智者率之。」

膳人，下士四人，府二人，史二人，徒二

十人。膳之言夕也。【疏】「府二人史二人」者，王引之

云：「《大宰》疏曰：『膳人，食醫之等府史俱無者，以其專官行事，更無所須故也。』據此，則《膳人》下無『府二人史二人』六字，此因上《鼈人》、下《醫師》皆有『府二人史二人』之文而誤衍，唐石經已然。」注云「膳之言夕也」者，賈疏

云：「乾曰膳，朝曝，於夕乃乾，故云膳之言夕。或作『久』字，久乃乾成，義亦通也。」阮元云：「久者，夕之誤也。」惠

棟云：「《說文》：『膳，乾肉也。』從殘肉，日以晞之，與俎同

意。籀文作𩇛，从肉。」替夕古字通，《穀梁傳》云「日人至于星出謂之替」，《管子》云「旦昔從事」，王逸《楚辭章句》引

《詩》云「樂酒今昔」，是皆以昔爲夕。昔之爲物，經夕乃乾，故言夕。或作久，久猶昔也。《國語》云「厚味實腊毒」，韋

昭曰：「腊讀若廟昔酒。」漢之酋久白酒亦云昔酒。」詒讓案：《毛詩·陳風·墓門》傳云：「昔，久也。」《文選·七命》李善注引賈逵《國語注》云：「腊，久也。」是腊亦得訓久。但腊夕聲類相近，凡注例云言者，多依聲以通其義，若前注云「膳之言善」「庖之言苞」是也。或本作久，義雖可通，而非鄭之舊。

醫師，上士二人，下士四人，府二人，史二人，徒二十人。醫師，衆醫之長。【疏】「醫師」者，

《說文·酉部》云：「醫，治病工也。古者巫彭初作醫。」賈疏云：「諸醫皆在此者，醫亦有齊和飲食之類，故設在飲食之間也。」注云「醫師，衆醫之長」者，前注云「師猶長也」，故衆醫之長謂之醫師。莊存與云：「食醫以下四官，

屬醫師。」

食醫，中士二人。食有和齊藥之類。【疏】注

云「食有和齊藥之類」者，賈疏云：「案其職云『春多酸，夏多苦』之等，皆須齊和，與藥同，故鄭云『食有和齊藥之類』，故在醫官之內也。」

疾醫，中士八人。【疏】「疾醫」者，《釋名·釋

疾病》云：「疾，病也。客氣中人急疾也。」案：疾醫，若今

之內科醫也。《左傳》僖三十年，晉有醫衍；成十年，秦有醫緩，疑即此官也。

瘍醫，下士八人。瘍，創癰也。【疏】「瘍醫」

者，若今之外科醫也。

注云「瘍，創癰也」者，《醫師》注

云：「身傷曰瘍。」《說文·疒部》云：「瘍，頭創也。癰，腫

也。」癰即癰之隸變。又《刃部》云：「刃，傷也。重文創，亦

或從倉。」《廣雅·釋詁》云：「瘍，創也。」本職注云：「腫

瘍，癰而上生創者。潰瘍，癰而含膿血者。金瘍，刃創也。

折瘍，踣跌者。」則瘍為凡創癰之通名。《孟子·萬章篇》

云：「孔子於衛主癰疽。」趙岐注云：「癰疽，癰疽之醫也。」

蓋即此瘍醫。互詳《醫師職》疏。

獸醫，下士四人。獸，牛馬之屬。【疏】「獸醫」

者，此官專主醫獸，故以事類附諸醫之後。

注云「獸，

牛馬之屬」者，明此獸為牲畜之通稱，與《獸人》及《庖人》六

獸為野獸，對六畜為家獸者異。賈疏云：「案《爾雅》，在野

曰獸，在家曰畜，畜獸異矣。而言獸牛馬者，但此職云「主

治牛馬」，未必治其野獸。對文則畜獸異，散文通。故《爾

雅》又云：「兩足而羽謂之禽，四足而毛謂之獸。」既不別釋

畜，則獸中可以兼牛馬，是其牛馬亦有獸稱。」詒讓案：此

官亦掌醫馬。《夏官·敘官》巫馬下士二人，下別有醫四人

者，彼馬醫，蓋散醫，故無爵。此獸醫通掌畜獸，故有爵，與彼異也。

酒正，中士四人，下士八人，府二人，史

八人，胥八人，徒八十人。酒正，酒官之長。【疏】

「酒正」者以下至鹽人八官，皆掌飲食膳羞之官，故次諸醫

官之後。《說文·酉部》云：「酒，就也，所以就人性之善

惡。一曰造也，吉凶所造起也。古者儀狄作酒醪，禹嘗之

而美，遂疏儀狄。杜康作秫酒。」注云「酒正酒官之長」

者，前注云「正，長也」。賈疏云：「此酒正與下酒人、漿人

為長。注雖不言漿，文略也。」案：賈說是也。酒正為酒官

之長，即《月令》之大酋。詳本職疏。

酒人，奄十人，女酒三十人，奚三百人。

奄，精氣閉藏者，今謂之宦人。《月令》仲冬「其器閔以奄」。

女酒，女奴曉酒者。古者從坐男女，沒入縣官為奴，其少才

知，以為奚，今之侍史官婢。或曰：「奚，宦女。」【疏】「酒

人奄十人」者，賈疏云：「以其與女酒及奚同職，故用奄人。

奄不稱士，則此奄亦府史之類，以奄為異也。」云「女酒三十

人，奚三百人」者，賈疏云：「則女酒與奚為什長，若胥徒

也。奚三百人，以其造酒，故須人多也。」注云「奄，精

氣閉藏者」者，《說文·門部》云：「闔，豎也。宮中奄闔閉門者。」奄即闔之借字。《掌戮》云：「官者使守內。」然此經官府小官凡與嬪婦雜處者，多以奄爲之，不徒守內也。云「今謂之宦人」者，明周之奄人即漢宦人也。《漢書·惠帝紀》顏注，應劭云：「宦官，闔寺也。」《文選·宦者傳論》李注云：「宦者，養也，養闔人，使其看官人。」案：《戰國策·趙策》有宦者令繆賢，又《唐六典》李林甫注引《石氏星經》云「宦者四星，在帝座西」，則周時已稱宦人，不自漢始矣。引《月令》仲冬「其器闔以奄」者，鄭彼注云：「器闔而奄，象物閉藏也。」引之者，證此奄人取精氣閉藏，與彼義同。《月令》孟冬、仲冬、季冬文同，此獨引仲冬者，偏舉一時以況義也。賈疏謂取十一月一陽爻生，以其奄人，雖精氣閉藏，猶少有精氣。說迂鑿，非鄭旨。云「女酒，女奴曉酒者」者，《方言》云：「曉，知也。」謂多才知，知作酒之事者。凡酒、漿、饔、醢、醢、醢、醢、醢七職，並掌飲食粢盛之事，故皆有女奴，即《寺人》、《世婦》所謂女官是也。云「古者從坐男女没入縣官爲奴」者，《司厲》云：「其奴，男子入于罪隸，女子入于春臺。」注云：「奴，從坐而没入縣官者，男女同名。」《說文·女部》云：「奴，奴婢，皆古之皐人也。」亦引《司厲》文。案：凡女官皆用刑女，猶奄闔皆用刑男也。没入縣官爲奴

者，秦漢時，通以國家爲縣官。《史記·李斯傳》云：「十公主死於杜，^①財物入於縣官」是也。《史記·周勃世家》司馬貞《索隱》云：「縣官謂天子也。」所以謂國家爲縣官者，夏家王畿內名縣內，即國都也。王者官天下，故曰縣官。互詳《司厲》疏。云「其少才知以爲奚」者，《春官·敘官》注云：「奚，女奴也。」《說文·女部》云：「媛，女隸也。」案：奚即媛之借字。凡此經之奚皆爲女奴，對《秋官》五隸爲男奴也。賈疏云：「奴者，男女同名，以其曉解作酒，有才智，則曰女酒。其少有才智給使者，則曰奚。」惠士奇云：「《呂氏春秋·精通篇》：『鍾子期夜聞擊磬者而悲，使人召而問之。』答曰：『臣之父不幸而殺人，不得生，臣之母得生，而爲公家爲酒；臣之身得生，而爲公家擊磬。』臣不覩臣之母三年矣，量所以贖之，則無有，是故悲也。」然則古之爲酒者皆女奴，信矣。」云「今之侍史官婢」者，《後漢書·鍾離意傳》李注引蔡質《漢儀》云：「尚書郎女侍史二人，皆選端正者，絮被服，執香爐燒熏，從入臺中，給使護衣服也。」又《漢書·貢禹傳》云：「諸官奴婢十餘萬人。」《漢舊儀》云：「省中侍使令者，皆官婢，擇年八歲以上，衣綠，曰官人。不得

①「砣」，原作「砣」，今據楚本改。

出省門，置都監。老者曰婢，婢教官人給使。尚書侍中皆使官婢，不得使官人。」案：依衛宏說，則漢之侍史，即於官婢中選擇爲之。鄭以其類周之女奴與奚，故以爲況。云「或曰奚，宦女」者，賈疏云：「漢時有此別號。按《左氏》，晉惠公之女名妾，稱「爲宦女」，謂宦事秦公子，亦云宦女也。」案：賈說非也。此別一說，謂此奚即宦女，對前奄爲宦男。《司刑》注云：「宦者，丈夫則割其勢，女子閉於宮中，若今宦男女也。」然則漢時官婢猶男之有官奴，宦女猶男之有宦人，二者小異，宦女非即官婢之別號也。又《左傳》宦女，即妾媵之稱，與漢之宦女亦異。俗本「宦女」作「官女」，尤誤。

漿人，奄五人，女漿十有五人，奚百有五十人。女漿，女奴曉漿者。【疏】「漿人」者，《酒正》注

云：「漿，今之釀漿也。」酒漿同以共飲，故漿人與酒人同屬酒正，而員數則半於酒人，以漿輕於酒，事省故也。注

云「女漿，女奴曉漿者」者，女奴與上女酒同。《曲禮》云：「納女於國君曰備酒漿。」酒漿即是經女酒、女漿是也。

凌人，下士二人，府二人，史二人，胥八人，徒八十人。凌，冰室也。《詩》云：「二之日，鑿冰

沖沖。三之日，納于凌陰。」【疏】「凌人」者，賈疏云：「案其職云：『掌冰，凡外內饗之膳羞鑑焉。』以供爲膳羞，故連類在此也。」云「徒八十人」者，以供藏冰之役，故員數多也。《左》昭四年傳說藏冰之事云：「山人取之，縣人傳之，與人納之，隸人藏之。」杜注云：「與隸皆賤官。」彼與疑即此徒矣。注云「凌，冰室也」者，本職注同。《初學記·地

部》引《風俗通》云：「積冰曰凌。」《說文·欠部》云：「滕，欠出也。《詩》曰：『納于滕陰。』重文，滕或从夔。」案：「出」疑「室」之譌。《玉篇·欠部》云：「凌，冰室也。」《漢書·惠帝紀》：「未央宮凌室災。」顏注云：「凌室，藏冰之室也。」引《詩》云「二之日，鑿冰沖沖，三之日，納于凌陰」者，《爾雅·七月》篇文。毛傳云：「凌陰，冰室也。」賈疏云：「案《詩》之所釋，謂周之二月，夏之十二月之日。鑿冰者，謂於深山窮谷，固陰沍寒之處，於是乎取之。沖沖，鑿冰之意。周之三月，夏之建寅之正月，納冰於凌陰室中。案彼又云：「四之日其蚤，獻羔祭韭。」啓冰之時也。鄭《荅志》，以「夏十二月取冰，二月開冰，四月班冰，是其常也。藏之既晚，出之又早。晚者，建寅乃藏，與此《周禮》十二月藏冰較一月故。出之早者，四月，夏之二月出冰，與《周禮》同。今幽土寒，故納冰可用夏正月」也。引之者，證凌陰即此冰

室，爲一物也。」

籩人，奄一人，女籩十人，奚二十人。竹

曰籩。女籩，女奴之曉籩者。【疏】「籩人」者，以下至鹽人

四職，並掌膳羞之事，故次凌人之後。云「女籩十人，奚二

十人」者，沈彤云：「一女籩亦爲二奚之長。」詒讓案：下女

醢、女醢、女鹽、女冪等並同。與前女酒、女漿等一女領十

奚異者，以其事少，用奚不多故也。注云「竹曰籩」者，

《爾雅·釋器》云：「木豆謂之豆，竹豆謂之籩。」《說文·竹

部》云：「籩，竹豆也。」本職注云：「籩，竹器如豆者，其容

實皆四升。」云「女籩，女奴之曉籩者」者，亦與女酒同。

醢人，奄一人，女醢二十人，奚四十人。

醢，豆實也。不謂之豆，此主醢，豆不盡于醢也。女醢，女

奴曉醢者。【疏】「醢人」者，《說文·西部》云：「醢，肉醬

也。」作醢之法，詳本職注。注云「醢，豆實也」者，本職

云：「掌四豆之實。」《掌客》注云：「豆，菹醢器也。」《鄉射

禮記》云「醢以豆」，注云：「豆宜濡物。」云「不謂之豆，此主

醢，豆不盡于醢也」者，于賈疏述注作「於」。黃丕烈云：

「于於古今字。經用古字當作于，注用今字當作於，本書往

往錯互。」案：黃校是也。賈疏云：「決上籩人不以籩中之

實爲名，而以籩爲官號，此即以豆中之實爲官號，不謂之豆

人。此是問辭，鄭還自荅。豆不盡於醢者，其豆之所盛，非

止此職中四豆之實而已。天子豆百二十，上公豆四十，侯

伯豆三十二，子男豆二十四，上大夫二十，下大夫十六，彼

有腳臘醢炙膾之屬，其數甚多，是豆不盡盛醢而已。若

言豆人，恐彼並掌之。此醢人惟掌此四豆之實而已，故不

得言豆人而言醢人也。」案：賈云天子百二十豆者，據《膳

夫》王饋羞用百有二十品。此與公豆四十等，並是庶羞。

但依禮器孔疏引皇侃說，天子庶羞百二十品，籩豆各六十，

則天子亦止六十豆耳。賈說殊失攷。凡庶羞之豆，皆別掌

於庖人，非醢人所共，詳《膳夫》、《庖人》疏。云「女醢，女奴

曉醢者」者，亦與女酒同。

醢人，奄二人，女醢二十人，奚四十人。

女醢，女奴曉醢者。【疏】「醢人」者，《釋文》云：「醢，本又

作醢。」案：《說文·皿部》云：「醢，酸也。作醢以醢以酒。」

《廣韻·十二齊》云：「醢，俗作醢。」《廣雅·釋器》云：「醢，

酢也。」案：醢以鬻和酒爲之，故鄭《聘禮》注云：「醢，穀陽

也。醢，肉陰也。」《內則》云：「三牲和用醢，獸用梅。」鄭彼

注云：「家物野物自相和。」又說八珍云：「食漬以醢，若醢

醢。」醢即梅漿，醢與梅醢同類，則醢爲酢明矣。注云

「女醢女奴曉醢者」者，亦與女酒同。

鹽人，奄二人，女鹽二十人，奚四十人。

女鹽，女奴曉鹽者。【疏】「鹽人」者，江永云：「鹽人惟掌

鹽之用，而《地官·虞衡》之後，不設掌鹽，蓋王畿內鹽非所產也。《禹貢》青州貢鹽，即今之青、登、濟、萊等處鹽，其地在齊。《職方氏》幽州利魚鹽，即今之長蘆鹽，其地屬燕。

《左傳》郇瑕氏國饒近鹽，即今解州池鹽，其地屬晉。諸侯各貢所有，則鹽人所用，其三國之貨貢與？鄭注飴鹽為戎鹽，其蕃國之貨貢與？意當時侯國產鹽之地，或亦設官為守，予其民以斥鹵之地，使之取鹽以當賦，如角人諸官之法。至管仲為鹽筴，始計口而增鹽稅，每鹽一升，加賦二合，而賦始重。齊之季世，有祈望之守，則鹽利盡歸於公，民始不得私煮耳。」注云「女鹽，女奴曉鹽者」者，亦與女酒同。

冪人，奄一人，女冪十人，奚二十人。以

巾覆物曰冪。女冪，女奴曉冪者。【疏】「冪人」者，賈疏云：「案其職云『掌供巾冪』，所以覆飲食之物，故次飲食官後。」注云「以巾覆物曰冪」者，《說文·巾部》云：「幘，幔也。《周禮》有幘人。」案：冪即幘之變體。宋嘉祐石經

依《說文》作幘。《輪人》亦有幘字。《小爾雅·廣服》云：「大巾謂之冪。」《廣雅·釋詁》云：「冪，覆也。」云「女冪，女奴曉冪者」者，亦與女酒同。

宮人，中士四人，下士八人，府二人，史

四人，胥八人，徒八十人。【疏】「宮人中士四人，

下士八人」者，此官掌王寢，亦主服御之事，故次飲食官之後。宮人，《燕禮》、《大射儀》、《公食大夫記》、《少牢饋食禮》並謂之司宮。《公食》注云：「司宮，大宰之屬，掌官廟者也。」《燕禮》注以司宮為小宰，誤。莊存與云：「掌舍以下三官，屬宮人。」云「府二人，史四人」者，《大射儀》有司宮士，即此宮人之屬吏也。

掌舍，下士四人，府二人，史四人，徒四

十人。舍，行所解止之處。【疏】「掌舍」者，掌王行道館舍之事，故次宮人之後。《聘禮》云：「管人布幕于寢門外。」注云：「管猶館也。館人謂掌次舍帷幕者也。」賈彼疏謂即此官而兼冪人者。又《左》昭元年傳亦云：「敝邑館人之屬也。」杜注云：「館人，守舍人也。」與鄭、賈義同。

注云「舍，行所解止之處」者，《說文·人部》云：「市居曰舍。」《釋名·釋宮室》云：「舍，於中舍息也。」賈疏云：「案

其職云，設車宮、壇壝宮、帷宮之等，並是解脫止息之處，故云解止之處也。」王引之云：「疏以解爲解脫，非也。解猶休也，息也，止也。昭五年《左傳》「敝邑休息」，杜注曰：「休，解也。」《釋文》：「解，佳賣反。」解止者，休止也。《管子·五輔篇》曰：「上彌殘苛而無解舍，下愈覆鷲而不聽從。」《吳子·治兵篇》曰：「馬疲人倦而不解舍。」解舍猶休止也。《漢書·郊祀志》曰：「奉尊之役，休而復起，繕治共張，無解已時。」解已猶休已也。《五行志》引京房《易傳》曰：「歸獄不解，茲謂追非。」張晏曰：「解，止也。」《五行志》又曰：「合朔在夜，明旦，日食而出，出而解。」孟康曰：「夜食地中，出而止也。」《淮南·原道篇》曰：「解車休馬。」《開元占經》引《石氏星經》曰：「氏爲宿宮休解房。」又引《甘氏星經》曰：「天牀寢舍，解息燕休。」是解與休止同義，音佳賣反，故鄭云「行所解止之處」。或言解止，或言解已，或言解息，或言解舍，或言休解，其義一也。」

幕人，下士一人，府二人，史二人，徒四十人。幕，帷覆上者。【疏】「幕人」者，《釋文》出「掌幕」

二字，與經文不合。本職《釋文》仍作「幕人」，則此作「掌幕」，誤也。幕人，掌次，並主張設帷幕之事，以備王舍息，故次諸宮舍官之後。注云「幕，帷覆上者」者，本職注

云：「在旁曰帷，在上曰幕。」詳彼疏。

掌次，下士四人，府四人，史二人，徒八十人。次，自脩正之處。【疏】「府四人史二人」者，王引

之謂當作府二人，史四人。詳前疏。

注云「次，自脩正

之處」者，《廣雅·釋詁》云：「次，舍也。」凡於內外以帷簾別爲舍息之處，並謂之次。脩正，猶《檀弓》云「曾子與子貢入於其廐而脩容焉」，注云「更莊飾」。凡次，亦脩正莊飾之所也。本職云：「凡祭祀，掌尸次。」先鄭注云：「尸次，祭祀所居更衣帳。」更衣亦自脩正之一端。正，明注疏本作「止」，誤。

大府，下大夫二人，上士四人，下士八人，府四人，史八人，賈十有六人，胥八人，徒八十人。大府，爲王治藏之長，若今司農矣。【疏】

「大府」者，以下至職幣九職，並掌府藏會計之官。凡府藏皆以共王之用，既用，則須會計，故次宮室服御官之後。

《漢書·食貨志》云：「太公爲周立九府圖法。」顏注云：

「《周官》太府、玉府、內府、外府、泉府、天府、職內、職金、職幣，皆掌財幣之官，故云九府。」《史記·貨殖傳》張守節《正義》說同。案：泉府屬地官，天府屬春官，職金屬秋官，似

不宜與大府等同列九府。劉迎、王與之謂九府即此大府至職幣九官，其說較頗爲允。《曲禮》云：「天子之六府，曰：司土、司木、司水、司草、司器、司貨，典司六職。」鄭彼注以爲殷制，與周法異也。此府藏諸官，通長屬言之，謂之府人，《左》昭十八年傳云「使府人庫人各徹其事」是也。彼又有庫人，此經無者，《左傳》孔疏謂通言庫亦謂之府，則此諸府可兼庫人。《月令》，季春「命工師令百工審五庫之量，金、鐵、皮革、筋角、齒羽、箭幹、脂膠、丹漆，毋或不良」。彼五庫蓋亦九府所該矣。 注云「大府爲王治藏之長」者，前

注云：「府，治藏。」《左傳》隱七年孔疏引《風俗通》云：「府，聚也。」^①藏府、私府，財貨之所聚也。此大府與下玉府、內府、外府諸治藏官爲長，故尊之曰大。《呂氏春秋·分職篇》說楚葉公發太府之貨予衆，是侯國亦有太府也。云「若今司農矣」者，《漢書·百官公卿表》云：「治粟內史，掌穀貨。武帝太初元年，更名大司農。」《續漢書·百官志》云：「大司農，卿一人，中二千石，掌諸錢穀金帛諸貨幣。」是漢時大司農主府藏，與周大府職同，故舉以爲況。

玉府，上士二人，中士四人，府二人，史二人，工八人，賈八人，胥四人，徒四十有八

人。工，能攻玉者。【疏】「賈八人」者，《聘禮》云「賈人啓櫝取圭授宰」，即此。又《少儀》云：「臣致綏於君，則曰致廢衣於賈人。」注亦謂即玉府之賈，是也。云「胥四人，徒四十有八人」者，沈彤云：「胥爲什長，胥一則徒十。玉府四胥，而徒乃四十八，何也？必十徒不足供一胥之科次，故浮於常也。」 注云「工，能攻玉者」者，即《考工記·玉人》之工。《考工記·總敘》注云：「攻猶治也。」凡工皆庶人在官者，與賈同，諸官有造作之事者並有之。

內府，中士二人，府一人，史二人，徒十

人。內府，主良貨賄藏在內者。【疏】注云「內府，主良貨賄藏在內者」者，良貨賄，其物珍貴，故藏在內。別於外府，謂之內府。王與之謂當在庫門內也。

外府，中士二人，府一人，史二人，徒十

人。外府，主泉藏在外者。【疏】注云「外府，主泉藏在外者」者，泉布以流通爲用，故藏之外舍，其官即對內府稱外府也。

司會，中大夫二人，下大夫四人，上士

① 「聚」，原誤作「藏」，今據《左傳正義》改。

八人，中士十有六人，府四人，史八人，^①胥五人，徒五十人。會，大計也。司會主天下之大計，計官之長，若今尚書。【疏】注云「會，大計也」者，《大宰》

注同。《說文·言部》云：「計，會也，筭也。」賈疏云：「案《宰夫職》：日計曰成，月計曰要，歲計曰會。故知會大計也。」詒讓案：通言之，成要會通曰計，而會為歲計，校成要為大，故云大計。若司書三歲大計，則又大於歲計，亦司會所通掌也。云「司會，主天下之大計」者，《小爾雅·廣言》云：「司，主也。」《說文·司部》云：「司，臣司事於外者。」賈疏云：「其職云『逆邦國都鄙官府』，是句考徧天下。」云「計官之長」者，莊存與云：「司書以下四官，屬司會。」云「若今尚書」者，《漢書·成帝紀》：「建始四年，罷中書宦官，初置尚書員五人。」《續漢書·百官志》：「尚書六人，六百石。」劉注引蔡質《漢儀》云：「典天下歲盡集課事。」《志》又云：「凡郡國歲盡，遣吏上計。」蔡氏所云「掌天下歲盡集課事」，即掌歲計也，與周司會主計同，故舉以為況。

司書，上士二人，中士四人，府二人，史四人，徒八人。司書，主計會之簿書。【疏】注云「司

書，主計會之簿書」者，《司會》注云：「書謂簿書。」《左》昭

二十五年傳，臧會為郈賈正，計於季氏。杜注云：「送計簿於季氏。」賈疏云：「古有簡策以記事。若在君前，以笏記事。後代用簿。簿，今手版。故云吏當持簿，簿則簿書也。」

職內，上士二人，中士四人，府四人，史四人，徒二十人。職內，主人也。若今之泉所入謂之少內。【疏】注云「職內，主人也」者，《說文·人部》云：「內，入也。」故掌賦入之官謂之職內。云「若今之泉所入謂之少內」者，賈疏云：「漢之少內，亦主泉所入。案王氏《漢官解》云：『小官嗇夫各擅其職，謂倉庫少內嗇夫之屬，各自擅其條理所職主。』由此言之，少內藏聚，似今之少府，但官卑職碎，以少為名。」王應麟云：「《漢書·丙吉傳》：『少內嗇夫白吉曰：食皇孫，亡詔令。』」注云：「少內，掖庭主府藏之官也。」

職歲，上士四人，中士八人，府四人，史八人，徒二十人。主歲計以歲斷。【疏】「職歲上士四人，中士八人，府四人，史八人，徒二十人」者，此官上士、

①「史」，原誤作「胥」，今據楚本改。

中士及史員數，皆倍於職內，以主出事繁，故官吏特多也。

注云「主歲計以歲斷」者，邦國會計之事，以歲之豐歉爲斷也。金榜云：「《王制》曰：『冢宰制國用，必於歲之杪。五穀皆入，然後制國用。』考之《周官經》，司稼以年之上下出斂法，均人均力征以歲上下，其斂諸民者，每歲不同。廩人以歲之上下數邦用，以知足否，以詔穀用，以治年之豐凶。小司寇孟冬祀司民，獻民數于王，王拜受之，以圖國用而進退之。其國用多寡，亦每歲輒異。冢宰恒於歲杪制爲式法，凡受財用者，皆並式法受之，故授式法之官名職歲，義由此矣。」

職幣，上士二人，中士四人，府二人，史四人，賈四人，胥二人，徒二十人。【疏】「職幣」

者，王念孫云：「主餘財之官也。職，主也。幣，餘也。所主者財物之餘，故次於大府以下諸官之後也。」案：王說是也。幣訓餘，詳《大宰》疏。

司裘，中士二人，下士四人，府二人，史四人，徒四十人。【疏】「司裘」者，《說文·衣部》

云：「裘，皮衣也。」司裘、掌皮二官亦有府藏，故次諸府藏會計官之後。司裘不與春官司服相次者，《玉藻》注云「裘，

裘也」，故與內司服及屨人等同屬天官。

掌皮，下士四人，府二人，史四人，徒四十人。

內宰，下大夫二人，上士四人，中士八人，府四人，史八人，胥八人，徒八十人。內

宰，宮中官之長。【疏】「內宰」者，以下至內豎五官，並掌

王寢內之事，與宮正官伯職掌，內外相備，故亦屬大宰。賈

疏云：「名內宰者，對大宰治百官，內宰治婦人之事，故名

內宰。然則大宰不稱外者，爲兼統內也。」詒讓案：內宰與

小宰相對爲內外，小宰治王宮之政令，內宰治王內之政令，

職掌略同也。賈謂對大宰，未允。云「下大夫二人」者，后

卑於王，故內宰之爵亦降於小宰一等也。云「上士四人，中

士八人」者，《公食大夫禮》有內官之士，注云「夫人之官，內

宰之屬也」，即此上中士以下是也。注云「內宰，宮中

官之長」者，與下內小臣、閹人、寺人、內豎等爲長，故《月

令》仲冬「命奄尹申宮令，審門閭，謹房室，必重閉」。注

云：「奄尹，主領奄豎之官也。於周則爲內宰，掌治王之內

政宮令，幾出入及開閉之屬。」案：彼注蓋以此官所領屬官

多奄豎，故亦稱奄尹。實則此官以士人爲之，非奄官也。

《呂氏春秋·仲冬紀》高誘注云「闔尹於《周禮》爲宮人」，則非是。其九嬪以下內官，雖亦內宰所教詔，然非其屬官。賈疏謂與下女史已下爲長，非鄭指也。胡匡衷云：「《祭統》『宮宰宿夫人』，鄭注云：『宮宰，守宮官。』然則諸侯之內宰，又謂之宮宰也。」

內小臣，奄上士四人，史二人，徒八人。

奄稱士者，異其賢也。【疏】「內小臣」者，賈疏云：「案其職云：『掌王后之命，正其服位。』案《夏官·大僕職》云：『出入王之大命，正其服位。』則此小臣侍后職，與大僕侍王同，亦是佐后之事，故在此。用奄者，以其所掌在內故。」《儀禮·燕禮》遂獻左右正與內小臣，皆于阼階上，鄭彼注云：「內小臣，奄人。掌君陰事陰令，后夫人之官也。」詒讓案：內小臣者，對夏官大僕屬官小臣爲外也。王官備，故有大僕，又有小臣；內官略，故止有內小臣，其侍后與大僕侍王略同，不復立內大僕也。通言之，內小臣亦稱僕，故《書·立政》云「左右攜僕」，僞孔傳云「左右攜持器物之僕」，孔疏「謂寺人內小臣等」，是也。注云「奄稱士者，

異其賢也」者，以其職掌較重，當選擇奄之賢者爲之，故特有爵也。賈疏云：「案上酒人、漿人等奄並不稱士，則非士也。獨此云以其有賢行命爲士，故稱士也。案：《詩》巷

伯，奄官也。注云：「巷伯，內小臣。小臣於宮中爲近，故謂之巷伯。」必知巷伯與小臣爲一人者，以其俱名奄。又言巷，亦宮中爲近。又稱伯，長也。內小臣又稱士，亦是長義，故知一人也。案：賈引《詩》注，即《小雅·巷伯》箋義也。《左》襄九年傳：「令司宮巷伯儆宮。」杜注云：「司宮，奄官。巷伯，寺人。」孔疏亦以司宮爲內小臣，巷伯爲寺人，與鄭說不同。今攷《詩》箋之巷伯，即本詩之寺人孟子。杜、孔說不誤。鄭以內小臣釋之，非也。內小臣自是司宮，故《左》昭五年傳楚靈王曰「吾若以韓起爲闔，以羊舌肸爲司宮，足以辱晉」，注釋司宮云「加宮刑」。彼以司宮與闔並舉，明以加刑示辱，則司宮即此奄士無疑。惟《儀禮·燕禮》諸篇，「司宮」爲宮人，故與內小臣並見，與《左傳》義異，詳前疏。胡匡衷云：「內小臣，《左傳》、《國語》亦單言小臣。《左傳》僖四年：『與小臣，小臣亦斃。』《晉語》說此事云：『飲小臣酒，亦斃。』韋注云：『小臣，官名，掌陰事陰命，闔士是也。』」

闔人，王宮每門四人，囿游亦如之。闔

人，司昏晨以啓閉者。刑人墨者使守門。囿，御苑也。游，離宮也。【疏】「闔人」者，賈疏云：「以其掌守中門之禁，王宮在此，故亦在此。《周禮》之內，有同官別職，則此闔人

每門及囿游同名閹人而職別。《山虞》、《澤虞》云「每大澤大山及川衡林衡」，亦是別職同官也。別官同職者，唯有官聯耳。」詒讓案：此閹人無爵，則亦庶人在官者也。沈彤云：「閹人內豎，案其職則類胥若徒也。」云「王宮每門四人」者，黃度、沈彤並云「宮門，皋、庫、雉、應、路，凡五，當二十人」是也。云「囿游亦如之」者，《釋文》游作「旂」，云「本亦作游」。案：《說文·夬部》云：「游，旌旗之流也。从夬汙聲。」旂即游之省。《囿人》經及《大宰》注並作囿游，則陸本非也。「亦如之」者，亦每門四人也。其凡數無攷。注云「閹人，司昏晨以啓閉者」者，昏閹聲類同。《說文·門部》云：「閹，常以昏閉門隸也。」《祭統》云：「閹者，守門之賤者也。」《公羊》襄二十九年傳云：「閹弑吳子餘祭。閹者何？門人也，刑人也。」賈疏云：「此釋名閹人之意。昏時閉門，則此名閹人也。晨時啓門，則《論語》謂之晨門也。皆以時事爲名耳。」云「刑人墨者使守門」者，賈疏云：「此《秋官·掌戮職》文。鄭彼注云「黥者無妨於禁禦」，欲使守門。案其職云：「掌守中門之禁。」言中門，則唯雉門耳，而言每門者，彼言中門，据有禁守者言之。其實王之五門，皆使墨者守之。或解以爲王有五門，四面皆有中門，故言每門，義亦通也。案《禮記》云：「古者不使刑人守門。」鄭彼

注「謂夏殷時」。《公羊》云：「閹殺吳子餘祭，近刑人，輕死之道。」彼據人君加之寵，故云近刑人，輕死之道。若君有防衛，不親近，則非近刑人。其劓者使守閹，以其醜惡遠之，不得約彼即以十二門皆使墨者也。《詩》云「昏椽靡共」，箋云「皆奄人」。彼据后宮門，故使奄者也。」案：依鄭、賈說，此閹人皆以墨者爲之。然《詩·召旻》之昏椽，昏即閹也。鄭彼箋云：「昏椽皆奄人也。昏，其官名也；椽，椽毀陰者也。」孔疏云：「案《周禮·序官》，閹人上有內小臣，下有寺人。內小臣之與寺人，皆是奄人爲之，閹人與之爲類，官居其間，則亦奄人也。閹人云：「王宮每門四人，囿游亦如之。」然則王宮之與囿游所守門者，其官皆曰閹人。是閹之用人，非獨奄也。《掌戮》「墨者使守門，宮者使守內，別者使守囿」，則墨別皆亦爲閹，非獨宮刑者矣。但內門則用奄以守之，其外門則用墨耳。《閹人職》曰：「掌守王宮之中門之禁。」注云：「中門，於外內爲中。」天子五門，雉門爲中門。是雉門以內用奄，庫門以外用墨，其囿則用別也。官與寺人爲類，主以奄者爲名。《月令》仲冬「命奄尹審門閭，謹房室」，是門房之守，皆奄爲之。故知閹是奄人之官名也。」案：依孔說，墨守門，宮守內，別守囿，通名閹人。其說較鄭、賈爲長。《穀梁》襄二十九年傳亦云

「閭，門者也，寺人也」，是官者爲閭也。《左》莊十九年傳云「鬻拳自刖，楚人以爲大閭」；《呂氏春秋·音初篇》說夏后孔甲田，取民子以歸，子長，幕動拆櫟，斧斫斬其足，遂爲守門者；《韓非子·內儲說下》篇，齊有門者刖跪：是刖者亦爲閭也。《管子·揆度篇》云「自言能爲官，不能爲官者，刖以爲門父」，是又以刖者守門也。以意求之，《掌戮》所云「墨者使守門」者，疑通凡守城郭官府諸門者言之，司門之門徒，亦其一也。又云「刖者使守囿」者，蓋即囿游之閭。鬻拳、刖跪皆以刖者而守門，或侯國之法，與此經不同。王宮五門之閭，蓋當兼用奄墨。《匠人》注云：「內，路寢之裏也。外，路門之表也。」是王宮內外，以路門爲分限。然則皋門至應門爲外，當以墨者爲之；路門以內爲內，當以宮者爲之，《掌戮》所云「宮者使守內」是也。《後漢書·宦者傳論》亦以此「閭者守中門之禁」爲宦者，蓋晉宋以前，此經舊說有以此官爲奄人者。孔謂雉門以內用奄，庫門以外用墨，似即本於彼，義亦得通。但治朝應門，六宮嬪御所不至，似不必用奄人耳。至賈泥鄭義，乃謂不得以王城十二門皆使墨者，殊爲失攷。又本職所云中門，實兼庫雉應諸門言之。鄭、孔謂專指雉門，義固未咳；賈引或說，謂四面皆有中門，則通閭門言之，不知閭門雖亦當有閭人，然不得

稱中門，亦未必有四人也。云「囿，御苑也」者，《地官·敘官》「囿人」注云：「囿，今之苑。」《說文·口部》云：「囿，苑有垣也。一曰：禽獸曰囿。」又《艸部》云：「苑，所以養禽獸。」《竹部》云：「簾，禁苑也。」《漢書·宣帝紀》顏注引蘇林云：「折竹以繩綿連禁簾，使人不得往來，律名爲簾。」此御即簾之借字。《大戴禮記·夏小正》云：「囿也者，園之燕者也。」《呂氏春秋·重己篇》高注云：「養禽獸所，大曰苑，小曰囿。」《淮南子·本經訓》高注云：「有牆曰苑，無牆曰囿。」釋玄應《一切經音義》引《字林》義同。《詩·秦風·駟驥》孔疏云：「有蕃曰園，有牆曰囿。」《左傳》僖三十四年孔疏云：「天子曰苑，諸侯曰囿。」以上諸說，蓋各舉一端言之，實則苑囿通稱。此經及《地官·囿人》並稱囿，是周制天子稱囿。《雍氏》云「禁山之爲苑者」，非天子囿之名，《左傳疏》說非也。《淮南注》與許說正相反，疑傳寫之誤。賈疏云：「案《詩》云：『王在靈囿。』注：『所以養禽獸，天子百里，諸侯四十里。』案《孟子》：齊宣王問孟子云：『文王之囿，方七十里，猶以爲小，寡人之囿，方四十里，猶以爲大，何也？』孟子答：『文王之囿，芻蕘者往焉，雉兔者往焉，與民同之，故以爲小，不亦宜乎！君之囿，民殺其麋鹿者，如殺人之罪，民以爲大，不亦宜乎！』則文王之囿方

七十里者，大於諸侯，小於天子故也。《白虎通》又云：「天子百里，大國四十里，次國三十里，小國二十里。」與《孟子》不同者，《白虎通》細別言之也。」案：囿，王與諸侯大小之制，經無正文。賈引《白虎通義》，今本佚此文。其說與《毛詩·大雅·靈臺》傳同。《公羊》成十八年何注云：「天子囿方百里，公侯十里，伯七里，子男五里，皆取一也。」徐彥疏引《司馬法》、《穀梁》楊士勛疏引徐邈說，並同。此依今文家說三等國里數，十取一以爲囿，與此經不相應也。又案：天子靈囿在郊，故《詩·駟驥》疏云：「囿，諸侯四十里，處在於郊。《靈臺》云『王在靈囿』，鄭《駁異義》引之云『三靈，辟雍在郊明矣』。孟子對齊宣王云『臣聞郊關之內有囿焉，方四十里』，是在郊也。」又《靈臺》疏引《五經異義》云《公羊》說天子有囿臺，觀鳥獸魚鼈，在國之東南二十五里」。攷周西都，文王都豐，所作靈囿，《三輔黃圖》云「在長安西北四十二里」，蓋亦於郊內爲之。囿人所掌者即郊囿。《委人》又有野囿，則更在郊外，彼或亦當有閭人守之。又《月令》孔疏云：「路門內雖是宮室所在，亦有林苑。」焦循亦云：「《左》襄十四年傳云：『衛獻公戒孫文子、甯惠子食，皆服而朝，日旰不召，而射鴻于囿，二子從之。』是時二子應召至朝，久待不召，乃知公在囿，故往見，是囿在宮中

也。」案：依孔、焦說，王宮中亦有苑囿，然其地當甚小，與郊囿廣狹迥殊，此閭人守宮門，亦得兼掌之矣。云「游，離宮也」者，《囿人》注釋「囿游」爲離宮小苑，鄭蓋謂游即於囿內爲宮室。《說苑·正諫篇》云，咎犯曰「便游楮畫」是也。別於城中王所居之宮，故謂之離宮。以其可以游觀，故謂之游。《漢舊儀》云「上林苑中離宮觀七十所，皆容千乘萬騎」是也。賈疏云：「囿是大苑，其門皆使閭人守之也。此離宮，即「囿游之獸禁」，故彼鄭云「謂囿之離宮小苑觀處也」。或以爲游亦謂城郭中與公所爲者也。」案：賈引或說，蓋謂游在城郭中，別於囿在城郭外也。今攷《晏子春秋·諫上篇》云：「景公畋於署梁，晏子自國往見公，比至，衣冠不正，不革衣冠，望游而馳。」則游不定在城郭中矣，或說未然。

寺人，王之正內五人。寺之言侍也。《詩》云

「寺人孟子」。正內，路寢。【疏】「寺人」者，《內則》云：「爲宮室，辨外內，深宮固門，闔寺守之。」是寺人守內，與閭人守外，職掌相備，故次閭人之後。此寺人亦無爵，與閭人同。注云「寺之言侍也」者，寺侍聲類同。《廣雅·釋詁》云：「侍，近也。」《詩·大雅·瞻卬》篇「時維婦寺」，毛傳云：「寺，近也。」是寺侍並訓近。寺人者，猶言近侍之人

也。又《詩·秦風·車鄰》篇「寺人之令」，陸彼《釋文》云：「寺本或作侍。」是寺侍互通。《左傳》襄二十五年，侍人賈舉；昭二十五年，侍人僚粗；《孟子·萬章》篇，侍人瘠環；侍人並即寺人也。賈疏云：「欲取親近侍御之義。此奄人也。知者，見僖二十四年：晉文公既入，呂、卻欲焚公宮。寺人披請見，公使讓之且辭焉。披曰：『齊桓公置射鉤而使管仲相，君若易之，行者甚衆，豈惟刑臣。』」彼寺人披自稱刑人，明寺人奄人也。若然，寺人既掌內人，不掌男子；而秦詩云「欲見國君，先令寺人」，而掌男子者，彼秦仲，宣王命作大夫，始大，有車馬，其官未備，故寺人兼小臣，是以寺人得掌男子。」論讓案：《車鄰》毛傳云：「寺人，內小臣也。」孔疏云：「天子之官，內小臣與寺人別官也。《燕禮》，諸侯之禮也，經云「獻左右正與內小臣」，是諸侯之官有內小臣也。《左傳》齊有寺人貂，晉有寺人披，是諸侯之官有寺人也。然則寺人與內小臣別官矣。此云寺人內小臣者，言寺人是在內細小之臣，非謂寺人即是內小臣之官也。內小臣之官與寺人之官，猶自別矣。」案：孔說較賈爲長。引《詩》云「寺人孟子」者，《小雅·巷伯》篇文。鄭彼箋即據此經爲說。引之者，證彼寺人與此同也。彼巷伯亦即此寺人，《左傳》襄九年杜注同。《詩箋》以巷伯爲內小臣，

非是，詳前疏。云「正內，路寢」者，內與寢義同。《大戴禮記·夏小正傳》云「燕操泥而就家，人人內」，即此義。《漢書·鼂錯傳》云：「家有一堂二內。」彼專謂室爲內，與此義微異。賈疏云：「寺人既不得在王之路寢，而云正內五人者，謂在后之路寢耳。若王之路寢，不得稱內；以后宮，故以內言之。故先鄭下注后六宮，前一後五，前一則路寢。」案：賈說是也。凡王與后，皆路寢一，燕寢五，路寢爲正，燕寢爲小。此「正內」既非王寢，明據后路寢言之可知。后六寢對王六寢謂之內，猶《女史》云「內宮」是也。云「王之正內」者，后寢亦統於王，猶《內宰》稱后宮爲「王之北宮」也。但此寺人與下內豎，雖專繫后路寢，其王燕寢及后燕寢、側室等，亦富有侍御奄豎。蓋燕寢卑於正寢，或以冗散給事，無定員專直，故經唯著正內之人數與？后六寢，亦前一後五，詳《內宰》疏。

內豎，倍寺人之數。豎，未冠者之官名。

【疏】「內豎，倍寺人之數」者，王之正內十人也。內豎無爵，蓋與庶人在官者同。注云「豎，未冠者之官名」者，

《國語·楚語》云：「使富都那豎贊焉。」韋注云：「豎，未冠者也。」案：未冠謂十九以下，十五以上，故本職注謂之童豎，《學記》注云「成童十五以上」是也。賈疏云：「《春秋左

氏傳：叔孫穆子幸庚宗婦人而生牛，以爲豎官。則亦童豎未冠者。必使童子爲之者，鄭於其職注云：「使童豎通王內外之命，給小事者，以其無與爲禮，出入便疾也。」詒讓案：內豎以待御王內爲名。《文王世子》世子之記曰：「朝夕至於大寢之門外，問於內豎曰：今日安否何如？」《周書·度邑篇》云：「王至于周，自鹿至于丘中，具明不寢，王小子御告叔旦。」小子御即此內豎也。是內豎亦侍王大寢燕寢，明寺人內豎不僅侍后寢矣。內豎省文亦稱豎。《左傳》二十八年傳云：「曹伯之豎侯獯。」《管子·小稱篇》云：「管仲對桓公曰：公喜內而妬，豎刁自刑而爲公治內。」然則內豎或亦以奄爲之，然不盡用奄也。

九嬪。嬪，婦也。《昏義》曰：「古者天子后立六

宮，三夫人，九嬪，二十七世婦，八十一御妻，以聽天下之內治，以明章婦順，故天下內和而家理也。」不列夫人于此官者，夫人之於后，猶三公之於王，坐而論婦禮，無官職。【疏】「九嬪」者，此官與世婦、女御並王之妾御，不列於百官，以大宰兼治宮政，故以事類屬之。全經五篇，凡本非屬官而以事類附屬者有三：一婦官，此九嬪、世婦、女御、女祝、女史及春官世婦、內外宗等是也；一三公，地官之鄉老，爵尊於大司徒是也；一家臣，春官之都宗人、家宗人，

夏官之都司馬、家司馬，秋官之朝大夫、都士、家士是也。三者皆無所繫屬，故以其職事相近者附列各官，亦《大宰》八法官屬之變例也。

注云「嬪，婦也」者，《爾雅·釋親》文。《釋名·釋親屬》云：「天子妾有嬪，嬪，賓也，諸妾之中見賓敬也。」《曲禮》鄭注云：「嬪，婦人有法度者之稱。」孔疏云：「嬪，婦人之美稱，^①可賓敬也。」引《昏義》以下者，以九嬪、世婦、女御三官，經不列其人數，故據《禮記》補之。鄭彼注云：「三夫人以下百二十人，周制也。內治，婦學之法也。」《檀弓》云：「舜葬於蒼梧之野，蓋三妃未之從也。」注云：「帝嚳而立四妃矣，象后妃四星，其一明者爲正妃，餘三小者爲次妃。帝堯因焉。至舜不告而取，不立正妃，但三妃而已，謂之三夫人。夏后氏增以三三而九，合十二人。《春秋說》云「天子取十二」，即夏制也。以虞夏及周制差之，則殷人又增以三九二十七，合三十九人；周人上法帝嚳立正妃，又三二十七爲八十一人以增之，合百一十一人。其位后也，夫人也，嬪也，世婦也，女御也，五者相參，以定尊卑。」蔡邕《獨斷》說略同。《內宰》先鄭注亦據彼以釋六宮。金鶚云：「《周官》世婦女御不言數，而《昏義》

① 「人」，原脫，今據《曲禮》正義補。

謂天子世婦御妻，合三夫人、九嬪，共一百二十人，說未可信。《曲禮》云：「納女於天子曰備百姓。」鄭注云：「天子皇后以下百二十人，廣子姓也。」夫百姓亦約舉其大數言之，非必限定百人也。爲此說者，蓋以《王制》言天子三公、九卿、二十七大夫、八十一元士，后之設官，當與之準，故有百二十人之數。然《王制》所言，亦未可信。《周官》六官之屬，合三百六十，以法周天之度，其人數更不止此，豈止百二十人邪！鄭注以爲夏制。《昏義》以天子立六官，三公、九卿、二十七大夫、八十一元士，與后立六宮，三夫人、九嬪、二十七世婦、八十一御妻，兩相比擬，其同爲周制可知。若以三公以下百二十人爲夏制，三夫人以下百二十人爲周制，則比擬不倫矣。然則《王制》所言官數，指周制言明矣。所言周制，顯與《周官》不合。且天子之事繁，故設官必多，后之事簡，何必悉與天子相準。若王后以準天子，而諸侯三卿、五大夫、二十七上士，其夫人何不設三十五人以準之邪？后之婦官，有世婦、女祝、女史等官，已如此其備，又何必有百二十人乎？案：金說是也。此經九嬪、世婦、女御並不言數，《昏義》所說內官之數，與外官相準，而外官之數與此經六官之數，遠不相應，則內官之數亦不可信可知矣。依《昏義》說，內官三夫人視三公，九嬪視卿，世婦視大

夫，女御視士，而鄭《內司服》、《屨人》注，說內外命夫命婦秩次，則以九嬪視孤妻，世婦視卿大夫妻，復與彼文舛異。至春官世婦，則又兼有宮卿、下大夫、中士三等，此皆與《昏義》有不能強合者。又《曲禮》云：「天子有后，有夫人，有世婦，有嬪，有妻，有妾。」又以世婦在嬪上，與《昏義》及此經敘內官次第並不合。攷九嬪職主贊后，非世婦之比，《追師職》又以九嬪在內命婦之外，則九嬪必尊於世婦可知。《曲禮》文蓋偶有駁異，不爲典要也。又案：《獨斷》云：「天子一娶十二女，象十二月，三夫人，九嬪。」攷天子一娶十二女，亦見《檀弓》注引《春秋說》。而《白虎通義·嫁娶篇》引《王度記》，則云「天子一娶九女」，兩文已自差悟。蔡氏又以三夫人九嬪合充十二人之數，則古絕無是說。唯《春秋繁露·爵國篇》說天子立一后，一世夫人，中左右夫人，四姬、三良人，似即《春秋說》十二女之義。彼中左右夫人，似即三夫人，然又有世夫人及姬、良人等，尤與禮不合，必非周制也。又《管子·小匡篇》說齊襄公有九妃六嬪。尹知章注云：「天子九嬪，諸侯六嬪。」亦未知塙否。云「不列夫人于此官者，夫人之於后，猶三公之於王，坐而論婦禮，無官職」者，阮元云「于當作於」是也。案：《內宰》注亦云「夫人如三公，從容論婦禮」，此注與彼同。鄭意此經有

九嬪、世婦、女御，獨無三夫人，明三夫人擬三公，三公與王坐而論道，無正職，三夫人亦與后坐而論婦禮，無官職。《漿人》云「共夫人致飲于賓客之禮」，即此注所謂三夫人也。經文止此一見。蓋其位尊，次於后，故事亦彌簡，猶三公之事亦簡於六卿也。

世婦。不言數者，君子不苟於色，有婦德者充之，

無則闕。【疏】「世婦」者，世與大義同，謂内外命婦之大者。《曲禮》孔疏云：「婦，服也。言其進以服事君子也。以其猶貴，故加以世言之，亦廣世胤也。」案：孔說未塙。惠士奇云：「春官世婦，其職視宮卿，二人，其次視下大夫，四人，其次視中士，八人，而天官世婦則闕焉。康成謂屬春官者，如漢大長秋，屬天官者，乃二十七世婦。非也。世婦屬天官內宰，而職掌禮事，故兼屬春官，其職本同，文有詳略。《春官·世婦》云「掌女宮之宿戒及祭祀，比其具」，《天官·世婦》亦云「祭之日，涖陳女宮之具」。《春官·世婦》云「帥六宮之人共盥盛」，《天官·世婦》亦云「帥女宮而濯概爲盥盛」。《春官·世婦》則曰大賓客云云，大喪云云，《天官·世婦》則一言以蔽之曰「掌祭祀賓客喪紀之事」。彼列其目，此舉其綱也。獨内外宗女不屬天官，然內宗云「凡卿大夫之喪掌其弔臨」，《春官·世婦》則曰「相内外宗

之禮事」，《天官·世婦》亦云「掌弔臨于卿大夫之喪」，則又未嘗不同也。但此略而彼詳耳。」案：惠謂此世婦與春官世婦職同，以經攷之，良是。竊謂世婦蓋有內命婦、外命婦之別。此世婦次於嬪御之間，則內命婦也。春官世婦與内外宗並列，則外命婦也。職掌雖略同，而内外迥別，故分屬二官。至鄭謂春官世婦爲男子，則甚誤，互詳《春官·敘官》疏。

注云「不言數者，君子不苟於色，有婦德者充之，無則闕」者，對九嬪稱九是言數，世婦及下女御皆不著人數，明必有德乃充，不必備數也。世婦以下，人數衆多，故容有不備。九嬪以上人少，則必備三九之數。賈疏謂九嬪無德，亦與世婦女御同闕，故特互其文，令義兩得見，誤。

女御。《昏義》所謂御妻。御猶進也，侍也。【疏】

注云「《昏義》所謂御妻」者，《昏義》御妻在九嬪、世婦之下，與此女御差次正相當，故知女御即御妻也。御妻又謂之妻，《曲禮》云：「天子有妻有妾。」鄭彼注云「妻，八十一御妻，《周禮》謂之女御，以其御序於王之燕寢」是也。案：《喪大記》云「君之喪，夫人、世婦、諸妻疏食水飲」，諸妻疑亦據侯國之女御言之。但御妻在嬪、世婦下，則不得取齊匹之義。《荀子·君子篇》云：「天子無妻，告人無匹也。」然則女御者其正名，御妻者其別稱，不爲典要者也。《周

書·祭公篇》云「汝無以嬖御固莊后」，嬖御即女御之屬。此經女御無人數，蓋亦不必備員。其分列各職者，唯內司服女御二人，縫人女御八人，餘無可攷。內宰九嬪兩職，又謂之九御，亦非其員數。《昏義》御妻八十一人，僣八十一元士，與此經元士之數不合，不宜據彼以定此女御之數，前疏已辯之矣。云「御猶進也，侍也」者，《春官·敘官》注義同。《廣雅·釋詁》云：「御，進也。」又《釋言》云：「御，侍也。」《獨斷》云：「御者，進也。凡衣服加於身，飲食入於口，妃妾接於寢，皆曰御。」

女祝四人，奚八人。女祝，女奴曉祝事者。

【疏】「女祝」者，此官與女史並后宮之官，故次嬪御之後。惠士奇云：「女祝視大祝、小祝。」 注云「女祝，女奴曉

祝事者」者，謂亦與「女酒，女奴曉酒」同。《說文·冂部》云：「祝，祭祀主贊詞者。」案：女祝雖無爵位，然備官后宮，且古者巫祝皆世事，則女祝疑當以祝官之家婦女爲之，與女巫略同。鄭槩以女奴當之，恐非。

女史八人，奚十有六人。女史，女奴曉書者。

【疏】「女史」者，《說文·史部》云：「史，記事者也。」惠士奇云：「女史視大史、小史。」詒讓案：亦兼視內史、外史，

詳本職疏。 注云「女史，女奴曉書者」者，謂通曉文字者，亦與女酒同。案：女史疑當以良家婦女知書者爲之，奚乃女奴耳，鄭義恐未允。春官世婦之屬，有女史二人，與此官亦異。

典婦功，中士二人，下士四人，府二人，

史四人，工四人，賈四人，徒二十人。典，主也。

典婦功者，主婦人絲枲功官之長。【疏】「典婦功」者，以下三官並主女功之事，故次官官之後。云「工四人」者，此不言「女工」，則男工也。疑即以幄氏之工爲之。云「賈四人」者，賈疏云：「以其絲枲有善惡貴賤之事，故須賈人也。」

注云「典，主也」者，《廣雅·釋詁》同。《說文·支部》云：「敷，主也。」典即敷之段字。云「典婦功者，主婦人絲枲功官之長」者，絲枲並婦功之事，此典婦功總掌其事，爲下典絲、典枲諸官之長也。惠士奇云：「《月令》染人曰『婦官』，蓋典婦功之屬官。」

典絲，下士二人，府二人，史二人，賈四

人，徒十有二人。【疏】「典絲」者，《說文·絲部》

云：「絲，蠶所吐也。」案：凡繒帛皆以絲爲之，此官通掌之也。

典臬，下士二人，府二人，史二人，徒二

十人。【疏】「典臬」者，賈疏云：「臬，麻也。案《喪服傳》

云「牡麻者，臬麻也」，則臬是雄麻，對苴是麻之有黃實者也。」案：臬，詳《籩人》疏。《淮南子·覽冥訓》云「位賤尚慕」，惠士奇謂慕與臬通，即此典臬是也。《淮南》高注以慕爲慕耳，菜名，失之。案：古無木棉，凡布皆以麻葛爲之，此官通掌之也。

內司服，奄一人，女御二人，奚八人。內

司服，主宮中裁縫官之長。有女御者，以衣服進，或當於王，廣其禮，使無色過。【疏】「內司服」者，此官與縫人並掌宮中衣服，亦是婦功之事，故次女功官之後。賈疏云：「以其掌后以下六服。言內司服者，亦是對春官司服男子服爲內。不與春官司服同處者，以從內官之例，故在此。」云「奄一人」者，賈疏云：「以其衣服事多，須男子兼掌。以與婦人同處，故用奄也。」云「女御二人」者，以王后尊貴，其衣服自有法式，故以女御內官監領之。蓋女御雖於內命婦秩次最卑，然尚當尊於無爵之奄，故《縫人》敘亦以女御次奄下，而其職則云「以役女御」，以相比例，知此官當亦聽於女御，女御非此官之屬也。若然，經不以女御領奄者，以內

司服官府，自以奄主之，女御爲內官，特兼領其事，而不常居其寺，故經首列奄，次列女御，亦變例也。注云「內

司服，主宮中裁縫官之長」者，《說文·衣部》云：「裁，制衣也。」又《糸部》云：「縫，以鍼紩衣也。」賈疏云：「長者，謂與下縫人爲長。」云「有女御者，以衣服進，或當於王，廣其禮，使無色過」者，謂此女御二人，與奄官同職，蓋選擇良家女子爲之，亦得以禮侍御於王，故與前女御同名也。賈疏云：「以此女御還是女奴曉進御衣服者，故與女酒、女祝、女史同號女也。以衣服進，謂進衣於王。王見之，或當王意，廣其禮，得與八十一女御同名。欲見百二十人外，兼有此女御之禮，王合御幸之，使王無淫色之過，故名女御也。」案：賈說非也。女奴乃罪人没人者，至卑賤，不得爲侍御。下縫人女工在女御之下，注謂是女奴，則鄭不以女御爲女奴明矣。但此與縫人二職之女御，當即選上女御爲之，鄭似謂在八十一人之外，亦未允。女御本無定數，不必有八十一人，詳前疏。

縫人，奄二人，女御八人，女工八十人，

奚三十人。女工，女奴曉裁縫者。【疏】「縫人，奄二

人」者，賈疏云：「奄有二人，亦是縫線事多，須有男子故也。」云「女御八人，女工八十人」者，女御亦與奄官同職，專

掌縫王后之衣服，故本職云「掌王宮之縫線之事，以役女御，以縫王及后之衣服」，明奄官與女工爲女御役，每十工，以女御一人監領之。若然，此女御亦非縫人之屬，而女工則屬女御，又兼屬縫人。蓋亦《大宰》八法官屬之變例也。

注云「女工，女奴曉裁縫者」者，此女工亦於女奴中選充之，與女祝、女史同。《國語·晉語》云「鄭伯嘉造納女工妾三十人」，蓋即此女工。韋注以工爲樂師，非也。又《左》成二年傳，魯賂楚以執鍼織紵皆百人。杜注云：「執鍼，女工。織紵，織繒布者。」蓋亦女工之別名也。

染人，下士二人，府二人，史二人，徒二

十人。【疏】「染人」者，《說文·水部》云：「染，以染繒爲色。」案：染人亦兼染絲及帛布等，許偏舉一端言之。賈疏云：「案其職云『掌染絲帛』。因婦人衣服，故亦連類在此也。」

追師，下士二人，府一人，史二人，工二

人，徒四人。追，治玉石之名。【疏】「追師」者，賈疏云：「在此者，職云『掌王后之首服，爲副、編、次、追衡、筭』。亦因婦人衣服，連類在此。若然，男子首服在《夏官·弁師》者，以其男子是陽，義又取夏時萬物長大，①長

大乃冠，故在《夏官》。此婦人，直取首服配衣，故與衣連類在此。若然，首反處下者，以冠履自相對，不與服爲先後，故不在上也。」云「工二人」者，蓋即以玉人雕人之工爲之。

注云「追，治玉石之名」者，本職注云：「追猶治也。」《詩·大雅·棫樸》篇「追琢其章」。毛傳云：「追，雕也。金曰雕，玉曰琢。」鄭箋云：「《周禮》追師掌追衡筭，則追亦治玉也。」《爾雅·釋器》云「玉謂之雕」，又云「玉謂之琢」，又云「雕謂之琢」，是雕琢並爲治玉之名。《荀子·富國篇》引《詩》追作「雕」，《說苑·修文篇》又引作「彫」。又《詩·周頌·有客》篇「敦琢其旅」，孔疏云：「敦雕古今字。」案：《說文·玉部》云：「琯，治玉也。」彫彫並琯之借字，琯、追、敦，一聲之轉。

屨人，下士二人，府一人，史一人，工八

人，徒四人。【疏】「屨人」者，《說文·屨部》云：「屨，履也。」賈疏云：「案其職云『掌王及后之服屨』，故從內官衣服，亦連類在此。若然，追師專掌婦人首服，此屨人兼男子屨舄，在下體，賤，故男子婦人同在此官也。」云「工八人」

①「時」，原誤作「詩」，今據《周禮注疏》改。

者，蓋以韋氏之工爲之。《呂氏春秋·召類篇》，子罕曰「南家工人也，爲鞵者也」。高注云：「鞵，履也，作履之工也。」亦此工之類。

夏采，下士四人，史一人，徒四人。夏采，

夏翟羽色。《禹貢》：徐州貢夏翟之羽。有虞氏以爲綏，後世或無，故染鳥羽，象而用之，謂之夏采。【疏】「夏采」者，《釋文》云：「采或作菜。」案：采菜字通。賈疏云：「在此者，其職云『掌大喪，以冕服復于大祖，以乘車建綏，復于四郊』。喪事是終，故在未職也。」詒讓案：此官所掌，止大喪復一事，疑文有闕佚。大喪非常，復又喪紀之小節，不當專設一官也。右天官之屬，卿一人，中大夫四人，下大夫十二人，上士四十二人，中士百十八人，下士百七十九人，府八十五人，史百四十八人，胥百七十四人，徒二千二百四人，工二十二人，賈四十四人。凡正官自卿至庶人，總三十三人。又奄上士四人，寺人、內豎及奄無爵者四十四人。內司服縫人女御十人，女祝四人，女史八人，女奴百二十五人，奚六百七十二人，女工八十人。凡女官、女庶人，總八百九十九人。此外九嬪、世婦、女御無員數，閭人每門四人，有員數，無總數，不可計。大凡可計者，總三千九百八十人。注云「夏采，夏翟羽色」者，《染人》云「秋染

夏」，注云：「染夏者，染五色。謂之夏者，其色以夏狄爲飾。」又《月令》，季夏「命婦官染采」，鄭彼注云：「采，五色也。」據此，則夏即謂染五色，象夏翟之羽采，即《畫績》所謂五采備也。此官掌以乘車建旄，復于四郊；旄有染鳥羽爲飾，所謂夏采也。《穀梁》隱五年傳「舞夏」，范注云：「夏，大也。大謂大雉。大雉，翟雉。」此亦以夏爲夏翟，而訓義又小異。夏翟，詳《染人》疏。云《禹貢》徐州貢夏翟之羽」者，《禹貢》徐州云：「羽畎夏翟」，亦詳《染人》疏。云「有虞氏以爲綏」者，鄭據《明堂位》云「有虞氏之旂，夏后氏之綏」，而互易其字，又讀綏爲綏，其說非也。綏即《巾車》五路所建之大麾，《司常》九旗之旄也，不必著羽。其著羽者，別爲九旗之旄旌。詳本職及《巾車》、《司常》疏。云「後世或無，故染鳥羽象而用之，謂之夏采」者，賈疏云：「案：《冬官考工記》有鍾氏染羽。夏即五色也。此職中注及彼注皆云「綏謂注旄於干首」，不云翟羽者，蓋注文不具耳。」

周禮正義卷二

大宰之職，掌建邦之六典，以佐王治邦

國：一曰治典，以經邦國，以治官府，以紀萬民；二曰教典，以安邦國，以教官府，以擾萬民；三曰禮典，以和邦國，以統百官，以諧萬民；四曰政典，以平邦國，以正百官，以均萬民；五曰刑典，以詰邦國，以刑百官，以糾萬民；六曰事典，以富邦國，以任百官，以生萬民。大曰邦，小曰國，邦之所居亦曰國。典，常也，經也，

法也。王謂之禮經，常所乘以治天下也；邦國官府謂之禮法，常所守以爲法式也。常者，其上下通名。擾猶馴也。統猶合也。詰猶禁也，《書》曰「度作詳刑，以詰四方」。任猶傳也，生猶養也。鄭司農云：「治典，冢宰之職，故立其官，曰使帥其屬而掌邦治，以佐王均邦國；教典，司徒之職，故立其官，曰使帥其屬而掌邦教，以佐王安擾邦國；禮

典，宗伯之職，故立其官，曰使帥其屬而掌邦禮，以佐王和邦國；政典，司馬之職，故立其官，曰使帥其屬而掌邦政，以佐王平邦國；刑典，司寇之職，故立其官，曰使帥其屬而掌邦禁，以佐王刑邦國。此三時皆有官，唯冬無官，又無司空，以三隅反之，則事典司空之職也。《司空》之篇亡。《小宰職》曰：「六曰冬官，其屬六十，掌邦事。」【疏】「大宰之職」者，天官之正所分掌之職事，即下八法之「官職」也。官各有職，百官府所同，經惟大宰、小宰、宰夫云職者，以正、貳、攷，其官特尊，故別異其文。地春夏秋冬四官並放此。云「掌建邦之六典」者，《敘官》注云「建，立也」。經例言建者，並謂修立其政法之書，頒而行之。六典至九兩，即後文「治象之法」，亦即治官官法之總會也。六典分屬六官，大宰掌治而總建六典者，《敘官》先鄭注云「六官皆總屬於冢宰」是也。云「以佐王治邦國」者，大宰之治，外統邦國，故《穀梁》僖九年傳云：「天子之宰，通于四海。」云「一曰治典，以經邦國，以治官府，以紀萬民」者，《國語·楚語》韋注云：「經，經緯也。」《大戴禮記·盛德篇》云：「是故官屬不理，分職不明，法政不一，百事失紀，曰亂也，亂則飭冢宰。」又云「冢宰之官以成道」，「以之道則國治」。即治邦國官府之義。《詩·大雅·棫樸》云「綱紀四方」，鄭箋云：「以綱呂

喻爲政，張之爲綱，理之爲紀。《白虎通義·三綱六紀》篇云：「綱者，張也。紀者，理也。大者爲綱，小者爲紀，所以張理上下，整齊人道也。」《內則》云：「后王命冢宰，降德于衆兆民。」鄭注云：「天子曰兆民，諸侯曰萬民。」案：此散文得通。賈疏謂以畿內據近而言，非是。云「二曰教典，以安邦國，以教官府，以擾萬民」者，《盛德記》云：「地宜不殖，財物不蕃，萬民飢寒，教訓失道，風俗淫僻，百姓散敗，曰危也，危則飭司徒。」又云「司徒之官以成德」，「以之德則國安」。即安邦國之義。云「三曰禮典，以和邦國，以統百官，以諧萬民」者，《爾雅·釋詁》云：「諧，和也。」和諧訓同，變文以見義。《盛德記》云：「父子不親，長幼無序，君臣上下相乖，曰不和也，不和則飭宗伯。」又云「宗伯之官以成仁」，「以之仁則國和」。即和邦國諧萬民之義。云「四曰政典，以平邦國，以正百官，以均萬民」者，《盛德記》云：「賢能失官爵，功勞失賞祿，爵祿失則士卒疾怨，兵弱不用，曰不平也，不平則飭司馬。」又云「司馬之官以成聖」，「以之聖則國平」。即平邦國之義。云「五曰刑典，以詰邦國，以刑百官，以糾萬民」者，《小宰》注云：「糾猶割也，察也。」《盛德記》云：「刑罰不中，暴亂姦邪不勝，曰不成，不成則飭司寇。」即詰邦國之義。云「六曰事典，以富邦國，以任百

官，以生萬民」者，《盛德記》云：「百度不審，立事失理，財物失量，曰貧也，貧則飭司空。」即富邦國之義。治典教典曰官府，禮政刑事四典曰百官者，亦變文也。後文及《小宰》、《宰夫》，詳言之曰百官府，略言之則或曰官府，或曰百官，其實一也。賈疏謂尊天地二官，不局其數，故不云百官而云官府，非也。《小宰》六職及諸官敍首所說，與此經小異大同，並文偶變易，不爲義例。注云「大曰邦，小曰

國」者，《說文·邑部》云：「挹，國也。」又《口部》云：「國，邦也。」《釋名·釋州國》云：「大曰邦，邦，封也，封有功於是也。」案：此注析言之，故大邦小國，大小並據封域所包而言。許統言之，故邦國互訓，不分大小。此經上曰邦者，據王國而言；下曰邦國者，總舉大小侯國通言之。王國亦曰國，故《詛祝》云：「作盟詛之載辭，以敍國之信用，以質邦國之劑信。」注云：「國謂王之國。邦國，諸侯國也。」賈疏云：《周禮》凡言邦國者，皆是諸侯之國。此言大曰邦小曰國者，止據此文邦在上國在下，故爲此解。案：《儀禮·覲禮》云「同姓大國，異姓小邦」，則邦國大小通也。「云「邦之所居亦曰國」者，此復於大邦小國中析言之，明國又爲對野之稱也。《呂氏春秋·明理篇》高注云：「國，都也。」賈疏云：「此即據王國而言，故上云「惟王建國」，《匠人》「營

國方九里」，與《典命》「國家」，皆是「邦之所居亦曰國」也。」《釋文》引干注云：「國，天子諸侯所理也。邦，疆國之境。」案：理當作治，陸書傳寫，避唐諱改。干以國爲天子諸侯所治，即邦之所居也，惟以邦爲國境，則不分邦大國小，與鄭說小異。云「典，常也，經也，法也」者，賈疏云：「《爾雅·釋詁》云：『典，常也。』孫氏云『禮之常也』。《釋言》云：『典，經也。』又云法者，以其經常者即是法式。」詒讓案：《說文·丁部》云：「典，五帝之書也。」又引莊都說，典，大冊也。典本訓書冊，書冊所以著政法，故又爲典法也。《毛詩·周頌·維清》傳云：「典，法也。典法者，治之大經，可以常行者，故又訓經、訓常，此並展轉引申之義。鄭言此者，明「典」含義甚廣，施之尊卑，各有所取也。云「王謂之禮經，常所秉以治天下也」者，即「經邦國」之義，明上秉之以治下者也。云「邦國官府謂之禮法，常所守以爲法式也」者，法式者，下守之以事上，亦與下「八法治官府」義略同。云「常者，其上下通名」者，賈疏云：「經據在上，灋據在下，至於王與邦國官府，俱有常義，故云常者上下通名也。」云「擾猶馴也」者，《服不氏》注義同，此假借之義也。呂飛鵬云：「《說文·手部》『擾，煩也』，與馴義異。《牛部》『擾，牛柔謹也』，馴擾之擾，當作『擾』。《玉篇》曰：『《尚書》

「擾而毅」，字如此。」惠棟云：「《春秋傳》云：『乃擾畜龍。』應劭《史記注》云：『擾音柔。擾，馴也。』《尚書》『擾而毅』。徐廣曰：『擾一作柔。』擾有柔音，故《史記》或作柔。又有馴音，故李軌、徐邈皆音尋倫反。或音而小反，失之。」案：惠、呂說是也。擾即擾之借字。《廣雅·釋詁》云：「擾、馴，善也。」又《釋言》云：「馴，擾也。」擾柔亦聲近義通，《國語·齊語》云「寬惠柔民」，柔民猶言擾民也。《地官·敘官》注云「擾亦安也」，安與馴義亦相成。云「統猶合也」者，後「八統」注云：「統所以合牽以等物也。」《說文·糸部》云：「統，紀也。紀，別絲也。」別絲必總合之，故又引申爲統合之義。《漢書·敘傳》張晏注云：「統，合也。」《書·周官》孔疏引馬融注云：「統，本也。百官，是宗伯之事也。」案：本與統合，義亦相近。云「詰猶禁也」者，《說文·言部》云：「詰，問也。」引申爲訶禁之義。《廣雅·釋詁》云：「詰，責也。」責與禁義亦相成。《釋文》引干注云：「詰，彈正糾察也。」義與鄭略同。引《書》曰「度作詳刑，以詰四方」者，《呂刑》文。偽孔本「刑」上無「詳」字。《大司寇》注引《書》亦作「詳刑」，蓋鄭據今文《書》爲注，本有此字。《後漢書·劉愷傳》李注引鄭《書》注云：「詳，審察之也。」《書》偽孔傳云：「度時世所宜，訓作贖刑，以治天下四

方之民。」此引之者，證詰邦國即彼詰四方也。云「任猶傳也」者，後注同。《說文·人部》云：「任，保也。」引申爲傳立之義。《釋名·釋言語》云：「事，傳也。傳，立也。凡所立之功也。故青徐人言立曰傳也。」案：傳有立義。此經凡作官民以立其職事，治土地以立其材產，並謂之任。《大司馬》注又云：「任猶事也。」事與傳聲義亦同。賈疏云：「傳猶立也，東齊人物立地中爲傳，欲使百官皆立其功也。」云「生猶養也」者，本職後注同。《說文·生部》云：「生，進也。」引申爲生養之義。《大戴禮記·夏小正傳》云：「養，長也。」生長義亦同。賈疏云：「冬官主土地，所以養民故也。」鄭司農云「治典冢宰之職」以下者，並據五官敘官文。云「此三時皆有官，唯冬無官，又無司空」者，謂四時之官，唯《冬官》亡闕也。云「以三隅反之，則事典司空之職也」者，三隅反，《論語·述而》篇文。謂以春夏秋冬三官例之，則《司空》篇首，當有使帥其屬而掌邦事之文，故知事典司空之職是也。云「司空之篇亡」者，謂河間獻王得《周官》時，亡此篇。賈疏謂六國時亡，其時以《考工記》代之，非也，詳前及《考工記·總敘》疏。引《小宰職》曰「六曰冬官，其屬六十掌邦事」者，《冬官》既亡，而《小宰》六屬有冬官掌邦事之文，故引以證司空掌事典也。以八濩治官府：一曰官屬，以舉邦治；二曰官職，以辨邦治；

三曰官聯，以會官治；四曰官常，以聽官治；五曰官成，以經邦治；六曰官濩，以正邦治；七曰官刑，以糾邦治；八曰官計，以弊邦治。百官所居曰府。弊，斷也。鄭司農云：「官屬

謂六官，其屬各六十。若今博士、大史、大宰、大祝、大樂屬大常也。《小宰職》曰「以官府之六屬舉邦治，一曰天官其屬六十」是也。官職謂六官之職，《小宰職》曰：「以官府之六職辨邦治，一曰治職，二曰教職，三曰禮職，四曰政職，五曰刑職，六曰事職。」官聯謂國有大事，一官不能獨共，則六官共舉之。聯讀爲連，古書連作聯。聯謂連事通職，相佐助也。《小宰職》曰：「以官府之六聯合邦治，一曰祭祀之聯事，二曰賓客之聯事，三曰喪荒之聯事，四曰軍旅之聯事，五曰田役之聯事，六曰斂弛之聯事。」官常謂各自領其官之常職，非連事通職所共也。官成謂官府之成事品式也。《小宰職》曰：「以官府之八成經邦治，一曰聽政役以比居，二曰聽師田以簡稽，三曰聽閭里以版圖，四曰聽稱責以傅別，五曰聽祿位以禮命，六曰聽取予以書契，七曰聽賣買以質劑，八曰聽出入以要會。」官法謂職所主之法度，①

① 上「法」，原作「政」，據孫疏出文改。

官職主祭祀、朝覲、會同、賓客者，則皆自有其法度。《小宰職》曰：「以法掌祭祀、朝覲、會同、賓客之戒具。」官刑謂司刑所掌墨、劓、剕、劓、官、劓、殺、劓也。官計謂三年則大計羣吏之治而誅賞之。《玄》謂官刑，《司寇》之職五刑，其四曰官刑，上能糾職。官計謂《小宰》之六計，所以斷羣吏之治。【疏】「以八灋治官府」者，《釋文》云：「灋，古法字。」案：《說文·廌部》云：「灋，刑也。平之如水，从水。廌所以觸不直者去之，从廌，去。重文法，今文省。」凡經皆作灋，注皆作法，經例用古字，注例用今字也。法本為刑法，引申之，凡典禮文制通謂之法。《韓非子·難三篇》云：「法者，編著之圖籍，設之於官府而布之於百姓者也。」此八法為治百官之通法。全經六篇，文成數萬，總其大要，蓋不出此八科。以《大宰》一職論之，自職首至末，通為官職。其中六典八法之等，建立大綱，則官法也。「正月之吉始和布治於邦國都鄙」以下，行事細別，則官常也。「歲終，則令百官府各正其治，受其會，聽其致事，而詔王廢置，三歲則大計羣吏之治而誅賞之」。受會則官成也，廢置誅賞則官刑也，計吏則官計也。至於率領貳攷以下，則有官屬；旁通五官，則有官聯。其餘六官三百六十職，雖爵有尊卑，事有繁簡，要此八法足以該之矣。賈疏云：「此八灋雖不云

建，亦有建義，故鄭注《大史職》云「六典、八灋、八則，冢宰所建，以治百官，大史又建焉」是也。上六典云治邦國，此八灋云治官府，官府，在朝廷之官府也。云「一曰官屬，以舉邦治」者，賈疏云：「以下皆單言邦，據王國而言之。」云「三曰官聯，以會官治，四曰官常，以聽官治」者，此八灋皆云邦治，唯官聯、官常云官治者，亦變文，無義例，故《小宰》六聯亦云合邦治。賈疏謂「官聯言官，欲取會合衆官，乃始得治，官常言官，欲取官有常職，各自治其官。故二者不言邦而云官」失之。餘詳《小宰》疏。注云「百官所居曰府」者，《廣雅·釋官》云：「府，舍也，官也。」《管子·度地篇》云：「官府寺舍。」《文選·東京賦》薛綜注云：「官吏所止為府。」《左》隱七年孔疏引《風俗通》云：「府，聚也。公卿牧守府，道德之所聚也。」案：府者大名，其小者即「宮正」次舍之舍，注云「舍，其所居寺」是也。凡內外衆官皆有府寺，長各率其屬而居之。賈疏云：「官府與上府史之府別，彼府主藏文書，此府是百官所居處，皆是府聚之義也。」云「弊，斷也」者，《小宰》、《眡侵》、《掌囚》注並同。《小爾雅·廣言》云：「蔽，斷也。」《左》昭十四年傳「叔魚蔽罪邢侯」，杜注同。《大司寇》先鄭注引《左傳》，蔽作弊，弊即蔽之借字。鄭司農云「官屬謂六官其屬各六十」者，據《小宰》

六屬文。屬猶言屬別，謂以爵秩尊卑相領隸。《國語·楚語》云：「五物之官陪屬萬，爲萬官。」彼據五官言之，義亦同也。凡官屬，有總屬，有分屬，有當官之屬，有冗散之屬。總屬即六官屬各六十，通屬於其正是也。分屬若庖人、內饗、外饗、亨人屬膳夫是也。當官之屬，若宮正中下士以下，屬於上士是也。冗散之屬，若四方之以舞仕者屬旄人，國勇力之士屬司右，相犬、牽犬者屬犬人，皆無職名員數是也。四者各以尊卑相隸，通謂之官屬，先鄭舉其大者言之。凡六官之屬，亦多贏羨，不皆六十，《小宰》約舉大數耳。詳彼疏。云「若今博士、大史、大宰、大祝、大樂屬大常也」者，《漢書·百官公卿表》云：「奉常，秦官，掌宗廟禮儀，景帝中六年，更名太常，屬官有太樂、太祝、太宰、太史、太卜、太醫六令丞。博士，秦官，掌通古今，武帝建元五年，初置五經博士。」引之者，證官大小相屬之事。引《小宰職》曰：「以官府之六屬舉邦治，一曰天官，其屬六十是也」者，以此官屬舉邦治與彼文同，故舉以相證。六屬止引天官者，撮舉六官之首，餘不備詳。云「官職謂六官之職」者，職者，主領之言，即《敘官》注云「各有所職而百事舉」也。凡三百六十職，通謂之官職，此舉其大者明之。引《小宰職》曰「以官府之六職辨邦治，一曰治職，二曰教職，三曰禮職，四曰政職，

五曰刑職，六曰事職」者，亦證此官職辨邦治，與彼文同。云「官聯謂國有大事，一官不能獨共，則六官共舉之」者，大事即小宰六聯之屬，其事衆多，則六官之屬相佐助共舉之。依《小宰》云「凡小事皆有聯」，則不必大事而後有聯。此據六官共舉者言之，故云大事。其小事則不必合六官，或異官，或同官，凡各屬共爲一事，亦得爲聯。《儀禮·燕》、《食》、《射》、《聘》諸篇，衆官各執其事，亦即官聯之法，故《燕禮》、《大射儀》注謂庶子與膳宰、樂正聯事，即其義也。云「聯讀爲連，古書連作聯」者，段玉裁云：「漢以後，連貫字皆用連，不用聯，故司農以今字易古字，而又明之曰，周秦古書連貫字皆用聯。」《說文·耳部》曰：「聯，連也，耳連於頰，絲連不絕，故從耳從絲。」此古書二字，與凡言故書者不同。案：段說是也。云「聯謂連事通職，相佐助也」者，《王制》注云「連猶聚也」，謂連聚數官，旁通它職，互相佐助，以合治一事。《周書·大戒篇》云：「連官集乘，同憂若一。」《荀子·王制篇》云：「職而不通，則職之所不及者必隊。」蓋言官聯也。《藝文類聚·職官部》引胡廣《漢官解詁》云：「光祿大夫與博士，俱以儒雅之選，異官通職，《周官》所謂官聯者也。」說與鄭同。引《小宰職》曰「以官府之六聯合邦治，一曰祭祀之聯事，二曰賓客之聯事，三曰喪荒

之聯事，四曰軍旅之聯事，五曰田役之聯事，六曰斂弛之聯事」者，亦證此官聯會邦治。彼云「合邦治」，會合義同。云「官常謂各自領其官之常職，非連事通職所共也」者，謂各職當官常行之事，《大史》云「祭之日執書以次位常」是也。每官各有其專領之職事，不得相侵越，官常主分，與官聯主合，義正相反。蓋以官職分言之，著於書者爲官法，布於行事者爲官常，官尊者法與常兼備，官卑者則惟奉行官常而已。故《宰夫》八職「一曰正，掌官灋以治要；二曰師，掌官成以治凡；三曰司，掌官灋以治目；四曰旅，掌官常以治數。」明司以上皆有官法，旅以下則惟有官常也。云「官成謂官府之成事品式也」者，謂各官府所掌之事已成，則案其簿書文字，攷其品數法式，即治會之事。《司會》云：「以參互攷日成，以月要攷月成，以歲會攷歲成。」此官成正與日成、月成、歲成同義。《司書》云：「凡稅斂，掌事者受灋焉。及事成，則入要貳焉。」注云：「成猶畢也。」此注云成事，猶彼云事成；彼要貳，亦即官成之要會也。然則鄭所謂成事品式，即謂凡官事之有文籍可稽校案驗者，《小宰》以比居簡稽等爲八成，正是此義。士師掌士之八成，邦汙邦賊之等，亦即最會刑名之簿書。《王制》云「百官各以其成質於三官，大司徒、大司馬、大司空以百官之成質於天子」，即此

官成也。賈疏乃謂「官自有成事品式，依舊行之」，則是有司循行故事，與官常殆無區別，經注之義，皆不如是矣。引《小宰職》曰「以官府之八成經邦治，一曰聽政役以比居，二曰聽師田以簡稽，三曰聽閭里以版圖，四曰聽稱責以傅別，五曰聽祿位以禮命，六曰聽取予以書契，七曰聽賣買以質劑，八曰聽出入以要會」者，亦證此官成經邦治，與彼文正同。後文云「以官成待萬民之治」，注亦釋爲八成，與此義同。云「官法謂職所主之法度，官職主祭祀、朝覲、會同、賓客者，則皆自有其法度」者，此注用今字作法也。謂邦之大事，各有專法，著其禮節名數，若今會典、通禮之屬，一官秉之，以授衆官，使各依法共治之，是謂官法。若《大司徒》之地法，《小司徒》之比法，《大司馬》之戰法，後世謂之司馬法，《縣師》之縣法，《稍人》謂之縣師之法，皆是也。鄭約舉此四者，爲下引《小宰職》文起義耳。引《小宰職》曰「以法掌祭祀、朝覲、會同、賓客之戒具」者，亦以彼云「以法」，與此六法文同。彼又云「軍旅、田役、喪荒亦如之」，此注不及者，亦文不備。云「官刑謂司刑所掌墨臯、劓臯、宮臯、剕臯、殺臯也」者，據《司刑》五刑文。臯，古罪字。凡經例用古字，或作臯；注例用今字，皆作罪。今《司刑》經並作罪，而此注引乃作臯，與例不合，疑誤。詳《甸師》及《司刑》疏。

賈疏云：「此是正五刑，施於天下，非爲官中之刑，故後鄭不從之也。」云「官計謂三年則大計羣吏之治而誅賞之」者，據後文，凡三年大計與歲計，通爲官計，先鄭略舉一隅爲釋也。云「玄謂官刑，司寇之職五刑，其四曰官刑，上能糾職」者，據《大司寇》文。《宰夫》「官刑」注義同。凡百官府黜陟廢置誅賞，並以此爲斷，與《司刑》「五刑」異也。《書·舜典》云：「鞭作官刑。」《史記·五帝本紀》《集解》引馬融云：「官刑爲辨治官事者爲刑。」案：鞭亦官府輕刑之一也。賈疏云：「是專施於官府之中，於義爲當也。」云「官計謂《小宰》之六計，所以斷羣吏之治」者，《小宰》云「以聽官府之六計，弊羣吏之治」，與此經官計文亦相會，故鄭據彼爲歲計，補先鄭義也。以八則治都鄙：一曰祭祀，以馭其神；二曰灋則，以馭其官；三曰廢置，以馭其吏；四曰祿位，以馭其士；五曰賦貢，以馭其用；六曰禮俗，以馭其民；七曰刑賞，以馭其威；八曰田役，以馭其衆。都之所居曰鄙。則，亦法也。典、法、則，所用異，異其名也。都鄙，公卿大夫之采邑，王子弟所食邑，周、召、毛、聃、畢、原之屬在畿內者。祭祀，其先君、社稷、五祀。法則，其

官之制度。廢猶退也，退其不能者，舉賢而置之。祿，若今月奉也。位，爵次也。賦，口率出泉也。貢，功也，九職之功所稅也。禮俗，昏姻喪紀舊所行也。鄭司農云：「士謂學士。」疏「以八則治都鄙」者，治畿內采邑之通法也。凡三等采邑，與公邑地相錯，則公邑與都鄙治法當略同，以其可互推，故經不具也。云「一曰祭祀，以馭其神」者，都家各有常祀，又有山川等命祀，《大宗伯》云「乃頒祀于邦國都家鄉邑」是也。賈疏云：「采地之中，祭祀宗廟、社稷、五祀。下注云「凡云馭者，所以馭之內之於善」，則於祭祀之中，宗廟先祖則無可去取；至社稷配食者，若取句龍、后稷，上公有功，是內之善也。」案：賈說非也。都鄙命祀，亦以地之廣狹、爵之尊卑爲差，蓋地廣爵尊者，所祀神亦尊而衆，地狹爵卑者，所祀神亦卑而少，是祀命各隨黜陟而改，故曰以馭其神也。云「二曰灋則，以馭其官」者，後經云「乃施則于都鄙，而建其長，立其兩，設其伍，陳其殷，置其輔」，即都鄙之官府，皆秉法則以治之也。云「三曰廢置，以馭其吏」者，吏謂采邑有地治之吏，則計其賢否，以詔廢置也。云「八曰田役，以馭其衆」者，田役謂凡田獵起徒役也。《遂人》注云：「役謂師田若有功作也。」蓋役事以師田爲最大，故經起徒役以田，謂之田役，以發兵則謂之師役，而功作之

事亦咳焉。《大宗伯》軍禮云：「大田之禮，簡衆也。大役之禮，任衆也。」故云「以馭其衆」。賈疏云：「謂采地之中，得田獵使役於民，據此文，則卿大夫得田獵。而《春秋》左氏傳《鄭大夫豐卷請田，子產不許者，彼常田之外，臨祭取鮮，唯人君耳，大夫唯得常田。故《禮》云『大夫不掩羣』，亦是常田。豐卷亦僭取鮮，故子產云『唯君用鮮』，明大夫不合也。」注云「都之所居曰鄙」者，《大司徒》正義同。《釋名·釋州國》云：「鄙，否也，小邑不能遠通也。」案：鄙即都家居治之邑，通界域言之則曰都鄙。此猶上文邦國，國即邦之所居；官府，府即百官所居也。與《遂人》「鄙」異。互詳《大司徒》疏。《書·蔡仲之命》孔疏引馬融云：「距王城四百里至五百里謂之都鄙。鄙，邊邑也，以封王之子弟在畿內者。」案：此馬氏《解詁》佚文。其說專據大小都而遺家邑，又距王城四百里至五百里地兼有公邑，亦不必盡爲都鄙。其說殊未安，故鄭不從也。又案：此都鄙爲采邑，與縣鄙爲公邑亦異。凡采邑與公邑地相比，經或合舉之，《宰夫》謂之「羣都縣鄙」，《司士》謂之「都家縣鄙」。蓋四等公邑，自甸外，其稍縣都三處，並與三等采地錯居，以其環繞國之邊竟，故通謂之鄙。所居爲公邑，則爲縣鄙；所居爲采地，則爲都鄙。其爲鄙同，而曰縣曰都則異，

都鄙屬於采地之主，縣鄙屬於公邑之吏，官制迥不同。蓋都家爲內諸侯，故亦立兩設伍，略放邦國之制。若縣鄙，則天子使吏治之，而領以縣師，不得有兩卿五大夫之等也。云「則亦法也」者，《爾雅·釋詁》云：「則，法也。」《大宗伯》、《大史》、《大司馬》正義並同。亦者，家上八法，明文異義通。云「典、法、則，所用異，異其名也」者，賈疏云：「謂典法則三者相訓，其義既同，但邦國言典，官府言法，都鄙言則，是所用處異，故別言之，其實義通也。」劉台拱云：「都鄙亦有官府，所以治之者，亦猶王朝之八法也。但施於都鄙，則曰法則。」云「都鄙，公卿大夫之采邑，王子弟所食邑」者，《大司徒》注同。《載師》云：「以家邑之田任稍地，以小都之田任縣地，以大都之田任疆地。」注云：「家邑，大夫之采地；小都，卿之采地；大都，公之采地，王子弟所食邑也。」案：都鄙制井田。《小司徒》井牧之法，四井爲邑，四縣爲都。故大夫曰家邑，公卿王子弟曰大小都。都邑以大小異名，散文亦通，故經以都鄙咳家邑，而注則以采邑食邑通釋大小都。《左·隱元年傳》有大都、中都、小都。彼中都即此小都，而小都則即此家邑，明都邑通言不別矣。采邑者，《禮運》云：「天子有田以處其子孫，大夫有采以處其子孫。」《白虎通義·京師篇》云：「公卿大夫皆食采者，示

與民同有無也。」《公羊》襄十五年何注云：「所謂采者，不得有其土地人民，采取其租稅爾。」《漢書·刑法志》顏注云：「采，官也。因官食地，故曰采地。說者不曉采地之義，因謂菜地，云以種菜，非也。」案：何說是也。家邑大小都三等采地，皆頒田邑以爲祿也。凡公卿大夫貴戚有功德得世祿者，皆頒邑以爲祿，是謂采邑。唯疏族新進未得世祿者，則賦田斂粟以頒祿，是謂祿田。賈《喪服》疏引《鄭志》云：「天子之卿，其地見賜乃有。」是采地皆特賜也。其在王子弟無官者，雖無祿，而得以恩澤食邑。采邑、食邑，食其田并主其邑，^①治以家宰私臣，又子孫得世守之。祿田不世守，且僅食其田之租稅，而不得主其邑，各就近屬鄉遂或公邑王官治之，若《司勳》賞地附屬六鄉之比，此其異也。凡命士有功德者，或功臣之後，亦間有采地，《祭法》注云「置都立邑，爲卿大夫采地及賜士有功者之地」是也。然士有采地者甚少，且里數亦大減，其餘則唯頒祿田而已，故《國語·晉語》云「大夫食邑，士食田」，明恒制士不得有采邑。鄭釋三等采地，止於大夫，《王制》說縣內三等國，亦云「其餘以祿士」是也。其不命之士及庶人在官者，則又無祿，而唯有稍食。以祿與命相將，不命則亦無祿也。通言之，祿田或亦謂之采，采地及稍食或亦謂之祿，散文不別

也。其外諸侯入仕者，亦受采地以爲祿，如其官爵，故《毛詩·鄭風·緇衣》傳云「諸侯人爲天子卿士，受采祿」，《公羊》定四年何注亦云「禮，諸侯人爲天子大夫，更受采地於京師」是也。凡三等采地制，互詳《小司徒》、《載師》疏。賈疏云：「親王子、母弟與公同處而百里，次疏者與六卿同處而五十里，次疏者與大夫同處二十五里。」案：《禮記·禮運》云：「天子有田以處其子孫。」鄭注《中庸》云：「同姓雖恩不同，義必同也。尊重其祿位，所以貴之，不必授以官守。」然則王子母弟，雖食采邑，未必別有官；有官，則依公卿大夫食邑，不假別言也。」云「周、召、毛、聃、畢、原之屬在畿內者」者，《左》僖二十四年傳，富辰云：「管、蔡、郕、霍、魯、衛、毛、聃、郕、雍、曹、滕、畢、原、豐、郇，文之昭也。邶、晉、應、韓，武之穆也。凡、蔣、邢、茅、昨、祭，周公之胤也。」杜預《春秋釋例·土地名》云：「周，扶風雍縣東北周城也。邶，扶風雍縣東南有邶亭。畢，京兆長安縣西北。原，河內汝水縣西北原城。」毛、聃闕。鄭以此六國，並王子弟食邑之在畿內者，故引以爲證。《白虎通義·京師篇》謂天子太子食采百里，與諸侯封同。於經無證，疑不足據。云「祭祀

① 「食其田」七字，原作「食其并主其并邑」，今從楚本改。

其先君、社稷、五祀」者，賈疏云：「案《孝經·大夫章》不云社稷，則諸侯卿大夫也。若王子母弟及三公稱諸侯者，五廟、五祀、三社、三稷，故云祀先君、社稷、五祀也。」詒讓案：先君、社稷、五祀，舉都鄙之常祀而言。《都宗人》注云：「都或有山川及因國無主九皇六十四民之祀。」彼皆非常祀，故此注不及也。云「法則，其官之制度」者，都鄙亦有兩卿、五大夫等官，官各有制度，是謂法則也。賈疏云：「謂宮室、車旗、衣服之等，皆不得僭也。」云「廢猶退也，退其不能者」者，《說文·广部》云：「廢，屋頓也。」引申之，人罷棄屏退，亦謂之廢。《檀弓》注云「廢，去也」，《士冠禮》注云「退，去也」，是廢退義同。謂退去其不能者，不復用也。云「舉賢而置之」者，《廣雅·釋詁》云：「置，立也。」鄭以此經廢置對文，廢爲退去其不能者，明置爲舉其賢者而置立之於位也。云「祿，若今月奉也」者，《釋文》云：「奉本或作俸。」案：俸即奉之俗。《國語·楚語》韋注云：「祿，奉也。」《廣雅·釋詁》云：「稟，奉、粟，祿也。」《漢書·高后紀》「列侯幸得餐錢奉邑」，顏注引韋昭云：「粟米曰奉。」續漢書·百官志載百官受奉，自大將軍、三公，至斗食佐史奉，並云月若干斛，所謂月奉也。賈疏云：「古者祿皆月別給之，漢之月奉亦月給之，故云若今月奉也。」沈彤云：

「《宮正》之會稍食，《宮伯》之均秩，皆以月終，則給祿當亦然，蓋漢亦承周法也。」云「位，爵次也」者，謂爵秩尊卑之次，即後文長、兩、伍、殷、輔，各以爵等尊卑相領屬是也。云「賦，口率出泉也」者，後注同。賈疏云：「下文九職、九賦，職賦相繼而言，故知賦即九賦口率出泉也。」《釋文》引干云：「賦，上之所求於下。」案：干說蓋通諸賦稅言之，是也。鄭意蓋以都鄙亦有口泉。賈《小司徒》疏引《鄭志》，說都鄙無口賦者，謂其不入於王，非謂自全不征也。實則後經九賦非口泉，鄭說殊不足據，詳後疏。云「貢，功也」者，《廣雅·釋詁》同。《說文·貝部》云：「貢，獻功也。」丁晏云：「《易·繫辭傳》『六爻之義易以貢』，《釋文》『荀作功』。古貢功通用，故鄭訓爲功。」云「九職之功所稅也」者，賈疏云：「亦約下文言。九賦上言九職，九職任之，九賦斂之，是以《大府》云九賦九功。九功即九職之功，故鄭於此以貢爲功，是九職之功出稅也。」詒讓案：後文別有九貢致邦國之用。知此貢非彼九貢者，九貢出於諸侯，非都鄙所出，故以貢爲九職之稅也。《釋文》引干云「貢，下之所納於上」，說與鄭同。云「禮俗，昏姻喪紀舊所行也」者，《土均》注云：「禮俗，邦國都鄙民之所行，先王舊禮也。」《管子·立政篇》云：「藏於官則爲法，施於國則成俗。」《曲禮》云：

「君子行禮，不求變俗。祭祀之禮，哭泣之位，皆如其國之故，謹守其法而審行之。」賈疏謂若《士冠禮》「若不醴，醢用酒」，是其一隅也。今案：禮俗當分爲二事。禮謂吉凶之禮，即《大司徒》十二教，陽禮教讓，陰禮教親之等是也。俗謂土地所習，與禮不同，而不必變革者，即十二教之「以俗教安」，彼注云「謂土地所生習」是也。《土均》、《小行人》「禮俗」義並同。鄭、賈合爲一，失之。鄭司農云「士謂學士」者，明此士對官吏而言，則非上中下士。《國語·周語》韋注云：「士，講學道藝者也。」學士，即士之養於學者，見《樂師》、《大胥》、《小胥》職。都鄙亦有學以養士，其賢能者，則選爲兩卿、五大夫等。其尤賢者，亦得升於王朝，皆得受祿位也。以八柄詔王馭羣臣：一曰爵，以馭其貴；二曰祿，以馭其富；三曰予，以馭其幸；四曰置，以馭其行；五曰生，以馭其福；六曰奪，以馭其貧；七曰廢，以馭其罪；八曰誅，以馭其過。柄，所秉執以起事者也。詔，告也，助也。爵謂公、侯、伯、子、男、卿、大夫、士也。《詩》云「誨爾序爵」，言教王以賢否之第次也。班祿所以富臣下。《書》云「凡厥正人，既富方穀」。幸謂言行偶合於

善，則有以賜予之，以勸後也。生猶養也。賢臣之老者，王有以養之。成王封伯禽於魯曰「生以養周公，死以爲周公後」是也。五福，一曰壽。奪謂臣有大罪，沒人家財者。六極，四曰貧。廢猶放也，舜殛鯀于羽山是也。誅，責讓也。《曲禮》曰「齒路馬有誅」。凡言馭者，所以馭之內之於善。【疏】「以八柄詔王馭羣臣」者，與內史、司士爲官聯也。賈疏云：「大宰以此八柄詔告於王馭羣臣。餘條皆不言詔，獨此與下八統言詔王者，餘並羣臣職務常所依行，歲終致事，乃考知得失；此乃王所操持，王不獨執，羣臣佐之而已，故特言詔也。」云「一曰爵以馭其貴，二曰祿以馭其富」者，爵祿爲予奪置廢之本，故首舉之。《司士》云：「以德詔爵，以功詔祿，以能詔事，以久奠食。」此不言食者，祿亦可以賅食也。云「四曰置以馭其行」者，賈疏云：「有賢行則置之於位，故云以馭其行。」云「七曰廢以馭其罪」者，罪疑當作「辜」，詳前疏。云「八曰誅以馭其過」者，誅即《內史》之殺，爲罰之最重者，故以次於末。案：此經八者，唯爵祿爲賞罰通法。以下六者，則予、置、生爲賞之事，奪、廢、誅爲罰之事，賞罰文別，而敘次則正相對。若《內史》八枋，則自爵祿之外，以予、奪、置、廢、生、殺，皆賞罰自相對爲文，故與此文次不同，義各有當也。自鄭誤解生爲養老，誅爲

薄責，賈氏遂強爲之說，謂奪重於誅，又謂《內史》變誅言殺，與此義殊。並不可通，今無取焉。

注云「柄，所秉

執以起事者也」者，《說文·木部》云：「柄，柯也。重文棟，或从秉。」是柄本爲斧柯之名，以斧柯爲人所執，引申之，凡有所秉執者皆謂之柄。《左》昭二十三年傳云「又執民柄」，

杜注云：「賞罰爲民柄。」《莊子釋文》引司馬彪云：「棟，威權也。」此八者亦王所秉執威權賞罰之事，故謂之八柄也。

《禮運》云：「禮者，君之大柄也。」注云：「柄，所操以治事。」柄秉聲類亦同，《內史》又借枋爲之。《管子·小匡

篇》：「管子曰：『昔者聖王之治其民也，謹用其六秉。如是，而民情可得，而百姓可御。』」桓公曰：「六秉者何也？」

管子曰：「殺、生、貴、賤、貧、富，此六秉也。」《國語·齊語》載其文，作六柄。案：彼六柄御百姓，生、貴、貧、富與

此同，殺即誅，賤即廢也。此馭羣臣，增予、置，爲八柄，義亦略同。云「詔，告也，助也」者，《說文·言部》云：「詔，告

也。」《爾雅·釋詁》云：「詔，助，勸也。」經例，凡言詔者，並以言語詔告相左助之謂。詔訓告，《大卜》《大僕》注亦同。

云「爵謂公侯伯子男卿大夫士也」者，《喪服傳》注云：「爵謂天子、諸侯、卿、大夫、士也。」此八柄據羣臣而言，故上不

及天子。爵下及士者，《王制》云：「王者之制祿爵，公、侯、

伯、子、男，凡五等。諸侯之上大夫卿、下大夫、上士、中士、下士，凡五等。」鄭彼注云：「爵，秩次也。」又《士冠禮記》

云：「以官爵人，德之殺也。死而謚，今也。古者生無爵，死無謚。」鄭彼注云：「今謂周衰，記之時也。古謂殷，殷士

生不爲爵，死不爲謚。周制以士爲爵，死猶不爲謚耳，下大夫也。」又《大行人》注云：「爵者四，孤、卿、大夫、士也。」此

不言孤者，孤亦冢卿也。《白虎通義·爵篇》云：「爵有五等，以法五行也。或三等者，法三光也。或法三光或法五

行何？質家者據天，故法三光；文家者據地，故法五行。《含文嘉》曰「殷爵三等，周爵五等」，各有宜也。《王制》

曰：「王者之制祿爵凡五等」，謂公侯伯子男，此據周制也。殷爵三等，謂公侯伯也。」又云：「公卿大夫者何謂也？」內

爵稱也。內爵稱公卿大夫何？爵者盡也，各量其職，盡其才也。何以知士非爵？《禮》曰「四十強而仕」，不言爵爲

士。至五十，爵爲大夫。何以知卿爲爵也？以大夫知卿亦爵也。何以知公爲爵也？《春秋傳》曰「諸侯四伯，諸公

六伯」，合而言之，以是知公卿爲爵。內爵所以三等何？亦法三光也。所以不變質文何？內者爲本，故不改內

也。」案：《小宗伯》云「賜卿大夫士爵則饋」，又《職喪》云「掌諸侯之喪及卿大夫士凡有爵者之喪」，則士得爲爵，經

有明文。《白虎通》謂周士非爵，與此經義異，鄭所不從。云「《詩》云誨爾序爵，言教王以賢否之第次也」者，「誨爾序爵」，《大雅·桑柔》文。鄭彼箋亦云「教女以次序賢能之爵」，與此注同。云「班祿所以富臣下」者，《韓非子·解老篇》云：「祿也者，人之所以持生也。」凡食稟田邑，通謂之祿，皆所以富贍臣下，故經云以馭其富也。引《書》云「凡厥正人，既富方穀」者，賈疏云：「《尚書·洪範》文。厥，其也。方，道也。穀，善也。凡其正直之人，既以爵祿富之，又以善道接之。引之者，證以馭其富也。」案：賈說同僞孔傳。鄭《書注》今佚，不知與彼同否。以此注引彼文推之，疑鄭本釋穀爲祿也。云「幸謂言行偶合於善，則有以賜予之，以勸後也」者，呂飛鵬云：「《左傳》曰：『善人富謂之幸。』賜予雖未能馭富，亦富之漸也，故云予以馭其幸。」詒讓案：《說文·夭部》云：「夭，吉而免凶也。」幸即夭之隸變。《公羊》宣十五年何注云：「幸，僥幸也。」鄭意幸者僥幸恩澤之言，謂諸臣本無功德，以言行偶合於善，則王亦有以賜予之，以廣恩澤，並以爲後人勸也。江永云：「凡賜予皆爲予。圭瓚、車馬、衣服、旌旗、弓矢、鍼鉞、虎賁，皆予之大者。幸與福一例，得予則爲幸，得生則爲福。」案：江說是也，注義未咳。云「生猶養也」者，前注同。劉敞云：「生

以馭其福，福者，其人本坐死，以親故功貴者，議而免之，是其福矣。楚誅鬬氏而免箴尹克黃，改命曰生，則此類也。」江永云：「生謂以八議生之。」案：劉、江說是也。易拔、李光坡、李鍾倫、蔣載康、俞樾說並同。經以生對誅殺爲文，則止謂保全臣下，使究其年壽耳。鄭以養爲訓，求之太深，於義轉遠矣。云「賢臣之老者，王有以養之」者，謂老者筋力衰劣，故王養以福之。云「成王封伯禽於魯，曰，生以養周公，死以爲周公後是也」者，賈疏云：「此並文公十三年《公羊傳》文。彼云：『周公拜乎前，魯公拜乎後，曰生以養周公，死以爲周公主。』此云『爲周公後』，不同者，鄭以義言之。」詒讓案：主後聲義並近，疑嚴、顏文異。此引之者，證生養義同。云「五福一曰壽」者，賈疏云：「此亦《洪範》文。引之者，證賢臣老，養之，是五福一曰壽，故曰以馭其福也。」云「奪謂臣有大罪，沒人家財者」者，《說文·奞部》云：「^①奪，手持佳，失之也。」又《支部》云：「攷，彊取也。」此奪即攷之借字。《淮南子·本經訓》高注云：「奪，取也。」臣有大罪，沒取其家財入官，亦謂之奪。劉敞云：「奪者，削其田邑祿職。」惠士奇云：「《左傳》莊十九年，惠王奪

① 「奞」，原作「又」，今從楚本改。

子禽、祝跪與詹父田，而收膳夫之秩。奪田收秩，所謂奪以馭其貧也。」案：劉、惠說是也。鄭鏐說同。此奪對予爲文，亦謂奪其田祿耳，非必盡沒其家財也。云「六極，四曰貧」者，賈疏云：「亦《洪範》文。引之者，證大罪奪之家資，以馭其貧也。」云「廢猶放也」者，此引申之義。《小爾雅·廣言》云：「放，棄也。」《莊子·釋文》引李頤云：「廢，棄也。」是廢放義同。《說文·支部》云：「放，逐也。」《左傳》宣元年杜注云：「放者，受罪黜免，宥之以遠。」案：經以廢對置爲文，亦止謂廢黜，不令在位耳，前注云「廢猶退也」，與此義最合。此注放棄之說，亦似太深也。云「舜殛鯀于羽山是也」者，葉鈔本《釋文》「殛鯀」作「極鯀」。案：《說文》無鯀字，今《書·舜典》亦作「殛鯀」。「于」，注例當作「於」，各本並誤。《史記集解》引馬融《書注》云：「殛，誅也。羽山，東裔也。」《祭法》孔疏引《鄭志》荅趙商云：「鯀非誅死，鯀放居東裔，至死不得反於朝。禹乃其子也，以有聖功，故堯興之。若以爲殺人父，用其子，而舜禹何以忍乎！而《尚書》云鯀則殛死禹乃嗣興者，箕子見武王誅紂，今與己言，懼其意有慙德，爲說父不肖則罪，子賢則舉之，以滿武王意也。」據《鄭志》，則鄭以殛爲放，與馬說不同，故引以證此廢爲放之義也。「殛」，當依宋本《釋文》作「極」。段玉裁云：

「《洪範》『鯀則殛死』，《釋文》：『殛，本又作極。』《左氏》昭七年傳『堯殛鯀羽山』，《釋文》『殛亦作極』。然則《堯典》『殛鯀』，亦是極字之假借。殛之本義訓爲殊，殊之訓死也，一曰斷也。殛之所假借爲極，極，窮也，《孟子》言『極之於所往』是也。」云「誅，責讓也」者，《司救》注云「誅，誅責也」，義與此同。《廣雅·釋詁》云：「讓，誅，責也。」黃以周云：「鄭意過與罪對，罪重而過輕，故誅訓責讓。」引《曲禮》曰「齒路馬有誅」者，鄭彼注云：「路馬，君之馬。齒，欲年也。誅，罰也。」賈疏云：「引之者，證誅爲言語責之，非有刑罪也。」《內史》變誅言殺，欲見爲惡不止則殺之。」劉敞云：「誅者，殺也。過當作禍，聲之誤耳。有馭其福則有馭其禍矣，福稱生則禍稱誅矣。八柄者，先敘賞而後言罰，賞則先重，罰則後重，故誅最後言也。內史貳八柄，爵、祿、廢、置、予、奪、生、七者皆同，而其一爲殺，殺則誅也。」俞樾云：「鄭必以責讓釋誅者，疑過失但當責讓，不當誅殺耳。不知此過字當讀爲禍，古禍過通用。《漢書·公孫弘傳》『諸常與弘有隙，雖陽與善，後竟報其過』，《史記》過作『禍』，是其證也。因段過爲禍，鄭君遂失其解。賈見《內史》八柄變誅言殺，不知其文異義同，而曲爲之說，胥失之矣。」案：劉、俞說是也。王安石、王昭禹、姜兆錫說並同。此經凡言誅，

雖有訓責讓者，而此職之誅，以《內史》證之，則不得與殺義岐迂、鄭、賈說並未允。云「凡言馭者，所以馭之，內之於善」者，此總釋上下兩章也。馭，《釋文》作馭。案：《說文·彳部》云：「御，使馬也。重文馭，古文御，从又从馬。」又《馬部》云：「驅，馬馳也。重文馭，古文驅，从支。」馭即馭之隸變。《大戴禮記·盛德篇》云：「德法者，御民之銜勒也。吏者，轡也。刑者，策也。天子，御者。內史、太史，左右手也。」《晏子春秋·諫下篇》云：「禮者所以御民也，轡者所以御馬也。」蓋使馬以策策馭之使行，引申之，凡有所馭使皆曰御。經例，凡言馭者，並有予奪勸懲之誼。^①八則、八柄及下八統，皆所以令臣民強之爲善，猶《孟子·梁惠王篇》云「驅而之善」，故並以馭爲文也。以八統詔王馭萬民：一曰親親，二曰敬故，三曰進賢，四曰使能，五曰保庸，六曰尊貴，七曰達吏，八曰禮賓。統，所以合牽以等物也。親親，若堯親九族也。敬故，不慢舊也。晏平仲久而敬之。賢，有善行也。能，多材藝者。保庸，安有功者。尊貴，尊天下之貴者。《孟子》曰：「天下之達尊者三：曰爵也，德也，齒也。」《祭義》曰：「先王之所以治天下者五：貴有德，貴貴，貴老，敬

長，慈幼。」達吏，察舉勤勞之小吏也。禮賓，賓客諸侯，所以示民親仁善鄰。【疏】「以八統詔王馭萬民」者，此親、故、賢、能、庸、貴、吏、賓八者，所咳甚廣，不止羣臣，故經以馭萬民言之。賈疏謂「民與在上同有此八事，故以萬民爲主」，則保庸、達吏諸事，非萬民所得與，於義難通，不可從。

注云「統所以合牽以等物也」者，前注云：「統猶合也。」《廣雅·釋詁》云：「牽，連也。」此八統並所以連合上下，敘其等差，故云合牽以等物也。魏氏《羣書治要》注云「統所以總物者也」，義與鄭同。賈疏云：「物，事也。謂牽下民使與上合，皆有以等其事，上行之，下效之也。」云「親親，若堯親九族也」者，賈疏述注「若」上有「謂」字。《書·堯典》云「以親九族」，《書釋文》引馬、鄭注云：「九族，上而高祖，下至玄孫，凡九族。」云「敬故，不慢舊也」者，《大司寇》注云：「故謂舊知也。」云「晏平仲久而敬之」者，《論語·公冶長篇》文。引之者，證敬故之事。云「賢有善行也，能多材藝者」者，孔繼汾謂「有善行也」，「也」疑當作「者」。阮元校同。案：《詩·大雅·烝民》孔疏引此注作：「賢，有善行者也。能，多材藝者也。」疑今本二句各脫一

① 「誼」，原作「謂」，今從楚本改。

字。《內則》注云：「賢猶善也。」《說文·能部》云：「能，熊屬，能獸堅中，故稱賢能，而強壯稱能傑也。」《鄉大夫》云：「三年則大比，攷其德行道藝，而興賢者能者。」鄭彼注云：「賢者，有德行者。能者，有道藝者。」《小司寇》「議賢議能」注，義亦同。《大司徒》十二教又云「以世事教能」，注謂士農工商之事。是賢屬德行，能包道藝及四民之事，故鄭云有善行多材藝。善行與德行，義亦同。云「保庸，安有功者者，《地官·敘官》注云：「保，安也。」又《大司徒》注云：「庸，功也。」《司勳》云：「民功曰庸。」云「尊貴，尊天下之貴者」者，《廣雅·釋言》云：「貴，尊也。」天下人所尊尚者，王亦尊之。引《孟子》曰「天下之達尊者三，曰爵也，德也，齒也」者，《公孫丑篇》文，引以證尊貴之義。彼文云：「天下有達尊三：爵一，德一，齒一。」趙注云：「三者天下之通尊也。」引《祭義》曰「先王之所以治天下者五，貴有德，貴貴，貴老，敬長，慈幼」者，證尊貴之義。貴有德即《孟子》之尊德也，貴貴即尊爵也，貴老即尊齒也。敬長、慈幼二者，牽連引之，於經無所當也。江永云：「尊貴，鄭引《孟子》三達尊及祭義證之，則貴中兼有爵齒德。」案：江說是也。賈疏以《孟子》爵德，當經進賢使能；又以祭義之貴有德為經之舉賢，貴貴為經之尊貴。非鄭引彼二書之指。云

「達吏，察舉勤勞之小吏也」者，《廣雅·釋詁》云：「達，通也。」《說文·一部》云：「吏，治人者也。」後注云：「吏，小吏在鄉邑者。」《大宗伯》「一命受職」注云：「始見命為正吏，王之下士一命。」是命士及不命之士，並得稱吏。《賈子·階級篇》云：「古者聖王制為列等，內有公卿大夫士，外有公侯伯子男，然後有官師小吏，施及庶人。」彼官師小吏，蓋專指中下士及不命之士言之，與此注義亦通也。小吏爵秩卑猥，有勤勞者，則亦察舉之，俾通於上，故謂之達。《檀弓》云：「公之喪，諸達官之長杖。」注云：「謂君所命。」蓋周制，公孤上卿皆以世族為之，其大夫士以下，則多參用庶族，故小吏積勞，亦得馴至達官也。此吏與《宰夫》之羣吏義同，詳後疏。又此八統與《小司寇》八辟目正相應，達吏當彼議勤之辟，鄭云勤勞之小吏，蓋隱據彼經為釋。此達吏與進賢使能異，賢能者皆有才德，殊異於衆，故因而進之使之；達吏則不必有才德，但以任事年久，積累勤勞，錄而通之，蓋以校計年勞，振拔困滯，卑官平進，與後世計資格相似。故《司士》云：「以德詔爵，以功詔祿，以能詔事，以久奠食。」彼德、功、能，即此進賢、保庸、使能，久即此勤勞之小吏，明勤勞必年久乃著。此職與《小司寇》、《司士》、三經義實相通貫也。云「禮賓，賓客諸侯」者，即後文云「以

禮待賓客之治」是也。凡諸侯來朝會，王待以不純臣，故謂之禮賓。《小司寇》八辟，八曰議賓之辟。注云：「謂所不臣者，三恪二代之後與？」彼注專據賓恪諸侯爲釋，義與此注小異。云「所以示民親仁善鄰」者，釋馭萬民而有賓客諸侯之事。賈疏云：「親仁善鄰，《左氏》隱公六年陳五父之辭。親仁善鄰，則當禮賓，故引以證禮賓也。」以九職任萬民：一曰三農，生九穀；二曰園圃，毓草木；三曰虞衡，作山澤之材；四曰藪牧，養蕃鳥獸；五曰百工，飭化八材；六曰商賈，阜通貨賄；七曰嬪婦，化治絲枲；八曰臣妾，聚斂疏材；九曰閒民，無常職，轉移執事。任猶傳也。鄭司農云：「三農，平地、山、澤也。九穀，黍、稷、秫、稻、麻、大小豆、大小麥。八材，珠曰切，象曰瑳，玉曰琢，石曰磨，木曰刻，金曰鏤，革曰剝，羽曰析。閒民，謂無事業者，轉移爲人執事，若今傭賃也。」玄謂三農，原、隰及平地。九穀無秫、大麥，而有粱、苽。樹果蔬曰圃，園其樊也。虞衡，掌山澤之官，主山澤之民者。澤無水曰藪。牧，牧田在遠郊，皆畜牧之地。行曰商，處曰賈。阜，盛也。金玉曰貨，布帛曰賄。嬪，婦人之美稱也。《堯典》

曰：「釐降二女嬪于虞。」臣妾，男女貧賤之稱。晉惠公卜懷公之生曰：「將生一男一女，男爲人臣，女爲人妾。」生而名其男曰圉，女曰妾。及懷公質於秦，妾爲宦女焉。疏材，百草根實可食者。疏不熟曰饔。【疏】「以九職任萬民」者，任民以制國用之法也。黃以周云：「九職者，任夫力也。任夫力以興功，故九職亦謂之九功。《鄉大夫》言「國中自七尺以及六十，野自六尺以及六十有五，皆征之」，是九職任民之法。《國語》云「任力以夫而議其老幼」，謂此。《閭師》言任農貢九穀，以至任虞貢其物，各以其所有穀物，以充力征，是九職徵賦之法。《司會》云「以九功之法，令民職之財用」，謂此。」又云：「《周禮》，民之受田地而不耕毛者，出里布屋粟；民之不受田地而無職事者，出夫家之征；皆示罰也，不以爲正稅。至《孟子》言「廛無夫里之布」，則知戰國時，以成周所以罰惰民閒民之征，爲經常之賦矣。周初征民之常經，祇有九職、九賦二法；而其國用之所仰給者，祇在九賦之一征，故九賦曰九正也。九職力征，祇以充府庫，以備非常之需。而里布夫家之征，特以禁閒惰之民，尤非國用之所待給也。《周禮》九職中，有貢九穀、貢布帛二職，農貢九穀，不出布帛，嬪貢布帛，不出九穀，非一人竝征之。《均人職》云「凶札則無力征，無財賦」，

則經常之征，止有力賦兩稅可知。」案：黃說是也。《穀梁》成元年傳云：「古者立國家，百官具，農工皆有職以事上。」桓寬《鹽鐵論·本議篇》云：「古者之賦稅於民也，因其所工，不求所拙，農人納其穫，女工効其功。」是有民則有職，有職則有功。九職者，謂任民以職事，其目有九也。民各以其力所能，受職而貢其功，以爲賦稅，故《大府》、《內府》、《司會》謂之九功，《閭師》謂之八貢。《大府》謂之「萬民之貢，以充府庫」，蓋任民之貢，不爲正賦，其率亦甚輕，故惟實府庫，以共餘義之用。下文九賦地稅，則爲賦法之正，大府以共九式之正法用。二者迥異。鄭以此爲正賦，對彼爲口賦，失之遠矣。又案：此經力征、役征亦分二法。任力者，民以其力自任其職事而共貢，《均人》所謂均地職是也。任役者，民以其力任國事，共軍旅會同及城道之役，亦通謂之力征，《均人》所謂「均人民牛馬車輦之力政」，又云「豐年則公旬用三日焉」是也。力征計戶任夫，猶後世之丁稅，自老疾及惰民外，無不受職共貢；役征雖亦計戶任夫，而大役不必常有，有事受役，歲不過三日，無事則免，不以爲歲征之常科，是其異也。互詳《鄉大夫》、《均人》疏。云「一曰三農，生九穀」者，《說文·農部》云：「農，耕也。」《閭師》云「任農以耕事貢九穀」是也。民事以農爲尤重，故九職亦以

此爲首。云「二曰園圃，毓草木」者，《閭師》云「任圃以樹事貢草木」是也。《大司徒》注云：「育，生也。」毓育古今字。云「三曰虞衡，作山澤之材」者，《閭師》云：「任衡以山事，貢其物；任虞以澤事，貢其物。」彼分爲二，以充八貢，此則合爲一職，其事同也。山澤之材，即後八材凡山澤所出者皆是。作，謂蕃聚興發之，以給用也。云「四曰藪牧，養蕃鳥獸」者，《閭師》云「任牧以畜事，貢鳥獸」是也。《大司徒》注云：「蕃，蕃息也。」云「五曰百工，飭化八材」者，《閭師》云「任工以飭材事，貢器物」是也。《考工記·總敘》云「或審曲面勢，以飭五材，以辨民器」，亦謂此也。賈疏云：「謂百種巧作之工，所爲事業，變化八材爲器物，飭之而已。飭，勤也，勤力以化八材。」案：《考工記》「飭五材」，先鄭注訓飭爲治。此「飭化」與下文「化治」，義蓋略同。《說文·力部》云：「飭，致堅也。」謂治八材極其堅致，化礦樸以成器物也。賈訓飭爲勤，未塙。互詳《考工記》疏。云「六曰商賈，阜通貨賄」者，《閭師》云「任商以市事，貢貨賄」是也。《考工記·總敘》云「或通四方之珍異以資之」，亦謂此也。云「七曰嬪婦，化治絲枲」者，《閭師》云「任嬪以女事，貢布帛」是也。化治謂繅絲擘麻，化爲綫縷，織成布帛，故《考工記·總敘》云「或治絲麻以成之」。枲麻義同。《管子·輕

重甲篇》有絛絲之籍，《孟子·盡心篇》有布縷之征，亦謂此也。云「八曰臣妾，聚斂疏材」者，此民家所養，有常主者，以其賤，故無貢也。云「九曰閒民，無常職，轉移執事」者，自三農至臣妾，皆有常職，此閒民不任受職，止任與人傭賃，而即以轉移執事爲職，《閭師》云「凡無職者出夫布」是也。江永云：「九職任萬民，皆任之以生財，《大學》所謂生之者衆也。九職外，有學士習道藝，巫醫卜筮守世事，府史胥徒服公事，皆非所以生財，故不在九職之數。而《大司徒》并之爲十有二，天下之民盡此矣。九職生財，即《閭師》之八貢與無職者之夫布。然亦稍有不同，九職合虞衡爲一，而有臣妾聚斂疏材，《閭師》無疏材之貢，而分虞衡爲二，亦得九，《大府》所謂九功者也。」案：江說是也。大司徒頒職事十有二于邦國，其稼穡、樹藝、作材、阜蕃、飭材、通財、化材、斂材、生材九者，與此正同，而別有學藝、世事、服事三者。此九職無之者，大宰主財用之總要，彼三者皆無力征，非財用所出，故不及也。 注云「任猶傳也」者，

前注同。賈疏云：「傳謂立也，使民之業得立。」鄭司農云「三農，平地、山、澤也」者，據《角人》云「掌以時徵齒角凡骨物于山澤之農」，《羽人》云「掌以時徵羽翮之政于山澤之農」，又《掌葛》云「以時徵絺綌之材于山農，徵草貢之材于

澤農」，故以山農、澤農與平地之農爲三也。彼山澤皆曰農，又皆出物以當邦賦，明生九穀爲其本職。而後鄭不從者，蓋以山澤生穀之地甚少，故易之。云「九穀，黍、稷、秬、麻、大小豆、大小麥」者，《說文·禾部》云：「穀，續也，百穀之總名。」稷，齋也，五穀之長。「秬，稷之黏者。」稻，稌也。《黍部》云：「黍，禾屬而黏者也。以大暑而種，故謂之黍。」《麻部》云：「麻，臬也。」《未部》云：「未，豆也。」又《艸部》云：「荅，小豆也。」《麥部》云：「麥，芒穀。」《廣雅·釋艸》云：「大麥，粦也。小麥，粦也。大豆，未也。小豆，荅也。」案：先鄭所說九穀，今惟稻、麥、豆名與古同。麻即《籩人》之蕡，宋以後醫書謂之火麻人，詳彼疏。其稷，今謂之高粱，秬即高粱之黏者也。黍即今北方之稷，其米爲黃米，南方或無其穀。後人說稷黍二穀者，多淆亂莫辨。故《爾雅·釋草》：「粢，稷。」郭注云：「今江東人呼粟爲粢。」《左傳·桓二年孔疏引《舍人》云：「稷，粟也。」《齊民要術》引孫炎說同。《國語·晉語》韋注云：「稷，粱也。」《本草》陶弘景注云：「汜勝之《種植書》無稷有粱，是秬。」依此諸說，是西漢以後，並以九穀之粱，家稷秬之名。故先鄭此注舉秬而遺粱，其釋《鍾氏》丹秬，亦以爲赤粟，粟即粱也。蘇恭《唐本草》謂稷即稌，則又以九穀之黍與稷相混。唯程瑤

田辨黍稷，最爲精析，今依用之。程氏說黍云：「《說文》：『黍，禾屬而黏者也。糜，稌也。』禾屬而黏者黍，則禾屬而不黏者糜，對文異，散文則通稱黍。《爾雅》：『秬，黑黍。』《內則》：『飯黍、稷、稻、粱、白黍、黃粱。』鄭注：『黍，黃黍也。』經傳中見黑黍、白黍、黃黍，不見黑糜、白糜、黃糜，是以知散文通稱黍也。糜一曰稌。飯用米之不黏者，黏者釀酒及爲餌資醢粥之屬，故簠簋實糜爲之，又名曰稌。不黏者有糜與稌之名，於是黏者得專稱黍矣。黍有黑黍、白黍、赤黍，而獨無黃黍，唯糜則類多黃者，然則黃黍者，糜也，稌也，《內則》直呼曰黍。今人乃以爲稌，豈不繆哉！今山西人無論黏與不黏，統呼之曰糜黍，又冒黃粱之名，呼黏者曰軟黃粱，不黏者曰硬黃粱。大原以東則呼黏者爲黍子，不黏者爲糜子。武邑人亦呼之曰黍子糜子，而呼黍之米曰黃米，糜之米曰稌米。北方稌黍音相邇，稌奪稌名，承譌日久。論者因謂稌黍一物，而以黏不黏分黍稌，失之矣。《說文》黍稌互釋，稌黍互釋，其爲二物甚明。」又說稌云：「稌，大者也。黏者爲秫，北方謂之高粱，或謂之紅粱，通謂之秫秫，又謂之蜀黍，蓋稌之類，而高大似蘆。《月令》：『孟春行冬令，首種不入。』鄭注：『舊說首種謂稌。』今以北方諸穀播種先後考之，高粱最先，粟次之，黍糜又次之，然

則首種者高粱也。《管子書》：『日至七十日，陰凍釋而藝稌，百日不藝稌。』聞之鳳陽人云，彼地種高粱最早，諺云『九裏種，伏裏收』。《管子》曰至七十日，今之正月也。余旁行南北，氣候不齊，曾未聞有正月藝粱粟者。至安徽藝粟，遲至五六月，烏在其爲日至百日不藝也！而高粱早種於正月者，則南北並有之，故曰稌爲首種。諸穀惟高粱最高大而又先種，謂之五穀之長，不亦宜乎！《良耜》詩箋云：『豐年之時，雖賤者猶食黍。』疏云：『賤者食稌耳。』《大戴禮》：『無祿者稌饋，稌饋者無尸。』注云：『庶人無常牲，故以稌爲主。』今北方富室，食以粟爲主，賤者食以高粱爲主。是賤者食稌而不可以冒粟爲稌也。」又云：「鄭衆、班固、服虔、孫炎、韋昭、郭璞之流，其言稌者，類皆冒粟之名。陸德明、孔穎達、賈公彥、顏師古，並承襲前人之說，無能正之者。陶通明注《本草》，言書多云稌與黍相似，然觀其所著書，其所謂與黍相似者，猶是指粟言，不謂稌在黍中也。至唐蘇恭誤解陶氏與黍相似之云，乃曰《本草》載稌不載稌，因以稌爲稌，而謂與黍爲秫秫，破冒粟爲稌之非，轉致強分黍爲二穀。不知黍中之有稌，猶稌中之有秫，稻中之有秠也。一穀自兼二種，安可以黍之不黏者，而冒爲稌乎！厥後陳藏器因之，謂稌如黍，黑色。宋蘇頌則直謂黏

者爲秫，不黏者爲黍。而孟詵、寇宗奭之徒，亦踵蘇恭之繆，而與蘇頌相反，所見不同，均之爲誤也。」案：程說是也。云「八材，珠曰切，象曰磋，玉曰琢，石曰磨，木曰刻，金曰鏤，革曰剥，羽曰析」者，《說文·木部》云：「材，木挺也。」引申之，凡可用之物皆曰材。《爾雅·釋器》云：「金謂之鏤，木謂之刻，骨謂之切，象謂之磋，玉謂之琢，石謂之磨。」郭注云：「六者皆治器之名。」此即先鄭所據。案：珠曰切，《釋器》珠作「骨」。賈疏謂司農讀《爾雅》本作「珠」。象曰磋，《釋器》磋作「磋」。王充《論衡·量知篇》亦云「骨曰磋」，與此注同。革曰剥者，《說文·刀部》云：「剥，裂也。」《皮部》云：「剥取獸革者謂之皮。」羽曰析者，《廣雅·釋詁》云：「析，分也。」《司常》云：「析羽爲旌。」此二者，《釋器》無文，先鄭以意增之，以足八材之數也。江永云：「八材，先鄭本《爾雅》珠象玉石木金革羽，遺搏埴之工。且珠之用少，當不特設一工。宜以《曲禮》土金石木獸草之六材，^①而益以玉羽。」案：江說亦通。云「閒民，謂無事業者，轉移爲人執事」者，《左傳》昭五年杜注云：「閒，暇也。」此民無常職事，轉移無定，與人爲役，故謂之閒民。《說文·辵部》云：「逄，遷徙也。」移即逄之段字。江永云：「閒民，傭力之人，執事於農工商賈圃牧虞衡之家，轉徙無

常，即《閒師》之無職者。」云「若今傭賃也」者，《說文·貝部》云：「賃，庸也。」《史記·范雎傳》云：「睢曰：臣爲人庸賃。」一切經音義引孟氏云：「傭，役也。謂役力受直曰傭。」《玉篇·貝部》云：「賃，借傭也。」案：《詩·周頌·載芟》：「侯彊侯以。」後鄭彼箋云：「以謂閒民，今時庸賃也。」與先鄭此注說同。云「玄謂三農原、隰及平地」者，《大司徒》注云：「高平曰原，下濕曰隰。」原、隰、平地，即《王制》孔疏引《五經異義·左氏說》，所謂原防、隰皋、衍沃也。後鄭以原卑於山，隰高於澤，於生穀爲宜，故用易先鄭義，其一爲平地則同。賈疏云：「原及平地可種黍稷之等，隰中可種稻麥及苽也。」惠士奇云：「三農者，上農、中農、下農也。《管子·揆度篇》曰：『上農挾五，中農挾四，下農挾三。』《小司徒》上地、中地、下地分爲三者，以此。」案：惠說亦通。云「九穀無秫大麥而有梁苽」者，此破先鄭說也。《釋文》云：「苽字或作菰。」案：菰即苽之俗。後鄭蓋依先鄭《膳夫》「六穀」注說，而加麻及大小豆也。賈疏云：「以秫爲赤粟，與稷黏疎爲異，故去之。大麥所用處少，故亦去之。必知有梁苽者，下《食醫》云凡饌食之宜，有「大宜梁」，

①「革」，原誤作「革」，據楚本改。

「魚宜苽」，故知有梁苽也。且前七穀之中，依《月令》，麥屬東方，黍屬南方，麻屬西方，豆屬北方，稷屬中央，故知有稷黍麻豆麥。稻與小豆，所用處多，故知有稻有小豆也。必知有大豆者，《生民》詩云「藝之戎菽」，戎菽，大豆，后稷之所殖，故知有大豆也。」案：賈疏以秫爲赤粟，即沿先鄭《鍾氏》注說之誤。梁者，今北方之小米也，南方謂之粟米。《說文·米部》云：「梁，米名也。米，粟實也。」《鹵部》云：「粟，嘉穀實也。」《禾部》云：「禾，嘉穀也。」程瑶田云：「禾，粟之有稊者也。」其實，粟也。其米，梁也。《史記索隱》載《三蒼》云「梁，好粟」，其證也。《內則》言飯有梁，又有黃梁，是梁者白梁也。今北方猶呼粟米之純白者曰梁米。賈公彥《舍人》疏乃云「正言粟即梁也」。夫梁，稷也。以粟爲梁，是以粟爲稷。此說蓋據郭璞《爾雅注》，乃漢世訓詁相承之語。孔穎達於《曲禮》「稷曰明梁」，亦釋之曰「稷，粟也」，蓋承其誤矣。汜勝之《種植書》不見稷，而云梁是秫。先鄭注《鍾氏》丹秫爲赤粟，其注九穀亦有稷無梁，然於六穀，則又稷梁並錄。韋昭注《國語》，直曰「稷，梁也」，顯然與《禮經》相畔矣。及其注百穀之屬，於稷之外，又復舉梁。稷梁二穀，見於經者，判然兩事，不知秦漢以後何以溷二穀而一之。如《呂氏春秋·審時篇》，舉梁而逸稷，其《十二

紀》中所載，又舉稷而逸梁。《月令》及《淮南子》皆因於《呂紀》，文亦同之。《淮南子·天文》、《墜形》、《主術》三訓，凡四見諸穀之名，皆不見稷字，直謂稷即梁也。後鄭知稷梁之不可以相無也，而改司農九穀之說，識卓矣。」又云：「《食醫》宜稌、宜黍、宜稷、宜粱、宜麥、宜苽，見稷則不見秫。《內則》菽麥蕡稻黍粱秫唯所欲，見秫則不見稷。故司農說九穀，稷秫並見，後鄭不從，入粱而去秫，以其闕粱而秫重稷也。」案：程說是也。段玉裁、劉寶楠說並同。至九穀之說，二鄭而外，亦多舛異。如《齊民要術》引汜勝之《種植書》，以爲稻、米、黍、麻、秫、小麥、大麥、小豆、大豆。案：據《本草》陶注，汜氏所謂秫者即粱，則所謂米者，蓋即指粱之不黏者。此與先鄭義略同，唯以米易稷耳。崔豹《古今注》，又以爲黍、稷、稻、粱、三豆、二麥。其說豆有三，不知埽指何種。此諸說並與《疾醫》六穀不合，不可以說此經。苽即彫胡，詳《膳夫》疏。云「樹果苽曰圃，園其樊也」者，《載師》注義同。賈疏云：「此圃即《載師》所云「場圃任園地」，謂在田畔樹菜蔬果苽者。」又云：「案《漢書·食貨志》云：「田中不得有樹，用妨五穀，環廬樹桑麻、菜茹、瓜瓠、果苽。」應劭曰：「木曰果，草曰苽。」張晏曰：「有核曰果，無核曰苽。」臣瓚曰：「木上曰果，地上曰苽。」劭與瓚義

同，晏獨異也。案《載師》云「場圃任園地」，則圃在園中，故鄭云「樹果蒚曰圃，園其樊」。^①是以《詩》云「折柳樊圃」，謂與圃爲樊，樊，其蕃蔽也。」詒讓案：《毛詩·齊風·東方未明》傳云：「圃，菜園也。」又《將仲子》傳云：「園，所以種木也。」《說文·口部》云：「種菜曰圃，園所以樹果也。」《一切經音義》引《三蒼》、《論語·子路》篇《集解》引馬融說，並略同。據《載師》云「場圃任園地」，則不得如毛、許說，以菜木分屬圃園，故鄭易之。依鄭義，圃樹果蒚。《甸師》注云：「果，桃李之屬。蒚，瓜瓞之屬」，則云樹果蒚，可通包菜木。圃之四畔爲藩籬，則謂之園。《說文·爻部》云：「梀，藩也。」樊即梀之段字。《爾雅·釋言》及《詩·東方未明》傳並云「樊，藩也」，《詩疏》引孫炎云「樊，圃之藩也」，與鄭義同。至《穀梁》宣十五年傳云：「古者公田爲居，井竈葱韭盡取焉。」范注云：「損其廬舍，家作一園，以種五菜，外種楸桑，以備養生送死。」此謂井田之法，於公田中廬舍之旁隙地爲園，以種菜木，與此園圃專爲毓草木之地迥異，詳《載師》疏。云「虞衡掌山澤之官，主山澤之民者」者，賈疏云：「案《地官》，掌山澤者謂之虞，掌川林者謂之衡，則衡不掌山澤。而云虞衡作山澤者，欲互舉以見山澤兼有川林之材也。鄭既云虞衡掌山澤之官，復云山澤之民者，欲見

虞衡是官，非出稅之人，以山澤之民無名號，故借虞衡之官，以表其民。所任者，任山澤之萬民。山虞澤虞之官，非是以任出稅之物，但主山澤之民也。」案：賈說是也。山林川澤之民，屬於虞衡，故即名其民職曰虞衡，亦通謂之虞。《史記·貨殖傳》引《周書》云：「農不出則乏其食，工不出則乏其事，商不出則三寶絕，虞不出則財匱少。財匱少而山澤不辟矣。」云「澤無水曰藪」者，《地官·敘官》澤虞有大澤、大藪，中澤、中藪，小澤、小藪。注云：「澤，水所鍾也。水希曰藪。」水希即是無水。《華嚴經音義》引《韓詩傳》云：「澤中可禽獸居之曰藪。」無水，故可居禽獸也。蓋析言則藪與澤別，統言之則藪澤亦通，故《職方氏》「藪澤」注云「大澤曰藪」是也。云「牧，牧田在遠郊」者，據《載師》云：「以牧田任遠郊之地。」彼注云：「牧田，畜牧者之家所受田也。」又鄭司農云：「牧田者，牧六畜之田。」後鄭彼注不從先鄭，而此注乃正從先鄭彼注義，當以此注爲正，詳彼疏。云「皆畜牧之地」者，牧爲蕃畜鳥獸之專地，其地甚廣，載師所任，既別爲區域，藪近水澤，薦草蕃衍，則亦可就之畜牧，故經兼舉之。《閭師》八貢止云任牧，不及藪者，文省

① 「圃園」，原誤作「園圃」，今據楚本改。

也。《管子·國準篇》云：「菹菜之壤，非五穀之所生也。麋鹿牛馬之地，春秋賦生殺老。」彼麋鹿之地即藪，牛馬之地即牧也。江永云：「藪牧養蕃鳥獸，不必家畜。藪牧之民，各守其地，野鳥獸取之有時，是亦所以養蕃之。疑藪牧之民有二種：其受田於遠郊者，則貢家畜；其處山澤與邦田之地者，則貢野鳥獸。家畜入於遂師，而遂師以共野牲，其卵鳥則掌畜復養而共之。野鳥獸入於迹人，獸人與掌畜，而諸官以共膳人、庖人之用。」案：江說是也。二云「行曰商，處曰賈」者，《司市》注云：「通物曰商，居賣貨曰賈。」義與此同。《說文·商部》云：「商，從外知內也。」又《貝部》云：「賈，行賈也。賈，市也，一曰坐賣售也。」案：商即賈之段字。《白虎通義·商賈篇》云：「商之爲言商也。商其遠近，度其有亡，通四方之物，故謂之商也。賈之爲言固也。固其有用之物，以待民來，以求其利者也。行曰商，止曰賈。《易》曰：『先王以至日閉關，商旅不行，后不省方。』《論語》曰：『沽之哉！我待價者也。』即如是，《尚書》曰：『肇牽車牛，遠服賈用』何？言遠行可知也。方言欽厥父母，欲留供養之也。」案：商賈對文則異，散文則通，故《尚書》以行爲賈，班說非。《文選·西京賦》薛注又云「坐者爲商，行者爲賈」，蓋誤文。云「阜，盛也」者，《毛詩·鄭風·

大叔于田》傳文。《大司徒》、《司市》、《掌畜》注義並同。云「金玉曰貨」者，後注云：「貨貢珠貝，自然之物也。」《聘禮記》：「多貨則傷于德。」鄭彼注云：「貨，天地所化生，謂玉也。」金玉並天地所化生，自然之物，故謂之貨。杜臺卿《玉燭寶典》引蔡邕《月令章句》云：「龜貝金玉之屬曰貨。」云「布帛曰賄」者，《玉燭寶典》引《月令章句》云：「布帛魚鹽之屬曰賄。」案：此商賈阜通貨賄，《大司徒》十二職事謂之通財。《說文·貝部》，貨賄並訓云財也。《漢書·食貨志》云：「貨謂布帛可衣，及金刀龜貝，所以分財布利，通有無者也。」是布帛亦得爲貨，蓋對文則異，散文得通。賈疏云：「《聘禮》曰『賄用束紡』，是人所爲曰賄也。若然，《王制》云『錦文珠玉，不粥于市』，此商賈得通之在市者，彼據珠玉有錦文者，或彼異代禮也。案：《左氏》襄十五年，宋人獻玉于子罕，子罕實諸其里，使玉人爲之攻之，富而後使復其所。服氏云『富，賣玉得富』，是其得粥玉也。」案：賈說非也。《王制》所說，欲防民之奢耳。此經主於阜通貨賄，義各有當，不當援彼疑此。又《王制》，錦文與珠玉各異物，賈謂珠玉有錦文者，尤謬。云「嬪，婦人之美稱也」者，《敍官》「九嬪」注云：「嬪，婦也。」案：此嬪婦指外嬪婦，即《典絲》之外工，與九嬪世婦等內嬪婦異。嬪義取可賓敬，

故爲婦人之美稱，詳《敍官》疏。引《堯典》曰「釐降二女嬪于虞」者，證嬪爲婦人美稱。僞孔傳云：「降，下。嬪，婦也。」與鄭義同。云「臣妾，男女貧賤之稱」者，《書·費誓》：「臣妾逋逃。」僞孔傳云：「役人賤者，男曰臣，女曰妾。」《史記·魯世家》集解引鄭《書注》云：「臣妾，厮役之屬也。」惠士奇云：「古無奴婢，有臣妾。」《易·遯》九三：「畜臣妾，吉。」《旅》六二：「得童僕，貞。」《左·昭七年傳》，謂之阜隸與臺。《公羊》宣十二年傳，謂之厮役扈養。《周書·大聚》曰「春發枯槁，夏發葉榮，秋發實蔬，冬發薪烝」，皆臣妾之職也。」又云：「魯國之法，贖人臣妾于諸侯者，皆取金于府」，並見《呂覽》、《家語》。故知古之臣妾，即今之奴婢。」江永云：「臣妾，奴婢也。貧民鬻身爲人奴婢，《閭師》無疏材之貢，恤其貧也，而九職生財必及之。《質人》：『掌成市之貨賄人民。』注：『人民，奴婢。』即此經之臣妾也，庶人商賈家皆有之。」云「晉惠公卜懷公之生，曰將生一男一女，男爲人臣，女爲人妾，生而名其男曰圉，女曰妾，及懷公質於秦，妾爲宦女焉」者，證臣妾爲男女之賤稱。賈疏云：「《左氏傳》僖十七年夏，晉太子圉爲質於秦，云：『惠公之在梁也，梁伯妻之。梁嬴孕，過期，卜招父與其子卜之。其子曰：『將生一男一女。』招曰：『然，男爲人臣，」

女爲人妾。」故名男曰圉，女曰妾。及子圉西質，妾爲宦女焉。」注：「養馬曰圉，不聘曰妾。」此與文異者，鄭以義增之也。云「疏材，百草根實可食者」者，《委人》注云：「疏材，草木有實者。」案：疏俗作「蔬」。《小爾雅·廣物》云：「菓謂之蔬。」《爾雅·釋天》郭注云：「草菜可食者，通名爲蔬。」《國語·魯語》云：「烈山氏子柱，能植百穀百蔬。」韋注云：「草實曰蔬。」案：據《委人》注，則木實亦得稱疏。故《月令》有能取疏食田獵禽獸者，鄭彼注云：「草木之實爲疏食。」《玉燭寶典》引《月令章句》亦云：「疏食，謂山有榛栗杼櫟，澤有菱芡鳧茈之屬，可以助穀者也。」此注不及木實者，文偶不具。上云園圃毓草木，據人所種者言之；此疏材之草木，據地自生者言之。以其種別繁多，故得百疏之稱矣。云「疏不熟曰饑」者，《釋文》熟作「孰」。案：熟即孰之俗。曹憲《廣雅音》云：「顧野王《玉篇》孰字加火，未知所出。」是古無熟字，當以《釋文》爲正。《爾雅·釋天》云：「穀不熟爲饑，蔬不熟爲饑，果不熟爲荒。」彼疏作「蔬」，亦俗字也。《詩·小雅·雨無正》孔疏引李巡注云：「可食之菜皆不熟爲饑。」引之者，證疏材可共食也。

周禮正義卷三

以九賦斂財賄：一曰邦中之賦，二曰四郊之賦，三曰邦甸之賦，四曰家削之賦，五曰邦縣之賦，六曰邦都之賦，七曰關市之賦，八曰山澤之賦，九曰幣餘之賦。財，泉穀也。鄭司農云：「邦中之賦，二十而稅一，各有差也。幣餘，百工之餘。」玄謂賦，口率出泉也。今之算泉，民或謂之賦，此其舊名與？鄉大夫以歲時登其夫家之衆寡，辨其可任者，國中自七尺以及六十，野自六尺以及六十有五，皆征之。遂師之職亦云「以徵其財征」，皆謂此賦也。邦中，在城郭者。四郊去國百里，邦甸二百里，家削三百里，邦縣四百里，邦都五百里。此平民也。關市山澤謂占會百物，幣餘謂占賣國中之斥幣，皆未作，當增賦者，若今賈人倍算矣。自邦中以至幣餘，各人其所有穀物，以當賦泉之數。每處爲一書，所待異也。【疏】「以九賦斂財賄」者，《說文·貝部》云：「賦，斂也。」《支部》云：「斂，收也。」經凡征斂通謂之賦。

此九賦，則皆任地以制國用之法也。黃以周云：「九賦者，斂田地之租也。田地爲正稅，故九賦《司書》亦謂之九正。《大府職》：「關市之賦，以待王之膳服；邦中之賦，以待賓客；四郊之賦，以待稍秣；家削之賦，以待匪頒；邦甸之賦，以待工事；邦縣之賦，以待幣帛；邦都之賦，以待祭祀；山澤之賦，以待喪紀；幣餘之賦，以待賜予。」此言九賦田地之租，《司會》所謂「以九賦之法，令田野之財用」者，此也。周初征民之常經，祇有九職、九賦二法。而其國用之所仰給者，祇在九賦之一征；九職力征，^①祇以充府庫以備非常之需；而里布夫家之征，特以禁惰閒之民，尤非國用之所待給也。」案：黃申先鄭說是也。九職蓋以田稅爲正，而它地稅亦無不賅焉。先鄭以《載師》「任地之法爲釋，與《司會》令田野財用之文相合，最爲得解。《書·禹貢》九州之賦，亦各以上中下三等爲差，此即田賦之正名也。蓋此經九賦，自國中至邦都六者，並以由內而外地之遠近，爲稅法輕重之差。關市、山澤以及幣餘之斂於官府者，其地祇廁於六處之中，而於田稅之外，別爲科率，故列於諸賦之後。通校各職，征賦之法有二：一曰任地，即此

① 「職」，原誤作「賦」，今據楚本改。

九賦地征是也；一曰任民，前九職之貢與《均人》「人民牛馬車輦之力政是也」。《國語·魯語》：「仲尼曰：先王制土，藉田以力，而砥其遠邇；賦里以入，而量其有無；任力以夫，而議其老幼。」彼藉田謂田稅，賦里謂廩稅，並爲任地之法，任力謂力征，爲任民之法，與此經正同。九賦猶後世之地稅，九職猶後世之丁稅，而人民牛馬車輦之力政，則猶後世之差徭，各自爲一法。此職九賦，以《司會》、《載師》證之，其爲地征，本無疑義。自後鄭以爲口泉，而賈疏申其義，遂於九職間民夫布之外，增一泉征，又無以處幣餘之賦，而經義晦矣。云「一曰邦中之賦」者，《載師》云：「以廩里任國中之地，以場圃任園地。」此其地征也，六鄉之吏及閭師、場人等斂之。云「二曰四郊之賦」者，距國百里，四郊六鄉之地征。《載師》云：「以宅田、士田、賈田任近郊之地，以官田、牛田、賞田、牧田任遠郊之地」是也。六鄉四郊之吏及閭師斂之。云「三曰邦甸之賦」者，距國二百里，六遂公邑之地征。《載師》云：「以公邑之田任甸地」是也。六遂之吏及縣師斂之。云「四曰家削之賦」者，距國三百里，公邑之地征。《載師》云：「以家邑之田任稍地」是也。自此以外至邦都，並縣師斂之。賈疏云：「謂三百里之內地名削，其中有大夫采地，謂之家，故名家削。大夫采地中，賦稅入

大夫家。但大夫家采地外，其地爲公邑，公邑之內，其民出泉，入王家，故舉家削以表公邑之民也。」江永云：「八則言賦貢以馭其用，則都鄙亦當有賦入於王。《司勳》『凡頒賞地，參之一食』。疏云：『若采地之稅，則四之一，與小國入天子同。』是謂采地有賦。此疏謂三等采邑出泉賦於公卿大夫，而三等公邑則出泉賦於王。蓋揭采邑，表公邑。非是。」案：江說是也。賈依後鄭義，以此九賦爲口泉，與稅異。《小司徒》疏引《鄭志》云：「稍縣都鄙地有公邑之民，口率出泉於王也，邦國都無口率之賦」。故此疏亦本彼爲說。不知此賦自是地征，非口賦。地征在公邑固全入王，采邑雖入其主，亦計率貢其餘於王。此由誤解賦字，與《司勳》疏實不相冢也。但彼疏謂采地之稅四之一入王，亦不塙耳，詳彼疏。云「五曰邦縣之賦」者，距國四百里地之地征。《載師》云：「以小都之田任縣地」是也。其公邑之賦，全入於王，小都采地之賦，則計率貢於王。云「六曰邦都之賦」者，距國五百里地之地征。《載師》云：「以大都之田任疆地」是也。亦公邑之賦，全入於王，大都采地之賦，計率貢於王。云「七曰關市之賦」者，司市、司關所斂廩征、財征是也。云「八曰山澤之賦」者，山林川澤之地征也。山虞、澤虞、川衡、林衡斂之。云「九曰幣餘之賦」者，《說文·食部》云：

「餘，饒也。」百官府法用之餘義，職幣所斂者是也。注

云「財，泉穀也」者，《宰夫》、《小司徒》注義同。《說文·貝

部》云：「財，人所寶也。」《考工記·總敘》云：「飭力以長

地財，謂之農夫。」財亦指穀言之。賈疏云：「見《外府》云

「掌邦布之出入賜予之財用」，以此知財中有泉也。又知財

中有穀者，案《禮記·喪大記》云：「納財，朝一溢米。」米即

是穀，故知財中有穀也。」詒讓案：《荀子·富國篇》楊注

云：「粟米布帛曰財。」依鄭前注說，則布帛為賄，此財賄並

言，則財中不含布帛，對文則異也。但鄭意此賦為口泉，則

以泉為主，其無泉者，則入穀及布帛以當泉。然此賦實為

地稅，則本不計口為征，而泉穀布帛，各隨所有斂之，亦不

定以泉為正也。鄭司農云「邦中之賦，二十而稅一，各有差

也」者，賈疏云：「先鄭約《載師》園廛二十而一，近郊十一，

遠郊二十而三，故云各有差。後鄭不從者，以關市、山澤、

幣餘之賦，皆無地稅，即上云邦中四郊之等，亦非地稅，故

不從也。」案：先鄭據《載師》釋此九賦為地稅，其說塙不可

易，後鄭及賈破之，非也。云「幣餘，百工之餘」者，謂百工

財賄所用之餘入於官者。《大府》「幣餘之賦」，先鄭注云：

「幣餘，使者有餘來還也。」與此注說異，皆未盡得其義。此

幣餘之賦，乃官府法用之餘，不徒出於百工。若云在市百

工器物之貢，則是九職之一，與幣餘之賦尤不相涉也。云

「玄謂賦，口率出泉也」者，《漢書·高帝紀》云：「郡各以其

口數率，人歲六十三錢以給獻。」顏注云：「率，計也。」此即

漢初口率出泉之法。《廣雅·釋言》云：「率，計數也。」謂

校計人口令出泉也。口率出泉，省文亦云口泉，與漢小丁

之口錢異，詳後。賈疏云：「案：《大府》云九貢九賦九功

各別。又見《司會》云「以九貢致邦國之財用，以九賦令田

野之財用，以九功令民職之財用」，貢賦及功各別，賦為口

泉也。」金榜云：「先鄭謂邦中之賦，二十而稅一，謂地稅

也。後鄭云賦口率出泉，謂夫布也。二者古皆謂之賦。

《閭師》「掌國中及四郊之人民六畜之數，以任其力，以待其

政令，以時徵其賦。」八貢與夫布，閭師以時徵之，通謂之

賦。是賦者，歲人之總名也。」江永云：「漢之口率出泉，

《周禮》亦有之，《閭師》言凡無職者出夫布是也。此因閒民

一職，轉移執事於人，故使出夫布，猶後世之丁錢及僱役

錢，不可以此通釋賦字也。」案：江說是也。賦雖為歲人之

總名，而九賦當以先鄭之說為正。蓋自邦中至山澤八

者，^①並任地之稅。幣餘出於官府，雖非地稅，而官府亦即

①「中」，原作「布」，據楚本改。

出賦之地。故《司會》云「以令田野之財用」。若是口泉，則不得言田野矣。載師任地，自國宅無征外，園廛、近郊、遠郊、甸、稍、縣、都及漆林之征，即此邦中至山澤八賦之法。若夫布，則《閭師》與八貢同舉，乃九職閭民之征，非九賦之正。若如鄭說，非徒幣餘一賦必不可通，而閭民之外，農牧虞衡之民，既各有所專任之職事，以令貢稅，乃復計口令出泉，是責倍輸之賦也，豈先王之法乎！惟《管子·山至數篇》云：「邦布之籍，終歲十錢。」《輕重甲篇》云：「桓公曰：寡人欲藉於萬民。管子曰：不可，是隱情也。」又云：「則無屋粟邦布之藉。」《國蓄篇》云：「以室廡籍，謂之毀成。以六畜籍，謂之止生。以田畝籍，謂之禁耕。以正人籍，謂之離情。以正戶籍，謂之養贏。五者不可畢用，故王者偏行而不盡也。」以諸文互校，彼邦布，蓋即《閭師》無職者所出之夫布。《載師》「民無職事者，出夫家之征」，亦出此布。周制本使閭民惰民出之，則不以此為任民之通法，而《管子》言之甚詳。疑春秋以後，侯國橫征，或使民之有職事者亦出此布，抑或變更九職任民之故法，改貢物為人泉，皆未可知。要所謂籍於萬民籍於正人者，實後世口泉之濫觴也。《管子·海王篇》又云：「萬乘之國，正人百萬也。月人三十錢之籍，為錢三十萬。」此正人月籍三十錢，

與《山至數篇》文異。考彼書《揆度篇》云：「萬乘之國，為戶百萬戶，為開口千萬人，為當分者百萬人。」是萬乘之國，實有千萬人，而止籍其當分之正人百萬，蓋亦十賦其一，然非周初九賦之制也。又案：《漢書·食貨志》說周法云：

「有賦有稅。稅謂公田什一及工商虞衡之人也。賦共車馬甲兵士徒之役，充實府庫賜予之用。稅給郊社宗廟百神之祀，天子奉養百官祿食庶事之費。」《刑法志》亦云：「有稅有賦。稅以足食，賦以足兵。」其下即說丘乘軍賦之法。蓋亦以稅當此經之九職，賦當此經之九賦，與後鄭義略同，而以賦為兼有軍賦，則小異。攷《國語·魯語》說軍賦歲收，一井出稷禾秉芻缶米，與井田什一之常稅，絕不相冢，詳《載師》疏。《漢志》說稅賦給用，與《大府》九賦分給九式之文尤不合，不可以證此經也。云「今之算泉，民或謂之賦，此其舊名與」者，此舉漢法證賦為口率出泉也。《漢舊儀》云：「算，民年七歲以至十四歲，出口錢，人二十三。二十錢以食天子，其三錢者，武帝加口錢，以補車騎馬。又令民男女年十五以上至五十六，出賦錢，人百二十為一算，以給車馬。」案：此即鄭所謂「算泉，或謂之賦」者也。《漢書·高帝紀》：「四年，初為算賦。」如淳注引《漢儀注》，與衛敬仲說同。賈疏謂漢法民年二十五以上至六十，出口賦錢人

百二十以爲算。與衛說小異，當以衛爲正。漢之口錢與算錢，二者不同，然其計口出泉則同。二者民並謂之賦，故《漢書·昭帝紀》如淳注引《漢儀注》，以口錢爲口賦錢。鄭惟舉算泉爲況者，以《鄉大夫》云「國中自七尺以及六十，野自六尺以及六十有五，皆征之」，與漢算泉法約略相當也。黃以周云：「注口率出泉，蓋亦謂計夫賦役，故又曰『今之算錢』。漢有算錢口錢二法，皆計口出錢也。算錢起於高帝。貢禹以爲古無賦算口錢，起武帝征伐四夷，重賦於民，產子三歲則出口錢，至於生子輒殺，宜令兒七歲去齒，乃出口錢，二十乃算。算錢口錢，二者分別言之。《後漢·光武紀》注引《漢儀注》，分算錢口錢爲二。與《貢禹傳》合。算錢者，已成丁壯而賦之。口錢則賦其未成丁壯者。《高帝紀》「初爲算錢」，《文帝紀》「民賦四十」，景帝紀「二十始傳」，《宣帝紀》「減民算三十」，《成帝紀》「減賦四十」，皆算錢也。」又云：「漢之算錢，爲古力役之征，應入九職，不得據以釋九賦。」案：黃說是也。鄭以前九職爲地征正賦，故以此九賦爲口賦，而以漢算賦況之。然漢之算賦，與古九職力役之征相類。但九職之征，受職者各貢其物，自閒民外，皆不定賦泉；漢之算賦，則概令出泉而不貢物，其法仍異。而鄭以況九賦田野之征，則尤不相當也。若漢之口

錢，則取之十四歲以下之小口，此皆古之所不征者，實爲病民之橫斂，鄭固不謂周有此法也。以《管子》攷之，則東遷以後，侯國已有口賦之制。《漢書·食貨志》載董仲舒說武帝云「秦田租口賦鹽鐵之利，二十倍於古」，則秦亦有口賦，此並漢算賦之濫觴，而亦非小丁之口錢。但口錢雖橫征，然似亦起於漢初。貢禹謂起於武帝者，據產子三歲即出口錢，又加錢三言之耳，非前此全無口錢也。引《鄉大夫》「以歲時登其夫家之衆寡，辨其可任者，國中自七尺以及六十，野自六尺以及六十有五，皆征之」者，證六鄉之征賦也。云「《遂師》之職亦云，以徵其財征」者，證六遂之征賦也。云「皆謂此賦也」者，謂《鄉大夫》、《遂師》二職所云征，即此經之賦，並據口泉而言。然《鄉大夫》所云，乃力役之征，計戶共貢役，而不計口出泉。先鄭彼注，訓征爲給事，於義爲近。後鄭以爲賦稅，乃誤說也。《遂人》「財征，則據地稅言之，雖即此九賦，而亦非口泉，此注亦誤，詳《鄉大夫》疏。云「邦中，在城郭者」者，與《鄉大夫》「國中」同，彼注亦云「國中，城郭中也」。案：城中，謂王城方九里之中，城之外有郭。《周書·作雒篇》云：「乃作大邑成周於土中，城方千六百二十丈，郭方七十二里。」孔晁注云：「郭，郭也。」案：「七十二里」當作「二十七里」。此國中，注謂兼城郭中

言，則方二十七里郭門之內，並爲國中矣。焦循云：「隱公五年傳云：『鄭人伐宋，入其郭。公聞其人郭也，將救之。』問於使者曰：『師何及？』對曰：『未及國。』公怒，乃止。」按：公聞其人郭，而使者對以未及國，公以其給己而怒，則當時謂郭內爲國也。《齊語》「參其國而伍其鄙」，韋昭注云：「國，郊以內也。鄙，郊以外也。」《孟子》云：「請野九一而助，國中十一使自賦。」《鄉大夫職》「國中對野言，與《孟子》同。《遂人》『掌邦之野』，注云：『郊外曰野，此野爲甸稍縣都。』準此，則近郊遠郊爲國中矣。」又云：「經典國有三解。其一，大曰邦，小曰國。如『惟王建国』、『以佐王治邦國』是也。其一，郊內曰國。《國語》、《孟子》所云是也。其一，城中曰國。《小司徒》『稽國中及四郊都鄙之夫家』、《載師》『以廛里任國中之地』、《質人》『國中一句郊二甸野三甸』、《鄉士》『掌國中』是也。蓋合天下言之，則每一封爲一國；而就一國言之，則郊以內爲國，外爲野；就郊以內言之，又城內爲國，城外爲郊。蓋單舉之則相統，並舉之則各屬也。」云「四郊去國百里」者，《載師職》「近郊遠郊注：『杜子春云，五十里爲近郊，百里爲遠郊。』」又引《司馬法》云「王國百里爲郊」。此四郊，據王城四面，面各百里，遠郊以內，通有郊稱。《說文·邑部》云「距國百里爲郊」，亦據遠

郊大界言之。段玉裁云：「《周禮》之制，王城方九里謂之國，城中謂之國中，城外五十里爲近郊，至百里爲遠郊。近郊、遠郊，見《載師》。近郊，經不多見。遠郊，經文謂之郊，謂之四郊。郊之內爲六鄉，至二百里爲野，野之內爲六遂。經文如《大宰》、《小司徒》、《閭師》，多以國中四郊並舉。言四郊，即關六鄉在內。但言鄉，則未見鄉之所際，故言六鄉不可以關四郊也。郊者，鄉與遂之間也。國中四郊對舉，猶令人云城裏城外也。鄭注《王制》『移之郊』，云「郊，鄉畝之外者也」。正謂郊在鄉與遂相接之間，故云鄉畝之外者，謂鄉之邊也。」案：段說是也。此經凡言郊，有包六鄉在內者，如此職言四郊之賦，不別出六鄉，猶之甸包六遂，經止言邦甸之賦也。有別郊於鄉之外者，如《小司徒》「大比六鄉四郊之吏」，《遺人》「有鄉里之委積，又有郊里之委積，郊與鄉並舉，則郊專指鄉外之餘地言之，互詳《小司徒》、《載師》、《遺人》疏。云「邦甸二百里」者，《載師職》「甸地」注引《司馬法》云「二百里爲州」，甸即州也。云「家削三百里」者，《釋文》云：「削本亦作稍，又作郛。」案：《說文·邑部》云：「郛，國甸。大夫稍稍所食邑。《周禮》曰「任郛地」，在天子三百里之內。」《載師職》作「稍地」，注云：「故書稍或作郛。」郛，正字，削稍同聲段借字。《縣師》、《稍人》字並作

稍。《載師》注又引《司馬法》云「三百里爲野」，稍即野也。《說文》云「國甸」者，疑因稍與甸地相比，故冢其稱。《周書·作雒篇》云：「制郊甸方六百里。」方六百里，開方爲地三十同。即自稍以內，包國中及郊甸之地也。云「邦縣四百里」者，《載師職》「縣地」注引《司馬法》云「四百里爲縣」是也。云「邦都五百里」者，《載師職》「大都任置地」，注引《司馬法》云「五百里爲都」。《說文·邑部》亦云《周禮》，距國五百里爲都是也。金鶚云：「邦都即置地，以其在五百里爲置界之地，故曰置，以其大都所在，爲都之宗，故曰都。」云「此平民也」者，賈疏云：「謂六曰已上，皆是平善之民，先王以農爲本，故謂之平民也。對七曰已下非農民者爲未作也。」云「關市山澤謂占會百物」者，《史記·平準書》：「各以其物自占。」司馬貞《索隱》引郭璞云：「占，自隱度也。」案：占會百物，謂向官自隱度諸物，會聚積貯以求利。若《食貨志》王莽詔云「工商能采金銀銅連錫，登龜取貝者，皆自占司市錢府，順時氣而取之」是也。賈疏云：「謂關上以貨出入，有稅物；市若泉府廛布總布之等，亦有稅物；山澤民人入山澤取財，亦有稅物。此人占會百物，爲官出息。」易拔云：「關市之賦，如《司市》所言市征，《司關》所言關門之征是也。山澤之賦，如尹人所取金錫玉石，

角人所取齒角骨物之類是也。」案：易說是也。《孟子·滕文公》、《公孫丑》篇趙注，並引此經關市之賦，以明關市之有征稅，則趙岐亦以此賦爲即關征市征，疑漢時禮家已有此說，而郊卿從之。蓋此關市山澤之賦，即地稅及貨賄材物之稅，非占會百物者之口賦，鄭、賈說亦誤。云「幣餘，謂占賣國中之斥幣」者，《一切經音義》引《漢書音義》云「斥，不用也」。謂國中之斥幣不用者，隱度其直，受而賣之也。賈疏云：「斥幣謂此物不入大府，指斥出而賣之，故名斥幣。」孔廣森云：《封禪書》曰「賜樂大乘輿斥車馬帷帳器物」。然則斥幣謂物陳積而斥出不用者。若占賣之，即謂之斥賣，《貨殖傳》「烏氏贏畜牧，及衆斥賣」，《漢書》「縣官斥賣董氏財凡四十三萬萬」是也。《賈師》注云「官有所斥令賣」，其斥字義同此。《晏子春秋》曰「財在外者斥之市」，是周時已有斥賣之語。王念孫云：「幣餘之賦，鄭司農云「百工之餘」，《大府》注又云「幣餘，使者有餘來還也」。二說不同。後鄭則以爲占賣國中之斥幣。又《司書》以敘其財，受其幣，使人于職幣」。後鄭云：「亦受錄餘幣而爲之簿書，使之入于職幣。幣物當以時用之，久藏將朽蠹。」案：幣餘之幣，非幣帛也。用之不盡則有餘，凡物皆然，不獨幣帛而已。幣當讀爲敝，《說文》：「敝，帔也。一曰敗

衣，從支兩。兩，敗衣也，象衣敗之形。』《急就章》：「帋敝囊橐不直錢」，顏注曰：「帋者，縻殘之帛也。敝，敗衣也。」是敝爲衣敗殘之名，殘則餘矣，因而凡物之殘者皆謂之敝餘。今時營造用物有餘，價賣以還官，謂之回殘是也。《職幣職》曰：「掌式灋以斂官府都鄙與凡用邦財者之幣，振掌事者之餘財。」後鄭曰：「幣謂給公用之餘。」是餘財謂之幣，較然甚明。職幣，主餘財之官也。「斂凡用邦財者之幣」，謂收用邦財者之餘也。司書「敍其財，受其幣，使人於職幣」，謂受其餘財，使人于主餘財之官。《泉府》：「歲終，則會其出入而納其餘」，後鄭曰「納，入也，入餘於職幣」是也。古敝字多通作幣，《魯語》：「不腆先君之幣器」，即敝器。《管子·輕重甲篇》：「靡幣之用」，^①《輕重乙篇》：「器以時靡幣」，即靡敝也。《孔宙碑》：「彫幣」，即彫敝也。皇象碑本《急就章》：「帋幣」，即帋敝也。字或作「幣」，《管子·小匡篇》：「戎車待游車之弊，戎士待臣妾之餘」，《趙策》：「趙以七敗之餘，收破軍之弊」，弊亦餘也，合言之則曰弊餘耳。先鄭前一說以幣餘爲百工之餘，差爲近之；後一說謂使者有餘來還，則誤以爲幣帛之餘矣。後鄭云「幣謂給公用之餘」，已得其義；而又云「占賣國中之斥幣」餘幣，「當以時用之，久藏將朽蠹」，則亦誤以爲幣帛之幣。豈知幣爲敝之假借，讀當如

其本字乎！「案：王安石、王昭禹、易拔、薛氏、劉迎、陳友仁、方苞、江永、莊存與、沈夢蘭，並據《職幣》證此幣餘爲式法所用之餘幣，而王說尤精塙，足正二鄭之誤。云「皆末作當增賦者」者，謂關市、山澤、幣餘三者，皆末作，與上平民務本業者異，當增其口泉也。今案：此並非口泉，幣餘爲官府公用之餘，亦非末作，鄭說並失之。云「若今賈人倍算矣」者，證末作當增賦也。惠棟云：「此漢律也。應劭《漢書·惠帝紀》注云：漢律，人出一算，算百二十錢，唯賈人與奴婢倍算。」云「自邦中以至幣餘，各入其所有穀物，以當賦泉之數」者，賈疏云：「以經云斂財賄，財賄即是穀物，取之以當賦泉之數者，若漢法人百二十。」云「每處爲一書，所待異也」者，據《大府職》，九賦各有所待，若此一曰邦中之賦，彼云「邦中之賦以待賓客」之等是也。賈疏云：「此九賦所得財物，給下九式之用，九式用處不同，故此九賦分爲九處，是以每一處爲一書，以待其出，式謂用財之節度，是所待異也。」江永云：「關市山澤之賦，亦即在邦中、四郊、甸稍、縣都之中。幣餘之賦，亦即八賦中之餘財。何以別出三種，列而爲九？蓋九賦因九式而分者也，觀《大府職》

① 「用」，原作「川」，據《管子》改。

可知矣。賓客、芻秣、工事、匪頒、幣帛、祭祀、羞服、喪荒、好用，因國之用財有此九事，故於通國之賦先分之爲九，以待九式之用，酌其所人所出之多寡，約略相當，準之以爲式焉。非謂王之膳服必出於關市，國之喪荒必取諸山澤也，其財物略相當焉耳。他賦與式皆倣此。惟幣餘一賦，從八式所用之餘而生，因王不能無賜予，故於八式所用之財，常留有餘，特設職幣一官掌之，是以賦與式皆有九也。」案：江說是也。以九式均節財用：一曰祭祀之式，

二曰賓客之式，三曰喪荒之式，四曰羞服之式，五曰工事之式，六曰幣帛之式，七曰芻秣之式，八曰匪頒之式，九曰好用之式。式謂用財之節度。荒，凶年也。羞，飲食之物也。工，作器物者。幣帛，所以贈勞賓客者。芻秣，養牛馬禾穀也。鄭司農云：「匪，分也。頒讀爲班布之班，謂班賜也。」玄謂王所分賜羣臣也。好用，燕好所賜予。【疏】「以九式均節財用」者，此制國用之總要也。此皆國之法用，大府以九賦正共之財待之，因事爲之法式，故《司書》謂之九事。金榜云：「九式者，冢宰以歲之上下制之，其式凡九。《王制》曰：『冢宰制國用，必於歲之杪，五穀皆入，然後制國用。』」

考之經，司稼以年之上下出斂法，均人均力征以歲上下。其斂諸民者，每歲不同。廩人以歲之上下數邦用，以知足否，以詔穀用，以治年之豐凶。小司寇孟冬祀司民，獻民數於王，王拜受之，以圖國用而進退之。其國用多寡，亦每歲輒異。冢宰恒於歲杪制爲法式，凡受財用者，皆並式法受之。理財之道，節用爲本，大宰以九式均節財用，《小宰》「執邦之九貢九賦九式之貳，以均財節邦用」，又云「以官府之六職辨邦治，一曰治職以節財用」，蓋其職之轉相佐貳者如此。」云「一曰祭祀之式」者，若《肆師》云「立大祀，用玉帛牲牷；立次祀，用牲幣；立小祀，用牲」，皆有等差。又《王制》說冢宰制國用云：「祭用數之仂。」注云「算今年一歲經用之數，用其什一」，即祭祀用財之式也。賈疏云：「謂若大祭次祭用大牢，小祭用特牲之類。」云「二曰賓客之式」者，若大行人、掌客所掌禮籍之等數是也。云「三曰喪荒之式」者，賈疏云：「喪謂若諸侯諸臣之喪，含襚贈奠賻贈之類。王家之喪所用大，非此所共也。」案：賈說非也。此喪當通大喪小喪言之，凡斂葬祭奠及明器等，皆依法式共之，《王制》云「喪用三年之仂」是也。金榜云：「喪荒，《大府》作『喪紀』。凶荒事出非常，不可預爲節度。《遺人》『縣都之委積，以待凶荒』。《倉人》『辨九穀之物，有餘則藏之，以

待凶而頒之」。故耕三餘一，^①耕九餘三，以三十年之通，雖有凶旱水溢，民無菜色。此治凶荒之道也。」云「四曰羞服之式」者，賈疏云：「謂王之膳羞衣服所用也。」《釋文》云：「羞服，干云：『羞，飲食也。服，車服也。』服或作膳。」臧琳云：「干、賈本皆作『羞服』，《釋文》同。或作『膳』，係妄改。」阮元云：「《大府》『闕市之賦以待王之膳服』。注云：『膳服即羞服也。』此經本作羞服之證。」案：阮元說是也。羞即膳夫、庖人所共膳羞，酒正有酒式，是其一隅。服即司服、內司服、弁師、屨人所共冠服，皆有法式。干實謂兼有車，亦是也。云「五曰工事之式」者，冬官百工造作器物，須授以齋材，貴賤工沽，亦各有法式也。注云「式謂用財之節度」者，《說文·工部》云：「式，法也。」此九者，皆國用之節度，多少有常。法式者，《大府》所謂「凡頒財以式灋授之」是也。云「荒，凶年也」者，《大司徒》注同。《爾雅·釋天》云：「穀不熟爲饑，蔬不熟爲饑，果不熟爲荒。」《說文·禾部》云：「穡，虛無食也。」荒即穡之省。又《凶部》云：「凶，惡也。」凶年謂年惡也。《穀梁》襄二十四年傳云：「五穀不升爲大饑，一穀不升謂之嗛，二穀不升謂之饑，三穀不升謂之饑，四穀不升謂之康，五穀不升謂之大侵。」《韓詩外傳》「康」作「荒」，荒康古字通。《墨子·七患

篇》云：「一穀不收謂之饑，二穀不收謂之旱，三穀不收謂之凶，四穀不收謂之饑，五穀不收謂之饑。」諸書所說，凶荒異名，此經通言不別也。云「羞，飲食之物也」者，《釋文》引干注義同。此羞爲凡飲食膳羞之通名，與《膳夫》羞用百有二十品專屬庶羞者異。云「工，作器物者」者，《漢書·食貨志》云：「作巧成器曰工。」賈疏云：「若《考工》所作器物也。」云「幣帛，所以贈勞賓客者」者，賈疏云：「謂若《司儀職》上公三問三勞之等，皆有束帛。《聘禮》『賄用束紡』。」詒讓案：贈賓客，猶《司儀》諸公相朝之致贈。《聘禮》云：「公使卿贈如覲幣。」注云：「贈，送也，所以好送之也。」《聘禮》又云「宰書幣」，諸侯之宰，猶天子大宰，故亦掌幣帛之事。但此幣帛之式，似當主聘問幣齋之幣而言，若贈勞之幣，則上賓客之式內已賅之矣。云「芻秣，養牛馬禾穀也」者，《說文·艸部》云：「芻，刈艸也。」又《食部》云：「秣，食馬穀也。」秣與芻同。《小爾雅·廣物》云：「藁謂之稈，稈謂之芻。」《充人》注云：「養牛羊馬曰芻。」《毛詩·小雅·鴛鴦》云：「乘馬在廐，摧之秣之。」傳云：「摧，莖也。秣，粟也。」箋云：「古者明王所乘之馬，繫於廐，無事則委之以

①「一」，原誤作「九」，據金榜《禮箋》改。

莖，有事乃予之穀。」案：凡刈草及莖禾稾飡牛馬謂之芻，以粟飡牛馬謂之秣，故云芻秣養牛馬禾穀也。江永云：「賓客來，固有幣帛、芻秣，又別爲二式者，王朝遣使存覲省聘問，亦用幣帛，牛人、牧人諸官自有芻秣，十二閑之馬，用芻秣尤多也。」案：江說是也。賈疏偏據《聘禮》致饗餼芻禾等爲釋，說未核。鄭司農云「匪，分也」者，《廩人》注云「匪讀爲分」，是匪分聲轉義同。莊述祖云：「《說文》，匪器似竹篋，無分訓，惟箕有非音。《說文》云：『箕，賦事也。』從業从八，八，分之也。八亦聲，讀若頒。一曰讀若非。」《周禮》借匪作箕，故司農云匪分也。」云「頒讀爲班布之班」者，《宮伯·大宗伯》注、《大史》先鄭注，讀並同。《說文·頁部》云：「頒，大首兒。」又《珣部》云：「班，分瑞玉也。」《支部》云：「攷，分也。」段玉裁云：「司農謂頒非其義，故易爲分瑞玉之班。頒，古音讀如汾，在諄文欣魂痕部。班，古音在元寒桓刪山仙部。合音最近，古相假借。若讀爲分，或讀爲攷，則同部假借。」云「謂班賜也」者，以匪訓爲分，班訓爲布，匪頒即謂分布賜予也。云「玄謂王所分賜羣臣也」者，賈疏云：「就足司農班賜之義也。」江永云：「匪頒之式，見於經者，《廩人》匪頒稍食也，《宮正》、《內宰》王宮后宮之稍食也，《稟人》外內朝宥食者之食也。又如《膳夫》肉

脩之頒賜，《酒正》之秩酒，《宮伯》、《司裘》之頒衣裳，《司裘》、《羅氏》之行羽物，《凌人》之頒冰，皆匪頒之類，是皆有常數者。其出於恩好賜予，則人好用之式。」金榜云：「《國語》：『天子之田九畝，以食兆民，王取經人焉，以食萬官。』《周官》以九賦待九式之用，禄食宜在九式中。《廩人》掌九穀之數，^①以待國之匪頒。《大宰》九式，八曰匪頒之式。則匪頒者，謂禄食歟？禄食所以代耕，恒以歲爲上下，由是匪頒有式。《墨子書》：『歲饑則仕者大夫以下，皆損禄五分之一，早則損五分之二，凶則損五分之三，饑則損五分之四，饑則盡無禄，稟食而已矣。』蓋其遺法。」案：江、金說是也。沈彤說亦略同。凡經言匪頒者，以羣臣之禄爲最大。此外若稍食及歲時之常賜，遺人之委積，凡著於秩籍，爲法所當得者，並入此科。經例，常賜謂之頒，非常賜謂之賜。《典臬》云：「頒衣服授之，賜予亦如之。」頒衣服爲匪頒，賜予爲好賜，其分別甚明。合言之則云頒賜，《膳夫》云「凡肉脩之頒賜」是也。此注釋匪頒爲分賜羣臣，蓋通該禄食及常賜言之。《廩人》注又以匪頒爲《遺人》諸委積不及羣臣之禄賜者，以委積爲藏聚米穀倉廩之通稱，凡羣臣禄

① 「九」，原作「七」，據金榜《禮箋》改。

賜之米穀，咸出於彼，故偏舉爲釋，義實互相備也。詳《廩人》疏。云「好用，燕好所賜予」者，《內饗》「凡王之好賜肉脩」，注云：「好賜，王所善而賜也。」《大府》云：「幣餘之賦以待賜予。」注云：「賜予即好用也。」案：《左傳》昭五年云「宴有好貨」，杜注云：「宴飲以貨爲好。」又昭七年云：「楚子享公于新臺，好以大屈。」注云：「宴好之賜。」此並因饗燕而賜。此好用，《內饗》謂之好賜，《內府》謂之好賜予，注並訓好爲善，蓋與《內小臣》好事好令，《典瑞》、《大行人》結好，義並略同。此注云「燕好所賜予」，亦謂王燕閒與諸侯及親貴諸臣爲恩好，而有賜予，下經「旂貢」注亦以燕好爲釋可證，則不必專屬饗燕之賜。但其賜予在常法頒賦之外，故別人好用。賈疏以「燕飲有所愛好」釋注「燕好」，非鄭悞也。呂飛鵬云：「《玉府》云「凡王之好賜」，《內府》云「凡王及冢宰之好賜予」，《職幣》云「以詔上之小用賜予」，皆謂好用。《職幣》疏以爲常賜予，誤也。《小雅·鹿鳴》燕羣臣嘉賓，以幣帛筐篚將其厚意，而曰「人之好我」，《彤弓》天子錫有功諸侯，而曰「中心好之」，是其證也。」以九貢致邦國之用：一曰祀貢，二曰嬪貢，三曰器貢，四曰幣貢，五曰材貢，六曰貨貢，七曰服貢，八曰旂貢，九曰物貢。嬪故書作賓。鄭司農

云：「祀貢，犧牲包茅之屬。賓貢，皮帛之屬。器貢，宗廟之器。幣貢，繡帛。材貢，木材也。貨貢，珠貝自然之物也。服貢，祭服。旂貢，羽毛。物貢，九州之外，各以其所貴爲摯，肅慎氏貢楛矢之屬是也。」玄謂嬪貢，絲枲。器貢，銀鐵石磬丹漆也。幣貢，玉馬皮帛也。材貢，櫟幹栝柏篠簜也。貨貢，金玉龜貝也。服貢，絺紵也。旂讀如囿游之游。游貢，燕好珠璣琅玕也。物貢，雜物魚鹽橘柚。【疏】「以九貢致邦國之用」者，此邦國，即《詛祝》注云諸侯國也，與前邦國通王國言者異。九貢，即《職方氏》云「制其貢，各以其所有」。《大戴禮記·虞戴德篇》云：「諸侯內貢於天子，率名數地實也，是以不至必誅。」是其事也。賈疏云：「此諸侯邦國歲之常貢，則《小行人》云令春人貢是也。《大行人》云「侯服歲一見，其貢祀物」，彼謂因朝而貢，與此別也。但諸侯國內得民稅，大國貢半，次國三之一，小國四之一。所貢者，市取當國所出美物，則《禹貢》所云厥篚厥貢之類是也。」案：賈以《大行人》六服朝貢與此不同，故專據《小行人》春人貢爲釋，其說是也。但據《小行人》注，則

①「虞戴德篇」，原訛作「千乘篇」，據楚本改。

每歲常貢，亦六服所貢，唯以遣使奉之爲異。又《大行人》朝貢祀、嬪、器、服、材、貨六貢，亦具在此九貢之內，是彼職不備九貢，而此經則通該彼六貢，二文固足相參證矣。又案：依《大司徒》注先鄭說，當云大國貢半，次國三之一，小國四之三。賈依後鄭說，誤，詳彼疏。注云「嬪故書作賓」者，賈疏云：「言故書者，鄭注《周禮》時有數本。劉向未校之前，或在山巖石室有古文，考校後爲今文。古今不同，鄭據今文注，故云故書作賓。」段玉裁云：「《周禮》以出於山巖屋壁入於祕府者爲故書，然則鄭君時所傳爲今書也。今書往往與故書不同，如今作嬪，故作賓是也。就故書中，亦復互異，今書亦然。蓋說者既殊，而轉寫乖異矣。鄭君所見故書，非真祕府所藏也，亦轉寫之本，目爲祕府本耳。鄭君擇善而從，絕無偏執。故司農從故書作賓，已從今書作嬪，於此可見其例也。故賓今嬪，此即賓讀爲嬪，大約古字多用假借。」徐養原云：「《周禮》有故書今書之別。疏謂劉向未校以前爲古文，既校以後爲今文，非也。以鄭注考之，凡杜子春、鄭大夫、鄭司農所據之本，並是故書。故書今書，猶言舊本新本耳。《周禮》乃古文之學，何今文之有！劉向校書未卒業，子歆續成之。《周禮》蓋歆所校，杜子春、鄭大夫親從歆問，而並據故書作注，則故書乃校後

之本也。《醢人》注云「故書鴈或爲鶉」，《鄉師》注云「今書多爲屯」，是故書今書皆非一本。然子春等於經文，但正其讀，不易其字。今書竟改之，後鄭就今書以校故書，而著其異同於注。」詒讓案：《周禮》故書今書，與《儀禮》古文今文不同。《儀禮》自有古今文兩家之學，《周禮》則自劉歆以來，止有古文之學，無所謂今文。徐氏謂故書亦爲校後之本，故書今書猶言舊本新本，足正賈疏之誤。但此經唯祕府所藏河間獻王所獻者爲祖本，或爲古文書，與孔壁諸經同，此非二鄭所得見。然則所謂故書者，有杜及二鄭所據之本，有後鄭所據之本，要皆不必祕府舊帙，不過校之今書，所出略前耳。今書則後鄭所見同時傳寫之帙。蓋故書今書，皆不能埽定其爲何家之本也。至杜、鄭所校本外，又有賈、馬二家，亦今書之別本。以疏及《釋文》所引攷之，《大宗伯》「圍敗」，馬本作「國敗」；《巾車》「有握」，馬本作「有幄」；《梓人》「冒鳴」，賈、馬作「冒鳴」；並不見於注，則今書或本甚多，鄭亦不能悉校矣。《夏采》注謂《士冠禮》、《玉藻》故書綏作綏。《禮經》雖有古文，而《小戴記》則本不出壁中，無古文，而亦得有故書，斯亦故書今書不過新舊本之證也。鄭司農云「祀貢，犧牲包茅之屬」者，《大行人》後鄭正義同。《月令》云：「季冬，乃命大史，次諸侯之列，賦

之犧牲，以共皇天上帝社稷之饗，乃命同姓之邦，共寢廟之芻豢。」此即祀貢犧牲之法。齊桓公責楚貢包茅，見《左》僖四年傳。《禹貢》亦云「荊州，厥貢包匭菁茅。」包茅，詳《甸師》疏。云「賓貢，皮帛之屬」者，《小行人》六幣，璋以皮。注云：「皮，虎豹皮也。」帛，即上注云「幣帛所以贈勞賓客者」是也。賈疏云：「此九貢皆是諸侯賓之所貢，不得特以一事爲賓貢，作賓貢者非也。」王引之云：「祀與賓相對爲文，其爲賓客之事明甚。上文『以九式均節財用，一曰祭祀之式，二曰賓客之式』，《地官·鄉師》『聞共祭器，州共賓器』，是其例也。祀貢以供王祭祀之事，賓貢以供王賓客之事，非謂諸侯來賓而貢之，因謂之賓貢也。賈疏不達先鄭之意，而臆爲之解，非是。」案：王說是也。先鄭以賓貢爲供賓客之貢，後鄭因其與幣貢無別，故不從其義。然以經攷之，實當以先鄭爲長。若然，此注所謂帛者，專指供賓客之帛而言。其他幣帛，並當入幣貢也。云「器貢，宗廟之器」者，《大行人》「器物」，後鄭注云「尊彝之屬」，與先鄭同，與此注異。賈疏云：「《大行人》因朝而貢者，得有成器。此歲之常貢，不得有成器，故後鄭不從也。」江永云：「器貢，若昭十五年《左傳》魯壺之屬。傳曰：『諸侯之封，皆有以鎮撫王室。』又曰：『彝器之來，嘉功之由。』疏謂諸侯常

貢無成器，未確。」案：江說是也，莊存與說同。互詳《大行人》疏。云「幣貢，繡帛」者，《說文·巾部》云：「幣，帛也。」《禹貢》貢篚，兖州有織文，徐州有玄纁縞，揚州有織貝，荊州有玄纁璣組是也。云「材貢，木材也」者，《說文·木部》云：「材，木梃也。」《禹貢》：揚州貢木。云「貨貢，珠貝，自然之物也」者，《聘禮記》注云：「貨，天地所化生，謂玉也。」珠亦玉之類，與貝並天地所化生，故云自然之物。後鄭則珠入游貢中，不爲貨貢也。云「服貢，祭服」者，即《禹貢》玄纁玄纁縞之屬。《史記·夏本紀》集解引鄭《書注》云「纁，細也，祭服之材尚細」是也。先鄭說服貢亦謂服材，非謂制成衣服。賈疏謂「後鄭不從，以《大行人》因朝而貢，有祭服，此歲之常貢，不得有成服」，亦非也。《左》桓十五年傳云「諸侯不貢車服」，則成服無貢法。《大行人》貢服物，亦非成服。互詳彼疏。云「旂貢，羽毛」者，《說文·於部》云：「游，旌旗之流也。从汙聲。」旂即游之省。賈疏述注作「游貢」，疑經本不作旂字。先鄭以旂爲旌旗之游，旌旗有注羽旄，故以羽毛爲釋。《禹貢》，揚州、荊州並貢羽毛，徐州貢羽旄夏翟。案：毛即旄人之旄。《說文·犛部》云：「犛，犛牛尾也。」犛正字，毛，旄假借字。旌旗注羽旄，詳《司常》疏。云「物貢，九州之外，各以其所貴爲摯」者，

《釋文》云：「摯本亦作贊。」案：《說文》無贊字，蓋即摯之俗。經注凡瑞摯字，並作摯，或作贊者，誤也。《大行人》云：「九州之外，謂之蕃國，世壹見，各以其所貴實爲摯。」先鄭蓋以《大行人》六服之貢，與此九貢爲一，而物貢在彼六貢之外，故別以蕃國之摯爲釋也。賈疏云：「後鄭不從者，以其九州之外，世一見，無此歲之常貢之法也。」云「肅慎氏貢楛矢之屬是也」者，《國語·魯語》云：「仲尼在陳，有隼集于陳侯之庭而死，楛矢貫之，石弩，其長尺有咫。仲尼曰：『此肅慎氏之矢也。昔武王克商，通道于九夷百蠻，使各以方賄來貢。於是肅慎氏貢楛矢石弩，其長尺有咫。』」韋注云：「楛，木名。弩，鏃也，以石爲之。肅慎，北夷之國。」此亦貢其所貴實之事，故引以爲證。云「玄謂嬪貢，絲枲」者，後鄭依今書作「嬪」爲釋，《大行人》「嬪物」注義同。《禹貢》：青州貢岱畎絲枲，筐篚絲，兗州貢絲，豫州貢枲。《國語·齊語》云：「桓公伐楚，使貢絲於周。」後鄭以絲枲婦功所用，故以當嬪貢也。王引之云：「實本字也，嬪借字也，讀當如其本字，不當依借字爲解。若謂嬪婦化治絲枲，因謂絲枲爲嬪貢，則下文服貢亦嬪婦所爲，^①何以不謂之嬪貢乎？材貢飭化於百工，不聞謂之工貢；貨貢阜通於商賈，不聞謂之商貢也。當以先鄭之說爲長。又

案：《秋官·大行人》「侯服，其貢祀物；甸服，其貢嬪物。」嬪亦當讀爲賓。祀物，祭祀之事所用之物；賓物，賓客之事所用之物也。故書作「嬪物」，嬪即賓之借字。鄭司農乃誤讀嬪物爲嬪物，以爲嬪物婦人所爲物，後鄭因以絲枲當之。豈知《大行人》之其貢嬪物，即《大宰》之賓貢乎？」案：王說足正後鄭之誤。云「器貢，銀鐵石磬丹漆也」者，六者皆制器所用。《禹貢》：梁州貢鏐鐵銀鏤斿磬，荊州貢砥礪斿丹，青州貢鉛松怪石，徐州貢泗濱浮磬，兗州、豫州並貢漆錫，貢磬錯，並是也。云「幣貢，玉馬皮帛也」者，後鄭以《小行人》六幣，圭以馬，璋以皮，璧以帛，琮以錦，琥以繡，璜以黼，是玉帛皮馬，並通稱幣，故據增成先鄭之義。後注又以玉入貨貢，則鄭意以此玉專指圭璋等六玉，追琢成器者而言，皮亦當專指虎豹皮。其它獸皮中裘材者，自入服貢中也。賈疏引《禹貢》之熊羆狐狸球琳等以釋此皮玉，未愜鄭指。云「材貢，樛幹栝柏篠簜也」者，亦與先鄭義同。《禹貢》：荊州貢柞幹栝柏。《說文·木部》云：「柞，木也。重文樛，或从熏。」鄭《考工記·總敘》注引《書》，柞亦作樛，或鄭本《尚書》如是。賈《考工記》疏及《詩·衛風·竹竿》孔

① 「婦」，原脫，今據《經義述聞》補。

疏引鄭《書注》云：「櫛、幹、栝、柏，四木名。幹，栝幹。栝松身曰栝。」又揚州厥貢篠簜，賈《大射儀》疏引鄭《書注》云：「篠，箭。簜，大竹也。」云「貨貢，金玉龜貝也」者，前注云「金玉曰貨」。《說文·貝部》云：「古者貨貝而寶龜。」先鄭說有貝而無金玉龜，故後鄭增成其義。《禹貢》：揚州貢金三品，荊州九江納錫大龜，雍州貢球琳，即金玉龜貢也。《禹貢》：揚州貢織貝。《史記·夏本紀》集解引鄭《書注》云「貝，錦名也」，則鄭不以為龜貝。賈疏引彼釋此貝，亦非。云「服貢，絺紵也」者，《禹貢》豫州貢絺紵是也。云「旂讀如囿游之游」者，賈疏述注「如」作「爲」。段玉裁云：「賈疏作『讀爲』，是。游本訓旌旗之流，其字省作旂。囿游與旌旗之流義不同，故雖同字，而曰讀爲，易其義也。囿游見《序官》。」阮元云：「依《說文·於部》，旌旗之流字作游，从於汙聲，假借爲出遊之游。出遊字或作遊，則俗字也。先鄭云『游貢羽旄』，游之本義也。後鄭云『游貢燕好珠璣琅玕』，游之引申假借之義也。易其字之本義，故曰『讀爲囿游之游』。其字皆从水。凡作旂，不从水者，亦俗字也。凡『讀如』『讀爲』，皆有仍用本字之例，殊之於其義也。」案：段、阮說是也。後鄭不從游之本義爲釋，故云「讀爲」。若作「讀如」，則是僅擬其音，不易其義，不宜別以燕好爲釋

矣。游俗作遊者，《說文》游，古文作逕之變體，詳《師氏》疏。云「游貢，燕好珠璣琅玕也」者，段玉裁云：「《地官·囿人》注：『囿游，囿之離宮小苑觀處也。』燕好珠璣琅玕，皆游觀之物。」詒讓案：後鄭以游爲燕游，故釋爲燕好之物。《禹貢》：徐州貢淮夷嬪珠，荊州篚璣組，雍州貢琅玕。《詩·韓奕》孔疏引鄭《書注》云：「琅玕，珠也。」云「物貢，雜物魚鹽橘柚」者，《禹貢》：徐州貢魚，青州貢鹽、絺，海物惟錯，揚州包橘柚是也。以九兩繫邦國之民：一曰牧，以地得民；二曰長，以貴得民；三曰師，以賢得民；四曰儒，以道得民；五曰宗，以族得民；六曰主，以利得民；七曰吏，以治得民；八曰友，以任得民；九曰覈，以富得民。兩猶耦也，所以協耦萬民。繫，聯綴也。牧，州長也。九州各有封域，以居民也。長，諸侯也，一邦之貴，民所仰也。師，諸侯師氏，有德行以教民者。儒，諸侯保氏，有六藝以教民者。宗，繼別爲大宗，收族者。鄭司農云：「主謂公卿大夫，世世食采不絕，民稅薄利之。」玄謂：利，讀如「上思利民」之利，謂以政教利之。吏，小吏在鄉邑者。友謂同井相合耦勸作者。《孟

子》曰：「鄉田同井，出入相友，守望相助，疾病相扶，則百姓親睦。」藪亦有虞，掌其政令，爲之厲禁，使其地之民，守其材物，以時入于王府，頒其餘於萬民。富謂藪中材物。

【疏】「以九兩繫邦國之民」者，此聯倫屬以立治教之本也。

賈疏云：「言邦國，即據諸侯及萬民而言，謂王者於邦國之中立法，使諸侯與民相合耦而聯綴，不使離散，有九事。」吳廷華云：「《周禮》邦國，或主天下，或主一國，此經九兩，亦應通天下言之。」案：吳說是也。此九兩以有牧以地得民，故經云繫邦國之民，實則通畿內畿外言之，賈疏殊泥。惠士奇云：「繫猶屬也。」《大戴禮·文王官人》七屬曰：「國則任貴，官則任長，學則任師，先則任賢，族則任宗，家則任主，鄉則任貞。」蓋牧以地得民，故國則任貴，長以貴得民，故官則任長。以賢得民者師，以道得民者儒。族則任宗，宗以族得民；家則任主，主以利得民；鄉則任貞，吏以治得民。此文王官人以七屬任之之法。周公又分七屬爲九兩者，有師以賢得民，自有友以任得民；有吏以治得民，自有藪以富得民；則九兩包於七屬也。」注云「兩猶耦也」者，《說文·兩部》云：「兩，再也。」兩即兩之借字。《廣雅·釋詁》云：「耦，兩，二也。」《釋名·釋親屬》云：「耦，遇也，二人相對遇也。」案：耦即相人偶際會之意。《御

覽·職官部》引舊注云「兩，耦合之言」，與鄭義同。云「所以協耦萬民」者，《說文·心部》云：「協，同心之𩇦也。」明注疏本作「協」，非。言立此九兩，所以使民自相協耦也。云「繫，聯綴也」者，《廣雅·釋詁》云：「聯、綴、系，連也。」《說文·糸部》云：「繫，繫纆也。一曰惡絮。」《糸部》云：「系，繫也。」凡連綴字，當作系，經通段繫爲之。黃丕烈云：「聯，古字。連，今字。注用今字，當作連。」案：黃校是也。聯連古今字，詳前八法「官聯」疏。但舊本竝作聯，今不敢輒改。《御覽·職官部》引舊注云：「繫者，以維持其情性，使不離散也。」《大戴禮記》作七屬，亦取繫屬之義。云「牧，州長也。」者，後「建其牧」注云：「以侯伯有功德者，加命作州長，謂之牧。」《書·立政》「宅乃牧」，孔疏引鄭《書注》亦云「州牧」。劉敞云：「牧者，司牧也，謂邦國之君也。諸侯世，故曰以地得民。」王安石、李光坡、方苞、莊有可說，竝略同。案：劉說較鄭爲咳。此牧即《孟子·梁惠王》篇之「人牧」，趙岐注以爲「牧民之君」是也。此與「建其牧」之牧微異，猶長以貴得民，亦與建其長之長異也。《文王官人》七屬，「一曰國則任貴」，惠士奇、孔廣森竝謂於此九兩，當「牧以地得民」，其說最塢。蓋自畿外九州牧伯、五等諸侯及附庸之君與公卿大夫食三等采地，凡世守其國邑者，

通謂之牧。鄭云州長，固爲牧中之一，而別以諸侯爲長，公卿大夫爲主，則非也。云「九州各有封域以居民也」者，九州見《職方氏》。鄭意：每州各有大封域，以收聚其一州之民，故云以地得民。今案：地者，大小國邑之通稱，不必一州也。鄭以牧專屬州牧，遂以地爲專指九州之封域，義亦未咳。云「長，諸侯也，一邦之貴，民所仰也」者，賈疏云：「對則大夫稱長，諸侯稱君。今此上言牧，下言長，故據諸侯也。」江永云：「《詩》曰『克長克君』，諸侯固有長稱。」詒讓案：諸侯雖得稱長，然此長實非諸侯，注說非也。《文王官人》七屬「三曰官則任長」，惠士奇、孔廣森謂即此所謂「長以貴得民」，其說足正二鄭之誤。蓋此長與諸侯之長及後文都鄙所建之長竝異，長猶言官長，即公卿大夫士凡有爵位而無國邑者之通稱，《小宰》六屬皆云「大事則從其長」是也。爲其無世守之封采，則與牧異；無專泄之地治，則又與吏異。此皆以貴領賤，故曰「長以貴得民」。所謂民者，蓋兼含不命之士及府史胥徒工賈隸役等，凡執事於百官府者而言。《周書·作雒篇》云「士居國家，得以諸公大夫」，亦謂此也。《鄉大夫》云：「使民興賢，出使長之；使民興能，入使治之。」其所謂長，即此長以貴得民；其所謂治，即下吏以治得民。《調人》云「師長之讎眦兄弟」，彼師

長，即此九兩之師與長，故與國君之讎眦父文別，亦長非諸侯之一證矣。若如鄭說，以長爲諸侯，則諸侯各世有其國，與州牧無異，亦可以地得民，而必區而別之曰「以貴得民」，果何理乎？云「師，諸侯師氏」者，鄭以經邦國屬侯國，故師儒皆據諸侯師氏、保氏官爲釋。云「有德行以教民者」者，鄉大夫以德行屬賢，故鄭以有德行釋經以賢得民也。詳前疏。賈疏云：「《師氏職》云『以三德三行教國子』，故知有德行也。」云「儒，諸侯保氏有六藝以教民者」者，《儒行目錄》云：「儒之言優也，柔也，能安人，能服人。又儒者，濡也，以先王之道，能濡其身。」此經以師儒對文，鄭既以師爲諸侯師氏，故以儒爲諸侯保氏。彼職云「掌養國子以道，乃教之六藝」，故云有六藝以教民也。知道即六藝者，《宮正》云「教之道藝」，《鄉大夫》云「察其道藝」，藝即道也。《大司樂》「凡有道有德者使教焉」，注亦云「道，多才藝者」，是道藝義同。鄭以德行釋賢，六藝釋道，深合經旨。但此經之師儒，於《文王官人》七屬，當「四曰學則任師」「七曰先則任賢」，所苞甚廣，鄭偏舉師氏保氏二官爲說，則又未咳。劉台拱云：「師即《禮經》所謂先生，鄭注云『古者年七十而致仕，老於鄉里，大夫名曰父師，士名曰少師，而教學焉』是也。儒即《禮經》所謂君子，鄭注云『有大德行不仕者』是

也。」俞樾云：「師者，其人有賢德者也。儒者，其人有伎術者也。」《說文·人部》：「儒，柔也，術士之稱。」是古謂術士爲儒。凡有一術可稱，皆名之曰儒，故有君子儒、小人儒之別。此經所謂儒者，止是術士耳。以道得民者，道亦術也。《國語》曰：「過五日，道將不行。」韋注曰：「道，術也。」儒以道得民，謂以道術得民也。說此經者，習於後世之言，視儒與道皆甚尊，於是始失其解矣。」案：劉、俞說得之而未盡也。此經之師儒，即《大司徒》本俗六之「聯師儒」，皆通乎上下之辭。師則泛指四民之有德行材藝，足以教人者而言。上者國學，鄉遂州黨諸小學，以逮里巷家塾之師，固爲師而兼儒；下者如嬪婦有女師，巫醫農工亦皆有師。蓋齊民曲藝，咸有傳授，則亦各有師弟之分。以賢得民，祇謂師賢於弟子耳，奚必德行純備之賢乎？儒則泛指誦說《詩》《書》，通該術藝者而言。若《荀子·儒效篇》所稱俗儒、雅儒、大儒，道有大小，而皆足以得民，亦不必皆有聖賢之道也。云「宗繼別爲大宗，收族者」者，即《文王官人》七屬「五曰族則任宗」是也。《喪服傳》云：「大宗，收族者也。」《大傳》云：「同姓從宗合族屬。」又云：「別子爲祖，繼別爲宗，繼禰者爲小宗。有百世不遷之宗，有五世則遷之宗。百世不遷者，別子之後也。宗其繼別子之所自出者，百世不遷

者也。宗其繼高祖者，五世則遷者也。」又云：「親親故尊祖，尊祖故敬宗，敬宗故收族。」鄭彼注云：「別子謂公子若始來在此國者，後世以爲祖也。繼別爲宗，別子之世適也，族人尊之，謂之大宗，是宗子也。繼禰者爲小宗，父之適也，兄弟尊之，謂之小宗。遷猶變易也。繼別子，別子之世適也。繼高祖者，亦小宗也。先言繼禰者，據別子子弟之子也。以高祖與禰皆有繼者，則曾祖亦有也，則小宗四，與大宗凡五。」《白虎通義·宗族篇》云：「宗者何謂也？宗，尊也，爲先祖主者，宗人之所尊也。古者所以必有宗，何也？所以長和睦也。大宗能率小宗，小宗能率羣弟，通其有無，所以紀理族人者也。宗其爲始祖後者爲大宗，此百世之所宗也。宗其爲高祖後者，五世而遷者也。故曰祖遷於上，宗則易於下。宗其爲曾祖後者爲曾祖宗，宗其爲祖後者爲祖宗，宗其爲父後者爲父宗。父宗以上，至高祖宗，皆爲小宗。以其轉遷，別於大宗也。別子者，自爲其子孫祖。繼別者，各自爲宗。小宗有四，大宗有一，凡有五宗，人之親所以備矣。」呂飛鵬云：「《大傳》云：『別子爲祖，繼別爲宗，繼禰者爲小宗。』《王制》云：『大夫三廟，一昭一穆，與太祖之廟而三。』鄭注云：『大夫，太祖別子始爵者。《大傳》『別子爲祖』謂此。』據此，則別子必爲大夫，而後得

爲後世之太祖，其子孫適長，因得繼別子而爲大宗。若爲士者，祇得爲禰於其子，而不得爲大祖於其後世，故其子孫適長，繼禰而爲小宗。大祖之廟，百世不遷，故大宗亦百世不遷，族人之同大祖者，盡宗之也。繼禰之宗，止於五世，族人之同高祖者宗之也。此經宗以族得民，當兼大宗小宗言。《大傳》注云「小宗四與大宗凡五」，繫姓弗別，綴食勿殊，從宗合族，此所以得民也。案：呂說是也。百世不遷之宗爲大宗，必別子之有爵者，《荀子·禮論篇》云「大夫士有常宗」是也。五世則遷之宗爲小宗，則通於齊民。此經云得民，當兼及小宗。但小宗不能統收合族，故注唯據大宗言之。鄭司農云「主，謂公卿大夫世世食采不絕」者，《調人》注云：「主，大夫君也。」《左》昭二十九年傳云：「齊侯使高張來唁公，稱主君。」《史記·魯世家》集解引服虔云：「大夫稱主。」先鄭意此主爲三等采邑之民尊其君之稱，後鄭亦從其說。今案：采邑之主，亦得有所食之邑，當屬牧以地得民，不得云以利得民也。劉敞云：「主讀如《孟子》『觀近臣以其所爲主』之主。」俞樾云：「有主客因而有臣主。」《晉語》載欒氏之臣辛俞曰：「三世仕家，君之；再世以下，主之。」蓋再世以下，恩義尚殺，君臣之分未定，故仍從所止之稱，而曰主也。相沿既久，而大夫稱主，遂成定

名。先鄭即以說此經主字，恐非周公制禮時之本意也。按六曰主，與下文八曰友，義蓋相近。《大戴記·曾子制言篇》云：「曾子門弟子或將之晉，曰：『吾無知焉。』曾子曰：『何必然，往矣！有知焉謂之友，無知焉謂之主。』然則主也，友也，皆人所因依者也。主即《孟子》『主顏讎由』『主司城貞子』之主。利之言利賴也，主以利得民，謂爲人所利賴也。任之言信任也，友以任得民，謂爲人所信任也。《調人職》曰：『君之讎眡父，師長之讎眡兄弟，主友之讎眡從父兄弟。』彼所謂師長，即此二曰長，三曰師也。所謂主友，即此六曰主，八曰友也。鄭彼注曰「主，大夫君也」，亦失之矣。」案：俞援《調人》及《曾子制言》，證此經之主友，其說致謬。此主以利得民，當《文王官人》七屬之「六曰家則任主」。蓋凡寄寓之賓旅於所寄之主人，^①與庸賃之閒民於執役之家長，並謂之主，以皆利賴彼以安，故云以利得民也。云「民稅薄利之」者，先鄭誤以主爲采地之主，故以薄稅爲利。若然，則牧以地得民，獨不可薄稅以利民乎？於義不通，故後鄭不從。云「玄謂利讀如上思利民之利」者，賈疏云：「上思利民，忠也。此《左氏傳》隨季良之辭也。」

①「寄」，原作「審」，據楚本改。

段玉裁云：「注經之例，凡言讀如者，擬其音；凡言讀爲者，易其字。此皆不用其本字，如祝讀如注、聯讀爲連是也。凡有言『讀如』、『讀爲』而仍用本字者，如利讀如上思利民之利，旂讀爲囿旂之旂，此蓋一字有數音數義。利民之利音與財利別，囿旂之旂義與旗旂別，故云讀如讀爲以別之也。利民與財利別者，如《公羊》之伐。」案：段說是也。云「謂以政教利之」者，破先鄭薄稅利之之說，謂以善政善教利民也。後鄭說利不爲薄稅，雖與先鄭異，而誤以主爲采邑之主，則同。案：此主雖爲主友之主，與利民義亦相通，後鄭說爲長。云「吏，小吏在鄉邑者」者，鄭意此吏與前達吏義同。賈疏云：「謂若比長、閭胥或在鄉，或在公邑、采邑，皆是。」易拔云：「吏，如鄉遂公邑之吏。」李光坡、姜兆錫、蔣載康說同。案：易說尤駭備。《文王官人》七屬「二曰鄉則任貞」。盧辯注云：「幹事曰貞。《周禮》曰『吏以治得民也』。」鄭說與《大戴記》義合。《周書·作雒篇》云「農居鄙得以庶士」，亦謂此也。惟此經之吏，所該頗廣。《說文·一部》云：「吏，治人者也。」則吏者，凡治民官之通稱，與它治事之官不同。此吏當通鄉遂公邑凡有地治之官，自卿大夫至不命之士，無問尊卑，悉謂之吏。以其治民而不得有其地，故曰以治得民，不止小吏也，云「友謂同井

相合耦耨作者」者，賈疏云：「鄭意經意非爲同師曰友，正是同在井邑之間共里，若《里宰職》『合耦于耨』注云：『合耦，使相佐助者也。』」江永云：「友以任得民，德行道藝相勸，吉相慶，凶相恤，緩急相救，有無相通是也。而同井合耦耨作，亦其一。」呂飛鵬云：「任即六行之任，《大司徒》注云『任信於友道』是也。《說文》云：『任，保也。』《大司徒》『五家爲比，使之相保。』注云：『保猶任也。』二義相兼乃備。」案：江、呂二說是也。此友即《大司徒》本俗六之「聯朋友」，蓋通於四民言之，以其各有相保任之義，故云「以任得民」。鄭專屬農民，偏舉一耑以見義耳。引《孟子》曰「鄉田同井，出入相友，守望相助，疾病相扶，則百姓親睦」者，《滕文公篇》文。趙注云：「同鄉之田，共井之家。共相營勞也。出入相友，相友耦也。《周禮·太宰》曰：『八曰友，以任得民。』守望相助，助察姦惡也。疾病相扶持，扶持其羸弱，救其困急。皆所以教民相親睦之道。睦，和也。」案：「疾病相扶」下，趙本《孟子》有「持」字，俗本此注亦有。惟宋婺州本、嘉靖本無，與賈述注合，今從之。鄭以此友專屬農民，故引《孟子》鄉田同井爲證。《孟子》據侯國井田之制言之，鄉田非即王國鄉遂之田。賈疏謂「鄉遂雖不爲井田，亦三三相任以出稅，與井田同，故云同井」，未得鄭指。

又謂或解爲同井水，尤謬。云「藪亦有虞」者，賈疏云：「《地官·澤虞職》云『每大澤大藪中士二人』，是藪有虞也。」惠士奇云：「川衡、林衡、山虞、澤虞皆國之藪，民共之而吏掌之。」案：惠說是也。此藪即凡山林川澤材用所出之土，官吏守其地者之通名。以其有地守而不主其民，則似吏而非吏；掌地利而不專其土，則似牧而非牧；故別屬之藪，不必專屬水希曰藪也。賈疏謂上八者皆據人而言，此藪不據人而言。不知鄭云藪亦有虞，虞即主藪之人，九兩未有不據人言者也。賈以藪爲指其地，亦非鄭悞。又《釋文》云：「藪，干云『宜作叟』。」今案：叟即窆之俗。《說文·又部》云：「窆，老也。」以富得民，不必年老，干讀未允。云「掌其政令，爲之厲禁，使其地之民守其材物，以時入于王府，頒其餘於萬民」者，阮元云：「《澤虞職》云：『使其地之人守其財物，以時入之于王府，頒其餘于萬民。』此王爲玉字之誤。」案：阮校是也。「于」，注例當作「於」，此於于錯出，誤。又《澤虞職》文，「民」作「人」、「材」作「財」，與此亦小異。蓋先鄭約引以證藪有虞以富得民之事，不必盡依元文也。云「富謂藪中材物」者，《國語·周語》云：「藪，物之歸也。」此亦當通山林川澤等凡出材物者而言。以富得民，民即指占取材物之民也。

周禮正義卷四

正月之吉，始和布治于邦國都鄙，乃縣治象之灋于象魏，使萬民觀治象，挾日而斂之。

正月，周之正月。吉謂朔日。大宰以正月朔日，布王治之事於天下，至正歲，又書而縣於象魏，振木鐸以徇之，使萬民觀焉。小宰亦帥其屬而往，皆所以重治法、新王事也。凡治有故，言始和者，若改造云爾。鄭司農云：「象魏，闕也。故魯災，季桓子御公立于象魏之外，命藏象魏，曰舊章不可忘。」從甲至甲謂之挾日，凡十日。【疏】「正月之吉，始和布治于邦國都鄙」者，自此至職末並大宰當官專領之職事，亦即八法之官常也。和布當讀爲宣布，詳後疏。大宰於周正月朔日，始宣布治典於畿外邦國，畿內都鄙。不及鄉遂公邑者，亦宣布之可知，經舉外以包內，文不具也。《月令》云：「季冬，天子乃與公卿大夫共飭國典，論時令，以待來歲之宜。」注云：「飭國典者，和六典之法也。《周禮》以正月爲之，建寅而縣之，今用此月，則所因於夏殷

也。」案：彼飭國典，在周正二月，故鄭以爲夏殷制。云「乃縣治象之灋于象魏，使萬民觀治象」者，即於布治之日，縣治象之法於王門之象魏，使國中萬民觀之。治象之法，即上六典八法已下，凡大宰之官法皆是。必縣之象魏者，古凡典法刑禁之大者，皆表縣之門閭，即布憲之義也。云「挾日而斂之」者，《釋文》云：「挾字又作浹，干本作帀。」案：《說文·帀部》云：「帀，周也。」《小爾雅·廣言》云：「周，浹，帀也。」挾帀義同。浹俗字，《說文》所無，或非也。干本亦不足據。賈疏云：「斂藏之於明堂，於後月月受而行之，謂之告朔也。」又《大司寇》疏云：「天子斂藏於明堂，諸侯斂藏於祖廟。」《禮運》孔疏引熊安生云：「天子藏舊章於明堂，諸侯藏於祖廟。知者，以天子視朔於明堂，諸侯於祖廟故也。《穀梁傳》云：『天子頒告朔于諸侯，諸侯受乎禴廟。』非鄭義也。」案：熊說即賈疏所本。又《左傳》哀三年孔疏云：「《地官》、《夏官》、《秋官》皆有此言。《地官》云『布教，縣教象』，《夏官》云『布政，縣政象』，《秋官》云『布刑，縣刑象』，各縣所掌之事爲異，其文悉同。惟春官不縣者，以禮法一頒，百事皆足，不可又縣，故不縣之。」注云「正月，周之正月」者，《唐會要》引干注云「正月，周正建子之月」，與鄭說同。賈《大司徒》疏云：「《周禮》凡言正歲

者，則夏之建寅正月；直言正月者，則周之建子正月也。」戴震云：「《周禮》重別歲年之名，直曰正月之吉，則知爲周正月也。《凌人》『掌冰政，歲十有二月，令斬冰』。不直曰十有二月，而曰歲十有二月，加歲以明夏，以別周，則知爲夏時也。此《周禮》之義例也。《大司徒》『正月之吉，始和布教于邦國都鄙』，又曰『正歲令于教官』。《鄉大夫》『正月之吉，受教灋于司徒，退而頒之於其鄉吏，使各以教其所治』，『正歲令羣吏攷灋于司徒以退，各憲之於其所治』。《州長》『正月之吉，各屬其州之民而讀灋』，『正歲則讀教灋如初』。異正月正歲之名而事不異，其爲一時審矣。凡言正月之吉，必在歲終正歲之前，未嘗一錯舉於後，其時之相承，正月爲建子之月，歲終爲建丑之月，正歲爲建寅之月也。先之以正月之吉，布政之始也。繼之以正歲，於是而後得徧奉以行也。六官之長，有止言正月之吉，不言正歲者，上之所慎，在宣布之始也。六官之屬，有止言正歲，不言正月之吉者，待上之宣布，乃齊同奉行也。上之布之，必不能一日而徧王畿千里之廣，下之奉行，又同用是日，惡能相及乎哉！」云「吉謂朔日」者，《大司徒》、《族師》注義並同。《唐會要》引干注亦云「吉，朔日也」。《毛詩·小雅·小明篇》「二月初吉」，傳云「初吉，朔日也」。此即鄭所本。

夏炘云：「《大宰》、《大司徒》、《鄉大夫》、《州長》、《大司馬》、《大司寇》、《布憲》皆言正月之吉，鄭皆以周正朔日解之。《族師》月吉，鄭以每月朔日解之。《詩·小明》初吉，毛公亦以朔日解之。《論語》吉月，孔安國亦以月朔解之。此自來相傳之古訓也。《說文》『吉，善也』，亦有始義。《爾雅》『元，始也』。賈逵《左·僖八年注》『元，善也』。元訓始亦訓善，則吉訓善亦可訓始，故凡始皆可謂之吉。立春爲春之始日，《周語》：『先立春九日，大史告稷曰：自今至於初吉，陽氣俱蒸，土膏其動。稷以告王曰：距今九日，土其俱動。』是以立春之日爲初吉，謂初春之始日。韋注以二月朔日解之，亦非也。」案：夏說是也。以毛、鄭及《國語》義覈之，蓋每月氣朔之始，通得爲初吉，省文則曰吉。《詩》、《禮》之吉與初吉，朔始也。《周語》之初吉，氣始也。《論語》之吉月，吉謂氣始，月謂朔始也。與他書泛言吉日者異。韓愈、李翱《論語筆解》謂此經月吉，《論語》吉月，皆指行吉禮之月日，非朔日。王引之云：「經傳凡言吉日者，與朔日不同。一月之始，謂之朔日，或謂之朔月，或謂之朔。日之善者謂之吉日，或謂之吉。朔日不必皆吉，故朔日不可謂之吉日也。《大宰》正月之吉，《黨正》孟月吉日，《族師》月吉，皆日之善者，日之善者不必在朔日也。其在月之

上旬者，謂之初吉。《小明》二月初吉，亦謂二月上旬之吉日也。上旬凡十日，其善者皆可謂之初吉，非必朔日也。《士冠禮》曰「令月吉日」，又曰「吉月令辰」。令也，吉也，皆善也。」案：王說即本韓義，似亦得通，吳廷華、方苞說竝同，今存之以備一義。云「大宰以正月朔日布王治之事於天下」者，賈疏云：「言天下，即經邦國都鄙，是畿外畿內偏天下。即《鄉大夫職》云「正月之吉，受教灋於司徒，退而頒之於其鄉吏」。是司徒布教法從六鄉已下出，則此大宰布法亦從六鄉已下出也。」云「至正歲又書而縣於象魏」者，書謂以治象書於版而縣之。《說文·縣部》云：「縣，繫也。」凡書著文字，通謂之象。《司常》說旗識云「皆畫其象焉」。杜注云「畫當爲書」，與治象義略同。賈疏云：「此鄭釋經中『乃縣』。必知乃縣是正歲建寅之月者，下小宰所以佐大宰，彼云正歲縣之，與此乃縣爲一事，故云正歲縣也。」易拔云：「鄭蓋以《小宰》互文推之，其理殊不然。小宰正歲所觀，不言縣治象，則知非大宰縣治象之時也。大宰縣治象，繼於正月始和之下，是以周正建子，示萬民以更始之意，何必求合乎《小宰》。」江永云：「縣法於象魏，疑一歲有兩縣。正月之吉，縣之挾日，爲萬民觀也。正歲則又縣之，使屬官觀之也。《大宰》、《小宰》、《大司徒》、《小司徒》、《大司寇》、

《小司寇》各言其一耳。鄭注謂正歲而縣於象魏，與經文承正月之吉者不協。」案：易、江說是也。此「乃縣」冢正月之吉爲文，則非至正歲始縣可知。治象等已斂之後，藏於明堂，非縣則無由觀，明正歲小宰等率屬以觀，亦縣可知。鄭并萬民觀與百官觀爲一事，乃移此正月之縣象於正歲，以遷就其文，不可從。凡《地官》、《夏官》、《秋官》言縣象者，並放此。云「振木鐸以徇之，使萬民觀焉，小宰亦帥其屬而往」者，據《小宰》云：「正歲帥治官之屬而觀治象之法，徇以木鐸，曰：不用灋者，國有常刑。」鄭以彼觀治象與此爲一，故謂萬民觀之有振木鐸以徇之事，又小宰亦率屬而往。其說皆非也。云「皆所以重治法新王事也」者，謂既布又縣之，使百官萬民徧觀，所以示重治法。正月正歲，歲時更始，將以除舊布新，明布治縣法，皆所以新王事也。云「凡治有故，言始和者，若改造云爾」者，賈疏云：「上六典已下至九兩，國法常定，今云始和，似更新其事，改造云爾，其實不改。」王引之云：「改造不得稱和，和當讀爲宣。『始和布治于邦國都鄙』九字爲一句。和布者，宣布也。《小司寇職》曰「正歲帥其屬而觀刑象，乃宣布於四方」，《布憲職》曰「正月之吉，執旌節以宣布于四方」，正與此同。《月令》「命相布德和令」，和亦當讀爲宣，謂布其德教，宣其禁令也。

以六書之例求之，宣桓皆以亘爲聲，宣之爲言和也。《禹貢》「和夷底績」，鄭注讀和爲桓。如淳注《漢書·酷吏傳》曰：「大版貫柱四出，名曰桓表。陳宋之俗，言桓聲如和，今猶謂之和表。」是其例矣。凡《大司徒》、《大司馬》、《大司寇》言始和布者，準此。案：王說是也。鄭司農云「象魏，闕也」者，《廣雅·釋宮》云：「象魏，闕也。」《說文·山部》云：「魏，高也。」《門部》云：「闕，門觀也。」魏即巍之省。《爾雅·釋宮》云：「觀謂之闕。」《禮運》孔疏引孫炎注云：「宮門雙闕者，舊縣法象，使民觀之處，因謂之闕。」《釋名·釋宮室》云：「闕在門兩旁，中央闕然爲道也。」亦謂之魏闕，《莊子·天下篇》云：「心居乎魏闕之下。」《呂氏春秋·審爲篇》高注云：「魏闕，象魏也。懸教象之法，決日而收之。魏魏高大，故曰魏闕。」《淮南子·本經訓》高注義同。賈疏云：「周公謂之象魏，雉門之外，兩觀闕高魏巍然。孔子謂之觀，《春秋左氏》定二年夏五月「雉門災及兩觀」是也。云觀者，以其有教象可觀望。又謂之闕者，闕，去也。仰觀治象，闕去疑事。或解闕中通門，是以莊二十一年云「鄭伯享王于闕西辟」，注「闕，象魏也」。案：《公羊傳》云：「子家駒謂昭公云：『諸侯僭天子，大夫僭諸侯久矣。』」公曰：「吾何僭矣哉？」子家駒曰：「設兩觀，乘大路。」何

氏云：「天子兩觀，諸侯臺門，則諸侯不合有觀也。」若然，雉門災及兩觀及《禮運》云「遊於觀之上」，有觀亦是僭也。」焦循云：「《釋宮》：『觀謂之闕。』《說文》：『闕，門觀也。』是觀闕一物也。《禮運》云：「昔者仲尼與于蜡賓，事畢，出遊于觀之上。」《月令》「可以居高明」，注云：「高明，樓觀之屬。」然則觀即樓類可登者也。《春秋》定公二年夏五月「雉門及兩觀災」，冬十月「新作雉門及兩觀」。此兩觀在雉門，天子則在應門之兩旁也。《公羊》昭二十五年傳，子家駒云「設兩觀，天子之禮也」。何注云：「禮，天子諸侯臺門，天子外闕兩觀，諸侯內闕一觀。」《禮器》云「天子諸侯臺門」，又云「家不臺門」，注云「闕者謂之臺」，《正義》云：「兩邊築闕爲基，基上起屋曰臺門。」《郊特牲》云「臺門而旅樹，大夫之僭禮也」，《正義》亦云：「兩邊起土爲臺，臺上架屋曰臺門。」據此則大夫不臺門，諸侯不兩觀，兩觀者天子也。《春秋》定公三年《左傳》云「邾子在門臺，臨廷」，廷即指治朝。《韓詩外傳》云「吾君有治事之臺」，是路門亦有臺。蓋天子皋路爲臺門，應門爲兩觀，闕爲專名，臺觀爲通名。魯之僭在於兩，不在於觀也。穎容以爲上有所闕失，下得書之於闕，故謂之闕，非取名之義也。莊公二十一年《左傳》云「鄭伯享王於闕西辟」，服虔注云：「西辟，西偏也。」即觀之在

西者，蓋享於其上也。」詒讓案：象魏也，闕也，觀也，以魯制言之，三者蓋異名而同物。天子諸侯宮門皆築臺，臺上起屋謂之臺門。《匠人》門阿即臺門門屋之阿也。天子臺門之兩旁，特爲屋，高出於門屋之上者，謂之雙闕，亦謂之兩觀。諸侯不得爲兩觀。則即於門臺之上正中，特高其屋，出於它門臺之上，是謂一觀。觀即因門臺爲之，故亦稱觀臺。《左》僖五年傳云「公登觀臺以望而書雲物」，即雉門兩觀之臺也。《詩·大雅·靈臺》孔疏引《五經異義·左氏》說，謂諸侯觀臺在廟中，容廟中亦爲臺門矣。天子兩觀之北墉，附於宮牆，自宮內視之，不見其闕，故曰外闕。諸侯就門臺爲觀，其闕半在門內，故曰內闕。通而言之，雙闕亦單稱闕，兩觀亦單稱觀。《公羊》何注謂天子外闕兩觀，諸侯內闕一觀，可證一觀兩觀同得稱闕也。《說文·門部》釋闕爲門觀，而《章部》別云「缺，缺也」。古者城闕其南方謂之缺，缺之與闕，義訓不同。蓋闕即門觀，本不取缺爲義，則不必雙而後稱闕。《穀梁》桓三年傳云：「禮，諸母昆弟不出闕門。」《大戴禮記·保傳篇》云：「過闕則下。」皆據侯國制言之，不必有二闕也。《釋名》以闕然爲道訓闕，《禮運》孔疏引熊安生說，亦謂當門闕處以通行路，似並誤混闕缺爲一義。孔氏又據孫炎說，謂闕取相對爲雙之義，又謂

諸侯不得有闕。不知一與雙通謂之闕，諸侯不得有兩觀者，乃不得爲雙闕，若一闕固得爲之矣。先鄭及《左傳》杜注並以闕釋象魏，皆不質言一觀兩觀。說禮者皆以象魏爲兩觀之定名，則又非也。據《公羊》載子家駒之言：則兩觀爲天子之制，魯僭設之。平諸侯得設一觀，謂之闕門，不得爲兩觀。而縣法象魏事，宜通於邦國，不止周、魯有之。然則無論一觀兩觀，皆巍然而高，即通謂之巍闕。無論爲臺爲觀，皆可以縣法，即通謂之象魏。象魏之名，起於縣法象，不繫於觀之一與兩、有與無也。凡諸侯三門，庫路爲臺門，雉門爲一觀。故《史記·扁鵲傳》云「出見扁鵲於中闕」，以其在內外門之中也。魯三門，雉門亦本當爲一觀，而僭爲兩觀，其縣法亦即在雉門，故雉門兩觀，即爲象魏。天子五門，象魏所在，經注並無文。其兩觀所在，則後鄭《閭人》及《朝士》注並謂亦在雉門，與魯同。《玉海·宮室》引《三禮義宗》云：「雉門，雉，施也。其上有觀闕以藏法，故以施布政教爲名也。《周禮》曰「乃垂治象之法於象魏闕」也。」崔氏說謂天子象魏在雉門，即賈疏所本。蓋推鄭意，謂天子雉門設兩觀，因以兩觀爲即象魏，在雉門之外。其說非也。《明堂位》說魯制云：「庫門，天子皋門。雉門，天子應門。」明魯之庫門，爲天子皋門之制，魯之雉門，爲

天子應門之制。魯兩觀在雉門，則天子兩觀不在雉門，而在應門可知。戴震、孔廣森、焦循、金鶚並謂周制天子當於應門設兩觀，其說甚塢。然此經之象魏，則又不在應門而在庫門。何則？庫門以內，非萬民所能至，而庫門外廷，即朝士所掌三詢之朝，衆庶咸在；又有嘉石肺石，所以平罷民，達窮民，則萬民皆得至。可知五官縣法，萬民所觀，當於其門，殆無疑義。若如賈說，謂象魏在雉門，則萬民得越三詢外朝而入庫門。儻謂在應門，則萬民并得至雉門以內，何以肅門禁乎？《周書·作雒篇》云：「應門庫臺。」庫臺者，謂庫門爲臺門之制。蓋天子五門，惟應門爲兩觀，餘四門皆爲臺門，不設觀。魯則雉門爲兩觀，路庫爲臺門，不設觀。它諸侯則雉門爲一觀，路庫二門與魯同。天子五門不皆設兩觀，故《周書》庫臺之制，殊異於應門。諸侯三門，不皆設一觀，故《史記》中闕之名，專屬之中門。參互證論，足明其義。魯以雉門之兩觀爲象魏，天子以庫門之臺門爲象魏，凡諸侯以雉門之闕門爲象魏。蓋象魏者，崇高之名。《禮器》說天子臺門爲以高爲貴，則庫門雖不爲觀，亦可謂之象魏矣。諸侯以庫門爲外門，三詢之朝，在庫門內，則萬民皆得入庫門。故象魏設於雉門，象魏恒視外朝所在爲之，不必兩觀而後可縣法象也。天子門制，互詳《閭人》疏。

云「故魯災季桓子御公立于象魏之外，命藏象魏，曰舊章不可忘」者，哀三年桓宮僖宮災，《左傳》文。忘，今本《左傳》作「亡」。杜注云：「象魏，門闕。《周禮》『正月，縣教令之法于象魏，使萬民觀之』。故謂其書爲象魏。」說與先鄭同。引之者，證象魏爲闕也。云「從甲至甲謂之挾日，凡十日」者，賈疏云：「破諸家從甲至癸謂之挾日也。若從甲至癸，仍有癸日，不得通挾，故以從甲至甲言之。」惠士奇云：「《左傳》成九年：『挾辰之間，而楚克其三都。』《正義》：『挾，周匝也。從甲至癸爲十日，從子至亥爲十二辰。』挾辰者，子亥之辰一匝。挾日者，甲癸之日一周。古挾挾通。《詩》曰『使不挾四方』，毛傳：『挾，達也。』謂方皇周挾於天下，故曰達。」阮元云：「挾，古挾字。《周禮》、《毛詩》用字正同。干本作巾，係以意改，非也。」案：阮說是也。挾即俗挾字。《國語·越語》云：「挾日而令大夫朝之。」韋注云：「從甲至甲曰挾。挾，巾也。」韋說與鄭同。諸家云從甲至癸差一日者，據鄭云凡十日，則亦是甲癸一周。而云自甲至甲者，不外所挾日耳。此乃立文小殊，不爲異說。賈云鄭破之，固矣。乃施典于邦國，而建其牧，立其監，設其參，傳其伍，陳其殷，置其輔。乃者，更申勅之。以侯伯有功德者，加命作州長，謂之牧，

所謂八命作牧者。監謂公侯伯子男各監一國。《書》曰「王啓監厥亂爲民」。參謂卿三人，伍謂大夫五人。鄭司農云：「殷，治律。輔，爲民之平也。」玄謂殷，衆也，謂衆士也。《王制》，諸侯上士二十七人，其中士下士，各居其上之三分。輔，府史，庶人在官者。【疏】「乃施典于邦國，而建其牧，立其監」者，《說文·支部》云：「岐，敷也。」聲讀與施同，施即岐之段字。以下皆五等侯國立州牧邦君及卿大夫士以下，尊卑相副貳之法。建牧以領一州，立監以治一國，皆謂君也。建立義同。云「設其參，傳其伍」者，國設三卿，而以五大夫副貳之，以下皆謂臣也。傳當爲敷之借字，二字聲類同，古通。《說文·支部》云：「設，施陳也。」《支部》云：「敷，施也。」是設敷義相近。此設傳，亦通言之，故後都鄙又云「設其伍」，明其義互通也。賈疏謂「大夫上有卿，下有士，受上政傳於下，受下政傳於上，故云傳」。義未塢。胡匡衷云：「天子六卿，諸侯之制半天子，故卿止三人也。若大夫則不止五人。經云傳其伍，蓋指副於卿者言之。《周禮》六官之屬，卿止六人，而中大夫不止小宰、小司徒等十人，是其明證。」案：胡說是也。此及下經所建邦國都鄙官府官數，凡言參伍之等，並專指卿長當官副貳之員數。實則侯國卿大夫，各有上下二等，其大夫人數甚衆，亦非伍

所能盡也。餘並放此。又案：《典命》云：「公之孤四命。」先鄭注云：「九命上公，得置孤卿一人。」是公國三卿之上尚有孤，但自侯伯以下並無，則非侯國之通法，故經無設孤之文也。云「陳其殷，置其輔」者，輔，唐石經初刻作「傳」，後磨改。賈疏云：「殷者，三卿下各陳士九人，三九二十七。輔者，謂三卿下各設府史胥徒。」案：賈釋陳殷置輔，似失鄭旨，詳後疏。注云「乃者，更申勅之」者，《說文·乃部》云：「乃，曳詞之難也。」乃即乃之隸變。乃本爲難詞，引申爲重複警戒之言。勅，依字當爲敕。《說文·力部》云：「勅，勞也。」又《支部》云：「敕，誡也。」案：經典多借勅爲敕，實則二字音義迥別。鄭此注及《宰夫》、《閭胥》、《司市》、《遂大夫》、《小臣》諸職注，並以勑爲敕，取通俗也。《周易釋文》引《字林》作勑，亦俗作，《說文》所無。鄭意此文與正月縣法相次，明亦每年正月之後，有此申勑之事。後文云：「歲終則令百官府各正其治，受其會，聽其致事，而詔王廢置。」蓋大宰通掌邦國百官之歲計，而詔王廢置，此施邦國都鄙官府等，並廢置之，大凡與官計事，亦相通也。若然，此施典邦國，蓋即每歲布治以後，受會之時，更以此典申勑邦國，建立牧監以下，不可有空闕，亦不得有僭溢也。下「施則都鄙」「施灋官府」並云乃，義亦同。云「以

侯伯有功德者，加命作州長，謂之牧」者，《曲禮》云：「九州之長，人天子之國曰牧，於外曰侯。」注云：「每一州之中，天子選諸侯之賢者以爲之牧也。外，自其國之外，九州之中。曰侯者，本爵也。二王之後不爲牧。」孔疏云：「天子於每州之中，選取賢侯一人，加一命，使主一州爲牧。牧，養也，言其養一州之人。」又《王制》云：「二百一十國以爲州，州有伯，八州八伯。」注云：「伯，長也。殷之州長曰伯，虞夏及周皆曰牧。」《書·立政》「宅乃牧」，孔疏引鄭注說同。《白虎通義·封公侯篇》云：「州伯，唐虞謂之牧者何？尚質。使大夫往來牧視諸侯，故謂之牧。」案：《漢書·王莽傳》「莽以《周官》、《王制》之文，置州牧部監二十五人，見禮如三公，監位上大夫，各主五郡」。蓋即據此經爲之。其以牧爲州牧，即鄭義所本也。依《王制》說，牧即州長，每州一牧。《掌交》云「諭九牧之維」，是九州則九牧。而《王制》云「八伯」，孔疏引鄭注《尚書》說同。又引《鄭志》：「張逸問云：『九州而八伯者何？』鄭荅云：『畿內之州不置伯，有鄉遂之吏主之。』」黃以周云：「凡一州必有一伯，故唐虞分十二州，《書》稱之曰十有二牧；夏分九州，《左傳》稱之曰九牧；周亦分九州，《左傳》稱之曰九伯。《王制》云『八州八伯』，承上千里之外設方伯爲文，故止云

八州。既舉八州，當云八伯，非畿內無伯也。伏生《書傳》云：『惟元祀巡此四嶽八伯。』此舉巡守畿外爲文，故亦曰八伯。鄭據此，遂謂畿內無伯，是十二牧實止十一牧，九牧九伯實止八牧八伯，豈其然與！畿內之伯，蓋亦二伯中一人兼之。」案：黃說本陳祥道，是也。《掌交》注亦釋九牧爲九州之牧。《左傳》四年傳「五侯九伯」，杜注及《大宗伯》疏引賈、服說，並以爲九州之伯。《王制》疏引《鄭志》，釋《左傳》九伯爲每州二小伯，與賈、服等義不同，然亦以畿內爲有一伯，則鄭自有兩解矣。至《說苑·君道篇》，說周公踐天子位，立十二牧，方三人，此與周州數不相應，殆不足據。又牧或以侯或以伯，皆擇有功德者爲之。《曲禮》唯云侯者，偏舉爵尊者言之，其實兼有伯也。以侯伯同七命，州牧職重，故加一命爲之。若上公九命，王之三公八命，並不復作牧，故《左》哀十三年傳云：「王合諸侯，則伯帥侯牧以見於王。」彼伯謂九命之伯，侯牧即八命之牧，與《曲禮》「人曰牧外曰侯」之文，亦正相應。然則此注及《大宗伯》注並云侯伯有功德者，明牧無上公也。然周制雖以州長爲牧，別於分陝之二伯，而州牧亦通稱州伯。《王制》注謂殷州長曰伯，周別曰牧，及《詩·邶風·旄丘》箋，謂周牧下別設二小伯以佐牧，說並未塙，詳《大宗伯》疏。云「所謂八命作牧

者」者，據《大宗伯》文。云「監謂公侯伯子男各監一國」者，《大司馬》注云：「監，監一國，謂君也。」《說文·臥部》云：「監，臨下也。」五等諸侯雖爵有尊卑，皆君臨一國，故同謂之監。《王制》云：「天子使其大夫爲三監，監於方伯之國，國三人。」注云：「使佐方伯領諸侯。」彼謂方伯之國，別有天子命卿爲三監，此經無文。引《書》曰「王啓監厥亂爲民」者，賈疏云：「此是《尚書·梓材》之篇，周公封康叔而勅之，證監是諸侯之義也。」云「參謂卿三人」者，《釋文》引干注云「三公也」。案：《廣雅·釋言》云：「參，三也。」故三卿謂之參。《周書·糴匡篇》云：「大荒，卿參告糴。」即《國語·魯語》所謂「國有饑饉，卿出告糴」。侯國不得立三公，干說非也。《白虎通義·封公侯篇》云：「諸侯有三卿者，分三事也。」《王制》曰：「大國三卿，皆命於天子。次國三卿，二卿命於天子，一卿命於其君。小國二卿，皆命於其君。」《禮王度記》曰：「子男三卿，一卿命於天子。」案：鄭《王制》注云：「小國亦三卿，一卿命於天子，二卿命於其君，此文似誤脫耳。」此說與《王度記》合。胡匡衷云：「經云設其參，不言小國有異，則小國亦三卿明矣。《鄉飲酒義》云「建國必立三卿」是也。」案：胡說是也。《國語·魯語》「叔孫穆子云：諸侯有卿無軍，自伯子男有大夫無卿。」

韋注云：「無卿，無命卿也。」《王制》曰「小國二卿，皆命於其君」也。依韋說，則《王制》文非誤脫，與鄭義不同。黃以周云：「《王制》當作「小國三卿，皆命於其君」。不列位於天子。《大宗伯》云「三命受位」，注曰：「此列國之卿，始有列位於王，爲王之臣也。」子男之卿再命，^①未受位於王，二卿命於其君，一卿亦非命於天子也。小國三卿，皆未受位於天子，故曰伯子男有大夫無卿。」案：黃申《國語》，說亦通。侯國之卿，未受位於天子者，《大射儀》謂之小卿，故鄭彼注云「小卿命於其君者也」。此經云設參，通命卿、小卿言之也。侯國三卿之名，經注並無文。《公羊》文八年，襄十年何注，並謂諸侯有司徒、司馬、司空三上卿。《書·酒誥》有圻父、農父、宏父，僞孔傳以爲司馬、司徒、司空，即諸侯三卿之制。《王制》孔疏引崔氏云：「三卿者，謂立司徒兼冢宰之事，立司馬兼宗伯之事，立司空兼司寇之事。故《春秋左傳》云，季孫爲司徒，叔孫爲司馬，孟孫爲司空，此是三卿也。以此推之，故知諸侯不立冢宰、宗伯、司寇之官也。」案：《內則》鄭注云：「《周禮》冢宰掌飲食，司徒掌十二教。諸侯并六卿爲三，或兼職焉。」又《聘禮》注云：「諸

①「之」，原誤作「二」，今據《禮書通故》改。

侯謂司徒爲宰。」崔氏蓋本此二注而推其義，賈、孔禮疏並從其說。胡匡衷云：「諸侯三卿，其來已久。《詩》曰『乃召司空，乃召司徒』。《牧誓》及《立政》，言文武未得天下以前制，皆曰司徒、司馬、司空；至武王有天下，立六卿，而三卿遂定爲諸侯之制。是以《酒誥》、《梓材》俱云司徒、司馬、司空也。春秋時有可考者，如襄十年傳云：『子國爲司馬，子耳爲司空，子孔爲司徒。』二十五年傳，子產入陳，『司徒致民，司馬致節，司空致地』。昭四年傳云，吾子爲司徒，夫子爲司馬，孟孫爲司空。此三卿爲司徒司馬司空之證。三卿無大宰、大司寇之官，而《左傳》楚與宋有少宰，又有大宰，宋有少司寇，又有大司寇，則東遷後所僭設，不如古也。春秋時，宋鄭皆有六卿，晉有八卿，其新上下軍未罷時，且有十二卿，比天子之卿猶倍之，僭妄甚矣。」論讓案：魯三卿，孟氏常爲司空，而《論語·子張篇》云「孟氏使陽膚爲士師」，是侯國司空兼司寇之證。《大戴禮記·千乘篇》說侯國設司徒、司馬、司寇，司空爲四佐，名四輔。與此經義不合，疑晚周之制。又案：《公羊·莊元年何注》云：「禮，諸侯三年一貢士於天子，天子命與諸侯輔助爲政，大國舉三人，次國舉二人，小國舉一人。」何意蓋謂《王制》所說大國三卿、次國二卿、小國一卿命於天子者，即邦國所貢士。然

《禮經》及《春秋傳》咸無其事，亦不足信也。云「伍謂大夫五人」者，《大司徒》云「五人爲伍」，故此大夫五人亦謂之伍，與彼義同。《王制》大國、次國、小國並云下大夫五人。《白虎通義·封公侯篇》云：「諸侯五大夫，下天子。」《曾子問》說諸侯朝於天子云：「乃命國家五官而后行。」注云：「五官，五大夫典事者。」《大戴禮記·千乘篇》云「列其五官」，即五大夫也。賈疏云：「司徒下二大夫，一大夫爲司徒大夫，一大夫爲大宰大夫。司空下二大夫，一大夫主司空事，一大夫爲司寇大夫。司馬事省，闕一大夫，故五人。」《檀弓》孔疏引崔靈恩云：「五大夫云下大夫五人者，取卿爲言耳。司徒之下立二人：小宰、小司徒。司馬之下，以其事省，立一人爲小司馬，兼宗伯之事。司空之下立二人：小司寇、小司空。」案：崔說與賈同，惟以五大夫爲小宰、小司徒、小司馬、小司寇、小司空，則名與天子六官之貳同，但無小宗伯耳。攷《曾子問》有小宰，即侯國之制。《左傳》宋有少宰、少司馬、少司寇，楚亦有少宰，蓋皆五大夫也。崔說較賈爲長。又《公羊·襄十一年傳》云：「作三軍。三軍者何？三卿也。古者上卿、下卿、上士、下士。」何注云：「說古制司馬官數。古者諸侯有司徒、司空，上卿各一，下卿各二。司馬事省，上下卿各一。上士相上卿，下士

相下卿，足以爲治。襄公益司馬，作中卿，官踰王制，故譏之。」案：《公羊》所云三卿，乃指司馬一官設上卿一、下卿二，非此三卿。然謂諸侯上卿止司徒、司空、司馬，三上卿之下，設五下卿，則與此注三卿五大夫之義正同。五大夫彼云五下卿者，此與《王制》所云下大夫，並對上卿言之，而立文各異，其實皆據上大夫五人言也。《大射儀》之小卿，胡匡衷據崔靈恩說，亦謂即指五大夫，未知是否。鄭司農云「殷治律」者，《爾雅·釋言》云：「殷，中也。」《鄉士》云「士師受中」，注云：「受中謂受獄訟之成也。」殷與中義近，故先鄭以治律釋之，謂治法律之官也。云「輔爲民之平也」者，《賈子·保傳篇》云：「誠立而敢斷，輔善而相義者，謂之輔。」是輔有平斷之義。先鄭釋殷輔二者，並望文生訓，於經無徵，故後鄭不從。云「玄謂殷，衆也」者，《大戴禮記·夏小正》傳文，《大宗伯》、《職方氏》注義並同。云「謂衆士也」者，賈疏云：「士稱殷，與旅同，並是衆義，故鄭云謂衆士也。」引《王制》諸侯上士二十七人者，彼文大國、次國、小國並云上士二十七人是也。侯國上士，當不止二十七人，此亦指副大夫者言之。云「其中士，下士各居其上之三分」者，《王制》云：「次國之上卿，位當大國之中，中當其下，下當其上大夫。小國之上卿，位當大國之下卿，中當

其上大夫，下當其下大夫。其中有中士下士者，數各居其上之三分。」鄭彼注云：「謂其爲介，若特行而並會也。居猶當也。此據大國而言，大國之士爲上，次國之士爲中，小國之士爲下。士之數，國皆二十七人，各三分之一，上九中九下九，以位相當。則次國之上士，當大國之中，中當其下。小國之上士，當大國之下。」賈疏云：「按彼注，大國之士爲上，次國之士爲中，小國之士爲下。言數各居其上之三分者，此謂盟會立位之序。大國之士爲上，北面前行，上九中九下九。次國之士爲後行，上士當大國之中士，中士當大國之下士，下士當其空。小國之上士，當大國之下士，中士當次國之下士，下士當其空。故云「數各居其上之三分」，引之爲破司農殷爲治律。」案：據疏述注「各居其上之三分」上，疑本有「數」字，孔繼汾亦謂今本誤脫。依《王制》注說，則中士下士各居其上之三分，乃據會盟立位而言，與上士二十七人之文，本不相屬，鄭此注牽連引之，義實難通。賈謂破先鄭殷爲治律，亦非其悞。竊謂此注似以數各居其上之三分，爲指人數而言。蓋上中下士數，當中多於上，下多於中。中士居上之三分者，多於上二分，八十一人也。下士居上之三分者，中對下爲上，下多於中二分，二百四十三人也。引此者，所以證士之數甚衆耳。若仍如《王制》

注，據立位而言，則此經本不說立位，鄭何必引彼文爲證乎？鄭此經注引《禮記》說，與記注固有不盡同者，此類是矣。又案：鄭依《王制》說，五等侯國皆有上中下士。《公羊》襄十一年傳，謂侯國有上士下士，無中士，與《禮》不合，鄭所不據也。《春秋經傳集解·爵國篇》，又謂王國亦止元士下士，尤謬。至侯國之官，例降王朝一等。凡王朝下士之官，在侯國當以不命之士爲之，此皆未得正祿，謂之士旅食，則與庶人在官同。但不命之士，亦列於職官，究與府史小異，疑亦當在陳殷之列矣。云「輔，府史庶人在官者」者，《廣雅·釋詁》云：「輔，助也。」府史輔助士以治事，故謂之輔。《王制》「庶人在官者」，鄭注云：「謂府史之屬，官長所除，不命於天子國君者。」孔疏云：「府史之屬，則《周禮·大宰》云「府六人，史十有二人」。云之屬，謂工人、賈人及胥徒也。」案：庶人在官者，孔謂兼工賈及胥徒，是也。但此輔，依鄭義，似專指府史而言。攷《敍官》注，謂凡府史，皆其官長所自辟除；胥徒，民給徭役者。蓋辟除雖不命，亦得謂之置。若胥徒，則以役法徵調之而已，此與工賈皆尤卑濫，不當在所置之列，故鄭不及也。賈疏謂輔關胥徒，恐非鄭旨。乃施則于都鄙，而建其長，立其兩，設其伍，陳其殷，置其輔。長，謂公卿大夫、王子弟

食采邑者。兩謂兩卿，不言三卿者，不足于諸侯。鄭司農云：「兩謂兩丞。」【疏】「乃施則于都鄙而建其長立其兩」者，畿內采地立長及設官尊卑相副貳之法。長即都鄙之君，自兩以下皆其臣也。注云「長謂公卿大夫、王子弟

食采邑者」者，《廣雅·釋詁》云：「長，君也。」公卿大夫王子弟，亦各自君其采邑，故謂之長。賈疏云：「謂公卿王子弟爲采邑之主，以是一邑之長，故言長。案《典命》云：「三公八命，其卿六命，其大夫四命。」案《大宗伯》云「六命賜官」。彼注「王六命之卿，賜官者，使得自置其臣治家邑如諸侯」，則此云長，唯據公卿已上。大夫四命，不合立官。此鄭云「長謂公卿大夫」，并言大夫者，以其大夫雖立官不與公卿同，亦得稱長，是廣解長義；其實大夫不合有兩卿五大夫，當與諸侯之卿同，官事當相兼也。王子弟食采邑者，謂親王子弟食邑與三公同，在五百里置地，各百里。其次疏者在四百里縣地，各五十里，與六卿同。已上二者，得立兩卿五大夫之等。其次更疏者在三百里稍地，各食二十五里，與大夫同，不得立兩卿五大夫，亦職相兼也。此中唯有都鄙，無家邑之名，故都鄙中含有公卿大夫。春官都宗人、家宗人，都家並有，故公卿入都宗人中，大夫則入家宗人中。以其公卿雖有大都小都之別，而同名都，故大夫不

得都名，直有家稱，故在家宗人也。至於夏官都司馬、家司馬，又與家宗人、都宗人異。故鄭注《都司馬》，唯云三公與王子弟，其卿又人家司馬中。以其司馬辨尊卑，六卿卑，又自使其臣爲司馬，若叔孫氏之臣，名鬻戾，王家不爲之立司馬，故卿入中。若然，都鄙之內，其號有三。若得諸侯之號，唯三公王子弟，故《司裘》「諸侯熊侯、豹侯，卿大夫麋侯」，是卿不入諸侯也。若立臣如諸侯，即此文卿與公同。若稱長可及大夫，亦此注含大夫是也。」沈彤云：「疏以大夫降於卿，不合有兩卿五大夫，豈知卿降於公，而亦不容有乎！故唯在公，則兩爲卿，五爲大夫，殷爲上士。若在卿，則兩爲大夫，五爲上士，殷爲下士。蓋爵之等，從其長而遞降；爵之數，從其等而遞減也。」《左》定四年傳，謂周公舉蔡仲，以爲己卿士。襄十年傳，瑕禽爲王卿士伯與之大夫。是公之兩爲卿，卿之兩爲大夫，皆有明徵，而其下可例推矣。」案：沈說得之。蓋卿以上得具官，故《大宗伯》云「六命賜官」。其大夫則雖亦有私臣，疑止得立家宰一人，不得備兩伍之數，賈疏謂官事相兼是也。又案：此經凡都家對文者，並以公卿采地爲都，以《載師》「大都爲公之采地，小都爲卿之采地，二者同稱都也。家則並專據大夫采邑，以《載師》「家邑爲大夫之采地。《夏官·敘官》注，以都唯據三公

王子弟，而以卿別人家內，蓋鄭偶存駁文，不足據依。賈疏強爲之說，非也。詳《夏官·敘官》疏。凡三等采地，《秋官·朝大夫敘》及《載師》注，通謂之國，故其君長亦得稱諸侯。《王制》云「天子之縣內諸侯，祿也」。《穀梁》「隱元年傳，又謂之「寰內諸侯」是也。《書·立政》云「大都小伯」，僞孔傳云「大都邑之小長」。《公羊》定十一年何注，又有采長。彼並謂采邑之宰，與此經長爲采邑之君異也。云「兩謂兩卿」者，亦借兩爲兩也。《說文·兩部》云：「兩，再也。」《易》曰：「參天兩地。」都鄙立二卿謂之兩，猶邦國立三卿謂之參也。丁晏云：「《書·蔡仲之命》正義曰：『《周禮》立其兩，馬、鄭皆云立卿兩人。』是鄭說與季長同，本於師說也。」詒讓案：《詩·小雅·十月之交》箋云：「禮，畿內諸侯二卿。」又《王制》「小國二卿，皆命於其君」。鄭注以爲或者欲見畿內之國二卿與？並與此注說同。此兩卿，當即家宰、邑宰之屬。《喪服傳》云：「公卿大夫室老、士、貴臣。其餘皆衆臣也。」注云：「室老，家相也。士，邑宰也。」賈彼疏云：「孤卿大夫有采邑者，其邑既有邑宰，又有家相。若魯三卿，公山弗擾爲季氏費宰，子羔爲孟氏卨宰之類，皆爲邑宰也。陽貨、冉有、子路之等，爲季氏家相，亦名家宰。若無地卿大夫，則無邑宰，直有家宰。孔子爲魯大夫，而原

思爲之宰，是直有家相者也。」案：據鄭、賈說，則采邑貴臣以室老、邑宰爲最尊，而爵次則視采主之爵爲降殺。故此注云兩卿，《喪服》注則以邑宰爲士也。《孝經》云：「大夫有爭臣三人。」邢昺疏引孔安國云「家相、室老、側室」。又云「王肅無側室，而謂邑宰」。案：孔、王並分家相、室老爲二，與鄭義不同，恐非。云「不言三卿者，不足於諸侯」者，「于」當從賈疏述注作「於」，注例用今字也。賈疏云：「以畿外諸侯，南面爲尊，故得申而立三卿。天子三公六卿雖尊，以其在天子之下，故屈而立兩卿，不足於諸侯。」詒讓案：此對上邦國設其參爲說。《詩·十月之交》云：「皇父孔聖，作都于向，擇三有事，宣侯多藏。」鄭箋以爲譏皇父專權，作都，立三卿，明正法不得立三也。鄭司農云「兩謂兩丞」者，《呂氏春秋·介立篇》高注云：「丞，佐也。」賈疏云：「以其兩卿丞副其長，先鄭以後代之官況之，故云兩丞也。」乃施灋于官府，而建其正，立其貳，設其攷，陳其殷，置其輔。正謂冢宰、司徒、宗伯、司馬、司寇、司空也。貳謂小宰、小司徒、小宗伯、小司馬、小司寇、小司空也。考，成也。佐成事者，謂宰夫、鄉師、肆師、軍司馬、士師也。《司空》亡，未聞其考。【疏】「乃施灋于

官府而建其正」者，以下皆王朝六官長屬尊卑相副貳之法也。注云「正謂冢宰、司徒、宗伯、司馬、司寇、司空也」者，賈疏云：「正，長也。亦是一官之長。」案：賈據《爾雅·釋詁》義也。此「正」即六卿，所謂大正也。《周書·嘗麥篇》「王命大正正刑書」，即謂大司寇。《左》昭十五年傳「孫伯黶司晉之典籍，以爲大政」，杜注釋爲正卿。《漢書·五行志》「大政」作「大正」，亦是也。此與《宰夫》八職之「正」兼包百官府當職之長者異。《左》襄二十五年傳云「六正五吏」，又云「百官之正長師旅」，杜注云：「六正，六卿。」彼六正猶此六卿之正，彼百官之正猶宰夫八職之正也。二者名同而實異，詳《宰夫》疏。云「貳謂小宰、小司徒、小宗伯、小司馬、小司寇、小司空也」者，《小宰》先鄭注云：「貳，副也。」賈疏云：「謂小卿副貳大卿。」吳廷華云：「正貳有三。有六官之正貳，如冢宰等爲正，小宰等爲貳是也。有一官各爲正貳者，如宮正上士爲正，中下士爲貳是也。有合數官共爲正貳者，如膳夫爲食官之長，庖人、內外饗皆貳之是也。」案：吳謂一官各爲正貳，即《宰夫》之正是也。云「考，成也」者，《爾雅·釋詁》文。《說文·支部》云：「攷，敏也。」又《老部》云：「考，老也。」凡訓考成、考課、考校者，皆攷敏引申之義，經典多借考爲之。此經皆作「攷」，注皆作

「考」，亦經用古字，注用今字之例也。云「佐成事者，謂宰夫、鄉師、肆師、軍司馬、士師也」者，以宰夫諸官，又次六貳之下，故以當六官之考也。云「《司空》亡，未聞其考」者，賈疏云：「案《鄉師》云：『及葬，執纛以與匠師御匱。』」注云：「匠師，事官之屬，其於司空，若鄉師之於司徒。」若然，鄉師是司徒之考，則匠師亦司空之考。而此云未聞者，彼文以義約之，司空考匠師也。無正文，故此云未聞也。」凡治，以典待邦國之治，以則待都鄙之治，以灋待賓客之治。成，八成。禮，賓禮也。【疏】「凡治，以典待邦國之治」者，以下並冢上施典、則、灋而廣言之，復兼及官成、賓禮也。此五者皆云待者，《說文·彳部》云：「待，俟也。」謂俟其事之至，持此典則等之書以治之。注云「成，八成」者，即小宰之八成也，上八法「官成」注義同。賈疏云：

「據上文，官成在八法治官府中。今特出之者，以其八成本待萬民，不待官府，若不特出之，則無此待萬民之事。在八法官府者，欲見官府執行。」阮元云：「此經必言官成者，謂以治官府之八成，待萬民之治也；又欲見此官成即從八法中別出也。」云「禮，賓禮也」者，《大宗伯》云「以賓禮親邦

國」，其別有八，皆是也。大宗伯掌其禮，大宰命其治，故此經亦著之。祀五帝，則掌百官之誓戒，與其具脩。祀五帝，謂四郊及明堂。誓戒，要之以刑，重失禮也。

《明堂位》所謂「各揚其職，百官廢職服大刑」，是其辭之略也。具，所當共。脩，掃除糞洒。【疏】「祀五帝則掌百官之誓戒」者，此與大司寇為官聯也。賈疏云：「謂祭前十日已前，誓戒百官，則大宰掌之。」云「與其具脩」者，賈疏云：「使百官供祭祀之具及脩之掃除也。」注云「祀五帝謂四郊」者，謂分祀五帝則各於其兆，《小宗伯》云「兆五帝于四郊」是也。賈疏云：「依《月令》四時迎氣，及季夏六月迎

土氣於南郊，其餘四帝各於其郊，并夏至祭所感帝於南郊，故云祀五帝於四郊也。」詒讓案：凡此經通例，有天，有上帝，有五帝。天即昊天，祀北辰；上帝為受命帝，在周則祀蒼帝；五帝為五色之帝。此上下文有天有五帝而無上帝，則五帝內含有蒼帝。以受命帝雖尊，然亦五帝之一，言五帝可以該上帝也。周夏至南郊雖特崇祀蒼帝，然四帝亦配食，故注云四郊，雖指四時迎氣，亦關南郊大祀，賈說深得鄭指。但五帝之名，依《月令》即太皞、炎帝、黃帝、少皞、顓頊五天帝。鄭《小宗伯》注，依《春秋緯·文耀鉤》說，謂蒼

帝名靈威仰等，非也，賈疏亦沿其誤，詳《掌次》及《小宗伯》疏。又案：下文有卜日，四時迎氣依《月令》在四立之日，則固不卜日。然誓戒具備及前期齊戒、臨祭眡滌濯、贊牲玉幣爵之事，實與南郊明堂同，則此祀五帝自兼四郊迎氣言，但下文卜日內不含四郊，經注偶未別白言之耳。至後賈疏及《表記》孔疏謂四郊亦有卜，則又失之，詳後。云「及明堂」者，謂合祀五帝則於南郊之明堂也。《詩·周頌·我將》序云：「祀文王於明堂也。」《孝經》云：「昔者周公郊祀后稷以配天，宗祀文王於明堂以配上帝。」《史記·封禪書》裴氏《集解》引鄭《孝經注》云：「上帝者，天之別名也。神無二主，故異其處，避后稷也。」《祭法》云：「周人禘饗而郊稷，祖文王而宗武王。」鄭彼注云「祭五帝五神於明堂曰祖宗，祖宗通言爾」，亦引《孝經》宗祀爲釋。《公羊》宣三年何注、《國語·魯語》韋注及唐明皇《孝經注》釋明堂配帝之義，並與鄭同。案：依鄭說，周以稷配郊祀者，特祀受命帝也；文武配明堂者，合祀五帝也，亦謂之禘，蔡邕《明堂月令論》引《禮記·檀弓》云「王齊禘於清廟明堂」是也。蓋以合祀五帝言之，則曰大饗帝；以先王配食言之，則曰祖宗；以所祭之地言之，則曰明堂：其實一也。《祭法》孔疏引《雜問志》云：「春曰其帝大皞，其神句芒。祭蒼帝靈威

仰，大皞食焉，句芒祭之於庭。祭五帝於明堂，五德之帝亦食焉，又以文武配之。《祭法》「祖文王而宗武王」，此謂合祭於明堂。漢以正禮散亡，《戴禮》文殘缺，不審周以何月也。於《月令》，以季秋。」案：祖宗之祭，說者不同。依鄭《祭法》注義，則爲合祭五帝，而以文武配食。《通典·吉禮》及《唐書·禮儀志》引王肅駁鄭云：「古者祖有功而宗有德，祖宗自是不毀之名，非謂配食於明堂者也。《春秋傳》曰：「禘、郊、祖、宗、報五者，國之典祀也。」以此知祖宗非一祭。審如鄭義，則經當言祖祀文王於明堂，不得言宗祀也。凡宗者，尊也。周人既祖其廟，又尊其祀，孰謂祖於明堂者乎？鄭引《孝經》以解《祭法》，而不曉周公本意，殊非仲尼之旨也。」是王肅謂《祭法》祖宗，乃宗廟不毀之名，非即《孝經》之宗祀。金鶚申鄭祖宗義云：「《孝經》云「周公宗祀文王于明堂，以配上帝」。《祭法》言四代祖宗，次於禘郊之下。」案：祖宗在明堂，故明堂非宗廟，而亦可稱大祖，亦稱清廟。《清廟詩》序云：「祀文王也。周公既成雒邑，朝諸侯，率以祀文王焉。」考《周書·作雒》，雒邑有明堂。《明堂位》言周公朝諸侯于明堂，此明堂在雒邑。《清

①「禘郊」，原誤作「郊禘」，今據《求古錄禮說》改。

廟詩》序所謂成維邑朝諸侯者，即《明堂位》所謂朝諸侯于明堂也。然則率以祀文王者，即祀文王於明堂可知矣。若在宗廟之中，則大祖后稷在上，大王、王季皆在，安得率諸侯而獨祀文王哉！明堂本爲宗祀文王之大廟，又無后稷諸神，宜率諸侯而祀文王於此也。《清廟》祀文王於明堂，明堂可稱大祖，其祀即祖宗之祭可知矣。《祭法》言周人祖文宗武，《孝經》言宗文王，似乎不同，不知周初武王之時，本宗文王，及武王沒，乃祖文王而宗武王。《孝經》言孝莫大于嚴父配天，文王爲周公之父，故但舉周公宗祀文王而言之也。王肅乃謂祖有功而宗有德，宗廟之祭非明堂之祭，宋儒皆從之。然有虞氏不宗幕而宗堯，堯非舜之祖考，安得祀之於宗廟之中，與瞽瞍、橋牛等並列哉！鄭注《堯典》云：「文祖，猶周之明堂。」《史記》云：「文祖者，堯大祖也。」堯之明堂所宗祀配天者，蓋帝嚳也。堯崩而舜立，因祖帝嚳而宗堯焉。瞽瞍、橋牛以上，爲舜之四親，故祀之於宗廟。帝嚳爲堯舜之所從受天下者，故祀之於明堂。明堂爲特祀，不與四廟之主並列也。幕爲舜之先，有功德，故爲報祀，在宗廟之中。《魯語》所云「四代報祀」，即祖功宗德之類也。殷周之得天下，與虞夏受禪不同，故明堂祖宗之人，即宗廟祖功宗德之人。但宗廟不配天，而明堂則配天，

此其異耳。豈可謂宗廟有祖宗而明堂無祖宗哉！且周公制禮之時，文武尚在四親廟中，未有世室之制，安得以文武爲祖宗乎！即至後世，文武二廟不遷，亦但謂之世室，而未嘗稱祖宗。竊謂祖功宗德之說，當以始祖爲祖功，其後有德者則宗之，宗無數，而祖則一而已。如殷有大甲、大戊、武丁，爲三宗，《祭法》言殷人宗湯，則有四宗。湯且稱宗而不稱祖，可知殷之廟惟契稱祖也。周人之廟，亦豈有二祖哉！然則祖宗之祭在明堂審矣。明堂無始祖，自可以祖宗配帝。然禘郊皆以一祖配，而明堂乃以祖宗二人並配。蓋禘郊是二祭，故以二祖分配；明堂祇一祭，故以祖宗二人並祀。」案：金說是也。《祭法》祖文王宗武王之說，本《國語·魯語》展禽語。與《孝經》宗祀文王文不同者，鄭《祭法》注以爲祖宗通言。《魯語》韋注云：「此與《孝經》異也。商家祖契。周公初時亦祖后稷而宗文王，至武王雖承文王之業，有伐紂定天下之功，其廟不可毀，故先推后稷以配天，而後更祖文王而宗武王也。」《南齊書·禮志》，何佟之議亦云：「《孝經》是周公居攝之禮，《祭法》是成王反位後所行。如王說，殷有三祖三宗，並應不毀，何故止稱湯契？」案：韋、何說足補鄭義，金說似亦隱據彼文。攷《通典·吉禮》引《白虎通》云：「后稷爲始祖，文王爲大祖，武

王爲大宗，此即據《祭法》郊祖宗三祀言之。若廟享，則后稷爲始祖，即爲大祖，安得別以文王爲大祖乎！然則鄭說亦有所本。《唐書·禮儀志》，長孫無忌申王駁鄭，據《國語》云：「郊禘祖宗報五者，國之祀典也。」，庶明堂祖宗合爲一祭之非。不知文武雖並配五帝，而祖宗名自不同。段如王說，則文武同立世室，而區分祖宗二祀，則親廟有四，豈亦得爲四祀乎！其不足以破鄭義明矣。又案：王、鄭祖宗之義不同，而說明堂祀五帝則不異。故《唐書·禮儀志》云：「明堂大饗，王肅議祀五行帝。」王涇《大唐郊祀錄》又引《孝經》明堂配帝王肅義爲祭昊天上帝。案：王涇所引，與《唐志》不同。今考明堂改祀昊天上帝，始於晉武帝泰始間，《晉書·禮志》不云王肅說，王氏疑偶誤。然泰始之制，六朝以後多依用之，或專祀昊天，或主昊天而兼配五帝。陳祥道《禮書》、馬端臨《文獻通考》，並主兼祀昊天及五帝之說。以經考之，其不可通有二：明堂五室，本以崇祀五帝，昊天最尊，何得下就五帝之室。且日至圜丘，禮極隆重，今相距數月，復降饗明堂，兩舉大祀，既爲大數，降丘就堂，尤嫌輕褻。是特祀昊天說之必不可通者也。明堂每帝一室，各有攸屬，今若合祀天帝，以昊天與五帝同室，於禮難行。儻云別爲昊天之堂，則堂內筵度有定，既無可增，堂

外特置，彼此睽隔，又乖合配之義。是合祀昊天五帝說之必不可通者也。又《孝經》，郊祀則云配天，宗祀明堂則云配帝。鄭以上帝爲天之別名者，蓋以南郊祭受命帝，明堂合祭五帝，同稱上帝，亦同得稱天。實則天之與帝，雖可通稱，而《孝經》與此經，則顯有不同。故《晉書·禮志》引晉武帝太康十年《明堂復祀五帝詔》云：「《孝經》：『郊祀后稷以配天，宗祀文王於明堂以配上帝』，而《周官》云：『祀天旅上帝』，又曰：『祀地旅四望』。四望非地，則明堂上帝不得爲天也。」又引摯虞議、《宋書·樂志》引顏竣議，並同。此釋《孝經》郊祀爲即圜丘昊天之神，雖與王肅、唐明皇及邢昺疏引孔安國傳說同，而釋明堂猶遵鄭義，其分別天與上帝，則尤明辨析矣。蓋《孝經》之天異於上帝者，受命帝與五帝也。而此經則《掌次》、《大宗伯》、《肆師》、《典瑞》、《司服》、《職金》諸職，凡言天者，並指昊天；言上帝者，並指受命帝；若五帝，則直稱五帝，不稱上帝。蓋《孝經》與此經文例本不同，不能強合，而天與上帝之分，在兩經各自區別，亦必不可合，此尤《孝經》上帝非昊天之塙證也。至明堂合祭時日，經無正文。《月令》「季秋大饗帝」，《鄭志》本以爲秦制，而謂周不審以何月，則鄭自不謂周大饗帝必在季秋。《南齊書·禮志》王儉議引馬融云：「郊天之祀，咸以夏正。

五氣用事，有休有王，各以其時，兆於方郊。四時合歲，功作相成，亦以此月，總旅明堂。」此謂祀明堂與南郊，同在夏正月。攷蔡氏《獨斷》及《續漢書·祭祀志》，並載漢禮南郊、北郊、明堂，同在正月，馬氏蓋據漢禮爲說。魏晉禮同，宋制則又與南郊同日。《齊志》又引蔡仲熊議云：「《鄭志》云：『正月上辛，祀后稷於南郊，還於明堂，以文王配。』故宋氏創立明堂，郊還即祭，是用《鄭志》之說也。蓋爲《志》者失，非玄意也。玄之言曰：『未審周明堂以何月，於《月令》則以季秋。』案：玄注《月令》季秋大饗帝云『大饗偏祭五帝』，又云『大饗於明堂，以文武配』。其時秋也，去啓蟄遠矣。」今案：蔡說深得鄭愜。蓋明堂時月，鄭本未有定論。馬氏謂與南郊同月，亦無塙證。《鄭志》或謂與郊同日，則尤謬鑿不足據。然正可證鄭說本不定，否則鄭門弟子何得妄騰異論邪？攷《漢書·律曆志》引《逸書·伊訓》：「太甲元年，伊尹祀于先王，誕資有牧方明。」劉歆說之，以爲冬至越弗，祀先王於方明，以配上帝。蓋謂即明堂宗祀之典，所謂祖契而宗湯者。劉說雖不甚塙，然竊疑西漢諸儒，有冬至宗祀明堂之說，則與圜丘同月矣。此與《司服》祀五帝服大裘之文，亦不相核，其說出於馬、鄭以前，或尚可馮也。鄭《駁異義》說明堂云「五帝各有一室」，是謂大

饗合祭帝各分就其室。《唐書·禮儀志》有司奏云：「季秋大饗五帝，各在一室，商量不便，請依兩漢季秋合饗總於太室。」黃以周云：「明堂祀五帝，總在太室，古禮然也。如五室各饗一帝，則文王專配一室，義非配五。即以武王兼祀，亦是位闕其三。」案：黃說近是。《祭法》孔疏云：「文武之配，皆於明堂上。或解云武王配五神於下。屈天子之尊，而就五神在庭，非其理也。」《通典·吉禮》則云：「五帝及神俱坐於上，以文武二祖汎配五帝及五神而祭之。」案：孔、杜二說，似亦據總祭而言。但五室室主一帝，則義自別有所取。五時告朔布政，各就其帝之室，此與大饗合祀事不相妨也。又《齊志》引何佟之議云：「明堂之祀，有單有合。故鄭云『四時迎氣於郊，祭一帝；還於明堂，因祭一帝，則以文王配』，明一賓不容兩主也。享五帝於明堂，則泛配文武。泛之爲言無的之辭，其禮既盛，故祖宗並配。」案：何氏引鄭說，與《詩·周頌·我將》孔疏引《樛問志》同。攷鄭《三禮》注，說明堂單祭，惟每月聽朔，以特牲告其時帝，以文武配，見《玉藻》注。此外絕無四立迎氣還特祀明堂之文。《鄭志》間有後人附益，不可以是誣鄭也。何氏不知引告朔證單祭，而信此詭託之謬說，其識蓋遜蔡仲熊遠矣。凡郊祀受命帝，明堂祀五帝，與圜丘祀昊天不同之

說，互詳《大宗伯》、《大司樂》疏。又案：明堂之祭亦卜日，鄭以此祀五帝內有明堂，則下文卜日內亦含明堂可知。賈疏不知而誤爲之說云：「案《下曲禮》云『大饗不問卜』。鄭云：『祭五帝於明堂，莫適卜也。』彼明堂不卜。此下經云『帥執事而卜日』，則此祀五帝，不合有明堂。鄭云及明堂者，廣解祀五帝之處，其實此處無明堂。」案：賈說非經注義也。《曲禮》「大饗不問卜」，謂不卜應祀與不耳，此即常祀不卜之義，非謂不卜日也。大饗雖有定月，《曲禮》孔疏引崔靈恩說，謂亦用辛日，則上中下旬不定，豈有不卜日之理。《表記》疏亦謂「此注廣解五帝所在，其實禮明堂不卜」，誤與賈同。而《曲禮》疏又云：「此大饗總祭五帝，其神非一。若卜其牲日，五帝總卜而已，不得每帝問卜。若其一一問卜，神有多種，恐吉凶不同，故鄭云『莫適卜』，總一卜而已。」案：二疏義異，其爲不達鄭指則一也。云「誓戒要之以刑，重失禮也」者，《說文·言部》云：「誓，約束也。」《殳部》云：「戒，警也。」《釋名·釋言語》云：「誓，制也，以拘制之也。」戒者告以其事，警敕其共職，誓則警其廢職失禮之事。大祭祀恐其失禮，故豫以失禮之刑，約誓警戒之。《大司寇》云「若禋祀五帝，則戒之日，涖誓百官，戒于百族」。即大祭祀誓戒之事。刑，若《小宰》「令于百官府

曰「其有不共，則國有大刑」及《條狼氏》所誓殺墨鞭之類，是也。凡誓戒與卜同日，詳《大司寇》疏。云《明堂位》所謂各揚其職，百官廢職服大刑，是其辭之略也」者，鄭彼注云：「揚，重也。大刑，重罪也。」彼文承「季夏六月以禘禮祀周公於太廟」之下，明是祭祀誓戒之事。此祀五帝與禘太廟，同是大禮，其誓戒警勅百官之辭，當與彼略同，故云是其辭之略也。云「具，所當共」者，《說文·殳部》云：「具，共置也。」謂百官所當共辦之事。《祭義》云：「孝子將祭，比時具物，不可以不備。」《祭統》云：「官備則具備。」注云「具謂所共衆物」是也。賈疏云：「祭祀之連事祭祀之具，百官共供，故云具謂所當供。」云「脩，埽除糞洒」者，《說文·彡部》云：「修，飾也。」又《肉部》云：「脩，脯也。」經典多借脩爲修。修本訓飾，引申之，埽除宮室壇兆，使之潔清，亦謂之修。《中庸》「脩其祖廟」，注云：「脩謂埽糞也。」《說文·艸部》云：「糞，棄除也。」賈疏云：「案：《宮人》云『掌六寢之脩』，《守桃》云『其廟有司脩除之』，是其脩埽除糞洒也。」詒讓案：《守桃》注以有司爲宗伯。《典祀》云「掌外祀之兆守，若以時祭祀，則帥其屬而脩除」。《隸僕》云「祭祀脩寢」。此三官並主內外祭祀脩除之事，蓋皆大宰令之矣。前期十日，帥執事而卜日，遂戒。前期，

前所諏之日也。十日，容散齊七日，致齊三日。執事，宗伯、大卜之屬。既卜，又戒百官以始齊。【疏】「前期十日」者，《釋文》云：「前如字，干本同。本或作先。」案：前義同。《祭統》云：「故先期旬有一日，官宰宿夫人。」彼言旬有一日者，兼祭日數之，與此前期十日同。云「帥執事而卜日，遂戒」者，卜之日，遂戒百官以始齊。《少牢饋食禮》筮日與官戒亦同日，即其比例。賈疏謂卜戒不同日，失之。又案：五帝之祀，四郊迎氣，依《月令》說不卜日。然則此卜日，專指夏正南郊祭受命帝及季秋大饗明堂言之。《郊特牲》云「卜郊受命于祖廟，作龜于禰宮」，即南郊卜日之事。《公羊》僖三十一年何注云：「禮，天子不卜郊。」《御覽·禮儀部》引《五經異義》云：「《春秋公羊說》，禮，郊及日皆不卜，常以正月上丁也。魯於天子並事變禮，今成王命魯使卜，從乃郊，不從即已，下天子也。」案：《公羊說》謂魯郊卜日，周郊不卜日，與《禮》不合，鄭所不從。其迎氣則前期十日，大宰唯掌其戒事，不卜日也。賈疏云：「但四時迎氣，冬至夏至郊天等，雖有常時常日，猶須審慎，仍卜日。故《表記》云：『不犯日月，不違卜筮。』」注：「日月謂冬夏至，正月及四時也。所不違者，日與牲尸也。」假令不吉，改卜後日。故《箴膏肓》云：「天子郊，以夏正上旬之日，魯

之卜三正下旬之日。」是雖有常時常日，猶卜日也。」案：賈謂四時迎氣亦有卜，《表記》孔疏亦同，其說非也。迎氣以四立之日，《月令》有明文，安得有卜。《表記》上云「不犯日月者，通二至及正月四時言之」。下云「不違卜筮，則專指二至正月，不關四時也」。蓋犯日月，非必犯所卜之日，鄭彼注亦未嘗合二語為一事，賈、孔自不察耳。凡祭祀之卜有四：卜應祀與不也，卜日也，卜牲也，卜尸也。《左》僖三十一年傳云：「夏四月，四卜郊，不從，乃免牲，非禮也。禮，不卜常祀，而卜其牲日。」然則凡常祀，皆不卜應祀與不。常祀之有定日者，則又不卜日。此經五帝及下文大神尸先王，皆常祀也，禮無卜祀。唯大旅及祈告非常之祭，乃有卜祀耳。其祭日，則自迎氣外，凡大祀無不卜者。其牲與尸，則雖迎氣，亦當有卜矣。又案：凡祀天日，常禮並用辛。若非常祀，則或用丁。故《續漢書·禮儀志》劉注引《白虎通》說郊云：「《春秋傳》曰『以正月上辛』。《尚書》曰『丁巳，用牲于郊，牛二』。」^①先甲三日，辛也，後甲三日，丁也，皆可接事昊天之日。」案：《御覽》引《五經異義·春秋公羊說》，謂郊常以正月上丁，魯以上辛郊，不敢與天子同。

① 「二」，原作「一」，據《後漢書·禮儀志》劉昭注改。

此謂王郊用丁，魯郊用辛。今攷《公羊》成十七年傳，說魯郊用正月上辛，無周郊用丁之文。若依鄭二《禮》注義，則魯郊當轉卜三正之辛日，周郊當卜夏正月之辛日。《公羊》舊說與諸傳注義，並不相應，疑不足據。《曲禮》孔疏引崔靈恩云：「郊之用辛者，唯夏正郊天及雩大饗明堂耳。若圜丘，自用冬至日。五時迎氣，各用其初朔之日，不皆用辛。」今攷圜丘當亦用冬至月之辛日，迎氣則用四立之日，《月令》有明文，餘祀並當如崔說。凡二至、圜丘、方丘並卜日，詳《大司馬》疏。

注云「前期，前所諏之日也」者，

《少牢饋食禮》云：「日用丁己，筮旬有一日。」注云：「必先諏此日，明日乃筮。以先月下旬之己，筮來月上旬之己。」又《特性饋食禮》云「不諏日」，注云：「諏，謀也。士賤職褻，時至事暇可以祭，則筮其日矣。不如《少牢》大夫先與有司於廟門諏丁己之日。」是其大夫以上，凡祭，必先謀所祭之日，明日乃筮。天子大祀則用卜。此注云前所諏之日者，即謂諏日時所謀定之祭日。其前十日，若祭日用己，則於先一句之戊日諏日，己日卜日。并祭日數之，則云旬有一日，外祭日言之，則云十日，其實同也。《穀梁》哀元年傳說魯郊云：「我以十二月下辛卜正月上辛，如不從，則以正月下辛卜二月上辛，如不從，則以二月下辛卜三月上辛。」

與此經前期十日卜日禮正合。賈疏亦謂依《少牢》所諏之日即祭日，是也。而又謂凡祭祀謂於祭前之夕爲期。今言前期十日者，明祭前十一日卜。是謂經前期之期，爲祭之前一日；前期十日者，爲前此爲期之日。以其說推之，則己日祭，當以先一句之戊日卜日，與《少牢》注不合，非鄭義也。云「十日容散齊七日，致齊三日」者，散齊七日，致齊三日，合之爲十日。賈疏云：「案《禮記·祭統》云：『散齊七日以定之，致齊三日以齊之。』」詒讓案：《祭義》云：「致齊於內，散齊於外。」若祭日用己，則先一句之己日始散齊，至乙日，散齊期滿。次丙日始致齊，至戊日，致齊期滿，即祭前一日，是二齊適盡十日也。云「執事，宗伯、大卜之屬」者，鄭《詩·周頌·執競》箋云：「執，持也。」經凡言執事，並謂諸官非其專掌，以連事通職，轉相贊助而執持其事者。猶《大史》云「凡射事，執其禮事」，以大史本不掌射法也。故《司會》云「凡官府都鄙之吏及執事者，受財用焉」，以執事與地治之吏別文，亦足相證。其職掌所存，專共常守者，則謂之有司。互詳《小宗伯》疏。賈疏云：「《大宗伯職》云『凡祀大神，享大鬼，祭大雩，帥執事而卜日』，謂宗伯蒞卜。又案《大卜》云『大祭祀視高命龜』。故知執事中有宗伯、大卜之屬。中含有小宗伯及卜師，故言之屬。」詒讓案：《肆

師云：「凡祭祀之卜日，宿爲期，詔相其禮」。又《大史》云「大祭祀與執事卜日」。彼二官亦當在執事之數。鄭不言者，「之屬」中咳之。云「既卜，又戒百官以始齊」者，《士冠禮》鄭注云：「戒，警也，告也。」既卜得吉，則告百官使始齊，是卜與戒及始散齊並同日也。《大司寇》云：「若禋祀五帝，則戒之日，涇誓百官，戒于百族。」注云：「戒之日，卜之日也。」《郊特牲》亦謂卜之日即戒百官，戒百族。賈疏謂卜之後一日乃戒，使散齊致齊。蓋誤以前期十日，爲先祭前爲期之日十日，故必移戒始齊之日於卜之次日，而後十日齊滿，乃適與祭日相接，其說與《大司寇》注義違，不足據也。《大司寇》疏則謂卜戒同日，不誤。及執事，眡滌濯。執事，初爲祭祀前祭日之夕。滌濯，謂溉祭器及甒甗之屬。【疏】「及執事眡滌濯」者，與大宗伯爲官聯也。《釋文》云：「眡，本又作視。」案：《說文·見部》云：「視，瞻也。从見示聲。重文師，古文視。眡亦古文視。」凡經皆作眡，注皆作視，亦經用古字，注用今字之例也。陸所見別本作視，非經例，不足據。又《說文·目部》有眡字，訓視兒，與古文視字別。眡滌濯者，內外饗、廩人、世婦、鬱人等溉器，大宰則監眡之也。賈疏云：「謂至祭前夕，大宰眡滌濯。」

案：《春官·小宗伯》「大祭祀眡滌濯」，《大宗伯》亦云「宿眡滌濯」。彼二官親眡滌濯，大宰尊，亦往涇之。」注云「執事，初爲祭祀前祭日之夕」者，謂若己日祭，此爲戊日之夕也。賈疏云：「案下經及納亨者，是祭日。此云眡滌濯，《儀禮·特牲》亦云「前祭日之夕，視壺濯及豆籩」。士卑，得與人君同。《少牢》，大夫禮，當祭日溉祭器者，下人君也。」江永云：「及執事眡滌濯，及，與也，謂與諸執事官眡滌濯也。」《小宗伯》言「及執事」者三：及執事禱祠于上下神，及執事涇大斂小斂，及執事眡葬獻器。與此文正相類。彼三處，鄭皆以執事之官釋之，此獨云「執事初爲祭祀前祭日之夕」，非也。」案：江說是也。云「滌濯，謂溉祭器及甒甗之屬」者，《大宗伯》注義同。《釋文》云：「甒，本又作甗。」案：《說文·鬲部》，甒即或鬲字。此注本《少牢禮》，當以作「甒」爲正。溉，疏述注作「溉」。阮元云：「據此知注中概本作溉。」《說文》曰：「溉，滌也。」鄭君注禮多作溉。凡經注从手之溉，俗本多譌从水。」案：阮說是也。《說文·水部》，溉爲水名，非此義。《大宗伯》注、《釋文》載或本亦作「溉」。《天官·世婦》云「掌祭祀之事，帥女官而濯溉」，此滌濯即濯溉也。《說文·水部》云：「滌，洒也。濯，灑也。」《少牢饋食禮》云「宗人命滌」，注云：「滌，溉滌」。

祭器，埽除宗廟。」案：彼滌兼埽除宗廟，此不言者，彼命滌在前期旬有一日，至祭日，乃云「雍人概鼎匕俎于雍饗，廩人概甑甗匕與敦于廩饗，司宮概豆籩勺爵觚觶，凡洗筐于東堂下」。是命滌與概相較旬日，故知滌中兼有埽除宗廟之事。此視滌濯同在祭前之夕，又上「具脩」注以脩爲埽除糞洒，故此滌濯注不云埽除也。

及納亨，贊王牲事。

納亨，納牲，將告殺。謂鄉祭之晨，既殺以授亨人。凡大祭祀，君親牽牲，大夫贊之。【疏】「及納亨，贊王牲事」者，賈疏云：「案《禮記·明堂位》，君肉袒迎牲于門，卿大夫贊君。及殺訖，納與亨人，故言納亨。云贊王牲事，即是卿大夫贊幣一人也。」注云「納亨，納牲，將告殺」者，《續漢書·禮儀志》劉注引干注同。《禮器》注云「納牲于庭時，當用幣告神而殺牲」是也。賈疏云：「謂牽牲入時也。《禮器》云『納牲詔于庭』，殺訖，毛以告純，血以告殺，腥其俎，肫解而腥之。以此訖，乃納與亨人燔祭。此言納亨者，以牽牲也。」惠士奇云：「納牲與納亨異。《禮運》祭玄酒，薦毛血，爲法太古；腥其俎，孰其殽，爲法中古；退而合亨，體其犬豕牛羊，爲今世之食。《禮器》『納牲詔于庭，血毛詔於室，羹定詔於堂。』《祭義》『君牽牲，穆荅君，卿大夫序從』，此之謂納牲。而納亨者，謂合亨之後，羹定之初，薦孰

未食之前，盛之於俎，先以告神於堂也。祭禮血腥之屬，盡敬心耳。要以孰爲正。五官奉牲，羞其肆，肆者，六牲之體，是爲納亨。諸子正之，司士割之，王親匕之，太僕贊之，御僕登之。先是納牲，卿大夫序從而已，及入廟，繫牲於碑，卿大夫袒而剗毛取血，人以告神於室。此所謂贊王牲事者，一當朝踐之節，一當饋食之時。獨言納亨者，舉其正也。黃以周云：「下贊王牲事，是據未殺爲文，故鄭以納牲解之。」案：黃說是也。經云贊牲事，又下文方及祀日贊玉幣禮神之事，故鄭以爲納牲當朝踐之前，與經文敍次最合，不可易也。竊謂迎牲與薦孰二節，大宰並有贊事。經言納亨者，以薦孰咳納牲，注則舉納牲以咳薦孰，皆互文以見義。《大祝》「逆牲」注云：「既隋饗，後言逆牲，容逆鼎。」此經云納亨，猶彼云逆鼎。注云納牲，即彼逆牲。彼文言逆牲以見逆鼎，亦猶此言納亨以見納牲矣。云「謂鄉祭之晨」者，《續漢志》注引干注云「謂向祭之晨也」。鄉向字同。《司寤氏》注云：「晨，先明也。」賈疏云：「案《檀弓》云『周人大事以日出』，故知納亨是嚮祭之晨。此祭天無裸，故先迎牲。若宗廟之祭有裸，而後迎牲也。」案：《曾子問》孔疏

①「逆」，原訛作「迎」，今據楚本改。下「逆牲」同。

引熊安生，亦據此注說之云：「郊社五祀，祭初未迎尸之前，已殺牲也，以其無灌故也。」此即賈說所本。若然，下文享先王納亨，當在旦明以後，雖亦彖此文，而時則早晏不同也。云「既殺以授亨人」者，賈疏云：「案《亨人職》：『職內外饗之饗亨』，謂腥其俎後。」云「凡大祭祀君親牽牲大夫贊之」者，大祭祀謂天神、地祇、人鬼諸大祭，納牲禮同。《禮器》說大廟之祭云：「君親牽牲，大夫贊幣而從。」鄭蓋兼采彼及《明堂位》文，賈疏謂專據《明堂位》，非也。又案：《大僕》亦云「祭祀贊王牲事」。彼注云：「牲事，殺割匕載之屬。」此不言者，大宰官尊，所贊之事當簡於大僕也。及祀之日，贊玉幣爵之事。日，旦明也。玉幣，所以禮神。玉與幣各如其方之色。爵，所以獻齊酒。不用玉爵，尚質也。三者執以從王，至而授之。【疏】「及祀之日」者，前納亨已爲祭日之晨，以尚未行朝踐正祭禮，故此別言及祀之日。注云「日，旦明也」者，上注云「鄉祭之晨」，爲將明之時，旦明則已明之時。《少牢饋食禮》云：「爲期於廟門之外，宗人曰：旦明行事。」鄭彼注云「旦明，旦日質明」是也。云「玉幣所以禮神，玉與幣各如其方之色」者，《大宗伯》注云：「禮謂始告神時，薦於神坐。」賈疏云：「上云祀

五帝，以爲迎氣於四郊之外。案：《大宗伯》「以玉作六器，以禮天地四方」。又云「青圭禮東方，赤璋禮南方，白琥禮西方，玄璜禮北方」。季夏六月，迎土氣於南郊亦用赤璋。下云牲幣，彼雖幣不是禮神之幣，亦云各放其器之色，是其禮神幣與玉亦各如其方色也。」案：鄭、賈說未塙。《大宗伯》六器，乃禮方明之玉。五時迎氣，當用四圭有邸，不用青圭、赤璋等。其牲幣則或當依方色。詳《大宗伯》、《典瑞》疏。云「爵所以獻齊酒」者，謂酌五齊以獻尸也。《通典·吉禮》引崔靈恩云：「圜丘用五齊，餘感帝、迎氣、神州等，並自醴齊而下四齊而已。」案：郊祀雖備五齊三酒爲八尊，然七獻之禮止用五齊，不用三酒。此注兼言酒，順文便耳，其實獻尸無酒也。云「不用玉爵，尚質也」者，賈疏云：「對下經享先王用玉爵，尚文；此祭天不用玉爵，故云尚質。」詒讓案：不用玉爵者，六天之祭並用匏爵也。《郊特牲》云：「器用陶匏，以象天地之性也。」《通典·吉禮》及叢崇義《三禮圖》引《三禮義宗》說，並謂祭天爵，以匏片爲之。《郊特牲》孔疏說亦同。云「三者執以從王，至而授之」者，賈疏云：「謂至祭所而授之，王親自執玉幣奠於神坐，親酌以獻尸。」詒讓案：即《禮器》云「大夫贊幣而從」。彼內祭祀贊幣之事，外祭祀禮同。祀大神亦如之。大神

祇謂天地。【疏】「祀大神而亦如之」者，《釋文》云：「而，本又作祇。」案：《說文·而部》云：「而，天祿象，見吉凶，所以示人也。祇，地祇，提出萬物者也。」此經皆借而爲祇，注皆作祇，亦經用古字，注用今字之例也。陸所見別本作祇，非經例，不足據。賈疏云：「祀大神謂冬至祭天於圓丘，祀大祇謂夏至祭地於方澤。亦如之者，從掌百官誓戒已下，贊玉幣爵之事已上，皆如祀五帝之禮。」注云「大神祇謂天地」者，天地謂圓丘祭昊天，方丘祭大地也。賈疏云：

「此天謂大天，對五帝爲小天。此地謂大地，對神州之地爲小地。」吳廷華云：「五帝之外別言大神祇，則大於五帝可知，故注以天地言之。」詒讓案：《大射儀》賈疏謂天子祭山川、社稷，亦有前期十日帥百執事而卜日遂戒等事，則經大亦亦咳四望、社稷，注文不具也。享先王亦如之，贊

玉几玉爵。玉几所以依神。天子左右玉几。宗廟獻用

玉爵。【疏】「享先王亦如之」者，賈疏云：「下別言贊玉几

玉爵，則天地不用玉几玉爵。其言亦如之者，謂亦贊王牲事已上。不云大者，欲見宗廟六享同然。」注云「玉几

所以依神」者，謂先王之神所馮依，別於下朝覲會同之玉几爲王所馮依也。玉几，爲《司几筵》五几之一，詳彼疏。云

「天子左右玉几」者，賈疏云：「此是《司几筵》文。彼所云者，謂王受諸侯朝覲會同所設。今此享先王鬼神之几，亦與王平生同，故引爲證。此享先王有玉几玉爵，天地有爵，但不用玉飾。祭宗廟用玉几，天地亦應有質几，不言之者，文不具。」詒讓案：天子祭祀左右玉几，別於《司几筵》諸侯祭祀右彫几也。其祀天地之几，於經無文，以《司几筵》五几差之，或當用漆几與？云「宗廟獻用玉爵」者，梓人爲飲器，云爵一升。《說文·鬯部》云：「鬯，禮器也。所以飲器象鬯者，取其鳴節節足足也。」《玉燭寶典》及聶氏《三禮圖》引梁正、阮湛《禮圖》云：「爵受一升，高二寸，尾長六寸，博二寸。傳假翼。兗下，方足。漆赤，中畫三周其身。大夫飾以赤雲氣黃畫，諸侯加飾口足以象骨，天子以玉。」案：《禮圖》說爵制，似不甚塙。但依其說，則玉爵亦刻木爲之，而飾以玉，若《內宰》「瑤爵」注亦謂「以瑤爲飾」是也。賈疏云：「按《明堂位》『獻用玉琖』，謂王朝踐饋獻醑尸時。若裸，則用圭瓚也。」程瑤田云：「玉爵即玉琖也。《明堂位》曰：『爵，夏后氏以琖，殷以斚，周以爵。』此明魯有三代之爵，其名不同，其爲爵一也。《行葦》之詩云『洗爵奠斚』，毛傳曰：『斚，爵也。』《說文》曰：『斚，玉爵也。』案：玉爵名制，互詳《量人》、《梓人》疏。大朝覲會同，贊玉幣、

玉獻、玉几、玉爵。助王受此四者。時見曰會，殷見曰同。大會同或於春朝，或於秋覲，舉春秋則冬夏可知。玉幣，諸侯享幣也。其合亦如小行人所合六幣云。玉獻，獻國珍異，亦執玉以致之。玉几，王所依也。立而設几，優尊者。玉爵，王禮諸侯之酢爵。王朝諸侯，立依前，南面，其禮之於阼階上。【疏】注云「助王受此四者」者，《州長》注云：「贊，助也。」此經上下文凡言贊者，並訓爲助。云「時見曰會，殷見曰同」者，《大宗伯》文，詳彼疏。云「大會同或於春朝，或於秋覲，舉春秋則冬夏可知」者，釋經云大朝覲即是會同，又不云宗遇之義。賈疏云：「諸侯四時常朝不稱大，今朝覲稱大者，諸侯爲大會同而來，故稱大朝覲。大會雖無常期，當春來即是春朝，當秋來即是秋覲，當夏來即是夏宗，當冬來即是冬遇。若大同則有常期，春東方六服盡來，夏南方六服盡來，秋冬同。經直云大朝覲，不言宗遇，有宗遇可知。在國行朝禮訖，乃皆爲壇於國外而命事焉。」案：大同亦無常期，賈說非。又凡會同，皆先行朝禮。並詳《大宗伯》及《大行人》疏。云「玉幣，諸侯享幣也」者，鄭意此即朝後之享，《大行人》「公侯伯子男皆」廟中將幣三享」是也。玉幣即《覲禮》所云「四享皆束帛加璧」。彼又云「侯氏升致命，王撫玉，侯氏降自西階，東面授宰

幣」。彼宰即謂大宰也。金鶚云：「古者玉帛通謂之幣，玉幣即瑞玉也。《曲禮》云「操幣圭璧則尚左手」，《司儀》言諸侯相朝之禮云「再拜授幣，賓再拜送幣」者，皆謂玉爲幣也。」案：金說亦足補鄭義。竊謂此玉幣當通受玉及受享二者言之，鄭、金兩義相兼乃備。蓋朝覲會同，以受玉爲正禮，冢宰贊王，不宜遺此而唯贊受享也。但此玉幣知不專屬瑞玉者，以《內府》云「凡四方之幣獻之，金玉齒革兵器凡良貨賄人焉」。彼所云幣獻，即此玉幣、玉獻。若玉幣專爲瑞玉，則朝覲禮畢，當以還侯氏，不入內府。唯三享圭璋璧琮，受而不還，乃得入內府耳。凡瑞玉通稱幣及還瑞玉，不還享玉，並詳《司儀》疏。又案：凡朝覲宗遇，受朝受享皆於廟。鄭《曲禮》注謂「春夏受贄於朝」，非也，賈疏亦沿其誤。詳《大宗伯》疏。云「其合亦如小行人所合六幣云」者，賈疏云：「案：《小行人》所合六幣，圭以馬，璋以皮，璧以帛，琮以錦，琥以繡，璜以黼。據彼鄭注，五等諸侯享天子用璧以帛，享后用琮以錦，則圭以馬，璋以皮者，謂二王之後享天子，用圭以馬，享后用璋以皮；則琥以繡，璜以黼者，子男自相享法。但《小行人》所云者，謂四時常朝，不見大朝覲會同法，約與四時常朝同，無正文，故言云也。」云「玉獻，獻國珍異，亦執玉以致之」者，賈疏云：「謂三享之

外，別有獻國珍異，亦如三享執玉以致之，故言玉獻，謂以玉致獻也。」易拔云：「玉獻，乃諸侯貢珍之禮，《大行人》之六貢是也。」案：易說是也。鄭意蓋謂享庭實之外，別有珍異之獻。《覲禮目錄》云：「朝宗禮備，覲遇禮省，是以享獻不見焉。」彼云享獻，亦謂享別有獻。《覲禮》有三享之庭實，而無珍獻，故云「享獻不見」。明所不見者，享後之獻。若三享，則經有明文，安得云不見乎！賈彼疏不達鄭意，乃引此經說之云「獻謂三享後行私覲，私覲後即有私獻」，引《聘禮記》云「既覲，賓若私獻，奉獻將命」爲證。金鶚云：「私覲私獻者，大夫奉君命出使，行聘享之後，別以己物獻他國之君，故曰私獻。諸侯親朝，其享天子之物，皆己物也，又何私焉。」案：金說足正賈說之誤。又經典享與獻亦多通稱，《爾雅·釋詁》云：「享，獻也。」《大戴禮記·朝事篇》云「奉國地重物而獻之」，此即兼享獻而言之者也。知此玉獻非即玉享者，以《覲禮》三享，庭實皮馬之外無他物，而《內府》說幣獻有金玉齒革兵器良貨賄等，明此經玉獻自爲享後六貢之獻，不可混於享也。享爲正禮，獻爲加禮，故《覲禮》不見。自賈誤解鄭《目錄》，說者不攷，遂以并疑此注，今無取焉。云「玉几，王所依也」者，《書·顧命》云：「王被冕服，憑玉几。」《說文·几部》引作「凭玉几」，云

「凭，依几也」。《有司徹》云：「主人降，受宰几，宰授几，主人受。」彼大夫祭禮，宰贊授尸几，與此大宰贊授王几，禮例略同。玉几，詳《司几筵》疏。云「立而設几，優尊者」者，即《明堂位》云「天子負斧依而立」者也。賈疏云：「知立而設者，案《司几筵》云：『大朝覲，大饗射，凡封國命諸侯，王位設黼依，依前南鄉，左右玉几。』是立而設几也。几爲坐設，今立而設几，故云優至尊也。」云「玉爵，王禮諸侯之酢爵」者，《大行人》注云：「王禮，王以鬱鬯禮賓也。酢，報飲王也。」賈疏云：「案《大行人》云：『上公再裸而酢，侯伯一裸而酢，子男一裸不酢。』此裸時大宗伯攝裸，非冢宰所贊。但諸侯酢王用玉爵，則冢宰贊，王受之，故云贊玉爵。」云「王朝諸侯，立依前，南面」者，《釋文》云：「依，本亦作扆。」案：依扆字同，《司几筵》亦作「依」。此並四時朝覲所同，賈疏謂專指秋冬朝時，亦沿《曲禮》鄭注之誤。云「其禮之於阼階上」者，賈疏云：「言禮之，謂裸諸侯是也。知王在阼階上者，當依賓主之禮。案《燕禮》，主君在阼，賓在牖戶之間，故知禮之王在阼階上也。」詒讓案：此亦兼據《聘禮》禮賓公拜送禮之禮。蓋大宗伯酌圭瓚於筵前裸賓，王於阼階上拜送也。凡裸，王不親酌而親拜送，詳《大行人》疏。大喪，贊贈玉，含玉。助王爲之也。贈玉，

既窆，所以送先王。含玉，死者口實，天子以玉。《雜記》曰「含者執璧將命曰：寡君使某含」，則諸侯含以璧。鄭司農云：「含玉，璧琮。」【疏】「大喪，贊贈玉、含玉」者，《釋文》云：「含，本又作哈。」案：《說文·玉部》云：「琯，送死口中玉也。」《口部》云：「含，噉也。」則含玉正字當作「琯」，經典多段含爲之，哈又含之俗。賈疏云：「大喪謂王喪，贊王爲此二者也。但含玉始死用之，贈玉於葬乃用。此文後云含玉者，用之則有先後，此作文先後無義例。」《典瑞》并云飯玉，此不云者，文不具也。」案：《宰夫》注云：「大喪，王后世子也。」賈不從彼注者，以后世子喪贈含，王不親其事，則非大宰所贊。唯有母后之喪，王當親贈及視含。此所贊或當兼彼，但不能通於王后，故賈專據王喪也。又依賈說，則大宰亦贊飯玉。《大祝》云「大喪相飯」。彼以飯咳含，此經以含咳飯，亦互相備也。又案：《士喪禮》「主人親含，云「宰洗柩，建于米，執以從」。又云「宰從立于牀西，在右」。注云：「宰立牀西，在主人之右，當佐飯事。」彼士禮，家宰佐含。此天子禮，雖不親含，大宰亦贊含，尊卑異而禮例同。

注云「助王爲之也」者，亦訓贊爲助也。賈疏云：「大喪既是王喪，云助王者，謂助嗣王也。」云「贈玉，既窆，所以送先王」者，《既夕禮》云：「乃窆，主人襲，贈用制幣，玄纁

束。」《檀弓》注云：「贈以幣，送死者於壙也。」此天子禮，蓋以玉加於幣以入壙也。贈玉亦用璧，詳《典瑞》疏。賈疏云：「案《既夕》，士禮，既窆謂下棺訖，主人贈用玄纁以入壙。王喪雖無文，應更有加，亦當以玄纁爲主也，所贈亦既窆時也。」云「含玉，死者口實」者，《典瑞》注云：「含玉，柱左右頤及在口中者。」《公羊》文五年傳云：「含者何？口實也。」何注云：「孝子所以實親口也。緣生以事死，不忍虛其口。」《檀弓》孔疏引《春秋說題辭》云：「口實曰含，象生時食也。」《白虎通義·崩薨篇》云：「所以有飯哈何？緣生食，今死，不欲虛其口，故哈。」是含爲死者口實也。云「天子以玉」者，賈疏云：「此云含玉，《玉府》、《典瑞》皆直云玉，無異物之稱，對大夫已下不用玉，其實亦爲璧形。」案：天子含玉，互詳《典瑞》疏。引《雜記》曰「含者執璧將命曰：寡君使某含」者，彼注云：「含玉爲璧形。其分寸大小，未聞。」引之者，證諸侯含以璧也。云「則諸侯含以璧」者，《雜記》所云即諸侯之禮也。鄭說含玉天子以玉，諸侯以璧，與《禮緯》同。以其說推之，則璧當次於玉。《春秋緯》謂諸侯以玉，大夫以璧，雖不與《禮緯》合，亦以玉璧爲尊卑之差。璧，何氏《公羊》注作「碧」。《說文·玉部》云「碧，石之青美者」，則降於玉宜也。然此注明引《雜記》執

璧之文，則不以璧爲碧可知。玉璧有異，未聞其說。賈疏及《玉府》疏，並謂天子含玉亦爲璧形，恐非鄭意。鄭司農云「含玉，璧琮」者，賈疏云：「爲璧琮之形也。」詒讓案：古書說含玉未有爲琮形者，先鄭說疑以朝聘享玉用璧琮，意致含亦用是也。作大事，則戒于百官，贊王命。

助王爲教令。《春秋傳》曰：「國之大事，在祀與戎。」【疏】「作大事，則戒于百官，贊王命」者，《象胥》注云：「作，使也。」《詩·大雅·烝民》云：「出納王命，王之喉舌。賦政于外，四方爰發。」毛傳云：「喉舌，冢宰也。」與此贊王命義合。《大射儀》云：「君有命戒射，宰戒百官有事於射者。」注云：「宰，於天子，冢宰，治官卿也。作大事，則掌以君命戒於百官。」然則百官命戒，事無大小，冢宰並掌之。經但舉大事者，文不具耳。注云「助王爲教令」者，《坊記》

注云：「命謂教令。」明經云贊王命，即助王爲教令也。引《春秋傳》者，《左傳》成十三年劉康公語。賈疏云：「上已云祀五帝及大神祇祭祀大事戒百官訖，則此云作大事戒於百官，唯戎事也。引之者，證經大事是戎事，連引在祀耳。」詒讓案：《司馬法·仁本篇》說用師云「冢宰徵師於諸侯」，又云「天子正刑，冢宰與百官布令於軍」，並戎事戒令之事。王眡治朝，則贊聽治。治朝在路門外，羣臣治事之

朝。王視之，則助王平斷。【疏】「王眡治朝則贊聽治」者，江永云：「古者視朝之儀，臣先君入，君出路門，立於宁，偏揖羣臣，則朝禮畢。於是君退適路寢聽政，諸臣至官府治事處，治文書。如議論政事，君有命，臣有進言，則於內朝。大宰所謂贊聽治者，於治事處贊之，非謂揖羣臣時也。」

注云「治朝在路門外，羣臣治事之朝」者，此王日視朝之朝也。路門者，王路寢之門。路門之外，即應門之內。天子五門，自外而內，路門居其後，三朝，治朝居其中，詳《閭人》及《朝士》疏。惠士奇云：「王與羣臣治事之朝曰治朝。冢宰贊之，宰夫掌其法，司士正儀辨等而擯之者是也。」賈疏云：「王有三朝，必知此是路門外朝者，但外朝是斷疑獄之朝，路寢庭朝圖宗人、嘉事，二者並於事簡，非正朝，故知治朝是路門外司士所掌者也。」云「王視之則助王平斷」者，此注用今字作視也。《小宰》注云：「聽，平治也。」《淮南子·說林訓》云：「是而行之，故謂之斷。」高注云：「斷，治。」是聽斷義亦相近，故云助王平斷也。眡四方之聽朝，亦如之。謂王巡守在外時。【疏】注云「謂王巡守在外時」者，《釋文》云：「守，本亦作狩。」案：守狩字通，詳《土訓》疏。此謂十二年巡守及殷國時於所至之國聽朝也。賈

疏云：「經云四方聽朝，故知巡狩時。此鄭據依常者而言。征伐在外亦有聽朝法，以非常法，故不言也。」凡邦之小治，則冢宰聽之。待四方之賓客之小治。大

事決於王，小事冢宰專平。【疏】注云「大事決於王」者，即

上云王砥治朝則贊聽治，彼大治，大宰雖助平斷可否，必決於王，不敢專也。云「小事冢宰專平」者，亦訓聽為平斷也。

此云小事則大宰聽之，不言贊王，明大宰專決之，不待王命。《大戴禮記·千乘篇》云：「君發禁，宰受而行之，以時

通於地，散布於小理。」亦謂此也。歲終，則令百官

府各正其治，受其會，正，正處也。會，大計也。

【疏】「歲終，則令百官府各正其治，受其會」者，並治官之法，官計、官成也。大宰總掌六官會計之事，故《小宰》云

「贊冢宰受歲會」，《王制》亦云「冢宰制國用必於歲之杪」是也。《月令·季秋》云：「乃命冢宰農事備收，舉五穀之

要。」彼蓋月要之屬，故經不具也。歲終者，謂夏正季冬，非

周之季冬，詳《宰夫》疏。注云「正，正處也」者，《左》文

十八年傳「德以處事」，杜注云：「處，制也。」謂平正處制其治也。賈疏云：「經云令百官府各正其治，謂正處其所治

文書，大宰乃受其計會也。」云「會，大計也」者，《序官》注

同。《司會》云「以歲會，攷歲成」，《宰夫》云「歲終則令羣吏正歲會」，是會為每年之歲計，對日計月計為大，與下三歲大計異也。聽其致事，而詔王廢置。平其事來至者之功狀，而奏白王。【疏】「聽其致事而詔王廢置」者，即

聽歲會以攷吏治之得失，而以八柄之法詔王也。《曲禮》

「五官致貢曰享」，注云：「貢，功也。享，獻也。致其歲終之功於王謂之獻。」亦引此經為釋。《荀子·王制篇》云：

「本政教，正法則，兼聽而時稽之，度其功勞，論其慶賞，以時慎脩，使五吏克盡而衆庶不偷，此冢宰之事也。」又《王霸

篇》云：「相者論列百官之長，^①要百事之聽，以飾朝廷臣

下百吏之分，度其功勞，論其慶賞，歲終奉其成功，以效於

君。當則可，不當則廢。」即此大宰歲終聽致事詔廢置之事也。《大戴禮記·盛德篇》云：「古者，天子常以季冬考德，

以觀治亂得失。」又云：「古者，天子孟春論吏德行能功。」

《管子·立政篇》云：「孟春之朝，君自聽朝，論爵賞校官，終五日。」若然，此歲終正治受會，正歲尚有考德論吏諸事，

固亦經義所該矣。賈疏云：「百官致其治政功狀與冢宰，聽斷其所致之功狀文書，而詔告於王，有功者置之進其爵，

①「長」，原作「具」，據《荀子》改。

有罪者廢之退其爵也。」

注云「平其事來至者之功狀，

而奏白王」者，亦訓聽爲平也。《禮器》鄭注云「致之言至也」。《小宰》「歲終則令羣吏致事」，注云「使齋歲盡文書來

至」。義與此同。又前注云「詔，告也」。奏白與告義同，故

云「平其事來至者之功狀而奏白王」也。三歲，則大計

羣吏之治，而誅賞之。事久則聽之：大無功，不徒

廢，必罪之；大有功，不徒置，必賞之。鄭司農云「三載考

績」。【疏】「三歲則大計羣吏之治」者，亦總掌六官大計之

事也。凡經云「羣吏」者，其義有四：一、通指百官府關內

外卿大夫士言之。此經三歲大計羣吏，冢上歲終令百官府

正治受會爲文，是羣吏即百官府，則通乎大小之言也。《司

會》云「以逆羣吏之治而聽其會」，冢上官府郊野縣都爲文，

《職歲》亦云「凡官府都鄙羣吏之出財用，受式灋于職歲」，

羣吏冢官府都鄙爲文，《天府》云「凡官府鄉州及都鄙之治

中，受而藏之，以詔王察羣吏之治」，羣吏冢官府鄉州及都

鄙爲文，則通乎內外之言也。《小宰》云「以官府之六敘正

羣吏」。又云「以官府之六計，弊羣吏之治。月終，則以官

府之敘，受羣吏之要。歲終，則令羣吏致事」。《司書》云

「三歲，則大計羣吏之治，以逆羣吏之徵令」。諸言羣吏，並

通乎羣臣，其義並同。又《小司徒》云「令羣吏正要會而致

事」，此雖專指地官之屬，然亦通內外大小諸吏言之也。

二、專指大夫士言之。《御僕》掌羣吏之逆，與《小臣》「掌三

公及孤卿之復逆」文相備，則羣吏不關公卿也。三、專指士

以下小吏言之。《宰夫》云「掌治朝之灋，以正王及三公、六

卿、大夫、羣吏之位」，又云「敘羣吏之治」，彼羣吏在大夫

下，則即朝士之羣士，又不關大夫也。《司市》云「市之羣

吏」，亦謂所屬市中衆小吏也。四、專指鄉遂公邑等有地治

之吏言之。《鄉大夫》云「鄉老及鄉大夫羣吏，獻賢能之書

于王」，又云「正歲令羣吏攷灋於司徒，以退各憲之于所

治」，此專指鄉大夫所屬鄉吏也。《縣師》云「三年大比，則

以攷羣吏，而以詔廢置」，此專指公邑之吏也。《小司寇》三

詢之朝位云「羣臣西面，羣吏東面」，又三刺，「一曰訊羣臣，

二曰訊羣吏」，《司刺》文同，此並以羣吏對羣臣言之；《朝

士》「外朝之位」云「右九棘，公侯伯子男位焉，羣吏在其後」，

亦以羣吏與孤卿大夫羣士別文：此並通鄉遂公邑都鄙之

吏言之也。鄭於《御僕》《小司寇》《朝士》三職之羣吏，並

以府史釋之。不知府史乃庶人在官者，不可謂之吏，經凡

言羣吏者，並無此義。互詳《小司寇》疏。賈疏云：「三年

一閏，天道小成，則大計會百官羣吏之治功文書。」云「而誅

賞之」者，亦當詔王誅賞之，經不言者，冢上廢置文省。

注云「事久則聽之」者，以此三年大計，校歲計爲久也。云「大無功，不徒廢，必罪之，大有功，不徒置，必賞之」者，明經云誅賞，重於上文廢置也。賈疏云：「上計當年已有廢置，今三年上大計，大無功，不徒廢，更加罪；大有功，不徒置，更加賞也。」鄭司農云「三載考績」者，《書·堯典》文，僞古文入《舜典》。《白虎通義·考黜篇》云：「所以三歲一攷績何？三年有成，故於是賞有功，黜不肖。《尚書》曰『三載攷績，三攷黜陟』。何以知始攷輒黜之？《尚書》曰『三年一攷，少黜以地』。」《儀禮經傳通解》引《尚書大傳》云：「三歲而小考者，正職而行事也。九歲而大考者，黜無職而賞有功也。」《春秋經傳集解·考功名篇》云：「考績之法，考其所積也。諸侯月試其國。州伯時試其部，四試而一考。天子歲試天下，三試而一考，前後三考而黜陟，命之曰計。」案：依班說，則三載考績，即有黜陟。依伏、董說，則三考九年乃有黜陟。先鄭引彼釋此經三年大計有誅賞，則當與班說同。但《書》謂考諸侯，與此經考官府，法本異。先鄭以彼考績與此大計年數同，故引以證義耳，實則周制與唐虞不必同也。

周禮正義卷五

小宰之職，掌建邦之宮刑，以治王宮之

政令，凡宮之糾禁。杜子春云：「宮，皆當爲官。」玄

謂宮刑，在王宮中者之刑。建，明布告之。糾猶割也，察也，若今御史中丞。【疏】掌建邦之宮刑，以治王宮之政

令者，天官通掌官府，而小宰、宰夫、宮正、宮伯特治宮政。

此王宮刑政等，皆小宰所專領，不佐大宰者也。凡施行爲政，布告爲令，月令注云「宮令，幾出入及開閉之屬」是也。

云「凡宮之糾禁」者，即《士師》五禁「一曰宮禁」，此官與彼爲官聯也。注杜子春云「宮皆當爲官」者，子春，河南

緱氏人，劉歆弟子，鄭大夫、鄭司農皆從受學，詳賈《序周禮廢興》引馬融傳。馬、鄭序皆不云杜有詁釋之書。《射人》

先鄭注引子春說而糾之，則注中所述杜義，疑皆先鄭所口受著之《解詁》者，後鄭又轉錄之也。杜意此節三宮字及職

末「乃退以宮刑憲禁于王宮」，諸宮字並當爲「官」。以《大宰》八灋、《大司寇》五刑並有官刑，無宮刑，官官字形又相

近，故破官爲官。段玉裁云：「凡易字之例，於其音之同部或相近而易之，曰『讀爲』。其音無關涉，而改易字之誤，則曰『當爲』。或音可相關，義絕無關者，定爲聲之誤，則亦曰『當爲』。」云「玄謂宮刑在王宮中者之刑」者，鄭不從杜易字也。《釋文》謂干氏亦同。王宮中謂皋門以內及後宮。《大司寇》五刑，不數官刑，而《士師》五禁以宮禁爲首，此官刑蓋卽犯宮禁者之刑也。賈疏云：「後鄭以宮刑官中之刑，不從子春官刑者，見《秋官·司寇》已云『四曰官刑』，此小宰不往貳之，則不須重掌。又見下文觀治象「乃退，以宮刑憲禁于王宮」，故知宮刑明矣。」阮元云：「經首云『掌建邦之官刑，以治王宮之政令』，末云『以宮刑憲禁于王宮』。《宮正》、《宮伯》等職皆言王宮，經無有言王官者，則官刑之非官刑審矣。」云「建，明布告之」者，《敍官》注云：「建，立也。」凡物建立之，則衆共見。故引申之，凡明白布告亦曰建。云「糾猶割也，察也」者，《宮正》、《寺人》、《大司徒》注並同。《說文·糸部》云：「糾，繩三合也。」引申之，凡有所繩治，並謂之糾。《大司馬》注云：「糾猶正也。」《廣雅·釋詁》云：「割，斷也。」凡物有孤邪者，必斷割之乃正，故糾訓正，亦得訓割也。訓察者，《漢書·平帝紀》顏注云：「糾謂禁察也。」《左傳》僖二十八年孔疏云：「糾者繩治之名。」

割、察皆繩治之事，故鄭兼兩義爲釋。賈疏云：「既言糾，謂糾舉其非。事已發者，依法斷割之；事未發者，審察之。」云「若今御史中丞」者，賈疏引應劭云：「秩千石，朝會獨坐，副貳御史大夫，內掌蘭臺圖籍，外督刺史，糾察百寮。」《續漢書·百官志》劉注引此職干注，亦云「若御史中丞」，與鄭同。王聘珍云：「《續漢書·百官志》『御史中丞一人，千石。』本注曰：『御史大夫之丞也。舊別監御史，在殿中密舉非法。及御史大夫轉爲司空，因別留中，爲御史臺率。』鄭舉以況小宰者，謂其殿中密舉非法，與小宰掌官之糾禁相似，非必校其官職之大小也。」黃以周云：「鄭注舉漢官以況周官有一例。其直況之於《序官》者，如大府之爲司農、司會之爲尚書，是擬之以其官也。其注《序官》不以況，而況之於職內所掌之下者，如大司徒掌建邦土地之圖，曰若今司空郡國輿地圖；里宰以歲時合耦于耨，曰若今街彈之室：皆擬之以其事也。此舉漢御史中丞以況小宰，亦謂其糾禁官事同爾。西漢御史中丞，內領侍御史，外督部刺史，主糾察百僚。東漢御史中丞屬少府，乃糾察官事，故鄭舉以況之，非擬其官也。」**掌邦之六典、八灋、八則之貳，以逆邦國、都鄙、官府之治。**逆，迎受之。

鄭司農云：「貳，副也。」【疏】「掌邦之六典、八灋、八則之貳，以逆邦國都鄙官府之治」者，此掌大宰治法之副貳，與司會、司書、大史、內史爲官聯也。以下皆佐大宰之事。賈疏云：「大宰本以六典治邦國，今還以六典逆邦國之治，逆謂迎受鉤考之也。大宰本以八法治朝廷官府，今還以八法鉤考官府之治。大宰本以八則治都鄙，今還以八則鉤考都鄙之治。皆鉤考使知功過所在也。」注云「逆，迎受之」者，《小祝》注云：「逆，迎也。」《聘禮》注云：「逆猶受也。」《宰夫》「萬民之逆」，先鄭注云：「逆，迎受王命者。」是經言逆者，皆爲迎受之義。鄭司農云「貳，副也」者，《大史》、《司勳》、《大司寇》、《大行人》注義並同。《說文·貝部》云：「貳，副益也。」《大史》、《司勳》注並云「貳猶副也」，則是以副爲引申之義，與許義微異。此注不言猶者，文不具。六典、八法、八則，大宰脩立其書，彼爲正本，小宰執其副本也。**執邦之九貢、九賦、九式之貳，以均財，節邦用。**【疏】「執邦之九貢、九賦、九式之貳」者，此亦治法之副貳，大宰脩其正本，小宰執其副本，與司會、司書爲官聯也。賈疏云：「此三者並大宰所掌者，以其冢宰制國用，九貢九賦斂財賄，九式用之，事之大者，故小宰副貳

之。然大宰有九職，小宰不貳之者，以其九職云「任萬民」，小宰若云貳，謂任使亦貳之，故不言。其實九職任之使之，出貢用之，則小宰亦貳之，九貢中兼之矣。以其九職亦有九貢故也。」案：依賈說，則此九貢即《大宰》、《司會》之九貢。本據邦國之貢，而實兼有《閭師》之八貢，即《大宰》九職之貢也。《大府》邦國之貢，「萬民之貢」，二者同稱貢，故此經亦以一兼二，與《大宰》詳略互見也。云「以均財，節邦用」者，《大宰》云「以九式均節財用」是也。以官府之

六敘正羣吏：一曰以敘正其位，二曰以敘進其治，三曰以敘作其事，四曰以敘制其食，五曰以敘受其會，六曰以敘聽其情。敘，秩次也。謂先尊後卑也。治，功狀也。食，祿之多少。情，爭訟之辭。【疏】「以官府之六敘正羣吏」者，自此六敘至後七事之法，並小宰之官法也。羣吏，與《大宰》義同，亦通百官府言之。賈疏云：「凡言敘者，皆是次敘。先尊後卑，各依秩次，則羣吏得正，故云正羣吏也。」云「一曰以敘正其位」者，謂若《司士》治朝之朝位，《小司寇》外朝之朝位，皆依爵秩尊卑為次也。云「二曰以敘進其治」者，賈疏云：「謂卿大夫士有治職功狀文書進於上，亦先尊後卑也。」云「三曰

以敘作其事」者，謂國有大事，射人作卿大夫，司士作士，諸子作庶子，皆以尊卑之敘作之。《象胥》云：「凡作事，王之大事諸侯，次事卿，次事大夫，次事上士，下事庶子。」亦以敘作事之等差也。云「五曰以敘受其會」者，通月要歲會言之，下文云「月終則以官府之敘，受羣吏之要」是也。受會，詳後疏。云「六曰以敘聽其情」者，後注云：「聽，平治也。」凡羣臣以事來諮請辨訟者，亦依敘次平治其情實也。

注云「敘，秩次也，謂先尊後卑也」者，《說文·支部》云：「敘，次弟也。」秩次與次弟義同。經典多段東西牆之序為之。此經例用古字作「敘」，注例用今字作「序」，雖述經文亦然。此注仍作敘，疑後人不知注例，依經文改之。云「治，功狀也」者，《喪服》注云：「治猶理也。」謂所治辨之功效事狀也。云「食，祿之多少」者，《醫師》注云：「食，祿也。」《論語·衛靈公篇》「事君敬其事而後其食」，《集解》引孔安國云：「先盡力而後食祿。」經典通稱祿為食。分言之則食與祿別，周制，命士以上，以爵制祿；不命之士及庶人在官者，則以事制食。此經凡言食者，皆與祿別。《司士》云「以功詔祿，以久奠食」。注云：「食，稍食也。」此云「以敘制其食」，當專屬不命之小吏言之，以其在官前後之敘，制其稍食，與《司士》「以久奠食」事正同。若祿，與爵常相

因，無俟於以敘制之也。鄭誤合食與祿爲一，賈疏謂制祿依爵命授之，並未得經義。祿食之異，詳《宮正》疏。云「情，爭訟之辭」者，賈疏云：「情謂情實。則獄訟之情，受聽斷之時，亦先尊後卑也。」惠士奇云：「聽其情，君之所以體臣。《韓詩外傳》言，人主之疾十有二發，而隔居其一焉，下情不上通謂之隔。《管子》亦言，國有四亡，其二曰塞，曰侵。塞者，下情不上通；侵者，下情上而道止。以敘聽其情，則通而不隔，行而不塞，誰得而侵之。」黃以周說同。詒讓案：凡羣吏之爭訟及以事來諮問請求，亦通謂之情。下文云「聽其治訟」，即是聽其情。《內史》云「掌敘事之灋，受納訪以詔王聽治」，注亦引此經「以敘聽其情」，明不止聽爭訟也。鄭、惠各舉一偏爲釋，當兼二義乃備。以官府之六屬舉邦治：一曰天官，其屬六十，掌邦治，大事則從其長，小事則專達；二曰地官，其屬六十，掌邦教，大事則從其長，小事則專達；三曰春官，其屬六十，掌邦禮，大事則從其長，小事則專達；四曰夏官，其屬六十，掌邦政，大事則從其長，小事則專達；五曰秋

官，其屬六十，掌邦刑，大事則從其長，小事則專達；六曰冬官，其屬六十，掌邦事，大事則從其長，小事則專達。大事從其長，若庖人、內外饗與膳夫共王之食。小事專達，若宮人、掌舍各爲一官。六官之屬，三百六十，象天地四時日月星辰之度數，天道備焉。前此者，成王作《周官》，其志有述天授位之義，故周公設官分職以法之。【疏】「以官府之六屬舉邦治」者，即《大宰》八灋之「一曰官屬以舉邦治」也。云「一曰天官其屬六十」者，此並約舉大數，實則六官之屬，員數多寡不同，皆不止六十也。云「大事則從其長」者，長謂當官之長，不必六官正也。若宰夫祭祀從大宰而眡滌濯，是其一端。云「小事則專達」者，《釋文》引干注云：「達，決也。」案：字書達無決訓。《士昏禮》注云：「達，通達也。」此專達亦謂脩其職事，以自通達於王。干說非經義。《檀弓》云：「公之喪，諸達官之長杖。」注云：「謂君所命，雖有官職，不達於君，則不服斬。」此小事可專達於王，所謂達官也。注云「大事從其長，若庖人、內外饗與膳夫共王之食」者，以庖人、內外饗皆膳夫之屬，故從膳夫共王之食。蓋大事職任既重，治辨又繁，非一官所能獨共，故備設長屬。長總其

成，屬則從其長而達於王。若《司士職》以小臣、祭僕、御僕、隸僕爲「大僕從者」，亦此義也。六官之內，此類甚多，鄭舉一端以況義爾。云「小事專達，若宮人、掌舍各爲一官」者，賈疏云：「若宮人直掌王之六寢，掌舍直掌王之行設榼柅之等，二官並是小事，又不立長官，當官行事，故云各爲一官，是專達也。」云「六官之屬三百六十」者，以六乘六十得此數，此亦約舉大數也。《明堂位》云：「夏后氏官百，殷二百，周三百。」注云：「周之六卿，其屬各六十，則《周官》三百六十官也。此云三百者，時《冬官》亡矣。《昏義》曰：「天子立六官，三公、九卿、二十七大夫、八十一元士。」凡百二十。蓋謂夏制也。」黃以周云：「《明堂位》「夏官百，殷二百，周三百」，此官之以職計者也。《昏義》、《王制》又舉其副貳之官云「三公、九卿、二十七大夫、八十一元士」，此官之以人計者也。夏殷之官，必非一職止一人爲之，可依《周官·序官》推之。兩文互異，義不相妨。」案：黃說是也。《明堂位》說三代官數，是約舉官職大數，所云周三百，非不數冬官也。《昏義》所云，則三公以下正貳相參佐之數，故皆以三三增倍。雖與周六官正貳之屬不合，然非一代衆官之通數，則固無疑也。至周代六官大數，則《冬官》已亡，餘五官敘官，或無員數，或有員數，其總數無

由校計。《北堂書鈔·設官部》引《五經異義》云：「古《周禮》說，冢宰、司徒、宗伯、司馬、司寇、司空是謂六卿之屬。大夫、士、庶人在官者，凡萬二千。」《通典·職官》云：「周內外官六萬三千六百七十五員，內二千六百四十三人，外諸侯國官六萬一千三十二人。內職掌，府史、胥徒、賈人，工人，奄、罪、閭、蠻、夷、貉等五隸，醫人，圉人，虎士，視瞭及奚、漿、籩、醢、醢、鹽、冪、酒、桃、春、枕、鐔、橐等女職，一萬五千九百五十人。都計內外官及內職掌人，七萬九千六百二十五人。」今以五官之屬校之，並不相應，未知其說云何。沈彤則以五官五分取一，以例冬官，六官凡五萬九千三百餘人。亦約略推計，不能盡合也。云「象天地四時日月星辰之度數，天道備焉」者，賈疏云：「依《周髀》、《七曜》皆云周天三百六十五度四分度之一，舉全數亦得云三百六十也。言地則與天配合四時，言周天亦是地之數。十二月亦是周天之數。日行一度，月日行十三度十九分度之七，日月所行亦在周天之數。星辰謂二十八宿十二次，亦在周天數內，皆不離三百六十五度四分度之一耳。天地四時日月星辰之度數，所從言之異耳。故《尚書·洪範》云「五紀，一曰歲，二曰月，三曰日，四曰星辰」，皆別言之。下以歷數摠結之，亦是類也。」詒讓案：象天地四時，謂六官

分繫天地春夏秋冬也。日月星辰之度數，乃指六屬三百六十，與周天度相應，所謂天道備也。賈說未析。云「前此者成王作《周官》，其志有述天授位之義，故周公設官分職以法之」者，賈疏云：「鄭依《書傳》云『周公攝政，三年踐奄』，與滅淮夷同時。又案：成王《周官》『成王既黜殷命，滅淮夷，還歸在豐，作《周官》』。則成王作《周官》，在周公攝政三年時，周公制禮在攝政六年時，故云前此者，謂成王前於此時作《周官》。其志謂成王志意有述天授位之義，即彼《周官》云『唐虞稽古，建官惟百，夏商倍之。今予小子訓迪厥官，以立太師、太傅、太保，茲惟三公，論道經邦，燮理陰陽。』下又云立三孤及天地四時之官，是其志有述天地三百六十官位之義。故周公設官分職，法之也。此鄭義不見《古文尚書》，故爲此解。若孔據《古文尚書·多士》已下，並是周公致政後成王之書。周公攝政時，淮夷、奄與管蔡同作亂，成王即政後又叛，成王親征之，故云滅淮夷。還歸在豐，作《周官》用人之法，則彼《周官》在此《周禮》後，與鄭義異也。」案：賈說非也。鄭以《書敘》滅淮夷即伐淮夷，與踐奄是攝政三年事，亦見《書·成王政敘》孔疏引鄭《書注》。又《書·周官》疏引鄭注云「《周官》亡」，是鄭注本無此篇。今所傳僞古文《周官》非鄭所見，且亦無述天授位之

說。此則真《周官》之逸說見於他書者，故鄭得引之。《地官·敘官》疏引《鄭志》，趙商問曰「成王《周官》，立太師、太傅、太保，茲惟三公」。是漢時《周官》雖亡，其墜文逸故，猶聞有傳者，述天授位之說，亦其一矣。以官府之六職辨邦治：一曰治職，以平邦國，以均萬民，以節財用；二曰教職，以安邦國，以寧萬民，以懷賓客，三曰禮職，以和邦國，以諧萬民，以事鬼神；四曰政職，以服邦國，以正萬民，以聚百物；五曰刑職，以詰邦國，以糾萬民，以除盜賊；六曰事職，以富邦國，以養萬民，以生百物。懷亦安也。賓客來，共其委積，所以安之。聚百物者，司馬主九畿，職方制其貢，各以其所有。【疏】以官府之六職辨邦治者，此即《大宰》八灋之「二曰官職以辨邦治」也。賈疏云：「六官者各有職，若天官治職，地官教職，其職不同，邦事得有分辨，故云以辨邦治也。」云「一曰治職，以平邦國，以均萬民，以節財用」者，以下與《大宰》六典文有異同，義並互相備。大宰以九式均節財用，故云以節財用也。云「六曰事職，以富邦國，以養萬民，以生百物」

者，《書·周官》孔疏引馬融注云：「事職，掌百工器用耒耜弓車之屬者。」賈疏云：「上『事典以生萬民』，生則養也，與上同。此六職不云官府百官，與六典不同者，以六職皆當職行事，義不及遠，故與六典文異也。」注云「懷亦安也」者，明與安邦國義同文異。《詩·邶風·終風》箋云：

「懷，安也。」《中庸》「懷諸侯」，亦此義。云「賓客來，共其委積，所以安之」者，賈疏云：「大司徒徒下有遺人，掌十里有廬，廬有飲食之等，故云共委積也。」案：委積，詳《遺人》疏。云「聚百物者，司馬主九畿，職方制其貢，各以其所有」者，並據《夏官》本職文。職方氏所制之貢，即出於九畿內侯、甸、男、采、衛、蠻六畿，故政職曰以聚百物。以官府之六聯合邦治：一曰祭祀之聯事，二曰賓客之聯事，三曰喪荒之聯事，四曰軍旅之聯事，五曰田役之聯事，六曰斂弛之聯事。凡小事皆有聯。鄭司農云：「大祭祀，大宰贊玉幣，司徒奉牛牲，宗伯視滌濯，涖玉鬯，省牲鑊，奉玉盥，司馬羞魚牲，奉馬牲，司寇奉明水火；大喪，大宰贊贈玉，含玉，司徒帥六鄉之衆庶屬其六引，宗伯爲上相，司馬平士大夫，司寇前王：此所謂官聯。」杜子春弛讀爲施。玄謂荒政弛力役，

及國中貴者、賢者、服公事者、老者、疾者皆舍，不以力役之事。奉牲者，其司空奉豕與？【疏】「以官府之六聯合邦治」者，此即《大宰》八灋之「三曰官聯以會邦治」也。合會

義同。賈疏云：「謂官府之中，有六事皆聯事通職，然後國治得會合，故云合邦治也。」詒讓案：凡官聯，有同官之聯事，若司市、司門、司關爲聯事，同屬地官是也。有異官之聯事，若祭祀喪紀，六官之長爲聯事是也。異官之屬亦多相與爲聯事，若《量人》云「凡宰祭，與鬱人受罍歷而皆飲之」，是夏官之屬與春官之屬爲聯事也。云「五曰田役之聯事」者，田役謂起徒役以田獵，即《大司馬》「春蒐、夏苗、秋獮、冬狩是也。亦兼畋諸功作之事，詳《大宰》疏。云「六曰斂弛之聯事」者，《釋文》云：「弛，劉本作施，音弛。杜作施。」案：陸謂杜作施，臧輔堂、嚴可均並謂據「讀作」言之，是也。蓋杜、鄭義本異，劉本則涉杜讀而誤，陸所不從。賈疏云：「並大宰任九職、九貢、九賦，司徒制貢，小司徒令貢賦，若通數小官則多矣。」吳廷華云：「斂是征賦，施是施惠。其聯事，斂則載師、閭師之屬，施則遺人、旅師之屬，皆聯事也。」云「凡小事皆有聯」者，以上祭祀六者，並據大事而言。其中亦有小事，若《小祝》云「凡外內小祭祀、小喪紀、小會同、小軍旅掌事焉」是也。至六者之外，衆小事則

條目尤繁多，故經並不悉舉也。賈疏云：「謂《司關》云『掌國貨之節以聯門市』之類是也。」注鄭司農云「大祭祀，

大宰贊玉幣，司徒奉牛牲，宗伯視滌濯、涖玉鬯、省牲鑊、奉玉盥，司馬羞魚牲、奉馬牲，司寇奉明水火」者，此各據本職，所謂祭祀之聯事也。五官長屬，官聯緜夥，不可具述，故略舉五官之正以明義也。云「大喪，大宰贊贈玉、含玉，司徒帥六鄉之衆庶屬其六引，宗伯爲上相，司馬平士大夫，司寇前王」者，亦各據本職，所謂喪之聯事也。「六引」引，《釋文》作「紉」，云：「徐音胤，劉音引，本或作引。」案：《大司徒職》亦作「引」。賈疏云：「司農雖解祭祀及大喪二事，皆不言司空，《司空》亡故也。大祭祀，唯大宰尊，不奉牲，宗伯不言奉雞，司馬直言奉馬，不兼言奉羊，司寇不言奉犬，皆略不言可知。」呂飛鵬云：「喪與荒爲二事，鄭司農注喪之聯事已具，不言荒者，略也。掌救荒之事者非一官，故有聯事。如小宰受幣玉，大司徒以十二荒政聚萬民，大宗伯以荒禮哀凶札，《小宗伯職》云『大裁及執事禱祠于上下神祇』，《士師職》云『若邦凶荒，則以荒辯之灋治之』是也。」云「此所謂官聯」者，聯，黃丕烈校改「連」，是也。此據《大宰》文。先鄭彼注讀聯爲連，則此注聯亦當作連矣。云「杜子春弛讀爲施」者，丁晏云：「《遂人》『與其施舍者』，注「施

讀爲弛」。《遂大夫》『與其可施舍』，注「施讀亦爲弛」。《土均》『與其施舍』，注「施讀爲弛」。《毛詩》『矢其文德』，傳「矢，施也」。《孔子閒居》引《詩》『弛其文德』，注「弛，施也」。古字多通用。云「玄謂荒政弛力役」者，賈疏云：「此經二曰喪荒，荒謂年穀不熟。《大司徒》有荒政十二，其中『四曰弛力』。弛力役謂《廩人》歲不能人二釜，則令移民就穀，是時弛力役也。」段玉裁云：「此鄭君不從杜易字也。」吳廷華云：「弛當依杜氏作施，施與斂出入相對，乃稱也。」王引之云：「弛舍與賦斂，意義不倫，無由並舉，當以讀施爲是。斂者聚也，施者散也。或先施而後斂，或先斂而後施。《地官·旅師》『掌聚野之糶粟、屋粟、閒粟而用之』。以質劑致民，平頒其興積，施其惠，散其利而均其政令。凡用粟，春頒而秋斂之」。鄭注曰：「困時施之，饒時收之。」此先施而後斂也。《司稼》『掌巡邦野之稼，以年之上下出斂灋，掌均萬民之食，而調其急』。《倉人》『掌粟人之藏。有餘則藏之，以待凶而頒之」。此先斂而後施也。又《鄉師》『以歲時巡國及野，而調萬民之糶阨，以王命施惠』。《司救》『凡歲時有天患民病，則以節巡國中及郊野，而以王命施惠』。《遺人》『掌邦之委積以待施惠，鄉里之委積以恤民之糶阨，門閭之委積以養老孤』。則掌施惠之事者非一官，

故曰斂施之聯事也。」案：吳、王二說是也。云「及國中貴者、賢者、服公事者、老者、疾者皆舍，不以力役之事」者，賈疏云：「《鄉大夫》云國中貴者，謂有官爵者，賢者謂有德行，服公事者謂若庶人在官者，老謂國中六十者，疾者謂廢疾不堪役者，皆舍，不以力役之事也。」云「奉牲者，其司空奉豕與」者，以先鄭說祭祀之聯事，五官皆備，惟司空獨闕，故補其義。《小宗伯》先鄭注，說「毛六牲」亦云「司空主豕」。《月令》注云：「彘，水畜也。」賈疏云：「《司空》雖亡，案《五行傳》云「聽之不聰，時則有豕禍，豕屬北方」。又《說卦》云「坎爲豕」，是豕屬水。故知司空奉豕。無正文，故云「與以疑之也。」以官府之八成經邦治：一曰聽政役以比居，二曰聽師田以簡稽，三曰聽閭里以版圖，四曰聽稱責以傅別，五曰聽祿位以禮命，六曰聽取予以書契，七曰聽賣買以質劑，八曰聽出入以要會。鄭司農云：「政謂軍政也。役謂發兵起徒役也。比居謂伍籍也。比地爲伍，因內政寄軍令，以伍籍發軍起役者，平而無遺脫也。簡稽士卒、兵器、簿書。簡猶閱也。稽猶計也，合也。合計其士卒之卒伍，閱其兵器，爲之要簿也。故《遂人職》曰「稽其人

民，簡其兵器」。《國語》曰「黃池之會，吳陳其兵，皆官師擁鐸拱稽」。版，戶籍。圖，地圖也。聽人訟地者，以版圖決之。《司書職》曰「邦中之版，土地之圖」。稱責，謂貸子。傅別，謂券書也。聽訟責者，以券書決之。傅，傅著約束於文書。別，別爲兩，兩家各得一也。禮命，謂九賜也。書契，符書也。質劑，謂市中平賈，今時月平是也。要會，謂計最之簿書，月計曰要，歲計曰會，故《宰夫職》曰「歲終則令羣吏正歲會，月終則令正月要」。傅別，故書作「傅辨」，鄭大夫讀爲「符別」，杜子春讀爲「傅別」。玄謂政謂賦也。凡其字或作政，或作正，或作征，以多言之宜從征，如《孟子》「交征利」云。傅別，謂爲大手書於一札，中字別之。書契，謂出予受入之凡要。凡簿書之最目，獄訟之要辭，皆曰契。《春秋傳》曰「王叔氏不能舉其契」。質劑，謂兩書一札，同而別之，長曰質，短曰劑。傅別質劑，皆今之券書也，事異異其名耳。禮命，禮之九命之差等。【疏】「以官府之八成經邦治」者，此即《大宰》八灋之「五曰官成以經邦治」也。彼注云：「官成謂官府之成事品式也。」案：八成與後文歲會月要日成之成義同，謂成事品式著於簿書文券可以案驗者，其目有八也。詳《大宰》疏。云「一曰聽征役以比居」者，賈疏云：「八事皆聽者，舊事爭訟當斷之也。政謂

賦稅，役謂使役，民有爭賦稅使役，則以地比居者共聽之。」
 吳廷華云：「聽，察也。政役八者皆邦治，比居八者則成典之在簡冊者也。八成繫於邦治之大，聽訟特獄吏事。賈謂八者皆聽斷之事，誤。」案：吳說是也。此八成皆官府經常之法，凡治民者皆取正於是。聽與後文「聽治訟」，義同。彼注云：「聽，平治也。」蓋凡咨決校攷，辯論陳乞，皆平治之所該矣。《大司寇》云：「凡諸侯之獄訟，以邦典定之；凡卿大夫之獄訟，以邦灋斷之；凡庶民之獄訟，以邦成弊之。」邦成即此八成，彼經與六典八法同舉，是獄訟雖以典法成三者為聽斷，而典法成非專為聽獄訟而設。先鄭唯以聽訟說版圖傳別，而賈疏遂謂八者專為聽爭訟之事，皆偏舉一端，義殊未該也。云「二曰聽師田以簡稽」者，《大宗伯》軍禮云「大師之禮用衆也，大田之禮簡衆也」。師田發衆庶，故以簡稽之簿書聽之。云「三曰聽閭里以版圖」者，賈疏云：「在六鄉則二十五家為閭，在六遂則二十五家為里。閭里之中有爭訟，則以戶籍之版、土地之圖聽決之。」
 詒讓案：聽閭里者，謂畿內界域錯互，戶口移徙之事，則案版圖以治之。云閭里者，偏舉鄉遂及郊里言之，若在公邑都鄙，則為井邑丘甸；猶《司書職》通畿內，而云「掌邦中之版」，亦舉邦中以該鄉遂都鄙，皆文不具也。版圖即大司

徒、司士、職方氏、司民及有地治諸官所掌是也。云「四曰聽稱責以傳別」者，賈疏云：「稱責謂舉責生子，於官於民俱是稱也。爭此責者，則以傳別券書決之。」云「五曰聽祿位以禮命」者，禮命謂國之禮籍，王之策命，若典命、內史所掌是也。賈疏云：「謂聽時以禮命其人策書之本，有人爭祿之多少，位之前後，則以禮命文書聽之也。」江永云：「爭祿位，如周甘人與晉閻嘉爭閻田，王叔陳生與伯與爭政之類。」云「六曰聽取予以書契」者，《說文·予部》云：「予，推予也。」賈疏云：「此謂於官直貸不出子者，故云取予。若爭此取予者，則以書契券書聽之。」案：取予亦通官民財用頒授之事言之，賈謂於官直貸不出子，非是。云「七曰聽賣買以質劑」者，即質人所掌者是也。賣買亦通官民言之。云「八曰聽出入以要會」者，凡斂散經用之會計，若司會、司書所掌是也。賈疏云：「歲計曰會，月計曰要。此出入者，正是官內自物。有人爭此官物者，則以要會簿書聽之。」
 注鄭司農云「政謂軍政也」者，先鄭讀政如字，謂軍賦之政事。《管子·小匡篇》云「卒伍政定於里，軍旅政定於郊」。所謂軍政也。然軍政與發兵事同，故後鄭不從。云「役謂發兵起徒役也」者，《說文·殳部》云：「役，戍邊也。」《國語·吳語》韋注云：「役，兵也。」是役本為兵戍，因之凡

因事興起徒衆者，並謂之役。發兵不入師田者，此爲平時部署征調，尚未成軍之事，與彼小異也。云「比居謂伍籍也」者，《小司徒》先鄭注云「五家爲比，故以比爲名」。《大史》注云：「居猶處也。」賈疏云：「即《司徒職》五家爲比，出軍即五人爲伍。」惠棟云：「《尉繚子》有束伍令，《史記·馮唐傳》有尺籍伍符。」詒讓案：先鄭意蓋謂比居即伍籍，與下注版戶籍小異。伍籍謂每地人民可任力役者之姓名，校比之時，亦依軍法聯其什伍。戶籍則無論男女老小，凡施舍不任力役者，亦咸登於版，詳略殊也。後鄭亦從其說。吳廷華云：「此即《小司徒》之比要，蓋人民多寡之籍也。既考其籍，又驗民居之數以實之，則役不濫矣。」案：吳說較先鄭爲長。易拔、孔廣森亦並謂《小司徒》云「凡民訟以地比正之，地訟以圖正之」，彼圖即下版圖之圖，地比即此比居之比。其說亦是。蓋每年校比，三年大比，皆有總要。其征役弛舍，咸具於書，故其治訟即依此聽之。若然，比之名義即起於校比，猶簡車徒之簿要即謂之簡。先鄭謂取五家比伍爲名，非其義也。云「比地爲伍，因內政寄軍令」者，賈疏云：「謂在家五家爲比，五比爲閭，四閭爲族，五族爲黨，五黨爲州，五州爲鄉。若出軍，則家出一人，則還五人爲伍，是一比，長還爲伍長領之。」^①二十五人爲兩，是一

閭，閭胥即爲兩司馬領之。以此言之，至一鄉出一軍，軍將還是鄉大夫爲之。是因內政寄軍令。此《管子》文。彼云「作內政」，司農云「因內政」者，讀字不同。案：賈說非也。先鄭蓋據《國語·齊語》，管子曰「作內政而寄軍令焉」。彼下文即說軌里卒伍之事，韋注云：「內政，國政也。因治政以寄軍令也。」《管子·小匡篇》「寄作寓」，非先鄭所據。「因內政」，與韋注義合，蓋以意改，亦非讀字不同也。云「以伍籍發軍起役者，平而無遺脫也」者，謂案伍籍以攷夫家可任之人數，而發軍起役，則政役均平，無過勞，亦無遺脫避役之弊也。云「簡稽士卒兵器簿書」者，凡士卒姓名部分，兵器種物凡數，皆著於簿書，謂之簡稽。《郊特牲》云：「簡其車賦而歷其卒伍。」注云：「簡歷，謂算具陳列之也。」《管子·問篇》云：「時簡稽帥牛馬之肥瘠，出人生死之會幾何。」又《侈靡篇》云：「斷指滿稽，斷首滿稽，斷足滿稽而死，民不服則弊刑之。」簿書亦得謂之稽，不徒師田矣。簿書，詳《敘官》疏。云「簡猶閱也」者，《遂大夫》注同。《廣雅·釋詁》云：「簡，閱也。」《左》桓六年傳云：「大閱，簡車馬也。」阮元云：「《釋文》出簡閱二字，則陸本無「猶」字。」

^① 「伍」，原作「五」，今據《周禮注疏》改。

云「稽猶計也，合也」者，《說文·稽部》云：「稽，留止也。」引申爲審慎攷計之稱，故又訓爲計。稽計聲亦相近。《水經·漸江水》、酈道元注云：「會稽者，會計也。」凡事物法數，必攷計而後合同，故又訓爲合。《廣雅·釋詁》云：「稽，合也。」皆展轉引申之義也。稽訓計，《宮正》及《大司馬》注義並同。云「合計其士之卒伍，閱其兵器，爲之要簿也」者，若《鄉師》云「凡四時之田，簡其鼓鐸、旗物、兵器，脩其卒伍」，又《縣師》云「及其六畜車輦之稽」是也。要簿亦卽簿書。云「故《遂人職》曰，稽其人民，簡其兵器」者，證簡稽本爲考閱人民兵器之事，遂以名其簿書也。此注據《遂人》，以人民屬稽，兵器屬簡，其實二者亦可互通。故《鄉師》云「稽其鄉器」，是器亦曰稽。《大宗伯》云「大田簡衆」，是衆亦曰簡，明通言不別也。引《國語》曰「黃池之會，吳陳其兵，皆官師擁鐸拱稽」者，《吳語》：「吳王夫差會晉公午于黃池，吳晉爭長。吳王乃令服兵擐甲，陳士卒百人以爲徹行百行，行頭皆官師擁鐸拱稽。」韋注云：「擁，猶抱也。拱，執也。抱鐸者，恐有聲也。唐尚書云「稽，桀戟也」。鄭司農以爲稽，計兵名籍也。」亦引此經聽師田以簡稽爲證。先鄭引之者，明彼拱稽卽執士卒之簿書也。云「版，戶籍」者，《司民》云：「登萬民之數，自生齒以上，皆書于版。」《宮

伯》先鄭注云：「版，名籍也，以版爲之。今時鄉戶籍謂之戶版。」《釋名·釋書契》云：「籍，籍也，所以籍疏人民戶口也。」案：《管子·禁藏篇》云：「戶籍田結者，所以知貧富之不訾也。」《史記·秦本紀》云：「獻公十年，初爲戶籍相伍。」是周時有戶籍之名。版，詳《宮伯》疏。云「圖，地圖也」者，《廣雅·釋詁》云：「圖，畫也。」《司會》注云：「圖，土地形象，田地廣狹。」又《大司徒》云：「掌建邦之土地之圖。」蓋自邦國以至閭里，皆有圖以辨其區域也。云「聽人訟地者，以版圖決之」者，《小司徒》云「地訟以圖正之」。兼云版者，地之夫家田萊之數，皆著於版也。引《司書職》曰「邦中之版，土地之圖」者，證版爲戶籍、圖爲地圖也。云「稱責，謂貸子」者，「子」舊本並譌「予」，今據宋婺州本正。賈疏云：「謂貸而生子者，若今舉責，卽《地官·泉府職》云「凡民之貸者，以國服爲之息」。若近郊民貸，則一年十一生利之類是也。」案：賈述注亦作「貸子」，是也。《管子·輕重丁篇》云：「桓公曰：崑丘之戰，民多稱貸，負子息，以給上之急，度上之求。」《孟子·滕文公篇》云：「又稱貸而益之。」趙注云：「稱，舉也。有不足者，又當舉貸子倍而益滿之。」《史記·貨殖傳》云「子貸金錢千貫」。又云「長安中，列侯封君，行從軍旅，齎貸子錢」。《索隱》云：「子謂利

息也。貸子，蓋漢時常語。《漢書·淮陽憲王欽傳》顏注云：「責，謂假貸人財物未償者也。」案：稱，當從趙岐訓爲舉，稱責猶言舉責也。《說文·犇部》云：「再，舉也。」此稱即再之段字。賈疏謂彼此俱爲稱意，故爲稱責，非其義。《說文·貝部》云：「責，求也。」今俗作債，非。云「傳別，謂券書也」者，傳別總名爲券書。丁晏云：「《說文·刀部》『券，契也。从刀柔聲。券別之書，以刀判契其旁，故曰契券。』《釋名·釋書契》：『券，繼也，相約束繾繾以爲限也。』云「聽訟責者，以券書決之」者，凡稱責而抵冒不償，或償不如約及未予而誣貸，已償而妄索，以此成訟者，並以券書之有無真僞決之。云「傳，傳著約束於文書」者，《淮南子·原道訓》高注云：「傳，著也。」謂爲文書，列其稱責之數，又爲約束何時償還及子息多少，並傳著於券書之上。此爲整券，不中別爲兩也。云「別，別爲兩，兩家各得一也」者，《廣雅·釋詁》云：「別，分也。」《士師》亦云「傳別」，先鄭注云：「若今時市買，爲券書以別之，各得其一。」義與此同。案：此亦傳著約束於文書，但其初書時，爲一券書訖，乃中別爲兩，所貸與予者各得其一，與傳爲一券止一家得之者異也。先鄭《士師》注又以傳別爲一，與此注小異，詳彼疏。賈疏云：「二家別釋後鄭不從者，名爲券書，即是傳

著於文書可知。後鄭傳別二字，共爲一事解之。」云「禮命，謂九賜也」者，《曲禮》孔疏云：「《公羊》云「命者何？加我服。錫者何？賜也。」是其命賜相將也。《周禮》九儀：一命受職，再命受服，三命受位，四命受器，五命賜則，六命賜官，七命賜國，八命作牧，九命作伯。案：《含文嘉》九賜：一曰車馬，二曰衣服，三曰樂則，四曰朱戶，五曰納陛，六曰虎賁，七曰斧鉞，八曰弓矢，九曰柅鬯。鄭司農以《周禮》九命與九賜是一也。康成以九命與九賜不同，九賜謂八命作牧、九命作伯之後，始加九賜。知者，《王制》云「三公一命卷，若有加，則賜」，二曰衣服之屬是也。又《宗伯》「八命作牧」，注云：「侯伯有功德，加命，得專征伐。」《王制》云：「賜弓矢，然後征。」《詩》云「瑟彼玉瓚，黃流在中」，傳曰：「九命然後賜以圭瓚。」又《尚書》：「文侯仇受弓矢柅鬯。」《左傳》：「晉文公受大路、戎路、弓矢、柅鬯、虎賁。此皆九命之外，始有衣服、弓矢、柅鬯等之賜，故知九賜不與九命同也。其《公羊》說九賜之次與《含文嘉》不同：一曰加服，二曰朱戶，三曰納陛，四曰輿馬，五曰樂則，六曰虎賁，七曰斧鉞，八曰弓矢，九曰柅鬯。異人之說，故文有參差，大略同也。《異義》許慎說九賜九命，鄭康成以爲不同，具如前說。」案：孔說未審。九賜，《韓詩外傳》、《白虎通義·考黜篇》、

《公羊》莊元年傳何注，並作九錫，賜錫義同。然此經九命與九賜，事不相涉。故《曲禮》「夫爲人子者，三賜不及車馬」，後鄭釋三賜，而未嘗援九賜爲說。先鄭此注雖以九賜釋禮命，而實不謂即《大宗伯》九儀之命，故先鄭彼注亦絕無九賜之說，與許氏《五經異義》說蓋小異。《曲禮》疏謂司農以九命與九賜爲一，失其指矣。云「書契，符書也」者，《釋名·釋書契》云：「契，刻也，刻識其數也。」《曲禮》云「獻粟者執右契」，注云：「契，券要也。右爲尊。」《易·繫辭傳》「後世聖人易之以書契」，李鼎祚《集解》引《九家易》云：「契，刻也。金決竹木爲書契。」案：符書者，即《質人》後鄭注所云「其券之象，書兩札，刻其側」者也。此皆合并兩札，刻書以爲符信，故曰符書。《說文·竹部》云：「符，信也。」《淮南子·主術訓》云：「以一合萬，若合符者也。」蓋書雖分著兩札，并而刻其邊側以紀數，又析之，使取者予者各持其一；其人往取，則予者并兩札，驗其側文合否而後予之也。惠士奇云：「《列子·說符》云：『宋人有遊於道，得人遺契者，歸而藏之，密數其齒曰：吾富可待矣。』契一作『挈』，《漢書》有租挈及廷尉挈令。韋昭曰『在板挈也』。《易林·大畜之未濟》云『符左契右，相與合齒。』」案：「惠說足證符契之義。」凡符契皆刻其側，謂之齒，詳

《質人》疏。賈疏謂「官券符璽之書，此據官予民物，何得爲符璽之書解之，故後鄭不從。」非也。云「質劑，謂市中平買，今時月平是也」者，《質人》先鄭注云：「質劑，月平買也。質大買，劑小買。」《說文·刀部》云：「劑，齊也。」齊平義相近。賈疏云：「後鄭不從者，《地官·質人》云：『大市以質，小市以劑。』若今月平買，不合有兩名，故不從也。」孔廣森云：「《漢書·溝洫志》注：『律，平價一月，得錢二千』所謂月平也。楊子《法言》曰：『一闕之市，必立之平。』蓋市價以時貴賤，故每月更平之。《景武功臣表》：『梁期侯任當千，坐賣馬一匹，賈錢十五萬，過平，減五百以上，免。』」案：孔說是也。月平者，漢時市價，蓋每月評定貴賤，若今時朔望爲長落也。《漢書·食貨志》載王莽令諸司市，常以四時中月，實定所掌，爲物上中下之賈，各自用爲其市平。即此月平也。云「要會，謂計最之簿書」者，《月令》，季冬「農事備收，舉五穀之要」。注云：「定其租稅之簿。」《呂氏春秋·季冬紀》高注云：「要，簿書也。」《國語·魯語》云：「收攬而蒸，納要也。」《小爾雅·廣詁》云：「最，凡、目、質，要也。」《說文·言部》云：「計，會也，算也。」又《月部》云：「最，犯而取也。又曰會。」又《冫部》云：「冫，積也。」案：凡經典之言計最、會最、最目、殿最者，皆取之借字，音義並

與聚同。故《公羊》隱元年傳云「會猶最也」，何注云：「最，聚也。最之言聚，若今聚民爲投最。」今並讀如字，非也。《漢書·嚴助傳》「願奉三年之計最」，顏注云：「最，凡要也。」①《史記·周勃世家》索隱云：「最，都凡也。」是計最者，總聚事物而算校其名數之言。計最則有簿書，故此注釋要會爲計最之簿書也。簿書，詳《司會》疏。云「月計曰要，歲計曰會」者，以一月之計少，舉其凡要而已，故謂之要。一歲之計多，則總聚攷校，故謂之會也。云「故《宰夫職》曰，歲終則令羣吏正歲會，月終則令正月要」者，證要爲月計，會爲歲計也。云「傳別故書作傳辨，鄭大夫讀爲符別，杜子春讀爲傳別」者，《後漢書·鄭興傳》云：「興字少贛，河南開封人也。建武六年，徵爲太中大夫。好古學，尤明《左氏》、《周官》。」案：興作《周禮解詁》，見鄭《自敘》。注凡引鄭大夫義，皆其遺說也。段玉裁云：「故書作傳，大夫讀爲符；故書作辨，子春、大夫皆讀爲別。司農從別不從符，作傳別。鄭君字從司農，而義則有異，故又自出其說也。辨別二字古多通用，如《月令章句》引《別名記》，即《白虎通》之《辨名記》。竊謂此當從故書作「辨」，而以辨讀爲「別」列於注，不當易經文從杜，鄭謂辨別義與音本皆同也。」惠士奇云：「傳別故書作傳辨，杜子春讀爲傳別。案

《荀子·性惡篇》「辨合符驗」，愚謂辨猶別也，合猶傳也，傳別猶辨合也。蓋辨而別之爲兩，合而傳之爲一，如符節然。詒讓案：《士師》「傳別」注云：「故書別爲辨。鄭司農云：傳或爲付，辨讀爲風別之別。」又《朝士》「凡有責者，有判書以治則聽」，注云：「故書判爲辨，鄭司農讀爲別。」傳與符付，辨與判，並聲類相近，辨與別亦一聲之轉。《說文·竹部》云：「符，漢制以竹，長六寸，分而相合。」大夫讀傳爲符，蓋亦謂稱責之符信分而相合者也。凡此經「傳別」別字，先鄭讀並與大夫、子春同。後鄭惟《朝士》從今書作判，餘亦並同三君讀。蓋因傳義自通，不煩破爲符字；而別則與一札中別之義尤切，故從杜破字也。云「玄謂政謂賦也」者，《孟子·盡心篇》趙注云：「征，賦也。」《廣雅·釋詁》云：「征，賦，稅也。」謂若《大宰》九賦之等。云「凡其字或作政，或作正，或作征」者，謂政正征聲類同，經文三字錯出，皆謂賦也。或作政者，謂此經及《遂人》云「以起政役」，又若《小司徒》之「平其政」，《均人》之「地政」、「力政」，《遂人》之「平政」，《羽人》之「羽翮之政」，《都司馬》之「政學」是也。或作正者，若《司書》之「九正」，《司門》之「正其貨賄」，

①「最」，原訛「計」，今據《漢書·嚴助傳》顏注改。

《司勳》之「無國正」，《諸子》之「司馬弗正」是也。或作征者，《小司徒》云「凡征役之施舍」，又《旅師》云「使無征役」，又若《獻人》之「獻征」，《大司徒》之「地征」、「薄征」等，經文常見，不復詳舉。云「以多言之，宜從征」者，以征賦無正字，故於三者之中，據其多者從之。此後鄭自著其發疑正讀之例也。云「如《孟子》交征利云」者，《孟子·梁惠王篇》云「上下交征利」，趙注云：「征，取也。」鄭引之者，證征爲斂取賦稅之名。賈疏謂引證征是口稅之法，非鄭愜。吳廷華云：「征役，力役之征也。」案：吳說是也。後鄭讀政爲征，得之；而釋爲賦稅之征，則非。云「傳別，謂爲大手書於一札，中字別之」者，此增成先鄭義也。《說文·木部》云：「札，牒也。」《士師》注云：「傳別，中別手書也。」《朝士》謂之判書，又謂之別券。《管子·問篇》云「問人之貸粟米有別券者幾何家」，即此稱責之傳別也。又《大匡篇》云「君與有司爲別契」，注云：「別契，謂分別其契，以知真僞也。」別契與別券義亦同。賈疏云：「謂於券背上，大作一手書字，札字中央破之爲二段，別之。」呂飛鵬云：「《釋名·釋書契》云：『荆，別也，大書中央，中破別之也。』即今市井合同。」案：呂說是也。中字別之，謂字一行中分而爲兩，劉勰《文心雕龍·書記篇》所謂「字形半分」者是也。

傳別，破別爲二，各執其一，責時則合二者以爲驗。^②故《史記·平原君傳》云「操右券以責」，又《孟嘗君傳》云「馮驩召諸取錢者，能與息者皆來，不能與息者亦來，皆持取錢之券合之」。是其證也。云「書契，謂出予受人之凡要」者，賈疏云：「此予則取予，謂若《泉府》云「凡賒者，祭祀無過旬日，喪紀不過三月」，及《旅師》云「春頒秋斂」，賒取官物，後還無生利之事，凡要亦是簿書也。」詒讓案：《說文·大部》云：「契，大約也。」凡以文書爲要約，或書於符券，或載於簿書，並謂之書契。若《宰夫》八職「五曰府，掌官契以治藏」，《酒正》云「凡有秩酒者，以書契予之」，《質人》「掌稽市之書契」，此謂符券之書契，故《質人》後鄭注謂「書兩札，刻其側」，是其制也。若《司會》云「掌國之官府、郊野、縣都之百物財用，凡在書契版圖者之貳」，《大司馬》云「羣吏選車徒，讀書契」，此謂簿書之書契也。此云聽取予以書契，與《酒正》之書契同，自指符券而言，故先鄭前注以符書爲釋。然取予之數，亦自當有簿書。符券、簿書，二者並爲凡要，故後鄭又增成其義。又案：注云「出予受人之凡要」，謂各

① 「釋」，原誤作「鐸」，今據楚本改。

② 「合」，原誤作「各」，今據楚本改。

司府藏之官，以物出而予人，及以物來人受取藏之者之凡目皆是。若《酒正》有秩酒者授以書契，即所謂出予之凡要也。然則取予與出入，事本相類。而書契與要會異者，書契乃未予未取之前，豫定其數，以爲符信；要會則既出既入之後，總計其數，以待校覈也。云「凡簿書之最目，獄訟之要辭，皆曰契」者，最亦取之借字。最目猶凡目、總目。《司會》注云：「書謂簿書。契，其最凡也。」《方言》劉歆《與楊雄書》云「欲頗得其最目」，是最目漢人常語。賈疏云：「簿書之最目曰契，即取予以書契是也。獄訟之要辭曰契，即鄭引《春秋傳》者是也。」引《春秋傳》曰「王叔氏不能舉其契」者，《左》襄十年傳文。杜注云：「契，要契之辭。」賈疏云：「彼云王叔陳生與伯與爭政，晉侯使士匄平王室，使王叔氏與伯與合要，王叔氏不能舉其契。此即獄訟之要辭曰契。」云「質劑，謂兩書一札，同而別之，長曰質，短曰劑」者，賈疏云：「案《地官·質人》云「大市以質，小市以劑」。鄭注：「大市，人民牛馬之屬，用長券；小市，兵器珍異之物，用短券。」言兩書一札同而別之者，謂前後作二券，中央破之，兩家各得其一，皆無手書字，異於傳別。」案：賈說非鄭悒也。《司市》注亦云「質劑，謂兩書一札而別之也。若今下手書，言保物要還矣」。則後鄭意不謂質劑無手書矣。

綜校鄭義，蓋質劑、傳別、書契，同爲券書。特質劑，手書一札，前後文同而中別之，使各執其半札。傳別，則爲手書大字，中字而別其札，使各執其半字。書契，則書兩札，使各執其一札。傳別札字半別；質劑則唯札半別，而字全具，不半別；書契則書兩札，札亦不半別也。惠士奇云：「《後漢書·張衡傳·應閒》云①「萬方億醜，并質共劑」。章懷注云：「質劑猶今分支契也。」質劑，《左氏》文六年傳謂之「質要」，《荀子·王霸篇》謂之「質律」，不徒賣買用之，《旅師》「平頒興積」，斂之民而散之民，亦憑質劑以爲信焉。又句計曰日成，②月計曰月要，歲計曰歲會，皆名爲質，《王制》所謂「司會以歲之成質於天子，冢宰齊戒受質」是也。又獄之要辭亦名爲劑，《大司寇》以兩劑禁民獄是也。然則傳別、質劑、要會三者，皆書契之別名也。」云「傳別、質劑皆今之券書也，事異異其名耳」者，傳別爲券書，與先鄭義同。後鄭意質劑與傳別，漢時通謂之券書，周時則事別爲名，破先鄭質劑爲平賈不爲券書也。《左傳》文六年杜注云：「質要，券契也。」云「禮命，禮之九命之差等」者，若《典命》五儀

①「云」，原重，據惠士奇《禮說》刪。

②「日」，原作「月」，據惠士奇《禮說》改。

五等之命，《春官·敘官》注云「命謂遷秩羣臣之書」是也。賈疏云：「謂若《大宗伯》九儀，從一命受職，以至九命作伯，差等有九是也。」沈彤云：「聽祿位以禮命，明制祿之多寡，本以爵等而兼命數也。自大夫而上，以策書之所命，皆主乎爵，而以數爲之等。」以聽官府之六計，弊羣吏之治。一曰廉善，二曰廉能，三曰廉敬，四曰廉正，五曰廉瀟，六曰廉辨。聽，平治也。平治官府之計有六事。弊，斷也。既斷以六事，又以廉爲本。善，善其事，有辭譽也。能，政令行也。敬，不解于位也。正，行無傾邪也。法，守法不失也。辨，辨然不疑惑也。杜子春云：「廉辨或爲廉端。」【疏】「以聽官府之六計，弊羣吏之治」者，即《大宰》八瀟之「八曰官計以弊邦治」也。羣吏亦通百官府言之。

注云「聽，平治也」者，《說文·言部》云：「訂，平議也。」訂聽聲義相近。《國策·秦策》高誘注云：「聽，治也。」此經凡言聽治、聽獄訟，皆謂平正斷決其是非，義並略同。云「平治官府之計有六事」者，賈疏云：「六計謂善、能、敬、正、法、辨，六者不同，既以廉爲本，又計其功過多少而聽斷之。」云「弊，斷也」者，《大宰》注同。云「既斷以六事，又以廉爲本」者，《禮運》云「大臣法，小臣

廉」。此六計通大小臣，亦以廉爲本也。賈疏云：「此經六事，皆先言廉，後言善能之等，故知將廉爲本。廉者，絜不濫濁也。」王安石、王昭禹、易祓、王與之、黃以周竝訓廉爲察，蓋以廉爲規之借字。《說文·見部》云：「規，察視也，讀若鑑。」於義亦通。云「善，善其事，有辭譽也」者，《說文·詰部》云：「譴，吉也。重文善，篆文譴从言。」善即譴之隸省。《宰夫》「以法警戒羣吏，書其能者與其良者，而以告于上」。注云：「良猶善也」。下廉能即能者，此廉善即良者，謂善於其所司之職事，有辭令名譽也。云「能，政令行也」者，《大宰》注云：「能，有才藝者。」《司諫》云：「辨其能而任于國事者。」謂有才藝，能任事，則政令自行也。云「敬，不解于位也」者，于，注例當作於，各本竝誤。不解於位，《詩·大雅·假樂》篇文。《釋名·釋言語》云：「敬，警也，恒自肅警也。」《說文·支部》云：「敬，肅也。」又《心部》云：「懈，怠也。」解即懈之借字。賈疏云：「謂敬其職位，恪居官次也。」云「正，行無傾邪也」者，《賈子·道術篇》云：「方直不曲謂之正。」《毛詩·大雅·小明》傳云：「正直爲正。」云「法，守法不失也」者，此亦注用今字作「法」也。賈疏云：「謂依法而行，無有錯失也。」云「辨，辨然不疑惑也」者，《敘官》注云：「辨，別也。」惠棟云：「辨然不，不讀

爲否。《漢官儀》解博士云：「士者辨於然否」是也。」案：惠說是也。然此疑當作「辨，辨然不，不疑惑也」，今本脫一不字。《白虎通義·爵篇》引傳曰：「通古今，辨然不，謂之士。」《說苑·修文篇》云：「辨然不，通古今之道，謂之士。」辨然不，即辨然否也。然不既辨，故能不疑惑。《大史》注亦云「攷案讀其然不」是也。賈疏謂「其人辨然於事分明，無有疑惑之事」。蓋所見本已脫「不」字，故不得其解。《釋文》不爲上「不」字發音，則陸本亦與賈同。杜子春云「廉辨或爲廉端」者，賈疏云：「經本或爲廉端。後鄭不從者，若爲端，端亦正，與廉正爲重，故不從。」段玉裁云：「或爲者，志其本之異也。子春乃劉歆弟子，而所見之本，已有乖異不同之處。」以灋掌祭祀、朝覲、會同、賓客之戒具，軍旅、田役、喪荒亦如之。法，謂其禮法也。戒具，戒官有事者所當共。【疏】「以灋掌祭祀朝覲會同賓客之戒具，軍旅田役喪荒亦如之」者，^①賈疏云：「此七事在《大宰》八法中『六曰官法』。彼在『八曰官計』上者，以其彼有數，故在上；此官法無數，故退在六計下也。」注云「法謂其禮法也」者，此亦注用今字作「法」也。賈疏云：「言禮法，謂七者皆有舊法依行，若九式。」云「戒具，戒官有

事者所當共」者，即《大宰》誓戒具脩是也。彼注云：「具，所當共。」謂以所當共之事，戒所掌之官，警其廢闕。此經不言誓脩者，文不具也。七事者，令百官府共其財用，治其施舍，聽其治訟。七事，謂先四、如之者三也。施舍，不給役者。七事，故書爲「小事」。杜子春云：「當爲七事，書亦爲七事。」【疏】「七事者，令百官府共其財用」者，《說文·人部》云：「供，設也。一曰供給。」此經通借共爲供。《羊人》注云：「共猶給也。」《外府》云：「凡祭祀、賓客、喪紀、會同、軍旅，共其財用之幣齎、賜予之財用。」此官即令外府等衆官府共之也。云「治其施舍」者，施舍，《釋文》引作「弛舍」。案：施舍與弛捨，聲類同。阮元云：「凡經云施舍字，注皆讀施爲弛。此注不言讀爲，蓋經本作弛字。」案：阮說是也。云「聽其治訟」者，治訟是二事。《司市》云：「聽其大治大訟，小治小訟。」此治蓋謂以事來咨辯，及有所陳訴請求。《旅師》云「凡新甿之治皆聽之」，注云：「治謂有所求乞也。」《方士》云「凡都家之士所上治，則主之」，《訝士》云「凡四方之有治於士者造焉」，注

① 「荒」原訛「紀」，據正文改。

謂「讞疑辨事」。皆其一隅也。凡咨辯陳訴請求必有辭，故治亦曰辭，《小司徒》云「聽其辭訟」，辭訟即治訟也。訟謂爭訟之事，《管子·立政篇》云「疏遠無蔽獄，孤寡無隱治」，彼以獄與治並舉，猶此云治訟也。訟亦有辭，故通言之，訟亦謂之治。《質人》云「凡治質劑者」，《朝士》云「凡士之治有期日」，注並以聽訟為釋，是也。 注云「七事謂先四

如之者三也」者，謂冢上計數，總為七事，猶《內宰》云「二事也」。賈疏云：「七事，先四謂從祭祀至賓客；云如之者三者，從軍旅至喪荒也。言以法掌祭祀已下七者，皆是上六聯百官聯事通職者。然六聯之中不言朝覲會同者，以彼賓客中可以兼之，以其朝覲會同，還是諸侯賓客之事。此七事不言斂弛，以其非七事中之大事，故退之在下。」云「施舍，不給役者」者，施，疑亦當從《釋文》引經作「弛」。《鄉師》注云「施舍謂應復免不給繇役」，義與此同。凡免力役，《大司徒》謂之弛，《鄉大夫》謂之舍，兼而言之則曰弛舍。又《左氏》宣十二年傳云「旅有施舍」，《國語·周語》云「縣無施舍」，彼「施舍」乃「岐予」之假借字，與此經凡言施舍者義別。云「七事故書為小事，杜子春云當為七事，書亦為七事」者，段玉裁改「書亦為七事」為「書亦或為七事」，云「此杜改定字誤」。案：段校是也。曾釗云：「小事，即上云

「小事皆有聯」是也。凡非祭祀、朝覲、會同、軍旅、田役、喪荒之事，皆謂之小事。小與七形聲並遠，無容故書譌作小。俞樾亦云：「七事上文既明列其目，則但云「令百官府共其財用」云云足矣，不必更斥之曰七事者，全經亦無此例。當從故書為小事。」案：曾、俞申故書義，亦通。前六聯一祭祀、二賓客、三喪荒、四軍旅、五田役、六斂弛，皆為大事，而復云小事皆有聯。此上文與彼正同，惟無斂弛耳。故此亦以小事者為更端之文，令百官府共其財用等，即上文戒具之事也。此明大事則此官親掌其戒具，小事則令他官共治之耳。①故事亦足備一義。凡祭祀，贊玉幣爵之事、裸將之事。又從大宰助王也。將，送也。

裸送，送裸，謂贊王酌鬱鬯以獻尸謂之裸。裸之言灌也，明不為飲，主以祭祀。唯人道宗廟有裸，天地大神至尊不裸，莫稱焉。凡鬱鬯受祭之，啐之，奠之。【疏】「凡祭祀贊玉幣爵之事」者，以下至職末，並小宰之官常也。玉，唐石經及今本並作「王」，岳珂《九經三傳沿革例》引越本注疏及建大字本同。宋婺州本、余本、董本、建小字本並作「玉」。段

①「小事」，原訛作「小官」，據上下文義改。

玉裁云：「凡祭祀」三字，統五帝、大神祇、先王而言也。此玉幣爵即《大宰》之祀五帝贊玉幣爵，故注云「又從大宰助王」，疏云「贊此三者」。唐石經及越注疏，建大字本作「王幣爵」，非也。」案：段說是也。阮元、黃丕烈說並同，今據正。《宋書·禮志》，朱膺之議引此經云「凡祭祀贊王裸將之事」，則疑劉宋時已有此譌本，不自唐石經始矣。但《大宰》云「祀五帝贊玉幣爵之事，祀大神而亦如之」。注云：「不用玉爵，尚質也。」彼下文又云「享先王亦如之，贊玉爵」。此凡祭祀有裸將，則通享先王而言，贊爵內亦當兼有匏木玉諸爵，與《大宰》文同而義則較廣也。 注云

「又從大宰助王也」者，《州長》注云：「贊，助也。」賈疏云：「案《大宰職》云「祀五帝贊玉幣爵」，今此又云祭祀贊此三者，謂小宰執以授大宰，大宰執以授王，是相贊助，故云又從大宰助王也。」云「將，送也」者，《爾雅·釋言》文。《小宗伯》、《大史》注並同。云「裸送，送裸」者，以將訓送，裸送即是送裸。經言裸將者，文到耳。《詩·大雅·文王》篇：「殷士膚敏，裸將于京。」毛傳云：「將，行也。」毛訓裸將為行裸，與送裸義亦相近。云「謂贊王酌鬱鬯以獻尸謂之裸」者，即宗廟九獻之初獻也。《大宗伯》注云：「灌以鬱鬯，謂始獻尸求神時也。」賈疏云：「上云「贊玉幣爵」，據祭天；

而下別云「裸將」，是據祭宗廟。」^①且上大宰不言贊裸將，則大宰不贊之，故此注云贊王酌鬱鬯也。」段玉裁云：「大宰享先王，不云贊裸將，然則小宰於享先王自助王，不同祀五帝從大宰助王，故注別之云贊王也。」案：段說是也。裸，小宰直助王，不從大宰。《毛詩·大雅·旱麓》傳云：

「祭祀之禮，王裸，諸臣助之。」^②諸臣即指小宰。孔疏謂裸亦大宰小宰同助王，失之。云「裸之言灌也」者，《大宗伯》、《玉人》注並同。《說文·冫部》云：「裸，灌祭也。」《毛詩·文王》傳同。案：許以裸字从冫，專屬祭祀之裸。《大行人》五等諸侯之裸，先鄭讀為灌，蓋謂賓客當言灌，不當言裸也。後鄭之意則以祭祀之裸，即為灌尸，與裸賓客字義同。《廣雅·釋詁》云：「灌，漬也。」裸尸、裸賓，並取酌鬱鬯灌漬之義。古音裸灌雙聲，後世音讀同。此經祭祀、賓客之裸，通作裸，又或借作「果」。《論語·八佾》、《禮記·禮器》、《郊特牲》、《明堂位》，說祭祀之裸，通作灌，蓋並以聲義相近通用。云「明不為飲，主以祭祀」者，明裸灌

① 「是」，原作「見」，據《周禮注疏》改。

② 「祭祀之禮王裸諸臣助之」，係《詩·大雅·棫樸》鄭箋文，孫氏誤記。

之義。廟享備九獻，朝踐以後，七獻皆飲，惟二裸不飲，故獻九而飲七。《司尊彝》注所謂「二裸爲奠而尸飲七」是也。裸以灌地降神，故云主以祭祀。云「唯人道宗廟有裸」者，《大宗伯》云「以肆獻裸享先王」。唯廟享言裸，凡賓禮大賓客亦有裸，是裸爲人道，故唯宗廟有之也。云「天地大神，至尊不裸，莫稱焉」者，祭天地唯七獻，無二裸也。《禮器》云：「德產之致也精微，觀天下之物，無可以稱其德者。」卽至尊莫稱之義。賈疏云：「據《大宰》祀五帝及大神而皆不言裸，此文又「裸將」在「玉幣爵」之下，明宗廟有裸，天地無裸。且《大宗伯》祀天言禋祭，社言血享，廟言灌，是亦天地無裸也。天地大神不灌者，不用降裸，無妨用柅鬯。必若然，天地用八尊，直有五齊三酒，不言柅鬯尊者，以其《冢人職》天地八尊者，以與宗廟六彝相對爲文，《鬯人職》柅鬯不入彝尊，則別有尊矣，不言者，略耳。不裸者，覆載之德，其功尤盛，欲報之德，無可稱焉，故無裸，直加敬而已。其牲用特，其器陶匏，皆是質略之事，故鄭云莫稱焉。祭天地既言無灌，案《宗伯》「涇玉鬯」，又案《禮記·表記》云「親耕粢盛，柅鬯以事上帝」，上帝得有柅鬯者，案《春官·鬯人職》掌共柅鬯下，所陳社稷山川等外神，皆用柅鬯，不用鬱。《鬯人職》用鬱鬯者，唯有宗廟及裸賓客耳。」黃以周云：

「《典瑞》裸圭止於肆先王，《玉人》裸圭止於祀廟，則祀天地不裸明甚。《表記》「柅鬯以事上帝」，謂享酒，非裸酒也。梁明山賓引《表記》文以證明堂有裸，亦誤。」詒讓案：《玉人》，大璋、中璋天子以巡守，注謂以事山川則用灌。是外神山川亦有灌，故鄭云「天地大神不裸」，明非大神或間有裸，非禮之至者也。山川有灌，則亦用鬱鬯。賈說非是。云「凡鬱鬯受，祭之，啐之，莫之」者，猶《特牲饋食禮》尸祭酒、啐酒、奠饌是也。《士昏禮》「啐醴」，注云：「啐，嘗也。」《雜記》「主人之酢也，啐之，衆賓兄弟則皆啐之」。注云：「啐皆嘗也。啐至齒，啐入口。」鄭言此者，亦明不爲飲，主以祭祀之義。賈疏云：「謂王以圭瓚酌鬱鬯獻尸，后亦以璋瓚酌鬱鬯獻尸，尸皆受灌地降神，明爲祭之。向口啐之，啐之謂人口乃奠之於地也。」凡賓客，贊裸，凡受爵之事，凡受幣之事。唯裸助宗伯，其餘皆助大宰。王不酌賓客而有受酢。《大宗伯職》曰：「大賓客則攝而載裸。」【疏】「凡賓客，贊裸」者，賈疏云：「案《大行人》云「上公再裸而酢，侯伯一裸而酢，子男一裸不酢」。謂諸侯來朝，朝享既畢，王禮之，有此灌酢之禮也。」云「凡受爵之事」者，《大宰》注云「玉爵，王禮諸侯之酢爵」是也。賈疏云：

「謂上公與諸侯酢王之爵，王受之。」云「凡受幣之事」者，《大宰》注云：「玉幣，諸侯享幣也。」案：受幣，疑當兼受瑞玉及三享之玉言之，詳《大宰》疏。 注云「唯裸助宗伯」

者，據《大宗伯》云攝裸，而《大宰》不云贊裸，小宰非宗伯屬官而贊之者，亦官聯也。鄭言此者，明三者贊同而所贊則異。云「其餘皆助大宰」者，《大宰職》云「大朝覲會同，贊玉幣玉爵」是也。賈疏云：「謂受爵幣二者，皆助大宰。賓客酢王之時，大宰於賓處受而授王，王飲訖，大宰受爵以授小宰。受幣之時，亦王親受，受以授大宰，大宰以授小宰也。」云「王不酌賓客而有受酢」者，謂王裸諸侯，則使宗伯代酌圭瓚，王但拜送而已。至裸訖，諸侯酌玉爵，報酢王，則王親受飲之，不使宗伯代也。賈疏云：「案：《燕禮》使宰夫爲主人，是君不酌臣，於諸侯亦然。受酢是飲酒之事，臣不可代君飲酒，故有受酢之事也。」引《大宗伯職》曰「大賓客則攝而載裸」者，明裸助宗伯之事。若賓客爲上公，宗伯兼攝后裸，則內宰贊之，小宰止贊攝王裸也。詳彼疏。 喪荒，受其含綖幣玉之事。《春秋傳》曰：「口實曰含，衣服曰綖。」凶荒有幣玉者，賓客所綢委之禮。【疏】「喪荒受其含綖幣玉之事」者，賈疏云：「喪謂王喪，諸侯諸

臣有致含綖幣玉之事。荒謂凶年，諸侯亦有致幣玉之事。上大宰不言，則此小宰專受之。案：《禮記·少儀》云：「臣致綖於君，則曰致廢衣於賈人。」則諸侯臣皆得致含也。詒讓案：《雜記》說諸侯喪受含綖贈之禮云「宰舉璧與圭，宰夫舉綖」，與此王喪小宰受含綖幣玉之事，足相比比例。

注引《春秋傳》曰「口實曰含」者，《公羊》文五年傳云：「含者何？口實也。」文與此注不同，或鄭約引之。口實，詳《大宰》疏。《御覽·禮儀部》引《春秋說題辭》云：「口實曰含，緣生象食，孝子不忍虛其欲。」竊疑此注所引，即《說題辭》文，《春秋傳》「傳」當爲「說」之誤。凡鄭注《三禮》引《緯侯》，並稱說，詳《大司馬疏》。云「衣服曰綖」者，《說文·衣部》云：「綖，衣死人也」，引《春秋傳》曰「楚使公親綖」。又「祝，贈終者衣被曰祝」。是送死衣服當以祝爲正字，今經典並段綖爲之。《小爾雅·廣名》云「衣服謂之綖」，《荀子·大略篇》云「衣服曰綖」，與此注同。《公羊》隱元年傳云「衣被曰綖」，又《穀梁傳》云「衣衾曰綖」，衣服卽衾衾被之屬。《白虎通義·崩薨篇》云：「綖之爲言遺也。衣被曰綖。知死者則贈綖，所以助生送死，追恩重終，副至意也。」《士喪禮》鄭注，《公羊》何注，義並同。《御覽·禮儀部》引《說題辭》云：「衣被曰綖，養死具也。」疑此亦據《說

題辭《文》，與上並引《春秋說》也。案：《裸記》云「諸侯相襚以後路與冕服」，則襚亦有車馬，不徒衣服矣。云「凶荒有幣玉者，賓客所調委之禮」者，明凶荒唯有幣玉，無含襚也。賈疏云：「案《小行人》云：『若國凶荒，則令調委之。』彼謂王家調委諸侯法，此謂諸侯調委王家法也。」詒讓案：凶荒調委當以泉粟，然必執幣玉以致之，故鄭以幣玉為調委之禮也。月終，則以官府之敍受羣吏之要。主每月之小計。【疏】「月終則以官府之敍受羣吏之要」者，以下並小宰總掌六官之官計、官成也。賈疏云：「月計曰要，故每月月終，則使官府致其簿書之要。受之當先尊後卑，故言敍。」詒讓案：《酒正》云：「酒正之出，日入其成，月入其要，小宰聽之。」上六敍云「以敍受其會」，會亦兼月要也。月要事小，故小宰專受之，不贊冢宰。不受日成者，日成事尤小，故宰夫及當官之長自受，不關小宰也。羣吏，亦通百官府言之。注云「主每月之小計」者，明月要對日成則為大，對歲會則為小，小宰得專主其事也。賈疏云：「言小計，對下經歲會為大計也。若大會，則下文冢宰平之。」贊冢宰受歲會，歲終，則令羣吏致事。使齋歲盡文書來至，若今上計。【疏】「贊冢宰受歲會」者，賈疏云：

「歲計曰會，言冢宰則據百官總焉，謂助冢宰受一歲之計。」王引之云：「贊冢宰受歲會，當在歲終。《宰夫職》曰『歲終則令羣吏正歲會，月終則令正月要』。《大宰職》曰『歲終則令百官府各正其治，受其會，聽其致事』。是冢宰受歲會在歲終也。小宰贊之，亦當在此時。」案：王說是也。經文在歲終之前者，為下句發端，非冢上月終為文也。云「歲終則令羣吏致事」者，歲終為夏之季冬，詳《宰夫疏》。賈疏云：「謂使六官各致一年功狀，將來考之故也。」注云「使齋歲盡文書來至」者，亦訓致為至也，詳《大宰疏》。云「若今上計」者，《續漢書·百官志》云：「凡郡國歲盡，遣吏上計。」漢法上計於歲盡，與周歲終羣吏致事同，故舉以為況。賈疏云：「漢之朝集使謂之上計吏，謂上一年計會文書及功狀也。」丁晏云：「《漢書·武帝紀》『受計於甘泉』，師古曰：『受郡國所上計簿也。若今之諸州計帳。』詒讓案：《左》昭二十五年傳云「臧會為邱賈正，計于季氏」。杜注云：「送計簿於季氏。」《晏子春秋·外篇》云：「晏子治東阿上計。」又《淮南子·人間訓》說魏文侯時，解扁為東封，上計而入三倍。是周時已有上計之名，漢亦沿周法也。正歲，帥治官之屬而觀治象之灋，徇以木鐸，曰：「不用灋者，國有常刑。」正歲，謂夏之正

月。得四時之正，以出教令者，審也。古者將有新令，必奮木鐸以警衆，使明聽也。木鐸，木舌也。文事奮木鐸，武事奮金鐸。【疏】「正歲帥治官之屬而觀治象之灋」者，亦書縣而觀之。經不言縣者，以《大宰》正月縣治象已詳，可以互推也。此小宰正歲縣治象，使治官觀，與大宰正月縣治象使萬民觀者爲二事。鄭《大宰》注并「一者爲一，云：『大宰以正月朔日，布王治之事於天下。至正歲，又書而縣於象魏，使萬民觀焉。小宰亦帥其屬而往。』其說非也。又案：依鄭說，此治象即縣於象魏。竊謂萬民所觀於象魏者，以其人衆，且庶民不得入王之中門也。此百官所觀，似不宜與彼同處，疑當縣於治朝旁大宰治事之舍，即《匠人》之九室是也。小司徒縣教法，小司徒寇縣刑法，蓋亦當各就司徒司寇治事之舍。互詳《大宰》、《小司徒》疏。云「徇以木鐸」者，《說文·彳部》云：「徇，行示也。《司馬法》斬以徇。」徇即徇之俗。云「曰不用灋者，國有常刑」者，誓以不用治法之刑。常刑謂官刑之常典也。《大司徒》賈疏云：「常刑者，謂二千五百條，各依輕重而受刑法。」注云「正歲謂夏之正月，得四時之正，以出教令者，審也」者，全經凡言正歲者，並爲夏正建寅之月，別於凡言正月者爲周正建子之月也。《爾雅·釋天》云：「夏曰歲，商曰祀，周曰

年。《左傳》昭七年孔疏引孫炎云：「四時一終曰歲，取歲星行一次也。」《周書·周月篇》云：「萬物春生、夏長、秋收、冬藏，天地之正，四時之極，不易之道。夏數得天，百王所同。其在商湯，用師于夏，順時革命，改正朔，以建丑之月爲正。亦越我周王致伐于商，改正異械，以垂三統。至於敬授民時，巡狩祭享，猶自夏焉。是謂周月，以紀于政。」是周雖建子，亦兼存夏正之事也。王引之云：「《爾雅》曰：『正，長也。』建寅之月，爲一歲十二月之長，故謂之正歲，猶月之朔日爲一月三十日之始，而稱朔月也。」云「古者將有新令，必奮木鐸以警衆，使明聽也」者，木鐸有聲，故振奮以警衆。《明堂位》云「振木鐸於朝，天子之政也」。注云：「天子將發號令，必以木鐸警衆。」《論語·八佾》集解引孔安國云：「木鐸，施政教時所振也。」賈疏云：「《案》禮記·檀弓》云：『自寢門至於庫門，振木鐸，曰：舍故而諱新。』彼及此文，是有命奮木鐸警衆使明聽之事也。」^①案：依鄭、賈說，此觀治象當在庫門內，徇木鐸疑亦當自寢門以至皋門。寢門外爲治朝，庫門外皋門內爲外朝，與《明堂位》所說亦正合。云「木鐸，木舌也」者，《鼓人》注云：「鐸，

① 「明」，原作「民」，今據《周禮注疏》改。

大鈴也。《呂氏春秋·仲春紀》高注云：「鐸，大鈴也。金口木舌爲木鐸，金舌爲金鐸。」《北堂書鈔·武功部》引《三禮圖》云：「鐸，今之鈴，其匡銅爲之，木舌爲木鐸，金舌爲金鐸也。」揚子《法言·學行篇》云：「如將復駕其所說，則莫若使諸儒金口而木舌，即謂木鐸也。」云「文事奮木鐸」者，此職之治象，《小司徒》之教法，《宮正》、《司烜氏》之火禁，《鄉師》之四時徵令，《小司寇》之刑象，《士師》之五禁，皆以木鐸徇之。又《檀弓》令舍故諱新，《月令》仲春「先雷三日奮木鐸以令兆民」，《左》襄十四年傳及僞古文《書·胤征》「正月孟春，道人以木鐸徇于路」，皆所謂文事也。《書》僞孔傳云：「木鐸，金鈴木舌，所以振文教。」云「武事奮金鐸」者，《吳子·治兵篇》云：「夫鼙鼓金鐸，所以威耳。」賈疏云：「《鼓人》云『金鐸通鼓』，《大司馬》云『兩司馬振鐸』是也。」乃退，以官刑憲禁于王宮。憲謂表縣之，若今新有法令云。【疏】「乃退，以官刑憲禁于王宮」者，謂與觀治象徇木鐸同日，徇行既畢而退，遂憲刑禁，禁即前云王宮之糾禁是也。此蓋不兼后宮，《內宰》云「憲令于王之北宮」，是后宮內宰憲禁。此官所憲者，蓋自王六寢以外，五門三朝之地通憲之，與內宰內外職掌互相備也。注云

「憲謂表縣之」者，《小司徒》、《胥師》、《小司寇》、《布憲》注義

竝同。《荀子·勸學篇》云「不道禮憲」，楊注云：「憲，標表也。」凡禁令欲衆共知，則書而表縣之。士師掌五禁，亦云「書而縣于門閭」，即所謂憲也。《列女傳·辯通篇》云：「齊景公有所愛槐，使人守之，植木懸之，下令曰：犯槐者刑，傷槐者死。」此憲禁，蓋亦書刑禁於木，表縣之。全經凡云憲者，如《小司徒》之「憲禁令」，《司市》之「憲罰」，《胥師》、《小司寇》布憲之「憲刑禁」，《朝士》故書之「憲刑貶」，義並同。《士師》說官禁等云「皆以木鐸徇之于朝，書而縣于門閭」。此憲官刑與彼事相類，蓋書而縣之，自寢門以至於皋門，與徇木鐸同也。賈疏云：「凡刑禁皆出秋官。今云憲禁者，與布憲義同，故小宰得秋官刑禁文書，表而縣之於宮內也。」云「若今新有法令云」者，漢時新有法令，亦必表縣之，使衆共見，故舉以爲況。令于百官府曰：

「各脩乃職，攷乃灋，待乃事，以聽王命。其有不共，則國有大刑。」乃猶女也。【疏】「令于百官

府」者，此亦冢上正歲爲文，百官府通內外言之，不徒宮中也。此官分就各官府一一戒敕之，與觀治象時總於觀象之處徇戒者異。又案地官觀教象之令在《小司徒》，與此同。而正歲令教官則在《大司徒》，與此兩令同在小宰異者，以

大宰總六官，職重事繁，故治官之戒令，皆小宰掌之；教官事簡，故正貳分掌之，其事異也。云「曰各脩乃職，攷乃灋，待乃事，以聽王命」者，以下並戒令之辭。徐榦《中論·譴交篇》引此文，「待」作「備」，亦通。職法即《大宰》之官職官法，事謂當職之事也。云「其有不共，則國有大刑」者，謂職事有不共舉者，則有刑。《大司寇》五刑，四曰官刑，上能糾職，即糾其不共也。大刑，謂常刑之大者。《明堂位》魯禘誓戒云「百官廢職，服大刑」，注云：「大刑，重罪也。」《書·費誓》誓師亦云「有常刑、大刑」，僞孔傳以大刑爲死刑，是也。《大司徒》令教官云常刑，與前觀治象及《小司徒》觀教象、《小司寇》觀刑象之令同。此云大刑者，以治官所掌尤重，故特警之。《職方氏》王將巡守，戒於四方，亦云「國有大刑」，與此正同。注云「乃猶女也」者，《職方氏》注同。《小爾雅·廣詁》云：「乃，汝也。」女汝古今字。

周禮正義卷六

宰夫之職，掌治朝之灋，以正王及三公、六卿、大夫、羣吏之位，掌其禁令。治朝，在路門之外。其位，司士掌焉，宰夫察其不如儀。【疏】

「掌治朝之灋，以正王及三公、六卿、大夫、羣吏之位」者，此司王之正朝，與射人、司士爲官聯也。三公謂大師、大傅、大保。六卿卽六官之正。大夫通中下言之。三公，詳《地官·敘官》疏。注云「治朝，在路門之外」者，《大宰》注

義同。云「其位司士掌焉」者，賈疏云：「案《司士》云：『正朝儀之位，辨其貴賤之等。王南鄉，三公北面東上，孤東面北上，卿大夫西面北上。王族故士、虎士在路門之右，南面東上，大僕、大右、大僕從者在路門之左，南面西上。』此羣吏卽羣士，是其位也。」吳廷華云：「此羣吏當合上中下士及故士等言之。《司士》注約《燕禮》士東面，則士位附於孤後也。」案：吳說是也。此羣吏專指命士以下言之。《朝士》外朝之位，羣士之外，又有羣吏，則羣吏與羣士異。此

以羣士爲羣吏者，對文則異，散文得通也。《大宰》八統七曰達吏，注釋爲小吏，此羣吏蓋卽衆小吏矣。云「宰夫察其不如儀」者，謂察其位次舛誤及如《朝士》掌外朝禁慢朝、錯立、族談者之類。敘羣吏之治，以待賓客之令，

諸臣之復，萬民之逆。恒次敘諸吏之職事。三者之來，則應使辨理之。鄭司農云：「復，請也。逆，迎受王命者。宰夫主諸臣萬民之復逆，故詩人重之曰『家伯維宰』。」玄謂復之言報也，反也。反報於王，謂於朝廷奏事。自下而上曰逆，逆謂上書。【疏】「敘羣吏之治」者，此冢上經爲文，則羣吏亦當專指命士以下言之，與《大宰》「大計羣吏之治」、《小宰》「弊羣吏之治」，義蓋小異也。云「以待賓客之令」者，此謂朝聘賓客之治令，猶《大宰》云「待四方賓客之小治」也。《掌訝》云：「凡賓客之治令訝，訝治之。」注云：

「賓客之治，謂欲正其貢賦，理國事也。以告訝，訝爲如朝而理之。」此令卽謂以事令訝，而訝爲達於朝者，則此官聽而治之也。此蓋賓客之小治，不必達於王者。其大治，則《大僕》諸侯之復逆，非此官所掌也。賈疏謂「賓客之令，謂若大宗伯朝覲會同則爲上相，《肆師》云『大朝覲佐儋』及大小行人、掌客、掌訝、委人、遣人之屬，皆是待賓客之官，使

辨理之」。非經義也。云「諸臣之復」者，賈疏云：「案《夏官·小臣職》云『掌三公及孤卿之復逆』。復逆並掌之。此不言逆者，但宰夫直次之，不掌事，故於文略也。又案《夏官·大僕職》云『掌諸侯之復逆』。此諸臣中兼之。此宰夫恒敘大僕、小臣等辨理此復逆之事也。」案：賈說非也。此諸臣，亦當謂命士以下，與御僕所掌羣吏之逆略同。三公六卿及諸侯之復逆，皆大僕、小臣掌之，王與冢宰聽之，非此官所職也。云「萬民之逆」者，賈疏云：「案《夏官·御僕職》『掌羣吏庶民之復逆』。彼羣吏，與此經羣吏爲羣臣別，故鄭彼注『羣吏，府史以下』。此不言羣吏及復，亦是文略也。此宰夫次敘御僕，使辨理府史萬民復逆也。」案：賈說亦非也。此羣吏專屬命士以下，《御僕》之「羣吏」則通大夫士言之。二經義不甚同，而皆非府史，詳《御僕》疏。

注云「恒次敘諸吏之職事，三者之來，則應使辨理之」者，敘，注例用今字，當作「序」，詳《小宰》疏。《鄉師》注云：「敘猶次也。」鄭以治卽職事，謂次序羣吏之班秩尊卑，使各自脩其職事也。賈疏云：「此宰夫次敘羣吏諸臣等之治職，卽以待賓客以下三事，使之應答，不闕於事也。」鄭司農云「復，請也」者，《廣雅·釋詁》云：「告、復、白，語也。」《爾雅·釋詁》云：「請，告也。」案：復請並謂以言語告白於

上。《曲禮》云：「小閒，願有復也。」後鄭注亦云「復，白也」。《大戴禮記·曾子立事篇》云「承閒觀色而復之」，《國語·齊語》云「正月之朝，鄉長復事」，《孟子·梁惠王篇》云「有復於王者」，是諸經凡言復者，率爲告白之義。先秦諸子中以告爲復者，尤不可枚數。《訝士》云「人復」，後鄭注云：「人告王以客至也。」彼訓復爲告，猶先鄭此注訓爲請也。又後鄭此後注及先鄭《大僕》注，並以復爲奏事，彼此互校，知二鄭復字訓義本同。賈疏謂復是報白之義，不得爲請，故後鄭不從，非。云「逆，迎受王命者」者，《小宰》注云：「逆，迎受之。」《聘禮》云「宰命司馬戒衆介，衆介皆逆命不辭」，注云：「逆猶受也。」《左》昭二十五年傳「有司逆命」，杜注云：「欲迎受殺生之命。」故先鄭以迎受王命爲逆。但此經逆與復互文，並爲告請之事，與《聘禮》、《左傳》義實不同，故後鄭亦不從。云「宰夫主諸臣萬民之復逆，故詩人重之，曰家伯維宰」者，維，疑當作「惟」，詳《夏官·敘官·趣馬》疏。此《詩·小雅·十月之交》文。鄭彼箋云：「家伯，字。」冢宰，掌建邦之六典，卿也。賈疏云：「知彼宰非大宰而當此宰夫者，維宰在司徒下，膳夫上，故知是宰

①「字」，原誤作「氏」，今據《毛詩》箋改。

夫也。此先鄭以官次第當宰夫。案鄭彼注「冢宰掌建邦之六典，^①皆卿也」。不從司農者，諸經單稱宰者，皆大宰。若宰夫，無單言宰者，故爲大宰解之。若然，大宰在司徒下者，彼以權寵爲次，不以尊卑。故內史中大夫在膳夫上士之下，師氏中大夫在趣馬下士之下。」案：賈說非也。《漢書·古今人表》有大宰家伯，此即後鄭《詩箋》所本。《春秋》桓四年「天王使宰渠伯糾來聘」，《公羊傳》云：「其稱宰渠伯糾何？下大夫也。」案：大宰屬下大夫，則宰夫也，是宰夫自可單稱宰矣。《詩》孔疏引王肅說，又以宰爲小宰，與班及二鄭義竝異，疑不足據。云「玄謂復之言報也，反也」者，此增成先鄭義也。《公羊》隱三年傳：「與夷復曰：先君之所爲不與臣國而納國乎君者，以君可以爲社稷宗廟主也。」何注云：「復，報也。」又《毛詩·小雅·我行其野》傳云：「復，反也。」是復兼報反二義。云「反報於王，謂於朝廷奏事」者，《大僕》先鄭注云「復謂奏事」，與此義同。後鄭意此復，直謂在朝廷親以事奏白於王，以其取報白反復之義，故謂之復。《大司寇》云：「凡遠近惇獨老幼之欲有復於上，而其長弗達者，士聽其辭，以告於上，而罪其長。」後鄭云：「復猶報也。報之者，若上書詣公府言事矣。」彼注亦訓復爲報，而特以上書言事爲況，足證此注義。賈疏

謂「羣臣受王命，使臣行之，訖，反報於王」，則鄭本無是義。凡受命行事訖而反報，《都宗人》、《家宗人》、《隸僕》直謂之反命，並不云復。疏說與經注，並不合也。云「自下而上曰逆，逆謂上書」者，破先鄭逆爲迎受王命。上書者，謂上書言事於王也。上書與奏事，事亦略同。蓋後鄭意復逆義本互通，但諸臣於王親近，故以爲於朝廷奏事；萬民於王疏遠，或不得於朝廷奏事，故但以上書爲說。此乃隨文異訓，實則復亦可訓爲上書，逆亦可訓爲奏事。《大司寇》注以上書言事，解惇獨老幼之復，亦其證矣。賈疏云：「謂自上而下曰順，故自下而上曰逆也。言上書者，則今之上表也。若然，據《夏官》諸侯諸臣萬民皆復逆並有，則此亦皆有上書奏事耳。司農於此注，復爲請，逆爲迎受王命，後鄭不從。及至《夏官·大僕》先鄭注云「復爲奏事，逆謂受下奏」，即與後鄭義同，故彼後鄭從之。若然，是先鄭兩解也。案《內豎》云「掌外內之通令，凡小事」。鄭注云：「內，后六宮。外，卿大夫也。使童豎通王內外之命，給小事者，以其無與爲禮，出入便疾。內外以大事聞王，則大事俟朝而自復。」若然，何須更有小臣等復逆乎？然王者一日萬機，或

①「邦」原脫，據《周禮注疏》補。

有俟朝自復，有大事急促不得待朝，即須非時通傳，使聞徹在上者也。」俞樾云：「大僕掌諸侯之復逆，小臣掌三公及孤卿之復逆，皆以復逆連文。《御僕》云羣吏之逆，庶民之復；此云諸臣之復，萬民之逆；蓋互言之，非謂諸臣有復而無逆，萬民有逆而無復也。」案：賈謂此諸臣萬民皆有上書奏事，俞說亦同，並是也。但先鄭《大僕》注訓復爲奏事，與此訓爲請同，賈謂其兩解，則非。至逆訓受下奏，與此注迎受王命之說同誤，後鄭彼注偶失刊正，實則彼職復逆連舉，與此互文義不異也。掌百官府之徵令，辨其

八職：一曰正，掌官灋以治要；二曰師，掌官成以治凡；三曰司，掌官灋以治目；四曰旅，掌官常以治數；五曰府，掌官契以治藏；六曰史，掌官書以贊治；七曰胥，掌官敍以治敍；八曰徒，掌官令以徵令。別異諸官之八職，以備王之徵召所爲。正，辟於治官，則冢宰也。治要，若歲計也。師，辟小宰、宰夫也。治凡，若月計也。司，辟上士、中士。治目，若今日計也。旅，辟下士也。治數，每事多少異也。治藏，藏文書及器物。贊治，若今起文書草也。治敍，次序官中，如今侍曹伍伯傳吏朝也。徵令，趨

走給召呼。【疏】「一曰正，掌官灋以治要」者，正與司皆掌官法者，長屬咸有當官之法，正則總建之，司則分治之，詳略雖異，而其爲法則同。官法、官成、官常，即《大宰》八法之三也。云「五曰府，掌官契以治藏」者，官契，即《小宰》八成之書契也。並詳《大宰》、《小宰》疏。莊存與云：「以上宰夫正職，下皆攷二宰之事也。」注云「別異諸官之八職，以備王之徵召所爲」者，《敍官》注云：「辨，別也。」賈疏云：「自正已下爲八職，皆備王召呼，則正亦備王召呼及所爲也。」詒讓案：此徵令當爲宣布政治，亦通咳興發屬斂諸事，令即命令也。鄭以王之徵召所爲爲釋，義未備，詳後。

云「正，辟於治官，則冢宰也」者，《釋文》云：「辟，本亦作譬，下皆同。」案：辟譬字通。鄭意此正爲各官之長，與《大宰》「建其正」略同。但百官府各自有當職之長，通謂之正，不可偏舉，故唯舉大宰以相況。以其長屬自相帥領，不必與爵秩尊卑之次相當，故爲譬況之詞矣。云「治要，若歲計也」者，要計對文則異，散文則通，謂都計諸凡之總簿書也。惠士奇云：「要、凡、目三者，皆數也。數分爲目，目最爲凡，凡合爲要，皆謂之數。《管子·君臣》曰：『君發其明府之法瑞以稽之，立三階之上，南面而受要。』八職首曰要，即此。《荀子》曰：『官人失要則死。』州里役要，邦國比要，皆

名爲要。《周官》之要在六官，六官之要在天官，是故冢宰治之，司會攷之，天子齋戒受之。有要而後有凡，有凡而後有目，有目而後有數。尊者治約，卑者治詳。」賈疏云：「案下文，歲終云會，月終云要，旬終云成。此歲云要者，但六卿下云要，不云會，以要當會處，故以治要爲歲計也。」云「師，辟小宰宰夫也」者，此亦約舉大宰屬官爲譬況也。賈疏云：「以下文四曰旅，是下士諸官皆名旅。其下士之上有上士、中士，向上差次，當三曰司。上士之上，向上差次，有小宰、宰夫，故知二曰師，當小宰、宰夫也。言辟者，亦是六卿之下皆有此二者，若司徒之下小司徒、鄉師之類，故亦言辟也。」王引之云：「宰夫掌敍羣吏之治，正也，師也，司也，旅也，皆羣吏之待徵令者。正非必六官之長，師非必六官之貳，與《大宰職》所云「建其正，立其貳」者不同。彼專指六官之長與貳，此則汎指百官府言之，謂百官府各有正、師、司、旅也。《大射儀》有小臣正、小臣師，鄭注曰：「小臣師，正之佐也。正，長也。」又有僕人正、僕人師，注曰：「僕人正，僕人之長，師其佐也。」又有司馬正、司馬師，注曰：「司馬正，政官之屬。師，正之佐也。」成十八年《左傳》說晉悼公命百官，有卿、有公族大夫、有大傅、有司空、有六官之長，中軍有尉、有佐、有司馬、有候奄，上軍有尉、有司馬，校

正屬御戎，司士屬右，六驍屬乘馬御，而統言之曰「師不陵正，旅不偪師」。則所謂正者，非專指六官之長而言。如中軍尉其下有佐、有司馬，上軍尉其下有司馬，則尉即是正。御戎、乘馬御及右，各有其屬，則皆正也。屬於正者，卽師旅也。襄二十五年傳曰「六正、五吏、三十帥、三軍之大夫、百官之正長、師旅」。六正已是六卿，則正長非卿可知，故杜注曰「百官正長，羣有司也」。正長爲有司，則師旅可知。《周語》「稷徧戒百姓，紀農協功。乃命其旅曰：徇，農師一之，農正再之，后稷三之」。韋注曰：「農師，上士也。農正，后稷之佐田畯也，故次農師。后稷，農官之君也，故次農正。」然則農正之位卑於后稷，其非命卿可知。農師又卑於農正，其旅又卑於農師。《周語》又曰：「至於王吏，則皆官正莅事，上卿監之。」是官正非上卿也。《楚語》曰：「天子之貴也，唯其以公侯爲官正，而以伯子男爲師旅。」言公侯伯子男，譬若百官之正長師旅，爲天子之羣吏也。《多方》曰：「越惟有胥伯小大多正。」然則正固有小者。《王制》「史以獄成告於正」，鄭注曰：「正，於周，鄉師之屬。」《左傳》有卜正、工正、候正、校正、隧正、四鄉正、馬正、陶正、令正、五工正、九農正、賈正、車正、牧正、庖正，是官之小者亦得名爲正也。《周官》以正名者，黨正但爲下大夫，

《鄉大夫職》謂之羣吏。其他官正、酒正，則以士爲之。推而至於百官府，皆名有正。故《酒誥》稱「庶士有正」，《大雅》稱「鞠哉庶正」，不必六官之長而後爲正也。師則屬於正者，故《左傳》曰「師不陵正」。《祭法》曰「適士二廟，官師一廟」。鄭注曰「官師，中士、下士」。不必六官之貳而後爲師也。」案：王說甚覈，與鄭義足互相備。此正與大宰之正異，師旅與《夏官·序官》之師旅亦異。正固兼有大小，師亦通於尊卑。如《書·盤庚》云「邦伯師長百執事之人」。僞孔傳云「師長，公卿」。是公卿爲師也。《國語·魯語》云「日中考政，與百官之政事師尹，維旅牧相，宣序民事」。韋注引賈逵、唐固、虞翻云「師尹，大夫官也」。又《楚語》云「自卿以下，至於師長士」。注云「師長，大夫」。是大夫亦爲師也。《墨子·尚同篇》引相年之道云「夫建國設都，乃作后王君公、卿大夫、師長」。是師長降於大夫，則又賅元士以下矣。但鄭約舉大宰當職官屬相譬況，則大宰爲正，小宰、宰夫爲師，上、中士爲司，下士爲旅。約略比擬，等差如是。非謂正必六卿，師必中下大夫，司旅必士也。云「治凡，若月計也」者，謂都計諸目之總簿書也。《庖人》注云：「凡，計數之。」《管子·幼官篇》云「計凡付終」，尹注云：「凡謂都數也。」賈疏云：「上要既當歲會，故治凡當月計曰

要之處也。」云「司，辟上士、中士」者，此亦約大宰屬官之上中士爲譬況也。司與師亦通稱，若司市稱市師，亦稱市司是也。云「治目，若今日計也」者，謂都計諸數之總簿書也。目詳於凡，故《公羊》僖五年傳云：「一事而再見者，前目而後凡也。」《春秋繁露·深察名號篇》云：「號凡而略，名詳而目。目者，徧辨其事也；凡者，獨舉其大也。」賈疏云：「從治要向下以次差之，此治目當日計曰成之處，故云今日計也。」案：注例凡言今者，皆舉漢制爲況。日成見下文，不當云今。上「治要」「治凡」注亦無「今」字，疑涉下「贊治」注而誤衍，賈所據本已然。云「旅，辟下士也」者，此亦約舉大宰屬官爲譬況也。《敍官》「大宰旅下士三十有二人」，注云「下士，治衆事者」是也。云「治數每事多少異也」者，《量人》注云：「數，多少也。自要以下，以次遞詳，至數而纖悉畢備，故云每事多少異也。云「治藏，藏文書及器物」者，《說文·艸部》新附云：「藏，匿也。」案：正字當作臧，藏卽臧之俗。《一切經音義》引《三倉》云：「府，文書財物藏也。」云「贊治，若今起文書草也」者，《續漢書·百官志》云：「尚書侍郎，主作文書起草。」鄭以史掌官書，故以起文書草爲釋。御史掌贊書，注亦云「若今尚書作詔文」。賈疏云：「起文書草，乃後判決，是爲贊治之法，故稱贊治也。」

云「治敍，次序官中」者，敍，疑亦當作「序」，凡注例用今字，雖複述經文，亦不用古字，詳《小宰》疏。《小宰》「六敍」注云：「敍，秩次也。」賈疏云：「既有才智，爲什長，當次序官中，須人驅役之處，則科次其徒，故云次序官中也。」云「如今侍曹伍伯傳吏朝也」者，賈疏云：「漢時五人爲伍。伯，長也，是五人之長。言傳吏朝者，傳在朝羣吏諸官事務於朝也。胥爲什長亦然。故舉漢法況之也。」孔廣森云：「《後漢書·宦者曹節傳》越騎營五百」，注曰：「今俗呼行杖人爲五百也。」《宋書·百官志》云：「舊說，古君行師從，卿行旅從。旅，五百人也。今縣令以上，古之諸侯，故立五百，以象師從旅從，依古義也。韋昭云：「五百字本爲伍伯。伍，當也。伯，道也。使之導引當道伯中以驅除也。」周制，五百爲旅，帥皆大夫，不得卑之如此說。」依韋訓，伯讀爲陌。依疏如字讀之。《司服》注曰：「今時伍伯緹衣，古兵服之遺色。」侍曹謂伍伯當日者，《文王世子》注云「如今小史直日」。陳遵爲公府掾史，曹事數廢，西曹以故事適之。侍曹輒詣寺舍白遵。是侍曹之法，有事當傳告也。」案：孔說是也。賈釋伍伯，本崔豹《古今注》義。《三國志·杜瓊傳》云：「自漢以來，名官盡言曹，吏言屬曹，卒言侍曹。」是侍曹即隨侍曹吏之卒也。鄭言此者，以傳吏朝與

次序官中事相類，故舉以爲證，非況胥爲什長，賈說失之。云「徵令趨走給招呼」者，《司市》注云：「徵，召也。」若《典祀》云「徵役于司隸而役之」，《大胥》云「以鼓徵學士」，皆招呼之事。黃以周云：「注趨走釋徒，招呼釋徵令，謂徒者徵召教令者也。」惠士奇云：「徵令者，傳令也。」韓非·難一曰：「當世之行事，都丞之下徵令者，不辟尊貴，不就卑賤。」然則戰國徵令以都丞，猶周之徒也。」論讓案：經凡言徵者有二：一爲徵召，若《典祀》、《大胥》二職所云是也。一爲徵斂，若《載師》云「以時徵其賦」，《掌茶》云「徵野疏材之物」是也。《掌炭》云「掌灰物、炭物之徵令」，亦專據徵斂言之。至《司書》云「以逆羣吏之徵令」，《小司徒》云「以行徵令」，《鄉師》云「凡四時之徵令有常者，以木鐸徇于市朝」，《閭胥》云「各掌其閭之徵令」，則皆通舉宣布政治之事，而徵召徵斂二義，自該於其中。此經上云「掌百官府之徵令」，亦與《小司徒》諸職同爲總舉之文，而徒掌官令以徵令，則自爲徵召教令。鄭此注義不誤，而釋前百官府之徵令亦爲招呼，則非也。掌治灋以攷百官府、羣都縣鄙之治，乘其財用之出入。凡失財用、物辟名者，以官刑詔冢宰而誅之。其足用、長

財、善物者，賞之。羣都，諸采邑也。六遂五百家爲鄙，五鄙爲縣。言縣鄙而六鄉州黨亦存焉。乘猶計也。財，泉穀也。用，貨賄也。物，畜獸也。辟名，詐爲書，以空作見，文書與實不相應也。官刑，在《司寇》五刑第四者。

【疏】掌治灋，以攷百官府羣都縣鄙之治者，此與司會、天府爲官聯也。賈疏云：「宰夫是句考之官，故以治法考百官及羣都縣鄙鄉遂之內治功善惡也。」案：羣都縣鄙謂采邑之都鄙及公邑之縣鄙，鄭、賈以縣鄙爲鄉遂，非也。此內舉官府，外舉采邑公邑，以該郊野鄉遂，明畿內之治，此官通攷之。《司會》云：「掌國之官府郊野縣都之百物財用，凡在書契版圖者之貳，以逆羣吏之治，而聽其會計。」《大府》、《職內》、《職歲》、《職幣》，並有官府都鄙之文。《天府》云：「凡官府鄉州及都鄙之治中受而藏之，以詔王察羣吏之治。」此云「羣都縣鄙」，《司會》云「郊野縣都」，《天府》云「鄉州都鄙」，《大府》諸職則唯云「都鄙」，並詳略互見，文不具也。云「乘其財用之出入者」，謂以書契版圖及月要歲會，通計其財用出入之凡數也。云「凡失財用、物辟名者，以官刑詔冢宰而誅之」者，凡治財用物不如法，則有損乏鹽惡之弊，故以詔告冢宰誅之。大司寇官刑上能糾職，此卽糾其職之不舉，黜其官爵，復加以刑罰也。云「其足用、長

財、善物者，賞之」者，賞謂增其祿秩。江永云：「足用謂度支有方而用不匱，長財謂經理有法而財自生，善物如牧養肥充、制作精良之類，此皆能稱職者，故賞之。」注云

「羣都，諸采邑也」者，《大宰》注云「都鄙，公卿大夫之采邑，王子弟所食邑」是也。賈疏云：「謂大都、小都、家邑三處也。」云「六遂，五百家爲鄙，五鄙爲縣」者，據《遂人》「五鄙爲鄙，五鄙爲縣」。云「言縣鄙而六鄉州黨亦存焉」者，鄭意經縣鄙卽六遂之屬別。《大司徒》六鄉之制，五百家爲黨，五黨爲州，與六遂縣鄙相當。經舉縣鄙以該州黨，明鄉遂之治宰夫通考之也。王安石云：「縣者，縣師所掌之縣也。」王昭禹說同。姜兆錫云：「羣都縣鄙，猶《司士》言都家縣鄙，謂采邑及凡公邑也。」案：王、姜說是也。經言縣鄙者凡六：此職云「以考百官府、羣都縣鄙之治」，《遂人》云「造縣鄙形體之灋」，《司常》云「州里建旗，縣鄙建旌」，《大司馬》云「縣鄙各以其名鄉以州名」，《司士》云「周知邦國都家縣鄙之數」，《朝士》云「則令邦國都家縣鄙慮刑貶」。鄭《司士》注云「縣鄙，鄉遂之屬」，義與此注同。而《司常》注則云「州里、縣鄙，鄉遂之官，互約言之」，《大司馬》注亦云「縣鄙謂縣正、鄙師至鄰長也」，則皆謂專指六遂之吏，不兼六鄉，與此及《朝士》注異。綜校諸文，《司常》之縣鄙與

州里並舉，《大司馬》之縣鄙與鄉州並舉，則縣鄙不得眡六鄉可知。蓋經凡言縣鄙者，惟《遂人》之縣鄙爲遂之屬別，此外如此及《司常》、《大司馬》、《司士》、《朝士》諸職，皆公邑也。縣即《縣師》、《縣士》之縣，爲四等公邑之通名。公邑所居謂之縣鄙，猶大小都所居謂之都鄙，非六遂五鄙之縣，五鄙之鄙。《左》昭二十年傳，晏子曰：「縣鄙之人，人從其政；偪介之關，暴征其私。」彼縣亦是公邑，故必由偪介之關而入共征役，與此經義可互證。鄭賈說並失之。此職及《司士》、《朝士》皆舉都家公邑而不及鄉遂者，舉外以包內耳。互詳《司常》、《大司馬》疏。云「乘猶計也」者，《稟人》「乘其事」注義同。《說文·桀部》云：「桀，覆也。」隸變爲乘。乘本訓覆，段借爲計數之義。賈疏云：「計者，算法乘除之名出於此也。」云「財，泉穀也」者，《大宰》注同。云「用，貨賄也」者，賈疏云：「案《內府》云「掌受九貢、九賦、九功之貨賄，以待邦之大用。」故知用中有貨賄也。」云「物，畜獸也」者，謂《庖人》六畜六獸之屬，若牛馬之等，亦動物之種別也。案：此物即《小宰》、《外府》、《司會》、《司書》之百物，當通眡動植器械之屬，凡周於民之食用者皆是，不徒畜獸也。注說似未眡，詳《外府》、《司會》疏。云「辟名，詐爲書，以空作見，文書與實不相應也」者，《呂氏春秋·處方

篇》高注云：「辟，邪也。」《賈子新書·道術篇》云：「襲常緣道謂之道，反道爲辟。」蓋辟者差戾之言。以空作見，即《漢書·食貨志》所謂多張空簿，府臧不實。若是，則財用物等與實差戾不相應，故謂之辟名。《釋文》引干注云「辟，不當也」，與鄭義略同。賈疏云：「其人失財用物者，則詐爲文書，以空物作見在，文書與實物不相應，是罪人也。」案：鄭、賈以「辟名」通冢財、用、物三者爲文，亦未塙。竊謂此文當讀「凡失財用」爲句，「物」屬下「辟名者」爲句。此經凡掌械器、膳服、畜獸諸官，多云辨其名物。蓋異物則異名，名與物必相應。若以鹽爲良，以惡爲美，則物與名違舛不相應，所謂物辟名也。財失則不長，用失則不足，物辟名則不善，上下文正相對。自鄭、賈以來，並失其句讀，而義亦晦矣。云「官刑在《司寇》五刑第四者」者，與《大宰》八法七曰官刑同。以式灋掌祭祀之戒具與其薦羞，從大宰而眡滌濯。薦，脯醢也。羞，庶羞、內羞。【疏】「以式灋掌祭祀之戒具與其薦羞」者，式灋即《大宰》九式祭祀之式是也。《小宰》注云：「法謂其禮法也。戒具，戒官有事者所當共。」《大宰》云：「祀五帝，則掌百官之誓戒與其具脩。前期十日，帥執事而卜日，遂戒。祀大神

而亦如之，享先王亦如之。」此戒與彼事同，蓋前祭十日，大宰則戒齊，宰夫則戒具及薦羞也。云「從大宰而祗滌濯」者，賈疏云：「上《大宰職》已云『祀五帝祗滌濯』，此宰夫又從大宰而祗之也。」詒讓案：此即《小宰》六屬所謂大事則從其長也。凡大祭祀，祗滌濯在祭前一日之夕，詳《大宰》疏。《大射儀》云「前射三日，宰夫戒宰及司馬」。彼諸侯大射，亦宰夫掌戒，天子禮當亦然。此不云射者，文不具也。

注云「薦，脯醢也」者，《膳夫》云：「凡王之稍事，設薦脯醢。」《士昏禮》「贊者薦脯醢」，注云：「薦，進也。」《有司徹》云「宰夫自東房薦脯醢」。彼大夫禮，亦其象類也。賈疏云：「案《儀禮·鄉飲酒》、《鄉射》、《燕禮》諸單言薦者，皆是脯醢，故知此薦亦脯醢。」凌廷堪云：「凡獻酒皆有薦，禮盛者則設俎。《士冠禮》醴辭曰『嘉薦令芳』，注：『嘉，善也。善薦謂脯醢。』脯，籩實；醢，豆實。凡經所謂薦者，皆指脯醢也。」詒讓案：此以禮之恒例言之也。其祭祀禮盛者，則朝事饋食之豆籩謂之薦，《籩人》注云「未食未飲曰薦」是也。《籩人》二籩之實皆無脯，而脯自爲加籩之實，則又當爲羞矣。蓋薦與羞繫乎饌之正加。禮殺，則脯爲正，入薦內。禮盛者，則脯不入正籩而爲加，不拘一例也。云「羞，庶羞，內羞」者，《有司徹》云「宰夫羞房中之羞于戶、

侑、主人、主婦，皆右之。司士羞庶羞于戶、侑、主人、主婦，皆左之」。即宰夫主羞之事。鄭彼注云：「房中之羞，其籩則糗餌粉餐，^①其豆則醢食糝食。庶羞，羊臠豕臠，皆有載醢。房中之羞，內羞也。」案：庶羞，即腳臠臠及《籩人》、《醢人》之加豆籩。內羞，即羞豆籩也。《籩人》注云：「既食既飲曰羞。」以《禮經》攷之，《鄉飲酒》、《燕禮》、《鄉射》、《大射禮》，羞皆在獻後；《特牲》、《少牢饋食禮》，羞皆在尸飯後。蓋庶羞內羞爲加饌，故後設也。互詳《膳夫》、《庖人》、《籩人》、《醢人》疏。

凡禮事，贊小宰比官府之具。比，校次之。【疏】「凡禮事」者，禮，唐石經初刻作「祀」，磨改作「禮」。案：上云掌祭祀之戒具，此別云凡禮事，蓋廣咳衆行禮之事，石經初刻誤。云「贊小宰比官府之具」者，賈疏云：「上小宰於七事已言以法掌戒具，此宰夫贊小宰校次之，使知善惡足否也。」詒讓案：《聘禮》「宰書幣命宰夫官具」，注云：「命之使衆官具幣及所宜齎。」亦宰夫比官府之具之一端。注云「比，校次之」者，《大司馬》注義同。《大胥》注云：「比猶校也。」又《春官·世婦》

① 「粉」，原作「紛」，據《儀禮》鄭注改。

注云：①「比，次也。」是比兼校次二義，謂考校序次之。凡朝覲、會同、賓客，以牢禮之灋，掌其牢禮，委積、膳獻、飲食、賓賜之飧牽，與其陳數。牢禮之法，多少之差及其時也。三牲牛羊豕具，爲一牢。委積，謂牢米薪芻給賓客道用也。膳獻，禽羞俎獻也。飲食，燕饗也。鄭司農云：「飧，夕食也。《春秋傳》曰『飧有陪鼎』。牽牲，牢可牽而行者。《春秋傳》曰『餼牽竭矣』。玄謂飧，客始至所致禮。凡此禮陳數存可見者，唯有《行人》、《掌客》及《聘禮》、《公食大夫》。【疏】「凡朝覲、會同、賓客」者，通四時朝覲及大小會同賓客等而言。賈疏云：「上《大宰》云『大朝覲會同』，彼言大，謂朝覲爲會同而來。今此朝覲不言大，則朝覲自是四時常朝及會同，皆有賓客也。」案：賈說是也。但經云賓客，似亦當闊聘客言之。云「以牢禮之灋」者，凡待賓客之禮有牲牢者，若《大行人》云「成牢禮」是也。其法蓋在《大宰》九式賓客之式。而此官掌之以爲官法者，《荀子·王制篇》云「宰爵知賓客、祭祀、饗食、犧牲牢之數」是也。云「掌其牢禮、委積、膳獻、飲食、賓賜之飧牽與其陳數」者，此與大行人、掌客爲官聯也。賈疏云：「下別言委積之等，則此牢禮謂饗餼之禮。若然，

委積是賓未至時在道所設。《聘禮》云「聘日致饗」，則饗餼是朝日致之矣。今在委積上者，以饗餼是禮之大者，故先言之。且委積非直賓來時共之，賓去亦共之，在下亦其宜。若然，飧牢皆殺，而云飧牽者，以《掌客》云「積視飧牽」，據積而言之也。案：依鄭、賈義，上云以牢禮之法者，通下諸禮言之。此又云掌其牢禮者，《牛人》注云：「牢禮，飧饗也。」賈以下文別有飧，故唯以饗餼爲釋。《司儀》亦云「餼牢賜獻」，是牢禮猶言餼牢，理或然也。至《掌客》云「掌四方賓客之牢禮、餼獻、飲食之等數」，彼牢禮當賅積及飧，而餼別見，與此不同者，詳略互見，無定例也。經「賓賜之飧牽」，《釋文》云：「一本作『賓賜掌其飧牽』。干本同。」包慎言云：「此經注與疏，鄭本似無『賓賜之』三字。如有此三字，二鄭不應無一語及之。上陳牢禮之法，委積一也，膳獻二也，飲食三也，并飧牽而四，經文何以於「飧牽」上獨加「賓賜之」三字？經果變文以別飧牽於上三者，注當申釋其義。注無釋，即知經之本無此三字也。當由干本作「賓賜掌其飧牽」，傳寫臚入鄭本耳。」案：包說近是。依今本，則牢禮也，委積也，膳獻也，飲食也，賓賜也，五者總掌其飧

①「注」，原訛「主」，下爲《春官·世婦》鄭注，故改。

牽，似以飡爲熟食，牽爲生牢。五事者或飡牽兩有，或有飡無牽，或有牽無飡，故綜舉之也。依《釋文》別本，則飡牽自專冢賓賜爲文，不涉上四者之事，二義絕不同。諦繹經文，上既云掌其牢禮等，則下不得更以「賓賜掌其飡牽」爲更端之語，別本文義爲短。若如今本，則不徒「賓賜」二字鄭、賈並無釋，據鄭以膳獻爲禽羞俶獻，而《聘禮記》注謂禽羞俶獻卽《聘義》之時賜，《司儀》「客拜禮賜」，注又云「禮賜謂乘禽」，是賓賜已略於膳獻之中，經亦不必更見此文。況後鄭釋飡爲致飡，則自以飡牽與牢禮四者平列，既不以飡牽屬賓賜，亦不以爲總承上五事之文。以經注參互校之，鄭、賈本似無「賓賜之」三字。惜於古無徵，未敢專輒刪定也。

注云「牢禮之法，多少之差」者，此亦注用今字作「法」也。詳《大宰》疏。鄭以此云法，則是總舉多少之差，與下牢禮據致饗餼言者不同。其差數，則《大行人》、《掌客》所說五等諸侯隆殺之等是也。云「及其時也」者，謂其致之先後，皆有定時。賈疏云：「案《聘禮》云賓至，大夫帥至于館，卽言宰夫朝服設飡。又云聘日致饗，卽天子待諸侯亦然。其委積者，從來至去，在道而設之。並是時也。若然，此等之禮，並是掌客所主。今此復言之者，此宰夫雖非正職，以其主陳之，當知其數，故言之耳。」云「三牲牛羊豕具爲一牢」

者，《大行人》注義同。鄭《詩·小雅·瓠葉》序箋云：「繫養者曰牢。」《說文·牛部》云：「牢，閑養牛馬圈也。」凡牲必繫養於牢，故祭祀賓客之牲，並謂之牢。對文則三牲具曰大牢，二牲曰少牢，故《公羊》桓八年何注云「牛羊豕凡三牲曰大牢，羊豕曰少牢」。散文則通稱爲牢，《國語·晉語》韋注云「凡牲一爲特，二爲牢」。是二牲以上並得牢稱。知此牢禮必爲大牢者，據《聘禮》歸飡、歸饗餼並以一大牢爲一牢，故云牛羊豕具爲一牢也。云「委積，謂牢米薪芻，給賓客道用也」者，《大司徒》云「大賓客令道脩委積」，注云「少曰委，多曰積，皆所以給賓客」是也。賈疏云：「依《掌客》云『積視飡牽』，飡有芻薪及米，明委積在道所設亦有芻米薪蒸也。且《地官·遺人》云『十里有廬，廬有飲食；三十里有宿，宿有委；五十里有市，市有積』。是其委積給客道用也。」案：委積，詳《大司徒》疏。云「膳獻，禽羞俶獻也」者，賈疏云：「此《聘禮記》文。彼注云「禽羞，謂成熟有齊和者。俶獻，四時珍美新物也。俶，始也。言其始可獻也。《聘義》謂之時賜」是也。」詒讓案：鄭蓋謂積飡饗餼之外，別有膳羞之獻，不在常禮之數，《聘義》云「燕與時賜無數」是也。以其膳羞有和齊，故謂之膳獻。王安石以《掌客》說之云：「膳則殷膳大牢之屬是也，獻則上介有禽獻之

屬是也。」王昭禹、易拔、王氏《詳說》、李光坡、姜兆錫、方苞、莊有可、蔣載康說並同。案：王說較鄭尤備。《掌客》說諸侯相朝之禮，君殷膳及夫人膳，並以大牢。《牛人》亦云「積膳之牛」，則膳不徒指禽羞俶獻等可知矣。云「飲食，燕饗也」者，即《掌客》云上公三食三饗三燕，侯伯再食再饗再燕，子男壹食壹饗壹燕是也。《大宗伯》嘉禮云「以飲食之禮親宗族兄弟，以饗燕之禮親四方之賓客」。彼飲食與饗燕異，此注不別者，散文得通。且賓客之禮，以饗為最重，食燕次之，此經唯云飲食，明通咳饗燕矣。賈疏云：「鄭以燕饗解飲食，即是飲人燕饗中。不解經中食為食禮者，經中言食，則食禮自明。今云「飲食燕饗」者，欲見飲人燕禮，可知饗中又兼燕與食，以其饗有米有酒故也。」詒讓案：《聘禮》說禮賓，云宰夫徹几改筵，又實觶以醴，又薦籩豆脯醢。《公食大夫禮》云「凡宰夫之具饌于東房」，又宰夫設黍稷膳稻，則賓客飲食之禮，疑宰夫皆親其事，不徒掌其法數矣。鄭司農云「飧，夕食也」者，《說文·食部》云：「飧，鋪也。鋪，申時食也。」《孟子·滕文公篇》趙注云：「饗，熟食也。朝曰饗，夕曰飧。」黃以周云：「夕食為飧之本義。古人日食盛，夕餽之餘，於禮殺矣，故不備禮曰飧。飧牽之飧，自當以後鄭之為正。牽謂生牲，飧則無生

牲，且雖有腥，而以飪為先，其禮具見《聘禮》。鄭注云「飪，孰也」。又云「新至尚孰」。《毛詩》傳云「孰食曰飧」，義與鄭兩通。」案：黃說是也。析言之，則朝食曰饗，夕食曰飧；通言之，則凡熟食並曰饗飧。朝聘致饗飧，則為凡食物之通稱，飪腥兼備，不止熟食矣。惟其禮飧殺而饗盛，故《司儀》注云「小禮曰飧，大禮曰饗」。禮殺者取夕食以為名，禮盛者取朝食以為名，實則致禮本不限以朝夕。先鄭就本訓為說，於經義未切，故後鄭不從。引《春秋傳》曰「飧有陪鼎」者，《左》昭五年傳，楚薳啓疆曰「宴有好貨，飧有陪鼎」。杜注云：「熟食為飧。陪，加也。加鼎所以厚殷勤。」此引以證飧有熟食也。云「牽牲，牢可牽而行者」者，《掌客》先鄭注義同。後鄭彼注云：「牽，生牢也。」《聘禮》「餼二牢陳于門西，北面東上。牛以西羊豕，豕西牛羊豕」。注云「餼，生也。牛羊右手牽之，豕束之」是也。以其可食則謂之餼，以其可牽而行則謂之牽，其實一也。引《春秋傳》曰「餼牽竭矣」者，《左》僖三十三年傳，說鄭使皇武子辭秦客，云「吾子淹久於敝邑，唯是脯資餼牽竭矣」。杜注云：「資，糧也。生曰餼，牽謂牛羊豕。」《掌客》先鄭注亦引

①「右」，原作「在」，據《儀禮》鄭注改。

《左傳》此文，賈疏引舊注云「餼，死牢。牽，生牢」。《聘禮》疏引彼服虔注云「腥曰餼」。案：餼者，牲殺而腥致之也。對孰牢則曰腥，曰生，對生牢則曰死牢，其義通也。此引之者，證牲可牽行稱牽之義。云「玄謂餼客始至所致禮」者，《掌客》注義同。賈疏云：「此亦破先鄭。案《聘禮》，客始至，大夫帥至于館，宰夫朝服設餼，不待至夕也。」詒讓案：據《聘禮》，則諸侯亦宰夫掌餼，與王國同。江永云：「後鄭謂餼客始至所致禮，非也。此謂或有時賜之小禮餼牽耳。始至致餼，前言牢禮中已兼之。」案：江不從鄭者，以經云賓賜之餼牽耳。然經本不定，鄭本或無「賓賜之」文，則注說自可通。今兩存之。云「凡此禮陳數存可見者，唯有《行人》、《掌客》及《聘禮》、《公食大夫》者，賈疏云：「以《儀禮》三千條內，具有諸侯之禮，但亡滅者多。今存可見者，《周禮》之內有《大行人》、《掌客》，是待諸侯之禮。《儀禮》之內有《聘禮》、《公食大夫》，是待聘客之法。皆有陳數，考校可知也。」**凡邦之弔事，掌其戒令，與其幣器財用凡所共者。**弔事，弔諸侯、諸臣。幣，所用賻也。器，所致明器也。凡喪，始死弔而含襚，葬而賵贈，其間加恩厚，則有賻焉。《春秋》譏武氏子來求賻。

【疏】

「凡邦之弔事掌其戒令」者，賈疏云：「弔謂王使人弔諸侯，自弔諸臣。須從王行者，并有贈喪之具。百官當共，故宰夫摠戒令之。」注云「弔事，弔諸侯諸臣」者，明通賸外諸侯、畿內諸臣也。賈疏云：「案《大宗伯》云「以喪禮哀死亡」，《禮記·檀弓》曰「君臨臣喪，巫祝桃茢執戈，惡之也」，天子之禮，弔諸臣之法。《春秋左氏》「王使榮叔歸含且賵」，是有弔法，故云弔諸侯諸臣也。」《左傳》文五年孔疏引「何休《膏肓》云：『禮，尊不含卑。』鄭《箴》云：『禮，天子於二王後之喪，含爲先，襚次之，賵次之，賻次之。於諸侯，含之，賵之。小君，亦如之。於諸侯臣，襚之，賵之。諸侯相於，如天子於二王後，於卿大夫，如天子於諸侯；於士，如天子於諸侯臣。』」案：《裸記》疏引《釋廢疾》說同。依鄭說，則王於諸侯之妻及臣，亦有哀弔之法。其於王臣、三公，當視二王後，卿大夫當視諸侯，士當視諸侯之臣，亦各以差次爲含襚賵之法，此弔事通賸之矣。又案：凡王遣使聘問諸侯，此官亦宜掌其戒令。《聘禮》云「宰書幣，命宰夫官具」。注云「命之使衆官具幣及所宜齎」。是凡使命禮幣，宰夫並掌之。經唯言弔事者，亦文不具也。云「幣，所用賻也」者，《禮·既夕》注云：「賻之言補也，助也。貨財曰賻。」《少儀》云：「賻馬與其幣，大白兵車，不入廟門。」是

賻有幣也。依《既夕》文，贈贈亦有幣，此止云賻者，以賻是加恩厚，其幣尤多，故特言之。賈疏云「案《公羊傳》，口實曰含，車馬曰贈，衣服曰襚。幣不人含襚贈中，故知是賻」。非也。云「器，所致明器也」者，《檀弓》云：「孔子謂爲明器者，知喪道矣。備物而不可用也。其曰明器，神明之也。」注云：「神明死者，異於生人。」賈疏述注，「致」上有「用」字，云：「案：《儀禮·既夕禮》云『若就器，則坐奠于陳』。注云『就猶善也。贈無常，唯翫好所有』。則此贈與人，亦是賓客就器。而云明器者，相對言之。則《檀弓》云『竹不成用，瓦不成味，木不成斲，琴瑟張而不平』之等，是主人之明器。賓客所致者，謂之就器。就，成也。謂善作之，名爲就器。摠而言之，皆是神明死者之器，故此就器亦名明器也。」云「凡喪，始死弔而含襚」者，據《士喪禮》，君使人弔襚及親友襚，皆在小斂以前。彼士禮，雖無君致含之文，但主人飯含並在小斂前，^①則王於諸侯、諸臣等有致含者，亦在小斂前可知，是始死即有弔及含襚之事。然此據畿內諸侯及諸臣言之。若畿外諸侯距王國遠者，則不限此。若文五年「榮叔歸含贈」，^②含與贈同歸是也。含襚，詳《大宰》疏。云「葬而贈贈」者，據《禮·既夕》，公贈及親賓贈贈，在祖奠以後，又云「公使宰夫贈玄纁束」，在柩行以後，是也。鄭彼

注云「贈，所以助主人送葬也。贈，送也」。是在將葬之時。《既夕》公贈亦使宰夫，與此經合。贈者，《春秋》隱元年經「天王使宰咺來歸惠公仲子之贈」。《公羊傳》云「喪事有贈。贈者蓋以馬，以乘馬束帛。車馬曰贈」。何注云：「贈猶覆也。禮，知生者贈賻，知死者贈襚。」《穀梁傳》亦云「乘馬曰贈」。《荀子·大略篇》云「與馬曰贈」。案：《大行人》賈疏引《左傳》服注，以宰咺爲天子宰夫。若然，此官主賻贈并奉致之矣。贈者，《既夕》云「知死者贈」，《記》云「凡贈幣無常」，注云：「玩好曰贈，在所有。」《白虎通義·崩薨篇》云：「贈之爲言稱也。玩好曰贈。知死者則贈襚，所以助生送死，追恩重終，副至意也。」云「其間加恩厚則有賻焉」者，據《既夕禮》，賻與贈贈同時。《公羊》隱元年傳，《荀子·大略篇》並云貨財曰賻。《公羊》何注云：「賻猶助也，皆助生送死之禮。」《穀梁傳》云：「錢財曰賻。」是賻所以加恩厚，助其喪費也。賈疏云：「言此者，欲見賻非正禮，其賻乃是於死者恩厚乃加之。故《禮記》云『弔喪不能賻，不問其所費』，是恩厚之義也。」引《春秋》譏武氏子來求賻」

① 「小」，原作「少」，據楚本改。

② 「五」，原訛「九」，榮叔歸含贈見文公五年。

者，明非加恩厚則有不賻也。賈疏云：「隱公三年《公羊傳》云：『武氏子來求賻，何以書？』」譏。何譏爾？喪事無求，求賻，非禮也。何休云：「禮本爲有財者制，有則送之，無則致哀而已。不當求，求則皇皇傷孝子心。」又云「蓋通于下」，何休云：「爾者，嫌天子財多不當求，下財少可求，故明皆不當求之。」鄭引此者，見王於諸侯，諸臣有歸則爾，諸侯諸臣亦不得求也。」大喪小喪，掌小官之戒令，帥執事而治之。大喪，王、后、世子也。小喪，夫人以下。小官，士也。其大官，則冢宰掌其戒令。治謂共辨。【疏】「掌小官之戒令」者，謂小官當共辨及奉行之事，宰夫豫禁戒告令之。《檀弓》云：「既卒哭，宰夫執木鐸以命于宮曰『舍故而諱新』，自寢門至于庫門。」《通典·凶禮》引盧植注，據此經爲釋云：「戒令即所謂舍故而諱新之屬。」案：此亦戒令之一端。云「帥執事而治之」者，此官親帥執事官吏治其事也。王、后、世子之喪，禮重事繁，治通於百官府，不必專職之有司，故以執事言之。詳《大宰》疏。

注云「大喪，王、后、世子也」者，謂王及后、世子三者之喪，並爲大喪也。《大宗伯》注義同。《通典》引《禮記》盧注說此經云「大喪，君也」，則盧謂大喪不關世子，與鄭說異。

賈疏云：「《大宰》云『大喪贊贈玉含玉』。《宗伯》云『朝覲會同則爲上相，大喪亦如之』。《鬱人》、《鬯人》俱云『大喪之潤』。《典瑞》云『大喪共飯玉、含玉、贈玉』。彼皆據王喪，唯《司寇》云『大喪前王，以爲嗣王，皆不爲后世子喪者，彼皆不對小喪。此大喪對小喪，亦王所申服，故注爲王、后、世子也。此不言庶子，文不具。』案：《宗伯》注亦以大喪關后、世子，賈偶失檢。又賈《大司寇》疏謂此注王后專屬后無王，亦非鄭指，詳彼疏。云「小喪，夫人以下」者，關九嬪、世婦、女御諸內人之喪也。《大史》注云：「小喪，卿大夫也。」此下文別有三公、六卿、諸大夫之喪，則此小喪中不兼卿大夫，故唯據內人小喪而言。賈《小祝》、《喪祝》疏謂小喪內有王后、世子，殊誤，詳彼疏。云「小官，士也」者，對六官正貳攷等爲大官也。《通典》引《禮記》盧注說此經云「小官，屬官也」，與鄭說同。賈疏云：「宰夫，下大夫所掌，而言小官，明是士可知。」云「其大官則冢宰掌其戒令」者，以冢宰爲宰夫之正，宰夫既專掌小官，明大官當冢宰掌之可知。賈疏云：「冢宰不言者，文不具。」云「治謂共辨」者，《喪服傳》注云：「治猶理也。」《考工記·總敘》注云：「辨猶具也。」辨俗作「辦」。《說文·力部》新附云：「辦，致力也。」賈疏云：「謂當職合共者共辨之。」三公、六卿

之喪，與職喪帥官有司而治之。凡諸大夫之喪，使其旅帥有司而治之。旅，冢宰下士。

【疏】「三公六卿之喪，與職喪帥官有司而治之」者，此與職喪爲官聯也。官有司，謂小官之主共喪事者，亦謂之公有所司，《職喪》云「凡公有司之所共，職喪令之趣其事」是也。賈疏云：「三公六卿喪尊，故宰夫與春官職喪帥其於喪家有事宜有司而治之。治之亦謂共辨之。」胡匡衷云：「司，主也。凡事有專主者謂之有司。有司有二義：一是事有常職者，謂之有司；一是事本無常職者，行禮時，特使人主其事者，亦目爲有司也。」案：胡說是也。此經凡云有司者，並據專主其事之官。其本非專主而聯事通職以共其禮者，則謂之執事。互詳《大宰》、《小宗伯》疏。云「凡諸大夫之喪」者，通中下大夫而言。云「使其旅帥有司而治之」者，賈疏云：「大夫之喪卑賤，宰夫不自爲，使在己之下其旅三十有二人帥有事於喪家之有司而治之。」詒讓案：旅帥有司，亦即官有司，冢上文省。若其私臣，則不煩宰旅帥之矣。注云「旅，冢宰下士也」者，前注云「旅，辟下士也」。《敘官》大宰有旅下士三十有二人。宰夫爲冢宰之考，冢宰之旅亦爲宰夫屬官，故知其旅即謂冢宰下下士也。

《檀弓》云「孟獻子之喪，司徒旅歸四布」。注亦云「旅，下士也」。案：魯季氏爲司徒兼爲宰，司徒旅猶宰旅也。孟獻子爲魯三卿之一，故司徒屬官亦治其喪事矣。歲終則令羣吏正歲會，月終則令正月要，旬終則令正日成，而以攷其治。治不以時舉者，以告而誅之。歲終，自周季冬。正猶定也。旬，十日也。治不時舉者，謂違時令失期會。【疏】「歲終則令羣吏正歲會」者，宰夫之官計、官成也。此總掌治官之歲會，與大宰、小宰通受六官歲會異。賈疏云：「羣吏則六十官。正歲會，正猶定也，謂一年會計文書，摠句考之。歲計曰會也。」云「月終則令正月要，旬終則令正日成」者，賈疏云：「謂每月終則令羣吏正其月要，月要謂月計曰要也。每旬終則令羣吏正其日成，日成謂日計曰成也。」詒讓案：依此經，則一月三正日成，計一歲十二正月要，一正歲會也。《管子·立政篇》云「三月一校，六月一計，十二月一著。」又《君臣》上篇云「是故歲一言者君也，時省者相也，月稽者官也」。則一時半歲亦有計事，經不具也。云「而以攷其治」者，賈疏云：「言會要成摠考之。」云「治不以時舉者，以告而誅之」者，此宰夫之官刑也。賈疏云：「謂告冢宰而誅責之也。」

注云「歲終，自周季冬」者，《大司徒》注同。宋董氏刊本，自作「目」，非。賈疏云：「以其正月之吉始和，彼正月是周之正月，始和布治于天下，至今歲終考之，是一歲之終，故知非夏之歲終也。」戴震云：「《周禮》之書，曰歲終，曰正歲，曰春秋冬夏，皆夏時也。」王引之云：「歲終與正歲相應。鄭注《小宰》云「正歲謂夏之正月」，則正歲爲夏之孟春，歲終爲夏之季冬，不得以爲周之季冬也。請以四證明之。《內宰職》曰：「歲終，則會內人之稍食，稽其功事；正歲，均其稍食，施其功事。」歲終是夏之十二月，正歲是夏之正月，言歲終與正歲，而一歲盡於此矣。故正歲則曰均、曰施，言其始也；歲終則曰會、曰稽，言其終也。若謂歲終爲周之季冬，則是夏之孟冬矣。孟冬以後尚有兩月，豈得遽會其稍食、稽其功事乎！此一證也。《既稷職》曰：「掌安宅敍降，正歲則行事，歲終則弊其事。」上言正歲，下言歲終。明正歲是夏之正月，歲終是夏之十二月。正歲行事，歲終弊之，而一歲全矣。若謂歲終爲周之季冬，則甫及夏之十月，十月以後尚有兩月，豈得十月遽弊其事乎！此二證也。《小司寇職》曰：「孟冬祀司民，獻民數於王，王拜受之，以圖國用而進退之。歲終則令羣士計獄弊訟，登中于天府。正歲，帥其屬而觀刑象。」歲終在孟冬正歲之間，則

爲夏之季冬明矣。若謂歲終爲周之季冬，夏之孟冬，則孟冬祀司民，已是夏之孟冬，何得又以歲終爲孟冬乎！此三證也。《小宰》歲終則令羣吏致事，正歲帥治官之屬而觀治象之法。《大司徒》歲終則令教官正治而致事，正歲令于教官曰「各共爾職，脩乃事，以聽王命」。《小司徒》歲終則攷其屬官之治成而誅賞，令羣吏正要會而致事；正歲則帥其屬而觀教灋。《鄉師》歲終則攷六鄉之治以詔廢置，正歲稽其鄉器。《鄉大夫》歲終則令六鄉之吏皆會政致事，正歲令羣吏攷灋于司徒。《州長》歲終則會其州之政令，^①正歲則讀教灋如初。《黨正》則會其黨政，帥其吏而致事，正歲屬民讀灋。《遂大夫》令爲邑者，歲終則會政致事，正歲簡稼器，脩稼政。《士師》歲終則令正要會，正歲帥其屬而憲禁令于國。皆先言歲終，後言正歲。蓋周以建子之月爲正月；其二月則建丑之月，而夏之歲終；其三月則建寅之月，而夏之正歲也。故正歲歲終，用夏時之名，而先歲終而後正歲，則周月之次序也。若謂歲終爲周之季冬建亥之月，則爲周月之最後者矣，何以先言歲終後言正歲乎！此四證也。歲終與夏之正歲爲終始，豈與周之正月爲終始

①「令」，原訛「教」，據楚本改。

乎！「案：戴、王二說，足正鄭義之誤。吳廷華、曾釗、林喬蔭說同。云「正猶定也」者，《說文·正部》云：「正，是也。」事必是而後定，故引申之定亦曰正。《管子·法法篇》云：「正也者，所以正定萬物之命也。」云「旬，十日也」者，《說文·勺部》云：「旬，徧也。十日爲旬。」云「治不時舉者，謂違時令失期會」者，《漢書·賈誼傳》云：「大臣特以簿書不報，期會之間，以爲大故。」案：違時令，若十二月之政令，先後違其時節。失期會，謂事之共辨有期限，而怠廢不辨失期者也。正歲，則以灋警戒羣吏，令脩宮中之職事。警戒之言。鄭司農云：「正歲之正月，以法戒勅羣吏。」【疏】「令脩宮中之職事」者，亦謂王宮中也。《檀弓》說宰夫命于宮，自寢門至于庫門。注云：「庫門，宮外門，天子謂之皋門。」然則皋門以內，通謂之宮中，宰夫皆警戒之矣。注云「警戒之言」者，《說文·言部》云：「警，戒也。」又《支部》云：「敕，戒也。」敕即敕之借字，詳《大宰》疏。鄭司農云「正歲之正月以法戒勅羣吏」者，此依今字作「法」也。先鄭亦以正歲爲夏之正月，與經凡言正月者異。謂夏正月小宰戒令百官府時，此官則亦警戒其屬及王宮中羣吏也。賈疏云：「正歲乃夏之正月，是其歲始，故

以法警戒羣吏，令脩宮中之職事，以謹勅之也。」書其能者與其良者，而以告于上。良猶善也。上謂小宰、大宰也。鄭司農云：「若今時舉孝廉、賢良方正、茂才異等。」【疏】「書其能者與其良者」者，《大宰》注云：「能，多才藝者。」《司諫》云：「掌糾萬民之德，以時書其德行道藝，辨其能而可任于國事者。」此書其能者，即書其有道藝而能任國事者。又兼書良者，《小宰》六計弊羣吏，一曰廉善，二曰廉能。良即是善，故與能者並書之也。賈疏云：「上云令脩宮中之職事，則此謂宮中諸吏也。正歲之正月，則豫選之，擬至歲終當舉之也。」注云「良猶善也」者，《玉府》、《司裘》、《夏官·敘官》、《校人》、《考工記·總敘》、《弓人》，注義並同。《說文·冂部》云：「𠂔，善也。」良即𠂔之隸變。良謂有善行，次於有德行之賢，故《師氏》三行，二曰友行以事賢良也。云「上謂小宰大宰也」者，二官皆宰夫之長。賈疏云：「以其承上文歲始，未是賞時，且長自告於王，知上非王，是小宰、大宰。」鄭司農云「若今舉孝廉、賢良方正、茂才異等」者，《漢書》本紀，武帝元光元年，初令郡國舉孝廉。又文帝二年，詔舉賢良方正能直言極諫者。又武帝元封五年詔，令州郡察吏民有茂才異等。應劭

云：「舊言秀才，避光武諱稱茂才。異等者，超等軼羣不與凡同也。」案：孝廉、賢良方正、茂才異等三者，並漢時薦舉之目。賈疏謂「異等者，四科不同，等級各異」，失之。又謂「賢良即經云「良者」，茂才即經云「能者」」。今審先鄭此注，蓋襍舉漢制為況，非必以賢良屬良，茂才屬能。故《鄉大夫》先鄭注云「興賢者，謂若今舉孝廉；興能者，謂若今舉茂才」。則又以孝廉況興賢，茂才況興能，與此注可互證矣。

宮正掌王宮之戒令、糾禁。糾猶割也，察

也。【疏】「掌王宮之戒令糾禁」者，戒令謂戒具徵令之事。

糾禁，亦即《士師》之「宮禁」。此官與彼為官聯也。注

云「糾猶割也，察也」者，《小宰》注同。以時比宮中之

官府、次、舍之衆寡，時，四時。比，校次其人之在

否。官府之在宮中者，若膳夫、玉府、內宰、內史之屬。次，

諸吏直宿，若今部署諸廬者。舍，其所居寺。【疏】「以時

比宮中之官府次舍之衆寡」者，衆寡冢官府次舍為文。凡

吏士有職事常居宮內者為官府，官府之小者為舍。其官府

本在外而人內治事，或無專職而人共守衛，使令暫居更直

者為次。官府次舍所居之人，通謂之衆寡，與《小司徒》「登

其鄉之衆寡」為鄉里之民，人異而義同。《宮伯》云「掌王宮之士庶子凡在版者」，此文亦「云為之版以待」，與彼文相應，是士庶子亦在衆寡之內，彼職又謂之宮衆。蓋自官吏以逮宿衛之士庶子，守王宮之閭寺、虎士、隸民，皆通駭於是矣。注云「時，四時」者，《鄙師》注義同，謂通四時皆

比校之也。賈疏云：「此時是尋常事，故為四時解之。

案：《地官·鄉師》云：「以歲時巡國及野，而調萬民之黷

阨。」鄭彼注：「時，隨其事之時。」不為四時解者，彼據黷阨

非常，故為隨其事之時，不得為四時也。」云「比，校次其人

之在否」者，《宰夫》注云：「比，校次之。」此義與彼同。宮

中官吏員數衆多，故宮正以時校次其在否也。云「官府之

在宮中者，若膳夫、玉府、內宰、內史之屬」者，《大宰》注

云：「百官所居曰府。」蓋諸官府寺皆在宮外，惟此諸官掌

王服御膳食及詔王聽治，職掌尤近，故於宮中為官寺。宮

中即皋門以內也。云「次，諸吏直宿」者，凡官吏治事，士民

聽事所居處，通謂之次。《宮伯》士庶子所止曰八次，《司

市》市官所治曰思次、介次，皆是。《穀梁》莊十年范注云：

「次，止也。」①直宿者或以職事暫留，或以更番當直止宿於

① 按：「次止也」係《穀梁傳》文。

是者，別於官府爲常居之處也。賈疏云：「此次，謂若《匠人》云『外有九室，九卿治之』，即《詩》云『適子之館兮』，鄭云『卿士所之之館，在天子之宮中，如今諸廬』。彼二者與此次爲一物，此據宮中之官府。下《宮伯》云『授八次八舍』，鄭注『衛王宮者』。彼據宮中官府子弟。」案：依賈說，則宮中官吏之次，並在路門之外，正朝之左右。凡諸官府，無論寺在內在外，其在官治事，各於治朝旁之次，或當直宿，則亦於次中宿，若今之朝房是也。次，《詩·鄭風·緇衣》謂之館，亦通謂之官，《玉藻》云「在官不俟屨」，注云「官謂朝廷治事處也」。朝廷即指治朝左右言之。又案：凡次舍對文義異，散文亦通。故《左·襄二十三年傳》云：「敬共朝夕，恪居官次。」杜注云：「次，舍也。」《國語·魯語》云：「文公欲弛孟文子之宅，對曰：夫位，政之建也；署，位之表也；車服，表之章也；宅，章之次也。今有司來，命曰：將易而次。」又「公欲弛邱敬子之宅，對曰：今命臣更次於外，請從司徒以班徙次」。《魯語》之次，即所居寺舍，世官則以爲宅，與朝廷治事之次異也。云「若今部署諸廬者」者，賈疏述注，「今」下有「時」字。阮元云：「時字當有，注中屢言若今時。」詒讓案：此亦舉漢法爲況。《說文·网部》云：「署，部署也。各有所网屬也。」《漢舊儀》云：「官

司馬內，營衛周廬，晝夜誰何。殿外門署屬衛尉，殿內部署屬光祿勳，黃門鉤盾署屬少府。」《漢書·百官公卿表》顏注引胡廣云：「衛尉主宮闕之門內，衛士於周垣下爲區廬。區廬者，若今之仗宿屋矣。」《藝文類聚·職官部》引《漢官解詁》云：「衛士於周垣下爲廬，各有員部。」《唐六典》李林甫注引應劭《漢官儀》云：「光祿勳有南北廬主事，三署主事。」此注云部署諸廬，殆即衛尉光祿勳三署南北廬之屬矣。丁晏云：《漢書·金日磾傳》「小疾卧廬」，師古曰「殿中所止曰廬」。《文選·西都賦》「周廬千列」，李善注：「《史記》：衛令曰，周廬設卒甚謹。張晏曰：直宿曰廬。」云「舍，其所居寺」者，《宮伯》八舍注云：「舍，其休沐之處。」《釋名·釋宮室》云：「舍，於中舍息也。寺，嗣也，治事者相嗣續於其內也。」《一切經音義》引《三蒼》云：「寺，官舍也。」《後漢書·光武紀》李注引《風俗通》云：「寺，司也。諸官府所止皆曰寺。」案：鄭意此舍即官寺，亦即官府之府。蓋府爲百官居寺之大名，其屬別謂之舍，若今之諸官衙署是也。諸吏官寺若在官外，則入宮時，治事直宿於治朝之次，退直則仍適宮外之寺。若親近之官寺，既在宮內，則治事直宿亦在治朝之次，其退直即居其宮內之寺。若然，寺舍則在內在外不定，視其職掌之近遠爲之。在外

之寺舍，則若《大司馬》注謂軍將營治於國門之屬是也。在內之寺舍，則若此宮中諸吏及宮正士庶子休沐居八舍是也。^①凡次多在路門外應門內近治朝之處，舍則當在應門之外皋門之內，與次不同處也。爲之版以待，鄭司農云：「爲官府次舍之版圖也。待，待比也。」玄謂版其人之名籍。待，待戒令及比。【疏】「爲之版以待」者，此掌王宮版籍之法，與內宰爲官聯也。 注鄭司農云「爲官府次舍之版圖也」者，賈疏云：「先鄭於『八成』注『云版，戶籍圖，地圖』。此注連言圖，其版即名籍，與後鄭義同。」詒讓案：《官伯》先鄭注云「版，名籍也，以版爲之」。圖亦畫版爲之，故通言之圖亦得爲版。《論語·鄉黨篇》云「式負版者」，《集解》引孔安國云：「負版，持邦國之圖籍者也。」先鄭意，此官府次舍所居之人則書於版，其官室所在方位則書於圖，以備稽察也。云「待，待比也」者，《說文·彳部》

云：「待，俟也。」謂俟當比之時，案版籍以校比之也。云「玄謂版其人之名籍」者，其人即上文「官府次舍之衆寡」是也。後鄭意，官府之人，但有名籍，不必有圖，故不從先鄭義。云「待，待戒令及比」者，亦增成先鄭義。以職首云「掌王宮之戒令糾禁」，明施戒令時亦當案版籍也。 夕擊柝

而比之。夕，莫也。莫行夜以比直宿者，爲其有解情離部署。鄭司農云：「柝，戒守者所擊也。《易》曰：『重門擊柝，以待暴客。』《春秋傳》曰：『魯擊柝，聞於邾。』」【疏】「夕擊柝而比之」者，比謂依在版之名籍，周歷諸次，而校其在否。此謂每日小校比，與上四時大校比異也。 注云

「夕，莫也」者，《釋文》云：「本亦作暮。」《說文·夕部》云：「夕，莫也。」又《井部》云：「莫，日且冥也。」《廣雅·釋詁》云：「莫，夜也。」莫暮古今字。云「莫行夜以比直宿者，爲其有解情離部署」者，《荀子·王制篇》楊注云：「行，巡行也。」離部署即謂離次。解亦懈之借字，詳《小宰》疏。賈疏云：「謂直宿即坐持更之人，則行夜者擊柝校比直宿人。」詒讓案：《藝文類聚·后妃部》引《尚書大傳》云：「雞鳴，大師奏雞鳴於陛下，然後應門擊柝告闕也。」彼擊柝疑即此官所掌矣。鄭司農云「柝，戒守者所擊也」者，《挈壺氏》後鄭注云：「擊櫜，兩木相敲行夜時也。」《說文·木部》云：「櫜，判也。《易》曰：重門擊櫜。」柝即櫜之隸變。《說文》又有櫜字，云「行夜所擊木」，引《易》又作櫜。然則櫜正字，柝假借字。此經字多作櫜。《挈壺氏》、《野廬氏》、《脩閭氏》

①「官正」似當作「官伯」。

三職字並從橐。《挈壺氏》、《野廬氏》疏引此職同。疑今本作柝者誤。又案：經凡言擊柝者有二：一爲守衛士民所擊，賈所謂持更者也；一爲官吏校比諸士民者所擊，鄭所謂行夜者也。王宮有衛士直宿，自兼有持更擊柝之人，此宮正則又擊柝校比之，故先鄭「云戒守」者，義與後鄭云「行夜」同也。《孟子·萬章篇》趙岐注云：「柝，門關之木也；擊，椎之也。或曰：柝，行夜所擊木也。」趙氏前一義，與許、鄭並不合，不足據。引《易》曰「重門擊柝，以待暴客」者，賈疏云：「《易·繫辭》文。彼又云「蓋取諸豫」。鄭玄注云：「豫，坤下震上。九四體震，又互體有艮。艮爲門，震，日所出，以爲門，重門象。艮又爲手，巽爻也，①應在四，皆木也，手持二木也。手持二木以相敲，是爲擊柝，擊柝爲守備警戒也。四又互體爲坎，坎爲盜，五離爻爲甲冑戈兵盜，謂持兵是暴客也。又以其卦爲豫，有守備，則不可自逸。」是也。」又引《春秋傳》曰「魯擊柝聞於邾」者，《左》哀七年傳：秋，伐邾。茅成子請告于吳，不許，曰：「魯擊柝聞於邾，吳二千里，不三月不至，何及於我。」《左傳釋文》云：「柝，字又作櫟。」引此二文，並證擊柝爲戒守之事。國有故，則令宿，其比亦如之。鄭司農云：「故謂禍災。令宿，宿衛王宮。《春秋傳》曰：『忘守必危，況有災

乎。』玄謂故，凡非常也。《文王世子》曰：「公有出疆之政，庶子以公族之無事者守於公宮，正室守大廟，諸父守貴宮，貴室，諸子，諸孫守下宮，下室。」此謂諸侯也。王之庶子職掌國子之倅，國有大事則帥國子而致於天子，唯所用之者。令宿之事，蓋亦存焉。【疏】「國有故則令宿」者，國有非常之故，當嚴戒守政，此官則令士庶子等人宿衛王宮。蓋平時唯宮內官吏及士庶子當直者宿，有故則令諸不當直者盡入宿衛也。云「其比亦如之」者，②賈疏云：「亦如上夕擊柝已上之事，與平常同也。」注鄭司農云「故謂禍

災」者，《大宗伯》云：「以弔禮哀禍裁。」注云：「禍裁謂遭水火。」《掌客》注云：「禍裁，新有兵寇水火也。」此作禍災者，注例用今字也。詳《膳夫》疏。云「令宿，宿衛王宮」者，《說文·宀部》云：「宿，止也。」《行部》云：「衛，宿衛也。」宿衛王宮，謂更直止宿宮中爲扞衛也。引《春秋傳》曰「忘守必危，況有災乎」者，證火災有守衛之事。賈疏云：「《左氏》昭十八年夏五月，宋、衛、陳、鄭災。子產授兵登陴，子大叔曰：『晉無乃討乎？』子產曰：『小國忘守則危，況有

①「爻」，原誤作「女」，今據《周禮疏》改。

②原脫「如」，據楚本補。

災乎！「彼爲『則』，先鄭云『必』，讀字不同也。」云「玄謂故凡非常也」者，《廣雅·釋詁》云：「故，事也。」此經凡言有故者，並謂非常事變，《朝士》云「若邦凶荒札喪寇戎之故」是也。其大者則謂之大故，鄭各隨文釋之。《膳夫》注云「大故，寇戎之事」；《小司徒》注云「大故謂災寇也」；《大宗伯》注云「故謂凶裁」；《肆師》注云「大故謂水旱凶荒」；《大祝》注云「大故，兵寇也」；《司險》注云「有故，喪災及兵也」。此云凡非常，則通《朝士》凶荒札喪寇戎諸事言之，較先鄭禍災之義尤備。賈疏又謂及王時出行不在，則巡守殷國，亦當令宿，猶諸侯有出疆之政，亦以庶子入守王宮也。引《文王世子》曰「公有出疆之政」者，鄭彼注云：「謂朝覲會同也。」云「庶子以公族之無事者守於公宮」者，案彼文又云「庶子之正於公族者」。注云：「庶子，司馬之屬，掌國子之倅，爲政於公族者。」是鄭以彼庶子即夏官諸子官也。云「正室守大廟」者，注云：「正室，適子也。大廟，大祖之廟。」案：正室即《小宗伯》之門子，大廟謂若后稷廟也。云「諸父守貴宮貴室」者，注云：「謂守路寢。」《禮記釋文》無「貴宮」二字。王引之謂「彼注路寢專釋貴室，不當有『貴宮』二字。此注亦後人據《禮記》誤本加之。」是也。賈疏云：「謂同族諸爲父行者。貴宮、貴室同爲路寢。路寢對

大廟，生人之尊也。」案：賈本已衍「貴宮」二字，故強爲之說，《禮記》孔疏義同，皆不足據也。云「諸子諸孫守下宮下室」者，注云：「下宮，親廟也。下室，燕寢也。」賈疏云：「亦謂同族之內諸爲子行孫行者也。」云「此謂諸侯也」者，以彼文云公族公宮，則是諸侯法也。云「王之庶子職掌國子之倅，國有大事，則帥國子而致於天子，唯所用之者」者，據《諸子》文。「諸子」《燕義》引作「庶子」，故《夏官·敘官》注云「諸子或曰庶子」。鄭注《文王世子》之庶子，亦以諸子釋之。蓋王國諸子亦得稱庶子，故《燕義》云「古者周天子之官，有庶子官」，此注亦云「王之庶子」。賈疏及《燕義》孔疏並謂於天子爲諸子，於諸侯爲庶子，非鄭義也。云「令宿之事，蓋亦存焉」者，賈疏云：「彼是甲兵，不云宿衛，故鄭云令宿之事蓋亦存焉。存焉者，宿衛之事亦在唯所用中。引之者，欲見國有故中有王出疆巡守征伐，皆須令宿，增成先鄭義也。」案：賈說亦非也。鄭引《文王世子》及《諸子職》文者，證有故則國子有宿衛之事。但國子宿衛雖庶子官所令，既入宮則亦由宮正令宿，故云蓋亦存焉。云蓋者，以彼二經無文，鄭互推補之也。辨外內而時禁，鄭司農云：「分別外人內人，禁其非時出入。」【疏】注鄭司農云「分別外人內人，禁其非時出入」者，《敘官》注云：「辨，別

也。」賈疏云：「謂住在王宮中，有卿大夫士等，外人謂男子，內人謂婦女皆是也。此男女自相對，爲外人內人。其內人非謂《內宰職》所云內人，是刑女在宮中者也。」案：賈說非經注義也。此內人外人，當謂宮內宮外之人，不必分男女也。禁之者，宮內之人非時不得出，宮外之人非時不得入也。《內則》云：「爲宮室，辨外內，深宮固門，闔寺守之。」此辨外內與彼義同。稽其功緒，糾其德行，稽猶考也，計也。功，吏職也。緒，其志業。【疏】稽其功緒者，賈疏云：「宮正考其宮中卿大夫士功狀及職業多少。」案：此亦當兼關庶子，賈說未咳。云「糾其德行」者，謂教羣吏及羣子等以六德六行，與師氏爲官聯也。凡國子皆入王宮左之小學，此官所掌者，宮中官吏子弟及宿衛士庶子等，亦糾其德行。下文又云「教之道藝」，明雖貴遊宿衛，亦不廢學也。注云「稽猶考也，計也」者，稽考，《小

司徒》、《質人》注並同。稽訓留止，引申爲審慎考計之義。《小爾雅·廣言》亦云「稽，考也」。計訓互詳《小宰》疏。云「功，吏職也」者，《小爾雅·廣詁》云：「功，事也。」《廣雅·釋詁》云：「職，事也。」凡吏受職則有事，事成則有功，故職事通謂之功。云「緒，其志業」者，《內宰》注云：「緒，業也。」顧炎武云：「已成者謂之功，未成者謂之緒。《說

文》：「緒，絲端也。」《中庸》曰：「武王纘大王、王季、文王之緒。」幾其出入，均其稍食，鄭司農云：「幾其出入，若今時宮中有罪，禁止不得出，亦不得入，及無引籍不得入官司馬殿門也。」玄謂幾荷其衣服、持操及疏數者。稍食，祿稟。【疏】注鄭司農云「幾其出入，若今時宮中有罪，禁止不得出，亦不得入」者，孔廣森云：「《漢書·嚴延年傳》注，張晏曰：『故事，有所劾奏，並移宮門，禁止不得入。』然則在內者，見彼劾奏，即不許出矣。」云「及無引籍，不得入官司馬殿門也」者，賈疏云：「言引籍者，有門籍及引人乃得出入也。」又云：「司馬殿門者，漢宮殿門每門皆使司馬一人守門，比千石，皆號司馬殿門也。」王應麟云：「《元帝紀》：令從官給事官司馬中者，得爲大父母、父母、兄弟通籍。應劭曰：『籍者，爲二尺竹牒，設其年紀、名字、物色，縣之宮門，案省相應，乃得入也。』顏師古曰：『司馬門者，宮之外門也。衛尉有八屯，衛候司馬主衛士徼巡宿衛。每面各二司馬，故謂宮之外門爲司馬門。』《寶嬰傳》：太后除嬰門籍，不得朝請。《王嘉傳》：爲郎，坐戶殿門失闕免。《梁孝王傳》：梁之侍中、郎、謁者著引籍，出入天子殿門，與漢宦官亡異。」阮元云：「《漢官儀》云『公車司馬掌殿司馬門』。司馬殿門，即殿司馬門也。」案：阮說是也。

劉向《列女傳·辯通篇·齊鍾離春傳》，齊有司馬門，則周季已有此制矣。云「玄謂幾荷其衣服、持操及疏數者」者，《王制》注云：「譏，苛察也。」幾，譏，荷，苛，字並通。《春官·世婦》及《射人》經注並作「苛」，《閹人》、《司關》、《萍氏》、《環人》注同。《比長》注又作「呵」。正字當作「訶」，《說文·言部》云：「訶，大言而怒也。」荷苛皆段字，呵即訶之俗。賈疏云：「案《閹人》云：『喪服凶器不入宮，潛服賊器不入宮，奇服怪民不入宮。』《司門》云：『幾出入不物者。』謂衣服視占不與衆同及所操物不如品式者。職雖不同，皆是守禁。此經直云幾其出入，明知有此呵其衣服持操及疏數，此增成司農義也。」詒讓案：疏數者，謂出入疏數異於平時，則亦幾荷之。云「稍食，祿稟」者，《內宰》、《廩人》、《掌固》注義並同。《說文·禾部》云：「稍，出物有漸也。」《同部》云：「稟，賜穀也。」賈疏云：「稍則稍稍與之，則月俸是也。則下士食九人，中士倍下士，上士倍中士，大夫倍上士之類。其祿與之米稟，故云祿稟也。」易拔云：「當是一命以上謂之祿，庶人在官者，稍食而已。」金榜云：「《校人》等馭夫之祿，宮中之稍食，明稍食與祿殊也。」沈彤云：「稍食，食之小者。《校人》等馭夫之祿，宮中之稍食。」馭夫爲中士、下士，宮中則師圉府史以下。觀《宮正》

食官府之衆寡，《內宰》食王內之人民，並稱稍食，則易說誠然。而疏以稍食爲命士以上之祿之通稱，誤矣。」案：易、金、沈三說是也。《校人》先鄭注云「稍食謂稟」，此訓最析。《司士》云「以德詔爵，以功詔祿，以能詔事，以久奠食」。注云「食，稍食也」。亦以祿食並言。然則有爵則有祿，有事則有食，故《廩人》以稍食匪頒二者並舉，食異於祿明矣。以經考之，賦祿或以田，或以米粟；奠食則一以米粟，無以田者。自卿以下至命士，皆有爵者也，故皆給祿不給食。祿之多寡有定，視命數以爲差，《小宰》云「聽祿位以禮命」，《內史》云「王制祿則贊爲之」，《校人》云「等馭夫之祿」是也。不命之士及庶子、庶人在官者，皆無爵而有事者也，故皆給食不給祿，《檀弓》云「仕而未有祿者」是也。食之多寡無定，視其事之繁簡，功之上下，以歲時稽而均之，《小宰》六敘正羣吏云「以敘制其食」，《醫師》云「歲終稽其醫事，以四等制其食」，《內宰》掌內官云「均其稍食」，《夏官·廩人》云「乘其事，試其弓弩，以上下其食而誅賞」，《校人》云「等宮中之稍食」是也。稍食亦曰稟食，《聘禮》云「既致饗，旬而稍」，鄭彼注云「稍，稟食也」。是稍食稟食義同。《墨子·七患篇》云：「歲饑，則仕者大夫以下皆損祿五分之一，旱則損五分之一，凶則損五分之三，饑則損五分之四，

饑則盡無祿，稟食而已矣。」無祿而有稟食，即所謂稍食也。《中庸》云「日省月試，既稟稱事」，注云「既，讀爲餼。餼，稟，稍食也。」彼說百工以無祿故有稍食，餼稟亦即稟食也。《大府》「四郊之賦，以待稍秣」，注云「稍秣即芻秣」。稍秣即給牛馬之稟食也。人之稟食謂之稍食，猶之牛馬之芻稟謂之稍秣矣。稍食，通言之或亦謂之祿，故《王制》云「庶人在官者，其祿以是爲差」。庶人在官者不得有祿，《孟子》、《王制》所謂祿，實即稍食。《燕禮》「士旅食」，注云：「士衆食，謂未得正祿，所謂庶人在官者也。」然則此注以祿稟釋食，或亦謂非正祿，與《燕禮》注意略同。但經則凡言祿者皆正祿，與稍食顯有區別，鄭既未別白言之，賈疏遂并祿食爲一，使分田制祿之典與詔事奠食之法，淆混無別，其失甚矣。去其淫怠與其奇袤之民，民，宮中吏之家人也。淫，放濫也。怠，解慢也。奇袤，譎觚非常。【疏】「去其淫怠與其奇袤之民」者，《釋文》云：「袤亦作邪。」案：《說文·衣部》云：「袤，褻也。」邑部云：「邪，琅邪郡。」此經例用古字作「袤」，注例用今字，多借「邪」爲之。詳《司諫》疏。去之者，謂擴放不得入宮也。注云「民，宮中吏之家人也」者，《內宰》云「分其人民以居之」，注云：「人民，吏子弟。」此云「吏之家人」即吏子弟也。宮中吏，即前注所說

膳夫、玉府諸官。其官府本在宮內，故其子弟得相隨入宮。但此民與《內宰》之人民所咳甚廣，蓋兼含凡士庶子及虎士守王宮者言之。賈疏謂若司隸隸民之類，亦是也。互詳《內宰》疏。云「淫，放濫也」者，《孟子·滕文公篇》趙注云：「淫，放也。」《國語·周語》韋注云：「淫，濫也。」云「怠，解慢也」者，亦段解爲懈，《說文·心部》云：「怠，慢也。懈，怠也。」云「奇袤，譎觚非常」者，袤，黃丕烈校改「邪」。賈疏云：「兵書有譎觚之人，謂譎詐桀出，觚角非常也。」案：賈引兵書，未詳所據。《祭義》云「雖有奇邪而不治者則微矣」，與此奇袤義同。孔疏云：「奇謂奇異，邪謂邪惡，皆據異行之人言。」又《賈子·道術篇》云：「方直不曲謂之正，反正爲邪。」奇袤與譎觚非常，並謂奇詭不正。譎觚，猶《莊子·齊物論》云「恢恠憭怪」。彼《釋文》引李頤云：「憭，乖也。」《孟子·梁惠王篇》趙注云：「桀服，譎詭非常之服。」觚、怪、乖、詭，並聲轉義略同。《史記·三王世家》索隱引此注作「譎怪」，則司馬貞臆改，不足據也。至此經奇袤文凡三見，而注悉小異。《內宰》「禁其奇袤」，注云「奇袤，若今媚道」。《比長》「有臯奇袤則相及」，注云「袤猶惡也」。蓋鄭君隨文立訓，總其大要，義並通也。又《司救》「掌萬民之袤惡過失而誅讓之」，注云「袤惡，謂侮慢長

老，語言無忌，而未麗於罪者」。奇衺、衺惡，義亦相近。奇又作「倚」，《管子·版法篇》云「植固不動，倚邪乃恐」。《荀子·榮辱篇》云「飾邪說，文姦言，爲倚事」。又《王制篇》云「姦言姦說，姦事姦能，遁逃反側之民，職而教之，須而待之」。卽所謂奇衺之民也。會其什伍而教之道藝。

五人爲伍，二伍爲什。會之者，使之輩作輩學相勸帥，且寄宿衛之令。鄭司農云：「道謂先王所以教道民者，藝謂禮樂射御書數。」【疏】「會其什伍」者，《說文·會部》云：

「會，合也。」宮中宿衛士庶子及虎士等，亦以軍法部署之，以佐守衛，而便校比，猶諸子掌國子合其卒伍也。云「而教之道藝」者，使就王宮左之小學而教之，與保氏爲官聯，亦猶諸子使國子脩德學道也。注云「五人爲伍」者，《小

司徒》、《族師》及《夏官·敘官》文。《說文·人部》云：

「伍，相參伍也。」云「二伍爲什」者，《說文·人部》云：「什，相什保也。」《周書·大聚篇》云：「十夫爲什。」云「會之者，使之輩作輩學相勸帥」者，《一切經音義》引《倉頡篇》云：

「輩，比也。」《說文·人部》云：「倫，輩也。」謂倫輩相合，比作功事而學道藝也。賈疏云：「宮正掌宮中卿大夫士，亦兼掌子弟。會謂會合其宮中子弟，使之以五人爲伍，二伍爲什。必會合之者，欲使之宿衛時語言相體，服容相識，是

其輩作也。及其學問，又相親及切磋琢磨，是其輩學。摠是相勸帥也。」云「且寄宿衛之令」者，賈疏云：「《管子》云「因內政，寄軍令」。在家時五家爲比，在軍還五人爲伍之類。此亦五人爲伍，二伍爲什，使之輩學，似若在家也，因使之宿衛以寄軍令也。」鄭司農云「道謂先王所以教道民者，藝謂禮樂射御書數」者，「御」當依《保氏》作「馭」，詳彼疏。《管子·君臣篇》云：「道也者，上之所以導民也。」賈疏云：「謂若《保氏》云「掌養國子以道而教之六藝」。道則《師氏》三德三行也。藝謂禮樂射御書數者，亦《保氏職》文也。」案：《少儀》「問道藝」，後鄭注云：「道，三德三行也。藝，六藝。」賈據彼注義，故分道藝爲二。王引之云：「《鄉大夫》以攷其德行，察其道藝」，德行與道藝分言，則道非德行之謂也。案：道者，術也。韋昭《吳語》注：「道，術也。」道藝卽術藝，《列子·周穆王篇》「魯之君子多術藝」是也。道訓爲術，藝亦是術，故以道藝連文，道卽藝也。司農言禮樂射御書數，先王所以教道民，故又謂之道也。疏以道爲三德三行，非先鄭之意。」案：王說是也。凡經云德者，並指六德六行而言，云道者，並指六藝六儀而言。兼舉之則曰德行，曰道藝。此教之道藝，道卽是藝，與德行無涉。上文云糾其德行，乃是六德六行耳。《大司樂》「凡有

道有德者使教焉」，後鄭注云「道，多才藝者。德，能躬行者」。是後鄭亦分釋甚明，《學記》注蓋偶有不審，^①不為典要。賈誤會先鄭之旨，強分為二，又引《保氏》「養國子以道」為證，不知保氏所教之道，亦即藝儀，與師氏教德行異職也。月終則會其稍食，歲終則會其行事。

行事，吏職也。【疏】「月終則會其稍食，歲終則會其行事」者，正宮中官吏之月要歲會，亦此官之官成、官計也。賈疏云：「稍食謂宮中官府等月祿，故至月終會計之。歲終則會計行事吏職，當考知功過也。」案：稍食與祿異，詳前疏。

注云「行事，吏職也」者，上文稽其功緒，注云「功，吏職也」。此云行事，與上文功是一，故注亦同。凡邦之大

事，令于王宮之官府次舍，無去守而聽政令。使居其處待所為。【疏】「凡邦之大事」者，全經各職

所掌大祭祀、大會同、大賓客、大喪、大師、大田諸事，皆為大事。此邦之大事，王宮有戒守，則當謂有寇戎及大喪之事。賈疏據《左傳》「國之大事在祀與戎」，然大祀，宮中不必有戒守之事，疑此大事不關祀也。《宮伯》「邦有大事」，疏亦惟以寇戎為釋。

注云「使居其處待所為」者，賈疏云：「謂使之皆在次舍，不得去部所守而聽待政令，須有所

為。」春秋以木鐸脩火禁。火星以春出，以秋入，因

天時而以戒。【疏】「春秋以木鐸脩火禁」者，亦士師宮禁

之一端，謂於宮中警官衆，與司烜氏脩國中火禁，內外職掌互相備也。脩火禁，亦文事，故奮木鐸。注云「火星以

春出，以秋入」者，明脩火禁必以春秋之義。《司烜》云「季

春出火，季秋內火」。先鄭注云：「以三月本時昏，火星見

於辰上，使民出火；九月本黃昏，火星伏在戌上，使民內

火。火星即心星，詳彼疏。云「因天時而以戒」者，即因出

火入火之時而施禁以戒救之也。賈疏云：「此謂宮正於宮

中特宜慎火，故脩火禁。《夏官·司烜》云「掌行火之政令，

四時變國火以救時疾」。下又云「時則施火令」。為焚萊之

時，故脩火禁也。《秋官·司烜》云「中春以木鐸脩火禁于

國中」。注云：「為季春出火也。火禁，謂用火之處及備風

燥。」是二月預脩之，三月重掌事，各有所為，不相妨也。」

案：經云春秋，不云何月，賈據注推之，謂當在季春季秋，

則火出人之後也。姜兆錫云：「春秋謂仲春卯月、仲秋酉

月也。以《司烜氏》「中春以木鐸脩火禁」推之可見。」案：

依姜說，則脩火禁在火出人之先，於經義並可通。若然，司

①「學記」，疑當作「少儀」。

烜氏歲止一脩火禁。此官掌宮政，於火禁尤重，故歲兩脩之與？凡邦之事蹕宮中廟中，則執燭。鄭司農

讀火絕之，云「禁凡邦之事蹕」，國有事，王當出，則宮正主禁絕行者，若今時衛士填街蹕也。宮中廟中則執燭，宮正主爲王於宮中廟中執燭。玄謂事，祭事也。邦之祭社稷、七祀於宮中，祭先公、先王於廟中，隸僕掌蹕止行者，宮正則執燭以爲明。《春秋傳》曰「有大事於大廟」，又曰「有事於武宮」。【疏】「凡邦之事蹕宮中廟中，則執燭」者，賈疏云：「謂祭祀之事，王當出入來往時，隸僕與王蹕止行人於宮中及廟中也。王出向二處，當侵晨而行，爾時則宮正爲王執燭爲明也。」詒讓案：執燭，與宮人、閹人爲官聯也。此官唯掌執燭，本不掌蹕事。但其執燭，以隸僕之蹕爲節。蓋必王親與祭事乃有蹕；若小祭祀及祈禱王所不與者，則無蹕，此官亦不執燭，當別使賤者執之。《燕禮》云：「宵則庶子執燭于阼階上，司宮執燭于西階上，甸人執大燭于庭閭人爲大燭于門外。」《大射儀》亦同。鄭注云：「燭，燠也。」彼司宮爲宮人，則庶子當即宮伯所掌之士庶子，蓋亦兼屬宮正，《禮經》與此經義不迂也。注云「鄭司農讀

火絕之，云禁凡邦之事蹕，國有事，王當出，則宮正主禁絕行者」者，邦，舊本作「國」，今從宋余仁仲本。賈疏云：「先

鄭讀火絕之，則火字向上爲句也。其「禁」自與「凡邦之事蹕」共爲一句。宮正既不掌蹕事，若如先鄭所讀，則似宮正爲王蹕，非也。」武億云：「《司烜氏》中春以木鐸脩火禁于國中」，此即火禁連文之徵。」案：武說是也。此凡邦之事，

與上文凡邦之大事，文例亦正同。先鄭讀二句並不辭，故後鄭不從。又案：《文選》潘岳《藉田賦》云：「宮正設門閭之蹕。」此用先鄭義也。李善注引《周禮·宮正》「凡邦之事蹕宮中」，則與二鄭讀並不合，不可從。云「若今時衛士填街蹕也」者，孔廣森云：「衛宏《漢舊儀》曰：「輦動則左右侍帷幄者稱警，車駕則衛宮填街，騎士塞路，出殿則傳蹕。」詒讓案：先鄭意宮正掌宿衛，故又爲王蹕，與漢衛士蹕事相類，故舉以爲況。《文選·赭白馬賦》注引應劭《漢官儀》亦云：「大駕鹵簿，五營校尉在前，名曰填街。」今本《文選注》作「填衛」，誤。互詳《閹人》疏。云「宮中廟中則執燭，宮正主爲王於宮中廟中執燭」者，舊本「廟中」下有「則」字，今據宋本、注疏本刪。先鄭以蹕與執燭並爲宮正之事，蹕在宮外，執燭則在宮內，謂宮廟二處並當執燭也。宮正不主宮外之事，則不得在外爲王蹕，宮內之蹕，又自有隸僕掌之，故後鄭不從。云「玄謂事，祭事也」者，破先鄭國有事爲泛指王出行幸之事。賈疏云：「謂在宮中廟中二處皆有祭事

也。「云「邦之祭社稷七祀於宮中」者，賈疏云：「《小宗伯》云「左宗廟，右社稷」，在宮中中門之外也。依《祭法》「王爲羣姓立七祀：曰司命，曰中雷，曰國行，曰國門，曰泰厲，曰戶，曰竈」。案《司門》云「凡歲時之門受其餘」，則此七祀等是謂羣姓所立者，不在宮中也。《祭法》又云「王自爲立七祀」者，此則禱祀在宮中者也。」案：社稷當在中門內，賈依鄭義謂在中門外，非也。詳《小宗伯》疏。又案《月令》注云「凡祭五祀於廟」，孔疏云：「《中雷禮》文，設祭戶、祭中雷，在於廟室之中。若祀竈、祀門、祀行，皆在廟門外。七祀加司命與厲，亦當與竈門行等俱在廟門之外祀也。總在宮內，故《宮正》注云「祭社稷七祀於宮中」。案：如孔說，則七祀皆在廟門內外，鄭以廟亦在宮中。但此經以廟與宮對文，明廟以祭祖考爲主，餘祀並統於宮，然則此注與《月令》注義亦無注也。云「祭先公先王於廟中」者，《司服》注云「先公謂后稷之後，大王之前，不啻至諸塾」是也。后稷及大王以後諸王，並爲先王。詳彼疏。云「隸僕掌蹕止行者」者，破先鄭爲宮正蹕也。《隸僕》云「掌蹕宮中之事」。先鄭彼注云「蹕謂止行者，清道」。後鄭以「凡邦之事蹕宮中廟中」爲句，謂二處蹕止行人，並隸僕所掌，不關宮正。《閭人》云「大祭祀，喪紀之事蹕宮門廟門」，與此文例正相類。

云「宮正則執燭以爲明」者，賈疏謂王侵晨行，執燭爲明。案《祭義》云：「周人祭日，以朝及闇。」彼雖謂郊祀，其宗廟之祭當亦然，然則及闇亦當執燭爲明也。引《春秋傳》曰「有大事於大廟」者，《春秋》文二年經：「秋八月丁卯，大事于大廟。」三家經並同。鄭此引以經爲傳，又大事上有「有」字，蓋偶誤記。大事，《公》、《穀》以爲大禘，《左傳》杜注以爲大禘，此引以證祭祀爲邦事也。云「又曰有事於武宮」者，昭十五年經：「春二月癸酉，有事于武宮。」《左傳》杜注云：「武宮，魯武公廟。」此武宮亦廟也。鄭引之者，亦以證有事爲祭祀事也。大喪，則授廬舍，辨其親疏貴賤之居。廬，倚廬也。舍，聖室也。親者貴者居倚廬，疏者賤者居聖室。《雜記》曰：「大夫居廬，士居聖室。」【疏】「大喪則授廬舍」者，賈疏云：「大喪謂王喪，臣子皆爲之斬衰，則同廬舍，所居則異也。」案：此大喪當亦兼先后及王后之喪言之，賈說未咳。《說文·手部》云：「授，予也。」以廬舍授予當居者。云「辨其親疏貴賤之居」者，惠士奇云：「《荀子·大略》曰「吉事尚尊，喪事尚親」。故欲辨貴賤，先辨親疏；既序親疏，又分貴賤。同一居廬，或官或袒，或隱或顯。貴非人君則袒之，親非適子則隱之，尚親而

兼尚尊也。」注云「廬，倚廬也」者，《喪大記》云：「父母

之喪，居倚廬不塗，君爲廬，宮之，大夫士禮之。既葬，柱楣塗廬。不於顯者，君大夫士皆宮之。凡非適子者，自未葬以於隱者爲廬。」注云：「宮謂圍障之也。禮，袒也，謂不障。」《既夕記》云「居倚廬」，注云：「倚木爲廬，在中門外，東方北戶。」《白虎通義·喪服篇》云：「所以必居倚廬何？孝子哀不欲聞人之聲，又不欲居故處，居中門之外，倚木爲廬，質反古也。不在門外何？戒不虞故也。故《禮間傳》曰：父母之喪，居倚廬於中門外東牆下，戶北向。」賈疏云：「謂於路門之外東壁，倚木爲廬。」云「舍，聖室也」者，《喪大記》云：「既練，居聖室，不與人居。既祥，黜聖。」注云：「黜聖，聖室之節也。地謂之黜，牆謂之聖。」又《喪服傳》云「既練，舍外寢」，注云：「舍外寢，於中門之外屋下，壘塹爲之，不塗塹，所謂聖室也。」《白虎通義·喪服篇》云：「練而居聖室，無飾之室。」賈疏云：「舍對廬，故爲聖室。聖室者，兩下爲之，與廬異。」惠士奇云：「倚廬不塗，既葬塗廬，塗近乎聖。」《釋名》云：「聖，亞也，次也。先泥之，次乃飾以白灰。」康成謂聖室者，屋下壘塹爲之。蓋柱楣倚壁爲一偏，壘塹成屋爲兩下。然則既葬塗之，既練壘之，既祥又加黜聖，總謂之廬。故《尚書大傳》曰「高宗有親

喪，居廬三年」，此之謂也。」云「親者貴者居倚廬，疏者賤者居聖室」者，《雜記》云：「疏衰皆居聖室，不廬。廬，嚴者也。」注云：「言廬哀敬之處，非有其實則不居。」然則親者貴者居倚廬，亦以親貴主嚴也。賈疏云：「親謂大功以上，貴謂大夫以上者，居倚廬。疏謂小功緦麻，賤謂士，二者居聖室。知義如此者，以其經云辨其親疏貴賤，明當如此解之也。」吳廷華云：「倚廬皆在寢門之東，適子當逼寢門，餘以次而東，蓋以親疏別遠近也。又曰貴賤者，爲異姓之臣言之。親者在前，疏者在後；同姓在前，異姓在後。」案：依吳說，則同一居倚廬，亦自有親疏貴賤之異，聖室亦然，足與鄭義互相備。引《雜記》曰「大夫居廬，士居聖室」者，鄭彼注云「謂未練時也」。賈疏云：「彼是諸侯之臣，其大夫居廬，士居聖室。彼注士居聖室，亦謂邑宰也。朝廷之士亦居廬。引之者，證貴者居廬，賤者居聖室，一邊之義耳。其實爲諸侯禮，不辨親疏貴賤，而別其遠近，並爲天子之臣也。」《雜記》孔疏云：「按《間傳》云：「斬衰之喪居倚廬，既練居聖室。」此經若練後則大夫居聖室，今云大夫居廬，明未練時也。士若非邑宰，未練之前，當與大夫同居廬，今云居聖室，故知是邑宰也。必知邑宰者，以上文云「大夫終喪，士練而歸」，言邑宰之士降於大夫；此云「士居

堊室」，亦降於大夫，故知是邑宰之士也。朝廷之士亦居廬者，以臣爲君喪，俱服斬衰，故知未練之前，士亦居廬也。然《周禮·宮正》注云「親者貴者居廬，疏者賤者居堊室」，引此《雜記》云「大夫居廬，士居堊室」，則是大夫以上定居廬，士以下定居堊室。此云朝廷之士亦居廬，與彼不同者，尋鄭之文意，若與王親者，雖云士賤，亦居廬，則此云「朝廷之士亦居廬」是也。若與王無親，身又是士，則居堊室，則此經「士居堊室」是也。故鄭於《宮正》之注引此士居堊室，證賤者居堊室。若與王親，雖疏但是貴者，則亦居廬也。庾氏、熊氏並爲此說。熊氏或說云：「若天子，則大夫居廬，士居堊室，則《雜記》言是也。若諸侯，則朝廷大夫士皆居廬也，邑宰之士居堊室，《宮正》之注是也。」此義得兩通，故並存焉。」案：孔引庾、熊二家說，即賈氏所本。熊氏或說與《雜記》注義違，此注又不得據諸侯制，非鄭指也。依庾、熊、賈說，則《喪服》斬衰皆居倚廬，既練居堊室，乃據親者言之。《雜記》所云，爲疏者之法，則士於君，雖斬衰亦降居堊室。蓋於貴賤之中，復以親疏別爲差次。經記各舉一隅，不容泥也。

周禮正義卷七

宮伯掌王宮之士庶子，凡在版者。

鄭司農云：「庶子，宿衛之官。版，名籍也，以版爲之。今時鄉戶籍謂之戶版。」玄謂王宮之士，謂王宮中諸吏之適子也。庶子，其支庶也。【疏】「掌王宮之士庶子」者，與諸子爲官聯也。凡國子皆掌於諸子。其入衛王宮者，則別以宮伯領之，諸子不掌宮政也。云「凡在版者」者，版即宮正之版，宮正通掌宮中官府衆寡之版，宿衛士庶子，蓋亦咳於其中。此官則案宮正之版以令其職事。其不入宿衛者，別著於司士之版，諸子治之。注鄭司農云「庶子，宿衛之官」者，謂公卿大夫士之子宿衛王宮者，雖有未受爵命者，亦謂之官，猶庶人在官者亦謂之官也。賈疏謂「先鄭此注謂若夏官諸子職，彼諸子是下大夫，此宮伯中士，不合掌之，故後鄭不從。」非也。諸子雖亦名庶子，然彼爲帥領庶子之官。經中凡言庶子者，乃諸子所屬之人，並非宿衛專職，先鄭何得援彼釋此乎！云「版，名籍也」者，《宮正》注義同。云

「以版爲之」者，釋名版之義。《論語·鄉黨》皇疏云：「版謂邦國圖籍也。古未有紙，凡所書畫皆於版，故云版也。」《管子·宙合篇》尹注云：「版，牘也。」《說文·片部》云：「版，判也。牘，書版也。」案：判木以書之故謂之版。王充《論衡·量知篇》云：「斷木爲契，枿之爲版，力加刮削，乃成奏牘。」然則版即牘之未甚刮削者也。亦謂之方，《荀族氏》注云：「方，版也。」云「今時鄉戶籍，謂之戶版」者，《大胥》注同。《漢書·高帝紀》詔曰：「民前或相保聚山澤，不書名數。」顏注云：「名數謂戶籍也。」案：鄉戶籍者，即謂鄉里戶口之名數也。漢時戶籍亦以版書之，故又謂之戶版。《御覽·學部》引《晉令》云：「郡國諸戶口黃籍，籍皆用一尺二寸札。」札即版也。漢戶版制，或與晉同。云「玄謂王宮之士，謂王宮中諸吏之適子也，庶子，其支庶也」者，《御覽·職官部》引環濟《要略》說同，此增成先鄭義也。諸吏，即《宮正》注云「官府之在宮中者，若膳夫、玉府、內宰、內史之屬」是也。賈疏云：「吏謂卿大夫士之摠號，以其宮正掌宮中官府，宮伯掌其子弟故也。」惠士奇云：「《趙策》，左師觸龍願以其少子補黑衣之缺，以衛王宮，則知戰國時衛王宮者，皆卿大夫之庶子。即《夏官·諸子職》所謂「國有大事則帥國子而致於太子」，《文王世子》所謂「公若有出

疆之政，庶子以公族之無事者守於公宮。公族之無事者，國之貴遊子弟也。」^①詒讓案：《稿人》「饗士庶子」，後鄭彼注云「士庶子，卿大夫士之子弟宿衛王宮者」。與此注同。而《大司馬》「王弔勞士庶子」，注云「庶子，卿大夫之子從軍者，或謂之庶士」。《都司馬》「掌都之士庶子及其衆庶之戒令」，注云「庶子，卿大夫士之子」。彼二注以庶子爲卿大夫之子，不分適庶，則士卽指上中下士，又與此注微異。蓋鄭本無定解。以經攷之，士庶子不當分適庶，此注義非也。金榜云：「公卿大夫之子弟當學者謂之國子，其職宿衛者則謂之庶子。《周官經》言士庶子者甚衆：《宮伯》「掌王宮之士庶子凡在版者」，《酒正》「凡饗士庶子皆共其酒」，《外饗》「饗士庶子掌其割亨之事」，《大司馬》「王弔勞士庶子則相，大會同則帥士庶子而掌其政令」，《都司馬》「掌都之士庶子之戒令」，《掌固》「頒其士庶子及其衆庶之守」。鄭注云：「王宮之士，謂王宮中諸吏之適子，庶子其支庶也。」竊以羣經考之，《象胥》「凡作事，王之大事諸侯，次事卿，次事大夫，次事上士，下事庶子」；《掌客》「王巡守殷國，從者三公眡上公之禮，卿眡侯伯之禮，大夫眡子男之禮，士眡諸侯之卿禮，庶子壹眡其大夫之禮」。周人凡賓客之事，《射人》作卿大夫從，《司士》作士從，《諸子》作羣子從。凡庶子於

士，相差一等，故《燕禮》、《大射禮》於獻大夫獻士後，並云主人洗，升自西階，獻庶子于阼階上，如獻士之禮。《燕義》：「席小卿次上卿，大夫次小卿，士庶子以次就位於下。獻君，君舉旅行酬而後獻卿，卿舉旅行酬而後獻大夫，大夫舉旅行酬而後獻士，士舉旅行酬而後獻庶子。」此其先後受獻之差。王宮之士庶子在版者，未聞其數，而《朝大夫》「每國庶子八人」，《都則》「庶子四人」，《司士》「掌羣臣之版，周知卿大夫士庶子之數」。是庶子雖未受爵王朝，而其數已列於羣臣之版。如是，蓋已命者謂之士，《司士》所云「王族故士在路門之右」是也。未命者謂之庶子，《大僕》所云「聞鼓聲則速逆御僕與御庶子」是也。此公卿大夫之子弟宿衛王宮，而或曰士，或曰庶子，所由名位不同，要不以適庶殊也。」俞正燮云：「《宮伯》云「王宮士庶子」，《外饗》、《酒正》云「饗士庶子」，《司士》云「辨卿大夫士庶子之數」，《象胥》云「次事上士，次事庶子」，庶子在士下也。《大僕》云「聞鼓聲則速逆御僕與御庶子」，庶子在僕下也。《掌客》云「士眡諸侯卿，庶子眡諸侯大夫」，庶子從王禮，在士從王下也。《朝大夫·序官》云，每國庶子八人，都則四人，其官列在士

① 「之」原訛作「子」，今據惠士奇《禮說》改。

府史下也。《燕禮》、《大射禮》有庶子執燭阼階上；《大射儀》獲者執薦，庶子執俎從之，設於乏南，與服不氏徒四人等。《燕禮》、《大射儀》之庶子，與《周官》所名庶子者同。《韓非子·內儲說》上云「商大宰使少庶子之市」，又云「卜皮爲縣令，使少庶子佯愛於御史」，《內儲說》下云「濟陽君有少庶子不見知」，又云「晉平公觴客，少庶子進炙」。《國策》云秦王庶子蒙嘉，呂不韋庶子甘羅，韓太子庶子強。《史記·扁鵲列傳》云「號門下中庶子」，蓋典謁者，士大夫家有之。《夏官·都司馬》云「掌都之士庶子戒令，家司馬亦如之」。則都有庶子，如卜皮之庶子是也。家有庶子，如呂不韋之庶子是也。《史記·商君列傳》云「魏人爲魏相公叔痤中庶子」，亦家臣也。」案：金、俞說並覈。金謂士庶子以已命未命爲別，亦致塙。蓋周時凡貴族子弟，無論適庶，並謂之國子，師氏所教，保氏所養，諸子所掌者是也。國子之中，適者謂之門子，小宗伯所掌者是也。其以才藝選擇爲宿衛及給侍御守圉者，謂之士庶子，則無適庶之分。其備宿衛者，亦不必王宮內諸吏之子也。凡士庶子或出於王族，其在侯國謂之公族，故衛宏《漢舊儀》云「周千八百諸侯，其長伯爲君，次仲叔季爲卿大夫，其支屬爲士庶子，皆世官位」是也。或出於異姓卿大夫士子弟，若趙左師觸龍

請以少子衛王宮是也。綜校全經，士庶子內備宿衛，外從巡守，且歲時有饗，死傷有弔勞，職任既親，恩禮尤備，其爲貴游子弟，殆無疑義。《象胥》、《掌客》敘庶子於士之下，皆單稱庶子，不連士爲文。則經之凡言士庶子者，所謂士即上中下士，凡王族及羣臣子弟既命而有爵者，如《司士》「王族故士」是也。《春秋繁露·爵國篇》說天子官制云「士人仕宿衛天子者比下士」，蓋即指此。其未命者，下士一等，則與庶人在官者等，以其世家貴胄殊異之，故不曰庶人而曰庶子。其他公邑及都家咸有貴族，侯國亦有公族世族，故亦有庶子，若《掌固》、《朝大夫》諸職及《燕禮》、《大射儀》所云皆是。《新序·雜事篇》云：「楚莊王中庶子曰：臣尚衣冠御郎十三年矣，前爲豪矢，而後爲藩蔽。」《墨子·尚賢上篇》又謂之「門庭庶子」。此亦侯國宿衛侍從之庶子，以其侍御宮庭，故謂之中庶子。《書·康誥》又有外庶子，外者對中之言，謂庶子之不充宿衛者也。至《韓非子》、《戰國策》及《史記》所說庶子，蓋皆良家少年子弟爲家臣給使令者，雖職事卑賤，然亦《周官》都家庶子之遺制也。夏官諸子職兼掌庶子，《燕禮》謂之庶子正。若此經及《燕禮》、《大射儀》所云庶子，即諸子所掌之人，而非官。鄭《儀禮注》誤會《燕義》之文，遂盡以彼庶子爲諸子官，非也。又《小司

徒之「餘子」，鄭注云「卿大夫之子」，蓋亦謂即庶子。今案：彼餘子乃羨卒，與庶子異，鄭并爲一，亦非。詳《諸子》及《小司徒》疏。掌其政令，行其秩敘，作其徒役之事，秩，祿稟也。敘，才等也。作徒役之事，天子所用。

【疏】「掌其政令」者，凡宿衛士庶子所有政治戒令，此官並專主之也。云「行其秩敘」者，行謂巡行校比之也。賈疏云：「秩謂依班秩受祿。敘者，才藝高下爲次第。」王引之云：「秩敘謂士庶子更番宿衛之次第。一月之次謂之秩，一歲之次謂之敘。故下文月終則均秩，歲終則均敘。均者齊其勞逸，行者巡其先後也。《里宰》：『以歲時合耦于耨，以治稼穡，趨其耕耨，行其秩敘』，正同義，不得以爲祿稟才等也。又《鄉師》：『凡邦事，令作秩敘』，亦謂役邦事之人，鄉師爲之次第而頒之，使各以其次服役，豈有祿稟與才等乎！秩與敘同意。彼注訓敘爲次，是也；訓秩爲常，則非也。」案：王說是也。凡經云秩敘者，並當爲顛之借字。《說文·豐部》云「顛，爵之次第也」，引《虞書》曰「平顛東作」。今經典通借秩爲之。注云「秩，祿稟也」者，《左》莊十九年傳「收膳夫之秩」。杜注云：「秩，祿也。」《荀子·彊國篇》云「士大夫益爵，官人益秩，庶人益祿」。楊注云：「秩祿

皆謂廩食也。」鄭意後文云「月終則均秩」，即《宮正》云「月終則會其稍食」，故以祿稟爲釋。然彼二文實不相涉，此義未塙也。祿稟，詳《宮正》疏。云「敘，才等也」者，敘，注例當作「序」，詳《小宰》疏。《說文·支部》云：「敘，次第也。」《司勳》注云：「等猶差也。」鄭意後文云「歲終則均敘」即《宮正》「歲終則會其行事」，故以才等爲釋，此義亦未塙。才等，謂才高下之等差也。云「作徒役之事，天子所用」者，據《諸子》云「國有大事，則帥國子而致于天子，唯所用之」。又云「凡國正勿及」。是它官不得役國子。此宿衛士庶子，即於國子中選擇用之。鄭意宮伯雖專主宮中士庶子，與諸子通掌國子不同，然庶子本屬天子，則天子有事，得役宮衆，故據彼文爲釋。授八次八舍之職事。衛王宮者，必居四角四中，於徽候便也。鄭司農云：「庶子衛王宮，在內爲次，在外爲舍。」玄謂次，其宿衛所在；舍，其休沐之處。【疏】注云「衛王宮者，必居四角四中，於徽候便也」者，賈疏云：「以其言八，似若八方爲四方四維然，相徽察來往候望皆便，故次舍皆八也。」孔廣森云：「此約漢法言之，《西京賦》所謂衛尉八屯者也。」案：孔說是也。薛綜《西京賦》注云：「衛尉帥吏士周宮外，於四方四角立八屯士，士則傳宮外向爲廬舍。」與此注四角四中之制正相似。

徵候者，《說文·彳部》云：「徵，循也。」《人部》云：「候，伺望也。」《漢書·百官公卿表》云：「中尉掌徵循京師」，顏注引如淳云：「所謂游徵循禁盜賊也。」此士庶子亦掌游徵循行宮內外同望非常也。鄭司農云「庶子衛王宮，在內爲次，在外爲舍」者，王南宮、北宮，非宿衛所居，則內當謂路門外、應門內及北宮以後，皆有八次，依方位分列其間。凡路門外之次，皆在治朝左右；八舍則在皋門內，及東西北宮周垣之內，環繞列處。《周書·克殷篇》云「王入卽位于社大卒之左」。孔注云：「大卒，屯兵以衛也。」《國語·楚語》云：「榭度於大卒之居。」案：大社在治朝之右，而大卒之居與彼相近，然則榭或卽宿衛八屯之一與？云「玄謂次，其宿衛所在，舍，其休沐之處」者，賈疏云：「謂宿衛之處稍在前爲之館也。舍者，若《掌舍》之舍，亦舍息休止之處，故鄭爲休沐之處也。」詒讓案：《宮正》注以次爲諸吏直宿之處，舍爲其所居寺，義與此注同。然則此次，亦卽衛士直宿之處，舍，其聚居之官寺。宿衛必分班更迭入直，退直則歸休沐。《初學記·政理部》云：「休假亦曰休沐。漢律，吏五日得一休沐，言休息以洗沐也。」依後鄭義，宿衛士庶子當直，則宿於路門及闔門外之八次；退直休沐，則止於皋門內之八舍。士庶子之次舍，雖並在宮中，亦自有內外之

別。二鄭說本不異，賈謂後鄭不從先鄭，非也。若邦有大事作宮衆，則令之。謂王宮之士庶子，於邦有大事，或選當行。【疏】「若邦有大事作宮衆，則令之」者，賈疏云：「事亦謂寇戎之事。作，起也。謂起宮中之衆，使士庶子行，則宮伯戒令之。」詒讓案：大事亦當兼大喪戒守及王巡守殷國士庶子從行，不徒大師也。互詳《宮正》疏。

注云「謂王宮之士庶子，於邦有大事，或選當行」者，明宮衆卽宿衛士庶子也。《象胥》云「凡作事，王之大事諸侯，次事卿，次事大夫，次事上士，下事庶子」。彼下事不作士以上，而大事作諸侯等，不妨兼及士庶子。此大事則或有急變，宮衆亦被選當行，與彼文不迂也。月終則均秩，

歲終則均敘。以時頒其衣裘，掌其誅賞。頒讀爲班。班，布也。衣裘，若今賦冬夏衣。【疏】「月終則均秩，歲終則均敘」者，謂均平其番直之次也。鄭前注以秩敘爲祿稟才等，義未允。惠士奇云：「《宮正》之士庶子，月終則均秩，歲終則均敘，猶漢之衛卒、唐之府兵也。漢之衛卒，每一歲而更；唐之府兵，宿衛者皆月上。然則月終

① 據惠士奇《禮說》，「宮正」當作「官伯」。

均秩者，猶府兵之月上；歲終均敘者，猶衛卒之歲更。蓋番上更休，皆有秩敘，各得其均。」案：惠說是也。此士庶子皆公卿大夫士之子弟，雖與漢衛卒、唐府兵微異，然其更番宿衛，則與歲更月上之制略同。云「以時頒其衣裘」者，賈疏云：「夏時班衣，冬時班裘。」

注云「頒讀爲班，班，布也」者，此與《大宰》「匪頒」義同。彼先鄭注亦云「頒讀爲班布之班，謂班賜也」。班訓布，《大史》注亦同。《小爾雅·廣詁》云：「頒，布也。」《廣雅·釋詁》云：「班，布也。」是頒班義通。云「衣裘若今賦冬夏衣」者，鄭舉漢法爲況，明此頒爲常賜也。漢時宿衛吏士蓋有賦冬夏衣。賈疏云：「賦，班也。班之與賦，皆賜授之義。」

膳夫掌王之食飲膳羞，以養王及后、世

子。食，飯也。飲，酒漿也。膳，牲肉也。羞，有滋味者。

凡養之具，大略有四。【疏】「掌王之食飲膳羞」者，掌其等

數政令，分令饔人、酒人、漿人、庖人、籩人、醢人等共之。云「以養王及后、世子」者，《春秋》僖五年《穀梁傳》云：「天子世子，世天下也。」《公羊傳》云：「世子猶世世子也。」《白虎通義·爵篇》云：「父在稱世子何？繫於君也。所以名

之爲世子何？言欲其世世不絕也。何以知天子之子亦稱世子也？《春秋傳》曰：「公會王世子于首止。」或曰天子之子稱太子，《尚書》曰：「太子發升于舟。」案：世大字通，此經竝稱世子，唯《諸子職》云「國有大事，則帥國子而致於大子」，明世大得互稱也。又《司市》「世子」爲國君之子，與此異。賈疏云：「舉尊者而言，其實羣臣及三夫人以下亦養之。」案：賈兼及羣臣者，謂貴近諸臣食於官者，若《左》襄二十八年傳說齊卿有公膳是也。膳夫當亦掌其膳羞之法數，其退食於家，則非此官所掌也。

注云「食，飯也」者，《釋文》云：「飯，依字作飢」。案：《說文·食部》云：「食，米也。」「飯，食也。」飢即飯之俗，陸說非。《淮南子·主術訓》高注云：「穀食曰食。」此食即六穀之飯，《食醫》謂之六食。《內則》云「飯，黍、稷、稻、粱、白黍、黃粱、稻、樵。食，蝸醢而苾食雉羹，麥食脯羹雞羹，析稌犬羹兔羹」是也。云「飲，酒漿也」者，《說文·飲部》云：「飲，飲也。」飲即飲之隸變。《釋名·釋飲食》云：「飲，奄也，以口奄而引咽之也。」案：酒即《酒正》之三酒，漿即下六清。而六清內之醴醫，亦通爲酒，並所以供飲，故通謂之飲。云「膳，牲肉也」者，《廣雅·釋器》云：「膳，肉也。」謂正饌皆六牲之肉。云「羞，有滋味者」者，《庖人》注義同。庶羞百

有二十品，皆肉及菜果之有滋味者，故於膳之外別言之。案：《內則》載上大夫庶羞二十豆，目之爲膳。彼庶羞卽此羞。六牲之外，有雉兔鶉鴛，亦名膳者，蓋散文得通。云「凡養之具，大略有四」者，賈疏云：「下文仍有珍用八物，醬用百有二十饔，不言之者，此舉大者。珍醬是饋之小者，略而不言。」凡王之饋，食用六穀，膳用六牲，飲用六清，羞用百有二十品，珍用八物，醬用百有二十饔。進物於尊者曰饋。此饋之盛者，王舉之饌也。六牲，馬牛羊豕犬雞也。羞，出於牲及禽獸，以備滋味，謂之庶羞。《公食大夫禮》：《內則》下大夫十六，上大夫二十，其物數備焉。天子諸侯有其數，而物未得盡聞。珍謂淳熬、淳毋、炮豚、炮牂、擣珍、漬、熬、肝腎也。醬謂醯醢也。王舉則醢人共醢六十饔，以五齋、七醢、七菹、三醢實之。醢人共齋菹醢物六十饔。鄭司農云：「羞，進也。六穀，稌、黍、稷、粱、麥、苽。苽，彫胡也。六清，水、漿、醴、醕、醫、醢。」【疏】「凡王之饋」者，此王饋食之大數也。王舉則此官依法數共而親饋之。注云「進物於尊者曰饋」者，賈疏云：「據此文云王之饋，及《少牢》《特性》皆云饋食，是進物於尊者曰饋。鄭注《玉府》云通行曰饋者，彼

對獻是進物於尊，則饋是通行也。」詒讓案：此謂膳夫親進饋於王也。《說文·食部》云：「饋，餉也。」《淮南子·詮言訓》許慎注云：「饋，進食也。」《士虞禮》「特豕饋食」，注云：「饋猶歸也」。凡經典於生人飲食、鬼神祭享通謂之饋，亦並取進餉之義，本不辨尊卑，鄭緣文爲訓耳。云「此饋之盛者，王舉之饌也」者，食膳飲羞珍醬六者咸備其物，是饋饌之至盛者，故下注云「殺牲盛饌曰舉」。但此皆通舉大數，不必盡用；其常食亦取具於是，而數尤少，唯王所欲而進之。云「六牲，馬牛羊豕犬雞也」者，《牧人》注義同。《說文·牛部》云：「牲，牛完全也。」引申爲凡畜之稱。鄭意此六牲卽《庖人》之六畜，故彼注云「始養之曰畜，將用之曰牲」是也。王引之云：「此六牲與《牧人》不同。《牧人》之六牲謂馬牛羊豕犬雞，此六牲則牛羊豕犬鴈魚也。蓋膳夫之食飲膳羞，與食醫之六食六飲六膳百羞相應。《食醫職》曰：「凡會膳食之宜，牛宜稌，羊宜黍，豕宜稷，犬宜粱，鴈宜麥，魚宜苽。」牛、羊、豕、犬、鴈、魚，所謂六膳也。稌、黍、稷、粱、麥、苽，所謂六食也。鄭司農以稌黍稷粱麥苽爲六穀，其說洵不可易。由是推之，則牛羊豕犬鴈魚，亦膳夫之六牲明矣。鴈謂鴈也。《堯典》「二生一死贊」，馬融以二生爲羔鴈。《史記·封禪書》、《漢書·郊祀志》並作「二

牲」，蓋羔與騂皆常畜之物，故謂之牲也。魚亦可畜之池，故亦謂之牲。《大司馬》「大祭祀饗食羞牲魚」，鄭司農曰「大司馬主進魚牲」是也。牛宜稌、羊宜黍、豕宜稷、犬宜粱、鴈宜麥、魚宜苽，猶《月令》食麥與羊、食菽與雞、食稷與牛、食麻與犬、食黍與彘，皆以牲配穀。鄭未考《食醫》之文，故說之未確。案：王說是也。姜兆錫說同。此經所用者，生人膳食之六牲，牧人所掌者，鬼神祭祀之六牲也。馬尤爲大牲，不以供膳羞，惟大司馬喪祭奉之，明其不常用也。云「羞出於牲及禽獸，以備滋味，謂之庶羞」者，《公食大夫禮》「士羞庶羞」，注云：「庶，衆也。進衆珍味可進者也。」案：庶羞者，別於正饌之言。凡祭禮、食禮，三牲骨體、腸胃、膚、魚、腊並在俎，肉羹滷在鉶，及豆醬之醢醢，是爲正饌。此外三牲臠臠炙，及他禽獸蟲魚菜果衆物在籩豆者，並謂之庶羞，是爲加饌，所以備極珍味，故其數特多也。賈疏云：「案《公食大夫》，下大夫十六豆中，從腳臘臠已下，皆出於牲，不見有出禽獸者。上大夫加以雉、兔、鶉、鴛，此則出禽獸也。」案：據《內則》，庶羞尚有出於蟲魚菜果者，鄭、賈不言，亦文不具也。又案：此羞百二十品，據共王饋食庶豆之大數言之。其飲酒則又有籩，二者通爲百二十。王與賓客饗食燕，蓋亦用之，而數則有隆殺不同。

其祭禮朝事饋食之豆籩，加豆籩羞籩，亦通謂之薦羞。詳《宰夫》、《籩人》、《醢人》疏。云「《公食大夫禮》、《內則》下大夫十六，上大夫二十，其物數備焉」者，《公食禮》載國君食下大夫之庶羞：腳一，臘二，臠三，牛炙四，醢五，牛載六，醢七，牛鮓八，羊炙九，羊載十，醢十一，豕炙十二，醢十三，豕載十四，芥醬十五，魚膾十六，所謂下大夫十六豆也。《公食禮》又云：「上大夫庶羞二十，加於下大夫以雉兔鶉鴛。」則雉十七，兔十八，鶉十九，鴛二十也。《內則》文與《公食禮》同，惟以牛鮓爲牛膾，鴛爲鶉，所謂上大夫二十豆也。是上下大夫禮其物數備於彼二經也。云「天子諸侯有其數，而物未得盡聞」者，賈疏云：「此經云百有二十者，是天子有其數。《掌客》云「上公食四十，侯伯三十二，子男二十四」，是諸侯有其數也。天子諸侯之數，皆從上大夫二十豆上加之。《內則》云「牛脩及爵、鶉、鴈、范、芝栢」已下三十一物，鄭注云「皆人君燕食所加庶羞也」。《周禮》天子羞用百有二十品，記者不能次錄，亦是有其物未盡聞也。」案：賈謂天子庶羞百二十品，以籩豆分之，則六十豆也。凡食有正豆，有庶羞之豆。《掌客》致飧正豆謂之豆，庶羞謂之食，其數正等。以次差之，天子正豆與庶羞，蓋皆六十。此經醬用百二十甕，正豆即在其內。饋食之庶羞唯有

豆，其見於《掌客》、《公食大夫禮》者，並爲豆而無籩。而《內則》牛脩等三十一物，鄭並以爲庶羞，內有脩脯、棗栗棗，皆見於《籩人》，則鄭謂庶羞亦有籩，蓋燕飲之所用也。《禮器》云：「天子之豆二十有六，諸公十有六，諸侯十有二，上大夫八，下大夫六。」鄭彼注及《掌客》注謂彼皆堂上正豆，孔疏引熊安生說以爲正羞醢醢百二十饗之等是也。彼疏又引皇侃云：「天子庶羞百二十品，籩豆各六十。今云二十六者，說堂上數也。堂下東西夾各十七，兩十七合三十四，三十四就二十六，故合六十也。」案：皇氏以彼爲庶羞，與鄭注及《公食禮》不合，孔亦庶其非是。其謂天子庶羞籩豆各六十，則與鄭、賈說同。是則下大夫正豆十六，堂上六，庶羞亦十六豆；上大夫正豆二十，堂上八，庶羞亦二十豆；子男正豆二十四，堂上十二，庶羞亦二十四；侯伯正豆三十二，堂上亦十二，庶羞亦三十二；諸公正豆四十，堂上十六，庶羞亦四十；天子正豆六十，堂上二十六，庶羞亦六十也。但天子正豆東西夾各十七，即違「鼎俎奇籩豆偶」之義；故王引之庶其非，而謂天子當四十八豆，堂上二十，東西夾各十四，其說較通，然與《禮器》不合。竊疑天子或當五十豆，堂上二十六，東西夾各十二，經有六十者，亦備其數，不盡用也。庶豆亦五十，籩如之，故《內饗》、

《食醫》並云百羞，《國語·周語》云百籩。《荀子·正論篇》說天子食禮云「執薦者百人侍西房」，似亦指進庶羞言之。云「珍謂淳熬、淳母、炮豚、炮脾、擣珍、漬、熬、肝膋也」者，並據《內則》爲說。彼文云「淳熬，煎醢加於陸稻上，沃之以膏，曰淳熬。」鄭彼注云：「淳，沃也。熬亦煎也。沃煎成之，以爲名。」又「淳母，煎醢加於黍食上，沃之以膏，曰淳母」。注云：「毋讀曰模。模，象也。作此象淳熬。」又「炮，取豚若將，剗之剗之，實棗於其腹中，編萑以苴之，塗之以謹塗，炮之。塗皆乾，擘之，濯手以摩之，去其皽。爲稻粉，搔洩之以爲醢，以付豚，煎諸膏，膏必滅之。鉅鑊湯，以小鼎，臠脯於其中，使其湯毋滅鼎，三日三夜毋絕火，而后調之以醢醢」。注云：「炮者，以塗燒之爲名也。將當爲牂。牂，牝羊也。剗，剗，博異語也。謹當爲瑾，聲之誤也。瑾塗，塗有穰草也。皽謂皮肉之上魄莫也。搔，洩，亦博異語也。搔讀與滄澹之滄同。臠脯，謂煮豚若羊於小鼎中，使之香美也。謂之脯者，既去皽，則解析其肉使薄，如爲脯然，唯豚全耳。豚羊人鼎三日，乃內醢醢可食也」。又「擣珍，取牛羊麋鹿麇之肉，必胾，每物與牛若一。捶反側之，去其餌，孰出之，去其皽，柔其肉」。注云：「胾，脊側肉也。捶，擣之也。餌，筋腱也。柔之，爲汁和也。汁和，亦醢醢

與？」又「漬，取牛肉，必新殺者，薄切之，必絕其理，湛諸美酒，期朝而食之，以醢若醢醢」。注云：「湛亦漬也。」又「爲熬，捶之，去其皴，編萑，布牛肉焉，屑桂與薑，以酒諸上而鹽之，乾而食之」。注云：「熬，於火上爲之也。今之火脯似矣。」又「肝膋，取狗肝一，幪之以其膋，濡炙之，舉焦其膋，不蓐」。注云：「膋，腸閒脂。」賈疏云：「是爲八珍。彼有糝與餼，彼是羞豆之實，非珍，故不取。」云「醬謂醢醢也」者，據《醢人》共醢六十齏，《醢人》共醢物六十齏，《掌客》上公饗餼醢醢百二十齏，即此醬之數也。《說文·西部》云：「醬，醢也。从肉，酉，酒以酥醬也。𠂔聲。」案：醬即醬之俗。醢亦含齏菹醢等言之，故《論語·鄉黨》皇疏云：「古者醬、齊、菹三者通名也。」江永云：「醬者，醢醢之總名。醢之物有七。醢醢，豕肉作之。又陸產之物有蜺、兔、鴈，水產之物有蜎、廬、魚，或閒有之，未必皆備。《內則》有卵醬，亦魚醢之類；有芥醬，則《醢人》七菹之類漬諸醢而成者也。醬物以醢醢爲主，或於烹魚肉時以醬和之，濡雞濡鼈醢醬，濡魚卵醬是也。或於食魚肉膾脯時以醬配之，脍脩蜺醢，脯羹兔醢，麋膚魚醢，魚膾芥醬，麋腥醢醬是也。凡稱醢醬，或單言醢者，醢醢也。言醢醬者，以醢和醬也。濡豚不用醬，而三牲和用醢。用梅漿作之者，^①爲醢醢。

醢主酸，醢主鹹。《公食禮》「凡炙無醬」，注云「已有鹹和」是也。案：江說甚覈。唯王舉用大宰，則醢醢當兼有牛羊豕肉之醢。互詳《醢人》疏。云「王舉則醢人共醢六十齏，以五齏、七醢、七菹、三醢實之，醢人共齏菹醢物六十齏」者，據《醢人》、《醢人》文。醢醢各六十齏，^②合之正百有二十齏，證醬即醢醢也。齏者齏之隸變。《說文·缶部》云：「甕，汲鉞也。」《既夕禮》注云：「甕，瓦器，其容蓋一斛。」《廣雅·釋器》云：「磨，瓶也。」甕、磨並甕之俗。聶氏《三禮圖》引舊圖云：「甕以盛醢醢，高一尺，受二斗。」案：依《陶人》注，則甕受斗二升，故賈《聘禮》疏謂甕與簋同受斗二升。《禮圖》說與《既夕》注義不合，恐誤。鄭司農云「羞，進也」者，《爾雅·釋詁》文。《說文·羊部》云：「羞，進獻也。」《大司徒》、《牛人》、《小子》、《司士》注並同。云「六穀，徐黍稷粱麥苽」者，據《食醫》文。《大宰》有九穀，此止用六者，與《倉人》注之六米同，皆謂穀之有米可爲飯者。九穀中有麻與大小豆，並不成米，不可爲飯，故不用。先鄭釋《大宰》九穀，有稷無粱，則非也。《玉藻》說諸侯法云「朔月

① 「漿」原作「醬」，據江永《鄉黨圖考》改。

② 「醢」原作「醢」，據楚本改。

四簋」，依注當爲黍稷稻粱，孔疏云：「以此而推，天子朔月大牢，當六簋，黍稷稻粱麥苽各一簋也。」案：據孔說，則天子唯朔食備用六穀，常食亦止四簋，與諸侯朔食同也。云「苽，彫胡也」者，《食醫》注同。《說文·草部》云：「苽，彫胡。」一名蔣。《西京雜記》云：「苽之有米者，長安人謂之彫胡。」《廣雅·釋艸》云：「苽，蔣也。其米謂之彫胡。」《淮南子·原道訓》高注云：「苽者，蔣實也。其米曰彫胡。」《楚辭·大招》「五穀六仞，設苽粱只」。王逸注云：「苽粱，蔣實，謂彫胡也。」案：苽，苽，彫，蔣，蔣，字並同。唐慎微《證類本草》引蘇頌《圖經》云：「苽即江南人呼爲茭草者，生水中，葉如蒲葦。其苗有根梗者謂之苽蔣草，至秋結實，乃彫胡米也。」程瑤田云：「茭草有牝牡之異。根成菌者，俗呼茭筍，其草不抽莖，不秀不實。根不成菌者爲牡，秋末抽莖，吐秀結實。」案：程說甚覈。《淮南子·詮言訓》云「苽飯牯牛，弗能甘也」，《古文苑》宋玉《諷賦》云「爲炊彫胡之飯」，是古人有以苽米爲飯。《內則》云「苽食」。《論語·鄉黨篇》云「雖疏食菜羹苽祭，必齊如也」。故二鄭以充六穀之一。但苽非常食，劉向《列女傳·母儀篇》云「精五飯」，蓋以六穀去苽是爲五飯矣。云「六清，水漿醴醕醫醕」者，《釋文》云：「醕，本又作涼。又醕作醕。」案：此即《漿

人》之六飲也。彼文醕亦作涼。醕即醕之俗，陸本非。彼六飲中，醴、醫、醕並有清糟。據彼注，漿涼亦當清糟兩有。此云六清者，以水唯有清無糟，又飲以清爲主故也。王日一舉，鼎十有二，物皆有俎。殺性盛饌曰舉。

王日一舉，以朝食也。后與王同庖。鼎十有二，牢鼎九，陪鼎三。物謂牢鼎之實，亦九俎。【疏】「王日一舉」者，朔望則大牢，常日則少牢，皆特殺也。云「鼎十有二者，專據盛食大牢言之，鄭、賈謂凡王舉皆大牢，非也。詳後。注

云「殺性盛饌曰舉」者，鄭意凡特殺謂之舉，而王食則大牢。賈疏及《玉藻》孔疏說同。金鶚云：「舉者，殺性盛饌也。大牢、少牢、特牲皆可言舉，不必大牢也。《膳夫》云「王日一舉」，當是少牢。《玉藻》云「天子日食少牢，朔月大牢」，諸侯日食特牲，朔月少牢」。降殺甚明，可知王日一舉爲少牢也。《檀弓》云「國亡大縣邑，君不舉」。《玉藻》云「至於八月不雨，君不舉」。君以諸侯言，諸侯日食特牲，朔月少牢，是特牲少牢皆可稱舉，何必大牢乎！下文云「大喪則不舉，大荒則不舉，大札則不舉，天地有災則不舉，邦有大故則不舉」。諸不舉承上「日一舉」而言，皆指少牢，并包特牲。少牢且不舉，則大牢不言可知也。《玉藻》言諸侯「特

牲三俎祭肺」，而《曲禮》云「歲凶君膳不祭肺」，是諸侯歲凶不得日食特牲，可知天子歲凶不得日食少牢，所謂「大荒則不舉」也。大札與天地有災，邦有大故，更可知矣。」案：金說是也。鄭以殺牲盛饌釋舉，不質言何牲，則亦以特牲以上皆為舉。但此注之意，以後賈疏引《鄭志》說推之，則專指大牢耳。其《曲禮》、《內則》注，並從《玉藻》日食少牢之說，蓋鄭二《禮》注自有兩解。賈後疏及《王制》孔疏並謂日食大牢為周公所制禮，日食少牢為衰世法，非也。《國語·楚語》云：「祀加於舉。天子舉以大牢，祀以會；諸侯舉以特牛，祀以大牢；卿舉以少牢，祀以特牛；大夫舉以特牲，祀以少牢；士食魚炙，祀以特牲；庶人食菜，祀以魚。」韋注云：「舉，人君朔望之盛饌。」案：韋氏以大牢為天子朔望盛饌，則亦謂王日食少牢矣。竊謂彼文以尊者曰舉，對卑者曰食，此可證鄭殺牲盛饌之說。彼文特牛、少牢、特牲並謂之舉，此可證金氏舉不必皆大牢之說。惟彼舉專指朔望盛饌而言，故曰大牢。此舉則兼朔望及常日而言，朔望大牢，日食少牢，皆每日特殺，即同謂之舉。《賈子·禮篇》云「天子饋牲而食以優飽也。」蓋亦指日食少牢而言。云「王日一舉以朝食也」者，賈疏云：「一日食有三時，同食一舉。」案《玉藻》云：「皮弁以日視朝，遂以食，日中而餽。」餽者，

餽朝之餘，則「遂以食」之謂朝之食。明知先朝食，次乃日中而餽。」案：賈謂一日之食有三時是也。三時者，《續漢書·五行志》劉注引《洪範五行傳》鄭注云：「平旦至食時，為日之朝；禺中至日昃，為日之中；下側至黃昏，為日之夕。」是朝食在禺中前，故後注云「燕食，謂日中與夕食。」明朝食之外，尚有日中、夕食，與《玉藻》注義同。《論語·鄉黨篇》「不時不食」，《集解》引鄭注云：「不時，非朝、夕、日中時。」鄭意蓋謂食必三時，通於上下。《白虎通義·禮樂篇》云：「王者所以日四食者何？明有四方之物，食四時之功也。平旦食，少陽之始也；晝食，太陽之始也；餽食，少陰之始也；暮食，大陰之始也。」《論語》曰：「亞飯干適楚，三飯繚適蔡，四飯缺適秦。」諸侯三飯，卿大夫再飯，尊卑之差也。《弟子職》曰「暮食復禮」，士也。食力無數，《庶人職》在耕桑，戮力勞役，飢即食，飽即作，故無數。」彼謂天子日四食，諸侯以下以次遞減，與鄭說不同。今案此經云「王齊日三舉」，則天子日無四食明矣。《說文·食部》云：「餽，日加申時食也。」申食正在日下側時，則已駭於夕食。《論語》亞飯、三飯、四飯，自是一食侑樂之節。《白虎通》說誤。云：「后與王同庖」者，賈疏云：「案《玉藻》云「夫人與君同庖」，鄭注云「不特殺」。明后亦與王同庖可知。」案：

依鄭、賈說，同庖即謂同食一牢。《郊特牲》云「共牢而食，同尊卑也」。《列女傳·貞順篇》「衛寡夫人曰：唯夫婦同庖」。故知王與后同庖，其母后及世子以下則異庖也。云「鼎十有二，牢鼎九，陪鼎三」者，《聘禮》致饗云：「飪一牢，鼎九，設于西階前。陪鼎當內廉。牛、羊、豕、魚、腊、腸胃同鼎，膚、鮮魚、鮮腊。腳、臠、臠陪牛、羊、豕。」鄭彼注云：「陪鼎，三牲臠腳臠臠陪之。庶羞加也。膚，豕肉也。」又《公食大夫禮》注云：「牛曰腳，羊曰臠，豕曰臠，皆香美之名也。」賈疏云：「鼎十有二者，案《禮記·郊特牲》『鼎俎奇而籩豆耦』者，謂正鼎九，陪鼎三，即是奇數，總而言之即十二。」《郊特牲》孔疏云：「案《聘禮》牛一，羊二，豕三，魚四，腊五，腸胃六，膚七，鮮魚八，鮮腊九，是鼎九。又有陪鼎，腳一也，臠二也，臠三也。」詒讓案：《公羊》桓二年何注云：「禮祭，天子九鼎，諸侯七，卿大夫五，元士三也。」此皆專據正鼎而言。《少牢饋食禮》正鼎五，《特牲饋食禮》正鼎三，即大夫、士之祭禮。天子時祭及大舉皆大牢，故正陪有十二鼎。若少牢，則牢鼎無牛，陪鼎無腳。特性則正鼎又無羊，陪鼎又無臠。數皆不備十二，經舉多以略少也。云「物謂牢鼎之實，亦九俎」者，釋經「物皆有俎」也。《王制》孔疏、《公羊》桓二年徐疏引此經並讀「鼎十有二物」爲句，

失之。此亦大舉大牢之俎數也。俎以載牢鼎之實。《內饗》注云：「取於鼎以實俎。」《說文·且部》云：「俎，禮俎也。」《一切經音義》引《字書》云：「俎，肉几也。」《明堂位》云：「周以房俎。」聶氏《三禮圖》引《三禮》舊圖云：「俎長二尺四寸，廣一尺二寸，高一尺。漆，兩端赤，中央黑。」賈疏云：「言實即牛羊豕之類也。亦九俎者，陪鼎三腳臠臠者謂庶羞，在於豆；唯牢鼎之物各在俎，故云亦九俎。」詒讓案：若少牢則俎五，特性則俎三，皆不備九，經亦舉多以略少也。又陪鼎之實，實於三豆，此不言者，文略。賈疏又云：「案趙商問：『王日一舉，鼎十有二，是爲三牲備焉。』商案《玉藻》『天子日食少牢，朔月大牢』。禮數不同，請問其說。」鄭荅云：「《禮記》後人所集，據時而言，或以諸侯同天子，或以天子與諸侯等，禮數不同，難以據也。《王制》之法，與禮違者多，當以經爲正。」若然，此《周禮》周公大平法，《玉藻》據衰世，或是異代，故與此不同。」案：賈說非也。經云鼎十有二，蓋專指朔望盛饌舉之尤盛者言之，與上云「舉」關朔望與日食者不同，詳略不嫌互見，經文固有此例。鄭據此謂日食大牢，遂席《玉藻》難據，賈、孔迺疑其別據衰世或異代法，誤益甚矣。以樂侑食，膳夫授祭，品嘗食，王乃食。侑猶勸也。祭謂刲肺、脊也。

禮，飲食必祭，示有所先。品者，每物皆嘗之，道尊者也。【疏】「以樂侑食」者，侑，依《大司樂》「王大食三宥」，則字當作宥，此疑轉寫之誤。此冢上王日一舉爲文，明殺牲盛饌必奏樂，與大司樂爲官聯也。《玉藻》云「奏而食」，注云：「奏，奏樂也。」《白虎通義·禮樂篇》云：「王者食所以有樂何？樂食天下之大平富積之饒也。明天子至尊，非功不食，非德不飽，故傳曰：天子食時舉樂。」賈疏云：「上言王日一舉，此云以樂侑食，即是《王制》云「天子食日舉以樂」。案：《論語·微子》云亞飯、三飯、四飯、鄭云皆舉食之樂。彼諸侯禮，尚有舉食之樂，明天子日食有舉食之樂可知。案《大司樂》云「王大食皆令奏鍾鼓」。彼大食自是朔食。日舉之樂，大司樂或不令奏，故不言之矣，無妨日食自有舉食之樂。」案：賈說是也。《論語·微子》皇疏謂「大司樂王朔望食乃奏樂，日食則不奏」。《王制》、《玉藻》云日奏，爲夏殷禮。其說不足據。《左》哀十四年傳，說宋向巢每食擊鍾，將食又奏。是侯國之卿日食亦奏樂，則王日食必奏樂可知矣。《大戴禮記·保傅篇》引《青史氏記》，說「王后就燕室，大師持銅而御戶左，太宰持斗而御戶右」。盧注云：「大師，瞽者。大宰，膳夫也。」以相推約，王舉在寢，亦宜此官與瞽師同御左右。若然，王日三食，朝食最

盛，其有樂既大司樂令奏；日中、夕食禮稍殺，或大師令奏與？又王后與世子大食亦當有樂宥，經文不具也。互詳《大司樂》疏。云「膳夫授祭」者，賈疏云：「謂王將食必祭先，膳夫授之。」《曲禮》云：「殺之序，徧祭之。」今徒言祭肺者，略舉其首者也。詒讓案：授祭即《大祝》九祭之「共祭」。凡食祭，近者授，遠者不授。《燕禮》云：「公祭如賓禮，膳宰贊授肺。」膳宰即膳夫也。授祭，互詳《大祝》疏。又案：王朝食盛饌，其授祭諸事，此官之長親侍。《蔡邕集·明堂月令論》引《古大明堂之禮》云「日出居東門，膳夫是相」。蓋即侍王朝食之事也。其日中夕食，則下云「王燕食則奉膳贊祭」是也。其禮略殺，或中士以下更迭侍御與？注云「侑猶勸也」者，《毛詩·小雅·楚茨》傳文。《大司樂》「三宥」注同。此亦當作「宥」，宥本訓寬，段借爲勸助之義，詳《大司樂》疏。云「祭謂刲肺、脊也」者，謂飲食之祭。《明堂位》云：「有虞氏祭首，夏后氏祭心，殷祭肝，周祭肺。」《說文·刀部》云：「刲，切也。」《特牲饋食記》「離肺一，刲肺三」。鄭彼注云：「離猶拞也。小而長，午割之，亦不提心，謂之舉肺。刲肺，爲尸、主人、主婦祭。今文刲爲切。」又《公食大夫禮》云「三牲之肺不離」。注云：「肺不離者，刲之也。不言刲，刲則祭肺也。此舉肺不離而刲之，便

實祭也。祭離肺者，絕肺祭也。」又《特性饋食禮》：「佐食舉肺脊以授尸，尸受振祭，膾之。」注云：「肺，氣之主也。脊，正體之貴者。先食啗之，所以導食通氣。」賈疏云：「但祭肺有二種：一者名為舉肺，亦名離肺，此為食而有也。二者名為祭肺，亦名刲肺，此為祭而有也。但舉肺離而不絕，祭肺則絕之。今此膳夫授祭為食而授，即舉肺也。鄭以經直云祭，不言舉，又不言離，直云祭，故云祭謂刲肺也。以優至尊，故與祭祀同刲肺也。若然，《鄉飲酒》、《鄉射》無連言脊，今兼言脊者，依《士虞》、《特性》皆言授肺脊，故鄭依之而言。」案：賈說是也。《禮經》通例，凡祭祀，有祭肺者刲之，祭後不膾。又有舉肺者不刲，祭則膾之。食禮但有舉肺，無祭肺。此王食宜用舉肺，而云刲肺者，鄭意蓋依《公食大夫禮》，用刲肺以優尊，故刲之，便王祭也。云「禮飲食必祭，示有所先」者，《曲禮》：「主人延客祭，祭食祭所先進，殽之序，偏祭之。」注云：「祭，祭先也。君子有事，不忘本也。」又《士昏禮》注云：「必為所祭者，謙敬示有所先也。」《論語·鄉黨》皇疏云：「祭謂祭食之先也。夫禮，食必先取食種種出片子置俎豆籩地，名為祭。祭者，報昔初造此食者也。君子得惠不忘報，故將食而先出報也。」《釋文》引干注云：「祭五行六陰之神與民起居。」案：依鄭、賈

說，凡食祭，泛祭先造食之人，無所主命。干氏謂祭五行六陰之神，五行即十日，六陰即十二辰，六陽六陰也。其說不知何據。云「品者，每物皆嘗之，道尊者也」者，《說文·品部》云：「品，衆庶也。」引申為周徧之義。《玉藻》說君賜臣食之禮云：「先飯，辯嘗羞，飲而俟。若有嘗羞者，則俟君之食然後食。」鄭彼注云：「君將食，臣先嘗之，忠孝也。不嘗羞，膳宰存也。」彼又云：「君命之羞，羞近者。命之品嘗之，然後唯所欲。」注云「必先徧嘗之」。孔疏云「品猶徧也」。案：此云品嘗食，猶《玉藻》云「辯嘗羞也」。膳夫共王食，故掌為王嘗羞，道王使食之。卒食，以樂徹于造。造，作也。鄭司農云：「造謂食之故所居處也。已食，徹置故處。」疏「卒食以樂徹于造」者，食終復奏樂徹膳也。《大戴禮記·保傳篇》云：「食以禮，徹以樂。」賈疏云：「卒，終也。天子食終徹器之時，作樂以徹之。但天子祭祀，歌《雍》以徹，徹食器之時，樂章未聞也。」惠士奇云：「以樂徹者，《荀子·正論》曰：『天子曼而饋，伐罍而食，《雍》而徹。』《淮南子·主術》曰：『鞀鼓而食，奏《雍》而徹。』鞀鼓者，王大食之所奏也。」案：據惠說，則天子食亦以《雍》徹，與祭祀同。詳《樂師》疏。注云「造，作也」

者，《爾雅·釋言》文。鄭司農云「造謂食之故所居處也，已食徹置故處」者，賈疏云：「二鄭義同，皆謂造食之處即廚是也。案《內則》云：『天子之閣，左達五，右達五。』彼亦是置食處。今此不徹於閣者，但閣內別置新饌。案：《文王世子》『未有原』，即此，亦不重進，故徹於造。」惠士奇云：「《大祝》注云『故書造作竈』，然則古文造竈通矣。《吳越春秋》勒馬銜枚，出火于造，闔行而進」。案「造」《吳語》作「竈」，所謂係馬舌，出火竈。《龜策傳》灼鑽之處，亦以造名。注造音竈，本此。《玉藻》『天子皮弁以食，日中而餽』。注云：「餽者，食朝之餘。」故王卒食則徹於竈，以便熬溫而供日中及夕之餽也。賈疏謂徹於造者不重進，失之矣。」案：惠說甚塙。凡餽必熬溫，熬溫必於竈。竈，《禮經》謂之爨，《有司徹》云「乃爨尸俎」，注云「溫尸俎於爨」是也。若左右達之閣無竈，不可以熬溫矣。《特性饋食禮》，饋爨在廟中西壁，雍爨在廟門外東南；《少牢饋食禮》，雍爨所在同，而廩爨則在雍爨北，與《特性》異。故《月令》注謂竈在廟門外之東。但彼諸爨並在廟，非常食庖廚饌具之所。王饋食在寢，以君子遠庖廚之義推之，疑當在寢門外，蓋與膳夫、庖人諸官寺相近。王卒食，則分徹於二爨，度置以俟餽。故《荀子·正論篇》云「《雍》而徹乎五祀」，五祀亦即謂

竈。《淮南子·主術訓》說天子之食云「已飯而祭竈」，或亦謂此與？王齊，日三舉。鄭司農云：「齊必變食。」【疏】「王齊日三舉」者，《說文·示部》云：「齊，戒絜也。」齊即齋之段字。賈疏云：「謂散齊致齊，齊必變食，故加牲體至三大牢。案《玉藻》朔食加日食一等，則於此朔食當兩大牢。不言之者，文不具。齊時不樂，故不言以樂侑食也。」孔廣森云：「賈說於經無文。然《國語》『天子舉以大牢，祀以會』，韋昭注曰『會，會三大牢』，是天子大祀有用三大牢之法。蓋朝踐一牢，象朝食；饋獻一牢，象日中食；醑尸又一牢，象夕食。或齊舉與大祀同也。《荀子·正論》曰：『食飲則重大牢而備珍怪。』重者，兩也。殆所謂兩大牢與？」案：天子日食少牢，朔月大牢，《玉藻》有明文，鄭《內則》注亦從其說。賈謂朔食兩大牢，非也。孔據《楚語》韋注天子祀用三大牢，謂王齊舉或與大祀同。攷古書說天子祭禮，雖禘祫殷祭，亦無三大牢之文。唯《掌客》云「王合諸侯而饗禮，則具十有二牢」，注謂用王禮。然王禮十二牢，自是致饗餼等盛禮之陳數，非日食所用。王巡守殷國，國君膳用犢，則並不具大牢。疑饗食亦當然，必無十二牢也。然則韋謂王大祀三大牢，殆不足據。竊謂《楚語》云祀以會者，疑謂禘祫殷祭會合六牲，蓋於大牢之外，更增馬牲

等。《大司馬》「喪祭奉詔馬牲」，注謂指大遣奠。攷《士喪禮》，士祭以特牲，遣奠加一等，用少牢。以此例之，則王時祭用大牢，遣奠加一等，用六牲。殷祭禮盛，或亦用六牲與？王齊日朝食，蓋用大牢，日中及夕食，則或少牢，或特牲，故云三舉。蓋特殺即謂之舉，若必三大牢，既無加於飽，而徒多殺大牲，先王制禮，必不如是之侈矣。至《荀子》所謂重大牢者，楊倞注云「重，多也」。謂重多之以大牢也，則不為兩大牢。即令如孔說，亦戰國時汰侈踰制，不足以證禮也。

注鄭司農云「齊必變食」者，《論語·鄉黨篇》文，《集解》引孔安國云「改常饌」。引之者，證齊日三舉，異於平日一舉，亦所謂變食也。大喪則不舉，大荒則

不舉，大札則不舉，天地有裁則不舉，邦有大故則不舉。大荒，凶年。大札，疫癘也。天裁，日月

晦食。地裁，崩動也。大故，寇戎之事。鄭司農云：「大故，刑殺也。《春秋傳》曰：『司寇行戮，君為之不舉。』」

【疏】「大喪則不舉」者，凡不舉並謂不特殺牲也。蓋食魚腊之屬。大喪則又不肉食，禮尤殺也。以下五者，皆王遇喪災減膳之事。惠士奇云：「大喪謂后、世子之喪。《春秋》晉荀躒如周葬穆后，既葬而宴。宴必奏樂，故曰宴樂，

叔向以為非禮。」又云：「言大喪則兼包小喪。王為三公六卿錫衰，諸侯緦衰，大夫士疑衰，皆小喪也。子卯尚稷食菜羹，王服衰而殺性盛饌，有是理乎？則小喪亦不舉可知也。」案：惠說是也。大喪關王、后、世子，詳《宰夫》疏。《曲禮》云：「天子之哭諸侯也，為之不樂食。」是小喪王不樂食，則不殺性盛饌可知。此不舉，皆主王言，賈疏謂大喪不舉屬臣子，誤。注云「大荒，凶年」者，《大宰》注云：

「荒，凶年。」此云大荒，猶《大司馬》云大凶，《春秋經》云大饑，《穀梁傳》云大侵也。《曲禮》云：「歲凶，年穀不登，君膳不祭肺。」鄭注云：「禮食殺性則祭先。不祭肺，則不殺也。」《玉藻》云：「年不順成，則天子食無樂。至于八月不雨，君不舉。」《穀梁》襄二十四年傳云：「五穀不升謂之大侵。大侵之禮，君食不兼味。」《周書·大匡篇》云：「維周王宅程三年，遭天之荒，作大匡，王既發命，入食不舉。」《白虎通義·諫諍篇》云：「《禮·保傅》曰：『王失度，膳夫徹其膳。』宰所以徹膳何？陰陽不調，五穀不熟，故王者為不盡味而食之。禮曰：『一穀不升徹鶉鷄，二穀不升徹鳧鴈，三穀不升徹雉兔，四穀不升損囿獸，五穀不升不備三牲。』《墨子·七患篇》云：『五穀盡收，則五味盡御於主；不盡收則不盡御。故凶饑存乎國人，君徹鼎食五分之三。』」

並大荒不舉之事。云「大札，疫癘也」者，《大司徒》、《大宗伯》、《大司馬》注及《司關》先鄭注，義並同。《說文·疒部》云：「疫，民皆疾也。癘，惡疾也。」《釋名·釋天》云：「厲，疾氣也，中人如磨厲傷物也。疫，役也，言有鬼行役也。札，截也，氣傷人如有斷截也。」《左》昭四年傳云：「癘疾不降，民不夭札。」杜注云：「夭死曰札。」《國語·周語》「民無夭昏札瘥之憂」。韋注云：「疫死曰札。」《管子·五行篇》云：「旱札，苗死民厲。」案：厲卽癘之借字。云「天裁，日月晦食」者，《說文·火部》云：「裁，天火曰裁。重文灾，或从火。灾，籀文从𠂔。」此經例作裁，注例作灾，亦或作灾。蓋漢時通用灾字，亦注從今字之例也。此注各本並作裁，疑後人依經改之。案：通言之天地變異皆謂之裁。日月晦食者，謂晦與食並爲天裁也。《左》文十五年，昭十七年傳，並云「日有食之，天子不舉」。《春秋經》：「僖十五年九月己卯晦，成十六年六月甲午晦。」《公羊傳》並云「晦者何？冥也」。何注云：「晝日而冥。」《穀梁》僖十五年傳義同。賈疏謂日食在晦朔，謬。云「地裁，崩動也」者，賈疏云：「《左氏》書地震及梁山崩是也。」詒讓案：《左》成五年傳，說「山崩川竭，君不舉」，是其事。云「大故，寇戎之事」者，《大祝》注義同。《朝士》云「若邦凶荒，札喪、寇戎之

故」。凶荒札喪，上文已具，故知大故唯據寇戎言也。《檀弓》云：「國亡大縣邑，君不舉。」是寇戎君不舉之事。鄭司農云「大故，刑殺也」者，賈疏云：「引之在下者，欲見大故中含有刑殺之事。」引《春秋傳》曰「司寇行戮，君爲之不舉」者，《左》莊二十年傳文。杜注云：「不舉，去盛饌。」先鄭引之者，證刑殺不舉之事。《國語·周語》亦有此文，韋注則云「不舉樂也」。賈疏謂「彼不舉者，謂不舉樂，此經數事不舉，司農意亦謂不舉樂，故引以爲證」。蓋本草說，然非此經之義，先鄭意似亦不如是也。王引之云：「《左》成五年傳「山崩川竭，君爲之不舉，降服乘縵，徹樂出次」。襄二十六年傳「古之治民者，將刑爲之不舉，不舉則徹樂」。既云不舉，又云徹樂，則不舉非徹樂矣。《膳夫》「王日一舉」之下，始云「以樂侑食」，則所謂舉者，以盛饌言之，非謂作樂明甚。而昭十七年傳「三辰有災君不舉」，《漢書·五行志》引《左氏說》曰「不舉，去樂也」。則西漢時已誤解矣。」案：王說足申先鄭義。但不舉樂，亦自是先秦古說，《韓非子·五蠹篇》云：「司寇行刑，君爲之不舉樂。」是韋釋不爲無本，但於此經義自不相應耳。王燕食，則奉膳贊祭。燕食，謂日中與夕食。奉膳，奉朝之餘膳。所祭者牢

肉。【疏】「王燕食則奉膳贊祭」者，《說文·手部》云：「奉承也。」贊祭即授祭也。蓋亦以樂侑食，品嘗食，與朝食同。

注云「燕食謂日中與夕食」者，《說文·宀部》云：「宴，安也。」燕，宴之段字。以王日三食，日中與夕食饌具減殺，別於禮食及朝食盛饌，故謂之燕食。與《小臣》、《道僕》「燕出入」之「燕」義略同。《王制》孔疏謂食禮有二種：一是禮食，《大行人》「諸公食禮九舉及《公食大夫禮》是也。二是燕食，謂臣下自與賓客旦夕共食，鄭注《曲禮》「酒漿處右」，云「此大夫士與賓客燕食之禮」。案：孔說禮食，即此下文王賓客食是也。蓋王無與臣下旦夕燕食之禮，故《士相見禮》君賜臣食，注亦以為禮食。明此王燕食，非與羣臣食，唯有旦夕自食得為燕食也。賈疏云：「案上「王日一舉」，鄭云謂朝食，則此云燕食者，謂日中與夕，相接為三時。案《玉藻》，天子與諸侯相互為三時食，故燕食以為日中與夕。」云「奉膳，奉朝之餘膳」者，《玉藻》云：「天子皮弁以日視朝，遂以食，日中而餽。」注云：「餽，食朝之餘也。」賈疏云：「則一牢分為三時，故奉朝之餘餽也。」云「所祭者牢肉」者，賈疏云：「案《玉藻》，諸侯云「夕深衣，祭牢肉」。鄭注云：「天子言日中，諸侯言夕，天子言餽，諸侯言祭牢肉，互相挾。」則天子諸侯朝皆祭肺，日中與夕皆祭牢肉，故言所祭

者牢肉也。贊祭者，助王祭牢肉。」案：鄭《玉藻》注又云「祭牢肉，異於始殺也」。孔疏云：「早起初殺之時，將食，先祭肺，以周人重肺。至夕將食之時，切牢肉為小段而祭之，故云異於始殺也。」凡王祭祀、賓客食，則徹王之胾俎。膳夫親徹胾俎，胾俎最尊也。其餘則其屬徹之。賓客食而王有胾俎，王與賓客禮食，主人飲食之俎皆為胾俎，見於此矣。【疏】「凡王祭祀賓客食，則徹王之胾俎」者，賈疏云：「王祭祀，謂祭宗廟。有胾俎者，謂若《特牲》、《少牢》「主人受尸酢，戶東西面，設主人俎於席前」。王受尸酢禮亦當然。賓客食，謂王與賓客禮食於廟，實在戶牖之間，王在阼階上，各有饌，皆設俎，故亦有胾俎。此二者皆名胾俎，膳夫徹之。」詒讓案：此云王賓客食者，對上王燕食為文。言食，而饗燕咳於其中。《燕禮》云「膳宰徹公俎」，是燕亦膳夫徹君俎也。注云「膳夫親徹胾俎，胾俎最尊也」者，胾俎，《特牲》、《少牢》饋食禮並作「阼俎」，胾阼字通。鄭彼注云：「阼俎，主人俎也。」案：《說文·自部》云：「阼，主人階也。」以下文及《少牢》注義推之，鄭意蓋以東階為主人之位，故即稱主人之俎為阼俎。祭禮主人受酢雖不在阼階，然亦在戶東也。賈疏謂以其胾

者酢也，取王與尸賓相荅酢之義，則是讀胙爲酢，與《司几筵》胙席正同。然此義止可通於祭祀饗燕，若食禮，則本無酬酢，賈說不可通於彼也。祭祀及賓客食，雖尊尸、賓，然王自有常尊，故膳夫之長親徹之。《少牢》、《有司徹》注說司馬、司士徹俎，不使宰夫特徹胙俎者，彼大夫禮，與王禮異也。云「其餘則其屬徹之」者，謂若尸、賓之俎，則宰夫使其屬徹之。賈疏云：「以其經膳夫徹王之胙俎，明非王胙俎則其屬徹之可知，膳夫是上士，則其屬中士以下是也。」論讓案：宰夫之屬，猶《有司徹》之宰夫贊者。《詩·小雅·楚茨》云：「諸宰君婦，廢徹不遲。」箋云：「尸出而可徹，諸宰徹去諸饌，君婦籩豆而已。」孔疏以諸宰爲即膳夫及其屬，是也。其后之俎，則內小臣徹之，非此官所掌也。云「賓客食而王有胙俎，王與賓客禮食」者，賓客禮食，即《掌客》上公三食、侯伯再食、子男壹食之等。王待來朝諸侯以不純臣禮，故王亦有胙俎，其與聘使及羣臣食則無也。賈疏云：「以其賓客與祭祀同科，故知是禮食，非是凡平燕食。案《公食大夫》，主君與聘大夫禮食，賓前有食，君前無食，退俟於廂。今此天子與諸侯禮食，王前有食俎者，天子於諸侯，其禮異於諸侯與聘大夫，故王前有俎。」云「主人飲食之俎皆爲胙俎，見於此矣」者，以此經祭祀及《特性》、《少

牢禮》主人有胙俎，是祭祀飲酒之俎。此經賓客食，主人有胙俎，是食之俎。鄭言此者，亦見胙俎爲主人俎之通名，不專據飲酒酬酢爲義也。凡王之稍事，設薦脯醢。鄭司農云：「稍事，謂非日中大舉時而閒食，謂之稍事，膳夫主設薦脯醢。」玄謂稍事有小事而飲酒。【疏】注鄭司農云「稍事謂非日中大舉時而閒食，謂之稍事，膳夫主設薦脯醢」者，賈疏云：「先鄭意旦起日中食牲牢，日中後空食脯醢。後鄭不從者，《玉藻》諸侯猶云「夕深衣祭牢肉」，則天子夕食牢肉可知。又脯醢者，是飲酒肴羞，非是食饌。若大夫已下燕食，有脯無醢，設脯無嫌。若王之日食，不得空薦脯醢，故以爲小事飲酒。」云「玄謂稍事有小事而飲酒」者，此破先鄭義也。《廣雅·釋言》云：「稍，稍小也。」以其爲飲酒之小者，別於大事飲酒，故謂之稍事。若醴醢之屬亦是也，《士冠禮》賓醴冠者，薦脯醢。又，始加，醢用脯醢。賈疏云：「案下經燕飲酒，謂大事與臣飲酒；則此云王之稍事，是王小事而飲酒，故空設薦脯醢。若大飲與食，則有牲體。」曾釗云：「上言賓客食，下言燕飲酒，而此言王小事飲酒，似屬不倫。按賓客本有稍禮，《聘禮記》「旬而稍」是也。且本經數言稍，並注曰「稟食」。《漿人》稍禮注云「王稍所給賓客」，則此稍事亦當謂給賓客者矣。所以知有脯

醢者，《酒人》「共賓客之禮酒飲酒而奉之」。注：「禮酒，饗燕之酒。飲酒，食之酒。此謂給賓客之稍。」《漿人》「共賓客之稍禮」。注：「漿人所給，六漿而已。」是稍事賓客有酒漿矣。肉必從酒，《量人》所謂「饗賓制其從獻脯燔之量」是也。彼雖王親饗，與稍事王不親饗不同，要無不可以例推之。《肆師》「共設匪饗之禮」，《聘禮記》「凡致禮皆用其饗之加籩豆」，則稍事之有脯醢灼然矣。但致禮，據《公食大夫禮》，使大夫以侑幣致之，則享燕之致禮，亦當使大夫，而此膳夫爲士者，蓋致之則大夫總其事，而薦設則士分其職，亦猶正共禮酒，飲酒使其士奉之與？曰凡王之稍事者，王之稍，有有故不親饗之稍，有賓未去留聞之稍，故曰凡以舉之。」案：曾說亦通。王燕飲酒，則爲獻主。鄭司農云：「主人當獻賓，則膳夫代王爲主，君不敵臣也。《燕義》曰：「使宰夫爲獻主，臣莫敢與君亢禮。」」《疏》「王燕飲酒則爲獻主」者，燕即《大宗伯》饗燕之燕。《左》昭二十七年傳云：「齊侯將享公，子家子曰『其飲酒也』」。乃飲酒，使宰獻而請安。」是飲酒即燕也。《大宗伯》嘉禮云「以饗燕之禮親四方之賓客」。此謂王與諸侯諸臣燕也。又《文王世子》云：「若公與族燕，則膳宰爲主人。」以此推之，則天子之禮賓燕及族燕，亦並膳夫爲獻主也。注鄭司農云「主人

當獻賓，則膳夫代王爲主，君不敵臣也」者，王與之《周禮》訂義》引崔靈恩云：「凡王燕諸侯皆於路寢，使膳夫爲主人。王不爲主，以燕禮輕，故君不酌也。」賈疏云：「此約《燕禮》而知。」案《燕禮》，主人酌酒獻賓，賓酢主人，主人酌酒獻君，君酢主人，主人酬賓，以後爲賓舉旅。引《燕義》曰「使宰夫爲獻主，臣莫敢與君亢禮」者，鄭彼注云：「宰夫，主膳食之官也。天子使膳宰爲主人。」又《燕禮》云：「賓升自西階，主人亦升自西階。」注云：「主人，宰夫也。宰夫，大宰之屬，掌賓客之獻飲食者也。君於其臣，雖爲賓不親獻，以其尊莫敢抗禮也。天子膳夫爲獻主。」案：依後鄭《燕義》、《燕禮》注義，則是使宰夫爲獻主。《左傳》齊侯飲魯昭公酒，使宰獻，孔疏亦以宰爲宰夫。若然，彼爲諸侯燕聘賓及異姓大夫禮，與此經王燕及《文王世子》諸侯族燕使膳夫爲獻主並異。而《燕義》釋文引別本「使宰夫」作「使膳夫」。林喬蔭、黃以周並據《聘禮》云「燕則宰夫獻」，《燕禮》亦云「主人筵前獻賓，膳宰薦脯醢，賓升筵，膳宰設折俎」，明主人與膳宰別。其說甚析。然則《燕義》別本作「膳夫」，自是譌文。蓋古書凡言膳宰，即此膳夫。雖亦或通稱宰夫，而《聘禮》經記宰夫與膳宰並見，明非即膳夫可知。《燕義》之文，與彼正合。則宰夫實即此經天官之攷，鄭說自不可易。

先鄭引《燕義》以證此經，蓋亦同後鄭義，故此注引之，更無駁易也。**掌后及世子之膳羞。**亦主其饌之數，不饋

之耳。【疏】「掌后及世子之膳羞」者，賈疏云：「上云「王

日一舉」，注：「后與王同庖。」不言世子，則世子與王別牲，

亦膳夫所掌。」注云「亦主其饌之數，不饋之耳」者，賈

疏云：「案：上文「凡王之饋食用六穀」已下言饋，則膳夫

親饋之，故云品嘗食。案《內饗》「其后及世子之膳羞」，則

是后、世子，內饗饋之，故鄭云亦主其饌之數，不饋之耳。」

詒讓案：《大戴禮記·保傳篇》云：「古者胎教，王后腹之

七月而就宴室，太宰持斗而御戶右。王后所求滋味者非正

味，則太宰倚斗而言曰：「不敢以待王太子。」又云：「及太

子既冠成人，則有徹膳之宰，太子有過而宰徹其膳。」盧注

云：「太宰，膳夫也。」並即此官主后、世子饌數之事。又

后、世子大食亦當有樂宥，詳前疏。**凡肉脩之頒賜皆**

掌之。鄭司農云：「脩，脯也。」【疏】「凡肉脩之頒賜皆掌

之」者，常賜謂之頒，好賜謂之賜。經云頒賜，蓋兼二賜言

之。常賜於《大宰》九式入匪頒，好賜則好用也。《內饗》

云：「凡王之好賜肉脩，則饗人共之。」然則凡肉脩之頒賜，

皆膳夫掌其事，饗人共其物。《聘禮記》云「胙肉及廋車」。

胙頒字通。《左》襄二十六年傳云：「是以將賞爲之加膳，

加膳則飫賜。」賈子·禮篇云：「乾肉不腐則左右親。」謂

肉脩之頒賜也。注鄭司農云「脩，脯也」者，《掌客》注

及《說文·肉部》並同。《釋名·釋飲食》云：「脯，搏也，乾

燥相搏著也。」又曰：「脩，脩縮也，乾燥而縮也。」《膳人》後

鄭注云：「薄析曰脯，捶之而施薑桂曰鍛脩。」賈疏云：「加

薑桂鍛治者謂之脩，不加薑桂以鹽乾之者謂之脯，則脩脯

異矣。先鄭云脩脯者，散文言之，脩脯通也。」**凡祭祀之**

致福者，受而膳之，致福，謂諸臣祭祀，進其餘肉，歸

胙于王。鄭司農云：「膳夫受之，以給王膳。」【疏】「凡祭

祀之致福者」者，凡都家之命祀及祖王廟等是也。《都宗

人》云「凡都祭祀，致福于國」。注云：「都或有山川及因國

無主九皇六十四民之祀，王子弟則立其祖王之廟。」《家宗

人》云「凡祭祀致福」。注云：「大夫采地之所祀與都同。

若先王之子孫，亦有祖廟。」則經云凡祭祀，所咳甚廣，賈疏

謂專指諸臣自祭家廟，非也。云「受而膳之」者，《祭僕》

云：「凡祭祀致福者展而受之是」。凡致福者，都家宗人致

於祭僕，祭僕展其體數訖，膳夫則受而膳之。其非祭祀致

福而獻膳，則徑致於膳夫。《玉藻》云：「膳於君，有葷桃

苟，皆造於膳宰。」膳宰即膳夫也。

注云「致福，謂諸臣

祭祀，進其餘肉，歸胙于王」者，于，注例當作「於」，各本並誤。致福者，《少牢饋食禮》祝嘏主人云：「皇尸命工祝承致多福無疆于女孝孫。」此歸胙曰致福，與彼事異而義同。《少儀》云：「為人祭曰致福，爲己祭而致膳于君子曰膳。」鄭彼注云：「攝主曰致福，申其辭也。自祭言膳，謙也。」依彼注義，則此私祭而云致福者，亦散文通也。但臣奉君命，爲國祭祀，似亦當有致福。《管子·小問篇》云：「桓公卽位，令嬖社塞禱，祝鳧已疵獻胙。」是公祀歸胙之證。竊疑此經祭祀致福及《少儀》爲人祭，並含公祀私祀言之，注家偶不詳省耳。又《左》僖四年傳，說晉太子祭齊姜云：「太子祭于曲沃，歸胙于公。」杜注云：「胙，祭之酒肉。」《穀梁》僖十年傳云：「世子已祠，致福于君，君田而不在，驪姬以醢爲酒，藥脯以毒。」《國語·晉語》說此事略同。此雖非君命，然亦公祀也。又據彼文，則致福歸胙，酒肉兩有。此注止言餘肉不言酒者，酒以共飲，當酒正受之，非此官專職也。賈疏述注「致福」下有「者」字，云：「致福者，凡祭祀主人受福，若與王受福然，故云致福。知諸臣有致胙法者，案《春秋左氏》昭十六年，子產云「祭有受胙歸胙」。彼注云：「受胙謂君祭以肉賜大夫，歸胙謂大夫祭歸肉於公也。」今

彼雖據諸侯禮，王之臣致胙亦然，故云歸胙於王也。」鄭司農云「膳夫受之以給王膳」者，膳夫受胙，於王饋食時，則進之以充膳，示不虛受其福也。以摯見者亦如之。鄭

司農云：「以羔鴈雉爲摯見者，亦受以給王膳。」【疏】「以摯見者亦如之」者，賈疏云：「謂卿大夫以下新仕爲臣者，卿執羔，大夫執鴈，士執雉來見王，亦受以給王膳也。」詒讓案：此與司士爲官聯也。《士相見禮》，受摯，復見之而還摯。又云「士見大夫，終辭其摯」。注云：「終辭其摯，以將不親荅也。凡不荅而受其摯，唯君於臣耳。」然則卿大夫士見王，亦直受摯不還，故膳之也。注鄭司農云「以羔鴈

雉爲摯見者，亦受以給王膳」者，以《大宗伯》六摯之內，孤執皮帛，不中膳羞。庶人執鵠，工商執雞，庶人工商無特見王禮，故不數驚雞也。薛季宣云：「《司士》曰『掌擯士者，膳其摯』。後鄭謂膳者人之於王之膳人。然則膳人之所受者，受之司士也。」歲終則會，唯王及后、世子之膳不會。不會計多少，優尊者。其頒賜諸臣則計之。

【疏】「歲終則會」者，此正膳羞之歲會，亦此官之官成也。膳夫受庖人諸官之歲會而人之冢宰，小宰贊冢宰受而聽之。歲終亦謂夏之季冬，詳《宰夫》疏。云「唯王及后、世子

之膳不會」者，賈疏云：「此膳夫所掌膳羞是其正，故世子亦不會。至下《庖人》『王及后不會』，則世子會之。彼禽獻是其加，故會之。」注云「不會計多少，優尊者」者，賈疏

云：「依《宰夫職》，會是歲計。謂若計，則似限尊者有多少。若不計，則任所用，故云不會是優尊者也。」云「其頒賜諸臣則計之」者，釋經「則會」也。頒賜即上文「肉脩之頒賜」是也。以頒賜與進膳異，且當有限制，以防濫恩，故計之。

庖人掌共六畜、六獸、六禽，辨其名物。

六畜，六牲也。始養之曰畜，將用之曰牲。《春秋傳》曰「卜日曰牲」。鄭司農云：「六獸，麋、鹿、熊、麕、野豕、兔。六禽，鴈、鶉、鷄、雉、鳩、鵠。」玄謂獸人冬獻狼，夏獻麋。又《內則》無熊，則六獸當有狼，而熊不屬。六禽於禽獻及六摯宜爲羔、豚、犢、麋、雉、鴈。凡鳥獸未孕曰禽。《司馬職》曰「大獸公之，小禽私之」。【疏】「掌共六畜、六獸、六禽，辨其名物」者，賈疏云：「掌共六畜者，馬、牛、羊、豕、犬、雞。謂夏官校人、地官牛人、春官雞人、秋官犬人、冬官豕人，摯送六畜與此庖人。六獸六禽，即下獸人送之。此庖人得此六畜六獸六禽，共與膳夫、內外饗。此禽獸等皆有

名號物色。」案：六牲中，羊爲夏官羊人所共，賈誤遺之。又六禽內羔、豚、犢，亦羊人、豕人、牛人共之，舒鴈則掌畜共之，獸人共者，唯雉、麋耳。賈據後注，謂六禽並獸人所獻，說未備。豕人文闕，賈知屬冬官者，依《小宰》注「司空奉豕」義補也。名物，若《爾雅·釋鳥》、《釋獸》、《釋畜》所說，種別不同，皆辨異之也。注云「六畜，六牲也」者，

《說文·豶部》云：「豶，牲也。」《田部》云：「畜，田畜也。」《爾雅·釋畜》釋文引《說文》作「豶牲也」。案：凡經典牲畜之畜，並豶之借字。《左傳》桓六年孔疏云：「《爾雅·釋畜》於馬牛羊豕狗雞之下，題曰六畜。故鄭衆、服虔皆以六畜爲馬牛羊豕犬雞。」然則先鄭《左傳》注說亦同後鄭義。六牲見《膳夫》及《牧人》。然《膳夫》六牲當爲牛羊豕犬鴈魚，與此六畜微異。《牧人》之六牲，乃正此六畜耳。詳《膳夫》疏。又《左》昭二十五年傳云：「爲六畜、五牲、三犧，以奉五味。」蓋六牲中馬不常用，故去之；犬雞不爲牢，故三犧亦不數；是皆不出六牲之外。而杜注乃以五牲爲麋、鹿、麋、狼、兔，孔疏引服虔又以爲麋、鹿、熊、狼、野豕，並取此六獸二鄭義爲釋，失之。云「始養之曰畜，將用之曰牲」者，釋畜牲異名之義。養謂豢飢蕃息之，用謂共祭及膳。《說文·牛部》云「牲，牛完全」也。此專據祭祀之牲言之。

祭牲必完全乃可用，許、鄭各偏舉一義也。引《春秋傳》曰「卜日曰牲」者，僖三十一年經：「四卜郊，不從，乃兔牲。」《左傳》云：「禮，不卜常祀，而卜其牲日，牛卜日曰牲。」杜注云：「既得吉日，則牛改名曰牲。」引之者，證將用曰牲之義。鄭司農云「六獸，麋、鹿、熊、麋、野豕、兔」者，此謂田獸也。《釋文》云：「麋，本又作麋，亦作麋，麋也。」又云：「干注麋作麋，熊作貍。」案，《說文·鹿部》云：「鹿，獸也。麋，鹿屬。麋，麋也，縮文作麋。麋，麋屬。」麋即麋之俗。干說惟以貍易熊，餘與二鄭同。貍，詳《草人》疏。凡家物謂之牲，野物謂之獸。《特牲饋食禮》云：「實獸于楨上，東首。牲在其西，北首東足。」《內則》云：「三牲用藪，獸用梅。」並以牲獸對文見異，與此經義同。吳廷華云：「據《內則》，有兔羹、麋膚、麋腥、鹿脯、田豕脯、麋脯，而不言熊；《左氏》則有熊蹯，先鄭言本此。」云「六禽，鴈、鶉、雉、鳩、鵠」者，《釋文》述干注義同。賈疏云：「此先鄭意取《爾雅》文『四足而毛謂之獸，二足而羽謂之禽』，故爲此解。」吳廷華云：「據《內則》曰雉羹，曰鴈宜麥，曰爵鶉鶉羹。《夏官·羅氏》則曰獻鳩。唯鵠無攷。」云「玄謂獸人冬獻狼，夏獻麋，又《內則》無熊，則六獸當有狼，而熊不屬」者，鄭以《獸人》有獻狼明文，此六獸不宜遺之。既有狼，則先鄭所數六

者之內當去其一。以《內則》膳羞諸獸咸備，而獨無熊，則不入常膳可知，故取彼刪此，餘五獸同先鄭說也。云「六禽，於禽獻及六摯宜爲羔、豚、犢、麋、雉、鴈」者，賈疏云：「下文禽獻之內取羔豚犢麋，《大宗伯》六摯之內亦取羔及雉鴈，破司農六禽之內有鶉鶉鳩鵠，四者於經無所據。」云「凡鳥獸未孕曰禽」者，通釋此經六禽、禽獻及《大宗伯》以禽作六摯之義。未孕曰禽，專據獸言之，鄭兼云鳥者，牽連及之耳。又案：《說文·內部》云：「禽，走獸總名。」《曲禮》：「鶉鵲能言，不離飛鳥；猩猩能言，不離禽獸。」孔疏云：「別而言之，羽則曰禽，毛則曰獸。通而爲說，獸亦可曰禽，故《易》曰：『王用三驅，失前禽。』《白虎通》云：『禽者，鳥獸之總名。』禽名通獸者，以其小獸可擒，故得通名禽也。」案：孔說是也。水蟲亦得稱禽，故後經禽獻又有鱸鱉。鄭云「未孕曰禽」，亦偏舉一義，其實鳥獸不論已孕未孕，通得禽稱矣。引《司馬職》曰「大獸公之，小禽私之」者，以彼文小禽與大獸對舉，明以大小異名，故引以證鳥獸未孕曰禽之義。凡其死生鱸鼈之物，以共王之膳與其薦羞之物及后、世子之膳羞。凡，計數之。薦亦進也。備品物曰薦，致滋味乃爲羞。王言薦者，味以

不褻爲尊。鄭司農云：「鮮謂生肉，薨謂乾肉。」【疏】「凡其死生蠹薨之物，以共王之膳與其薦羞之物」者，此冢上六畜六獸六禽爲文也。賈疏云：「此四者或死或生，新殺爲蠹，乾者爲薨，並庖人以與膳夫、內外饗，以共王之膳。」

注云「凡，計數之」者，與《宰夫》「治凡」之凡義同。《說文·二部》云：「凡，最括而言也。」《一切經音義》引《三蒼》云：「凡，數之總名也。」《漢書·萬石君傳》「迺舉集其門凡」，顏注云：「凡，最計也。」云「薦，亦進也」者，《爾雅·釋詁》云：「薦，進也。」云亦者，冢前《膳夫》先鄭注云「羞，進也」。《籩人》注云：「薦羞皆進也。」義同。云「備品物曰薦，致滋味乃爲羞」者，賈疏云：「以經羞言薦，對后、世子羞言膳，故云備品物曰薦，致滋味乃爲羞。以其不言薦，即是滋味之羞。若然，備品物者，謂王舉則共醢六十饗，以五齋、七醢、七菹、三饔實之。醢人共齋菹醢六十饗，是其備品物，及三牲之俎皆是也。致滋味乃爲羞百有二十品，故鄭云「羞出於牲及禽獸，以備滋味，謂之庶羞」。故《公食》云「宰夫自東房薦豆六」，又云「士羞庶羞」。案：賈謂薦內有三牲之俎，非經正義也。注云備品物者，謂正饌依法數備設之，不主於味。致滋味謂加饌，則以味爲主，不必備物也。此經云共王之膳與其薦羞之物，膳者謂牲體之俎，薦

者謂脯醢，羞者謂庶羞、內羞。故《宰夫》云「掌祭祀之戒具與其薦羞」。彼注云：「薦，脯醢也。羞，庶羞、內羞。」又《籩人》注云：「未食未飲曰薦，既食既飲曰羞。」三注各舉一隅爲釋，義並通也。云「王言薦者，味以不褻爲尊」者，鄭意大總言之，則飲食前所進羞，亦謂之薦；分言之，則有正加尊卑之別。正饌爲薦，尊於二羞，故經於共王細別備舉之。實則王、后、世子云膳羞，羞中亦含薦，以禮殺於王，文不具耳。賈疏謂王言薦羞爲進羞備品物，蓋誤會鄭指。鄭司農云「鮮謂生肉」者，《說文·魚部》云：「鱻，新魚精也。鮮，魚名，出貉國。」經典多借鮮爲鱻。此經皆作鱻，注皆作鮮，亦經用古字，注用今字之例。後「鱻羽」杜注亦云「鮮，魚也」。鱻爲生魚，引申爲凡生肉之稱。《書·益稷》「奏庶鮮食」，僞孔傳云：「鳥獸新殺曰鮮。」是凡鳥獸魚之肉生者並曰鮮矣。《既夕禮》云「魚腊鮮獸」，注云：「鮮，新殺者。」生肉卽新殺者也。云「薨謂乾肉」者，《說文·殂部》云：「薨，殂人里也。」又《木部》云：「槁，木枯也。」此經薨並爲枯魚乾肉之稱。《內則》則葷葷粉榆亦以乾爲薨，蓋皆槁之借字。《敝人》「蠹薨」，《釋文》載別本作「槁」，槁卽槁字。《淮南子·泰族訓》云「以奉宗廟鮮槁之具」。高注云：「乾肉爲槁。」槁亦槁之假借字。互詳《敝人》疏。共祭祀之

好羞，謂四時所爲膳食，若荊州之鯪魚，青州之蟹胥，雖非常物，進之孝也。【疏】「共祭祀之好羞」者，此亦庶羞也。其與內外饗、籩人、醢人等爲豆籩之實。 注云「謂

四時所爲膳食」者，賈疏云：「謂四時之間非常美食。」案：

依賈義，則注「膳食」疑當爲「善食」。好與善美義同，此非

正膳，不當云膳食也。《北堂書鈔·酒食部》引此注作「四

時之善羞」，雖有省改，而善字不誤。云「若荊州之鯪魚，青

州之蟹胥」者，《釋文》引《字林》云「胥，蟹醬也。」丁晏云：

「《說文·魚部》：『胥，蟹醢也。』南方謂之鮓，北方謂之

鯪。」《肉部》：「胥，蟹醢也。」《釋名·釋飲食》：「鮓，菹也，

以鹽米釀魚以爲菹，熟而食之也。蟹胥，取蟹藏之，使骨肉

解胥胥然也。」詒讓案：鮓卽鯪之俗。據鄭說，則南方亦

稱鯪矣。胥亦作「鮓」，《廣韻·四十馮》云「鮓，鹽藏蟹」是

也。云「雖非常物，進之孝也」者，此好羞在六畜、六獸、六

禽之外，非常用之物。必進之者，示備珍品，以盡孝道也。

共喪紀之庶羞，賓客之禽獻。喪紀，喪事之祭，謂

虞祔也。禽獻，獻禽於賓客。獻，古文爲獸。杜子春云：

「當爲獸。」【疏】「共喪紀之庶羞」者，《膳夫》云「羞用百二

十品」是也。詳彼疏。云「賓客之禽獻」者，賓謂朝覲諸侯，

客謂聘覲卿大夫及士介，此官皆共禽獻以與宰夫，使致之也。《聘禮記》云：「宰夫歸乘禽。凡獻執一雙，委其餘于

面。」卽賓客禽獻之事。彼《記》又云「禽羞俶獻比」。^①鄭

注云：「禽羞謂成孰有齊和者。」則禽獻之外，又有禽羞，當

亦此官共之。下云「凡用禽獻」。注云：「用禽獻謂煎和之

以獻王。」《宰夫》「賓客膳獻」，注亦以禽羞俶獻爲釋。是生

孰通得稱獻，則比共禽獻，^②亦得兼咳禽羞，故經不具也。

注云「喪紀，喪事之祭，謂虞祔也」者，《文王世子》注

云：「紀猶事也。」案：此喪紀與《甸師》「喪事」義同，蓋通

大小喪言之。《禮運》鄭注云：「^③紀，絲縷之數有紀。」喪

事有法數，故亦謂之紀。《呂氏春秋·音律篇》高注云：

「喪紀，喪服親疏輕重之紀。」彼專據服制而言，非此經之

義。賈疏云：「凡喪未葬以前，無問朝夕奠及大奠，皆無薦

羞之法。今言共喪紀庶羞者，謂虞祔之祭乃有之。天子九

虞後作卒哭祭，虞，卒哭在寢，明日祔於祖廟。今直云虞祔

不言卒哭者，舉前後虞祔，則卒哭在其中，共庶羞可知。」吳

①「比」，原訛「此」，據楚本改。

②據文義「比」似當作「此」。

③此係《禮器》注文。

廷華云：「庶羞，蓋《內則》及《公食大夫禮》腳臘炙載等二十豆也。《士虞禮》有載四豆，故注云然。」詒讓案：經云喪紀，鄭、賈皆謂據喪祭虞祔。知不含喪奠者，《特牲饋食禮》注云：「庶羞，主爲尸，非神饌也。」喪奠皆無尸，至虞而後立尸，明虞祔乃有庶羞。喪奠雖有籩豆，皆神饌，不得爲庶羞也。《籩人》云：「喪事共其薦籩羞籩。」彼注以爲殷奠時者，據喪奠中有栗脯及糗等耳，非謂喪奠有庶羞也。又案：《小宗伯》「既葬，詔相喪祭之禮」。注亦以喪祭爲虞祔之祭。然三年之喪，虞祔之後，尚有練、大祥、禫諸祭，雖爲吉祭，而亦在未終喪之內。此云喪紀，所該者廣，則練祥諸祭，庖人亦當共其庶羞，不徒卒哭也。虞祔，詳《小宗伯》、《大祝》疏。云「禽獻，獻禽於賓客」者，賈疏云：「謂若《掌客》上公乘禽日九十雙，侯伯七十雙，子男五十雙之類是也。」云「獻，古文爲獸，杜子春云當爲獻」者，段玉裁云：「此字之誤也，故曰當爲。」徐養原云：「獸爲字之誤，古文即故書也。」案：注云古文者，惟此經與《梟氏》兩見。徐謂古文即故書是也。此即謂舊本，非古文大篆，與《儀禮》古文亦異。詳《大宰》疏。又案：此及下文言禽獻者凡三。此注疊古文不云皆爲獸，則下文禽獻字古文及今書自不異，杜即據彼兩文正讀也。凡令禽獻，以瀆授之，

其出入亦如之。令，令獸人也。禽獸不可久處，賓客至，將獻之，庖人乃令獸人取之，必書所當獻之數與之。及其來致禽，亦以此書校數之。至于獻賓客，又以此書付使者，展而行之。《掌客》：乘禽於諸侯，各如其命之數。《聘禮》：乘禽於客，日如其饗餼之數。士中日則二雙。【疏】「凡令禽獻以瀆授之」者，此冢上「賓客之禽獻」爲文。法即等數著於大宰九式賓客之式者，此官受之以爲官法，賓客至，則依法以授而令之也。賈疏云：「凡朝聘賓客至，並致館與之。賓客既在館，此庖人乃書所共禽獻之數，令於獸人，以數授之。」云「其出入亦如之」者，賈疏云：「既以數授獸人，依數以禽人庖人，是人也。庖人得此禽，還依數付使者送向館，是出也。亦如之者，亦依法授之。」注云：「令，令獸人也」者，賈疏云：「案《獸人》云「凡祭祀、喪紀、賓客，共其死獸生獸」。故知令獸人。」詒讓案：六禽有麋、雉。又《掌客》注謂乘禽雉鴈之屬。鄭意鴈謂野鴈。獸人掌野獸并掌野禽，故此注謂唯令獸人也。今攷鴈當爲鵝，《聘禮》注說禽獻又有鷺，則皆家畜也。其雞或亦當有之，則宜并令雞人、掌畜等共之，注義未備也。云「禽獸不可久處，賓客至將獻之，庖人乃令獸人取之」者，禽獸當繫畜於闌牢，不可久處庖中，故必待賓客至，將獻之時，乃令獸人

等取而獻之，明未獻則不豫取也。云「必書所當獻之數與之」者，《司書》注云：「法猶數也。」《宰夫》「凡賓客，以牢禮之法，掌其膳獻與其陳數」。是數與法相將，故鄭即以數釋此經之法。《文選·東京賦》薛綜注云：「授，與也。」謂庖人書所當獻禽獸之法數以與獸人等，使依書取致之也。云「及其來致禽，亦以此書校數之」者，獸人等既取禽獸以入致於庖人，庖人仍以前所與之書校數其具否。云「至于獻賓客，又以此書付使者，展而行之」者，于，注例當作「於」，各本並誤。付使者，即付宰夫等也。賈疏云：「解經出亦如之。言展而行之者，展猶省視也。行，去也。謂將向客館之時，省視禽性，然後去。」云「掌客」，乘禽於諸侯，各如其命之數者，釋朝賓禽獻之數，詳《掌客職》。「引《聘禮》乘禽於客，日如其饗餼之數」者，釋聘客禽獻之數。《聘禮記》云：「既致饗，旬而稍，宰夫始歸乘禽，日如其饗餼之數。」賈疏云：「言此臣禮，不依命數。公侯伯之卿三命，子男之卿再命，皆以爵卿也。饗餼五牢，日五雙，故言日如其饗餼之數。」詒讓案：五等諸侯雖依命數，亦依饗餼牢數，則每牢十雙，如上公九牢，乘禽日九十雙是也。此臣禮，依饗餼牢數，則每牢一雙，卿五牢，而《聘義》云「乘禽日五雙」是也。云「士，中日則二雙」者，亦《聘禮記》文。鄭彼注

云：「中猶閒也。不一日一雙，大寡，不敬也。」賈疏云：「謂作介時，士爵一日則一雙，禽獻不以命數，故言閒日則二雙。言此者，釋經以法授之，法則數也。」凡用禽獻，春行羔豚，膳膏香；夏行牂鰠，膳膏臊；秋行犢麋，膳膏腥；冬行鱄羽，膳膏膻。用禽獻，謂煎和之以獻王。鄭司農云：「膏香，牛脂也，以牛脂和之。牂，乾雉。鰠，乾魚。膏臊，豕膏也，以豕膏和之。」杜子春云：「膏臊，犬膏。膏腥，豕膏也。鮮，魚也。羽，鴈也。膏膻，羊脂也。」玄謂膏腥，雞膏也。羔豚，物生而肥。犢與麋，物成而充。牂，鰠，煖熱而乾。魚，鴈，水涸而性定。此八物者，得四時之氣尤盛，為人食之弗勝，是以用休廢之脂膏煎和膳之。牛屬司徒，土也。雞屬宗伯，木也。犬屬司寇，金也。羊屬司馬，火也。【疏】「凡用禽獻」者，此共王之禽獻也。上云六禽，此又有鰠鱄者，魚為小牲，亦得稱禽也。《國語·魯語》云：「使水虞登川禽。」韋注云：「鰠鰠之屬。」案：彼當亦含有魚，蓋水蟲通得謂之川禽，與此經義可互證也。云「春行羔豚，膳膏香」者，以下辨四時所用禽獻之物，《內則》文並同。《司燂》注云：「行猶用也。」《春秋·緜露·天地之行篇》云：「飲食臭味，每至一時，

亦有所勝有所不勝之理，不可不察也。四時不同氣，氣各有所宜。宜之所在，其物代美。視代美而代養之，同時美者裸食之，是皆其所宜也。春秋裸物其和，而冬夏代服其宜，則當得天地之美四時和矣。」案：此經說四時之味所宜，即董子所謂春秋裸物其和而冬夏代服其宜也。鄭、賈以五行休王為說，於經無當。注云「用禽獻謂煎和之以獻王」者，賈疏云：「殺牲謂之用，煎和謂之膳。用膳相將之言，故以煎和解用。上言賓客之禽獻，此用禽以王為主，故言獻王。」案：賈說非也。用與行義同。此獻王者，

以備膳羞，別於上賓客之禽獻為生致者，故注特言煎和也。但《聘禮》賓客有禽羞，彼注謂有齊和，則亦宜依此法行之。此禽獻內雖以王膳為主，當亦咳有賓客之羞矣。煎和，詳《內饗》疏。鄭司農云「膏香，牛脂也」者，《說文·香部》云：「香，芳也。」香，香之隸省。《內則》香作「薝」，鄭彼注云「牛膏薝」。薝香字同。香、臊、腥、羶，皆以其芳臭名膏也。賈疏云：「案《內則》鄭注『釋者曰膏，凝者曰脂』。彼是相對之義，通而言之，脂膏一也，故司農以脂解膏。」案：賈謂通言脂膏是一，是也，然非先鄭之旨。《梓人》注云：「脂者牛羊屬，膏者豕屬。」故經云膏，統言不別。而先鄭及杜釋香、羶，特言牛脂、羊脂，辨異名也。云「以牛脂和之」

者，謂以牛脂和羔豚之肉為膳也。云「腊，乾雉」者，《內則》注同。此據《士相見禮》云「冬用雉，夏用腊」。注云：「夏用腊，備腐臭也。」《內則》、《釋文》引盧植亦云「腊，雉腊」。「說文·肉部」云：「北方謂鳥腊腊。傳曰：堯如腊，舜如腊。」案：許意蓋謂凡雞鶩鳧鴈之屬，乾者通得稱腊。於此經及《內則》義亦得通。《廣雅·釋器》云：「腊，脯也。」蓋亦指羽鳥之乾脯言之。云「鱸，乾魚」者，《內則》注同。《籩人》「臠鮑魚鱸」，注云：「鱸者，析乾之。出東海。」《說文·肉部》云：「鱸，乾魚，尾臠鱸也。」《周禮》有臠鱸。「許所據字與鄭異而義同。《內則》釋文載鱸本又作「臠」，與許合。此鱸即《敝人》之臠。夏獻之，故《國語·魯語》謂之夏槁矣。云「膏臊，豕膏也」者，《釋文》引干注同。《說文·肉部》云：「臊，豕膏臭也。」《一切經音義》引《通俗文》云：「羶臭曰臊。」並與先鄭說同。《說文·魚部》云「鰾，鮓臭也」，引《周禮》曰「膳膏鰾」。「鮓，魚臭也。」阮元云：「《周禮》諸本不同。《說文》引經，每兼釋異本。蓋膏鰾一作膏鰾，而其義為魚臭，與鄭以為豕膏，杜以為犬膏，俱互異。《說文》於鰾下引《周禮》，於鰾下止存豕膏臭一義，則許氏所據古文本作鰾。」案：阮說是也。惠士奇說同。然鰾為犬臭，《內饗》有明文，則不當別為魚臭之鰾，許所據本不及杜、鄭本

之長。又《呂氏春秋·本味篇》云：「水居者腥，肉攫者臊。」高注云：「肉攫者，攫挐肉而食之，謂鷹鵂之屬，故其臭臊也。」高說臊臭，與此經及《說文》並異。云「以豕膏和之」者，亦謂以豕膏和脰鱸爲膳也。杜子春云「膏臊犬膏，膏腥豕膏也」者，據《內饗》文。《內則》注亦云「犬膏臊」。俞樾云：「臊腥羶三者，均當以杜說爲定。《內饗》云：『辨腥臊羶香之不可食者。羊冷毛而羶，羶；犬赤股而臊，臊；豕盲視而交睫，腥。』然則臊以犬言，腥以豕言，羶以羊言，在本經具有明證。先鄭以膏臊爲豕膏，則與《內饗》不合。後鄭以膏腥爲雞膏，附會土木金火爲義，更不足據矣。」案：俞說是也。《說文·肉部》云：「豕，犬膏臭也。」與杜、鄭此注字義又異，疑本賈侍中說。又許書腥字，別爲「星見食豕，令肉中生小息肉」，不爲牲臭，亦詳《內饗》疏。云「鮮，魚也」者，此亦注用今字也。《內則》注云：「鮮，生魚也。」對前鱸爲乾魚。鮮，鱣之借字，詳前疏。云「羽，鴈也」者，《內則》注同。《說文·羽部》云：「羽，鳥長毛也。」此與《司裘》、《羅氏》羽物義同，乃禽鳥之通名。杜據《食醫》六牲有鴈，故專舉鴈爲釋，鴈亦即鵞也。《釋文》出「鱣羽」云：「鄭云：『鮮，魚也；羽，鴈也。』」杜云：「鮮羽，鴈也。」則陸所見本，杜注無「魚也」二字，而以鮮羽二字連

讀。然鴈曰鮮羽，於義無取，其本殆不足據。其所引後鄭說，蓋據《內則》注，非此經注義。云「膏羶，羊脂也」者，《內則》注云：「羊膏羶。」《說文·彡部》云：「彡，羊臭也。重文羶，彡或从亼。」是羶本羊臭，《呂氏春秋·本味篇》云「草食者羶」是也。云羊脂者，亦以有角者脂別之。云「玄謂膏腥，雞膏也」者，《釋文》引干注同，又云「或作雉膏」。案：《內則》注亦云「雞膏腥」，此無正文，後鄭以五牲分屬五行，而以時令合之，謂秋當用雞膏，故不從子春說。其實非也。又五牲無雉，《釋文》所載或說亦非。云「羔，豚，物生而肥」者，《大宗伯》注云：「羔，小羊也。」《說文·豚部》云：「豚，小豕也。重文豚，篆文从肉豕。」此釋春行羔豚之義，春萬物生長之時，羔豚亦肥腯也。云「犢與麋，物成而充」者，《說文·牛部》云：「犢，牛子也。」《迹人》注云：「麋，麋鹿子。」此釋秋行犢麋之義，秋萬物長成之時，犢麋亦充實也。云「脰鱸，暎熱而乾」者，釋夏行脰鱸之義。《說文·日部》云：「暎，乾也。耕暴田曰暎。」夏盛暑暎熱，故物易乾也。云「魚，鴈，水涸而性定」者，釋冬行魚鴈之義。凡六禽六鰾之鴈，並當爲鴈，即舒鴈也。前杜釋羽爲鴈，當同。鄭於《大宗伯》注則釋鴈爲鴻鴈，此注亦然，故云水涸性定，以鴻鴈亦水鳥也。然與經義不合。《詩·周頌·潛》敍云「季冬

薦魚」。鄭彼箋云：「冬魚之性定。」孔疏云：「冬月既寒，魚不行，乃性定而肥充，故冬薦之也。」云「此八物者，得四時之氣尤盛，為人食之弗勝，是以用休廢之脂膏煎和膳之」者，此鄭自申其膳和應五行休王之說也。《內則》注亦云：

「此八物四時肥美也，爲其大盛，煎以休廢之膏，節其氣也。」賈疏云：「春木王，火相，土死，牛屬中央土。夏時金死，犬屬西方金。雞屬東方木，秋時木死。羊屬南方火，冬時火死。」又云：「五行王相相剋。春木王，火相，土死，金囚，水爲休廢。夏火王，土相，金死，水囚，木爲休廢。已下推之可知。王所勝者死，相所勝者囚，新謝者爲休廢。若然，向來所膳膏者，皆是死之脂膏。鄭云休廢者，相對死與休廢別，散則死亦爲休廢，故鄭以休廢言之也。」案：鄭意當如賈說，但膳羞齊和，當取性味相成，不宜傳合五行休王爲釋。且秋行犢麋膳膏腥，腥實爲豕膏，豕北方畜，秋時金王水相，亦非休廢之膏。鄭、賈說不可從。云「牛屬司徒土也」者，《大司徒》云：「祀五帝，奉牛牲。」注云：「牛能任載，地類也。」又牛人掌養牛，亦屬司徒，是於五行屬土也。亦詳《大司徒》疏。云「雞屬宗伯木也」者，雞人掌雞牲，屬宗伯，是雞屬木。詳《春官·敘官》疏。云「犬屬司寇金也」者，犬人掌犬牲，屬司寇，是犬屬金。詳《秋官·敘官》疏。

云「羊屬司馬火也」者，羊人掌羊牲，屬司馬。《少牢饋食禮》注引《尚書傳》云「羊屬火」。凡此諸牲屬五行之說，蓋並依《洪範五行傳》義，互詳《夏官·敘官》疏。歲終則會，唯王及后之膳禽不會。膳禽，四時所膳禽獻。加世子可以會之。【疏】「歲終則會」者，正膳羞之歲會，亦官成也。注云「膳禽四時所膳禽獻」者，卽上禽獻四時異物是也。云「加世子可以會之」者，禽獻爲加饌，輕於正膳。經云「唯王及后不會」，則世子不在不會之例可知。對前膳夫掌正膳世子亦不會也。

周禮正義卷八

內饗掌王及后、世子膳羞之割亨煎和

之事，辨體名肉物，辨百品味之物。割，肆解肉也。亨，煮也。煎和，齊以五味。體名，脊、脅、肩、臂、臠之屬。肉物，載燔之屬。百品味，庶羞之屬。言百，舉成數。

【疏】注云「割，肆解肉也」者，《爾雅·釋言》云：「割，裂也。」《說文·刀部》云：「割，剥也。」《郊特牲》云「腥肆爛臠祭」。注云：「治肉曰肆。」《小子》「羊肆」注云：「肆，讀爲鬻。羊鬻者，所謂豚解也。」《大司徒》注亦云「肆，解骨體」。是肆解即割裂牲體骨肉之通名，故此注釋割爲肆解也。

《儀禮經傳通解續》引《尚書大傳》云：「殺者中死，割者中理。」凡牲體有豚解、體解，節解，法數不同，詳後及《小子》疏。云「亨，煮也」者，《方言》云：「亨，熟也。嵩嶽以南，陳、潁之間曰亨。」《士冠禮》注云：「煮於鑊曰亨。」云「煎和，齊以五味」者，《說文·火部》云：「煎，熬也。」《方言》云：「煎，火乾也。凡有汁而乾謂之煎。」煎和蓋謂煎熬而

以五味調和之。《呂氏春秋·仲夏紀》高注云：「和，齊和也。」又《本味篇》云：「凡味之本，水最爲始。五味三材，九沸九變，火爲之紀。調和之事，必以甘酸辛苦鹹，先後多少，其齊甚微，皆有自起。」《左》昭二十年傳，晏子曰：「水火醯醢鹽梅以亨魚肉，燀之以薪，宰夫和之齊之以味，濟其不及，以洩其過。」並煎和齊五味之義。云「體名，脊、脅、肩、臂、臠之屬」者，凌廷堪云：「凡牲左體謂之左胖，右體謂之右胖。前體謂之肱骨，又謂之前脛骨。肱骨三，最上謂之肩，肩下謂之臂，臂下謂之臠。後體謂之股骨，又謂之後脛骨。股骨三，最上謂之肱，又謂之膊，肱下謂之胛，又謂之髀，胛下謂之股。中體謂之脊。脊骨三，前骨謂之正脊，中骨謂之脰脊，後骨謂之橫脊。脊兩旁之肋謂之脅，①又謂之肋，②又謂之幹。脅骨三，中骨謂之正脅，又謂之長脅，前骨謂之代脅，後骨謂之短脅。肩上謂之臑，又謂之臑。臑上謂之髀。餘骨謂之儀。殊左右肱股骨四，脊一，兩脅二，謂之七體，又謂之豚解。左右肱股骨各六，脊骨三，左右脅骨六，謂之二十一體，又謂之體解。節解謂之折，骨

①「兩」，原訛作「雨」。

②「肋」原作「胸」二字，今據凌廷堪《禮經釋例》改。

折謂之殺膏。案：凌說二十一體，有穀而無脾，從《少牢》賈疏說也。朱子則謂當加兩脾而去穀。黃以周云：「豚解合升，是并脾升。體解不升脾，而《士虞》、《特牲》、《少牢饋食》祝俎皆用脾，則脾自在二十一體之中。但神俎升右脾，以脾賤不升，故《少牢禮》止十一體爾。經言脾不升，正明其爲一體也。」案：黃說是也。云「肉物，載燔之屬」者，《釋文》燔作腍，云「本亦作燔」。案：宋本亦作「腍」。《說文·肉部》云：「載，大臠也。」又《炙部》云：「燔，宗廟火孰肉。」燔卽腍之借字。《士虞禮》注云：「載，切肉也。」燔，詳《量人》疏。王引之云：「載燔乃割亨煎和之異名，非肉所本有之名物也。與「體名」爲牲所本有者義例參差，殆非經意。今案：「肉物」蓋若《大雅·行葦篇》之「嘉穀脾臠」，《少牢饋食禮》之腸三、胃三、舉肺一、祭肺三、倫膚九及心舌載于肝俎，賓長羞牢肝之屬，凡無骨者皆是。」案：王說是也。凌廷堪云：「皮謂之膚，精者謂之倫膚，腹腴謂之腸胃，知食味者謂之心舌，氣主謂之肺，舉肺謂之離肺，又謂之膾肺，祭肺謂之刳肺，又謂之切肺，肺與正脊謂之舉，肉理謂之腠，又謂之奏。」案：此卽所謂肉名也。云「百品味，庶羞之屬，言百，舉成數」者，賈疏云：「案《膳夫職》庶羞百有二十品，今言百，故鄭云舉成數。」詒讓案：百品味卽後

云百羞是也。《國語·周語》云「品其百籩」，亦同。凡庶羞之屬，濡者實於豆，乾者實於籩。云百籩者，以咳豆也。王舉，則陳其鼎俎，以牲體實之。取於鑊以實鼎，取於鼎以實俎。實鼎曰胥，實俎曰載。【疏】「王舉則陳其鼎俎」者，舉亦謂殺牲盛饌也。賈疏云：「陳鼎有二處：初陳鼎於鑊西，後陳鼎於阼階下。其俎皆陳於鼎西南。」云「以牲體實之」者，①牲體卽豚解七體、體解二十一體之等，皆肆解而實之鼎俎也。注云「取於鑊以實鼎，取於鼎以實俎」者，凡牲必解而亨之於鑊，既孰，乃取以實鼎。

《亨人》注云「鑊，所以煮肉及魚腊之器，既孰，乃胥於鼎」是也。將薦之，則以匕出牲體於鼎，而載之於俎也。其見於《禮經》亨鑊、升鼎、載俎三節皆備者，《少牢饋食禮》云：「羹定，雍人陳鼎五，三鼎在羊鑊之西，二鼎在豕鑊之西。司馬升羊右脾，實于一鼎。司士升豕右脾，實于一鼎。雍人倫膚九，實于一鼎。司士又升魚腊，魚十五而鼎，腊一純而鼎。卒胥，皆設扃鬯，乃舉，陳鼎于廟門之外東方，北面北上。」此取於鑊以實鼎也。又云：「鼎序入，司士合執二俎以從，司士贊者二人皆合執二俎以相從。入，陳鼎於東

①「云」，原作「亦」，據上下文義改。

方，當序南，于洗西。俎皆設于鼎西。佐食上利升牢，心舌載于所俎。上利升羊，載右胖。下利升豕，其載如羊。體其載于俎，皆進下。司士三人升魚腊膚，魚用鮒十五而俎，腊一純而俎，膚九而俎。此取於鼎以實俎也。凡禮略者，或取於鑊，即實之俎。《鄉飲酒記》云：「其牲狗也，亨于堂東北，俎由東壁自西階升。」注云「亨狗既孰載之俎」是也。云「實鼎曰胥，實俎曰載」者，即據《少牢饋食》文。《禮》他篇多言升。《士冠禮》「載合升」，鄭注云：「在鼎曰升，在俎曰載。」彼升即胥也。通言之，在俎亦得謂之胥。《燕禮》「胥薦主人于洗北西面，脯醢無胥。」注云：「胥，俎實。」胥字又作烝，《國語·周語》有全烝、房烝、肴烝。肴烝《特性饋食禮》作穀胥。此胥並謂俎實。是胥與載對文則異，散文亦通。選百羞、醬物、珍物以俟饋。先進食之時，恒選擇其中御者。【疏】「選百羞、醬物、珍物以俟饋」者，《說文·立部》云：「俟，待也。」經典通段俟爲俟。賈疏云：「百羞者，則庶羞百二十。醬物者，即醬用百二十饔。珍物者，諸八珍之類。」案：《膳夫》云羞用百有二十品，此及《食醫》並云百羞，鄭、賈謂舉成數。竊疑或據王食禮籩豆各五十言之，詳《膳夫》疏。《初學記·帝王部》引《尸子》云「君天下者珍羞百種」，即此。俟饋者，謂俟膳夫之饋也。

王之膳羞，內饗但主選，不主饋，王尊於后，世子也。

注云「先進食之時，恒選擇其中御者」者，《小爾雅·廣言》云：「選，擇也。」謂於王未進食之時，先選擇珍美堪中王御者以進之也。《獨斷》云：「御者，進也，飲食入於口曰御。」王引之云：「選讀曰饌。《說文》曰：「饌，具也。」又曰：「異，具也。」異與饌古同聲。選百羞醬物珍物者，具百羞醬物珍物也。《文王世子》曰「養老之珍具」是也。珍羞恐其不備而具之，故謂之饌。」案：王說亦通。共后及世子之膳羞。膳夫掌之，是乃共之。【疏】注云「膳夫掌之，是乃共之」者，據《膳夫》云掌后及世子之膳羞。賈疏云：「后，世子直言共，不言饋者，膳夫饋王，不饋后，世子，此內饗言共，是親饋，故鄭云膳夫掌之，是乃共之。」辨腥臊羶香之不可食者。牛夜鳴則廋；羊冷毛而羴，羴；犬赤股而躁，躁；鳥鵲色而沙鳴，羴；豕盲眦而交睫，腥；馬黑脊而般臂，蠅。腥臊羶香可食者，是別其不可食者，則所謂者皆臭味也。冷毛，毛長總結也。鵲，失色，不澤美也。沙，漸也。交睫，腥，腥當爲星，聲之誤也。肉有如米者，似星。般臂，臂毛有文。鄭司農云：「廋，朽木臭也。蠅，蠅蛄臭也。」杜子春

云：「盲眊當爲望視。」【疏】「辨腥臊羶香之不可食者」者，此辨禽牲之不中膳羞者。凡牲病則失味且害人，故內外饗不以共也。《內則》亦有此文。云「犬赤股而躁，臊」者，《說文·肉部》云：「股，髀也。」《內則》注云：「赤股，股裏無毛也。」賈疏云：「言股裏無毛，而走又躁疾。」云「鳥皤色而沙鳴，狸」者，鳥即掌畜之卵鳥，兼鴈雞二牲而言。狸，《內則》作「鬱」，彼注云「鬱，腐臭也」。云「豕盲眊而交睫，腥」者，盲眊《內則》作「望視」。眊視古今字，詳《大宰》疏。《說文·目部》云：「眊，目旁毛也。」睫即眊之俗。賈疏云：「豕乃聽物，不合望眊。此豕眼睫毛交，故云望眊而交睫。」云「馬黑脊而般臂，蠖」者，《說文·犛部》云：「脊，背脊也。」脊即脊之隸變。蠖，《內則》作「漏」，字通。注云「腥臊羶香可食者」者，賈疏云：「即上《庖人職》所云是也。」云「是別其不可食者，則所謂者皆臭味也」者，《敍官》注云：「辨，別也。」經言辨其不可食者，明此腥臊羶香，與《庖人》膏腥等異，即《論語·鄉黨篇》云「臭惡不食」是也。臭味，謂穢惡之味。《說文·尸部》云：「穢，腐氣也。」經典通借臭爲之。云「冷毛，毛長總結也」者，賈疏云：「冷毛謂毛長也，毳謂毛別聚結者。」案：依賈說，則鄭自以毛長詰冷毛，總結詰毳，疑注「冷毛」下當有「毳」字，而今本挽之。蓋經

於冷毛毳之間著一「而」字，明毳與冷毛是二病，下四句文例並同，故鄭亦兼釋之。《內則》注云：「冷毛毳，毛別聚於不解者也。」彼注亦兼舉「冷毛毳」三字，可以互證。彼孔疏云：「冷謂毛本稀冷，毳謂毛頭毳結。」洪頤煊云：「冷與零同，謂毛零落而又毳結。」案：孔、洪說是也。蓋凡畜病則細毛多零落，長毛雖存，而糾結不解。此注以毛長釋冷毛，明細毛零落，僅見長毛也。以總結釋毳者，《掌皮》云「共其毳毛爲毼」，故毛結亦謂之毳。《內則》釋文云：「冷，結毛如氈也。」陸雖釋冷，實毳字義也。《曲禮》牲號云「羊曰柔毛」，注云：「羊肥則毛柔潤。」毛零落總結則不柔潤，故爲病矣。云「皤失色，不澤美也」者，《釋文》皤作「獮」，云「本又作獮」。阮元云：「《玉篇》：『皤，白色。獮，牛色不美澤；又牛黃白色。』《說文·牛部》：『獮，牛黃白色，从牛皤聲。』《白部》無皤字。今《禮記·內則》作『皤』，而《釋文》作『獮』，云『本又作獮』。知皤爲俗字。」案：阮以皤爲俗字是也。但此爲鳥色，則不得爲獮字，陸本及《玉篇》不足據。《玉篇》獮字注亦隱用此注義，而以失色爲牛色，尤譌謬之甚者。此字古當止作獮。《內則》注云：「皤色，毛變色也。」孔疏云：「皤色，其色變無潤澤。」《廣韻·三十小》引《蒼頡篇》云：「獮，鳥毛變色。」字作「獮」，與《內則》或本同

訓爲鳥毛變色，與此注失色之義亦正合。《古文苑》班婕妤《擣素賦》有「見禽華以廋色」之語，亦其證也。云「沙，漸也」者，沙漸一聲之轉。《說文·疒部》云：「癩，散聲。」《方言》云：「癩，散也。東齊聲散曰癩，秦晉聲變曰癩。」《內則》注云：「沙猶癩也。」彼《釋文》云：「癩，本作斯。」孔疏云：「癩謂酸癩，古之癩字單作斯耳。」案：《大戴禮記·文王官人篇》云「其聲斯醜」。盧注云：「癩當聲誤爲斯。」癩、癩、癩，斯，聲義並相近。《曲禮》云「雞曰翰音」。注云：「翰，長也。音，鳴也。」是雞以長鳴爲良，故鳴聲沙漸則爲病也。云「交睫腥，腥當爲星，聲之誤也」者，《內則》注同。段玉裁云：「注舉交睫腥三字者，以此腥別於上文腥臊羶香之腥也。鄭君說腥爲雞膏交睫腥之腥，當易爲星。」云「肉有如米者，似星」者，《內則》注云：「星，肉中如米者。」段玉裁云：「似星」當作「曰星」，謂肉有如米者謂之星，如飯之粦也。許叔重說勝爲犬膏之臭，腥爲星見食豕，令肉中生小息肉，故其字從肉星，星亦聲，則腥爲正字，而勝爲《周禮》腥臊之正字。許所據《周禮》，與鄭所據不同。兩司農作「腥」，而「云豕膏，一云雞膏，許作「勝」而曰犬膏，說又乖異耳。」阮元云：「《爾雅》「米者謂之粦」。郭注云：「飯中有腥。」亦以腥爲正字。」詒讓案：後鄭因此經腥爲豕

病，而《庖人》「膏腥」注以爲雞膏，二者不相當，故破腥爲星，而別爲之說。依許說，則腥自爲豕生息肉之正字，不必改讀。但此經方言氣臭之不可食者，不宜腥獨爲肉有如米之名，鄭說殆非也。此腥實當讀如字，《庖人》之膏腥，亦當依杜子春說訓爲豕膏。兩經文義本相合，鄭岐而二之，遂滋曲說耳。互詳《庖人》疏。云「般臂，臂毛有文」者，《釋文》云：「臂，徐本作辟。」案：辟即臂之省。《內則》注云：「般臂，前脰般般然也。」般蓋辯之借字。《說文·文部》云：「辯，駁文也。」賈疏云：「鄭荅冷剛：童牛之牀，木在手曰牀，牛無手，以前足當之。此馬亦然，故言般臂。」惠棟云：「《山海經·北山經》「諸毗之水，其中多水馬，其狀如馬，文臂牛尾」。郭璞云：「臂，前腳也。《周禮》曰：馬黑脊而斑臂腰。」阮元云：「《釋文》「般音班」，注云「臂毛有文」，是亦讀般爲斑也。古般斑通。郭氏以今字讀之，故引作斑。」案：阮說是也。斑亦即辯之俗。鄭司農云「庖，朽木臭也」者，呂飛鵬云：「《說文·广部》：「庖，久屋朽木。《周禮》曰：牛夜鳴則庖臭如朽木。」與司農說合。」詒讓案：後鄭《內則》注云「庖，惡臭也」，引《春秋傳》曰「一薰一庖」。僖四年《左傳》作「蕕」，杜注云：「蕕，臭草。」亦與朽木臭之義相近，蓋庖蕕聲近義略同。《釋文》引干注云「病

也。《廣雅·釋詁》云：「瘡，病也。」瘡，瘡字亦通。云「螻，螻蛄臭也」者，《內則》螻作漏，注云「漏當爲螻，如螻蛄臭也」，即依此文。《爾雅·釋蟲》云「蝻，天螻」。郭注云：「螻蛄也。」《釋文》云「螻，干音漏，內病也」。則干依《內則》破螻爲漏，與鄭正相反。焦循云：「康成以漏爲螻，令升以螻爲漏。《列子·周穆王篇》云「王之廚饌，腥螻而不可饗」。張湛取鄭注云：「螻蛄臭也。」《方言》「螻蛄一名杜狗」。即今之土狗，不聞其臭惡。螻從婁，《說文》：「婁，空也。」《釋名》：「樓，言牖戶諸射孔婁婁然也。」婁爲孔，與漏義正同。《呂氏春秋·慎小篇》云：「巨防空螻而漂邑殺人。」此螻卽漏字，空螻卽孔漏也。高誘解爲孔穴容螻蛄，非是。此干氏內病之訓，謂內病成孔，婁婁然也。」案：焦申干義，亦足備一解。但據《列子》腥螻之文，則螻自當爲臭味之名。螻，《山海經》郭注引此經又作「樓」，螻蛄聲類同。杜子春云「盲胝當爲望視」者，胝，注例用今字作「視」，述經亦然，此作「胝」，疑誤。杜卽從《內則》讀也，但杜意止謂盲當爲望耳。其胝視爲古今字，此經用古文，《禮記》用今文，經文各從其朔，不足相校也。鄭彼注云「望視，視遠也」。孔疏云：「謂豕視望揚。」案：《左》哀十四年傳云「陳豹望視」，杜注云：「目望陽。」孔卽本杜義。《家語·辨樂

篇》王注云：「望羊，遠視也。」《莊子·秋水篇》「眈眈向若而歎」。彼《釋文》云：「本亦作『望洋』，司馬、崔云：眈眈猶望羊，仰視貌。」《莊子》眈與此盲字正同，揚陽洋洋字並通。段玉裁云：「盲望同音假借。子春不云讀爲，云當爲者，謂爲聲之誤也。」凡宗廟之祭祀，掌割亨之事。凡燕飲食亦如之。凡掌共羞、脩、刑、醢、臠、胖、骨、鱠，以待共膳。掌共，共當爲具。羞，庶羞也。脩，鍛脯也。胖如脯而腥者。鄭司農云：「刑醢謂夾脊肉，或曰膾肉也。骨鱠謂骨有肉者。」玄謂刑，鉶羹也。臠，腩肉大臠，所以祭者。骨，牲體也。鱠，乾魚。【疏】「凡宗廟之祭祀，掌割亨之事」者，賈疏云：「內饗不掌外神，言凡者，謂四時及祫禘并月祭等皆在其中，掌其割亨之事。上王后言煎和，此不言煎和者，鬼神尚質，不貴褻味，故不言煎和。」詒讓案：《大戴禮記·諸侯饗廟禮》，雍人刲羊割雞，雍人卽內饗也。又《少牢饋食禮》云「雍人概鼎匕俎于雍爨」，又「雍人陳鼎五」，又「雍人倫膚九，實于一鼎」，則內祭祀內饗亦陳其鼎俎以牲體實之，此文不具也。云「凡燕飲食亦如之」者，賈疏云：「謂王及后、世子自燕飲食，皆須割亨，故云亦如之。」案：賈說是也。此食與《膳

夫《燕食同》，飲亦謂燕居飲酒，則與《膳夫》燕飲酒異。其賓客饗食燕皆掌於外饗，非此官之職也。云「凡掌共羞、脩、脩、脩、脩、脩、脩，以待共膳」者，謂豫具此七者，以待共王、后、世子之膳，不徒掌割烹也。 注云「掌共，共當爲具」

者，以與下共膳文複，故破爲具，共具形近而誤，謂統下羞脩七者皆具之。云「羞，庶羞也」者，賈疏云：「庶羞則百二十品是也。」案：詳《膳夫》疏。云「脩，鍛脯也」者，《膳夫》先鄭注云：「脩，脯也。」《白虎通義·文質篇》云：「鍛脩者，脯也。」《公羊》莊二十四年何注同。案：統言之，脩脯並爲乾肉；析言之，則乾肉之不鍛者爲脯，鍛者爲脩。故《膳人》注云：「薄析曰脯，捶之而施薑桂曰鍛脩。」《廣雅·釋詁》云：「鍛，椎也。」蓋取乾脯雜薑桂椎擣之，是爲鍛脩，若《內則》牛脩是也。互詳《膳夫》、《膳人》疏。云「胖如脯而腥者」者，亦如脯之薄析，但不乾耳。《膳人》注云：「胖宜爲脯而腥，胖之言片也，析肉意也。」《說文·肉部》云：「胜，一曰不孰也。」經典通段腥爲之，互詳《膳人》疏。鄭司農云「刑臠，謂夾脊肉」者，先鄭以刑臠爲一物，《膳人》杜注亦云「臠胖皆謂夾脊肉」。曾釗云：「刑不訓夾脊肉。據先鄭意當讀爲肿，刑从开聲，與肿聲近。《說文·肉部》「肿，夾脊肉也。」^①正與先鄭合。」案：曾說是也。臠，《說文》訓

爲無骨腊，杜及先鄭亦釋爲夾脊肉者，蓋讀臠爲脢也。《易·咸》九五爻辭「咸其脢」，《釋文》引虞翻云：「脢，夾脊肉也。」孔疏引子夏《易傳》云：「在脊曰脢。」鄭《易》注云：「脢，脊肉也。」王肅云：「脢在背而夾脊。」字亦作脰，《內則》「擣珍用脰」，鄭注云：「脰，脊側肉也。」臠與脢聲類相近。《詩·小雅·小旻》「民雖靡臠」，《大雅·緜》「周原臠臠」，《釋文》及《文選·魏都賦》李注引《韓詩》，臠並作「脰」。杜鄭二君讀臠爲脢，猶《韓詩》以脰爲臠也。《集韻·十五灰》亦云「脢或作臠」，卽其證。云「或曰脰肉也」者，《膳人》先鄭注同。《說文·肉部》云：「脰，匈也。」案：此亦讀臠爲脢而說異。《易·咸》九五王弼注云：「脢者，心之上，口之下。」心上口下，卽當脰之肉也。云「骨鱠，謂骨有肉者」者，謂牲牢之骨體也。鱠不得爲牲體，先鄭本疑當作「臠」，與《說文·肉部》引《庖人》文同，此又以骨鱠爲一物也。先鄭意蓋以此字從肉，義可通於牲魚，故《庖人》單言臠，則釋爲乾魚；此與骨連文，則以爲骨之連肉者，與後鄭本字義並微異。若亦同後鄭作鱠從魚，則形義相將，不得通於牲畜矣。云「玄謂刑，鉏羹也」者，破先鄭刑臠爲

① 「肿」原說「脊」，據楚本改。

一物。刑鉶聲類同字通。《史記·敘傳》「啜土刑」，亦以刑爲鉶。鉶羹，見《亨人》。後鄭意刑謂和羹之菜肉也。云「臠，腠肉大臠，所以祭者」者，亦破先鄭夾脊肉、膾肉之說。《說文·肉部》云：「腠，薄切肉也。臠，臠也。一曰切肉臠也。」《少儀》云：「牛與羊魚之腥，聶而切之爲膾。」注云：「聶之言腠也。先藿葉切之，復報切之，則成膾。」然則腠肉大臠者，謂薄切肉爲大臠，卽所謂藿葉切之者，但不復報切耳。《少儀》又云「魚祭臠」，注云：「臠，大臠，謂剝魚腹也。」凡進羞必以肉肥美者，特爲大臠以擬祭，謂之大，魚或謂之臠。案：凡腠肉大臠，在牲謂之大，在魚謂之臠。通言之，大亦得名臠，此職及《腊人》之臠是也。互詳《腊人》疏。云「骨，牲體也」者，謂六牲之骨體。《祭統》云：「凡爲俎以骨爲主，骨有貴賤，殷人貴髀，周人貴肩。」凡前貴於後，亦卽上體名脊脅之屬是也。云「鱠，乾魚」者，《庖人》先鄭注同。此亦破先鄭骨鱠爲一物也。凡王之好賜肉脩，則饗人共之。好賜，王所善而賜也。【疏】「凡王之好賜肉脩，則饗人共之」者，謂非常賜也。常賜亦有肉脩，《膳夫》云「凡肉脩之頒賜」是也。當亦饗人所共，經惟言好賜者，文不具。饗人卽內饗，稱人者，通舉其官長徒屬之言。凡此經總舉官屬者皆稱人，若《射人》稱大僕爲僕

人，《大祝》稱甸師爲甸人是也。《左》襄二十八年傳云：「公膳日雙雞，饗人竊更之以鷺。」杜注云：「卿大夫之膳食。」彼饗人與此正同。凡卿大夫以事在公，則有公膳，《左傳》昭四年孔疏謂「在官治事，官皆給食」是也。公之膳食，亦饗人掌之，則不徒好賜也。《孟子·萬章篇》云「庖人繼肉」。蓋饗人與庖人通職，並掌餽賜之事矣。注云「好賜，王所善而賜也」者，鄭《詩·小雅·鹿鳴》箋云：「好猶善也。」《大宰》「好用之式」，注云：「好用，燕好所賜予。」此

好賜與好用義同，《內府》又謂之好賜予，皆謂王於羣臣有所厚好則賜予之，不在常賜之科者也。

外饗掌外祭祀之割烹，共其脯脩、刑、

臠，陳其鼎俎，實之牲體、魚、腊。凡賓客之

飧饗、饗食之事亦如之。飧，客始至之禮。饗，既

將幣之禮。致禮於客，莫盛於饗。【疏】「掌外祭祀之割

烹」者，對宗廟六享，爲內祭祀也。賈疏云：「謂天地、四望、山川、社稷、五祀外神，皆掌其割烹。」云「共其脯脩刑臠」者，刑亦與鉶通，謂鉶羹也。詳《內饗》疏。云「陳其鼎俎實之牲體、魚、腊」者，賈疏云：「謂若鼎十有二者也。」云

「凡賓客之飧饗饗食之事亦如之」者，賈疏云：「謂所陳之數，如《宰夫職》所云者也。皆以外饗共之，故言亦如之。」案：此謂共陳實三者並如祭祀也。賈說未咳。《公食大夫禮》云「雍人以俎入，陳于鼎南。旅人南面加匕于鼎，退」。即賓客食陳鼎俎之事。

注云「飧，客始至之禮」者，《宰夫》注義同，詳彼疏。云「饗，既將幣之禮」者，賈疏云：「案《聘禮記》云『聘日致饗』，鄭注云：『急歸大禮。』鄭云將幣者，即是聘享也。若諸侯來朝，亦朝日致之也。」詒讓案：

凡朝聘致饗餼，皆在將幣之後，故《掌客》注亦云「饗餼，既相見致大禮也」。《左傳》隱十年杜注云：「諸侯相朝，逆之以饗餼，謂之郊勞。」是謂賓至郊即致饗餼，與禮不合，謬說不足據。又《國語·周語》云「周之《秩官》曰：敵國賓至，膳宰致饗」。韋注云：「膳宰，膳夫也。」案：《聘禮》，宰夫設飧，卿歸饗餼。蓋此外饗共賓客之飧饗，亦從其長而致之。彼云膳宰者，以外饗是膳夫之屬，亦得通稱也。云「致禮於客，莫盛於饗」者，宋建陽本作「於賓客」，賈疏述注同，疑所見本亦有「賓」字。莫盛於饗者，對飧為致賓客之殺禮，故《司儀》注亦云「小禮曰飧，大禮曰饗餼」也。又《掌客》注云：「大者既兼飧積，有生有脛有執，餘又多也。」賈疏云：「以其饗之中有飧有脛有牽，又有酒有米，兼燕與

食，其中芻薪米禾又多，故云莫盛於饗也。」邦饗耆老、

孤子，則掌其割亨之事。饗士庶子亦如之。

孤子者，死王事者之子也。士庶子，衛王宮者。若今時之饗衛士矣。《王制》曰：「周人養國老於東膠，養庶老於虞庠。」

【疏】「邦饗耆老孤子」者，《聘禮》注云：「饗謂亨大牢

以飲賓也。」《說文·老部》云：「耆，老也。」《曲禮》云：「六

十曰耆。」案：饗耆老者，言饗以咳食。耆老亦關四等之老

言之。《王制》云：「凡養老，有虞氏以燕禮，夏后氏以饗

禮，殷人以食禮，周人修而兼用之。」注云：「兼用之，備陰

陽也。凡飲養陽氣，凡食養陰氣，陽用春夏，陰用秋冬。」孔

疏引皇侃云：「人君養老有四種：一是養三老五更；二是

子孫為國難而死，王養死者父祖；三是養致仕之老；四是

引戶校年養庶人之老是也。」又《郊特牲》云：「春饗孤子，

秋食耆老。」孔疏引熊安生云：「春饗孤子，亦饗耆老；秋

食耆老，亦食孤子。」案：《文王世子》說天子視學養老之禮

云：「適東序，釋奠於先老，遂設三老、五更、羣老之席位

焉。」又云：「王乃命公侯伯子男及羣吏曰：『反，養老幼于

東序。』是老幼同時並養，熊說不為無徵。依《郊特牲》文，

蓋老幼並春秋兩養，春用饗禮，秋用食禮，故《王制》謂周兼

脩虞夏殷之禮。孔疏引熊氏推鄭義，謂四時養老，蓋謂春用饗禮，夏用燕禮，秋冬用食禮。又引皇氏說，謂「春夏雖以飲爲主，亦有食，先行饗，次燕，次食。秋冬以食爲主，亦有饗，先行食，次燕，次饗。一日之中，三事行畢。」孔又申鄭義云：「或鄭因春而言夏，因秋而見冬，周冬夏不養老也。」今案：皇說鯀瀆無理，不爲典要。據《羅氏》云：「仲春羅春鳥獻鳩，以養國老。」而《郊特牲》又云「秋食耆老」。《禮書》引《尚書大傳》云：「舜五祀，秋饗耆老而春食饋子。」是虞禮與周略同，此皆春秋有養之明文。《大戴禮記·千乘篇》云，「朝孤子八人以成春事，息國老六人以成冬事」。息爲鄉飲酒，亦燕之類。是冬養又用燕禮矣。禮文歧迂，難以合一。要《王制》疏謂鄭意止有春秋二養老，與諸經及注義皆合，近得其正矣。凡常禮饗食皆在廟，此饗耆老、孤子，據《文王世子》說則皆在學也。饗士庶子雖無文，或當與老幼同。《王制》疏引皇氏說，謂「饗宿衛及耆老皆用饗禮。致仕之老，當用正饗房烝，與饗來朝諸侯同。饗死政之老，則用折俎烝烝」。亦無正文，未知是否。至《說文·食部》云「饗，鄉人飲酒也」。此用《詩·豳風·七月》「朋酒斯饗」毛傳義。《詩》孔疏謂鄉飲酒，禮尊事重，故以饗言之。是蓋饗之別義。此經凡言饗者，並與彼不同。

饗耆老與鄉飲酒雖皆在學，其禮則隆殺迥殊。饗禮兼食燕，其禮最盛。故《槁人》云「若饗耆老孤子士庶子，共其食」。若用鄉飲酒禮，則不得有食矣。蓋鄉邑之吏養老於學，容有用鄉飲酒禮者，《千乘》所謂息是也。若天子諸侯養老之盛禮，未有不用正饗禮者也。凡饗正禮必在廟，然亦有不在廟者，猶《左傳》莊二十一年，^①鄭伯享王於闕西辟是也。食正禮亦在廟，而《祭義》、《樂記》說天子食三老五更於大學，則天子饗耆老皆於學，又何疑乎！《王制》疏又引熊氏說，謂天子一年七養老，亦誤。詳《羅氏》疏。

注云「孤子，死王事之子也」者，《說文·子部》云：「孤，無父也。」即《司門》所謂死政之孤是也。賈疏云：「謂若《左氏》哀公二十三年，晉知伯親禽顏庚。至二十七年，齊師將興，陳成子屬孤子三日朝，設乘車兩馬，繫五邑焉，召顏庚之子而賜之。是其禮孤子之法。」互詳《司門》疏。云「士庶子，衛王宮者」者，即公卿大夫之子宿衛王宮者。《戰國策·中山策》云：「中山君饗都士大夫，司馬子期在焉。」是饗士庶子之事也。凡國子備宿衛者，已命者爲士，未命者爲庶子，詳《宮伯》疏。云「若今時之饗衛士矣」者，惠棟

①「二十一」原作「十二」，事在莊公二十一年。

云：「《續漢書·禮儀志》云：『饗遣故衛士儀：百官會，位定，謁者持節，引故衛士入自端門。衛司馬執幡鉦護。行定，侍御史持節慰勞，以詔恩問所疾苦，受其章奏所欲言。畢饗，賜作樂，觀以角抵。樂闋罷遣，勸以農桑。』案：前漢饗衛士於曲臺，後漢於平樂觀。」孔廣森云：「《王尊傳》曰『正月幸曲臺，臨饗，罷衛士』。衛宏言常以正月五日也。《和熹鄧后紀》：『舊事，歲終當饗遣衛士。太后以陰陽不和，軍旅數興，詔饗會勿設戲作樂。』引《王制》曰『周人養國老於東膠，養庶老於虞庠』者，證饗耆老在學也。彼下文云「虞庠在國之西郊」，鄭彼注云：「東膠，大學，在國中王宮之東。虞庠，小學也。周立小學於西郊。膠之言糾也，庠之言養也。周之小學，為有虞氏之庠制，是以名庠云。其立鄉學亦如之。」孔疏引熊氏云「國老謂卿大夫致仕者，庶老謂士也」。又引皇氏云「庶老兼庶人在官者。其致仕之老，大夫以上當養從國老之法，士養從庶老之法」。詒讓案：庶老亦當兼有庶人之老。依《大司徒》注及賈疏義，庶人之老，蓋七十養於鄉，八十養於國，^①九十養於學，與卿大夫士之老異也。此職及《酒正》、《槁人》之饗，並兼該四等之老，與《遺人》、《司門》之養老專指死政之老者異。賈疏謂耆老對孤子，經耆老以死政之老為主，非也。東膠即

《文王世子》之東序，《祭義》、《樂記》通言之則曰大學。周大學在南郊，《王制》注以為在國中王宮之東，非周制也。《白虎通義·鄉射篇》謂事三老在辟雍。辟雍亦即大學，故《禮運》云「三老在學」。《初學記·禮部》引《白虎通》則云「禮三老於明堂，禮五更於大學」，蓋禮家傳聞之異。國老，互詳《羅氏》疏。東膠、虞庠並詳《大司樂》疏。師役，則掌共其獻、賜脯肉之事。獻謂酌其長帥。【疏】

「師役則掌共其獻賜脯肉之事」者，賈疏云：「師役者，謂出師征伐及巡狩田獵。掌共其獻者，謂獻其將帥并賜酒肉之事並掌之。」詒讓案：脯，籩實。肉，豆實。獻有脯肉，若《量人》從獻脯燔之等；賜有脯肉，若《膳夫》肉脩頒賜之等是也。師役在野外軍中，其獻酒事略，故唯薦脯醢肉物，無牲體之俎也。注云「獻謂酌其長帥」者，對賜兼士徒以下通有之也。賈疏云：「以經獻謂獻酒非獻肉，故鄭謂酌其長帥軍將已下至伍長有功者饗獻之。」凡小喪紀，陳其鼎俎而實之。謂喪事之奠祭。【疏】「凡小喪紀」

者，《大史》「小喪賜謚」，注云：「小喪，卿大夫也。」惠士奇

① 「八」原作「六」，據《大司徒》疏改。

謂當爲諸侯。案：此小喪紀，當亦據王子弟、內諸侯言之。賈疏據《宰夫》注義，謂夫人以下之喪亦其一崗。若卿大夫喪事莫祭，則非外饗王官所掌也。此與《小祝》、《小司馬》二經義並小異，詳彼疏。注云《謂喪事之莫祭》者，賈疏云：「謂其殷奠及虞祔之祭皆有鼎俎，故云喪事之莫祭也。」吳廷華云：「喪紀陳鼎俎，自小斂莫始。」

亨人掌共鼎鑊以給水火之齊。鑊，所以煮

肉及魚、腊之器。既孰，乃胥于鼎。齊，多少之量。【疏】

注云「鑊所以煮肉及魚、腊之器」者，《說文·金部》云：

「鑊，鑊也。」《淮南子·說山訓》高注云：「無足曰鑊。」《士

冠禮》鄭注云：「煮於鑊曰亨。」又《特牲饋食禮》「亨于門外

東方，西面北上」。鄭彼注云：「亨，煮也。煮豕、魚、腊以

鑊，各一爨。」《少牢饋食禮》有羊鑊、豕鑊。是鑊爲煮肉及

魚、腊之器也。云「既孰乃胥于鼎」者，于，注例當作「於」，

各本並誤。此即《內饗》注所謂取於鑊以實鼎，實鼎曰胥

也。賈疏云：「案《少牢》，爨在廟門外之東。大夫五鼎，

羊、豕、腸胃、魚、腊各異鑊。鑊別有一鼎，鑊中肉孰，各升

一鼎，故云既孰乃胥于鼎。」詒讓案：王舉牢鼎九，當有七

鑊，牛、羊、豕、魚、腊、鮮魚、鮮腊也。腸胃與牛羊同鑊，膚

與豕同鑊，其胥之則異鼎耳。《少牢》腸胃與羊亦同鑊。賈說未析。又案：牢鼎以盛牲體，皆既孰乃胥之。《內則》八珍炮豚及牂云「鉅鑊湯以小鼎薺脯於其中」。彼小鼎置於鑊中以煮肉，則不待既孰乃胥，此官咸掌之也。云「齊多少之量」者，齊即分量之法。凡亨煮或多汨，或少汨，此用水多少之量也。或爛或孰，此用火多少之量也。職外內

饗之爨亨煮，辨膳羞之物。職，主也。爨，今之

竈。主於其竈煮物。【疏】「職外內饗之爨亨煮」者，王念

孫云：「煮即亨也，既言亨，則無庸更言煮。案鄭注云「爨，

今之竈，主於其竈煮物」。疏云「主外內饗爨亨煮之事」。

皆是以竈釋爨，以煮釋亨，而經文原無竈煮二字也。唐石

經有煮字，即涉注文而衍，而各本遂沿其誤。《詩·楚茨》

及《左傳》桓十四年《正義》引此有煮字，疑亦後人依唐石經

加之。《瓠葉》正義云「天官亨人掌外內饗之爨，亨，煮物之

名」。《正義》以煮釋亨，則經文之有亨無煮甚明，故知他篇

引此有煮字者，後人所加也。《大宰》及《少牢饋食》疏引此

皆作「職外內饗之爨亨」，無煮字。《特牲饋食》疏云「《周

禮》亨人，其職主爨亨之事，以供外內饗」。亦無煮字。」

案：王說是也。凡經亨煮字例作「饗」，注乃作「煮」。此經

作者，與字例亦不合。詳《肆師》疏。經言此者，明此官兩屬外內饗，通掌其亨煮之事，亦《大宰》八法官屬之變例也。云「辨膳羞之物」者，謂辨別膳夫膳用六牲，羞用百二十品之物，皆亨而共之。

注云「職，主也」者，《爾雅·釋詁》

文。《春官》、《夏官》、《秋官》敍官注並同。云「饗，今之竈」者，《說文·饗部》云：「饗，齊謂之炊饗。」《釋名·釋宮室》云：「饗，銓也，銓度甘辛調和之處也。」《楚辭·九歎》王注云：「饗，炊竈。」《詩·小雅·楚茨》篇「執饗蹕蹕」，毛傳云：「饗，饗饗、康饗也。」案：外內饗之饗，即《禮經》之雍饗也。《少牢饋食禮》云：「雍人概鼎匕俎于雍饗。雍饗在門東南，北上。」注云：「雍人，掌割亨之事者。饗，竈也。羊豕魚腊皆有竈。」案：《特牲饋食禮》又謂之牲饗、魚腊饗。《少牢》雍人即外內饗。天子食祭用大牢，則饗饗牛、羊、豕、魚、腊、鮮魚、鮮腊各一竈也。《少牢》別有康饗在雍饗之北，《士虞》及《特牲禮》又謂之饔饗，乃炊黍稷之竈。饔人掌其炊事，非亨人所職也。鄭《儀禮注》直釋饗為竈，此獨云饗今之竈者，以古時饗竈兩稱，漢時則皆稱竈，不稱饗，故釋之。云「主於其竈煮物」者，釋經饗亨之義。亨即煮也。煮物謂牲體及魚腊等。

祭祀，共大羹、鉶羹。賓客亦如之。大羹，肉湑。鄭司農云：「大羹，不致五

味也。鉶羹加鹽菜矣。」【疏】「祭祀共大羹、鉶羹」者，賈疏云：「大羹，肉湑盛於登，謂大古之羹，不調以鹽菜及五味，謂饔中煮肉汁，一名湑。鉶羹者，謂是陪鼎腳臠臠，牛用藿，羊用苦，豕用薇，調以五味，盛之於鉶器，即謂之鉶羹。若盛之於豆，即謂之庶羞，即《公食大夫》十六豆腳臠臠等也。」云「賓客亦如之」者，謂賓客饗食之禮，《大戴禮記·禮三本篇》云「大饗先大羹」是也。賈疏云：「謂若致饗饗及飧禮皆有陪鼎，則鉶羹也。」案：鉶與陪鼎異。《掌客》及《聘禮》載致飧饗饗之禮並有陪鼎，又有鉶。賈謂鉶即陪鼎，非也。鉶實三牲之湑，與《公食大夫》十六豆腳臠臠亦異，詳《掌客》疏。

注云「大羹，肉湑」者，《爾雅·釋器》云：「肉謂之羹。」《說文·弼部》云：「羹，五味盪羹也。重文羹，小篆从羔从美。」《士昏禮》「大羹湑在饗」，注云：「大羹湑，煮肉汁也。大古之羹，無鹽菜。今文湑皆作汁。」彼《釋文》引《字林》云：「湑，羹汁也。」鄭司農云「大羹不致五味也」者，《左》桓二年傳，臧哀伯曰：「大羹不致，昭其儉也。」杜注云：「不致五味。」《郊特牲》云：「大羹不和，貴其質也。」云「鉶羹加鹽菜矣」者，明亦是肉湑而加鹽菜之和也。《掌客》注云：「鉶，羹器也。」《公食大夫記》云：「鉶芼，牛藿，羊苦，豕薇，皆有滑。」又《士虞記》云：「鉶芼用苦

若薇，有滑，夏用葵，冬用葷。」即鉶羹之菜也。互詳《掌客》疏。

甸師掌帥其屬而耕耨王藉，以時人之，

以共盥盛。其屬，府史胥徒也。耨，芸芋也。王以孟春

躬耕帝藉，天子三推，三公五推，卿諸侯九推，庶人終於千畝。庶人謂徒三百人。藉之言借也。王一耕之，而使庶人

芸芋終之。盥盛，祭祀所用穀也。粢，稷也，穀者稷爲長，

是以名云。在器曰盛。【疏】「掌帥其屬而耕耨王藉」者，

《說文·耨部》云：「耕，耨也。」《祭統》云：「天子親耕於南

郊，以共齊盛。諸侯耕於東郊。」孔疏云：「鄭云王藉田在

遠郊，故甸師氏掌之。天子太陽，故南也。諸侯少陽，故東

也。」《續漢·禮儀志》劉注引干寶云：「古之王者，貴爲天

子，富有四海，而必私置藉田，蓋其義有三焉。一曰以奉宗

廟，親致其孝也；二曰以訓于百姓在勤，勤則不匱也；三

曰聞之子孫，躬知稼穡之艱難無逸也。」①云「以時人之」

者，賈疏云：「謂麥則夏熟，禾黍秋熟，則十月穫之，送入地

官神倉，故云以時人之。」曾釗云：「人之之時，當在九月，

《呂氏春秋·季秋紀》『藏帝籍之收於神倉』是也。疏謂十

月穫之，蓋誤以《豳風》十月穫稻，十月納禾稼爲據耳。不知幽地晚寒，所穫較遲，不足證也。」案：曾說與《月令》合，較賈爲長。但經云以時人之，自是隨時進獻以共嘗薦新穀。《月令》入神倉箸於季秋者，亦以一年農事畢於是月，故總記於此，非謂餘時更無人穀之事也。又案：此官所入者，人其所穫之粟於廩人，春人也。《穀梁》桓十四年傳云：「甸粟而納之三宮，三宮米而藏之御廩。」彼爲諸侯禮。此王禮，則粢盛之穀當后監六宮米而藏之矣。云「以共盥盛」者，以祭穀尤重，故特著之。其實王食用六穀，亦此官所共。《左》成十年傳云「晉侯欲麥，使甸人獻麥」，明甸人所共不徒祭穀矣。注云「其屬，府史胥徒也」者，以經云帥其屬，即其本職之府史胥徒可知。據後注則主耕耨者惟徒三百人，此兼言府史胥三者，雖不主耕耨，亦從甸師監視之也。云「耨，芸芋也」者，《釋文》云：「芸，本或作耘。」《說文·耨部》云：「耨，耨器也。」耨即耨之變體。《呂氏春秋·任地篇》云：「耨，柄尺，其耨六寸，所以間稼也。」高注云：「耨所以耘苗也。刃廣六寸，所以入苗間也。」案：耨本爲耨器之名，因之耨禾亦謂之耨。《釋名·釋用器》云：

①「逸」原作「違」，據楚本改。

「耨，以鉏耨耨禾也。」《易釋文》引孟喜云：「耨，耘除草也。」又《說文·耒部》云：「耨，除苗間穢也。重文耨，耨或从芸。」《禾部》云：「籽，離禾本。」耘即耨之省，芸芋即耨籽之借字。《詩·小雅·甫田》篇「或耘或耔」。毛傳云：「耘，除草也。耔，離本也。」案：芸芋義異，耨訓與芸同，而鄭兼云芋者，《漢書·食貨志》云：「播種於畊中，苗生葉以上，稍耨隴草，因隴其土以附苗根。故其詩曰：『或芸或芋，黍稷儼儼。』芸，除草也。耔，附根也。言苗稍壯，每耨輒附根，比盛暑，隴盡而根深，能風與旱。」據此，則耨除草，即隴土以附根，芸芋事相因，故鄭兼舉以釋耨也。云「王以孟春躬耕帝藉」者，《月令》：「孟春乃擇元辰，天子親載耒耜，帥三公、九卿、諸侯、大夫躬耕帝藉。」鄭注云：「帝藉，為天神借民力所治之田也。」賈疏云：「藉田之穀，衆神皆用，獨言帝藉者，舉尊言之。」詒讓案：《月令》據供祭祀言之，謂之帝藉；此經據王親耕言之，謂之王藉，義並通也。云「天子三推，三公五推，卿、諸侯九推」者，亦《月令》文。《續漢書·禮儀志》劉注引此注「公五推」上無「三」字。王念孫據《月令》孔疏述經及《唐月令》諸書並無「三」字，謂今本有「三」字，為後人據誤本《月令》加之。其說近是。《國語·周語》號文公說藉田禮云：「農祥晨正，日月底于天

廟，土乃脈發。先時九日，王乃使司徒咸戒公卿百吏庶民，司空除壇于藉。及期，王裸鬯饗禮乃行，百吏庶民畢從。及藉，后稷監之，膳夫、農正陳藉禮，大史贊王，王敬從之，王耕一壠，班三之。」韋注云：「一壠，一耜之壠也。王無耦，以一耜耕。班，次也。三之，下各三其上也。王一發，公三，卿九，大夫二十七也。」《月令》疏引賈逵說同。《詩·周頌·載芟》孔疏引韋說釋之云：「然則每耕人數如《周語》其推之數如《月令》，則王一人發而三推，公三人發各五推，卿九人發各九推。大夫推數則無文，其大夫雖多，見相三之數，取二十七人為之，其土蓋八十一人為之耳。」《續漢志》注引盧植云：「天子耕藉，一發九推耒。《周禮》二耜為耦，一耦之伐，廣尺深尺。伐，發也。天子及三公坐而論道，參伍職事，故三公以五為數。卿、諸侯當究成天子之職事，故以九為數。伐皆三者，禮以三為文。」《呂氏春秋·孟春紀》高注云：「禮以三為文，故天子三推，謂一發也。」又引《國語》說之云：「謂公卿大夫各三其上，公三發，卿九發，大夫二十七發也。」案：盧說當作「一發三推，三發九推耒」。盧、孔並參取《國語》一發班三之文以說《月令》，盧則謂凡發皆以三為數，班三猶言皆三也。依其說，則王一發三推，班三之，三發通為九推；三公則一發五推，三發為十

五推；卿諸侯則一發九推，三發為二十七推也。《白虎通義·耕桑篇》引《曾子問》云：「天子耕東田而三反之。」三反即三發也。盧說蓋本於彼。孔氏則依賈、高、韋說，以《周語》一發為人數，而班三為下各三其上，故王一人發而三推，公三人發而五推，卿五人發而九推。賈疏云：「王三推而一發，公五推而三發，卿諸侯九推而五發。」案：賈似亦用孔說，但卿諸侯五發，與孔不合，疑當為九發之誤。以上諸說，並於《月令》之文無注，未知鄭意云何。至孔說大夫所發人數，與賈、高、韋說同，而推數則《月令》無文，孔亦無以說之。《呂氏春秋·孟春紀》作「卿、諸侯、大夫九推」，則校《月令》多大夫二字，是以大夫推數與卿諸侯同。《白虎通義·耕桑篇》引《祭義》云「卿大夫七推」，《續漢志》注引《月令章句》說又謂孤卿七推，大夫十二推，並與《月令》不合，鄭所不取。云「庶人終於千畝」者，亦《周語》文。韋注云：「終，盡耕之也。」鄭引之者，證甸師率屬耕藉之事。《續漢志》注引《月令章句》云「士終畝」，與《國語》不合，不足據。云「庶人謂徒三百人」者，據《敘官》有徒三百人，人數衆多，故使盡耕千畝也。徒即庶人在官者，故《周語》云「庶人」，韋注云：「庶民，甸師氏所掌之民也，主耕耨王之藉田者。」義與鄭同。云「藉之言借也」者，藉，正字作「藉」。

《說文·末部》云：「藉，帝藉千畝也。古者使民如借，故謂之藉。」應劭《風俗通義·祀典篇》義同。《初學記·禮部》引《月令章句》，《續漢書·祭祀志》注引薛綜《二京賦》注，釋藉田亦並從許、鄭義。藉，《毛詩·載芣·敘》、《國語·周語》字並作「籍」。《呂氏春秋·孟春、季秋紀》並作「帝籍田」。又《上農篇》云「故天子率諸侯耕帝籍田」。案：藉籍並藉之借字，故鄭《載芣》箋云：「籍之言借也，借民力治之，故謂之籍田。」孔疏及《周語》韋注亦同鄭義。明藉籍字雖乖異，義實一也。《北堂書鈔·禮儀部》引賈逵《國語》注云：「天子躬耕籍田，助民力也。」《續漢志》注引盧植云：「藉，耕也。《春秋傳》曰「邠人藉稻」，故知藉為耕也。」《漢書·文帝紀》「藉田」，顏注引應劭云：「籍者，帝王典籍之常。」又引臣瓚云：「親耕本以躬親為義，不得以假借為稱，籍謂蹈籍也。」顏從瓚說。據應說以典籍為釋，則字當為籍，與《風俗通》說異。瓚說以蹈籍為釋，則字當為藉，故《後漢書·明帝紀》李注引《五經要義》云「藉，蹈也，言親自履蹈於田而耕之」。即瓚說所本。今案：許、鄭訓藉為借，即指使庶人終畝而言，其義甚精。應氏典籍之言，望文生訓，固不可通；臣瓚蹈藉之說，亦淺陋無取，而以親耕不得稱段借，妄破鄭義，則《載芣》疏已辟其謬矣。云「王一耕

之，而使庶人芸芋終之」者，謂王一耕三推以發其耑，而使甸徒芸芋終其事，以王不自終其事，故謂之借。芸芋在苗生葉以後。終之者，明自芸芋以後，至於穫，並庶人共其役也。《國語·周語》云：「王治農於籍，耨穫亦於籍。」韋注云：「言王亦至於籍考課之。」則耨穫雖庶人之事，王或亦親至監視之矣。云「齋盛祭祀所用穀也」者，《祭義》云：

「是故昔者天子爲藉千畝，冕而朱紘，躬秉耒，諸侯爲藉百畝，冕而青紘，躬秉耒，以事天地、山川、社稷、先古，以爲醴酪齊盛，於是乎取之，敬之至也。」據此，則齋盛關天地、山川、社稷，以至廟享，凡內外大小祭祀言之。阮元云：「齋當爲粢，經作齋盛，注皆作粢盛。」案：阮說是也。詳後。

云「粢，稷也」者，《爾雅·釋詁》文。《說文·禾部》云：

「齋，稷也。重文粢，齋或从次作。」又《食部》云：「資，稻餅也。重文粢，資或从米。」又《皿部》云：「盥，黍稷在器以祀者。」據許書，則盥爲齋盛正字，粢爲粢稷字，粢爲資之或體，三字迴別。依鄭說，則經典齋盛字並當爲粢，粢即稷也。今本《爾雅》粢稷字亦从米。蓋許、鄭二家說本不同。段玉裁云：「粢即盥字。《小宗伯》『辨六盥之名物』，注云：『盥讀爲粢。六粢謂六穀：黍稷稻粱麥苽。』全經內盥字，當以此例之。此注上云齋盛，下云粢稷也。《春人》『盥

盛之米」，注云：「齋盛謂黍稷稻粱之屬，可盛以爲簠簋實。」《肆師》「表盥盛」注：「粢，六穀也，在器曰盛。」明盥皆讀爲粢。《九嬪》「玉盥」注則云「玉敦，受黍稷之器」，與《說文》合。案：段謂此經齋盛字鄭皆讀爲粢是也。此注絕不及从禾之粢，明與許說不同。《說文》齋字說解，與下注盛訓義正同，蓋亦即指祭穀，猶《毛詩·小雅·甫田》傳云「器實曰齊」，器實即謂六穀也。蓋許並不以盥爲器名，《韻會》引作黍稷器，非也。《九嬪》注因玉敦所以盛祭穀，故以玉敦釋玉盥，猶圭瓚所以盛鬯，《大宗伯》謂之玉鬯，非以鬯爲器也。云「穀者稷爲長，是以名云」者，釋六穀總名六粢之義。《說文·禾部》云：「稷，齋也，五穀之長。」《白虎通義·社稷篇》云：「稷，五穀之長，故立稷而祭之也。」又云：「稷者，得中和之氣，而用尤多，故爲長也。」案：《續漢祭祀志》劉注引《援神契》、《郊特牲》孔疏引《五經異義·今孝經》說、《風俗通義·祀典篇》、《獨斷》，說並同。《續漢志》注又引蔡邕《月令章句》云：「稷，秋夏乃熟，歷四時，備陰陽，穀之貴者。」亦其義也。程瑶田云：《月令》「孟春行冬令，首種不入」。鄭注：「舊說首種謂稷。」今以北方諸穀播種先後考之，高粱最先。《管子書》：「日至七十日，陰凍釋而藝稷，百日不藝稷。」然則首種爲稷。稷爲五穀長，故

司農之官曰后稷，因之爲祭穀之總名也。」案：程以《月令》首種釋稷，爲五穀之長，其說甚塢。賈疏以月令稷屬中央土，五行土爲長爲釋，非其義。稷卽今高粱，《釋草》郭注以稷爲粟，誤。詳《大宰》疏。云「在器曰盛」者，《毛詩·小雅·甫田》傳文，《肆師》注同。《說文·皿部》云：「盛，黍稷在器中以祀者也。」《甫田》孔疏云：「在器曰盛，據已盛於器也。故桓六年《左傳》曰『絜粢豐盛』，言爲穀則絜清，祀器則豐滿。是指器實爲粢，在器爲盛也。」案：孔說是也。凡盛者，實於器中之名。祭穀黍稷實於簋敦，稻粱實於簠，通謂之盛。然粢盛對文則異，散文亦通，故《閭師》云「不耕者祭無盛」，注云：「盛，黍稷也。」又《鬯人》「鬯門用瓢鬯」，杜注云：「粢，盛也。」《國語·楚語》云：「天子禘郊之事，王后必自春其粢；諸侯宗廟之事，夫人必自春其盛。」韋注云：「器實曰粢，在器曰盛。上言粢，此言盛，互其文也。」此皆以粢盛互稱，明器實與在器，義得兩通，故《說文》疊盛二字訓義略同。惟《孟子·滕文公篇》趙注云「粢，稷。盛，稻也」。以盛爲稻，與粢稷相對，古無此訓，不可從也。祭祀，共蕭茅，鄭大夫云：「蕭字或爲茜，茜讀爲縮。束茅立之，祭前沃酒其上，酒滲下去，若神飲之，故謂之縮。縮，浚也。故齊桓公責楚不貢包茅，王祭不共，

無以縮酒。」杜子春讀爲蕭。蕭，香蒿也。玄謂《詩》所云「取蕭祭脂」。《郊特牲》云「蕭合黍稷，臭陽達於牆屋。故既薦然後炳蕭合馨香」。合馨香者，是蕭之謂也。茅以共祭之苴，亦以縮酒，苴以藉祭。縮酒，泝酒也。醴齊縮酌。【疏】「祭祀共蕭茅」者，以下共甸田所產之艸物、蔬果也。賈疏云：「此祭祀共蕭者，據祭祀宗廟時有之。若共茅，外內之神俱用。」注鄭大夫云「蕭字或爲茜，茜讀爲縮」者，臧琳云：「《說文·西部》：「茜，禮祭，束茅加于裸圭，而灌鬯酒，是爲茜，象神歆之也。从酉从艸。《春秋傳》曰：爾貢苞茅不入，王祭不供，無以茜酒。」又《詩·伐木》「有酒湑我」，傳：「湑，茜之也。」箋云：「王有酒則泝茜之。」則茜酒字本从艸从酉。據《說文》，知《左傳》作「無以茜酒」。據《甸師》注，知《周禮》作「祭祀共茜茅」。蓋《毛詩》、《周禮》、《左傳》皆古文，故與六書之旨合。今《左傳》作「縮酒」，《司尊彝》作「數酌」，皆茜之聲近假借字。《甸師》云「茜茅」者，以茅爲茜酒之用，當如字讀。鄭少贛既從《左傳》茜酒義，而復讀爲縮者，恐人不識茜字，故以今文讀之段。玉裁云：「鄭大夫依或本作茜，大夫讀爲縮酒之縮。《說文·西部》有茜字，許所據同大夫也。若王獻之《辭中令帖》云「蓬茜與蘭蕙齊榮」，蓋謂茜卽蕭字，非是。」云「束

茅立之，祭前沃酒其上，酒滲下去，若神飲之，故謂之縮」者，賈疏云：「此鄭大夫之意，取《士虞禮》束茅立几束，所以藉祭。」案：賈說是也。大夫此注，隱據《禮經》之苴爲釋。依《士虞禮》設饌饗神陰厭時，祝取奠饌祭于苴，卽所謂沃酒其上。《左傳》僖四年杜注云：「束茅而灌之以酒爲縮酒。」《國語·晉語》「置茅蕝」，韋注云：「蕝謂束茅而立之，所以縮酒。」說竝與大夫同。《說文》謂加裸圭而灌鬯酒，則是裸事亦用茅。《論語·八佾》皇疏說灌法云：「於太祖室裏龕前，東向束白茅，置地上，而持鬯酒灌白茅上，使酒味滲入淵泉，以求神也。」皇說與許略同。蓋祭初降神之裸，與二裸獻尸事異，但裸圭卽圭瓚，用以酌鬯，非束茅所加，許說與禮微迂，不知何據。至《禮經·少牢·特牲》，大夫士吉祭無茅苴，唯《士虞》喪祭有之。彼賈疏據《司巫》注，謂天子諸侯吉祭亦有苴，大夫意或亦當然。《士虞》祭苴在祝酌奠後，則王禮九獻祭苴，亦當在朝踐後延尸入室時。故《通典·吉禮》謂饋孰尸入室時，尸舉奠罍祭酒以菁茅，謂之縮酒。此亦用大夫義，謂祭苴在尸舉奠時也。據皇侃說，則似初降神灌鬯時已有苴。攷《士虞》設苴在初陳饌未迎尸時，以相推約，義並得通也。互詳《司巫》疏。又案：《春官·敘官》賈疏引先鄭釋《左傳》屏攝云「束茅以

爲屏蔽祭神之處」，此與大夫束茅沃酒義異，而亦祭祀用茅之事，則亦此官共之矣。云「縮，浚也」者，《說文·水部》云：「浚，抒也。一曰水下滴瀝澼浚也。」縮浚並與澼義同。《左傳》僖四年孔疏及《論語·憲問》邢昺疏引，浚並作「滲」。《說文·水部》云：「滲，下澼也。」與浚義略同。此冢上酒滲爲文，疑作滲爲是。然《釋文》云：「浚，荀潤反。劉思順反。」則劉昌宗及陸本並作「浚」，與孔所見本異。云「故齊桓公責楚不貢包茅，王祭不共，無以縮酒」者，《左》僖四年傳，齊伐楚，楚子使與師言。管仲對曰：「爾貢包茅不入，王祭不共，無以縮酒，寡人是徵。」杜注云：「包，裹束也。茅，菁茅也。」《書·禹貢》：「荊州「包匭菁茅」。」《史記·夏本紀》《集解》引鄭《書注》云：「菁茅，茅有毛刺者，給宗廟縮酒。」《穀梁》僖四年傳：「齊桓公曰：菁茅之貢不至，故周室不祭。」范注云：「菁茅，香草，所以縮酒，楚之職貢。」案：《穀梁》云不祭者，謂不以菁茅共祭，卽《左傳》所謂王祭不共也。然菁茅荊產，當在《大宰》九貢祀貢之科，非甸師所共，此引以證菁茅縮酒之事耳。云「杜子春讀爲蕭」者，段玉裁云：「爲當作「從」。凡二本字乖異，而用一廢一，曰從。如蕭或爲茜，鄭仲師從茜讀縮，杜則從蕭是也。鄭君從杜，蕭與茅爲二，大夫、許君茜茅爲一。」云「蕭，

香蒿也」者，《郊特牲》注同。《爾雅·釋草》「蕭萩」，郭注云「卽蒿」。《說文·艸部》云：「蕭，艾蒿也。蒿，蒿也。蒿，蒿也。」《詩·王風·采葛》孔疏引陸璣疏云：「蕭，今人所謂萩蒿者是也。或云牛尾蒿，似白蒿，白葉，莖羸，科生。多者數十莖，可作燭，有香氣，故祭祀以脂熬之爲香。許慎以爲艾蒿，非也。」云「玄謂《詩》所云「取蕭祭脂」者，《大雅·生民》文。毛傳云：「取蕭合黍稷，臭達牆屋，先奠而後熬蕭，合馨香也。」引證祭祀有用蕭，從杜讀也。引《郊特牲》云「蕭合黍稷，臭陽達於牆屋，故既薦然後炳蕭合馨香」者，今《禮記》薦作「奠」，馨香作「羶薌」。鄭彼注云：「奠謂薦熟時也。《特牲饋食》所云「祝酌奠於鉶南」是也。蕭，薌蒿也。染以脂，合黍稷燒之。羶當爲馨，字之誤也。奠或爲薦。」此引薦從或本，馨從改讀。凡宗廟之祭，有兩度炳蕭。此既薦炳蕭，在饋食時，更有朝踐時燔脾膋亦炳蕭。故《祭義》云：「建設朝事，燔燎羶薌，見以蕭光。」此注不言者，文不具也。云「合馨香者，是蕭之謂也」者，《郊特牲》合馨香，本兼黍稷及蕭二者言之，此就經舉證，故唯云蕭也。云「茅以共祭之苴，亦以縮酒」者，明茅於祭有二用，苴以祭酒，與縮酒不同，不當如大夫說以苴爲縮酒也。《御覽·百卉部》引《毛詩義疏》云：「白茅，茅之白者，古用包裹禮物，

以充祭祀縮酒用之。」案：此官所共茅，自是畿內所生，當卽《詩》之白茅也。云「苴以藉祭」者，亦據《士虞禮》有苴。彼注云：「苴猶藉也。」此卽《鄉師》之茅苴及《司巫》菹館之菹，詳彼二職疏。賈疏云：「此甸師共茅與司巫，司巫爲苴以共之，此據祭宗廟也。《鄉師》又云「大祭祀共茅苴」者，謂據祭天時，亦謂甸師氏送茅與鄉師，爲苴以共之。若然，甸師氏直共茅而已，不供苴耳。」云「縮酒，泚酒也」者，泚與漉義亦同。凡酒濁者，必泚之而後可酌。其用茅者謂之縮，不用茅者直謂之泚。《詩·小雅·伐木》云「醕酒有衍」，又云「有酒湑我」。毛傳云：「以筐曰醕，以藪曰湑。湑，茜之也。」孔疏云：「筐，竹器也。藪，草也。漉酒者或用筐，或用草。用草者，用茅也。」詒讓案：湑卽所謂縮，醕卽不用草而泚者，故用筐也。通言之，則縮亦爲泚，故後鄭以泚訓縮。此與大夫說縮酒爲束茅立祭前沃酒其上者異。云「醴齊縮酌」者，《司尊彝》文。引之者，證茅以縮酒也。

共野果蓏之薦。甸在遠郊之外，郊外曰野。果，桃李之屬。蓏，瓜瓞之屬。【疏】「共野果蓏之薦」者，與場人爲官聯也。薦亦冢上「祭祀」爲文。吳廷華云：「薦卽《中庸》「薦其時食」之薦。」注云「甸在遠郊之外」者，《敘官》注義同。賈疏云：「案《載師》「公邑之田任甸地」，在二百里

中。《司馬法》「百里爲遠郊」。今言甸在遠郊外，則是二百里中。「云「郊外曰野」者，《毛詩·召南·野有死麕》傳文。《遂人》、《縣士》注並同。《說文·里部》云：「野，郊外也。」案：《爾雅·釋地》云：「邑外謂之郊，郊外謂之牧，牧外謂之野。」《說文·門部》用彼文作郊外謂之野，蓋許、鄭所見《釋地》並無「牧」文，此注義即本於彼也。凡此經注言野者有五解，對文各有專屬，散文則可以相統。此注以甸釋野，則以野爲二百里甸之專名也。《縣師》「徼野之賦貢」，注云：「野謂甸稍縣都也。」《遂人》「掌邦之野」注同。則距王城二百里甸，至五百里疆，通得野稱也。《司會》「掌國之官府郊野縣都之百物財用」，注云：「野，甸稍也。」《質人》「野三甸」注同。彼文郊野之外別出縣都，則野爲二百里甸，三百里稍，不兼縣都也。又，《載師》注引《司馬法》云：「二百里爲州，三百里爲野，四百里爲縣，五百里爲都。」則野又爲稍地之專名，內不及甸，外不及縣都也。又，《鄉大夫》「國中自七尺以及六十，野自六尺以及六十有五，皆征之」。注云：「國中，城郭中也。」則野爲城郭外可知，是王城之外，四郊以內，亦得稱野也。竊謂藉田當從孔晁說在近郊，甸師掌田之官，不取二百里甸爲名。此云共野果祿之薦，果祿出於園圃。《載師》「以場圃任園地」，彼場人所掌在城外

郭內。此甸師所掌，蓋在郭外近郊之內，與藉田相近，亦有種果祿之園地也。《場人》「掌國之場圃」，云「凡祭祀賓客共其果祿」。《委人》「掌斂野賦凡疏材」，注謂草木有實者。是場人掌附郭之疏材，委人掌六遂以外之疏材。此官掌郭外四郊以內，與彼二官內外正互相備，雖聯事通職，而地守界域則絕不相侵。若然，此野當與《鄉大夫》之野同，乃對城郭以內爲國中言之。鄭《文王世子》注以甸人爲郊野官，義尚可通；此注則誤謂甸師以二百里甸名官，遂釋野爲郊外，是直謂專據遠郊外之甸地，非也。藉田在近郊，互詳《敘官》疏。云「果，桃李之屬，祿，瓜瓞之屬」者，《場人》注義同。《說文·木部》云：「果，木實也。」又《艸部》云：「在木曰果，在地曰祿。」《素問·藏氣法時論》云「五果爲助」。王冰注云：「五果謂桃李杏栗棗也。」瓜瓞者，《爾雅·釋草》云：「瓞，瓞。其紹瓞。」《詩·大雅·綿》孔疏引舍人云：「瓞名瓞，小瓜也。紹繼謂瓞子。漢中小瓜曰瓞。」案：統言之，則瓜亦得稱果，故《喪大記》注云「果，瓜桃之屬」是也。賈疏云：「案《食貨志》，臣瓚以爲在樹曰果，在地曰祿，不辨有核無核。張晏以有核曰果，無核曰祿。今鄭云果，桃李之屬，即是有核者也；祿，瓜瓞之屬，即是無核者也。此從張晏之義。」案：《既夕記》鄭注云：「實在木

曰果，在地曰蒞。則鄭亦同瓚義，賈說未然。喪事，代

王受眚裁。粢盛者，祭祀之主也。今國遭大喪，若云此

黍稷不馨，使鬼神不逞于王。既殯，大祝作禱辭授甸人，使

以禱藉田之神。受眚裁，弭後殃。【疏】「喪事代王受眚

裁」者，與大祝爲官聯也。經喪事皆通眚大小喪而言，唯此

云代王受眚裁，則不得有后、世子及諸小喪，故賈疏謂專據

王喪是也。受眚裁者，亦攘除之意。《說文·目部》云：

「眚，目病生翳也。」引申爲災眚。《易·復》上六爻辭云「有

災眚」。《釋文》引鄭注云「異自内生曰眚，自外曰祥，害物

曰災」。又引《子夏傳》云「傷害曰災，妖祥曰眚」。是也。

《書·舜典》云「眚災肆赦」，非此義。注云「粢盛者，祭

祀之主也」者，祭祀有粢盛、牲牢、酒齊，而以粢盛爲主。以

王藉是粢盛所出，甸師主其地，故使掌禱祈之事也。云「今

國遭大喪，若云此黍稷不馨，使鬼神不逞于王」者，于注例

當作「於」，各本並誤。此釋甸師爲王受眚裁所以禱神之

意。賈疏云：「逞，快也。使鬼神不快於王，令使王死。」云

「既殯，大祝作禱辭，授甸人」者，《大祝》云「言甸人讀禱」是

也。《王制》云：「天子七日而殯。」賈疏云：「見《大祝職》

云授甸人禱辭，在大斂後，大斂則殯，故知在既殯後。」云

「使以禱藉田之神」者，謂藉田之中有王社、王稷，及《篇章》

云田祖、田峻之屬亦是也。云「受眚裁，弭後殃」者，裁，注

例用今字，當作「災」，《大祝》注可證。今本並作裁，疑後人

誤依經改。謂甸師引咎自責，代受其眚災，俾嗣王無後殃

也。王之同姓有辜，則死刑焉。鄭司農云：「王

同姓有罪當刑者，斷其獄於甸師之官也。《文王世子》曰

「公族有死罪，則磬於甸人」。又曰「公族無官刑，獄成，致

刑于甸人」。又曰「公族無官刑，不踐其類也。刑于隱者，

不與國人慮兄弟」。【疏】「王之同姓有辜，則死刑焉」者，

《說文·辛部》云：「辜，犯法也。从辛从自，言辜人戚鼻苦

辛之憂。秦以辜似皇字，改爲罪。」又《網部》云：「罪，捕魚

竹網，从网非。秦目爲辜字。」案：辜罪古今字。此經辜罪

錯出，蓋非其舊。注則皆作罪，注例用今字也。賈疏云：

「周姓姬，言同姓者，絕服之外同姓姬者。有辜者，謂凡五

刑則刑殺不於市朝，於此死刑焉，謂死及肉刑在甸師氏。

必在甸師氏者，甸師氏在疆場，多有屋舍，以爲隱處，故就

而刑焉。案《掌囚》云：「凡有爵者，與王同族，奉而適甸

師氏，以待刑殺。」此中不云有爵者，文不具。」注鄭司

農云「王同姓有罪當刑者，斷其獄於甸師之官也」者，官謂

甸師所治處也。賈疏云：「此斷獄，自是秋官罪定斷訖，始

適甸師氏而刑殺之。若然，斷獄不在甸師。後鄭不破之者，案《掌囚》云「凡有爵，與王之同族，奉而適甸師氏，以待刑殺」。此經亦云死刑焉。甸師氏不斷獄顯然，故不破之。論讓案：先鄭意刑官就甸師官府斷獄而後刑殺也。《文王世子》云：「公族其刑罪則織劓，亦告於甸人。」鄭彼注云：「織讀爲鍼。鍼，刺也。劓，割也。告讀爲鞠，讀書用法曰鞠。」據此，則適甸師氏雖在獄成之後，然讀鞠之時，囚或不服，亦容別有讞斷矣。引《文王世子》曰「公族有死罪，則磬於甸人」者，鄭彼注云：「不於市朝者，隱之也。甸人，掌郊野之官。懸縊殺之曰磬。」引之者，明王族無大辟。經云死，卽彼之磬。彼諸侯甸人，卽此甸師氏也。《通典·凶禮》引盧植《禮記注》云：「磬，麗繫也。」與此經不合，非也。引又曰「公族無官刑，獄成，致刑于甸人」，又曰「公族無官刑，不踐其類也」者，今《禮記》踐作「翦」。鄭彼注云：「翦，割截也。」引之者，證經云刑止有墨劓刑三刑也。云「刑于隱者，不與國人慮兄弟」者，甸師官寺當在與藉田相近郊野之地，故云隱。《文王世子》孔疏云：「若異姓，則刑之於市。此同姓，刑於甸師隱僻之處者，不與國人謀慮兄弟也。」帥其徒以薪蒸役外內饗之事。役，爲給役也。木大曰薪，小曰蒸。【疏】「帥其徒以薪蒸役外內饗

之事」者，外內饗主饗饗，須薪蒸以共享煮，故使甸徒取之，此官亦與彼爲官聯也。其饗人饗饗炊食之薪蒸，當亦甸徒所共。《國語·周語》云：「甸人積薪。」《喪大記》云：「甸人取所徹廟之西北扉薪，用饗之。」甸人並卽甸徒也。薪蒸又可爲燎燭，故此官亦兼主燎燭之事。《左·襄三十一年傳》云：「甸設庭燎。」又《燕禮》、《大射儀》並云「甸人執大燭于庭」。若然，此經薪蒸亦兼共燎燭，不止共饗事，經文不具也。凡此官之薪蒸，亦於四郊以內取之。其六遂以外之薪蒸，則委人掌之，故彼職祭祀喪紀皆共薪蒸。二官亦互相備也。又案：《公食大夫禮》云「甸人陳鼎七」，與《少牢饋食禮》雍人陳鼎事同，是外內饗陳鼎俎之事，甸人亦役之。《公食》注謂彼甸人兼亨人，義亦得通。注云「役爲給

役也」者，《廣雅·釋詁》云：「役，使也。」此經凡云役者有二：一當官之屬給正長之役，如瞽矇役大師，縫人役本職之女御是也；一異官以連事通職相役，如此官役外內饗，酒人役世婦，罪隸役百官府，蠻隸役校人，閭隸役掌畜，夷隸役牧人，貉隸役服不氏是也。二者雖有同官異官之別，而其爲給事則同。賈疏云：「其徒三百人，耕耨藉田千畝，其事至閑，故兼爲外內饗所役使，共其薪蒸。」云「木大曰薪，小曰蒸」者，賈疏引《纂要》文同。《委人》注云：「薪蒸

給炊及燎，羸者曰薪，細者曰蒸。」《說文·艸部》云：「薪，蕘也。蒸，折麻中幹也。」《月令》「收秩薪柴」注云：「大者可析謂之薪，小者合束謂之柴。薪施炊爨，柴以給燎。」案：蒸本為麻幹，借為小木之名。薪蒸即薪柴也。凡薪取大木以給炊爨，蒸柴取小木以給燎燭，《既夕》注云「燭用蒸」是也。

獸人掌罟田獸，辨其名物。罟，罔也。以罔

搏所當田之獸。【疏】「掌罟田獸」者，與冥氏、穴氏為官聯也。云「辨其名物」者，若《爾雅·釋獸》所釋是也。注

云「罟，罔也」者，《說文·网部》云：「罟，网也。」「网，庖犧所結繩以田以漁。重文罔，网或从亼。罔或从糸。」《爾雅·釋器》云：「鳥罟謂之羅，兔罟謂之置，麋罟謂之罾，雉罟謂之羅，魚罟謂之罾。」案：凡捕鳥獸魚之罔，通名為罟。經云「掌罟田獸，謂獸罟也。其鳥罟小而密者，羅氏職之。其大而疏者，則亦此官所兼掌。故《國語·魯語》云：「鳥獸孕，獸虞於是乎禁罟羅。」韋注云：「獸虞掌鳥獸之禁令。罟，免罟。羅，鳥罟也。」彼獸虞疑即此獸人，亦兼言鳥罟可證。若然，《釋器》諸罟，唯魚罟掌於獸人，餘罟此官並掌之矣。云「以罔搏所當田之獸」者，《說文·手部》云：「搏，索

持也。《左傳》莊十一年杜注云：「搏，取也。」謂張罔遮格搏取之。當田之獸，即《庖人》六獻之屬。賈疏云：「案夏官四時田獵，春用火，夏用車，秋用羅，冬用徒。四時各有其一以為主，無妨四時兼有罔取當田之獸。」冬獻狼，夏獻麋，春秋獻獸物。狼膏聚，麋膏散，聚則溫，散則涼，以救時之苦也。獸物，凡獸皆可獻也，及狐狸。【疏】

「冬獻狼，夏獻麋」者，此四時所獻者皆謂鮮獸，《左》宣十二年傳云「獸人無乃不給於鮮」是也。注云「狼膏聚，麋

膏散，聚則溫，散則涼，以救時之苦也」者，《說文·犬部》云：「狼，似犬，銳頭，白頰，高前廣後。」又《鹿部》云：「麋，鹿屬，冬至解角。」《山海經·中山經》郭注云：「麋似鹿而大也。」《詩·齊風·還》孔疏引陸璣疏云：「狼，其膏可煎和。」賈疏云：「夏苦其大熱，故獻麋；冬苦其大寒，故獻狼。案《內則》取稻米與狼臠膏以為餼。狼之所用，惟據取膏為餼食，若麋之所用則多矣。」詒讓案：狼膏聚，麋膏散，鄭蓋目驗得之。《神農本草經》云：「麋脂味辛溫。」鄭以為涼，與彼正相反，未知其審。賈疏謂狼，山獸，山是聚，故狼膏聚；麋，澤獸，澤主銷散，故麋膏散。義亦未塙。云「獸物，凡獸皆可獻也」者，謂春秋所獻衆多，非一獸也。《詩·

秦風·駟驥篇「奉時辰牡」。毛傳云：「辰，時也。冬獻狼，夏獻麋，春秋獻鹿豕羣獸。」毛即本此經爲說，亦以獸物爲羣獸。^①又鄭《士相見禮》注云「禮有秋獻麋」，蓋兼據《庖人》禽獻言之。云「及狐狸」者，賈疏云：「案《內則》，狐去首，狸去正脊。二者並堪食之物，故知獸物中兼獻。」案：賈說未得鄭指。狐狸雖可食，然非珍異，鄭不宜偏舉之。尋此注所以別出狐狸者，蓋謂獻裘材也。司裘中秋獻良裘，季秋獻功裘，掌皮秋斂皮，則狐狸宜以秋獻可知。時田，則守罟。備獸觸攫。【疏】「時田則守罟」者，田即《鄉師》云四時之田，謂春蒐、夏苗、秋獮、冬狩，具《大司馬職》。獸人唯守罟，不掌逐射之事。注云「備獸觸攫者，《釋文》云：「攫，又作攫。《文選·南都賦》李注引《蒼頡篇》云：「攫，搏也。」又《射雉賦》注引《埤蒼》云：「攫，爪持也。」案：攫即《梓人》「攫網援箠」之攫。觸以角，攫攫並以爪，義得兩通。恐獸入罔仍觸攫破罔而逸，故豫守其處，見入罔則搏取之。及弊田，令禽注于虞中。弊，仆也。仆而田止。鄭司農云：「弊田謂春火弊，夏車弊，秋羅弊，冬徒弊。虞中，謂虞人釐所田之野，及弊田，植虞旗於其中，致禽而珥焉。獸人主令田衆得禽者，置

虞人所立虞旗之中，當以給四時社廟之祭。故曰「春獻禽以祭社，夏獻禽以享禴，秋獻禽以祀祫，冬獻禽以享烝」。又曰「大獸公之，小禽私之」。公之謂輸之於虞中。珥焉者，取左耳以致功，若斬首折馘。故《春秋傳》曰「以數軍實」。【疏】「及弊田，令禽注于虞中」者，贊致禽之事，與山虞、澤虞，甸祝爲官聯也。注云「弊，仆也」者，《大司馬》注同。《說文·犬部》云：「弊，頓仆也。」弊即弊之俗體。云「仆而田止」者，此經及《大司馬》凡田事言弊者，並爲止，其本義則皆爲仆。此所仆者，通闢火、車、羅、徒。先鄭後注已詳，故此不著也。詳《大司馬》疏。鄭司農云「弊田，謂春火弊，夏車弊，秋羅弊，冬徒弊」者，據《大司馬》文，謂以火止、車止、羅止、徒止爲止獵之節也。此引之者，證田止稱弊之義。云「虞中，謂虞人釐所田之野，及弊田，植虞旗於其中，致禽而珥焉」者，《釋文》云：「釐，本亦作萊。」阮元云：「《山虞職》作「萊山田之野」，此作釐。本作萊者，依彼經所改。賈本作萊。」論讓案：釐萊音近字通。《山虞》、《澤虞》、《大司馬》文並作「萊」，此注兼約彼職文。疑故書或本有借釐爲萊者，故先鄭依用之。虞中，即虞旗之

① 原「爲」字誤重，據楚本刪其一。

中。禽注於虞中，所謂致禽也。山虞，澤虞通稱虞人，釐所田之野，亦兼畎山虞萊山野、澤虞萊澤野也。並詳《山虞》疏。云「獸人主令田衆得禽者，置虞人所立虞旗之中」者，釋經「令禽注于虞中」也。《廣雅·釋詁》云：「鉉，置也。」注鉉聲類同。虞旗，《澤虞職》作虞旌，以旌卽旗之注析羽者，故言旗不言旌，猶《大司馬》蒐田章注言虞人植旌，以旌畎旗也。云「當以給四時社廟之祭」者，卽據《大司馬》爲說。社謂社枋，廟謂禴烝。云「故曰春獻禽以祭社，夏獻禽以享禴，秋獻禽以祀枋，冬獻禽以享烝」者，《大司馬》文。浦鏜云：「《大司馬職》『禴作杓』，下『獻作致』。」賈疏云：「此祭並非四時常祭，以田獵得禽牲，因享祭之耳。」案：詳《大司馬》疏。云「又曰大獸公之，小禽私之」者，亦《大司馬》文。云「公之，謂輸之於虞中」者，此兼釋《大司馬》文，明此云令注禽于虞中，卽彼云大獸公之也。云「珥焉者，取左耳以致功，若斬首折馘」者，此兼釋《山虞》文，亦據《大司馬》云「獲者取左耳」。《詩·大雅·皇矣篇》「攸馘安安」，毛傳云：「馘，獲也。不服者，殺而獻其左耳曰馘。」《說文·耳部》云：「馘，軍戰斷耳也。《春秋傳》曰：『以爲俘馘。』重文馘，馘或从首。」又《又部》引《司馬法》曰：「載獻馘，馘者耳也。」先鄭意四時大田本以習戰，故獲禽取左耳，

亦法戰伐俘獲斬首取左耳也。以致功者，謂致其多獲之功。云「故《春秋傳》曰，以數軍實」者，《左·隱五年傳》云：「三年而治兵，入而振旅，歸而飲至，以數軍實。」杜注云：「飲於廟，以數車徒器械及所獲也。」引之者，證田獵數所獲禽獸，亦爲數軍實之事。賈疏云：「案：襄二十四年『楚遠啓疆如齊聘，齊社，蒐軍實，使客觀之』。注云：『蒐，數軍實兵甲器械，與隱公傳數軍實一也。』若然，注傳兵甲器械與斬首折馘不同者，兵甲器械自爲軍實，至於斬首折馘亦是軍實，仍於生執囚俘亦爲軍實，是以僖公三十三年晉捨秦囚，先軫曰『墮軍實』是也。」案：賈引襄二十四年《左傳》注，蓋賈、服義。凡祭祀、喪紀、賓客，共其死獸生獸。共其完者。【疏】「凡祭祀、喪紀、賓客，共其死獸生獸」者，與圉人爲官聯也。李鍾倫云：「生獸則獸人直供與庖人，死獸則付之腊人，或鮮之，或乾之，以共庖人之用也。但言祭祀、賓客、喪紀等，不言王膳者，省文，實王膳亦在其中。」注云「共其完者」者，完謂不肆解者。下文云「凡獸入于腊人」，或全乾之，或解肆乾之。是有完有不完者。此獸人死生兼共，則皆完者也，故知此是完者。凡獸入于腊人，當乾之。【疏】注云「當乾之」者，此謂死

獸也。此官人之腊人，腊人乾之爲脯腊等，又人之膳府也。

皮毛筋角入于玉府。給作器物。【疏】「皮毛筋角

入于玉府」者，明殺獸則當入其物也。《冥氏》云：「若得其獸，則獻其皮革齒須備。」彼不獻筋角，此又不入齒須等者，皆互文見義，要隨所有通人之可知。注云「給作器物」

者，《左》隱五年傳云：「鳥獸之肉，不登於俎，皮革齒牙，骨角毛羽，不登於器，則公不射。」明此皮毛筋角亦以中作器物，故入之玉府也。《塵人》云：「凡屠者，斂其皮角筋骨，入于玉府。」注云：「以當稅，給作器物也。」此注不云當稅者，彼屠者爲市民私畜，故有稅；此官掌田獸，爲公家物，不必入稅，故但入皮毛筋角以共用而已。賈疏云：「獸人所得禽獸，其中皮毛筋角，擇取堪作器物者，送入於玉府，擬給百工飾作器物。」凡田獸者，掌其政令。【疏】「凡田獸者，掌其政令」者，此謂公私小田獵，於四時大田之外，特取獸者也。《迹人》云：「凡田獵者受令焉。」注云：「令謂時處也。」此政令亦謂所宜田之時與處及爭訟厲禁之事，此官並掌之，與迹人爲官聯也。賈疏云：「謂田獵取獸禽者，所有政令，獸人掌之，以其知田獵之法故。」

敝人掌以時敝爲梁。《月令》季冬「命漁師爲

梁」。鄭司農云：「梁，水偃也。偃水爲闕空，以筍承其空。

《詩》曰：敝筍在梁。【疏】「掌以時敝爲梁」者，《禮運》注引敝並作「漁」，古用段字，今用正字也。詳《敝官》疏。賈

疏云：「取魚之法，歲有五。案《月令》孟春云「獺祭魚」，此時得取矣，一也。季春云「薦鮓於寢廟」，二也。又案：《鼈

人》云「秋獻龜魚」也，《王制》云「獺祭魚，然後虞人入澤梁」，與《孝經緯》援神契云「陰用事，木葉落，獺祭魚」同時，

是十月取魚，四也。獺則春冬二時祭魚也。案《潛》詩云

「季冬薦魚」，與《月令》季冬漁人始漁同，五也。是一歲三

時五取魚，唯夏不取。案：《魯語》云「宣公夏濫於泗淵」，以其非時，里革諫之，乃止。案：《王制》孔疏謂正月雖獺

祭魚，虞人不得入澤梁，與賈說異，未知孰是。竊謂賈一歲三時五取魚之說，雖摭舊文言之。實則四時賓祭，隨月皆可取魚。惟夏濫之禁，《國語》有明文。《周書·大聚篇》

云：「禹之禁，夏三月，川澤不入網罟，以成魚鼈之長。」亦可證夏不取魚之說。然大祭祀、賓客、俎實有鮮魚，則亦自有特取魚之法，固不在禁例矣。

注引《月令》「季冬，命漁師爲梁」者，賈疏云：「案《月令》季冬云「命漁師始漁，天子親往」，此注云「季冬命漁師爲梁」，文句不同者，鄭以此

經有梁字，故於《月令》以義取之，非是《月令》正文。」案：賈說是也。鄭引《月令》者，證此官即彼漁師也。《呂氏春秋·季冬紀》高注亦云「漁師，掌漁官」。《大戴禮記·夏小正》云：「十二月，虞人入梁。」疑鄭或兼采彼文，但彼虞人當爲澤虞、川衡之屬，非此廵人也。又《國語·魯語》云：「古者大寒降，土蟄發，水虞於是乎講罟罾，取名魚，登川禽，而嘗之寢廟，行諸國人，助宣氣也。」韋注云：「土蟄發，謂孟春建寅之月蟄始震也。」^①水虞，漁師也，掌川澤之禁令。《月令》：季冬始漁，乃嘗魚，先薦寢廟。唐云孟春，誤矣。」案：韋以水虞爲漁師，則亦即此廵人。然《月令》：孟冬「有命水虞，漁師之文，二官並命，則水虞疑當爲《夏正》之虞人，非即漁師也。韋云掌川澤之禁令，則亦兼據《川衡職》爲釋，蓋二官本聯事通職，未能質定也。又韋意似謂孟春雖得取魚，而嘗魚之時當依《月令》季冬，故席唐固以爲孟春之誤。然依《毛詩·周頌·潛》敘，則冬春皆有薦魚之事，故此經後文亦云「春獻王鮪」，唐說不誤，韋爲失糾也。鄭司農云「梁，水偃也，偃水爲關空，以筍承其空」者，《釋文》出「水偃」云：「徐本作堰。」阮元云：「《說文·匚部》：『堰，匿也。』《人部》：『偃，僵也。』是水偃字當從徐本作堰。」賈疏云：「謂偃水兩畔，中央通水爲關孔。筍者，葦

薄。以薄承其關孔。魚過者，以薄承取之。」詒讓案：《說文·木部》云：「梁，水橋也。」《毛詩·邶風·谷風》傳云：「梁，魚梁。」蓋梁本爲橋梁，引申爲取魚之梁。魚梁，絕水爲之。《爾雅·釋宮》云：「隄謂之梁。」《詩·衛風》「有狐綏綏，在彼淇梁」。毛傳云：「石絕水曰梁。」《王制》「澤梁」注云：「梁，絕水取魚者。」水偃即謂絕水也，與《左》襄二十五年傳「偃豬」之偃，義略同。《宮人》注作「堰豬」，故徐邈本此注亦作水堰。《釋名·釋水》云：「滴，術也，偃水使鬱術也，魚梁水確之謂也。」《毛詩·魚麗》傳云：「土不隱塞，庶人不數罟。」《詩釋文》：「隱，本又作偃。」偃即障塞水流之義。字又作堰、堰、隅。《廣雅·釋宮》云：「柎、潛，堰也。」《後漢書·董卓傳》「僞立隅以爲捕魚」，李注引《續漢書》「隅作「堰」。並同。筍者，《說文·句部》云：「筍，曲竹捕魚筍也。」《淮南子·兵略訓》云「魚筍門」高注云：「竹筍所以捕魚，其門可入而不得出。」蓋竹及葦薄皆可以爲筍。爲魚梁者，先以土石壅水使不流，而後於梁中開爲關空，使魚得從中出入於筍。關空者，關與門關字同義。空孔古今字。言於魚梁間爲門孔，可開閉，而後以筍承其孔以遮

①「孟」原作「立」，據《國語》韋注改

魚也。《夏小正傳》云「梁者，主設罔罟者也」，則梁亦可設罔罟，不徒設筍矣。引《詩》曰「敝筍在梁」者，《齊風·敝筍》篇文，引以證梁有空當以筍承之也。春獻王鮪。王鮪，鮪之大者。《月令》：季春「薦鮪于寢廟」。【疏】「春獻王鮪」者，《毛詩·周頌·潛》敝亦云「春獻鮪」，鄭箋云：「春鮪新來，獻之者，謂於宗廟也。」注云「王鮪，鮪之大者」者，《說文·魚部》云：「鮪，鮪也。」《周禮》：「春獻王鮪。」《爾雅·釋魚》云：「鮪，鮪，鮪。」郭注云：「鮪，鱣屬也。大者名王鮪，小者名鮪鮪。」《詩·衛風·碩人》孔疏引陸璣疏云：「鮪魚形似鱣而色青黑，頭小而尖，似鐵兜鍪，口在頰下。其甲可以摩薑。大者不過七八尺，益州人謂之鱣鮪。大者為王鮪，小者為鮪鮪，一名鮪，肉色白，味不如鱣也。」又云：「鱣鮪出江海，三月中從河下頭來上。」《水經·河水篇》鄭注云：「鞏縣北有山臨河，其下有穴，謂之鞏穴。直穴有渚，謂之鮪渚。成公子安《大河賦》曰「鱣鮪王鮪，暮春來遊」。《周禮》，春薦鮪。然非時及它處則無，故河自鮪穴已上，又兼鮪稱。」引《月令》季春「薦鮪于寢廟」者，證此春獻鮪亦謂季春也。《大戴禮記·夏小正》云：「二月祭鮪。鮪之至有時，美物也。鮪者，魚之先至者也。」彼以祭鮪在仲春，與《月令》不同者，蓋所聞有異。凡薦時

物於寢廟，皆獻於廟後之寢，詳《隸僕》疏。辨魚物，為

鱣鮪，以共王膳羞。鮮，生也。鮪，乾也。【疏】「辨

魚物」者，魚種類繁多，辨別其物色，若《爾雅·釋魚》是也。

云「為鱣鮪」者，《釋文》云：「鮪，本又作鮪。」案：鮪字

同，稟正字，鮪段字。《庖人》亦作鮪，詳彼疏。《曲禮》云：

「稟魚曰商祭，鮮魚曰脰祭。」又《內則》「免鮪」，彼《釋文》

云：「本又作稟。」鮪即稟之變體。《國語·魯語》「里革

曰：「稽魚鼈以為夏槁。」韋注云：「槁，乾也。」云「以共王

膳羞」者，擇其中膳羞者而共之。賈疏云：「此所共者，共

於膳夫以共王。」注云「鮮，生也」者，《庖人》先鄭注

云：「鮮謂生肉。」魚肉通稱。經作「鱣」注作「鮮」者，亦經

用古字，注用今字之例，詳《庖人》疏。《大戴禮記·禮三本

篇》、《荀子·禮論篇》並云「大饗俎生魚」，《樂記》生作

「腥」。《少儀》又有濡魚。並用鮮魚也。云「鮪，乾也」者，

《庖人》先鄭注云：「鮪謂乾肉。」亦魚肉通稱。此鮪魚即

《庖人》、《籩人》之鮪也。凡祭祀、賓客、喪紀，共

其魚之鱣鮪。凡獻者，掌其政令。凡獻征，

入于玉府。鄭司農云：「漁征，漁者之租稅，漁人主收

之，入于玉府。」【疏】「凡祭祀、賓客、喪紀，共其魚之鱣鮪」

者，與川衡爲官聯也。賈疏云：「此所共者，共內外饗，以其膳夫不掌祭祀之事。」云「凡獻者，掌其政令」者，謂公私隨時取魚之事。賈疏云：「凡取魚者所有政令，皆漁人掌之，以其知取之時節及處所。」

注鄭司農云「漁征，漁者

之租稅，漁人主收之，入于玉府」者，此亦注用今字作「漁」也。于，亦當作「於」。《大司徒》注云：「征，稅也。」凡漁者

之租稅有二：一爲《大宰》九賦之澤賦，即占受川澤之地稅；一爲《大宰》九職之貢，即漁者一家之力征。二者通謂

之漁征。若《月令》云：「孟冬乃命水虞、漁師收水泉池澤之賦。」《玉藻》云「年不順成，關梁不租」，明成年梁有租也。

《管子·輕重甲篇》亦有「澤魚之正」，正征字通。《遂師》云

「入野職野賦于玉府。」漁征即川澤之職賦，故亦入玉府矣。

賈疏云：「謂近川澤之民，於十月獺祭魚之時，其民亦得取

魚水族之類。其中鬚骨之事堪飾器物者，所有征稅，漁人

主收之，送入于玉府，以當邦賦也。」吳廷華云：「鬚骨之

征，《閭師》所謂「任虞以澤事貢其物」，蓋正賦也。此疏謂

其當邦賦，是本《塵人》斂皮骨注言之。蓋鄭以賦爲口率出

泉，而《大宰》山澤之賦，則又鄭所謂席賣賦泉，故以皮角爲

代賦。其說與《閭師》顯背，此疏又舉爲說，非也。」案：吳

說是也。此漁征當以魚物爲稅，但鮮薤中膳羞者當入膳

府，故賈謂入玉府者爲鬚骨之屬，猶塵人斂珍異入膳府，屠者皮角筋骨乃入玉府也。但魚鬚骨中用者少，或當兼有泉貨耳。賈此說本不誤。但依鄭說，此漁民亦應有口賦，當計口入泉。故賈據《角人》諸職有當邦賦之說。不知口賦即九職之貢，本貢物而不率泉，則鬚骨即爲正賦，不必云當賦也。《角人》諸職以物當邦賦者，皆別有義例，詳彼疏。

鼈人掌取互物，鄭司農云：「互物，謂有甲萇胡龜鼈之屬。」

【疏】注鄭司農云「互物，謂有甲萇胡龜鼈之屬」

者，丁晏云：《釋名》：「胡，互也。在咽下垂，能斂互物

也。」鄭以互物爲萇胡，取聲相近也。」盧文弨云：「《呂氏春

秋·孟冬紀》「其蟲介」，高誘注：「介，甲也。象冬閉固皮

漫胡也。」漫與萇音義同。《廣雅·釋詁》：「萇，當也。」蓋如

器之有當。①《莊子·說劍篇》「曼胡之纓」，此當與古係冠

者殊，必擁其頸與領下而爲之，故亦取名於此耳。」案：丁、

盧說是也。此即《大司徒》、《大司樂》之介物。先鄭以經不

云介物而云互物，明取萇胡爲義。互又與互通。《左傳》昭

①「當」，原作「蓋」，據盧文弨《鍾山札記》改。

四年杜注云：「互，閉也。」孔疏亦引此經互物爲釋。彼互爲閉，猶《釋名》云「斂，互也」。《釋名·釋飲食》又云：「胡餅，作之大漫沍然也。」萑胡、漫胡、漫沍，皆形容之語，聲義並同。《說文·兩部》云：「萑，平也。」又《干部》云：「市，相當也。」市與兩聲義亦相近。蓋介物皮甲周市冢合，上下必相當也。《釋文》引干注云：「互，對也。」互對即兩甲相當之義。《掌蜃》「掌斂互物」，後鄭注云：「互物，蚌蛤之屬。」干說與彼略同。蓋龜鼈蚌蛤同爲介蟲，亦並稱互物，二鄭及干義得兩通矣。以時簠魚鼈龜蜃，凡狸

物。蜃，大蛤。鄭司農云：「簠謂以杈刺泥中搏取之。狸物，龜鼈之屬，自狸藏伏於泥中者。」玄謂狸物亦謂鱗刀含漿之屬。【疏】以時簠魚鼈龜蜃者，賈疏云：「即下經春獻鼈蜃。若然，簠魚鼈據所取，下經據所獻，其時一也。」

注云「蜃，大蛤」者，《醢人》、《地官·敘官》、《赤友氏》注並同。《國語·晉語》韋注云：「小曰蛤，大曰蜃，皆介物蚌類也。」《說文·虫部》云：「蜃，蜃屬，有三，皆生於海。蜃屬，千歲雀所化，秦人謂之牡蜃。海蜃者，百歲燕所化也。蜃蜃，一名復蜃，老服翼所化也。」賈疏云：「《月令》云「雉入大水化爲蜃」者是也。對雀入大水化爲蛤爲小蛤。」《釋

文》引干注云：「蜃，鰮類。」案：《說文·魚部》云：「鰮，鰮也。」《爾雅·釋魚》云：「鰮，鰮。」郭注云：「今泥鰮。」則與蜃異物。干氏所說，未詳其義。鄭司農云「簠謂以杈刺泥中搏取之」者，《說文·手部》云：「簠，刺也。」《周禮》曰：「簠魚鼈。」惠士奇云：「《說文》說本司農。《國語·魯語》

「簠魚鼈以爲夏槁」，作簠。《莊子·則陽篇》「冬則擲鼈於江」，作擲。《列子·仲尼篇》「牢簠庖廚之物」，作簠。殷敬順《釋文》謂「簠本作簠，以竹木圍繞又刺也」。案：簠乃《西京賦》所謂「又簠之所攬掬」。《東京賦》「璫璫不簠」，謂狸物也。阮元云：「作簠爲正字，作簠爲聲借字。《說文》簠從手，簠省聲，故《列子》竟省手作簠也。」呂飛鵬云：「韋昭《國語》注：「簠，擲也。」宋庠《補音》：「簠，或作擲，又作簠。」蓋簠爲正字，簠擲爲同聲通用字。」案：惠、阮、呂說是也。簠、擲、簠並與簠同。《西京賦》之又簠與擲同，又即此注之杈。《玉燭寶典》引孔晁《國語》注云：「簠，又取之也。」《文選》潘岳《西征賦》「挺又來往」，李注云：「又，取魚又也。」《掌蜃》注引漢時東萊方言，以蛤灰爲又灰，蓋亦以又取之。《初學記·漁部》引《纂文》云「鈎鐵有鉅，施竹頭，以之擲鼈鼈」，疑即所謂杈矣。云「狸物，龜鼈之屬，自狸藏伏於泥中者」者，呂飛鵬云：「《說文·豸部》：「狸，伏獸，

似龜。《釋文》於此經音莫皆反，則讀如埋。《說文》無理字，《艸部》：「蕤，瘞也。」此經蓋省作狸。《大宗伯》「狸沈」注云：「祭山林曰埋。」此其例也。」案：呂說是也。凡此經蕤藏字，皆借狸爲之，注或作埋，則蕤之俗也。先鄭意經狸物，即謂龜鼈諸互物自狸者。然經前言龜鼈，後別言狸物，則狸物不止龜鼈之屬，故後鄭補其義。云「玄謂狸物亦謂鱧刀含漿之屬」者，《爾雅·釋魚》「鯨，鱧刀」，郭注云：「今之鯨魚也，亦呼爲魴魚。」又云「蚌，含漿」，注云：「蚌即蜃也。」《說文·魚部》云：「鯨，飲而不食，刀魚也。九江有之。」賈疏云：「觀此，鄭意鱧刀爲一物，蚌爲含漿，亦一物。孫氏注《爾雅》，刀魚與鱧別，非鄭意。」惠士奇云：「鱧刀，鯨魚也。康成蓋謂魚之狸者多此類，不獨龜鼈爲然，含漿乃蛤耳，非與魚同類，其爲狸物則一也。」案：惠說是也。春獻鼈蜃，秋獻龜魚。此其出在淺處可得之時。魚亦謂自狸藏。【疏】「秋獻龜魚」者，《月令》：季夏「命漁師伐蛟，取鼈、登龜、取鼈。」彼注引此經及《龜人》曰「凡取龜用秋時」，而釋之云：「是夏之秋也。作《月令》者以爲此秋，據周之時也。周之八月，夏之六月，因書於此，似誤也。」是《月令》登龜與此經異時，故鄭席其誤。《玉燭寶典》引王肅說則云：「《周官》獻龜，於秋當獻，故於末夏而命。」

義亦通。

注云「此其出在淺處可得之時」者，鼈蜃龜魚等狸藏時，不可又籍，必俟其出在淺處時，而後可得，故或春或秋，各隨其時也。云「魚亦謂自狸藏」者，亦謂鱧刀之屬。賈疏云：「若不自狸藏則在上，漁人取之矣。故知此魚與龜鼈是自狸藏者也。」祭祀，共廬、羸、蜺，以授醢人。羸，蜺蜃。鄭司農云：「廬，蛤也。」杜子春云：

「廬，蚌也。蜺，蛾子。《國語》曰：「蟲舍蜺蜃。」【疏】「祭祀共廬、羸、蜺，以授醢人」者，與川衡爲官聯也。賈疏云：

「案《醢人》有廬醢、羸醢、蜺醢，故以此三者授醢人。」

注云「羸，蜺蜃」者，《醢人》注同。《爾雅·釋魚》「蜺，蜺蜃。」郭注云：「即蝸牛也。」王應麟《周書王會篇補注》引《尚書大傳》「鉅定羸」，鄭注亦云：「羸，蝸牛也。」案：今語

以水生者爲羸，陸生者爲蝸牛，古人蓋無此分別。凡經典之言蜺羸，言羸，注家訓爲蝸爲蝸牛者，皆當爲水羸。《說文·虫部》云：「羸，一曰虎蜃。」又云：「蝸，蝸羸也。」蝸羸

疊韻，羸亦可單言蝸。故羸醢，《內則》及《士冠禮》注引今文《禮》並作蝸醢。《文選》張衡《東京賦》云：「獻鼈蜃與龜魚，供蝸羸與菱芡。」彼賦正用此經，蓋平子亦以羸爲蝸。薛綜注云：「蝸，螺也。」螺即羸之俗。《爾雅》「蜺，蜺蜃」

與「羸小者蝻」文相比屬，足證其同爲水羸。若陸生之蝸牛，則《本草經》謂之陵蠡，腥穢不入食品，《醢人》羸醢必不用是矣。鄭司農云「蠃，蛤也」者，《醢人》注同。《爾雅·釋魚》云：「蚌，蠃。」《廣雅·釋魚》云：「蚌，蛤，蒲盧也。」是蠃卽蚌，亦通謂之蛤也。杜子春云「蠃，蚌」也者，《釋文》云：「蚌字又作蚌。」案：蚌卽蚌之異文，《掌蜃》注亦作蚌。《既夕禮》「蜃醢」，鄭注云：「蜃，蚌也。」蜃與蠃同。《爾雅·釋魚》郭注云：「今江東呼蚌長而狹者爲蠃。」《說文·虫部》云：「蚌，蜃屬。蠃，蚌也。脩爲蠃，圓爲蜃。」又云：「蜃，蚌屬。」是蠃亦爲蚌也。《漢書·地理志》顏注云：「蛤似蚌而圓。」綜校諸說，是脩者爲蠃，爲蚌，圓者爲蜃，爲蛤，爲蜃，而蠃則其尤狹長者。先鄭以蠃爲蛤，散文通耳。杜以蠃爲蚌，與《說文》脩爲蠃合，其義較析，故後鄭《既夕》注亦從之。賈疏謂蚌蛤一物，非也。云「蜃，蜃子」者，《醢人》注同。《內則》「蜃醢」，鄭注云：「蜃，蜃子也。」《爾雅·釋蟲》云：「蜃，蜃，大蜃。小者蜃，其子蜃。」郭注云：「蜃，蜃卵。」《夏小正》二月抵蜃，傳云：「抵猶推也。蜃，蜃卵也。爲祭醢也。」《說文·虫部》云：「蜃，蜃子也。」《周禮》有蜃醢蛾羅也。蜃，蜃子也。」案：《爾雅釋文》引《說文》「蛾」作「蜃」，與《虫部》「蠃」爲蠃蠃字別。引《國語》云「蠃

舍蜃蜃」者，《魯語》里革語。韋注云：「蜃，蜃子也，可以爲醢。蜃，蜃陶也，可以食。舍，不取也。」《說文·虫部》云：「蜃，復陶也。劉歆說蜃，蜃子。董仲舒說蜃子也。」案：《爾雅·釋蟲》郭注、宣十五年《公羊》何注、《左傳》杜注及孔疏引李巡《爾雅注》、《漢書·五行志》引劉向說，並與董同。依劉歆說，則蜃與蜃異名同物。《祭統》「陸產之醢」，鄭注以爲蜃蜃之屬，則似從劉歆說。若蜃子害稼，不宜舍之，且不聞可爲醢也。賈說依董說以蜃爲蜃，謂與蜃別，連引之，恐非鄭意。掌凡邦之簠事。

腊人掌乾肉，凡田獸之脯腊臠胖之事。

大物解肆乾之，謂之乾肉，若今涼州鳥翅矣。薄析曰脯，捶之而施薑桂曰鍛脩。腊，小物全乾。【疏】「掌乾肉」者，通牲獸言之也。云「凡田獸之脯腊臠胖之事」者，田獸卽《庖人》六獸之屬，獸人所入者也。蓋此官本正掌共田獸之肉，田獸不皆生得，其肉鮮少乾多，以其習於乾肉之事，故并使掌家牲之乾肉。若家牲之腥肉，則自有庖人、內外饗共之，非此官所掌也。其獸肉則腥乾兼掌，故賈疏引《鄭志》云：「趙商問：腊人掌凡乾肉，而有臘胖何？鄭荅：雖鮮亦屬

腊人。」姜兆錫云：「牢鼎之實，腊與鮮腊爲二鼎，則腊人掌乾肉，自有枯潤之不同也。」案：姜說是也。《士昏禮》及《聘禮》、《公食大夫禮》並有鮮腊，《既夕禮》又謂之鮮獸，注云「鮮，新殺者」。此臘脂蓋亦以獸肉之新殺者制之矣。阮元云：「臘脂之事」四字疑衍文，下經「臘脂」始有注。若於此先言臘脂，二鄭、杜氏、康成當於此下注矣。《釋文》出胖字音於「豆脯」之下，則陸本尚未誤衍。此疏引趙商問腊人掌凡乾肉而有臘脂何，亦據下文言之。」案：阮據《釋文》校，於義近是。《甸祝》疏亦引此經「掌凡田獸之脯腊」，而此疏標起止，則有「之事」二字，或是後人竄改，非賈氏之舊。但有此四字，於義亦尚可通，未敢專輒刪定也。

注云「大物解肆乾之，謂之乾肉」者，凡牲畜大者不易乾，故必解肆其骨體而後乾之，以爲俎實，《禮經》謂之乾肉折俎。解肆謂亦若腥牲有豚解七體、體解二十一體之等也。詳《內饗》疏。散文通言，凡脯腊之屬，並爲乾肉，大物乾肉亦通謂之腊，《少牢饋食禮》云「腊用麋」是也。對文析言，則乾肉之異於腊者，一解肆，一全乾也。又異於脯脩者，一體折爲俎實，一薄析爲簋實也。姜兆錫云：「首句言乾肉，而下句乃指田獸言之，則是牲肉。」案：此乾肉鄭不別牲畜，賈謂專屬獸肉，姜則謂專屬牲肉。今諦審經言凡田獸以下

爲區別之文，則乾肉自當兼含牲畜，賈、姜二義，相兼乃備。《禮經》所言者，則皆三牲之肉。《士冠禮》始醯再醢有脯醢，三醢乃有乾肉折俎。注云：「乾肉，牲體之脯也。折其體以爲俎。」《士虞記》注義同。然則此官牲畜兼掌乾肉之義，與《禮經》亦不異也。云「若今涼州鳥翅矣」者，《士虞記》「乾肉」注義同。鳥翅，蓋漢時涼州所出乾肉，亦解肆牲體而乾之，故鄭以爲況。鳥翅名義未詳。云「薄析曰脯」者，《說文·肉部》云：「脯，乾肉也。」《內則》注云：「脯皆析乾肉也。」案：散文脯與乾肉亦通稱。凡脯，牲畜兩有。《內則》有鹿脯、田豕脯、麋脯、麇脯，此獸脯也。又有脯羹，注謂析乾牛羊肉，此牲脯也。《齊民要術》作脯法云：「用牛羊麋鹿野豕豬肉，或作條，或作片。」鄭云薄析，即謂作片，故後注謂胖之言片析肉意。《鄉射禮記》云：「薦脯用簋五臠，臠長尺二寸。」臠，《鄉飲酒記》又謂之挺，皆片析之名，其長逾尺，則雖片析，又近於條矣。云「捶之而施薑桂曰鍛脩」者，《內饗》注云：「脩，鍛脯也。」《郊特牲》云：「大饗尚鍛脩而已矣。」《有司徹》注云：「鍛脩，搗肉之脯。」又《內則》注云：「鍛脩，捶脯施薑桂也。」又云：「捶，搗之也。」案：鍛即鍛之俗，《昏義》字又省作「段」。《淮南子·道應訓》高注云：「捶，鍛擊也。」蓋脩亦薄析乾之，與脯同，

故《少儀》「束脩」孔疏謂卽十脔脯。是亦片析爲臠之證。但既析乾之後，又捶擣之使堅實而加薑桂，以助其辛烈之味，是曰鍛脩。《內則》說八珍之熬，亦先捶之而屑薑桂洒諸上而鹽之。乾而食之。作鍛脩法，蓋與彼略同。凡脩亦牲獸兩有，互詳《膳夫》、《內饗》疏。云「腊，小物全乾」者，《說文·日部》云：「咎，乾肉也。重文，籀文从肉。」《釋名·釋飲食》云：「腊，乾肉也。」案：小物全乾，謂小禽獸之屬不解肆者，若《庖人》注云「脔乾雉」，《既夕禮》注云「士腊用兔」是也。賈疏云：「案《特牲》云「陳鼎于門外，楨在其南，南順，實獸于上」，又云「宗人舉獸尾」，是其全者。士用兔，是其小物全乾。少牢用麋，不云舉獸尾，則未全。若然，則天子諸侯之所用雖無文，其獸必大，亦不必全。今云全者，據有全者耳。」案：賈說是也。《易·噬嗑》六三爻辭云「噬腊肉」，又六五云「噬乾肉」，彼《釋文》引馬融云：「晞於陽而煬於火曰腊肉。」是腊與乾肉不同。但《禮經》凡言腊者，皆田獸。田獸之中，若麋鹿之屬，亦有重物，自當解肆乾之，不必皆全，則亦通謂之腊，故《莊子·外物篇》說任公子得大魚離而腊之，是卽析乾者也。散文腊乾義通，故許、劉並以乾肉詁昔矣。凡祭祀，共豆脯，薦脯、臠、胖，凡腊物。脯非豆實，豆當爲羞，聲之誤也。鄭

司農云：「臠，膾肉。」鄭大夫云：「胖讀爲判。」杜子春讀胖爲版，又云「臠胖皆謂夾脊肉」。又云「禮家以胖爲半體」。玄謂《公食大夫禮》曰「庶羞皆有大」。《有司》曰「主人亦一魚，加臠祭于其上」。《內則》曰「麋鹿田豕麇皆有胖」。足相參正也。大者，載之大饗。臠者魚之反覆。臠又詁曰大，二者同矣，則是臠亦腍肉大饗。胖宜爲脯而脛，胖之言片也，析肉意也。禮固有脛臠爛，雖其有爲孰之，皆先制乃亨。【疏】凡腊物者，卽獸腊載於俎者也。注云「脯

非豆實，豆當爲羞，聲之誤也」者，以豆盛濡物，與脯爲乾肉不相應也。古音豆在侯部，羞在尤幽部，合音相近，故云聲之誤。賈疏云：「案《籩人職》有栗脯，則脯是籩實，故云脯非豆實也。知豆當爲羞者，案《籩人職》云：「凡祭祀共其籩薦羞之實。」鄭云：「未飲未食曰薦，已飲已食曰羞。」羞薦相對，下既言薦脯，明上當言羞脯也。」案：依鄭、賈說，則羞脯者謂加籩羞籩之實，薦脯者謂朝事饋食之籩實，則二者皆主籩而言也。據《爾雅·釋器》云：「竹豆謂之籩。」是籩亦可稱豆。而鄭必破豆爲羞者，以此經凡言籩豆者，皆塋爲二器，不相段借，不可援彼釋此也。易拔、陳友仁、姜兆錫、江永竝據《王制》「天子歲三田一爲乾豆之文，證此豆脯不必破字。攷《王制》鄭注云：「乾豆謂腊之以爲祭祀

豆實也。」賈《醢人》、《甸祝》及《鄉射禮》疏，《王制》孔疏，並謂脯非豆實，而別據《醢人》注云「作醢及饗者，必先膊乾其肉」，釋乾豆之義，此與易、陳諸說可互通。惠士奇又據《內則》脯羹，證脯可爲豆實。依諸家說，則脯雖不盛於豆，而以脯爲醢爲羹，則不妨爲豆實。此皆不破字，而說尚可通，附著之以廣異義。鄭司農云「膾，膾肉」者，《內饗》注同。鄭大夫云「胖讀爲判」，杜子春讀胖爲版者，段玉裁云：「判、版、胖，古音同在元寒桓刪山仙部，①兩「讀爲」疑當作「讀如」，此擬其音，不必易其字。其字從肉，則正字也。《說文·半部》：胖字下曰「半體肉也」。膾字下曰「《周禮》有膾判」。案：段謂兩「讀爲」當作「讀如」是也。《說文·肉部》引《周禮》作判者，依鄭大夫讀；《半部》胖訓半體者，據《儀禮》。二文不相妨也。又云「膾胖皆謂夾脊肉」者，此讀膾爲膾也。《內饗》先鄭注亦以膾爲夾脊肉，詳彼疏。胖者，《內則》「鵠鴉胖」，鄭注云：「胖謂脅側薄肉也。」脅側薄肉即夾脊肉也。又云「禮家以胖爲半體」者，禮凡用成牲者皆胖升。《少牢饋食禮》云：「司馬升羊右胖，髀不升。肩、臂、臑、膊、髀，正脊一，脰脊一，橫脊一，短脅一，正脅一，代脅一，皆二骨以並。」又司士升豕右胖，文與升羊同。又《既夕禮》云：「厥明，陳鼎五于門外，其實羊左胖，

髀不升。」是《禮經》所謂胖者，並謂半體。凡吉禮牲皆用右胖，變禮反吉，用左胖。《說文》亦以胖爲半體肉。《廣雅·釋詁》云：「胖，半也。」並與禮家說同。後鄭則謂此膾胖義與左右胖異，故亦不從其說。云「玄謂《公食大夫禮》曰庶羞皆有大」者，鄭彼注云：「大，以肥美者特爲饗，所以祭也。魚或謂之膾，膾，大也。唯醢醬無大。」引之者，證性獸肉本名大也。又引《有司》曰「主人亦一魚加膾，祭于其上」者，此證膾本爲割魚大饗之名也。鄭彼注云：「膾讀如『殷畀』之畀，剗魚時，割其腹以爲大饗也，可用祭也」。案：《禮經》本作「侑主人皆一魚」，此鄭所省改。引《內則》曰「麋鹿田豕麋皆有胖」者，《內則》文胖本作「軒」，鄭彼注云：「軒讀爲憲，憲謂藿葉切也。軒或爲胖。」此鄭依或本引之。案彼上文云「鹿脯田豕脯麋脯」，而云「皆有胖」，明脯乾胖腥，文正相對，足證胖如脯而腥之義。又彼下文云：「肉腥細者爲膾，大者爲軒。」又云：「野豕爲軒。」注「軒亦或作胖」。《少儀》說野豕爲軒云「聶而不切」，則知《內則》之胖不爲半體矣。云「足相參正也」者，謂《有司徹》

① 「仙」原作「先」，據段玉裁古音十七部及《周禮漢讀考》改。

之大，可證此經之膾。《公食禮》之膾，雖與此膾異物，而同爲大膾，亦足相證。據《內則》，知此胖與禮家半體之胖不同，皆足相參正也。云「大者載之大膾」者，釋《公食禮》文。《說文·肉部》云：「載，大膾也。」案：此謂三牲鳥獸之腥肉也。云「膾者，魚之反覆」者，釋《有司徹》文。《少儀》注云：「膾，大膾，謂剝魚腹也。」案：膾覆聲近，鄭意剝魚腹取大膾反覆之，故謂之膾。此膾之本義。《籩人》朝事之籩有「膾鮑魚鱸」，注云「膾，腓生魚爲大膾」是也。云「膾又詁曰大，二者同矣」者，《爾雅·釋詁》云：「膾，大也」。膾與膾音義並同。言此者，明膾與大雖以魚肉異名，義則同也。云「則是膾亦腓肉大膾」者，明此膾即《公食禮》之大，段腓魚大膾之名以名腓肉大膾，不當如先鄭及杜子春說也。《內饗》注義亦同。又《說文·肉部》云：「膾，無骨腊也。揚雄說鳥腊。《周禮》有膾判。」許意蓋以此經膾胖與脯腊同掌，故亦釋爲腊物。膾爲無骨腊者，蓋即謂腓肉大膾之乾昔者。此疑本賈侍中說，亦足備一義也。云「胖宜爲脯而腥」者，《內饗》注義同。云「胖之言片也，析肉意也」者，胖與膾同爲腥肉，胖又薄析之，不爲大膾，即《內則》注所謂藿葉切之也。《廣雅·釋詁》云：「片，胖，半也。」《說文·片部》云：「片，判木也。」胖判片聲並相近，片絕之即析肉

之意。鄭云此者，明胖亦如脯之片析，不徒爲半體也。但脯則析而乾之，胖則析而不乾，以此爲異。阮元云：「《玉篇·肉部》引作『胖之言半也』」。古書片半通用，其音義皆同。云「禮固有腥膾爛，雖其有爲孰之，皆先制乃亨」者，賈疏云：「祭祀之禮，肫解而腥之，又有體解而爛之，又有薦孰之禮。《禮經》固有此三者，皆當先制爲胖。言此者，證胖與膾不同，破諸家之意。」案：賈說非也。《郊特牲》云：「腥肆爛膾祭。」鄭彼注云：「膾，熟也。」又《祭義》云：「爛祭祭腥而退。」注云：「爛祭祭腥，爛肉腥肉也。湯肉曰爛。」細繹鄭意，蓋謂禮有腥膾爛之薦，腥是生肉，爛是半生半孰之肉，膾是孰肉。然雖有孰薦，亦必先以生肉依法制割而後亨之。明此腊人所掌膾胖，亦是未亨之前制之，或腓爲大膾，或薄析之，故得爲腥肉也。賈乃謂證胖與膾不同，失其指矣。賓客、喪紀，共其脯腊，凡乾肉之事。【疏】「共其脯腊，凡乾肉之事」者，賈疏云：「此所共者，共內外饗也。」

周禮正義卷九

天官冢宰下【疏】「天官冢宰下」者，《釋文》作「天官下」，云：「本亦作『天官冢宰下』。」案：宋以來刻本，並與《釋文》或本同。孔繼汾云：「《儀禮》之《士喪》、《特牲饋食》及《禮記》之《曲禮》、《檀弓》、《雜記》各有上下篇，竝漢時舊師所傳。《周禮》則每官爲一篇，不殊上下，故鄭自敘云『凡著三禮七十二篇』也。石經十二卷之數，乃後人所分，不知始於何時，《隋志》已然。」案：孔說是也。《士喪》、《特牲》之下篇，皆別取篇首之文爲題目，與《曲禮》、《檀弓》、《雜記》上下篇並通計篇數。蓋漢時傳本如是，故《曲禮下》、《鄭目錄》云「簡策重多，分爲上下」是也。此六官六篇，別爲上下，蓋亦後人以簡策重多分之。然鄭本尚無此分別，故不以上下篇計數。唐石經作「天官冢宰下第二」，以後五官竝通計上下爲十二篇，尤誤。今不從。

周禮 鄭氏注

醫師掌醫之政令，聚毒藥以共醫事。毒

藥，藥之辛苦者，藥之物恒多毒。《孟子》曰：「藥不瞑眩，厥疾無瘳。」【疏】「掌醫之政令」者，掌衆醫癘治齊和之政及命令也。云「聚毒藥以共醫事」者，毒藥之物出於山澤，蓋委人及山虞、澤虞等斂聚，人之醫師，儲以待用也。賈疏云：「謂所有藥物，並皆聚之，以供疾醫、瘍醫等。」注

云「毒藥，藥之辛苦者，藥之物恒多毒」者，《說文·艸部》云：「毒，厚也。」《廣雅·釋詁》云：「毒，苦也。」凡辛苦之藥，味必厚烈而不適口，故謂之毒藥。《月令》「孟夏聚畜百藥」。鄭注云：「蕃廡之時毒氣盛。」《素問·藏氣法時篇》云：「毒藥攻邪。」又《移精變氣論》云：「毒藥治其內，鍼石治其外。」《五常政大論》云：「能毒者以厚藥，不勝毒者以薄藥。」王冰注云：「藥厚薄謂氣味厚薄者也。」《鵠冠子·環流篇》云：「味之害人者謂之毒，積毒成藥，工以爲醫。」是毒藥者，氣性酷烈之謂，與《本艸經》所云有毒無毒者異。鄭義根據古訓，不可易也。賈疏謂「藥中有毒者，巴豆、狼牙之類」，殆未達鄭指。王安石、王昭禹、鄭鏐、姜兆錫、莊有可、俞樾並謂毒藥爲二，即《瘍醫職》五毒五藥，亦通。引《孟子》曰「藥不瞑眩，厥疾無瘳」者，《滕文公篇》文。惠棟校余本作「若藥不瞑眩厥疾無瘳」，明汪道昆本同。阮元校

宋本作「藥不瞑眩厥疾弗瘳」。賈疏作「藥不瞑眩厥疾不瘳」。葉鈔《釋文》作「無瘳」，盧本仍作「不瘳」。今從嘉靖本，宋岳本亦同。《孟子》趙注本作「若藥不瞑眩厥疾不瘳」，《國語·楚語》同。賈疏云：「注云《逸書》也。藥使人瞑眩悶亂，乃得瘳愈，猶人敦德惠乃治也。引之者，證藥中有毒之意。此是《古文尚書·說命》之篇，高宗語傳說之言也。不引《說命》而引《孟子》者，鄭不見《古文尚書》故也。」案：賈說非也。《方言》云：「凡飲藥傳藥而毒，東齊海岱之間謂之瞑，或謂之眩。」又云：「南楚飲毒藥懣，謂之頓眩，猶中齊言眠眩也。」《國語》韋注云：「瞑眩頓脊，攻己之急也。」據此，是瞑眩亦謂藥氣味辛苦酷烈，飲之傳之，使人頓悶痛苦，即所謂毒也，故鄭引以爲證，非證藥中有毒也。又賈所引《孟子》趙注，與今本少異，而義旨校長。至東晉僞古文《說命》有此二語，即取《孟子》爲之。鄭注真古文《書》，本無此篇，不足據也。凡邦之有疾病者，有疔瘍者造焉，則使醫分而治之。疔，頭瘍，亦謂禿也。身傷曰瘍。分之者，醫各有能。【疏】「凡邦之有疾病者有疔瘍者造焉」者，宋本經「疔瘍」上無「有」字，今從唐石經及宋小字本。彭元瑞云：「下《獸醫》「凡獸之有病者

有瘍者」，亦疊有字。」王念孫云：「《太平御覽·疾病部》一引此，亦疊有字。」案：彭、王校是也。《司門》注云：「造猶至也。」造謂來至醫師所治之官府也。云「則使醫分而治之」者，賈疏云：「疾病者付疾醫，疔瘍者付瘍醫，故云分而治之。下有食醫、獸醫亦屬醫師，不來造醫師者，食醫主齊和飲食，不須造醫師。獸醫畜獸之賤，便造獸醫，故亦不須造醫師。」注云「疔，頭瘍」者，《說文·疔部》云：「疔，頭瘍也。」《左》襄十九年傳云：「荀偃瘕疽，生瘍於頭。」蓋疔爲頭創專名，它瘍不得稱疔，而疔得通稱瘍，故鄭、許並云頭瘍。賈疏云：「案下《瘍醫》腫瘍等不言疔，此特言疔者，腫瘍等可以兼之，故云疔頭瘍，謂頭上有瘡含膿血者。」云「亦謂禿也」者，《一切經音義》引《倉頡篇》云：「疔，禿也。」云「身傷曰瘍」者，若瘍醫四種之瘍是也。《說文·疔部》云：「瘍，頭創也。」《廣雅·釋詁》云：「瘍，傷，創也。」《內則》云：「頭有創則沐，身有瘍則浴。」《爾雅·釋訓》云：「肝瘍爲微。」則創凡在頭身及四肢者，並謂之瘍。鄭以經瘍疔並言，疔爲頭瘍，則瘍直爲身瘍，故據《內則》爲訓，實則疔亦得通稱瘍也。云「分之者，醫各有能」者，賈疏云：「疾醫知疾不知瘍，瘍醫知瘍不知疾，故云醫各有能。」歲終，則稽其醫事以制其食。十全爲上，十

失一次之，十失二次之，十失三次之，十失四爲下。食，祿也。全猶愈也。以失四爲下者，五則半矣，或不治自愈。【疏】「歲終則稽其醫事，以制其食」者，此醫官之官計也。歲終亦夏之季冬，鄭、賈謂周之季冬，非也。詳《宰夫》疏。《小宰》注云：「稽猶計也。」賈疏云：「謂疾醫等歲始已來治病，有愈有不愈，並有案記，今歲終摠考計之，據所治愈不愈之狀，而制其食祿五等之差。」

注云「食，祿也」者，《小宰》六敍云「四曰以敘制其食」，注亦釋食爲祿。賈疏云：「食卽月俸，故以祿解食。依《序官》，疾醫中士，瘍醫下士。案《禮記·王制》：下士視上農夫，食九人祿；中士倍下士，十八人祿。若然，中士祿食有常，今差爲五等者，但功適中者守本祿，功高者益之，功下者損之，欲勉勵醫者，故爲此五等之差。」莊存與云：「食，來歲之稍食也。」案：莊說是也。疾醫、瘍醫，爵爲中下士，則以爵制祿，其差止二等。既無五等之差，且祿與爵常相因，有一定之爵，則有一定之祿，不當稽其事以爲之制。此制其食，卽《小宰》六敍之制食，皆謂稍食，鄭、賈以爲祿，非也。凡命士以上則有祿，不命之士及庶人在官者，則無祿而有稍食。此醫師所屬疾醫、瘍醫各八人，皆有祿之命士

也。然以王國之大，而止此醫士十有六人，於事必不給。《周書·大聚篇》云：「鄉立巫醫，具百藥以備疾災。」是則鄉遂以外亦立醫官之證。竊疑疾醫、瘍醫兩官，當各有散醫，無員數，亦無爵秩。《夏官·巫馬》別有醫四人，無爵，卽其比例也。散醫無爵，則亦不受祿，但以給事於官，受稍食而已。此云稽其醫事以制其食者，卽稽散醫之事而制其稍食也。《春官·敍官》，凡以神仕者無數，以其藝爲之貴賤之等。此官以五等制醫之食，卽所謂以其藝爲之貴賤之等，與神仕正同。若中下士之醫官，自當擇其藝之精者爲之。段令方術疏淺，不勝其任，則黜之耳，何煩立五等之差，以校其上下哉！凡經言食者，並與祿異，詳《官正》疏。云「全猶愈也」者，《說文·人部》云：「全，完也。」引申之疾愈亦爲全。《莊子·徐無鬼篇》云：「今予病少痊。」《釋文》引李頤云：「痊，除也。」痊卽全之俗。云「以失四爲下者，五則半矣，或不治自愈」者，明十失五者，并不得爲下醫也。以其術疏，纔能得半。卽其所得之五，亦或是不治自愈，非所治之功，故不足數也。《靈樞經·邪氣藏府病形篇》云：「上工十全九，中工十全七，下工十全六。」《八十一難經》第十三難說同。彼並分工爲三等，與此經五等制食異，而以十全六爲下工則同。

食醫掌和王之六食、六飲、六膳、百羞、

百醬、八珍之齊。和，調也。【疏】「掌和王之六食、

六飲、六膳、百羞、百醬、八珍之齊」者，並食醫之官法，與膳夫、庖人、內外饗、饕人爲官聯也。《膳夫》云：「凡王之饋食用六穀，膳用六牲，飲用六清，羞用百有二十品，珍用八物，醬用百有二十饗。」此云百羞百醬，亦舉成數也。此並庖人共其物，內饗割烹煎和之，膳夫饋之，食醫唯掌其調和齊量而已。

注云「和，調也」者，《弓人》注同。《說文·鬻部》云：「穌，調也。讀與和同。」和卽穌之借字。

凡食

齊，春時，飯宜溫。羹齊，夏時，羹宜熱。醬

齊，秋時，醬宜涼。飲齊，冬時，飲宜寒。【疏】

「凡食齊，春時」者，此論調和飲食寒溫之齊。《內則》文同，蓋卽本此經。食齊，饕人共六食之齊也。賈疏云：「言食者，卽上六食，則《內則》所云食齊一也，言飯之齊和。眠猶比也。四時常溫，比於春時。」云「羹齊，夏時」者，享人共羹之齊也。賈疏云：「謂大羹、鉶羹、菜羹等，其所齊和，四時常熱，故云眠夏時，羹宜熱故也。」云「醬齊，秋時」者，醯人、醢人共齏菹醬之齊也。賈疏云：「案《醢人》、《醯人》唯有醢醢，不言醬，卽豆醬也。案：《公食大夫》、《公親設

醬」。醬者食之主，言醬則該諸豆實。四時皆須涼，故言醬

齊，秋時。云「飲齊，冬時」者，酒正、漿人共六飲之齊也。

賈疏云：「謂若漿人六飲水漿之等。四時皆須寒，故言飲齊，冬時，飲宜寒故也。」

注云「飯宜溫」者，以下《內

則》注並同。《膳夫》注云：「食，飯也。」《士昏禮》云：「黍稷四敦皆蓋。」注云：「蓋爲尚溫。」案：溫者不寒不熱之

謂。《說文·食部》云：「饑，飯傷熱也。」溫則不至於饑矣。

云「羹宜熱」者，羹者肉湑，以熱爲美。《士昏禮》云：「大羹

湑在饗。」注云：「饗，火上。」蓋亦尚熱。《戰國策·燕策》

云：「昔趙王與代王飲，酒酣，樂進取熱歡，廚人進斟羹。」

羹宜熱而歡之，故謂之熱歡。云「醬宜涼」者，《膳夫》注

云：「醬謂醢醢也。」醢醢之屬，不須溫食，故宜涼也。云

「飲宜寒」者，六飲皆以水和齊，以寒爲貴。《楚辭·招魂》

云：「挫糟凍飲，耐清涼些。」所謂宜寒也。凡和，春多

酸，夏多苦，秋多辛，冬多鹹，調以滑甘。各尚

其時味，而甘以成之，猶水火金木之載於土。《內則》曰：

「棗栗飴蜜以甘之，萁荳粉榆婉槁滷澹以滑之。」【疏】「凡

和」者，論調和五味多少之齊也。《內則》文亦同。云「調以

滑甘」者，《說文·水部》云：「滑，利也。」此五味益以滑，謂

之六和。《禮運》云：「五味六和十二食，還相爲質也。」甄鸞《五經算術》引彼文，「質」爲「滑」。彼十二食，孔疏以爲十二月之食。案：此味分四時，不以月別，《禮運》所云，未聞其審。

注云「各尚其時味，而甘以成之，猶水火金木之載於土」者，《內則》注云：「多其時味，以養氣也。」《春秋繁露·五行之義篇》云：「金木水火雖各職，不因土方不立，若酸鹹辛苦之不因甘肥不能成味也。甘者五味之本也，土者五行之主也。」《淮南子·墜形訓》云：「味有五變，甘其主也。位有五材，土其主也。」賈疏云：「東方木味酸，屬春，春時調和食，酸多於餘味一分。南方火味苦，屬夏，夏時調和食，苦亦多於餘味一分。西方金味辛，屬秋，秋時調和食，辛亦多於餘味一分。北方水味鹹，屬冬，冬時調和食，鹹亦多於餘味一分。中央土味甘，屬季夏，金木水火，非土不載，於五行土爲尊，於五味甘爲上，故甘摠調四時。」《內則》孔疏云：「依經方，春不用食酸，夏不用食苦，四時各減其時味也。經方所云，謂時氣壯者，減其時味，以殺盛氣。此經所云，食以養人，恐氣虛羸，故多其時味以養氣也。」蕭吉《五行大義·論配氣味》篇云：「《周禮》解有兩家。一云宜從時氣，春食須多酸，夏食須多苦。一云多者，過也。春食過酸，宜減其鹹味；夏食過苦，宜減其酸味，是

以後句云調以滑甘。今依前解，四時之味，各隨時所當，故逐時鹹苦，養體之宜。土既居總載四時，是以四時味兼須甘味以調之。」呂飛鵬云：「前說即鄭注各尚其時味之義。由後說推之，過酸宜減其鹹味，過苦宜減其酸味者，治其源也。酸爲木味，鹹爲水味，苦爲火味。水生木，木生火，減其所生之味，而春酸夏苦，不至於太過。若然，則秋食過辛，宜減其甘味；冬食過鹹，宜減其辛味。」案：蕭吉亦從鄭說，其所述第二說，義殊迂曲，蕭氏亦不從也。引《內則》曰「棗栗飴蜜以甘之，薑荳粉榆婉槁漚澹以滑之」者，賈疏云：「證經滑甘之所用之物。鄭君注《內則》：「荳，薑類。榆白曰粉。婉，新生者。槁，乾也。齊人漚曰漚。秦人滑曰澹。」謂將此薑已下，和漚以滑之。」詒讓案：「婉槁」《內則》作「免蕘」。《禮記釋文》云：「蕘，字又作稟。」案：槁稟字同。《羣經音辨·女部》引《禮》「婉槁漚澹」云「鄭康成讀」。攷《內則》注，鄭無異讀，《音辨》所述鄭讀，蓋即指此引《內則》文。疑賈昌朝所見《周禮釋文》本作「婉槁」，槁槁字亦通也。又今本《內則》注，「婉」作「免」，「槁」作「蕘」，齊秦字互易，與賈疏所引不同，或賈依此注改之。漚者，《說文·水部》云「久汨也」。《內則》說爲醢云「爲稻粉穠漚之」。注云：「穠讀與漚澹之漚同。」則漚澹與穠漚義同，並

謂以米粉和菜爲滑也。凡會膳食之宜，牛宜稌，羊宜黍，豕宜稷，犬宜粱，鴈宜麥，魚宜苽。

會，成也，謂其味相成。鄭司農云：「稌，梗也。《爾雅》

曰：「稌，稻。」苽，彫胡也。【疏】「凡會膳食之宜」者，此論

六膳六食，性與穀配合之宜也。《內則》文亦同。云「牛宜

稌」者，賈疏云：「依《本草》、《素問》，牛味甘平，稻味甘而

又溫，甘苦相成。」云「羊宜黍」者，黍即今之稌，詳《大宰》

疏。賈疏云：「羊味甘熱，黍味苦溫，亦是甘苦相成。」云

「豕宜稷」者，稷即今之高粱，詳《大宰》疏。賈疏云：「豕豬

味酸，牝豬味苦，稷米味甘，亦是甘苦相成。」云「犬宜粱」

者，粱即今北方之小米，詳《大宰》疏。賈疏云：「犬味酸而

溫，粱米味甘而微寒，亦是氣味相成。」云「鴈宜麥」者，王引

之云：「鴈謂鵞也。《爾雅》「舒鴈，鵞」。李巡注曰：「野曰

鴈，家曰鵞。」對文則鵞與鴈異，散文則鵞亦謂之鴈。《方

言》：「鴈自關而東謂之鵞，南楚之外謂之鵞。」《說文》：

「鴈，鵞也。」《莊子·山木篇》「命豎子殺鴈而亨之」，謂殺鵞

也。《齊策》「士三食不得饜，而君鵞驚有餘食」，《韓詩外

傳》及《說苑·尊賢篇》竝作「鴈驚有餘粟」。《晏子春秋·

外篇》亦曰「君之鳧鴈食以菽粟」。《墨子·雜守篇》曰「寇

至，先殺牛羊雞狗鳧鴈」，《說苑·臣術篇》「秦穆公悅百里奚之言，公孫支歸取鴈以賀」，《漢書·翟方進傳》「有狗從外人，齧其中庭羣鴈數十」，皆謂鵞爲鴈也。《堯典》「二生

一死贊」，馬融以二生爲羔鴈，鴈則鵞也。《史記·封禪

書》《漢書·郊祀志》竝作二牲，蓋羔與鵞皆常畜之物，故

謂之牲。《王制》曰：「庶人春薦韭，夏薦麥，秋薦黍，冬薦

稻。韭以卵，麥以魚，黍以豚，稻以鴈。」鴈亦謂鵞也。【案：

王說是也。賈疏云：「鴈味甘平，大麥味酸而溫，小麥味甘

微寒，亦是氣味相成。」云「魚宜苽」者，賈疏云：「魚味寒，

魚族甚多，寒熱酸苦兼有，而云宜苽，或同是水物相宜。」

【案：此六者，牲穀相配，亦取氣味相宜而已。賈傳合五行

爲說，經旨實未必然也。又《月令》說春食麥羊，夏食菽雞，

季夏食稷牛，秋食麻犬，冬食黍豕。《蔡邕集·月令問答》

謂皆時味所宜，與此六牲六穀氣味相成異也。注云

「會，成也，謂其味相成」者，《爾雅·釋詁》云：「會，合也。」

謂齊合諸味相成不爽戾也。云「稌，梗也」者，《釋文》云：

「梗，本亦作稌。」《說文·禾部》云：「稌，稻屬，重文梗，稌

或从更聲。」「稌，稻也」，引《周禮》曰「牛宜稌」。「稻，稌

也」。【案：《說文》謂稌爲稻屬，而以稌稻轉相訓者，稌稻爲

大名，稌則稻之不黏者，故《爾雅釋文》引《字林》云：「稌，

稻不黏者。稷，黏稻也。」先鄭意，蓋謂食稻宜用不黏者，故即以稷釋稌也。引《爾雅》曰「稌，稻」者，《釋艸》文。郭注云：「今沛國呼稌。」上以稷釋稌，偏舉一種，更引《爾雅》此文，明稌稻並為大名也。云「苽，彫胡也」者，《釋文》云：「彫，劉本作凋。」《膳夫》注亦作彫，詳彼疏。凡君子之食恒放焉。^①放猶依也。【疏】「凡君子之食恒放焉」者，《禮器》注云：「君子，謂大夫以上。」《喪服傳》云：「君子子者，貴人之子也。」注以君子為大夫及公子。《月令》孔疏引《月令章句》云：「君子謂人君以下至位士也。」《白虎通義·號篇》云：「或稱君子者何？道德之稱也。君之為言羣也。子者，丈夫之通稱也。何以知其通稱也？以天子至於民。」案：此經君子，當以王為主，而公卿大夫及王子弟之有公膳者，亦依此齊和之，不下及士庶人，與蔡、班義小異。賈疏云：「上六食六飲一經，據共王，不通於下。」^②凡食春多酸已下，至魚宜苽已上，齊和相成之事，雖以王為主，君子大夫已上亦依之，故云恒放焉。」注云「放猶依也」者，《廣雅·釋詁》云：「放，依也。」《墨子·法儀篇》云：「放依以從事。」是放依義同。

疾醫掌養萬民之疾病。四時皆有癘

疾：春時有瘖首疾，夏時有痒疥疾，秋時有瘧寒疾，冬時有嗽上氣疾。癘疾，氣不和之疾。瘖，酸削也。首疾，頭痛也。嗽，欬也。上氣，逆喘也。《五行傳》曰：「六癘作見。」【疏】「掌養萬民之疾病」者，賈疏云：「此主療治疾病而云養者，但是療治，必須將養，故以養言之。疾病兩言之者，疾輕病重，故注《論語》云「疾甚曰病」。謂疾病俱療，故兩言之。此直言萬民，不言王與大夫，《醫師》雖不言，或可醫師治之。」案：後注云：「養猶治也。」此官掌治疾病，通於上下，廣言之，故云萬民。賈說非。云「四時皆有癘疾」者，並據時氣所感病之多者言之。云「春時有瘖首疾」者，謂春氣不和，民感其氣，則為瘖痛而在首也。《左》昭元年傳，子產論六氣之疾云「風淫末疾」，孔疏引賈逵以末疾為首疾，謂風眩也。此瘖首疾在春，亦風氣所生也。云「夏時有痒疥疾」者，《說文·疒部》云：「痒，瘍也。疥，搔也。」又《虫部》云：「蟬，搔蟬也。」痒即蟬

① 「子」，原作「予」，據楚本改。

② 「於」，原作「放」，據楚本改。

之段字，俗作癢。《釋名·釋疾病》云：「癢，揚也，其氣在皮中，欲得發揚，使人搔發之而揚出也。疥，齡也，癢搔之齒類齡也。」謂夏氣不和，民感其氣，則爲創痒而成疥也。云「秋時有瘡寒疾」者，《說文·疒部》云：「瘡，熱寒休作病。」《釋名·釋疾病》云：「瘡，酷虐也，凡疾或寒或熱耳，而此疾先寒後熱，兩疾似酷虐者也。」謂秋氣不和，民感其氣，則爲瘡而發於寒也。《素問·瘡論》云：「岐伯曰：夏傷於大暑，其汗大出，腠理開發，因遇夏氣淒淒之水，寒藏於腠理皮膚之中，秋傷於風，則病成矣。夫寒者，陰氣也；風者，陽氣也。先傷於寒，而後傷於風，故先寒而後熱也。病以時作，名曰寒瘡。」又《金匱真言論》云：「秋善病風瘡。」又《陰陽應象大論》云：「夏傷於暑，秋必痾瘡。」與此經義合。《左》昭元年傳云「陰淫寒疾」，亦與此義略同。云「冬時有嗽上氣疾」者，謂冬氣不和，民感其氣，則爲嗽而氣上逆也。《陰陽應象大論》云「秋傷於溼，冬生欬嗽」，義亦與此經合。 注云「癢疾，氣不和之疾」者，《說文·疒部》云：「癢，惡疾也。」隸變作癢。氣謂四時五行之氣。不和者，即後注云「病由氣勝負而生」是也。《呂氏春秋·仲冬紀》「行春令則民多疾病」。高注云：「水木相干，^①氣不和，故民多疾病也。」《左》昭四年傳杜注云：「癢，惡氣也。」

字亦作「厲」。《釋名·釋天》云：「厲，疾氣也，中人如磨厲傷物也。」案：此癘爲四時常疾，其大疫亦謂之癘，即《膳夫》之大札，彼注云「大札，疫癘」是也。《公羊》莊二十年傳：「大瘡者何？痢也。」何注云：「痢者，民病疫也。」痢與癘聲類亦同。云「瘡，酸削也，首疾，頭痛也」者，《說文·疒部》云：「瘡，酸瘡，頭痛，《周禮》曰：春時有瘡首疾。」案：瘡削聲類同。賈疏云：「人患頭痛，則有酸嘶而痛，酸削則酸嘶也。」丁晏云：「《釋名·釋疾病》云：「酸，遜也，遜遁在後也，言腳疼力少，行遁在後，似遜遁者也。消，弱也，如見割削，筋力弱也。」即釋此酸削之義。」曾釗云：「注意謂頭痛酸削耳。若疏析瘡首爲二，則頭痛之外，何者爲酸削之痛邪？」《說文》云「酸瘡，頭痛」。左思《蜀都賦》云「味蠲瘡瘡」，劉注：「瘡，頭病也。《周禮》：春多瘡首之疾。」是古訓不分瘡首爲兩解。又《素問·金匱真言論》：「東風生於春，病在肝，俞在頸項，故春氣者病在頭。」是感春癘氣爲頭痛，《內經》有明文。賈乃別瘡爲酸削之痛，非注意矣。」案：曾說是也。《列子·黃帝篇》「指擗無瘡癢」，張湛注云：「瘡癢，痛癢也。」張機《金匱要略·虛勞篇》云「足酸

①「木」，原作「火」，據《呂氏春秋》高誘注改。

削」，巢元方《諸病源候總論》作「痠癰」。《廣韻·十二齊》云：「痠癰疼痛。」痠痠聲同，瘡與癰、癰、癰，亦聲相轉。《神農本草經》云：「礞石主周痺風溼，肢節中痛，不可持物，洗洗酸瘡。」是凡首及四肢，並有酸瘡之痛，而春之癰疾，其酸瘡則多在首，故經云瘡，而又云首疾也。《說文》以酸瘡專屬頭痛，義即本此經。《管子·地員篇》云「終無瘡瘡」。①尹注云：「瘡，首疾也。」亦與許義同。賈疏謂頭痛之外，別有酸削之痛，非經義。云「嗽，欬也」者，《廣雅·釋言》同。《釋文》云：「嗽，本亦作欬。」盧文弨云：「《說文》：「欬，吮也。」無嗽字。《玉篇》：「欬，上欬也。」則作欬為正。」案：盧說是也。原本顧氏《玉篇·欠部》引此經，亦作「欬」。又《一切經音義》引《蒼頡篇》云：「齊郡謂欬曰欬也。」嗽即欬之俗。②《說文·欠部》云：「欬，逆氣也。」《釋名·釋疾病》云：「欬，刻也，氣奔至出入不平調，若刻物也。」云「上氣，逆喘也」者，賈疏云：「向上喘息，謂之逆喘。」詒讓案：逆喘即《說文》所謂逆氣也。《素問·五藏生成論》云：「欬嗽上氣，厥在胸中。」又《欬論》云：「久欬不已，則使人多涕唾，而面浮腫氣逆也。」又《生氣通天論》云：「秋傷於溼，上逆而欬，發為痿厥。」然則上氣即因嗽之甚而氣逆為喘，事亦相因，故經云嗽上氣疾也。引《五行傳》曰「六癘作見」

者，明癘疾生於五行之氣也。賈疏云：「案：《五行傳》云：「五福乃降，用彰於下，六沴作見。一曰：貌之不恭，是謂不肅，惟金沴木。」又曰：「言之不從，是謂不乂，惟火沴金。」又曰：「眠之不明，是謂不哲，惟水沴火。」又曰：「聽之不聰，是謂不謀，惟土沴水。」又曰：「思之不睿，是謂不聖，惟木金水火沴土。」此其五沴也。言六沴者，天雖無沴，案《洪範》六極，又案《書傳》致六極之由，皆由身之五事。一曰凶短折，思不睿之誅；二曰疾，眠不明之誅；三曰憂，言不從之誅；四曰貧，聽不聰之誅；五曰惡，貌不恭之誅；六曰弱，皇不極之誅。據此六極，皇極為屬天王者，不極亦有疴疾病，併前五者為六沴。彼言沴此鄭注言癘者，言沴謂五行相乖沴，此言癘，癘氣與人為疫，故不同。若據五事所致言之，四時之疾皆據眠之不明者也。」又云：「春是四時之首，陽氣將盛，惟金沴木，故有頭首之疾。四月純陽用事，五月已後，陰氣始起，惟水沴火。木為甲，疥有甲，故有疥痒之疾。秋時陽氣漸銷，陰氣方盛，惟火沴

①「瘡」，楚本作「醒」，與《管子·地員》合。

②「欬」，原作「嗽」，據楚本改。

③「欠」，原作「元」，據楚本改。

金，兼寒兼熱，故有瘡寒之疾。冬時陰氣盛，陽氣方起，惟土沍水，以土壅水，其氣不通，故有嗽上氣之疾。」詒讓案：鄭本《五行傳》亦作「沍」，《續漢書·五行志》劉注引鄭彼注云：「沍，殄也。」此引作瘡者，瘡沍聲近義通。《大祝》注亦同。《左傳》昭七年孔疏引鄭《箴膏肓》云：「厲者，陰陽之氣相乘，不和之名，《尚書·五行傳》六厲是也。」則又借厲爲之。《漢書·五行志》云：「氣相傷謂之沍，沍猶臨莅不和意也。」與鄭此注瘡字，訓義略同。賈據《五行傳》以釋此經四時之瘡疾，與醫家說不必盡合。然鄭意或如是，附存之以證注義。

以五味、五穀、五藥養其病，養猶治也。病由氣勝負而生，攻其贏，養其不足者。五味，醢酒飴蜜薑鹽之屬。五穀，麻黍稷麥豆也。五藥，草木蟲石穀也。其治合之齊，則存乎神農、子儀之術云。【疏】「以五味、五穀、五藥養其病」者，以下通論治疾之術，並疾醫之官法也。

注云「養猶治也」者，此引申之義。養身即所以治病，是養與治義相成也。云「病由氣勝負而生」者，謂五行之氣，相勝則爲病，即《五行傳》五沍之義。《素問·陰陽別論》云：「陰勝則陽病，陽勝則陰病。陽勝則熱，陰勝則寒，風勝則動，熱勝則腫，燥勝則浮，溼勝則濡瀉。」此言陰陽寒熱燥溼氣相勝爲病之事，與此注義，亦足互相備。云「攻其

贏養其不足者」者，贏，《釋文》作「羸」。盧文弨云：「《爾雅·釋天》『夏爲長羸』，注云：『本或作羸。』是古並通用。」賈疏云：「夏時病者，則五味中食甘，五穀中食稷，以甘稷是土之穀味。土所剋水，是攻其羸也。土生於火，土是火之子，食甘稷爲子養母之道，故云養其不足也。」云「五味，醢酒飴蜜薑鹽之屬」者，賈疏云：「醢則酸也，酒則苦也，飴蜜即甘也，薑即辛也，鹽即鹹也。」云「五穀，麻黍稷麥豆也」者，賈疏云：「此依《月令》五方之穀。此五穀據養疾而食之，非必入於藥分。」程瑤田云：「五穀養疾，宜與藏氣相應，故據《月令》配五行者爲之注。《素問·藏氣發時論》：『粳米甘，小豆酸，麥苦，大豆鹹，黃黍辛。』《靈樞·五味篇》：『稗米甘，麻酸，大豆鹹，麥苦，黃黍辛。』《五音五味篇》：『麥苦，大豆鹹，稷甘，黍辛，麻酸。』案：《五音篇》與《月令》同。合觀之，粳稷可互取，小豆麻可互取。」又云：「綜計諸家言五穀者，《月令》曰『麻黍稷麥豆』，鄭據之以注《疾醫》。《史記·天官書》、顏師古注《漢書·食貨志》、盧辨《大戴禮》注，皆同。《素問·金匱真言論》：『五方之穀，曰麥黍稷稻豆。』鄭注《職方氏》之五種，曰『黍稷菽麥稻』。《漢書·地理志》引《職方氏》師古注同。《管子·地員篇》載五土所宜之種，曰『黍稷菽麥稻』。《淮南子·脩務訓》五

穀，高注「菽麥黍稷稻」。《漢書音義》，韋昭曰：「五穀，黍稷麥稻也。」自《金匱真言》以下，說竝不異。而《五常政大論》則又進麻爲木穀，至火穀，則麥黍互用。以上言五穀者凡十二事，雖不能齊一，然皆有稷無粱。《楚辭·大招》「五穀六仞，設菰粱只」。王逸注：「五穀，稻稷麥豆麻也。菰粱，蔣實，謂雕胡也。」王說亦爲有稷無粱。《周書》言五方之穀，曰「麥黍稻粱菽」。粟，粱也。是爲有粱無稷。凡此皆秦漢後稷粱溷一之證也。」金鶚云：「鄭注《疾醫》五穀，據《月令》爲說。其注《職方》五穀，則以爲稻黍稷麥菽，有稻而無麻，與《素問·金匱真言論》合。趙岐、高誘、韋昭說，皆與此同。盧辨、楊倞、顏師古皆與《疾醫》注同。王逸以爲稻稷麥豆麻，則稻麻並舉而無黍。《逸周書》曰「麥黍稻粱菽」，則無麻稷而有粟。《管子》曰「黍稷菽麥稻」，則無麻粟而有秫，諸說不一。鶚謂五穀者，以其爲飯者而言也，曰黍稷稻粱麥。《膳夫》王食六穀，《食醫》會膳食之宜，牛宜稌，羊宜黍，豕宜稷，犬宜粱，鴈宜麥，魚宜苽。《內則》言飯黍稷稻粱下，又言麥食苽食，可知六者皆可爲飯矣。《內則》疏謂諸侯朔食四簋，黍稷稻粱；天子則加以麥苽，可知常食者，黍稷稻粱也。苽爲雕胡，其米所出頗少，惟天子諸侯得暫食，而麥則貴賤皆食之。然則六穀去一而爲五穀，

當存麥而去苽矣。若菽與麻，古人用爲籩實，不以爲飯，是則五穀不當數麻菽矣。《月令》、《素問》、《逸周書》、《管子》或別有取義，皆不可以定五穀之名也。」案：金說是也。云「五藥，草木蟲石穀也」者，謂動植庶物入藥分者，約有此五類也。《大觀本草》引陶弘景《本草序》，附載《本草經》舊目，有玉石草木蟲獸果菜米食八類，鄭此注依經五藥約略數之，故與彼不同。云「其治合之齊，則存乎神農、子儀之術」者，《隋書·經籍志》引梁《七錄》，有《神農本草經》三卷，今存。子儀者，賈疏云：「案劉向云：『扁鵲治趙太子暴疾尸蹙之病，使子明炊湯，子儀脈神，子術案摩。』」又《中經簿》云：「《子義本草經》一卷。」儀與義一人也。若然，子義亦周末時人也。」案：賈所引劉向說，見《說苑·辨物篇》。今本作「子明吹耳，陽儀反神，子游矯摩」。蓋傳寫譌舛，當據此以正之。《韓詩外傳》亦載其事，作「子明灸陽，子游案摩，子儀反神」。其子儀之名，與賈引劉說同。以

五氣、五聲、五色眊其死生。三者劇易之徵，見於外者。五氣，五臟所出氣也。肺氣熱，心氣次之，肝氣涼，脾氣溫，腎氣寒。五聲，言語宮商角徵羽也。五色，面貌青赤黃白黑也。察其盈虛休王，吉凶可知。審用此者，莫若

扁鵲、倉公。【疏】注云「三者劇易之徵見於外者」者，賈疏

云：「此經三者，並是人病者氣與聲色。其病在內，人所不覩，見其聲色，則知增劇及簡易，故云劇易之徵見於外者也。」云「五氣，五藏所出氣也」者，賈疏云：「言五藏謂氣之所藏，故云五氣出於五藏。」云「肺氣熱，心氣次之，肝氣涼，脾氣溫，腎氣寒」者，賈疏云：「此已下並據《月令》『牲南首』而言。肺在上當夏，故云肺氣熱。心在肺下，心位當土，心氣亦熱，故言次之。肝在心下近右，其位當秋，故云肝氣涼。此三藏並在膈上。脾於藏值春，故云溫。腎位在下，於藏值冬，故言寒。此二者在膈下。此五藏寒熱等，據《月令》成文而說。及其醫方之術，心屬南方，肝屬東方，肺屬西方，脾屬中央，腎屬北方，此並據五色而言，不據氣之寒熱也。」案：《月令》：「春祭先脾，夏祭先肺，中央土祭先心，秋祭先肝，冬祭先腎，此即賈氏所據也。《月令》孔疏引『五經異義』云：『《今文尚書》歐陽說：肝木也，心火也，脾土也，肺金也，腎水也。《古尚書》說：脾木也，肺火也，心土也，肝金也，腎水也。』許慎謹案：《月令》春祭脾，夏祭肺，季夏祭心，秋祭肝，冬祭腎，與《古尚書》同。」鄭駁之云：「《月令》祭四時之位，及其五藏之上下次之耳。冬位在後，而腎在下；夏位在前，而肺在上。春位小前，故祭先

脾；秋位小卻，故祭先肝。腎也，脾也，俱在膈下；肺也，心也，肝也，俱在膈上。祭者必三，故有先後焉，不得同五行之氣。今醫疾之法，以肝爲木，心爲火，脾爲土，肺爲金，腎爲水，則有瘳也。若反其術，不死爲劇。」曾釗云：「此注本《古尚書》說。以方書攷之，殊不然。鄭《駁異義》從《今文尚書》說。蓋二書不作於一時也。《素問·宣明五氣篇》：『五氣所病，心爲噫，肺爲欬，肝爲語，脾爲吞，腎爲欠爲嚏。』此經五氣當從之。蓋因五氣以審五藏，傷則病，絕則死。」呂飛鵬云：「《素問·至真要大論》：『岐伯曰：厥陰司天，風淫所勝，病本於脾，衝陽絕，死不治。太陰司天，淫淫所勝，病本於腎，太谿絕，死不治。少陽司天，火淫所勝，病本於肺，天府絕，死不治。陽明司天，燥淫所勝，病本於肝，太衝絕，死不治。太陽司天，寒淫所勝，病本於心，神門絕，死不治。所謂動氣知其藏也。』案：衝陽足跗上動脈，胃氣也，木勝土，故脾胃病。尺澤在肘內廉大紋中，肺氣也，火勝金，故肺大腸病。大谿在足內踝後跟骨上動脈，腎氣也，土勝水，故腎膀胱病。天府在臂臑內廉下腋三寸，亦肺氣也。太衝足三指本節後二寸，脈動應手，肝氣也，金勝木，故肝膽病。神門在掌後銳骨之端動脈，心氣也，水勝火，故心與包絡病。五氣絕，故不治，反是則生。」案：五行

主五藏，當以《駁異義》說爲正，曾說是也。又曾、呂二家並據《素問》說五藏之氣，與鄭異而義可通，今兩存之。云「五聲，言語宮商角徵羽也」者，賈疏云：「宮數八十一，配中央土；商數七十二，配西方金；角數六十四，配東方木；徵數五十四，配南方火；羽數四十八，配北方水。此五聲，數多者聲濁，數少者聲清，人之言語似之，故云言語宮商角徵羽也。」詒讓案：《素問·陰陽應象大論》云：「木，在藏爲肝，^①在音爲角，在聲爲呼。火，在藏爲心，在音爲徵，在聲爲笑。土，在藏爲脾，在音爲宮，在聲爲歌。金，在藏爲肺，在音爲商，在聲爲哭。水，在藏爲腎，在音爲羽，在聲爲呻。」彼五音，即此經五聲也。彼五聲，《宣明五氣論》又謂之五氣，與此經五聲不同。云「五色，面貌青赤黃白黑也」者，賈疏云：「此據五方，東方木色青，南方火色赤，中央土色黃，西方金色白，北方水色黑。病者面色似之。」詒讓案：《素問·五藏生成篇》云：「五藏之氣色，見青如草茲者死，黃如枳實者死，黑如炁者死，赤如衄血者死，白如枯骨者死，此五色之見死也。青如翠羽者生，赤如雞冠者生，黃如蟹腹者生，白如豕膏者生，黑如鳥羽者生，此五色之見生也。」又《靈樞經·五色篇》云：「以五色命藏，青爲肝，赤爲心，白爲肺，黃爲脾，黑爲腎。」此並治疾察五色之法。云

「察其盈虛休王，吉凶可知」者，賈疏云：「假令冬時面色黑，其氣寒，聲應羽，此是盈而王，吉可知。若冬時其色黃，其氣熱，聲應宮，此得中央土來剋己，此是虛而休，凶可知。若得東方青色等，則子來助己，亦吉。」云「審用此者莫若扁鵲、倉公」者，《釋文》云：「扁，本亦作鵲。」又引《漢書音義》云：「扁鵲，魏桓侯時醫人。」案：鵲俗字，古書「扁鵲」字並作扁。《史記·扁鵲倉公傳》云：「扁鵲者，勃海郡鄭人也。姓秦氏，名越人。爲醫，或在齊，或在趙。在趙者名扁鵲。」又云：「太倉公者，齊太倉長，臨菑人也。姓淳于氏，名意。師同郡元里公乘陽慶，傳黃帝、扁鵲之脈書，五色診病，知人死生，決嫌疑，定可治。爲人治病，決死生多驗。」本傳載二人以氣色等眡死生之事甚衆，故鄭謂其審用此也。兩之以九竅之變，參之以九藏之動。兩參之者，以觀其死生之驗。竅之變，謂開閉非常。陽竅七，陰竅二。藏之動，謂脈至與不至。正藏五，又有胃、旁胱、大腸、小腸。脈之大候，要在陽明寸口，能專是者，其唯秦和乎！岐伯、榆柎則兼彼數術者。【疏】注云「兩參之者，以觀其死生之驗」者，此家上文爲義。《廣雅·釋言》云：

①「在」，原脫，今據楚本補。

「參，三也。」《周書·常訓篇》云：「疑意以兩，平兩以參。」賈疏云：「上經觀其氣色，此經驗其脈候，故以參兩言之。」言兩者，謂九竅與所眡爲兩，兩與九藏爲參。」云「竅之變謂開閉非常」者，《說文·穴部》云：「竅，空也。」九竅開閉有常，若失其常，則爲疾病，故曰非常。云「陽竅七，陰竅二」者，《素問·陰陽象大論》云：「清陽出上竅，濁陰出下竅。」王注云：「上竅，耳目鼻口。下竅，謂前陰後陰。」又《金匱真言論》云：「東方青色，入通於肝，開竅於目。南方赤色，入通於心，開竅於耳。中央黃色，入通於脾，開竅於口。西方白色，入通於肺，開竅於鼻。北方黑色，入通於腎，開竅於二陰。」呂飛鵬云：「耳目鼻，竅各二，口竅一，陰竅一，是爲九竅。」云「藏之動謂脈至與不至」者，賈疏云：「謂九藏在內，其病難知。但診脈至與不至，即知九藏之動，故云藏之動謂脈至與不至也。」云「正藏五」者，醫經所謂五神藏也。《素問·五藏別論》云：「五藏者，藏精氣而不寫也。」《五行大義》云：「五藏者，肝心脾肺腎也。藏者，以其藏於形體之內，故稱爲藏。亦能藏受五氣，故名爲藏。」云「又有胃、膀胱、大腸、小腸」者，賈疏云：「此乃六府中取此四者，以益五藏爲九藏也。六府：胃、小腸、大腸、膀胱、膽、三焦。以其受盛，故謂之爲府。亦有藏稱，故入

九藏之數。然六府取此四者，案《黃帝八十一難經》，說胃爲水穀之府，小腸爲受盛之府，大腸爲行道之府，膀胱爲津液之府。天氣之所生，其氣象天，故寫而不實，實不滿。若然，此則正府也，故入九藏。其餘，膽者清淨之府，三焦爲孤府，非正府，故不入九藏也。」案：賈所引《難經》，見本經《第三十五難》及《素問·五藏別論篇》。舊注疏本，文多譌羨，今各據本書校正。鄭於五藏之外，又取六府之胃、膀胱、大腸、小腸，以足九藏之數，而舍膽與三焦不數。《國語·鄭語》云：「建九紀以立純德。」韋注云：「九紀，九藏也。正藏五，又有胃、膀胱、腸、膽也。」則并大小腸爲一而增膽，與鄭小異。又《素問·六節藏象論》《三部九候論》，並云形藏四，神藏五，爲九藏。王注云：「形藏四者，一頭角，二耳目，三口齒，四胸中也。形分爲藏，故以名焉。神藏五者，一肝，二心，三脾，四肺，五腎也。神藏於內，故以名焉。所謂神藏者，肝藏魂，心藏神，脾藏意，肺藏魄，腎藏志也。故此二別爾。」此說九藏，復與鄭、韋異。今案《素問》說下部三候，肝腎脾胃，中部三候，肺胸中心；上部三候，頭角口齒耳目。爲三部九候，即九藏，故王冰據以爲說。雖根據古醫家言，然此經九竅內，已有耳目口，則九藏不當數形藏。《素問·三部九候》自是專家之學，與此經義

不合。又《靈蘭秘典論》別有十二藏之目，正藏五及胃、膀胱、大腸、小腸之外，以膽、膈中、三焦亦為藏，足徵方術家展轉增加，本無定數矣。云「脈之大候，要在陽明寸口」者，賈疏云：「但醫者診脈，諸脈皆可據。若脈之大候，取其要者，在於陽明寸口二處而已。陽明者，在大拇指本骨之高處，與第二指間。寸口者，大指本高骨後一寸是也。」俞正燮云：「陽明，人迎及衝陽也。」案：俞說是也。以《靈樞經·本輸》、《經脈》兩篇攷之，人迎為大腸手陽明脈，《經脈》云「起於大指次指之端」，即賈所說是也。衝陽為胃足陽明脈，《本輸》云「在足跗上五寸陷者」是也。寸口則為肺手太陰脈，亦名氣口。《素問·經脈別論》云：「肺朝百脈，氣口成寸，以決死生。」王注云：「三世脈法，皆以三寸為寸關尺之分。」《說文·寸部》云：「人手卻一寸動脈，謂之寸口。」《難經·第一難》亦云：「十二經皆有動脈，獨取寸口以決五藏六府死生吉凶之法，何謂也？寸口者，脈之大會，五藏六府之所終始，故法取於寸口也。」今諦審注意，陽明者通該人迎與衝陽而言，寸口者通該寸關尺而言。《內經》說脈，有尺寸而無關。蓋魚際至關，關至尺，各得一寸，故對關尺言之，寸口雖專屬寸，而對陽明言之，則三部通得謂之寸口也。張機《傷寒論敘》云：「觀今之醫，按寸不及

尺，握手不及足，人迎跌陽，三部不參。」跌陽即衝陽。張氏論候脈，亦於寸尺外，特舉人迎跌陽，與鄭以陽明寸口並舉，其意正同。賈釋陽明，舉人迎而遺衝陽，非鄭旨也。云「能專是者，其唯秦和乎」者，《左·昭元年傳》：「晉侯有疾，求醫於秦，秦伯使醫和視之，即其人也。」云「岐伯榆柎則兼彼數術者」者，《釋文》云：「榆，本亦作俞。岐伯、榆柎，皆黃帝時醫人。」案：今醫家書《素問》及《靈樞經》，皆述黃帝與岐伯問答語。《史記·司馬相如傳》《集解》引《漢書音義》云：「岐伯、黃帝大醫。」榆柎，《鶡冠子·世賢篇》、《淮南子·人間訓》並作「俞跗」。《史記·扁鵲傳》：「號中庶子曰：臣聞上古之時，醫有俞跗，治病不以湯液醴灑，鑱石橋引，案扞毒熨，一撥見病之應，因五藏之輸，乃割皮解肌，訣脈結筋，搦髓腦，揲荒爪幕，湔浣腸胃，漱滌五藏，練精易形。」張氏《正義》引應劭云：「黃帝時醫也。」《漢書·藝文志·方技家論》云：「大古有岐伯、俞跗。」又經方有《秦始黃帝扁鵲俞跗方》二十三卷。案：《釋文》「或本作俞」，與《史記》、《漢志》諸書合。賈疏云：「上神農、子儀、扁鵲、倉公、秦和等各專一能，此二人兼上數術耳。」凡民之有疾病

①「記」，原訛作「紀」，今據楚本改。

者，分而治之。死終，則各書其所以，而入

于醫師。少者曰死，老者曰終。所以，謂治之不愈之狀

也。醫師得以制其祿，且爲後治之戒。【疏】死終則各書

其所以，而入于醫師者，書其事以備稽攷，亦疾醫之官計

也。注云「少者曰死，老者曰終」者，《說文·殂部》

云：「殂，漸也。人所離也。」《釋名·釋喪制》云：「老死曰

壽終。壽，久也。終，盡也。生已久遠氣終盡也。」《檀弓》

「子張曰：君子曰終，小人曰死。」鄭彼注云：「死之言漸

也。事卒爲終，消盡爲漸。」案：此注以死終爲少老之異，

與《檀弓》義異，鄭隨文解之。云「所以，謂治之不愈之狀

也」者，《漢書·劉向傳》顏注云：「以，由也。」謂病治之不

愈所由情狀。云「醫師得以制其祿」者，賈疏云：「則上「十

全爲上」已下是也。」詒讓案：此本上《醫師》爲說，則當云

「制其食」，鄭合祿食爲一，未析。詳前疏。云「且爲後治之

戒」者，疾病不愈，或由醫不應法，故書其不愈之狀，爲後之

治此病者之戒，使勿復踵其失也。

瘍醫掌腫瘍、潰瘍、金瘍、折瘍之祝藥

副殺之齊。腫瘍，癰而上生創者。潰瘍，癰而含膿血

者。金瘍，刃創也。折瘍，跪跌者。祝當爲注，讀如注病之

注，聲之誤也。注謂附著藥。刮，刮去膿血。殺謂以藥食

其惡肉。【疏】「掌腫瘍、潰瘍、金瘍、折瘍之祝藥副殺之

齊」者，《釋文》云：「折，劉本作斨。」臧琳云：「《說文·艸

部》：「斨，斷也，从斤斷艸，譚長說。折，篆文斨，从手。」然

則今用折字者，從小篆也。劉昌宗作斨，爲古文，當從之。」

賈疏云：「注藥於瘡，乃後刮殺。而言齊者，亦有齊量之宜

也。」詒讓案：《漢書·郊祀志》顏注云：「齊，藥之分齊

也。」惠士奇云：「副以砭，殺以藥，是爲齊。」注云「腫

瘍，癰而上生創者」者，《說文·肉部》云：「腫，癰也。」又

《疒部》云：「癰，腫也。」癰卽癰之隸變。《釋名·釋疾病》

云：「腫，鍾也，寒熱氣所鍾聚也。癰，壅也，氣壅否結裏而

潰也。」《論衡·狀留篇》云：「肉暴長者曰腫。此腫瘍亦謂

癰創腫結，未成膿血者也。云「潰瘍，癰而含膿血者」者，

《素問·五常政大論》云「分潰癰腫。」王注云：「潰，爛也。」

《說文·疒部》云：「潰，爛也。」潰正字，潰借字。此潰瘍謂

癰已成膿血潰破者也。云「金瘍，刃創也」者，《淮南子·說

山訓》高注云：「金，刀劍之屬。」《說文·刀部》云：「刃，傷

也。或作劒。」劒卽劒之俗。《釋名·釋疾病》云：「劒，戕

也，戕毀體使傷也。」此金瘍卽謂金刃之傷也。《左傳》成十

六年孔疏引服虔云：「金創爲夷。」云「折瘍，踣跌者」者，《後漢書·方術傳》李注云：「踣，屈損也。」《方言》云：「跌，蹙也。」踣跌謂手足宛屈及蹙仆，因而折損支體，故謂之折瘍。《月令》云：「孟秋，命理瞻傷察創視折。」彼創卽此金瘍，折卽此折瘍也。云「祝當爲注，讀如注病之注，聲之誤也」者，祝注一聲之轉。《釋名·釋疾病》云：「注病，一人死，一人復得，氣相灌注也。」《諸病源候總論》云：「注病，注者住也，言其連滯停住，死又注易旁人也。」段玉裁云：「此易其字而釋其音，又釋其義也。」云「注謂附著藥」者，惠士奇云：「古人假借，多取音同。《函人》甲屬，《匠人》水屬，注皆云屬讀如注。音同，古文通。《左傳》：「韎韐之附注」，賈、服皆云注，屬也。」案：惠說是也。《士冠禮》鄭注云：「屬猶著也。」注、屬、著，音義竝相近。附著藥，蓋猶今治創瘍者之傳藥。《玉燭寶典》引崔寔《四民月令》云「正月上除，合注藥」是也。《墨子·非攻中》篇云：「今有醫於此，和合其祝藥之於天下之有病者而藥之，萬人食此，若醫四五人得利焉，猶謂之非行藥也。故孝子不以食其親，忠臣不以食其君。」《墨子》之祝藥以食，與此經祝藥義不相應也。云「刮，刮去膿血」者，《說文·刀部》云「刮，刮去惡創肉也」，引《周禮》曰「刮殺之齊」。又「刮，

刮把也。」刮卽刮之隸變。阮元云：「《說文》：刮，刮異義，鄭君謂爲一字。」詒讓案：鄭蓋謂刮古今字，故經作刮，注並作刮，亦經用古字，注用今字之例也。下注直云「刮殺」可證。《釋文》出「刮去」二字，似陸本注上刮字作刮，則是以刮釋刮，殆非鄭本之舊。俗注疏本同，非也。惠士奇云：「《大玄·達》之次七曰：『達于砭割，前亡後賴。』測曰：達於砭割，終以不廢也。」刮殺猶砭割。《內經》：癰瘍宜砭石，古者以石爲鍼，謂之砭。云「殺謂以藥食其惡肉」者，《左傳》：僖十五年杜注云：「食，消也。」謂傳藥於創，消其腐惡之肉。惠士奇云：「《大玄·從》之次七曰：『拂其惡，從其淑，雄黃食肉。』測曰：拂惡從淑，救凶也。」注藥以食其肉，惡去而善生。」**凡療瘍，以五毒攻之，止病曰療。**攻，治也。五毒，五藥之有毒者。今醫方有五毒之藥，作之，合黃堇，置石膽、丹沙、雄黃、礬石、慈石其中，燒之三日三夜，其煙上著，以雞羽埽取之。以注創，惡肉破，骨則盡出。【疏】「凡療瘍，以五毒攻之」者，以下通論治瘍之術，竝瘍醫之官法也。以五毒攻之，謂腫瘍潰瘍也。金瘍折瘍則不用此法。注云「止病曰療」者，《說文·疒部》云：「療，治也。重文療，或从寮。」《一切經音義》引《三蒼》云：「療，治病也。」云「攻，治也」者，《小爾雅·廣詁》文。《龜

人》、《考工記·總敘》注並同。云「五毒，五藥之有毒者」者，卽下石膽等五者是也。云「今醫方有五毒之藥，作之，合黃堊，置石膽、丹沙、雄黃、礬石、慈石其中，燒之三日三夜，其煙上著，以雞羽埽取之」者，鄭據漢時瘍醫有此注藥，卽古五毒之遺法也。《釋文》云：「堊，本又作螯。」案：《內則》「敦牟」鄭注云：「牟讀曰堊也。敦堊，黍稷器也。」孔疏引《隱義》云：「堊，土釜。」《說文·金部》云：「鑿，鍍屬也。」又《虜部》云：「鑿，土鑿也。」堊、螯、牟，並鑿之借字。黃堊，蓋卽燒黃土爲鑿。《抱朴子·神仙金鈞經》說，作丹藥，盛用黃土甌。注云：「意是土釜也。出在廣州及長沙、豫章、臨川、鄱陽者，皆可用之。又此諸郡，皆作黃土堊，亦可用之。」依其說，則黃土堊又與土釜不同。賈疏謂唐時合和丹藥者，皆用黃瓦甌爲之，亦名黃堊。《大觀本草》引蘇頌《圖經》，謂黃堊若市中所貨，有蓋瓦合。諸說差異，未知其審也。丹沙，宋本、注疏本作丹砂，砂卽沙之俗。《神農本草經》云：「石膽，主金瘡諸邪毒氣。丹砂，主身體五藏百病。雄黃，主鼠瘻、惡瘡、疽痔、死肌、殺百蟲毒。礬石，主鼠瘻蝕瘡。慈石，主周痺風溼。」又《名醫別錄》說石膽、雄黃、礬石竝有毒，丹砂、慈石竝無毒。蓋五石之藥，咸氣性酷烈，故謂之五毒，不必皆有毒也。云「以注創，惡肉破，

骨則盡出」者，明此藥可食惡肉也。《大觀本草》引蘇頌云：「直史館楊嶠，瘍生於頰，依鄭注合燒藥成，注之創中，少頃，朽骨連兩牙潰出，遂愈。」案：蘇頌所記，足證此注肉破骨出之義。以五氣養之，以五藥療之，以五味節之。既刮殺而攻盡其宿肉，乃養之也。五氣當爲「五穀」字之誤也。節，節成其藥之力。【疏】「以五氣養之」者，以下三法並四瘍所通用也，與《疾醫》云「以五味、五穀、五藥養其病」，略同。蓋治瘍之異於治疾者，惟祝藥及刮殺之齊耳；其養治之法則不異也。注云「既刮殺而

攻盡其宿肉，乃養之也」者，賈疏述注，「攻」下有「之」字，疑今本誤脫。刮殺者，去其惡肉；養之者，長其新肉也。此以五藥療之，亦長新肉之事。療瘍之五藥，卽《疾醫》之五藥，非上文攻瘍之五毒也。賈疏謂此文重言五藥者，爲下五味節成此藥，故須更言五藥，則似攻療爲一事，失之。云「五氣當爲五穀，字之誤也」者，據《疾醫》校也。惠棟云：「《說文》『饋客芻米曰氣』。氣本餽字。經傳無五氣之文。《內經·藏氣法時論》云：『五穀爲養，五果爲助，五菜爲充。』故鄭據此五氣當爲五穀。」案：惠說是申鄭讀。惠士奇、呂飛鵬並據《素問·六節藏象論》云「天食人以五氣」，

謂五氣即五行之氣，不必改爲五穀。亦足備一義。云「節，節成其藥之力」者，鄭意蓋謂既服藥之後，更以五味節成其藥之力，則五味亦即《疾醫》注所云醢酒飴蜜薑鹽之屬，非謂五味之藥。賈謂卽下文以酸養骨之類，失之。凡藥，

以酸養骨，以辛養筋，以鹹養脈，以苦養氣，以甘養肉，以滑養竅。以類相養也。酸，木味，木根

立地中，似骨。辛，金味，金之纏合異物，似筋。鹹，水味，水之流行地中，似脉。苦，火味，火出入無形，似氣。甘，土

味，土含載四者，似肉。滑，滑石也。凡諸滑物，通利往來，似竅。【疏】「凡藥以酸養骨」者，此通論五味六和之藥。

養病所宜也。云「以滑養竅」者，吳廷華云：「醫以五行爲宗，滑又以通五行之氣。凡食醫疾醫皆然，此總發之。」案：吳說是也。此以五味增滑爲六，與上五味不相家。賈疏謂「上云以五味節之，卽此五味，欲見五味節成五藥，故藥味合言。」非經義。注云「以類相養也」者，賈疏云：

「謂若酸與骨、辛與筋之類是也。」云「酸，木味，木根立地中，似骨」者，《白虎通義·五行篇》云：「木味所以酸何？東方萬物之生也，酸者以達生也，猶五味得酸乃達也。」《淮南子·時則訓》「其味酸」，高注云：「酸之言鑽也，萬物鑽

地而生。《管子·四時篇》云：「風生木爲骨。」尹注云：「骨亦木之類也。」賈疏云：「酸木味之等，並依《洪範》及《月令》爲說也。木立地中似骨者，謂似人之骨立肉中者，故以酸養之。」云「辛，金味，金之纏合異物，似筋」者，《白

虎通義·五行篇》云：「金味所以辛何？西方煞傷成物

辛，辛所以煞傷之也，猶五味得辛乃委煞也。」《說文·辛

部》云：「辛，秋時萬物成而孰，金剛味辛，辛痛卽泣出。」賈

疏云：「人之筋亦纏合諸骨，故云似筋而以辛養之也。」云

「鹹，水味，水之流行地中，似脉」者，《說文·辰部》云：「𩇑，

血理分袞行體中者。重文脈，𩇑或从肉。」脉卽脈之俗。

《白虎通義·五行篇》云：「水味所以鹹何？是其性也。

所以北方鹹者，萬物鹹與所以堅之也，猶五味得鹹乃堅

也。」《素問·陰陽應象大論》云：「水生鹹。」《管子·水地

篇》云：「水者，地之血氣，如筋脈之通流者也。」尹注云：

「分流地上若脈也。」云「苦，火味，火出入無形，似氣」者，

《白虎通義·五行篇》云：「火味所以苦何？南方主長養，

苦者所以長養也，猶五味須苦可以養也。」《素問·五運行

大論》云：「火生苦。」云「甘，土味，土含載四者，似肉」者，

《白虎通義·五行篇》云：「土味所以甘何？中央者，中和

也，故甘，猶五味以甘爲主也。」《素問·陰陽應象大論》王

注云：「物之味甘者，皆土氣之所生也。」《春秋經傳集解》：「循天之道篇」云：「甘者，中央之味也。」又《五行之義篇》云：

「甘者，五味之本也。」《淮南子·原道訓》云：「味者，甘立而五味亭矣。」《五行大義》引《元命苞》云：「甘者，食常言安其味也。甘味爲五味之主，猶土之和成於四行也。」賈疏云：「金木水火，非土不載，故云含載四者，似人之肉，亦含載筋骨氣脈，故以甘養之也。」案：此經辨諸味所養，與古醫家言不相應，未審其義。鄭、賈以象類釋之，亦無當癰疾之用，殆非其本旨。今以古醫經校之，當是此經文有譌互。蓋以酸養骨，骨當作氣；以苦養氣，氣又當作骨。馬總《意林》引《公孫尼子》云：「多食甘者，有益於肉，而骨不利。多食苦者，有益於骨，而筋不利。多食辛者，有益於筋，而氣不利。」彼言甘益肉，辛益筋，與此以甘養肉，以辛養筋正同。而言苦有益於骨，足證以苦養氣，當作以苦養骨。苦既以養骨，則酸當以養氣又可知矣。《素問·六節藏象論》云：「肺者氣之本。」《宣明五氣論》云：「心主脈，肝主筋，脾主肉，腎主骨。」《藏氣法時篇》云：「肝用辛補之，酸寫之；心用鹹補之，甘寫之；脾用甘補之，苦寫之；肺用酸補之，辛寫之；腎用苦補之，鹹寫之。」蓋此經凡言養者，皆謂補其本。《素問》以酸補肺，卽此以酸養氣也；以辛補肝，

卽此以辛養筋也；以鹹補心，卽此以鹹養脈也；以苦補腎，卽此以苦養骨也。《內經》諸文，皆此經之塙帖。自漢以後，經文氣骨二字互易，鄭賈皆緣誤爲釋，遂不可通。要之醫癰之術，古今不易，不可誣也。至《素問·宣明五氣論》，說五味所禁，又云：「辛走氣，氣病無多食辛；鹹走血，血病無多食鹹；苦走骨，骨病無多食苦；甘走肉，肉病無多食甘；酸走筋，筋病無多食酸。」《五藏生成篇》說略同。彼云五味所走，與此經所養義亦相合。而以所走之味多食爲禁者，蓋節其太過，卽《藏氣法時篇》補寫異用之義，與此經文異而理實通也。云「滑，滑石也」者，《神農本草經》云：「滑石味甘寒，主身熱洩瀉，女子乳難癰閉，利小便，蕩胃中積聚寒熱，益精氣，久服輕身，耐飢，長年。」賈疏云：「以五味酸苦辛鹹甘，養骨筋氣脈與肉，相配訖，前《食醫》云「調以滑甘」。平常服食，五味之外有滑，彼滑用堇荳粉榆。今此養病，五味之外亦宜有滑，但於藥分之中慎滑，則不得如平常用堇荳等，故以滑石解之。」云「凡諸滑物，通利往來，似竅」者，《本草》、《名醫別錄》云：「滑石通九竅六腑津液，去留結，令人利中。」是通利往來之藥，故可以養竅。然鄭云諸滑物，似通芼菜之滑而言，以其品類衆多而性味大同，義得兼含也。凡有瘍者，受其藥焉。

【疏】「凡有瘍者，受其藥焉」者，賈疏云：「卽上五藥是也。凡國中有瘍，不須身來者，並於瘍醫取藥焉。」案：此藥亦當兼祝藥及刮殺之藥等言之，賈說未咳。

獸醫掌療獸病，療獸瘍。

畜獸之疾病及瘍，

療同醫。【疏】注云「畜獸之疾病及瘍療同醫」者，賈疏云：「以上之人疾與瘍別醫，今此畜病之與瘍同在一醫者，重人賤畜，故略同在一醫也。此醫唯療家畜，不療野獸。但畜獸義通，今以畜解獸，故畜獸連言之也。」凡療獸病，灌而行之以節之，以動其氣，觀其所發而養之。療畜獸必灌行之者，爲其病狀難知，灌以緩之，且強其氣也。節，趨聚之節也。氣謂脉氣，既行之，乃以脉視之，以知所病。【疏】注云「療畜獸必灌行之者，爲其病狀難知，灌以緩之，且強其氣也」者，《投壺》注云：「灌猶飲也。」謂先灌藥以緩其病，使不至增劇，可以徐察其狀也。賈疏云：「爲其病狀難知，故先灌而和緩之，以其瘦弱，且強其氣力也。」吳廷華云：「灌藥必須行之，卽所謂行藥也。又恐其弱，故又緩以強之。蓋行則氣動，病之所發，惟動乃見，故得觀而養之。」云「節，趨聚之節也」者，《釋文》

云：「聚，本亦作驟。」案：聚卽驟之省。《大司馬》云：「車驟徒趨。」《說文·馬部》云：「驟，馬疾步也。」趨驟之節，謂或緩或急，依節更迭行之，以動其氣也。云「氣謂脉氣者，謂血脉之氣發於外者。」《左》僖十五年傳，慶鄭說小駟云「亂氣狡憤，陰血周作，張脉憤興，外彊中乾」，所謂脉氣也。云「既行之，乃以脉視之，以知所病」者，謂既適其趨聚之節，而脉氣外發，參諗之，乃知其病之所在也。凡療獸瘍，灌而劑之，以發其惡，然後藥之，養之，食之。亦先攻之而後養之。【疏】然後藥之，養之，食之者，藥之卽以瘍醫之祝藥附著之也。注云「亦先攻之而後養之」者，賈疏云：「亦上瘍醫以五穀養之養。彼注先刮殺盡乃養之，此亦然。」凡獸之有病者，有瘍者，使療之，死則計其數，以進退之。【疏】「凡獸之有病者有瘍者使療之」者，謂醫師使獸醫療之也。云「死則計其數以進退之」者，獸醫之官計也。賈疏云：「上《醫師》云十全爲上者，唯據疾醫與瘍醫，不據獸醫，故此云計其數而進退之。進退亦謂據功過進退其祿也。」詒讓案：此進退卽據醫師進退獸醫下士四人而言，猶司士稽士任而進退其爵祿也。獸醫之下，亦當有散醫，無員數，則

亦當稽其事，而以醫師五等制食之法，進退其食。此經止言進退醫官而不及制散醫之食；《醫師》則唯言制散醫之食而不及進退醫官之事，皆互文以見義。

酒正掌酒之政令，以式灋授酒材。式法，

作酒之法式。作酒既有米麴之數，又有功沽之巧。《月令》曰：「乃命大酋，秫稻必齊，麴蘖必時，湛醴必絮，水泉必香，陶器必良，火齊必得。」鄭司農云：「授酒材，授酒人以其材。」【疏】「掌酒之政令」者，謂作酒及共授之政令。此官不掌酒禁，以酒禁別有萍氏掌之也。賈疏云：「酒正辨四飲，則漿之政令亦掌之。今直言掌酒之政令不言漿之政令者，但據酒之尊者而言，其實漿亦掌之。」云「以式法授酒材」者，賈疏云：「酒材即米麴蘖，授與酒人，使酒人造酒。既言兼掌漿人，則漿之法式及漿材亦授之。不言者，亦舉尊言也。」注云「式法，作酒之法式」者，此亦注用今字作「法」也。作酒法式即後文之酒式。《大宰》九式有羞服之式，此酒式蓋又羞式中的一端與？云「作酒既有米麴之數，又有功沽之巧」者，《說文·米部》云：「蘗，酒母也。」麴即蘗之俗。凡造酒爲麴，所用米不同。《聘禮》注云「凡酒，

稻爲上，黍次之，粱次之」是也。又用米多少，亦有劑數。《漢書·平當傳》如淳注引《漢律》云：「稻米一斗，得酒一斗，爲上尊；稷米一斗，得酒一斗，爲中尊；粟米一斗，得酒一斗，爲下尊。」是也。功沽者，猶後注云作酒之善惡。

《司兵》注云：「等，謂功沽上下。」義與此同。《國語·齊語》云：「辨其功苦。」《管子·小匡篇》及《荀子·王制篇》，亦並有功苦之語。苦與沽亦聲類同。蓋凡器物飲食之精者並謂之功，粗者並謂之沽。作酒之法同，而作之則有詳略久速，故亦有功沽之巧，二者並法式所該也。引《月令》者，《仲冬令》文。彼文饅作「熾」。鄭彼注云：「酒孰曰酋。大酋者，酒官之長也。於周則爲酒人。秫稻必齊，謂孰成也。湛，漬也。熾，炊也。火齊，腥孰之調也。古者穫稻而漬米麴，至春而爲酒。」案：《月令》注以大酋爲酒人，與此注異，當以此注爲正。彼大酋爲酒官之長，此酒正亦與酒人，漿人爲長，正與彼相應，故此注引彼文爲釋。彼注蓋偶通長屬言之，未及別白耳。《呂氏春秋·仲冬紀》高注亦云：「大酋，主酒官也。酋，醞米麴，使之化熟，故謂之酋，於《周禮》爲酒正。」亦與此注義同。《月令》孔疏乃云「酒正掌酒之政令及酒出入之事，不親監作，此大酋監作，故爲酒人」，欲以調停鄭兩注之差互，非也。鄭司農云「授酒材，授

酒人以其材「者，嫌酒正自授其所屬胥徒等，故特釋之。

凡爲公酒者亦如之。謂鄉射飲酒以公事作酒者，亦

以式法及酒材授之，使自釀之。【疏】注云「謂鄉射飲酒以

公事作酒者」者，《牛人》注云：「公猶官也。」此與《閭人》

「公器」，《牛人》「公牛」，《巾車》「公車」，《馭夫》「公馬」義

同，謂爲官所作之酒也。賈疏云：「謂鄉飲酒、鄉射飲酒。

鄉飲酒中，有黨正飲酒，賓賢能飲酒。鄉射飲酒中，有州長

春秋習射於序，又有鄉大夫三年賓賢能後，以五物詢衆庶，

用州長射禮，並是鄉射飲酒。此數事者，皆爲國行禮，不可

橫斂於民，故得公酒。其百家爲族，不得公酒，族祭步神之

時，合錢飲酒。」吳廷華云：「此亦有祭祀之酒。」云「亦以式

法及酒材授之，使自釀之」者，明此不授酒人，但授其鄉之

有司，使自釀之也。辨五齊之名，一曰泛齊，二

曰醴齊，三曰盎齊，四曰緹齊，五曰沈齊。泛

者，成而滓浮泛泛然，如今宜成醪矣。醴猶體也，成而汁滓

相將，如今恬酒矣。盎猶翁也，成而翁翁然，葱白色，如今

酇白矣。緹者，成而紅赤，如今下酒矣。沈者，成而滓沈，

如今造清矣。自醴以上尤濁，縮酌者。盎以下差清。其象

類則然，古之法式，未可盡聞。杜子春讀齊皆爲粢。又《禮

器》曰：「緹酒之用，玄酒之尚。」玄謂齊者，每有祭祀，以度量節作之。【疏】「辨五齊之名」者，五齊有滓未泚之酒也。

注云「泛者，成而滓浮泛泛然」者，《釋名·釋飲食》

云：「汎齊，浮蟻在上，汎汎然也。」《說文·水部》云：「泛，

浮也。汎，浮兒。」二字音義相近。《郊特牲》「明水汎齊」。

注云：「汎齊，或爲汎齊。」《禮記釋文》亦云：「汎，本又作

泛，同。」《說文·米部》云：「槽，酒滓也。」成而滓浮，謂酒

孰而糟上浮。又謂之醴，《說文·西部》云：「醴，泛齊，行酒

也。」行酒蓋謂薄酒。《九章算術·盈不足篇》云：「醇酒一

斗直錢五十，行酒一斗直錢一十。」泛齊味薄，故謂之行酒。

醴又疑卽《內則》之濫，互詳《漿人》疏。云「如今宜成醪矣」

者，賈疏云：「宜成，說以爲地名，故曹植《酒賦》曰：「宜成

醴，蒼梧縹清。」若馬融所云「今之宜成，會稽稻米，清似

宜成」，以爲酒名。故劉沔《要雅》亦以宜成爲酒名。二者

未知孰是。今鄭云宜成醪矣，亦未知鄭意酒名地名。類下

酇白，則爲地名。王聘珍云：「《釋名·釋飲食》云：「酒言

宜成醪，蒼梧清之屬。」《文選·七命》李注引張華《輕薄篇》

云：「蒼梧竹葉青，宜城九醞醪。」據此則宜城之爲地名無

疑。《續漢書·郡國志》南郡有宜城侯國。」丁晏云：「《初

杜根傳：「爲宜城山中酒家保」。李賢注：「宜城縣故城，在今襄州率道縣南，其地出美酒。」今湖廣襄陽府宜城縣。」林頤山云：「《漢·地理志》，濟南郡有宜成。《續漢志》已省。宜城醪當出南郡宜城也。《文選》張平子《南都賦》：「酒則醪敷徑寸，浮蟻若萍。」醪酒有滓浮在上，與泛齊同，故舉以相況。」案：王、丁、林說是也。樂史《太平寰宇記》云：「山南東道襄州宜城出美酒，俗號爲竹葉杯。」《北堂書鈔·酒部》引傅玄《七謨》云「甘醪貢於宜城」。又《酒賦》云「比蒼梧與宜城」。字並作城，可證。《釋名》與此注並作「成」，蓋偶用省段字也。《說文·西部》云：「醪，汁滓酒也。」《御覽·飲食部》引《禮記外傳》云：「泛齊，俗爲白醪。」《齊民要術》引《食經》，有作白醪法，以秫米與麴合作之，云「酒甘如乳」，則泛齊與醪齊，同爲恬酒，但稍濁耳。云「醪猶體也，成而汁滓相將」者，謂醪之不滓者，汁與糟相將未分，故《禮》酌醪必用枲。若滓而去其糟，則別爲醴清，人四飲內，不爲齊也。《說文·西部》云：「醴，酒一宿孰也。」《釋名·釋飲食》云：「醴齊，醴，體也，釀之一宿而成，體有酒味而已也。」許、劉言醴成之速，鄭言醴成之濁，各舉一端，義不異也。《御覽·飲食部》引《禮記外傳》云：「醴齊，汁滓相將，同一體也。」即本鄭義。《呂氏春秋·重己篇》高注云：

「醴以釀與黍相體，不以麴也。」高氏似亦釋醴爲體，而云以釀與黍作之。《山海經·中山經》云：「其祠釀醴。」郭注亦云「以釀作醴」。《韓詩》及《漢書》顏注則謂醴，少麴多米，與高說不同，未知孰是。云「如今恬酒矣」者，恬即恬之借字，《鹽人》注亦以恬爲恬。舊本《北堂書鈔·酒食部》引《韓詩》云：「恬而不滓，少麴多米曰醴。」《漢書·楚元王傳》顏注云：「醴，甘酒也。少麴多米，一宿而孰，不齊之。」《呂氏春秋》高注亦云「醴濁而恬」。賈疏云：「此醴齊，作時恬於餘齊，與酒味稍殊，故亦入於六飲。」云「益猶翁也，成而翁然葱白色」者，《釋名·釋飲食》云：「益齊，益，滄也，滄滄然濁色也。」《說文·西部》云：「醴，濁酒也。」又《水部》云：「滄，雲氣起也。決，滄也。」益翁即醴滄之借字，益與翁亦雙聲義近，猶決訓滄也。益齊，《禮運》、《禮器》並謂之醴，詳後疏。云「如今鄭白矣」者，賈疏云：「漢時蕭何所封南陽地名鄭。」《釋文》云：「鄭白即今之白醴酒也。宜作醴。作鄭，假借也。」案：《續漢書·郡國志》，鄭縣有二：一屬南陽郡，^①一屬沛國。蕭何初封在沛，其字本作酈，故《說文·邑部》云：「酈，沛國縣。」今酈縣。後高

①「陽」，原脫，今據楚本補。

后封何夫人，則在南陽鄴。鄴，鄭異字異音，《續漢志》始誤爲一字。與醴同音者，自是鄴字。《史記·蕭相國世家》索隱引鄴誕生云：「鄴，屬沛郡，音嵯，屬南陽，音贊。」鄴氏雖亦以鄴爲鄴，而音則不誤。賈以此注鄴爲南陽地名，非也。依陸說，則鄴爲醴之借字，說與賈異。《御覽》引《禮記外傳》云：「盎齊今之白醴酒也。」亦與陸同。惠士奇申陸說云：「鄭讀爲醴，《廣雅·釋器》『醴，酒也』。《南史·王玄謨傳》宋孝武《四時詩》所謂白醴解冬寒也。」黃以周說同。丁晏亦云：「《玉篇·西部》：『醴，白酒也。』《一切經音義》引《通俗文》『白酒曰醴』。賈疏以鄴爲地名，非也。」案：惠、丁說是也。《北堂書鈔·酒部》引孫詵《三公山下楔賦》，亦云「九醞白醴」。據張華云「宜城九醞醴」，則白醴似亦出宜城。沛國之鄴，南陽之鄴，皆不聞出美酒，其爲聲近段借字明矣。云「緹者，成而紅赤」者，《釋名·釋飲食》云：「緹齊，色赤如緹也。」《說文·糸部》云：「緹，帛丹黃色。紅，帛赤白色。」《廣雅·釋器》云：「緹，赤也。」蓋酒成而淺赤色，故謂之緹齊矣。云「如今下酒矣」者，賈疏云：「下酒謂曹床下酒，其色紅赤，故以緹名之。」惠士奇云：「《詩》『釃酒有衍』。《說文·西部》云：『釃，下酒也。』謂盞酒以筐。」汪文臺說同。案：惠、汪說是也。賈云「曹床下

酒」，曹當作糟。下酒，蓋糟床盞下之酒。緹齊於盎齊益清，故鄭以下酒爲釋。云「沈者，成而滓沈」者，《釋名·釋飲食》云：「沈齊，濁滓沈下，汁清在上也。」案：沈齊雖有滓而沈，故其酒稍清。《禮運》、《坊記》並謂之澄，《禮器》又謂之清矣。云「如今造清矣」者，《釋名》有「蒼梧清」，即造清也。惠士奇云：「《文選》張衡《南都賦》『十旬兼清』，疑卽此。」云「自醴以上尤濁，縮酌者」者，賈疏云：「言自醴以上，唯有泛齊。泛齊滓浮，則濁於醴齊，汁滓相將者。此二者皆以茅泚之，故《司尊彝》云『醴齊縮酌』。《郊特牲》云『縮酌用茅，明酌也』。謂以事酒之上清明者和醴齊，以茅泚之，使可酌。鄭彼注云泛從醴，是二者皆縮酌，故云自醴已上尤濁縮酌也。」云「盎以下差清」者，賈疏云：「案《司尊彝》云『盎齊泚酌』。鄭注：『泚，清也。』謂以清酒泚之，則不用茅，以其盎已清故也。鄭彼注又云『緹沈從盎』，^①則亦用清酒泚之。」呂飛鵬云：「五齊皆酒之濁者。後鄭謂盎以下差清，但較泛齊、醴齊爲稍清耳，其實皆濁酒也。」案：呂說是也。《淮南子·說林訓》云：「清醎之美，始於末耜。」高注云：「醎，清酒，《周禮》醎齊是。」《廣雅·釋器》

① 「彼注」，原誤作「注云」，今據賈疏改。

云：「清英，酒也。」酖，英，並與盎聲類同。鄭及高誘並以盎齊爲清，於濁齊之中爲差清也。故《郊特牲》「況齊」注云：「況猶清也。五齊濁，泆之使清，謂之況齊。」是鄭謂五齊皆濁，與許君訓醴爲濁酒，並不相牾也。云「其象類則然，古之法式未可盡聞」者，周人作五齊三酒，分齊法式，經傳無文，鄭略依其清濁象類說之，故云未可盡聞也。云「杜子春讀齊皆爲粢」者，《司尊彝》鬱齊、醴齊、盎齊，杜讀同。賈疏云：「子春意，見《禮運》云『粢醴在堂』，粢穀爲緹酒，則其餘四齊皆以粢穀爲之，故讀齊皆爲粢。」詒讓案：齊正字，粢段借字。杜轉讀齊爲粢者，蓋兼據《司尊彝》故書粢爲齍，齍粢字同也。《禮運》注云：「粢讀爲齊，聲之誤也。」後鄭說與杜正相反，故不從杜讀。孔疏云：「《爾雅》：『粢，稷也。』作酒用黍，不用稷，故粢當爲齊。」今案：杜讀齊爲粢，惟取聲類同耳，非必取以稷作酒之義，賈說不若孔說之當。云「又《禮器》曰，緹酒之用，玄酒之尚」者，賈疏述注，「又」作「云」，疑當作「又云」，今本似誤。《禮器》元文，「緹酒」實作「醴酒」。此引作緹，與彼文異。杜引之者，證此緹齊也。云「玄謂齊者，每有祭祀，以度量節作之」者，後鄭蓋讀齊與《月令》「秬稻必齊」之齊同。《司尊彝》先鄭注，讀齊爲齊和之齊，與後鄭此注正同。《亨人》注云：「齊，多

少之量。」度量即謂米糲水火之數量也。《御覽》引《禮記外傳》云：「齊者，酒人和合之分劑之名也。」劑齊字同。賈疏云：「謂祭有大小，齊有多少，謂若祫祭備五齊，禘祭備四齊，時祭備二齊，是以度量節作之。不從子春爲粢者，《禮運》唯有醴齊稱粢，於此五者皆稱齊，子春破五齊從一案，於義不可，故鄭於《禮運》注「粢當爲齊」，破一案從五齊，於義可也。此五齊與下三酒及春官鬯人所造鬯酒所以異者，五齊三酒俱用秬稻麴蘖，又三酒味厚，人所飲者也，五齊味薄，所以祭者也，是以下經鄭注云「祭祀必用五齊者，至敬不尚味而貴多品」。五齊對三酒，酒與齊異；通而言之，五齊亦曰酒，故《禮·坊記》云「醴酒在室，醴酒在堂」是也。其鬯酒者，自用黑黍爲之，與此別也。」案：賈說祫禘時祭用齊多少，本崔靈恩說，詳後及《司尊彝》疏。然賈以祭大小齊多少釋此注，則非鄭意。又賈謂五齊三酒，並秬稻所作，與《鬯人》鬯酒爲秬黍所作異，《表記》孔疏謂五齊之酒即鬯酒，以秬黍爲之，一說差異。程瑤田則據《內則》醴兼用稻粱黍三米，又《聘禮》「夫人使下大夫歸禮，醴黍清皆兩壺，明五齊非秬鬯，三酒亦不皆用秬稻」。案：程說甚塢。蓋五齊，酒人所作；秬鬯，鬯人所作。分掌二職，不可并而爲一。《司尊彝》鬱齊，亦在五齊之外，足證其非同齊。鄭

《禮》注既絕無拒鬯卽五齊之說，而前注引《月令》證作酒之事，亦非謂齊酒二者皆必用秫稻，賈、孔說並不足據。辨

三酒之物，一曰事酒，二曰昔酒，三曰清酒。

鄭司農云：「事酒，有事而飲也。昔酒，無事而飲也。清

酒，祭祀之酒。」玄謂事酒，酌有事者之酒，其酒則今之醪酒也。昔酒，今之酋久白酒，所謂舊醖者也。清酒，今中山冬

釀，接夏而成。【疏】辨三酒之物者，三酒，已泝去滓之

酒也。上五齊言名，此三酒言物，名物相將，兩文互相備

也。物卽謂酒之種別。賈疏謂「物者，材也。以三酒所成

有時，故豫給材令作之」，非也。云「一曰事酒，二曰昔酒，

三曰清酒」者，賈疏云：「此三酒並人所飲，故下云共王四

飲三酒也。但事酒酌有事人飲之，故以事上名酒也。昔酒

者，久釀乃熟，故以昔酒爲名，酌無事之人飲之。清酒者，

此酒更久於昔，故以清爲號，祭祀用之。此昔酒、清酒，皆

以酒上爲名也。《御覽·飲食部》引《禮記外傳》云：「三酒

者列於堂下，臣下相酌，酬酢之用。」吳廷華云：「三酒不第

共祭祀，如下王及后、世子、賓客、孤老、士庶子皆用之。」

注鄭司農云「事酒，有事而飲也」者，有事，謂若《特牲》、

《少牢饋食禮》凡諸執事之人，不與尸爲獻酬者也。賈疏

云：「謂於祭祀之時，乃至卑賤執事之人，祭末並得飲之。」

云「昔酒，無事而飲也」者，賈疏云：「亦於祭末，羣臣陪位

不得行事者，並得飲之。」云「清酒，祭祀之酒」者，賈疏云：

「亦於祭祀之時，賓長獻尸，尸酢賓長，不敢與王之神共器

尊，同酌齊，故酌清以自酢。故《司尊彝》云「皆有疊，諸臣

之所酢」。此三酒，皆盛於疊尊，在堂下。但此清酒受尸

酢，故以祭祀言之。」案：《禮運》孔疏引崔靈恩，謂「天子祫

禘時祭，尸酢王與后，還用所獻之齊；賓長醑尸，酢用清酒，

加爵亦用三酒」。卽賈說所本。《郊特牲》疏引崔氏，則云

「以清酒酢王，昔酒酢后」，與前說小異，《通典·吉禮》亦從

其義。孔駁之云：「案《司尊彝》云：『皆有疊，諸臣之所酢

也。』鄭注云：『酌疊以自酢，不敢與王之神靈共尊。』疊盛

三酒，唯云諸臣所酢，不言酢王酢后，崔氏所說，於義疑

也。」案：孔說深得鄭愜。但三酒所用，經本無明文，二鄭

及崔、杜，並以意推之，於經咸無塙證。先鄭之義與後鄭亦

未必盡同，其以清酒爲祭祀之酒。似謂卽獻尸之酒。而賈

以尸酢賓長釋之者，以《司尊彝》注說獻尸用五齊，不得用

三酒也。然酢賓仍是酌臣，不得獨爲祭祀。惟加爵酌尸，

或足當之耳。但此自是後鄭及崔氏之義，與先鄭意亦未知

合否。黃以周云：「清酒既爲祭祀之酒，宜崇於助祭之酒，

何爲事酒、昔酒反在祭酒之上？事酒、昔酒，《內則》謂之白酒。鄭注《聘禮》「醅黍清」云「醅，白酒也，先言醅，白酒尊」，而謂祭祀用其酒之下，不用其尊，無是禮也。然則執事之酒，雖亦用事酒、昔酒，要不得謂事酒、昔酒不用諸祭祀矣。」案：黃糾三酒尊卑差次之外迂，是也。以此經齊酒通例言之，本皆濁尊於清，後注云「至敬不尚味」是也。而依鄭此注義，則以清酒最尊，昔酒次之，事酒又次之，先鄭及賈、孔說並如是。崔靈恩說以清酒酢王，昔酒酢后，明亦以清酒尊於昔酒也。然後鄭《聘禮》注說，則又以白酒尊於清酒。鄭二《禮》注義既自不同，今亦無可質正，未敢臆定也。云「玄謂事酒，酌有事者之酒」者，賈疏云：「先鄭云『有事而飲』，據有事時飲之。後鄭云『酌有事者之酒』，謂有事之人，但是有事之人，雖不當祭時，亦酌酒與之。是就足先鄭義也。」《御覽》引《禮記外傳》云：「事酒新成者，酌飲有事，謂廟中助祭親事者也。廟中以有事者爲榮。」《釋名·釋飲食》云：「事酒，有事而釀之酒也。」案：二鄭以飲有事釋事酒，望文生訓，義本不甚塙。劉說與二鄭異，而義實長。《郊特牲》孔疏說事酒云「謂爲事而新作者」，亦與劉同。郝敬、方苞、蔣載康、黃以周並據《少牢》「宰命爲酒」，釋此事酒，義證尤塙。俞樾云：「事酒者，謂臨事而釀者

也。三酒以新舊爲次，疏謂昔酒久釀乃孰，清酒更久於昔。然則事酒最在前，其爲新酒可知矣。」云「其酒則今之醅酒也」者，《郊特牲》注亦云「事酒，今之醅酒，皆新成也」。孔疏云：「醅是和醅醞釀之名，即今卒造之酒也。」惠士奇云：「醅酒有舊有新，舊爲昔酒，則新爲事酒矣。」案：惠說是也。事酒有事而釀，則隨時可釀。但五齊不必酋醅，事酒則必待酋醅而後孰，故亦謂之醅酒，明酋醅而不甚久者也。賈疏謂事酒亦冬釀夏成，似非。云「昔酒，今之酋久白酒」者，賈疏云：「言昔爲久，酋亦遠久之義，故以漢之酋久白酒況之。但昔酒對事酒爲清，若對清酒則爲白，故云酋久白酒也。故《晉語》云「味厚實昔毒」，^①酒久則毒也。」案：鄭《郊特牲》注，以味厚腊毒，釋昔酒之義，故賈亦引《國語》爲釋，而以「腊毒」爲「昔毒」，文小異。今章本作「厚味實腊毒」，注云：「腊，亟也，讀若廟，昔酒。」《文選·七命》李注引賈逵《國語注》云：「腊，久也。」又《鄭語》云：「毒之酋腊者，其殺也滋速。」依《說文·日部》，腊即昔之籀文，其字本同，亦皆有久義，鄭、韋訓讀可互證也。《說文·酋部》云：「酋，醅酒也。」《釋名·釋飲食》云：「酒，酋也，

① 「味厚實昔毒」，見《周語》下，不見《晉語》。

釀之米麴酋澤，久而味美也。醴酒，久釀酋澤也。醴，澤，
釋，字並同。《說文》所謂醴酒，蓋兼事酒、昔酒言之，二酒
皆酋澤，但以醴之新舊爲異。《釋名》所謂醴酒，蓋專指舊
醴言之，即此注之酋久白酒也。《方言》云：「酋，熟也。自
河以北，趙魏之間，久熟曰酋。」蓋事酒酋澤而不必久，昔酒
必酋澤之久而後成，故亦謂之酋久白酒。《內則》「酒清
白」，注云：「白，事酒昔酒也。」是事酒、昔酒，並白而不清，
但昔酒酋澤較久，故獨得昔名。事酒，昔酒，《聘禮》亦謂之
醴，《士虞記》又作淩酒。《聘禮》之醴清，猶《內則》云清白
矣。云「所謂舊醴者也」者，《郊特牲》云：「猶明清與醴酒
于舊澤之酒也。」彼注云：「澤讀爲醴，舊醴之酒，謂昔酒
也。泚清酒以舊醴之酒者，爲其味厚腊毒也。」賈疏云：
「案彼上注云『明酌者，事酒之上也』。醴酒盎齊，泚於舊醴
之酒。三酒除事酒、清酒，則云舊醴，是昔酒可知也。對事
酒爲新醴，昔酒爲舊醴，清酒不得醴名。」云「清酒，今中山
冬釀接夏而成」者，清酒，酋澤之尤久者也。《北堂書鈔·
酒部》引《袁子正論》云：「中山清醴。」《說文·酉部》云：
「釀，醢也。作酒曰釀。」賈疏云：「以昔酒爲久，冬釀接春，
明此清酒久於昔酒，自然接夏也。中山，郡名，故《魏都賦》
云：『醇酎中山，沈湎千日。』」丁晏云：「《文選·魏都賦》

劉涓子注：「中山出好酎酒。」《初學記·酒類》引晉張載
《鄴酒賦》「中山冬啟，醇酎秋發」，即鄭所云中山冬釀也。
詒讓案：統校經注，凡齊酒，並濁者成速，清者成遲。五齊
最濁，成最速，故《說文》以醴爲一宿孰。三酒之中，事酒較
濁，亦隨時釀之，酋澤即孰。昔酒較清，則冬釀春孰。清酒
尤清，則冬釀夏孰。《月令》命大酋爲酒，在仲冬。鄭彼注
云：「古者穫稻而漬米麴，至春而爲酒。」又別引《王居明堂
禮》云：「季冬命國爲酒，以合三族。」《逸禮》與記文相較一
月，其爲冬釀一也。《詩·豳風·七月》云：「十月穫稻，爲
此春酒。」毛傳云：「春酒，凍醪也。」孔疏以爲凍時釀之，故
稱凍醪。又謂即此注所謂中山冬釀。然依鄭義，則冬釀春
成，是爲春酒，即三酒之昔酒，此清酒接夏乃成，則更久於
春酒。孔疏謂春酒即中山冬釀，非也。又《月令·孟夏》云
「天子飲酎」，注云：「酎之言醇也，謂重釀之酒也，春酒至
此始成。」彼酎酒以春酒重釀之，故夏成；此清酒夏成，非
重釀，與彼亦異。辨四飲之物，一曰清，二曰醫，
三曰漿，四曰醕。清，謂醴之泚者。醫，《內則》所謂
或以醕爲醴。凡醴濁，釀醕爲之，則少清矣。醫之字，從毌
從西省也。漿，今之載漿也。醕，今之粥。《內則》有黍醕。
醕飲，粥稀者之清也。鄭司農說以《內則》曰「飲重醴，稻醴

清酒，黍醴清酒，梁醴清酒，或以醴爲醴，漿、水、臆」。后致飲于賓客之醴，有醫醴糟。糟音聲與酒相似，醫與臆亦相似，文字不同，記之者各異耳，此皆一物。【疏】「辨四飲之物」者，賈疏云：「案《漿人》有六飲，此言四者，以《漿人》注「酒正不辨水涼者，無厚薄之齊」，故此唯辨四飲之物也。」

注云「清謂醴之泚者」者，以別於五齊之醴爲汁滓相將不泚者也。凡泚，皆謂去其滓。《士冠禮》云：「凡醴，事質者用糟，文者用清。」賈疏云：「此鄭據《漿人》解之。《漿人》云醴，此云清，故云清謂醴之泚者。」江永云：「醴有清有糟，而四飲惟有清者，蓋糟醴與醴齊同，已於五齊中辨之也。」云「醫，《內則》所謂或以醴爲醴」者，彼注云「釀粥爲醴」。江永云：「今時北方造黃酒之法，先煮黃米爲粥，乃入麴蘖釀之成酒，正與《內則》注合。此惟黃米可釀粥，而秫稻則否。黃米蓋卽古之黃粱。又《內則》重醴中亦有粱醴。蓋炊飯而釀者爲醴，煮粥而釀者以醴爲醴也。」云「凡醴濁釀，醴爲之則少清矣」者，明醫雖亦是醴，而清濁小異。凡醴濁，必泚之乃清；若以醴爲醴，則雖不泚，亦少清於醴，以醴本含水多也。然鄭云少清，則醫之糟者，雖清於未泚之醴齊，而校之已泚之醴清則仍少濁也。云「醫之字，從毌從酉省也」者，《釋文》云：「從毌，烏兮反。徐烏例反。」

本或作毌。臧琳云：「醫字正從毌從酉，不當言從酉省。考賈疏云「從毌省者去羽，從酉省者去水」；則賈疏本作「從毌從酉省也」。《釋文》音烏兮反，蓋已誤作毌。或作毌，卽醫之俗字。徐仙民音烏例反，當作蔽毌之毌，與賈疏本同。今賈疏亦作「從醫從酉」，幸有去羽去水之言可考也。《說文·西部》云：「醫，治病工也。毌，惡姿也。醫之性然，得酒而使，从酉。王育說。一曰毌，病聲，酒所以治病也。《周禮》有醫酒。」據《說文》則毌爲病容，一曰病聲，皆取會意，不從毌省。而鄭云從毌省者，鄭以醫爲諧聲字。凡醴釀醴醇等字皆從酉，酉卽酒也。《說文》醫下云「从酉，醫之性得酒而使」，又云「酒所以治病也」，亦以酉爲酒。鄭云從酉省，則凡從酉字，皆因省從酉，是酉酒不同矣。惠棟云：「文當云：从毌从酉省。」段玉裁亦改酉爲酒，云：「鄭意此字俗用爲醫藥字，而其字上從毌，下從酉省，則四飲之一，乃此字本義也。鄭不言從酉省毌聲者，毌緊字在古音脂微齊皆灰部，醫字古音在之哈部，與《內則》臆字同物同音。」案：惠、段說是也。臧氏謂徐音及賈疏本並作「從毌從酉省」，^①亦足正今本之誤。然徐、賈所見，仍是晉宋

① 「酒」，原訛「羽」，據上文義改。

以後之誤本，非鄭君之舊。又案：後鄭言此者，取醫於文從酒省，證其爲酒醴之屬耳。許引此經云醫酒，則亦以醫爲酒醴，《玉藻》五飲之酒卽此。《素問》有《湯液醪醴論篇》，醫酒卽醪醴，與湯液異。五齊三酒，皆可治病，四飲之醫，雖亦名醫酒，然治病之酒，實不必專用醫也。云「漿今之載漿也」者，鄭《內則》注亦云「漿，酢載」。《說文·水部》「漿，《西部》載，並云「酢漿也」。漿卽漿之正字。《釋名·釋飲食》云：「漿，將也，飲之寒溫多少，與體相將順也。」《廣雅·釋詁》云：「酪，載，醪，漿也。」案：漿載同物，彙言之則曰載漿，蓋亦釀糟爲之，但味微酢耳。《內則》又有醴，注以爲梅漿，蓋亦載漿之別，此漿內通含之矣。賈疏云：「此漿亦是酒類，載之言載，米汁相載，漢時名爲載漿也。」云「醴，今之粥，《內則》有黍醴，醴飲，粥稀者之清也」者，《說文·西部》云：「醴，黍酒也。一曰𩚑也。賈侍中說醴爲鬻清。」許所云黍酒，蓋卽《內則》之以醴爲醴。鄭以爲四飲之醫，賈侍中云「醴爲粥清」，則卽此四飲之醴，賈說與鄭同也。云「鄭司農說以《內則》曰，飲重醴，稻醴清，黍醴清，粱醴清，或以醴爲醴，漿、水、臛者，舊本「臛」作「醴」，宋建陽本、注疏本並作「臛」。《釋文》云：「臛，本又作醴。」案：建本與陸合，今從之。《內則》「蒹」並作「糟」，「臛」亦作

「臛」。鄭彼注云：「重，陪也。糟，醇也。清，沛也。致飲有醇者，有沛者，陪設之也。水，清新。臛，梅漿。」案：二鄭說諸飲，並以此經及《內則》參校爲說，而義各異。後鄭以彼三醴當此經之清及《漿人》之醴，彼醴醴當此經之醫，而彼之臛則卽此經漿之屬。先鄭則以彼醴醴與三醴，同當此經之清，而以彼之臛當此經之醫，並與後鄭義異。惟謂彼黍醴與漿，卽此經之漿與醴，水卽《漿人》之水，則與後鄭說同。《內則》又有濫，後鄭以當六飲之涼，此先鄭不引之，疑亦同後鄭說矣。云「后致飲于賓客之禮有醫醴糟」者，于，注例當作「於」，各本並誤。先鄭據此經下文，明與《內則》臛蒹，物同而字異也。云「糟音聲與蒹相似，醫與臛亦相似」者，臛，舊本亦作「醴」，今從注疏本。段玉裁云：「今《內則》「蒹」作「糟」，疑是用《周禮》改也。」^①司農云「糟音聲與蒹相似」。謂之相似，則非一字也。蒹之本義，當是艸類，從艸酒聲，故沈重音子由反。糟，曹聲，古讀如拏。同在尤幽部。糟是正字，蒹是假借字。又云醫與臛音聲亦相似，蓋同在之哈部，今本《內則》作臛者，俗製也。」江永云：「先鄭以臛釋醫，別爲一義，未確。下言后夫人致禮，醫亦

① 「是用」，原作「用是」，據楚本改。

有糟，醴爲梅漿，安得有糟乎！」案：江說是也。《內則》八珍，食漬以醴若醴醴，則醴爲醴類明矣。故後鄭彼注以爲梅漿，此注則以醫與醴醴是一，皆不從司農說也。云「文字不同，記之者各異耳，此皆一物」者，謂《內則》之糟，與下文糟爲一物，臆與此醫爲一物，依後鄭說，則糟糟同物，而臆醫不同物。此引之者，廣異義也。掌其厚薄之齊，

以共王之四飲三酒之饌，及后、世子之飲與其酒。后、世子不言饌，其饋食不必具設之。五齊正用

醴爲飲者，取醴恬與酒味異也。其餘四齊，味皆似酒。

【疏】「掌其厚薄之齊，以共王之四飲三酒之饌」者，賈疏云：「從五齊已下，非酒正所造，並是酒人、漿人所作，故直辨其厚薄之齊。饌者，謂饌陳具設之也。」注云「后、世子不言饌，其饋食不必具設之」者，《說文·食部》云：「饗，具食也。重文饌，饗或从巽。」是物具爲饌。此王饋食，主於備品物，具設四飲三酒，故云饌。后、世子則不具設，故不云饌也。云「五齊正用醴爲飲者，取醴恬與酒味異也」

者，明經不云共五齊，以漿人體入六飲，亦卽上四飲之清，餘四齊皆非常飲所用也。凡酒以苦爲正，故《疾醫》注以酒屬五味之苦。醴則濁而味恬，與它酒異，故於五齊之中，特

取此備六飲之一也。云「其餘四齊味皆似酒」者，賈疏云：

「三酒味厚，五齊味薄，故言似酒。醴恬，全與酒味別也。」

凡祭祀，以灋共五齊三酒，以實八尊。大祭

三貳，中祭再貳，小祭壹貳，皆有酌數。唯

齊酒不貳，皆有器量。酌，器，所用注尊中者，數量

之多少未聞。鄭司農云：「三貳，三益副之也。大祭天地，

中祭宗廟，小祭五祀。齊酒不貳，爲尊者質，不敢副益也。」

杜子春云：「齊酒不貳，謂五齊以祭不益也。其三酒，人所

飲者，益也。《弟子職》曰：「周旋而貳，唯謙之視。」玄謂

大祭者，王服大裘、袞冕所祭也。中祭者，王服鷩冕、毳冕

所祭也。小祭者，王服希冕、玄冕所祭也。三貳再貳一貳

者，謂就三酒之尊而益之也。《禮運》曰：「玄酒在室，醴醑

在戶，粢醴在堂，澄酒在下。」澄酒是三酒也。益之者，以飲

諸臣，若今常滿尊也。祭祀必用五齊者，至敬不尚味，而貴

多品。【疏】「凡祭祀以灋共五齊三酒」者，亦酒正之官法

也。賈疏云：「謂天地及宗廟等總目之言。但祭有大小，

齊有多少，各有常法。」云「以實八尊」者，五齊則盛以六尊，

三酒則盛以疊尊，各隨其事而用之也。賈疏云：「五齊五

尊，三酒三尊，此除明水、玄酒。若五齊加明水，三酒加玄

酒，此八尊爲十六尊。不言之者，舉其正尊而言也。」《禮運》孔疏云：「周禮，大禘於大廟，則備五齊三酒。大禘則用四齊三酒者，醴齊以下悉用之，故《禮運》云「玄酒在室，醴醑在戶，粢醑在堂，澄酒在下」。四時之祭，唯二齊三酒，則自禘以下至四時祭，皆通用也。二齊，醴、盎也，故鄭注《司尊彝》「四時祭法」，但云醴盎而已。其禘祭之法，既備五齊三酒，以實八尊。禘祭在秋。案《司尊彝》，秋嘗冬烝，朝獻用兩著尊，饋獻用兩壺尊。則泛齊、醴齊各以著尊盛之，盎齊、醴齊、沈齊各以壺尊盛之，凡五尊也。又五齊各有明水之尊，凡十尊也。三酒三尊，各加玄酒，凡六尊也。通烝彝盛明水，黃彝盛鬱鬯，凡有十八尊，故崔氏云：「大禘祭凡十八尊。」案：依崔、孔義，則大禘十八尊，大禘十六尊，時祭十二尊。《司尊彝》賈疏說，亦同。此云實八尊者，以崔、孔所推大禘禮言之，則一著尊盛泛齊，一著尊盛醴齊，一壺尊盛盎齊，一壺尊盛醴齊，以上四尊，皆陳於堂上。一壺尊盛沈齊，一壺尊盛事酒，一壺尊盛昔酒，一壺尊盛清酒，以上四尊，皆陳於堂下。此並據五齊三酒之正尊言之，不數鬱鬯及明水、玄酒等尊也。又案鄭《司尊彝》注，謂大禘備五齊，崔靈恩推之以爲禘用四齊，時祭用二齊。賈前疏及《郊特牲》疏引皇侃說，《禮運》疏說並同。江永則

云：「凡祭祀，酒正以法共五齊三酒，以實八尊」。通言之，非一祭中具備也。觀《司尊彝》六尊不並用，可見漢儒謂禘大於禘，故疏家云「禘備五齊，禘備四齊」，此以意言之耳。《禮運》諸篇，雜陳天子諸侯宗廟之祭，未有及泛齊者，則泛齊唯用之祀天地。」案：江謂禘亦不得備五齊，與鄭義不同，以《司尊彝》六尊不並用推之，似亦可通。然經無明文，未敢定也。互詳《司尊彝》疏。云「大祭三貳」者，賈疏云：「就三酒人所飲者，三度副益之。」云「中祭再貳，小祭壹貳」者，經例凡列次分別數，曰一曰二，積參增益數，曰壹曰再。中祭小祭禮殺，獻酬數校少，故正酌之外，止再度壹度益之也。云「皆有酌數」者，賈疏云：「謂三酒之祭，副益等尊，皆有酌器盛酒。益尊數者，謂多少之數。」注云「酌，器，所用注尊中者」者，《說文·西部》云：「酌，盛酒行觴也。」凌廷堪云：「凡斟酒之器曰勺。《士冠禮》注：「勺，尊斗，所以斟酒也。」考《鄉飲酒》，兩壺加二勺；《鄉射》，兩壺，左玄酒，皆加勺；《大射》，方壺膳尊，亦云加勺。《特牲饋食記》，兩壺加勺；《士冠禮》，醢用酒，尊亦加勺。蓋酒在尊中，必以勺斟之，然後實於爵也。《士冠禮》，側尊一甌醴，有篚，實勺觶角柶；《士虞禮》，兩甌醴酒，加勺。是醴亦用勺也。」詒讓案：此酌，即《梓人》之勺。凡斟酒以

注之尊，斟尊以注之爵，皆用勺，故《說文·勺部》云：「勺，挹取也。」勺以酌酒，則亦通謂之酌，故《楚辭·招魂》王注云：「酌，酒斗也。」此三酒與五齊，雖有貳不貳之異，而其用勺注尊則同。經於酒言酌，於齊言器者，互文見義也。云「數量之多少未聞」者，酌數，若《士昏禮》酌玄酒三屬於尊之類。《梓人》云「勺一升」，即其容量。而鄭云未聞者，謂初注尊及後貳益，酌數量數皆未聞。酒言數，齊言量，亦互文也。鄭司農云「三貳，三益副之也」者，《說文·貝部》云：「貳，副益也。」《王制》「七十貳膳」，注云：「貳，副也。」《文選》張衡《西京賦》「膳夫馳騎，察貳廉空」，薛綜注云：「貳爲兼重也。」賈疏云：「先鄭之意，注酒於尊中爲副，子春、後鄭亦與之同。」案：賈說是也。杜及二鄭並以加益訓貳，副貳義亦同也。其備加益，亦別有尊。故《易·坎》六四云「樽酒簋二」，李鼎祚《集解》引虞翻云：「貳，副也。禮有副樽。」虞所說副樽，即備加益之尊。《韓詩外傳》：「范昭謂齊景公曰：願君之倅樽以爲壽。」倅尊亦即副尊也。然此經三貳、再貳、壹貳，自是就正尊加益之數，與副尊不相涉也。云「大祭天地」者，《肆師》「立大祀，用玉帛牲牲。立次祀，用牲幣。立小祀，用牲」。先鄭彼注云：「大祀天地，次祀日月星辰，小祀司命已下。」依彼注義，則先鄭謂天

神亦分三等。此天地在大祭中，則專指圜丘、方丘、南北郊及五帝而言，非謂天神並爲大祭也。後鄭說同。《通典·吉禮》引崔靈恩說，圜丘用五齊，餘感帝、迎氣、神州等，並自醴齊而下四齊而已。案：依崔說，則唯圜丘備八尊，與大禘同；其南北郊、迎氣等，並與大禘同，不得備八尊。方丘，崔無說，當亦同圜丘備八尊。蓋二丘與大禘尊數相等，二郊與大禘尊數亦相等，但無二彝爲異也。云「中祭宗廟」者，先鄭意宗廟人鬼，先王先公，並爲中祭。後鄭則以先王爲大祭，先公爲中祭，與先鄭異。云「小祭五祀者」，《大宗伯》「地而之五祀也」。後鄭說亦同。云「齊酒不貳，爲尊者質，不敢副益也」者，齊酒，尸所飲，主於尊神，故尚質不副益也。賈疏云：「以其主獻尸，所用少，故不副益。」杜子春云「齊酒不貳，謂五齊以祭不益也，其三酒人所飲者益也」者，說亦與先鄭同。三酒人所飲，主於文，故有三益、再益、一益之差。引《弟子職》曰「周旋而貳，唯嫌之視」者，證貳爲副益之義。《漢書·藝文志》，《弟子職》一篇在《孝經》家。今在《管子》第五十九篇。彼文云：「左執虛豆，右執挾匕，周還而貳，唯嫌之視，同嫌以齒，周則有始。」尹知章注云：「貳謂再益。食盡曰嫌。」周還，此引作周旋，字通。彼文本以益食爲貳，與此經益酒爲貳義同。賈疏謂彼周旋

而貳亦爲副益酒尊，失之。云「玄謂大祭者，王服大裘，衾冕所祭也」者，賈疏云：「已下至玄冕所祭，並據《司服》六冕差之。冕服有六，天地宗廟各有三等，故以六冕配之。按《司服》，王祀昊天上帝，則服大裘而冕，祀五帝亦如之，祀先王則衾冕，祭地亦用大裘，是天地宗廟皆有大祭，一也。」云「中祭者，王服鷩冕、毳冕所祭也」者，賈疏云：「案《司服》，先公則鷩冕，四望山川則毳冕，是地與宗廟次祭，二也。但天之次祀不見衣服者，日月是天之次祀，以其大報天，主日，配以月，服大裘；春分朝日，秋分夕月，兼服玄冕，故天之次祀中不見衣服。」詒讓案：後鄭《肆師》注，以大祀爲天地、宗廟，中祀爲日月、星辰、社稷、五祀、五嶽，則大祀有先公，中祀有社稷、五祀而無先公，並與此注義異。金鶚據彼注糾此云：「鄭既以宗廟爲大祭，鷩冕以享先公，獨非宗廟之祭乎？何又以鷩冕所祭爲中祭也？」吳廷華亦云：「先王先公之祭，其禮原無隆殺，其分衾冕、鷩冕者，不過視先王先公之服以爲服，所謂不敢以己之尊服臨先公，非以此爲中祭也。蓋先公之祭若在親廟之中，則與先王之祭何別，若在禘祫，則尤爲大祭，況據《中庸》上祀先公以天子之禮，是先公之祀等於先王也。」案：金、吳說是也。《禮器》注謂祭先公七獻，亦未塙，詳《司尊彝》疏。云「小祭

者，王服希冕，玄冕所祭也」者，《釋文》云：「希，本又作緡。」案：作緡者，依《司服》注讀改，非鄭之舊。《司服》、《弁師》注說希冕，並依經作希，不改字。賈疏云：「按《司服》『社稷五祀則希冕，羣小祀則玄冕』。鄭彼注『山林川澤之屬』。鄭雖不言風師、雨師等，『之屬』中兼之也。惟見天地小祭，不見宗廟小祭者，馬融以爲宗廟小祭謂祭殤是也。祭殤之時，或可亦用玄冕。若然，則《禮器》云『一獻質』，謂祭羣小祀，當玄冕；『三獻文』，謂祭社稷五祀，當希冕；『五獻察』，謂祭四望山川，當毳冕；『七獻神』，謂祭先公，當鷩冕。雖不言九獻，下云『大饗，其王事與』，大饗謂祫祭先王，爲九獻，當衾冕。《禮器》下文云『大饗不足以大旅』。大旅當大裘。據此一獻至九獻，以此獻數約之，故六服差爲三。按《司服》，四望山川服毳冕，五獻，社稷服希冕，三獻，社稷在山川下。按《大宗伯》『以血祭祭社稷、五祀、五嶽』，而社稷在五嶽上者，五嶽與土地異形，若畿外諸侯，服獻則尊於王朝之臣；社稷號曰土神，似若王朝之臣，服獻則卑於五嶽而在五嶽上者，似若王人雖微，猶敘諸侯之上。按《王制》『宗廟之牛角握』，《國語》『山川之牛角尺』。社稷尊於五嶽者，彼自從國中之神莫貴於社，故與宗廟同角握。」詒讓案：《小司徒》、《舞師》後鄭注並云「小祭祀，王玄

冕所祭」，則謂小祭，惟據玄冕祭，不兼希冕祭。又《肆師》「小祀」，後鄭注以爲司中、司命、風師、雨師、山川百物，則又謂有山川無社稷五祀，義並與此注異。吳廷華云：「《司服》明云祭羣小祀則玄冕，是小祭只有玄冕。若希冕則在羣小祀之上也。鄭以希冕、玄冕俱爲小祭，與《司服》經悖。」案：吳說是也。金鶚說亦同。然鄭此注及《肆師》注所定祭祀差次，岐迕殊甚，今亦無以質其是否，詳《肆師》及《大司樂》疏。云「三貳、再貳、一貳者，謂就三酒之尊而益之也」者，凡經作「壹」，注例並作「一」，亦古今字也。此說與杜及先鄭同，謂以勺斟酒，就三酒之尊，注而益之，如其數也。引《禮運》曰「玄酒在室，醴醑在戶，粢醕在堂，澄酒在下」者，《釋文》云：「醕，本亦作緹。」案：《禮運》作「醕」，《釋文》或本作「緹」者，疑依上經文改。緹醕字同。《司尊彝》注亦引此文釋之作緹，與此別本同。鄭《禮運》注云：「粢讀爲齊，聲之誤也。《周禮》五齊，字雖異，醑與盎，澄與沈，蓋同物也。莫之不同處，重古略近也。」案：《禮運》此文，謂齊酒等所陳位次。此引之者，欲證三酒卑在堂下也。凡齊酒陳位，詳《司尊彝》疏。云「澄酒是三酒也」者，此專釋酒字，不釋澄也。其澄自如《禮運》注說，與沈齊同物。《禮運》疏云：「此注澄是沈齊。案《酒正》注，澄酒是三酒。」

二注不同，故趙商疑而致問。鄭荅之云：「此本不誤，轉寫益澄字耳。」如鄭所荅，是轉寫《酒正》之文，誤益澄字，當云「酒，三酒也」，則是與《禮運》注同。然案《坊記》云：「醴酒在室，醕酒在堂，澄酒在下。」注又以澄爲清酒，田瓊疑而致問。鄭荅之云：「《禮運》云醴醑醕澄，各是一物，皆不言酒，故推其意澄爲沈齊。酒爲三酒，《坊記》云醴也，醕也，澄也。皆言酒，故因注云澄酒，清酒也。其實沈齊也。」如鄭此言，《坊記》所云醴酒醑酒，五齊亦言酒，則澄酒是沈齊也。是五者最清，故云澄酒，非爲三酒之中清酒也，是與《禮運》不異也。賈疏亦云：「案《鄭志》趙商問，《禮運》注「澄是沈齊」，今此注「澄酒是三酒」何？鄭荅今解可去澄字。若然，鄭本於此注時，直云「酒是三酒」，無澄字，有澄字者誤，當云「酒是三酒」。」段玉裁云：「按鄭作注時，謂「澄酒」之酒字是三酒，以別於上文「玄酒」之酒字。趙商不善讀。鄭荅語，蓋忘其有澄字之意矣。而賈徑云本無澄字，有者誤也，是賈誤矣。」云「益之者，以飲諸臣」者，與子春說同。賈疏云：「案《司尊彝》云「皆有疊，諸臣之所酢」，是飲諸臣也。」云「若今常滿尊也」者，據漢法爲況，蓋亦常副益之，使酌之不罄。《後漢書·馬融傳·廣成頌》云「山疊常滿」，《藝文類聚·雜器物部》有宋何偃《常滿尊銘》，即

此。云「祭祀必用五齊者，至敬不尚味而貴多品」者，不尚味謂齊醑而酒苦，貴多品謂酒三而齊五也。《郊特牲》云：「籩豆之薦，水土之品也。不敢用常褻味而貴多品，所以交於神明之義也，非食味之道也。」彼主籩豆言，鄭以祭祀用五齊，義與彼相類，故約彼文爲說。共賓客之禮酒，

共后之致飲于賓客之禮醫酏糟，皆使其士奉之。禮酒，王所致酒也。王致酒，后致飲，夫婦之義。

糟，醫酏不涉者。涉曰清，不涉曰糟。后致飲，無醴醫酏不清者，與王同體，屈也，亦因以少爲貴。士謂酒人、漿人奄士。【疏】「共賓客之禮酒」者，以下皆致朝聘賓之酒也。

禮酒，謂致饗燕之酒。凡致酒皆盛於壺，其數未聞。云「共后之致飲于賓客之禮醫酏糟」者，此致飲，亦與王致饗燕禮相擬。《掌客》諸侯相朝，夫人於侯伯有致饗，於上公又兼致饗食，亦其比例也。據《掌客》、《聘禮》，夫人於朝賓聘使致饗餼，有壺酒。后亦當同。此不言者，文略，亦共之可知。賈疏云：「醫酏糟者，言致飲之中，取二飲以致之。」云「皆使其士奉之」者，《天府》注云：「奉猶送也。」江永云：「酒人、漿人與酒正奉之文雖同，而所奉則異。酒人、漿人奉之於酒正者也。酒正奉之，奉之於王朝者也。」案：江

說是也。《內宰》云：「致后之賓客之禮。」注云：「謂諸侯來朝覲及女賓之賓客。」然則后致飲於賓客，酒正奉之，內宰致之。注云「禮酒，王所致酒也」者，《酒人》注云：

「禮酒，饗燕之酒，王不親饗燕，不親食，而使人各以其爵以酏幣侑幣致之，則從而以酒往。」是也。賈疏云：「下《酒人》云「賓客之陳酒」。彼言陳，謂若致饗餼，列陳於客館中。言禮酒不言陳，謂饗燕之酒，王當親饗燕，王有故，則使人就館以酏幣致之。」案：賈說是也。凡王致賓客之禮，有積，有飡，有饗餼。唯積無致酒之文，餘皆有之。鄭知此禮酒非飡饗餼者，以彼二禮《酒人》謂之陳酒，與禮酒文別，故知爲饗燕之酒也。鄭又知非王親饗燕之酒者，以下云「王之燕飲酒，酒正奉之」。彼文含有賓客燕飲之酒，若饗禮更盛於燕。儻王親饗，則宜酒正自奉其酒，不當反使其士奉之，禮轉殺於燕飲酒也。致酒，詳《酒人》疏。云「王致酒，后致飲，夫婦之義」者，明王致饗燕，則有酒無飲，后致饗燕則有飲無酒，互相備也。賈疏云：「酒是陽，故王致之。飲是陰，故后致之。是陰陽相成，故云夫婦之義。」云「糟，醫酏不涉者，涉曰清，不涉曰糟」者，《說文·米部》云：「糟，酒滓也。」糟卽糟之隸變。凡醫酏作成時，並汁滓相將，亦通謂之糟。涉去其滓，取其汁，則謂之清。此經醫

醕下特著糟字，則是不沛者也。云「后致飲，無醕醫醕不清者，與王同體屈也」者，賈疏云：「對下《漿人》『其夫人致飲於賓客之禮，清醕醫醕糟而奉之』，謂夫人卑於后，致三飲醫醕糟上，加之以清醕。今后尊，唯有醫醕二飲，無清醕。既無清醕，醫醕當清，今皆不清者，以其后尊，夫妻片合，與王同體，故屈。夫人卑，與王不同體，得申，故加之以清醕也。」案：王國致飲於賓客，后少夫人多者，養賓之禮，尊者可略，卑者宜詳也。鄭、賈謂以與王同體而屈，似非經意。云「亦因以少爲貴者」，賈疏云：「案《禮器》云：『有以少爲貴者，天子無介，祭天特性。』是以少爲貴。則夫人三飲，后二飲，是因以少爲貴。」云「士謂酒人、漿人奄士」者，賈疏云：「酒使酒人，漿使漿人，皆奄士。案《序官》，酒人奄十人，漿人奄五人，皆不言士。此經注皆士者，爲官首當是士。但非賢，故不言士。內小臣是奄而稱士，鄭云異其賢。」王昭禹云：「酒正中士四人，下士八人。所謂酒正則中士也，所謂士則下士也。」吳廷華云：「注以酒漿奄士訓經，蓋見酒漿二職，於賓客酒皆曰奉，與此經奉字合，遂以內小臣奄士，合酒漿之奄人，爲此經士字作詰。賈又以「非賢故不言士」釋之，其說似是而非。蓋《序官》，士大夫皆以爵言。酒人止奄十人，漿人止奄五人，使酒漿奄人果是士，

《序官》何得無士名？且使酒漿奄人果不賢，故不言士，則此經又何得以士目之？況此經言后，酒漿二職不言后，則此經奉之人何必即是酒人漿人。竊謂酒正一官，中士四人，下士八人。據《序官·大宰》注云「自大宰至旅下士，轉相副貳」。如其說，是一官之中，自有副貳。酒正，中士，正也；下士則其副貳也。下節王燕飲，酒正奉之，謂中士四人也。此經奉賓客之禮酒，當是下士，故曰使其士奉之也。若以士爲奄士，則酒漿奄人既不言士，內小臣奄士又非奉禮酒之職，所謂奄士者，又安指邪？」案：王、吳說是也。魏校、姜兆錫、方苞、江永、蔣載康、黃以周說並同。凡王之燕飲酒，共其計，酒正奉之。共其計者，獻酬多少，度當足也。故書「酒正」無酒字。鄭司農云：「正奉之，酒正奉之也。」【疏】「凡王之燕飲酒，共其計」者，燕飲酒與《膳夫》義同，亦兼燕賓客及諸臣言之。賈疏謂惟指王與羣臣燕飲之酒，說殊未咳。共計者，共酒之時，并具計簿奉之。云「酒正奉之」者，此燕飲酒，王親與，故酒正自奉之，異於致賓客之禮酒，使其士奉之也。注云「共其計者，獻酬多少度當足也」者，計謂其數量著於秩籍者。凡燕飲酒，主人進賓之酒，謂之獻。賓報主人之酒，謂之酢。主

人先飲以勸賓之酒，謂之酬。正獻既畢之酒，謂之旅酬。旅酬既畢之酒，謂之無算爵。其多少，皆計數量共之當足也。云「故書酒正無酒字，鄭司農云正奉之，酒正奉之也」者，先鄭依故書無酒字，則官名未著，故特釋之。後鄭則以故書今書義並通，而有酒字，文尤詳備，故不從故書也。黃以周云：「《酒人》於共賓客之禮酒、飲酒，《漿人》於共夫人致飲於賓客之禮清醴醫醕糟，並曰而奉之，不復舉其官，為奉者即其官可知也。此曰「正奉之」，對上文共賓客之禮酒及后致飲於賓客「使士奉之」為文。」凡饗士庶子，饗耆老孤子，皆共其酒，無酌數。要以醉為度。

【疏】「凡饗士庶子，饗耆老孤子」者，此皆於學行之，詳《外饗》疏。耆老亦通四等之老言之。《王制》孔疏引皇侃云：「饗有四種。一是諸侯來朝，天子饗之，則《大行人職》云「上公之禮，其饗禮九獻」是也。其性則體薦，體薦則房烝，《國語》云「王公立飫，則有房烝」。其所云飫，即是饗也。二是王親戚及諸侯之臣來聘，王饗之。其酌數亦當依命。其性折俎，亦曰穀烝也。三是戎狄之君使來，王饗之。其禮則委饗也。其來聘賤，故王不親饗之，但以牲全體委與之是也。四是饗宿衛及耆老孤子，則以醉為度。故《酒正》

云「凡饗士庶子，饗耆老孤子，皆共其酒，無酌數」。又云：「饗致仕之老，則當用正饗之禮，以其有賢德者，不可以褻禮待之。其饗死事之老，不必有德，又是老人，不宜久立，當用折俎之饗。」案：皇說饗致仕之老與死事之老異，《禮經》無明文，未知然否。但致仕之老，尊卑命數不同，死事之老，或無爵秩，雖用房烝穀烝之禮，而酌數不能依命數，則亦當無酌數，皇說與經義自不迂也。注云「要以醉為度」者，不豫限酌數，要以及醉而止，亦不及亂也。掌

酒之賜頒，皆有灋以行之。法，尊卑之差。【疏】

「掌酒之賜頒」者，謂王賜頒諸臣及宿衛士庶子等之酒。賜謂好賜，頒謂常賜，與《膳夫》肉脩之頒賜義同，詳彼疏。云「皆有灋以行之」者，皆依《大宰》九式之法行之。好賜則有好用之式，常賜則有匪頒之式也。行與《司裘》、《羅氏》「行羽物」義同，彼注云「行謂賦賜」是也。注云「法，尊卑之差」者，此亦注用今字也。以爵秩之尊卑，為賜頒之差數，必與法式相應也。凡有秩酒者，以書契授之。

鄭司農云：「有秩酒者，給事中予之酒。秩，常也。常受酒者，《國語》曰：「至於今秩之。」玄謂所秩者，謂老臣。《王制》曰：「七十不俟朝，八十月告存，九十日有秩。」【疏】

「凡有秩酒者，以書契授之」者，《小宰》八成云：「聽取予以書契。」注云：「書契，謂出予受人之凡要。」此書契即出予之凡要也。蓋凡有秩酒者，此官則案其當得之數，爲書契以授其人；至其人來取酒。又案視書契，而後依數授之。賈疏謂酒正授使者酒，書之多少以爲契要而與之。是授酒之時，復與以書契，非經義也。

注鄭司農云「有秩酒者，給事中予之酒」者，賈疏云：「司農之意，謂在朝羣臣，親近於王，總名給事中，王常以酒與之。」詒讓案：給事中謂給事王宮中官吏。《春官·世婦》注云：「女宮，刑女給宮中事者。」《晏子春秋·外篇》云：「擁札摻筆，給事宮殿中。」並與此義同。《漢書·百官公卿表》有給事中加官，與此異。云「秩，常也，常受酒者」者，秩常，《爾雅·釋詁》文。《鄉師》注同。引《國語》曰「至於今秩之」者，《楚語》云：「鬬且廷語其弟曰：昔鬬子文三舍令尹，無一日之積。成王聞子文之朝不及夕也，於是乎每朝設脯一束，糗一筐，以羞子文。至於今令尹秩之。」韋注亦訓秩爲常也。此引無「令尹」二字者，先鄭所刪。彼秩謂脯糗，不云有酒，先鄭引之證常秩之義耳。云「玄謂所秩者，謂老臣」者，破先鄭給事中予酒之說也。《內則》云：「大夫無秩膳。」彼注云：「謂年五十始命，未甚老也。」此秩酒，與秩膳事同，明非老

臣不得有，故不從先鄭說。引《王制》曰「七十不俟朝，八十月告存，九十日有秩」者，鄭彼注云：「不俟朝，君揖則退。月告存，每月致膳。日有秩，秩，常也，有常膳。」引之者，明彼云有秩膳，亦有秩酒也。酒正之出，日入其成，月入其要，小宰聽之。出謂授酒材及用酒之多少也。受用酒者，日言其計於酒正，酒正月盡言於小宰。

【疏】「日入其成」者，以下正酒府之成要，所謂官成也。《宰夫》云：「月終則令正月要，旬終則令正日成。」蓋酒人每日計用酒之多少，著之簿書，至浹旬，則總計十日之成，言之酒正，正受而聽之也。云「月入其要」者，賈疏云：「謂酒正得酒人日計文書，日計其月要，至月盡，以月計文書入於小宰。」云「小宰聽之」者，《小宰》云「聽出入以要會」是也。賈疏云：「小宰將酒正文書，聽斷之，知其得失。」

注云「出謂授酒材」者，賈疏云：「謂授酒人以其材，《酒正職》首所言者是也。」云「及用酒之多少也」者，賈疏云：「謂若共五齊三酒以下是也。」云「受用酒者，日言其計於酒正」者，日計，每日計之，其事輕數少，不必言於小宰，故知

① 「將」，《周禮注疏》作「得」。

酒人受酒材及用酒之有司，各言其計於酒正也。云「酒正月盡言於小宰」者，酒正總計一月授用酒之數爲月要，而言之小宰，故《小宰》云「月終則以官府之敍，受羣吏之要」。彼不云受日成，是小宰唯聽月要，日成則酒正自聽之也。歲終則會，唯王及后之飲酒不會。以酒式誅賞。誅賞作酒之善惡者。【疏】「歲終則會」者，此正

酒府之歲會，亦官成也。亦以十二月之要，總會計之。《小宰》云「贊冢宰受歲會」，是歲會當小宰贊大宰聽之，經文不具也。云「唯王及后之飲酒不會」者，賈疏云：「不云世子，以其酒與膳異。膳羞食之正，則世子亦不會。膳禽食之加，世子會之，酒亦爲加，故亦會之。」云「以酒式誅賞」者，此酒正之官計也。式卽上文「灋式」。^①凡所作之酒，如式者爲善，不如式者爲惡，亦當言於大宰小宰而誅賞之。

注云「誅賞作酒之善惡者」者，謂計攷酒人等所作之善惡，卽上注所謂功沽之巧是也。

① 「灋式」，疑當作「式灋」。

周禮正義卷十

酒人掌爲五齊三酒，祭祀則共奉之，以

役世婦。世婦謂宮卿之官，掌女宮之宿戒，及祭祀，比其具。酒人共酒，因留與其奚爲世婦役，亦官聯。【疏】

「祭祀則共奉之以役世婦」者，謂共具齊酒，又親奉致之世婦，遂共其役也。

注云「世婦謂宮卿之官」者，賈疏云：「謂《春官》云每宮卿一人。」案鄭、賈意，此世婦非《天官》之世婦也。然二世婦內外異而職掌略同，祭祀皆掌饌具，則此世婦不專指春官宮卿明矣。《縫人職》云：「掌王宮之縫線之事，以役女御。」是亦奄官得爲內嬪婦役之例。鄭、賈說未咳。互詳《敍官》疏。云「掌女宮之宿戒，及祭祀，比其具」者，亦《春官·世婦職》文。引之者，明彼具內含有五齊三酒，又掌宿戒，故有役使之事也。云「酒人共酒，因留與其奚爲世婦役」者，賈疏云：「酒人以奚送酒至世婦，因爲世婦所役使。」詒讓案：《敍官》，酒人有奚三百人。人數衆多，故此官率領之，留爲世婦役。不言女酒者，

女酒掌爲酒，不掌共送饌具之事也。云「亦官聯」者，聯，黃丕烈校改「連」是也。舊本並誤，詳《大宰》疏。賈疏云：「即《小宰》云祭祀之聯事是也。」共賓客之禮酒、飲酒而奉之。酒正使之也。禮酒，饗燕之酒。飲酒，食之

酒。此謂給賓客之稍，王不親饗燕，不親食，而使人各以其爵，以酬幣侑幣致之，則從而以酒往。【疏】注云「酒正使之也」者，賈疏云：「《酒正》云「共賓客之禮酒，使其士奉之」。士即此酒人也。彼不言飲酒者，禮酒中可以兼之矣。」吳廷華云：「《酒正》言士奉之，此經亦言奉者，蓋謂酒人奉於酒正，而酒正之士奉於賓客。疏仍主《酒正》注奄士說，非也。」案：吳說是也。黃以周說同。互詳《酒正》疏。云「禮酒，饗燕之酒」者，此謂三酒也，凡饗燕獻酬用之。王於賓客饗食燕，通謂之禮，故《覲禮》云「饗禮乃歸」。但此及酒正之禮酒，並謂致之客館者，故《酒正》注又云「王所致酒也」。云「飲酒，食之酒」者，賈疏云：「謂食時有酒者，《曲禮》云「酒漿處右」，則此非獻酬酒，是醑口之酒也。」詒讓案：此謂四飲之醴清也。《公食大夫禮》云：「飲酒、漿飲俟于東房。」注云：「飲酒，清酒也。飲酒先言飲，明非獻酬之酒也。」蓋食禮無獻酬，唯有醑口，故別謂之飲酒。《公

食」注清酒，賈彼疏謂卽三酒之清酒。吳廷華、褚寅亮、黃以周謂當爲四飲之清，是也。此四飲，《漿人》六飲，並無三酒。云「此謂給賓客之稍」者，猶《漿人》共六飲云「共賓客之稍禮」，別於下陳酒爲致饗餼也。《掌客》云：「賓客有喪，唯芻稍之受。」注云：「稍，人稟也。」《聘禮·記》注亦以稍爲稟食。此下注謂不親饗食歸幣之酒，則與稟食別，而云稍者，以其歸於客館，有似稟食，亦得通稱稍。故賈疏云：「此禮酒飲酒，總言王若不親燕飲食，則使人致之於客館，任賓客稍稍用之，故云給賓客之稍。」云「王不親饗燕，不親食，而使人各以其爵以酬幣侑幣致之」者，《聘禮》云：「若不親食，使大夫各以其爵朝服致之以侑幣，致饗以酬幣亦如之。」鄭彼注云：「君不親食，謂有疾及他故也。必致之，不廢其禮也。致之必使同班，敵者易以相親敬也。酬幣，饗禮酬賓勸酒之幣也。」又《公食大夫禮》云：「賓三飯，公受宰夫束帛以侑。若不親食，使大夫各以其爵朝服以侑幣致之。」注云：「侑猶勸也。主國君以爲食賓殷勤之意未至，復發幣以勸之，欲用深安賓也。」賈疏云：「彼雖無致燕法，案：《鹿鳴》燕羣臣嘉賓，有實幣帛，則致燕亦以酬幣致之，與饗同。各以其爵者，則諸侯來朝，遣三公致饗；卿來聘，遣卿大夫致饗。燕以酬幣，致食以侑幣。」案：賈說是

也。《聘禮》「公于賓壹食再饗，燕與羞，俶賜無常數。」彼爲諸侯使卿自相聘之禮，禮殺。食饗有常數，而燕無常數，故亦無不親燕致幣之文。此天子待來朝諸侯，據《掌客》上公三饗、三食、三燕諸文下，總云「若弗酌則以幣致之」，是燕有常數，與饗食同，則不親燕亦有致幣可知，故鄭、賈並兼言燕也。賈《掌客》疏謂「燕禮褻，不酌，蓋不致幣」。《聘禮》疏亦謂「天子諸侯燕皆無酬幣」，與此疏說自相抵牾，不足據。胡承珙云：「《周語》言先王之燕，「體解節折而共飲食之，於是乎折俎加豆，酬幣宴貨，以示容合好」，則燕亦未嘗不用酬幣也。」案：胡說本陳祥道，是也。《詩·小雅·鹿鳴》孔疏亦謂燕當有幣。今《燕禮》不言者，文略。互詳《掌客》疏。又案：鄭知此禮酒非王親饗燕食之酒者，以酒正饗士庶子、耆老等皆共其酒，則王饗賓客，亦當酒人從酒正共之，不當直使酒人共之也。云「則從而以酒往」者，賈疏云：「謂酒人以酒從使人往客館，授與賓客。」案：此當謂奉之於酒正，鄭、賈說亦誤。凡事，共酒而入于酒府。入于酒正之府者，是王燕飲之酒，酒正當奉之。【疏】注云「入于酒正之府者，是王燕飲之酒酒正當奉之」者，于，注例當作「於」，各本並誤。賈疏云：「此謂酒正所

奉者，則《酒正》云「凡王之燕飲酒，酒正奉之」。并共王之四飲三酒之饌，亦是酒正奉之。以其事非一，故言凡事共酒入于酒正之府。」惠士奇云：「《宰夫職》云：『府掌官契以治藏。』《酒正職》云：『凡有秩酒者，以書契授之。』酒正之出，日入其成，月入其要。」成要即書契，府實掌而藏之。酒正府二人，酒人、漿人無府。故《酒人》共五齊三酒，《漿人》共六飲，皆曰入于酒府，謂入于酒正之府，日入其成，月入其要也。」案：惠說是也。酒人共酒，漿人共漿，入於酒府，固謂入酒漿之物。然亦兼入書契，以備成要，惠說足補注義。

凡祭祀，共酒以往。不言奉，小祭祀。【疏】

注云「不言奉，小祭祀」者，賈疏云：「上云祭祀共奉之，謂大祭、次祭。此不言奉，謂小祭祀，王希冕、玄冕所祭者，故云共酒以往。」詒讓案：大祭祀之酒，正親奉之。小祭祀不言奉者，酒人使人以酒往，致主祭祀之有司，不親奉之也。**賓客之陳酒亦如之。**謂若歸饗餼之酒，亦自有奉之者，以酒從往。【疏】注云「謂若歸饗餼之酒」者，賈疏云：「謂上公饗餼九牢之等。案《聘禮》云，卿韋弁歸饗餼牲牢及芻薪米禾等，並歸於客館。彼八壺設於西序，北上。天子致禮於諸侯，亦當陳於西序，故云賓客之陳酒。經直云

賓客陳酒，不指斥言饗餼，鄭不敢正言，故言若饗餼之酒。」案：《聘禮》歸饗餼，堂上八壺，設于西序，北上，二以並，南陳；西夾六壺，西上，二以並，東陳；又東夾亦六壺，東上，西陳。即鄭所據也。賈唯舉西序所陳，未咳。又《聘禮》致餼，亦有堂上八壺，西夾六壺。《掌客》諸侯相致餼之禮，則上公壺四十，侯伯壺三十有二，子男壺二十有四。此陳酒內當亦含致餼，鄭不言者，文不具也。云「亦自有奉之者」者，以經亦不言奉，明酒人不自奉之。賈疏云：「謂使卿韋弁歸之者是也。」云「以酒從往」者，賈疏云：「謂卿韋弁歸饗餼等之時，亦使人以此酒從往致之。」

漿人掌共王之六飲，水、漿、醴、涼、醫、

醕，入于酒府。王之六飲，亦酒正當奉之。醴，醴清

也。鄭司農云：「涼，以水和酒也。」玄謂涼，今寒粥，若糗飯襍水也。酒正不辨水涼者，無厚薄之齊。【疏】掌共王

之六飲，水、漿、醴、涼、醫、醕」者，此與膳夫為官聯也。六

飲自水外，並有清有糟，而以清為尤善，故膳夫謂之六清。

《玉藻》云：「五飲，上水、漿、酒、醴、醕。」彼酒蓋即此醫。

無涼者，涼依先鄭說則咳於酒，依後鄭說則咳於醕漿，故略

之也。漿、鬻、醢，並詳《酒正》疏。云「入于酒府」者，賈疏云：「亦入於酒正之府，與三酒同。以其酒正奉之故也。」

注云「王之六飲，亦酒正當奉之」者，賈疏云：「亦如酒人共酒入於酒府，酒正奉之。言當者，《酒正》所云有不自奉者，唯共王乃奉之。」云「醢，醢清也」者，據《內則》，醢本有清糟二種。《酒正》四飲，一曰清。《膳夫》又云六清。此六飲之醢，雖不言清，以《酒正》例之，則此醢亦謂醢之清者可知，故云醢清也。賈疏謂此醢是不泐者，未達鄭旨。鄭司農云「涼，以水和酒也」者，《說文·水部》云：「涼，薄也。」以水和酒則味薄。黃以周云：「醢爲醇酒，涼爲薄酒，先鄭義如此。」詒讓案：依《郊特牲》及《司尊彝》文，惟明水泔齊，與凡酒脩酌祭祀之酒，有以水和。若常人所飲，不當以水和酒，故後鄭不從。云「玄謂涼今寒粥，若糗飯雜水也」者，《廣雅·釋器》云：「醢，漿也。」呂飛鵬云：「《說文·西部》云：「醢，雜味也。」則醢爲正字，故《膳夫》六清注作醢。涼乃假借字。」王聘珍云：「《釋名·釋飲食》云：「寒粥，末稻米，投寒水中，育育然也。糗，齏也，飯而磨散之，使齏碎也。」詒讓案：糗與飯爲二物，凡以米乾熬之謂之糗，淩水烝炊之謂之飯。糗飯淩水，謂先熬炊諸米，而更和以水，與寒粥小異。《國語·楚語》章注云：「糗，寒粥也。」

《穆天子傳》郭注同。韋、郭所謂寒粥，蓋卽此注糗飯雜水所爲矣。糗，詳《籩人》疏。又，以諸和水亦謂之涼，《內則》諸飲有醢及醢，鄭彼注云：「醢，梅漿。醢，以諸和水也。以《周禮》六飲校之，則醢，涼也。紀莒之間，名諸爲醢。」孔疏云：「康成以涼與醢是一物，則此以諸和水，謂以諸雜糗飯之屬和水也。諸者，衆雜之辭。」黃以周云：「諸謂梅諸。或以桃諸爲之，謂之桃醢。《釋名》：「桃醢，水漬而藏之，其味醢醢然醢也。」孔、賈申鄭並以諸爲衆辭，非鄭意。」案：黃糾孔、賈之誤是也。但諦審《內則》注意，醢者，煮梅取其汁爲醢漿，卽六飲漿之別，故云梅漿。醢則以乾蓀漬水成味，故云以諸和水。此與寒粥及糗飯淩水異。孔合爲一，非鄭旨也。綜校許、鄭諸說，蓋涼本爲寒飲，故《呂氏春秋·節喪篇》高注又云：「以冰置水漿於中爲醢。」是飲本宜寒，而涼醢又六飲中之最寒涼者，其味淩和衆物，唯意所欲。故或寒粥，或糗飯淩水，或以諸和水，三者雖不同物，以其並是寒水淩和米物，故同得涼稱。許以淩味詁醢，義足通咳。鄭二禮注似岐異，而實可互相備也。許、鄭並以涼爲和水，與酒不同。唯《說文·西部》有「醢」字，云「泛齊，行酒也」。疑漢時禮家說，有以《內則》之醢爲酒名者，故字或作醢，猶涼亦作醢也。《楚辭·招魂》「挫糟凍飲酎

清涼」，王逸注云：「盛夏之時，覆甕乾釀，提去其糟，但取清醇，居之冰上，然後飲之，酒寒涼，又長味好飲也。」惠士奇、孔廣森並據彼以證涼濫爲寒涼之飲。但依王注，則彼爲涼酒，此與《說文》訓醞爲泛齊義略相近。然依鄭說，則濫無厚薄之齊，與酒迥異也。云「酒正不辨水涼者，無厚薄之齊」者，賈疏云：「此文六飲，并有水涼。酒正辨四飲，無水涼，以其水則臨時取用，涼則至用乃和，二者並不須豫辨，故言無厚薄之齊。」詒讓案：水涼無厚薄之齊，謂非醞釀所成，與酒絕異，故酒正不辨之也。共賓客之稍禮。稍禮，非飧饗之禮，留閒，王稍所給賓客者。漿人所給亦六飲而已。【疏】注云「稍禮非飧饗之禮，留閒，王稍所給賓客者」者，賈疏云：「謂賓未去，留閒，王稍稍所給賓者也，故以稍言之。」詒讓案：此注釋稍爲留閒王稍所給，猶《大府》注釋稍秣爲稍用之物也。《聘禮記》云：「既致饗，旬而稍。」鄭彼注云：「稍，稟食也。」賈彼疏謂以其賓客之道，十日爲正。行聘禮既訖，合歸，一句之後，或逢凶變，或主人留之，不得時反，即有稍禮。蓋凡朝聘賓客，始至則有飧，既行禮則有饗。若其有事留閒，則別給稟食，其禮殺於飧餼，蓋有米穀酒漿而無牲牢，故鄭《聘禮》注以稟

食爲釋。又《酒人》「共賓客之禮酒、飲酒而奉之」。注云：「此謂給賓客之稍。」又謂王不親饗食而致幣以酒從往。然則賓禮自致飧饗正禮外，凡致飲食於客館，不必稟食，並得稱稍矣。云「漿人所給亦六飲而已」者，賈疏云：「漿人不主酒齊，唯主飲，故知此稍禮所給六飲而已。」共夫人致飲于賓客之禮，清醴醫醕糟，而奉之。亦酒正使之。三物有清有糟。夫人不體王，得備之。禮，飲醴用柶者糟也，不用柶者清也。【疏】「共夫人致飲于賓客之禮」者，賈疏云：「夫人，謂三夫人。致飲於賓客之禮，助王養賓，亦致於客館。」詒讓案：三夫人，詳《敝官》疏。《掌客》五等諸侯相朝，夫人致禮，有壺豆籩，壺卽盛酒漿之器也。彼夫人爲諸侯夫人，與此王后下之夫人異，而致禮賓客則略同。云「而奉之」者，黃以周云：「謂奉之酒正。」

注云「亦酒正使之」者，賈疏云：「亦謂酒正使酒人漿人奄士也。故《酒正》云「醫醕糟，皆使其士奉之」。彼注「士，酒人漿人奄士」。故知亦酒正使之。」案鄭意，酒正使漿人奉之賓客，其說非也。酒人、漿人之奄士，亦不當稱士，賈襲《酒正》注之誤，詳《酒正》、《酒人》疏。云「三物有清有糟」者，明經清糟，通醴醫醕三者言之。醴有清糟，《內則》

所謂重醴，彼注云：「重，陪也。致飲有醇者，有泝者，陪設之也。」醫卽釀醴爲醴，故亦有清有糟。醴爲粥清，不釀，亦有糟者。凡泝者爲清，不泝者其滓卽爲糟也。黃以周云：「黍醴，煮黍爲鬻。其稀而清者，謂之醴；其厚而有滓者，所謂醴糟也。」云「夫人不體王，得備之」者，賈疏云：「對后體王，屈，故醫醴糟而無清醴也。」案：夫人致飲備於后者，卑者之禮賓宜詳也。鄭、賈說未審，亦詳《酒正》疏。《掌客》，致禮公侯伯八壺，子男六壺。此夫人所致無文。五等諸侯，宜有降殺，其備三飲則同。云「禮飲醴用柶者糟也，不用柶者清也」者，《士冠禮》云：「賓禮冠者，贊者洗于房中，側酌醴，加柶，覆之，面葉。」又「醴賓以一獻之禮」。鄭彼注云：「醴賓不用柶者，泝其醴。凡醴事，質者用糟，文者用清。」是醴有糟用柶，清無糟不用柶之事。柶者，角柶，所以扱醴，祭之，啐之。詳《玉府》疏。賈疏云：「案柶只爲糟設，醴既泝而清，則不假柶，則此經清醴是也。」凡飲共之。謂非食時。【疏】注云「謂非食時」者，謂共渴時之飲，非食時酌口、漱口之飲也。賈疏云：「上共王六飲，食時以共訖；此又云凡飲共之，故云謂非食時。」孫希旦云：「食畢飲酒謂之醕，飲漿謂之漱。祭祀，尸食畢而獻之謂之醕。《士昏禮》『合卺而醕』。《樂記》云『食三老五更於大

學，天子執爵而醕」。此皆用酒者也。《士昏》、《特性》、《少牢》，漿皆不設。《公食禮》兼設酒漿，而賓但飲漿。《弟子職》曰「左酒右漿」。又曰「先生已食，弟子乃徹，趨走進漱」。亦但飲漿而已。是則禮之重者，食畢用酒以醕而無漿，輕者兼設酒漿，而食畢但飲漿也。案：孫說甚覈。凡六飲全以共飲。食時雖有飲以醕漱，然唯用酒漿二物，不全共也。上言共王之六飲，雖據王舉言之，然亦通舉大數，不全用也。此云凡飲則所含亦甚廣，但非王舉耳。而鄭以非食時解之者，明此亦具六飲，與上同，而與食禮唯用酒漿異也。《公食大夫禮》「飲酒漿飲」，鄭彼注云：「漿飲先言漿，別於六飲也。」彼漿飲，是食時漱口之飲。而謂其別於六飲者，明不兼餘四飲也。若然，此注云非食時，謂通共六飲可知矣。

凌人掌冰正，歲十有二月，令斬冰，三

其凌。正歲季冬，火星中，大寒，冰方盛之時。《春秋傳》

曰：「火星中而寒暑退。」凌，冰室也。三之者，爲消釋度也。故書正爲政。鄭司農云：「掌冰政，主藏冰之政也。」杜子春讀掌冰爲主冰也。政當爲正。正謂夏正。三其凌，

三倍其冰。【疏】「掌冰」者，《說文·欠部》云：「欠，凍也。」

冰，水堅也，重文凝，俗冰从疑。」經典通段冰爲欠。此當從故書及先鄭讀爲「掌冰政」，謂主藏冰出冰之政令也。云

「正歲十有二月，令斬冰」者，《左傳》隱十年，^①孔疏引干寶云：「十盈則更始，以奇從盈數，故言有也。」案：此疑引干

氏《周禮注》義。「斬冰」者，《檀弓》注云：「斬，伐也。」《大學》云：「伐冰之家。」伐斬義同。謂冰堅須斬伐而取之。

《左》昭四年傳，申豐說藏冰云：「深山窮谷，固陰沍寒，於是乎取之。」又云：「山人取之，縣人傳之，輿人納之，隸人藏之。」蓋此官令山人、縣人等人山谷斬而納之。注云

「正歲季冬，火星中，大寒，冰方盛之時」者，此後鄭誤從杜以正歲連讀也。《月令》：「季冬之月，冰方盛，水澤腹堅，命取冰，冰已入，令告民出五種。」注云：「此月日在北陸，

冰堅厚之時也。」孔疏引《三統曆》云：「大寒日在危初度，

昏昴二度中，去日八十度，旦心五度中。」《左》襄九年傳云：「心爲大火。」是十二月大寒，旦心中即火星中，冰盛之

時也。案：《左傳》申豐曰「日在北陸而藏冰」，據日躔而言，此注云「火星中」，據中星而言，同屬季冬天象也。此經

及《月令》皆十二月斬冰，當月即納於凌室。《詩·豳風·七月》篇則十二月鑿冰，正月納之，與此納校一月，詳《敍

官》及後疏。引《春秋傳》曰「火星中而寒暑退」者，《左》昭

三年傳，晉張趯語。引之者，證火星中在季冬大寒之時也。

今本《左傳》作「火中寒暑乃退」。賈疏引作「火中而寒暑乃退」。又引注云：「火星，季冬十二月平旦，正在南，大寒

退。季夏六月黃昏，火中，暑退。」案《詩·豳風》、《禮記·

檀弓》孔疏，李善《文選·閒居賦》注，引《左傳》並作「火星中而寒暑乃退」。疑今本《左傳》有脫字也。賈引注說，與杜義同而文異，蓋據賈、服義。云「凌，冰室也」者，《敍官》

注同。云「三之者，爲消釋度也」者，入春以後，氣溫，冰漸消釋，故計每歲所用冰數，三倍納之於冰室之中，則雖有消

釋之減，不至乏用也。云「故書正爲政，鄭司農云，掌冰政，主藏冰之政也」者，先鄭從故書，讀「掌冰政」句斷，謂藏冰

之政令，凌人主掌之也。政正聲類同，詳《小宰》疏。云「杜子春讀掌冰，爲主冰也」者，謂杜讀「掌冰」爲句，訓其義則

爲主冰也。云「政當爲正，正謂夏正」者，段玉裁云：「此鄭君用杜說，改政爲正，下屬也。攷《周禮》全書言正歲者，皆

謂寅月。言歲終，歲十有二月者，皆謂丑月。凡言歲者，皆謂夏正也。言歲十有二月，則爲夏正已顯明，不必加正字，

① 孔疏見《左傳》隱十有一年。

以混於全書內之謂寅月者。司農從故書「掌冰政」爲長。^①王引之云：「建寅之月，爲一歲十二月之長，故謂之正歲。若建丑之十二月，則當謂之歲終，何得謂之正歲乎？鄭釋《小宰》正歲命名之義，不明其爲一歲之長，而但以爲得四時之正。於是寅月之名正歲，其義不明；而夏時十二月，遂若皆得四時之正，而可以蒙正歲之稱。此凌人掌冰正歲十有二月之所以誤讀也。」案：段、王說是也。云「三其凌，三倍其冰」者，賈疏云：「謂應十石，加至四十石，即是三倍其冰也。」阮元云：「應十石者，三倍之爲三十石。」案：阮說爲長。

春始治鑑。鑑，如甌，大口，以盛冰，置食物于中，以禦溫氣。春而始治之，爲二月將獻羔而啓冰。【疏】「春始治鑑」者，《釋文》云：「鑑，本作監。」葉鈔《釋文》「監」作「濫」。梁履繩云：「《左傳》襄九年《正義》引此文作『鑿』，疑監字當本作鑿。」治讓案：鑑、監、濫，聲類同，古通。鑿則俗體也。鑑，依注當爲金器，則是冶鑄所成，蓋亦臬氏爲之。此官春治之者，謂於孟春未出冰時，豫備具檢察之，慮有扁缺，不任用也。注云「鑑如甌，大口」者，《說文·金部》云：「鑑，大盆也。」又《缶部》云：「甌，小口罍也。」《方言》云：「甌，罍也。自關而西，晉之舊都河汾之間，其大者謂之甌。」又云：「罍，周洛韓鄭之間謂之

甌。」案甌：卽甌之別。據《說文》甌爲小口罍，則鑑蓋大口罍矣。《說文》以鑑爲大盆。《急就篇》顏注云：「盆斂底而寬上。」寬上卽大口，許說蓋與鄭同。《呂氏春秋·慎勢篇》云：「銘篆著乎壺鑑。」《節喪篇》及《墨子·節葬篇》並作「壺濫」。鑑俗作「甌」，《廣韻》去聲五十九陷云「甌，大瓮似盆」是也。《司烜氏》及《攻工記》攻金之工，又有鑿燧之鑿，與此鑑字同而義別。云「以盛冰，置食物于中，以禦溫氣」者，于注例當作「於」，各本並誤。春夏之時，食物得溫氣則易敗，故用鑑盛冰，置食物於冰上以寒之也。《玉燭寶典》引干寶注云：「鑑，金器，盛飲食物，以置冰室，使不茹餒也。」案依干說，鑑盛飲食不盛冰，與鄭義小異。據下云冰鑑，則干義非也。云「春而始治之，爲二月將獻羔而啓冰」者，謂啓冰則須用鑑，故先一月豫治之也。《詩·豳風·七月》云：「四之日其蚤，獻羔祭韭。」《月令》云：「仲春之月，天子乃鮮羔開冰，先薦寢廟。」鄭注云：「鮮當爲獻，聲之誤也。獻羔謂祭司寒也。祭司寒而出冰，薦於宗廟，乃復賦之。」《左·昭四年傳》云：「祭寒而藏之，獻羔而啓之，公始用之。」鄭兼用此諸文，啓冰在夏正二月後，夏頒冰

① 「政」，原作「正」，據《周禮漢讀考》改。

在夏正四月，蓋啓後兩月，始頒之也。凡外內饗之膳羞，鑑焉。凡酒漿之酒醴亦如之。酒醴見溫氣

亦失味。酒漿，酒人、漿人也。

【疏】「凡外內饗之膳羞鑑焉」者，此與外饗、內饗爲官聯，彼二官並於凌人取冰鑑也。

賈疏云：「謂王后及世子，并饗耆老孤子之等。以下文云

祭祀，此經直云膳羞，明非祭祀也。二月之後，皆須鑑以盛

冰，故云鑑焉。」云「凡酒漿之酒醴亦如之」者，此與酒人、漿

人爲官聯也。賈疏云：「酒謂酒人之酒，謂三酒五齊，舉酒

而言。漿人之醴，謂六飲，舉醴而言。亦如之者，亦以鑑盛

冰。」注云「酒醴見溫氣亦失味」者，酒醴得溫則酸而失

味也。《楚辭·招魂》「凍飲」，王注謂「盛夏取清醇，居之冰

上，然後飲之，酒寒涼，又長味好飲也」。是亦酒用冰取寒

不失味之一端。云「酒漿，酒人、漿人也」者，明與外內饗同

爲官名也。祭祀，共冰鑑；賓客，共冰；不以鑑

往，嫌使停膳羞。【疏】「祭祀共冰鑑」者，謂共冰并共鑑以

盛之。賈疏云：「此云祭祀者，謂天地、社稷及宗廟之等皆

共鑑。」云「賓客共冰」者，謂共致之賓客之館也。賈疏云：

「謂諸侯來朝王，禮之以飧及饗餼，直共冰以往，無鑑也。」

注云「不以鑑往，嫌使停膳羞」者，冰用鑑者，爲置膳羞

其中，久不失味。賓客膳羞，當共新者，嫌使停宿，故不以鑑往也。大喪，共夷槃冰。夷之言尸也。實冰於夷

槃中，置之尸牀之下，所以寒尸。尸之槃曰夷槃，牀曰夷

牀，衾曰夷衾，移尸曰夷于堂，皆依尸而爲言者也。《漢禮

器制度》，大槃廣八尺，長丈二尺，深三尺，漆赤中。【疏】

「大喪共夷槃冰」者，《左傳》所謂喪浴用冰也。賈疏云：

「亦謂三月已後遭大喪，則共夷槃及冰，舉王喪共，后、世子

及三夫人已下小喪亦共之。但王及后有夷槃，自外當與諸

侯已下同大槃等；其世婦已有冰，則與大夫同；女御與

士同，無冰，見賜乃有也。」注云「夷之言尸也」者，《喪

大記》注同。夷尸音近，得轉相訓。《士喪禮》注亦云「夷

槃，承尸之槃」。呂飛鵬引成十七年《左傳》「一朝而尸三

卿」，《韓非子》載厲公語曰「吾一朝而夷三卿」，是夷尸訓得

通也。云「實冰於夷槃中，置之尸牀之下，所以寒尸」者，

於舊本誤「于」，今據宋婺州本、建陽本正。《喪大記》云：

「君設大槃造冰焉，大夫設夷槃造冰焉，士併瓦槃，無冰，設

牀檀第。」鄭注云：「造猶內也。檀第，袒簣也，謂無席如浴

時牀也。禮自仲春之後，尸既襲，既小斂，先內冰盤中，乃

設牀於其上，不施席而遷尸焉。秋涼而止。士不用冰，以

瓦爲盤，併以盛水耳。」孔疏云：「既襲謂大夫也，既小斂謂

士也，皆是死之明日。若天子諸侯，亦三日而設冰也，在襲斂之前也。」林喬蔭云：「《喪大記》注以襲在室中，小斂後則俛於堂。明此兩處皆先於牀下造冰，孔疏誤會注意。士之有冰者，禮明於陳襲事之後未浴之前言用夷槃，則固在死之本日，未至厥明。」案：林說是也。云「尸之槃曰夷槃，牀曰夷牀，衾曰夷衾，移尸曰夷于堂，皆依尸而爲言者也」者，于，黃丕烈校改「於」。阮元云：「宋本無『者』，案疏亦無『者』，諸本蓋衍。」案：黃、阮校是也。此廣證名夷之義。《既夕禮》「夷牀」鄭注云：「朝正柩用此牀。」又《士喪禮》云：「士舉，男女奉尸夷于堂，幘用夷衾。」注云：「俛之言尸也。夷衾，覆尸柩之衾也。今文俛作夷。」案：俛夷字同。《喪大記》亦作夷，是鄭所據也。引《漢禮器制度》者，賈疏云：「叔孫通前漢時作《漢禮器制度》，多得古之周制，故鄭君依而用之也。依《制度》云「天子大槃，廣八尺，長丈二尺，深三尺，漆赤中」。此經雖云夷槃，無形制，故依焉。若然，此周謂之夷槃，漢謂之大槃，是別大異名。案：《喪大記》君設大盤者，彼諸侯，不敢與天子同名夷盤，故名大盤。彼大夫云夷盤者，卑不嫌得與天子同名，其制則小也。《釋文》云：「漆赤中，用朱漆其中。」詒讓案：《漢禮器制度》，蓋卽《後漢書·曹褒傳》所云「叔孫通《漢儀》十二篇」。

王充《論衡·謝短篇》云「高祖詔叔孫通制作《儀品》十六篇」，亦卽是書。惟篇數不同，未知孰是。《喪大記》注引《漢禮》，文與此同，彼注又云：「夷槃小焉。《周禮》天子夷槃，《士喪禮》君賜冰亦用夷槃，然則其制宜同之。」據彼注說，則漢禮夷槃小於大槃。鄭意此經夷槃爲天子禮，亦卽《禮記》之大槃，其制度當與漢大槃同，故引以爲釋也。夏

頒冰，掌事。暑氣盛，王以冰頒賜，則主爲之。《春秋

傳》曰：「古者日在北陸而藏冰，西陸朝覲而出之。」【疏】

「夏頒冰掌事」者，賈疏云：「據頒賜羣臣言。掌事者，謂主此賜冰多少，合得不合得之事。」注云「暑氣盛，王以冰

頒賜，則主爲之」者，此亦讀頒爲班。班，賜也。見《大宰》

注。《鄭志》引此經亦作「班冰」。《大戴禮記·夏小正》「三

月頒冰」，傳云：「頒冰也者，分冰以接授大夫也。」彼頒冰

在三月，與此時異而事則同。賈疏云：「謂二月之時，蠅蟲

已生，公始用之。四月以後，暑氣漸盛，則賜及羣下。」引

《春秋傳》者，《左》昭四年傳，申豐曰：「古者日在北陸而藏

冰，西陸朝覲而出之。其藏冰也，深山窮谷，固陰沍寒，於

是乎取之。其出之也，朝之祿位，賓食喪祭，於是乎用之。

其藏之也，黑牡秬黍，以享司寒。其出之也，桃弧棘矢，以

除其災。其出入也時，食肉之祿，冰皆與焉。大夫命婦，喪浴用冰。祭寒而藏之，獻羔而啓之，公始用之。火出而畢賦。自命夫命婦，至於老疾，無不受冰。」賈疏云：「《爾雅》云：『北陸，虛也。西陸，昴也。』服氏云：『火出，於夏爲三月，於商爲四月，於周爲五月。陸，道也。北陸言在，謂十二月日在危一度。西陸朝覲不言在，則不在昴，謂二月在婁四度，謂春分時，奎婁晨見東方而出冰，是公始用之。』今此鄭注引朝覲而出之，謂經夏頒冰，則西陸朝覲而出冰，羣臣用之。若然，日體在昴在三月內，得爲夏頒冰者，據三月末之節氣，故證夏頒冰。此言夏，據得夏之節氣。《春秋》言火出者，據周。至於《七月》詩「二之日鑿冰，三之日納於凌室，四之日其蚤，獻羔祭韭」。孫皓問：「藏之既晚，出之又早何？」鄭荅：「豳土晚寒，故夏正月納冰。夏二月仲春，大族用事，陽氣出地，始溫，故禮應開冰先薦寢廟，是公始用之也。」案：據賈引服說，西陸朝覲，謂在二月，是月卽出冰，出冰卽獻羔啓冰，公始用之。《左傳》杜注則云「謂夏三月，日在昴畢，蟄蟲出而用冰。春分之中，奎星朝見東方」。是謂西陸朝覲在二月時，則公始用冰，而出冰則在三月，又與服小異。《詩》、《左傳》孔疏並引《鄭志》荅孫皓問云：「西陸朝覲，謂四月立夏之時，《周禮》夏班冰是也。」是

鄭說西陸朝覲，又爲四月，故引以證此經夏頒冰，與二月開冰爲二事。《月令》孔疏亦云：「鄭以爲四月之時，日在畢昴之星，朝見東方，於時出冰，以頒賜百官。若其初出薦廟，時在二月。」案：孔述鄭義甚析。鄭謂立夏昂朝覲東方，與《夏小正》四月昴則見之文正合，故《左傳疏》引劉炫亦從其說。賈疏乃謂鄭據三月末之節氣，非也。但以《左傳》文義推之，先藏冰，後出冰，畢賦更在其後，敘次不容淆混。若依鄭義，則四月出冰，三月乃云畢賦，於理難通。審文校義，西陸之名，通咳白虎七宿，服說塙鑿，不可易也。至申豐云「火出而畢賦」，服據昭十七年傳梓慎語，釋爲夏之三月，以《左》證《左》，亦自允當。杜則云「火星昏見東方，謂三月四月中」。杜意蓋因此經有夏頒冰之文，故兼三四兩月爲釋。據《夏小正》三月頒冰之文，則服說專指三月，得之。竊謂頒冰者，隨時授用，非必盡在一時。三月之末，暑氣初生，容已有頒冰之事。至四月以後，暑氣大盛，則所頒尤多。《左傳》及《夏正》據其初頒時言之，故繫之三月；此經則據其頒多時言之，故繫之夏。明自孟夏至季夏，一時三月，頒冰之事，凌人悉掌之。斯乃立文有異，於事無悖。此經通例，凡紀時者，皆據夏正。頒冰是夏非春，與《左傳》、《夏正》之文，不能強合也。秋，刷。刷，清

也。鄭司農云：「刷除冰室，當更內新冰。」玄謂秋涼，冰不用，可以清除其室。【疏】注云「刷，清也」者，《爾雅·釋詁》文。郭注云：「埽刷皆所以爲潔清。」《說文·刀部》云：「刷，刮也。」《又部》云：「刷，飾也。」此刷卽刷之借字。《封人》注亦云「刷治潔清」。鄭司農云「刷除冰室，當更內新冰」者，謂豫刷除冰室，爲十二月內新冰之備也。云「玄謂秋涼冰不用，可以清除其室」者，後鄭意秋時，去內新冰時尚遠，故止爲清除其室，不用先鄭義也。

籩人掌四籩之實

籩，竹器如豆者，其容實皆四升。【疏】「掌四籩之實」者，此並與醢人爲官聯也。祭祀以籩實乾物，分四次薦之。朝事加籩，皆八籩。饋食，據賈說亦同。羞籩則二籩，《郊特牲》所謂鼎俎奇而籩豆偶是也。

注云「籩，竹器如豆者」者，《論語·述而》皇疏云：「竹曰籩，木曰豆。豆盛菹醢，籩盛果實，並容四升。柄尺二寸，下有跗也。」案：籩與豆形制大同，蓋亦有校有鐙，但編竹作之爲異，故《爾雅·釋器》謂之竹豆。詳《敍官》及《瓶人》疏。賈疏云：「皆面徑尺柄尺，亦依《漢禮器制度》知之也。」云「其容實皆四升」者，賈疏云：「據其籩之所受則曰容，據其所實體實等則曰實。四升亦約與豆四升

同也。」案：豆容四升，見《瓶人》職。朝事之籩，其實體、蕡、白、黑、形鹽、臠、鮑魚、鱸。蕡，臯實也。

鄭司農云：「朝事謂清朝未食，先進寒具口實之籩。熬麥曰體，麻曰蕡，稻曰白，黍曰黑。築鹽以爲虎形，謂之形鹽，故《春秋傳》曰：鹽虎形。」玄謂以《司尊彝》之職參之，朝事謂祭宗廟薦血腥之事。形鹽，鹽之似虎者。臠，腓生魚爲大臠。鮑者，於樞室中糗乾之，出於江淮也。鱸者，析乾之，出東海。王者備物，近者腥之，遠者乾之，因其宜也。今河閒以北，煮種麥賣之，名曰逢。燕人膾魚方寸，切其腴以啗所貴也。【疏】「朝事之籩」者，謂宗廟之祭，第一次所薦之籩也。賈疏云：「此言朝事，謂祭廟二灌之後，祝延尸於戶外，后薦此八籩。」江永云：「《內宰》、《司尊彝》疏，后薦朝事豆籩，在延尸出戶迎牲未入之時。《禮運》孔疏，在升首之後，薦腥之前。今從賈疏。蓋尸出在堂，席前不可空，故先設豆籩。」案：江說是也。《通典·吉禮》謂尸初出戶時，及薦腥之後，有兩次薦豆籩，尤誤。互詳《內宰》、《司尊彝》疏。《左傳》僖二十二年孔疏云：「此等所陳，雖爲祭祀，下云賓客亦如之，是賓客與祭祀不異。」云「其實體、蕡、白、黑、形鹽、臠、鮑魚、鱸」者，《釋文》云：「體，芳弓反。徐

又芳勇反。或郎第反。」嚴可均云：「郎第從豐聲，蓋本或作麴矣。」案：嚴說是也。然鄭以逢釋麴，《說文·麥部》「麴讀若馮」，則自以諧豐聲爲正，不當作麴，陸所載或音不足據。此八籩於四等籩爲最尊，諸侯以下亦通用之，而數有降損，不得備用。故《左傳》魯饗周公閱，辭曰黑形鹽；《有司徹》禮，上大夫賓尸四籩，則用麴黃白黑是也。賈疏云：「八籩者，則麴爲熬麥，一也。黃爲麻子，二也。白爲熬稻米，三也。黑爲熬黍米，四也。形鹽，鹽似虎形，五也。麴，以魚肉爲大羹，六也。鮑，以魚於楅室糗乾之，七也。鱣爲乾魚，八也。」注云「黃，泉實也」者，《弓人》注同。

《說文·艸部》云：「黃，櫟香艸。葩，泉實也，重文櫟，葩或从麻黃。」又《尤部》云：「泉，麻也。」此黃卽櫟之借字。《爾雅·釋草》云：「泉，麻。廣，泉實。」《御覽·百卉部》引吳普《本草》云：「麻子一名麻廣。」賈疏云：「案《喪服》云「苴經」，子夏傳云：「苴，麻之有黃。」黃是麻之子實也。又案《疏》衰裳齊牡麻經，子夏傳云：「牡麻者，泉麻也。」則泉麻謂雄麻也。若然，泉麻無實，而解黃爲泉實者，舉其類耳。」程瑤田云：「麻，大名也。無實者泉，有實者苴，有實則有黃矣。北方蓺麻，三月下種，夏至前後，牡麻開細碎花，色白而微青。苴麻不作花而放勃，勃與花初胎時相似，名之

曰黃，卽麻實之穉者。牡麻俗呼花麻，花落後，卽先拔而漚之，剥取其皮，是爲夏麻。苴麻俗呼子麻，八九月間，子熟則落，農人拾取之。《詩》言「九月叔苴」。叔，拾也。拾取子盡，乃刈漚其皮而剥之，是爲秋麻。牡麻有花無黃，言黃則子見，故《禮經》數穀但曰黃，注者並曰泉實，而《喪服》疏引孫炎，直以麻子釋黃也。」劉寶楠云：「《玉篇》：「有子曰苴，無子曰泉。」《列子·楊朱篇》：「昔人有美戎菽甘泉者。」《呂氏春秋·審時篇》：「得時之麻，厚泉以均。」《列子》、《呂覽》所云，並謂泉實。然則泉是大名，有子無子皆得稱之。而《玉篇》別言之者，有子可通言泉，無子不可通言苴也。《廣韻》乃謂「有子曰泉，無子曰苴」，非是。李時珍《本草綱目》云：「大麻卽今火麻，亦曰黃麻。」案：依李說，則九穀之麻實曰黃，卽今之火麻人是也。」程瑤田說同。鄭司農云「朝事，謂清朝未食，先進寒具口實之籩」者，先鄭不以此朝事爲祭祀之事，謂王朝起未食時，先進餅餌爲口實也。寒具者，《北堂書鈔·飲食部》引《通俗文》云：「寒具謂之餲。」《齊民要術》云：「環餅一名寒具，以蜜調水浸麵。」《北戶錄》注引《證俗音》云：「鱸饅，內國呼爲環餅，亦呼寒具。」惠士奇云：「《晏子春秋》曰：「晏子侍于景公，朝寒，公曰：請進暖食。」暖食者，漢之寒具也。先鄭謂朝事者，清

朝未食，先進寒具口實之籩，則饋食加羞，皆非祭禮，乃王者之饋食燕食可知矣。」云「熬麥曰糴」者，《有司徹》「糴黃設于豆西」。^①注云：「糴，熬麥也。」《方言》云：「熬，熬煎糴，火乾也。凡以火而乾五穀之類，自山而東，齊楚以往謂之熬。」程瑤田云：「《荀子·富國篇》：『午其軍，取其將，若撥糴。』蓋麥乾煎則質輕，撥去之甚易，故以為況。」詒讓案：《說文·火部》云：「熬，乾煎也。重文熬，熬或从麥作。」蓋即緣熬麥而制字。又《鬲部》云：「鬲，熬也。」鬲，《方言》作「聚」，今俗書作「炒」。古所謂熬，即今所謂炒也。《春秋繁露·祭義篇》云：「夏上尊實。尊實，糴也，夏之所初受也。」又《四祭篇》云：「杓者，以四月食麥也。」董子說夏上糴，蓋亦以為熬麥。但糴不可實於尊，尊疑當作算，算筭字通，筭與籩形制同。云「麻曰黃」者，以下三者，並冢熬為文。《有司徹》、《內則》注並云黃熬，臬實也。云「稻曰白」者，《有司徹》「婦贊者執白黑以授主婦」。鄭注云：「白，熬稻。」《左傳》僖三十年杜注同。劉寶楠云：「管子·地員篇『五傑之土，其種白稻』是稻偁白也。」程瑤田謂白當為白稷，亦通。云「黍曰黑」者，《有司徹》注云：「黑，熬黍。」《左傳》杜注同。賈疏云：「《爾雅》有秬黑黍，故知黑是黍。」云「築鹽以為虎形，謂之形鹽」者，《說文·竹

部》云：「築，擣也。」《釋名·釋言語》云：「築，堅實也。」此謂擣鹽使堅，又刻為虎形也。云「故《春秋傳》曰鹽虎形」者，賈疏云：「《左氏》僖三十年冬，王使周公閱來聘，饗有昌歜、白黑形鹽。」辭曰：「國君文足昭也，武可畏也，則有備物之饗以象其德，薦五味，羞嘉穀，鹽虎形。」服云「剋形」。非是築剋為之，故後鄭不從也。詒讓案：剋與刻通，服說與先鄭同。《呂氏春秋·本味篇》云「大夏之鹽」，高注云：「大夏，澤名，或曰山名，在西北。鹽，形鹽。」案：形鹽即戎鹽。《御覽·飲食部》引《涼州異物志》，說戎鹽，土人鑊為虎形，殆古之遺制與？詳《鹽人》疏。云「玄謂以《司尊彝》之職參之，朝事謂祭宗廟薦血腥之事」者，破先鄭之說。謂此朝事即《司尊彝》朝踐之節也。彼注云：「朝踐，謂薦血腥，酌醴，始行祭事，后於是薦朝事之豆籩。既又酌獻。」此於祭宗廟九獻，當三獻之前，故鄭據以為說。謂之朝事者，《祭義》云：「二端既立，報以二禮，建設朝事，燔燎羶薌，見以蕭光，以報氣也。薦黍稷，羞肝肺首心，見間以俛觶，加以鬱鬯，以報魄也。」彼注亦云：「朝事，謂薦血腥時也。薦黍稷，所謂饋食也。」孔疏云：「朝事謂旦朝祭

① 「糴黃」，原倒，據《儀禮·有司徹》乙。

事。」又《郊特牲》云「坐尸於堂」，注云：「謂朝事時也。朝事延尸於戶西，南面，布主席，東面。時尸薦以籩豆。」詒讓案：《祭義》以朝事與薦黍稷爲二禮，與此經以朝事與饋食並舉同，足證朝事即朝踐，不當如先鄭清朝進口實之說也。賈疏云：「祭宗廟無血，鄭云薦血腥者，鄭注《論語》亦云『禘祭之禮，自血腥始』，皆謂毛以告純，血以告殺。是爲告殺時有血，與朝踐薦腥同節，故連言血耳，非謂祭血也。」《司尊彝》疏又云：「《禮器》云『郊血大饗腥』，則享祭宗廟無血，此云薦血腥者，謂肉，非謂如別薦血也。」案：《禮器》孔疏引熊氏說同，即賈所本。孔氏駁之云：「案：《詩·小雅》論宗廟之祭，云『執其鸞刀，以啓其毛，取其血膋』，則是有用血之明文也。熊氏云無血，其義非也。」孔又引皇氏云：「郊則先設血也，後設腥與燭孰。大饗之時，血與腥同時俱薦。當朝事迎尸於戶外，薦血腥也。雖以大饗爲主，其宗廟之祭皆然也。」案：皇、孔說是也。《郊特牲》說宗廟之祭，明云血祭盛氣也。孔疏謂在堂上制祭後，又薦血腥，時是血與腥同薦也。互詳《司尊彝》、《大祝》疏。云「形鹽，鹽之似虎者」者，《鹽人》注同。賈疏云：「以爲自然似虎形，此破先鄭築鹽爲虎形也。」案：《左傳》杜注云：「形鹽，鹽形象虎。」依後鄭義。云「膾，腍生魚爲大饗」者，《腊人》

注云：「膾者，魚之反覆。」《有司徹》，尸俎五魚，侑主人皆一魚，皆加膾祭于其上。鄭彼注云：「膾，剝魚時，割其腹以爲大饗也，可用祭也。」案：凡腍肉大饗，獸謂之大，魚謂之膾，通而言之，獸肉亦得謂之膾，故《內饗》注云「膾，腍肉大饗」。此膾鮑魚鱸，並據魚言，故知即腍生魚爲大饗，與《內饗》、《腊人》膾腍爲獸肉別也。云「鮑者，於糲室中糲乾之，出於江淮也」者，《釋文》云：「糲，本又作煬。」案：煬即煨之省，糲俗字也。《說文·火部》云：「煨，以火乾肉。重文，籀文不省。」《廣韻·二十四職》云：「煨，糲同。」又乾，《釋文》作幹，云「又作乾」。阮元云：「賈疏本亦作乾，經乾祿字作乾。陸本作幹，殆非。」案：阮校是也。《漢書》顏注引並與今本同。《方言》說火乾五穀云：「關西、隴、冀以往謂之煨，秦晉之間或謂之聚。」糲糲字同，糲聚音義亦相近。蓋糲糲並爲熬穀，引申爲凡以火乾物之通稱。謂於糲魚肉之室內，爲火以乾之也。賈疏以糲室謂糲土爲室，失之。又《說文·魚部》云：「鮑，鮑魚也。」《釋名·釋飲食》云：「鮑魚，鮑，腐也，埋藏淹使腐臭也。」《史記·貨殖傳》：「鮑千石，鮑千鈞。」裴駰《集解》引徐廣云：「鮑，膊魚也。」《索隱》引《聲類》、《韻集》云：「破鮑不相離謂之膊，完漬云鮑。」《正義》云：「謂破開中，頭尾不相離爲鮑，謂之膊開者

也。《漢書·貨殖傳》顏注云：「鮑，膊魚也。即今不著鹽而乾者也。鮑，今之鮑魚也。鄭康成以爲鮑於煨室中乾之，非也。煨室乾之，即鮑耳。蓋今巴荆人所呼鮭魚者是也。秦始皇載鮑亂臭，則是鮑魚耳。而煨室乾者，本不臭也。《急就篇》注亦云「鮑亦海魚加之以鹽而不乾者也。」案：據許、劉諸說，則鮑爲鮭魚之未乾者，與鄭說異。張守節以鮑爲破開中頭尾不相離，則與《聲類》、《韻集》完漬義亦異。皆未知孰是。惠士奇云：「《史記》『鮑千石，鮑千鈞』。鮑即鮭，析乾爲鮭，破開爲鮑。鮑亦煨乾之，但不析耳。或云鮑魚，誤。凡鮭實皆乾。」案：惠說近是。又《賈子新書·禮篇》云：「周文王使太公望傳太子發。太子嗜鮑魚而太公弗與，曰：『禮，鮑魚不登於俎。』案禮，魚俎皆用生魚，不用鮑鮭。賈子所說，蓋謂鮑魚不登於正俎，非不實於饗，與此經義不相核也。云「鮭者，析乾之，出東海」者，乾，《釋文》亦作「幹」。《庖人》先鄭注云：「鮭，乾魚。」案：鮭蓋與鮑同，惟以驅析其體爲異。《莊子·外物篇》說任公子得大魚，離而腊之，即析乾之義。《續漢書·郡國志》，東海郡屬徐州。云「王者備物，近者腥之，遠者乾之，因其宜也」者，謂臘鮑魚鮭，腥乾兼備也。近者可以生致，故用腥而爲臘，遠者不能生致，故乾之以備物而爲鮑鮭，是各因其

宜也。云「今河間以北煮種麥賣之，名曰逢」者，《續漢·郡國志》，河間郡屬冀州。《說文·麥部》云：「𥽿，煮麥也。讀若馮。」段玉裁云：「此鄭以方言證司農義也。《說文》『讀若馮』，馮與逢音正同，許時馮字已同今馮姓之音矣。」程瑤田云：「《說文》：『熬，乾煎也。煮，烹也。』鄭從司農說，熬麥曰𥽿，又曰煮種麥，與《說文》所謂𥽿煮麥者蓋同，然則熬煮通也。鄭舉漢法之逢，以況籩實，知其所謂煮者，非麥粥也。」又云：「種，疑或爲種𥽿之種，宿麥也。又或爲種麥之𥽿。」案：程說近是。段玉裁說亦同。葛洪《西京雜記》：「九月九日，正月上辰，並食蓬餌。」蓬逢音義同。種，《釋文》音直龍反，正讀爲《內宰》種𥽿之種，^①程說與陸音合。或說則讀爲種，《本草》陶注云：「種即宿麥，亦謂種麥。」此即或說所本。宿麥爲秋冬種大小麥之通名，種則大麥之別種也。楊倞《荀子注》引此注，亦作「種麥」，云「據鄭之說，𥽿，麥之牙蘖也」。是讀種爲種子之種，種種古今字，則當音章勇反矣。今攷此經注，麥麻稻黍四穀，並乾熬，則麥不宜獨爲牙蘖。楊說雖或隋唐舊義，然鄭意必不如是也。又煮麥，宋本賈疏述注作「灸麥」，阮元謂灸當作「炙」。

① 下「種」原訛「𥽿」，據楚本改。

賈所據注，蓋本作炙。種麥，案《說文》亦作「煑麥」，則賈引非也。《御覽·飲食部》引東晉《餅賦》云：「朝事之籩，煑麥爲饘。」亦從許及後鄭說。云「燕人膾魚方寸，切其腴以啗所貴也」者，各本並無「也」字，今從嘉靖本。《說文·肉部》云：「膾，細切肉也。腴，腹下肥也。」《有司徹》注謂膾爲刳魚，割腹爲大臠，是膾正是腴魚腹下腴，故引漢時燕俗語爲證也。饋食之籩，其實棗、栗、桃、乾蓀、榛實。饋食，薦孰也。今吉禮存者，《特性》、《少牢》、《諸侯大夫士祭禮》也。不裸、不薦血腥，而自薦孰始，是以皆云饋食之禮。乾蓀，乾梅也。有桃諸、梅諸，是其乾者。榛，似栗而小。【疏】饋食之籩者，此宗廟之祭，第二次所薦之籩也。賈疏云：「此謂朝踐薦腥後，堂上更體其犬豕牛羊烹孰之時，后薦謂之饋食之籩也。」云「其實棗、栗、桃、乾蓀、榛實」者，賈疏云：「其八籩者：棗一也，栗二也，桃三也，乾蓀謂乾梅，四也，榛實五也。其於八籩，仍少三。案：乾蓀既爲乾梅，經中桃是濕桃，既有濕桃，乾梅，明別有乾桃，則注引《內則》桃諸，鄭云是其乾者。既有濕桃，明有濕梅可知。以乾桃濕梅二者，添五者爲七籩。案桃梅既並有乾濕，則棗中亦宜有乾濕，復取一添前爲八也。必知

此五者之中有八者，案《儀禮·特性》、《少牢》、士二籩二豆，大夫四籩四豆，諸侯宜六，天子宜八。《醢人》饋食之豆有八，此饋食之籩言六，不類。又上文朝事之籩言八，下加籩亦八，豈此饋食在其中六乎？數事不可，故以義參之爲八也。《郊特性》孔疏引熊安生說此經云：「乾蓀之中有桃諸、梅諸，則爲六物，實六籩也。」案：熊說與賈不同，蓋謂桃兼乾濕，而梅棗則否。王紹蘭云：「經文桃與乾蓀並列，乾蓀爲乾梅，則桃亦乾桃。經不言乾桃者，舉乾蓀可知，故鄭注云「有桃諸梅諸」，明以乾蓀爲梅諸，桃爲桃諸，猶恐人誤爲濕物，故注又云「是其乾者」。是知鄭不以桃爲濕桃矣。《鄉射記》「脯用籩」，注：「籩宜乾物也。」禮何以用乾不用濕？濕者，新也。祭主四時，棗與桃梅，濕者不能時有，亦不能同時並有。如煑梅以五月，煑桃以六月，剥棗以八月。若籩實用濕，臨時豈能備物。」案：王駁賈說甚允。吳廷華、姜兆錫說並同。敖繼公據《少牢》「不饋尸禮，四籩棗糗栗脯，謂經棗下脫糗，栗下脫脯。然亦止七籩。孫希旦又據《曲禮》，婦人摯脯脩棗栗榛根皆籩實，議補根爲八籩。黃以周云：「《記》曰「鼎俎奇而籩豆偶」，籩未有用五者，《周官》當有誤文。饋食之籩蓋四，其實棗栗蓀榛，不用桃。《內則》「棗栗榛柿瓜桃李梅杏楂梨」，鄭注謂人君燕食

之庶羞，非用於祭。《韓非子·外儲說左下》云：「魯哀公賜桃與黍，孔子先飯黍而後啗桃。哀公曰：「黍者非飯之也，以雪桃也。」孔子對曰：「黍，祭先王爲上盛，果蓏有六，而桃爲下，祭先王不得入廟。」饋食爲祭之盛禮，則其籩不用桃明矣。鄭注釋乾蓀引桃諸梅諸，今本作桃乾蓀，乃後人以注語增之爾。古人飲酒之禮，籩如豆數，而食禮有豆無籩，饋食用食禮，故籩不必如豆數。」案：黃氏議減籩數，與熊說同，而數小異。但以《禮經》通例攷之，食禮固有豆無籩，而飲酒禮有籩，則數咸與豆同。如《士冠禮》再醺，《士虞禮》獻祝，《特性禮》主婦致爵于主人，皆二籩二豆。《少牢禮》賓尸用四豆四籩。它小禮用脯醢者，則皆一豆一籩。是無籩則已，有則其數未有不與豆相儷者。賈氏八籩之說，殆不可易。黃又議刪經桃字。案：注既釋蓀爲乾梅，而又兼舉桃諸，則鄭本實有桃字，必非後人妄增。《韓子》謂桃不入廟，疑專指生桃言之，熊、黃說似皆未審。竊謂推校《禮經》，凡用饋食之豆，恒配以饋食之籩，如《士虞》《特性禮》並用二籩棗栗配饋食二豆是也。而《既夕禮》大遣奠四豆，脾析、蟬醢、葵菹、羸醢，其四籩爲棗、糗、栗、脯。《士冠禮》再醺，《士喪禮》大斂奠，亦並以栗脯配葵菹羸醢。唯《有司徹》下大夫不賓尸，以棗糗栗脯配韭菹醢

葵菹醢，朝事四豆，則變禮也。若然，以禮例推之，則饋食之籩，容有糗脯等，敖說似尚可通。但經文闕略，衆釋紛悟，未敢臆定，謹備著之，以俟商榷。 注云「饋食，薦孰也」者，孰，古熟字。《特性饋食禮》注云：「祭祀自孰始曰饋食。饋食者，食道也。」又《大宗伯》「以饋食享先王」注云：「言饋食者，著有黍稷。」《司尊彝》「秋嘗冬烝，其饋獻用兩壺尊」。注云：「饋獻，謂薦孰時，后於是薦饋食之豆籩。」是在九獻第五獻之前，燭薦體解之時，后薦此豆籩也。詳《膳夫》疏。云「今吉禮存者，《特性》《少牢》，諸侯之大

夫士祭禮也」者，《儀禮·特性饋食禮》第十五、鄭《目錄》云：「特性饋食之禮，謂諸侯之士祭祖禰，非天子之士。」又《少牢饋食禮》第十六、《目錄》云：「諸侯之卿大夫，祭其祖禰於廟之禮。羊豕曰少牢。」賈《特性》疏云：「《曲禮》『大夫以索牛，士以羊豕』。彼天子大夫士也。此《儀禮》特性、少牢，故知是諸侯大夫士也。」案：鄭以天子諸侯祭禮亡，故故舉諸侯大夫士禮之存者爲說也。云「不裸、不薦血腥，而自薦孰始，是以皆云饋食之禮」者，賈疏云：「若天子諸侯，則有室中二裸、堂上朝踐薦血腥之禮；大夫則無此二者，而自薦孰始。天子諸侯大夫士雖同名饋食，仍有少別。何者？天子諸侯尸食前，仍有饋獻一，是饋孰陰厭，陰厭

後，尸入室食乃獻；大夫士則饋孰與黍稷爲陰厭，陰厭前，無饋獻，以此爲異耳。」云「乾蓀，乾梅也」者，丁晏云：「《說文·艸部》云「蓀，乾梅之屬」，引《周禮》曰：「饋食之籩，其實乾蓀。」後漢長沙王始煮艸爲蓀。蓀或从潦」。《齊民要術》引《廣志》曰：「蜀名梅爲蓀，大如雁子。梅杏皆可以爲油脯，黃梅以熟蓀作之。」云「有桃諸、梅諸，是其乾者」者，《內則》載國君之燕食有此二者，引以證蓀兼有乾桃也。孔疏云：「王肅云「諸，菹也」。謂桃菹、梅菹，卽今之藏桃藏梅也。欲藏之時，必先稍乾之，故《周禮》謂之乾蓀。」詒讓案：凡乾梅乾桃，皆煮而暴之。《大戴禮記·夏小正》云「五月煮梅，六月煮桃」，傳並云煮以爲豆實也。籩豆通稱。《釋名·釋飲食》云：「桃諸，藏桃也。諸，儲也，藏以爲儲，待給冬月用之也。」云「榛，似栗而小」者，榛卽柔之借字。《說文·木部》云：「柔，果實如小栗。《春秋傳》曰：「女摯不過柔栗。」」《詩·鄘風·定之方中》，孔疏引陸璣疏云：「榛，栗屬。有兩種：其一種之皮葉皆如栗，其子小，形似杼子，味亦如栗，所謂樹之榛栗者也；其一種枝葉如木蓼，生高丈餘，作胡桃味，遼東、上黨皆饒。」又云：「桂陽有柔栗，蓼生，大如杼子，中人皮子形色與栗無異也，但差小耳。」加籩之實，蓀、芡、棗、脯、蓀、芡、棗、脯。

加籩，謂尸既食，后亞獻尸所加之籩。重言之者，以四物爲八籩。蓀、芡也。芡，雞頭也。栗與饋食同。鄭司農云：「蓀芡脯脩。」【疏】「加籩之實」者，此宗廟之祭，正獻之後所羞之籩也。

注云「加籩謂尸既食，后亞獻尸所加之籩」者，謂在九獻第六獻之後，尸十五飯畢時。《司尊彝》注云「尸卒食，王醕之，后酌亞獻，內宗薦加豆籩」。是也。賈疏云：「案《春官·內宗》云：「掌宗廟之祭祀，薦加豆籩。」以其內宗所薦，明主於后。又見《特牲》主婦獻尸云：「宗婦執兩籩於戶外，主婦受，設於敦南。」主人獻尸之時，不見有設籩之事，故知唯主於后也。《少牢》主婦不設籩者，以其當日賓尸故也。其下大夫不賓尸者，亦與士同也。」詒讓案：加籩之薦，與加爵相因，故《內宗》注釋加豆籩爲加爵之豆籩是也。攷《左傳》僖二十二年云：「楚子入享於鄭，九獻，加籩豆六品。」又昭六年云：「季孫宿如晉，晉侯享之有加籩。武子退，使行人告曰：「小國之事大國也，得貺不過三獻，今豆有加，臣下勿堪。」」據《左傳》說，則饗禮亦有加籩豆，然在九獻三獻之外。而鄭此注及《內宰》、《司尊彝》注，並以九獻第八獻九獻爲加爵加豆籩，卽薦於彼時，則以加爵爲在正獻之內。《禮運》孔疏引崔靈恩則云：「尸十五飯後，王醕尸爲七獻，后醕尸爲八獻，諸侯爲賓者獻尸

爲九獻。九獻之後，謂之加爵。」孔氏又云：「案《特牲》有三加，則天子以下加爵之數，依尊卑不祇三加也。故《特牲》三加爵，別有嗣子舉奠。《文王世子》諸侯謂之上嗣，舉奠亦當然。」陳祥道申崔義云：「《籩人》、《醢人》言朝事饋食之籩豆，則朝踐饋獻之籩豆也。言加籩加豆，則加爵之籩豆也。《特牲禮》主人主婦既醑尸，然後長兄弟衆賓長爲加爵，則加爵不施於亞獻之節。鄭說誤。」案：崔、陳謂加爵在正獻之外，是也。薛季宣、鄭鏐說同。江永、金榜亦謂薦加豆籩，當在九獻後諸臣獻尸時，不在八獻后亞王醑尸時，並足正鄭、賈之誤。互詳《內宰》、《司尊彝》、《內宗》疏。云「重言之者，以四物爲八籩」者，四物，物各二籩，合成八籩，嫌物各一籩，故重言之。云「菱，芰也」者，《說文·艸部》云：「菱，芰也。楚謂之芰，秦謂之薜荔。」《爾雅·釋艸》：「菱，薜荔。」郭注云：「菱，今水中芰。」惠士奇云：「《楚語》：『屈到嗜芰，有疾，屬曰：『祭我必以芰。』』及祥，將薦芰，屈建命去之。」愚謂菱芰栗脯，分實八籩，天子之祭禮也。《特牲》、《有司徹》不聞有菱芰，大夫而薦芰，是僭用天子之禮也。故屈建曰「干國之典」。說者謂芰非祭物，誤。云「芰，雞頭也」者，《說文·艸部》同。《方言》云：「葍，芰，雞頭也。北燕謂之葍，青徐淮泗之間謂之芰，南楚江湖

之間謂之雞頭，或謂之雁頭，或謂之烏頭。」崔豹《古今注》云：「芰，雞頭也。一名雁頭，一名芰。葉似荷而大，葉上蹙紐如沸，實有芒刺，其裏如珠，可以療饑。」《神農本草經》云：「雞頭實，一名雁喙實，一名芰。」陶注云：「此卽今葍子，莖上花似雞冠，故名雞頭。」云「栗與饋食同」者，饋食，栗一籩。此加籩，栗二籩，所實則同。醢人四豆，朝事與加豆，同用醢醢，饋食與加豆，同用魚醢，則一物不嫌兩薦也。經作臬，注作栗者，亦經用古字，注用今字之例。鄭司農云「菱芰栗脯」者，段玉裁云：「《司農》云」之下，脫「當言」二字，謂菱芰栗脯，當作菱芰栗脯。脩，段脩也。栗與饋食複，故易之。」詒讓案：此先鄭改字以避兩薦也。《有司徹》，主婦獻尸侑主人，並有股脩。若然，先鄭以此脯爲乾肉之不鍛者，與脩小異，故並薦之。後鄭則以脯脩同物，而栗不妨與饋食同，故不從。《士冠禮》再醢兩籩，《既夕禮》大遣奠四籩，皆以栗脯並薦，亦其證也。羞籩之實，糗餌、粉飧。羞籩，謂若《少牢》主人酬尸，宰夫羞房中之羞于尸、侑、主人、主婦，皆右之者。故書飧作芰。鄭司農云：「糗，熬大豆與米也。粉，豆屑也。芰字或作飧，謂乾餌餅之也。」玄謂此二物皆粉稻米黍米所爲也。合蒸曰餌，餅之曰飧。糗者，搗粉熬大豆，爲餌飧之黏著，以粉之耳。

餌言糗，饗言粉，互相足。【疏】「羞籩之實」者，此亦宗廟之祭，正獻之後，加爵之前，所羞之籩也。賈疏云：「此當王酬尸，內饗進之於尸侑等者也。」案：賈謂王酬尸後，進羞籩，此於王祭宗廟，當在明日繹祭時，依注義也。《玉藻》孔疏說同。然據後《世婦》云「及祭之日，涖陳女宮之具，凡內羞之物」。是正祭之日，亦當有此羞籩等之進，注文偶不具耳。詳後。又據《世婦職》，則內羞世婦所掌，故《詩·小雅·楚茨》孔疏云「內羞則世婦薦之」。賈謂內饗進之，於經無徵，不足據也。云「糗餌粉羞」者，賈疏云：「此爲二籩，糗與粉爲一物，恐餌糗黏著籩，故分於二籩之下。」

注云「羞籩謂若《少牢》主人酬尸，宰夫羞房中之羞于尸、侑、主人、主婦，皆右之者」者，《有司徹》文。鄭《目錄》云：「《有司徹》，《少牢》之下篇也。」故此引之稱《少牢》也。彼文於主人酬尸之後云：「尸侑主人皆升筵，乃羞，宰夫羞房中之羞于尸、侑、主人、主婦，皆右之。司士羞庶羞于尸、侑、主人、主婦，皆左之。」注云：「二羞，所以盡歡心。房中之羞，其籩則糗餌粉羞，其豆則醢食糝食。房中之羞，內羞也。內羞在右，陰也。庶羞在左，陽也。」賈疏云：「天子祭祀之禮亡，故取《少牢》大夫禮解之。案《有司徹》，上大夫當日賓尸，正祭不設內羞，故於賓尸設之。此天子之禮，賓

尸在明日，則祭祀日當設之。案《少牢》，下大夫不賓尸，賓長致爵受酢，云宰夫羞房中之羞，司士羞庶羞于尸祝主人主婦，內羞在右，庶羞在左。天子之禮，賓長受酢後，亦當設此內羞，庶羞于尸祝及王與后。然鄭不引不賓尸而引賓尸者，以其設內羞之禮同，^①故祇引其一。但正祭設於祝，賓尸設於侑，又賓尸主人酬尸後，正祭賓長受酢後爲異耳。詒讓案：羞籩羞豆，於天子祭禮，薦於何時，經無可攷。注以《少牢》上大夫禮相比況，則王禮當於明日賓尸，尸酬王後，薦於尸侑及王后。其正祭之日進內羞，止見《世婦職》，而注則無文。賈據《少牢》下大夫不賓尸禮推之，謂王禮正祭九獻，諸侯爲賓者，獻尸受酢後，亦有此內羞之薦。《詩·小雅·楚茨》云：「君婦莫莫，爲豆孔庶，爲賓爲客。」毛傳云：「豆謂內羞，庶羞也。繹而賓尸及賓客。」孔疏云：「《有司徹》，大夫賓尸尚有二羞，明天子之正祭有二羞矣。非但正祭所用，至繹又用之，故云繹而賓尸及賓客也。」案：孔意疑亦與賈同。任啓運駁賈正祭之日設二羞於尸祝及王后之說，云：「王不獻祝，王與后未交致爵，內羞、庶羞於何用乎？」案：任謂王不獻祝，是也。賈《鬱人》

① 「同」，原脫，今據《周禮注疏》補。

疏，亦謂天子無獻祝及佐食之事。此疏與彼疏，蓋自相抵牾。至王禮祭日九獻之後，王后自有致爵之禮，故鄭《司几筵》注云「后諸臣致爵，乃設席」，則賈謂正祭有設二羞於王后，說自可通也。以《特牲》、《少牢》二禮推之，蓋王祭日，諸侯爲賓者終獻後，王與后交致爵，則進羞籩羞豆於尸及王后；至長兄弟等爲加爵，則進加籩加豆。經先加籩而後羞籩者，以羞籩輕於加籩，故文不次耳。王禮，經注雖闕略不備，而依大夫士禮推致之，尚可得其端緒也。云「故書資作茨」者，徐養原云：「茨爲資之假借。」鄭司農云「糗，熬大豆與米也」者，《說文·米部》云：「糗，熬米麥也。」案：米蓋謂稻米。程瑤田云：「陳藏器曰：『糗，一名麪，和水服之。河東人以麥爲之，麪者爲乾糗糧。東人以粳米爲之，炒乾磨成也。』」《釋名·釋飲食》云「糗，餗也，飯而磨之使餗碎」是也。然則糗有擣粉者，有未擣粉者。籩實之饔簋白黑。《國語》「設糗一筐以羞子文」，其糗之未擣粉者與？《既夕篇》之四籩，棗糗栗脯，直呼糗餌爲糗，則已擣之糗粉於餌者也。《左傳》：「陳轅頗出奔鄭，道渴，其族轅咺進稻醴梁糗股脩焉。」杜注：「糗，乾飯也。」《公羊傳》：「魯昭公走之齊。高子執簠食與四脰脯，國子執壺漿，曰：吾寡君聞君在外，餽饗未就，敢致糗於從者。」何休注：「糗，糲

也。《左傳》之梁糗，《公羊》之簠食曰致糗，蓋皆謂飯爲糗也。今人炊飯令汁乾，亦謂之乾飯，然則糗之義本寬也。其已擣粉之糗，可和水而服之者，若今北方之麪茶，南方之麪粹，皆其類也。其未擣粉而亦可和水者，則鄭注六飲之涼云「今寒粥若糗飯雜水」是也。其已擣粉亦可餅而食之，若《玉篇》以粳粳爲麪，《廣韻》以爲餅是也。合諸言糗者而觀之，糗之爲言氣也，米麥火乾之，乃有香氣，故謂之糗。《說文》熬米麥之訓，最爲得解，無論擣與未擣也。案：程說是也。《內則》注云：「糗，擣熬穀也。」《書·費誓》孔疏云：「糗謂熬米麥使熟，又擣之以爲粉也。」蓋凡乾熬稻梁黍麥豆諸穀，通謂之糗。先鄭云「熬大豆與米」，後鄭云「熬穀」，許云「熬米麥」，其義一也。惟糗有擣與未擣兩種。先鄭釋糗爲熬豆米，以別於粉之爲豆屑，則謂此糗爲熬而未擣者。粉餌以擣爲宜，故後鄭不從。云「粉，豆屑也」者，《釋名·釋首飾》云：「粉，分也，研米使分散也。」此豆屑亦謂磨熬豆爲粉。知爲豆者，粉餅餌宜用豆也。云「茨字或作資」者，段玉裁云：「謂書亦或作資也。司農從或本。」云「謂乾餌餅之也」者，《釋名·釋飲食》云：「資，漬也，烝燥屑使相潤漬餅之也。餅，并也，溲麪使相合并也。」劉說資與先鄭同，謂乾烝米屑不和水；其爲餅餌者，烝氣潤漬所

成。後鄭則直謂和水爲餅，與先鄭異也。云「玄謂此二物皆粉稻米黍米所爲也」者，稻米謂粳米也，與黍米皆黏，宜爲餌饘，故知粉二者所爲也。《楚辭·招魂》云「粒糗蜜餌」，王注云：「言以蜜和米麪，煎作粒糗，搗黍作餌。」此卽粉黍米之餌也。云「合蒸曰餌，餅之曰饘」者，《說文·鬻部》云：「饘，粉餅也，重文餌，饘或从食耳聲。」《食部》云：「饘，稻餅也，重文粢，饘或从米。」餅，麪饘也。《火部》云：「烝，火氣上行也。」蒸卽烝之段字。段玉裁云：「許說與鄭不同，謂以粳米蒸熟，餅之如麪餅曰饘，今江蘇之饘飯也。粉粳米而餅之而蒸之，則曰餌，今江蘇之米粉餅，米粉團也。粉餅則傳之以熬米麥之乾者，故曰糗餌。饘則傳之以大豆之粉。《米部》曰：「粉，傅面者也。」許不言何粉，大鄭云豆屑是也。」詒讓案：依《許書》，則米屑所爲曰餌，麥屑所爲曰餅，不屑之米所爲曰饘。《急就篇》顏注云：「搜麪而蒸熟之則爲餅，搜米而蒸熟之則爲餌。」《列子·力命篇》張湛注云：「粢，稻餅也。味類乾，米不碎。」說並與許同。據鄭說，則餌用乾粉合烝之，饘則水搜爲餅，不乾烝，二者同用粉，不用米，惟以烝不烝爲異。與許說不同。餌饘散文亦通，故《方言》云「餌謂之糕，或謂之饘」是也。又《初學記·歲時部》、陳元靚《歲時廣記》引干寶注云：「糗餌者，

豆末和屑米而烝之，加以棗豆之味，卽今餌餹也。」案：干說蓋謂搗豆爲末，以粉米屑之上，合烝之，又加以棗使味美也。徐堅所引「味」下，疑有脫字。高承《事物紀原·飲食部》引干注，作「糗餌者，或屑而蒸之，以棗豆之味同食」，亦誤。干說以糗爲豆末，餌爲屑米烝之，並與後鄭同。其用棗者，以助餌之甘，蓋據晉時作烝餅法。《齊民要術》有作粳米棗糯法，亦略相類。餌餹者，《玉篇·食部》云：「蜀人呼蒸餅爲餹。」《類篇·食部》云：「餹，丸餌也。」云「糗者，搗粉熬大豆」者，謂取大豆熬之，又搗之爲粉也。《內則》「糗餌粉餹」，注云：「糗，搗熬穀也，以爲粉餌與饘。」《既夕禮》大遣奠有糗，注亦云以豆糗粉餌。云「爲餌饘之黏著，以粉之耳」者，《釋名·釋飲食》云：「餌，而也，相黏而也。兗豫曰漚浹，就形名之也。」是餌饘潤漬，皆易黏著，故以豆屑粉之使分散也。云「餌言糗，饘言粉，互相足」者，賈疏云：「餌言糗，謂熬之亦粉之，饘言粉，搗之亦糗之，故言互相足也。」凡祭祀，共其籩薦羞之實。薦、羞，皆進也。未食未飲曰薦，既食既飲曰羞。【疏】「凡祭祀共其籩薦羞之實」者，賈疏云：「謂四時禘祫等，皆共其籩。」注云「薦羞皆進也」者，《膳夫》、《庖人》注義同。云「未食未飲曰薦」者，賈疏云：「先薦後獻，祭祀也。據朝踐饋獻時，未獻

前所薦籩豆，朝事饋食之籩是也。」詒讓案：此謂先設之正饌也。《宰夫》注云：「薦，脯醢也。」朝踐饋食之豆籩及脯醢，皆爲正饌。此與《宰夫》注各舉一隅爲釋，詳彼疏。云「既食既飲曰羞」者，《宰夫》注云：「羞，庶羞，內羞也。」賈疏云：「爲尸食後，醑尸訖所進羞，即加籩之實是也。」吳廷華云：「此言加籩，以槩羞籩也。」案：吳說是也。此據後設之加饌言之，加籩豆、羞籩豆及庶羞，皆加饌也。此注與《宰夫》注亦互相備，互詳《宰夫》疏。喪事及賓客之事，共其薦籩羞籩。喪事之籩，謂殷奠時。【疏】「喪事及賓客之事，共其薦籩羞籩」者，賈疏云：「喪事謂大奠時，賓客之事謂享燕時，亦共其薦籩羞籩。」注云「喪事之籩謂殷奠時」者，賈疏云：「殷尤大也。大奠，朔月、月半、薦新、祖奠、遣奠之類也。」吳廷華云：「《儀禮》之例，脯醢皆曰薦，始死即有之，《士喪禮》：『脯醢醴酒奠於尸東是也。』羞止有庶羞。據上疏，則加豆籩亦得曰羞。據《士喪禮》，小斂止有脯醢，則薦籩而已。大斂奠兩豆葵菹苴，兩籩栗脯。兩豆皆饋食之豆，是上疏所謂薦兩籩皆加籩，是則所謂羞也。則大斂已有羞籩，疏止以朔奠以下言，誤也。」

案：吳說是也。《士喪禮》「月半不殷奠」，注云：「殷，盛也。士月半不復如朔盛奠，下尊者。」《曾子問》：「有殷事，

朔月、月半、薦新之奠也。」又《喪服大記》「主人具殷奠之禮」，注云：「殷猶大也。朝夕小奠，至月朔則大奠。」案：凡喪禮之奠有十，惟始卒及朝夕奠爲小奠，其小斂、大斂、朔月、月半、薦新、遷祖奠、祖奠、大遣奠，並有牲體，爲殷奠。此注本兼小斂、大斂奠言之，賈乃漏釋耳。又《釋名·釋喪制》云：「朔望祭曰殷奠，所用殷衆也。」劉氏復偏舉朔望奠爲說，尤未核。其《士喪禮》無月半之殷奠，又朔望無籩。天子朔望皆有奠，其禮尤盛，當與士異也。互詳《牛人》、《喪祝》疏。又案《既夕禮》，大遣奠又有羞籩之糗，《庖人》云「若喪紀之庶羞」，亦此所謂羞籩也。彼注以爲喪祭虞祔，不數喪奠者，以其未立尸也。互詳彼疏。爲王及后世子共其內羞。於其飲食以共房中之羞。【疏】

注云「於其飲食以共房中之羞」者，《有司徹》云「宰夫羞房中之羞」，又云「內羞在左」，故知內羞爲房中之羞，即糗餌、粉簋、醢食、糝食等是也。此即羞籩之實。不及朝踐饋食加籩等者，以其非飲食恒禮所用也。凡籩事，掌之。

醢人掌四豆之實。朝事之豆，其實韭菹、醯醢，昌本、麋臠，菁菹、鹿臠，茆菹、麋

𩇛。𩇛，肉汁也。昌本，昌蒲根，切之四寸爲菹。三𩇛亦𩇛也。作𩇛及𩇛者，必先膊乾其肉，乃後莖之，雜以粱粬及鹽，漬以美酒，塗置甌中百日則成矣。鄭司農云：「麋𩇛，麋肝髓𩇛。或曰麋𩇛，醬也。有骨爲𩇛，無骨爲𩇛。菁菹，韭菹。」鄭大夫讀茆爲茅。茅菹，茅初生。或曰茆，水草。杜子春讀茆爲卯。玄謂菁，蔓菁也。茆，鳧葵也。凡菹𩇛皆以氣味相成，其狀未聞。【疏】「掌四豆之實」者，此並與籩人、醯人爲官聯也。《說文·豆部》云：「豆，古食肉器也。桓，木豆謂之桓。」①《詩·大雅·生民》篇「于豆于登」，毛傳云：「木曰豆，瓦曰登。豆，薦菹𩇛也。登，大羹也。」王涇《大唐郊祀錄》引《三禮圖》云：「豆，以木爲之，受四升，高尺二寸，漆赤中。」案：此四豆以盛菹𩇛，則皆木豆也，與旒人所爲瓦豆異。正字當作桓，經典通作豆。凡祭祀，以豆盛濡物，亦分四次薦之。朝事，饋食加豆皆八豆，羞豆則二豆，與籩人四簋數正相當也。賈疏云：「言四豆之實者，豆與籩並設，節數與四簋同時，亦謂朝事饋食加豆羞豆之實是也。」云「朝事之豆」者，賈疏云：「亦謂朝踐節。八豆並后設之。」云「其實韭菹𩇛，昌本麋𩇛，菁菹鹿𩇛，茆菹麋𩇛」者，《釋文》云：「𩇛，本又作菹。」案：菹卽𩇛之譌，詳後。賈疏云：「於豆內齋菹之類，菜肉通，全物若臠爲菹，

細切爲齋。又不言菹者，皆是齋，則昌本之類是也。」詒讓案：此第一豆亦最尊，故《左·僖三十年傳》魯饗周公閱，辭昌歌。《禮經》惟《聘禮》致饗餼，全用此八豆。《公食大夫禮》六豆，則無茆菹麋𩇛。上大夫八豆，注謂因六豆而加以葵菹、蜆𩇛。《少牢饋食禮》則用韭菹𩇛、葵菹羶𩇛，皆參用饋食之豆。《有司徹》上大夫賓尸，則唯用韭菹𩇛、昌菹𩇛。皆不備用，亦禮之殺也。又案《郊特牲》云：「恒豆之菹，水草之和氣也；其𩇛，陸產之物也。加豆，陸產也；其𩇛，水物也。」注云：「此謂諸侯也。天子朝事之豆，有昌本麋𩇛，茆菹麋𩇛。饋食之豆，有葵菹羶𩇛，豚拍魚𩇛，其餘則有雜錯云也。」《詩·大雅·既醉》孔疏云：「《記》言恒豆、加豆，鄭引朝事、饋食，則以朝事爲恒，饋食爲加，取其水陸相配與《記》同者而證之，以恒加相亞，宜爲朝事與饋食，故不爲饋外之加焉。其餘錯雜者，於《醯人》云朝事之豆，有韭菹菁菹，非水草也；饋食之豆，有蜆蜆𩇛，蜆非陸產，蜆非水物，故言雜錯也。」案：依《郊特牲》注說，則四豆惟朝事爲恒豆，饋食以下三豆並爲加豆，與此經加豆爲第三豆異。《郊特牲》孔疏謂彼加豆，亦卽此經第四豆，與《詩

①「桓」，原作「豆」，據《說文》改。

疏》侑異，於義雖可通，然非鄭悒也。但此經四豆之實，水陸錯出，與《禮記》所說，亦不相應。鄭以爲天子禮異，理或然矣。

注云「醢，肉汁也」者，《說文·肉部》云：「𩚑，肉汁滓也。」又《血部》云：「𩚑，血醢也。《禮》有𩚑醢，以牛乾脯梁藟鹽酒也。」無醢字。《聘禮》注云：「醢，醢汁也。」又《公食大夫禮》注云：「醢醢，醢有醢。」畢沅校本《釋名·釋飲食》云：「醢多汁者曰醢。醢，滓也。宋魯人皆謂汁爲滓。」《毛詩·小雅·行葦》傳云：「以肉曰醢醢。」案：《說文》云「禮有𩚑醢者」，許所見《儀禮》、《周禮》經文，並作醢醢也。二徐本作《禮記》，非。今從段玉裁校刪。依許說，則𩚑爲肉汁滓，醢爲血醢，二義不同。然《禮經》無血醢，而鄭說醢醢，正與許書𩚑字說解同。竊謂正字當本作𩚑，醢乃後來孳生字。二《禮》及《毛詩》並作醢，此經別本又作𩚑，皆醢之變體。漢時禮家說，蓋有以醢爲血醢者，許遂別以醢隸《血部》，實則與𩚑是一字也。凡《禮經》單言醢，不著牲獸者，並即三牲之醢醢，是肉非血，許說未塙。段玉裁云：「許云汁滓者，謂醢不同滓也。凡醢醢皆有汁，而牛乾脯獨得醢名者，六畜不言牲名，他醢醢不言醢，立文錯見之法。汁即鹽酒所成，醢皆牲物，^①非有孰汁也。毛傳云「以肉曰醢醢」，大鄭云「醢醢肉醬也」，皆言肉以包汁。

不言何肉者，蓋謂《周禮》六牲之肉，下文醢醢麋鹿兔鴈，在六獸六禽內可證也。許但言牛乾脯者，舉六牲之一以包其餘也。」案：段說是也。凡醢皆有汁，故實於豆。《行葦》孔疏謂「肉醢特有多汁，故以醢名。其無汁者，自以所用之肉魚鴈之屬爲名」，非也。又《內則》：「記大夫庶羞二十，牛炙、牛載、羊載、豕炙之下，並有醢。孔疏引熊氏云：「此經承牛羊之下，則是牛肉羊肉之醢。以其庶羞，故得用三牲爲醢。若其正羞，則不得用牲，故《醢人職》無云牲之醢也。」今案：熊說亦非也。此經醢醢，即是三牲之醢，安得謂《醢人職》無牲醢乎？云「昌本，昌蒲根」者，《公食大夫禮》注云：「昌本，昌蒲本菹也。」《呂氏春秋·任地篇》云：「冬至後五旬七日，菖始生。」高注云：「菖，菖蒲，水草也。」又《克己篇》注云：「本，根也。」昌蒲根菹，又謂之昌歌。《左》僖三十年傳云：「饗有昌歌。」《遵人》疏引《左傳》服注云：「昌歌，昌本之菹。」歌，《玉篇·欠部》作「𩚑」，義未詳。《韓非子·說難篇》、《呂氏春秋·遇合篇》，並云文王嗜昌蒲菹。高注亦云「昌本之菹」。《本草·草部》云：「菖蒲，一名昌陽，生上洛池澤及蜀郡嚴道，一寸九節者良。」案：

①「醢」，原誤作「言」，今據《說文解字注》改。

古昌本當用此。《本草》別有白昌，《證類本草》引陳藏器云：「即今之溪蓀也。一名昌陽，生水畔，人亦呼爲菖蒲，一名水菖蒲，根色正白，去蚤蝨。」白昌不可爲菖，非古昌本也。云「切之四寸爲菹」者，賈疏云：「蓋以一握爲限，一握則四寸也。」詒讓案：《士虞禮》注云「菹刊」，刊即切也。昌本後文在五齋之內，此云爲菹者，菹齋散文得通。《有司徹》亦云「昌菹」。其切之皆以四寸爲度也，詳後疏。云「三鬻亦醢也」者，對文則有骨爲鬻，無骨爲醢，散文則通。《有司徹》凡鬻亦並通曰醢。云「作醢及鬻者，必先膊乾其肉，乃後莖之，雜以粱糲及鹽，漬以美酒，塗置甑中，百日則成矣」者，此釋作醢及鬻之法。膊乾者，《說文·肉部》云：「膊，薄脯，膊之屋上。」《方言》云：「膊，暴也。燕之外郊，朝鮮洌水之間，凡暴肉謂之膊。」《釋名·釋飲食》云：「膊，迫也，薄豚肉，迫著物使燥也。」^①莖者，《說文·艸部》云「斬芻也」。《急就篇》顏注云「細斫稟也」。此引申爲細切肉之稱。蓋先析肉爲薄片，暴乾之爲脯，復細切之，和粱糲等物以爲之。《說文》說作醢醢法，與此正同。粱糲者，以粱米爲糲。《漢書·平當傳》如淳注引《漢律》云：「粟米一斗，得酒一斗，爲下。」此粱糲，即粟米所作之糲也。甑者，小口甕，詳《凌人》疏。賈疏云：「案《王制》云「一爲乾豆」，

鄭注云：「謂腊之以爲祭祀豆實也。」脯非豆實，亦謂作醢始得在豆，與此先膊乾其肉義合。鄭司農云「麋鬻，麋肝醢」者，《說文·骨部》云：「肝，較也。髓，骨中脂也。」《爾雅·釋訓》郭注云：「肝，腳脛。」案：髓即髓之變體。若依此說，則鹿麋諸鬻，並肝髓醢矣。此於經無論，故後鄭不從。云「或曰麋鬻醬也」者，《說文·西部》云：「醢，肉醬也。」《廣雅·釋器》云：「醢，醬也。」此又一說，直謂麋肉爲之，與前麋肝髓醢說異。以諸醢通例校之，後說爲是。云「有骨爲鬻，無骨爲醢」者，亦或說也。謂鬻醢但以有骨無骨爲異，不用肝髓也。《爾雅·釋器》云：「肉謂之醢，有骨謂之鬻。」郭注云：「醢，肉醬。鬻，裸骨醬。」《說文·肉部》云：「脰，有骨醢也。重文鬻，脰或从難。」《釋名·釋飲食》云：「醢有骨者曰鬻。鬻，昵也，骨肉相傳昵無汁也。醢，晦也。晦，冥也，封塗使密冥乃成也。」《公食大夫禮》後鄭注云：「醢有骨謂之鬻。」與先鄭說同。云「菁菹，韭菹」者，《說文·艸部》云：「菁，韭華也。」又《韭部》云：「韭，菜名。一種而久者，故謂之韭。」《廣雅·釋艸》云：「韭，其華謂之菁。」《玉燭寶典》引《四民月令》云：「八月收韭菁，作搗

①「使」，原作「便」，楚本作「使」，與《釋名》合，據改。

齋。賈疏云：「以菁爲韭菁，於義不可，後鄭不從。若爲韭字，韭則蔓菁，於義爲是，後鄭不應破之，明本作韭，不作菲也。」阮元云：「考疏云『以菁爲韭菁，於義不可，後鄭不從』。據此，是先鄭作『菁菹，韭菁菹也』。韭菁謂之韭菁，漢人語尚如此。後人奪下菁字，賈時不誤。」案：阮說是也。上已有韭菹，不當複出，故先鄭以「韭菁菹」爲釋，別於上文韭菹爲韭葉也。賈所見別本，蓋作「韭菁菹」。疏當云「韭菁則蔓菁」。蓋韭菹形近，韭菁又與蔓菁聲相轉，故互誤。今本有挽字。《說文》訓菁爲韭華，知不作「韭華菹」者，以別本作菲，若爲菲華，則義不可通，賈不宜云於義爲是也。《爾雅·釋艸》云「菲，芴」，郭注云：「卽土瓜也。」又「菲，蔥菜」，注云：「菲草，生下溼地，似蔓菁，華紫赤色，可食。」據郭說，則菲似蔓菁，而實非一物。惟段公路《北戶錄》云「蔓菁，《小學篇》曰芴菁」，與《釋艸》「菲芴字同」，故賈云卽蔓菁也。云「鄭大夫讀芴爲茅，茅菹，茅初生」者，芴茅聲相近。《鄉師》「大祭祀共茅菹」。杜注云：「菹當爲菹，以茅爲菹。」案：茅初生，所謂菹也。《毛詩·邶風·靜女》傳云：「菹，茅之始生也。」《玉燭寶典》引《夏小正》云：「二月時有見菹。始收菹也者，取以爲豆實也。」今《大戴禮記》菹作「稊」，誤。又引《詩草木疏》云：「正月始生，其心似麥

欲秀，其中正白，長數寸，食之甘美。」蓋茅初生可作菹，故《小正》取爲豆實矣。賈疏謂茅不可食，誤。云「或曰芴，水草」者，卽後鄭所謂覺葵也。《祭統》「水草之菹」，鄭注云：「芹芴之屬」。段玉裁云：「此大夫所引或說不改字，又一說也。」云「杜子春讀芴爲卯」者，段玉裁改卯爲菲，云：「杜子春以芴不見於經傳，易爲《魯頌》『薄采其菲』之菲。鄭申之曰覺葵。知鄭必申杜者，若非杜說，則鄭當云『芴當爲菲，覺葵也』。且今本杜說讀芴爲卯，殊不可通。若云讀芴如卯，亦當訓爲何物。惟杜破字作菲，則覺葵之解，已在其中，鄭特明言之耳。陸氏作《釋文》，賈氏作《正義》時，注文已譌繆，又不知卯非本二聲，芴非必二字，誤謂本一字，故不能更正。《周禮釋文》「芴音卯，北人音柳」，《魯頌釋文》「芴音卯，徐音柳」，皆混芴菲爲一字。《泮水》本是菲字，訓覺葵，《說文·艸部》可證。韋昭音萌藻反，則韋時菲已誤爲芴矣。《漢·律厯志》「冒芴於卯」，芴字僅見於此。」又云：「按杜不云芴當爲菲，而云讀爲菲者，古音卯聲菲聲同在尤幽部。凡易其字而音韻同部者，皆曰讀爲也。」案：段據《說文》定芴字當爲菲，諧菲聲，不當從卯，其說自是。但杜、鄭說字形聲正別，不盡與許同。證以《漢志》「冒芴」之文及韋昭萌藻之讀，蓋漢時自有從艸卯聲之字，至許君乃定

其字爲諧𠂔聲。然𠂔𠂔古音同部，未必𠂔聲之必不可諧也。竊疑杜、鄭自作𠂔字，此當云「讀𠂔如𠂔」，非正其字，乃擬其音耳。《管子·五行篇》「𠂔菱」，尹注云：「𠂔，𠂔葵，早春而生也。」字亦作𠂔可證。云「玄謂𠂔，𠂔葵也」者，《書·禹貢》孔疏引此注「𠂔」作「葵」。鄭《坊記》注云：「𠂔，𠂔葵也。陳宋之間謂之𠂔。」《方言》云：「𠂔，葵，𠂔葵也。關之東西謂之𠂔葵，陳楚之郊謂之𠂔。」郭注云：「𠂔，今江東音蒿，字作𠂔也。」《公食大夫禮》「𠂔菹」，注云：「𠂔，葵，葵葵也。」蔓、葵、葵，竝一聲之轉。《詩·邶風·谷風》釋文引《草木疏》云：「𠂔，葵葵也。」郭璞云：「今葵菜也。」案：《齊民要術》有作葵葵菹法。又云：「葵菜，似葵葵，無毛而大。」《說文·艸部》云：「葵葵似葵葵，實如小𠂔者。」則葵葵乃葵葵之類，似非即葵也。《本草》陶注云：「葵葵是今溫葵，其根可食，葉不中噉。葵葵根乃細於溫葵，而葉似葵，好食。其子與溫葵甚相似，小細爾。俗人蒸其根及作菹，皆好，但小薰臭爾。」又引唐本注云：「葵葵，北人又名葵葵，根葉及子乃是葵類，與葵葵全別。」陶及《唐本草》說亦小異。綜校諸說，葵葵殆即葵葵之細而長者，葉似葵而實非葵，郭說之誤明矣。云「𠂔，葵葵也」者，𠂔，段玉裁亦改爲葵。《詩·魯頌·泮水》篇「薄采其葵」，毛傳

云：「葵，葵葵也。」《說文·艸部》及《廣雅·釋艸》竝同。《詩》孔疏引《草木疏》云：「葵與葵菜相似。葉大如手，赤圓有肥者，箸手中滑不得停，莖大如匕柄，葉可以生食，又可齏，滑美。江南人謂之葵菜，或謂之葵葵。諸陂澤水中皆有。」《魯頌》釋文云：「葵，干寶云：『今之鵝躑草，堪爲菹，江東有之。』何承天云：『此菜出東海，堪爲菹醬也。』鄭小同云：『江南人名之葵菜，生陂澤中。』《草木疏》同，又云『或名葵葵』。一云今之浮菜即猪葵也。《本草》有葵葵，陶弘景以人有名無用品。解者不同，未詳其正。沈以小同及《草木疏》所說爲得。」詒讓案：據鄭小同、陸璣、沈重說，葵葵即葵菜。而《後漢書·馬融傳》李注云：「葵葵，菜團似葵，生水中，今俗名葵葵。」《證類本草·菜類》，葵下引蜀本《圖經》亦云「葵葵葵葵」。此並分葵葵與葵葵爲二，與鄭、陸說異。又《本草經》云：「葵葵生水中，即葵葵也。」又引唐本注及《圖經》，並云「即葵葵」。葵葵字同。今攷《詩·周南·關雎》孔疏引陸疏，說「葵葵浮在水上」。顏之推《家訓·書證篇》亦說葵葵，云「黃華似葵，江南俗亦呼爲猪葵」。若然，葵葵本浮生，又別名猪葵。是陸引一云浮菜即猪葵者，即以葵葵爲葵葵，與《本草經》說同也。故《證類本草·草類》葵葵下引唐本注，云「南人名猪葵」。又引別本

注駁之，云「猪尊與鳧葵，全不相似」。蓋魏晉以來釋鳧葵者，或謂卽尊，或謂是苕菜，則似尊而非尊。諸說舛異，要不出此二者。以《詩》攷之，苕見《關雎》，非見《泮水》，傳箋及陸疏並分別釋之，則鳧葵是尊，而與苕不同物，殆可無疑矣。云「凡菹醢皆以氣味相成，其狀未聞」者，賈疏云：「經云韭菹醢已下，兩兩相配者，皆是氣味相成，之狀不可知，故云其狀未聞。」饋食之豆，其實葵菹、羸醢，脾析、羸醢，蜃、蜃醢，豚拍、魚醢。羸，蜃蜃。蜃，大蛤。蜃，蛾子。鄭司農云：「脾析，牛百葉也。羸，蛤也。」鄭大夫、杜子春皆以拍爲膊，謂脅也。或曰豚拍，肩也。今河間名豚脅聲如鍛鑄。【疏】「饋食之豆」者，賈疏云：「亦與饋食之籩同時而薦。」云「其實葵菹羸醢」者，《說文·艸部》云：「葵，菜也。」葵卽葵之隸變。《齊民要術》引《四民月令》云：「九月可作葵菹。」金鶚云：「葵類最多。《爾雅·釋草》云：「苕，菟葵。芹，楚葵。」《說文》云：「菲，鳧葵。蘩，鳧葵。」又《爾雅》：「齧，苦菹。」郭注云：「今菹葵也。」又「苕，蚬蚌」，注云：「今荆葵也。」又「苕，戎葵」，注云：「今蜀葵。」此六者皆有葵名，亦以其可食而味滑也。然皆似葵，爲葵之類，非卽葵也。今秋葵，一名側金盞，六

月放花，大如碗，鵝黃色，紫心六瓣，朝開暮落，隨即結子。諸葵惟蜀葵根苗嫩時可食，秋葵嫩時食之尤佳。鮑昭《葵賦》云「豚耳鴨掌」，今觀秋葵，其葉如鴨掌，則秋葵卽葵菜之葵，明矣。云「脾析羸醢，蜃蜃醢，豚拍魚醢」者，賈疏云：「此八豆之內，脾析、蜃、豚拍三者不言菹，皆齋也。」詒讓案：《士冠》再醺，《士喪》大斂奠，《士虞》《特牲》，二豆並用葵菹羸醢。《士喪》大遣奠四豆，又加以脾析蜃醢。亦士禮殺，不得全用八豆也。注云「羸，蜃蜃，蜃，大蛤，蜃，蛾子」者，《鼈人》注並同。《大戴禮記·夏小正》云：「二月抵蜃。蜃，蜃卵也，爲祭醢也。」鄭司農云「脾析，牛百葉也」者，《既夕》注云：「脾讀爲雞脾臍之脾。」臍，脾臍也。《臍與斯，斯與析，音近，故釋脾析爲脾臍。雞臍皆有脾臍，謂胃也，卽許所謂鳥臍臍也。鄭與許字異而音義同。謂之百葉者，胃薄如葉，碎切之故云百葉。未切爲臍臍，既切則謂之脾析，謂之百葉也。此胃也，而經注何以謂之脾？蓋如今人俗語脾胃連言，故以脾之名加於胃也。經文脾析，說禮家容有讀爲臍者，故許從之，不欲與土藏同名也。《莊子·庚桑

楚《臘者之有臠胾》，司馬云「臠，牛百葉也」是也。《大雅》「加肴脾臠」，脾蓋亦謂百葉。許以牛百葉系諸獸，系諸已成之豆實，故以鳥臠胾爲別一義，實則皆謂胃也。《廣雅》云「百葉謂之臠胾」，渾言之也。」案：段說是也。鄭《既夕》注必讀脾爲雞脾臠者，以別於土藏之脾，許君則徑定其字爲臠，與鄭義小異。又《說文·肉部》云：「胾，牛百葉也。」《廣雅·釋器》云：「胃謂之胾。」然則脾析也，脾臠也，臠胾也，百葉也，胾也，五者皆胃之異名。《既夕》注止云百葉，不云牛，賈彼疏云：「《醢人》，天子禮，容有牛。此用少牢，無牛，當是羊百葉，故不云牛。」然則凡牲畜胃並有百葉之稱，不徒牛矣。云「臠，蛤也」者，《鼈人》先鄭注同。云「鄭大夫，杜子春皆以拍爲膊，謂胾也」者，段玉裁云：「以拍爲膊，卽讀拍爲膊也，易其字而訓爲胾。」詒讓案：《士喪禮》「特豚兩膊」，鄭彼注云：「膊，胾也。今文膊爲迫。」《文選·東京賦》「毛魚豚膊」，李注引此經作膊，蓋兼據《禮》古文改。《山海經·西山經》「有窮鬼居之，各在一搏」。郭注云：「搏猶胾也。」案：《說文》無膊字，古蓋無正字，故段借作拍、膊、迫及膊、搏，聲類並相近也。凡成牲體解，左右胾各分爲三，前曰代胾，次曰長胾，後曰短胾。豚未成牲，則唯解左右胾爲二，《禮》所謂兩膊是也。云「或曰豚拍，肩

也」者，段玉裁云：「此又一說，不易字而訓爲肩，拍不得訓肩，此是讀拍爲膊。」《說文》曰：「膊，肩甲也。」案：段說是也。惠士奇說同。《士喪禮》小斂奠云：「兩肩亞，兩肱亞。」此拍與膊字同。彼肩膊相亞，則拍非肩明矣，故後鄭不從。云「今河間名豚胾聲如鍛鑄」者，段玉裁云：「此鄭君援方言以證前說之是也。河間謂豚胾爲鑄，則易拍爲膊，訓胾宜矣。膊訓「薄脯，膊之屋上」，非謂胾也。而依河間語言，則字用膊訓胾可矣。拍古音與膊、鑄同，鍛鑄卽段氏爲鑄器也。古段鍛通用。」加豆之實，芹菹、兔醢，深蒲、醢醢，箔菹、鴈醢，筍菹、魚醢。芹，楚葵也。鄭司農云：「深蒲，蒲莖入水深，故曰深蒲。或曰深蒲，桑耳。醢醢，肉醬也。箔，水中魚衣。」故書鴈或爲鶩。杜子春云「當爲鴈」。玄謂深蒲，蒲始生水中子。箔，箭萌。筍，竹萌。【疏】「加豆之實」者，《國語·周語》韋注云：「加豆，謂既食之後所加之豆也。」賈疏云：「此加豆之實，亦與加籩之實同時設之。」詒讓案：加豆，亦爲加爵時，內宗所薦之豆，在正獻之後。鄭《司尊彝》注，謂在九獻第八獻時所薦，誤也。詳《籩人》疏。云「深蒲醢醢」者，賈疏云：「醢醢與朝事之豆同。」云「筍菹魚醢」者，魚醢亦與饋

食同，猶籩人加籩之實栗與饋食同也。

注云「芹，楚葵

也」者，《爾雅·釋艸》文。郭注云：「今水中芹菜。」《說文·艸部》云：「芹，楚葵也。」又「莛，菜類蒿。《周禮》有莛菹」。《詩·魯頌·泮水》「薄菜其芹」，箋云：「芹，水菜也。」案：鄭、郭並以芹爲楚葵，卽水芹也。許則以此芹菹，字當爲莛，而楚葵之芹，別一艸。未知孰是。水菜之芹，《神農本草經》又作水蘄，陶注云：「其二月三月作莢時，可作菹。及孰，燻食之。又有楂芹，可爲生菜，亦可生噉，俗中皆作芹字。」案：芹正字，蘄俗作，陶說誤。鄭司農云「深蒲，蒲莢入水深，故曰深蒲」者，《說文·艸部》云：「蔞，蒲莢之類也。」又「蒲，水艸也。可以作席」。深卽蔞之段借字。《詩·大雅·韓奕》毛傳云：「蒲，蒲莢也。」《齊民要術》引《詩義疏》云：「蒲，深蒲也。《周禮》以爲菹。謂蒲始生，取其中心入地者莢，大如匕柄，正白，生噉之，甘脆。又煮而以苦酒浸之，如食筍法，大美。今吳人以爲菹。」《輪人》注云：「今人謂蒲本在水中者爲弱。」案：弱莢字同。深蒲蓋蒲始生，嫩葉未出水者，故可爲菹。許以蔞爲蒲莢之類，則不以爲一物，與二鄭說異。云「或曰深蒲，桑耳」者，《神農本草經》有桑耳。《名醫別錄》云：「味甘，一名桑菌，一名木麥。」《說文·艸部》云：「葍，桑莢也。莢，木耳

也。」案：桑耳卽桑莢，謂木耳之生於桑者，《齊民要術》云「作木耳菹，取棗桑榆柳樹邊生者」是也。《內則》燕食庶羞有芝栢，孔疏引庾蔚之云：「無華葉而生者曰芝栢，今春夏生於木，可用爲菹。」盧植云：「芝，木芝也。」王肅云：「無華而實者名栢。」栢卽莢也。然桑耳爲深蒲，其說無據，故後鄭亦不從。云「醯醢，肉醬也」者，言肉以包汁，與後鄭前注義同。云「箔，水中魚衣」者，段玉裁云：「《說文·艸部》曰：「落，水青衣也。从艸治聲。」此先鄭說也。然則先鄭本作箔。今本經文作箔，混誤不成字。」洪頤煊云：「《詩·采菽》正義引此作落菹。」案：段、洪校是也。《祭統》孔疏引經亦作落。《說文》落字注，今本作「水衣」，段從《爾雅音義》引《說文》校改。又《釋草》云：「薄，石衣。」郭注云：「水苔也。一名石髮，江東食之。」魚衣、水衣、石衣，蓋異名同物。然此經先鄭本固當作落；後鄭本則自作箔，故釋爲箭萌。蓋二鄭本自不同，注偶未別白釋之耳。孔引作落，則與後鄭說不合，今不據改。云「故書鴈或爲鶉」者，《說文·佳部》云：「鶉，鶉屬也。」鶉卽鶉之借字。《公食大夫禮》，上大夫庶羞有雉兔鶉鴛。杜子春云「當爲鴈」者，段玉裁云：「『爲』宜作『從』，故書本不畫一，杜從其長者也。」云「玄謂深蒲，蒲始生水中子」者，子亦謂蒲嫩葉也。《說文·

艸部云：「蒹，蒲子，可以爲平席。」蓋深蒲卽蒲之少者，故謂之子。可作席，其初生者可爲蒹。後鄭說與先鄭及許同，但先鄭不云蒲子，故增成其義。云「筴，箭萌」者，不從先鄭本作蒹也。筴卽筴之俗。《爾雅·釋艸》云：「筴，箭萌。」郭注云「萌，筴屬也」，引《周禮》曰：「筴，蒹屬。」《說文·竹部》云：「筴，竹萌也。箭，矢竹也。」《御覽·兵部》引《字統》云：「箭者，竹之別，大身小葉曰竹，小身大葉曰箭，箭竹主爲矢，因謂矢爲箭。」案：郭引此經作筴者，從《爾雅》文改也。《釋文》出筴字，云「《爾雅》作筴」，則經本不與《釋艸》同可知。云「筴，竹萌」者，亦《爾雅·釋艸》文。竹謂大竹也。《詩·大雅·韓奕》孔疏引孫炎云：「竹初萌生謂之筴。」又陸璣疏云：「筴，竹萌也。皆四月生，唯巴竹筴，八月九月生，始出地，長數寸，鬻以苦酒，豉汁浸之，可以就酒及食。」《說文·竹部》云：「筴，竹胎也。」段玉裁云：「許意筴筴不以大竹小竹分別。筴謂掘諸地中者，如今之冬筴；筴謂已抽出者，如今之春筴。與鄭說不同也。」

羞豆之實，酏食，糝食。鄭司農云：「酏食，以酒酏爲餅。糝食，菜餛蒸。」玄謂酏，饗也。《內則》曰：「取稻米舉搔漚之，小切狼臠膏，以與稻米爲饗。」又曰：「糝，取牛羊豕之肉三如一，小切之，與稻米，稻米二肉一，合以爲餌，

煎之。」【疏】「羞豆之實」者，此亦謂房中之羞也。賈疏云：「此羞豆之實，亦與羞籩之實同時設之。」云「酏食糝食」者，賈疏云：「謂饗與糝食爲二豆。」注鄭司農云

「酏食，以酒酏爲餅」者，賈疏云：「酏，粥也。以酒酏爲餅，若今起膠餅。文無所出，故後鄭不從。」案：賈云起膠餅，膠卽教也。《漢書·李陵傳》注引孟康云：「媒，酒教。」《玉篇·西部》有酵字，云「酒酵」。酵卽教之俗。程瑤田云：「起膠餅，《齊書》永明間詔，太廟四時祭薦，宣皇帝起麪餅，卽此也。蓋蒸餅饅頭之類，可充籩實。而以爲豆實，宜後鄭不從也。」云「糝食，菜餛蒸」者，《說文·米部》云：「糝，以米和羹也。一曰粒也。重文糝，古文糝从參。」又《鬻部》云：「鬻，鼎實，惟葦及蒲。陳留謂鍵爲鬻。重文鍵，鬻或从食束聲。」《釋名·釋飲食》云：「糝，黏也，相黏教也。」鍵字又作藪。《爾雅·釋器》云：「菜謂之藪。」《詩·大雅·韓奕》：「其藪維何，維筴及蒲。」毛傳云：「藪，菜穀也。」案：依《說文》、《爾雅》，則菜鍵同物，但唯蒸菜不得稱糝。諦審先鄭此注，似用許書後一義，以鍵爲鍵。《易·鼎》「覆公餗」，《釋文》引馬融亦云「餗，鍵也」。《穀梁》僖二十四年楊士助疏又引馬云「謂糜也」。蓋先鄭意以菜與鍵粥合蒸之，是謂糝食。凡以米和菜，通謂之糝。但菜多而米專用屑者

爲羹，《內則》說羹有和糝。鄭注云「凡羹齊，宜五味之和，米屑之糝」是也。菜少而米或用屑或用粒者則爲糜，故《說文》糝亦訓粒，又《米部》云「糜，糝也。糝，米和也」是也。凡羹糜皆煮之，而先鄭云蒸之者，以糜多淖，必蒸之乃可爲豆實也。後鄭別取《內則》爲釋，故不從先鄭。云「玄謂醢，糝也」者，《說文·鬻部》云：「鬻，糝也。重文，鬻或从食衍聲。」賈疏云：「案《雜問志》云：《內則》糝次糝，《周禮》醢次糝。又醢在六飲中，不合在豆。且《內則》有糝無醢，《周禮》有醢無糝，明醢糝是一也。故破醢從糝也。」段玉裁云：「此鄭君破醢字從《內則》之糝也。醢與糝皆粥也，而醢薄糝厚，小切狼臠膏與稻米爲糝，尤糝之至厚者。《說文》鬻或作餼，鬻也。醢，賈侍中說爲鬻清。鄭注四飲曰：「醢，今之粥。醢飲，粥稀者之清也。」然則醢餼各物者，析言之。《周禮》謂糝爲醢者，統言之。鄭云：「醢，糝也」。且餼字，今音諸延切，古當讀衍，平聲，與醢雙聲，故《周禮》以醢爲糝也。『醢食』之醢，與四飲之『醢』異，猶《內則》『羞糝餌粉醢』之醢，^①與『黍醢』之醢異。」引《內則》曰「取稻米，舉搔洩之，小切狼臠膏，以與稻米爲糝」者，《內則》糝本作「醢」。鄭彼注云：「搔洩，博異語也。搔讀與滯澹之滯同。」^②狼臠膏，臠中膏也。以煎稻米，則似今膏臠矣。此

《周禮》醢食也。此醢當從餼。」彼注義與此同。段玉裁云：「據《雜問志》，則《內則》本作糝字。注中『此醢當從糝』，謂《周禮》此醢字，當從《內則》作糝字。言此醢者，以別於六飲之醢也。今本《內則》作醢，淺人所改。」案：段說是也。阮元說同。呂飛鵬云：「《攷工記》注『讀糝糝之糝』，糝，古文饋字，糝與饋似爲一物。然《釋名》云「肺肭，饋也。以米糝之如膏饋也」。則饋爲糝食矣。蓋以膏煎米則爲糝，以糝和肉則爲臠矣。云「又曰，糝，取牛羊豕之肉三如一，小切之，與稻米，稻米二肉一，合以爲餌煎之」者，鄭彼注云：「此《周禮》糝食也。」賈疏云：「三如一者，三肉等分。小切之者，謂細切之。稻米二肉一者，謂米二分，肉一分，合以爲餌煎之也。糝糝二者皆有《內則》文，故不從先鄭。然則上有糝餌，彼餌無肉，則入籩。此餌，米肉俱有，名之爲糝，即入豆。案：《易·鼎卦》九四：「鼎折足，覆公餗，其刑剭，凶。」鄭注云：「糝謂之餗。《震》爲竹。竹萌曰筍。筍者，餗之爲菜也，是八珍之食。臣下曠官，失君之美道，當刑之於屋中。」案：上《膳夫》注，八珍取肝膋，

① 「粉」，原作「紛」，據《周禮漢讀考》改。

② 「與」，原訛「爲」，今據《禮記》注改。

不取糝；鄭注《易》，糝又入八珍中者，以其糝若有菜，則入八珍，不須肝腎；若糝無菜，則入羞豆，此文所引是也。八珍則數肝腎，故注不同。凡祭祀，共薦羞之豆實，

賓客、喪紀亦如之。爲王及后、世子共其內

羞。王舉，則共醢六十簋，以五齊、七醢、七

菹、三饗實之。齊當爲齋。五齋，昌本、脾析、蜃、豚

拍、深蒲也。七醢，醢、羸、麇、蜃、魚、兔、鴈醢。七菹，韭、

菁、茆、葵、芹、箔、筍菹。三饗，麋、鹿、麇饗也。凡醢醬所

和，細切爲齋，全物若豚爲菹。《少儀》曰：「麋鹿爲菹，野

豕爲軒，皆腍而不切。麋爲辟雞，兔爲宛脾，皆腍而切之。

切葱若薤實之，醢以柔之。」由此言之，則齋菹之稱，菜肉

通。【疏】「凡祭祀，共薦羞之豆實」者，薦豆，朝事饋食之

豆也。羞豆，加豆羞豆也。《禮經》又有腳、臠、臠、臠、臠、炙，

謂之庶羞。又《膳夫》羞用百有二十品，亦爲庶羞，其半爲

豆，亦此官所共。以羞豆恒法，故經不具也。云「賓客、喪

紀亦如之」者，賓客謂饗食燕及致飧饗饌。喪紀謂殷奠及

虞祔等，又《既夕禮》，明器有饗醢醢。《檀弓》云：「宋襄公

葬其夫人，醢醢百簋。」王禮亦當有之。云「王舉則共醢六

十簋，以五齊、七醢、七菹、三饗實之」者，此與膳夫、醢人爲

官聯也。賈疏云：「凡祭至內羞，一與籩人同。王舉則共

醢六十簋，此以下與籩人異，以其王舉不共籩實，唯有豆

實。王舉，謂王日一舉，鼎有十二，則醢人共醢六十簋，以

醢爲主，其實有五齋、七菹等。」凌廷堪云：「《禮經》通例，

食禮則有豆無籩，飲酒之禮則豆籩皆有。故《公食大夫》有

豆無籩，《鄉飲》、《鄉射》、《燕禮》、《大射》豆籩皆有。《特

牲》尸人九飯，有豆無籩；主婦亞獻，主人獻賓，豆籩皆有。

《少牢》尸人十一飯，有豆無籩；《有司徹》祭畢賓尸，豆籩

皆有。」案：王舉用食禮，故有豆無籩。凌說足與賈說相

證。析言之則齋菹饗與醢別，統言之則齋菹饗得通稱醢，

故五齋七醢七菹三饗，總爲醢六十簋也。又案：《禮器》

云：「天子之豆二十有六，諸公十有六，諸侯十有二，上大

夫八，下大夫六。」鄭注謂天子朔食之豆。孫希旦云：「醢

人朝事之豆八，饋食之豆八，加豆八，羞豆二，合爲二十六。

天子全用之，而公以下遞減焉。」案：依孫說，則王大舉正

饌，亦即此四種豆，於數頗合，亦足備一義也。注云

「齊當爲齋」者，明此與《酒正》五齊異也。《說文·韭部》

云：「醢，醢也。从韭，次，朱皆聲。重文齋，醢或从角。」是齋

卽醢之或體，從齊得聲。《曲禮》「飯齊」「醬齊」並以齊爲齋

字。段玉裁云：「此定爲聲之誤也，故曰當爲。」云「五齋」

昌本、脾析、蜃、豚拍、深蒲也」者，賈疏云：「此據豆肉不言菹者，皆是齋，以次數之，有此五而已。」云「七醢，醢、羸、羸、蜃、魚、兔、鴈醢，七菹，韭、菁、茆、葵、芹、箔、筍菹，三齋，麋、鹿、麋齋也」者，並據上經去復重計之。云「凡醢醬所和」者，據《膳夫》云醬用百有二十甕，通醢醢言之。但此官共醢六十甕，與醢人共醢物六十甕別職，則此齊醢菹齋之屬，皆未和醢者也。蓋齊菹等雖皆以醢作之，作成之後，亦仍有和醢不和醢之別。鄭言醢醬所和，明醬物調和之通法耳。云「細切爲齋」者，《釋名·釋飲食》云：「齋，濟也，與諸味相濟成也。」《莊子·列御寇篇》云「蟹粉」，又《大宗師篇》《釋文》引司馬彪云「蟹，碎也」。是齋爲切和細碎之名，故菜肉之細切者通謂之齋。細切，即《少儀》注所云「報切之」是也。云「全物若臠爲菹」者，《說文·艸部》云：「菹，酢菜也。」又《血部》云：「菹，醢也。」又《肉部》云：「臠，薄切肉也。」《釋名·釋飲食》云：「菹，阻也，生釀之，遂使阻於寒溫之間不得爛也。」《一切經音義》引《通俗文》云：「全物爲菹。」案：全物謂小物不及四寸者，全而不切。臠謂薄切之，但不細切耳。此經昌本爲五齋之一，而前注云切之四寸爲菹，是細切、臠切皆以四寸爲度。細切者，蓋若今之肉絲。臠切者，即《內則》、《少儀》注所謂藿葉切之，蓋

若今之肉片。《士喪禮》大斂奠「髀豆兩，其實葵菹芋」。注云：「齊人或名全菹爲芋。」蓋葵長過四寸以爲菹，當臠切之，今喪奠禮略，亦全而不切，故《禮經》特著芋文，明非恒法也。互詳《內饗》疏。引《少儀》曰「麋鹿爲菹，野豕爲軒，皆臠而不切，麋爲辟雞，兔爲宛脾，皆臠而切之，切葱若薤實之，醢以柔之」者，舊本麋麋互譌。今據宋董氏本及注疏本正。《釋文》出「皆臠」云：「本或作臠，下同。」案《禮記》文，臠並作「臠」。鄭注云：「臠之言臠也。此軒、辟雞、宛脾皆菹類也。其作之狀，以醢與葷菜淹之，殺肉及腥氣也。」《內則》亦有此文。案此注作臠者，薄切肉之正字。《少儀》作臠者，聲近段借字。《釋文》作「臠」者，又臠之異文。鄭引彼文者，明彼菹軒即此七菹之屬，辟雞宛脾即此五齋之屬也。云「由此言之，則齋菹之稱菜肉通」者，賈疏云：「鄭案三豆之內，七菹皆菜無肉。五齋之內，菜肉相兼。若據《少儀》齋菹之稱，菜肉通也。」詒讓案：鄭因此七菹皆菜，而《少儀》云「麋鹿爲菹」，故又據彼明齋菹惟以細切不細切爲別，不分菜肉也。依《說文》，則菹爲酢菜之專名，《少儀》麋鹿之菹，似當爲菹之借字，與鄭義少異。賓客之禮，共醢五十甕。致饗餼時。【疏】賓客之禮，共醢五十甕者，賈疏云：「賓客謂五等諸侯來朝也。天子致饗餼，

與之醢。」詒讓案：客內亦兼侯國卿大夫來聘者，其致饗醢亦共醢也。

注云「致饗醢時」者，賈疏云：「案《掌客》，上公之禮，醢醢百有二十饗，侯伯百饗，子男八十饗。此共醢五十饗，并醢人所共醢五十饗，共爲百饗。此據侯伯饗醢之禮，舉中言之，明兼有上公與子男。若然，則上公百二十饗，與王數同者，據二王之後，王所尊敬者而言。其同姓諸侯，唯魯得與二王後同，其餘同姓，雖車服如上公，從侯伯百饗而已。又案《掌客》，上公已下，並是諸侯自相待法，天子待諸侯亦與之同。又案《聘禮》，待聘臣亦云醢醢百饗，得與諸侯同者，彼別爲臣禮，禮有損之而益，故子男之卿百饗，其數多於君。」案：子男卿，醢醢不得多於君，賈說未允，詳《掌客疏》。

凡事，共醢。

周禮正義卷十一

醯人掌共五齊七菹，凡醯物。以共祭祀之齊菹，凡醯醬之物。賓客亦如之。齊菹

醬屬醯人者，皆須醯成味。【疏】「掌共五齊七菹，凡醯物」

者，此亦共豆實，與醯人爲聯事也。五齊，齊亦當爲齋，下齊菹同。凡醯人共齊菹，^①此官則以醯和之以成其味也。

云「以共祭祀之齊菹，凡醯醬之物」者，賈疏云：「醯人連言醬者，并豆醬亦掌。」詒讓案：經言「共五齊七菹」而云

「凡醯物」，則醯物即指齊菹之和醯者。此祭祀云「凡醯醬之物」者，醯亦即和醯之齊菹，醬即未和醯之醯也。凡經言

醬者，多爲醯醢之通名，若《膳夫》云「醬用百有二十饔」、《內饔》云「醬物」是也。此職醯醬並言，則醯及醬爲二物。

但醬有二，有和醯不和醯之別。《士昏禮》：「饌于房中，醯醬二豆。」注云：「醯醬者，以醯和醬，生人尚褻味。」又《公

食大夫禮》：「宰夫自東房授醯醬。」賈彼疏云：「祭祀無此法。以生人尚褻味，故有之。」據鄭、賈說，則和醯之醬爲褻

味，祭祀所無；此「醯醬之物」共祭祀之用，則醯與醬各自共之，非和醯之醬明矣。故賈別以醬爲豆醬，豆醬即醯人豆實之醢，未和醯者也。云「賓客亦如之」者，此當并共和醯之醬，^②而云如祭祀者，明其法數略同。賈疏云：「上經云賓客之禮，據饗餼；此云賓客，據饗食致之。」注云

「齊菹醬屬醯人者，皆須醯成味」者，《內則》說麋鹿魚爲菹等，並切葱若薤，實諸醢以柔之。注謂「醢菜而柔之以醢，殺腥肉及其氣」。至將食時，又有以醯和醬。是齊菹醬之類，並須醯以柔之，且成其酢味，故醯人兼掌之也。王

舉，則共齊菹醢物六十饔，共后及世子之醬齊菹。賓客之禮，共醢五十饔。凡事，共

醢。【疏】「王舉則共齊菹醢物六十饔」者，明醢物即齊菹

之和醯者，六十饔內無徒醢也。王舉尚褻味，明當有和醢之醬矣。賈疏云：「共齊菹醢物六十饔者，并醢人六十饔，

即《膳夫》醬用百有二十饔是也。」云「共后及世子之醬齊菹」者，賈疏云：「案《醢人》共其內羞不言齊菹，此云齊菹，

① 「醢」，原訛「醢」，今據楚本改。

② 「醢」，原訛「醢」，據文義改。

以其與醢人共掌醢菹，須醢，故就醢人爲言。」詒讓案：后世子所共饔數，經無文，以禮等推之，疑后數當與王同，世子當與《掌客》上公同，亦皆六十饔與？云「賓客之禮共醢五十饔」者，賈疏云：「與醢人五十饔，摠共爲百饔，亦據侯伯舉中言之。」

鹽人掌鹽之政令，以共百事之鹽。

政令謂受人教所處置，求者所當得。【疏】「以共百事之鹽」者，謂祭祀、賓客、膳羞等用鹽爲和，其事衆多，言百以略之。

注云「政令謂受人教所處置」者，凡海鹽產鹽之處，以鹽來入，此官並受之，又區其種別，處置其所，則教令之。云「求者所當得」者，謂求鹽共用，各依其所當得者與之。若祭祀當得苦鹽、散鹽，賓客當得形鹽、散鹽，膳羞當得飴鹽是也。祭祀，共其苦鹽、散鹽。杜子春讀苦爲鹽，謂出鹽直用不凍治。鄭司農云：「散鹽，凍治者。」玄謂散鹽，鬻水爲鹽。【疏】注云「杜子春讀苦爲鹽」者，苦鹽聲類同，故杜讀從之。《典婦功》先鄭讀同。《說文·鹽部》云：「鹽，河東鹽池也。袤五十一里，廣七里，周百十六里。」《史記·貨殖傳》索隱引伊說云：「鹽鹽，河東大鹽。」

案：小司馬所引，即伊氏《周禮注》佚義也。賈疏云：「鹽謂出於鹽池，今之顆鹽是也。」段玉裁云：「凡《周禮》苦讀爲鹽者甚多，故杜比例知之也。」魏了翁云：「苦鹽自對下文飴鹽，不改爲鹽亦可。」案：魏說亦通。《水經·涑水注》說鹽池云：「土人鄉俗引裂沃麻，分灌川野，畦水耗竭，土自成鹽，即所謂鹹鹺也，而味苦，號曰鹽田。鹽鹽之名，殆資是矣。」案：《曲禮》云「凡祭宗廟之禮，鹽曰鹹鹺」。^①注云：「大鹹曰鹺。」然則祭祀之鹽，貴其大鹹。《爾雅·釋言》云：「鹹，苦也。」郭注云：「苦即大鹹。」《淮南子·墜形訓》云：「鍊苦生鹹。」苦鹽即大鹹也。酈道元謂河東鹽池，鹽鹽味苦。然則苦鹽鹽鹽，義本兩通，不必破字矣。《宋史·食貨志》云：「引池而成者曰顆鹽，《周官》所謂鹽鹽也。」與賈說同。蓋以味言則曰苦鹽，以形言則曰顆鹽也。互詳《典婦功》疏。云「謂出鹽直用不凍治」者，《說文·水部》云：「凍，澹也。」賈疏云：「對下經鬻鹽是凍治者也。」鄭司農云「散鹽凍治者」者，《史記索隱》引伊說云：「散鹽，東海煮水爲鹽也。」案：伊亦用鄭義。賈疏云：「下經自有鬻鹽是凍治，故後鄭不從。」云「玄謂散鹽鬻水爲鹽」者，對上

① 「鹽曰」，原誤作「祭用」，今據《禮記》改。

鹽鹽非鬻水所爲鹽也。《釋文》於下經鬻鹽，始發音，疑此注鬻字本作「煮」，注例用今字也。互詳《肆師》疏。《說文·鹽部》云：「鹽，鹹也。古者夙沙初作鬻海鹽。」釋玄應《一切經音義》引《說文》云：「天生曰鹵，人生曰鹽。」管子·地數篇》云：「請君伐蒞薪，煮沸水爲鹽。」案：鬻海水爲鹽，所謂人生者也。《宋史·食貨志》云：「鬻海鹽并鬻鹹而成者，曰末鹽，《周官》所謂散鹽也。」案：《禹貢》青州貢鹽，《職方氏》幽州其利魚鹽，皆鬻海之鹽也。又案：苦鹽味大鹹，爲鹽之最貴者。散鹽則味微淡，用多而品略賤，祭祀則次於苦鹽，賓客則次於形鹽，故謂之散，散之爲言裸也。《說文·肉部》云：「散，裸肉也。」散卽散之隸變。此經凡言散者，皆羸沽猥裸，亞次於上之義。故《屨人》散屨次於功屨；①《巾車》散車次於良車；《充人》之散祭祀，別於五帝先王之祭；《旄人》之散樂，別於雅樂；《司弓矢》之散射，別於師田之射。事異而義並相近也。賓客，共其形鹽、散鹽。形鹽，鹽之似虎形。【疏】「賓客，共其形鹽、散鹽」者，依《左》僖三十年傳說，則惟饗大賓客有形鹽，其燕食及小賓客並用散鹽也。又《籩人》祭祀朝事之籩，亦有形鹽。上祭祀不言共者，文略。注云「形鹽，鹽之似

虎形」者，《籩人》注同。王之膳羞，共飴鹽，后及世子亦如之。飴鹽，鹽之恬者，今戎鹽有焉。【疏】「王之膳羞共飴鹽」者，饋食尚褻味，故鹽以甘爲貴也。

注云「飴鹽，鹽之恬者」者，《廣雅·釋器》云：「飴，錫也。《內則》：棗栗飴蜜以甘之。」飴味甘，故鹽味甘者亦謂之飴鹽。又《內則》說人君燕食有卵鹽，疑卽此。恬卽恬字，詳《酒正》疏。云「今戎鹽有焉」者，《神農本草經》云：「戎鹽味鹹，一名胡鹽。生胡鹽山及西羌、北地、酒泉、福祿城東南角。」賈疏云：「卽石鹽是也。」惠士奇云：「《御覽·飲食部》引《涼州記》曰：『青鹽池出鹽，正方半寸，其形似石，甚恬美。』《涼州異物志》曰：『鹽山二岳，三色爲質，赤者如丹，黑者如漆，作獸辟惡，佩之爲吉，名曰戎鹽，可以療疾。』則戎鹽不徒供膳羞，兼可療疾病。又土人鑿爲虎形，大小如意，明鹽人形鹽，亦用戎鹽也。」詒讓案：依鄭說，則戎鹽蓋鹹而微恬，《呂氏春秋·本味篇》云：「伊尹曰：和之美者，大夏之鹽。」殆卽戎鹽與？凡齊事，鬻鹽以待戒令。齊事，和五味之事，鬻鹽凍治之。【疏】

①「功屨」，原訛「功履」，今據楚本改。

注云「齊事，和五味之事」者，若食醫掌和王之六膳、百羞、百醬、八珍之齊，須調和五味者，皆用鹽以爲鹹也。齊和，詳《內饗》疏。云「鬻鹽漚治之」者，鬻，注例當作「煮」，凡注複述經文，亦不用古字。《說文·鬻部》云：「鬻，烹也。重文煮，鬻或從火。」此鬻鹽通上苦鹽等言之。呂飛鵬云：「鹽爲鹽池，凡出鹽之所，皆得稱鹽，故未煎之鹽亦稱鹽。《郊特牲》「煎鹽之尚」，疏云「煎者，煎此自然之鹽，鍊治之也」。此注云漚治之，殆即所謂煎鹽與？」

冪人掌共巾冪。共巾可以覆物。【疏】「掌共

巾冪」者，《說文·巾部》云：「巾，佩巾也。」案：佩巾以拭物，即《內則》之紛帨，又有盥巾，亦其類。《玉府》掌王之燕衣服，注謂有巾，則此官唯掌賓祭及王飲食覆物之巾。佩巾、盥巾，非其所掌，賈疏謂此巾兼以拭物，非也。注

云「共巾可以覆物」者，《敍官》注亦云「以巾覆物曰冪」。謂巾冪即是巾之可以覆物者，以別於佩巾不可以覆物也。《國語·周語》云：「淨其巾冪。」韋注云：「巾冪所以覆尊彝也。」案：冪即冪之俗。^①《大射儀》云：「膳尊兩甒，冪用錫若絺。」《燕禮》云：「公尊瓦大兩，冪用綌若錫。」《特牲饋食禮》云：「覆兩壺，卒莫，冪用綌。」^②又《記》云：「籩巾以

綌，纁裏。」《士昏禮》云：「醢醬二豆，菹醢四豆，兼巾之。」

《公食大夫禮》云：「簠有蓋冪。」是尊、彝、甒、壺、籩、豆、簠、簋皆有冪，冪以布及葛爲之，亦通謂之巾，《士昏禮》及《特牲記》所云是也。聶氏《三禮圖》引舊圖云：「籩巾圓一幅。」又云：「覆饌巾，士大夫以緇布纁裏，諸侯天子以玄布纁裏。」禮圖所云，蓋巾冪之通制也。其牲鼎之覆，以茅爲之，《禮經》謂之甒，與巾冪異。祭祀，以疏布巾冪八

尊，以疏布者，天地之神尚質。【疏】「祭祀以疏布巾冪八

尊」者，賈疏云：「祭天無灌，唯有五齊三酒，實於八尊。疏

布者，大功布爲冪，覆此八尊，此據正尊而言。若五齊加明水，三酒加玄酒，則十六尊，皆以疏布冪之也。」案：依《通

典·吉禮》引崔靈恩說，則唯圜丘、方丘備五齊三酒，乃有八尊；其二郊及迎氣止四齊三酒，則唯七尊，加明水玄酒則十四尊也。詳《酒正》疏。注云「以疏布者，天地之

神尚質」者，《郊特牲》云：「黼黻文繡之美，疏布之尚，反女功之始也。」又《禮器》云：「犧尊疏布甒，此以素爲貴也。」

注云：「冪或作冪。」案：冪即冪之借字。疏布，鄭不云何

^①「冪」，原作「冪」，據楚本改。

^②「用綌」，原脫，據楚本補。

布，賈以爲大功布，蓋據《士喪禮》，大小斂奠，冪並用功布，故《鄉射記》疏謂喪中之冪，皆用疏布。明祭冪雖尚質，不當降於喪冪也。今攷《喪服經》有疏衰，又有大功布、小功布。彼注云：「疏猶羸也。大功布，其鍛治之功羸沽之。」《問傳》云：「大功七升、八升、九升，小功十升、十一升、十二升。」《國語·魯語》云：「子服之妾，衣不過七升之布。」七升布，即大功布也。攷《士喪禮》、《喪大記》及《司巫》注引《逸禮》，並有功布。鄭《士喪》注云：「功布，鍛濯灰治之布也。」故賈、孔咸以七升大功布釋之。然《既夕》云「舊三，冪用疏布；齔二，冪用功布」，則疏布非即功布。竊疑功布既爲大功布，則疏布當即六升之布。蓋疏衰之布，雖自三升以上，而《問傳》說斬衰受服六升七升，而後謂之成布，則五升以下，雖有疏名，而尚未得爲成布；七升以上，則加以羸功，而不僅稱疏。是疏布之縷六升，不當以七升以上之大功布擬之，明矣。賈疏云：「鄭知此經祭祀是天地之神者，以其下經畫布冪六彝，是宗廟之祭用六彝，即知此疏布冪八尊，無裸，是天地可知。又見《禮器》云：『大路素而越席，疏布冪。』彼皆據祭天，則疏布是祭天地可知。舉天地則四望、山川、社稷、林澤皆用疏布，皆是尚質之義也。」詒讓案：《禮運》說宗廟之祭，亦云「疏布以冪」，則內

祭祀亦有用疏布冪者。孔疏謂彼記裸陳夏殷諸侯之禮，未知然否。疏布巾，蓋用素布一幅爲之。陳祥道謂「下言畫布巾，則疏布不畫可知」，是也。《郊特牲》以疏布別於黼黻文繡，明疏布尚質，無黼黻之文矣。以畫布巾冪六彝。宗廟可以文。畫者，畫其雲氣與？【疏】「以畫布巾冪六彝」者，用玄纁錫布一幅爲巾而畫之也。賈疏云：「言六彝者，雞彝、鳥彝、罍彝、黃彝、虎彝、蜼彝。此六彝皆盛鬱鬯，以畫布冪之。此舉六彝，對上經八尊無鬱鬯，以言宗廟有鬱鬯。其實天地亦有秬鬯之彝，用疏布，宗廟亦有八尊，亦用畫布，互舉以明義也。」案：賈說祭天地亦有秬鬯之彝，蓋陳而不裸，詳《鬯人》、《司尊彝》疏。又《燕禮》「公尊冪用給若錫」，注云：「冬夏異也。」依鄭彼注義，則天子諸侯冪當用錫，夏則以絺給。黃以周云：「凡尊冪，錫爲上，絺次之，給又次之。錫，布之細者也。絺，葛之細者也。《大射》冪用錫若絺，《燕禮》冪用給若錫，惟君得用錫也。或絺或給，亦惟其所用，上得兼下。鄭以爲冬夏之別，非其義也。《鄉飲酒》、《士昏》、《特性》皆用給，是士以給爲正也。畫布，爲布之細者，即錫也。」案：黃說與鄭小異，於義亦通。錫布，依鄭《裸記》注義，爲七升半。依金榜說，則當爲十五升。金說爲允。其布精於功布，於差次亦正符合

也。注云「宗廟可以文」者，賈疏云：「以其用畫布，對

上疏布爲質，故言宗廟可以文。」云「畫者畫其雲氣與」者，賈疏云：「三禮通例，所言畫者，解皆以爲畫雲氣，謂畫爲五色之雲。俱無正文，故言「與」以疑之。」詒讓案：鄭君諸經注凡言畫者，多以雲氣爲說。如《射人》及《鄉射記》之畫侯，《司几筵》及《書·顧命》之畫純，《司常》之畫象，《喪大記》之畫荒，皆以爲雲氣。蓋皆意爲之說，於經典無塙證。王昭禹、黃以周謂下文凡王巾皆黼，則畫布巾亦畫黼，其說亦通。凡王巾，皆黼。四飲三酒皆畫黼。周尚武，其用文德則黻可。【疏】「凡王巾皆黼」者，王飲食覆物之巾，

若《曲禮》云「爲天子削瓜者副之，巾以絺」之類，別於上覆尊彝之巾爲祭祀所用也。又據《典絲》注，則王盥巾亦有畫黼，賈疏云：「凡王之覆物之巾，皆用黼文覆之。言凡，非一，四飲三酒之外，簋豆俎簋之屬皆用之。」注云「四飲

三酒皆畫黼」者，謂以玄纁布一幅爲巾，而畫以黼文。飲食不用五齊，故不言也。其布蓋亦以錫及絺綌。四飲三酒，詳《酒正》職。云「周尚武」者，賈疏云：「黼者，白與黑作斧文，取金斧斷割之義。周以武得天下，尚武，故用黼也。」詒讓案：黼斧字通。《周書·器服篇》記明器有斧巾，卽此黼巾也。云「其用文德則黻可」者，亦鄭以意言之，明不必皆

用黼也。賈疏云：「謂若夏以揖讓得天下，是文定天下，則當用黑與青謂之黻，兩已相背也。若然，《易》云「湯武革命」，殷亦以武得天下，則亦用黼耳。」

宮人掌王之六寢之脩

五。《玉藻》曰：「朝，辨色始入。君日出而視朝。退適路寢聽政。使人視大夫，大夫退，然後適小寢，釋服。」是路寢以治事，小寢以時燕息焉。《春秋》書魯莊公薨于路寢，僖公薨于小寢，是則人君非一寢明矣。【疏】「掌王之六寢之脩」者，《釋文》云：「脩，本亦作修。」案：修正字，經例用借字作「脩」。《大宰》「祀五帝則掌百官之誓戒與其具脩」，注云「脩，埽除糞洒」是也。注云「六寢者，路寢一，小寢

五」者，《說文·宀部》云：「寢，卧也。」《艸部》云：「寢，病卧也。」案：寢省變作寢。凡宮寢並取寢息爲名。《釋名·釋宮室》云：「寢，寢也，所寢息也。」賈疏云：「路寢制如明堂，以聽政。路，大也。人君所居皆曰路。」《曲禮》孔疏云：「案《周禮》，王有六寢，一是正寢，餘五寢在後，通名燕寢。其一在東北，王春居之；一在西北，王冬居之；一在西南，王秋居之；一在東南，王夏居之；一在中央，六月居

之。凡后妃以下，更以次序而上御王於五寢之中也。」胡培翬云：「天子六寢，路寢一，小寢五。路寢則正寢，小寢則燕寢也。正寢之一，天子至士所不殊，惟燕寢有隆殺耳。」詒讓案：路寢，《大僕》謂之大寢。燕寢見《女御》，亦曰小寢者，對大寢言之也。此王六寢，自相對為大小，與后寢無涉。《公羊》莊三十二年，何注云：「夫人居小寢。」《左傳》僖三十三年杜注及《檀弓》孔疏引服虔說，並以小寢為夫人寢。彼以夫人寢對君寢為小寢，與此注義異。鄭《匠人》注謂天子路寢，制如明堂；而此注云路寢一，小寢五。則鄭意路寢者，一寢而五室十二堂；小寢五者，五寢寢各一堂二房一室也。小寢雖不如明堂制，然五寢方位亦與明堂五室同。故《曲禮》疏，說五小寢，並依《匠人》五室注義，一寢居中，而四寢分居四維，蓋深得鄭指。《內宰》先鄭注，說后六宮，後五前一，與後鄭說王寢制正同。然鄭路寢如明堂制之說，實未塙。李如圭云：「《書·顧命》，成王崩於路寢。其陳位也，有設斧戣牖間南嚮，則戶牖間也；西序東嚮，東序西嚮，則東西序也；西夾南嚮，則夾室也；東房西房，則左右房也；賓階面、阼階面，則兩階前也；左塾之前，右塾之前，則門內之塾也；畢門之內，則路寢門也；兩階阼，則堂廉也；東堂西堂，則東西箱也；東垂西垂，則東

西堂之宇階上也；側階則北階也。然則鄭謂天子路寢如明堂制者，蓋未必然。」案：《顧命》路寢東西房側階之制，不可通於明堂，李氏所駁甚當。江永、金鶚說並同。《明堂位》孔疏引《尚書大傳·多士傳》云：「天子堂廣九雉，三分其廣以二為內，五分其內以一為高，東房、西房、北堂各三雉。」《伏傳》亦謂路寢有東西房及北堂，足證其必不為明堂制矣。《喪大記》孔疏引熊氏說，謂天子路寢，左房則東南火室，右房則西南金室。欲以傳合東西房與五室為一制，說殊牽強，亦不足據。互詳《大史》、《匠人》疏。又案：《伏傳》說路寢制，有東西房、北堂而無室。依《禮經》，北堂皆在東房之後，則言房可以咳北堂，而室必不容不見，義並難通。豈伏意謂北堂在室後，或舉堂以見室與？引《玉藻》曰「朝辨色始入」者，《釋文》云：「辨，本又作別。」案：《禮記》作「辨」，辨別聲近義通，詳《敍官》疏。鄭彼注云：「羣臣也。入，入應門也。辨猶正也，別也。」賈疏云：「謂羣臣味爽至門外，辨色始入應門。」云「君日出而視朝」者，彼上文云「朝服，以日視朝於內朝」。鄭注云：「內朝，路寢門外之正朝也。」然則此視朝，亦謂內朝。云「退適路寢聽政，使人視大夫，大夫退，然後適小寢，釋服」者，鄭彼注云：「小寢，燕寢也。釋服，服玄端。」賈疏云：「朝罷，君退適路寢

之時，大夫各鄉治事之處。君使人視大夫，大夫退還舍，君然後適小寢，釋去朝服，服玄端。」云「是路寢以治事，小寢以時燕息焉」者，《玉藻》聽政在路寢，是路寢以治事。聽政畢，則適燕寢，是燕寢以時燕息，故《女御》云「掌御敍于王之燕寢」。但路寢爲王之齊宮，凡齊疾亦於彼居息，故《大戴禮記·盛德篇》云「此天子之路寢也，不齊不居其室」，是路寢亦有居息之時矣。云「《春秋》書魯莊公薨于路寢，僖公薨于小寢」者，莊三十二年，僖三十三年經文。《公羊》莊公傳云：「路寢者何？正寢也。」《穀梁》說同。云「是則人君非一寢明矣」者，據《玉藻》及《春秋經》，諸侯非一寢，明天子宜有六寢也。《春秋》定十五年經「公薨于高寢」。《穀梁傳》云：「高寢非正也。」《左傳》杜注亦云：「高寢，宮名。不於路寢，失其所。」^①是高寢非正寢，故鄭不引。又《說苑·脩文篇》云：「《春秋》曰：壬申，公薨于高寢。傳曰：高寢者何？正寢也。曷爲或言高寢，或言路寢？」曰：諸侯正寢三，一曰高寢，二曰左路寢，三曰右路寢。高寢者，始封君之寢也。二路寢者，繼體君之寢也。其二何？曰：子不居父之寢，故二寢。繼體君世世不可居高祖之寢，故有高寢，名曰高也。路寢其立柩何？高寢立中，路寢左右。然則天子之寢柩何？曰：亦三承明，繼體守文

之君之寢曰左右承明。路寢謂之承明何？曰：承乎明堂之後者也。」案：《說苑》說承明，文有缺佚。大意蓋以始受命之王居中承明，猶諸侯之有高寢也。《公羊》莊二十二年，何注云：「天子諸侯皆有二寢，一曰高寢，二曰路寢，三曰小寢。父居高寢，子居路寢，孫從王父，妻從夫寢，夫人居小寢。」案：劉、何說天子亦三寢，與此經乖；其說高寢，亦與《穀梁傳》不合；並鄭所不取。至諸侯寢數，此注無文。賈疏云：「天子六寢，則諸侯當三寢，亦路寢一，燕寢一，側室一，《內則》所云者是也。」《喪大記》孔疏云：「諸侯三寢，一正者曰路寢，二曰小寢。夫人亦有二寢，一正二小。」案：賈、孔二說不同，以孔爲長。黃以周云：「天子諸侯之寢見於經傳者，止有路寢小寢。所謂燕寢高寢者，皆小寢也。《祭義》云：『卜三宮夫人世婦之吉者。』鄭注：『諸侯夫人三宮，半王后也。』亦兼正寢言。以此例之，則諸侯三宮，亦正寢一小寢二可知也。側室不得謂之寢，賈疏非。」胡培翬云：「《內則》『妻將生子及月辰居側室』。注疏解此經爲大夫之制，謂夫正寢之室在前，燕寢在後，側室又次燕寢在燕寢之旁。是大夫有燕寢，有側室矣。《既夕記》

①「路」，原作「露」，據楚本改。

「月朔若薦新，則不饋于下室」。賈疏以下室爲燕寢，則士有燕寢矣。《內則》云：「庶人無側室者，及月辰，夫出居羣室。」庶人無側室，則士得有側室矣。若諸侯小寢二，與大夫士同爲燕寢一側室一，不幾上下亡等乎！案：黃、胡說是也。金鶚亦謂側室非小寢。並足正賈說之誤。《春秋》僖公二十年五月西宮災，《公羊傳》云：「西宮者何？小寢也。小寢則曷爲謂之西宮？有西宮則有東宮矣。魯子曰：以有西宮，亦知諸侯之有三宮也。」又《穀梁》桓十四年傳云：「甸粟而納之三宮。」並諸侯夫人三宮之證。鄭此注及《內宰》注，以後六宮擬王六寢，則亦謂侯國夫人三宮，與君三寢相擬可知；六宮兼路寢言之，則侯國三寢三宮亦兼路寢言可知。綜校鄭義，孔說自塙。又《文王世子》云：「諸孫守下宮下室。」注云：「下室，燕寢。」是燕寢通稱下室，而不得爲側室。側室蓋在后燕寢之兩旁，而別自爲院，故《內則》云「夫齊，則不入側室之門」。孔疏謂側室在燕寢之旁，亦南嚮。是側室別有門而南嚮，足以明其制。又側室，《大戴禮·保傅篇》引《青史氏記》，謂之宴室，詳《內宰》疏。爲其井匱，除其不蠲，去其惡臭。井，漏井，所以受水潦。蠲猶絜也。《詩》云「吉蠲爲饔」。鄭司農云：「匱，路廁也。」玄謂匱豬，謂雷下之池，受畜水而流之

者。【疏】爲其井匱者，井匱當讀爲屏匱。《說文·广部》云：「屏，蔽也。」謂於宮寢隱處爲之匱，又爲屏以爲隱蔽。屏亦作「屏」，《墨子·旗幟篇》云：「爲屏，三十步而爲之圍，高丈，爲民圉，垣高十二尺以上。」匱即圉也。云「除其不蠲，去其惡臭」者，即井匱掃除之事。此官以時除其不絜之物。《說文·占部》云：「殍，腐气也。」臭即殍之借字。惡臭尤不絜之甚者。去亦除也。注云「井，漏井所以受水潦」者，蓋直承雷之下，於地爲小溝，所以受承接承雷之水潦，使漏泄於宫外者，其形若井，故謂之漏井。《御覽·禮儀部》引傳玄《五祀議》云「中雷祭於漏井」是也。云「蠲猶絜也」者，《小爾雅·廣詁》云：「蠲，潔也。」段玉裁云：「圭訓絜，蠲不訓絜，因音同而以猶通之。」案：段說是也。蠲即圭之借字，詳《蜡氏》疏。引《詩》云「吉蠲爲饔」者，《小雅·天保篇》文。毛傳亦訓蠲爲潔，故引以爲證。賈疏云：「案《秋官·蜡氏》云：『大祭祀，令州里除不蠲。』」注云：「蠲讀如『吉圭惟饔』之圭。圭，絜也。」此云蠲，彼注云圭，不同者，彼蓋是三家《詩》，故與此不同。鄭司農云「匱，路廁也」者，《說文·匚部》云：「匱，匿也。」《广部》云：「廁，清也。」謂於宮中路旁隱匿之處爲廁，是謂之匱。惠士奇云：「井匱一名匱，一名屏匱。《莊子·庚桑楚篇》

云：「觀室者周於寢廟，又適其偃焉。」郭注：「偃謂屏廁。寢廟則以饗燕，屏廁則以偃洩。」此井偃乃屏廁之明證。而後鄭謂漏井偃豬者，非也。《戰國策·燕策》：「宋王鑄諸侯之象，使侍屏偃。」《廣雅·釋器》云：「圍、圉、屏，廁也。」王念孫云：「《急就篇》云：『屏廁清溷糞土壤。』屏與屏通。《開元占經·甘氏外官占》引甘氏云：『天溷七星在外屏南，外屏七星在奎南。』注云：『天溷，廁也。外屏所以障天溷也。』又引甘氏讚云：『天溷伏作，抒廁糞土。屏蔽擁障，宴溷莫睹。』宴亦廁也。字本作偃，又作偃，偃與屏皆取隱蔽之義。《宮人》『爲其井偃』，井字疑是并字之譌。并屏古字通，屏偃謂廁也。據下文云「除其不蠲，去其惡臭」，則以偃爲路廁者是也。」案：惠、王說甚塢。但先鄭不釋井字，疑以井偃爲一，蓋不知井爲并之譌也。云「玄謂偃豬謂雷下之池，受畜水而流之者」者，破先鄭說也。丁晏云：「《左傳》襄二十五年『規偃豬』，杜注：『偃豬，下濕之地。』鄭云偃豬，義與偃豬同。《敝人》注：『梁，水偃也。』《釋文》：『徐本作偃。』古偃偃通用。《稻人》注：『偃豬者，畜流水之陂也。』詒讓案：《說文·雨部》云：『雷，屋水流也。』故凡屋檐尚水下注之處，通謂之雷。《鄉飲酒禮》「磬階間縮雷」，《燕禮》「設洗筐于阼階東南，當東雷」，又「賓所執脯以

賜鍾人于門內雷」是也。此云雷下之池，蓋卽《掌舍》先鄭注所謂受居溜水以涑橐者。亦謂之承雷，《檀弓》云「池視重雷」，鄭彼注云：「如堂之有承雷也。承雷以木爲之，用行水，亦宮之飾也。今宮中有承雷，云以銅爲之。」孔疏云：「重雷者，屋承雷也。以木爲之，承於屋，雷入此木中，又從木中而雷於地，故謂此木爲重雷也。天子則四注，四面爲重雷。」案：據孔說，則王六寢並四面爲承雷。雷以行水，故亦謂之池。喪車之池，蓋依此爲名。《漢書·宣帝紀》：「神爵元年，詔曰：金芝九莖，產於函德殿銅池中。」顏注引如淳云：「銅池，承雷也。」則漢時猶名承雷爲池矣。

共王之沐浴。沐浴所以自絜清。【疏】「共王之沐

浴」者，《內則》云「外內不共湑浴」，則王寢中當亦有浴室，此官兼掌之也。此謂共王燕居無事時之沐浴，與鬯人王齊事之湑浴用鬯鬯、女巫歲時祓除釁浴用香薰草藥異。共之者，《喪大記》注說喪禮「天子沐黍」，平時沐禪當同。此官共其潘汁及浴用巾席盤杆之屬，並具而奉之。注云

「沐浴所以自絜清」者，《釋文》云：「本亦作清。」案：《說文·水部》云：「沐，濯髮也。浴，洒身也。澣，無垢蔑也。」又《欠部》云：「清，寒也。」絜清之清，卽澣之借字，澣淨亦古今字，與清字別，或非是。鄭言此者，明與上文脩除蠲

繫事義同也。凡寢中之事，埽除、執燭、共鑪炭，凡勞事。勞事，勞襲之事。【疏】「凡寢中之事」者，

明此官專掌六寢以內，凡喪祭及王燕居之事，無大小皆共給之也。云「埽除」者，《說文·土部》云：「埽，埽也。」此即上云脩是也。詳《隸僕》疏。《大射儀》云：「司宮埽所畫物。」大射雖不在寢，宮人蓋亦掌其埽除之事矣。云「執燭」者，昏執之以爲明也。《宮正》云：「凡邦之事蹕宮中廟中，則執燭。」彼注以爲祭事，蓋在寢外，宮廟之中，則宮正執燭。若平時在寢內，則此宮人執之。二職互相備，亦官聯也。《燕禮》云：「司宮執燭于西階上。」司宮即宮人，燕在寢，故亦此官執燭。《公食大夫禮》「司宮具几筵」。注云：「司宮，大宰之屬，掌宮廟者也。」即據此官言之。彼食禮在廟，故注兼云宮廟。《燕禮》注以司宮爲小宰，失之。云「共鑪炭」者，《說文·金部》云：「鑪，方鑪也。」王燕居寒，則共鑪炭爲溫。蓋掌炭共炭，此官以共王，二官相與爲聯事也。

注云「勞事，勞襲之事」者，謂上三者之外，凡王之六寢中勞苦卑襲之事，宮人並掌之。四方之舍事亦如

之。從王適四方及會同所舍。【疏】注云「從王適四方及

會同所舍」者，賈疏云：「爲王巡守、征伐及會同所舍之處，

亦如上掌凡勞襲之事。」詒讓案：王行所至之地，則掌舍爲宮以舍，宮人亦從而掌其舍中之事也。

掌舍掌王之會同之舍。設桎柅再重。

故書柅爲柅。鄭司農云：「桎，棖桎也。柅，受居溜水涑臺者也。」杜子春讀爲桎柅，桎柅謂行馬。玄謂行馬再重者，以周衛有外內列。【疏】「掌王之會同之舍」者，統下三宮四門等言之。賈疏云：「會同者，謂時見曰會，殷見曰同，皆爲壇於國外，與諸侯相見，而命以致禁之事焉。王至壇所舍息也。」案：賈據會同常禮之行於國城外者，唯爲壇壝宮而已。其十二年王巡守，會諸侯於畿外方岳及殷國，道路較遠，或於道廬宿市之舍，則備此三宮四門，各隨時地設之。會同，詳《大宗伯》疏。注云「故書柅爲柅」者，宋

婺州本、建陽本、董氏本、嘉靖本並作拒，下同。葉鈔本《釋文》亦作拒。案：拒即柅之誤，今依宋互注本正。徐養原云：「《司會》『參互』，故書互爲巨，杜子春讀爲參互。《脩閭氏》『互櫟』，故書互爲巨，鄭司農云當爲互。是古者桎柅之柅，或通作互，互與巨形聲相似。故作柅則讀爲柅，作巨則讀爲互，杜鄭各依字讀之。」鄭司農云「桎，棖桎也」者，先

鄭蓋以桎爲槐之借字。《爾雅·釋宮》云「槐謂之棖」，郭注云「屋椽」。《說文·木部》云：「槐，栢也。棖，秦名爲屋椽，周謂之棖，齊魯謂之槐。」案：槐卽屋椽端橫木。《釋文》云：「棖，戚疏關反。」盧文弨云：「當本亦作椽。」段玉裁云：「棖字不當有此音，非是關字有誤，則戚本當作槐字。《通俗文》曰：『閉門機曰棖。』」案：棖椽義同，然椽與「疏關」音遠，疑段說近是。云「柜，受居溜水涑橐者也」者，賈疏云：「掌舍掌閑衛，不掌絮淨之事。又行止之處，未卽有蟲可涑。先鄭輒依故書柜，而爲溜水涑橐，又柜非必是受溜水之物，於義未可，故後鄭不從。」段玉裁云：「此司農從故書作柜。涑橐，涑讀如盥漱之漱。橐，《釋文》『當洛反』，讀爲沍。《集韻》：『沍，當洛切，滴也。』受居溜水涑橐者，今之格雷是也。謂雷水下其間，漱之沍之。疏云「涑蟲」。岳珂橐音妒，葉林宗抄宋本《釋文》及宋槧《周禮》「橐，當路反」，蓋皆讀橐爲蠹，似非也。會同之舍爲壇，不屋，不應有棖及格雷等，故後鄭從子春作桎柜，訓行馬也。」案：段說甚覈。先鄭以柜爲受居溜水之物，溜雷字通，卽《宮人》後鄭注云「雷下之池受畜水而流之者」，漢人所謂承雷者也。《說文·水部》云：「涑，潏也。漱，盪口也。」二字音義不同。《釋文》云：「涑，徐、劉色遘反，^①戚色冑反。」

是徐邈、劉昌宗並如字讀，而戚衮則讀爲漱，蓋與《匠人》注漱留字同。段從戚讀，於義自通。但「涑橐」疏釋爲「涑蟲」，《釋文》則讀橐爲蠹，猶《掌染草》《釋文》音橐爲妒也，此與賈義正同。段則據今本《釋文》讀橐爲沍。皆未知孰得先鄭之旨。曾釗則謂橐卽櫟字：《脩間氏》注「櫟」，束兩版爲之；此注云「橐」，蓋以接柜所受水而瀉於地者，形制與櫟同，故借名橐。若然，涑橐卽謂漱洒其承雷之木中空如櫟者，義亦得通也。至惠士奇、曾釗又並謂柜卽渠之省。惠又引《荀子·非相篇》「渠匱」爲釋，揆之聲義，亦似符合。但諦審經義，竊疑柜與《掌固》「樹渠」字同，其義當爲藩落，《土方氏》「王巡守則樹王舍」，注云「爲藩羅」是也。《脩間氏》「互櫟」，《古文苑》揚雄《城門校尉箴》用彼文作「柝柜」，與此故書正同。蓋交木爲行馬謂之桎，樹木爲藩落謂之柜，二者皆以備守衛，故經並舉之。以此釋故書，或可備一義與？云「杜子春讀爲桎柜，桎柜謂行馬」者，《說文·木部》云：「桎，桎柜也。柜，行馬也。」《周禮》曰：「設桎柜再重。」段玉裁云：「杜易柜爲柜，鄭君從杜也。司農桎柜爲二物，杜桎柜爲一物。柜與柜形聲皆相似。《說文》柜字下

①「遘」，原訛「溝」，據《釋文》及楚本改。

云「行馬也」，引《周禮》。柅字下不引《周禮》，亦是從子春說，不從故書。案：段說是也。行馬，以木相連比，交互爲之，故謂之柅柅。柅字亦作「互」，《脩閭氏》先鄭注云：「互謂行馬，所以障互禁止人也。」亦謂之閑，虎賁氏「舍則守王閑」，注云：「閑，柅柅。」《六韜·軍用篇》云：「三軍拒守木螳螂，劍刃扶胥，廣二丈，百二十具，一名行馬。」是周時有行馬之名。漢時因之，《藝文類聚·職官部》引《漢官儀》云：「光祿勳門外，特施行馬以旌別之。」是也。云「玄謂行馬再重者以周衛有外內列」者，周衛謂周市王舍爲藩衛。《師氏》云：「朝在野外，則守內列。」注云：「內列，蕃營之在內者也。」是周衛有外內列之證。然則設柅柅再重者，內列一重，外亦一重也。賈疏云：「此柅柅所施，唯據下文車宮壇宮止宿而言。其帷宮無宮，暫止之間，未必有此柅柅也。」設車宮、轅門，謂王行止宿阻險之處，備非常。次車以爲藩，則仰車以其轅表門。【疏】「設車宮、轅門」者，以下設三宮四門之法。宮之爲言營也，凡野舍爲營域以象牆壁，通謂之宮。《司儀》說壇壝宮有四門，則三宮及無宮並設四門可知。注云「謂王行止宿阻險之處，備非常」，次車以爲藩，則仰車以其轅表門」者，以下云「爲壇壝宮」，是平地築土爲宮；此不築土而以車爲宮，明是阻險之處暫

以此備非常。次車以爲藩，謂野處無牆垣，則以車相次比爲藩落也。《孫子·軍爭篇》曹注云：「以車爲營曰轅門。」即本此經。賈疏云：「言仰車以其轅表門者，謂仰兩乘車轅，相向以表門。」詒讓案：凡兵車、乘車曲轅，大車直轅，兩制不同。此會同設車宮，當用兵車，則轅當爲轅，經注散文不別也。又轅門亦建旌，《穀梁》昭八年傳說蒐狩之事云：「艾蘭以爲防，置旌以爲轅門。」范注云：「轅門，印車以其轅表門。」楊士勛疏云：「謂以車爲營，舉轅爲門，又建旌以表之。」並與鄭義同。此會同之舍雖與蒐狩異，車宮轅門之制則一也。又《韓非子·十過篇》云：「智伯與韓魏圍晉陽。二君朝智伯而出，遇智過於轅門之外。」則軍旅亦爲轅門矣。惠士奇云：「漢衛青擊匈奴，以武剛車自環爲營，蓋師古車宮之遺意。」爲壇壝宮，棘門。謂王行止宿平地，築壇，又委壝土起堦埒以爲宮。鄭司農云：「棘門，以戟爲門。」杜子春云：「棘門或爲材門。」【疏】注云「謂王行止宿平地」者，賈疏云：「以下文二者非止宿之事，唯有此壇壝宮及上文車宮爲止宿，但險阻平地二所不同，故知是止宿平地也。」云「築壇又委壝土起堦埒以爲宮」者，《司儀》云：「將合諸侯，則令爲壇三成，宮旁一門。」注云：「合諸侯，謂有事而會也。爲壇於國外以命事。宮謂壝土以爲牆

處，所謂爲壇壝宮也。」又《覲禮》云：「諸侯覲于天子，爲宮方三百步，四門，壇十有二尋，深四尺。」注云：「四時朝覲受之于廟，此謂時會殷同也。宮謂壇土爲埧，以象牆壁也。」案：此並所謂壇壝宮也。壇謂宮內之土堂，壝則通壇外之營域言之。《祭法》注云：「封土爲壇。」《書·金縢》「三壇同埧」，《書釋文》引馬融云：「壇，土堂。」蓋壝者，委土之名。凡委土而平之爲埧；於埧之中封土若堂爲壇；埧之外四面圍繞擁土若牆垣爲壝埧。三者通謂之壝，故《大司徒》「設其社稷之壝」，注云：「壝，壇與壝埧也。」又《鬯人》「社壝」注云：「壝謂委土爲埧壇。」《廣雅·釋丘》云：「壝，埧，厓也。」《說文·土部》云：「埧，庫垣也。」鄭意築土高起爲壇，又於壇外四面委土爲庫垣，令高出於埧，使有厓埧，卽所謂宮也。賈疏謂掘地爲宮，土在坑畔而高爲壝埧；《司儀》疏亦謂掘地爲壝，壝土爲壝埧，當牆處。則似爲溝塹矣，殊誤。又《聘禮》：「未入竟，壹肆，爲壝壇。」彼但壝土爲壇，不爲壝埧，故下云無宮，與此壇壝宮異也。鄭司農云「棘門，以戟爲門」者，《小爾雅·廣器》云：「棘，戟也。」《說文·戈部》云：「戟，有枝兵也。讀若棘。」《明堂位》「越棘大弓」，鄭注云：「棘，戟也。」《左·隱十一年傳》「子都拔棘」，杜注同。案：戟，詳《治氏》疏。棘戟古同讀，故

經典戟字多作棘。壇壝宮無屋，於壝旁樹戟以表門。戟門卽於壝旁爲之，故《覲禮》注云「諸侯入壝門」，卽此棘門也。惠士奇云：「《戰國策·楚策》『楚考烈王卒，李園入宮，置死士於棘門之內』。則知古者宮門皆立戟矣。」杜子春云「棘門，或爲材門」者，存異文也。宋世榮云：「《詩·斯干》『如矢斯棘』，《韓詩》棘作『枋』。《聲類》：『枋，古材字。』」案：宋說是也。棘枋材三字，古音同部，故棘門或爲材門。其義未聞。賈疏云：「閔二年，衛文公居楚丘，國家新立，齊桓公共門材，先令豎立門戶。故知棘門亦得爲材門，卽是以材木爲門也。」案：賈說亦通。爲帷宮，設旌門。謂王行畫止，有所展肆若食息，張帷爲宮，則樹旌以表門。

【疏】「爲帷宮，設旌門」者，與幕人、掌次、司常爲官聯也。

注云「謂王行畫止，有所展肆若食息」者，肆卽肆之借字。賈疏云：「見《下曲禮》云『君命大夫與士肆』。鄭云：「肆，習也。君有命大夫則與士展習其事。」則此亦王與羣臣畫止有所展習。云若食息者，非直有展習，亦有食息之時。」案：《曲禮》經注肆並作「肆」，賈引作「肆」，與彼《釋文》所載別本同。惠士奇云：「《聘禮》：『未入竟，壹肆，爲壝壇，畫階，帷其北，無宮。』蓋張帷以象宮室，帷一面而闕其三，不成宮也。」案：惠說近是。彼聘使展肆，疑兼用帷

宮無宮之制。蓋帷宮正法，張帷周帀爲垣，又於中張帷幕爲次，不僅帷其北也。《左》宣十八年傳，公孫歸父「墀帷而復命於介」。《穀梁》襄十八年傳亦有墀帷之文，似皆與《聘禮》略同。云「張帷爲宮，則樹旌以表門」者，《幕人》注云：「在旁曰帷。」謂張帷帳爲宮也。^①賈疏云：「案《司常》云：『會同賓客置旌門。』」注引此《掌舍》「爲帷宮設旌門」，則旌門司常置之，掌舍主掌之。其旌門，則《司常》所云析羽爲旌者也。詒讓案：《大司馬》「以旌爲左右和之門」，注云：「軍門曰和。今謂之壘門，立兩旌以爲之。」《國語·齊語》「執枹鼓立于軍門」，韋注云：「軍門，立旌爲軍門，若今牙門矣。」又云「渠門赤旂」，注云：「渠門，兩旂所建，以爲軍門，若今牙門矣。」是渠門亦卽旌門。此帷宮爲會同之舍，大會同六軍從行，故旌門之制亦與軍門同也。依韋昭說，似諸侯旌門用大旂。但龍旂色青，今《齊語》云赤旂，則當是鳥隼之旗。以其注析羽於干首，故謂之旌。若天子制，似當用大常而注析羽也。至《毛詩·小雅·車攻》傳，說田禮云「褐纁旂以爲門」，與《穀梁傳》謂置旂以爲轅門同，則因王侯所載旗，並爲通帛之旂。蓋旂旌皆五旗之通制，故《詩》孔疏謂彼卽此及《大司馬》之旌門，賈《大司馬》疏同是也。五旗通有旂旌，詳《司常》、《大司馬》疏。又《覲

禮》云：「至于郊，王使人皮弁用璧勞，侯氏亦皮弁迎于帷門之外。」鄭注云「郊舍狹寡，爲帷宮以受勞」，引此職帷宮旌門。然則旌門，蒙帷宮爲名，亦得謂之帷門矣。無宮則共人門。謂王行有所逢遇，若住遊觀，陳列周衛則立長大之人以表門。【疏】「無宮則共人門」者，《聘禮》注云：「無宮，不壘土畫外垣也。」此無宮，亦王行道路暫駐，故不壘土畫外垣，則立人以表門。云共者，謂選擇其人而立之也。注云「謂王行有所逢遇，若住遊觀」者，謂王行在道，或與諸侯逢遇，或無所逢遇而暫住遊觀，則不爲宮，但立人門。以二者皆行道倉卒簡略之事，不久停止故也。云「陳列周衛則立長大之人以表門」者，謂列人爲周衛，當門處則選擇長大之人以表之也。惠士奇云：「虎士立爲門，四翟各持兵，故曰人門。」《公羊》昭二十五年傳，以遇禮相見，以人爲菑。何注云：「菑，周埒垣也，所以分別內外，衛威儀。」則人門若人垣矣。案：惠說是也。《公羊》云「以遇禮相見」，亦如在道逢遇，陳列周衛。其禮疏略，與此注可互證。此雖云無宮，蓋亦列人爲菑，故《孫子·軍爭

① 「張」，原訛「帳」，據楚本改。

篇》曹注云：「以人爲營，人門是也。」凡舍事，則掌之。王行所舍止。【疏】注云「王行所舍止」者，言雖非會同，若巡守師田之類，王行所舍止，其事皆掌舍掌之。

幕人掌帷幕幄帘綬之事。王出宮則有是

事。在旁曰帷，在上曰幕。幕或在地，展陳于上。帷幕皆以布爲之。四合象宮室曰幄，王所居之帳也。鄭司農云：「帘，平帳也。綬，組綬，所以繫帷也。」玄謂帘，王在幕若幄中，坐上承塵。幄帘皆以繒爲之。凡四物者以綬連繫焉。【疏】「掌帷幕幄帘綬之事」者，賈疏云：「掌王帷在傍施之，像土壁也。幕則帷上張之，像舍屋也。幄，帷幕之內設之。帘者，在幄幕之內，承塵。綬者，條也，以此條繫連帷幕。幕人掌此五者，王出宮，則送與掌次張之。」注云

「王出宮則有是事」者，謂王在宮寢室之內，則無張帷幕諸事，明此幕人所掌諸事，惟王出宮乃有也。然幄帘二者，在宮亦或張之，故《韓詩外傳》云：「天子居廣廈之下，帷帳之內，旃茵之上。」《詩·大雅·抑》云：「相在爾室，尚不愧于屋漏。」鄭彼箋釋屋爲幄。孔疏云：「禮之有帷幕，皆於野張之以代宮室，其宮內不張幕也。幄則室內亦有之。」云

「在旁曰帷，在上曰幕」者，《說文·巾部》云：「在旁曰帷。帷在上曰幕。覆食案亦曰幕。」《釋名·釋牀帳》云：「帷，圍也，所以自障圍也。幕，幕絡也，在表之稱也。」《廣韻·四覺》引《三禮圖》云：「四旁及上曰帷。」案：《禮圖》兼上言之，未析。帷亦謂之容，《荀子·正論篇》云：「天子居則設張容。」容即帷也，與《巾車》車裳帷爲「容」同。楊注以容爲羽衛，非也。賈疏云：「帷在下，幕在上，共爲室。今之設幕，則無帷在下爲異也。」云「幕或在地，展陳于上」者，于，注例當作「於」。賈疏云：「案《聘禮》云，管人布幕，官陳幣，史展幣，皆於幕上。《聘禮》又賓入境，至館，皆展幣。是幕在地，展陳於上。」云「帷幕皆以布爲之」者，賈疏云：「案《既夕禮》云「明衣裳用幕布」，其帷在幕下，明亦用布，故知二者皆用布。至於覆棺之幕，則用繒，故《禮記·檀弓》云：「布幕，衛也。綯幕，魯也。」明天子亦用繒覆棺，不張設，故用繒也。」案：《檀弓》孔疏引崔靈恩說，亦謂此帷幕皆用布，與襯棺之幕用繒別，即賈所本。《既夕記》鄭注云：「幕布，帷幕之布，升數未聞也。」案：《史記·孔子世家》：「孔子見衛夫人，夫人在絺帷中。」絺亦布也。《禮記》說諸侯道死，用緇布裳帷，則帷幕或上下通用緇布與？云「四合象宮室曰幄」者，賈疏引顏延之《纂要》說同。《釋

名·釋牀帳》云：「幄，屋也，以帛衣版施之形如屋也。」《小爾雅·廣服》云：「覆帳謂之幄。幄，幕也。」《廣韻·四覺》引《三禮圖》云：「上下四旁悉周曰幄。」案：四合者，謂上下四旁湊合相遮覆也，象宮室有棟宇四壁之形。蓋兼帷幕之用而較小，故《詩·抑》鄭箋云：「屋，小帳也。」孔疏云：「《裸記》云：『諸侯行而死於道，緇布裳帷，素錦以為幄而行。』則幄在帷幕之內，帷幕是大帳，則幄為小帳也。」案：孔說是也。幄正字當作「幄」，亦作「屋」，詳《巾車》疏。云「王所居之帳也」者，《左傳》哀十四年杜注云：「幄，帳也。」《釋名·釋牀帳》云：「帳，張也，張施於牀上也。」案：幄即覆帳，故云「王所居之帳」。《史記·周本紀》云：「有火自上復于下，至于王屋，流為烏。」王屋亦即王所居之幄也。鄭司農云「帟，平帳也」者，《廣雅·釋器》云：「帟，帳也。」平帳者，謂平施於人上，異於幄幕等為穹隆下覆之帳也。云「綬，組綬，所以繫帷也」者，《說文·糸部》云：「綬，韎維也。組，綬屬也。」《內則》孔疏云：「組，紃，條也。薄闔為組，似繩者為紃。」案：《玉藻》說天子以下佩玉皆有組綬。蓋凡織絲為薄闔之組以為繫者，通謂之組綬。此組綬以連繫帷，與韎維佩系同材也。云「玄謂帟，王在幕若幄中，坐上承塵」者，《廣韻·四覺》引《三禮圖》云：「在上曰帟。」賈

疏云：「在幕謂下《掌次》云『師田則張幕，設重帟』，是王在幕設帟之事。若幄中有帟者，《掌次》云：『朝日，祀五帝，則張大次，小次，設重帟。』次即幄，是幄中坐上有承塵也。」詒讓案：《檀弓》注云：「帟，幕之小者，所以承塵。」《釋名·釋牀帳》云：「小幕曰帟，張在人上帟帟然也。」①又云：「承塵，施於上以承塵土也。」案：承塵即平帳。以其平施於坐上，則謂之平帳；以其承塵土，則謂之承塵。後鄭此說，即增成先鄭之義。《玉篇·巾部》云：「帟，平帳也。又承塵也。」分為二義，非。賈疏謂後鄭不從先鄭平帳義，亦誤。云「幄帟皆以繒為之」者，《說文·糸部》云：「繒，帛也。」賈疏云：「以其布帷幕之內，宜細密。又案《喪大記》有素錦褚。褚即幄。彼喪用錦，明此用繒可知。」案：賈知素錦褚即幄者，據《裸記》云「其轉，素錦以為屋」。注云：「轉，象宮室。屋，其中小帳，襯覆棺者。」彼屋亦與幄同。又《周書·王會篇》云：「成周之會，壇上張赤帟陰羽。」又云：「堂後東北為赤帟焉，浴盆在其中。其西天子乘車立焉，青帟陰羽鳧旌。」又云：「外臺之四隅，張赤帟，為諸侯欲息者皆息焉，命之曰爰間。」孔晁注云：「帟，帳

①「帟帟」，原作「奕奕」，據《釋名》改。

也。陰，鶴也。以羽飾帳。」然則吉時之帟，蓋以采繒爲之。

《周書》帟有羽飾，此經無者，文不具也。云「凡四物者，以綬連繫焉」者，謂帷幕幄帟四者，並以綬連繫之，以便張也。

凡朝覲、會同、軍旅、田役、祭祀，共其帷幕

幄帟綬。共之者，掌次當以張。【疏】「凡朝覲、會同、軍

旅、田役、祭祀，共其帷幕幄帟綬」者，賈疏云：「此一經皆

供與掌次使張之。此云朝覲會同，即《掌次》云「諸侯朝覲

會同」是也。此云軍旅田役，即《掌次》云「師田」，彼師即此

軍旅，彼田即此田役是也。此云祭祀，即《掌次》云「大旅及

朝日祀五帝」是也。此數事皆共帷幕幄帟綬與掌次。」案：

田役謂四時大田起徒役，詳《大宰》疏。注云「共之者，

掌次當以張」者，明此官唯掌共，不掌張事也。大喪，共

帷幕帟綬。爲賓客飾也。帷以帷堂，或與幕張之於庭。

帟在柩上。【疏】「大喪共帷幕帟綬」者，《宰夫》注云：「大

喪，王、后、世子也。」《遂師》云：「大喪，使帥其屬以幄帟

先。」注云：「幄帟先，所以爲葬窆之間先張神坐也。」是大

喪亦當共幄，此不言者，文不具。注云「爲賓客飾也」者，明

喪當去飾，而共此四者，是爲賓客設飾。賓客謂諸侯君臣

來朝聘及來奔喪弔賻者也。云「帷以帷堂」者，堂謂路寢之

堂。賈疏云：「謂若《喪大記》及《士喪禮》始死帷堂，小斂

徹之，及殯在堂，亦帷之也。」云「或與幕張之於庭」者，庭亦

謂路寢堂下。賈疏云：「案《尚書·顧命》云：『出綴衣於

庭。』鄭云：『連綴小斂大斂之衣於庭中。』爾時在庭，應設

此帷幕，無正文，故云或也。有解者云「爲王襲經在庭，故

有帷幕」。按《喪大記》，諸侯踊阼階下，襲經於序東，雖王

禮亦當哭踊在阼階下，何因反來庭中襲經乎？恐不可

也。」詒讓案：此帷幕亦以布爲之。依《檀弓》注，說天子禮

別有覆棺之繆幕，當亦此官共之。又《墨子·節葬篇》說送

葬亦有屋幕，則不徒張之於庭矣。云「帟在柩上」者，《掌

次》注云：「張帟，柩上承塵。」又《檀弓》注云：「帟張於殯

上。」殯上即柩上也。據《遂師》注，大喪葬窆時，張神坐亦

設帟。注不言者，亦文不具。三公及卿大夫之喪，

共其帟。唯士無帟，王有惠則賜之。《檀弓》曰：「君於

士有賜帟。」【疏】「三公及卿大夫之喪，共其帟」者，此亦謂

張殯上之帟也。賈疏云：「《掌次》云「諸侯再重，孤卿大夫

不重」。則此云三公不云諸侯與孤，《掌次》云諸侯與孤不

云三公者，三公卽是諸侯，再重。此不云孤，孤與卿大夫

同，不重。幕人不張，故略不言。」注云「唯士無帟，王

有惠則賜之」者，以士賤不得備物，《士喪禮》亦無帟。引《檀弓》曰「君於士有賜帟」者，證有惠則賜，蓋亦此官共之。

掌次掌王次之灋，以待張事。法，大小丈

尺。【疏】「掌王次之灋」者，掌次之官法也。賈疏云：「次者則舍也。言次謂次止，言舍謂舍息。」云「以待張事」者，賈疏云：「王出宮，則幕人以帷與幕等送至停所，掌次則張之。」案：賈說未晬。《廣雅·釋詁》云：「張，施也。」凡王次張施陳設之事，此官悉掌之，故下經氈案亦云張，明張事不徒設帷幕幄帟等矣。蓋凡王次，皆幕人、司几筵共其物，掌次掌其事，三官相與為官聯也。凡張帷幕等，並以木為柱橑，而後施以繒布。故《呂氏春秋·音初篇》云：「幕動坼橑。」《委人》「喪紀共其木材」，注亦云「木材給張事」是也。注云「法，大小丈尺」者，此亦注用今字也。《司書》注云：「法，數也。」謂大小丈尺之數。賈疏云：「大小者，下文有大次小次是也。丈尺之數，未聞。」王大旅上帝，則張氈案，設皇邸。大旅上帝，祭天於圓丘。國有故而祭亦曰旅。此以旅見祀也。張氈案，以氈為牀於幄中。鄭司農云：「皇，羽覆上。邸，後版也。」玄謂後版，

屏風與？染羽象鳳皇羽色以為之。【疏】「王大旅上帝，則張氈案，設皇邸」者，《釋文》云：「皇邸，一本作皇羽邸。」阮元云：「此因注云皇羽覆上，經亦誤衍羽字。疏云見經皇是鳳皇之字，故知以皇羽覆邸上，是賈疏本不衍羽字也。」案：阮說是也。以下並王之張事，王大祭祀，皆設大次小次以為休息之所。氈案皇邸即張設於次中，賈疏謂王坐所置是也。氈案云張，皇邸云設者，《說文·言部》云：「設，施陳也。」與張文異義同，故下文又云設重案矣。注云「大旅上帝，祭天於圓丘」者，經注例，凡圓字皆作「圜」，此疑誤。賈疏云：「見下經別云祀五帝，則知此是昊天上帝，即與《司服》及《宗伯》昊天上帝一也，即是《大司樂》冬至祭天於圓丘之事也。」案：鄭、賈意經雖言大旅，實即圓丘之大祀也。依此注，則上帝指昊天而言。《大宗伯》及《典瑞》皆云旅上帝，注並云上帝五帝也。《職金》「旅上帝」，賈疏亦以五帝為釋。二說不同。攷《禮器》云：「大饗之禮，不足以大旅。大旅具矣，不足以饗帝。」注云：「大旅，祭五帝也。饗帝，祭天。」《家語·郊問篇》王肅注同。彼云「大旅不足以饗帝」，饗帝即圓丘之祭。大旅既次於饗帝，則此注以大旅上帝為祭天於圓丘者，非也。《禮器》注說以大旅為祭五帝，與《大宗伯》、《典瑞》諸注義同。然此

職下文別出祀五帝，明上帝與五帝異，則以上帝爲通咳五帝者，亦非也。蓋帝之與天，雖可互稱，而此經則塙有區別。通校全經，凡云昊天者，並指圜丘所祭之天。凡云上帝者，並指南郊所祭受命帝。二文絕不相通。此職云「大旅上帝」，《大宗伯》云「旅上帝及四望」，《典瑞》云「祀天旅上帝」，又云「祀地旅四望」，《職金》云「旅于上帝」，《玉人》云「旅四望」。凡言旅者，並指非常之祭而言。所旅者止於上帝四望。不云旅昊天、旅五帝，則知旅祭上不及昊天，下不徧及五帝。此大旅上帝，自專指有故祭受命帝，與南郊之祭帝同而禮不同，與圜丘昊天之祭則迥不相涉也。蓋受命帝在五帝之中爲特尊，而卑於昊天，旅上帝有張氈案，設皇邸，則祀昊天亦同可知。旅禮略而郊祀詳，旅有張設，則郊祀亦同又可知。經舉上帝而不及昊天者，明舉卑可以見尊。舉大旅而不及郊祀者，明舉略可以見詳，經固有此文例也。凡上帝與昊天、五帝不同，互詳《大宰》、《大宗伯》、《肆師》、《典瑞》疏。《南齊書·禮志》載江淹、王儉議，並謂南郊爲旅上帝。又引孔晁云：「五帝佐天化育，故有從祀之禮，旅上帝是也。」案：孔晁治王肅之學，蓋亦以郊丘爲一，南郊祀昊天，以五帝配，是爲旅上帝，則亦以旅爲郊也。王議又引馬融說，以爲夏正總旅明堂。《舊唐書·禮儀志》

載唐人亦有釋《典瑞》「旅上帝」爲衆祭五帝者，黎幹表難之云：「旅雖訓衆，出於《爾雅》，及爲祭名，《春官》訓陳，注有明文。若如所言，旅上帝便成五帝，則季氏旅於泰山，可得便是四鎮邪？」案：黎說是也。馬、王諸家之說，其不可通有四。此經云大旅，下文又別云祀五帝，則上帝非即總祀五帝可知。段令大旅與祀同，此五帝經何以爲別異之文乎？其不可通一。旅爲總祭，古無是說。《大宗伯》、《典瑞》、《玉人》並云「旅四望」，望祀各就其方，無總祭之法。若如馬說，豈得復有總祭四望之禮乎？其不可通二。《大宗伯》以旅上帝爲國有大故之祭。若南郊，則常祀之最大者，不得待有大故始行之，其不可通三。《眡瞭》說大旅有廠樂器，與大喪同，《笙師》說大旅陳器亦然。明大旅之禮與常祭不同。若郊祀用盛樂，豈得但廠陳之？其不可通四也。凡大旅與圜丘不同帝，與南郊帝同而祭不同，互詳《大司樂》疏。云「國有故而祭亦曰旅」者，明旅本爲有故特祭之專名，常祀不名旅也。賈疏云：「案《大宗伯》『國有大故則旅上帝及四望』。是國有故而祭謂之旅。」案：詳《大宗伯》疏。云「此以旅見祀也」者，賈疏云：「但此下文五帝見正祀，其旅見於《大宗伯》。《大宗伯》昊天不云旅，故此見。此文不言正祀，故鄭以因旅見之。欲見有故昊天亦旅

之，故云以旅見祀。」詒讓案：《大宗伯》注云：「旅，陳也。陳其祭事以祈焉，禮不如祀之備也。」據彼注則旅與祀禮小異。此經云王大旅上帝，不云祀上帝，不宜大旅有張氈案設皇邸之等，大祀反無之，故鄭謂經言旅以見祀，明旅有此張設則祀亦有待言也。然以經攷之，昊天似無旅法，鄭、賈並謂昊天亦有旅，非也。云「張氈案，以氈爲牀於幄中」者，《掌皮》云：「共其毳毛爲氈，以待邦事。」《釋名·釋牀帳》云：「氈，旃也，毛相著旃旃然也。」《說文·毛部》云：「氈，撚毛也。」《木部》云：「案，几屬。牀，安身之几坐也。」案：對文則案與牀異，散文則通。凡牀以木爲之，此注云以氈爲牀者，言以氈覆牀上爲之，猶後牀上覆重席，謂之重案也。賈疏云：「牀上著氈，即謂之氈。案據鄭云於幄中，則知不徒設氈案皇邸而已，明知并有大次小次之幄，與下祀五帝互見之也。」鄭司農云「皇，羽覆上」者，《樂師》「皇舞」先鄭注云：「以羽冒覆頭上，衣飾翡翠之羽。」然則此皇邸，先鄭意疑亦當爲翡翠之羽覆邸上，與後鄭皇爲象鳳皇羽義異。賈疏謂先鄭亦以皇爲鳳皇羽，疑非先鄭意。云「邸，後版也」者，謂氈案後之植版也。《爾雅·釋器》云：「邸，謂之柅。」凡物根柅必在後，故後版謂之邸。《輶人》以「大車後轅爲邸，與此義略同。」云「玄謂後版屏風與」者，賈

疏云：「此增成司農義。言後版者，謂爲大方版於坐後，畫爲斧文。言屏風者，據漢法況之。無正文，故言「與」以疑之。」呂飛鵬云：「康成《三禮圖》云：「宸從廣八尺，畫斧文於其上，今之屏風也。」賈云「爲大方版於坐後，畫爲斧文」。是即以後版屏風爲斧依。」案：呂說是也。《釋名·釋牀帳》云：「屏風，所以屏障風也。」《爾雅·釋器》郭注謂射容形如牀頭小曲屏風。此氈案即牀而設後版，蓋與漢晉牀頭屏風正相類，故後鄭舉屏風以申先鄭後版之說。然不云畫黼，賈據《司几筵》注謂黼依制如屏風，因謂此皇邸亦畫斧文。不知此皇邸以皇羽覆上，不必更畫斧文也。屏風亦見《燕丹子》及《史記·孟嘗君傳》，則戰國時已有此稱，不始於漢矣。云「染羽象鳳皇羽色以爲之」者，《樂師》「皇舞」注云：「皇，裸五采羽如鳳皇色，持以舞。」《王制》云：「有虞氏皇而祭。」注云：「皇，皇冕屬也，畫羽飾焉。」凡《禮經》言皇者，鄭並以鳳皇羽爲釋。《爾雅·釋鳥》云：「鳳其雌皇。」《山海經·南山經》云：「丹穴之山有鳥焉，其狀如雞，五采而文，名曰鳳皇。」此象鳳皇羽色，亦謂染羽爲五采也。賈疏云：「案《尚書·禹貢》「羽畎夏翟」，謂羽山之谷貢夏翟之羽。後世無夏翟，故《周禮》鍾氏染鳥羽，象鳳皇色以爲之，覆於版上。《明堂位》及《司几筵》皆云「黼黻」，此不

在寢廟，無宸，故不得云黼宸，故別名皇邸。」案：賈說非也。鳳皇羽與夏翟羽色並備五采，鄭各望文爲訓，故不同耳。《爾雅·釋器》云：「牖戶之間謂之宸。」此皇邸大旅所用，既不在牖戶之間，雖形制相近，而畫飾迥異，不得謂即黼依之別名也。《典絲》疏說亦同。朝日、祀五帝，則

張大次、小次、設重帘重案。合諸侯亦如之。朝日，春分拜日於東門之外。祀五帝於四郊。次謂

幄也。大幄，初往所止居也。小幄，既接祭退俟之處。《祭

義》曰：「周人祭日，以朝及闇。」雖有強力，孰能支之，是以退俟與諸臣代有事焉。合諸侯於壇，王亦以時休息。重

帘，復帘。重案，牀重席也。鄭司農云：「五帝，五色之

帝。」【疏】「朝日祀五帝」者，亦冢王爲文。此皆大祀，王親

與祭，則有此張設之事。五帝尊於日月，而經先云朝日後

云祀五帝者，各隨文便，無義例。云「則張大次小次，設重

帘重案」者，賈疏云：「大幄小幄，但幄在幕中，既有幄，明

有帷幕可知。設重帘者，謂於幄中設承塵。重案者，案則

牀也。牀言重，謂牀上設重席。不言氈及皇邸，亦有可

知；上氈案不言重席，亦有重席可知。互見爲義。」注

云「朝日，春分拜日於東門之外」者，《玉藻》云：「天子玄端

而朝日於東門之外。」鄭注云：「朝日，春分之時也。東門

謂國門也。《觀禮》云：「天子乘龍，載大旂，象日月、升龍、

降龍，出拜日於東門之外，反禮方明。」彼注云：「此謂會同

以春者也。」此云拜日於東門之外，兼用《玉藻》、《觀禮》兩

文。《觀禮》所記雖非春分朝日，其禮略同也。春分朝日，

秋分夕月，即日月之正祭。鄭說本馬融，詳《典瑞》疏。云

「祀五帝於四郊」者，賈疏云：「案：《小宗伯》兆五帝於四

郊」是也。此謂四時迎氣。案《月令》，立春於東郊，立夏於

南郊，季夏六月迎土氣，亦於南郊，立秋於西郊，立冬於北

郊，謂靈威仰之屬。」①案：詳《小宗伯》疏。云「次謂幄也」

者，《敘官》注云：「次，自脩正之處。」凡祭祀朝覲之所，必

張幄以爲自脩正之處。經云大小次，次即幄，四合象宮室

者也。云「大幄，初往所止居也，小幄，既接祭退俟之處」

者，賈疏云：「必兩次設幄者，大幄謂王侵晨至祭所，祭時

未到，去壇壝之外遠處設大次，王且止居，故云大幄初往所

止居也。接祭者，與羣臣交接相代而祭，去壇宜近，置一小

幄，退俟之處。」引《祭義》曰「周人祭日，以朝及闇」者，《祭

義》云：「郊之祭也，大報天而主日，配以月。夏后氏祭其

①「謂」下，《周禮疏》有「祭」字。

闇，殷氏祭其陽，周人祭日以朝及闇。」鄭彼注云：「闇，昏時也。陽，日中時也。朝，日出時也。夏后氏大事以昏，殷人大事以日中，周人大事以日出，亦謂此郊祭也。以朝及闇，謂終日有事。」案：彼注謂郊祭，此注引之，證朝日祀五帝，與郊祀略同，亦終日有事也。云「雖有強力，孰能支之，是以退俟，與諸臣代有事焉」者，強力謂強有力也。《聘義》云：「聘射之禮，至大禮也。質明而始行事，日幾中而后禮成，非強有力者弗能行也。」《挈壺氏》注云：「代猶更也。」以其竟日有事，雖有強力，亦不能支，故王與諸臣更番迭進，王以次退俟於幄，得以暫息，不至疲勞。云「合諸侯於壇，王亦以時休息」者，明合諸侯，亦於壇內外設大小次及重帘重案也。合諸侯，即《大宗伯》云「時見曰會，殷見曰同」。賈疏云：「案《司儀》，合諸侯爲壇三成是也。」云「重帘復帘」者，復，宋本、嘉靖本並作「複」，今從注疏本。《廣雅·釋詁》云：「復，重也。」賈疏云：「謂兩重爲之。」詒讓案：《周書·王會篇》，說成周之會，壇及爰間，皆張赤帘。蓋即重帘也。云「重案，牀重席也」者，牀不可以言重，故知爲覆重席。賈疏云：「案：《司几筵》『莞筵纁席，次席三重」。此言重席，亦當有此三重，與重帘不同。」案：賈意重案當有三重席，與重帘止兩重帘，文同義異。但《司几筵》

三種席謂加席也，與重席本不同。以《禮經》重席之例言之，天子當莞筵五重，《玉藻》云「天子之席五重」是也。此經注並無重席之數，疑覆案之席與設於地不同，或不必備五重。後文諸侯不云重案，則是不重，與《禮器》亦異，是其證也。重席，詳《司几筵》疏。鄭司農云「五帝，五色之帝」者，即蒼赤黃白黑五天帝是也。詳《大宰》及《小宗伯》疏。師田，則張幕，設重帘重案。不張幄者，於是臨誓衆，王或迴顧占察。【疏】「師田則張幕，設重帘重案」者，亦冢上王爲文，謂大師及四時大田王親行者也。賈疏云：「謂出師征伐及田獵，則張幕者爲王設坐。不言帷者，亦有可知。」注云「不張幄者，於是臨誓衆，王或迴顧占察」者，謂師田有誓衆之事，故設平帳之帘，而不設四合象宮室之幄，使四旁皆見，以便王之迴顧占察。《說文·見部》云：「覘，窺視也。」占即覘之段字。《方言》云：「占，視也。凡相窺視，南楚或謂之占，自江而北凡相候謂之占。」然則占察猶言視察。《司稽》、《司門》注並云「視占」是也。諸侯朝覲會同，則張大次、小次，大次，亦初往所止居。小次，即宮待事之處。【疏】「諸侯朝覲會同」者，以下並諸侯之張事。賈疏云：「此謂與諸侯張之，若四時常朝

在國內。今言朝覲會同，爲會同而來，故在國外，與《大宰》大朝覲會同一也。」案：經言朝覲者，明四時常朝亦張大小次也。賈謂因會同而朝，不關常朝，非經義。云「則張大次小次」者，賈疏云：「亦如上文大小次，丈尺則減耳。」詒讓案：張大小次，則亦當有帘案，但不重耳。又《聘禮記》云：「宗人授次，次以帷，少退于君之次。」鄭彼注云：「主國之門外，諸侯及卿大夫之所使者，次位皆有常處。」賈彼疏云：「凡爲次，君次在前，臣次在後，故云少退於君之次。」則諸侯卿大夫來聘問，亦有次。此經不言者，文略。

注云「大次亦初往所止居，小次即宮待事之處」者，賈疏云：「鄭云初往止居者，謂宮外也。即宮者，應是宮內。言宮，即《司儀》所云「宮方三百步曠土爲之」是也。言待事者，欲於幄中待事辦否。」案：賈據會同言之。其朝覲之次，則在皋門外及廟門外。《覲禮》云：「諸侯前朝，皆受舍于朝。同姓西面北上，異姓東面北上。」鄭彼注云：「受舍于朝，受次于文王廟門之外。言舍者，尊舍也。天子使掌次爲之。諸侯上介先朝受焉。」此即朝覲即宮待事之次也。但《覲禮》注謂朝覲受次在文王廟門外，而依《小宗伯》注，廟在雉門外，則非三朝所在。《小司寇》注雖有外朝在雉門外之說，然以《朝士》校之，自是譌文。今攷定廟當在路門

外，則正當治朝，然鄭實無是義。又《齊僕》、《大行人》注謂朝覲王有車迎出大門之法，則諸侯待事，亦不宜唯在廟門外。鄭彼注義，舛迕甚多，故賈彼疏云：「若天子春夏受享，諸侯相朝聘，迎賓客者皆有外次。有外次於大門外者，則無廟門外之內次。天子覲遇在廟者，有廟門外之內次，無大門外之外次。」案：賈蓋亦知鄭義之難通，故爲此說以斡旋之，然究不塙也。江永云：「朝覲當有大次在外朝，有小次在廟門外，《覲禮》所謂前朝皆受舍于朝是也。《覲禮》言旅見，則分同姓西面，異姓東面。若其特朝，則次當張之門外西方而東面，以爲止居待事之處。《掌訝》云：「及將幣，爲前驅，至於朝，詔其位，入復。」入復至行禮，爲時久，則侯氏宜於大次止居以待，乃交擯，天子許入，於是侯氏入大門。至廟門外，入於小次以待事。」案：江說與《聘禮》、《覲禮》義並合，是也。凡四時朝覲禮亦無異，詳《大宗伯》疏。師田，則張幕設案。鄭司農云：「師田謂諸侯相與師田。」玄謂此掌次張之，諸侯從王而師田者。【疏】「師田則張幕設案」者，賈疏云：「文承上諸侯，謂諸侯從王師田，即張幕設案者也。不言重，則無重席，亦應有單席於牀也。」注鄭司農云「師田，謂諸侯相與師田」者，先鄭意上張幕設重帘重案爲天子師田，此文承上諸侯朝覲會同之

下，故當爲諸侯相與師田，與上天子師田異也。云「玄謂此掌次張之，諸侯從王而師田者」者，賈疏云：「後鄭不從先鄭者，以其天子掌次，不合與諸侯國內張幕，故云掌次張之，以明非諸侯相與師田也。此至下所云次者，謂以繒爲幄帳。案《聘禮記》所云次，或以帷及席，皆得，與此《掌次》所云次別也。」案：賈意上大小次，注以次爲幄。據《幕人》注，幄以繒爲之，故謂此及下所云次，並以繒爲幄帳，與《聘禮記》次以帷布爲之者別。又《士冠禮》「賓就次」，注云：

「次，門外更衣處也，以幄幕簾席爲之。」賈彼疏謂士卑，或張簾席，故此疏亦云或以帷及席皆得。竊謂行禮有次，通於尊卑，幄帷雖繒布異材，然皆可爲次。此經諸次所設不同，既無用幄之明文，則或亦得含有帷席之次。賈必謂其與《聘禮》次別，殆失之固矣。孤卿有邦事，則張幕

設案。有邦事，謂以事從王，若以王命出也。孤，王之孤

三人，副三公論道者。不言公，公如諸侯禮。從王祭祀合諸侯，張大次小次，師田亦張幕設案。【疏】「孤卿有邦事

則張幕設案」者，此畿內諸臣之張事，孤卿不設幄次，降於諸侯也。

注云「有邦事謂以事從王」者，賈疏云：「謂若上王大旅上帝、朝日、祀五帝、合諸侯及師田等數事，王

親行則從王往也。」云「若以王命出也」者，賈疏云：「若祭祀，則容王有故不視，羣臣攝之。若諸侯使臣時聘殷覲，王不親行，則於國外使羣臣受之，是王命出也。」云「孤，王之孤三人，副三公論道者」者，《北堂書鈔·設官部》引《五經異義》云：「古《周禮》說，天子立三公，曰太師、太傅、太保。無官屬，與王同職，故曰「坐而論道，謂之王公」。又立三少以爲之副，曰少師、少傅、少保，是爲三孤。」又引環濟《要略》云：「少師、少傅、少保，是爲三孤，副助三公者也。孤者，不掌官，桀然孤特也。」《書》僞古文《周官》說，與《周禮》說略同。僞孔傳云：「孤，特也。言卑於公，尊於卿，特置此三者。」《論語·微子》《皇氏《義疏》引鄭《書·微子》注云：「少師者，大師之佐，孤卿也。」亦從古《周禮》說。王引之云：「《漢書·百官公卿表》曰：「大師、大傅、大保，是爲三公。又立三少爲之副，少師、少傅、少保，是爲孤卿，與六卿爲九焉。」是鄭注所本也。案：三少出《大戴禮記·保傅篇》，曰「於是爲置三少，皆上大夫也」。曰「少保、少傅、少師，是與大子宴者也」。未嘗以爲《周禮》之孤。《周禮》言三公者，皆著其數曰三，若孤實有三人，則亦當著其數曰三孤矣。乃通考全經，言孤者凡二十有一，皆但謂之孤，無言三孤者，則孤之數必非三人，未可以保傅之三少當之也。

《幕人》：「三公及卿大夫之喪，共其帑。」《典命》：「王之三公八命，其卿六命。」《掌客》：「從者，三公眡上公之禮，卿眡侯伯之禮。」皆言三公而不言孤，孤已在卿之內故也。經凡以孤卿並言者，皆不答卿之人數。以卿與三公對言，則曰六卿，而不言孤，豈非以孤在六卿之內，則不得於孤之外更數六卿，亦不得於六卿之外更言孤乎？蓋六卿中有秉國政者，其位獨尊，故謂之孤。孤者，獨也。譬之大國之卿，晉士會受黻冕之命而將中軍，宋樂喜爲司城以爲政，位在六卿之列，而又獨尊也。《周書·大匡篇》：「王乃召冢卿、三老、三吏、大夫、百執事之人，朝于大庭。」孔注曰：「冢卿，孤卿。」蓋《爾雅》冢，大也。六卿之中孤爲大，故曰冢卿也。《穆天子傳》：「百辟冢卿亦孤也。」郭注以爲冢宰，失之。昭四年《左傳》：「叔孫卒，杜洩將以路葬。」南遺謂季孫曰：「冢卿無路，介卿以葬，不亦左乎？」杜注曰：「冢卿謂季孫介，次也。」則季孫爲冢卿，孟孫、叔孫爲介卿可知。季孫秉國政，故謂之冢卿也。其位在六卿之首，其數則一人而已，不得有三也。自班氏作表，誤以三少爲孤，而康成沿襲之，於是東晉古文《尚書》竊其說以入《周官》，曰少師、少傅、少保曰三孤，而孤之爲官，遂失其本義矣。又案：以《周禮》之孤爲三人，其誤始於新莽。《漢書·王莽傳》曰：「置大

司馬司允，大司徒司直，大司空司若，位皆孤卿。」蓋莽建立《周禮》，見《周禮》屢言三公孤卿，則妄以孤爲三公之佐，而置三公司卿以放效之。至班氏作表，又以大師大傅大保爲三公，而少師少傅少保爲孤卿，官名雖異，而以孤爲三人，分屬三公，則沿新莽之誤。」案：王謂孤爲冢卿，即在六卿之中，非三少，其說致塙。孤者，執政之卿，亦謂之卿士。《詩·小雅·十月之交》，說「皇父卿士」在「家伯維宰」之上，鄭箋以宰爲冢宰，則皇父爲孤卿可知。《左·隱九年傳》，載鄭莊公爲王左卿士，與虢公忌父爲右卿士，並爲政。《左·隱三年》杜注，謂卿士，王卿之執政者。執政必孤卿，而有左右，是有二孤矣。蓋孤爲諸卿中執政者之稱，無專職亦無定員，但不可以三少強充其數耳。通言之，孤在卿中爲特尊，秩次亞於三公，故亦通稱公。《鄉飲酒禮》：「諸公大夫，」注云「大國有孤，四命謂之公」是也。卿士爲孤，而亦爲諸卿之通稱，故《書·洪範》云：「卿士惟月，師尹惟日。」孔疏引鄭《書注》云：「卿士，六卿掌事者。」又《匠人》注以三孤六卿爲九卿，亦非，詳彼疏。云「不言公，公如諸侯禮，從王祭祀合諸侯，張大次小次，師田亦張幕設案」者，以經言孤卿，不及三公，故鄭補其義。賈疏云：「謂如上諸侯之禮，中唯有會同師田，無言祭祀，鄭云祭祀者，王於會同與祭

祀同，云亦如之，則諸侯從王祭祀，亦與會同同。若然，三公從王祭祀，亦與從王會同同也。」**凡喪，王則張帟三重，諸侯再重，孤卿大夫不重。**張帟，柩上承塵。

【疏】「凡喪，王則張帟三重，諸侯再重，孤卿大夫不重」者，賈疏云：「以其王以下至孤卿大夫，兼有后及三夫人已下，故言凡以廣之也。后與王同三重，世子、三夫人與諸侯同再重，九嬪二十七世婦與孤卿大夫同不重，一而已。八十一御妻與士同，無帟，有賜乃得帟也。此諸侯，謂三公、王子、母弟。若畿外諸侯，掌次不張之。」金鶚云：「凡兩物積累，方可言重。若只一物，則不可言一重。故再重之下，即曰不重，而無一重之文。」注云「張帟，柩上承塵」者，詳

《幕人》疏。**凡祭祀，張其旅幕，張尸次。**旅，衆

也。公卿以下即位所祭祀之門外以待事，爲之張大幕。尸則有幄。鄭司農云：「尸次，祭祀之尸所居更衣帳。」【疏】

「凡祭祀，張其旅幕，張尸次」者，賈疏云：「祭祀言凡者，天地宗廟外內祭祀，皆有羣臣助祭，其臣既多，不可人人獨設，故張旅幕。旅，衆也，謂衆人共幕。諸祭皆有尸，尸尊，故別張尸次。」注云「旅，衆也」者，《序官》注同。云「公

卿以下即位所祭祀之門外以待事」者，上經「孤卿有邦事則

張幕設案」，注謂「以事從王」，又謂「公如諸侯禮，從王祭祀，設大次小次」，是公從祭當特設次，卿從祭當特張幕；則此注公卿以下，蓋外公卿言之，謂中大夫以下待事，則衆人共居旅幕，以其無專幕也。《通典·吉禮》說大袞云：

「掌次於廟外之東，設主人及公卿以下次幕。」林喬蔭云：

「尸次差設於廟門外之西。」案：林蓋據《聘禮》注賓次在門西推之，於義近是。杜謂設於門東，恐未塙。賈疏云：「若宗廟自有廟門之外，若外神於郊，則亦有壇宮之門，門外並有立位。」云「爲之張大幕」者，以其旅居人衆，取足相容，故特爲大幕也。云「尸則有幄」者，以經云張尸次，與上朝日祀五帝設大次小次，^①同爲四合之幄也。《少牢饋食禮》云「祝迎尸于廟門之外」。《特牲饋食禮》云「祝迎尸于門外」。注云：「尸自外來，代主人接之，就其次而請。」則尸次亦於廟門外張之。鄭司農云「尸次，祭祀之尸所居更衣帳」者，《掌訝》云「次于舍門外」，後鄭注云：「次，如今官府門外更衣處。」《士冠禮》、《大射儀》注並同。即用先鄭義。次張帷幕爲之，故謂之帳。賈疏云：「未祭則常服，至祭所，乃更去常服服祭服也，故言更衣。」射則張耦次。耦，俱升

①「日」，原脫，據楚本補。

射者。次在洗東。《大射》曰：「遂命三耦取弓矢于次。」
【疏】「射則張耦次」者，通三射而言。賈疏云：「天子大射，六耦，在西郊。賓射亦六耦，在朝。燕射三耦，在寢。此六耦，三耦，據諸侯射者，若衆耦則多，但無常數耳。」
案：天子大射當在東郊、南郊，燕射亦具六耦，賈說並誤，詳《司裘》、《大司馬》、《射人》疏。 注云「耦，俱升射者」

者，即《大司馬》云「若大射則合諸侯之六耦」，《射人》云「王六耦，諸侯四耦，孤卿大夫士三耦」是也。《左》襄二十九年傳云：「射者三耦。」杜注云：「二人爲耦。」《曲禮》孔疏云：「射法，每兩人相對以決勝負，名之曰耦。耦貴賤必對，故卿與卿耦，大夫與大夫耦。或奇餘不足，則使士備耦。」案《大射》，君與賓耦，卿大夫自相耦。賈疏云：「案《大射》、《鄉射》，耦皆兩兩揖讓，升自西階，鄉兩楹之間，履射物南面而射。射訖，又兩兩揖讓，降自西階。」云「次在洗東」者，鄭《大射儀》注云：「耦次在洗東南。」案彼經上文云「設洗于阼階東南」，然則耦次又在洗之東南，亦即阼階東南也。此注不言南者，文不具。又案：《大射》注據射宮庭中言也。燕射於路寢，亦有阼階。唯賓射於治朝，無堂階，以意推之，賓射耦次，其在路門外東塾之東南與？引《大射》曰「遂命三耦取弓矢于次」者，賈疏云：「證次中有弓

矢，其耦立位在次北，西面。至射乃命三耦入次，取弓矢。引之者，以天子之次無文，雖六耦不同，設次則與諸侯同也。《儀禮·鄉射》乃是州長射士禮，其中兼有鄉大夫詢衆庶之射，並無次，故堂西比耦也。」掌凡邦之張事。

大府掌九貢、九賦、九功之貳，以受其貨賄之人，頒其貨于受藏之府，頒其賄于受用之府。九功謂九職也。受藏之府，若內府也。受用之府，若職內也。凡貨賄皆藏以給用耳，良者以給王之用，其餘以給國之用。或言受藏，或言受用，又雜言貨賄，皆互文。【疏】「掌九貢九賦九功之貳」者，此並掌財用府藏官之官法，與大宰正副相贊者也。《大宰》云：「以九職任萬民，以九賦斂財賄，以九貢致邦國之用。」此官並執其法籍之貳。賈疏云：「大宰掌其正，此官掌其副貳者，以其物入大府故也。」云「以受其貨賄之人」者，明凡貨賄之人，此官總受之也。賈疏云：「九貢謂諸侯九貢，自然有金玉曰貨，布帛曰賄。九賦謂畿內之九賦，口率出泉。九職，如三農園圃之類。亦有不出貨賄者，皆言受其貨賄之人者，雖以泉穀爲主，民欲得出貨賄者則取之，以當邦賦之數，故《大

宰云：「九賦斂財賄」，是其不要取泉也。」案：九賦者，畿內田野之稅。九功者，萬民職事之征。賈依《大宰》注說以九賦爲口泉，非也。並詳《大宰》疏。云：「頒其貨于受藏之府，頒其賄于受用之府」者，賈疏云：「言大府雖自有府，其物仍分置于衆府。」注云：「九功謂九職也」者，《司會》云

「以九功之濃，令民職之財用」，故知九功卽九職之功，授其事則爲職，獻其成則爲功，其實一也。《管子·乘馬篇》云：「賈而不爲官賈者，與功而不與分焉；工而不爲官工者，與功而不與分焉。」彼功卽此九功之功。與功而不與分，謂使爲賈工者，各自貢其功，若《閭師》商賈百工之貢，不與分者，不頒以食也。賈疏云：「以其九職任萬民，謂任之使有職事，故《大宰》云九職。大府斂貨賄，據成功言之，故云九功。其本是一，故云九功九職也。」江永云：「九功中，臣妾不貢疏材，此舉其大綱，未暇細別，《閭師》乃分析言之。」云「受藏之府若內府也」者，據《內府》云：「掌受九貢九賦九功之貨賄，良兵良器，以待邦之大用。」是受藏之府。《職金》云：「入其玉石丹青于守藏之府。」注亦云：「守藏者，玉府、內府也。」黃以周云：「玉府、內府皆藏貨賄之良，以待王之大用。大用不常有，故謂之受藏之府，明不遽出也。」詒讓案：鄭意蓋謂玉府、內府、外府，皆爲受藏之

府。唯云內府者，文不具也。云「受用之府若職內也」者，據《職內》云：「以逆邦國之賦用」，是受用之府。鄭意蓋謂職內、職歲、職幣皆爲受用之府，唯舉職內者，亦文不具也。

金榜云：「受藏之府，受用之府，六官之屬具有之。在天官則玉府、內府、外府，其較著者也。職內掌邦之賦入，職歲掌邦之賦出，蓋各執其出入之總，以贊逆會，乃計官之屬，故與司會、司書職相亞次，非謂邦賦盡入於職內，盡出於職歲也。」案：金說是也。此經受藏受用之府，所該甚廣，若酒人、漿人酒飲並入酒府，廛人市布入泉府，珍異入膳府之屬。凡百官之有府者，並得受之。注唯舉內府、職內二官以見例耳。云若者，卽是比擬之詞，非謂受藏專屬內府，受用專屬職內也。云「凡貨賄皆藏以給用耳」者，以貨爲金玉，賄爲布帛，皆給用之物。賈疏云：「鄭欲以藏用互文，貨言藏者，以其善物；賄言用者，以其賤物。其實皆藏皆用，故言凡貨賄皆藏以給用耳。」云「良者以給王之用」者，若內府待邦之大用，玉府掌王之良貨賄之藏是也。云「其餘以給國之用」者，若職內邦國之用是也。云「或言受藏，或言受用，又雜言貨賄，皆互文」者，賈疏云：「言受藏謂內府，言受用謂職內，皆藏以給用，言藏亦用，言用亦藏，是互文也。雜言貨賄者，言貨兼有賄，言賄亦兼有貨，亦是互

文。但二者善惡不同，故別言之耳。」凡官府都鄙之吏及執事者，受財用焉。【疏】「凡官府都鄙之吏」

者，此吏通冢官府都鄙爲文，謂王朝衆官及都鄙采邑咸有官吏，猶《司會》云「掌國之官府郊野縣都百物財用」。此內舉官府，外舉都鄙，以通該郊野縣等，明畿內之官吏通掌之，文不具也。采邑之吏，雖各屬其主，然亦兼正於王官。若都家、宗人、司馬及邑長等有大法用，如受王命祭祀、發軍役之等，亦受財於大府也。云「及執事者」者，執事謂非其專職，暫來治事者，故於官府都鄙之吏外，別言之，詳《大宰》疏。云「受財用焉」者，官吏與執事凡有應用財物者，皆於此官受之，以此官通管諸府也。凡頒財，以式灋授之。關市之賦以待王之膳服，邦中之賦以待賓客，四郊之賦以待稍秣，家削之賦以待匪頒，邦甸之賦以待工事，邦縣之賦以待幣帛，邦都之賦以待祭祀，山澤之賦以待喪紀，幣餘之賦以待賜予。待猶給也。此九賦之財給九式者。膳服，卽羞服也。稍秣卽芻秣也，謂之稍，稍用之物也。喪紀卽喪荒也。賜予卽好用也。鄭司農云：「幣

餘，使者有餘來還也。」玄謂幣餘，占賣國之斥幣。【疏】

「凡頒財」者，以下冢上文而辨九賦、九貢、九功所用之異也。《大宰》注云：「財，泉穀也。」此當通貨賄言之。賈疏云：「《大宰》云九賦斂財賄，九式用之。此大府頒與九式用之。但事相因，故二處別言九賦之物也。此所頒之財，卽《大宰》斂財賄，一也。」云「以式灋授之」者，明此官亦掌九式之貳也。當頒財時，各攷案法式爲書，并授其人，使依法式用之，所用與式必相應也。金榜云：「大宰制法式，以歲上下，凡受財用者，皆以法式授之，爲其所用多寡，歲各不同。《職歲職》曰：「凡官府都鄙羣吏之出財用，受式法于職歲。」此大府頒財，亦令職歲授之式法也。」云「關市之賦以待王之膳服」者，賈疏云：「自此以下並與九式事同，但文有交錯，與九賦不次。」江永云：「以某賦待某事，蓋約計其財用之相當，爲之式法，非必以其地之所出給此用也。」金榜云：「大府頒其貨于受藏之府，頒其賄于受用之府，分別其貨賄，入于諸府。未嘗以邦中四郊之等區爲九處，如山澤之賦以待喪紀，而川衡祭祀賓客共川奠，澤虞祭祀賓客共澤物之奠，其非專以待喪紀甚明。餘可類推。」案：江、金說是也。此亦以九賦地稅，與九式法用約略相當，足相待給耳。至其用之，則緩急贏朒亦自有彼此通移

之法，固不可一概論也。

注云「待猶給也」者，《外府》

注同，此引申之義也。《說文·彳部》云：「待，竢也。」凡儲物竢其用時而給之，亦爲待，故《小宗伯》注云「待者有事則給之」是也。賈疏謂鄭謂大宰斂得九賦之財，給九式之用，待來則給之，故云待猶給，非是訓待爲給。非鄭旨也。云「此九賦之財給九式者」者，據《大宰》文。見經云式法，卽九式之法也。九賦，地稅爲賦斂之正，故以待九式之正法用，明餘法用不得取此也。云「膳服卽羞服也」者，此據《大宰》九式文。彼注云：「羞，飲食之物也。」膳卽飲食之善者，故兩職互文。云「稍秣卽芻秣也」者，亦據九式文，謂給牛馬之禾穀也。《掌客》云：「賓客有喪，唯芻稍之受。」注云：「芻，給牛馬。稍，人稟也。」與此異者，芻稍對文則異，散文可通。以禾穀給牛馬，亦猶人之給稟食，故通得稱稍矣。云「謂之稍，稍用之物也」者，釋芻秣亦曰稍秣之義。《說文·禾部》云：「稍，出物有漸也。」芻秣亦以漸頒之，故云稍用之物。云「喪紀卽喪荒也」者，亦據九式文。呂飛鵬云：「九式言喪荒，注云：『荒，凶年也。』此經言喪紀者不一。《庖人》『共喪紀之庶羞』，注云：『喪紀，喪事之祭。』《外饗》『凡小喪紀』，注云：『謂喪事之奠祭。』則喪紀祇可云喪事，不可兼云荒也。」案：呂說是也。《大宰》九式有喪

荒，此有喪無荒者，荒非常事，不可豫爲節度，故文不具也。詳《大宰》疏。云「賜予卽好用也」者，以九式有好用無賜予，彼注云「好用燕好所賜予」是也。凡賜有常賜，有好賜。常賜者，歲時頒賜，著於秩籍者；好賜則常賜之外，以恩澤特受賜，非恒典也。常賜謂之頒，上匪頒內已略之，明此賜予專據好賜言也。凡經云賜予者，並爲好賜，詳《內饗》及《大宰》疏。鄭司農云「幣餘，使者有餘來還也」者，先鄭意聘使當有幣帛，故有餘來還謂之幣餘也。賈疏云：「案：《大宰》司農注『幣餘，百工之餘』，與此注不同者，蓋是司農互舉以相足。後鄭不從者，聘使之物，禮數有限，何得有餘來還。又且有餘來還，何得有賦，故後鄭不從。」云「玄謂幣餘，占賣國之斥幣」者，《大宰》『幣餘之賦』，後鄭注同。案：幣餘，幣當讀爲敝，二鄭說並誤，詳《大宰》疏。凡邦國之貢以待弔用，此九貢之財所給也。給弔用，給凶禮之五事。【疏】「凡邦國之貢以待弔用」者，邦國九貢，爲數不多，不及九賦九功之富，又無泉穀之貢，故專儲以待弔用也。江永云：「以待弔用，亦謂取之諸侯者，還用之諸侯耳。非謂弔用必取給于九貢而九貢必不可爲他事用也。」

注云「此九貢之財所給也」者，據《大宰》云：「以九貢

致邦國之用。《書·禹貢》孔疏引鄭《書注》云：「貢者，百功之府受而藏之。」即謂此大府等也。賈疏云：「案《大行人》六服諸侯因朝所貢之物，與《大宰》九貢歲之常貢，雖曰時節不同，貢物有異，要六服之貢與九貢多同，亦入弔用之數。」云「給弔用，給凶禮之五事」者，明與《宰夫》云「凡邦之弔事，掌其戒令與其幣器財用」，為專據弔諸侯諸臣者異也。賈疏云：「案《大宗伯》云「凶禮，哀邦國之事」。下云有喪禮、荒禮、弔禮、禴禮、恤禮，五禮皆須以財貨哀之，故云給凶禮之五事。」詒讓案：鄭知弔用非即凶禮之弔禮者，以弔禮所用無多，故以凶禮五事總釋之。凡萬民之貢

以充府庫，此九職之財。充猶足。【疏】「凡萬民之貢，

以充府庫」者，此即上文九功，亦即《閭師》之八貢也。任民以九職，而使貢其功以當賦，故謂之功，亦謂之貢。九功之財數，亦少於九賦。以充府庫者，積儲以備九賦九貢之不足，及他小用，亦取諸此也。江永云：「此對邦國之貢言之，即九功所出之財貨，非別有貢物也。」黃以周云：「此言九職力征，《閭師職》所謂「掌國中及四郊之人民，六畜之數，以任其力，以時徵其賦」是也。力征其所入者少，祇以充府庫，不若九賦之待用廣也。賈氏疏鄭以九功為田賦，九賦為口錢，則是以田地之正稅充府庫，而口賦之餘稅反

給邦國之大用，無是理也。」案：黃說是也。注云「此

九職之財」者，即上九功之財也。賈疏云：「案《大宰》云九職任萬民，此上文又云九功，此貢即是九職之功所稅，故知此是九職之財也。」^①又九貢言入弔用，九賦言入九式，有餘財亦入府庫，是以上文掌九貢九賦，受其貨賄，頒於受藏受用之府也。」云「充猶足」者，《廣雅·釋詁》云：「充，滿也。」《說文·儿部》云：「充，長也，高也。」引申為滿足之義，故云充猶足也。凡式貢之餘財以共玩好之用。

謂先給九式及弔用，足府庫而有餘財，乃可以共玩

好，明玩好非治國之用。言式，言貢，互文。【疏】「凡式貢

之餘財」者，此亦即幣餘之財，以共賜予外，尚有羨贍也。

云「以共玩好之用」者，《說文·玉部》云：「玩，弄也。」沈夢

蘭云：「九式九貢之餘財以供玩好之用者，如《禹貢》球琳

琅玕蠙珠之屬。《國語·楚語》：「白珩，先王之玩也，何寶

焉。」謂之玩好之用，正不貴異物之意也。」注云「謂先

給九式及弔用，足府庫而有餘財，乃可以共玩好，明玩好非

治國之用」者，賈疏云：「經言餘財，明知先給九式及弔用，

① 「職」，原訛「賦」，據賈疏及楚本改。

足府庫之餘也。經言式貢者，式即上文九賦之財，給九式之餘也。貢即上文邦國之貢，及萬民之貢也。」云「言式、言貢，互文」者，賈疏云：「式謂九賦，貢謂九貢及萬民之貢。但賦言式，據用而言，其實亦有賦，貢據貢上爲名，亦有用，故云互文也。」案：此式謂九式所用之餘，雖據用而言，然亦兼有斂，即幣餘之人職幣，又以式灋斂之者也。賈說未析。凡邦之賦用，取具焉。賦用，用賦。【疏】「凡邦之賦用取具焉」者，明大府爲財用之總會，凡邦用無大小，悉取具於是官也。注云「賦用，用賦」者，用賦猶言用財，明與上九賦異也。賦用亦見《職內》。賦皆謂財用之總名。又《職內》云「賦入」，《職歲》云「賦出」，義並同。賈疏謂「上有九賦、九貢、九功，此特言賦，明兼有九貢九功，亦取具焉」。失之。歲終，則以貨賄之人出會之。【疏】「歲終則以貨賄之人出會之」者，此通掌諸府藏

官之官成。《司會》云「以歲會攷歲成」。亦與彼爲官聯也。大府受諸府之歲會，而人之冢宰，冢宰受而聽之。賈疏云：「貨賄之人者，謂九貢、九賦、九功人來至大府。言出者，大府以貨賄分置於衆府，及給九式之用，亦是至歲終總會計之。」

周禮正義卷十二

玉府掌王之金玉玩好、兵器，凡良貨賄

之藏。良，善也。此物皆式貢之餘財所作。其不良，又有受而藏之者。【疏】「掌王之金玉玩好、兵器，凡良貨賄之藏」者，兵謂五兵，器謂車旗用器，即《內府》「良兵、良器」是也。此經《司兵》及它職云五兵、兵甲、兵革者，皆單言兵，不繫器爲文。《大司馬》云軍器，則又不言兵。凡云兵器者，並兵與器爲一。鄭、賈多釋爲軍器，則與《內府》不合，非也。《大宰》注云「金玉曰貨，布帛曰賄」，則金玉玩好、兵器，亦良貨賄之種別。此金玉玩好、兵器及良貨賄，即《大宰》九賦之稅所造及九職之功所貢者。故《遂師》云「入野職野賦于玉府」，明此官爲其受藏之府。內府亦掌良貨賄，此官蓋掌其尤良中王之服御者，亦與彼爲官聯也。易按云：「《獸人》曰『皮毛筋骨入于玉府』；《獸人》曰『凡獻征入于玉府』；《塵人》曰『斂其皮角筋骨入于玉府』；《澤虞》曰『掌國澤之政令，守其財物，以時人之于玉府』；

《職金》亦曰「入其金錫于爲兵器之府，入其玉石丹青于守藏之府」。^①此其玩好、兵器、良貨賄之物，玉府皆掌而藏之矣。」注云「良，善也」者，《宰夫》注義同。云「此物皆式貢之餘財所作」者，賈疏云：「案上《大府》云『式貢之餘財，以供玩好之用』。彼玩好之中，兼有金玉兵器，故知式貢餘財也。」云「其不良又有受而藏之者」者，賈疏云：「即上《大府》云受藏受用之府是也。」詒讓案：以經云良貨賄，明惟良者乃入此官，其不良者仍入內外府諸官也。共王之服玉、^②佩玉、珠玉。佩玉者，王之所帶者。《玉藻》曰：「君子於玉比德焉。天子佩白玉而玄組紃。」《詩傳》曰：「佩玉，上有蔥衡，下有雙璜、衝牙，蠙珠以納其閒。」鄭司農云：「服玉，冠飾十二玉。」【疏】「共王之服玉佩玉珠玉」者，此皆王服御之玉也。江永云：「有法度之玉，典瑞掌之。良貨賄之玉，玉府藏之。服玉、佩玉、珠玉、食玉、含玉，皆良貨賄之玉也。」詒讓案：《說文·玉部》云：「珠，蚌中陰精也。」此珠玉則當是小玉圓好如珠者，或

① 「玉」，原作「金」，據易按《周官總義》改。

② 「王」，原作「玉」，據楚本改。

亦琢玉爲之，非蚌珠也。《爾雅·釋地》云：「南方之美者，^①有霍山之多珠玉焉。」彼珠卽小玉也。《荀子·賦篇》云：「旋玉瑤珠，不知佩也。」則古珠或以瑤爲之。《毛詩·衛風·木瓜》傳云：「瓊瑤，美石。」玉石散文亦通。 注

云「佩玉者，王之所帶者」者，《說文·人部》云：「佩，大帶佩也。」《釋名·釋衣服》云：「佩，倍也，言其非一物，有倍貳也。有珠，有玉，有容刀，有帨巾，有觿之屬也。」案：容刀諸物所謂事佩也，與玉佩異。賈疏云：「謂佩於革帶之上者也。」引《玉藻》曰「君子於玉比德焉」者，彼下文卽說天子以下佩玉事，故引以證王必佩玉之義。《聘義》文亦略同。云「天子佩白玉而玄組綬」者，亦《玉藻》文。鄭彼注云：「綬者，所以貫佩玉相承受者也。」賈疏云：「所佩白玉謂衡、璜、琚、瑀。玄組綬者，用玄組條穿連衡璜等，使相承受。」引《詩傳》者，賈疏謂是《韓詩》。案：《月令》孔疏引《韓詩外傳》文，與此同。然今本《外傳》無此語，疑出《韓詩內傳》也。《國語·晉語》韋注引《詩傳》及《大戴禮記·保傳篇》、《賈子·容經》說佩玉，並略同。云「佩玉上有蔥衡」者，《大戴禮·保傳》盧注云：「衡，平也。」賈疏云：「衡，橫也。謂蔥玉爲橫梁。」案：《說文·玉部》云：「珩，佩上玉也，所以節行止也。」衡卽珩之段字。徐堅《初學記·器物

部》引《三禮圖》云：「衡，長五寸，博三寸，上平爲衡。」案：《御覽》及聶氏《三禮圖》引並作「博一寸」，疑徐引非是。《玉藻》云：「一命再命幽衡，三命蔥衡。」注云：「衡，佩玉之衡也。青謂之蔥。」又云：「天子佩白玉，公侯佩山玄玉，大夫佩水蒼玉，世子佩瑜玉，士佩瑀玟。」則天子以下佩玉各異，所謂蔥衡者，卽大夫佩水蒼玉之衡。此鄭引《詩傳》成語，故仍其舊文，不復改易。實則天子當佩白玉衡，不佩蔥衡。《國語·晉語》云「白玉之珩六雙」，《楚語》亦云「楚之白珩」，蓋卽天子所佩白玉衡也。又《詩傳》云：「上有蔥衡。」賈、孔疏義並謂佩上止有一衡，而宋本《大戴禮》及《賈子》、《月令章句》、《三禮舊圖》、《漢書·五行志》注並云上有一雙衡，《初學記·器物部》引魚豢《魏略》亦云「有雙璜、雙珩、琚瑀、衡牙、琕珠爲佩者，乃漢明帝采古文始制」也。任大椿云：「攷衡之爲義，惟一梁上橫。《追師》之衡，《輶人》之衡，與佩上之衡，名義相似。蓋以一衡爲上端，下屬三組，中組以貫瑀衡牙，旁組以貫兩琚及雙璜也。若有兩衡，何以貫三組乎？況《三禮舊圖》，明云衡長五寸，若雙衡則一尺矣。佩繫身旁而容一尺之衡，其不適於體甚明。故

① 「南方」，據《爾雅》應作「西方」。

「雙」之作「蕙」，當以《韓詩》爲正。」案：任說甚覈。孔廣森亦據《儀禮經傳通解》，校改《保傳》「雙衡」爲「蕙衡」。但據《玉藻》，則天子以下佩衡，玉色各異。《大戴禮》諸書，並通論佩制，與《詩》說不同，不宜槩沿三命蕙衡之文。陳奐、黃以周並從舊本《大戴禮》作雙衡。陳氏云：「珩爲佩玉最上之名，行步，下則雙璜與衝牙成聲，上則珩與珩成聲。」《采芑篇》「有璿蕙珩」，傳：「璿，珩聲。」謂卽雙珩之聲也。鄭引《詩傳》者，三家釋《采芑》之蕙珩，後儒因改《大戴禮》雙字爲蕙字。天子白珩，《大戴》言天子之珩，不得爲蕙珩明矣。」案：依陳說，則《韓傳》詁詩自作蕙衡，《戴記》述禮又自作雙衡，兩文不可強合，其論實允當。《晉語》說白珩以雙計，亦足爲《保傳》佐證。但任謂衡之義，取一梁上橫，與車衡義同，其說則固不誤。蓋裸佩之玉不一，今以條組交午貫穿，若非以一衡總攝兩端，則縣之革帶，必有散亂之弊，聲亦安能成節乎？衡之不能與璜同爲平列分縣，揆之物理，殆無疑義。竊謂古佩玉自有雙衡，而實非平列，似當以兩玉重紮縣之，其形蓋橫平，而上微隆起爲鈍角，下微容邪刺，旁出爲岐足。故《晉語》韋注云：「珩，形似磬而小。」《楚語》注又云：「珩，上之橫者。」韋所謂象磬而上橫者，自據漢以後橫縣之磬爲象。然則《三禮舊圖》云「上平曰衡」，

亦對雙璜側垂大較言之，實則衡上隆而下窪，與橫磬略同，固非正平也。其縣之則上下重沓，相去當不逾數分，動則下衡之首，與上衡恒相摩切，故不藉衝牙，而自能璿然成聲。而三組分貫於上下衡之中與兩旁，則與一衡無異，自無不能總攝之患。揆校文制，於《禮》或有合乎！云「下有雙璜衝牙」者，《保傳》盧注云：「半璧曰璜。」《玉藻》云：「佩玉有衝牙。」鄭注云：「居中央以前後觸也。」孔疏云：「凡佩玉必上繫於衡，下垂三道，穿以蟻珠，下端前後，以縣於璜，中央下端縣以衝牙，動則衝牙前後觸璜而爲聲。所觸之玉，其形似牙，故曰衝牙。皇氏謂衝居中央，牙是外畔兩邊之璜，以衝牙爲二物。若如皇氏說，鄭何得云牙居中央以爲前後觸也？」賈疏云：「謂以組懸於衡之兩頭，兩組之末皆有半璧曰璜，故云雙璜。又以一組懸於衡之中央，於末著衝牙，使前後觸璜，故言衝牙。」案：賈說是也。依皇侃說，則璜一名牙，衝牙者以衝璜得名，與鄭、賈說異。《保傳》盧注云：「衝在中，牙在傍。」說亦與皇同。《初學記》及叢氏《三禮圖》引舊圖云：「下有雙璜，徑三寸，衝牙長三寸。」綜校諸說，璜蓋以徑三寸之璧而中析之，每璜肉蓋徑一寸，其好半徑則五分也，長皆如其全徑。衝牙長三寸，橫設璜間，其兩角適切璜好之中，以雙璜肉各一寸，并

衝牙三寸爲五寸，與上衡之長適相準，此亦衡橫縣之義證也。云「螭珠以納其間」者，《大戴禮·保傳》云：「玼珠以納其間，琚瑀以雜之。」盧注云：「納於衡橫衝牙之間。玼亦作螭。總曰玼珠，而赤者曰琚，白者曰瑀。或曰：瑀，美玉。琚，石次玉。」《書·禹貢》云「淮夷螭珠」，孔疏引鄭注云：「螭珠，珠名。」《說文·玉部》云「玼，珠也」。宋弘云：「淮水中出玼珠。玼珠，珠之有聲者。」《重文作螭》，云《夏書》玼从虫賓。賈疏云：「螭，蚌也。珠出於蚌，故言螭珠。納其間者，組繩有五，皆穿珠於其間，故云以納其間。」案：賈蓋謂螭爲蚌之別種，因以名其珠，卽本鄭義也。《玉藻》疏謂佩組三道，皆穿以螭珠。賈更及邪繫二組，午貫四維，故有五組，與孔義實同也。《續漢書·輿服志》劉注引《月令章句》云：「佩，上有雙衡，下有雙橫，琚瑀以雜之，衝牙、螭珠以納其間。」《初學記·器物部》引《三禮圖》文略同。又云：「橫中橫以衝牙，以蒼珠爲瑀。」案：此並讀「衝牙螭珠以納其間」爲句，與盧辯及賈、孔兩疏異。《漢書·五行志》顏注說同。蓋衝牙居兩橫之間，亦得爲納間，然鄭讀實不如是也。依《大戴記》，裸佩又有琚瑀。《毛詩·邶風·有女同車》傳云：「佩有琚瑀，所以納間。」此注引《詩傳》則無琚瑀，唯有螭珠。賈疏又云：「案《毛詩傳》，衡橫之外，

別有琚瑀。其琚瑀所置，當於懸衝牙組之中央，又以二組穿於琚瑀之內角，斜繫於衡之兩頭，於組末繫於橫。」案：諦繹賈說，似以琚瑀爲一玉，且唯中組設之，與螭珠編綴五組不同。而盧辯及《三禮舊圖》，並謂琚瑀卽珠。《續漢·輿服志》注引顏延之《纂要》云：「琚瑀所以納間，在玉之間，今白珠也。」似亦以螭珠與琚瑀爲一珠，乃玉珠非蚌珠。《魏略》以螭珠爲琨珠。《說文·玉部》云：「琨，石之美者。」則魚說雖不以琨珠琚瑀爲一，而亦不以爲蚌珠，並與賈義異。任大椿云：「《保傳篇》先言葱衡及雙橫衝牙，特舉上下兩端也。上下玉名既著，於是始言上下之間貫以玼珠，而玼珠之中，又間以琚瑀之玉。其云琚瑀以雜之，猶云琚瑀以間之也。《鄭風》『佩玉瓊琚』，毛傳：『佩有琚瑀，所以納間。』間猶中也，謂琚瑀納在衡橫衝牙之中也。《大戴禮注》亦謂玼珠納衡橫之間，不及琚瑀，蓋彼注以琚瑀爲玼珠別名，非玉也。則佩上下惟有衡橫二玉，欲明玼珠在納玉間，惟得云納於衡橫之間耳。今攷《雜佩以贈之》傳，『雜佩者，珩璜琚瑀衝牙之類』。珩璜衝牙與琚瑀並舉，珩璜衝牙既爲玉，則琚瑀亦爲玉明矣。故《說文》『玉篇』皆云瑀，石之似玉者。《說文》云：「琚，瓊瑀。」《玉篇》亦云：「琚，玉也。」《續漢志》『孝明皇帝乃爲大佩衝牙雙瑀璜，皆以白

玉」。然則《漢志》明以白玉爲琚瑀，則琚瑀不得爲玼珠矣。」案：任謂琚瑀非玼珠是也。賈前疏謂琚瑀以白玉爲之，與《續漢志》同，則亦不謂與螭珠爲一，任說與賈正合。琚瑀納間，似五組皆當有之，與螭珠相錯共處，而賈前疏則謂唯中組有之。古書所說不詳，宋以後說者皆謂瑀在中組，雙瑀在旁，咸無塙證，今亦無以定之。經云佩玉，蓋通衡璜衝牙及琚瑀螭珠言之，佩以玉爲主，言玉可以眩石珠也。鄭司農云「服玉，冠飾十二玉」者，賈疏云：「案：弁師掌五冕，衮冕十二旒，鷩冕九旒，毳冕七旒，絺冕五旒，玄冕三旒，皆十二玉。冕則冠也。《弁師》又有皮弁、韋弁冠，亦皆十二玉，故云冠飾十二玉也。」詒讓案：《弁師》又有玉笄、玉瑱，當亦在服玉之內。先鄭不言者，文不具。又《月令》，春服蒼玉，夏服赤玉，中央土服黃玉，秋服白玉，冬服玄玉。後鄭彼注云：「凡所服玉，謂佩飾及所佩者之衡璜也。」呂氏春秋·孟春紀《高注》，則直訓服爲佩。彼不言佩玉，故服玉內兼有佩玉。此服玉在佩玉之外，故先鄭止舉冠飾之玉爲釋也。王齊，則共食玉。玉是陽精之純者，食之以禦水氣。鄭司農云：「王齊當食玉屑。」【疏】注云「玉是陽精之純者」者，賈疏云：「但玉聲清，清則屬陽。又案《楚語》云：『王孫圉與趙簡子言曰：玉足以庇蔭嘉

穀，使無水旱之災則寶之；珠足以禦火則寶之。』服氏云：「珠，水精，足以禁火。」如是則玉是火精可知。」案：賈說非也。《易·說卦傳》云「乾爲玉」，故爲陽精。《白虎通義·考黜篇》云「玉者德美之至也」，^①故爲陽精之純者。云「食之以禦水氣」者，《大戴禮記·勸學篇》及《管子·侈靡篇》並云：「玉者陽之陰也，故勝水。」此謂玉可以禦水氣，義蓋與彼同。但齊居路寢，何必以禦水氣，未審厥旨。賈疏謂恐起動多，故須玉以禦水氣，亦未塙。鄭司農云「王齊當食玉屑」者，《楚辭·離騷》云：「精瓊靡以爲糧。」王注云：「精，鑿也。靡，屑也。精鑿玉屑以爲儲糧。」是古有食玉屑之法。賈疏云：「其玉屑研之乃可食。」俞正燮云：「《太平御覽》引吳普《本草》云：『玉泉一名玉屑，神農、岐伯、雷公甘。』《三輔黃圖》云：『武帝銅盤玉杯承露，和玉屑服之，以求仙道。』皆食玉也。」惠士奇云：「食玉，掌於玉府，而不掌於膳夫，則玉非可食之物矣。」《左傳》成十七年，聲伯夢，或與己瓊瑰食之。食玉者，含象，聲伯夢而惡之。則玉非可食之物益明。」曾釗云：「方書亦有食玉法，然非經義也。《膳夫職》云「王齊日三舉」，是齊食加日食二等，其器必有

①「美」，原訛作「義」，今據楚本改。

用玉者。《玉藻正義》：「天子朔月，太牢當六簋，盛舉則八簋。」《禮器》注：「鏤簋，謂刻而飾之，天子以玉。」然則食玉，蓋卽簋歟？日食朔食並有簋，玉府獨共王齊者，變食亦變器也。」案：先鄭說蓋據漢時神仙服食家言，若俞氏所舉是也。然其說不經，於古未聞，殆不足據。惠氏糾之甚允。通校諸家之說，惟曾說較爲近理。蓋王齊備盛饌，則饌具之器，亦宜備飾。食玉者，殆卽以玉飾食器，若玉敦、玉豆之類皆是與？

大喪，共含玉、復衣裳、角枕、角枵。角枕以枕尸。鄭司農云：「復，招魂也。衣

裳生時服，招魂復魄于大廟，至四郊。角枵，角匕也，以楔齒。《士喪禮》曰「楔齒用角枵」。楔齒者，令可飯含。」玄謂

復於四郊以綏。【疏】「大喪共含玉」者，此與典瑞爲官聯

也。賈疏云：「大喪謂王喪，含玉，璧形而小，以爲口實。

此不言贈玉，飯玉者，文不備。」江永云：「含玉，玉府、典瑞

兩官並共，豈玉府共之於典瑞，而典瑞乃共之以含與？」

案：江說近是。此大喪疑亦通包王、后、世子之喪，賈說未

咳。含玉，詳《大宰》疏。云「復衣裳」者，與司服爲官聯也。

共與夏采、祭僕、隸僕等用之。《說文·巾部》云：「常，下

帛也。重文裳，常或从衣。」凡復時所用吉服燕服，咸襦裳

具有，故經兼云衣裳也。賈疏云：「王始死，招魂復魄之衣裳不在司服者，司服所掌是尋常衣服，玉府所掌皆王之美物。其衣服美者，亦玉府掌之。但所復衣裳用死者上服，故玉府供之。」案：賈說非也。《司服》云：「大喪共其復衣服。」彼官所掌，自裘冕以下，弁冠諸禮服，無不備共，則其美者不宜轉在此官。據下經云「掌王之燕衣服」，則此復衣裳疑亦當爲燕衣服。王喪復於大小寢，或兼用燕服也。《士冠禮》大小斂，^①皆祭服散衣並列，彼注釋散衣爲袍繭之屬，卽下經燕衣服也。若然，司服所共者祭服，此官所共者殆卽散衣，二官互相備與？《司服》又有斂衣服、奠衣服、廠衣服，當亦祭服散衣並有，經皆不具也。注云「角枕以枕尸」者，《說文·木部》云：「枕，卧所薦首者。」《詩·唐風·葛生》云：「角枕粲兮。」毛傳云：「齊則角枕。」蓋枕尸用齊時枕也。《既夕記》始死云設牀第，設枕。《喪大記》沐浴之後云：「設牀檀第，有枕，含一牀，襲一牀，遷尸於堂又一牀，皆有枕席，君大夫士一也。」彼枕皆卽此角枕。鄭司農云「復，招魂也」者，《夏采》先鄭注云：「復，於始死招魂復魄。」與此注義同。《楚辭·招魂》王敘云：

①「冠」疑當作「喪」。

「招者召也，以手曰招，以言曰召。魂者，身之精也。」《士喪禮》說復云「北面招以衣」，即謂招魂也。《檀弓》孔疏謂招魂者是六國以來之言，未塙。云「衣裳生時服」者，謂王生時常御之服，明與明器之衣服異也。云「招魂復魄于大廟至四郊」者，于，注例當作「於」，各本並誤。此亦據《夏采》文。先鄭意，彼文雖云以乘車載綏復於四郊，亦兼有衣裳矣。云「至四郊」者，明自內及外，咳祭僕復小廟，隸僕復小寢大寢而言也。云「角柶，角匕也」者，《說文·木部》云：「禮有柶，柶，匕也。」又《匕部》云：「匕，所以比取飯，一名柶。」《廣雅·釋器》云：「柶，匙，匕也。」《士冠禮》：「側尊一甒醴，有筐，實勺，觶角柶。」鄭彼注云：「柶狀如匕，以角爲之者，欲滑也。」《喪大記》孔疏云：「柶，以角爲之，長六寸，兩頭曲屈。」聶氏《三禮圖》云：「禮有柶，用角爲之。銅有柶，用木爲之。舊《圖》云：柶長尺，櫨博三寸，曲柄長六寸，漆赤中及柄端。又云：疏匕亦形如飯乘，以棘爲之，長二尺四寸，葉長八寸，博三寸，其柄葉通疏，皆丹漆之。桃匕，漆柄末及淺斗中，皆朱，柄葉長短廣狹與疏匕同。」案：禮凡扱醴扱羹並以柶，蓋與匕飯匕牲體之匕形略同而用異。據《士冠禮》，角柶有枋有葉，《舊禮圖》說匕亦同。《禮圖》之櫨，即《聘禮》之櫨。《士冠禮》之葉，鄭注云「葉，柶大

端」是也，云「以楔齒」者，即據《士喪禮》文。彼注云：「爲將含，恐其口閉急也。」《喪大記》疏云：「楔，柱也，以柶柱張尸齒令開也。」引《士喪禮》曰「楔齒用角柶」者，證角柶楔齒之事。《喪大記》云：「小臣楔齒用角柶，綴足用燕几，君大夫士一也。」則天子禮亦與士同，故鄭引士禮爲證也。楔齒必用角柶者，蓋以始死不能猝辦喪器，因以生時所用之角柶，斷去其櫨，而用其曲柄。故《喪大記》疏謂角柶長六寸，與《三禮舊圖》角柶曲柄之長正合。以其楔齒，即謂之楔。《既夕記》所云「楔貌如輶，上兩末」，蓋柶末斷時，上崙之柄有末，而下崙則爲櫨，上銳下圓，止有一末。至斷去其櫨，則曲柄乃有兩末，正與車輶相似。但車輶上附於衡，下掄牛領，兩末必下向；此楔齒則兩末上向爲異耳。至於角柶曲柄，乃其本制，非爲楔齒乃屈之也。賈疏乃謂如枇杷，拔屈中央楔齒，則似謂不去其櫨，而別屈其中央，《士喪禮》疏亦云「此角柶與扱醴角柶制別，故屈之如輶」。蓋謂遇喪時別制此楔齒之角柶，與生時所用形制不同，誤也。云「楔齒者，令可飯含」者，含，《釋文》作「唅」。案：唅即含之俗，詳《大宰》疏。謂始死時柱齒，令不閉，以待飯含也。云「玄謂復於四郊以綏」者，後鄭意復衣裳止用於廟寢也。賈疏云：「案《夏采》云：『以冕服復於大祖，以乘車建綏復

於四郊。」言此者，破先鄭於四郊亦以衣服。「掌王之燕衣服、衽、席、牀、第，凡褻器。」燕衣服者，巾絮寢衣袍褻之屬，皆良貨賄所成。第，簀也。鄭司農云：「衽席，單席也。褻器，清器，虎子之屬。」【疏】「掌王之燕衣服、衽、席、牀、第」者，賈疏云：「謂燕寢中所有衣服之屬。衽席者，亦燕寢中卧席。牀第者，謂燕寢中牀簀也。」

注云「燕衣服者，巾絮寢衣袍褻之屬」者，明非燕居上服玄端服也。賈疏云：「巾絮者，案《內則》『左佩紛帨』，紛帨即巾也。又婦事舅姑佩有線纁，此絮則纁也。寢衣者，《論語·鄉黨》云：『必有寢衣，長一身有半。』鄭注云『今小卧被』是也。袍褻者，案《毛詩》云，豈曰無衣，與子同袍，與子同褻是也。」王念孫云：「絮與帑通，帑亦巾也。《說文》：『帑，巾帑也。』巾帑即巾絮也。《方言》：『幪，巾也。大巾謂之帑，嵩嶽之南陳穎之間謂之帑。』郭璞音奴豬反。《漢書·周勃傳》『太后以冒絮提文帝』。應劭注曰：『陌額絮也。』晉灼曰：『《巴蜀異物志》謂頭上巾爲冒絮。』《說苑·正諫篇》『吳王蒙絮覆面而自刎』，謂以巾絮覆面也。亦通作挈，《風俗通義·怪神篇》『以挈巾結兩足幘冠之』是也。疏以絮爲纁，失之。《釋文》不爲絮字作音，蓋誤以爲絲絮

之絮矣。」案：王說是也。《說文·衣部》云：「被，寢衣袍，襦也。褻，綺也。」玉藻云：①「纁爲繭，緇爲袍，褻爲綱，帛爲褶。」《廣雅·釋器》云：「褻，袍，長襦也。」褻亦作澤。《釋名·釋衣服》云：「袍，丈夫著下至跗者也。袍，苞也，苞內衣也。汗衣，近身受汗垢之衣也。《詩》謂之澤，受汗澤也。」《秦風·無衣篇》「與子同澤」，箋云：「澤，褻衣，近汗垢。」案：澤，褻字通。《詩箋》、《禮記》注及《論語·鄉黨》皇疏引鄭注，並以袍澤爲褻衣。蓋凡著袍繡者，必內著褻，次著袍，次著中衣，次加禮服爲表。故賈《聘禮》疏云：「凡服四時不同，假令冬有裘，襯身褻衫，又有襦袴，襦袴之上有裘，裘上有楊衣，楊衣之上又有上服皮弁祭服之等。若夏則以絺綌，絺綌之上則有中衣，中衣之上復有上服。若春秋二時，則衣袷褶，袷褶之上加以中衣，中衣之上加以上服也。」案：賈說四時衣法甚覈。此注褻即襯身褻衫，袍即襦之長者。通言之亦得爲褻，故《廣雅》釋袍並訓長襦，而《說文》又訓褻爲綺也。凡中衣以內之衣，通爲褻衣。燕居容有不上上衣，或并不加楊衣、中衣，若《玉藻》所謂振絺綌表裘者，故亦通謂之燕衣服。自裘爲司裘所掌外，餘中

①「玉藻」，原訛「禮器」，據楚本改。

衣及絺綌褶袍繡等，此官盡共之矣。中衣、裼衣，互詳《司裘》疏。云「皆良貨賄所成」者，賈疏云：「見上文云「凡良貨賄之藏」，故知此良貨賄所成。」云「第，簀也」者，《說文·竹部》云：「第，牀簀也。簀，牀棧也。」《爾雅·釋器》云：「簀謂之第。」郭注云：「牀，版也。」《喪大記》注云：「禮第，袒簀也。」案：第爲牀上竹木之棧，亦通謂牀爲第。《方言》云：「牀，齊魯之間謂之簀，陳楚之間或謂之第。」與此經義小異。鄭司農云「衽席，單席也」者，賈疏云：「案《曲禮》云：「請衽何趾。」鄭注云：「衽，卧席。」又案：《斯干詩》云「下莞上簟」，《內則》云「斂枕篲、簟席、褥器而藏之」。司農云單席，則卧之簟席。」案：賈說是也。《曲禮》云：「請席何鄉，請衽何趾。」彼文以衽爲卧席，對席爲坐席言之。此經衽席與牀第並舉，則衽席並爲寢卧之席可知。《士昏禮》：「御衽于奧，媵衽良席在東，北止。」是卧席稱衽，亦稱席也。《既夕記》云：「設牀第當牖，衽下莞上簟。」此士禮遷尸之席，與生時卧席同。《禮器》孔疏引熊氏云：「天子卧席則亦下莞上簟，《詩·斯干》所云是也。」《詩·小雅》疏亦謂寢卧之席，自天子以下莞簟同。依熊、孔說，則此經衽席即下莞上簟之卧席也。先鄭云單席者，《禮器》云：「天子之席五重。」此卧席蓋下鋪莞席五重，而上加簟席不重，

不重即單席也。先鄭意，經衽爲親身之簟席，席則在下之莞席，衽席異物，猶《內則》簟席對文。鄭注亦云「簟，席之親身也」。若然，衽席單席乃專釋衽字，因文便，連言席，猶《酒正》注澄酒三酒，專釋酒字而連言澄也。凡《禮經》同席而彙設之謂之重，異席則謂之加。上席有再加，而皆止一席，故曰單，單者不重之謂，非無加之謂也。詳《司几筵》疏。云「褻器，清器，虎子之屬」者，《說文·衣部》云：「褻，私服。」引申之，凡私褻之用器，亦謂之褻器。丁晏云：「《史記·萬石君傳》：「石建取親中裙廁綌。」《集解》：「呂靜云：「械，箭，褻器也。音威豆。」賈逵解《周官》：「械，虎子也。箭，行清也。」孟康曰：「廁，行清。箭，行清中受糞函也。東南人謂鑿木空中如曹謂之箭。」鄭云清器，猶行清也，義本賈君。《說文》：「廁，清也。」《廣雅》：「圍，廁也。」清圍古今字。」案：丁說是也。賈景伯蓋以械箭詁此褻器，而申釋其義。《急就篇》云：「屏廁清溷糞土壤。」顏注云：「清言其處特異餘所，常當加潔清也。」《釋名·釋宮室》云：「廁或曰圍，言至穢之處，宜常脩治使潔清也。」蓋漢時名廁爲清，故謂受糞之器爲清器。清器即行清，謂以木爲函可移徙者，通謂之廁，與《宮人》之「區爲地廁別。虎子，盛溺器，亦漢時俗語。《後漢書·獻帝紀》李注引《漢官

儀云：「侍中分掌乘輿服物，下至褻器虎子之屬。」《西京雜記》云：「漢朝以玉爲虎子，以爲便器，使侍中執之行幸以從。」是也。《說文·木部》云：「械，械衛，褻器也。」與賈、鄭義同。賈疏云：「案《內豎》及葬，執褻器以從遣車。」彼褻器，振飾頽沐之器，與此注不同。彼從葬於死者，不用清器，故爲頽沐之器。」若合諸侯，則共珠槃、玉敦。敦，槃類，珠玉以爲飾。古者以槃盛血，以敦盛食。合諸侯者，必割牛耳，取其血，歃之以盟。珠槃以盛牛耳，尸盟者執之。故書珠爲夷。鄭司農云：「夷槃或爲珠槃。玉敦，歃血玉器。」【疏】「若合諸侯」者，謂時見曰會，殷見曰同。《司盟》云「凡邦國有疑會同，則掌其盟約之載及其禮儀」是也。其十二年巡守殷國，亦有盟法。《左》昭十三年傳：「晉叔向曰：明王之制，使諸侯歲聘以志業，間朝以講禮，再朝而會以示威，再會而盟以顯昭明。」杜注云：「十二年王巡守，盟于方嶽之下。」彼聘朝會年數雖不與此經同，而十二年巡守則一，足爲巡守有盟之證。四者之盟，《封人》所謂大盟也。云「則共珠槃、玉敦者，王大盟，此官共槃敦，以盛牛耳及血。其諸侯自相與盟，非玉府所共也。共之者，奉其器以授司盟及戎右，三官相與爲官

聯也。歃畢，則又受而藏之。

注云「敦，槃類」者，《廣

雅·釋器》云：「盤，孟也。」盤敦字同。《詩·衛風·氓》孔疏引孫炎《爾雅注》云：「敦器似孟。」《士喪禮》云：「黍稷用瓦敦，有蓋。」又「啓會面足」。注云：「敦有足，則敦之形如今酒敦。」《少牢饋食禮》云：「主婦自東房執一金敦黍，有蓋。」又云「敦皆南首」。注云：「敦有首者，尊者器飾也。飾蓋象龜形。」賈氏彼疏引《孝經鉤命決》云：「敦，規首，上下圓相連。」聶氏《三禮圖》引舊《圖》云：「敦受一斗二升，漆赤中，大夫飾口以白金。」案：《少牢》注謂敦「飾蓋象龜形」，蓋者疑辭。賈彼疏謂唯蓋象龜，聶圖從之，非鄭旨也。依鄭、孫諸說，則敦之形制，蓋與簋相近，亦有首、有蓋、有足。又有無足者，《士喪禮》謂之廢敦，注云「廢敦無足者」是也。此玉敦當有足，與金敦同。金鶚云：「《明堂位》，有虞氏之兩敦，周之八簋。是敦爲虞器，周用簋簋，亦兼用敦。然簋簋爲天子諸侯之器，而敦則大夫士用之。《內則》言父母之敦牟，非餽莫敢用，是大夫士常食用敦也。《士昏禮》「黍稷四敦，皆蓋」，是昏禮用敦也。《少牢饋食禮》「主婦執一金敦黍」，又云「上佐食取黍稷于四敦」，是祭祀用敦也。《士喪禮》「朔月奠，有黍稷，用瓦敦」，《士虞禮》「贊設二敦于俎南」，是喪禮用敦也。經典並無天子用敦之文。

玉府玉敦，會盟所用器，非祭器也。《九嬪》「凡祭祀贊玉盥」，玉盥者，玉簠簋也。鄭注「玉盥，玉敦」。誤。「云「珠玉以爲飾」者，賈疏云：「此槃敦應以木爲之，將珠玉爲飾耳。」案：賈說是也。禮器之敦皆木器，而飾口以金，瓦敦則無飾。此玉敦蓋亦以木爲之，而飾口以玉。珠槃亦以琢玉小珠爲槃口之飾。云「古者以槃盛血，以敦盛食」者，《牛人》：「祭祀共牛牲并共盆簋。」先鄭注云：「盆所以盛血。」是祭祀盛血用瓦盆。此槃則以木爲之，形制蓋與盆相近。敦盛食者，《內則》注云：「敦牟，黍稷器也。」《九嬪》「玉盥」注亦以爲玉敦，與此器同而用異。賈疏云：「案《特牲》、《少牢》，皆敦盛黍稷。以槃盛血雖無文，郊血及血以告殺，當以槃盛血也。」案：賈說與《牛人》不合，恐非是。鄭意恒制槃盛血，敦盛食；盟則以槃承耳，敦盛血，不與常同也。《左傳》僖二十三年，曹僖負羈饋晉公子盤飧，則槃亦可以盛食，不定以盛血矣。云「合諸侯者必割牛耳，取其血，歃之以盟，珠槃以盛牛耳」者，《說文·欠部》云：「歃，歃也。」《國語·晉語》韋注云：「歃，飲血也。」此據《戎右》「玉敦辟盟」，與贊牛耳爲二事，明珠槃盛耳不盛血也。《曲禮》孔疏云：「盟者，殺牲歃血誓于神也。盟法：先鑿地爲方坎，殺牲于坎上，割牲左耳盛以珠盤，又取血盛以玉敦。用血爲

盟書，成乃歃血而讀書。」云「尸盟者執之」者，明大會同，王尸盟，卽王自執牛耳也。賈疏云：「尸猶主也。小國主盟，故使執牛耳也。知此珠槃玉敦爲盟而設者，案《戎右》云：「盟則以玉敦辟盟，遂役之，贊牛耳、桃茢。」彼注云：「役之者，傳敦血授當歃者。割牛耳取血，助爲之。及血在敦中，以桃茢拂之。」是以知珠槃玉敦爲盟而設。若然，執牛耳是小國尸盟者也。若以歃血，則大國在先，故哀公十七年，吳晉爭先。《國語》曰：「吳公先歃，晉亞之。」既言爭先，是以知大國當在先。若諸侯相與盟，則大國戎右執牛耳也。」案：賈說非也。《左》定八年傳：「晉師將盟衛侯于鄆澤，衛人請執牛耳。」杜注云：「盟禮，尊者涖牛耳，主次盟者。衛侯與晉大夫盟，自以當涖牛耳，故請之。」又哀十七年傳：「公會齊侯盟于蒙。孟武伯問於高柴曰：「諸侯盟，誰執牛耳？」季羔曰：「鄆衍之役，吳公子姑曹；發陽之役，衛石魋。」武伯曰：「然則魋也。」杜注云：「執牛耳尸盟者，鄆衍則大國執，發陽則小國執。據時執者無常，故武伯自以爲可執。」孔疏云：「劉炫以爲小國恒執牛耳，何得云執者無常。」黃以周云：「依禮，諸侯相與盟，大國執。發陽之役，吳不盟，宋皇瑗又臣，魯衛無大小，故石魋執。杜、劉說胥失之。」論讓案：以《左傳》諸文覈之，則執牛耳者必尸

盟，尸盟者必大國，其常法也。亦有時以小國尸盟，則即以小國執牛耳，其變禮也。故襄二十七年《左傳》，宋之盟，晉楚爭先，叔向謂趙孟曰：「諸侯歸晉之德只，非歸其尸盟也。且諸侯盟，小國固必有尸盟者。」是小國亦有尸盟之證。然則執牛耳必尸盟，不分大國小國。賈及劉氏《規杜》並謂執牛耳必小國。杜預《春秋釋例》云：「盟者殺牲載書，大國制其言，小國尸其事。」此卽劉、賈諸說所本，然與哀十七年傳注不合。今攷鄫衍吳盟，則公子姑曹執；發陽吳不盟，則衛石魋執；似當以大國執爲正。但蒙之盟，魯與齊盟，齊大於魯，何以孟武伯自謂當執牛耳？則杜謂執者無常，說自可通。賈又謂敵血必大國在先，尸盟則小國不知先敵卽是尸盟，故宋之盟，晉楚爭先，叔向以非歸其尸盟爲說。又戎右贊牛耳，亦非卽執牛耳，賈乃云「若諸侯相與盟，則大國戎右執牛耳」，此與《戎右職》不合，又與小國尸盟執牛耳之說，自相違伐，並非也。《左傳》定八年孔疏又云：「盟用牛耳，卑者執之，尊者涖之。衛人請執牛耳，請使晉大夫執牛耳。鄫衍吳爲盟主，不知盟禮當令小國執牛耳，而自使其臣執之。」是分執牛耳、涖牛耳爲二，尤誤。云「故書珠爲夷，鄭司農云，夷槃或爲珠槃」者，段玉裁云：「司農從或本作珠，鄭君從之也。」徐養原云：「珠夷形聲不

同，各爲一字。凌人共夷槃冰，依尸而爲言者也。此不應與之同名，故不從故書。」詒讓案：徐鍇本《說文·冏部》說盟禮作朱盤玉敦，疑故書或本有作朱者。朱與夷形近，與珠聲同，故傳寫互異與？云「玉敦，敵血玉器」者，玉敦所以承血而傳敵之也。《春秋釋例》云：「盟者，珠槃玉敦以承流血而同敵。」又《史記·平原君傳》，平原君適楚，毛遂謂楚王之左右曰：「取雞狗馬之血來！」毛遂奉銅盤而跪進之楚王，當敵血而定從於殿上。據彼二文，則槃亦以敵血，或通言不別也。凡王之獻金玉、兵器、文織、良貨賄之物，受而藏之。謂百工爲王所作，可以獻遺諸侯。古者致物於人，尊之則曰獻，通行曰饋。《春秋》曰「齊侯來獻戎捷」，尊魯也。文織，畫及繡錦。【疏】「凡王之獻金玉、兵器、文織、良貨賄之物，受而藏之」者，並謂臣民獻之於王者，玉府則受而藏之，以備共御也。注云「謂百工爲王所作，可以獻遺諸侯」者，鄭以此經云「王之獻」與《內府》「四方之幣獻」，文例相似。彼幣獻爲四方所進獻，則此王獻亦據王所獻遺言之，故謂此經金玉兵器等，皆是百工爲王作，藏之玉府，以備獻遺諸侯者。百工，則《考工記》攻金、刮摩、設色諸工是也。云「古者致物於人，

尊之則曰獻」者，鄭又釋天子遣諸侯物稱獻之義。《檀弓》云：「仕而未有祿者，君有饋焉曰獻。」鄭彼注云：「君有饋，有饋於君。」與此注「尊之曰獻」義同。賈疏云：「若正法，上於下曰賜，下於上曰獻。若尊敬前人，雖上於下亦曰獻，是以天子於諸侯云獻。」案《月令》「后妃獻繭」，鄭注謂獻於后妃，知此「王之獻金玉」非是獻金玉於王者，案下《內府職》「凡四方之幣獻之金玉」，彼是諸侯獻王，入內府藏之，不得在此，故知金玉是獻遺諸侯者也。況諸侯中兼有二王之後，二王之後，王所尊敬，自然稱獻也。若王肅之義，取《家語》曰：「吾聞之，君取於臣曰取，與於臣曰賜；臣取於君曰假，與於君謂之獻。」以此難鄭君。鄭君弟子馬昭之等難王肅：「《禮記》曰「尸飲五，君洗玉爵獻卿」。況諸侯之中，有二王之後，何得不云獻也？」案：依王肅說，則此經云獻，亦為下獻於王，劉敞、易拔、黃度、林之奇、王與之、方苞、林喬蔭、黃以周說並同。江永云：「注謂王用以獻遺諸侯，恐不然。此謂臣下有獻於王，如《曲禮》所謂「大夫私行，反必有獻」，《少儀》所謂「君將適他，臣如致金玉貨貝于君」是也。四方之幣獻，則入之內府。」王引之云：「獻者，獻於王也。諸侯獻金玉、兵器、文織、良貨賄之物於王，則玉府為王受而藏之，若魯僖公納玉於王十穀之

類是也。若謂王獻諸侯之物則受而藏之者，當在諸侯，不得在玉府矣。且何以別於下文凡王之好賜乎？《內府》：「凡適四方使者，共其所受之物而奉之。」鄭彼注曰：「王所以遣諸侯者。」彼為王遣諸侯之物，故曰共曰奉，此為諸侯獻王之物，故曰受曰藏，不可比而同之也。至《內府》「凡四方之幣獻之金玉、齒革、兵器，凡良貨賄入焉」，與此相同，所謂官聯也。若謂內府所掌，玉府不應與之同，則內府掌共王及冢宰之賜予，玉府何以亦共王之好賜乎？殆失之矣。」案：江、王申王肅說，並通。《少儀》：「臣致禴於君，則曰致廢衣於賈人。」彼注引此經為釋，似亦以獻屬臣獻君言之，足正此注之誤。云「通行曰饋」者，《說文·食部》云：「饋，餉也。」《廣雅·釋詁》云：「饋，遺也。」饋遺並通行之辭。賈疏云：「言通行者，上於下，下於上及平敵相於皆可云饋。康子饋藥，陽貨饋孔子豚，皆是上於下曰饋。《膳夫職》云「王饋用六穀」及《少牢》、《特牲》稱饋食之禮，並是於尊者曰饋。朋友之饋，雖車馬不拜，是平敵相饋。故鄭云通行曰饋。」引《春秋》曰齊侯來獻戎捷，尊魯也者，莊三十一年經：「六月，齊侯來獻戎捷。」《左傳》云：「非禮也。凡諸侯有四夷之功，則獻于王，王以警于夷。中國則否，諸侯不相遺俘。」杜注云：「捷，獲也。獻，奉上之

辭。」又《釋例》云：「獻者自下奉上之稱，遺者敵體相與之辭。傳曰『諸侯不相遺俘』。齊侯失辭稱獻，失禮遺俘。故因其來辭，見自卑也。以其大卑，故書以示過。」杜例與鄭此注義同。賈疏云：「然《三傳》皆不解獻義，今鄭引者，以齊大於魯，言來獻，明尊之則曰獻，未必要卑者於尊乃得言獻。」云「文織畫及繡錦」者，《月令》「文繡有恒」，注云：「文謂畫也。」《說文·糸部》云：「織，作布帛之總名也。」又《帛部》云：「錦，襄邑織文也。」《書·禹貢》「兗州厥篚織文」，偽孔傳云：「織文，錦綺之屬。」《荀子·禮論篇》楊注云：「文織，染絲織為文章也。」任大椿云：「鄭破文為畫，織為錦繡，其實錦織而繡刺，鄭蓋以大通言之也。」詒讓案：《月令》注云：「祭服之制，畫衣而繡裳。」又《玉藻》「士不衣織」，注云：「織，染絲織之。」蓋大夫以上服，皆染絲織之。織成文則為錦，織成縵繒而畫之則為文，刺之則為繡。畫兼布帛言之，雖屬文亦得為織。繡錦皆帛之有文采者，雖屬織亦得為文，故鄭兼釋之。凡王之好賜，共其貨賄。【疏】「凡王之好賜」者，《內饗》注云：「好賜，王所善而賜也。」案：好賜與《大宰》「好用」、《內府》「好賜予」義同。賈疏謂王於羣臣有恩好，因燕飲而賜之貨賄，未析。詳《大宰》、《內饗》疏。好用殿九式之末，其事較輕，而此及

內府、外府、職歲、職幣五官通掌之者，此及內府共其貨賄，外府、職歲、職幣則共其財用，貨賄財用，分儲諸官府，或此有彼無，不能一律，故必衆官通共乃能具給也。

內府掌受九貢九賦九功之貨賄、良兵、良器，以待邦之大用。大用，朝覲之班賜。【疏】

「掌受九貢九賦九功之貨賄、良兵、良器」者，賈疏云：「此九貢以下而言受，即是《大府》所云『九貢已下頒之於受藏之府』是也。案彼注云『受藏之府若內府也』，則此九貢等由大府而來，內府皆受藏之也。良兵良器，此是冬官百工所作，亦由大府而來。良兵，謂弓矢殳矛戈戟五兵之良者；良器，謂車乘及禮樂器之善者。」詒讓案：九功即九職，貨賄即九職商賈之貢，良兵良器即九職百工之貢也。其九貢、九賦亦有之。九貢、九賦、九功，並詳《大宰》、《大府》疏。注云「大用，朝覲之班賜」者，鄭意此大用對《職幣》詔上之小用賜予，故亦以班賜為釋，謂若《覲禮》賜侯氏車服，又云「重賜無數」，注云：「重猶善也。所加賜善物，多少由恩也。」此貨賄良兵良器之等，亦所以共重賜也。賈疏云：「掌給九式及弔用，是大府所給也。好賜之用，玉

府所給也。此又言以待邦之大用，是朝覲頒賜可知。」黃以周云：「《內府》之大用，謂祭祀、賓客、喪紀、會同、軍旅之大財用也。注專以朝覲之頒賜言，似偏。」案：黃說是也。此大用與《外府》《職幣》小用相對爲文，當通包九式之法用，與大府長屬同共，不得強爲區別。鄭、賈說並未昧。凡四方之幣獻之金玉、齒革、兵器，凡良貨賄入焉。諸侯朝聘所獻國珍。【疏】「凡四方之幣獻之

金玉、齒革、兵器」者，《大宰》大朝覲會同，有玉幣玉獻之等，是朝會之幣獻也。《聘禮》云：「賓之幣唯馬出，其餘皆東。」注云：「馬出，當從廐也。餘物皆東，藏之內府。」是聘之幣獻也。一者蓋皆藏於內府。《職方氏》注云：「齒，象齒也。革，犀兕革也。」詳彼疏。云「凡良貨賄入焉」者，賈疏云：「其不良者入於職內，給國之用。此良者入內府，以給王之用。」注云「諸侯朝聘所獻國珍」者，國珍謂侯國所出之珍物。《大戴禮記·朝事篇》云：「奉國地所出重物而獻之，明臣職也。」是也。賈疏云：「《覲禮》所云「匹馬卓上，九馬隨之」，龜金竹箭分爲三享是也。諸侯遣臣聘所獻國珍者，謂若《聘禮》束帛加璧，庭實乘皮之等是也。此因朝聘而貢，先入於掌貨賄，入其要於大府，乃始通之於內府也。」案：賈謂朝覲庭實有龜金竹箭，本鄭《覲禮》注，說似

未瑯，詳《大行人》疏。凡適四方使者，共其所受之物而奉之。王所以遺諸侯者。【疏】「凡適四方使

者」者，猶《小行人》云「使適四方」，彼注云：「適，之也。」賈疏云：「謂使公卿以下聘問諸侯，若《大行人》所云問閭省親之等。」云「共其所受之物而奉之」者，此物亦據貨賄及良兵、良器等而言，凡使者所當受之物，內府則依法式共而奉與之。注云「王所以遺諸侯者」者，謂享幣之外，別有賜遺者也。賈疏謂即上王之獻金玉兵器等，亦襲《玉府》注之誤。凡王及冢宰之好賜予，則共之。冢宰待

四方賓客之小治，或有所善，亦賜予之。【疏】注云「冢宰待四方賓客之小治」者，據《大宰》文。此即《敍官》注云「百官摠焉則謂之冢」是也。云「或有所善亦賜予之」者，《說文·予部》云：「予，推予也。」好賜予即《內饗》、《玉府》之好賜也。注訓好爲善，與《內饗》注義同。

外府掌邦布之入出，以共百物，而待邦之用，凡有灋者。布，泉也。布讀爲宣布之布，其藏

曰泉，其行曰布，取名於水泉，其流行無不徧。入出，謂受

之復出之。共百物者，^①或作之，或買之。待猶給也。有法，百官之公用也。泉始蓋一品，周景王鑄大泉而有一品。後數變易，不復識本制。至漢唯有五銖久行。王莽改貨而異作，泉布多至十品，今存於民間多者，有貨布、大泉、貨泉。貨布長二寸五分，廣寸，首長八分有奇，廣八分；其圓好徑二分半，足枝長八分，其右文曰貨，左文曰布，重二十五銖，直貨泉二十五。大泉徑一寸二分，重十二銖，文曰大泉，直十五貨泉。貨泉徑一寸，重五銖，右文曰貨，左曰泉，直一也。【疏】「掌邦布之人出」者，此官爲九府之一，凡圜法鑄造及賦人之泉布，此官總掌其入出之事，與泉府爲官聯也。惠士奇謂此邦布，即《閭師》之夫布，亦即《荀子·富國篇》所謂刀布之斂，又《管子·輕重甲篇》云「屋粟邦布」。今案：《管子》之邦布，即《載師》之里布，亦泉人之一端也，詳《載師》疏。注云「布，泉也」者，《載師》、《司市》、《塵人》、《羊人》、《巫馬》注並同。《檀弓》注云：「古者謂錢爲泉布，所以通布貨財。」《國語·周語》韋注云：「泉者，金幣之名，古曰泉，後轉曰錢。」云「布讀爲宣布之布」者，段玉裁云：「凡言『讀爲』者，必易其字。此未易其字而曰讀爲，何也？雖未易其形而易其義也。布字泉織爲本義，宣布爲引伸之義，以布可舒卷而引伸之也。鄭恐人疑經謂布匹，

故舉引伸之義以易本義。」云「其藏曰泉，其行曰布」者，明泉布異名同物，以行之曰布，故取宣布之義。《漢書·食貨志》顏注云：「布亦錢耳。謂之布者，言其分布流行也。」云「取名於水泉其流行無不徧」者，《漢書·食貨志》云：「貨實於金，利於刀，流於泉，布於布，束於帛。」注引如淳云：「流行如泉也。」《史記·貨殖傳》：「計然曰：財幣欲其行如流水。」云「入出謂受之復出之」者，謂凡納邦布者，皆入於外府；其須用者，則外府復出之也。云「共百物者，或作之，或買之」者，作之謂出泉市材，使官工營作之。買之謂直出泉市已成物，不須作者，及動植諸物皆是也。云「待猶給也」者，《大府》注同。云「有法，百官之公用也」者，此亦注用今字也。謂官府之公用，著於《大宰》九式之法者。鄭意經云「待邦之用凡有灋者」，與《倉人》灋用義正同。賈疏以待邦之用，謂國家非常所用；凡有灋者，謂在朝官府依常法用之。強爲分別，非鄭悞也。云「泉始蓋一品，周景王鑄大泉而有一品」者，《漢書·食貨志》云：「太公爲周立九府圜法：錢圜函方，輕重以銖。周景王時患錢輕，將更鑄大錢，單穆公曰：『不可。古者天降災戾，於是乎量資幣，

①「百」，原訛「不」，據楚本改。

權輕重，以救民。民患輕，則爲之作重幣以行之，於是有母權子而行，民皆得焉。若不堪重，則多作輕而行之，亦不廢重，於是乎有子權母而行，小大利之。今王廢輕而作重，民失其資，能無匱乎？」王弗聽，卒鑄大錢，文曰「寶貨」。案：《國語·周語》亦載此事，在景王二十一年。韋注云：「單穆公曰『古者有母平子，子權母而行』，則二品之來，自古而然矣。鄭君云『錢始一品，至景王而有二品』，省之不熟也。」案：韋說是也。云「後數變易，不復識本制」者，謂秦及漢初，泉法數變易，不復識古圜法之本制也。云「至漢唯有五銖久行」者，《漢·食貨志》云：「漢興，以爲秦錢重，難用，更令民鑄英錢。孝文五年，乃更鑄四銖錢，其文爲『半兩』。武帝更造錢幣，令縣官銷半兩錢，更鑄三銖錢，重如其文。明年，有司更請郡國鑄五銖錢。」案：漢初英錢四銖三銖之屬，皆不久即罷，惟五銖終漢世行之，故云唯五銖久行。云「王莽改貨而異作，泉布多至十品」者，《漢·食貨志》云：「王莽居攝，變漢制，以周錢有子母相權，於是更造大錢，徑寸二分，重十二銖，文曰『大錢五十』。又造契刀、錯刀。契刀，其環如大錢，身形如刀，長二寸，文曰『契刀五百』。錯刀，以黃金錯其文，曰『一刀直五千』。與五銖錢凡四品，並行。莽即真，以爲書『劉』字有金刀，迺罷錯刀、契

刀及五銖錢，而更作金、銀、龜、貝、錢、布之品，名曰『寶貨』。小錢徑六分，重一銖，文曰『小錢直一』。次七分，三銖，曰『幺錢一十』。次八分，五銖，曰『幼錢二十』。次九分，七銖，曰『中錢三十』。次一寸，九銖，曰『壯錢四十』。因前『大錢五十』，是爲錢貨六品，直各如其文。大布、次布、弟布、壯布、中布、差布、厚布、幼布、幺布、小布。小布長寸五分，重十五銖，文曰『小布一百』。自小布以上，各相長一分，相重一銖，文各爲其布名，直各加一百。上至大布，長二寸四分，重一兩，而直千錢矣。是爲布貨十品。」是王莽異作泉布多品之事也。云「今存於民間多者，有貨布、大泉、貨泉」者，言莽亡後，所作泉布並廢，至鄭君時民間所存者，惟此三品爲多也。云「貨布長二寸五分，廣寸，首長八分有奇，廣八分，其圜好徑二分半，足枝長八分，其右文曰貨，左文曰布，重二十五銖，直貨泉二十五」者，《漢·食貨志》云：「天鳳元年，罷大小錢，改作貨布，長二寸五分，廣一寸，首長八分有奇，廣八分，其圜好徑二分半，足枝長八分，間廣二分，其文右曰貨，左曰布，重二十五銖，直貨泉二十五。」即鄭所據也。云「大泉徑一寸二分，重十二銖，文曰大泉，直十五貨泉」者，亦據《漢志》文，已詳前。宋建陽本無「貨泉」二字，亦通。賈疏云：「案彼大泉直五十，不云

五十言十五者，亦誤，當從五十爲正也。」詒讓案：《周語》注引此注作「文曰大泉五十」，與《漢志》同，疑今本脫誤。彼注又引唐固說，以大泉爲周景王所鑄，亦誤。云「貨泉徑一寸，重五銖，右文曰貨，左曰泉，直一也」者，亦天鳳元年所作。《漢志》云「貨泉徑一寸，重五銖，文右曰貨，左曰泉，枚直一」是也。共王及后、世子之衣服之用。凡祭祀、賓客、喪紀、會同、軍旅，共其財用之幣齋，賜予之財用。齋，行道之財用也。《聘禮》曰：「問幾月之齋。」鄭司農云：「齋或爲資，今禮家定齋作資。」玄謂齋資同耳。其字以齊次爲聲，從貝變易，古字亦多或。【疏】「共王及后、世子之衣服之用」者，謂共泉與司服、內司服、追師、弁師、屨人、玉府諸官用之也。云「凡祭祀、賓客、喪紀、會同、軍旅，共其財用之幣齋」者，以下並專屬王之用，不關后、世子也，亦並共泉與之。賈疏云：「幣齋之財用，謂王使公卿已下聘問諸侯之行道所用，則曰幣齋。」案：經云「財用之幣齋」，與下「賜予之財用」互文。疏以文例整齊之，則云「幣齋之財用」，凡疏述經注，不必盡依元文也。此幣卽《小行人》六幣之等，與職幣義異。祭祀以下五者所用幣齋，蓋謂共王及諸臣行道之用，及問勞大小

賓客，若祭祀有助祭，喪紀有弔送，會同、軍旅則或來會，或徵告，皆有財幣。賈專據聘問言，則與經總承上五事者不相應矣。云「賜予之財用」者，卽《內饗》「好賜」，亦卽《大宰》之「好用」，詳《大府》疏。易祓云：「此卽上文所謂待邦之用凡有法者也。法，九式是也。共王及后、世子衣服之用，則《大宰》羞服之式；祭祀、賓客、喪紀、會同、軍旅之幣齋，賜予之財用，則又《大宰》祭祀、賓客、喪荒、芻秣、匪頒、好用之式。」注云「齋，行道之財用也」者，《漢書·食貨志》云：「行者齋，居者送。」顏注云：「齋謂將衣食之具以自隨也。」《廣雅·釋言》云：「齋，裝也。」《漢書·霍去病傳》「約輕齋」，顏注云：「齋字與資同，謂資裝也。」案：依鄭《巾車》注，則齋本訓財，而此特云行道之財用者，以經幣齋與財用連文，不當總訓爲財，故以行道別之。然則此齋猶言持也，謂行道所持之財用。《小宗伯》云：「大賓客，受其將幣之齋。」注云：「謂所齋來貢獻之財物。」此幣齋義當與彼同。彼爲齋來之物，此爲齋去之物。凡禮幣及行道辨裝，通爲幣齋，皆外府所共也。通言之，齋卽爲財用。《少儀》云：「君將適他，臣如致金玉貨貝於君，則曰致馬資於有司。」彼馬資與此幣齋義亦略同。引《聘禮》曰「問幾月之齋」者，《聘禮記》記聘使將行之禮云：「既受行出，遂見宰，

問幾月之資。」鄭彼注云：「資，行用也。古者君臣謀密草創，未知所之遠近，問行用當知多少而已。古文資作齋。」案：彼依今文作資，此經字與古文同，故鄭即從古文作齋引之也。鄭司農云「齋或爲資」者，謂故書或本也。不云故書者，文略。丁晏云：「《掌皮》先鄭注「齋或爲資」；《典婦功》注「故書齋爲資，杜子春讀爲資」；《典臬》注「故書齋作資」；《攷工記》注「故書資作齊，杜子春云齊當爲資」；古齋齊資並通用。」云「今禮家定齋作資」者，先鄭據《聘禮記》今文作資，與古文異。今禮家即謂禮今文家也。云「玄謂齋資同耳，其字以齊次爲聲，從貝變易，古字亦多或」者，段玉裁云：「此司農說禮家定齋當作資，而鄭君非之，謂二字皆可用。齋，從貝齊聲，資從貝次聲，實一字也。古字亦多或者，謂古字多或體。如《說文》多云某或某字者是也。《說文·貝部》：「資，貨也。齋，持遺也。」不云是一字，似較鄭君爲長。」詒讓案：齋資兩文，杜、許並分爲二；先鄭則兩列其字，不敢決定；後鄭則徑合之，故全經字並從齋，而訓解則兼取許書二義。如《巾車》「毀折入齋於職幣」，鄭不從杜讀爲資，而從其資財之訓，此與許書資字說解同者也。此職幣齋，注謂行道之財用；《小宗伯》「將幣之齋」，注謂齋來之財物；《掌皮》「歲終則會其財齋」，注云「所給

予人以物曰齋」；《臬人》「掌受財于職金，以齋其工」，注云「給市財用之直」；《典婦功》「以授嬪婦及內人女功之事齋」，注云「謂以女功之事來取絲臬」。曰行道，曰齋來，曰給予，曰來取，此並與許書齋字說解持遺之義略同；而曰財用，曰財物，曰絲臬，則又兼取資財之義。然則後鄭雖合二字爲一，不及許之分析；而隨文作訓，義則二者兼備，未嘗偏持一說矣。至《考工記·總敘》「或通四方之珍異以資之」，注云：「資，取也，操也。」此亦與持遺義同。依許書正當作齋，而鄭顧從資者，以彼記故書作齊，爲齋之同聲假借字，義更不及資之明切，故不得不從今書耳。凡邦之小用，皆受焉。皆來受。【疏】「凡邦之小用皆受焉」者，

小用，蓋共三夫人與諸王子以下之衣服及《大宰》九式之小者，若《小司馬》云「小祭祀、會同、饗食、師田、喪紀」等諸事之用。又《大府》有王玩好之用，皆是對上文共王、后、世子衣服及祭祀、賓客、喪紀、會同、軍旅等財用，爲邦之大用也。凡大用小用皆爲法用，則皆此官共其泉布。賈疏謂「外府所納泉布，所積既少，有小用則給之，若大用則取餘府」失之。注云「皆來受」者，謂主用者來取，外府給

之，彼則受也。經文云皆受，嫌此官受彼，故特釋之。歲

終，則會，唯王及后之服不會。【疏】「歲終則會」者，此正邦布之歲會，外府之官成也。云「唯王及后之服不會」者，《膳夫》注云「不會計多少，優尊者」是也。賈疏云：「言王及后不會，以衣服異於膳羞與所加禽獸，故通世子可以會之也。」

司會掌邦之六典、八灋、八則之貳，以逆邦國都鄙官府之治。逆，受而鉤考之。【疏】「掌

邦之六典、八灋、八則之貳」者，此執國典之副，與小宰、大史、內史爲官聯也。司會總天下會計之成，爵尊任重。凡治官官法之大者，並大宰掌其正本，此官掌其副貳，其職蓋亞於六卿。故《大戴禮記·盛德篇》云：「六官以爲轡，司會、均人以爲軛。」又《大司寇》邦大盟約之盟書，司會皆受其貳而藏之，則約劑之屬亦其所掌，不徒典法則矣。互詳《大宰》、《小宰》疏。

注云：「逆，迎受之。」又《鄉師》注云：「逆猶鉤考也。」《鬼谷子·權篇》陶弘景注云：「求其深微曰鉤。」《國語·晉語》韋注云：「考，校也。」鉤考亦謂鉤求考校之，察其是非也。以九貢之灋致邦國之財用，以九賦之灋

令田野之財用，以九功之灋令民職之財用，以九式之灋均節邦之財用。掌國之官府、郊野、縣都之百物財用凡在書契版圖者之貳，以逆羣吏之治，而聽其會計。郊，四郊，去國

百里。野，甸稍也。甸去國二百里，稍三百里，縣四百里，都五百里。書謂簿書。契，其最凡也。版，戶籍也。圖，土地形象，田地廣狹。【疏】「以九貢之灋致邦國之財用」者，以下總掌財用之法，與小宰、大府爲官聯也。賈疏云：「九貢即是大宰九貢。其所貢之物，出於諸侯邦國。言『之財用』，謂諸侯於其民什一取之，既取得民物，大國貢半，次國三之一，小國四之一。所貢之物，皆市取土毛，貢於天子，則《禹貢》所云厥篚厥貢是也。故云致邦國之財用。此即《小行人》云『春令人貢』，是謂歲之常貢。《大行人》因朝而貢者，所貢無常，不應使司會致之。」案：賈說邦國之貢，據《大司徒》後鄭注說，謂次國貢三之一，小國貢四之一。義與彼經不合，詳彼疏。云「以九賦之灋令田野之財用」者，明九賦爲地稅之正法也。上九貢出於畿外邦國，以其自遠而至，故曰致。此及下九功並出於畿內，以其斂之於近，故曰令，謂以其書，令凡稅斂之吏，依法征之也。賈疏云：

「此九賦，卽《大宰》所云「九賦斂財賄」是也。言法者，謂口率出錢多少，有其定法。九賦之內，惟有關市幣餘，國中非田野，自外四郊、邦甸、家稍、邦縣、邦都、山澤，盡是田野，據多言之，故曰令田野之財用。」案：九賦卽畿內之地稅，故經云「令田野之財用」。若如鄭、賈說，以爲口賦，則與經義不相應矣。九賦關市幣餘之賦，卽出於官府，賈後疏謂官府不出賦，亦誤。並詳《大宰》疏。云「以九功之灋令民職之財用」者，九功與《大府》、《內府》義同。大宰以九職任民而貢其功，猶後世之口賦、鄭、賈謂卽什一之地稅，非也。詳《大宰》、《內府》疏。云「以九式之灋均節邦之財用」者，與《大宰》同。上三者爲斂入之法，此爲頒出之法，故云均節。詳《大宰》疏。云「掌國之官府郊野縣都之百物財用凡在書契版圖者之貳」者，此與宰夫、司士、職方氏、司民爲官聯也。賈疏云：「案《大宰》九賦，一曰邦中，二曰四郊。此不言邦中而言官府者，以官府在邦中，故舉官府以表邦中，其實官府不出賦也。百物財用者，以其民之出賦，不必皆使出泉，以百物當之亦得，故《大宰》云「九賦斂財賄」，則此百物財用一也。但九式用九賦，大宰均節而用之，此司會主鉤考，故亦言之矣。此書契版圖，下文司書掌其正，此司會主鉤考，故掌其副貳。」曾釗云：「此經不掌賦，蓋謂掌官

府郊野縣都之百物財用之在書契版圖者之貳，逆羣吏之治而聽其會計耳，不必謂舉官府以表邦中也。當以「掌國之官府郊野縣都之百物財用凡在書契版圖者之貳」絕句。其言書契，謂官府之書契，版圖謂郊野縣都之版圖。百物財用，謂官府郊野縣都之出入。賈疏讀「財用」絕句，誤矣。」案：曾說是也。黃以周說同。此經官府，蓋通六官所屬百官府言之。郊野縣都，則自國城外極於五百里置。此官總攷其會計，職掌蓋通於畿內。不及國中者，言郊以包國中，文不具也。百物財用者，《宰夫》注云：「財，泉穀也。用，貨賄也。物，畜禽也。」案：百物者，《小宰》六職云：「政職以聚百物，事職以生百物。」又見《外府》、《司書》。綜校諸文，則百物當通該《大司徒》五地動物植物及《閭師》百工所貢器物之等言之。《宰夫》注義，殊未該也。百官府及郊野縣都，皆有府藏委積廩牧，則各有財物存儲及出入，故《職內》有官府都鄙財入之數，《職歲》有官府都鄙財出賜之數。凡此財用出入之數，則在書契；官祿民賦之數，則在版；田野地產之數，則在圖。經云在者，明官府郊野縣都百物財用之總要，咸具於此。官府之長，郊野縣都之吏，各分執其正本，此官則通執其副貳，以待會計也。賈疏乃以此爲專據九賦言之，遂謂官府爲邦中之賦，百物爲出物以當泉

賦，其誤甚矣。又司書即司會之屬官，所掌版圖亦即副貳，賈謂彼掌其正，亦誤。云「以逆羣吏之治，而聽其會計」者，謂據書契版圖等，以考吏治之舉廢。羣吏，與《大宰》、《小宰》義同，亦通內外百官府言之，詳《大宰》疏。賈疏云：「羣吏謂朝廷官府下及羣都縣鄙羣臣之治，皆逆而鉤考之。羣吏以會計文書送於司會者，司會皆聽斷之。」注云「郊，四郊，去國百里」者，《大宰》注義同。此四郊兼六鄉，當通王城以外至百里界言之。賈謂據遠郊言，誤。云「野，甸稍也」者，《質人》注同。《甸師》注云「郊外曰野」，《縣士》注云「距王城二百里以外至三百里曰野」，是也。蓋甸稍在鄉郊之外，縣都之內，此及《遺人》、《質人》諸職通謂之野。《縣師》、《遂人》、《縣士》經注並以野爲甸稍縣都之通名。此文郊野之外，別出縣都，故知野不兼縣都也。此野當兼六遂公邑家邑言之。云「甸去國二百里，稍三百里，縣四百里，都五百里」者，《大宰》注義並同。此縣都當通公邑大小都言之。云「書謂簿書」者，謂會計之書著於簿籍者。《釋名·釋書契》云：「笏或曰簿，可以簿疏物也。」案：《孟子·萬章篇》云：「孔子先簿正祭器。」趙注亦以簿爲簿書，則周時已有簿書之名。賈疏謂舉漢法而言，非也。互詳《敘官》及《小宰》疏。云「契，其最凡也」者，《小宰》注云「凡

簿書之最目，獄訟之要辭，皆曰契」是也。最凡與最目義同。賈疏云：「此之書契，即《小宰》八成取予以書契之類。最凡，謂計要之多少以爲契要。」案：亦詳《小宰》疏。云「版，戶籍也」者，《小宰》先鄭注同。小司寇司民之民數，凡登於天府者，司會皆受其貳，即所謂版也。云「圖，土地形象，田地廣狹」者，據《司書》、《大司徒》，並云土地之圖。形象謂方圓邪正之形，田地廣狹謂廣輪步畝之數，並載於圖也。以參互攷日成，以月要攷月成，以歲會攷歲成，參互謂司書之要貳，與職內之人，職歲之出。故書互爲巨。杜子春讀爲參互。【疏】「以參互攷日成」者，此官贊冢宰總掌六官會計之事，與小宰爲官聯，亦所謂官成也。賈疏云：「司會鉤考之官，以司書之等，相參交互考一日之中計算文書也。」黃以周云：「日謂十日。日成謂旬日之成，猶決句謂之決日也。《宰夫職》云：「歲終令正歲會，月終令正月要，旬終令正日成。」文義與此相同，則日成爲十日之成可知也。」云「以月要攷月成，以歲會攷歲成」者，月要歲會即《小宰》八成所謂「聽出入以要會」也。賈疏云：「月計曰要，亦與諸職參互考一月成事文書也。歲計曰會，以一歲之會計，考當歲成事文書。」注云「參互謂司書之要貳，與職內之人，職歲之出」者，賈疏云：「案：

《司書職》云：「凡稅斂，掌事者受法焉。及事成，則入要貳焉。」又案《職內》云：「掌邦之賦入。」又案《職歲》云：「掌邦之賦出。」云參互鉤考，明知有此三官，出內事共鉤考之。「云」故書互爲巨，杜子春讀爲參互者，《脩閭氏》云：「掌比國中宿互櫜者。」注云：「故書互爲巨。鄭司農云，巨當爲互。」與此義同。互巨形聲並相近，故傳寫易譌。《掌舍》「櫜」，故書櫜爲柜，杜讀柜爲柜，亦其比例。以周知四國之治，以詔王及冢宰廢置。周猶偏也。

言四國者，本逆邦國之治，亦鉤考以告。【疏】「以周知四

國之治」者，以歲成贊冢宰大計，攷天下吏治之舉廢，亦所謂官計也。云四國者，舉外以包內。此官總掌邦計，凡邦國、官府、都鄙、鄉遂、公邑之治，皆其所通掌也。云「以詔王及冢宰廢置」者，《大宰》云：「歲終則令百官府各正其治，受其會，聽其致事，而詔王廢置。」又八則治都鄙，三曰廢置以馭其吏，是大宰本以廢置詔王。司會既受諸會計官之歲計而聽之，又人之冢宰，而以吏事之得失詔王及冢宰，以六官之官計，爲其所專司也。廢置亦通內外官吏及官長等，凡治脩舉者則進置之，怠弛者則黜廢之。《王制》云：「天子齊戒受諫，司會以歲之成，質於天子。冢宰齊戒受質，大樂

正、大司寇、市三官以其成從質於天子。」鄭彼注云：「歲終羣臣奏歲事。市，司市也。從，從於司會也。」此即攷歲成詔王及冢宰廢置之事。

注云「周猶偏也」者，《大司徒》、《小司徒》、《司稼》、《大祝》、《司險》注並同。《說文·口部》云：「周，密也。」又《勺部》云：「匊，市偏也。」凡經典訓周偏者，皆匊之借字。《廣雅·釋詁》云：「周，偏也。」云「言四國者，本逆邦國之治，亦鉤考以告」者，賈疏云：「案上云「掌邦之六典，以逆邦國之治」，逆即鉤考也。」方苞云：「《月令》，每歲季秋，制諸侯來歲所賦於民輕重之法，貢職之數。則古者邦國之要會，皆達於天子矣。」

司書掌邦之六典、八灋、八則、九職、九正、九事邦中之版、土地之圖，以周知入出百物，以敘其財，受其幣，使人于職幣。九正謂九賦九貢。正，稅也。九事謂九式，變言之者，重其職。明本而掌之，非徒相副貳也。敘猶比次也，謂鉤考其財幣所給，及其餘見，爲之簿書。故書受爲授。鄭司農云：「授當爲受，謂受財幣之簿書也。」玄謂亦受錄其餘幣，而爲之簿書，使之人於職幣。幣物當以時用之，久藏將朽蠹。

【疏】「掌邦之六典、八灋、八則、九職、九正、九事邦中之版，土地之圖，以周知人出百物，以敘其財」者，此通掌治官、官法、官成、官計之書及王畿版圖之法，以攷會計，與小宰、大府、大司徒、大史、內史、職方氏、司民爲官聯也。邦中之版者，《大宰》注云：「邦中，在城郭者。」此官職事通於畿甸，則不當止掌王城內民數之版。蓋以王城爲官府人民所萃，故舉以核百縣，文不具也。土地之圖者，即《職方氏》「天下之圖」，此則據畿內言之。賈疏云：「言掌邦之六典已下，至周知人出百物已上，所掌與司會同者，以其司會主鉤考，司書掌書記之，司書所記，司會鉤考之，故二官所掌，其事通焉。九職即司會九功也，九正即司會九賦、九貢也，九事即司會九式也。邦中之版，土地之圖，即司會版圖也。周知人出百物者，即司會百物財用，一也。敘謂比次其財，知用多少。」云「受其幣，使人于職幣」者，賈疏云：「百官所用餘財，送來與司書，司書受其幣，使人於職幣之官，不入本府。」案：受其幣，幣與《大宰》、《大府》「幣餘之賦」義同。幣當讀爲敝，敝即官府所用之餘也。鄭、賈並如字釋之，非經義，詳《大宰》疏。注云「九正謂九賦、九貢」者，賈疏云：「案上《司會》有九賦九貢，此《司書》則有九正無九賦九貢，故知九正則是九賦九貢也。」云「正，稅也」者，讀正爲

征也。《釋文》云：「九正音征。注同。」案：陸音是也。《司勳》先鄭注云：「正謂稅也。」《司門》注云：「正讀爲征。征，稅也。」此不著其讀者，文略，與《司勳》注例同。九賦爲地稅，故《掌交》謂之九稅，征稅義同。九貢雖出於邦國，亦征於民而共其物，故亦通謂之正。正征字通，詳《小宰》疏。賈讀正如字，以謂「九賦九貢正稅也」爲句，謂此二者之財，皆出於正稅。依其說，則正爲正共之義，非鄭指也。云「九事謂九式」者，賈疏云：「九式據用財言之，九事據用財所爲之事，其理一也。」云「變言之者，重其職，明本而掌之，非徒相副貳也」者，賈疏云：「謂變九賦九貢言九正，變九式言九事也。重以其職，明本而掌之，非徒相副貳也。其相副貳者，謂司會六典、八法、八則之貳是也。」案：鄭賈意，蓋謂司書自掌九正九事之正本，不徒如小宰、大府、職內、職歲掌其副貳，故變文以見義也。云「敘猶比次也」者，敘，注例當作「序」，詳《小宰》疏。《說文·支部》云：「敘，次第也。」敘本爲事有次第之義，引申之，凡比例次第亦謂之敘，故云猶比次也。云「謂鉤考其財幣所給及其餘見，爲之簿書」者，《漢書·王莽傳》顏注云：「見，現在也。」「餘見」，亦見《申屠嘉傳》，蓋漢時常語。謂百官府所藏財幣，除已給用外，餘留見在者。經云敘其財，注兼言幣者，鄭以受幣爲

幣帛也。賈疏云：「司書『周知入出百物以敘其財』，明知敘其財者，所給諸官，餘不盡者，即以餘見爲之簿書，擬與司會鉤考之。」云「故書受爲授，鄭司農云，授當爲受」者，授從受得聲，故傳寫易誤。段玉裁云：「此從司農以爲聲之誤而改之也。」丁晏云：「《典婦功》注：『授當爲受，聲之誤也。』《掌葛》注：『故書受或爲授，杜子春云，當爲受。』」云「謂受財幣之簿書也」者，先鄭不知幣當讀爲敝，而以爲幣帛，故云「財幣之簿書」，其說非也。云「玄謂亦受錄其餘幣，而爲之簿書，使之人於職幣」者，此從先鄭以授爲受，而以幣爲餘幣，義長於先鄭。云「幣物當以時用之，久藏將朽蠹」者，賈疏云：「釋經百官餘幣不入於本府，而入於職幣之意。若入本府，即是久藏，將恐朽爛蠹敗，故人職幣，使人占賣之，本在生利也。」詒讓案：後鄭雖以幣爲餘幣，而兼以幣物爲說，義仍未悛。凡上之用財用，必攷于司會。上謂王與冢宰。王雖不會，亦當知多少而闕之。司會以九式均節邦之財用。【疏】「凡上之用財用，必攷于司會」者，王引之云：「經兩用字複出，文不成義，下用字蓋因注而衍。賈疏云『此經上之用財必考於司會者』，又云『司會以九式均節邦之財用者』，據此則注文作『財用』，經

文則作『用財』，不得云『用財用』也。唐石經始誤衍。」案：王說是也。此用字，疑卽下經民之財用之稅文，誤移著此者。司書爲司會之屬，故凡財用之出，必就司會攷而書之，以備要貳也。

注云「上謂王與冢宰」者，以冢宰爲天官之正，司書卽冢宰之屬，故亦謂之上也。賈疏云：「案《內府職》云『凡王及冢宰賜與則共之』，明此上中有冢宰可知。」云「王雖不會，亦當知多少而闕之者，明王之用財，亦在司書、司會所攷之列。但爲簿書時闕其數，示不爲限制耳。賈疏云：『案上《膳夫》、《庖人》及《外府》等，皆言王及后不會。此經上之用財必考於司會者，此之所考，但知多少而闕之，非是會計與王爲限。』」云「司會以九式均節邦之財用」者，據《司會》文。以司會爲計官之長，司書乃其屬，故必考於彼也。三歲，則大計羣吏之治，以知民之財器械之數，以知田野夫家六畜之數，以知山林川澤之數，以逆羣吏之徵令。械猶兵也。逆，受而鉤考之。山林川澤童牯則不稅。【疏】「三歲則大計羣吏之治」者，亦贊大宰治官計也。大計者，通計畿內百官府之吏，察其政治得失。羣吏，與《大宰》、《小宰》、《司會》義同，詳《大宰》疏。云「以知民之財器械之數，以知

田野夫家六畜之數」者，王引之云：「賈疏釋經曰：『以知民之財用器械之數者，民之財用謂幣帛多少。』則所據經文，「財」下有「用」字。財用、器械，相對爲文，與田野、夫家、六畜、山林、川澤文義亦相稱也。」^①唐石經始脫用字。」案：王說是也。民之財用，謂家有恒產，稽其貧富。器若《鄉師》「輦輦鄉器」，《遂大夫》「稼器」。械謂兵甲旗物。田野可食之土，夫家可任之民，六畜則馬牛之等，凡案比所及者，皆總攷其數也。此案比任土任民財用百物之數，即《小司徒》之比法。三年大比，與大計事相因也。《州長》云：「三年大比，則大攷州里，以贊鄉大夫廢興。」《縣師》云：「三年大比，則以攷羣吏，而以詔廢置。」彼因大比而察吏，與此因大計而知任土任民之數，事同。蓋田野之蕪闢，戶口之息耗，咸與吏治之舉廢相通，故大計與大比皆三年一舉，而其條法簿要，互相出入，亦與小司徒、鄉大夫、縣師爲官聯也。云「以知山林川澤之數」者，此虞衡所掌，任土任民之餘，亦比法之所及也。賈疏云：「案：《大司徒》地有十等，不言丘陵墳衍原隰者，略言之也。」云「以逆羣吏之徵令」者，徵令謂宣布法令，通該徵役、徵賦二義，詳《宰夫》疏。賈疏云：「逆謂鉤考也。此司書知民之財器已下，川澤已上，恐其羣吏濫徵斂萬民，故知此本數，乃鉤考其徵令

也。」注云「械猶兵也」者，明經言器械，猶《玉府》、《內

府》云兵器也。《說文·攴部》云：「兵，械也。」《木部》云：

「械，一曰器之總名也。」《少儀》「不度民械」，注云：「械，兵器也。」《公羊》莊三十二年傳「俄而牙殺械成」，何注云：

「有攻守之器曰械。」是械器義同。析言之，則凡師田攻守

甲兵之屬，通名爲械也。云「逆受而鉤考之」者，《司會》注

同。云「山林川澤童枯則不稅」者，《釋名·釋長幼》云：

「山無草木曰童。」賈疏云：「山林不茂爲童，川澤無水爲

枯。所稅者，稅其有；今山林不茂則無材木，川澤無水則

無魚鼈、蒲葦，故不稅之。」凡稅斂，掌事者受灋焉。

及事成，則入要貳焉。法猶數也，應當稅者之數。

成猶畢也。【疏】「凡稅斂，掌事者受灋焉」者，稅斂通任

地、任民之征賦言之。法即前九職、九正之法。掌斂事之

官並於此官受法數，依而斂之也。掌事，謂地治之吏及執

事，凡專司徵斂者皆是。賈疏謂若地官閭師、旅師諸徵斂

之官。今攷凡征賦，國中、四郊，閭師斂之；鄉遂、鄉師、遂

師與閭師同斂之；公邑，縣師斂之。旅師唯斂三粟，則非

師與閭師同斂之；公邑，縣師斂之。旅師唯斂三粟，則非

師與閭師同斂之；公邑，縣師斂之。旅師唯斂三粟，則非

師與閭師同斂之；公邑，縣師斂之。旅師唯斂三粟，則非

師與閭師同斂之；公邑，縣師斂之。旅師唯斂三粟，則非

①「亦」，原訛「不」，據《經義述聞》卷八改。楚本肥改作「乃」，非。

稅斂之正也。賈說未核。云「及事成則入要貳焉」者，此稅斂之官成也。事畢則有成，即《司會》所謂日成、月成、歲成。各官皆爲要會，其正本入大宰，副本則入司書也。賈疏云：「及事成收斂畢人要，謂寫一通副貳文書，名爲要，入司書。必來受法又入要貳者，以司書知財器已下之數，擬後鉤考之也。」

注云「法猶數也」者，此亦注用今字也。法訓數者，引申之義。《管子·七法篇》云：「尺寸也，繩墨也，規矩也，衡石也，斗斛也，角量也，謂之法。」是凡會計等數，並謂之法也。云「應當稅者之數」者，賈疏云：「即上田野夫家之等，是其本出稅者之數也。」云「成猶畢也」者，《說文·戊部》云：「成，就也。」引申爲凡事終畢之稱。《士喪禮》「獻素獻成」，注云「飾治畢爲成」，亦其義也。凡邦治，攷焉。考其法於司書。【疏】「凡邦治攷焉」者，謂政治有疑互辨訟不決者，皆就此官攷之。賈疏謂吏治之善惡，非也。注云「考其法於司書」者，經作「攷」，注作「考」，亦經用古字、注用今字也。邦治有成法，皆藏於司書，故還就考之也。

職內掌邦之賦入，辨其財用之物而執

其總，以貳官府都鄙之財入之數，以逆邦國之賦用。辨財用之物，處之，使種類相從。總謂簿書之

種別與大凡。官府之有財入，若關市之屬。【疏】「掌邦之

賦入」者，此計官財入之官成也。賈疏云：「謂九職、九貢、

九賦之稅入，皆掌之。獨云賦入者，賦是摠名，下言賦者，

皆此類也。」云「辨其財用之物而執其總」者，此官唯主百官

府財入之凡總，其受藏則各自有職之者，但辨使各從其類

耳，不必皆入於職內之府也。云「以貳官府都鄙之財入之

數，以逆邦國之賦用」者，此及職歲、職幣三職並云官府都

鄙之財，即《司會》所云「掌國之官府郊野縣都之百物財用」

也。舉官府都鄙，以通包郊野縣等，明其無不掌也。賈疏

云：「都鄙謂三等采地，采地之稅四之一。言貳者，謂職內

受取一通副貳文書，擬鉤考。以逆邦之賦用者，職內既知

財入之數，鉤考用賦多少，知其得失。」案：賈謂采地之稅

四之一入王者，據《小司徒》注義，其說未塙，詳《小司徒》

疏。注云「辨財用之物，處之，使種類相從」者，《敘官》

注云：「辨，別也。」謂分別其賦入之財物，自以種類相從而

藏之。賈疏云：「但賦之所入，先由職內，始至大府，大府

分致於衆府，以是分別使衆類相從。」案：賈說非也。此官

雖自有府藏，然唯掌會計，不掌徵斂，故總辦百官府之財用，亦仍就各職當官之府，分別存儲。蓋職內、職歲通掌財

之出入，亦止執其凡總，財入不必皆由職內受入大府，財出亦不必皆由職歲受大府而出之。故經於《職幣》，有斂幣振財之文，而此及《職歲》兩職則無之，足以明之矣。云「總謂簿書之種別與大凡」者，種別謂名物之細目，大凡謂多少之都數也。凡衆物出入細目，則以種類分別書之，又辜較其都數，二者並總爲簿書。《說文·糸部》云：「總，聚束也。」

《淮南子·本經訓》高注云：「總，凡也。」云「官府之有財人，若關市之屬」者，賈疏云：「司關、司市皆屬地官，關市皆有出稅，故知官府之有財人若關市也。言之屬者，兼有城十二門亦有稅入。」案：百官府又有幣餘之人，賈說未咳。凡受財者，受其貳令而書之。受財，受於職

內以給公用者。貳令者，謂若今御史所寫下本奏，王所可者。書之，若言某月某日某甲，詔書出某物若干，給某官某事。【疏】「凡受財者，受其貳令而書之」者，賈疏云：其

「有官府合用官物而受財者，並副寫一通勅令文書與職內，然後職內依數付之。」又云：「若然，職內主人，職歲主出。職內分置於衆府，所以得有物出與人者，職內雖分置衆府，職內亦有府，貨賄留之者，故得出給。故《大府職》云『頒其

賄於受用之府」，鄭注云「受用之府若職內」是也。」案：賈說非也。此官唯掌書貳令，不必自出給財物，詳後。

注云「受財受於職內以給公用者」者，鄭意職內掌財用之物，凡受財者。即向職內受之。知給公用者，別於賜予爲私用，非職內所給。然諦審經義，實不如鄭說。蓋此受財者，即謂以上令受財於百官府，如受泉者，即自向外府、泉府取之。但以令送致此官，書其副貳，以備鉤考，非必皆此官取百官府之財以授之也。云「貳令者，謂若今御史所寫下本奏王所可者」者，鄭舉漢制爲況也。《續漢書·百官志》云：「侍御史十五人，六百石，掌察舉非法，受公卿羣吏奏事，有違失，舉劾之。」是漢時御史掌受章奏。凡臣下上書，上可其請，御史蓋寫其本爲副貳，與此職書貳令事相類。鄭云若今御史，明此御史自是漢官，而云王所可者，順文便也。賈疏不察，乃據《春官·御史職》云「掌贊書」，是其用官財者，先奏白王，王許可，則御史贊王爲辭，下職內，職內則書之爲本案，然後給物與之。依其說，則鄭不當言今，失之遠矣。又案：依鄭義推之，則此貳令，當爲王及冢宰所下之令，其正令下所出財用之府，而別以貳令下職內，使書之。此並據國之大用及非常之頒賜言之，若尋常小用，自有式法，不必有專令也。云「書之，若言某月某日某

甲，詔書出某物若干，給某官某事」者，丁晏云：「《獨斷》云：詔書，羣臣有所奏請，尚書令奏之，下有制，天子荅之曰可。若下某官云云，亦曰詔書。又奏左下方附曰某官臣某甲上。駁議，曰某官某甲議。其合於上意者，又報曰某官某甲議，可。」詒讓案：此亦約漢制爲說。某甲謂日辰，與《獨斷》某甲謂人姓名異，詳《馮相氏》疏。某事，謂因某事而給財。《說文》後云：「十月十九日，中黃門饒喜，以詔書賜召陵公乘許冲布四十匹，即日受詔朱雀掖門，敕勿謝。」此漢時書臣下受賜物之例。職內書公用，蓋亦類此。及會，以逆職歲與官府財用之出，亦參互鉤考之。【疏】「及會，以逆職歲，與官府財用之出」者，即以所執財用之總，與所書之貳令，以攷歲會，贊司會而與職歲，職幣共校計之也。賈疏云：「言會者，謂至歲終會計。以逆職歲者，逆謂鉤考也。職歲主出，職內主人，以己之入財之數，鉤考職歲出財之數。又云與官府財用之出者，謂職歲出財，與官府所用之數，並鉤考之。」注云「亦參互鉤考之」者，亦訓逆爲鉤考，與《司會》、《司書》注義同。賈疏云：「按《司會》『以參互考之』，鄭彼注云『參互謂司書之要貳，職內之人，職歲之出』，以三官相鉤考。此職內逆職歲，明兼有司書之要貳，故言參互。言亦者，亦如《大府》也。」

而敘其財以待邦之移用。亦鉤考今藏中餘見，爲之簿。移用謂轉運給他。【疏】「而敘其財以待邦之移用」者，此鉤考幣餘之財，與職幣爲官聯也。注云「亦鉤考

今藏中餘見，爲之簿」者，亦蒙上《司書》云「以敘其財」，明其文義同也。但此承上官府財用爲文，則職內雖是有府藏，而其所比次鉤考爲之簿者，則廣賅衆有府藏官而言。賈疏謂「此敘財，亦謂比次職內藏中餘見，爲簿書，以待邦之移用。若然，職內既非常府，其所藏者，唯當歲所用，故用不盡者移用之」。非經注義也。云「移用謂轉運給他」者，《說文·辵部》云：「逡，遷徙也。」移即逡之段字。《廣雅·釋詁》云：「移，轉也。」謂當官有餘財，更轉運給他官之用。《遣人》「掌邦之委積，以待施惠」。注云：「委積者，廩人、倉人計九穀之數，足國用，以其餘共之，所謂餘法用也。職內邦之移用，亦如此也。」彼遣人之委積，亦儲餘財移給他用，足以相況也。

職歲掌邦之賦出，以貳官府都鄙之財出賜之數，以待會計而攷之。以貳者，亦如職內書其貳令而編存之。【疏】「掌邦之賦出」者，此計官財出

之官成也。此官亦唯主百官府財出之凡總，其出給各自有職之者，不必職歲自取給之也。賈疏云：「職內主人，職歲主出，職內所入於衆府所用之多少，皆主之，故云掌邦之賦出。但九貢九賦九功之用皆主之，特言賦者，亦如《職內》云賦，賦是總稱也。」云「以貳官府都鄙之財出賜之數」者，賜卽下云「凡上之賜予」是也。賈疏云：「《職內》云：『以貳官府都鄙之財入之數。』此職歲亦貳官府都鄙之財，出賜之數，二官一人一出，皆書其貳，共相鉤考，故《職內》云『以逆邦國之賦用』，此《職歲》云『以待會計而考之』，其事通也。」注云「以貳者，亦如職內書其貳令而編存之」者，《說文·糸部》云：「編，次簡也。」賈疏云：「《職內》云：『凡受財者，受其貳令而書之。』此官主出，所出亦皆由上令，所出前後不同，亦皆書其貳令，編存爲案，以待會計而考之也。」凡官府都鄙羣吏之出財用，受式灋于職歲。百官之公用式法多少，職歲掌出之舊用事存焉。

【疏】注云「百官之公用式法多少，職歲掌出之舊用事存焉」者，此亦注用今字作「法」也。百官公用，卽《外府》邦用有法者。式法卽《大宰》九式之法，與大宰頒財式法同。凡百官府及都鄙羣吏出財用，皆須依放九式之法，爲多少之

節度。以其爲職歲常所乘以用事，故卽就之受出財舊法式，以頒授之也。凡上之賜予，以敘與職幣授之。敘，受賜者之尊卑。【疏】「凡上之賜予，以敘與職幣授之」者，此與職幣爲官聯也。王及冢宰凡賜予之用，當以幣餘之財給之，則是出於職幣之府；以此官掌財出之數，故兼敘其事，二官同授之，且攷其會計也。賜予謂好賜，亦卽《大宰》九式好用之式也。《晏子春秋·諫上篇》云：「景公燕，賞於國內，萬鍾者三，千鍾者五，令三出而職計莫之從。」職計蓋卽此職歲、職幣之屬。注云「敘受賜者之尊卑」者，敘，注例當作「序」，此與《小宰》六敘義同。謂若數人同受賜，則各依其秩次，尊者先授，卑者後授，職歲與職幣同敘之也。及會，以式灋贊逆會。助司會鉤考羣吏之計。【疏】注云「助司會鉤考羣吏之計」者，此贊司會而與職內、職幣共攷會計之書也。《州長》注云：「贊，助也。」《司會》注云：「逆，受而鉤考之。」賈疏云：「案：司會以逆羣吏之治，而聽其會計，此官主式灋出財用，至歲終會計之時，則以式法贊助司會鉤考會計之事。」

職幣掌式灋以敘官府都鄙與凡用邦財

者之幣，幣謂給公用之餘。凡用邦財者，謂軍旅。【疏】

「掌式灋以斂官府都鄙與凡用邦財者之幣」者，此官掌《大宰》九職幣餘之賦，亦依式灋，校計其財用有贏餘者而斂之。

注云「幣謂給公用之餘」者，幣讀爲敝，敝，餘也。詳《大宰》疏。給公用之餘，謂九式所用之餘也，故還以式法斂之。云「凡用邦財者謂軍旅」者，以其在官府都鄙之外也。惠士奇謂邦財者，《外府》「凡祭祀、賓客、喪紀、會同、軍旅、財用之幣齋」，皆是也。案：惠說近是。凡者，辜較之辭，蓋通關諸法用而言。鄭謂專指軍旅，似未咳。振

掌事者之餘財，振猶拊也，檢也。掌事謂以王命有所作爲。先言斂幣後言振財，互之。【疏】注云「振猶拊也，

檢也」者，檢，舊本作「撿」。今據宋建陽本、注疏本正。《說文·手部》云：「撿，拱也。」非此義。王念孫云：「經言斂言振，注言拊言檢，皆謂收取之也。《中庸》「振河海而不泄」，鄭注曰：「振猶收也。」張揖注《上林賦》同。《孟子·萬章篇》曰：「金聲而玉振之也。」《廣雅》曰：「收、斂、拊，取也。」又「拊，收也」。《孟子·梁惠王篇》：「狗彘食人食而不知檢。」趙岐注曰：「檢，斂也。」《漢書·食貨志》引《孟子》作「不知斂」，斂亦收也。振、拊、檢、斂四字同義，故

曰振猶拊也，檢也。賈不曉振字之義，又不曉拊字、檢字之義，乃云「以財與之謂之拊」，此誤以拊爲拊濟之拊；「知其足剩謂之檢」，此誤以檢爲檢察之檢。」案：王說是也。云「掌事，謂以王命有所作爲」者，賈疏云：「以其上經官府已下，是其國家常事。此別言掌事，是王命有所作爲。」論讓案：《大府》云「凡官府都鄙之吏及執事者，受財用焉」，此掌事餘財，即吏及執事者所受財用之餘也。惠士奇云：「巾車之毀折入其齋，泉府之賒貸納其餘，是爲掌事者之餘財。」案：惠說亦注義所咳。云「先言斂幣，後言振財，互之」者，互之猶《庭氏》注云「互言之」。王念孫云：「上言斂幣而不言振財，下言振財而不言斂幣者，言幣則兼財，言財則兼幣，互文耳，故云「先言斂幣後言振財互之」。賈誤以振爲振濟之振。又云「今於上文直言斂不言振，亦振之，下言振財有餘，亦斂之可知，故言互之也」。此不得其解，而強爲之辭。」案：王說亦是也。皆辨其物而奠其錄，以書楬之，以詔上之小用賜予。奠，定也。故書錄爲錄。杜子春云：「祿當爲錄，定其錄籍。」鄭司農云：「楬之，若今時爲書以著其幣。」【疏】「皆辨其物而奠其錄」者，此計官餘財之官成也。賈疏云：「上經既斂得幣，皆當

辨其物，知其色類及善惡。而莫其錄者，謂定其所錄簿書色別，各入一府。」云「以書楬之」者，賈疏云：「謂府別各爲一牌，書知善惡價數多少，謂之楬。」云「以詔上之小用賜予」者，《內府》云「以待邦之大用」，注云：「大用，朝覲之班賜。」彼注以頒賜釋大用，疑鄭意此賜予亦即小用矣。今攷《外府》云「共賜予之財用」，又云「凡邦之小用皆受焉」，是賜予與小用自是二事。小用，法用之小者，猶《倉人》云「餘法用」。蓋大用小用皆不出《大宰》九式之外，但以事分大小，遂有差別耳。幣餘爲羨餘之財，故以共小用。又《大府》云「幣餘之賦以待賜予」，故此亦以詔賜予也。賈疏云：「詔猶告也。職幣既知府內，則告上之王與冢宰小用賜予之事，此謂常賜予。《玉府》所云「凡王之好賜共其貨賄」，及《內府》云「凡王冢宰之好賜」，此二者非常賜予。外府及典絲枲三官言賜予者，與此職幣同，亦是國家常賜予。」案：賈說非也。此賜予亦謂好賜，與常賜予異。又案《大府》云：「凡式貢之餘財，以共玩好之用。」彼亦據幣餘之財而言，則此小用內當亦兼有玩好之用矣。並詳《大宰》及《大府》疏。

注云「莫，定也」者，《司市》、《小史》、《弓人》注並云「莫讀爲定」，是莫定聲近，義亦通也。云「故書錄爲祿，杜子春云，祿當爲錄」者，祿錄聲類同，亦通作某。

《周書·王會篇》云：「堂下之東面，郭叔掌爲天子某幣焉。」孔注云：「某，錄諸侯之幣也。」彼幣爲幣帛，與此異，而錄義與此同。云「定其錄籍」者，杜亦訓莫爲定也。《廣雅·釋詁》云：「錄，具也。」《說文·竹部》云：「籍，簿也。」凡財物之名數，具於簿籍，故通謂之錄。莫其錄，謂次第財幣名物，善惡多少，記錄定著於簿籍也。鄭司農云「楬之，若今時爲書以著其幣」者，《職金》云：「辨其物之嫩惡與其數量，楬而璽之。」先鄭注云：「楬，書其數量以著其物也。」《國語·晉語》韋注云：「著，附也。」案：楬者，概杙也。此云以書楬之，猶《典婦功》云「物書而楬之」，《泉府》云「物楬而書之」，並謂書其名數於杙，以爲表識，而附著之其物之側也。楬，詳《泉府》、《職金》疏。歲終，則會其出。【疏】「歲終則會其出」者，此正幣餘之歲會，職幣之官成也。賈疏云：「以其職幣主出，故歲終與司會會之。下贊之，亦謂贊司會會之事也。」凡邦之會事，以式灋贊之。

周禮正義卷十三

司裘掌爲大裘，以共王祀天之服。鄭司

農云：「大裘，黑羔裘，服以祀天，示質。」【疏】「掌爲大裘」者，與司服爲官聯也。云「以共王祀天之服」者，祀天，據冬至圜丘祀昊天天神之最尊者言之。夏正南郊，祀受命帝，及春祭蒼帝，冬祭黑帝，亦服大裘，故《司服》云「祀昊天上帝，則服大裘而冕，祀五帝亦如之」。此經言祀天，以咳五帝，互文以見義也。其夏祭赤帝，季夏祭黃帝，秋祭白帝，揆之時月，皆不得服裘。賈謂通四時祭天皆共之，不限六天之大小，非也。又祭地之服，經注並無文。賈疏云：「案《孝經緯鉤命決》云：『祭地之禮與天同。』」性玉皆不同，言同者，唯據衣服，則知崑崙神州亦用大裘可知。」案：《郊特牲》孔疏引王肅《聖證論》說，謂祭天地皆大裘；又崔靈恩說，謂崑崙神州亦用大裘。此並賈氏所本。《王制》疏亦云：「按《詩·昊天有成命》，郊祀天地也。天地相對，則祭地亦用大裘，故《孝經援神契》云『祭地之禮與祭天同』，亦

據衣服同也。」案：孔亦從王、崔說。《通典·吉禮》說同。

陸佃云：「大裘，冬裘也，冬日至然後服以祀天。若夏祀天，則惟衮而已。其祭地蓋亦如之，故曰『凡四時之祭祀，以宜服之』。先儒謂崑崙神州亦服大裘。按《司裘》曰『掌爲大裘以共王祀天之服』，則祀地不服大裘，以夏日至不可服裘故也。」案：陸說是也。方丘祭大地，在夏至北郊，依賈《典瑞》疏說在七月，皆不得服裘。《孝經緯》雖說祭天地同禮，然無祭地服大裘明文，鄭亦無是義，王、崔、賈、孔並馮臆推測，不足據也。注鄭司農云「大裘，黑羔裘」者，

《司服》先鄭注及《玉藻》後鄭注義並同。《唐郊祀錄》引《三禮義宗》云：「祭天所以用大裘者，則黑羔裘也。黑者象天色之玄，大者擬覆燾垂蓋。」《隋書·禮儀志》引《禮圖》云：「大裘之服，羔正黑者爲之。」並本二鄭義。賈疏云：「裘言大者，以其祭天地之服，故以大言之，非謂裘體侈大，則義同於大射也。祭服皆玄上纁下，明此裘亦羔裘之黑者，故知大裘黑羔裘。」詒讓案：大裘用黑者，取其與冕服玄衣相稱，用羔者，取其質也。凡冕服、弁服、冠服並有裘，經唯云掌爲大裘而不及衮冕以下之裘者，《玉藻》「狐青裘」注以爲玄衣之裘，孔疏引熊氏云，謂六冕及爵弁也。案：熊以彼注通咳六冕，則是謂大裘亦爲狐青裘，與鄭義顯違。孔

氏墨守注義，不宜從而糾，揆之義疏恒例，皆不可通。竊疑熊說「六冕」，當作「五冕」。蓋推鄭意，王六冕，自大裘外，餘五冕服皆不服羔裘。此乃申《玉藻》注義，其與此注義，仍不相核也。《詩·召南·羔羊》孔疏引劉焯、劉炫則云：「《司服職》云「王祀昊天上帝則服大裘而冕」，以下冕不復云裘；《司裘職》云「掌爲大裘以共王祀天之服」，亦不別言衮冕以下之裘；明六冕與爵弁同用大裘之羔裘矣。」案：二劉謂六冕同羔裘，與《玉藻》注不合，《玉藻》疏亦申熊難劉，而《羔羊》疏轉從劉說，自相違伐，亦孔氏之疏也。賈後疏以《玉藻》注玄衣，爲指玄端服，則賈意亦與劉同。金榜云：「大裘以共王祀天之服。《節服氏》「掌祭祀，衮冕六人，維王之大常。郊祀，裘冕二人執戈，送逆尸，從車」。自衮冕九章以下，不得服大裘可知也。」案：金說是也。據先鄭後注，以示質爲釋，是專屬祀天而言。若它祭祀，當備文采，以明差次，無爲皆取示質之義，何必與祀天同用黑羔裘乎？互詳《司服》及後疏。又案：《玉藻》疏引皇氏云：「凡云冕及爵弁，無裘。」孔疑其文無所出。今攷六冕內明有大裘，而云無裘，皇侃必不至蒙固如是。竊疑皇說「無裘」，當作「羔裘」，蓋即二劉說所本。《玉藻》注「狐青玄衣」，皇亦謂玄端，與劉說同，即其塙證也。孔氏所見皇義，

字已譌互，故不可通耳。云「服以祀天示質」者，謂羔色純黑，不及狐裘之華縟也。賈疏云：「以其衮已下皆有采章，惟此大裘更無采章，故云質。」案《鄭志》，大裘之上又有玄衣，與裘同色，亦是無文采。《玉海·車服》引《三禮義宗》云：「大裘其服無章，其冕無旒，天道至尊，難可比擬，舍去雕飾，服以其質。」金榜云：「玄衣更有上衣。《玉藻》「大裘不裼」，言不得免上衣見裼衣也。大裘上衣十二章。」案：金說是也。《左傳》哀十年孔疏云：「裘上裼衣，裼衣之上乃有朝祭正服，裘上有兩衣也。」依孔說，是凡裘上有裼衣，裼衣之上有上衣，亦謂之襲衣。《鄭志》謂大裘上有玄衣者，《玉藻》注云「凡裼衣象裘色」是也。但審後鄭意，蓋謂裼衣及上衣，並純玄無文，先鄭示質之義，或亦如此。今攷大裘固裼玄衣，而上衣則當以衮龍十二章爲襲，冕則十二旒，不得如鄭、崔、賈說也。詳《司服》、《弁師》疏。中

秋，獻良裘，王乃行羽物。良，善也。中秋鳥獸雉毼，因其良時而用之。鄭司農云：「良裘，王所服也。行羽物，以羽物飛鳥賜羣吏。」玄謂良裘，《玉藻》所謂黼裘與？此羽物，小鳥鶉雀之屬，鷹所擊者。中秋鳩化爲鷹，中春鷹化爲鳩，順其始殺，與其將止，而大班羽物。【疏】「中秋獻

良裘」者，唐石經誤作「仲秋」，今從宋本正。凡經四「仲」字並作「中」，《釋文》亦不誤。良裘謂王冕弁冠服之裘，次於大裘者也。《玉藻》云：「君衣狐白裘，錦衣以裼之。君子狐青裘，豹褱，玄緇衣以裼之。麕裘，青豸褱，絞衣以裼之。羔裘，豹褱，緇衣以裼之。狐裘，黃衣以裼之。」注云：「天子狐白之上衣，皮弁服與？狐青裘，蓋玄衣之裘。黃衣，大蜡時臘先祖之服也。」金榜云：「凡冕服、爵弁服，皆玄上纁下。《玉藻》『狐青裘』，注云『玄衣之裘』。熊氏謂五冕及爵弁也。君用純狐青，大夫士雜以豹褱。近得其實。狐白裘錦衣，麕裘絞衣，皮弁服之裘也。羔裘緇衣，冠弁服之裘也。韠弁服韠韋衣裳，韠者赤黃之間色，故《羔羊》正義云：「兵事既用韠韋衣，則用黃衣狐裘，《春秋傳》『臧之狐裘，敗我于狐貍』是也。」鄭疑黃衣狐裘爲蜡時臘祭先祖之服，與《郊特牲》黃衣黃冠而祭爲一事。榜謂黃衣黃冠，庶人之祭服也，故曰：「野夫黃冠。黃冠，草服也。」案：金綜合鄭、孔及皇、熊說冕弁冠諸服之裘，致塙。張惠言、宋縣初說並同。此良裘卽通咳彼諸裘言之也。云「王乃行羽物」者，此官掌裘，又兼掌羽物，與羅氏爲官聯也。注

云「良，善也」者，《宰夫》注義同。云「中秋鳥獸毼毼」者，^①此卽《書·堯典》「中秋鳥獸毛毼」之異文。賈疏引鄭《書

注云：「毼，理也，毛更生整理。」惠棟云：「《釋文》云：『毼音毛。』案：毼當爲髦字之誤也。《尚書》云：『中秋鳥獸髦毼，中冬鳥獸毼髦。』涉下而誤耳。」案：惠說是也。《說文·毛部》云：「毼，毛盛也。从毛隹聲。《虞書》曰：『鳥獸毼髦。』毼，仲秋鳥獸毛盛，可選取以爲器用。」《說文》之毼，卽今書鳥獸毼毛之毼字。此注毼字，與毼形近，惠謂涉彼而誤，近是。鳥獸毼髦，惟見《說文》。鄭注《尚書》，與許本同異，今無可攷。此毛毼之爲毼毼，蓋鄭君涉筆之誤，非鄭所讀《堯典》如是也。毼，傳寫又誤作「毼」，後人不敢輕易，而依今書讀之，故陸音毛，亦非謂毼卽毛字。《玉燭寶典》引此注作毛毼，蓋六朝舊讀如是。《集韻·六豪》云：「毛或作毼。」又誤采陸音，古實無是字也。云「因其良時而用之」者，此中秋季秋兩獻裘，並謂獻已成之裘。凡皮以乾久爲良，必非新取卽獻。而鄭言此者，蓋謂前年中秋取裘材，次年中秋裘成，乃獻而用之。用與取時正相應，亦得取毛毼爲良之義。《掌皮》云：「秋斂皮，冬斂革，春獻之。」注云：「皮革踰歲乾久，乃可用。獻之，獻其良者於王，以入司裘，給王用。」彼秋斂皮，卽取裘材之時；至次年春，皮乾

①「中秋」原作「仲秋」，據上鄭注正文改。

久，始獻之人司裘。既人司裘，乃頒與裘氏，制之成裘，至中秋季秋而獻之。以兩職經注合校，可以得其義也。鄭司農云「良裘王所服也」者，先鄭意此良裘不辨何裘，但是王所服，凡冕服弁服之裘皆是。以尊者所親御，當擇毛物純縹、人功密致者獻之，故稱良裘，對下功裘爲卿大夫所服也。云「行羽物，以羽物飛鳥賜羣吏」者，《羅氏》「行羽物」，注云「行謂賦賜」，義與此同。云「玄謂良裘，《玉藻》所謂黼裘與」者，彼文云「唯君有黼裘以誓省，大裘非古也」。鄭彼注云：「黼裘，以羔與狐白雜爲黼文也。省當爲獮。獮，秋田也。國君有黼裘誓獮田之禮。」賈疏云：「案彼文云『唯君有黼裘以誓獮』，獮是仲秋田獵之名。彼獮田用黼裘，與仲秋獻良裘同時，皆不爲寒設，故知此良裘則與彼黼裘一也。」案：賈說非鄭旨也。注以黼裘說此良裘，亦因黼裘唯天子諸侯誓省得服，其文最縟；《玉藻》與大裘同舉，明視它裘爲特尊，故舉以爲釋，非謂此專爲仲秋獮田而獻，不爲寒設也。但五冕祭服之裘，與黼裘同爲大裘之次，不宜不在良裘之列，此經之義，自以先鄭說爲最咳。又黼裘，鄭《玉藻》注謂以羔與狐白雜爲黼文。然羔之與狐，羸縶迴殊，相雜爲文，恐非所宜。孔廣森謂錯白黑羊皮爲之，於義可通，而終嫌其太樸。竊疑當以狐白雜狐青爲之，乃得相

稱耳。且黼裘珍貴，固宜與五冕之裘同用狐也。又案：《玉藻》之「誓省」，鄭讀爲「誓獮」，於經無徵。且依其說，則上服當爲冠弁服，是降於五冕爵弁、韋弁、皮弁服之裘，不得爲尤善矣。陳祥道讀「省」如字，謂祭祀服以聽誓命，省牲饗。其說近是，惠士奇、戴震、孔廣森、宋繇初說同。竊謂黼裘蓋天子諸侯齊服之裘，祭前誓省服齊服，與正祭不同。互詳《司服》疏。至《家語·郊問篇》，說郊禮云：「天子大裘以黼之。」王注云：「大裘爲黼文也。」此以黼裘爲即大裘，其說殊謬。蓋王肅采《郊特牲》文私定，不足辯也。云「此羽物，小鳥鶉雀之屬，鷹所擊者」者，賈疏云：「案：《夏官·羅氏》『仲春，羅春鳥，行羽物』。彼注云：『羽物，若今南郡黃雀之屬。』彼黃雀卽此雀之屬，此鶉與雀亦是鷹所擊，故連言鶉也。」云「中秋鳩化爲鷹，中春鷹化爲鳩」者，《月令》「仲春鷹化爲鳩」，無中秋鳩化爲鷹之文。惟《王制》云「鳩化爲鷹，然後設罝羅」，不著時月。鄭知爲仲秋者，以春生秋殺，鷹鳩因時氣而化，一仲爲春秋之中，經雖無文，可互相推定也。《大戴禮記·夏小正》云：「正月鷹則爲鳩，五月鳩爲鷹。」此與《月令》文乖，鄭所不用。故《月令》「季夏鷹乃學習」，孔疏引《鄭志》：「焦氏問云：『仲秋乃鳩化爲鷹。仲春鷹化爲鳩，此六月，何言有鷹學習乎？』張逸

荅曰：「鷹雖爲鳩，亦自有真鷹可習矣。」《玉燭寶典》引《月令章句》云：「鷹以中春化爲鳩，中夏陰氣起，而復爲鷹。」此兼據《小正》爲說，非鄭義也。云「順其始殺與其將止，而大班羽物」者，通釋此經中秋行羽物及羅氏中春行羽物，一年二次行羽物，並順始殺與止殺之時也。季秋，

獻功裘，以待頒賜。功裘，人功微麤，謂狐青麤裘之

屬。鄭司農云：「功裘，卿大夫所服。」【疏】「季秋獻功裘」

者，《國語·周語》云：「單襄公曰：隕霜而冬裘具。」韋注

云：「孟冬天子始裘，故九月可以具。」案：彼冬裘蓋兼此

良裘功裘言之。具裘之時始於中秋，盡於季秋；言隕霜

者，舉其最遲之期限也。《大戴禮記·夏小正》云「九月王

始裘」，則季秋天子已衣裘矣。賈疏云：「按《詩》云「七月

流火，九月授衣」，此季秋則是九月授衣之節。」云「以待頒

賜」者，頒謂常賜，若宮伯掌宮中士庶子，云「以時頒其衣

裘」是也。賜謂好賜，非常賜也，詳《膳夫》疏。賈疏云：

「功裘之內，有羣臣所服之裘，故言以待頒賜。」注云

「功裘，人功微麤」者，謂攻皮之工，裘氏作之，功有精麤，猶

《典婦功》有良功苦功。上文良裘之功最精良，此裘功微麤

苦，則亞次於彼者，故直謂之功裘也。云「謂狐青麤裘之

屬」者，賈疏云：「案《玉藻》「君子狐青裘，豹裘；麤裘，青

豻裘」。彼云君子，鄭云君子，大夫士也。以其彼云豹裘、

青豻裘，裘用雜，故爲大夫士。若君則用純。引此者，證功

裘中有此狐青麤裘，以待頒賜。《玉藻》仍有羔裘、狐裘，亦

是臣之所服裘，不引之者，「之屬」中含之矣。若然，狐青裘

者，鄭《玉藻》注云「蓋玄衣之裘」。天子下至士玄端之服皆

服之。又云麤裘者，鄭彼注引孔子素衣麤裘，謂是君臣視

朔之服。」案：《玉藻》狐青裘玄衣，孔疏引皇氏云：「玄衣

謂玄端也。」劉氏同。賈說即本於彼。孔又引熊安生說，謂

玄衣即指冕服、爵弁服是也。詳前疏。劉氏之意，蓋以五

冕之裘，同黑羔裘，則狐青裘玄衣，不得復爲五冕之衣，故

必易爲玄端，而後可申其說，亦以玄端衣與狐青色足相配

也。《詩·邶風·旄丘》孔疏說亦同。金榜云：「《玉藻》

「狐青裘，玄綃衣以楊之」。皇氏以玄衣爲玄端，則玄綃衣

以楊，爲以帛裏布矣。」案：金說足證熊、劉之誤，賈氏從

之，疏矣。《詩·召南·羔羊》孔疏，又謂鄭意功裘以待頒

賜大夫士，明狐青非冕服之裘，以申劉氏之說，亦非也。賈

又以麤裘爲視朔之服者，《玉藻》疏云：「天子視朝，服皮弁

服，狐白錦衣，士不衣狐白，熊氏云「用麤裘素楊」也。諸

侯在國視朔，則素衣麤裘。卿大夫士亦皆然，故《論語》注

云「素衣麋裘，視朔之服」是也。」又案：賈謂此功裘內，含有諸狐裘及羔裘是也。但據經以待頒賜之文，則不關王自服之裘可知。然則狐羔諸裘，皆宜屬諸侯及卿大夫士所服言之。後鄭上良裘注，不及狐青裘，則似王所服裘，自黼裘外，皆入此功裘，恐非經義也。鄭司農云「功裘，卿大夫所服」者，先鄭以良裘爲王所服，故此功裘爲卿大夫所服，亦通冕服、弁服、玄端服之裘而言也。其說亦較後鄭爲長。

王大射，則共虎侯、熊侯、豹侯，設其鵠。諸侯則共熊侯、豹侯，卿大夫則共麋侯，皆設其鵠。大射者，爲祭祀射，王將有郊廟之事，以射擇諸侯及羣臣與邦國所貢之士可以與祭者。射者可以觀德行，其容體比於禮，其節比於樂而中多者，得與於祭。諸侯，謂三公及王子弟封於畿內者。卿大夫亦皆有采地焉，其將祀其先祖，亦與羣臣射以擇之。凡大射各於其射宮。侯者，其所射也。以虎熊豹麋之皮飾其側，又方制之以爲臺，謂之鵠，著於侯中，所謂皮侯。王之大射：虎侯，王所自射也；熊侯，諸侯所射；豹侯，卿大夫以下所射。諸侯之大射：熊侯，諸侯所自射；豹侯，羣臣所射。卿大夫之大射，麋侯，君臣共射焉。凡此侯道，虎九十弓，熊七十弓，豹麋五

十弓。列國之諸侯大射，大侯亦九十，參七十，干五十，遠尊得伸可同耳。所射正謂之侯者，天子中之則能服諸侯，諸侯以下中之則得爲諸侯。鄭司農云：「鵠，鵠毛也。方十尺曰侯，四尺曰鵠，二尺曰正，四寸曰質。」玄謂侯中之大小，取數於侯道。《鄉射記》曰：「弓二寸以爲侯中。」則九十弓者，侯中廣丈八尺；七十弓者，侯中廣丈四尺；五十弓者，侯中廣一丈。尊卑異等，此數明矣。《考工記》曰：「梓人爲侯，廣與崇方，參分其廣而鵠居一焉。」然則侯中丈八尺者，鵠方六尺；侯中丈四尺者，鵠方四尺六寸大半寸；侯中一丈者，鵠方三尺三寸少半寸。謂之鵠者，取名於鵠鵠。鵠鵠小鳥而難中，是以中之爲雋。亦取鵠之言較，較者直也，射所以直己志。用虎熊豹麋之皮，示服猛討迷惑者。射者大禮，故取義衆也。士不大射，士無臣，祭無所擇。故書「諸侯則共熊侯虎侯」，杜子春云：「虎當爲豹。」【疏】「王大射」者，王與諸侯、諸臣射於大學，其禮大於賓射、燕射、鄉射，故謂之大射也。《射義》孔疏云：「凡天子諸侯及卿大夫禮射有三：一爲大射，是將祭擇士之射；二爲賓射，諸侯來朝天子，人而與之射也，或諸侯相朝而與之射也；三爲燕射，謂息燕而與之射。其天子、諸侯、大夫，三射皆具；其士，無大射，其賓射、燕射，士皆有之。」

案：《鄉射記》云：「唯君有射于國中，其餘否。」注云：「國中，城中也。謂燕射也。」則是大夫士有鄉射，無燕射，但士當亦有大射。孔說並未塙。孔又不及鄉射者，以鄉遂之吏主其事，王與諸侯咸不與也。《漢書·吾丘壽王傳》又謂大射之禮，自天子降及庶人。未知塙否。詳後及《梓人》疏。云「則其虎侯、熊侯、豹侯，設其鹄」者，以下並大射前三日，共與射人張之，二官相與爲官聯也。注云「大射者，爲

祭祀射，王將有郊廟之事，以射擇諸侯及羣臣與邦國所貢之士可以與祭者，射者可以觀德行，其容體比於禮，其節比於樂而中多者，得與於祭」者，賈疏云：「《禮記·射義》云『天子大射，謂之射侯』，即云『天子將祭，必先習射』，故知大射是將祭而射也。郊謂祭五天帝於四郊，不言圜丘祭昊天，亦有可知。廟謂祭先王先公皆是也。『以射擇諸侯』至『得與於祭』皆《射義》文。案：彼云『天子以射擇諸侯卿大夫士』，即云『是故古者天子之制，諸侯歲貢士於天子，試之射宮，其容體比於禮，其節比於樂而中多者，得與於祭，而中少者不得與於祭』。是其大射擇諸侯、羣臣、貢士得與祭之事也。」詒讓案：凡大射皆因祭而射，其事有三：一爲天子春試邦國之貢士，其禮最大，《梓人》所謂「張皮侯而棲鹄，則春以功」是也；二則四時郊廟祭前，擇助祭之臣；三

則四時大田校獵，卿大夫相與射，時田有享杓、享烝及方社之獻，則亦祭事也。三者皆爲祭而舉，而以能詔事，亦即行於其間，故有擇諸侯、卿大夫士及得中爲諸侯之說。本原禮意，蓋因畿內外諸侯與官府學士等，皆本無職事，而來助祭觀禮者其人衆多，不容盡取，故必射以擇之。《漢書·食貨志》說諸侯貢士於天子，云「行同能偶，別之以射」，將祭擇士，亦此意也。若遠方侯服祗奉職貢，宗祝有司共脩職掌，雖亦與射，而豈在擇取之列哉！云「諸侯謂三公及王子弟封於畿內者」者，《王制》云：「天子之縣內諸侯，祿也。」彼內諸侯通公卿大夫凡食采者而言，此惟言三公者，以別於下卿大夫也。王子弟據親子弟食都者而言。此諸侯知非畿外諸侯者，畿外諸侯大射得用三侯，《大射儀》所謂「大侯九十，參七十，干五十」，與此不同，又非司裘所共故也。云「卿大夫亦皆有采地焉」者，賈疏云：「案：《載師》『大都任置地』，是此諸侯也。又云『小都任縣地，家邑任稍地』，是其卿大夫亦皆有采地焉。」詒讓案：據《載師》注，公卿大夫通謂之采地，此惟言卿大夫有采地者，以經以卿大夫與諸侯別文故也。又依《大宰》、《載師》疏說，王子弟疏者亦食縣稍，則當與卿大夫同射麋侯。云「其將祀其先祖，亦與羣臣射以擇之」者，《大射儀》、《鄭目錄》云：「諸

侯將有祭祀之事，與其羣臣射，以觀其禮，數中者得與於祭，不數中者不得與於祭。」是諸侯祀先祖與羣臣射以擇之事也。卿大夫亦有廟有臣，故得與諸侯同。云「凡大射各於其射宮」者，明大射射宮在國外，與賓射在朝燕射在寢不同也。賈疏云：「從王以下，至大夫，大射各自於其西郊之學射宮之中。」案：賈謂在西郊之學者，謂虞庠也。《樂記》云：「武王克殷，散軍而郊射，左射《狸首》，右射《騶虞》。」鄭注云：「郊射，為射宮於郊也。左，東學也。右，西學也。」《大射儀》云「公人《鵲》，鄭注云：「此公出而言入者，射宮在郊，以將還為人。」又《鄉射記》「於郊則間中」，注云：「於郊，謂大射也。大射於大學。《王制》曰：小學在公宮之左，大學在郊。」案：以《樂記》及《大射》、《鄉射》諸注校之，禮大射必在郊學。而鄭說學制，謂天子大學在國，小學在郊，諸侯反是。故賈氏謂天子大射在西郊之虞庠小學，諸侯大射在郊之大學，《樂記》孔疏說亦云然。蓋鄭所謂各於其射宮者，說本如是。今攷天子大射之宮，見於經者有二。一在東郊，為壇壇宮。《大戴禮記·虞戴德篇》云「諸侯會朝于天子，天子以歲二月，為壇于東郊，抗大侯，規鵠豎物。九卿佐三公，三公佐天子，天子踐位，諸侯各以其屬就位。乃升諸侯之教士，教士執弓挾矢，揖讓而升，履物

以射」是也。此天子春與邦國貢士大射，公卿及諸侯咸在，即所謂春以功也。其禮最盛而人尤衆，故不於大學而於郊壇。若歲時大祭擇士及王與羣臣或國中學士射，則當在大學中學之辟雍。《諸子》云：「春合諸學，秋合諸射。」射即辟雍也。惟射宮本無定所，射於東郊，即以壇宮為射宮，射於大學，即以辟雍為射宮，注說固足以咳之矣。蓋鄭謂大射在郊，甚塙；而謂天子郊學為小學，則失之。賈、孔謂王大射在西郊之虞庠，尤誤之甚也。《射義》云：「天子將祭，必先習射於澤，已射於澤，而後射於射宮。」彼澤宮在靈囿之中，與射宮辟雍異地。《大司馬》注謂大射於澤，實據習射言之，非大射射宮之正也。諸侯大射，亦各於其國郊之大學；卿大夫大射，則各於所近鄉學庠序之中。《孟子·滕文公篇》云：「序者射也。」此指州序等而言，即卿大夫所射，非天子大射之所，亦非大學之東序也。周學制異同及射宮，並詳《大司馬》及《諸子》疏。云「侯者，其所射也」者，鄭《鄉射禮》、《大射儀》注，並云「侯謂所射布也」。《小爾雅·廣器》云：「射有張布謂之侯。」《說文·矢部》云：「侯，春饗所射侯也。从人从厂，象張布，矢在其下。」案：三射之侯制雖小異，而以布為之則同。云「以虎熊豹麋之皮飾其側」者，賈疏云：「侯中上下俱有布一幅夾之，所飾

者唯有兩傍之側，故云飾其側也。」云「又方制之以爲羣，謂之鵠，著於侯中」者，於舊本誤「于」，今據宋余仁仲本正。羣，《釋文》云：「本亦作準。」丁晏云：「《說文·土部》：『羣，秩臬也。』从土羣聲，讀若準。」《木部》：「臬，射準的也。」羣即羣之省文。」賈疏云：「梓人爲侯，廣與崇方，故云『方制之』。質者正也，所射之處，故名爲質。三分其侯，鵠著於侯中。」案：丁說是也。《說文·言部》云：「羣，孰也，讀若純。」非此義。《釋文》或本作「準」者，準即羣之借字。賈本羣又作「質」，故釋質爲正，而不及羣。《詩·小雅·賓之初筵》孔疏引鄭此注，亦作「質」，是孔、賈所見本同。今本疏述注仍作「羣」者，宋人以疏合注時，改從《釋文》也。質與羣義同。《毛詩·賓之初筵》傳云：「的，質也。」《荀子·勸學篇》亦云「質的」。《說文》詁臬爲準的，是羣、臬、的、質同物。方制之爲羣，謂如其飾侯之皮，制之正方，以爲其侯之鵠。若虎侯則虎飾而虎鵠，熊侯則熊飾而熊鵠，它皆放此。云「所謂皮侯」者，據《梓人》文。鄭說以鵠即羣，與諸儒不同，詳後。朱大韶云：「侯皆以布爲之。其曰虎侯、熊侯、豹侯、麋侯，豸侯者，據侯中言。鵠用皮爲之，故羣於司裘，蓋用皮之存毛者，故得辨其爲虎熊豹麋豸。」云「王之大射，虎侯王所自射也，熊侯諸侯所射，豹侯卿大

夫以下所射」者，以三侯之尊卑遞推知之。賈疏云：「卿大夫更言以下者，兼有士，亦射豹侯。」云「諸侯之大射，熊侯諸侯所自射，豹侯羣臣所射」者，降於天子也。云「卿大夫之大射，麋侯君臣共射焉」者，卿大夫唯有麋侯，故知君臣共射之也。云「凡此侯道，虎九十弓，熊七十弓，豹麋五十弓」者，《大射儀》注云：「量侯道，謂去堂遠近也。」天子大射侯道之數，禮無明文，鄭依《大射儀》畿外諸侯大射侯道及《射人》所言九節七節五節推之，《射人》注說賓射侯道亦同。《白虎通義·鄉射篇》云：「天子射百二十步，諸侯九十步，大夫七十步，士五十步，明尊者所服遠，卑者所服近也。」案：此漢時禮家之異說，蓋因《大射儀》諸侯大侯九十弓推之，天子侯道當遠於諸侯，故謂天子百二十步，步即弓也。今攷《匠人》，市朝一夫不過百步，若百二十步，凡七十二丈，射宮之庭未必有如此之廣，其說殆不足據。云「列國之諸侯大射，大侯亦九十，參七十，干五十」者，《釋文》云：「干，本又作豸。」案：《大射儀》作「干」，鄭讀爲豸。豸即豸之或體，詳《射人》疏。此並據《大射儀》，彼文云：「司馬命量人量侯道與所設乏，以狸步，大侯九十，參七十，干五十。」鄭彼注云：「《鄉射記》曰：『侯道五十弓』，《考工記》曰『弓之下制六尺』，則此狸步六尺明矣。大侯，熊侯。謂

之大者，與天子熊侯同。參讀爲穆。穆，雜也。雜侯者，豹鵠而麋飾，下天子大夫也。干讀爲豻。豻侯者，豻鵠豻飾也。鄭意畿外諸侯得同天子用三侯，與畿內諸侯止得用熊侯、豹侯異，故云列國之諸侯以別之。云「遠尊得伸，可同耳」者，賈疏云：「對此經畿內諸侯之近尊，不得同於天子三侯。」云「所射正謂之侯者，天子中之則能服諸侯，諸侯以下中之則得爲諸侯」者，《大射儀》注亦云：「尊者射之，以威不寧侯；卑者射之，以求爲侯。」案《梓人》云：「毋或若女不寧侯，不屬於王所，故抗而射女。」是天子中之，則能服諸侯也。《祭義》云：「射侯者，射爲諸侯也。射中則得爲諸侯，射不中則不得爲諸侯。」是諸侯以下射中之，則得爲諸侯也。此明射以攻德，有德者宜爲王侯，失德者則忝其爵位，非真以射爲黜陟也。《書·益稷》云「侯以明之」，僞孔傳云：「當行射侯之禮，以明善惡之教。」亦此義也。《楚辭·大招》王注云：「王者當制服諸侯，故名布爲侯而射之。古者選士必於鄉射，心端志正，射則能中，所以別賢不肖也。」王說與鄭亦略同。鄭司農云「鵠，鵠毛也」者，《說文·鳥部》云：「鵠，鴻鵠也。」賈疏云：「先鄭意以鵠字與『鴻鵠』鵠字同，故爲鵠毛解之。」案《梓人》云：「張皮侯而棲鵠。」毛非可棲之物，故後鄭不從。云「方十尺曰侯，四尺

曰鵠，二尺曰正，四寸曰質」者，《毛詩·齊風·猗嗟》傳亦云「二尺曰正」。《賓之初筵》疏云：「《周禮》鄭衆、馬融注，皆云「十尺曰侯，四尺曰鵠，二尺曰正，四寸曰質」，則以爲侯皆一丈，鵠及正質於一侯之中，爲此等級。王肅亦云「二尺曰正，四寸曰質」，又引《爾雅》云：「射張皮謂之侯，侯中者謂之鵠，鵠中者謂之正，正方二尺也。正中謂之鵠，方六寸也。鵠則質也。舊云方四寸，又云方六寸。《爾雅》說之明，宜從之。」此肅意唯改質爲六寸，其餘同鄭、馬也。賈逵《周禮注》云：「四尺曰正，正五重，鵠居其內，而方二尺。」以爲正大於鵠，鵠在正內，雖內外不同，亦共在一侯。鄭於《周禮》上下檢之，以爲大射之侯，其中制皮爲鵠，賓射之侯，其中采畫爲正，正大如鵠，皆居侯中三分之一。其燕射則射獸侯，侯中畫爲獸形，卽《鄉射記》所謂熊侯白質之類矣。《射人》注說畫正之注云：「其外之廣，居侯中三分之一。」中言二尺，與毛傳「二尺曰正」，同也。案據此說，則先鄭及馬氏並謂鵠最大，正次之，質最小，三射之侯中皆有此三等。後鄭說則以皮侯棲鵠不爲正，采侯設正不爲鵠，正鵠大小同而侯異，其皮侯之鵠，采侯之正，又各隨侯中之大小爲增減。二義不同。王肅據《小爾雅·廣器》文，定質爲六寸，餘並從先鄭義。賈說稍異，而亦以正鵠爲一。並

與後鄭義殊。金鶚云：「射侯有正鵠，先儒皆分大射、賓射，其說始於鄭，《中庸》、《射義》注云：「畫布曰正，棲皮曰鵠。《釋文》曰：「大射則張皮侯而棲鵠，賓射則張布侯而設正也。」「竊以爲非也。《詩·齊風》云：「終日射侯，不出正兮。」「言正而不言鵠，此但稱魯莊公之善射，非必賓射也。《射義》云：「射者各射己之鵠。言鵠而不言正，此泛言射義，非必大射也。且大射、賓射既別，則燕射亦宜有異。若亦名正鵠，是無別也；若別有其名，何不見於經乎？即或混同於大射、賓射，其取義亦不確。獸侯爲獸形，有似於皮侯，當名爲鵠；然畫布非棲皮，有類於采侯，又當名爲正；殊難處置。惟無以處夫獸侯，故知正鵠之不可分屬皮侯、采侯也。《小爾雅》云：「鵠中者謂之正。《齊風》毛傳云：「二尺曰正。鄭司農云：「十尺曰侯，四尺曰鵠，二尺曰正，四寸曰質。』據此可知正鵠但有內外之分，而無畫布棲皮之異也。正象內志之正，鵠象外體之直，故正在內而鵠在外。鵠居侯中三分之一，天子侯中丈八尺，鵠方六尺，畿外諸侯亦然。畿內諸侯侯中丈四尺，鵠方四尺六寸大半寸；大夫士侯中一丈，鵠方三尺三寸少半寸。侯國大夫與王朝諸侯同，士與王朝大夫同。正亦居鵠中三分之一，天子正方二尺，畿外諸侯同；畿內諸侯正方一尺五寸少半寸，大夫士

正方一尺一寸一分有奇。魯是畿外諸侯，故毛傳以「二尺曰正」解之，非謂凡正皆二尺也。司農二尺曰正，本於毛傳，亦可見正在鵠中也。侯中有鵠又有正，本當兼言正鵠，其單言正或言鵠者，省文也。以中正中鵠皆可謂中，故正鵠可偏舉也。第正鵠雖皆可謂中，而尤以中正爲善，故《齊風》言不出正也。鄭注《射人》所謂中二尺者，專指九十步五采之侯，與毛傳「二尺曰正」合。但毛不專屬采侯，而鄭專屬采侯，是爲異耳。《考工記》云「張皮侯而棲鵠」，但言鵠而不言正者，以正在鵠中，言鵠則正可知，故省之也。下云張五采之侯張獸侯，並不言鵠，蒙上省文，不言可知也。鄭因采侯不言鵠，遂謂此畫布爲正，與棲皮之鵠異，誤矣！「朱大韶申先鄭、馬、王說云：「鵠與正相連，不與侯連，故曰棲曰設。居侯中者謂之鵠，居鵠中者謂之正。《射義》云「發而不失正鵠者」，又云「失諸正鵠」，是中正謂之中，中鵠亦謂之中，居正中者謂之質。《賓之初筵》「發彼有的」，傳「的，質也」；荀卿《勸學篇》「質的張而弓矢至」；《淮南·兵略訓》高注「的，射準也」，是也。侯未有不設正鵠者，故經但言鵠不言正，以正居鵠中，舉鵠而正賅焉矣。《鄉射記》：「天子熊侯白質，諸侯麋侯赤質，大夫布侯畫以虎豹，士布侯畫以鹿豕。凡畫者丹質。」質即二寸曰質之

質。於布侯、皮侯皆曰質，則質居正之中可知。」案：金、朱據毛、馬、先鄭說，定正在鵠內，無大射賓射之分；又謂鵠居侯中三分之一，正亦居鵠中三分之一。其說近是。竊謂侯中大小，取數侯道弓二寸以爲侯中，《鄉射記》有明文。三分侯廣而鵠居一，《梓人》亦有明文。馬、鄭、王諸儒不容不見，而謂侯鵠正質內外大小四等爲一定之數者，蓋假大夫士諸侯侯中之度，約舉大數，以明大小之差也。鄒漢勛云：「《鄉射記》：『鄉侯十尺。』鄭、馬言侯方十尺者，據鄉侯也。四尺曰鵠，亦據鄉侯取成數言之。其實三分取一，侯丈八尺者，鵠六尺；侯丈四尺者，鵠四尺六寸三分寸之二；侯丈者，鵠三尺三寸三分寸之一。」案：鄒說是也。五十弓之侯中十尺，鵠方三尺三寸少半寸，其正依金說，當方一尺一寸一分有奇，而云四尺曰鵠二尺曰正者，約舉成數也。據先鄭說，正之內尚有質。《楚辭·大招》云：「三公穆穆，登降堂只。諸侯畢極，立九卿只。昭質既設，大侯張只。執弓挾矢，揖辭讓只。」彼正據大射大侯言之，而亦設昭質，足證先鄭義。質亦謂之的，故《毛詩》、《荀子》並以的質同論。《韓非子·外儲說左》及《問辯》二篇，並云「設五寸之的」，是質小於正，古有明徵。質居正中，蓋亦當居正三分之一，則五十弓侯之質，當方三寸七分強。而先鄭云

四寸曰質者，亦舉成數也。先鄭《梓人》注云：「設身廣一丈，兩個各一丈，凡爲三丈。」彼云身一丈，與此注十尺曰侯同。彼爲設數，則此注亦爲設數，非侯之通制可知。侯鵠正質，隨侯道爲大小，故質、鵠、的爲一物。而馬、鄭說質四寸，《小爾雅》說鵠六寸，《韓非》說的五寸，其非一定之數又可知矣。今參取馬、鄭、王及金氏義，推定天子以下侯制。蓋凡侯皆爲侯中及鵠正質三等。其侯中及鵠正大小之差，當如金說。其正內之質，則九十弓之侯，質方六寸六分強，與《小爾雅》六寸之鵠文合。七十弓之侯，質方五寸一分強，與《韓非》五寸之的文合。而五十弓之侯，與馬、鄭四寸之質亦相近。可以釋諸說之紛互矣。至賈景伯說正大於鵠，則於古無可證；鵠方二尺，與《梓人》文尤不合。金榜謂蓋段侯中六尺明之。然以《鄉射記》推之，六尺之侯，侯道止有三十弓，《禮經》侯道未有如是之近者，則亦不可通也。云「玄謂侯中之大小，取數於侯道，《鄉射記》曰，弓二寸以爲侯中，則九十弓者侯中廣丈八尺，七十弓者侯中廣丈四尺，五十弓者侯中廣一丈，尊卑異等，此數明矣」者，此鄭據《鄉射》文，明侯中之數，隨侯地之遠近而各異，以破先鄭十尺曰侯之說也。引《考工記》云「梓人爲侯，廣與崇方，參分其廣而鵠居一焉」者，鄭彼注云：「崇，高也。方猶等

也。高廣等者，謂侯中也。」引之者，明鵠大小之度，出數於侯中，以破先鄭四寸曰鵠之說也。云「然則侯中丈八尺者，鵠方六尺，侯中丈四尺者，鵠方四尺六寸大半寸，侯中一丈者，鵠方三尺三寸少半寸」者，《大射儀》注說大侯、繆侯、猗侯之鵠同。賈疏云：「以其侯中丈八尺，三六十八，故鵠居六尺。侯中丈四尺者，取丈二尺，三六十二，得四尺；有二尺在，又取尺八寸，三六十八，又得六寸；有二寸在，寸各爲三，二寸併爲六分；取二分各爲三分寸之二，即是大半寸也。侯中一丈者，取九尺，三三而九，得三尺。一尺在，又取九寸，得三寸，仍有一寸，分爲三，得一分，故云少半寸。」詒讓案：鄭言此者，亦破先鄭侯十尺鵠四尺之說。然先鄭實假設之數，與《鄉射》、《梓人》文，本不相戾，後鄭似未諒。云「謂之鵠者，取名於鵠鵠，鵠鵠小鳥而難中，是以中之爲雋」者，《大射儀》注以此訓爲第二說，云：「或曰鵠，鳥名，射之難中，中之爲俊，是以所射於侯取名也。」《淮南子》曰：「鵠鵠知來。」案：鄭引《淮南子》，《汜論訓》文。今本鵠作「乾」，高注云：「乾鵠，鵠也。」《廣雅·釋鳥》云：「鵠鵠，雋也。」《說文·佳部》云：「鵠，鵠鵠也。」《鳥部》云：「鵠，鵠鵠，山鵠，知來事鳥也。」鵠、雋並鵠之異文，鵠與鵠亦聲相近。依高、張說，則鵠鵠即今之喜鵲，《說文》則以爲山

鵠，二者種類略同。《釋文》引劉昌宗「鵠」音「雁」；金鶚亦謂古字鵠與雁通，鵠與鵠通，鵠鵠猶鴻鵠也，非小鳥。案：劉音金說與先鄭鵠毛之義相近，然與許、鄭諸家說鵠鵠並不合，未知是否。中之爲雋者，本《左》昭十二年傳「其以中雋也」之文，謂以中小爲雋異也。云「亦取鵠之言較，較者直也，射所以直己志」者，《大射儀》注義同。此說較鵠鵠之義爲優。金鶚云：「鵠與梏聲同。《爾雅·釋詁》云：「梏，直也。」梏，轉聲爲較，故《釋詁》較亦訓直。鄭注《射義》云：「鵠之言梏也。梏，直也。」然則鵠本作梏，或作較。其作鵠者，古字假借耳。」云「用虎熊豹麋之皮，示服猛，討迷惑者，射者大禮，故取義衆也」者，《說文》侯字注云：「天子射熊虎豹，服猛也。諸侯射熊豕虎，大夫射麋，麋惑也。」《白虎通義·鄉射篇》云：「天子所以射熊何？示服猛，遠巧佞也。熊爲獸猛巧者，非但當服猛也，亦當服天下巧佞之臣也。諸侯射麋者，示遠迷惑人也。麋之言迷也。大夫射虎豹何？示服猛也。」班氏所說，即《鄉射記》之獸侯，與此經大射侯異，而釋義亦與鄭、許同。云「士不大射，士無臣，祭無所擇」者，《大射儀》注云：「士無臣，祭不射。」《射義》疏亦謂士唯有賓射、燕射。金榜駁之云：「大射主於擇士，天子諸侯將祭，於是乎行之。卿大夫士無將祭擇士之

事，因射誓衆選賢，孔子射於矍相之圃，是其遺事。《射義》「古者諸侯之射也，必先行燕禮。卿大夫士之射也，必先行鄉飲酒之禮」。《射義》釋《大射儀》之義，遂廣及卿大夫士，明士亦得行大射。」金鶚云：「士亦有大射。《射人》云：「士以三耦射豻侯」，《大射儀》言士射干，其明證也。鄭注《射人》以爲賓射，非也。先儒皆謂士無臣故無大射。然攷之《特牲饋食禮》，有宗祝、佐食、雍人，所謂有司也。《士冠禮》云：「有司如主人服。」注云：「有司，羣吏有事者，謂主人之吏，所自辟除府史以下也。」夫羣吏雖不可謂臣，而既爲士治事，即當考校其功，豈得無大射乎？《史記》云：「諸儒大射於孔子冢」，此亦可見士有大射矣。大夫士大射之地，先儒謂不可考。案：《鄉射記》云：「唯君有射于國中，其餘否。」是大夫士之射在郊。《射義》云：「孔子射於矍相之圃。」鄭注：「矍相，地名。」此當爲大射。孔疏以爲賓射，非也。蓋大夫士大射，皆於國外射圃也。」胡匡衷云：「《特牲饋食禮》有私臣，則士有臣矣。《左傳》云：「士有隸子弟」，又云「士臣阜」。蓋士得以其子弟及府史之屬爲臣也。」案：依二金及胡說，則士亦有臣，得行大射，其說亦較鄭爲長。云「故書諸侯則共熊侯、虎侯，杜子春云虎當爲豹」者，賈疏云：「虎侯是天子大侯，不宜在諸侯熊侯之下，故不從

也。」段玉裁云：「《說文》『侯，天子射熊虎豹，諸侯射熊虎』。此從故書以熊侯爲最貴，天子諸侯同之。《射人》『王以六耦射三侯』，鄭司農云『三侯，熊虎豹也』，與許云『天子射熊虎豹』合。然則經文本作『王大射則共熊侯虎侯豹侯』。《司常》『熊虎爲旗』，熊在虎上。」論讓案：《論語·八佾篇》《集解》引馬融云：「天子有三侯，以熊虎豹皮爲之。」亦以熊貴於虎，與先鄭及許同。又《鄉射記》：「天子熊侯，諸侯麋侯，大夫布侯，畫以虎豹，士布侯，畫以鹿豕。」彼指鄉射燕射之侯，亦以熊貴於虎。竊疑此經故書天子則虎侯先熊侯，諸侯則熊侯先虎侯，兩文錯異。先鄭及馬季長、許叔重讀並改天子三侯，首熊侯，次虎侯，而諸侯二侯則仍故書之舊。後鄭從杜子春說，不改天子三侯，而破諸侯虎侯爲豹侯，以合三侯之次。二說不同，由所讀各異也。大喪，廡裘，飾皮車。皮車，遣車之革路。故書廡爲淫。鄭司農云：「淫裘，陳裘也。」玄謂廡，興也，若《詩》之興，謂象似而作之。凡爲神之偶衣物，必沾而小耳。【疏】「大喪」者，賈疏云：「謂王喪。」論讓案：亦當關后、世子喪，詳《宰夫》疏。云「廡裘」者，亦與司服爲官聯也。賈疏云：「謂明器中之裘，卽上『良裘』『功裘』等。」云「飾皮車」者，與

巾車、車僕、司常、校人爲官聯也。賈疏云：「亦謂明器之車以皮飾之。」注云「皮車，遣車之革路」者，《巾車》王

五路有革路，注云：「革路，輓之以革而漆之。」天子遣車，亦備五路。此革路亦稱皮車，皮革散文通。《新序·雜事篇》云「中行穆子皮車十乘」，謂兵車也。《車僕》云：「大喪廠革車。」彼注云：「言興革車，則遣車不徒戎路，廣闕革輕皆有焉。」則此飾皮車，亦通駭五戎車，蓋皆司裘飾訖，與車僕廠之。《巾車》又云「大喪飾遣車」，則此官所飾者，唯革路而已；餘玉金象木四路，並巾車飾之也。云「故書廠爲淫，鄭司農云淫裘，陳裘也」者，《司服》、《大師》、《司兵》注義並同。徐養原云：「廠之爲淫，蓋聲之誤。然先鄭直訓淫爲陳，是不必改從廠也。《說文·广部》：「廠，陳興服於庭也。」字從今書，義同先鄭，然則淫與廠皆可訓爲陳也。《爾雅·釋詁》：「廠，熙，興也。」此後鄭所本，而不能通其義於淫。」曾釗云：「淫與陳聲近。《詩·行葦》『以引以翼』，引本或作淫。《爾雅》『引，陳也』。則司農訓爲陳，正合古義。」詒讓案：《司服》、《司兵》先鄭注並云「淫讀爲廠」，則先鄭亦不從故書也。此與《大師》注獨無讀爲廠之文，疑所引不備。陳裘謂爲明器之裘，將葬則與明器遣車等同陳之。《既夕禮》：「葬前一日，於祖廟載飾柩訖，云「陳

明器于乘車之西」，即廟之中庭。許君以「陳興服於庭」解廠，即隱據彼經也。其葬日至壙，亦當如《既夕》云「陳器于道東西」，既窆，則亦與司服廠衣服同藏於槨中也。云「玄謂廠，興也」者，《爾雅·釋詁》文。《大司樂》、《大師》、《笙師》、《典庸器》、《巾車》、《司兵》注並同。後鄭亦以廠裘爲明器之裘，而訓義則與先鄭異。段玉裁云：「此鄭君不從故書作淫司農訓陳也。書或作廠，故鄭君從之，爲之說如此。《說文》所據《周禮》亦作廠，與後鄭同。」詒讓案：全經五篇，大喪言廠者十有六職：此司裘，廠裘也；司服，共廠衣服也；大司樂，涖廠樂器也；大師，帥瞽而廠也；小師，與廠也；眡瞭，笙師、鐃師、籥師，廠樂器也；典庸器，廠筍虞也；司干，廠舞器也；巾車，飾遣車遂廠之行也；車僕，廠革車也；司常，建廠車之旌也；司兵，廠五兵也；圉人，廠馬也。先鄭皆訓爲陳，後鄭皆訓爲興，謂作之。賈《司兵》疏云：「先鄭廠皆爲陳，後鄭皆不從，以爲廠興解之者，見《司服》云「大喪，共其復衣服、斂衣服、奠衣服、廠衣服，掌其陳序」，《圉人職》云「凡賓客、喪紀牽馬而入陳，廠馬亦如之」。以此言之，廠陳既別，則廠不得爲陳，以興象爲義也。」姜兆錫申先鄭說云：「廠即陳也，爲王喪異其文耳。《笙師》云「大喪廠樂器，大旅陳樂器」，《眡瞭》則云「大

喪廠樂器，大旅亦如之」，是廠陳異文同義也。《巾車》云：「大喪飾遣車，遂廠之行之。」飾而遂陳，其義甚明。若遣車既飾矣，而又云遂興似而作之，義可通乎？「王引之說同。案：姜、王說是也。凡廠者陳而不用之名。《司服》之陳序，冢上復斂奠廠四者衣服而言，故廠衣服之外，復言掌其陳序。《圉人》所云「凡賓客、喪紀牽馬而入陳」者，指駕車之真馬而言，故鄭注云「啓後所薦馬」。以其陳而不用，與塗車芻靈異，故下別言「廠馬亦如之」也。要之，凡器物之陳而不用者謂之廠，亦可謂之陳，故《大旅》之廠，《笙師》謂之陳，《既夕禮》言陳明器而不言廠，明言陳猶言廠也。其用者則謂之陳，而不可謂之廠，故《圉人》云「陳馬」，又云「廠馬」，明兩文不相涉也。後鄭以《爾雅》有廠興之訓，遂據以易先鄭之說，而於《巾車》注，仍云「廠，興也，謂陳駕之」。則自知其不可通，而兼用先鄭之義，亦足徵其非達詁矣。云「若《詩》之興，謂象似而作之」者，後鄭意此廠訓興，與六詩比興之興同義。《釋名·釋典藝》云：「興物而作謂之興。」《荀子·禮論篇》云：「明器，類而不用。」是明器雖不用，亦象似生時所用之物而作也。云「凡爲神之偶衣物，必沾而小耳」者，孔廣森云：「偶，寓也，謂作假物寄寓其象。《史記》『見木偶人與土偶人相與語』。《索隱》音寓。」

《韓延壽傳》曰：「賣偶車馬下里僞物者，棄之市道。」漢郊祀有木寓龍一駟，木寓車馬一駟。寓車馬即偶車馬也。」案：孔說是也。偶衣物謂明器，賈疏讀偶衣句斷，失之。《既夕記》說明器云：「弓矢之新沾功。」注云：「沾示不用。」又《喪服》注云：「沾猶羶也。」《荀子·禮論篇》云：「具生器以適墓，略而不盡，類而不功，明不用也。」爲偶衣物羶略而小，亦示不用之義。凡邦之皮事，掌之。歲終則會，唯王之裘與其皮事不會。【疏】「凡邦之皮事掌之」者，凡聘享庭實及弁冠、舄帶、席褱諸器服用皮革者皆是。后亦當有裘，經不言者，文略。云「歲終則會」者，正裘及凡皮事之歲會，司裘之官成也。歲終謂夏之季冬，周之二月也。鄭《宰夫》注謂是周之季冬，失之，詳彼疏。

掌皮掌秋斂皮，冬斂革，春獻之。皮革踰

歲乾久乃可用。獻之，獻其良者於王，以入司裘，給王用。【疏】「掌秋斂皮，冬斂革，春獻之」者，賈疏云：「許氏《說文》：獸皮治去其毛曰革」。秋斂皮者，鳥獸毛毳之時，其皮善，故秋斂之。革乃須治，用功深，故冬斂之。乾久成善乃可獻，故春獻之也。」宋綿初云：「凡連毛者曰皮，裘材也。」

去毛者曰革，練治之革曰韋。此云革，蓋兼韋言之，冠與帶之材也。」

注云「皮革踰歲乾久乃可用」者，釋經秋冬斂春乃獻之之義。鄭意凡裘材皆於前年秋取之，故《獸人》

「春秋獻獸物」，注云「及狐狸」，即取裘材也。《詩·豳風·

七月》云：「一之日于貉，取彼狐狸，爲公子裘。」彼仲冬取者，民間取獸時或略後，與此經不必同也。依經注義，秋斂

春獻，並屬裘材。其司裘中秋獻良裘，季秋獻功裘，則獻已成之裘。獻成距斂皮已期歲，其彌乾久可知。其韋革亦以

乾久爲善，故《釋名·釋喪制》云：「凡五材，膠漆陶冶皮革，乾槁乃成也。」云「獻之，獻其良者於王，以入司裘，給王

用」者，以共尊須擇良者，故特獻之也。皮革兩者皆獻其良者入司裘，皮以爲王裘，革以給帶舄及皮車等之用。遂

以式灋頒皮革于百工。式法，作物所用多少故事。

【疏】「遂以式灋頒皮革于百工」者，此冢上春獻爲文，謂既獻之後，遂依式法頒之於百工也。案《敘官》司裘之下無

工，則凡皮革之良者，雖獻於王入司裘，仍洩此官頒之於工；其不良者，則此官直頒之於工，不入司裘也。百工者，

即《考工記·總敘》云「攻皮之工五，函、鮑、鞞、韋、裘」。又

彼注說百工云「衆言之」是也。賈疏謂獻良者入司裘，其餘

乃入百工，是人司裘者即不復頒工，似非經義。

注云

「式法，作物所用多少故事」者，此亦注用今字作「法」也。

蔣載康云：「式灋即九式之灋，指工事言。」賈疏云：「作，

若裘氏作裘，函人作甲冑，謂皮革皆有物多少之數，有舊

法者也。」共其毳毛爲氈，以待邦事。當用氈則共

之。毳毛，毛細縵者。【疏】注云「當用氈則共之」者，氈，

詳《掌次》疏。賈疏云：「謂若掌次張氈案，是當其用氈，則

掌皮共毳毛與冬官，使作氈與掌次也。」云「毳毛，毛細縵

者」者，《說文·毳部》云：「毳，獸細毛也。」《一切經音義》

引《三蒼》云：「毳，羊細毛也。」凡氈以毳毛爲之。《淮南

子·齊俗訓》云：「越人見毳，不知其可以爲旃也。」旃氈字

同。歲終，則會其財齎。財，斂財本數及餘見者。

齎，所給予人以物曰齎。今時詔書或曰齎計吏。鄭司農

云：「齎或爲資。」【疏】「歲終」者，亦謂夏之季冬。云「則

會其財齎」者，此正皮革之歲會，亦此官之官成也。注

云「財，斂財本數」者，賈疏云：「謂四方所有皮革之入掌皮

之數，是本數也。」詒讓案：《大宰》注云：「財，泉穀也。」此

財蓋謂所斂皮革直泉多少之本數。云「及餘見者」者，餘見

謂所用餘皮革見在者也，詳《司書》疏。賈疏云：「謂出給

不盡，見在庫者也。」云「齋所給予人以物曰齋」者，此亦謂給予百工也。《稟人》云：「掌受財于職金以齋其工。」注云：「齋，給市財用之直。」《墨子·非樂篇》說為舟車云：「萬民出財齋而予之。」此經義與彼同。段玉裁云：「此與許君齋訓持遺合。」案：詳《外府》疏。云「今時詔書或曰齋計吏」者，孔廣森云：「《漢書·文翁傳》曰：買刀布蜀物，齋計吏以遺博士。」詒讓案：計吏即上計吏，詳《小宰》疏。齋計吏，乃以賜物畀計吏，使持與所賜之人，非即賜計吏也。賈疏謂有詔賜與計吏則曰齋，殊失攷。鄭司農云「齋或為資」者，《外府》注同，亦謂故書或本也。

內宰掌書版圖之灋，以治王內之政令，均其稍食，分其人民以居之。版謂宮中閭寺之屬

及其子弟錄籍也。圖，王及后、世子之宮中吏官府之形象也。政令謂施閭寺者。稍食，吏祿稟也。人民，吏子弟分之，使衆者就寡，均宿衛。【疏】「掌書版圖之灋，以治王

內之政令」者，《匠人》注云：「內，路寢之裏也。」王路寢以內，至於北宮，凡王及后、夫人所居之舍，此官通掌之。蓋舉門以內通為王宮，路門以內通為王內，此官治王內之政

令，與小宰治王宮之政令，內外互相備也。王內與《敍官》王之「正內」、《女史》「內宮」專指后宮言者異。惠士奇云：「王宮、后宮皆曰王內，版圖政令，宮正、宮伯分治之而內宰則兼治之者也。」云「均其稍食，分其人民以居之」者，俞樾云：「均者，據版以均之也，人之多寡在版也。分者，據圖以分之也，地之廣狹在圖也。」注云「版謂宮中閭寺之屬及其子弟錄籍也」者，《小宰》注云：「版，戶籍也。」又《宮

正》注云：「版，其人之名籍。」蓋凡戶籍、名籍，並謂之版。宮中閭寺，即內小臣、閭人、寺人、內豎之屬本在宮中者。鄭意閭寺本身固著錄籍，其子弟或通籍得入宮者，內宰亦書之也。云「圖，王及后、世子之宮中吏官府之形象也」者，王居南宮，后居北宮，世子亦自有宮。《內則》注云：「古者命士以上，年十五，父子異宮。」《喪服傳》亦謂有東宮，有西宮，有南宮，有北宮。若然，世子居東宮，羣王子則居西南北三宮，與王及后所居南北宮異。其后寢亦有王女之宮，猶《公羊》莊元年傳所謂「羣公子之舍」是也。自后、世子以下諸宮，皆統於王宮，故此官并掌之。《大宰》注云：「百官所居曰府。」吏官府之形象，謂吏人所居之府寺，其方位界域，廣狹遠近，悉書其形象於圖也。凡經言版圖，圖並謂地圖。《小宰》「聽閭里以版圖」，注云：「圖，地圖也。」《司會》

「凡在書契版圖者之貳」，注云：「圖，土地形象，田地廣狹。」義並與此同。云「政令謂施閭寺者」者，賈疏云：「以其閭人主中門之禁，寺人掌王之內人之戒令，內宰爲之長，故知政令者施之於閭人，寺人也。不言內小臣及內豎者，蓋亦施之也。」云「稍食，吏祿稟也」者，稟，舊本誤「廩」，今依注疏本正。《宮正》注義同。賈疏云：「吏即閭寺子弟宿衛后宮者。宮正所均，謂宿衛王宮者，以米稟爲祿之月俸。均之者，當知見在空闕也。」詒讓案：稍食者，稟食也，與正祿異。詳《宮正》疏。云「人民，吏子弟」者，鄭意王內非庶民所居，明人民爲在宮中官吏之子弟。《宮正》「去其淫怠與其奇衰之民」，注云：「民，宮中吏之家人也。」義與此同。惠士奇云：「《宮伯》之士庶子，《宮正》之衆寡，《內宰》之人民，一也。古者兵出於民，故曰夫家衆寡，又曰人民。虎賁掌虎士，司右掌勇力之士，皆人民也。」案：惠說是也。后宮之朝及門垣，蓋皆有宿衛，故後文有北宮糾守之事。此人民當兼賅士庶子及夏官之虎士，秋官之隸民，凡備衛守共使役者皆是。若宮中官吏，其身任在宮給事，或得并攜子弟之無職事者同居。然其官寺當在路門以外，不得在北宮也。若然，此官及宮伯、宮正所掌，蓋皆通王宮后宮宿衛吏士言之，並互詳《宮正》疏。云「分之，使衆者就寡，均宿衛」

者，宿衛人數衆寡，必分使相等，所以均其勞役，且使遮迺周密，無疏懈之患。以陰禮教六宮，鄭司農云：「陰禮，婦人之禮。六宮後五前一。王之妃百二十人：后一人，夫人三人，嬪九人，世婦二十七人，女御八十一人。」玄謂六宮，謂后也。婦人稱寢曰宮。宮，隱蔽之言。后象王，立六宮而居之，亦正寢一，燕寢五。教者，不敢斥言之，謂之六宮，若今稱皇后爲中宮矣。《昏禮》：「母戒女曰：夙夜毋違宮事。」疏注鄭司農云「陰禮，婦人之禮」者，《媒氏》注云：「納幣用緇，婦人陰也。」凡禮之涉婦人者，通謂之陰禮。後文「凡建國佐后立市，祭之以陰禮」。注云：「陰禮，婦人之祭禮。」《大司徒》云「以陰禮教親則民不怨」。注云：「陰禮謂男女之禮。」是也。又《內小臣》云「掌王之陰事陰令」，《媒氏》云「凡男女之陰訟」，並以事涉婦人，故謂之陰，與此義同。云「六宮，後五前一」者，賈疏云：「天子謂之六寢，《宮人》所云者是也。后亦象王立宮，亦後五前一，在王六寢之後爲之，南北相當耳。」詒讓案：王六寢，前路寢一，後燕寢五，一居中，其四分居四隅，后六宮亦然，詳《宮人》疏。云「王之妃百二十人，后一人，夫人三人，嬪九人，世婦二十七人，女御八十一人」者，《昏義》云：「古者天子后立六宮，三夫人，九嬪，二十七世婦，八十一御妻，以

聽天下之內治。」此即先鄭所本。《敍官》後鄭注亦引彼文。其說實未可信，詳《敍官》疏。云「玄謂六宮謂后也」者，賈疏云：「先鄭意以陰禮婦人之禮，教六宮之人，自后以下至女御。後鄭意以婦人之禮教后一人，六宮即后也。」詒讓案：後鄭意下文別出九嬪，則此六宮不得通該嬪御，其三夫人班秩雖在九嬪之上，究不可與后並言，明此六宮當專屬后，故不從先鄭說也。云「婦人稱寢曰宮，宮，隱蔽之言」者，此六宮即后所居之寢，與《匠人》「室中度以几，宮中度以尋」，以宮對室，主外之圍繞言者異。《宮人》「王六寢」直稱寢，此後稱宮不稱寢。宮之爲言營也，營繞周市即隱蔽之義，婦人所居以隱蔽爲宜，故異其名也。云「后象王，立六宮而居之，亦正寢一燕寢五」者，申先鄭前一後五之義，明后寢與王同。《宮人》注說王六寢云：「路寢一，小寢五。」路寢即正寢，小寢即燕寢也。后燕寢五，中及四方，諸侯夫人燕寢三，則中及東西。《左》襄九年傳「魯穆姜薨于東宮」，即三寢之一也。云「教者，不敢斥言之，謂之六宮」者，后尊與王同，內宰主內教，不敢斥言后，故以后之宮言之也。云「若今稱皇后爲中宮矣」者，衛宏《漢舊儀》云：「皇后稱中宮。」王應麟云：「《哀帝紀》『中宮』注云：『皇后之宮。』」云「《昏禮》母戒女曰，夙夜毋違宮事」者，據《士昏

禮》文。明婦人主宮事，故后稱宮也。以陰禮教九嬪，教以婦人之禮。不言教夫人、世婦者，舉中，省文。【疏】注云「教以婦人之禮」者，與上先鄭說同。云「不言教夫人、世婦者，舉中省文」者，賈疏云：「司農意上文教六宮之人訖，此復教九嬪者，先鄭意以九嬪掌婦學之法，使之教九御，故內宰更別教之也。後鄭意下文別教九御，故知此教三夫人已下。不言三夫人、世婦者，舉中以見上下，省文。」以婦職之灋教九御，使各有屬以作二事，正其服，禁其奇袞，展其功緒。婦職，謂織紵組紃縫線之事。九御，女御也，九九而御於王，因以號焉。使之九九爲屬，同時御又同事也。正其服，止踰侈。奇邪，若今媚道。展猶錄也。緒，業也。故書二爲三，杜子春云：「當爲二，二事謂絲枲之事。」【疏】「以婦職之灋教九御，使各有屬，以作二事」者，婦職，即《大宰》九職「七曰嬪婦化治絲枲」。此官亦以職事授內嬪婦，而贊九嬪教九御也。王引之云：「《九嬪》：『掌婦學之灋，以教九御各帥其屬，而以時御敍于王所。』即此所謂以婦職之灋教九御，使各有屬也。」案：王說是也。九御屬九嬪，此官使各從其長，以施教作事也。云「禁其奇袞」者，《釋文》云：「袞，本

亦作邪。」案：經例用古字作「袞」，注例用今字作「邪」，或本非是，詳《宮正》、《司諫》疏。奇袞之禁，亦士師宮禁之一端也。

注云「婦職謂織紉組紃縫線之事」者，《釋文》云：「線，本亦作綫。」案：線綫字同，詳《縫人》疏。此卽化治絲枲之事。《內則》云：「女子執麻枲，治絲繭，織紉組紃，學女事以共衣服。」鄭彼注云：「組，條。」孔疏云：「紃爲繒帛。皇氏云「組是綬也」。然則薄闇者爲組，似繩者爲組。」賈疏云：「織紃爲一事，組紃又爲一事，縫線又爲一事，三者皆婦職也。案《詩注》云：「王后織玄紃，公侯夫人紃紃，卿之內子大帶，大夫命婦成祭服，士妻朝服，庶士以下各衣其夫。」貴賤皆有職者，彼示雖貴無得遊手率先之意，非如此絲枲二事，責其功緒也。上文世婦以上皆直言陰禮不言職，此言職者，以其世婦以上貴，無絲枲等職業之法故也。」云「九御，女御也」者，以其次九嬪之後，故知卽女御也。《國語·周語》云：「內官不過九御。」《魯語》云：「天子日入監九御，使潔奉郊禘之粢盛。」韋注云：「九御，九嬪之官，主粢盛祭服者也。」案此上文云「以陰禮教九嬪」，與教九御別，則九御非卽九嬪也。韋說非。九御亦謂之諸御，《莊子·德充符篇》云「爲天子之諸御，不爪剪，不穿耳」是也。云「九九而御於王，因以號焉」者，九九而御於

王，卽《九嬪》注所謂「女御八十一人當九夕」是也。今案：女御人數未埒，詳《敍官》疏。云「使之九九爲屬，同時御，又同事也」者，鄭意九嬪九人，女御八十一人爲九嬪之屬，是每九嬪一人領女御九人，亦卽《大宰》八法官屬之義也。九九爲屬，各自相從，以御於王，又同受職作事，使分別班秩，不相雜廁。內嬪婦與外百官府，固無不同矣。賈疏謂九人爲一屬，屬猶聚也，非經注之義。云「正其服，止踰侈」者，踰侈謂踰越僭侈，服其所不當服者也。依《內司服》注，女御服祿衣。今依金榜說，女御亦得服展衣，詳彼疏。云「奇邪若今媚道」者，此注用今字也。《史記·建元以來侯者年表》云：「將陵侯史子回妻宜君，盜斷婦人初產子臂膝以爲媚道，弃市。」又《外戚世家》云，長公主譏栗姬挾邪媚道，陳皇后挾婦人媚道。鄭以媚道卽婦人奇邪之事，故舉以爲況。云「展猶錄也」者，《說文·尸部》云：「展，轉也。」引申爲校錄之言，《聘禮》注云：「展猶校錄也。」謂校比紀錄之，以考其高下也。云「緒，業也」者，《廣雅·釋詁》同。《宮正》注亦云「緒其志業」。云「故書二爲三，杜子春云當爲二，一事謂絲枲之事」者，段玉裁云：「此鄭君從杜定爲字誤而改之也。」王引之云：「故書作三是也。三事謂祭祀、賓客、喪紀之事。祭祀、賓客、喪紀謂之

三事，猶祭祀、朝覲、會同、賓客、軍旅、田役、喪荒，《小宰》謂之七事也。下文云：大祭祀贊九嬪之禮事，凡賓客之裸獻，瑤爵皆贊，凡喪事佐后使治外內命婦正其服位。曰祭祀，曰賓客，曰喪事，所謂三事也。正其服位，所謂正其服也。亦如《大僕》「祭祀賓客喪紀正王之服位」矣。案：此作事冢上婦職爲文，則杜、鄭破字，義自允協。但王申故書，於義亦通，黃以周說同，今附存之。大祭祀，后裸

獻，則贊，瑤爵亦如之。謂祭宗廟，王既裸而出迎牲，后乃從後裸也。《祭統》曰：「君執圭瓚裸尸，大宗執璋瓚亞裸。」此大宗亞裸，謂夫人不與而攝耳。獻謂王薦腥薦孰，后亦從後獻也。瑤爵，謂尸卒食，王既醑尸，后亞獻之，其爵以瑤爲飾。【疏】「大祭祀后裸獻則贊」者，此與外宗爲官聯也。內宰祭祀贊后裸獻，猶小宰祭祀贊王裸將之事。賈疏云：「大祭祀謂祭宗廟也。后裸者，謂室中二裸，后亞王裸尸。獻謂朝踐饋獻，后以玉爵亞王而獻尸。此三事內宰皆佐后。裸時以璋瓚授后，獻時以玉爵授后，故云則贊也。」云「瑤爵亦如之」者，唐石經贊下疊一贊字，則讀「贊瑤爵亦如之」爲句。阮元云：「亦如之者，謂亦贊也。正下文所謂皆贊也。若瑤上復有贊字，則不可通。唐石經

非。」案：阮說是也。嚴可均亦據疏云「瑤爵亦如之者亦贊之也」，謂少一贊字爲是。今不據增。賈疏云：「謂尸卒食，王醑尸，后亞王而醑尸，則內宰以瑤爵授后，后親酌盞齊以醑尸，亦贊之也。」案：朝踐饋獻亦用瑤爵，鄭、賈謂用玉爵，非也，詳後。注云「謂祭宗廟」者，明不關外祭也。賈疏云：「以其天地、山川、社稷等外神，后夫人不與。又天地無裸，此云裸，故知經云大祭祀者，據宗廟而言也。但宗廟之祭，四時與禘祫六享，皆有此裸獻瑤爵之事，故總言宗廟也。」案：賈說是也，亦詳《小宰》疏。云「王既裸而出迎牲，后乃從後裸也」者，此王初裸，后亞裸，爲宗廟九獻首二裸之節，裸尸於室中，迎牲於門外，故言出也。此注謂迎牲在后亞裸之前；《司尊彝》注先說后以璋瓚酌亞裸，次引《郊特牲》「既灌然後迎牲」，則謂迎牲在后亞裸之後。

《禮運》孔疏引崔靈恩說，從此注義，謂王出迎牲，后乃從灌。賈《司尊彝》疏則謂此注取王事自相亞，故先言王裸出迎牲，后乃後裸，其實以彼注爲正。今案：王裸則后亞裸，事本相次，但初裸既畢，則王無事，已可以出，不必待后畢裸而後出也。王出之後，后方送裸，逮王迎牲而入，則后裸已訖，是王出在后送裸之先，人在后畢裸之後，二注文本無悞也。云「《祭統》曰君執圭瓚裸尸，大宗執璋瓚亞裸，此大

宗亞裸，謂夫人不與而攝耳者，明后亞裸亦執璋瓚也。鄭彼注亦云：「大宗亞裸，容夫人有故攝焉。」孔疏云：「大宗主宗廟禮者，以亞裸之禮，夫人親爲之，此不云夫人而云大宗者，記者廣言容夫人有故，故大宗伯代夫人行禮，執璋瓚亞裸之禮。」云「獻謂王薦腥薦孰，后亦從後獻也」者，鄭以此獻與裸對文見異，謂當九獻中四獻六獻之節也。賈疏云：「案《禮記·禮運》云：『腥其俎，孰其殽。』鄭云『腥其俎謂豚解而腥之，孰其殽謂體解而孰之』。是其薦腥薦孰也。此二者是堂上朝踐饋獻之節。室中二灌訖，王出迎牲時，祝延尸於戶外之西，南面，薦八豆八簋，王牽牲入，以血毛告訖，以此腥其俎薦於神前，王以玉爵酌醴齊以獻尸，后亦以玉爵酌醴齊以獻尸也。朝踐訖，乃孰其殽，薦於神前，王以玉爵酌盎齊以獻尸，后亦以玉爵酌盎齊以獻尸，名爲饋獻。」江永云：「《內宰》及《司尊彝》疏，延尸出戶在二灌訖，王出迎牲之時。《禮運》孔疏在血毛詔於室之後。今從賈氏。蓋尸主在堂，而血毛詔於室，《郊特牲》下文所謂求而未之得也。」案：江說是也。互詳《司尊彝》疏。又依崔靈恩義，薦腥薦孰之獻，當在後文瑤爵內，凡后獻皆用瑤爵不用玉爵，則獻當與裸爲一。鄭說非經義，詳後。云「瑤爵，謂尸卒食，王既醕尸，后亞獻之」者，謂當九獻中七獻八獻

之節也。賈疏云：「案《儀禮》鄭注云：『諸侯尸十三飯，天子尸十五飯。』尸食後，王以玉爵酌朝踐醴齊以醕尸，謂之朝獻。后亦於後以瑤爵酌饋獻時盎齊以醕尸，謂之再獻，故云后亞獻也。」《禮運》疏云：「崔氏以爲后獻皆用瑤爵。」鄭鑄云：「自三獻以至九獻，王皆以玉爵，后皆以瑤爵。康成特指八獻時所用之爵，恐非也。」江永云：「凡后獻皆用瑤爵，言瑤爵亦如之，所以別於裸用璋瓚耳。」金榜云：「《司尊彝》注云：『朝獻謂尸卒食，王醕之。再獻者，王醕尸之後，后酌亞獻。諸臣爲賓，又次后酌盎齊，備卒食三獻也。於后亞獻，內宗薦加豆簋。』《明堂位》曰：『灌用玉瓚大圭，爵用玉琖，加用璧角璧散。』又《鬱人職》曰：『受舉畢之卒爵而飲之。』則王醕尸以玉爵也。王醕尸用玉爵，而再獻者用璧角、璧散可知也。鄭意蓋以后與諸臣再獻者，當《明堂位》之加爵，則以璧角、璧散與此瑤爵爲一，是加用瑤爵也。賈、孔之徒申注義者，謂后未醕尸以前，不用瑤爵，朝踐饋食皆酌玉爵以獻，與王同。唯崔靈恩以爲后獻皆用瑤爵，九獻之外，諸臣加爵用璧角、璧散，杜佑依用其說。榜案：周人祭祀、賓客之禮，王以圭瓚裸，后以璋瓚亞裸，其裸器既殊；大宰以玉爵贊王，內宰以瑤爵贊后，其爵制亦異。故《內宰》又言「凡賓客之裸獻瑤爵皆贊」。裸獻也，

瑤爵也，對文並舉，后之正獻具是矣。《特性饋食禮》加爵在正獻後。天子之禮，諸臣爲加爵，於時內宗獻加豆籩，王與后咸不親其事，然則內宰所贊，非加爵章著矣。」又云：「祭統『獻之屬，莫重於裸』，故謂之裸獻。鄭君分釋裸獻爲二，非也。」案：鄭、江、金從崔說，后獻皆用瑤爵是也。黃以周說同。凡九獻內，四獻、六獻、八獻后皆用瑤爵，鄭誤謂六獻以前，后獻並同王用玉爵，至八獻始用瑤爵，賈、孔禮疏並襲其誤，不可從。云「其爵以瑤爲飾」者，謂刻木爲爵而以瑤飾之，若《大宰》之玉爵也。《毛詩·衛風·木瓜》傳云：「瓊瑤，美石。」《說文·玉部》云：「瑤，玉之美者。」《木瓜釋文》引《說文》作美石，與毛義同。《楚辭·九歌》王注云：「瑤，石之次玉者。」然則瑤次於玉，故祭祀獻尸，王用玉爵，后用瑤爵。《祭統》云：「尸飲五，君洗玉爵獻卿；尸飲七，以瑤爵獻大夫。」亦瑤爵降於玉爵之證也。賈疏依《司尊彝》注說，謂「后以瑤爵亞酌尸，即『明堂位』之角散。彼云璧，此云瑤，不同者，瑤，玉名，瑤玉爲璧形，飾角口則曰璧角，角受四升，爵爲總號，故鄭云其爵以瑤爲飾。」《禮運》、《明堂位》孔疏說亦同。並非也。詳前金榜說及《司尊彝》疏。正后之服位而詔其禮樂之儀。薦徹之禮當與樂相應。位謂房中、戶內及阼所立

處。【疏】「正后之服位」者，賈疏云：「服謂若《內司服》禕衣已下六服。皆正之，使服當其用。位謂后助祭之位，正之使不失其所。」云「而詔其禮樂之儀」者，賈疏云：「后之行禮之時，皆合於樂節，各當其威儀，皆內宰告后，使依於法度。」注云「薦徹之禮當與樂相應」者，《內宗》云：「掌宗廟之祭祀，薦加豆籩。及以樂徹，則佐傳豆籩。」《外宗》云：「佐王后薦玉豆，眡豆籩。及以樂徹亦如之。」王后以樂羞盥則贊。」是后薦徹當與樂相應之事。賈疏云：「案《九嬪職》云『贊后薦徹豆籩』，是后薦徹也。天子之禮，薦時歌《清廟》，及徹歌《雍》，是薦徹皆有樂節。但內宰所詔，唯詔禮耳。經兼云樂者，禮樂相應也。」案：賈知徹歌《雍》者，據《樂師》、《小師》注義也。江永云：「《漢書·禮樂志》『秦漢之樂，乾豆上，登歌，猶古《清廟》之歌』。疏謂薦時歌《清廟》，其說蓋本此。」云「位謂房中、戶內及阼所立處」者，賈疏云：「但天子諸侯祭禮亡，今云位謂房中者，案《儀禮·特性》云：『主婦亞獻尸，尸拜受，主婦北面拜送。』主婦北面拜者，避內子。及尸酢主婦，主婦適房中，南面祭酒。及主人致爵于主婦，亦於房中南面拜受爵。至於《少牢》主婦入戶，西面獻尸，及酢主婦，無人房之文，即此云位謂房中戶內者，據《特性》士禮而言也。案：《少牢》、《有司

徹云：主人位于阼階上，獻尸侑訖，「主婦乃洗爵于房中，出實爵，尊南西面獻尸，尸拜于筵上受，主婦西面于主人席北拜送爵」。云主人席北，即當阼階，故云阼所立處，此約《有司徹》而言也。贊九嬪之禮事。助九嬪贊后之事。九嬪者贊后薦玉盥，薦徹豆籩。【疏】注云「助九嬪贊

后之事」者，《州長》先鄭注云：「贊，助也。」以九嬪職祭祀，無特行禮之事，明九嬪禮事即贊后之事也。云「九嬪者贊后薦玉盥，薦徹豆籩」者，賈疏云：「引《九嬪職》贊后爲后薦玉盥，薦徹豆籩等，是九嬪贊后之事，即是內宰助九嬪，九嬪贊后也。」凡賓客之裸獻、瑶爵，皆贊。謂王同姓及二王之後來朝覲爲賓客者。裸之禮，亞王而禮賓。獻謂王饗燕，亞王獻賓也。瑶爵，所以亞王酬賓也。《坊記》曰：「陽侯殺穆侯而竊其夫人，故大饗廢夫人之禮。」【疏】「凡賓客之裸獻瑶爵皆贊」者，賈疏云：「賓客則王同姓及二王後。以其非一，故云『凡』以廣之。云裸者，謂行朝覲禮訖，即行三享之禮，享訖，乃禮賓於戶牖之間。獻謂饗燕賓客，后亦助王獻賓。瑶爵謂王饗燕酬賓時，后亦助王酬賓。皆贊助于后也。」案：此裸獻與大祭祀同，亦專屬裸；后之獻賓亦以瑶爵。賈依鄭義，分裸獻爲二，而以瑶

爵別爲酬賓，失之，詳後。

注云「謂王同姓及二王之後

來朝覲爲賓客者」者，賈疏云：「見《大行人》云『上公之禮，再裸而酢，侯伯一裸而酢，子男一裸不酢』，則是上公乃有再裸，王先一裸，次后再裸。按：《孝經緯》云『二王之後稱公』，則知二王之後有后裸也。又案：《巾車》云：『同姓金路。』鄭云：『王子母弟雖爲侯伯，畫服如上公。』則此云王之同姓，亦謂爲侯伯得與上公同再裸，亦有后裸可知。若同姓爲子男者，則與異姓同一裸，無后裸也。故鄭云「謂王同姓及二王之後來朝覲爲賓客者」。但裸時大宗伯代后，至於拜送則后，則內宰亦贊后拜送爵。」論讓案：依《大宗伯》注疏，王與后二裸，皆宗伯攝爲之。二裸皆有贊。攝王裸時則小宰贊，《小宰》云「凡賓客贊裸」是也。攝后裸時則內宰贊，此經所云是也。《小宰》注謂贊裸爲助宗伯，則此贊裸亦助宗伯可知。賈謂贊后拜送，失之。云「裸之禮，亞王而禮賓」者，《大行人》云「王禮再裸而酢」，是裸即禮賓也。凡賓主人行禮畢，主人待賓用禮則謂之禮，不用禮則謂之饋。鬱鬯亦禮類也，故通稱禮也。詳《司儀》疏。云「獻謂王饗燕亞王獻賓也」者，賈疏云：「后之裸者，饗燕亦與焉。案《掌客》云，上公三饗三食三燕，侯伯再饗再食再燕，子男一饗一食一燕。無飲酒之禮，惟有饗燕耳。饗者

亨大牢以飲賓，立行禮在廟，獻依命數，爵盈而不飲。燕禮其牲狗，行一獻之禮，四舉旅，降脫屨，升坐，其爵以醉爲度。饗燕皆有獻賓酬賓，后亦助王獻賓酬賓之事，內宰皆贊后也。」案：此亦當以裸獻爲一事，饗禮上公九獻，初獻、二獻爲裸；侯伯七獻，子男五獻，初獻爲裸。其裸後獻酒則以瑤爵，與裸獻異也。鄭、賈說非，互詳《大行人》疏。云「瑤爵所以亞王酬賓也」者，《鄉飲酒禮》：「賓酢主人後，主人實觶酬賓。」注云：「酬，勸酒也。」案酬者，謂主人先飲以勸賓也。《詩·小雅·彤弓》箋云：「飲酒之禮，主人獻賓，賓酢主人，主人又飲而酌賓謂之醕。醕猶厚也，勸也。」酬卽醕之或體。江永云：「瑤爵，亞王醕賓之爵，注謂亞王酬賓之爵，非也。以幣酬賓之禮，惟獻末王一行，后則無酬。凡后獻皆用瑤爵。」金榜云：「禮，婦人於賓有獻無酬。」案：江、金說是也。引《坊記》曰「陽侯殺穆侯而竊其夫人，故大饗廢夫人之禮」者，今《坊記》「穆侯」作「繆侯」。鄭彼注云：「同姓也。其國未聞。大饗，饗諸侯來朝者也。」鄭以天子饗諸侯，后助獻賓，無正文，故引諸侯相饗夫人獻賓爲證，明后禮與諸侯夫人同也。致后之賓客之禮。謂諸侯來朝覲及女賓之賓客。【疏】注云「謂諸侯來朝覲」者，謂爲后致禮於來朝覲之諸侯也。《掌客》注云：「夫人

致禮，助君養賓也。」后致禮於諸侯，亦所以助王養賓。賈疏云：「謂若《酒正》云致后之賓客之禮。其掌客致夫人之禮，彼諸侯，夫人致禮於賓客法，明后亦致牢禮於賓客。鄭注《掌客》『凡夫人禮，皆使下大夫致之』，則此內宰亦下大夫也。」云「及女賓之賓客」者，賈疏云：「謂畿內同姓諸侯夫人有會見王后之法，故亦致禮焉。」凡喪事，佐后使治外內命婦，正其服位。使，使其屬之上士。內命婦，謂九嬪、世婦、女御。鄭司農云：「外命婦，卿大夫之妻，王命其夫，后命其婦。」玄謂士妻亦爲命婦。【疏】「凡喪事佐后使治外內命婦，正其服位」者，賈疏云：「喪言凡，則王及后、世子已下皆是。以其皆有服位，故云凡以廣之。凡有喪事，內宰皆佐后使其屬官治外內之命婦，正其服之精麤，位之前後也。」注云「使，使其屬之上士」者，以經云使治，則是內宰自使其當官之屬治之。內宰下大夫，其屬最尊惟上士，故知使上士也。賈疏謂以外內命婦卑，故內宰不自治之，非經義。此外命婦，閭閻卿妻，不盡卑也。云「內命婦謂九嬪、世婦、女御」者，此皆內宮之嬪御，故謂之內。《玉藻》云：「唯世婦命於奠薦。」鄭注云：「奠猶獻也。凡世婦已下，蠶事畢獻繭，乃命之以其服。」是內嬪御亦有命

也。賈疏云：「不言三夫人者，三夫人從后，不在治限，故不言也。」案：賈說是也。《肆師》「大喪，禁内外命男女之衰不中濃者」。彼注「内命女，王之三夫人以下」，與此注不同。據《追師》云「爲九嬪及外内命婦之首服」，是内命婦不數九嬪，則三夫人更不數可知。《喪大記》注亦云「内命婦，君之世婦」。若然，經凡言内命婦命女者，唯當數世婦、女御耳。三夫人、九嬪位尊，殆非内宰、肆師所治也。二注說並未埒，互詳《内司服》疏。鄭司農云「外命婦，卿大夫之妻」者，《喪服經》「大夫命婦」傳云：「命婦者，其婦人之爲大夫妻者也。」鄭彼注云：「命者加爵服之名，自士至上公凡九等，君命其夫，則后夫人亦命其妻矣。」案：據鄭彼注，則《喪服傳》「大夫妻闕上公及卿妻言之」，與此經以卿大夫妻爲外命婦合。至《國語·魯語》以卿之内子與命婦並舉，韋注云：「卿之適妻曰内子。命婦，大夫之妻也。」《釋名·釋親屬》云：「卿之妃曰内子，子，女子也，在閨門之内治家也。大夫之妃曰命婦，婦，服也，服家事也。夫受命於朝，妻受命於家也。」《屨人》注又專以孤妻爲内子，卿大夫妻並爲命婦，與韋、劉說復小異，^①皆析言之也。統言之則卿大夫妻同受后夫人命，亦通稱外命婦矣。云「王命其夫，后命其婦」者，與《喪服》注義同。《玉藻》云：「君命屈狄，再命

褱衣，一命褱衣，士祿衣。」鄭彼注云：「君，女君也。此子男之夫人及其卿大夫士之妻命服也。禮，天子諸侯命其臣，后夫人亦命其妻以衣服，所謂夫尊於朝，妻榮於室也。」案：后命命婦蓋使女史賜以衣服，與王格廟策命諸臣禮不同。《玉藻》又云：「唯世婦命於奠薦，其他則皆從男子。」蓋外命婦各從其夫，内命婦不得從君，則特命於獻薦時矣。云「玄謂士妻亦爲命婦」者，此增成先鄭義。《肆師》「内命女注」，^②亦通卿大夫士妻爲說。賈疏云：「夏殷之禮，爵命不及於士。周之禮，上士三命，中士再命，下士一命，夫尊於朝，妻榮於室，明士妻亦爲命婦可知。若然，《喪服》命夫命婦皆據大夫不含士者，彼據降服不降服爲說，故唯據大夫爲命夫，其妻爲命婦，不及士也。」詒讓案：析言之則士妻不得稱命婦，故《魯語》云「列士之妻」。《釋名·釋親屬》云：「士庶人曰妻，妻，齊也，夫賤不足以尊稱，故齊等言也。」《喪大記》云：「士妻不當斂，則爲命婦出。」《屨人》注亦分士妻與命婦爲二。此經通言之，則外命婦得下闕士妻也。互詳《大司寇》疏。凡建國，佐后立市，設其

① 「韋劉」二字原未印出，據楚本補。

② 「内」，疑當作「外」。

次，置其敍，正其肆，陳其貨賄，出其度、量、淳、制，祭之以陰禮。市朝者，君所以建國也。建國者必面朝後市，王立朝而后立市，陰陽相成之義。次，思次也。敍，介次也。陳猶處也。度，丈尺也。量，豆區之屬。鄭司農云：「佐后立市者，始立市，后立之也。祭之以陰禮者，市中之社，先后所立社也。」故書淳爲敦，杜子春讀敦爲純，純謂幅廣也，制謂匹長。玄謂純制，《天子巡守禮》所云「制幣丈八尺，純四咫」與？陰禮，婦人之祭禮。【疏】「凡建國」者，與《敍官》《建國》義同，亦謂營都也。云「佐后立市」者，以后命於北宮後周垣之外立三市，而兼治其市政，與司市爲官聯也。云「設其次，置其敍」者，謂設置市官所治官舍，又分置其市肆之行列，即《司市》「以次敍分地而經市」之事也。云「正其肆，陳其貨賄」者，謂內宰令市官，使列肆各以類相從，即《司市》「以陳肆辨物而平市」之事也。云「出其度量淳制」者，淳，《釋文》作「潭」。案《說文·水部》云：「潭，渌也。从水覃聲。」淳即潭之隸變。謂內宰以所定度量之法式，出與司市質人等官，使數率齊一，以防抵冒爭訟之弊，即《司市》「以度量成賈而徵價」之事也。注云「市朝者，君所以建國也」者，亦辨方正位之一端也。

云「建國者必面朝後市」者，據《匠人》文。後謂在王宮之北，詳彼疏。云「王立朝而后立市，陰陽相成之義」者，賈疏云：「王立朝，即三朝皆王立之也。后立市者，即此文是也。朝是陽，王立之；市是陰，后立之。獨陽不生，獨陰不成，故云陰陽相成之義也。」詒讓案：后立市，謂建國之時以后命立之，特取陰陽相成之義，其實市事非后所與也。云「次，思次也，敍，介次也」者，《釋文》云：「介或作分，非。」孔繼汾云：「介篆文作𠂔，隸省作介，其作分者，今之譌也。」詒讓案：思次、介次見《司市職》。彼注云：「思次，若今市亭也。介次，市亭之屬別小者也。」賈疏云：「案《司市》注：「次謂吏所治舍，思次、介次也，若今市亭然。敍，肆行列也。」與此注不同者，鄭望文解之。彼經無肆文，故以敍爲行列，并思次、介次共爲一所解之。此文自有肆文，故分思次、介次別釋也。」王安石云：「次其官之次，《司市》所謂思次、介次是也。敍其地之敍，《司市》所謂各於其地之敍是也。肆謂陳物之肆，《肆長》所謂各掌其肆之政令是也。」王昭禹、易拔、方苞、姜兆錫、蔣載康說竝同。俞樾云：「《司市職》云：「以次敍分地而經市，以陳肆辨物而平市。」則彼經亦有肆文也。鄭以敍爲肆之行列，與下句肆字自不相妨。蓋敍者統諸肆而言之也，肆者就一肆而言之

也。乃於此經分次爲思次，敘爲介次，義殊未安。《司市職》云：「上旌于思次以令市，市師蒞焉，而聽大治大訟；胥師、賈師蒞于介次，而聽小治小訟。凡萬民之期于市者，辟布者，量度者，刑戮者，各於其地之敘。」以敘與介次別言之，可知此注之非矣。」案：王、俞說是也。敘蓋市肆行首當市朝者，胥及肆長所治處，與思次、介次並異。詳《司市疏》。云「陳猶處也」者，《司市》注云：「陳猶列也。」陳列卽處置之義，謂分別其貨賄，使各處其肆，不相雜廁，卽《肆長》所云「名相近者相遠，實相近者相爾」是也。云「度，丈尺也」者，《司市》、《大行人》注並同。此關五度也。《漢書·律麻志》云：「度者，分寸尺丈引也，所以度長短也。本起黃鐘之長。以子穀秬黍中者，一黍之廣，度之九十分，黃鐘之長。一爲一分，十分爲寸，十寸爲尺，十尺爲丈，十丈爲引，而五度審矣。」云「量，豆區之屬」者，《司市》、《大行人》注義並同，亦關五量也。《左》昭三年傳：「晏子云：齊舊四量：豆區釜鍾。四升爲豆，各自其四以登於釜，釜十則鍾。杜注云：「四豆爲區，區斗六升，四區爲釜，釜六斗四升；鍾六斛四斗。」《漢·律麻志》云：「量者，龠合升斗斛也，所以量多少也。」鄭司農云「佐后立市者，始立市后立之也」者，謂建國始立市時，后命內宰營其塵肆之等，明市

舍皆官授，市人不得私建也。但此專據王城內三市言之，其國外鄉遂、公邑、家邑之等皆有市，則皆其長吏立之，不必盡稟命於王后也。云「祭之以陰禮者，市中之社先后所立社也」者，市中不得有他神位，而周制百家以上則得立社，故知先后命立市時，亦并命爲羣姓立社，卽《祭法》所謂置社是也。詳《大司徒疏》。云「故書淳爲敦，杜子春讀敦爲純」者，故書作敦，杜讀爲純，今經作淳者，從今書也。《質人》亦作淳，杜讀同。徐養原云：「《質人》『壹其淳制』，杜子春云『淳當爲純，純謂幅廣』。玄謂『淳讀爲淳尸盥之淳』。淳純音同，古字通用。至《管子·君臣篇》『丈尺淳制』，作淳，注以爲古準字。蓋淳純皆有準音，此字以純之左傍，淳之右傍合而成之。《說文》所無，乃俗體也。」云「純謂幅廣也」者，《質人》注同。《說文·巾部》云：「幅，布帛廣也。」《淮南子·天文訓》云：「幅廣二尺七寸。」《漢書·食貨志》云：「周法，布帛廣二尺二寸爲幅。」《鄉射禮》注云：「今官布幅廣二尺二寸。」後疏引《鄭志》又謂二尺四寸爲幅，蓋據帛言之，故《王制》孔疏謂布廣二尺二寸，帛廣二尺四寸。鄭、孔說與班說異，不知杜從何說也。云「制謂匹長」者，《說文·冫部》云：「匹，四丈也。」《漢·食貨志》說同。《淮南子·天文訓》云：「四丈而爲匹，一匹而爲制。」

是制卽一匹之長也。《管子·乘馬篇》云：「季絹三十三制，當一鎰。」《韓非子·外儲說右上篇》云：「終歲布帛取二制焉。」此制似皆卽匹之異名。字又作「製」，《說苑·復恩篇》云：「吳赤市使於智氏，假道於衛，甯文子具紵絺三百製，將以送之。」是也。依杜及《淮南》說，則制卽《媒氏》之兩布帛，每端長二丈，合兩端而成匹，則四丈也。然據鄭引《巡守禮》，則制長丈八尺，又是一端之長，與杜及《淮南書》並不合。又《王制》云「度量數制」，鄭彼注云：「制，布帛幅狹也。」是制又爲幅廣矣。云「玄謂純制《天子巡守禮》所云制幣丈八尺純四咫與」者，後鄭依今書作淳，讀亦依子春爲純，而義小異。制幣丈八尺卽幣之長，純四咫卽幅之廣，後鄭釋純與杜同，而釋制則與杜異也。《天子巡守禮》，蓋《禮古經》逸篇之一。《聘禮》注又引《朝貢禮》云：「純，四只。制，丈八尺。」《既夕禮》賈疏亦謂丈八尺曰制，《朝貢》及《巡守禮》皆有此文。今案：咫只並咫之段字。賈疏引《鄭志》：「趙商問云：『《天子巡守禮》，制丈八尺，純四咫何？』」荅云：「《巡守禮》：制丈八尺，咫八寸，四咫三尺二寸。又大廣，四當爲三，三八二十四，二尺四寸，幅廣也。古三四積畫，是以三誤爲四也。」惠士奇云：「淳與純通，純猶全也。《既夕禮》『贈用制幣玄纁束』。注云：『丈

八尺曰制，二制合之，十制五合。』然則丈八爲端，名曰制幣，蓋用之鬼神者也。《曲禮》曰「量幣」。古之幣帛有純有制，全曰純，量曰制，吉凶禮用制，賓嘉禮用純。」詒讓案：淳制之義，杜以純爲幅廣，制爲匹長。鄭引《逸禮》雖與杜義小異，而以純爲廣度制爲長度則一。然《既夕》及《逸禮》並云「制幣」，《聘禮》又云「釋幣制玄纁束」，既云釋幣，而又別之曰制，則制非匹長之通名。鄭據《逸禮》謂凡制幣皆丈八尺，其說自可馮；但周制布帛一端二丈，今云丈八尺，則制乃布帛長度之不足者。依此經云「出其淳制」，《質人》云「壹其淳制」，則淳制自當爲布帛廣長之正法。乃純廣猶是恒度，而匹長乃專舉丈八尺之制，廣贏而長不足，於文例既爲參差，且內宰所出，質人所壹，匹長皆不足於常度，又何理乎？惟惠氏以爲純卽《媒氏》純帛之純，全者爲純，不全者爲制，嘉賓禮用純，吉凶禮用制。通校禮經，無不符合。今依其義，更爲申繹。竊謂《說文·刀部》云：「制，裁也。」是制者裁布帛之名，因爲端幅尺度減少之稱。蓋古者布帛廣度不同，而一端之長，則咸以二丈爲正。如其正度者謂之純，純不必專屬廣度也。取其純者裁而減之，或減其長不及二丈，或減其廣布不及二尺二寸，帛不及二尺四寸者，則皆謂之制，制亦不必專屬長度也。《昏禮》納幣用純

帛者，即長二丈廣二尺四寸如其正度之帛也。《士昏記》云「皮帛必可制」，明其爲不裁制之全帛矣。鄭《媒氏》注破「純」爲「緇」，失之。《聘禮》、《既夕禮》及《逸禮》所云制幣，皆丈八尺，蓋於長二丈之常度減去二尺，是謂之制。《逸禮》又云純四咫者，四依《鄭志》當爲三，謂匹長雖減，而幅廣則猶是二尺四寸之全度。然既經裁減，則究非全帛，故謂之制幣也。然則純者廣長完全之正法，制者廣長裁減之別法。凡賓嘉禮必用其類，故用純帛取其全也。吉凶禮用幣，或焚或埋，備物而已，故用制幣，取其易共，義各有當也。至於民間買價，蓋亦純制兩有，然制雖減常度，亦自有差節，不能任意減省。《曲禮》謂祭祀之禮幣曰量幣。蓋祭祀用制幣，度雖不足，仍須中量。若《雜記》云「魯人之贈也，廣尺長終幅」，此則制幣之減省太甚者，正所謂不中量者矣。然則純贏制胸，二者不同，而皆爲布帛之準法，通於禮俗，故內宰出之，質人又壹之也。至《管子·君臣篇》云：「衡石一稱，斗斛一量，丈尺一綽制。」稱即指衡石，量即指斗斛，則綽制即指丈尺言可知。若《管子·輕重甲篇》云「纂組一純」。《戰國策·秦策》云「錦繡千純」，高注云：「純，束也。」《穆天子傳》云「錦組百純」，郭注云：「純，匹端名。」《說苑·善說篇》云「文織百純」。此與《管子》、《韓

子》、《淮南子》之制，並即布帛匹束之通名，與此經純制及《媒氏》純帛義，咸不相涉也。又案：依此注義，淳制爲布帛之專稱。通言之，布帛亦得稱度量，故幣曰量幣，《王制》云「布帛幅廣狹不中度量，不粥於市」是也。云「陰禮，婦人之祭禮」者，前先鄭注云「陰禮婦人之禮」，此據祭市社而言，故知爲婦人之祭禮。然外祭祀非后所與，或亦命內宰帥女祝以禮就祭之與？
中春，詔后帥外內命婦始蠶于北郊，以爲祭服。蠶于北郊，婦人以純陰爲尊。郊必有公桑蠶室焉。【疏】「中春」者，謂夏之中春也。

凡經言春夏秋冬者，並據夏時，詳《大司馬疏》。云「詔后帥外內命婦始蠶于北郊」者，此內宰詔后親桑之事。《說文·蠶部》云：「蠶，任絲蟲也。」引申之，凡蠶桑之事通謂之蠶。《月令》「季春，后妃齊戒，親東鄉躬桑。」注云：「后妃親桑，示帥先天下也。東鄉者，鄉時氣也。是明其不常留養蠶也。留養者，所卜夫人與世婦。」孔疏云：「按此經是季春躬桑，《內宰》云仲春者，以仲春既帥命婦躬桑浴種，至季春又更躬桑浴蠶也。故熊氏云：『案《馬質》注云「蠶爲龍精，月直大火則浴其種」，是二月浴種也。《祭義》云：「大昕之朝，奉種浴于川。」注云：「大昕，季春朔日。」是三月又

浴蠶也。」皇氏云：「二月浴之，三月乃躬。」其義非也。」詒讓案：此經親蠶以中春，與《月令》躬桑、《祭義》浴種時月並不同，熊安生據《馬質》注謂浴種有二月三月兩浴，賈疏及《詩·大雅·瞻卬》孔疏並從之。黃以周云：「蓋中春詔后始蠶，季春朔日乃入蠶室也。依《周官》中春始蠶，故鄭注《馬質》引《蠶書》二月浴種。依《戴記》季春始蠶，故注《祭義》以爲季春朔日浴種。此各據本書以爲言耳，似非重浴。」案：黃說與皇侃同，於理近是。《大戴禮記·夏小正》云「三月妾子始蠶」，亦蠶事盛於三月之證也。又《月令》云：「蠶事既登，分繭稱絲效功。」又《孟夏》云：「蠶事既畢，后妃獻繭，乃收繭稅。」注云：「后妃獻繭者，內命婦獻繭於后妃。收繭稅者，收於外命婦。」此經無夏獻繭及收繭稅之事，蓋文不具。又案：《夏小正傳》云：「先妾而後子，何也？曰：事有漸也，言事自卑者始。」若然，王女亦有蠶事，不徒命婦矣。云「以爲祭服」者，《月令》說親桑云「以共郊廟之服」是也。《穀梁》桓十四年傳云：「王后親蠶以供祭服。」《孟子·滕文公篇》云：「夫人蠶繅以爲衣服。」《詩·豳風·七月》毛傳云：「祭服，玄衣纁裳。」任大椿云：「經傳言祭服者，多據冕弁服。《內宰》、《祭義》祭服謂冕服也。《士喪禮》『祭服次，散衣次』，《喪大記》『小斂之

衣，祭服不倒」，謂爵弁、皮弁也。」賈疏云：「《禮記·祭義》亦云：『蠶事既畢，遂朱綠之，玄黃之，以爲祭服。』此亦當染之以爲祭服也。」注云「蠶于北郊，婦人以純陰爲尊者，于當作『於』」，注例複述經文亦不用古字。《祭統》云：「天子親耕於南郊，以共齊盛；王后蠶於北郊，以共純服。諸侯耕於東郊，亦以共齊盛；夫人蠶於北郊，以共冕服。」鄭彼注云：「東郊，少陽，諸侯象也。夫人不蠶於西郊，婦人禮少變也。」賈疏云：「鄭以諸侯爲少陽，是天子以純陽爲尊，則后蠶於北郊純陰爲尊也。」詒讓案：《月令》注說公桑繭稅，云「收以近郊之稅」，則北郊謂近郊五十里之內。孔疏謂公桑在國北近郊是也。惠士奇云：「《公羊》桓十四年何休注曰：『禮，天子親耕東田千畝，諸侯百畝，后夫人親西郊采桑，以共粢盛祭服。』《白虎通·耕桑篇》曰：『耕於東郊何？東方少陽，農事始起。桑於西郊何？西方少陰，女功所成。』漢儒之說，皆不合《周官》。」云「郊必有公桑蠶室焉」者，《祭統》云：「古者天子諸侯必有公桑蠶室，近川而爲之，築宮仞有三尺，棘牆而外閉之。及大昕之朝，君皮弁素積，卜三宮之夫人世婦之吉者，使人蠶于蠶室，奉種浴于川，桑于公桑，風戾以食之。」又案：《呂氏春秋·上農篇》云：「后妃率九嬪蠶於郊，桑於公田。」是公桑即公田所

種之桑，又於其處築養蠶之室，二者同在北郊也。歲終，

則會內人之稍食，稽其功事。內人，主謂九御。

【疏】「歲終」者，謂夏之季冬。鄭、賈以爲周季冬，非也。

詳《宰夫》疏。云「則會內人之稍食」者，此正內宮之歲會

也。稍食亦謂稟食。依鄭義，內人爲女御，稟食當視命士

之祿。依沈彤、江永說，爲女府史、女工、女奴等，則稟食當

視府史胥徒。此官皆總攷其歲會，亦內宮之官成也。云

「稽其功事」者，正內宮之官計也。上以婦職之法教九御，

云「展其功緒」，功事與功緒略同。彼隨時展省之，此歲終

又總稽攷其成功。《典絲》、《典臬》並云「歲終則各以其物

會之」，事略同也。賈疏云：「稽，計也。又當計女御絲臬

二者之功事，以知多少。」注云「內人主謂九御」者，前

注云：「九御，女御也。」《寺人》、《典婦功》注義同。《女御》

云「以歲時獻功事」，即此功事也。賈疏云：「按《典婦功》

「授嬪婦及內人女功之事齋」。嬪婦既是九嬪世婦，明內人

是九御也。」沈彤云：「內人謂女酒、女籩之等，而上及女

府、女史也。女御與九嬪、世婦皆爲內命婦，《內宰》注已言

之。且閭人於外內命婦出入爲之辟，而內人之出入無帥則

幾，是又其下於內命婦之微。」又云：「女給事自外而入役

宮中，其非刑女有家者，食當視在官庶人也。」江永亦云：

「此即《典婦功》之內人與《典絲》之內工，是宮中專治女功

者。」詒讓案：經言內人者凡六：此職云「會內人之稍食，

稽其功事」，一也；《內小臣》云「祭祀、賓客、喪紀，正內人

之禮事」，二也；《閭人》云「凡內人公器賓客，無帥則幾其

出入」，三也；《寺人》云「掌王之內人及女宮之戒令」，又云

「掌內人之禁令，凡內人弔臨于外則帥而往，立于其前而詔

相之」，四也；《內豎》云「若有祭祀、賓客、喪紀之事，則爲

內人蹕」，五也；《典婦功》云「授嬪婦及內人女功之事齋」，

六也。通校諸文，蓋內人所職甚廣，當上關女御，下兼女府

史及女酒、女籩、內工等。凡內宰會其稍食，稽其功緒，及

寺人掌其戒令禁令，典婦功授其事齋者，並通上下言之。

凡內小臣正其禮事，弔臨于外，寺人詔相之及內豎爲之蹕

者，則專指女御而言。若止屬女府史以下，何得與祭祀、賓

客、喪紀之禮事，且寺人爲之詔相，內豎爲之蹕乎？若閭

人幾其出入者，則又專指女府史以下而言，鄭及沈、江各舉

一偏爲釋，相兼乃備也。佐后而受獻功者，比其

小大與其麤良而賞罰之。獻功者，九御之屬。鄭

司農云：「烝而獻功。」玄謂《典婦功》曰：「及秋獻功。」

【疏】「佐后而受獻功者」者，賈疏云：「謂內宰佐后而受女御等獻絲枲之功布帛等。」云「比其小大與其羸良」者，《說文·鹿部》云：「羸，鹿超遠也。」《米部》云：「粗，疏也。」羸即粗之段字。賈疏云：「布帛之等縷小者則細良，縷大者則羸惡。今言羸不云惡，言良不云細者，互見爲義也。」案：依賈說則小大即羸良，經不宜複出，殆非也。竊謂此云比其小大與其羸良，即《典婦功》所謂辨其苦良比其小大也。小大者，凡枲布絲帛之功，羸疏者爲大功，精密者爲小功。《喪服》大功、小功注云：「大功布者，其鍛治之功羸沽之。」彼大小功，《賈子新書·六術篇》作「大紅細紅」，並專據布言之。《左·閔二年傳》云：「衛文公大布之衣，大帛之冠。」杜注云：「大布，羸布。大帛，厚繒。」則繒帛亦有小大，並其義也。但《喪服》注釋冠沽功爲羸功，云：「羸功，大功也。」賈說似隱據彼注，則與此經義不相當。蓋此經之羸，即《典枲》之苦功，先鄭謂即麻功，良即《典絲》之良功，先鄭謂即絲功是也。羸良者，別絲枲而比之；小大者，通絲枲而比之。以經證經，二事顯異。自後鄭《典絲》、《典枲》注不從先鄭說，賈氏此疏遂並小大羸良爲一，其誤甚矣。注云「獻功者，九御之屬」者，《女御》云「以歲時獻功事」是也。《典婦功》注云：「國中嬪婦所作，成即送之，

不須獻功時。」故此注亦專據內嬪婦爲釋。賈疏云：「上文云以婦職之法教九御，明所受獻功還是九御之屬可知。」鄭司農云「烝而獻功」者，《國語·魯語》：「公父文伯母曰：王后親織玄紞，公侯之夫人加之以紃紼，卿之內子爲大帶，命婦成祭服，列士之妻加之以朝服，自庶士以下皆衣其夫。社而賦事，烝而獻功，男女效績，愆則有辟，古之制也。」韋注云：「冬祭曰烝，烝而獻布帛之功也。」此即先鄭所本。凡烝祭以孟冬，則獻功亦在是月。《管子·輕重乙篇》云：「大冬營室中，女事紡織緝縷之所作也。」此之謂冬之秋。《詩·鄘風·定之方中》箋，謂營室中在小雪時，則正是孟冬，《管子》所言與《魯語》合，此蓋魯齊制，與此經不必同。姜兆錫謂此獻功，爲內工獻功於后，在歲終，即所謂烝而獻功；若外工獻功於典婦功，則在秋，其事異。姜蓋以此經冢上歲終爲文，先鄭意或當如是。廟享正祭雖不在季冬，而冬祭通得稱烝，則《國語》義與此經亦尚可通。唯典婦功秋獻功，實通內外工言之，姜謂專屬外工，究無塙證，未知果得先鄭意否耳。云「玄謂《典婦功》曰，及秋獻功」者，後鄭以後經有明文，故不從先鄭說也。賈疏云：「不從先鄭者，以其內宰佐后受，明是婦官所造，還是典婦功、女御等秋獻功也。」會內宮之財用。計夫人以下所用財。

【疏】「會內宮之財用」者，此遙蒙上歲終爲文，亦內宮之歲會官成也。

注云「計夫人以下所用財」者，明后之財用不會也。凡共三夫人、九嬪、世婦等之財用，亦當有常秩，與外官之祿相類。女御以下則有稍食。賈疏云：「以其云內宮，是總六宮之內所有財用皆會計之。」正歲，均其稍食，施其功事，憲禁令于王之北宮而糾其守。均猶調度也，施猶賦也。北宮，后之六宮。謂之北宮者，繫于王言之，明用王之禁令令之。守，宿衛者。【疏】

「正歲均其稍食，施其功事」者，賈疏云：「正歲謂建寅之月，歲始故摠均宮中所受稍食月俸之人，歲始又施其女功絲枲之事。」詒讓案：《國語·魯語》云「社而賦事」，則當在中春。彼外嬪婦於家受事，校內宮遲一月，亦不相遠也。

云「憲禁令于王之北宮，而糾其守」者，即《小宰》云「凡宮之糾禁」。彼又云：「乃退以宮刑憲禁于王宮。」注云：「憲謂表縣之。」但彼通掌王宮，此官則唯掌北宮。禁即《士師》之宮禁，此官與彼二官爲聯事也。賈疏云：「糾其守者，謂宿衛之子弟，糾其惰慢者也。」注云「均猶調度也」者，《大司馬》先鄭注云：「均，調也。」又《司稼》注云：「均謂度其多少。」此均其稍食，亦謂案其位之尊卑，功之勤惰，爲稍食

之多少，使之均調也。云「施猶賦也」者，此段借之義也。

《說文·旗部》云：「施，旗兒。」又《支部》云：「岐，敷也。讀與施同。」施即岐之借字。《管子·山權數篇》：「賦籍藏龜。」尹注云：「賦，敷也。」岐賦同訓敷，故施亦訓賦。《大戴禮記·曾子天圓篇》盧注云：「施，賦也。」賦功事猶《國語》云賦事矣。云「北宮，后之六宮」者，古者宮必南鄉，王

路寢在前，謂之南宮，《大戴禮記·盛德篇》云「待朝在南宮」是也。后六宮在王六寢之後，對南宮言之，謂之北宮。《左》襄十年傳云：「子國、子耳劫鄭伯以如北宮。」又哀十七年傳云：「衛侯薨于北宮。」是侯國後宮亦稱北宮也。賈

《內小臣》疏云：「對王六寢在南，以后六宮在北，故云北宮也。」云「謂之北宮者，繫于王言之，明用王之禁令令之」者，阮元云：「疏引注于作於，此非。」案：阮校是也。此釋經云王之北宮，明后雖自主六宮，仍統於王也。后宮所憲之禁令，即小宰所建之宮刑，亦士師五禁之一，故云用王之禁令令之。云「守，宿衛者」者，《大司寇》「軍刑上命糾守」，注

云：「守，不失部伍。」此宮官糾守，亦謂糾察宿衛吏民，使不失部伍也。賈疏云：「謂若宮伯所掌士庶子者也。」上

春，詔王后帥六宮之人而生種桂之種，而獻

之于王。六宮之人，夫人以下分居后之六宮者。古者使后宮藏種，以其有傳類番孳之祥。必生而獻之，示能育之，使不傷敗，且以佐王耕事共締郊也。鄭司農云：「先種後孰謂之種，後種先孰謂之陸，王當以耕種于藉田。」玄謂《詩》云「黍稷種陸」是也。夫人以下分居后之六宮者，每宮九嬪一人，世婦三人，女御九人；其餘九嬪三人，世婦九人，女御二十七人，從后唯其所燕息焉。從后者五日而沐浴，其次又上十五日而徧云。夫人如三公，從容論婦禮。

【疏】「上春」者，《天府》注云：「上春，孟春也。」注云

「六宮之人，夫人以下分居后之六宮者」者，明此六宮之人通咳衆嬪御，與上文以陰禮教六宮專指后一人者異也。云「古者使后宮藏種，以其有傳類番孳之祥」者，番，蕃之省，明放岳本及注疏本並作「蕃」，與《釋文》不合。《釋文》又云：「孳，本又作滋。」案：孳滋聲義同。謂皆取生育之義象類同也。云「必生而獻之，示能育之，使不傷敗」者，生者謂不朽鬱，即舍人所縣以共獻者也，此亦取生育不傷之義。云「且以佐王耕事」者，謂佐王孟春躬耕帝藉之事也。詳《甸師》疏。云「共締郊也」者，《國語·魯語》云「天子日人監九御，使潔奉締郊之粢盛」；又《楚語》云「天子郊締之事，王后必自舂其粢」是也。賈疏云：「締謂祭廟，郊謂祀

天，舉尊言之，其實山川社稷等皆用之也。」鄭司農云「先種後孰謂之種，後種先孰謂之陸」者，《釋文》云：「種，本或作重。案如字書禾旁作重，是種陸之字。作童，是種殖之字。今俗則反之。陸，本又作穆。」案：陸說是也。《說文·禾部》云：「種，先種後孰也，从禾重聲。陸，疾孰也，从禾耂聲。《詩》曰「黍稷種陸」。重文穆，陸或从麥。種，孰也，从禾童聲。」經注種陸字，正字當作種。經之種，①注藏種，先種、後種、耕種字，正字當作種。種陸字，此及《舍人》、《司稼》凡三見，及《籩人》注種麥字，並作種，陸所謂俗反互易也。《釋文》「或本作重」，即種之省；陸作穆則或體也。《管子·地員篇》云：「羣土之長，是惟五粟，其種大重、細重，白莖白秀。五壩之土，其種大穆杞、細穆杞，黑莖黑秀。」《呂氏春秋·任地篇》云：「種陸禾不為陸，種重禾不為重，是以粟少而失功。」高注亦云：「晚種早孰為陸，早種晚孰為重。」《續漢書·禮儀志》劉注引賀循云：「陸，早也。種，晚也。」又引干寶《周禮注》云：「種，晚秔稻之屬。陸，陵穀，黍稷之屬。」今案：據《管子》、《呂》書說，則種陸者蓋衆穀之通名，黍稷稻粱麥並有此先種後孰、後種先孰之異種

①「種」，疑當作「種」。

也。賀循說種早種晚，專據孰時言之，與《毛詩·七月》傳說同。干注謂種稷有原隰之異，漢以前絕無此說，不知令升果何所據也。云「王當以耕種于藉田」者，于注例亦當作「於」，各本竝誤。謂后獻種在王耕藉之先，王受此種稷之種，乃以耕種於王藉也。《月令》耕藉在孟春，與此后獻種同月。藉田亦詳《甸師》疏。云「玄謂《詩》云黍稷種稷是也」者，《豳風·七月》、《魯頌·閟宮》並有此文。「種稷」《毛詩》並作「重稷」。毛傳云：「後孰曰重，先孰曰稷。」《詩釋文》云：「本又作種稷。」《說文·禾部》引《詩》同。《呂氏春秋·任地篇》，高注引《詩》作「重稷」，字並小異。賈疏云：「此增成先鄭義，亦以其先鄭直云先種後種，不見穀名，後鄭意黍稷皆有種稷。」云「夫人以下分居后之六宮者，每宮九嬪一人，世婦三人，女御九人，其餘九嬪三人，世婦九人，女御二十七人，從后唯其所燕息焉」者，賈疏云：「此以下亦是增成先鄭義。所分居者唯據九嬪以下，三夫人不分居，亦得爲三夫人以下也。每宮九嬪一人者，九嬪九人，六宮各一人，則三人在也。世婦二十七人，六宮每宮三人，則九人在也。女御八十一人，六宮各九人，餘二十七人在也。其餘謂不分者，故云其餘九嬪三人，世婦九人，女御二十七人也。后不專居一宮，須往即停，故云唯其燕息

焉。」金鶚云：「王后六宮，一正寢，五小寢。六宮兼正寢而言，正寢非居息之所也。九嬪、世婦、女御或分居，或随后，一宮十三人已不能容，若王后至其宮，又加四十人，何以容之乎？」案：金說是也。此經九嬪、世婦、女御，《敘官》並不言數，又不見三夫人，固不可援《昏義》內官百二十人之說以定其居。又后六宮，正寢爲聽內治及齋居之宮，金謂非居息之所，亦至當不易。《匠人》九嬪所居之九室，乃內宮之朝治事處，非宮人居息之所。竊謂六宮除正寢及燕寢中宮爲后自居外，餘四宮爲嬪御所居。其旁尚有側室，則內官之爵秩較卑者居之。諸侯三宮，夫人亦自居二宮，餘一宮及側室，爲嬪御所居。《公羊》僖二十年何注說三寢云：「夫人居中宮，少在前，右媵居西宮，左媵居東宮，少在後。」皆不足據也。以經攷之，后雖有六寢，內官所居者則唯在五小寢，經通言之云六宮之人耳。互詳《敘官》、《九嬪》疏。又案：后夫人寢數，或六或三，等殺有定；而側室之數，則多少無定，取足容居處而已。其室蓋在后燕寢之旁，后生子亦就之，故《內則》注云「凡子生皆就側室」，即通王后以下言也。《大戴禮記·保傳篇》云：「青史氏之《記》曰：古者胎教，王后腹之，七月而就宴室。」盧注云：「宴室，郊室，次宴寢也，亦曰側室。」案：宴燕字通，盧謂即側

室是也。其云邾室者，邾，夾之誤。《內則》云：「妻將生子及月辰，居側室。」注云：「側室謂夾之室，次燕寢也。」此卽盧所本。然古書無以夾室爲側室者，宋本《內則》注夾作「夫」，於義較長。盧所據本蓋已譌作夾，故又譌爲邾，殆不足馮也。賈《宮人》疏謂側室卽爲燕寢之一，亦誤。云「從后者五日而沐浴」者，謂五日則退居宮休沐也。《內則》云：「五日則燂湯請浴，三日具沐。」是沐浴以五日爲期也。云「其次又上十五日而徧云」者，賈疏云：「鄉所分居六宮，九嬪以下皆三分之一，一分從后，兩分居宮。假令月一日一分從后，至月五日，從后者五日滿，則右邊三宮之中舊居宮者，來替此從后者，從后者又來入右邊三宮；從后者至十日又滿，則左邊三宮者來替此從后者，從后者來居左邊三宮；又至十五日，則三番總遍，故云十五日而徧。」云「夫人如三公，從容論婦禮」者，《敍官》注義同。婦禮卽上文陰禮是也。賈疏云：「王后六宮，夫人有三，分居不遍，因卽尊之。三公坐與王論道，三夫人尊卑與三公同。三公侍王，三夫人亦侍后，故取以證三夫人不分居宮之義也。」

周禮正義卷十四

內小臣掌王后之命，正其服位。命謂使令

所爲。或言王后，或言后，通耳。【疏】「掌王后之命，正其服位」者，賈疏云：「《敍官》云：『奄上士四人。』案：《夏官·大僕》云『掌正王之服位，出入王之大命』，則大僕掌王命及服位；此《小臣》亦云『掌王后之命，正其服位』，則小臣侍后與大僕侍王同也。」詒讓案：大僕屬官又有小臣，掌王之小命，此內小臣職掌與小臣相當。后宮事少，故不設內大僕，則不問大命小命，皆內小臣掌之也。正服位者，從內宰也。大僕掌王視治朝之位，則后視內宮之朝，內小臣亦當掌其位。《毛詩·衛風·碩人》傳云：「君聽朝于路寢，夫人視內事于正寢。」亦相擬也。正后服位，互詳《內宰》疏。注云「命謂使令所爲」者，《說文·口部》云：「命，使也。」《內則》注云：「命謂使令。」謂后於宮內外有所使令及所求爲，皆掌其事也。云「或言王后，或言后，通耳」者，賈疏云：「以此經及上經皆云王后，下文則皆云后，鄭

恐人以爲別有義意，故云通耳，無義例也。」后出入，則前驅。道之。【疏】「后出入則前驅」者，后乘車出入，此官爲之前驅而道，亦猶大僕王出入則自左馭而前驅，小臣王之燕出人則前驅也。注云「道之」者，《漢書·溝洫志》顏注云：「道，引也。」謂前驅爲道引也。若有祭祀、

賓客、喪紀，則擯，詔后之禮事，相九嬪之禮事，正內人之禮事，徹后之俎。擯，爲后傳辭，有所求爲。詔、相、正者，異尊卑也。俎，謂后受尸之爵，飲于房中之俎。【疏】「若有祭祀、賓客、喪紀，則擯」者，賈疏云：「此三者后皆有事，九嬪以下從后往也。三事皆與后爲擯贊也。」云「詔后之禮事」者，猶大僕祭祀、賓客、喪紀詔王灋儀，小臣詔相王之小灋儀也。《內宰》云：「大祭祀，正后之服位而詔其禮樂之儀。」《春官·世婦》云：「祭祀詔王后之禮事，大賓客之饗食亦如之。大喪及王后有操事於婦人則詔相。」此官蓋從內宰詔相王后，而與世婦爲官聯也。云「相九嬪之禮事，正內人之禮事」者，此兼爲內命婦相禮也。內人亦謂女御，詳《內宰》疏。《內宰》云「贊九嬪之禮事」，《春官·世婦》云「相外內宗之禮事」，此官亦從內宰而與世婦爲官聯也。云「徹后之俎」者，賈疏云：「謂后於東

房中受尸酢之俎，內小臣徹之。」

注云「擯，爲后傳辭，

有所求爲」者，賈疏云：「后爲上三事須物，則小臣擯贊而傳辭，與諸司求物，供所爲也。」詒讓案：《說文·人部》云：「擯，導也。重文擯，或从手。」凡《禮經》言擯，或接賓，

或詔禮，皆取導引贊侑之義。此擯當亦爲導贊，鄭謂傳辭，

義亦同。而云有所求爲者，蓋以下文別云詔禮，則此擯非禮事可知，故意其傳辭，實因有所求爲也。互詳《大宗伯》

疏。云「詔、相、正者，異尊卑也」者，明三者文異，事則一也。賈疏云：「后尊云詔，詔告而已；九嬪稍卑則言相，

相，佐助之言也；女御卑，直正之而已。」云「俎謂后受尸之爵，飲于房中之俎」者，于，注例當作「於」。賈疏云：「天子

諸侯祭禮亡。案《特牲》，薦俎，乃受尸之酢，次主婦醑尸，尸酢主婦於東房中，受尸之酢亦有薦俎。后之俎，小臣所

徹，亦約與士禮主婦之俎同也。」后有好事于四方，則使往；有好令於卿大夫，則亦如之。后於

其族親所善者，使往問遺之。【疏】「后有好事于四方，則使往」者，好事，恩澤之事，與《大宰》「好用」、《內饗》「好賜」

義略同。四方與《內府》「使適四方」義同，並謂畿內諸侯也。云「有好令於卿大夫，則亦如之」者，於，經例當作

「于」，石經及各本並誤。好令，亦恩澤之命，令此官爲傳之。此猶大僕掌三公孤卿之弔勞，小臣掌士大夫之弔勞也。此四方諸侯云好事，卿大夫云好令者，亦互文見義。賈疏謂：「后雖無正令施與卿大夫，時有言教至焉，故云令；后於畿外全無言教所及，故云事。」未塙。注云

「后於其族親所善者，使往問遺之」者，《詩·鄭風·遵大路》箋云：「好猶善也。」賈疏云：「后有族親在四方，謂畿外諸侯於王有親，謂若魯衛晉鄭之等也。於卿大夫，亦謂同姓族在朝廷者也。王后意行所善，遣小臣往，以物問遺之。」案：注云其族親所善，當亦指后已族黨及昏嫔之親

言，非專謂王族也。賈謂若魯衛晉鄭，未咳。掌王之陰事陰令。陰事，羣妃御見之事。若今掖庭令晝漏不盡

八刻，白錄所記，推當御見者。陰令，王所求爲於北宮。

【疏】「掌王之陰事陰令」者，《昏義》云：「天子理陽道，后治陰德。」鄭注云：「陰德謂主陰事、陰令也。」然則陰事陰

令，內小臣掌之，王后治之矣。注云「陰事，羣妃御見之事」者，《敍官》注云：「御猶進也，侍也。」以是婦人之事，

故謂之陰事，與《內宰》「陰禮」義同。賈疏云：「謂若《九嬪職》後鄭所云者是也。」云「若今掖庭令晝漏不盡八刻，白錄

所記，推當御見者」者，《續漢書·百官志》：「掖庭令一人，六百石，宦者，掌後宮貴人、采女事。」《漢舊儀》云：「掖庭令晝漏未盡八刻，廬監以茵次上婕妤以下至後庭，訪白錄所，推當御見。」案：《漢儀》「訪白錄所」當作「白錄所記」，謂錄次所記宮人之名籍，此注與彼正同也。鄭以此內小臣亦掌羣妃御見之事，故以漢法爲況。云「陰令，王所求爲於北宮」者，亦以王令婦人之事，故謂之陰令。賈疏云：「謂若縫人、女御爲王裁縫衣裳及絲枲織紵之等，皆是王之所求索、王之所造爲者也。」案：北宮，詳《內宰》疏。

閹人掌守王宮之中門之禁，中門，於外內爲

中，若今宮闕門。鄭司農云：「王有五門，外曰皋門，二曰雉門，三曰庫門，四曰應門，五曰路門。路門一曰畢門。」玄謂雉門，三門也。《春秋傳》曰：「雉門災，及兩觀。」【疏】「掌守王宮之中門之禁」者，《士師》五禁有宮禁，此其一端，亦與彼官爲聯也。注云「中門，於外內爲中」者，鄭意

中門卽雉門，在外二門之內，內二門之外，於五門爲第三也。《司儀》諸公臣相爲國客，云「出，及中門之外，問君，客再拜對」，與《聘禮》「公出，及大門內，問君，賓對」文同。又

《左》昭二十五年傳，說臧氏逐臧會，執諸季氏中門之外，平子怒曰：「何故以兵入吾門。」是諸侯三門，大夫二門，中門皆在外門內，則天子中門亦必在外門內矣。但此經中門之禁，當兼庫、雉、應三門言之，詳後。云「若今宮闕門」者，《續漢書·百官志》劉注引《漢官秩》云：「平城門爲宮門。」《水經·穀水注》引洛陽故宮名，有朱雀闕、白虎闕、蒼龍闕、北闕、南宮闕也。是東漢時宮門並有闕。鄭以周雉門爲王宮中門，亦有闕，與漢制同，故舉以爲況。鄭司農云「王有五門，外曰皋門，二曰雉門，三曰庫門，四曰應門，五曰路門」者，《朝士》先鄭注同。賈疏云：「司農庫門在雉門內，爲中門。」詒讓案：天子五門，此經唯《師氏》、《司士》、《匠人》有路門、應門，其皋門、庫門見《詩》及《禮記》，雉門見《春秋經》及《禮記》，並詳後。《毛詩·大雅·緜》傳云：「王之郭門曰皋門。」依毛說則皋門非王之宮門，與《明堂位》說不合，先鄭所不從也。其五門名義，《玉海·宮室》引《三禮義宗》云：「天子宮門有五，法五行，曰皋門，曰庫門，曰雉門，曰應門，曰路門。皋門者，王宮之外門，皋之爲言高也，謂其制高顯也。庫門因其近庫，卽以爲名也。雉門，雉，施也，其上有觀闕以藏法，故以施布政教爲名也。應門，謂應接諸侯羣臣，常在此門之內也。路門，路寢之門也。」

案：崔以五門雉門在庫門內，則依後鄭說，與先鄭異，亦詳後。云「路門一曰畢門」者，《書·顧命》云：「二人雀弁執惠立于畢門之內。」僞孔傳云：「路寢門，一名畢門。」即本先鄭說。孔疏云：「下云王出在應門之內，出畢門始至應門之內，知畢門即是路寢之門，一曰畢門也。」賈疏云：「言路門者，路，大也。人君所居皆曰路，以大爲名。言畢門者，從外而入路門爲終畢。」云「玄謂雉門，三門也」者，賈疏云：「破先鄭雉門爲二門。必知雉門爲中門者，凡平諸侯三門，有皋、應、路，《詩》云『乃立皋門，皋門有亢。乃立應門，應門將將』者是也。若魯三門則有庫、雉、路，故《明堂位》說魯制二兼四，云『庫門，天子皋門』，則庫門向外兼皋門矣。又云『雉門，天子應門』，則雉門向內兼應門矣。既言庫門向外兼皋門，雉門向內兼應門，則天子五門庫門在雉門外明矣。」案：賈據《朝士》注及《詩·大雅·緜》箋義也。後鄭說天子門數亦同先鄭，惟以雉門第三，庫門在其外，與先鄭異，故《朝士》注云：「《明堂位》說魯公宮曰：『庫門，天子皋門；雉門，天子應門。』言魯用天子之禮，所名曰庫門者，如天子皋門；所名曰雉門者，如天子應門。此名制二兼四，則魯無皋門應門矣。」《檀弓》曰：「魯莊公之喪，既葬而經不入庫門。」言其除喪而反，由外來，是庫門

在雉門外必矣。如是王五門，雉門爲中門。」是鄭據彼二文，故知雉門當爲三門也。今攷天子五門之次，後鄭此說塙不可易。《明堂位》說魯制以庫門當天子皋門，雉門當天子應門。皋門於五門爲最在外，古無異說，則庫門必在雉門外可知。魯庫門既在雉門外，則天子庫門必不在雉門內又可知。先鄭說與《明堂位》亦不合，宜後鄭之不從也。其諸侯三門之制，則當從劉敞說，有庫雉而無皋應，魯與凡諸侯並同。《朝士》注及《詩箋》並謂諸侯有皋應而無庫雉，非也，詳《朝士》疏。《明堂位》雖以庫雉二門爲魯制，當天子之皋應，實則天子五門兼有庫雉，非天子有皋門無庫門、有應門無雉門也。孔廣森云：「《郊特牲》記王之郊也，獻命庫門之內。《周書·作雒》亦有應門庫臺。」案：孔說是也。《郊特牲》正據天子郊禮言之，故上有「卜之日王立於澤」之文，《作雒》亦據雒邑之制。《御覽·禮儀部》引《周書》逸文，說明堂制亦有庫門、雉門，其說雖與《匠人》不合，然可證天子本有庫雉二門，二鄭之義，不可易也。至此經之中門，先鄭謂是庫門，後鄭謂是雉門，並據第三門言之。今攷五門之次，以雉門爲三門，當依後鄭說爲正。然此中門實不專屬雉門，當兼庫雉應三門言之。蓋五門以路門爲內門，皋門爲外門，餘三門處內外之間，故通謂之中門，猶之

治朝與三詢之朝，對燕朝言之，通稱外朝也。《司儀》之中門，據侯國制止三門，則中門自專屬雉門，與此小異。《敍官》賈疏又載或說，謂王宮四面皆有中門，其說殊謬。竊謂天子五門，本皆有閭人，此獨言掌守中門之禁，以皋門內之外朝，三詢觀法之地，嘉石肺石所在，萬民皆得出入，其守禁較寬；又有師氏同守之，非閭人所專司。唯庫門以內三門，廟社府庫及官府次舍羅列其間，地居要近，閭人專掌其守禁，故經特舉中門言之，非謂中門之外，遂非閭人所守也。金鶚云：「《閭人》『王宮每門四人』，是外門亦有守也。但中門之禁較嚴，故特言中門，非謂外門無禁也。」案：金說是也。《檀弓》記曾子與子貢弔於季氏，閭人弗內，二子入於其廡而修容焉。蓋季氏大夫二門，亦各有閭人守之。閭人弗內者，不得入中門也。入廡修容者，已得入大門也。《郊特牲》「庫門」注云：「庫或爲廡。」是廡庫同處，天子諸侯庫門所由得名，大夫則在大門內也。此雖非王侯制，然可證中門門禁嚴於外門，閭人所譏察尤謹於是矣。引《春秋傳》曰「雉門災及兩觀」者，賈疏云：「定公二年：『夏五月壬辰，雉門及兩觀災。』《公羊傳》曰：『曷爲不言雉門災及兩觀？主災者兩觀也。主災者兩觀則曷爲後言之？不以微及大也。』今鄭所引不與彼傳同者，鄭勣傳非彼正文

也。引之者，證魯有三門，雉門有兩觀爲中門，則知天子五門，雉門亦爲中門有兩觀矣。」詒讓案：鄭正據《公羊》文，故不引《春秋經》也。《穀梁傳》亦云：「其不曰雉門災及兩觀，何也？災自雉門始也。」後鄭推魯禮以合天子，謂王五門亦雉門設兩觀。《玉海》引崔氏《義宗》及賈疏說並同。孔廣森云：「《明堂位》曰：『庫門，天子皋門；雉門，天子應門。』《春秋經》書雉門及兩觀災。魯之兩觀於雉，知王之兩觀當於應。」案：孔說是也。戴震、焦循說同。天子五門惟應門爲正門，故特設兩觀，其餘四門並爲臺門一觀。魯無應門，故於雉門設兩觀，此魯禮不可以概天子之制也。互詳《大宰》疏。喪服、凶器不入宮，潛服、賊器不入宮，奇服怪民不入宮。喪服，衰經也。凶器，明器也。潛服，若衷甲者。賊器，盜賊之任器。兵物皆有刻識。奇服，衣非常。《春秋傳》曰：「虜奇無常，怪民狂易。」【疏】「喪服凶器不入宮」者，以下宮門糾禁之事，即《士師》之宮禁也。金鶚云：「自皋門以內，即是王宮。曰不入宮，則外門有守明矣。中門惟臣得人，凡民皆不得入，非特喪服、凶器等不得人也。」注云「喪服，衰經也」者，賈疏云：「案《下曲禮》云：『苞屨扱衽厭冠不入公門。』苞屨謂

杖齊衰。扱衽，斬衰初死服。厭冠，總小功冠。《檀弓》云：「士唯公門說齊衰。」《服問》注云：「大功免經。」鄭云衰經，義出於彼也。《曲禮》孔疏云：「此云「苞屨扱衽不入公門」。《服問》云：「唯公門有稅齊衰。」注云：「不杖齊衰也。於公門有免齊衰，則大功有免經也。」如鄭之言，五服入公門與否，各有差降。熊氏云：「父之喪，唯扱上衽，不入公門，冠經衰屨皆得入也。杖齊衰，則屨不得入；不杖齊衰，衰又不得入；其大功，經又不得入；其小功以下，冠又不得入。此厭冠者，謂小功以下之冠，故云不入公門。凡喪冠皆厭，大功以上厭冠，宜得入公門也。」案：據鄭、孔說，則喪服不得入公門者，以五服輕重為差，輕者不得入，重仍得入者，蓋君以事召之往朝，則服重者得喪服入公門。其非入朝時，仍不得入，故此經槩云「喪服不入宮也」。《白虎通義·喪服篇》云：「凶服不敢入公門者，明尊朝廷，吉凶不相干，故《周官》曰：「凶服不入公門。」即約此文。云「凶器，明器也」者，《家人》注同。《曲禮》云：「書方衰凶器不以告，不入公門。」鄭彼注云：「此謂喪在內，不得不入，當先告君耳。凶器，明器也。」賈疏云：「案《士喪禮》，主人所造曰明器，賓客所致曰就器。此經凶器亦應兼有就器，而云凶器明器者，以主人明器為主也。」案明器，詳《宰夫》

疏。云「潛服，若衷甲者」者，《廣雅·釋器》云：「潛，隱也。」《左》哀六年傳「潛師閉塗」。杜注云：「潛師，密發也。」《逸周書·文政篇》云「同惡潛謀」，孔注云：「潛謀，潛密之謀也。」此潛服亦謂姦人隱密而襲戎服者。《左》襄二十七年傳云：「將盟于宋西門之外，楚人衷甲。」杜注云「甲在衣中」是也。云「賊器，盜賊之任器」者，《司厲》云：「掌盜賊之任器、貨賄。」先鄭注云「任器謂盜賊所用傷人兵器」是也。云「兵物皆有刻識」者，謂有刻識文字可辨切。《說文》說秦八體有殳書，即刻識兵器之書也。賈疏云：「案定十年，侯犯以郈叛，叔孫氏之甲有物是也。」云「奇服，衣非常」者，《說文·大部》云：「奇，異也。」《淮南子·脩務訓》高注云：「非常曰奇。」《六韜·上賢篇》云：「奇其冠帶，偉其衣服，此姦人也。」《荀子·非相篇》云「奇衣婦飾」，楊注云：「奇衣，珍異之衣。」引《春秋傳》曰「龍奇無常」者，《左》閔二年傳，晉侯使太子申生伐東山臯落氏，衣之偏衣，佩之金玦。罕夷曰：「龍奇無常，金玦不復。」杜注云：「偏衣，左右異色，其半似公服。」① 龍，裸色。裸色奇怪非常之服。」引之者，證奇服即非常之服也。云「怪民狂易」者，《漢

① 「似」原訛「是」，據《左傳》杜注改。

書·王子侯表》「樂平侯訴病狂易免」。^①顏注云：「病狂而改易其本性也。」又《五行志》：成帝綏和二年，男子王褒入北司馬門殿東門，上前殿，人非常室中，收縛考問，病狂易不自知入官狀。案《說文·疒部》云：「瘍，脈瘍也。」狂易字當爲瘍之段借。《釋文》云：「易，徐音陽。」依徐音則當爲「易」字，蓋易之形誤。凡內人、公器、賓客，無帥則幾其出入。三者之出入，當須使者符節乃行。

鄭司農云：「公器，將持公家器出入者。幾謂無將帥引之者，則苛其出入。」【疏】「凡內人」者，謂女府史以下，詳《內宰》疏。注云「三者之出入，當須使者符節乃行」者，

《九嬪》注云：「帥猶道也。」使者謂道引之人，若《寺人》「掌內人及女宮，相道其出入之事」，《內豎》「爲內人蹕」，即內人之帥。《掌訝》「國賓客至，爲前驅，凡從者出，則使人道之」，即賓客之帥。其公器亦各有司帥之也。鄭知又有符節者，以《掌節》云「門闕用符節」，注云：「符節者，如今宮中諸官詔符也。」^②蓋此三者本於宮門出入無禁者，亦必有帥道符節乃得行，防姦盜也。鄭司農云「公器，將持公家器出入者」者，《牛人》「公牛」注云：「公猶官也。」彼職又云「公任器」，亦即此公器也。云「幾謂無將帥引之者，則苛其

出入」者，《釋文》云：「苛，本又作呵。」案：將帥引之者，謂使人道引之出入，無則幾之也。苛者詞之段字，呵即訶之俗，亦即《宮正》注所謂「幾荷」也，詳彼疏。以時啓閉。

時，漏盡。【疏】「以時啓閉」者，司宮中諸門之啓閉，猶司門掌授管鍵以啓閉國門也。注云「時，漏盡」者，謂宮

門夜漏盡則啓，晝漏盡則閉也。《儀禮經傳通解》引《尚書大傳》云：「雞鳴，太師奏雞鳴於陛下，然後夫人鳴佩玉於房中，告去也；然後應門擊柝，告辟也；然後少師奏質明於陛下。」鄭注云：「辟，啓也。」然則王宮啓門在質明之前矣。賈疏云：「漏盡者，謂若夏至，晝則日見之漏六十刻，夜則四十刻。冬至晝則日見漏四十刻，夜則六十刻。就時

之間，大判九日校一刻。」凡外內命夫命婦出入，則爲之闢。辟行人，使無干也。內命夫，卿大夫士之在宮中者。【疏】「凡外內命夫命婦出入，則爲之闢」者，《釋文》

云：「闢，本又作辟。」案：闢辟聲類同，字亦通，然經當本與注同作「辟」，《釋文》所載或本是也。凡此經辟人字並作

① 「狂」原脫，據《漢書》補。

② 「官」原訛「官」，據《掌節》注改。

辟。《大司寇》「凡邦之大事使其屬蹕」，注云：「故書蹕作避。杜子春云：避當爲辟，謂辟除姦人也。」蓋杜、鄭校定字例如是。若此經故書作闕，杜、鄭不宜無說，足證其誤。互詳《大司寇》疏。

注云「辟行人使無干也」者，《釋文》云：「辟，避也。」案：《說文·辟部》云：「辟，法也。」《干部》云：「干，犯也。」此謂辟除行人，使無干犯而已，不止行也。凡經辟人字，《大司寇》杜注，《小司寇》先鄭注並訓爲辟除，即辟法引申之義，後鄭義亦當同。陸訓爲避，義雖得通，而非杜、鄭之旨，亦詳《大司寇》疏。云「內命夫，卿大夫士之在宮中者」者，賈疏云：「謂若宮正所掌者也，對在朝卿大夫士爲外命夫。鄭雖不解外內命婦，其外命婦則摠外內命夫之妻，內命婦即三夫人已下也。」案：賈說是也。《肆師》：「大喪禁外內命男女之衰不中灋者。」注云：「外命男，六鄉以出也。內命男，朝廷卿大夫士也。」彼內命男統朝廷卿大夫士，此內命夫注云「在宮中」，則餘朝廷卿大夫士並爲外命夫。與彼不同者，六鄉以出外命夫，不常在宮中，閭人不當爲辟，故知自以在宮對朝廷爲外內也。外內命婦，詳《內宰》疏。掌埽門庭。門庭，門相當之地。

【疏】「掌埽門庭」者，通掌五門之庭凡埽除之事。《宮人》云「凡寢中之事埽除」則王路寢以內之埽除，宮人掌之。此

官掌寢外五門門庭之埽除，與彼爲官聯也。

注云「門

庭，門相當之地」者，門外雷以外相當之地也。《說文·广部》云：「庭，宮中也。」又《爿部》云：「廷，朝中也。」王五門，唯路門內燕朝爲庭，以外諸門庭皆無屋，字當爲廷。作庭者，假借字也。凡五門，路門、庫門外並爲朝廷。應門、雉門、皋門外，雖不爲朝，而皆有廷。其廟門闕門外亦然。蓋每門門廡所覆地謂之門基，基以外皆門廷也。賈疏謂「閭人掌中門，則門相當之地，唯中門外之地，若餘門庭則各有守門者埽之」，非也。凡五門門廷，其表蓋皆百步，詳《匠人》疏。大祭祀、喪紀之事，設門燎，蹕宮門、廟門，燎，地燭也。蹕，止行者。廟在中門之外。

【疏】「大祭祀、喪紀之事，設門燎，蹕宮門、廟門」者，大祭祀在宮中者，唯有宗廟六享及大社是也。喪紀亦冢「大」爲文。《宰夫》注云：「大喪，王、后、世子也。」賈疏云：「大喪以下朝廟及出葬之時，宮中及廟門皆設門燎，蹕止行人也。」注云「燎，地燭也」者，謂樹地之大燭，非人所執者也。

《說文·火部》云：「燭，庭燎大燭也。」《士喪禮》注云：「燭，樵也。火在地曰燎，執之曰燭。」《燕禮》：「甸人執大燭於庭，閭人爲大燭於門外。」彼諸侯禮。此經天子祭

祀、喪紀，閭人亦設門燎，門燎即大燭也。《司烜氏》：「凡邦之大事，共墳燭庭燎。」注云：「樹於門外曰大燭，於門內曰庭燎，皆所以照衆爲明。」此燭在門外曰門燎，彼門外曰大燭，門內曰庭燎者，燭爲大名，蓋人執者不得稱燎，在地者得通稱燭也。門燎之制當與庭燎同，而數較少，詳《司烜氏》疏。云「蹕，止行者」者，《師氏》、《大司寇》注義並同。又《隸僕》先鄭注云：「蹕謂止行者，清道，若今時儆蹕。」段玉裁云：「《說文·走部》：「蹕，止行也。」《足部》無蹕字。今《周禮》皆作蹕，惟《大司寇釋文》作蹕。」詒讓案：蹕者，清道，禁止人不得行。辟者，禁人干犯，不干犯者仍得行。二字義異，互詳《大司寇》疏。云「廟在中門之外」者，鄭謂中門即雉門。《小宗伯》云「左宗廟，右社稷」，注云「庫門內雉門外之左右」是也。今案：廟當在應門內路門外之左右，鄭說非是，詳彼疏。凡賓客亦如之。【疏】「凡賓客亦如之」者，賈疏云：「賓客在宮中廟，謂若饗食在廟，燕在寢，皆爲設門燎及蹕止行人。」

寺人掌王之內人及女宮之戒令，相道其出入之事而糾之。內人，女御也。女宮，刑女之

在宮中者。糾猶割察也。【疏】「相道其出入之事而糾之」者，道，唐石經作「導」。《說文·寸部》云：「導，導引也。」導正字，道段借字。《訝士》、《掌訝》二職道字，石經亦皆作導。宋本並作道，與《釋文》合，今從之。相道謂詔相帥道之。糾謂察其不從戒令者。注云「內人，女御也」者，

《內宰》注云：「內人，主謂九御。」女御即九御也，詳彼疏。《典婦功》先鄭注義亦同。云「女宮，刑女之在宮中者」者，《春官·世婦》注義同。賈疏云：「謂男女没入縣官爲奴者。」王昭禹云：「女宮若女奚之類是也。」沈彤云：「女宮即奚也。《序官》酒人奚在女酒下，注以奚爲宦女。《禁暴氏》奚與隸並稱，注以奚爲女奴。女奴即《司厲》入春槩之女子，宦女即《掌戮》守內之宮者。是二者即在宮刑女，故知女宮爲奚也。」案：王、沈說是也。云「糾猶割察也」者，《小宰》注義同。若有喪紀、賓客、祭祀之事，則帥女宮而致於有司，有司謂宮卿世婦。【疏】「則帥女宮而致於有司」者，於，經例當作「于」，石經及各本並誤。注云「有司謂宮卿世婦」者，賈疏云：「案《春官·宮卿世婦》云：「掌女宮之宿戒，及祭祀，比其具。」此既言致於有司，明是男子官宮卿所掌女宮也，非是下文世婦之帥女

官者也。」論讓案：經言有司，容有它官得役女官，若內宰及內外宗之屬皆是，不徒世婦也。春官世婦與天官世婦，內外異而職掌同，此有司不當專指宮卿言之，鄭說未咳。

佐世婦治禮事。世婦，二十七世婦。【疏】注云「世

婦，二十七世婦」者，賈疏云：「上云有司是宮卿世婦，恐此亦是彼世婦，故云二十七世婦。以寺人是奄者，故得佐世婦治禮事。禮事卽世婦所掌祭祀、賓客、喪紀之事是也。」

案：此亦當兼有宮卿世婦，鄭、賈說亦未咳。掌內人之

禁令，凡內人弔臨于外，則帥而往，立于其前而詔相之。從世婦所弔，若哭其族親。立其前者，

賤也。賤而必詔相之者，出入於王宮，不可以闕於禮。

【疏】注云「從世婦所弔」者，賈疏云：「鄭知從世婦不自弔臨者，此直言凡內人弔臨于外，不指斥其事，故知不自弔臨。案《世婦職》云「掌弔臨于卿大夫之喪」，故內人得從之也。」云「若哭其族親」者，此兼以哭釋臨也。《裸記》說弔禮，先唯致弔，後臨則哭。是析言之，弔臨小異。《鬯人》云：「凡王弔臨，共介鬯。」注云：「以尊適卑曰臨。」是鄭釋弔臨，通言不別。但此內人非內宮尊官，嫌不得取臨卑之義，故兼釋爲哭也。詳《鬯人》疏。賈疏云：「王后有哭族

親之法，則內人女御亦往哭之。」云「立其前者，賤也」者，《樂記》云：「宗祝辨乎禮儀，故後尸；商祝辨乎喪禮，故後主人。」是凡詔相必居後。此寺人詔相女御等則立於其前，明以其賤，故不與他詔相禮同也。云「賤而必詔相之者，出入於王宮不可以闕於禮」者，以內人出入王宮，當閑習禮法，不可有闕失，故雖賤亦使寺人詔相之也。

內豎掌內外之通令，凡小事。內，后六宮。

外，卿大夫也。使童豎通王內外之命給小事者，以其無與爲禮，出入便疾。內外以大事聞王，則俟朝而自復。【疏】注云「內，后六宮，外，卿大夫也」者，后六宮通命於卿大夫之事，春官世婦掌之，不使內豎；則此內外之通令，謂王以小事通命於后六宮及卿大夫，皆內豎掌之也。云「使童豎通王內外之命給小事者，以其無與爲禮，出入便疾」者，《敘官》注云「豎，未冠者之官名」，故云童豎。以其未成人，故無與爲禮，又出入便疾，宜於給小事也。經云「通令」，令命義同。《文王世子》云「問於內豎之御」者，注云：「內豎，小臣之屬，掌外內之通命者。」卽據此經爲說。云「內外以大事聞王，則俟朝而自復」者，賈疏云：「經云凡通小事復白

也，明大事待朝自復，不使內豎也。」若有祭祀、賓客、喪紀之事，則爲內人蹕。內人，從世婦有事於廟

者。內豎爲六宮蹕者，以其掌內小事。【疏】「若有祭祀、

賓客、喪紀之事，則爲內人蹕」者，賈疏云：「皆謂在廟時。

若然，祭祀在廟，謂禘祫四時之祭祀也。賓客在廟，謂饗食

時也。喪紀在廟，謂喪朝廟爲祖奠、遣奠時也。皆爲內人

蹕，止行人也。」

注云「內人從世婦有事於廟者」者，內

人亦謂女御也。《女御》云：「凡祭祀贊世婦。」賈疏云：

「內人卑，不專行事。案下《世婦職》云，掌祭祀已下三事，

與此經三事同，明此內人從世婦而濯漑及爲粢盛也。」云

「內豎爲六宮蹕」者，以其掌內小事者，以蹕爲止行人，既不

關禮事，內人又卑，故使童豎爲之，亦內小事之類也。惠士

奇云：「內豎爲王后之喪蹕，又爲內人蹕。內人，六宮之

人，則蹕之名通上下矣。至秦，天子出入稱警蹕，諸侯出入

稱課促，惟至尊乃蹕也。」案：惠說是也。《家人》云：「凡

諸侯及諸臣葬于墓者爲之蹕。」則諸侯諸臣皆得稱蹕矣。

王后之喪遷于宮中，則前蹕。及葬，執褻器

以從遣車。喪遷者，將葬，朝于廟。褻器，振飾類沐之

器。【疏】「王后之喪遷于宮中，則前蹕」者，賈疏云：「謂

七月而葬，將葬而朝七廟，則亦使內豎在車前蹕止行人也。」論讓案：此後喪將葬朝於祖廟，準王禮，蓋亦以葬前

八日啓殯，即朝祖，每廟一日，七日而畢，明日而遂葬也。

云「及葬，執褻器以從遣車」者，此亦小事之尤勞辱者也。

賈疏云：「謂朝七廟訖，且將行，在大祖廟中爲大遣奠，苞

牲取下體。天子大牢苞九箇，遣車九乘，后亦同。使人持

之往如墓，則此內豎執褻器從遣車之後。以其遣車載牲

體，鬼神依之，故使執褻器從之者，若生時亦執褻器從也。」

注云「喪遷者，將葬朝于廟」者，于，注例當作「於」，各

本並誤。《既夕禮》云：「遷于祖，用軸。」鄭彼注云：「遷，

徙也。徙於祖，朝祖廟也。《檀弓》曰：「殷朝而殯於祖，周

朝而遂葬。」蓋象平生將出必辭尊者。此遷于宮中，與彼遷

于祖義同，故《曾子問》孔疏引《鄭志》云：「崇精問曰：『葬

母亦朝廟否？』焦氏答曰：『婦未廟見，不朝廟耳。《內豎

職》云，王后之喪朝廟，則爲之蹕也，是母喪亦朝廟明也。』

朝祖禮，互詳《喪祝》疏。云「褻器，振飾類沐之器」者，振飾

與扞拭同。《爾雅·釋詁》云：「扞、拭、刷，清也。」「士喪

禮》「扞用巾」，注云：「扞，晞也，清也。古文扞皆作振。」

《說文·巾部》云：「飾，晞也。讀若式。」又《水部》云：「沐，

洒面也。重文湏，古文沫，从頁。」類即湏之或體。《書·顧

命「王乃洮頰水」。《書釋文》引馬融注云：「頰，頰面也。」案：此褻器蓋《既夕禮》明器、用器、燕器之屬。賈疏云：「《玉府》云『凡褻器』，鄭注以爲清器虎子，不爲振飾類沐器者，彼據生時，故與牀第等連文。但死者器物雖皆不用，仍法其威儀者，故此注褻器爲振飾類沐之器，不爲清器虎子也。知有振飾類沐器者，案《特牲》爲尸而有槃匱，并有簞巾，巾爲振飾，槃匱爲盥手，明其頰面沐髮亦有之，故《既夕禮》用器之中有槃匱，是送葬之時有褻器也。」

九嬪掌婦學之灋，以教九御婦德、婦

言、婦容、婦功，各帥其屬而以時御敎于王所。婦德謂貞順，婦言謂辭令，婦容謂婉婉，婦功謂絲枲。

自九嬪以下，九九而御於王所。九嬪者，既習於四事，又備於從人之道，是以教女御也。教各帥其屬者，使亦九九相與從於王所息之燕寢。御猶進也，勸也，進勸王息。亦相次敎。凡羣妃御見之法，月與后妃其象也。卑者宜先，尊者宜後。女御八十一人當九夕，世婦二十七人當三夕，九嬪九人當一夕，三夫人當一夕，后當一夕，亦十五日而徧云。自望後反之。孔子曰：「日者天之明，月者地之理。」

陰契制故月上屬爲天使，婦從夫放月紀。【疏】「掌婦學之灋」者，九嬪之官法也。《匠人》云：「內有九室，九嬪居之。」賈彼疏謂九室爲教九御之所，是卽嬪婦教學之宮也。

注云「婦德謂貞順，婦言謂辭令，婦容謂婉婉，婦功謂絲枲」者，《昏義》云：「古者婦人，先嫁三月，祖廟未毀，教於公宮，祖廟既毀，教於宗室。教以婦德、婦言、婦容、婦功。」彼注義與此同。《昏義》所云，《詩·周南·葛覃》毛傳以爲古者女師之教。若然，女官與女師所教異，而四事則同。劉向《列女傳》有《貞順篇》。又《後漢書·列女傳》曹昭《女誡·婦行篇》云：「女有四行：一曰婦德，二曰婦言，三曰婦容，四曰婦功。夫云婦德，不必才明絕異也，婦言不必辯口利辭也，婦容不必顏色美麗也，婦功不必工巧過人也。清閑貞靜，守節整齊，行己有恥，動靜有法，是謂婦德。摛辭而說，不道惡語，時然後言，不厭於人，是謂婦言。盥浣塵穢，服飾鮮潔，沐浴以時，衣不垢辱，是謂婦容。專心紡績，不好戲笑，潔齊酒食，以奉賓客，是謂婦功。」案：曹大家論四行，卽本此經四事也。賈疏云：「案《內則》云：『姆教婉婉聽從，執麻枲，治絲繭，織紵組紃。』故鄭君此注婦德謂貞順，當彼聽從；此云婦容謂婉婉，還當彼婉婉也；此云婦功謂絲枲，還當彼執麻枲已下。惟婦言注與彼

少異。此注以婦言謂辭令，彼《內則》注以婉爲言語，婉之言媚也，謂容貌也。不同者，以彼經無四事之言，故分婉婉爲二事以充四德，此有四者之言，故并婉婉爲容貌，別以辭令解婦言。然彼以婉婉亦兼婦言者，以其言語婉順亦得爲容貌故也。」云「自九嬪以下，九九而御於王所」者，《內宰》注釋九御云：「九九而御於王所，因以號焉。」與此義同。《女御》注云「王不就后宮息」，故凡嬪御皆就御於王所。《毛詩·邶風·靜女》傳云：「后妃羣妾以禮御於君所，女史書其日月，授之以環以進退之。」是也。云「九嬪者，既習於四事，又備於從人之道，是以教女御也」者，賈疏云：「釋經使九嬪教女御之意，既習於四事，即經婦德之等是也。云又備於從人之道，謂御序之事，即經各帥其屬以時御敘于王所是也。」云「教各帥其屬者，使亦九九相與從於王所息之燕寢」者，謂女御八十一人爲九嬪之屬，是一九嬪領九女御以御於王寢，兼以受婦職，故《內宰》云：「以婦職之灋教九御，使各有屬以作二事。」注云：「使之九九爲屬，同時御又同事也。」經云王所，即謂王之燕寢，《女御》云「掌御敘于王之燕寢」是也。賈疏云：「亦九九相與從王者，亦上居宮及以作二事，皆九人相配，故以亦之也。」云「御猶進也，勸也，進勸王息」者，《廣雅·釋詁》云：「御，進也。」言以夕

進接於王，勸王燕息也。云「亦相次敘」者，敘，注例當作「序」，此作敘者，蓋後人依經改，後「敘哭」注亦云次序可證，詳《小宰》疏。賈疏云：「亦上居宮有次敘也。」云「凡羣妃御見之法，月與后妃其象也」者，謂羣妃御見之法，半月更直，周而復始，象月及后妃星也。《淮南子·天文訓》云：「月者陰之宗。」《檀弓》注云：「后妃四星，其一明者爲正妃，餘三小者爲次妃。」案即《史記·天官書》云：「天極星後句四星，末大星，正妃，餘三星，後宮之屬也。」《索隱》引《援神契》云：「辰極橫后妃四星，從端大妃光明。」《神仕》注云「祭地方澤，象后妃」，亦謂此也。云「卑者宜先，尊者宜後」者，賈疏云：「案《禮運》云：『三五而盈，三五而闕。』后以下法之，故從微嚮著，卑者宜先；從著嚮微，卑者宜後也。」云「女御八十一人當九夕，世婦二十七人當三夕，九嬪九人當一夕，三夫人當一夕，后當一夕，亦十五日而偏云」者，鄭意以九嬪、世婦、女御並九人而當一夕，三夫人三人而當一夕，后則專夕也。鄭所說夫人、九嬪、世婦、女御之數，並據《昏義》文。其所云當夕者，並謂更迭當直，非必王之接於寢也。《內則》云：「故妾雖老，年未滿五十，必與五日之御。」鄭注以五日之御爲諸侯之制，謂夫人當一夕，兩媵一夕，姪娣兩兩而御，五日而偏也。《詩·小雅·采

綠《毛傳》亦云「婦人五日一御」。孔疏引王肅則云「大夫以下之制」。此並無明文，要嬪御以敘侍御於君，與遠色之義不相妨也。惟《昏義》所說內官之數，則非周法，蓋不足據，詳《敘官·九嬪》疏。云「自望後反之」者，謂望前則先卑後尊，故先女御，次世婦，次九嬪，次三夫人，而後及后。若望後則反是，先后，次三夫人，次九嬪，次世婦而終於女御，皆放月盈闕之義。賈疏云：「言亦者，亦上居宮。」引孔子曰「日者天之明，月者地之理，陰契制，故月上屬為天使，婦從夫放月紀」者，賈疏云：「《孝經援神契》文。但彼是孔子所作，故言孔子云也。日者天之明者，本合在天；月者地之理者，本合在地。今以陽尊而陰卑，月乃為天契制所使，故云陰契制。上屬為天使，是以月上屬於天，隨日而行。婦從夫放月紀者，解后已下就王燕寢而御之意。」案：《左傳敘》孔疏引《春秋感精符》亦云「月者，陰之精，地之理也」。與《孝經緯》說略同。鄭引此者，取婦從夫放月紀，證后妃象月御於王，十五日而徧之義。賈說非鄭意。契制之義，賈釋未明。《通典·吉禮》云：「日者陽精，屬天；月者陰精，屬地。陰道挈制於陽，故月屬天而從於陽。」彼文蓋隱據《孝經緯》，而以「契制」為「挈制」，則是讀契為挈，同聲假借字也。又《曲禮》孔疏引此注而釋之云：「月紀是星也。」

案：孔云星，疑亦指后妃星。然月紀之義，未詳。凡祭祀，贊玉盥，贊后薦徹豆籩。玉盥，玉敦受黍稷器，后進之而不徹。故書「玉」為「王」，杜子春讀為玉。【疏】「凡祭祀」者，賈疏云：「后無外事，唯有宗廟禘祫與四時月祭等。」云「贊玉盥」者，以下並與外宗為官聯也。賈疏云：「但祭祀之時，男子進俎，婦人設豆籩盥簋。贊，助也，助后薦玉盥也。」江永云：「羹定，詔於堂之後，乃延主於室。徙堂上朝踐饋食豆籩入室，設於尸席前。俎人，設於豆東。后乃薦玉盥，設於俎南。」案：江說是也。祭祀贊后薦玉盥者，以《特牲》、《少牢饋食禮》約之，蓋當四獻之後，設陰厭時，后則以玉盥薦黍稷。《外宗》云「王后以樂羞盥，則贊」，則九嬪與外宗同贊之也。云「贊后薦徹豆籩」者，《詩·小雅·楚茨》孔疏云：「后夫人所主籩豆，唯有朝事饋食之籩豆后薦之耳。於《周禮》，加豆籩則內宗薦之，內羞、庶羞則世婦薦之。」詒讓案：朝踐饋食，后凡二次薦豆籩，九嬪亦與外宗同贊之。祭畢，又同贊后徹之。故《外宗》云：「佐王后薦玉豆，眡豆籩；及以樂徹，亦如之。」其加豆籩，內宗薦之。內宗卑於九嬪，則加豆籩，此官蓋不贊之也。又案：豆籩中內羞為世婦所薦，庶羞則當小子薦

之。孔謂二羞並世婦薦，未塙。詳《世婦》、《小子》疏。

注云「玉盥，玉敦受黍稷器」者，鄭亦讀盥爲粢。六粢爲祭穀，故以玉飾受黍稷之器，即謂之玉粢，猶圭瓚盛鬯謂之玉鬯也。詳《甸師》及《宗伯》疏。祭祀饌兼有稻粱，亦得稱粢。鄭知此玉盥內不關受稻粱器者，以稻粱爲加饌，內宗薦之，亦九嬪所不贊也。賈疏云：「案：《明堂位》云『有虞氏之兩敦，周之八簋』，則周用簋。《特性》、《少牢》、《大夫士用敦。今周天子用玉敦者，《明堂位》明魯得兼用四代之器用敦，明天子亦兼用可知。云玉敦者，謂以玉飾敦，謂若《玉府》云『珠槃玉敦』。但彼以珠槃盛牛耳，玉敦盛血，此玉敦盛黍稷爲異耳。」金鶚云：「《明堂位》敦爲虞器，周用簋，亦兼用敦。然簋爲天子諸侯之器，而敦則大夫士用之。《玉藻》云：『諸侯朔月四簋。』是常食用簋也。《掌客》上公簋十，侯伯八，子男六，簋則同用十二，是享賓用簋也。《禮運》言陳其簋簠，《祭統》言八簋之實，《曾子問》言天子嘗禘郊社五祀之祭，簋簠既陳，是祭祀用簋也。皆未有言敦者，可知敦非天子諸侯之器也。《舍人》云：『凡祭祀共簋簠，實之陳之。』則知此玉盥者，玉簋也。經典並無天子用敦之文。《玉府》云：『若合諸侯，則共珠槃玉敦。』此會盟所用，非祭器也。天子之祭，既有簋

盛稻粱，簋盛黍稷，雖有敦，將焉用之！」案：金謂天子祭祀當用簋，不用敦，是也。但此職所贊后薦者唯正饌，則玉盥止有玉簋，無玉簠也。至《外宗》云玉豆，則豆籩亦飾玉。此唯云玉盥，贊豆籩不云玉者，以已詳於彼，亦互文見義也。簋，詳《舍人》、《瓶人》疏。玉敦，詳《玉府》疏。云「后進之而不徹」者，賈疏云：「豆籩云贊薦徹，玉盥直贊不云薦徹，明直贊進之而已。案《禮器》云：『管仲饔簋。』注云：『天子飾以玉。』此直云玉敦，則簋亦飾以玉。而不云者，但玉敦后親執而設之，故特言之；其簋則九嬪執而授后，后設之，若《少牢》主婦親受韭菹醢醢，其餘婦贊者授主婦，主婦設之，故不言也。」案：依金鶚說，則玉盥即玉簋，非玉敦，賈強爲分別，非也。《詩·小雅·楚茨》云：「諸宰君婦，廢徹不遲。」箋云：「君婦謂后也。尸出而可徹，諸宰徹去諸饌，君婦籩豆而已。」孔疏云：「《周禮·宰夫》無徹饌之文。《膳夫》云：『凡王祭祀、賓客，則徹王之胾俎。』注云：『膳夫親徹胾俎，胾俎最尊也。其餘則其屬徹之。』然則徹饌者，膳夫也。」案：孔說是也。賈《外宗》疏亦據《楚茨》謂宰徹黍稷，彼宰即膳夫也。《有司徹》下大夫不實尸章，注謂宰夫徹敦，亦可證膳夫徹盥之說。若然，則唯豆籩后薦后徹，九嬪、外宗贊之。其玉盥，則后薦膳夫徹。九

嬪、外宗唯贊薦不贊徹也。云「故書玉爲王，杜子春讀爲玉」者，以王齋無義，而玉齋見《大宗伯》，故杜讀從之。段玉裁云：「此鄭君從杜謂字之誤而改之也。篆體玉與王皆三畫，惟玉三畫勾，王上二畫相近，不勾。」若有賓客，

則從后。當贊后事。【疏】「若有賓客則從后」者，與內

宗爲官聯也。

注云「當贊后事」者，賈疏云：「后之有

事於賓客者，唯有諸侯來朝，王親饗燕，^①后當助王饗燕時，九嬪從后往也。」大喪，帥敍哭者亦如之。亦從后。帥猶道也。后哭，衆之次序者乃哭。【疏】「大喪，帥

敍哭者亦如之」者，與肆師、春官世婦、內宗、外宗爲官聯也。敍哭，通始崩哭及殯後朝莫哭言之。賈疏云：「大喪

謂王喪。帥敍哭者，謂若外內命婦哭時，皆依尊卑命數，在后後爲前後列位哭之，故須帥導使有次敍也。」案：大喪亦容有后喪，賈說未咳。注云「亦從后」者，以經冢上云

亦如之，明亦從后贊事也。云「帥猶道也」者，《說文·巾

部》云：「帥，佩巾也。」又《辵部》云：「達，先道也。」經典多段帥爲達。以其非本義，故云猶道也。云「后哭，衆之次序者乃哭」者，亦注用今字作「序」也。《肆師》序哭注云：

「序，使相次秩也。」《喪大記》注說諸侯喪哭位云「女子立於

夫人後」，準彼文則王喪當亦然。明后在前先哭，三夫人以下至內外宗命婦等，乃各以尊卑次序繼哭也。哭位次，詳《肆師》疏。

世婦掌祭祀、賓客、喪紀之事，帥女官

而濯概，爲齋盛。概，拭也。爲猶差擇。【疏】「掌祭

祀、賓客、喪紀之事，帥女官而濯概」者，以下並與春官世婦職掌略同，亦官聯也。女官，卽刑女之在宮中者，詳《寺人》

疏。賈疏云：「此婦人所掌，祭祀謂祭宗廟，賓客謂饗食諸侯在廟，喪紀謂大喪朝廟，設祖奠與大遣奠時。爲此三事，

則帥女官而濯概。案《少牢》，饗人概鼎俎，庖人概甑，司官概豆籩，皆使男子官不使婦人者，彼以大夫家無婦官及

無刑女，故並使男子官。此天子禮，有刑女及婦官，故與彼異也。」云「爲齋盛」者，齋亦當讀爲案，詳《甸師》疏。

注云「概，拭也」者，《說文·手部》云：「概，滌也。」《詩·大雅·洞酌》篇「可以濯漑」，毛傳云：「漑，清也。」彼《釋文》

「漑」作「概」。《爾雅·釋詁》云：「拭，清也。」案：濯概卽

①「親」原訛「覲」，據賈疏改。

滌濯也。《曲禮》云：「器之溉者不寫。」注云：「溉謂陶梓之器，不溉謂萑竹之器也。」此濯溉亦謂陶梓之器。《少牢饋食禮》：「廩人概甑鬲匕與敦于廩爨。」若然，天子禮有玉齋簠簋等，皆此官帥女宮概之於廩爨也。云「爲猶差擇」者，謂簡擇米之精潔者供之。《既夕記》：「夏祝淅米差盛之。」注云：「差，擇之。」《後漢書·和熹鄧皇后紀》：「詔曰：自非供陵廟稻粱米，不得導擇。」是祭祀齋盛必差擇之也。賈疏云：「祭祀黍稷，春人春之，饌人炊之，皆不使世婦，故此爲非春非炊，是差擇可知也。」論讓案：《國語·楚語》：「觀射父曰：天子禘郊之事，王后必自春其粢；諸侯宗廟之事，夫人必自春其盛。」《穀梁》文十三年傳云：「禮，宗廟之事，君親割，夫人親春。」又桓十四年傳云：「甸粟而內之三宮，三宮米而藏之御廩。」《漢書·五行志》劉向說「御廩，夫人、八妾所春米之藏以奉宗廟者也」。彼爲諸侯禮，則天子禮宜亦后帥六宮春其粢。意者春人既春之後，后帥六宮更精春之。鄭云差擇，或亦含此義。又賈《特牲饋食禮》疏引《易·歸妹》上六云：「女承筐無實，士刲羊無血。」鄭注云：「宗廟之禮，主婦奉筐米。」若然，鄉祭之晨，女宮或當奉米以授饔人炊之，與《特牲》士禮主婦視饔爨事相擬與？

及祭之日，涖陳女宮之具，凡內羞

之物。涖，臨也。內羞，房中之羞。【疏】「及祭之日，涖陳女宮之具，凡內羞之物」者，此謂祭祀世婦掌視內羞并薦之也。《詩·小雅·楚茨》云：「君婦莫莫，爲豆孔庶。」毛傳云：「豆謂內羞，庶羞也。」則庶羞亦婦官所兼涖也。莊有可云：「陳具，陳酒漿、醢醢、巾冪、春饔諸具也。」注

云「涖，臨也」者，《州長》、《黨正》、《小宗伯》、《大司馬》、《大司寇》注並同。《說文·立部》云：「竦，臨也。」《老子釋文》云：「莅，古無其字，《說文》作竦。」案：涖莅並竦之俗體。云「內羞，房中之羞」者，即《籛人》「羞籛之實糗餌粉簋」，《籛人》「羞豆之實醢食糝食」也。內羞皆穀物，女宮所共與庶羞爲內外饗所共異，故謂之內羞，又謂之房中之羞，見《有司徹》。賈疏云：「案《少牢》，皆從房中而來，故名爲內羞。」案：詳《籛人》疏。掌弔臨于卿大夫之喪。王使往弔。【疏】「掌弔臨于卿大夫之喪」者，亦與內宗爲官聯也。此后使弔臨，臨謂哭也，詳《寺人》、《鬯人》疏。莊存與云：「必貴戚之卿大夫也。」注云「王使往弔」者，賈疏云：「案《內宗》云：『凡卿大夫之喪，掌其弔臨。』」注云：「王后弔臨諸侯而已。是以言掌卿大夫云。」文同而注異者，彼上文云：「王后有事則從，大喪序哭者。哭

諸侯亦如之。」彼文與后事相連，彼主於后。此上文無后，故知此王使往也。若然，后無外事，彼弔諸侯，謂三公、王子母弟。若畿外諸侯，則后不弔。以其王爲三公六卿錫衰，諸侯總衰，后不弔。畿外諸侯既輕於王之卿，卿既后不親弔，畿外諸侯不親弔可知。若然，《喪大記》諸侯夫人弔卿大夫士之喪者，以其諸侯臣少，故不分別尊卑，夫人皆弔之也。案《司服》，公卿大夫皆王親弔之，此文使世婦往弔者，此蓋使世婦致禮物，但弔是大名，雖致禮亦名爲弔，是以《大僕》云「掌三公孤卿之弔勞」，注云：「王使往。」《小臣》云「掌士大夫之弔勞」，注云：「致禮同名爲弔。」是其事也。此所弔不言三公與孤者，文不具也。案：鄭、賈說非也。此世婦與春官世婦，內外異而職掌同，此所云弔臨于卿大夫之喪者，亦后使與內宗共弔臨卿大夫之喪耳。鄭以天官春官兩世婦有男女之異，遂謂內宗是后使，此是王使。賈疏申鄭，又曲爲之說。不知王使弔臨，自有大僕、小臣，何爲復遣世婦乎？至王於諸臣之喪贈致禮物，則自有含襚賻贈之禮，不爲弔。賈謂致禮亦名爲弔，說尤牽強。又引《小臣》注致禮，今本彼注無此文，彼疏述注亦無，所未詳也。

女御掌御敍于王之燕寢。言掌御敍，防上

之專妬者。于王之燕寢，則王不就后宮息。【疏】注云「言掌御敍，防上之專妬者」者，敍，注例當作「序」，各本並誤。謂令嬪御等以尊卑敍次，更迭御侍於王，即所以防壁寵之專妬也。賈疏謂「鄭解不使九嬪世婦掌房之意，使女御掌之，官卑不敢專妬」，殊非鄭指。云「于王之燕寢，則王不就后宮息」者，于，注例當作「於」，各本並誤。胡培暉云：「王六寢，其一爲正寢，治事之處，而所居恒在於燕寢。后夫人以下分居六宮。其有當御者，則就於王之燕寢。此古者王后居寢之制也。」賈疏云：「破舊說云「王就后宮」者，故鄭云此也。」案：《詩·召南·小星》孔疏引《尚書大傳》云：「古者后夫人將侍君前，息燭後，舉燭至於房中，釋朝服，襲燕服，然後入御於君。雞鳴，大師奏雞鳴於階下。然後夫人鳴佩玉於房中，告去。」《列女傳·周宣姜后傳》說后夫人御於君之禮同。《後漢書·明帝紀》李注引《韓詩章句》亦云：「人君退朝，入於私宮，后妃御見，去留有度。應門擊柝，鼓人上堂，退反宴處，體安志明。」並后妃御見就王燕寢之證。以歲時獻功事。絲枲成功之事。【疏】「以歲時獻功事」者，即《典婦功》云「秋而獻功」是也。《縫人》

注云「女御裁縫王及后之衣服」，亦功事之類。又黃佐《六藝流別》引《尚書大傳》云：「季夏，命世婦治服章。」案：此經世婦無治婦功之文，而女御卽世婦之屬，《伏傳》所云，或卽此官功事之一端與？

注云「絲枲成功之事」者，卽九嬪婦功之事，內宰佐后受之者也。《呂氏春秋·上農篇》

云：「春夏秋冬皆有麻枲絲繭之功，以力婦教也。」《列女傳·母儀傳》云：「《詩》曰『婦無公事，休其蠶織』。言婦人以織績爲公事者也，休之非禮也。」案：劉引《詩》，《大雅·

瞻卬》文，所述蓋三家《詩》義。彼公事卽此功事，《毛詩》說爲外政，非也。《管子·問篇》云：「問處女操工事者幾何人。」工事卽功事，公功工並聲近義同。《大戴禮記·夏

小正》云：「三月，妾子始蠶，執養官事。」彼官事卽女宮之

功事，亦兼蠶織言之。凡祭祀，贊世婦。助其帥泣女

宮。【疏】注云「助其帥泣女宮」者，亦訓贊爲助也。賈疏

云：「上《世婦職》云『掌祭祀、賓客、喪紀帥女宮，及祭之日，泣女宮之具』。故知此贊者助其泣女宮也。」大喪，

掌沐浴。王及后之喪。【疏】注云「王及后之喪」者，賈

疏云：「王及后喪，沐浴潘，浴用湯，始死爲之於南牖下。

但男子不死於婦人之手，今王喪亦使女御浴者，案《士喪

禮》，浴時男子抗衾，則不使婦人。今王喪，沐或使婦人，而

浴未必婦人，或亦供給湯物而已，亦得謂之掌也。」方苞

云：「注非也。《大祝職》『大喪，始崩，以肆鬯灑尸』，則非

女御所掌明矣。疏謂或使婦人供給湯物，亦非也。《肆師

職》『大喪，大湣以鬯，則築鬻』，《鬯人職》『大湣設斗，共其

鬻鬯』，則共給湯物不以婦人明矣。經所以不明著王后者，

男不死於婦人之手，士庶人且然，況天子乎！以外官掌之

則大喪爲王，以婦官掌之則大喪爲后，不待言耳。」案：方

說是也。此大喪蓋專繫后及母后言之。依《宰夫》注，男大

喪含世子，則此女大喪或亦含王姬，故下文又別言后喪。

注兼舉王，則誤也。賈疏依違其說，亦非。《喪大記》云：

「御者人浴，小臣四人抗衾，御者二人浴。其母之喪，則內

御者抗衾而浴。《士喪禮》云：『外御受沐人，乃沐浴。』鄭

注云：『外御，小臣侍從者。』又《既夕記》云：『御者四人抗

衾而浴，其母之喪則內御者浴。』鄭注云：『內御，女御也。』

彼注據士禮，女御謂女子侍御者，雖非此官，而可證喪禮沐

浴男用外御，女用內御，其別至嚴，王喪不當使女御沐浴明

矣。惟王喪沐浴，於經無文。大祝灑尸，乃浴之一節，其勞

辱之事，非所掌也。以意求之，似當是御僕沐浴。此下文

云「后之喪持鬯」，《御僕》亦云「大喪持鬯」，然則后之有女

御，與王之有御僕，職正相準。彼職不云大喪沐浴者，文不具耳。后之喪，持嬰。嬰，棺飾也。持而從柩車。

【疏】注云「嬰，棺飾也，持而從柩車」者，《檀弓》云：「飾棺牆，置嬰，周也。」注云：「嬰以布衣木，如攝與？」《喪大記》注云：「漢禮，嬰以木爲筐，廣三尺，高二尺四寸，方兩角高，衣以白布，柄長五尺。車行，使人持之而從。既窆，樹之於壙中。」《後漢書·趙咨傳》李注引《三禮圖》云：「嬰以竹爲之，高二尺四寸，廣三尺，衣以白布，柄長五尺。葬時，令人執之於柩車旁也。」說與鄭同，惟云以竹爲之，與鄭異。《說文·羽部》云：「嬰，棺羽飾也。天子八，諸侯六，大夫四，士二，下垂。」《釋名·釋喪制》云：「嬰，齊人謂扇爲嬰，此似之也。象嬰扇，爲清涼也。」《呂氏春秋·節喪篇》：「僂嬰以督之」，高注云：「嬰，棺飾也。畫黼黻文，狀如扇，插於僂邊。」又《淮南子·汜論訓》高注云：「嬰狀如今要扇，畫文，插置棺車箱以爲飾。」案《巾車》：「后輦車有嬰棺飾，蓋與彼相類。僂卽《縫人》之柳也。依高說，是嬰插柳邊車箱之中，非人執以從車，則持嬰當與《旅賁氏》「持輪」、《齊右》「道右持馬」義同，謂扶翼維持之，不爲持執之義，與鄭說異。賈疏云：「案《禮器》云「天子八嬰」。又漢制度皆戴璧，后喪亦同，將葬向壙之時，使此女御持之，左右各四人，

故云持而從后柩車也。」案：天子嬰制，互詳《縫人》疏。從世婦而弔于卿大夫之喪。從之數蓋如使者之介云。【疏】注云「從之數蓋如使者之介云」者，賈疏云：「王之妃妾，三夫人象三公，九嬪象孤卿，二十七世婦象大夫，女御象元士。但介數依命數爲差，則王之大夫四命，世婦之從亦四人。以無正文，故言「蓋言」云以疑之也。」

女祝掌王后之内祭祀，凡内禱祠之事。

内祭祀，六宮之中竈、門、戶。禱，疾病求瘳也。祠，報福。【疏】注云「内祭祀，六宮之中竈、門、戶」者，以經内祭祀專屬王后，則是内宮之羣小祀。《祭統》云：「内祭則大嘗禘是也。」彼王以宗廟爲内祭祀，與此后内祭祀異也。賈疏云：「依《祭法》，王立七祀，有戶、竈、中雷、門、行、泰厲、司命，后亦與王同。今鄭直云内祭祀竈門戶者，以其婦人無外事，無行與中雷之等，其竈與門戶人所出入，動作有由，后亦當祀之，故言竈與門戶也。案《月令》，春祀戶，夏祀竈，秋祀門。后祀之時，亦當依此也。」云「禱，疾病求瘳也，祠，報福」者，《說文·示部》云：「禱，告事求福也。」《小宗伯》注云：「求福曰禱，得求曰祠。」報福卽得求而報之，故

曰祠。鄭以凡災變祈禱非后所與，故唯以疾病禱祀爲釋，下文招梗檜攘，亦云以除疾殃，是其證也。掌以時招、

梗、檜、攘之事，以除疾殃。鄭大夫讀梗爲亢，謂

招善而亢惡去之。杜子春讀梗爲更。玄謂梗，禦未至也。

除災害曰檜，檜猶刮去也。卻變異曰攘，攘，攘也。四禮唯攘其遺象今存。【疏】「掌以時招梗檜攘之事」者，此四者

並宮中祈攘之小事，后所不親與者，則女祝專其事也。招

梗檜攘與《小祝》侯攘事略同。賈疏云：「此四事並非常求

福去殃之事。以時者，謂隨其事時，不必要在四時也。」云

「以除疾殃」者，《說文·卣部》云：「殃，咎也。」除疾殃與

《男巫》「春招弭以除疾病」義同。注云「鄭大夫讀梗爲

亢」者，丁晏云：「梗从更聲，更亢聲相近。」後漢書·樊宏

傳：「封族兄忠更父侯」，卽亢父也。《說文》「杭从禾亢聲，或

从更作梗。」云「謂招善而亢惡去之」者，《說文·手部》云：

「招，手呼也。」《男巫》「招弭」注云：「招，招福也。」《左傳》

宣十三年杜注云：「亢，禦也。」大夫意招梗二祭相對，一爲

招善使來，一爲禦惡使去也。然與檜攘無別，故後鄭增成

其義。賈疏云：「招者，招取善祥；梗者，禦捍惡之未至。」

云「杜子春讀梗爲更」者，梗更聲類同，杜以此梗爲除舊更

始之祭，故破字爲更也。惠士奇云：「《管子·四時篇》

云：「脩除神位，謹禱弊梗。」弊當作幣。《續漢·禮儀志》

曰：「周人火德，以桃爲梗，言氣相更也。」《風俗通·祀典》

亦曰：「梗者更也，歲終更始受介祉也。」招者旁招，招以

茅，謂福祥引之來；梗者更始，更用幣，謂凶咎遷之去。」云

「玄謂梗，禦未至也」者，段玉裁云：「大夫、子春皆易字，鄭

君不易也。《方言》曰：「梗，猛也。韓趙之間曰梗。凡艸

木刺人，自關而東或謂之梗。」詒讓案：此增成大夫義。

災異未至，先祭祀豫禦之，是謂之梗，對下檜攘皆爲災害已

至之祭也。《說文·卣部》云：「禦，祀也。」疑卽所謂梗矣。

云「除災害曰檜，檜猶刮去也」者，《大祝》六祈，三曰檜。注

云：「檜，告之以時有災變也。」《神仕》注云：「檜，除也。」

賈疏云：「檜者，除去見在之災。」金鶚云：「檜刮聲相近，

故以刮訓之。《說文》云：「檜，會福祭也。」謂除去疾殃所

以會福也。」案：金說是也。《藝文類聚·禮部》引《說文》

云：「檜，除惡之祭也。」與今本《說文》異。依鄭義，經凡云

檜者有三：此檜與《大祝》六祈詛祝檜祭之檜爲一，皆爲祭

名。《神仕》之檜則與《庶氏》之檜爲一，爲檜災害之通語，

其音讀如潰。《大宗伯》之檜則與《大行人》、《小行人》之檜

爲一，爲會財救災之事，與祭祀之檜不相涉也。云「卻變異

曰禳者，《說文·示部》云：「禳，磔禳，祀除癘殃也。古者燧人祭子所造。」《風俗通義·祀典篇》云：「禳者，卻也。」《聘禮》「禳乃人」，注云：「禳，祭名也。爲行道累歷不祥，禳之以除災凶。」《山海經·中山經》：「平逢之山，其祠之用一雄雞，禳而勿殺。」郭注云：「禳亦祭名，謂禳卻惡氣也。」賈疏云：「禳者，推卻見在之變異。」云「禳，攘也」者，《禁殺戮》注云：「攘猶卻也。禳爲卻變異之祭，義與攘同，禳攘同聲，字亦相通。」《左》昭十七年傳「禳火」，《釋文》云：「禳，本亦作攘。」《月令》「季春九門磔攘」，《釋文》作「攘」，並其證。云「四禮唯禳其遺象今存」者，《漢書·地理志》云：「左馮翊雲陽，有越巫貼鄴祠三所。」貼卽《說文·辛部》「辜，古文𡗗之譌。鄴卽禳之段字。貼鄴卽《月令》之「磔攘」，是漢時有禳祠。其招梗禳三者，漢時並無其制，故云唯禳遺象存也。

女史掌王后之禮職，掌內治之貳，以詔

后治內政。內治之法本在內宰，書而貳之。【疏】「掌

王后之禮職」者，謂典禮之職事也。云「掌內治之貳，以詔后治內政」者，猶內史掌王之八枋之灋，以詔王治執國法及

國令之貳，以致政事也。

注云「內治之法本在內宰，書

而貳之」者，賈疏云：「案《內宰職》云：『掌書版圖之法，以治王內之政令。』今此云掌內治之貳，故知內治之法，本在內宰掌，此女史書而貳之也。」逆內宮，鈎考六宮之計。

【疏】「逆內宮」者，猶內史執國灋及國令之貳以逆會計也。

賈疏云：「言內宮，亦對王之六寢爲內宮，謂六宮所有費用財物及米粟，皆當鈎考之也。」詒讓案：《左》成十八年傳云：「齊侯使士華免以戈殺國佐于內宮之朝。」杜注云：

「內宮，夫人宮。」據彼則諸侯夫人宮亦稱內宮，與此王后六宮稱內宮同。蓋后六宮在王燕寢之後，南北正相當。《內則》云：「適子、庶子見於外寢。」注云：「外寢，君燕寢也。」

是后夫人寢對君寢爲內外，以方位言之則曰北宮，以內外言之則曰內宮，其實一也。注云「鈎考六宮之計」者，

《鄉師》注云：「逆猶鈎考也。」鈎考，詳《司會》疏。書內

令。后之令。【疏】「書內令」者，書於方策以授內小臣，

使施行之，猶內史掌書王命、外史掌書外令也。《毛詩·邶風·靜女》傳云：「古者后夫人必有女史彤管之法。史不

記過，其罪殺之。后妃羣妾以禮御於君所，女史書其日月，授之以環，以進退之。生子月辰，則以金環退之。當御者

以銀環進之，著於左手，既御，著於右手。事無大小，記以成法。」又《釋名·釋首飾》云：「以丹注面曰的。此本天子諸侯羣妾當以次進御，其有月事者，止而不御，重以口說，故注此丹於面，女史見之則不書其名於第錄也。」然則女史兼書王之陰事，與內小臣爲官聯，不徒書內令矣。注

云「后之令」者，明與內小臣掌王之陰令異也。賈疏云：「內令亦對王令爲內，故鄭云『后之令』，謂書而宣布之於六宮之中也。」凡后之事，以禮從。亦如大史之從於王。【疏】注云「亦如大史之從於王」者，賈疏云：「案《大史職》云：『大會同朝覲，以書協禮事；及將幣之日，執書以詔王。』」注云：「告王以禮事。」此女史亦執禮以從王后，故云如大史之於王。」

典婦功掌婦式之灋，以授嬪婦及內人

女功之事齋。婦式，婦人事之模範。法，其用財舊數。

嬪婦，九嬪、世婦。言「及」以殊之者，容國中婦人賢善工於事者。事齋，謂以女功之事來取絲枲。故書齋爲資，杜子春讀爲資。鄭司農云：「內人謂女御。女功事資，謂女功絲枲之事。」【疏】「掌婦式之灋」者，此官掌嬪婦絲枲功事

之官法也。云「以授嬪婦及內人女功之事齋」者，《釋文》云：「齋，本亦作案。」阮元云：「當云『本亦作資』。案者，字之誤也。」段玉裁亦改案爲資，云：「亦作資者，乃依注改經之本也。」案：阮、段校是也。凡經齋字，故書或作資，後鄭皆從齋。《外府》注以資爲齋之或體，則此職經文必不從資可知。陸校別本不足據。杜、許、二鄭說齋資二字異同，詳《外府》疏。注云「婦式，婦人事之模範」者，《說文·

工部》云：「式，法也。」又《木部》云：「模，法也。」《爾雅·釋詁》云：「範，法也。」是式與模範義同。此即《大宰》九式羞服之式，凡服物式法施於嬪婦者也。云「法，其用財舊數」者，此亦注用今字也。賈疏云：「此即典絲、典枲所授絲枲多少，並有舊數依而授之。」云「嬪婦，九嬪世婦」者，賈疏云：「案《內宰》以作二事及婦功，唯據九御而言，不見九嬪世婦有絲枲之事。此言嬪婦者，但三夫人無職，九嬪已下皆有之。但女御四德不備，須教之；九嬪世婦素解，不須教之，其實有婦職也。是以《魯語》云：『王后織玄紵，公侯夫人紵紵，卿之內子大帶』，則貴賤皆職事也。」云「言及以殊之者，容國中婦人賢善工於事者」者，賈疏云「案下《內司服》注『言及言凡，殊貴賤也』」。此云及，非直殊貴賤，亦含國中婦人，故云容也。必知有國中婦人者，以下《典絲》

云「頒絲于外內工」，注云：「外工，外嬪婦也。」故《大宰職》云「嬪婦化治絲枲」。是其國中婦人有嬪婦之稱也。」詒讓案：鄭意九嬪世婦亦內人，而經云「以授嬪婦及內人」為殊別之詞者，以嬪婦為大名，所該甚廣，容外嬪婦之賢善工於事者亦得與焉。其內人則專屬宮人而言，故經言及以殊之。鄭知此嬪婦非專屬外嬪婦者，以外嬪婦為九職之一，通於萬民，人數衆多，其功事不必皆由官授也。云「事齋謂以女功之事來取絲枲」者，《外府》注云：「齋，行道之財用也。」《掌皮》注云：「所給予人以物曰齋。」引申之，彼來取而此給予以財物，亦得為齋。《考工記·總敘》注云：「資，取也。」後鄭《外府》注謂齋資字同，故此注兼以來取為訓，絲枲亦即資財也。賈疏據《外府》注「行道曰齋」為釋，未達鄭指。互詳彼疏。又案：《大戴禮記·子張問入官篇》云：「是故夫工女必自擇絲麻，良工必自擇齋材。」蓋絲麻即女功之齋材，故此注亦以絲枲釋事齋矣。云「故書齋為資，杜子春讀為資」者，段玉裁改「讀為資」為「讀為齋」，云：「此故書作資，子春易為齋，而鄭君從之也。今本作杜子春讀為資，便是讀資為資，不可通矣。杜易其字，司農則不易字，讀從故書作資。大約諸家皆訓資為貨，訓齋謂持遺，分別與《說文解字》合。」案：段說是也。杜意經文故書

齋資錯出，凡為給予之義者當從齋，凡為財貨之義者當從資，故此故書作資，而杜讀為齋。《巾車》：「毀折入齋于職幣。」故書作齋而杜讀為資，二注正相反，可以推其分別二字之例矣。依後鄭《外府》注義，則齋資一字，資即齋之或體，故於此職從杜作齋，而於《巾車》則不從杜作資。賈疏不知杜讀資當為齋，乃謂「鄭不破子春者，從上注義可知，不復重言」，亦非也。鄭司農云「內人謂女御」者，《寺人》後鄭注義同。案此內人即《典絲》之內工，蓋通女御以下內嬪婦之賤者言之，詳《內宰》疏。云「女功事資，謂女功絲枲之事」者，先鄭從故書作資，與杜及後鄭讀異，其以絲枲釋「事資」則與後鄭同，故附引之。凡授嬪婦功，及秋獻功，辨其苦良，比其小大而賈之，物書而楬之。授，當為受，聲之誤也。國中嬪婦所作成即送之，不須獻功時。賈之者，物不正齊，當以泉計通功。鄭司農云：「苦讀為監。謂分別其縑帛與布紵之麤細，皆比方其大小，書其賈數而著其物，若今時題署物。」【疏】「凡授嬪婦功」者，授當讀如字。此嬪婦亦通內外言之。云「及秋獻功」者，謂夏之季秋。《毛詩·豳風·七月》云「九月授衣」，又云「八月載績」。傳云：「九月，霜始降，婦功成，可以授

冬衣矣。載績，絲事畢而麻事起矣。」是婦功成於秋末之證。

注云「授當爲受，聲之誤也」者，段玉裁云：「凡字之誤，聲之誤，易之例皆曰當爲。」賈疏云：「以其上文已授女功，故知此爲受。」詒讓案：此又言授嬪婦功者，爲下言獻功辨賈書楊之事發端，明必先授乃獻，《典絲》、《典臬》兩職並先言頒授而後言獻功，卽其證也。易拔、李光坡、姜兆錫並謂此不當破字，得之，注說誤。云「國中嬪婦所作，成卽送之，不須獻功時」者，賈疏云：「以其經受嬪婦功在秋獻功上，故不待秋獻功也。」案：鄭意當如賈說，蓋鄭既破授爲受，故以受嬪婦功爲受國中嬪婦無定時，對下秋獻功爲內人九御受獻有定時也。實則經云秋獻功，自統內外嬪婦言之，注說非經義也。云「賈之者，物不正齊，當以泉計通功」者，賈疏云：「婦人雖等受絲臬，作有麤細善惡，故以泉計而通爲功。布絹惡者盡其材猶不充功，布絹善者少送以充功直，故云泉計通功也。」鄭司農云「苦讀爲鹽」者，舊本脫「云」字，今據宋婺州本校補，賈疏述注亦有。段玉裁云：「《毛詩·鴛羽》傳云：『鹽，不功至也。』《四牡》傳云：『鹽，不堅固也。』杜子春於《鹽人》讀苦爲鹽，謂出鹽直用不凍治，意義正同。依《說文》則鹽爲河東鹽池，亦非正字也。《鹽人》『苦鹽』，讀爲鹽，而下文云『鬻鹽』，鄭云『凍治之』。

然則凡鹽之粗穠者爲鹽，因爲凡物粗穠者之名也。」案：段說是也。《呂氏春秋·誣徒篇》云「從師苦而欲學之功也」，高注云：「苦，讀如鹽會之鹽，不精至也。」《史記·五帝本紀》「器皆不苦廬」，《正義》云：「苦，讀如鹽，廬也。」又《平準書》云：「鐵器苦惡。」《國語·齊語》云「辨其功苦」，韋注云：「苦，脆也。」《淮南子·時則訓》云「工事苦慢」，高注云：「苦，惡也。」則苦不破字亦可通。云「謂分別其縑帛與布紵之麤細，皆比方其大小」者，《敘官》注云：「辨，別也。」先鄭以《典絲》云「受良功」，《典臬》云「受苦功」，故以良功爲絲功縑帛，苦功爲臬功布紵也。賈疏云：「司農之意以典婦功是都司總掌，故分別布帛。其典絲卽唯主絲，絲爲良者也。典臬唯主布，布爲苦者也。若後鄭之義，卽以典婦功主良，典絲、典臬主苦者。又以絲臬之中各自有苦良。若然，經云苦謂就良中苦者也。」詒讓案：此辨苦良，比小大，與《內宰》云「比其小大與其麤良」同義。比麤良者，謂校其絲功與臬功也。比小大者，通絲帛臬布，校其功之麤疏與精密也。先鄭蓋以縑帛細與布紵麤釋經之苦良，而縑帛布紵中又各有麤細二等，麤者謂之大，細者謂之小。受功時又通校之。據經云辨其苦良，則此官無論苦功良功，通主其授受辨比之事，不得謂專受良功也。此當以

先鄭說爲正。賈申後鄭說，謂經云苦謂就良中苦者，失之。互詳《內宰》及《典絲》、《典臬》疏。云「書其賈數而著其物」者，《職幣》注云：「揭之，若今時爲書以著其幣。」謂以木爲杙，而書其賈數以附著其物之上，故謂之揭。詳《職幣》、《職金》疏。云「若今時題署物」者，《釋名·釋書契》云：「書稱題，題，諦也，審諦其名號也。亦言第，因其第次也。書文書檢曰署，署，予也，題所予者官號也。」蓋漢時凡書物有所表識，亦謂之題署，故舉以爲況。以共王及后之用，頒之于內府。【疏】「以共王及后之用，頒之于內府」者，與內府爲官聯也。賈疏云：「此於典絲、典臬處受其良好者，入此典婦功藏之，待王及后之用，故藏之於內府也。」詒讓案：《大府》注以內府爲受藏之府。又其府藏在內，故嬪婦之功共王及后之用者，亦頒藏於彼。彼職不言共王及后之用者，文不具也。

周禮正義卷十五

典絲掌絲人而辨其物，以其賈褐之。

人，謂九職之嬪婦所貢絲。【疏】「掌絲人而辨其物」者，謂外嬪婦所入絲織、縑帛及染人所入黼畫組就之物，質有善惡，功有精麤，所施不同，皆辨異之以待用也。 注云

「絲入，謂九職之嬪婦所貢絲」者，據《大宰》及《閭師》文。賈疏云：「后宮所蠶之絲，自於后宮用之以爲祭服，不入典絲。其歲之常貢之絲，若《禹貢》兗州貢漆絲之等，且餘官更無絲人之文，亦當入此典絲也。」案：《禹貢》絲帛等爲筐貢，《書》孔疏引鄭注云：「貢其實於筐者，入於女功。」賈蓋據彼注義。彼云入女功者，即謂典婦功官，明典婦功爲此官之長，當監涖同受之也。 掌其藏與其出，以待興功之時。 絲之貢少，藏之出之可同官也。 時者，若溫煖宜縑帛，清涼宜文繡。【疏】「掌其藏與其出」者，藏謂入絲時受而藏之，出即下頒絲及賜予皆授之是也。 注云

「絲之貢少，藏之出之可同官也」者，對《大府》云「頒其貨于

受藏之府，頒其賄于受用之府」，是掌貨賄者藏出不同官，此職藏出同掌，明以絲貢較少，一官可以兼之，不煩兩設也。云「時者，若溫煖宜縑帛，清涼宜文繡」者，《說文·火部》云：「煖，溫也。」《糸部》云：「縑，并絲繒也。」《急就篇》

「綈絡縑練素帛蟬」，顏注云：「縑之言兼也，并絲而織，甚細密也。帛，總言諸繒也。」案：溫煖謂春夏時，清涼謂秋冬時。賈疏云：「文繡必於清涼者，以其文繡染絲爲之，若於夏暑，損色，故待秋涼爲之也。」頒絲于外內工，皆以物授之。 外工，外嬪婦也。 內工，女御。【疏】「皆以

物授之」者，賈疏云：「若縑帛則授之以素絲，若文繡則授之以綵絲，故以物而言也。」 注云「外工，外嬪婦也」者，

呂飛鵬云：「即上注所云國中嬪婦也。」云「內工，女御」者，

賈疏云：「上《典婦功》云「凡授嬪婦功」，并有九嬪世婦。

此注內工不言嬪婦直云女御者，案：《內宰職》教女御以作

二事及《九嬪職》教九御以婦職，則女御專於絲枲也。」詒讓

案：《敍官》內司服、縫人皆以女御役十女工，是女御爲女

工之監領，內宮容更有散員女工共女御之役者。此內工即

女御與衆女工治絲枲者之通稱也。 凡上之賜予，亦

如之。 王以絲物賜人。【疏】注云「王以絲物賜人」者，

亦謂好賜也，詳《大府》疏。及獻功，則受良功而藏之，辨其物而書其數，以待有司之政令，上之賜予。良當爲苦，字之誤。受其蠶鹽之功，以給有司

之公用。其良功者，典婦功受之，以共王及后之用。鄭司農云：「良功，絲功，縑帛。」【疏】「及獻功」者，賈疏云：「卽上《典婦功》云『秋獻功』是也。」云「則受良功而藏之」者，此官爲絲帛受藏受用之府，故於外嬪婦人絲功則受之也。絲功亦有苦者，經對臬功則云良功，詳後疏。云「辨其物而書其數」者，絲有縷數，《西京雜記》：「鄒長倩《遺公孫弘書》云：五絲爲縷，倍縷爲升，倍升爲緘，倍緘爲紀，倍紀爲綬，倍綬爲綬。」《詩·召南·羔羊篇》說素絲，云五紵、五緘、五總，毛傳釋紵總並云數也。案：總當與綬同。又《月令·季春》云：「蠶事既登，分繭稱絲效功。」是絲人又須稱其輕重，若《弓人》云「絲三邸」，其帛則有匹束廣狹長短之數，《內宰》所謂度量淳制是也，受功時則皆書之。 注云

「良當爲苦，字之誤」者，賈疏云：「以其典絲、典臬授絲臬，使外內工所造縑帛之等，良者入典婦功，以共王及后之用，故典臬直有苦者而無良者，明典絲亦不得有良者，故破良爲苦。必從苦者，見《典婦功》有良苦之字，故破從苦，苦卽

蠶鹽者也。」案：經自以絲功爲良功，對臬功爲苦功，鄭、賈說失之。云「受其蠶鹽之功以給有司之公用，其良功者，典婦功受之，以共王及后之用」者，鄭謂絲功亦自有良苦，良功別使典婦功受之，以供王及后之用，典絲惟受苦功以給有司之用，申明其破良爲苦之意也。然《典婦功》云「辨其苦良」，既良苦通辨之，則不專受良功可知，鄭說亦誤。有司謂專主用絲臬者之官，蓋若內司服、司服、屨人、弁師之屬。詳《宰夫》疏。鄭司農云「良功，絲功，縑帛」者，賈疏云：「先鄭之意以爲絲功爲良，臬功爲鹽，故不破良爲苦。玄既不從，引之在下者，亦得爲一義故也。」鄭鏐云：「典絲之職以絲爲主，則獻功之時受絲功之縑帛，故曰受良功。蓋物之美者曰良，絲視麻爲美，絲功謂之良功，典絲受之；麻功謂之苦功，典臬受之。」案：鄭鏐說是也。黃以周說同。先鄭不破字，謂凡絲功並爲良功，無論精粗此官通受之。其說較後鄭爲長。 凡祭祀，共黼畫組就之物。以

給衣服冕旒及依盥巾之屬。白與黑謂之黼。采色一成曰就。【疏】「凡祭祀」者，賈疏云：「謂祭祀天地、宗廟、社稷、山川之等，故言凡以廣之。」云「共黼畫組就之物」者，此兼共色絲也。凡色絲皆典絲先共素絲人染人染訖，仍入典絲以共用。《說文·糸部》云：「組，綬屬也。其小者以爲

冠纓。」段玉裁云：「織成之綬材謂之組。《玉藻》綬必連組，曰玄組綬，朱組綬是也。」賈疏云：「凡祭服皆畫衣繡裳，但裳繡須絲，衣畫不須絲而言共絲者，大夫以上裳皆先染絲，則玄衣亦須絲爲之乃後畫，故兼衣畫而言之也。組就者，謂以組爲冕旒之就，故組就連言之。」注云「以給

衣服冕旒及依盥巾之屬」者，謂典絲共色絲以給作此諸物之用。旒，旒之俗，詳《弁師》疏。賈疏云：「衣服釋經黼畫。但周之冕服九章，衣五章，裳四章。龍袞已下直言黼者，據美者而言，謂若《詩》云「玄袞及黼」，《商書》云「麻冕黼裳」之類。冕旒者，釋經組就，謂若《弁師》云十二就之等。依者亦釋經黼，此據祭祀，謂若《掌次》「大旅上帝設皇邸」，邸卽屏風爲黼文。盥巾者，亦釋經黼，謂若《冢人》「職云「王巾皆黼」之類。」案：賈以依爲《掌次》之皇邸者，嫌祭禮黼依無見文也。今攷《士虞記》云「佐食出戶負依」，則天子祭禮有黼依可知。《掌次》皇邸雖與依形制略同，然經注並無畫黼之文，不可以釋此注之依也。詳《掌次》、《司几筵》疏。云「白與黑謂之黼」者，據《畫績》文。云「采色一成曰就」者，《弁師》：「王之五冕五采，纁十有二就。」注云：「就，成也。」又《大行人》注云：「每一處五采備爲一就。」案：成備義同。凡會合采色以爲文飾，采備爲就，若《典

瑞》圭璧纁五采五就，三采三就，二采再就等，並以五采三采二采備爲一就，惟一采不言就。《巾車》之樊纓，《弁師》之冕纁，凡言就者義並同。但此典絲所共組就，織采絲所爲，蓋專據冕旒言之。其《典瑞》纁藉，《巾車》樊纓，依鄭說爲畫韋及采闕，並非典絲所共也。采就亦詳《典瑞》疏。喪紀，共其絲纁組文之物。以給線纁，著盱口綦

握之屬。青與赤謂之文。【疏】「喪紀共其絲纁組文之物」者，《說文·糸部》云：「纁，絮也。絮，敝綿也。」案：凡纁者爲絲，不纁者爲纁，卽今之絲絛。組文並以絲織成。四者皆絲物，故此官共之。喪紀，詳《庖人》疏。注云「以

給線纁，著盱口綦握之屬」者，賈疏云：「此鄭並據《士喪禮》而言。線纁者，謂所裁縫皆用線纁，釋經絲也；著盱口綦握者，釋經纁組。案《士喪禮》：「握手，玄纁裏，著組繫。」案《喪大記》：「屬纁以俟絕氣。」《內則》云「屨著綦」，鄭云「綦，屨繫」。是用纁組之事也。」案：以《士喪禮》攷之，自賈所舉外，斂襲時亦用纁組，又有纁瑱、纁極。又幘目有著組，決有組繫，髻亦用組。又屨有組綦，則卽《內則》之屨綦也。通校《士喪》上下篇，無纁組著盱之文，賈此疏亦未釋。竊疑「盱」乃「擊」字之誤，著擊卽謂握，《士喪記》云「設握裏親膚，繫鉤中指，結于擊」是也。蓋鄭以給線纁

釋經文之絲，①以著口釋經之纁，而以綦握釋經之組，以絲纁組三者，喪紀所用處多，故略舉以咳其餘也。云「青與赤謂之文」者，據《畫纁》文。但此文爲繒帛有文采者之通名，喪紀用文，若《縫人》棺飾所用文繡是也。實不定爲青赤兩采，鄭約舉記文以見義耳。凡飾邦器者，受文織絲組焉。謂茵席屏風之屬。【疏】「凡飾邦器者，受文織絲

組焉」者，謂掌飾器之有司來受絲物，此官則授之也。《玉府》注云：「文織，畫及繡錦。」案上喪紀共「絲纁組文」，凡四物，此飾邦器則不用纁，故經唯云「文織絲組」。蓋文織爲二物，上經通謂之文；絲組亦爲二物，則與上經同。詳《玉府》疏。注云「謂茵席屏風之屬」者，賈疏云：「上

既言祭祀喪紀所用絲纁訖，今復云飾邦器，故知此據生人所設器物言。茵者，謂若《少儀》云枕几茵穎之等，鄭云「茵，著蓐」是也。席者，謂席之四緣，若《司几筵》云紛純、畫純、黼純、纁純之等是也。②屏風者，即上文注黼依也。重言之者，上據祭祀時，此據爲王所用，謂若《司几筵》云依前者是也。」案：屏風，詳《掌次》、《司几筵》疏。歲終，則各以其物會之。種別爲計。鄭司農云：「各以其所飾之物，計會傳著之。」【疏】「歲終」者，亦夏之季冬也。

詳《宰夫》疏。云「則各以其物會之」者，此正絲物出入之歲會，即此官之官成也。注云「種別爲計」者，《廣雅·釋詁》云：「種，類也。」謂凡絲物，每一種類別爲計簿。鄭司農云「各以其所飾之物，計會傳著之」者，先鄭謂此經亦冢上飾邦器爲文，所會者止謂文織絲組諸共飾之物，計其數而傳著爲簿書。其說未咳，後鄭所不從也。

典臬掌布總縷紵之麻草之物，以待時頒功而授齋。縷，十五升布抽其半者。白而細疏曰

紵。雜言此數物者，以著其類衆多。草，葛藟之屬。故書齋作資。【疏】「掌布總縷紵之麻草之物」者，縷，唐石經作絲，誤。今從宋本。《說文·巾部》云：「布，臬織也。」《糸部》云：「縷，綫也。」凡麻紵等，並先爲綫縷而後成布。自疏衰三升，至麻冕之布三十升爲最精，詳《冢人》、《司服》、《弁師》疏。麻即臬也，詳《敍官》疏。賈疏云：「欲見布總縷用麻之物，紵用草之物，布中可以兼用葛藟之草爲

①「文」，原作「釋」，據楚本改。

②「纁」，原訛作「黼」，今據楚本改。

③「系」，原訛作「糸」，今據《說文》改。

之。」云「以待時頒功而授齋」者，亦如典絲待興功之時，《毛詩·豳風·七月》傳謂「八月麻事起」是也。時至，此官則頒之以職事，復授之以臬葛之材也。賈疏云：「亦如《典婦功》注謂以女功事來取者。」注云「總十五升布抽其半者」者，^①據《喪服傳》文。鄭彼注云：「布八十縷爲升，升

字當爲登，登，成也。」又云：「謂之總者，治其縷細如絲也。或曰有絲，^②朝服用布，何衰用絲乎？抽猶去也。」又《裸

記》：「朝服十五升去其半而總。」注云：「總，精麤與朝服同，去其半則六百縷而疏也。」《釋名·釋喪制》云：「總，絲也，績麻細如絲也。」《說文·糸部》云：「總，十五升布也。一曰兩麻一絲布也。」案：依鄭說則總布六百縷，依許說則千二百縷，許是也。《喪服傳》云「十五升布抽其半」者，謂有事者六百縷，無事者亦六百縷耳。二鄭《禮》注，並失其義。許又引一曰兩麻一絲布者，此誤說，與《喪服》注所引或說同，則鄭已辟之矣。互詳《司服》疏。云「白而細疏曰紵」者，《說文·糸部》云：「紵，繅屬，細者爲紵，粗者爲紩。」《一切經音義》引《說文》作「白而細爲紵」。《詩·陳

風·東門之池》孔疏引陸璣疏云：「紵亦麻也。科生數十莖，宿根在地中，至春自生，不歲種也。荆揚之間一歲三收。今官園種之，歲再刈，刈便生。剥之以鐵若竹，挾之，

表厚皮自脫，但得其裏韌如筋者煮之。用緝謂之微紵。今

南越紵布皆用此麻。」案鄭云白而細疏者，謂其布色白縷細而疏，猶今之細白紵布以爲夏衣。《喪大記》云：「絺綌紵不入。」注云：「當暑之褻衣也。」云「雜言此數物者，以著其類衆多」者，明麻草所績之物衆多，不可備數，故雜舉布縷紵四者以概之。云「草，葛縷之屬」者，《掌葛》「徵草貢之材於澤農」，注亦云「縷紵之屬」。《廣韻·四十一迴》云：

「縷同縷。」《說文·林部》云「縷，泉屬」，引《詩》曰「衣錦縷衣」。《裸記》字作「縷」，注云：「縷，草名。無葛之鄉去麻則用縷。」《證類本草》云：「苧實。」唐本注云：「一作縷字，人取皮爲索者也。」《圖經》云：「北人種以績布及打繩索，苗高四五尺，或六七尺，葉似苧而薄，花黃，實帶殼如蜀葵，中子黑色。」陳啓源云：「苧麻，一名縷麻，葉大如桐，華黃，夏開，北土最多，其皮可績。」《詩·碩人》「褻衣」，《說文》「縷，泉屬」。縷、褻、苧、縷字同，正此麻也。」案：陳說是也。此二者皆艸之類，泉可績者，故典泉并掌之矣。葛，詳《掌葛》疏。云「故書齋作資」者，段玉裁云：「《典婦功職》，

^①「布」，原訛「半」，今據楚本改。
^②「曰」，原脫，今據《儀禮注》補。

杜讀資爲齋。此不言杜讀者，鄭時書作齋而從之，亦是省文互見。」及獻功，受苦功，以其賈揭而藏之，以待時頒。其良功亦入於典婦功，以共王及后之用。鄭司農云：「苦功謂麻功布紵。」【疏】「及獻功受苦功」者，此官爲臬布受藏受用之府，故於秋獻功之時，外嬪婦以臬功來人則受之也。臬功亦有良者，經對絲功則云苦功。云「以待時頒」者，賈疏云：「卽下文頒衣服及賜予是也。」

注云「其良功亦入於典婦功，以共王及后之用」者，與《典絲》注義同。鄭意麻功亦有良苦之別，以良功入典婦功，故經止云苦功。然經自以臬功與絲功相對爲良苦，後鄭說亦失之。鄭司農云「苦功謂麻功布紵」者，亦讀苦爲鹽也。《喪服》「齊衰」傳云：「冠者，沽功也。」注云：「沽猶羸也。」苦沽亦聲同字通。先鄭以麻功羸於絲功，故謂之苦功，對典絲絲功爲良功。此義亦校後鄭爲長，詳《典絲》疏。頒衣服，授之，賜予亦如之。授之，授受班者。帛言待有司之政令，布言班衣服，互文。【疏】「頒衣服授之」者，與《大宰》「匪頒」義同，謂常賜也。云「賜予亦如之」者，謂好賜非常秩者。詳《大宰》及《大府》疏。注云「授之，授受班者」者，謂待當班者來則授之也。經云頒注云班

者，蓋亦讀頒爲班，詳《大宰》疏。云「帛言待有司之政令，布言班衣服，互文」者，謂互文見義，帛亦有班衣服，布亦待有司之政令也。賈疏云：「帛謂典絲，布謂典臬，據成而言。知爲互文者，以其典絲、典臬俱不爲王及后之用者，將頒賜，故知互見爲義也。」案：賈亦依鄭義，謂王及后所用並入典婦功也。然亦非經義。歲終，則各以其物會之。【疏】歲終則各以其物會之」者，此正臬物出入之歲會，亦卽此官之官成也。

內司服掌王后之六服，褱衣，揄狄，闕

狄，鞠衣，展衣，緣衣，素沙。鄭司農云：「褱衣，畫衣也。《祭統》曰：『君卷冕立于阼，夫人副褱立于東房。』揄狄、闕狄，畫羽飾。展衣，白衣也。《喪大記》曰：『復者朝服，君以卷，夫人以屈狄，世婦以褱衣。』屈者音聲與闕相似，褱與展相似，皆婦人之服。鞠衣，黃衣也。素沙，赤衣也。」玄謂狄當爲翟。翟，雉名，伊雉而南，素質，五色皆備成章曰翟；江淮而南，青質，五色皆備成章曰搖。王后之服，刻繒爲之形而采畫之，綴於衣以爲文章。褱衣畫翟者，揄翟畫搖者，闕翟刻而不畫，此三者皆祭服。從王

祭先王則服褱衣，祭先公則服揄翟，祭羣小祀則服闕翟。今世有圭衣者，蓋三翟之遺俗。鞠衣，黃桑服也，色如鞠塵，象桑葉始生。《月令》：「三月薦鞠衣于上帝，告桑事。」展衣，以禮見王及賓客之服，字當爲禮，禮之言亶，亶，誠也。《詩·國風》曰「玼兮玼兮，其之翟也」，下云「胡然而天也，胡然而帝也」，言其德當神明。又曰「玼兮玼兮，其之展也」，下云「展如之人兮，拜之媛也」，言其行配君子。二者之義與禮合矣。《雜記》曰：「夫人復稅衣、揄狄。」又《喪大記》曰：「士妻以祿衣。」言祿者甚衆，字或作稅。此緣衣者，實作祿衣也。祿衣，御于王之服，亦以燕居。男子之祿衣黑，則是亦黑也。六服備於此矣。褱、揄、狄、展，聲相近，緣，字之誤也。以下推次其色，則闕狄赤，揄狄青，褱衣玄。婦人尚專一，德無所兼，連衣裳不異其色。素沙者，今之白縛也。六服皆袍制，以白縛爲裏，使之張顯。今世有沙穀者，名出于此。【疏】「掌王后之六服」者，此辨后服名物尊卑之差，卽此官之官法也。六服者，一褱衣，二揄狄，三闕狄，四鞠衣，五展衣，六緣衣是也。《玉海·車服》引《三禮義宗》云：「陽爻九，故王服有九；陰爻六，故后服惟六。天子九服，祭服有六；王后六服，祭服有三。陽色尚文，故有章數等級之別；陰色尚質，故無殊章之品。」云

「緣衣」者，《釋文》云：「緣或作祿。」案：經注緣字並當作綠，後鄭改爲祿，或本依鄭義改，非其舊也。詳後。云「素沙」者，賈疏云：「此非服名。六服之外別言之者，此素沙與上六服爲裏，使之張顯。但婦人之服不殊裳，上下連，則此素沙亦上下連也。王之吉服有九，韋弁已下，常服有三，與后鞠衣已下三服同。但王之祭服有六，后祭服唯有三翟者，天地山川社稷之等，后夫人不與，故三服而已。必知外神后夫人不與者，案《內宰》云：「祭祀裸獻則贊。」天地無裸，言裸唯宗廟。又《內宗》、《外宗》佐后皆云宗廟，不云外神，故知后於外神不與。是以《白虎通》云：《周官》祭天，后夫人不與者，以其婦人無外事。」孔廣森云：「禮，婦人從夫之服位。男子冕弁之服凡有九等，婦服此唯見六服者，外祀武甸非后所有事，故不備其服。今差次之：蓋褱衣視衮冕，揄狄視鷩冕，闕狄視毳冕，鞠衣視希冕，禮衣視玄冕，稅衣視爵弁，錫衣視冠弁，宵衣視玄端。何以明之？《記》曰：「君衮冕立於阼，夫人副褱立於房中。」是褱衣視衮冕也。《玉藻》曰：「王后褱衣，夫人揄狄，君命屈狄，再命褱衣。」鄭曰：「侯伯之夫人揄狄，子男之夫人闕狄。」是揄狄視鷩冕，闕狄視毳冕也。鄭曰：「其夫孤也，則服鞠衣。」孤之服自希冕而下，是鞠衣視希冕也。《喪大記》曰：「復，大

夫以玄纁，世婦以禮衣。」玄上纁下，冕服之色，大夫一命而冕，世婦一命而禮，故《玉藻》曰「一命禮衣」，是禮衣視玄冕也。《喪大記》曰：「復，士以爵弁，士妻以稅衣。」《雜記》曰：「諸侯以褒衣、冕服、爵弁服，夫人以稅衣揄狄、狄稅素沙。」亦以狄比冕服，稅比爵弁服，是稅衣視爵弁也。《少牢饋食禮》：「主婦被錫衣侈袂。」錫衣者，緇衣也。主人朝服布，主婦緇衣亦布，是錫衣視冠弁也。《特牲饋食》主人冠端玄，主婦纁笄宵衣，是宵衣視玄端也。」案：孔分配男服，自鞠衣以上與鄭義同。禮衣視玄冕，稅衣視爵弁，亦依鄭《禮記注》義。《喪大記》之禮衣，即此展衣，稅衣即此緣衣也。綜而論之，展衣以上，鄭義差次甚當。其緣衣，依鄭此職及《追師》注義，服次者視弁服、冠弁服，服纁笄者亦曰宵衣，則視玄端服，並未盡精析。今依孔說，參之《禮經》，蓋女子次緣衣，視男子之爵弁、皮弁服；女子被錫衣，視男子之冠弁朝服；女子纁笄宵衣，視男子之玄端服。宵衣即錫衣而以綃爲領者，與緣衣實不同，此經無者，亦文不具也。又依鄭義，此王后六服當皆侈袂，然於經無文，未知是否。詳《追師》疏。

注鄭司農云「裋衣，畫衣也」者，賈疏云：「先鄭意裋衣不言狄，則非翟雉。知畫衣者，以王之冕服而衣畫，故知后衣畫也。」呂飛鵬云：「《說文·衣部》

云：「《周禮》曰王后之服裋衣，謂畫袍。」說與先鄭合。」詒讓案：許云袍者，即後注所謂六服皆袍制也。裋衣，後鄭謂「以繒刻翟雉爲飾」，則自當與揄翟、闕翟同名。今不名翟而名衣，明與二翟異制。賈疏謂「以其衣是服之首，故自言衣」，蓋曲說也。竊謂當以先鄭及許畫衣之說爲長。《穆天子傳》云：「天子大服冕裋。」冕裋者，蓋衮冕之服。后之裋衣視王之衮冕服，衮衣有畫章，故亦謂之裋衣，猶婦人有緣衣，《士喪禮》及《雜記》名男子玄端服之連衣裳者亦曰緣衣也。此可證司農畫衣之說。或當如《釋名》說衣畫翟雉之形，若九章之有華蟲耳。儻云「繒刻雉形」，則不可通於男子之衮衣矣。郭璞注《穆傳》云：「裋衣，蓋王后之上服，今帝服之，所未詳。」殆未達其義。引《祭統》曰「君卷冕立于阼，夫人副褱立于東房」者，證褱衣與男子衮冕相當也。賈疏云：「彼據二王後夫人助祭服褱衣，與后同也。」云「揄狄、闕狄，畫羽飾」者，《廣雅·釋器》云：「狄，羽也。」呂飛鵬云：「《說文·衣部》云：「揄，揄翟，羽飾衣。」據此則揄爲正字，揄爲假借。《毛詩·鄘風·君子偕老》傳云：「揄翟，闕翟，羽飾衣也。」毛、許皆不言畫，與先、後鄭異。」詒讓案：先鄭蓋亦讀狄爲翟，但以狄爲雉羽，而揄非雉名。毛、許說亦略同。依後鄭說則揄爲翟之段字，依許說則自有本

字，此許、鄭說字之異。畫羽飾，蓋謂以采色畫鳥羽，綴之衣以爲飾。毛、許止云羽飾衣不言畫者，文省。三君說實同也。但衣以羽飾，於制未協。《君子偕老》孔疏引孫毓云：「自古衣飾山、龍、華蟲、藻、火、粉米及《周禮》六服，無言以羽飾衣者。羽施於旌旂則可，施於衣裳則否。蓋附人身，動則卷舒，非可以羽飾故也。鄭義爲長。」案：孫說是也。陳啓源據《左》昭十二年傳有「秦復陶翠被」，胡承珙據《樂師》先鄭注云「聖舞者衣飾翡翠之羽」，《說苑·善說篇》「襄成君衣翠衣」，證古衣服有用羽飾者。然彼皆非禮法之服，不可以釋此經。《詩·君子偕老篇》又以二翟爲象服，孔疏謂以象骨飾服，尤謬。云「展衣，白衣也」者，後鄭《詩·邶風·綠衣》、《邶風·君子偕老》箋及《釋名·釋衣服》義並同。《說文·衣部》云：「衰，丹縠衣也。」案：許以衰爲正字，則展爲同聲假借字。《君子偕老》毛傳亦云：「禮有展衣者，以丹縠爲衣。」《詩釋文》云：「檀衣，毛氏，馬融皆云色赤。」說並與鄭異。孔廣森云：「《詩》言『璫兮璫兮，其之展也』。《說文》曰：『璫，玉色鮮白。』以玉之白喻衣之白，則展衣白信矣。」案：孔說是也。引《喪大記》曰「復者朝服，君以卷，夫人以屈狄，世婦以檀衣」者，證屈檀文異。云「屈者音聲與闕相似，檀與展相似，皆婦人之服」

者，明此經與《禮記》文異義同。屈、闕、檀、展，古音並同部，故云音聲相似。屈，《玉篇·糸部》又作「繩」，則俗字也。云「鞠衣，黃衣也」者，《綠衣》箋義同。云「素沙，赤衣也」者，蓋釋沙爲丹沙也。《周書·王會篇》云：「卜人以丹沙。」先鄭意素沙別爲一服，以生帛爲之而以丹沙染其色也。然經傳凡言素者並爲白，不當爲赤。且經明言六服，如先鄭說素沙爲一服，則有七服，故後鄭不從。云「玄謂狄當爲翟」者，據《詩·邶風》字作翟，明狄爲段字，翟爲正字也。《巾車》后路重翟、厭翟、翟車亦並作翟，翟狄聲近字通。《書·禹貢》「羽畎夏翟」，《染人》注及《漢書·地理志》引並作「夏狄」是也。云「翟，雉名」者，《爾雅·釋鳥》云：「鵠，山雉。」彼《釋文》鵠作翟，郭注云：「鵠，長尾者。」《說文·羽部》亦云「翟，山雉尾長者」。是翟爲雉名也。案：依《爾雅》，則翟與翟、搖各爲十四雉之一種。後鄭之意，則翟爲雉之大名，翟、搖爲翟之種別，故此咸通言翟也。《染人》注亦以夏狄爲六雉總名，與此注義同。《唐郊祀錄》引《三禮圖》云：「婦人祭服所以用雉爲飾者，取其專一之德，復有文采之華，故用之以飾衣也。」云「伊雉而南，素質五色皆備成章曰翟，江淮而南，青質五色皆備成章曰搖」者，亦《釋鳥》文。今本《爾雅》雖作洛，五色作五采，搖作鵠。《說

文·佳部《說十四雉之名，亦作搖。鵠爲鷺鳥，非雉名，當從搖爲正。伊雉字亦不當作洛，詳《職方氏》疏。《釋鳥》郭注云：「翬亦雉屬，言其毛色光鮮，王后之服以爲飾。鵠卽鷺雉也，亦王后之服以爲飾。」郭卽本鄭義。云「王后之服，刻繒爲之形而采畫之，綴於衣以爲文章」者，此統裋衣、揄翟二服而言。《說文·刀部》云：「刻，鏤也。」謂鏤繒爲雉形，而復畫之，備五采以綴衣也。今案：裋衣疑不當以繒刻雉形，後鄭說未塙。云「裋衣畫翬者，揄翟畫搖者，闕翟刻而不畫」者，《玉藻》裋衣、揄狄、屈狄注云：「裋讀如翬，揄讀如搖，翬搖皆翟雉名也。刻繒而畫之，著於衣以爲飾，因以爲名也。後世作字異耳。屈，《周禮》作闕，謂刻繒爲翟，不畫也。」案鄭意，裋揄皆畫文，如其雉，闕狄不畫翟名，故謂不畫也。《禘記》說棺飾有揄絞，注亦謂「絞繒，畫翟雉」，與此義同。《釋名·釋衣服》云：「王后之上服曰裋衣，畫翬雉之文於衣。搖翟，畫搖雉之文於衣。闕翟，翦闕繒爲翟雉形以綴衣也。」《北堂書鈔·衣冠部》引《三禮圖》云：「揄翟，刻青翟形，采畫雉，綴於衣。闕翟，刻赤繒爲翟形，而不采畫，綴於衣也。」依《禮圖》述鄭義，則三翟裋玄、揄青、闕赤皆如其色，刻繒爲之。《詩·君子偕老》之「象服」，鄭箋謂指揄翟、闕翟。象，豫字通。史游《急就篇》云：

「豫飾刻畫無等雙。」是女服有刻畫爲飾。但劉以翦闕釋闕翟。《玉藻》孔疏則謂取直刻雉形，闕其采畫。未知孰是。劉釋裋衣搖翟皆不云綴繒，亦與鄭義小異。陳祥道云：「三翟蓋皆畫之於衣，如王冕服。崔靈恩謂三翟數皆十一，王者之後諸侯夫人、三公而下夫人，雉數如命數。於理或然。」案：陳蓋兼采先鄭及劉氏說。其引《三禮義宗》王后以下翟數之說，亦未知然否。云「此三者皆祭服」者，賈疏云：「對鞠衣以下非祭服也。」云「從王祭先王則服裋衣，祭先公則服揄翟，祭羣小祀則服闕翟」者，《舊唐書·儒學傳》引《三禮義宗》、《書鈔》引《三禮圖》說並同。賈疏云：「鄭言此者，欲見王后無外事，唯有宗廟分爲二，與王祀先王袞冕、先公鷩冕同差，羣小祀王玄冕，故后服闕翟。」《唐書》引《義宗》又云：「王后無助祭天地五嶽，故自先王以下，無助祭天地四望之服。」案：凡婦人從夫行禮，服次必相配，此注以後裋衣視王袞冕，后揄翟視王鷩冕是也。惟闕翟依後注說內外命婦服次及《喪大記》注義，則當視毳冕。今祭羣小祀，王玄冕則后當展衣，而鄭嫌展衣非三翟，不可以爲祭服，故徑以闕翟當之。然於差次，究嫌錯互。又據此注及《屨人》疏引《鄭志》，說此三祭皆從王。今攷《司服》注云：「羣小祀，林澤墳衍四方百物之屬。」彼皆外祭，王后所不

與。唯女祝，王后有內祭祀、內禱祠，注以內祭祀爲宮中竈、門、戶，內禱祠爲疾病祈報。此注所云，疑即據彼言之。但宮中諸祀其禮甚殺，疑皆后自主之，王似不必與祭，不審鄭意果何指也。又《司服》「王饗射鷩冕」，《唐書》引《義宗》云：「搖狄，祭先公及饗諸侯則服之。」蓋崔氏雖不違鄭義，而仍以揄狄視鷩冕，故據《司服》王服，正後注后展衣見賓客之說，明三翟不能當六冕也。云「今世有圭衣者，蓋三翟之遺俗」者，孔廣森云：「《續漢·輿服志》曰：『自皇后以下，皆不得服諸古麗圭袞闥袷加上之服。』圭袞即圭衣也。」林頤山云：「注所舉以況三翟者，當舉圭衣中離袿有襪者言之也。《釋名·釋衣服》：『婦人上服曰袿。其下垂者，上廣下狹如刀圭。』圭衣實由是而得名。又《漢江充傳》：『充衣紗縠單衣，曲裾，後垂交輪。』張晏注：『曲裾如婦人衣。』蘇林注：『交輪，如今新婦袍上挂全幅繒角割，名曰交輪裁。』如淳注：『交輪，割正幅，使一頭狹若燕尾，垂之兩旁，見於後。是《禮·深衣》續衽鉤邊，賈逵謂之衣圭。』蓋自其所垂偏旁而言，交輪裁一頭狹，故《釋名》云「形如刀圭」，賈逵又云「衣圭」。自其垂之兩旁而言，兩旁尖長，中尖漸殺而短，故蘇林云「交輪裁」，如淳又云「若燕尾」。凡漢制，圭衣中離袿有襪。《文選》司馬長卿《子虛賦》「蜚襪

垂髻」。郭璞注：「司馬彪曰：襪，袿飾。髻，燕尾。」燕尾即圭衣。《漢司馬相如傳》張揖注：「襪，離袿。」即司馬彪所云「袿飾」。「離袿襪」又即《續漢志》「麗圭袞」。案：林說甚覈。圭衣即衣圭。如淳引賈景伯說，疑即此經注文，鄭說或本於賈也。《後漢書·光武紀》「諸子繡髻」，李注引《前書音義》云：「諸子，大掖衣，如婦人之袿衣。」袿衣亦即圭衣也。蓋漢時圭衣制最華麗，其刻繒爲飾者謂之髻，亦謂之襪離。《文選》傅毅《舞賦》：「華袿飛髻而雜纖羅。」纖羅亦即襪離。李注引司馬彪《上林賦》注云：「髻，燕尾也。衣上假飾。」據此諸文，知漢圭衣刻繒爲假飾，亦畫而綴之衣以爲華者，故鄭以爲三翟之遺俗也。至江充曲裾後垂交輪，蓋效婦人衣爲之，本非法服。如淳以爲即《深衣》之續衽，非也。《喪服》鄭注云：「婦人不殊裳，衰下無衽。」是婦人衣亦無衣旁垂如燕尾之衽，則圭衣削幅之與衽不相涉明矣。云「鞠衣，黃桑服也，色如鞠塵，象桑葉始生」者，《月令》鄭注亦云「鞠衣，黃桑之服」也。案：黃桑服即後世之緗色。《釋名·釋采帛》云：「緗，桑也，如桑葉初生之色也。《急就篇》：『鬱金半見緗白藪。』顏注云：『緗，淺黃也。』依鄭說，則「鞠衣」鞠爲鞠之借字，即《地官·敘官》注之「鞠𦑔」，《易緯稽覽圖》云「黃之色悖如鞠塵」是也。故賈

疏及《詩·君子偕老》孔疏並謂鞠黼字通。然漢唐人說鞠衣，多謂取秋華之鞠同色。《呂氏春秋·季春紀》：「天子乃薦鞠衣于先帝。」高注云：「《內司服》，王后之六服有菊衣，衣黃如菊花，故謂之菊衣。」《玉燭寶典》引《月令章句》云：「鞠衣，衣名，春服也。蓋菊華之色。」《釋名·釋衣服》云：「鞠衣，黃如鞠華色也。」《月令》孔疏亦云：「菊者，草名，花色黃。故季秋之月云『菊有黃華』，是鞠衣黃也。與桑同色，又當桑生之時，故云黃桑之服也。」與《詩疏》說異。王聘珍云：「孔本劉熙說，與鄭所云鞠塵者不合，其說非是。鞠卽黼黻之鞠，古無鞠字，《說文》作鞠，古與鞠通。《齊民要術》說作鞠之法，以青蒿上下舂之，置牀上三七二十一日，開看偏生黃衣乃止。」《釋名·釋飲食》云：「鞠，朽也，鬱之使生衣。」案：王說是也。黃華之鞠，見《蠲氏》，其字借鞠爲之。既不作鞠，又不可以言塵。陸氏《周禮》、《毛詩》、《禮記》釋文並兩存其音，而不能決，蓋咸未達鄭旨矣。云「《月令》三月薦鞠衣于上帝，告桑事」者，引證鞠衣爲桑服。今《禮記》「上帝」作「先帝」，鄭彼注云：「爲將蠶求福祥之助也。先帝，太皞之屬。」《唐書》引《三禮義宗》云：「鞠衣以采桑則服之。」《書鈔》引《三禮圖》云：「鞠衣，王后親桑之服也。」賈疏云：「謂季春將蠶，后服之，告先帝

養蠶之服。」案：據崔、賈說，蓋薦之於神以告桑，遂服以親桑親蠶，故《追師》注亦謂編服之以桑，與此衣正相配也。云「展衣以禮見王及賓客之服」者，《詩·君子偕老》箋亦云「展衣，此以禮見於君及賓客之盛服也。」《唐書》引《三禮義宗》、《書鈔》引《三禮圖》說亦同。賈疏云：「知義然者，以其鞠衣在上告桑之服，祿衣在下御於王之服，展衣在中，故以爲見王及賓客之服。但后雖與王體敵，夫尊妻卑，仍相朝事與賓同，諸侯爲賓客於王，后助王灌饗賓客，則后有見賓客之禮，是以亦服展衣也。若然，《內則》注夫人朝於君次而祿衣也者，彼注謂御朝也。」孔廣森云：「王以皮弁爲朝服，后以展衣爲朝服，取其色與皮弁素積相應。」案：鄭意蓋當如孔說。此注以展衣爲后以禮見王之服，猶《巾車》注謂安車爲后朝見於王所乘，皆指常朝言之。賈後疏引《大傳》注，謂后夫人朝服同展衣，而《內則》世子生則君沐浴朝服，夫人亦如之。鄭彼注則云「諸侯夫人朝於君次而祿衣也」與此注及《大傳》注義異。《追師》注謂「后見於王首服次」，然次祿衣乃燕見之服，《內則》明云朝服則與燕見服異。今以男女二服差次推之：天子朝服皮弁，则后當次祿衣；諸侯朝服冠弁，则夫人當纁笄宵衣。《毛詩·齊風·鸛鳴》傳謂夫人纁笄而朝，其說甚塢。鄭《三禮注》及

《大傳》注說，並與次不合。賈疏謂《內則》注次緣衣爲御朝；彼孔疏亦謂當御於君，故服進御之服。然後御見亦當纁笄宵衣，二說並非也。互詳《追師》疏。又賈釋見賓客爲從王灌饗賓客，蓋與《巾車》注謂厭翟爲后從王賓饗諸侯所乘同，《內宰》「凡賓客之裸獻，瑤爵」，注謂「后亞王禮獻」，卽其事也。但依崔靈恩說，后從饗賓客當服揄狄，亦不當服展衣。鄭、賈說未塙。詳前。云「字當爲檀，檀之言亶，亶，誠也」者，亦依《玉藻》、《雜記》、《喪大記》破展爲檀，與司農說同。《君子偕老》箋亦云「展衣字誤，《禮記》作檀衣」。亶，誠，《爾雅·釋詁》文，鄭述之以明名檀之義。馬瑞辰云：「《玉藻》『櫛用櫛櫛』，孔疏：『櫛，白理木也。』《說文》：『黹，白而有黑也。』《廣雅》：『白馬黑脊，驢。』古字從單、旦、亶聲者，多有白義。檀之色白，取義正同。《釋名》『檀衣，檀，坦也，坦然正白無文采也』。是矣。」案：馬說亦通。《釋名》說與鄭微異而字亦從檀，《說文》則展衣字作袞而不收檀字，許、鄭說亦異也。云《詩·國風》曰玼兮玼兮，其之翟也，下云胡然而天也，胡然而帝也，言其德當神明者，並《鄘風·君子偕老》文。《釋文》云：「玼音此。劉倉我反。本亦作瑳，與下瑳字同倉我反。」阮元云：「《詩釋文》『玼音此，本或作瑳，此是後文瑳兮。然舊本皆前作玼，

後作瑳」。按玼瑳聲相近。《說文》：「瑳，玉色鮮白。玼，玉色鮮也。」義亦同。然一書之中不當玼瑳錯出，《毛詩》「瑳兮」下，傳箋、王肅皆無說，明與前章同作玼也。此注玼亦作瑳。劉昌宗音倉我反。蓋《毛詩》前後皆作玼，《禮注》據魯、韓前後皆作瑳。今本合并爲一，以前後區別之，非也。案：阮說是也。馬瑞辰說同。陸所見或本不誤。毛傳亦以二翟爲釋，又云：「玼，鮮盛貌。尊之如天，審諦如帝。」鄭箋云：「胡，何也。帝，五帝也。」鄭引彼者，證三狄字當作翟，且爲祭服，故云德當神明也。云「又曰瑳兮瑳兮，其之展也，下云展如之人兮，邦之媛也，言其行配君子」者，毛傳亦以展衣爲釋，又云：「展，誠也。美女爲媛。」鄭箋云：「媛者，邦人所依倚以爲援助也。」此注引以證展衣爲以禮見王之服，故云行配君子也。云「二者之義與禮合矣」者，謂《詩》言天帝見二翟之爲祭服，言邦媛見展衣之爲禮見服，二義並與《禮》合也。引《雜記》曰「夫人復稅衣揄狄」，又《喪大記》曰「士妻以緣衣」者，證緣衣當爲緣衣。《夏采》注引《喪大記》緣作稅。阮元云：「今本《雜記》、《喪大記》皆作稅衣。據此注所引，知本作緣衣。下云字或作稅，當兼《雜記》、《喪大記》言之。賈疏云『或《雜記》文』，蓋賈所據《雜記》已作稅矣。《雜記》『其餘如士』，注云：『其

餘如士之妻，則亦用稅衣。《正義》本稅衣作緣衣，與此注正合，稅緣皆聲相近。」云「言緣者甚衆，字或作稅，此緣衣者實作緣衣也」者，呂飛鵬云：「《毛詩·綠衣》箋云：『綠當爲緣，字之誤也。緣衣黑。』《雜記》、《喪大記》皆作稅衣，康成破稅爲緣。此經緣衣，^①康成亦作緣，則鄭以緣爲正字。然注《士喪禮》緣衣云「古文緣爲緣」，則古無緣字審矣。《說文·衣部》無緣字。」詒讓案：經注緣衣字並當從《詩·邶風》孔疏引作綠衣。鄭所見《雜記》、《喪大記》稅衣字蓋並作緣，故定緣爲正字，而據以讀此經。《士喪禮》、《玉藻》亦並作緣衣，此不備引，故云言緣者甚衆也。云「緣衣，御于王之服，亦以燕居」者，于亦當作「於」。《唐書》引《三禮義宗》、《書鈔》引《三禮圖》說同。賈疏云：「案《尚書·多士傳》云：『古者后夫人侍於君前，息燭後，舉燭至於房中，釋朝服，襲燕服，然後入御於君。』注云：『朝服，展衣。君在堂。』又云：『大師奏鷄鳴于簷下，然後后夫人鳴珮玉於房中，告去。』以此而言，云釋展衣朝服以燕服，然後入御，明入御之服與燕服同緣衣，以其展衣下唯有緣衣，故知御與燕居同緣衣也。以其御與燕居同是私褻之處，故同服。」案：賈所引《大傳》舊本，譌脫不可讀，今據《詩·召南·小星》疏、《御覽·皇親部》、《儀禮經傳通解·內治篇》

所引補正。依鄭此注及《追師》注，則王后御於王服次緣衣，燕居服纁笄緣衣。張惠言云：「后燕居宜宵衣。」案：張說是也。《玉藻》云：「天子玄端而居。」注謂玄端爲王燕居之服，后燕見燕居之服，當與王燕衣相配，自宜服纁笄宵衣。鄭以緣衣、宵衣爲一，亦非也。互詳《追師》疏。云「男子之緣衣黑，則是亦黑也」者，鄭《士喪禮》注云：「黑衣裳赤緣謂之緣，緣之言緣也。」又《雜記》注云：「稅衣，若玄端而連衣裳者也。」《釋名·釋衣服》云：「緣衣，緣然色黑也。」賈疏云：「男子緣衣黑，禮雖無文，案：《士冠禮》，陳服於房，爵弁服、皮弁服、玄端服；至於《士喪禮》，陳襲衣于房，亦云爵弁服、皮弁服、緣衣。緣衣當玄端之處，變言之者，冠時玄端衣裳別，及死襲時，玄端連衣裳，與婦人緣衣同，故雖男子之玄端，亦名緣衣。又見子羔襲用緣衣纁衽，譏襲婦服，纁衽與玄衣相對之物，則男子緣衣黑矣。男子緣衣既黑，則是此婦人緣衣亦黑可知。鄭言此者，以六服之色無文，欲從下而上推次其色，以此爲本，故言之也。」案：緣衣男女皆有之，男子緣衣，即玄端服之連衣裳者。《春秋·僖公·度制篇》云：「大夫衣緣，士不以燕。」蓋即指

① 「緣」，原訛作「祿」，今據楚本改。

玄端服與？依賈《士喪禮》疏，以赤緣專釋婦人服，則赤緣卽纁裙。纁爲赤之淺者，散文通稱。又案：男子緣衣卽玄端服之別制，玄端布衣，則緣衣亦用布可知。女子六服皆絲衣，與彼不同，緣衣又視男子弁服，不視玄端，蓋亦黑纁爲之，故《士昏禮》謂之純衣，鄭注亦釋爲絲衣，明與男子緣衣色同質異也。況《玉藻》云「以帛裏布，非禮也」，此衣服通例，男女所同。后六服皆以素沙爲裏，沙穀以絲爲之，若緣衣表布而裏素沙，則是以帛裏布矣，足明其不然也。《士昏禮》又有纁笄宵衣，又云「女從者畢袵玄」。賈彼疏推鄭義，謂純衣、綃衣、袵玄皆是緣衣，^①而《少牢》疏則云「綃衣者，六服外之下者」。今以經注攷之，惟純衣當爲緣衣，其宵衣及袵玄並以配玄端，與純衣配爵弁服不同，鄭、賈說非是。詳前及《追師》疏。云「六服備於此矣」者，先鄭以素沙爲一服，鄭不從其說，明自袵衣至緣衣，六服已備，不當如先鄭說更數素沙也。云「袵、揄、狄、展，聲相近」者，謂與鞞、搖、翟、檀，聲類相近也。《玉藻》注「袵揄讀同」。惠士奇云：「揄，古搖字。《素問·骨空論》云：「揄臂齊肘。」注云：「揄音搖。」」段玉裁云：「袵與鞞聲近。后服刻繒爲鞞形，而采畫之綴於衣。鄭意鞞是正字，袵是假借字。《說文》亦以袵爲蔽膝正字，而王后袵衣特假借此字也。揄與

搖聲近，揄衣刻繒爲搖形而采畫之。鄭意搖是正字，揄是假借。《說文》作揄字，從衣俞聲，字不從手，亦不謂爲搖之假借。狄與翟聲近，鄭意《禮經》翟是正字，狄是假借。展與檀聲近，鄭意從《喪大記》、《玉藻》作檀爲正字，作展爲假借。《說文》字作袵，從衣亼聲，今《詩》、《禮》皆無其字。云「緣，字之誤也」者，緣亦當爲綠。《詩·邶風·綠衣》序箋云：「綠當爲緣，故作緣，轉作綠，字之誤也。」孔疏云：「此綠衣與《內司服》『綠衣』字同。內司服掌王后之六服，五服不言色，唯綠衣言色，明其誤也。」段玉裁云：「賈疏云：『綠與緣不得爲聲相近，^②但字相似，故云字之誤。』《毛詩正義》云「此綠衣與《內司服》『綠衣』字同」，則《周禮》經文作綠甚明，故鄭定爲字形之誤。若本是緣字，^③則緣緣皆象聲，當與袵揄狄展皆爲聲相近，或當云聲之誤，不得別爲字之誤矣。」孫志祖云：「蓋賈氏所見本猶不誤。然《釋文》云：『緣或作緣，同，吐亂反。』沿譌久矣。」案：段、孫說是也。蓋此經自是形誤，與《士喪禮》緣衣古文作緣爲聲誤不

① 「緣」，原訛「緣」，據《儀禮·士昏禮》賈疏改。

② 「緣」，原作「緣」，據《周禮漢讀考》改。

③ 「緣」，原訛作「緣」，今據《周禮漢讀考》改。

同。《大戴禮記·夏小正》八月「玄校」，傳云：「校也者，若綠色然。」傳崧卿本亦誤爲綠色，與此正同。云「以下推次其色，則闕狄赤，揄狄青，裋衣玄」者，狄，依前破字當作「翟」，各本並誤。賈疏云：「王后六服，其色無文，故須推次其色。言推次者，以鞠衣象鞠塵，其色黃；祿衣與男子祿衣同，其色黑。二者爲本，以五行之色從下向上以次推之，水色既黑，祿衣象之；水生於金，祿衣上有展衣，則展衣象金色白，故先鄭亦云展衣白衣也。金生於土，土色黃，鞠衣象之。土生於火，火色赤，鞠衣上有闕翟，則闕翟象之赤矣。火生於木，木色青，闕翟上有揄翟，象之青矣。五行之色已盡，唯有天色玄，裋衣最在上，象天色玄。是其以下推次其色也。」詒讓案：六服之色，依後鄭說，則裋衣玄，揄翟青，闕翟赤，鞠衣黃，展衣白，祿衣黑。依先鄭說，則展衣白，鞠衣黃，素沙赤，裋衣爲畫衣，二翟則畫羽飾，不詳何色。《詩·君子偕老》毛傳以展衣用丹縠，則色赤，餘五服無說。孔疏云：「孫毓推之以爲，裋衣赤，揄翟青，闕翟黑，鞠衣黃，展衣赤，祿衣黑。鞠名與鞠同，雖毛亦當色黃。祿衣與男子之祿衣名同，則亦宜黑。然則六服逆依方色，義或如毓所言。以婦人尚華飾，赤爲色之著，因而右行以爲次，故裋衣赤，揄翟青，闕翟黑；次鞠衣，鞠衣宜白，以爲疑

於凶服，故越取黃；而展衣同赤，因西方闕其色，故祿衣越青而同黑也。」段玉裁云：「毛、許、馬融皆云展，丹縠衣，仲師始云白衣，而鄭君從之。蓋舊說《周禮》鞠衣黃，綠衣綠，素沙白，則展衣丹矣。」案：孫、孔所推六服之色，鍾復雜亂，無所取法。段說雖依據故書，而綠爲間色，不宜以爲法服；素沙別爲一服，亦與經不合。鄭君所說，推次精當，不可易也。云「婦人尚專一，德無所兼，連衣裳不異其色」者，《綠衣》箋亦云：「婦人之服，不殊衣裳，上下同色。」賈疏云：「案《喪服》，上云「斬衰裳」，下云「女子壻衰三年」，直言衰不言裳，則連衣裳矣。又《昏禮》云「女次純衣」，亦不言裳，是其婦人連衣裳。裳衣既連，則不異其色。必不異色者，爲婦人尚專一，德無所兼故也。」黃以周云：「婦連衣裳，裳亦別爲之，而連綴於衣，非裳與衣同幅爲之也。俗儒據《詩》「綠衣黃裳」，以爲婦人亦殊裳，殊謬。」云「素沙者，今之白縛也」者，《釋文》云：「縛，《聲類》以爲今作絹字。」案：《說文·素部》云：「素，白緻縐也。」《糸部》云：「縛，白鮮厄也。絹，縐如麥稈。縐，鮮厄也。」《聘禮》「束紡」，注云：「紡，紡絲爲之，今之縛也。」段玉裁云：「據許則縛與絹各物，音近而義殊。二《禮》之鄭注，自謂縛不謂絹也。」案：段說是也。依許說，則縛卽縐，與絹小異。後注又舉

沙穀爲比。《廣雅·釋器》云：「鮮支，穀絹也。」《一切經音義》引《纂文》云：「白鮮支，絹也。亦名縞。則漢之縛，卽魏晉以後之絹矣。云「六服皆袍制，以白縛爲裏，使之張顯」者，《說文·衣部》以裋衣爲畫袍，與鄭義同。《詩·綠衣》云：「綠衣黃裏。」鄭箋云：「諸侯夫人祭服之下，鞠衣、展衣、緣衣皆以素紗爲裏。今緣衣反以黃爲裏，非其禮制也。」《雜記》注亦云：「六服皆袍制，不禪，以素紗裏之，如今桂袍襖重繒矣。」孔疏云：「皆袍制謂連衣裳有表裏似袍，漢時有桂袍，其袍下之襪，以重繒爲之。」詒讓案：據《雜記》云：「夫人稅衣揄狄，狄稅素沙。」重言狄稅而總云素沙，明此經先舉六服而終以素沙，素沙卽衣裏，通六服言之，猶《屨人》云「亦烏黑烏，赤纁黃纁，青句素屨」，纁絢卽爲烏屨之飾也。《釋名·釋衣服》云：「袍，丈夫著下至跗者也。袍，苞也，苞內衣也。婦人以絳作衣裳，上下連，四起施緣，亦曰袍，義亦然也。」則漢時婦人衣亦上下連名袍，與六服同。凡古男女袍制，並連衣裳，有表裏。賈疏據《雜記》云「子羔之襲繭衣裳」，繭卽是袍，謂「男子袍有衣裳，今婦人衣裳連則非袍而云袍制者，正取衣複不單與袍制同，不取衣裳別爲義」，非也。《雜記》繭衣裳，孔疏謂亦連衣裳，足正賈說之誤。又案：古制布帛表裏必相應，此六服

皆以繒爲之，故以素沙爲裏，沙亦繒帛也。若六服之下，更有錫衣、宵衣，以布爲之，則不得以素沙爲裏，以帛不裏布也。此經不及錫衣、宵衣，或以是與？云「今世有沙穀者，名出于此」者，于，亦當作「於」。鄭《雜記》注亦云「素沙若今紗穀之帛也」。沙紗古今字。《大戴禮記·曾子制言篇》云：「白沙在泥，與之皆黑。」《論衡·率性篇》云：「白紗入緇，不練自黑。」白沙卽此素沙也。惠棟云：「《釋名·釋采帛》曰：「穀，粟也，其形足，足而踈，視之如粟也。又謂沙穀亦取踈踈如沙也。」《說文·糸部》曰：「穀，細縛也。」與鄭說合。」呂飛鵬云：「古無紗字，至漢時始有之。」《漢書·江充傳》：「充衣紗穀襪衣。」注：「師古曰：紗穀，紡絲而織之也。輕者爲紗，縹者爲穀。」則紗與穀有別。」任大椿云：「《江充傳》注曰「縹者曰穀」，《釋名》所云如沙如粟，皆縹之狀，蓋穀卽今之縹紗也。」案：任說是也。依鄭義，六服皆以繒爲之，而別以沙穀爲裏。段玉裁據《毛詩傳》云「展丹穀衣」，推此經舊說，蓋謂言衣言沙者，互見，則鞠衣等皆以穀爲之。舊師說或然，然非經義也。辨外內命婦之服，鞠衣，展衣，緣衣，素沙。內命婦之服：鞠衣，九嬪也；展衣，世婦也；緣衣，女御也。外命婦者：其夫孤也，則服鞠衣；其夫卿大夫也，則服展衣；其夫士也，則服

緣衣。三夫人及公之妻，其闕狄以下乎？侯伯之夫人揄狄，子男之夫人亦闕狄，唯二王後褱衣。【疏】「辨外內命婦之服，鞠衣，展衣，緣衣，素沙」者，緣亦當爲綠，注當爲緣，各本並誤。賈疏云：「上言王后六服，此論外內命婦不得有六服，唯得鞠衣已下三服，尊卑差次服之而已。亦以素沙爲裏，故云素沙也。」注云「內命婦之服，鞠衣，九

嬪也，展衣，世婦也，緣衣，女御也」者，緣當作「褱」，賈疏述注不誤，下同。《內宰》注云：「內命婦謂九嬪、世婦、女御。」賈疏云：「鄭以內命婦無過三夫人已下，外命婦無過三公夫人已下。但經云鞠衣以下，則三夫人、三公夫人同，皆得闕狄以下，則此命婦之中，無三夫人及三公夫人矣，故內命婦從九嬪爲首也。鄭必知九嬪以下服鞠衣以下者，但九嬪下有世婦、女御三等，鞠衣已下服亦三等，故知鞠衣以下九嬪也，展衣以下世婦也，褱衣女御也。」王應電謂世婦當服鞠衣，女御當服展衣。金榜云：「鄭君以九嬪、世婦、女御當內命婦，因以差三夫人宜服闕狄。榜謂《玉藻》「王后褱衣，夫人揄狄」。注云：「夫人，三夫人，亦侯伯之夫人也。」據夫人揄狄差之，則九嬪屈狄、世婦鞠衣、女御展衣可知也。《喪大記》「復者夫人以屈狄，世婦以褱衣」。注謂爲子男夫人，則侯伯夫人以揄狄者，世婦宜以鞠衣可知也。

《追師》「爲九嬪及外內命婦之首服」，明內命婦不數九嬪。《玉藻》「唯世婦命於奠薦，其他皆從男子」，注云：「天子之后夫人、九嬪及諸侯之夫人，夫在其位，則妻得服其服。」明內命婦數自世婦以下。鞠衣，黃桑服也。《月令》：「季春薦鞠衣于先帝」，爲將蠶求福祥之助；及奠薦，命世婦以其服。世婦服鞠衣，此其著也。內司服所辨內外命婦之服，更有緣衣，爲外命婦言之耳。」案：金說甚精，足正此注之誤。云「外命婦者，其夫孤也則服鞠衣，其夫卿大夫也則服展衣，其夫士也則服緣衣」者，此以婦人鞠衣對男子之絺冕，婦人展衣對男子之玄冕，婦人褱衣對男子之弁服也。《北堂書鈔·衣冠部》引《三禮圖》云：「鞠衣，孤之妻服，以從助祭；展衣，卿大夫妻服之，以助君祭；褱衣，士妻服以從君助祭者也。」與鄭義同。賈疏云：「此約《司服》孤絺冕，卿大夫同玄冕，士皮弁三等而言之。孤已下妻，其服無文，故以此三等之服配三等臣之妻也。孤妻亦如九嬪三服俱得也，卿大夫妻亦如世婦展衣、褱衣俱得也，士妻褱衣而已。但《司服》孤卿大夫士文承諸侯之下，皆據諸侯之臣而言。若然，諸侯之臣妻，亦以次受此服。是以《玉藻》云「君命闕狄，再命褱衣，一命褱衣，士褱衣」。注云：「此子男之夫人及其卿大夫士之妻命服也。褱當爲鞠。諸侯之臣皆

分爲三等，其妻以次受此服。」若然，五等諸侯之臣命雖不同，有孤之國，孤絺冕，卿大夫同玄冕；無孤之國則卿絺冕，大夫玄冕。其妻皆約夫而服此三等之服。其天子之臣服無文，亦得與諸侯之臣服同，是以此外命婦亦得與諸侯臣妻服同也。」詒讓案：鄭《玉藻》注云：「公之臣，孤爲上，卿大夫次之，士次之。侯伯子男之臣，卿爲上，大夫次之，士次之。」據鄭此說，則王臣與公國之臣同服，皆孤一等，卿大夫共一等。如《司服》所說，侯伯子男之國，無孤，則卿大夫異等，妻服亦如之。《雜記》云：「內子以鞠衣，褻衣，素沙，下大夫以禮衣，其餘如士。」注云：「此復所用衣也。內子，卿之適妻也。下大夫謂下大夫之妻。卿妻自鞠衣而下，大夫妻自展衣而下，士衣稅衣而已。」又《喪大記》云：「復，大夫以玄纁，世婦以禮衣，士以爵弁，士妻以稅衣。」注云：「纁，赤也。玄衣赤裳，所謂卿大夫自玄冕以下之服也。其世婦亦以禮衣。」此二文並據無孤之國而言。如其說則侯伯子男之卿得服絺冕，妻服鞠衣，而天子及公之卿反服玄冕，妻服展衣，於次不順，故《大戴禮記·諸侯遷廟篇》盧注駁其誤云：「《玉藻》曰君命屈狄再命褱衣者，謂其夫爲君，則命其妻以屈狄；加再等之命，則上公夫人乃褱衣。孫、鄭等改鞠衣，非也。又云一命展衣者，此則申

子男臣妻之服耳。玄又分公卿大夫及其妻爲三等，而升降其服。經云「孤絺冕，卿大夫玄冕」，何爲易之？又令小國之卿及內子，更同列國之卿孤，絺冕與鞠衣錯易，尤非宜也。」據盧說，則侯伯子男之卿，亦與大夫同一等，皆服玄冕，妻皆服展衣，其說似是。《大宗伯》「再命受服」，注云：

「此謂受玄冕之服。列國之大夫再命，於子男爲卿。」亦不言子男之卿當絺冕，或鄭亦自知其說之未安，而更定之乎？若然，《雜記》內子鞠衣之文，疑當指孤之妻言之，卿之妻自同下大夫禮衣。記文詳略互見，遂失其義耳。又案外命婦之服，依鄭義，自大夫妻祿衣以上皆侈袂，其士妻祿衣則不侈袂，其說亦不盡塙。詳《追師》、《司服》疏。云「三夫人及公之妻，其闕狄以下乎」者，狄亦當作翟，下並同。賈疏云：「婦人之服有六，從下向上差之；內命婦三夫人當服闕狄，外命婦三公夫人亦當闕狄。若三夫人，從上向下差之則當揄狄。是以《玉藻》云「王后褱衣，夫人揄狄」，注「夫人，三夫人」。若三公夫人，不得過闕狄。知者，《射人》云「三公執璧」，與子男執璧同，則三公亦褱冕。《玉藻》「君命屈狄」，據子男夫人，則三公之妻當闕狄。三夫人其

① 「之」，原脫，今據《玉藻》鄭注補。

服不定，三公夫人又無正文，故總云「乎」以疑之也。」案：依賈說，則三夫人服有兩說。據《玉藻》注義，則三夫人得衣揄狄；鄭此注以九嬪及孤之妻鞠衣遞加之，則三夫人及公之妻當服闕狄，與《玉藻》注不合。其說非也。陳祥道云：「《王制》言三公一命衮，則三公在朝驚冕，其妻揄狄可知也。《玉藻》言夫人揄狄，則三夫人揄狄可知也。」金鶚云：「三夫人尊與三公同，則三公夫人亦揄狄，同於侯伯夫人。」案：陳、金兩說是也。姜兆錫、蔣載康、黃以周說同。依鄭、賈義，則天子三公服毳冕，妻服闕狄；天子孤服絺冕，妻服鞠衣。公之孤侯伯子男之卿及妻服同。天子之卿大夫服玄冕，妻服展衣，公之卿大夫侯伯子男之大夫及其妻服同。天子及諸侯之士同服弁服，妻服祿衣。差次淆舛，殆不可通。今通校諸經及陳、金諸家說，攷定王臣服次：天子三公當驚冕，妻當揄狄，則孤卿當毳冕，妻當闕狄；大夫當絺冕，妻當鞠衣；士當玄冕，妻當展衣。侯國之臣則當如盧景宣說，乃合其次耳。鄭、賈說之誤，互詳《司服》疏。云「侯伯之夫人揄狄，子男之夫人亦闕狄，唯二王後褱衣」者，《玉藻》注及《詩·君子偕老》箋義同。《書鈔》引《三禮圖》及《通典·吉禮》引崔靈恩說，亦並依鄭義。鄭既以鞠衣以下衣，對男子絺冕以下，差而上之，則婦人闕

狄對男子之毳冕，婦人揄狄對男子之驚冕，婦人褱衣對男子之衮冕也。故《喪大記》云「復，君以卷，夫人以屈狄」。注云：「君以卷，謂上公也，夫人以屈狄，互言耳。上公以衮，則夫人用褱衣；而侯伯以驚，其夫人用揄狄；子男以毳，其夫人乃用屈狄矣。」又《明堂位》云「君卷冕立于阼，夫人副褱立于房中」。注云：「褱，王后之上服，唯魯及王者之後夫人服之，諸侯夫人則自揄翟而下。」則魯夫人得同二王後夫人服也。賈疏云：「《玉藻》云：『夫人揄狄。』夫人，三夫人，亦侯伯之夫人。鄭必知侯伯夫人揄狄者，以《玉藻》云「君命闕狄，再命鞠衣，一命褱衣」，夫並是子男之國，闕狄既當子男夫人，以上差之，侯伯夫人自然當揄翟，二王後夫人當褱衣矣。案《喪大記》云「復，君以卷」，注云：「上公以衮則夫人用褱衣。」又案：《隱五年》《公羊》云：「諸公者何？天子三公稱公。」若然，天子三公有功，加命服衮冕，其妻亦得服褱衣矣。此注直云二王後，不云三公之內上公夫人者，以其八命則毳冕，夫人服闕翟，不定故不言。若然，《喪大記》注云「公之夫人」，容三公夫人兼二王後夫人矣。《明堂位》云「夫人副褱」，是魯之夫人亦得褱衣，故彼鄭注「副褱，王后之上服，唯魯及王者之後夫人服之」。以此而言，則此注亦含有九命上公夫人，與魯夫人同也。」詒

讓案：侯國內命婦之服，經注無文。《詩·綠衣》箋云：

「諸侯夫人祭服之下，鞠衣爲上，展衣次之，祿衣次之。次之者，衆妾亦以貴賤之等服之。」孔疏云：「衆妾亦分爲三等，蓋夫人下姪婦鞠衣，二媵展衣，其餘祿衣也。」張惠言別依金榜說，又以意推之，謂上公侯伯世婦從君祭鞠衣，從夫人見賓客展衣，以禮見君祿衣，御於君宵衣，御妻從夫人祭，賓客並展衣，餘與世婦同；妾從王祭，賓客並祿衣，見於君，人御並宵衣。子男世婦從夫人祭祀，賓客展衣，以禮見君祿衣，御於君宵衣，御妻妾從夫人祭祀，賓客並祿衣，見於君，人御並宵衣。其所推未知是否，附著以備攷。凡

祭祀、賓客、共后之衣服；及九嬪世婦凡命婦，共其衣服。共喪衰亦如之。凡者，凡女御與

外命婦也。言「及」言「凡」，殊貴賤也。《春秋》之義，王人

雖微者，猶序乎諸侯之上，所以尊尊也。臣之命者，再命以上受服，則下士之妻不共也。外命婦，唯王祭祀、賓客，以禮佐后，得服此上服，自於其家則降焉。【疏】「凡祭祀、賓

客，共后之衣服」者，賈疏云：「婦人無外事，言凡祭祀，惟據宗廟大小祭祀。賓客，謂后助王灌饗諸侯來朝。祭祀共三翟，賓客共展衣。」案：后從王饗賓客當衣揄狄，鄭、賈謂

服展衣，未埒，詳前疏。云「及九嬪世婦凡命婦，共其衣服」

者，賈疏云：「謂助后祭祀賓客時。云凡命婦者，兼外內命婦也。」詒讓案：王姬之服，經注並無文。攷《毛詩·召南·何彼禮矣》敍云：「王姬亦下降於諸侯，車服不繫於其夫，下王后一等。」鄭箋謂服揄狄。此官當亦共之，經文不具也。云「共喪衰亦如之」者，謂喪紀則共衰，此通關后以下及內外命婦言之也。《說文·糸部》云：「縗，服衣，長六寸，博四寸，直心。」經典通段衰爲之。《喪服》注云：「凡服，上曰衰，下曰裳。婦人不殊裳，衰如男子衰，下如深衣。深衣則衰無帶，下又無衽。」是婦人喪衰之制也。賈疏云：

「外命婦喪衰，謂王服齊衰，於后無服。若九嬪已下及女御，於王服斬衰，於后服齊衰也。」莊有可云：「喪衰，斬衰，齊衰也。后當更有錫衰、緦衰、疑衰。嬪婦以下大功小功等私服，司服不共也。」注云「凡者，凡女御與外命婦

也」者，賈疏云：「鄭知凡中內命婦唯有女御者，據上文外內命婦服唯有鞠衣已下，此經上已云九嬪、世婦，則內命婦中唯有女御也。其外命婦中則有孤妻以下。」云「言及，言凡，殊貴賤也」者，明九嬪、世婦亦即內命婦，以其貴故家后爲文，言「及」以示殊異。其女御外命婦等名位較賤，則別言「凡」爲綜括之辭，明其與后等差懸絕也。云「《春秋》之

義，王人雖微者，猶序乎諸侯之上，所以尊尊也」者，據《公羊》僖八年「公會王人、齊侯、宋公、衛侯、許男、曹伯、陳世子款、鄭世子華盟于洮」傳義。鄭以外命婦中，三公夫人及孤卿之妻，其服或加於九嬪、世婦，而經必先九嬪、世婦，次及凡命婦者，明以尊王內官，合於《春秋》尊尊之義也。云

「臣之命者，再命以上受服，則下士之妻不共也」者，明夫受服於司服，則妻亦受服於內司服也。賈疏云：「此約《大司馬》男子之服。彼云「一命受職，再命受服」，則天子上士三命，中士再命乃受服，天子下士一命則不受，故鄭云下則不共也。」云「外命婦唯王祭祀賓客以禮佐后，得服此上服，自於其家則降焉」者，《追師》正義同。賈疏云：「案此上經，士妻緣衣，大夫妻展衣。案《特牲》「主婦纁笄綃衣」，《少牢》「主婦髮鬻衣侈袂」，士妻不衣緣衣，大夫妻侈綃衣袂，不衣展衣。如其夫自於家祭降服，是自於其家則降。上經祭祀，賓客共后之服，是外命婦助后祭祀賓客乃服上服也。」互詳《追師》疏。后之喪，共其衣服，凡內具

之物。內具，紛帨、線纁、鞶褱之屬。【疏】「后之喪共其衣服」者，通王后及先后言之。內命婦及王女之喪亦當共衣服等，經不言者，文略。賈疏云：「后喪所共衣服者，正謂襲時十二稱，小斂十九稱，大斂百二十稱。」案：依賈說，

則后襲斂服稱數與王同。詳《小宗伯》疏。《司服》云：「大喪共其復衣服、斂衣服、奠衣服、廡衣服，皆掌其陳序。」此官掌后服，則后喪亦當共復、斂、奠、廡四者衣服，與司服掌王服內外相準，不徒共斂服也。云「凡內具之物」者，喪紀所用絲枲縫紵之物，內人所具者，亦并共之也。

注云「內具，紛帨、線纁、鞶褱之屬」者，《釋文》云：「紛，本又作帨。《說文·巾部》云：「楚謂大巾曰帨。帥，佩巾也。帨，帥或从兑聲。帨，書衣也。褱，帨或从衣。」案：帨即帨之變體。紛，段借字也。《內則》注云：「紛帨，拭物之佩巾也。繫，小囊也。」鞶與繫同。賈疏云：「案《內則》婦事舅姑有紛帨、線纁、鞶褱，故死者入壙亦兼有數物。《內則》更有刀礪小觸之等，故云「之屬」以總之也。」

縫人掌王宮之縫線之事，以役女御，以縫王及后之衣服。女御裁縫王及后之衣服，則爲役

助之。宮中餘裁縫事則專爲焉。鄭司農云：「線，纁。」【疏】「掌王宮之縫線之事」者，《說文·糸部》云：「縫，以鍼紩衣也。」謂王宮中線纁縫紩之事，此官咸掌之也。

注云「女御裁縫王及后之衣服，則爲役助之」者，《敍官》奄官下有女御八人，女工八十人；蓋以王及后尊貴，其裁縫衣服自有法式，縫人不敢專爲，故使女御監蒞其事，縫人奄官則與女工給其使役，佐助成之，猶《酒人》注謂酒人共酒，因留與其奚爲世婦役也。云「官中餘裁縫事則專爲焉」者，明非王及后之衣服，若三夫人以下縫線之事，直縫人專爲之，不關女御，故下文云「掌凡內之縫事」是也。鄭司農云「線，縷」者，《說文·糸部》云：「線，縷也。重文線，古文線。」《公羊》僖四年傳何注云：「線，縫帛縷。」喪，縫棺飾焉，孝子既啓，見棺猶見親之身，既載，飾而以行，遂以葬。若存時居于帷幕而加文繡。《喪大記》曰：「飾棺，君龍帷，三池，振容，黼荒，火三列，黻三列，素錦褚，加僞荒，纁紐六，齊五采，五貝，黼嬰二，黻嬰二，畫嬰二，皆戴圭，魚躍拂池。君纁戴六，纁披六。」此諸侯禮也。《禮器》曰：「天子八嬰，諸侯大嬰，大夫四嬰。」《漢禮器制度》：「飾棺，天子龍火黼黻皆五列，又有龍嬰二，其戴皆加璧。故書焉爲馬。杜子春云：「當爲焉。」疏：「喪縫棺飾焉」者，賈疏云：「此喪以王爲主，但是王家后，世子已下，亦縫棺飾焉。」注云「孝子既啓，見棺猶見親之身」者，啓謂啓肆

也。凡喪禮，大斂後殯於西階上，以木覆棺而塗之。將葬之前一日，啓殯，遷棺而朝於祖。鄭言此者，明孝子見棺如見親之身，故棺飾擬生時帷幕爲之。《檀弓》云：「制絞衾，設蓆，爲使人勿惡也。」鄭《喪大記》注云：「飾棺者，以華道路及壙中，不欲衆惡其親也。」並其義也。云「既載，飾而以行」者，此明棺飾卽葬行時柩車所飾柳嬰等，故《檀弓》注云：「殯引飾棺以輓，葬引飾棺以柳嬰。」彼殯引棺飾，卽《雜記》所說行死柩自外來就殯之事，以非常法，故鄭此注不兼輓飾言之。賈疏云：「案《既夕禮》：日側，遂匠納車於階間，卻柩而下載之於廐車之上，乃加帷荒。飾棺訖，乃還車向外，移柩車去載處。設祖奠。明日旦，乃更徹祖奠，設遣奠。苞牲取下體，乃引向壙。」云「遂以葬」者，謂葬時并以入壙藏之也。喪禮謂之「見」。《既夕禮》云：「乃窆，藏器于旁，加見。」注云：「見，棺飾也。更謂之見者，加此則棺柩不復見矣。」是也。云「若存時居于帷幕而加文繡」者，于，注例當作「於」，各本並誤。《荀子·禮論篇》云：「無幙，絲葛，縷嬰，其類以象菲、帷、幙、尉也。」王念孫謂「無幙」卽《喪大記》之「素錦褚加帷荒」，荒在上象幕，褚在下象幄，故曰其類象菲帷幙尉也。案：鄭說與《荀子》同。賈疏云：「幕人」《共帷幕幄帟綬》。注云：「在旁曰

帷，在上曰幕。」是存時居於帷幕。而云加文繡者，生時帷幕無文繡，今死恐衆惡其親，更加文繡，即所引《喪大記》「已下是也。」引《喪大記》曰「飾棺，君龍帷」者，孔疏云：「帷，柳車邊障也。以白布爲之，王侯皆畫爲龍。」詒讓案：以下並據《喪大記》諸侯棺飾，證天子之法。龍帷者，象生時之帷也。《幕人》之帷亦以布爲之，但此以畫龍爲異。帷，《檀弓》又謂之牆，據柳象宮室，故別稱牆也。云「三池」者，彼注云：「池，以竹爲之，如小車筵，衣以青布。柳象宮室，縣池於荒之爪端，若承雷然云。」孔疏云：「三池者，諸侯禮也。池謂織竹爲籠，衣以青布，挂著於柳上荒邊爪端，象平生宮室有承雷也。天子生有四注屋，四面承雷，柳亦四池象之。諸侯屋亦四注，而柳降一池，闕於後一，故三池也。」云「振容」者，孔疏云：「振，動也。容，飾也。謂以絞繒爲之，長丈餘如幡，畫幡上爲雉，縣於池下爲容飾，車行則幡動，故曰振容。」詒讓案：此容蓋與婦人車之童容形制相似，詳《巾車》疏。云「黼荒，火三列，黻三列」者，彼注云：「荒，蒙也。在旁曰帷，在上曰荒，皆所以衣柳也。黼荒，緣邊爲黼文，火黻爲列於其中耳。」孔疏云：「荒謂柳車上覆，謂鼈甲也。緣荒邊爲白黑斧文，故云黼荒。火三列者，列，行也，於鼈甲黼文之上荒中央又畫爲火三行也。火形如半

環也。黻三列者，^①又畫爲兩已相背爲三行也。」詒讓案：荒象生時之幕也，蓋亦以布爲之。云「素錦褚」者，彼注云：「褚，以襯覆棺，乃加帷荒於其上。」孔疏云：「素錦，白錦也。褚，屋也。於荒下又用白錦以爲屋也。葬在路象宮室也。故《雜記》云「素錦以爲屋而行」，即褚是也。」詒讓案：此象生時之幄也。幕人之幄以繒爲之，此則用素錦爲異。云「加僞荒」者，彼注云：「僞當爲帷，聲之誤也。大夫以上有褚以襯覆棺，乃加帷荒於其上。」云「纁組六」者，彼注云：「組，所以結連帷荒者也。」賈疏云：「組謂繫連帷荒，以纁色爲之，左右各三組，并之六耳。」云「齊五采，五貝」者，彼注云：「齊，象車蓋莖，縫合雜采爲之，形如瓜分然，綴貝落其上及旁。」孔疏云：「齊五采者，謂鼈甲上當中央，形員如華蓋，高三尺，徑二尺餘。五采謂人君以五采繒衣之，列行相次，故云五采也。五貝者，又連貝爲五行，交絡齊上也。」云「黼嬰二，黻嬰二」者，《釋文》云：「嬰，本又作筭。」案：嬰筭聲類同，古通。《說文·竹部》云：「筭，扇也。重文筭，筭或从妾。」《喪大記》注云：「畫者，畫雲氣，其餘各如其象。」《釋名·釋喪制》云：「要有黼

①「黻」，原訛作「黼」，今據楚本改。

有畫，各以其飾名之也。」嬰，詳《女御》疏。云「皆戴圭」者，賈疏云：「謂置圭於嬰之兩角爲飾也。」云「魚躍拂池」者，彼注云：「以銅爲魚，縣於池下，行則魚上拂池。」孔疏云：「凡池必有魚，故此車池縣絞雉，又縣銅魚於池下，若車行則魚跳躍上拂池也。」《隱義》曰「振容在下」，是魚在振容間。」云「君纁戴六，纁披六」者，彼注云：「戴之言值也，所以連繫棺束與柳材使相值，因而結前後披也。」賈疏云：「謂於車與兩廂各豎三隻軫子，以纁爲值，軾其軫子，各使相值，因而繫前後披兩廂，各使人持制之，以備車之傾側也。其實兩廂各三，而云六者，人君禮文，圍數而傍言六耳。」案：賈所謂車兩廂各豎三軫子者，卽柳材也。戴，披並詳《司士》疏。云「此諸侯禮也」者，彼云君，據諸侯禮，故三池六嬰，與天子禮異。賈疏云：「天子無文，故取諸侯法以推天子禮也。」又引《禮器》曰「天子八嬰，諸侯六嬰，大夫四嬰」者，上引《雜記》，不見天子嬰數，故又引《禮器》補之。八嬰者，蓋如諸侯六嬰加龍嬰二爲八也。云「《漢禮器制度》，飾棺，天子龍火黼黻皆五列，又有龍嬰二，其戴皆加璧」者，以周天子棺飾無文，鄭據漢禮補之。龍火黼黻皆五列，視《喪大記》周諸侯禮加龍火，又增三列爲五列。又於六嬰之外，增龍嬰二，與《禮器》八嬰數合。其不戴圭而戴

璧，亦擬周天子禮，故《明堂位》云「周之璧嬰」。注云：「天子八嬰皆戴璧垂羽，諸侯六嬰皆戴圭。」是漢禮皆約周天子禮爲制，故鄭引彼證此也。云「故書焉爲馬，杜子春云當爲焉」者，段玉裁云：「此字之誤也。」衣嬰柳之材。必先纏衣其木，乃以張飾也。柳之言聚，諸飾之所聚。《書》曰「分命和仲，度西曰柳穀」。故書「嬰柳」作「接櫬」。鄭司農云：「接讀爲踳，櫬讀爲柳，皆棺飾。」《檀弓》曰「周人牆置踳」。《春秋傳》曰「四踳不踳」。【疏】注云「必先纏衣其木，乃以張飾也」者，《說文·木部》云：「材，木挺也。」又《系部》云：「纏，繞也。」謂嬰以木爲匡及柄，柳上荒下帷，亦以木爲槿，所謂材也。經不云衣嬰柳而云衣其材，則二者並先纏繞衣其內材，而後張其外衣之帷荒。凡內衣纏之，外衣則張之而已，不纏也。賈疏云：「嬰柳二者皆有材，縫人以采繒衣纏之，乃後張飾於其上。」云「柳之言聚，諸飾之所聚」者，柳聚一聲之轉。凡棺飾，帷、池、容、荒、齊等並聚於柳也。《釋名·釋喪制》云：「與棺之車曰輜，其蓋曰柳。柳，聚也，衆飾所聚，亦其形像也；亦曰鼈甲，似鼈甲然也。其旁曰牆，似屋牆也。」惠士奇云：「柳一作像。《莊子·達生》曰：『生有軒冕之尊，死得於豚楯之上，聚像之中。』柳之言聚，故曰聚像，棺之飾也。」《呂氏春秋·節

喪曰：「世俗之行喪，載之以大輅，僂嬰以督之。」一作縷嬰，見《荀子·禮論篇》。案：惠引《莊子》，足證鄭、劉二家義。《漢書·季布傳》「置廣柳車中」，顏注引鄭氏云：「作大柳衣車，若《周禮》喪車也。」又引晉灼云：「《周禮》說，衣嬰柳。柳，聚也，衆飾之所聚也。」晉說亦本鄭義。又案：凡覆柩車者，上曰柳，下曰牆，柳衣謂之荒，牆衣謂之帷，故《既夕禮》注云「牆有布帷，柳有布荒」是也。劉氏亦以柳牆別釋。若總言之，則牆亦通名柳，故《檀弓》注釋牆爲柳衣，《喪大記》注謂帷荒皆所以衣柳。柳亦通名牆，《既夕記》云「巾奠乃牆」，牆中兼帷荒也。此經言柳不言牆，明柳之內兼有牆可知。又據《檀弓》及《喪大記》注，則柳爲帷荒內木材之名；而《檀弓》孔疏則謂帷荒及木材等總名曰柳。然則柩車之上，上荒下帷，內材外衣，通得柳名，此經之柳固無所不該矣。引《書》曰「分命和仲度西曰柳穀」者，《釋文》云：「度音宅，古文庀與度字相似，因此而誤。」賈疏云：「是濟南伏生《書傳》文，故云『度西曰柳穀』，見今《尚書》，云『宅西曰昧谷』。度亦居也。柳者，諸色所聚。日將沒，其色亦兼有餘色，故云柳穀。引之者，見柳有諸色。」丁晏云：「《史記·五帝本紀》集解曰『昧谷，徐廣曰：一作柳谷』。《書·堯典》正義引夏侯等書，昧谷爲柳谷。《儀禮經

傳通解續》引《書大傳·虞傳》「秋祀柳穀」，注「柳，聚也。齊人語」。《說文·赤部》：「穀，日出之赤也。」穀聲相近，故賈以爲色赤。案：丁說是也。據《堯典》疏及《大傳》，則作「柳穀」者，蓋今文《尚書》。鄭注《尚書》，從古文作「昧谷」。故《三國志·吳志·虞翻傳》，裴松之注引翻奏鄭解《尚書》違失事，云「古柳卯同字，而以爲昧」，即指此也。此注欲證柳聚之義，故從今文引之。度訓居，義亦可通，賈說得之。陸疑爲「庀」之誤，不可從。云「故書嬰柳作接櫨，鄭司農云接讀爲踳，櫨讀爲柳，皆棺飾」者，徐養原云：「接，踳之假借字。櫨字字書所無。《釋文》音柳，亦就此經而作音耳，其本音本義則不可考，殆亦傳寫之誤也。《集韻·四十四有》載蓐、僂、輶、輅四字，皆喪車飾。蓐嬰見《檀弓》下，注云『《周禮》蓐作柳』。柳在幽尤韻，蓐在侯韻，二韻異部而相近，故可通用。《荀子·禮論》有縷嬰，又有蓐蓐，楊倞以爲俱蓐嬰之誤。」段玉裁云：「櫨從木從貿聲，貿從貝從卯聲，而先鄭讀櫨爲柳，此於疊韻求之也。」案：段說是也。《莊子·德充符篇》云：「戰而死者，其人之葬也，不以嬰資。」資蓋即櫨之譌文，嬰資即嬰柳也。引《檀弓》曰「周人牆置踳」者，彼文云：「殷人棺槨，周人牆置嬰。」鄭彼注云：「牆，柳衣也。」又引《春秋傳》曰「四踳不踳」者，襄二十

五年《左傳》云「齊崔杼弑莊公，葬諸士孫之里，四筵，不蹕，下車七乘。」是也。杜注云：「喪車之飾，諸侯六筵。蹕，止行人。」段玉裁云：「此司農易接爲蹕而引《檀弓》及《春秋傳》以證蹕之義也。司農所據《記》《傳》字作「蹕」，今本《記》《傳》則皆作「筵」矣。監本注疏改「牆置蹕」爲「牆置筵」，則舛錯不倫。《喪祝》注亦云四蹕牆置蹕，蹕者筵之假借字也。」詒讓案：此經故書作「接」，先鄭讀爲「蹕」，後鄭自依今書作「筵」，與先鄭不同，故引之在後。《女御》《御僕》二職並作筵，不作蹕，可證後鄭不從蹕矣。掌凡內之縫事。【疏】「掌凡內之縫事」者，謂宮中三夫人以下所有裁縫之事，並此官專掌之也。

周禮正義卷十六

染人掌染絲帛。凡染，春暴練，夏纁

玄，秋染夏，冬獻功。暴練，練其素而暴之。故書纁

作黹。鄭司農云：「黹讀當爲纁，纁謂絳也。夏，大也，秋

乃大染。」玄謂纁玄者，謂始可以染此色者。玄纁者，天地

之色，以爲祭服。石染當及盛暑熱潤始湛研之，三月而後

可用。《考工記》鍾氏則染纁術也。染玄則史傳闕矣。染

夏者，染五色，謂之夏者，其色以夏狄爲飾。《禹貢》曰「羽

眇夏狄」，是其總名。其類有六：曰翬，曰搖，曰芻，曰

希，曰蹲。其毛羽五色皆備成章，染者擬以爲深淺之度，是

以放而取名焉。【疏】「掌染絲帛」者，未織者爲絲，已織者

爲帛。凡王后及公卿大夫之衣服，並染絲而織之。元士以

下則服染纁。《玉藻》云「士不衣織」是也。內命婦女御以

下，外命婦士妻以下並同。此官掌染絲帛，則亦染桌布，經

不言者，亦文不具也。云「春暴練」者，《說文·日部》云：

「暴，晞也。」从日出収米，與《卒部》暴字別，隸變二文並作

暴，誤。經例暴字從古文作𣎵，而晞暴字此及《帔氏》並作暴，亦傳寫沿誤也。以下四時染事，並關絲帛二者言之。

賈疏云：「以春陽時，陽氣燥達，故暴曬其練。」案：賈說非

也。此借練爲凍，謂以絲帛暴之凍之，以俟染也。暴布帛

宜於春，故《月令·仲夏》云「無暴布」矣。云「夏纁玄」者，

賈疏云：「夏暑熱潤之時，以朱湛丹秫，易可和釋，故夏染

纁玄而爲祭服。」案：賈據《鍾氏》染纁法也。染玄者，當以

涅，不唯用朱，疏說亦未析。云「秋染夏」者，秋時石染草染

無不宜，可博染衆色也。云「冬獻功」者，染事既成，人之典

婦功及典絲，賈謂獻之於王，失之。注云「暴練，練其

素而暴之」者，《說文·糸部》云：「練，凍繒也。」《素部》

云：「素，白緻繒也。」《水部》云：「凍，滴也。」《雜記》注云：

「素，生帛也。」《釋名·釋采帛》云：「練，爛也，煮使委爛

也。素，朴素也，已織則供用，不復加功飾也。又物不加飾

皆自爲素，此色然也。」段玉裁云：「此練當作凍。凍其素，

素者質也，即《帔氏》云凍絲凍帛也。已凍之帛曰練。帔氏

如法凍之暴之，而後絲帛之質精，而後染人可加染。」案：

段說是也。此練即凍之借字，凡滴治絲帛通謂之凍，已凍

之絲帛亦通謂之練。《說文》訓練爲凍繒，已凍之帛也。

《淮南子·說林訓》云：「墨子見練絲而泣之，爲其可以黃

可以墨。」高注云：「練，白也。」此已練之絲也。注「練其素」，統凍治素絲素帛二者而言，故下云玄纁以爲祭服。賈疏謂素卽絹，先練乃暴之，若然，服則先染絲乃織之，不得爲練，非也。暴凍絲帛法，並詳《帋氏職》。云「故書纁作竄」，鄭司農云竄讀當爲纁者，段玉裁云：「此以竄不見於他經傳而易其字也。宛聲熏聲略相似。《說文·黑部》有覲字，云「黑有文也。從黑宛聲，讀若飴登之登」。按覲卽竄字，故書假借爲纁字也。」王引之云：「竄，《說文》作覲，《玉篇》覲或作覲。《廣韻》：「覲，黃黑色也。」覲與竄同。又通作苑，《淮南·時則篇》「天子衣苑黃」，高誘注曰：「苑讀登飴之登。」則古人衣色亦有用竄黃者。《急就》曰「鬱金半見細白麝」，顏師古注曰：「鬱金，染黃也。」鬱與竄聲義正同。夏竄玄者，《豳風·七月》所謂載玄載黃也。似不必改爲纁字。」案：王說亦通。許君《自敘》述所偶《禮》、《周官》，皆古文，而《說文》有覲無竄，疑許所見故書又作覲矣。《春秋·緡露·五行順逆篇》云：「心腹宛黃。」宛亦覲之借字。云「纁謂絳也」者，《說文·糸部》云：「纁，淺絳也。絳，大赤也。《廣雅·釋器》云：「纁謂之絳。」賈疏云：「絳卽《爾雅》及《鍾氏》所云三人爲纁者是也。」詒讓案：依《說文》義，纁雖絳之類，而色淺於絳，故《士冠禮》「纁裳」注亦云

「淺絳裳」。此不言淺者，散文纁得通稱絳也。亦詳《鍾氏疏》。云「夏，大也」者，《爾雅·釋詁》文，《鍾師》注亦同。云「秋乃大染」者，大染謂通染衆色。此先鄭臆說，故後鄭不從。云「玄謂纁玄者，謂始可以染此色者」者，謂夏時染事始起，惟可染此二者，不可染餘色也。云「玄纁者，天地之色，以爲祭服」者，《周髀算經》云：「天青黑，地黃赤。」青黑卽玄色，黃赤卽纁色也。賈疏云：「案《易·九事章》云：「黃帝、堯、舜垂衣裳，蓋取諸乾坤。」乾坤卽天地之色。但天玄地黃，而玄纁者，土無正位，託位南方火，火色赤，與黃共爲纁也。凡六冕之服皆玄上纁下，故云以爲祭服，卽《祭義》云玄黃之者也。」《王制》孔疏引鄭《易繫辭》注云：「土託位南方，南方色赤，黃而兼赤，故爲纁也。」案：賈卽本鄭《易注》義。云「石染當及盛暑熱潤始湛研之，三月而後可用」者，後，舊本作「后」，今據注疏本正。凡染，用草木者謂之草染，祭服所不用。祭服纁玄染必以石，謂之石染。纁者黃赤，其染以朱。《說文·丹部》云：「丹，巴、越之赤石也。」丹卽《鍾氏》所謂朱也。玄者鄭謂赤黑，《周髀》云：「青黑其染以涅。」《淮南子·假真訓》云：「今以涅染緇則黑於涅。」高注云：「涅，礬石也。」是也。石質堅韌，故必湛研之而後可用。知湛研必三月者，亦約《鍾氏》文。依鄭

說，蓋孟夏取丹涅之石湛研之，至季夏始可染纁玄也。《詩·豳風·七月》云：「八月載績，載玄載黃。我朱孔陽，爲公子裳。」毛傳云：「朱，深纁也。」《大戴禮記·夏小正》云：「八月玄校。」彼二經又以染玄纁爲在八月者，染纁玄雖始於夏，至秋亦尚可染。此經云「秋染夏」，夏爲五色，則亦兼有纁玄。《豳詩》、《夏正》與此文雖異，義不乖也。又《月令》云：「季夏，命婦官染采，黼黻文章必以法，故無或差貸，黑黃倉赤，莫不質良，毋敢詐僞，以給郊廟祭祀之服，以爲旗章，以別貴賤等級之度。」鄭注云：「婦官，染人也。采，五色。」據彼文季夏即染五色，此夏唯染纁玄至秋乃染夏者，《月令》孔疏謂彼是秦法。竊謂染練有時，不應周秦法異。疑《月令》或因夏染纁玄，而類及諸色。且染夏雖在秋，而命婦官則不妨先時敕戒，《月令》之文與此經似亦無悞。《齊民要術》引崔寔《四民月令》云：「六月，命女工織練練，可燒灰染青紺雜色。八月，涼風戒寒，趣練練帛，染綵色。」明染事盛於夏秋之交，亦與經義合也。云「《考工記》鍾氏則染纁術也」者，明染絲帛與染羽術同。《鍾氏》云：「染羽，以朱湛丹秫，三月而熾之，淳而漬之，三人爲纁。」是也。云「染玄則史傳闕矣」者，《鍾氏》又云：「五人爲緇，七人爲緇。」注云：「凡玄色者，在緇緇之間，其六人

者與？」是染玄亦以朱爲質，而入黑汁，但其術經記無文，故云闕也。云「染夏者，染五色，謂之夏者，其色以夏狄爲飾」者，此據《禹貢》夏狄之文，破先鄭夏大之訓。染五色或用草木，不必用石染，故以秋也。引《禹貢》曰「羽畎夏狄」者，畎，《釋文》作「畎」，阮元傳校宋本同。案：畎，畎之俗。《說文·人部》古文作畎，篆文作畎。《匠人》經亦從俗作畎，則此注不必改畎。今從嘉靖本。宋婺州唐氏本同今《書》作「羽畎夏翟」。《漢書·地理志》述《禹貢》，翟亦作狄。《敍官》注引《書》作翟。翟正字，狄段借字。以《內司服》注破狄爲翟推校之，則此注作「狄」恐非鄭注舊文。賈疏云：「畎，谷也。羽山之谷有夏之五色之翟雉貢焉。」案：賈本似亦作夏翟。所釋義與《詩·小雅·節南山》孔疏引《禹貢》鄭注同，^①即約彼注義也。云「是其總名」者，《書》僞孔傳亦云：「夏翟，翟雉名。」《內司服》注義同。鄭意翟爲雉之總名，夏翟又爲雉備五色者之總名也。云「其類有六，曰翬，曰搖，曰鵲，曰留，曰希，曰蹲」者，搖，《爾雅·釋鳥》作鷩。翬，詳《內司服》疏。《釋鳥》又云：「南方曰鵲，東方曰鷩，北方曰鷩，西方曰鷩。」並此注所本。彼文留

① 「小雅」，原訛「大雅」，據楚本改。

希蹲作鷓鴣。《說文·佳部》雉字注，數十四種雉，留蹲與此注同；鴛作鴛，希作稀，又與此小異，未知孰是。云「其毛羽五色皆備成章」者，《釋鳥》說五采皆備成章者，惟翬二雉，四方之雉不言何色。鄭意四方雉文承翬之下，其毛羽當亦備五色也。云「染者擬以爲深淺之度，是以放而取名焉」者，《御覽·服章部》引董巴《漢輿服志》云：「上古衣毛而冒皮，後世聖人易之以絲麻，觀翬翟之文，榮華之色，乃染帛以效之，始作五采，成以爲服，亦染五色放翬翟取名之義。」**掌凡染事。**【疏】「掌凡染事」者，蔣載康云：「當統布屬、韋革、羽毛等。染羽見《鍾氏》。」

追師掌王后之首服，爲副、編、次，追衡、笄，爲九嬪及外內命婦之首服，以待祭祀、賓客。鄭司農云：「追，冠名。《士冠禮記》曰：『委貌，周道也。章甫，殷道也。牟追，夏后氏之道也。』追師，掌冠冕之官，故并主王后之首服。副者，婦人之首服。《祭統》曰：『君卷冕立于阼，夫人副褱立于東房。』衡，維持冠者。《春秋傳》曰：『衡紘紘紘。』玄謂副之言覆，所以覆首爲之飾，其遺象若今步繇矣，服之以從王祭祀。編，編列髮

爲之，其遺象若今假紒矣，服之以桑也。次，次第髮長短爲之，所謂髮髻，服之以見王。王后之燕居，亦纁笄總而已。追猶治也。《詩》云「追琢其章」。王后之衡笄皆以玉爲之。唯祭服有衡，垂于副之兩旁，當耳，其下以紘縣瑱。《詩》云：「玼兮玼兮，其之翟也。」髮如雲，不屑髻也，玉之瑱也。是之謂也。笄，卷髮者。外內命婦衣鞠衣、褱衣者服編，衣祿衣者服次。外內命婦非王祭祀賓客佐后之禮，自於其家則亦降焉。《少牢饋食禮》曰「主婦髮髻衣移袂」，《特性饋食禮》曰「主婦纁笄宵衣」是也。《昏禮》女次純衣，攝盛服耳。主人爵弁以迎，移袂，祿衣之袂。凡諸侯夫人於其國，衣服與王后同。【疏】「掌王后之首服，爲副、編、次，追衡、笄」者，賈疏云：「對夏官弁師掌男子之首服。首服則副、編、次也。追，治玉石之名。謂治玉爲衡、笄也。」詒讓案：此婦人首服六，亦與男子服相配。依鄭義，三翟首服副、鞠衣、展衣首服編，則當男子冕服也。祿衣首服次，則當男子弁服也。祿衣或不服次而服纁笄，則當男子冠服也。以《禮經》校之，唯《明堂位》、《祭統》以副褱配衮冕，《士昏禮》以次純衣即祿衣配爵弁，一文與鄭義正同，而餘服則未甚符合。今依金榜、孔廣森、凌廷堪諸說，更爲推定。次祿衣之下當有二服：一爲被錫衣，當男子玄冠朝服；一爲纁笄

宵衣，當男子玄端服。此經無被者，以非王后賓祭所用，故文不具。鄭、賈以被卽次，宵衣卽祿衣，皆非也。並詳後。云「爲九嬪及外內命婦之首服」者，賈疏云：「此云『及』，則與上《內司服》同，亦是言及殊貴賤。九嬪下不言世婦，文略，則外命婦中，有三公夫人，卿大夫等之妻；內命婦中唯有女御也。」云「以待祭祀賓客」者，后則從王，九嬪外內命婦等則從后也。

注鄭司農云「追，冠名」者，釋官名之義，兼明追衡筭之追亦爲首服也。引《士冠禮記》曰「委貌周道也，章甫殷道也，牟追夏后氏之道也」者，證追卽牟追冠也。牟，《釋文》作「毋」，與《儀禮》同。鄭彼注云：「委猶安也，言所以安正容貌。章，明也，殷質，言以表明丈夫也。毋，發聲也，追猶堆也，夏后氏質，以其形名之。三冠皆所服以行道也。其制之異同，未聞。」《續漢書·輿服志》云：「委貌冠，皮弁冠同制，長七寸，高四寸，制如覆杯，前高廣，後卑銳，所謂夏之毋追，殷之章甫也。」聶氏《三禮圖》引《舊圖》云：「毋追制與周委貌同。殷冠委大臨前，夏冠委前小損。」案：牟追形制蓋與委貌略同，委貌卽玄冠，詳《司服》疏。云「追師掌冠冕之官，故并主王后之首服」者，賈疏云：「此鄭意以追師掌作冠冕，弁師掌其成法，若縫人掌縫衣，別有司服、內司服之官相似，故有兩官共掌男子首服

也。後鄭不從者，此追師若兼掌男子首服，亦當如下《屨人職》云「掌王及后之服屨」，兼王爲文。今不云王，明非兩官共掌，此直掌后已下首服也。」云「副者婦人之首服」，又引《祭統》曰「君卷冕立于阼，夫人副褱立于東房」者，彼上公夫人服褱衣而副，與后同，故先鄭引以爲證。林頤山云：「先鄭單證副，不及編與次者，其意以副編聯文爲句，次自爲句，宗《詩》毛傳舊讀，卽用其義，不與後鄭析副編次爲三同。案：《詩·鄘·君子偕老》「副笄六珈」傳：「副者，后夫人之首飾，編髮爲之。笄，衡笄。」先鄭宗毛傳義，王后首服分爲四，不分爲五：副編一，次一，追一，衡笄一。此云「副，婦人首服」，亦宗毛傳編髮爲之，合副編爲一物。」案：林說是也。云「衡，維持冠者」者，《左傳》桓二年杜注同。案：《詩》「副笄」毛傳、《國語·楚語》韋注並云衡笄，是以笄與衡爲一物。林頤山云：「先鄭以副編與次爲王后所獨，追與衡笄爲王及王后所同，故其自申己說曰：『追師掌冠冕之官，故并主王后之首服。』其說衡，引《左氏傳》亦單證衡而不及笄，亦宗毛傳二字聯文爲句，如說副單證副而不及編之例，不如後鄭分衡與笄爲二也。先鄭既合衡笄爲一，故得與王之冕弁冠笄相例。案《續漢志》，漢世簪制，左右各一，橫簪之。《考工記·玉人》注：『衡古文橫。』《儀

禮·士冠》注：「筭，今之簪。」衡筭即《續漢志》所云橫簪。案：林謂先鄭依毛詁合衡筭爲一，即《漢志》橫簪是也。史游《急就篇》云：「冠幘簪簪結髮紐。」《皇象碑》本簪作黃。彼簪簪亦即指衡筭、橫簪。衡、橫、簪、黃字並通。顏師古注云「簪即步搖」，非也。但《詩》副筭，爲婦人持副之筭，此注云衡維持冠者，則當是偏舉男子持冠之筭爲釋，即《弁師》之玉筭也。若女子則唯有纚筭、副筭，無持冠之筭。漢制雖有持簪之筭，然簪究與冠不同。後鄭不從毛，別以衡爲筭旁垂玉，禮無明文，自不若先鄭之義據明埒，故何楷、秦蕙田及江永、張惠言、宋綿初、林喬蔭、莊有可並從毛及先鄭，以衡即爲筭。陳奐謂婦人有副筭，有纚筭。維持纚者謂之纚筭，維持副者謂之副筭，副筭用衡筭，纚筭不用衡筭。金鶚亦謂筭有二，云：「安髮之筭，《士喪禮》謂之髻筭，髻之爲言會也，髮所聚會也。固冠之筭，謂之衡筭，衡之爲言橫也，橫之於首也。連言曰衡筭，單言曰衡，一也。」案：陳、金說足申毛及先鄭義。《士昏》、《特牲禮》，婦人服有纚筭宵衣。纚筭即持髮之筭，蓋婦人之常服，至卑者即以纚筭爲首服，《喪服小記》所謂男子冠而婦人筭也。自此以上更加他首服，則亦別著筭，故服副者有副筭。以此推之，則服編次者亦當有編筭、次筭，是爲衡筭。女子副

編次而著筭，猶男子冕弁而著筭，故女子雖不冠而不害其有衡筭也。《國語·楚語》：「司馬子期欲以其妾爲內子，訪之左史倚相曰：『吾有妾而愿欲筭之，其可乎？』」韋注云：「筭，內子首服衡筭也。」是衡筭唯內子乃得著，妾則否也。列國之卿服玄冕，內子當服編展衣，則《楚語》之衡筭，當即編筭，明不第副有筭也。若纚筭，則女子十五以上之常服，通於貴賤，不必內子矣。竊謂王后首服亦當有纚筭、衡筭，此經衡筭自是二筭，衡即副編次之筭，筭則纚筭也。副編次筭尊，故特稱爲衡；纚筭卑，故不別制名耳。引《春秋傳》曰「衡紃紃」者，桓二年《左傳》臧哀伯語。賈疏云：「彼云衡紃紃，則據男子之衡。引證此者，司農意男子婦人皆有衡。後鄭意亦爾，但後鄭於此經無男子耳。」案：賈說是也。男子之衡，蓋即《弁師》之玉筭，散文得通也。紃，詳後。紃紃，詳《弁師》疏。云「玄謂副之言覆，所以覆首爲之飾」者，《玉藻》孔疏引《鄭志》說同。《釋名·釋首飾》云：「王后首飾曰副。副，覆也。以覆首亦言副貳也，兼用衆物成其飾也。」劉前說與鄭同。云「其遺象若今步繇矣」者，《玉藻》疏引《鄭志》亦同。《釋文》云：「繇，本或作搖。」案：繇搖字通。《詩·君子偕老》箋說六珈云：「副，既筭而加飾，如今步搖上飾。古之制所有，未聞。」彼

疏引此注亦作搖。《明堂位》注亦云：「副，首飾也。今之步搖是也。」案：依後鄭說，副列衆物爲飾，與編次唯以髮爲之者異，蓋首飾之最華者。《釋名·釋首飾》云：「步搖上有垂珠，步則搖動也。」《續漢·輿服志》云：「皇后謁廟，假結步搖，以黃金爲山題，貫白珠爲桂枝相繆，八爵九華，熊、虎、赤翟、天鹿、辟邪、南山豐大特六獸。《詩》所謂副笄六珈者。」此並漢時步搖之飾。《藝文類聚·人部》引宋玉《諷賦》，有步搖垂珠之語，疑亦漢人依託爲之，周制質樸，未必盡如漢法。但副爲首飾，加於紒上，則與步搖約略相似，故鄭舉以況義耳。又《後漢書·東平憲王蒼傳》李注、《太平御覽·服用部》並引鄭注云：「副，婦人首服，三輔謂之假紒。」案：鄭所謂假紒遺象者，乃編字詁釋，與副不同，且不引三輔方言，其非後鄭說無疑。先鄭《解詁》，隋、唐《志》已不著錄，亦非李賢等所得見。此或賈、馬、干諸家佚說，誤屬之鄭與？《毛詩傳》以副爲編髮爲之，義亦略同。惠士奇云：「漢之假髻亦名爲副，故《廣雅·釋器》云：『假結謂之髻，副以髮爲之，故從髟。』」然則副與編一物也。飾之盛者爲副，其次爲編與？案：漢皇后謁廟，首服假紒，上有步搖，乃后之盛飾，故康成以副當之。其實步搖非副，而在副上，則副爲假紒又何疑。」王念孫亦云：「副之異於

編次者，副有衡筓六珈以爲之飾，而編次則無之。其實副與編次皆取他人之髮合己髮以爲結，則皆是假結也。」案：《廣雅》文足證李引舊說，惠、王兩說亦足以釋毛、鄭之紛。但《說文》無髻字，《玉篇·髟部》云：「髻，本又作副。」則當是副之俗體，非古字也。云「服之以從王祭祀」者，謂副配三翟，《內司服》注以三翟皆爲祭服是也。《玉藻》疏引《鄭志》亦云「三狄首服副」。賈疏云：「祭祀之中，含先王、先公、羣小祀，故以祭祀總言之也。鄭必知三翟之首服副者，王之祭服有六，首服皆冕，則后之祭服有三，首服皆副可知。」案：賈謂鄭以三翟當王六冕，以其皆祭服也。但以《內司服》及《喪大記》注所定男女服次覈之，三翟所配者，實止毳冕以上四服。其絺冕、玄冕，於婦人服當別配鞠衣、展衣，三翟不得通配六冕也。若然，王祭羣小祀服玄冕，則后從王當服編展衣，方與等差相合。《內司服》注謂后從祭羣小祀服闕狄，似未協。詳彼疏。秦蕙田云：「副配三翟，其制亦宜有三等之別。如用玉加於副以爲飾謂之珈，侯伯夫人揄狄之副用六珈，則王后褱衣之副，其珈必不止六；而闕狄之副，其珈又當降殺，如王五冕之旒有等級之辨也。」案：秦說近是。但《君子偕老》傳謂珈爲筓飾之最盛者，則珈兼於飾筓，不專主於飾副，疑編次之筓亦有之也。

加數降殺，金鶚謂衛侯爵七命，夫人以偶數故六，由此推之，子男夫人當有四，上公夫人當有八，王后當有十。但於經無文，未知是否。云「編，編列髮爲之」者，《玉藻》疏引《鄭志》同。《釋名》亦云「編，編髮爲之」。《說文·糸部》云：「編，次簡也。」引申爲編髮之稱。《一切經音義》引《字林》云：「以繩次物曰編。」此編蓋亦以細繩聯次髮爲之。云「其遺象若今假紒矣」者，《玉藻》疏引《鄭志》亦同。惠士奇云：「假紒者，假髮爲髻。」後漢書·東平憲王蒼傳，肅宗賜東平、琅邪兩王書，送光烈皇后假紒，帛巾各一。則知假紒，皇后服之，與副同矣。林頤山云：「《續漢·輿服志》：『皇后謁廟，假結。』髻紒結通用字。《宋·禮志》：『漢制，皇后謁廟，首飾假髻。』《宋·五行志》：『晉海西太和以來，大家婦女緩髻傾髻爲盛飾，用髮既多，乃先作假髻。』《後漢·馬廖傳》：『長安語曰：城中好高髻，四方高一尺。』亦指假髻而言。因其真髻上又覆以假髻，髻高近於一尺。然則編列髮爲假紒，其形制大而且高也。」云「服之以桑也」者，謂編配鞠衣。桑謂蠶桑之事，兼《內宰》仲春親蠶，《月令》季春告桑言之。《詩·君子偕老》及《雞鳴》孔疏引「以桑」，並作「以告桑」，疑據《內司服》注增。賈疏云：「上注鞠衣以告桑，此下注及《鄭荅志》皆云展首服編，此直

據鞠衣服之以桑，不云展衣者，文略。其編亦兼於展衣也。鄭必知鞠衣、展衣服編者，三翟首服副，《昏禮》「女次純衣」，純衣則袷衣，袷而云次，則袷衣首服次可知。其中唯有編，明配鞠衣、展衣也。」云「次，次第髮長短爲之」者，《玉藻》疏引《鄭志》同。《士昏禮》「女次純衣」，注云：「次，首飾也。今時髮也。」《釋名》云：「次，次第髮也。」字又作「髻」，《說文·髟部》云：「髻，用梳比也。」《玉篇·髟部》云：「首飾爲髻。」蓋次第髮長短，必用梳比，故首飾以爲名矣。《君子偕老》疏云：「編，列他髮爲之，假作紒形，加於首上。次者，亦髻他髮與己髮相合爲紒。是編次所以異也。」云「所謂髮髻」者，《玉藻》疏引《鄭志》同。《釋文》云：「髻，本又作髻。」《少牢饋食禮》：「主婦被錫衣移袂。」注云：「被錫讀爲髮髻。古者或剔賤者、刑者之髮，以被婦人之紒爲飾，因名髮髻焉，此《周禮》所謂次也。」《詩·召南·采芣》「被之僮僮」，傳云：「被，首飾也。」箋亦引《禮》「主婦髮髻以證之。此注與《詩箋》所謂髮髻，即據《少牢禮》改字爲說。《說文·髟部》云：「髻，髮也。重文髻，髻或从也聲。髮，髻也。又髻，髻髮也。」張參《五經文字》引鄭《詩箋》作髻。段玉裁謂《少牢》、《追師》注髮髻字，亦並當作髻，鄭云「髻髮以髮婦人之結」，作髻者誤。其說是也。戴

震云：「鄭注《禮》，合次與髮髻爲一，其箋《詩》又合被與髮髻爲一，被之爲次，恐未然也。三翟之首服副，鞠衣、展衣之首服編，祿衣之首服次。《君子偕老》之次章，上言「其之翟也」，下言「鬢髮如雲，不屑髢也」。箋曰：「髢，髮也。不用髮爲善。」髮被古字通用。然則《詩》之被，乃所謂髢，不在副編次之數。」金榜云：「《少牢》，主人朝服，主婦被錫衣。案：男子服爵弁者，婦人首服次。《少牢》主人服朝服而主婦或首服次，蓋非其差矣。經傳或言髮，或言髢，一物二名，未有連屬爲文稱髮髢者，鄭改經被錫爲髮髢，非古也。被卽《詩》所謂被。錫今文作緡，《說文》云「細布」，《子虛賦》「被阿緡」是也。」案：戴、金並謂被別爲首服，在副、編、次之下，緡之上，規鄭《少牢》注破字及以被與次爲一之誤，義致精塢。張惠言說同。然則鄭釋次義，與許劉同，自是古制；而所謂髮髢者，則止可以釋《詩》之被，不可以釋此及《禮經》之次矣。云「服之以見王」者，謂次配祿衣，《內司服》注云：「祿衣，御於王之服，亦以燕居。」並謂襲燕服御見時也。賈疏云：「《士昏禮》「女次純衣」，純衣卽祿衣，則祿衣首服次可知。上注展衣云「以禮見王」，則展衣首服編以禮見王。此又云次以見王者，則見王有二：一者以禮朝見於王，與見賓客同，則服展衣與編也；一者祿衣首服

次，接御見王則祿衣與次，則此注見王是也。故二者皆云見王耳。」案：《內司服》注謂后以禮見王服展衣，故燕見降一等當服祿衣。然王燕服玄端，以次推之，則后燕見王當纁笄宵衣，與燕居同。若服次祿衣，則正與王皮弁朝服相當，非燕見之服也。《內司服》注謂后朝服展衣，故後賈疏謂后朝王首服編。並非其差。互詳《內司服》疏。云「王后之燕居亦纁笄總而已」者，謂亦祿衣而不服次，故《玉藻》疏引《鄭志》云：「若燕居之時，則亦祿衣纁笄總而已。」賈疏云：「案《士冠禮》，纁長六尺以韜髮，笄者所以安髮，總者既繫其本，又總其末。燕居謂不至王所，自在燕寢而居時也。案《鷄鳴》詩云：「東方明矣，朝既昌矣。」毛云：「東方明則夫人纁笄而朝。」但諸侯夫人於國，衣服與王后同，而得服纁笄而朝者。此經云副編次以待祭祀賓客，明燕居不得著次，自然著纁笄。而毛云著纁笄朝者，毛更有所見，非鄭義。若然，彼鄭不破之者，以其纁笄燕居無正文，故且從毛也。其實朝王時首服編也。」案：鄭、賈說非也。后御見與燕居之服蓋同纁笄宵衣，鄭以宵衣與祿衣爲一，故有茲誤。又纁笄有與被同服者，則當服錫衣，與宵衣唯服纁笄異。《毛詩·鷄鳴》傳謂夫人笄纁朝，此指諸侯夫人朝服，蓋卽被錫衣，與諸侯朝服冠弁正相當。服被者亦纁笄，纁

筭則不必盡著被也。其夫人燕見、燕居之服，疑亦當纁筭宵衣。不降於王后者，禮窮則同也。又案《內則》云：「婦事舅姑如事父母，鷄初鳴，咸盥漱，櫛，紒筭總，衣紳。」紒與纁同。則纁筭總蓋婦人之常服。但《禮經》言婦人纁筭者，《士昏禮》、《特牲饋食禮》並服宵衣，其等差蓋在袷衣之下。若如注說謂王后燕居服袷衣，則不得去次而徒纁筭，鄭說不可通也。又《白虎通義·嫁娶篇》云：「婦事夫，鷄初鳴，咸盥漱，櫛，紒筭總而朝。」《公羊·莊二十四年何注》、《詩·鷄鳴》孔疏引《列女傳》魯師氏母語，文略同。蓋妻事夫之常禮，通上下言之，故止著纁筭之文，而不詳其服之異也。云「追猶治也」者，《序官》注云：「追，治玉石之名。」衡筭皆玉爲之，故別言追不言爲也。林頤山云：「後鄭改先鄭舊義，以追連下衡筭讀，說追爲治玉，猶言追玉衡、玉筭，即追師所以名官，而分衡與筭爲二物。」引《詩》云「追琢其璋」者，《大雅·棫樸》文。《毛詩》璋作章。阮元云：「此當據《魯》、《韓詩》。《玉篇·疋部》引《詩》亦作璋。」論讓案：毛傳云：「追，彫也。金曰彫，玉曰琢。」鄭箋云：「《周禮》追師『掌追衡筭』，則追亦治玉也。」是彼詩追訓與此經同，故引以爲證。云「王后之衡筭皆以玉爲之」者，賈疏云：「以《弁師》王之筭以玉，故知后與王同用玉也。《弁師》云，諸

公用玉爲瑱。《詩》云「玉之瑱也」，據諸侯夫人。夫人與君同用玉瑱，明衡筭亦用玉矣。其三夫人與三公夫人同服翟衣，明衡筭亦同玉矣。其九嬪命婦等當用象也。」案：諸侯夫人玉筭、瑱，瑁玉爲之，乃石之似玉者，與王后玉筭瑱蓋小異，詳《弁師》疏。聶氏《三禮圖》引梁正、阮氏圖云：「筭，士以骨，大夫以象。」賈謂九嬪、命婦等用象，並依大夫制也。《鄘風·君子偕老》說衛夫人象服，《穀梁·僖九年楊疏》謂即象筭，則誤。云「唯祭服有衡」者，《詩·君子偕老》疏引「衡」下有「筭」字。案：衡筭不得垂於副旁，此與注下文不合，《大雅·棫樸》疏引亦無筭字，則《鄘風》疏蓋傳寫誤衍。賈疏云：「見桓二年臧哀伯云『衮冕黻珽，帶裳幅舄，衡紃紃紃』，並據男子之冕祭服而言，明婦人之衡亦施於三翟矣。鞠衣以下雖無衡，亦應有紃以懸瑱，是以《著》詩云充耳以素，以青，以黃，是臣之紃以懸瑱，則知婦人亦有紃以懸瑱也。」云「垂于副之兩旁，當耳，其下以紃縣瑱」者，于，亦當作「於」。《釋文》「以」下無「紃」字。賈疏云：「《傳》云『衡紃紃紃』，與衡連，明言紃爲衡設矣。筭既橫施，則衡垂可知。若然，衡訓爲橫，既垂之而又得爲橫者，其筭言橫，據在頭上橫貫爲橫，此衡在副旁當耳，據人身豎爲從，此衡則爲橫，其衡下乃以紃縣瑱也。」案：賈所

據本有紃字。《國語·魯語》韋注云：「紃，所以縣瑱當耳者。」《說文·糸部》云：「紃，冕冠塞耳者。」《詩·齊風·著》箋說：「紃，織之，人君五色，臣三色。」孔疏引王肅說，則謂天子玄紃，唯一色。金鶚亦據《國語·魯語》「王后織玄紃」，謂王與后皆當用玄紃。其說近是。凡瑱皆有紃，而祭服別有垂縣之衡，則《詩》《禮》諸經並無見文，鄭說不知何據，賈亦無所申證。今以此注所說形制，反復攷之，疑後鄭即緣男子之冕纁，推之以說后之首飾。《大戴禮記·子張問人官篇》云：「黹紃塞耳，所以聿聰也。」《晏子春秋·外篇》云：「纁紃琄耳，惡多所聞也。」紃即纁之或體。《文選·東京賦》薛綜注云：「黹纁，言以黃綿大如丸，懸冠兩邊，當耳。」《續漢·輿服志》注引呂忱《字林》、《論語》皇疏、《左傳》孔疏、《漢書·東方朔傳》顏注並用其義，而求之《詩》、《禮》，絕無徵證。如淳《漢書注》又謂以玉爲瑱，用黹纁懸之，《大戴禮》盧注所說略同，則謂纁與紃異名同物。然紃爲織成條繩，不用絛纁爲之，其說亦難通。竊疑古書說冕飾之纁，正字當作衡，其物則以玉爲之。《太平御覽·皇王部》引《蘇子》云：「天子坐九重之內，旒以翳明，衡以隱聽。」旒衡卽旒纁也。《蘇子》雖晉蘇盧所撰，然以纁爲衡，必有所本。蓋纁衡聲近字通。衡之與瑱同用玉，繫以

紃而垂之，衡橫而瑱從，與佩玉之衡相類，故亦謂之衡。以紃貫衡與瑱，垂於耳旁，皆有充塞之象，故衡瑱紃三者並可以充耳塞耳言之。後鄭此注卽據彼爲釋。但天子諸侯冕服之衡，以玉爲之，若后首服則不必有此，後鄭說不若先鄭釋衡爲笄之瑱，而可以證古冕纁之爲玉而非絛丸。自漢以後，失其形制，因其字借作纁，而《士喪禮》又有瑱用白纁之文，遂推之生人之冕飾，望文生訓，舛爲黃絛爲丸之說。魏晉以後冕服，並沿其制，郢書燕說，千載勿悟，誠足悵也。云《詩》云「玼兮玼兮，其之翟也」，鬢髮如雲，不屑鬢也，玉之瑱也，是之謂也」者，《鄘風·君子偕老》文。玼當作瑳，詳《內司服》疏。毛傳云：「玼，鮮盛貌。翟，綸翟，闕翟，羽飾衣也。鬢，黑髮也。如雲，言美長也。屑，絜也。瑱，塞耳也。」鄭箋云：「鬢，髮也。不絜者，不用髮爲善。」賈疏云：「引之者，證服翟衣首有玉瑱之義，故云是之謂也。其紃之采色、瑱之玉石之別者，婦得服翟衣者，紃用五采，瑱用玉，自餘鞠衣以下紃則三采，瑱用石。知義然者，案《著》詩云：「充耳以素。」鄭彼注云：「謂從君子而出，至於著，君子揖之時也。我視君子，則以素爲充耳，謂所以懸瑱者，或名爲紃，織之，人君五色，臣則三色而已。此言素者，目所先見而云。」下云「尚之以瓊華」，注云「美石」。彼下經

文又云「充耳以青」「充耳以黃」，據臣三色，故云人君五色矣。《詩》云「玉之瑱」，據君夫人云用玉，則臣之妻與夫同美石。彼毛注以素爲象瑱，鄭不從者，若素是象瑱，文何以更云瓊華瓊英之事乎？故鄭以爲紃也。二云「笄，卷髮者」者，《喪服小記》注義同。《說文·竹部》云：「笄，簪也。」又《先部》云：「先，首笄也。俗作簪。」《釋名·釋首飾》云：「笄，係也，所以係冠使不隊也。」《公羊》僖九年何注云：「笄者，簪也，所以繫持髮。」《士冠禮》賈疏云：「凡諸設笄有二種：一是紃內安髮之笄，一是皮弁、爵弁及六冕固冠之笄。」案：賈說分別甚析。《士喪禮》云：「髻笄纓中。」注云：「纓，笄之中央以安髮。」此即安髮之笄，亦即纓笄也。《喪服傳》云「吉笄尺二寸」，又吉笄有首。注云：「有首者，若今時刻鏤摘頭矣。」王及后吉笄制亦當同。賈《士喪禮》疏又云：「安髮之笄，男子婦人俱有。冠笄唯男子有而婦人無也。」金鶚云：「婦人有瑱者亦有笄，安髮之笄非所以縣瑱也。賈謂婦人止有安髮之笄，非也。」案：金說是也。鄭意疑亦謂后夫人無縣瑱之笄，故唯云卷髮，不知尚當有持首服之衡笄，《詩·邶風》副笄是也。二者形制蓋同，但纓笄短而副笄長耳，詳前疏。《魏書·劉芳傳》載後魏王肅說，謂古男子無笄，則尤謬。云「外內命婦衣鞠衣禮衣者服

編，衣祿衣者服次」者，祿，《釋文》作「緣」，誤。《屨人》疏引《鄭志》說同。《玉藻》疏引《鄭志》作「展衣祿衣首服次」，疑誤記也。賈疏云：「案《昏禮》云「女次純衣」，純衣則祿衣。據士服爵弁親迎攝盛，則士之妻服祿衣首服次，亦攝盛。祿衣既首服次，三翟首服副，則鞠衣禮衣首服編可知。」二云「外內命婦非王祭祀賓客佐后之禮，自於其家則亦降焉」者，賈疏云：「知者，大夫妻服禮衣首服編，士妻服祿衣首服次。《少牢》、《特性》是大夫士妻，《特性》云「主婦纓笄宵衣」，《少牢》云「主婦髮髻衣移袂」，但大夫妻移袂爲異，又不服編，故知自於其家則降。」詒讓案：《內司服》注云：「外命婦唯王祭祀、賓客，以禮佐王后，得服此上服，自於其家則降焉。」此首服亦與彼同。但彼注止云外命婦，此注外內並舉者，內命婦雖無於其家祭祀、賓客之事，或以禮事至其家，則亦宜降於佐后之服也。內外命婦服升降，其差次禮文不備。張惠言參合鄭《禮注》及金榜之說，又以意推之，爲《婦人服表》，謂「內命婦：三夫人從王祭先王先公揄狄，從后祭羣小祀闕狄，告桑鞠衣，從后見賓客展衣，以禮見王祿衣，御於王宵衣。九嬪從王后祭闕狄，告桑鞠衣，從后見賓客，以禮見王，御於王與三夫人同。世婦從后祭，告桑並鞠衣，從后見賓客，以禮見王，御於王亦與三夫人同。

女御從后祭、桑、見賓客並展衣，以禮見王，御於王並與三夫人同。外命婦：三公夫人從后祭闕狄，從后桑鞠衣，從后賓客展衣，祭其廟祿衣，禮見君子宵衣。王之孤公之孤之妻助君祭鞠衣，從后夫人賓客展衣，祭其廟祿衣，禮見君子宵衣。次國小國之卿之妻助君祭鞠衣，從夫人賓客展衣，從夫人小禮事祿衣，祭其廟宵衣。王之卿大夫、公之卿大夫、侯伯子男之大夫之妻助君祭，從后夫人賓客並展衣，從后夫人小禮事祿衣，祭其廟宵衣。王及侯國士之妻助君祭，從夫人賓客祿衣，祭其廟宵衣。」張表所差如此，雖無明證，大較近之。惟天子三公鷩冕，夫人從后祭當揄狄，自祭其廟當展衣。又次國小國卿妻與大夫妻，似不宜分爲二等；天子士妻服亦不宜與侯國之士妻同。張氏沿《內司服》注之誤，偶未釐正耳。互詳彼疏。云「《少牢饋食禮》曰，主婦髮鬢衣移袂，《特性饋食禮》曰，主婦纚笄宵衣是也」者，《少牢》經「髮鬢衣」本作「被錫衣」，鄭讀爲髮鬢，此依破字引之。鬢疑當爲鬢，詳前。移袂，舊本移作移，非。今據注疏本正。《少牢》釋文作「移袂」，此與唐石經同。鄭彼注云：「纚笄，首服。宵，綺屬也。此衣染之以黑，其纁本名曰宵。」鄭意《少牢》，諸侯卿大夫之祭禮，主婦服次，《特性》，諸侯士之祭禮，主婦服纚笄；故引以證大夫士妻

自祭降服之事。今攷「髮鬢衣」當爲「被錫衣」，與男子玄冠朝服相當。纚笄宵衣又見《士昏禮》，云「姆纚笄宵衣」。注云：「宵讀爲詩『素衣朱綃』之綃，姆亦玄衣，以綃爲領，因以爲名。」與《特性》注說小異，而其以宵衣爲即祿衣則一。金榜云：「凡此祭於公，大夫冕服，其妻展衣；士爵弁服，其妻祿衣；皆絲衣也。《特性》、《少牢》自祭於廟，主人朝服布衣也，故主婦亦服錫衣，《特性》主婦宵衣，《昏禮》注云「以綃爲領」，則宵衣亦以布爲之可知。」案：金說是也。孔廣森、林喬蔭、張惠言說並略同。蓋錫衣與《司服》錫衰同物，宵衣亦即錫衣而以綃爲領者，與男子玄端服相當。鄭說並失之。云《昏禮》女次純衣，攝盛服耳，主人爵弁以迎者，《士昏禮》親迎云「主人爵弁，纁裳緇紕」，「女次純衣纁衽」。純衣即祿衣。士上服爵弁服，士妻上服次祿衣，惟服以助祭於君。今親迎得服之，故云攝盛服。此引證非助祭而不降者，爲非常禮也。孔廣森云：「《昏禮》主人爵弁，女次純衣纁衽。《雜記》『子羔之襲也，繭衣裳與稅衣纁衽爲一』，曾子以爲婦服，則稅衣纁衽者即純衣纁衽也。」案：孔說是也。稅祿通，詳《內司服》疏。云「移袂，祿衣之袂」者，鄭於《少牢》經「既破被錫爲髮鬢，則所云衣者不知何衣，意大夫妻助祭服展衣，自祭降一等，當服祿衣，故謂移袂者

卽祿衣也。鄭彼注釋衣移袂云：「亦衣綃衣而侈其袂耳。侈者，蓋半士妻之袂以益之，衣三尺三寸，袂尺八寸。」彼注不云祿衣者，鄭意綃衣卽祿衣。依鄭《司服》注義，蓋謂大夫以上朝祭服並侈袂，士朝服玄端服則不侈袂。以相比例，則婦人服：大夫妻祿衣以上並侈袂，士妻祿衣則不侈袂，與男服差次相應。但婦服侈袂，唯《少牢》一見，而鄭謂大夫以上服並侈袂，說亦不甚塙，未可據以推定婦服也。詳《司服》疏。賈疏云：「此鄭覆解《少牢》主婦衣移袂者，是移祿衣之袂。上既云移袂，今又云移祿衣之袂，不同者，但士之妻服綃，服祿衣助祭及嫁時不移其袂，今大夫妻綃衣移而以祿衣袂者，以大夫妻與士妻綃衣名同，不得言移於綃衣之袂，故取祿衣也。」黃以周云：「鄭注《少牢》云：『亦衣宵衣而侈其袂。』又注《追師》云：『侈袂，祿衣之袂。』是鄭亦以宵衣爲祿衣也。婦人祿衣配男子朝服。」案：鄭、賈意當如黃說，故鄭《士昏禮》注以宵衣亦爲玄衣。賈《內司服》疏謂《少牢》大夫妻侈綃衣袂，《少牢》疏義同。大意蓋謂《少牢》主婦所服亦卽綃衣，但士妻綃衣袂無侈法，今云移袂則是祿衣，明祿衣宵衣本同，惟以領袂爲異。今攷宵衣，實卽錫衣，與祿衣自是二服，此注說非是。《少牢》主人朝服，主婦被錫衣，侈袂。《特性》主人冠端玄爲玄端服，

主婦纁笄綃衣不侈袂。蓋衣同而首服及領袂則降，男女服差次正合。若如此注以爲祿衣，則與主人朝服不相當，足知其非。又案：婦人服次，祿衣以降爲被錫衣，唯《少牢禮》一見；更降爲纁笄宵衣，《士昏禮》兩見，《特性》一見，則皆不加被，蓋笄卽爲首服也。又《士昏禮》，壻從者畢玄端，女從者畢紵玄，纁笄被纁黼。蓋亦卽錫衣之衣加被者，與玄端服正相當，以其不綃領，故不云宵衣耳。鄭注及賈彼疏亦謂卽祿衣，則非也。云「凡諸侯夫人於其國，衣服與王后同」者，賈疏云：「以其諸臣之妻有助后與夫人祭之事，諸侯夫人無助后之事，故自於其本國衣服得與王后同也。所同者，上公夫人得祿衣已下至祿衣，祿衣從君見大祖，綃從君祭羣廟，闕翟從君祭羣小祀，鞠衣以告桑，展衣以禮見君及賓客，祿衣以接御。侯伯夫人得綃翟已下，綃翟從君見大祖及羣廟，闕翟已下與上公夫人同。子男夫人得闕翟已下，闕翟從君見大祖及羣廟與羣小祀，鞠衣以下與侯伯同。並纁笄綃衣以燕居也。二王之後與魯夫人亦同上公之禮，故《明堂位》云：「季夏六月，以禘禮祀周公於大廟，夫人祿衣」是也。」喪紀，共笄經，亦如之。【疏】「喪紀共笄經亦如之」者，喪紀通大小喪言之。此所共者，亦自王后以下通内外命婦皆共之也。《喪服》經云：

「妻爲夫、妾爲君、女子子在室爲父，布總箭筭髻，衰三年。」注云：「箭筭，篠竹也。」又《記》云：「女子子適人者爲其父母、婦爲其舅姑，惡筭有首以髻。卒哭，子折筭首，以筭布總。」《傳》云：「筭有首者，惡筭之有首也。惡筭者，櫛筭也。折筭首者，折吉筭之首也。吉筭者，象筭也。」注云：「櫛筭者，以櫛之木爲筭。或曰榛筭。」案：《檀弓》說榛筭長尺，蓋短於吉筭。后之喪筭亦當有箭筭、櫛筭，但后吉筭用玉，則折筭或不用象筭耳。其內命婦九嬪以下，外命婦卿大夫妻以下，喪筭與《喪服》經記同。凡經有首經、要經，男女制同，詳《司服》疏。

屨人掌王及后之服屨。爲赤舄、黑舄，

赤總、黃總；青句，素屨，葛屨。屨自明矣，必連言服者，著服各有屨也。複下曰舄，禪下曰屨。古人言屨以通於複，今世言屨以通於禪，俗易語反與？舄屨有絢、有總、有純者，飾也。鄭司農云：「赤總黃總，以赤黃之絲爲下緣。《士喪禮》曰：『夏葛屨，冬皮屨，皆總緇純。』禮家說總亦謂以采絲縹其下。」玄謂凡屨舄，各象其裳之色。《士冠禮》曰玄端、黑屨、青絢總純，素積、白屨、緇絢總純，

爵弁、纁屨、黑絢總純是也。王吉服有九，舄有三等。赤舄爲上冕服之舄。《詩》云「王賜韓侯，玄衮赤舄」，則諸侯與王同。下有白舄、黑舄。王后吉服六，唯祭服有舄。玄舄爲上，禕衣之舄也。下有青舄、赤舄。鞠衣以下皆屨耳。句當爲絢，聲之誤也。絢總純者同色，今云赤總、黃總、青絢，雜互言之，明舄屨衆多，反覆以見之。凡舄之飾，如纁之次。赤總者，王黑舄之飾；黃總者，王后玄舄之飾；青絢者，王白舄之飾。言總必有絢純，言絢亦有總純，三者相將。王及后之赤舄皆黑飾，后之青舄白飾。凡屨之飾，如繡次也。黃屨白飾，白屨黑飾，黑屨青飾。絢謂之拘，著舄屨之頭以爲行戒。總，縫中紉。純，緣也。天子諸侯吉事皆舄，其餘唯服冕衣翟著舄耳。士爵弁纁屨，黑絢總純，尊祭服之屨飾，從纁也。素屨者，非純吉，有凶去飾者。言葛屨，明有用皮時。【疏】「掌王及后之服屨」者，賈疏云：「但首服在上，尊，又是陽，多變，是以追師與弁師男子婦人首服各別官掌之。屨舄在下，卑，又是陰，少變，故男子婦人同官掌之也。」云「爲赤舄黑舄，赤總黃總，青句素屨」者，此辨二舄一屨色及采飾之別，即此官之官法也。賈疏云：「謂掌而營造之，故云爲也。赤舄者，男子冕服、婦人闕翟之舄也。黑舄者，天子諸侯玄端服之舄。赤總已下云總云

句者，欲言總綯以表見其烏。赤總者，是天子諸侯黑烏之飾；黃總者，與婦人爲玄烏之飾也。青句者，與王及諸侯爲白烏之飾。凡履烏皆有綯總純三者相將，各言其一者，欲互見其履烏，故多舉一邊而言也。素屨者，大祥時所服，去飾也。」案：烏屨之差見於經者，唯此職及《士冠》、《士喪》二禮，文皆不具。此經雖有互文錯見之例，然如鄭賈所說，前後參差，絕無義例，殆不足據。林喬蔭云：「王與后蓋皆二烏，一赤烏，一黑烏。赤總以飾赤烏，黃總以飾黑烏。燕居則王及后皆不服烏而服屨，是爲素屨。」案：林說較長。王昭禹亦謂赤烏赤總，黑烏黃總，卽林氏所本。莊有可說同。史浩釋赤總黃總亦從黃說，又謂青句卽以飾素屨，亦近是。今依據《禮經》，參以諸家之義，竊謂此經赤烏、黑烏，王與后通得服之。赤烏則赤綯總純，黑烏則黃綯總純，素屨則青綯總純。蓋赤烏最尊，故卽以赤爲飾，不以他采間之，亦謂之金烏，以赤兼黃朱，近於金色也。《小爾雅·廣服》云：「履尊者曰達履，謂之金烏而金綯也。」是卽金烏爲綯同色之塙證。《士冠》三屨並總綯同色，而此赤總黃總之下別出青綯，明青綯自與素屨爲一屨，素屨卽《士冠禮》之白屨，林本孔廣森說，謂非凶屨是也。王之白屨青綯總純，與士白屨緇綯總純小異。其必曰青綯素屨者，別於

凶屨無綯。其不曰青總素屨者，嫌與上赤總黃總連文無別也。要之此經二烏一屨，與《士冠》禮三屨之色正同。唯王及后仍當有纁屨、黑屨，與士三屨同。經不著者，以烏尊屨卑，舉赤烏黑烏足以咳纁屨黑屨。卿大夫及王之命士得服冕服者，亦得服赤烏。侯國之士服自爵弁以下，則惟服纁、黑、白三屨。蓋服屨之內本無青黃二色，經文敘次自明析也。云「葛屨」者，《說文·艸部》云：「葛，絺綌材也。」賈疏云：「自赤烏以下，夏則用葛爲之，若冬則用皮爲之。在素屨下者，欲見素屨亦用葛與皮故也。」案：《詩》、《禮》諸經止有葛屨無葛烏。竊意烏尊，雖夏亦當用皮，葛褻，止可用以爲屨，不以爲烏也。賈說恐未塙。賈疏又云：「《鄭志》：趙商問：『《司服》王后之六服之制，目不解，請圖之。』荅曰：『大裘、衮衣、鷩衣、毳衣、絺衣、玄衣，此六服皆纁裳赤烏。韋弁衣以韎，皮弁衣以布，此二弁皆素裳白烏。冠弁服黑衣裳而黑烏。冠弁玄端。韋衣玄烏，首服副，從王見先王。綯翟青烏，首服副，從王見先公。闕翟赤烏，首服副，從王見羣小祀。鞠衣黃屨，首服編，以告桑之服。褫衣白屨，首服編，以禮見王之服。祿衣黑屨，首服次，以御於王之服。后服六翟，三等三烏，玄、青、赤。鞠衣以下三屨，黃、白、黑。婦人質，不殊裳，屨烏皆同裳色也。』」案：

賈引《鄭志》所定王及后服舄屨之差，亦未瑯，詳後。《初學記·履部》引《賈子》云：「天子黑方履，諸侯素方履，大夫素圓履。」此說履制，與《禮經》不合，尤不足據也。注

云「履自明矣，必連言服者，著服各有履也」者，明服別則履別也。賈疏云：「履舄從裳色，裳既多種，故連言服也。」云

「複下曰舄，禪下曰履」者，《隋書·禮儀志》引《禮圖》同。

《說文·履部》云：「履，足所依也。屨，履也。」《釋名·釋

衣服》云：「履，禮也，飾足所以爲禮也。亦曰屨，屨，拘也，

所以拘足也。複其下曰舄，舄，腊也，行禮人立地或泥溼，

故複其下使乾腊也。」賈疏云：「下謂底。複，重底。重底

者名曰舄，禪底者名曰履也。」惠士奇云：《方言》：「中有

木者謂之複舄，自關而東複履，其庫者謂之鞮，下禪者謂之

鞮。」郭注云：「今韋鞮也。」然則禪以皮而複加木矣。《隋

志》云：「近代或以重皮而不加木，隋制復古，以木重底。舄，

冕服著之，屨則通用。」任大椿云：《釋名》：「複其下曰

舄，複其末下使乾腊也。」《古今注》：「舄以木置屨下，乾腊

不畏泥溼也。」蓋舄以革爲底，而以木爲重底，置在屨下，故

《釋名》謂複其末下，《古今注》亦云木置屨下也。革柔故以

革親足，木堅可以禦泥溼，故以木著地也。」云「古人言屨以

通於複，今世言屨以通於禪，俗易語反與」者，賈疏云：「首

直云屨人不言舄，及經舄屨兩有，是言屨通及舄。漢時名複下者爲屨，并通得下禪之屨，故云俗易語反與。」論讓案：鄭謂周時本以複下曰舄，禪下曰履，然此經履屨內兼有三舄，是複下亦通名屨也。《毛詩·豳風·狼跋》傳云：

「赤舄，人君之盛屨也。」又《小雅·車攻》傳云：「金舄，達屨也。」此並古義之以屨通舄者也。至漢時俗語則無復舄

名，而以屨爲複下之正稱。其禪下者，蓋別稱鞮。《方言》

所云，卽漢時語也。禪下者雖亦或稱屨，則以爲段借之通

語，不爲正名，是與周時語正相反也。云「舄屨有絢有縹有

純者，飾也」者，舄屨鼻飾謂之絢，牙底相接縫中之飾謂之

縹，繞口之飾謂之純。純，見《士冠禮》及《士喪禮》。此經

有絢縹而無純者，文不具。鄭司農云「赤縹黃縹，以赤黃之

絲爲下緣」者，謂織赤黃之絲爲條紃，以緣牙底相接之縫

中。云下緣者，對繞口之緣爲上緣也。先鄭說與後鄭同。

引《士喪禮》曰「夏葛屨，冬皮屨，皆縹緇純」者，今《儀禮》

「冬皮屨」作「冬白屨」，又「緇純」作「緇絢純」。陸氏《儀禮

釋文》亦無絢字，蓋先鄭所見本異。鄭彼注云：「冬皮屨，

變言白者，明夏時用葛亦白也。」《士冠禮》亦云：「屨，夏用

葛，冬皮屨可也。」賈疏云：「引《士喪禮》者，證縹爲下緣。

云皆縹緇純者，葛屨皮屨皆有縹也。緇純純用緇，則縹絢

亦用緇色也。」云「禮家說纁亦謂以采絲礫其下」者，漢時禮家說《士冠》義也。礫蓋與擲同。《釋名·釋首飾》云：「導，所以導擲髮，使人巾幘之裏也。」屨纁亦以采絲擲入屨牙底接縫中爲飾，故云礫其下。纁於屨牙底之間爲飾，猶《士虞禮》爵口足之間爲篆飾，謂之纁爵也。《說文·糸部》云：「縹，以絲介履也。」疑卽此纁。又《履部》別有屨字，訓履下，蓋卽履下底之名。徐鍇《說文繫傳》謂此注之礫卽屨字之假借，誤。云「玄謂凡屨爲各象其裳之色」者，《士冠禮》注亦云「屨者順裳色」。蓋凡禮之通例，衣與冠同色，帶與衣同色，裳與鞞同色，屨與裳同色。賈疏云：「屨爲與裳俱在下體，其色同。」凌廷堪云：「亦有屨與裳不同色者，玄端用黑屨，而裳則有玄裳、黃裳、雜裳之異是也。」注蓋舉其多者言之耳。引《士冠禮》曰「玄端黑屨，青絢纁純，素積白屨，緇絢纁純，爵弁纁屨，黑絢纁純」是也者，此《士冠》三加玄端、皮弁、爵弁服之屨也。鄭彼注云：「玄端黑屨，以玄裳爲正也。絢纁純三者皆青。爵弁屨以黑爲飾。」引此者，證屨象裳色之義。玄端、皮弁、爵弁服，並詳《司服》疏。云「王吉服有九，爲有三等」者，賈疏云：「則《司服》六冕，與韋弁、皮弁、冠弁是也。爲有三等，謂經赤舄、黑舄、白舄也。」云「赤舄爲上冠服之舄」者，天子吉服以六冕爲上，此

經二舄先赤後黑，亦以赤舄爲上。凡冕服皆玄衣纁裳，故同赤舄也。赤舄亦謂之金舄，鄭《詩·小雅·車攻》箋云：「金舄，黃朱色也。」孔疏謂金舄者，卽《禮》之赤舄是也。云「《詩》云王賜韓侯，玄衮赤舄，則諸侯與王同」者，《詩·大雅·韓奕》文。《毛詩》「賜」作「錫」，俗本多依《詩》改作錫，非。又《車攻》云：「赤芾金舄，會同有繹。」毛傳亦云諸侯赤芾金舄。賈疏云：「玄衮者，冕服皆玄上纁下，而畫以衮龍。赤舄者，象纁裳故也。引之者，證諸侯得與王同有三等之舄，赤舄爲上也。」案：《詩·豳風·狼跋》亦說周公服赤舄。但依鄭、賈說，則諸侯吉事無不服舄者。今攷《左傳》及諸子述諸侯事涉屨者甚多，疑諸侯弁服、冠服亦止服屨也。詳後。云「下有白舄、黑舄」者，賈疏云：「白舄配韋弁、皮弁，黑舄配冠弁服。案《司服》注：「韋弁，以韠韋爲弁，又以爲衣裳。」則韋弁其裳以韠之赤色韋爲之。今以白舄配之，其色不與裳同者，《鄭志》及《聘禮》注韋弁服，皆云以素爲裳。以無正文，鄭自兩解不定，故得以白舄配之。冠弁服則諸侯視朝之服，是以《燕禮記》云「燕朝服」，鄭云：「諸侯與其羣臣日視朝之服也。謂冠玄端、緇帶、素鞞、白屨也。」白屨卽與皮弁素積白屨同，今以黑舄配之，不與裳同色者，朝服與玄端大同小異，皆玄端緇布衣而裳有

異耳。若朝服，則素裳白屨。若玄端之裳，則《玉藻》云「韠，君朱，大夫素，士爵韋」。是韠從裳色，則天子諸侯朱裳，大夫素裳，皆不與裳同色者，但天子諸侯烏有三等，玄端既不得與祭服同赤烏，若與韋弁、皮弁同白，則黑烏無所施。故從上士玄裳爲正而黑烏也。大夫玄端素裳，亦從玄裳黑屨矣。」案：鄭、賈說非也。王及諸侯弁服冠服，禮無服烏之正文。又此經本無白烏，而鄭以青絢爲白烏，謂經舉飾以明烏，其說本屬牽強。韋弁服韠裳，當以《司服》注爲正。《鄭志》云素裳，乃鄭未定之論，不足據。依賈又謂冠弁玄端服黑烏，亦本《鄭志》說。任大椿云：「冠弁即朝服也。天子諸侯朝服皆素裳，烏從裳色。《燕禮記》疏謂諸侯朝服當白烏，則天子冠弁亦當白烏。」案：任說是也。宋蘇初說同。今依此經及《士冠禮》攷之，王烏實止有赤黑二種，屨則當有纁黑素三種。赤烏以配五冕服之纁裳，纁屨以配韋弁服之韠裳，素屨以配皮弁冠弁服之素裳，黑屨以配玄端服之玄裳，惟黑烏無所施。今攷《司服》齊服玄端，上通於天子。《書·顧命》載康王即位之禮，云「王麻冕黼裳，卿士邦君麻冕蟻裳」。蟻裳即玄裳，黼裳黑白相間爲變服，黑烏者殆即玄冕玄裳黼裳之烏也。如是則於經文既合，而二烏配冕服，素屨配弁服，於尊卑敘次，尤絕無混

躐；較之以青絢爲白烏，橫增經外之服名，以黑烏配冠弁，復乖朝服之裳色，不遠勝乎！王齊服玄冕玄端，亦詳《司服》疏。云「王后吉服六，唯祭服有烏」者，《內司服》注云「韠衣、揄狄、闕狄」此三者皆祭服」是也。賈疏云：「以王烏有三，后烏不得過王，故知后烏亦三等。但冕服有六，其裳同，故以一烏配之。后翟三等，連衣裳而色各異，故三翟三等之烏配之。」云「玄烏爲上，韠衣之烏也，下有青烏、赤烏，韠衣以下皆屨耳」者，《御覽》引《三禮六服圖》云：「王后鞞衣玄烏，揄狄青烏，闕狄赤烏，韠衣黃屨。」並依鄭義。賈疏云：「玄烏配韠衣，則青烏配搖翟，赤烏配闕翟可知。六服三翟既以三烏配之，且下文命夫命婦唯言屨不言烏，故知韠衣以下皆屨也。」又云：「上公夫人得服韠衣者，亦得玄烏也。」案：鄭、賈說亦未安。玄烏、青烏經文所無，鄭以意增之，以配韠衣、揄狄，誤亦與王服增白烏同。但后之烏屨所配，經無明文，今以屨順裳色推之，竊謂唯闕狄赤服赤烏當如鄭說，餘服則韠衣玄，揄狄青，玄青與黑色並相近，當同服黑烏；韠衣黃，當服纁屨；展衣白，當服素屨；祿衣、宵衣黑，則當同服黑屨。但《禮經》闕略，無文可證耳。云「句當爲絢，聲之誤也」者，段玉裁云：「此依《士冠禮》作絢，定爲聲之誤。實則古假借字也。」案：段說是也。《漢

書·王莽傳》亦作句。云「絢纁純者同色」者，賈疏云：「案《士冠禮》，三冠絢纁純各自同色故也。」云「今云赤纁黃纁青絢雜互言之，明烏屨衆多，反覆以見之」者，賈疏云：「以其男子有三等屨，婦人六等屨，若具言其屨，於文煩，故雜互見之，明其衆多也。」案鄭、賈意，經以赤纁爲黑烏之飾，又以黃纁見后有玄烏，以青絢見王有白烏，而赤烏當黑纁，則又無文，故云雜互言之。其說亦非也。今據《小爾雅》推定，赤纁即赤烏之飾，則黃纁亦即黑烏之飾，而青絢又當別爲素屨之飾，無白烏，玄烏，經文敘次並不雜互，鄭自誤釋耳。云「凡烏之飾如纁之次」者，《畫纁之事》：「雜五色，東方謂之青，南方謂之赤，西方謂之白，北方謂之黑，天謂之玄，地謂之黃。青與白相次也，赤與黑相次也，玄與黃相次也。」注云：「此言畫纁六色所象及布采之第次，纁以爲衣。」此所謂纁次也。賈疏云：「無正文，此約皮弁白屨黑絢纁純，白黑比方爲纁次；爵弁纁屨黑絢纁純，黑與纁南北相對，尊祭服，故對方爲纁次也。以此而言，則知凡烏皆不與屨同，而爲纁次可知。」詒讓案：此亦鄭以意說之，蓋不足據。以金烏絢同烏色證之，則無纁次之說可知。云「赤纁者，王黑烏之飾」者，賈疏云：「以其烏飾從纁之次，亦是南方火色，與北方黑對方，更無青屨取赤爲纁，

知是王黑烏之飾也。」案：鄭、賈說亦非也。今定赤纁即赤烏之飾，赤纁則赤絢，《小爾雅》所謂金絢是也。云「黃纁者，王后玄烏之飾」者，賈疏云：「以其天玄與地黃，相對爲纁次，故知是王后玄烏之飾也。」案：鄭、賈說亦非也。今定黃纁爲黑烏之纁，非纁次也。云「青絢者，王白烏之飾也」者，^①賈疏云：「亦以對方飾之，亦得與緣衣黑屨爲飾。

但據烏尊者而言，王亦與諸侯白烏爲飾也。」案：鄭、賈說亦非也。今定青絢即素屨之絢，亦非對方色也。云「言纁必有絢純，言絢亦有纁純，三者相將」者，賈疏云：「以《士冠禮》三冠各有絢纁純，故知三者相將。但經互見，故各偏舉其一耳。」案：鄭、賈說是也。絢纁純同色，故經不一一備詳。但鄭謂舉纁絢以見烏屨，則非耳。云「王及后之赤烏皆黑飾，后之青烏白飾」者，賈疏云：「以烏皆對方以纁次爲飾，故知義然也。」案：鄭、賈說亦非也。今定王赤烏赤飾，后無青烏。云「凡屨之飾如纁次也」者，《畫纁之事》云：「青與赤謂之文，赤與白謂之章，白與黑謂之黼，黑與青謂之黻，五采備謂之纁。」注云：「此言刺繡采所用，繡以爲裳。」所謂繡次也。鄭以《士冠禮》黑屨青絢纁純，白屨緇

①「者」，原脫，案：疏前述注，例加者字，故補。

絢縹純，與畫績黼黻繡次正合，故云如繡次。此說亦非，詳前。云「黃屨白飾，白屨黑飾，黑屨青飾」者，賈疏云：「此據婦人之屨，鞠衣已下之屨，故有黃屨、黑屨也。以屨從繡次爲飾，故知義然也。」詒讓案：黃屨當云纁屨，白屨卽素屨也。云「絢謂之拘」者，《釋文》拘作「救」，云「戚如字，劉音拘」。段玉裁從《釋文》作救，云：「作拘者誤。絢謂之救者，《爾雅·釋器》文。《司救》注云：「救猶禁也。禮防禁人之過者也。《儀禮》注「絢之言拘也」，鄭自爲說故云」之言。此引《爾雅》，云「謂之」。案：段說是也。云「著烏屨之頭，以爲行戒」者，賈疏云：「絢謂屨頭以條爲鼻，鄭注《士冠》亦云「絢之言拘也，以爲行戒，狀如刀衣鼻，在屨頭」。言拘取自拘持爲行戒者，謂使抵目不妄顧視也。」詒讓案：絢形制，鄭《士冠》、《士喪禮》注並云「如刀衣鼻」。《漢書·王莽傳》「句履」，句卽絢之段字。宋祁校本引韋昭云：「句，履頭飾，形如刀鼻。」與鄭說同。顏注引孟康云：「今齊祀履烏頭飾也，出履二寸。」師古云：「其形歧頭。」顏說歧頭之形，未知其審。據孟康說，出履二寸，蓋屈絲條，著履頭爲小紐，如刀衣鼻，可以穿繫，故《士喪禮》襲時「乃屨，綦結于跗，連絢」。賈彼疏謂以刀衣鼻，況絢在屨頭上，以其皆有孔，得穿繫於中而過。《曲禮》孔疏引《禮記隱

義》，亦言「古者屨頭鼻，綦繩相連結之」是也。又《穀梁》襄二十七年傳，^①衛侯之弟專出奔晉，織絢邯鄲。楊士勛疏引麋信云：「絢，著履烏之頭，卽《周禮》絢縹及純是也。」然則絢蓋染絲織成著之。至《內則》「屨著綦」，注云：「綦，屨繫也。」屨繫著於踵謂之綦，與屨飾著於頭謂之絢異。《內則》孔疏引皇氏云「屨頭施繫以爲行戒」，又引《士冠禮》「青絢注說爲證，則誤以綦絢爲一，非也。《晏子春秋·諫下篇》云：「景公爲屨，黃金之綦，飾以組，連以珠，良玉之絢，其長尺。」綦絢並舉，足證其非一物。彼絢有玉，又甚長，蓋非常制。依法出履二寸如刀衣鼻，卽至長亦不得盈尺也。又絢廣度，經注無文。《曲禮》疏引《士冠禮》「絢博寸」解者，云「用繒一寸，屈之爲絢」。然《士冠禮》博寸專屬純，則與絢廣無涉，孔說亦誤。云「縹，縫中紃」者，《士冠禮》注同。賈疏云：「縹是牙底相接之縫，綴條於其中。」詒讓案：《廣雅·釋器》云：「編、緒、縹、紃，條也。」《說文·糸部》云：「紃，圓采也。條，扁緒也。」《淮南子·說林訓》云：「條可以爲縹，不必以紃。」高注云：「紃亦縹也。」《雜記》「鞞紃以五采」，注云：「紃施諸縫中，若今時條也。」故

①「七」，原訛「四」，據楚本改。

賈以條釋紃。《內則》疏云：「薄闇爲組，以繩爲紃。」然則總者，織采絲爲紃繩，以飾舄屨縫中，與鞞以采紃綴縫略同。《鹽鐵論·散不足篇》說屨云「紃裏紃下」。凡總以紃綴牙底之縫，故謂之紃下矣。又《荀子·富國篇》云：「布衣紃屨之士。」楊注云：「紃，條也。謂編麻爲纍繩之屨也。」彼紃屨卽繩屨，乃賤者所服，與此屨總異。云「純，緣也」者，《士冠禮》三屨並云「純博寸」，彼注及《司几筵》注並同。《說文·糸部》云：「緣，衣純也。」賈疏云：「謂以條爲口緣。」詒讓案：禮，服凡緣邊口，並謂之純，若衣之領袂、筵席之邊並有純是也。此純亦謂舄屨繞口之緣，與綴縫之緣異。《漢書·賈誼傳》云：「爲之繡衣絲履，偏諸緣。」顏注引服虔云「加牙條以作履緣」也。偏諸，卽《說文》之「扁緒」，《廣雅》之「編緒」。又《廣雅·釋器》說屨云：「其緣謂之無縵。無縵，綵也。」則履緣亦以采絲條爲之，與總同。云「天子諸侯吉事皆舄」者，卽上云王吉服有九，諸侯吉服各依爵命爲差。鄭意天子諸侯冕弁冠諸服，凡吉事並服舄也。任大椿云：「天子諸侯自冕服外，雖朝服玄端，皆用舄，惟天子爵弁當用屨。」《屨人》注：「天子諸侯吉事皆舄。」爵弁爲天子哭諸侯及承天變之服，非吉事也，似不當舄。諸侯未遇爵命，服士服而來，則服爵弁，雖非凶事，但

既服士服，似亦當從士屨。」案：任推鄭義，深得其指。若然，諸侯爵弁用之吉事，依鄭義仍得服舄矣。《燕禮記》「燕朝服於寢」，注謂諸侯與羣臣朝服白屨。是諸侯吉事亦有著屨者。賈彼疏則謂鄭據《士冠禮》成文，其實諸侯當白舄，其臣則白屨也。依賈說，則諸侯朝服玄冠亦服舄也。今攷天子諸侯弁服冠服，無論吉凶，似皆當服屨。鄭、賈謂皆服舄，恐非。云「其餘唯服冕衣翟著舄耳」者，此兼釋后、夫人、內外命婦服屨之差也。依鄭《典命》、《司服》、《內司服》注義，服冕，謂王之三公服毳冕、孤服絺冕、卿大夫服玄冕者，並得服赤舄；士服爵弁，則服纁屨，不得服舄也。衣翟，謂后以下至三公夫人服三翟者，並得服舄；其九嬪、世婦、御妻及卿大夫之妻不得服翟者，皆服屨也。今攷天子士得服冕而不得服舄，九嬪孤卿之妻並宜得服舄，皆不如鄭所說，詳後疏。云「士爵弁纁屨，黑絢總純，尊祭服之屨飾，從纁也」者，補釋《士冠禮》義。依鄭前說，舄飾從纁次，屨飾從纁次，士爵弁纁屨若從纁次，則宜白飾；今《士冠禮》黑絢總純，與纁次不合，故鄭以爲因祭服特尊之，得與舄同從纁次，《士冠禮》注亦云：「爵弁尊，其屨飾以纁次」是也。云「素屨者，非純吉，有凶去飾者」者，賈疏云：「下經注散屨與此素屨同，是大祥時；則大祥除衰杖後，身服

素縞麻衣，而著此素屨，故云非純吉。經素屨不云絢縹純，故知去飾無絢縹純也。」孔廣森云：「素屨如素積之素，非凶履也。」陳奐云：「素者，白也。素屨，白屨，卽皮屨。」案：孔、陳說是也。此卽《禮經》之白屨，詳前。云「言葛屨，明有用皮時」者，以先鄭引《士喪禮》云「夏葛屨，冬皮屨」，而此經止云葛屨不云皮屨，明此職所掌自葛屨外，諸葛屨皆以皮爲之，故《士喪禮》直言「冬白屨」。是凡屨爲之以色別者，並皮爲可知。《詩·魏風·葛屨》孔疏云：「凡屨，冬皮夏葛，則無用絲之時。而《少儀》云『國家靡弊，君子不履絲屨』者，謂皮屨以絲爲飾也。夏日之有葛屨，猶絺綌所以當暑，特爲便於時耳，非行禮之服。若行禮之服，雖夏猶當用皮。鄭於《周禮注》及《志》，言朝祭屨爲各從其裳之色，明其不用葛也。」案：孔謂禮屨皆用皮是也。但依《士喪禮》注，謂夏用葛，屨亦白，則無論皮葛並同裳色，是葛屨亦爲禮屨。若如孔說，則冠喪大禮乃用不禮之屨，其可通乎？但葛屨止夏時服之，餘三時則皆當皮屨。賈《士冠禮》疏謂「春宜從夏，秋宜從冬」，非也。凡皮屨以韋革爲之，不存毛。《左》昭十二年傳，說楚靈王服豹舄，杜注云：「以豹皮爲履。」非禮服也。

辨外內命夫命婦之命屨、功屨、散屨。命夫之命屨，纁屨。命婦之命屨，黃

屨以下。功屨，次命屨，於孤卿大夫則白屨、黑屨；九嬪、內子亦然；世婦、命婦以黑屨爲功屨。女御、士妻命屨而已。士及士妻謂再命受服者。散屨，亦謂去飾。【疏】「辨外內命夫命婦之命屨、功屨、散屨」者，賈疏云：「上明王及后等尊者爲屨訖，此明臣妻及嬪已下之屨也。言外內命夫，案《肆師職》云：『禁外內命男女之衰不中法者。』鄭彼注『外命男，六鄉以出也。內命男，朝廷卿大夫士也。其妻爲外命女』。彼外命男，則此外命夫。若然，此外命夫，其妻爲外命婦，鄭雖不注，亦與彼同也。內命婦自是九嬪以下也。」案：賈說是也。互詳《內宰》、《肆師》疏。注云「命夫之命屨，纁屨」者，賈疏云：「以其經不云爲，唯云屨，大夫以上衣冠則有命爲，無命屨，故知命屨中唯有屨而已。士之命服爵弁則纁屨，故云命屨纁屨而已。」詒讓案：鄭以命夫命屨爲纁屨，專指士爵弁服言也。然此命夫當通公孤卿大夫士言之，經舉屨以見爲，互文以見義，猶上文王后之服屨亦不舉爲也。依鄭、賈說，王之三公服毳冕，孤服絺冕，卿大夫服玄冕，並得服爲。今攷定王三公服鷩冕，孤卿服毳冕，大夫服絺冕。又依《禮器》說，王之命士亦得服冕，與鄭注小異。竊謂《毛詩傳》亦爲人君之盛屨，則赤舄唯人君乃得服之。天子三公孤卿，或以外諸侯爲之，或食大

小都，亦有人君之道，自得服赤舄。其大夫士爵秩較卑，疑雖得服冕而仍服纁屨，與其妻服纁屨、白屨亦適相稱也。王三公以下之服，詳《大宗伯》、《司服》疏。云「命婦之命屨，黃屨以下」者，內自九嬪至女御，外自孤卿內子下及士之妻，通稱命婦也。賈疏云：「以其外命婦孤妻已下，內命婦九嬪已下，不得服舄，皆自鞠衣以下，故云黃屨以下。言以下者，兼有卿大夫妻及二十七世婦，皆展衣白屨，士妻與女御皆祿衣黑屨，故云以下以廣之。」案：鄭、賈說亦非也。以差次攷之，外內命婦，王三公夫人當服揄狄，九嬪及孤卿之妻並當服闕狄，則皆得服赤舄。世婦及大夫之妻當服鞠衣，並當服纁屨。御妻及士之妻服展衣，並當服白屨，無黃屨也。詳前及《內司服》疏。云「功屨次命屨，於孤卿大夫則白屨、黑屨」者，功屨猶《司裘》之功裘，亦人功微羸者也。命屨，人功最精；功屨次於命屨，故微羸。次命屨謂降一等也。賈疏云：「案《司服》，孤希冕，卿大夫玄冕，皆以赤舄爲命舄，以下仍有韋弁白屨、冠弁黑屨，故云次命屨。命屨據婦人而言，其實孤卿大夫身則功屨，次命舄也。」云「九嬪、內子亦然」者，《雜記》云：「內子以鞠衣。」注云：「內子，卿之適妻也。」此注則專據孤之妻言之，不含卿妻也。賈疏云：「九嬪與孤妻內子既以黃屨爲命屨，功屨之中有

禮衣白屨、祿衣黑屨，故云亦然。」案：九嬪及孤妻當以赤舄爲命舄，鄭、賈說亦非。云「世婦、命婦以黑屨爲功屨」者，此命婦專據卿大夫妻言之。賈疏云：「以其皆以禮衣白屨爲命屨，其功屨唯有祿衣黑屨也。」案：卿妻當與孤妻同，世婦及大夫之妻當以纁屨爲命屨，白屨爲功屨，鄭、賈說亦非。云「女御、士妻命屨而已」者，賈疏云：「以二者唯有祿衣黑屨爲命屨，故云命屨而已。」案：女御及士妻當以白屨爲命屨，鄭、賈說亦非。云「士及士妻謂再命受服者」者，此據《大宗伯》云「再命受服」，明王之下士及妻皆不得受命屨也。詳《大宗伯》及《內司服》疏。云「散屨亦謂去飾」者，賈疏云：「據臣言散，卽上之素，皆是無飾，互換而言，故云謂去飾者也。」案鄭、賈意，此散屨猶上素屨，皆凶服。又《士冠禮》云：「不屨總屨。」注云：「總屨，喪屨也。屨不灰治曰總。」亦其類也。但此說亦非是。今攷此功屨、散屨，猶《巾車》言良車、散車，蓋尋常燕居之屨，降於功屨者。其人功尤羸，凶屨去飾，或亦在其內，然必非專指凶屨也。鄭《巾車》注以功沽沽良散，其義最允。凡此經言散者，並取羸沽猥雜、亞次於上之義。詳《鹽人》、《巾車》疏。凡四時之祭祀，以宜服之。祭祀而有素屨散屨者，唯大祥時。【疏】「凡四時之祭祀以宜服之」者，此專據

祭服烏屨而言，不關王后素屨、外内命夫命婦散屨也。

注云「祭祀而有素屨、散屨者，唯大祥時」者，《檀弓》云：「有子蓋既祥而絲屨組纓。」注云：「譏其早也。禮，既祥白屨無紃。」孔疏謂據戴德《喪服變除禮》文。賈疏云：「鄭知此經四時祭祀含有素屨散屨者，以此經四時祭祀，總結上文諸屨，故知有此二屨也。云唯大祥時者，此據外内命夫命婦為王斬衰而言。初死著菅屨，卒哭與齊衰初死同疏屨，既練與大功初死同繩屨，大祥與小功初死同吉屨，無紃總純。是以上經注云非純吉，故云唯大祥時也。但上經據卑云散，散與素一也。」案：鄭、賈說並非經義。又素屨、散屨亦非凶屨，詳前疏。

夏采掌大喪以冕服復于大祖，以乘車建綏復于四郊。 求之王平生常所有事之處。乘車，

玉路。於大廟以冕服，不出宮也。四郊以綏，出國門，此行道也。鄭司農云：「復謂始死招魂復魄。」《士喪禮》曰：「士死于適室，復者一人以爵弁服，升自東榮，中屋北面，招以衣，曰皋某復，三，降衣于前，受用篋，升自阼階，以衣尸。」《喪大記》曰：「復，男子稱名，婦人稱字，唯哭先復。」

言死而哭，哭而復，冀其復反，故《檀弓》曰：「復，盡愛之道也。望反諸幽，求諸鬼神之道也。北面，求諸幽之義也。」

《檀弓》又曰：「君復於小寢，大寢，小祖，大祖，庫門，四郊。」《喪大記》又曰：「復者朝服，君以卷，夫人以屈狄，大夫以玄纁，世婦以禮衣，士以爵弁，士妻以稅衣。」《雜記》曰：「諸侯行而死於館，則其復如於其國；如於道，則升其乘車之左轂，以其綏復。大夫死於館，則其復如於家；死於道，則升其乘車之左轂，以其綏復。」《喪大記》又曰：「為賓則公館復，私館不復。」夏采天子之官，故以冕服復于大祖，以乘車建綏復于四郊，天子之禮也。大祖，始祖廟也。」故書綏為禮，杜子春云：「當為綏，禮非是也。」玄謂《明堂位》曰「凡四代之服器，魯兼用之」。「有虞氏之旂，夏后氏之綏」。則旂旂有是綏者，當作綏，字之誤也。綏以旄牛尾為之，綴於幢上，所謂注旂於干首者。王祀四郊，乘玉路，建大常，今以之復，去其旒，異之於生，亦因先王有徒綏者。《士冠禮》及《玉藻》冠綏之字，故書亦多作綏者，今禮家定作綏。【疏】「掌大喪以冕服復于大祖」者，此與祭僕、隸僕為官聯也。賈疏云：「大喪謂王喪也。謂初死屬纊絕氣之後，即以冕服自衾冕以下六冕及爵弁皮弁之等復，謂招魂。復者，各依命數，天子則十二人，各服朝服，而復於大祖之

廟，當升自東雷，北面履危西上，云「臯天子復」，如是者三，乃卷衣投於前，有司以篋受之，升自阼階，入，衣於尸。復而不蘇乃行死事也。」案：六冕當作五冕。依賈說，則王喪當十二人復。《敍官》止下士四人，於數不足者，蓋當使它官若祭僕、隸僕、小臣之屬同復也。云「以乘車建綬，復于四郊」者，綬，當從故書作「禮」，即旌之段字。謂以象路建大常，而載全羽之旌，至四郊祭祀兆域之處，升車之左轂而復也。

注云「求之王平生常所有事之處」者，此夏采復於大祖及四郊，祭僕復於小廟，隸僕復於小寢大寢，此五者並王平生常所有事之處，故博求之也。云「乘車，玉路」者，賈疏云：「案《巾車》云『玉路以祀』，祭天地於郊用玉路，明於四郊復乘玉路可知。」案《小宗伯》云：「兆五帝於四郊。」平生於四郊郊事神之處，故復之也。」案：此乘車實當爲象路，即《司常》之道車。鄭、賈以爲玉路，則不得建綬，非也，詳後。玉路，詳《巾車》疏。云「於大廟以冕服，不出宮也」者，冕服即五冕之服也。凡復用衣裳不用冠，故《士喪禮》說士復云「以爵弁服，簪裳于衣，左何之，扱領于帶」。此王復用冕服，亦用衣不用冕也。《玉府》亦云「大喪共復衣裳」。《雜記》云：「復，諸侯以褻衣、冕服、爵弁服。」後鄭注云：「上公五，侯伯四，子男三。」案：此天子冕服，蓋亦自

袞冕而下爲五。其袞冕以祭昊天上帝，非廟享所服，則復於大祖蓋亦不用大裘十二章之袞也。大廟在應門內之左，後鄭《閭人》及《小宗伯》注雖謂在中門外，要不出皋門、庫門，故云不出宮也。云「四郊以綬，出國門，此行道也」者，四郊蓋謂近郊五十里，在國門之外。王生時非行不出國門，故用行道之法建綬以復，不用冕服也。鄭司農云「復謂始死招魂復魄」者，後鄭《士喪禮》注義同，詳《玉府》疏。引《士喪禮》曰「士死于適室」者，鄭彼注云：「適室，正寢之室也。疾者齊，故於正寢焉。」賈疏云：「適室則適寢也。大夫士謂之寢，天子諸侯謂之路寢也。」云「復者一人」者，賈疏云：「命士不命之士皆一人，若大夫以上皆依命數也。」云「以爵弁服」者，士以爵弁爲上服，猶王用冕服也。云「升自東榮」者，賈疏云：「升屋從東榮而上，天子諸侯言東雷。」云「中屋北面，招以衣，曰皋某復，三」者，鄭彼注云：「皋，長聲也。某，死者之名也。復，反也。」云「降衣于前，受用篋，升自阼階，以衣尸」者，鄭彼注云：「降衣，下之也。受者，受之於庭也。復者其一人招，則受衣亦一人也。人君則司服受之。衣尸者，覆之，若得魂反之。」引《喪大記》曰「復，男子稱名，婦人稱字」者，賈疏云：「男子稱名，據大夫、士。」《禮記·曲禮》云：「天子崩，復曰天子復矣。諸

侯，復曰某甫復矣。」鄭注云：「不呼名，臣不名君也。諸侯呼字。」詒讓案：《喪服小記》云：「復與書銘，自天子達於士，其辭一也。男子稱名，婦人稱姓與伯仲。」鄭注謂彼據殷禮，質，復臣得名君。先鄭意或以《小記》為周法，則《大記》文容得含天子禮，與後鄭據《曲禮》義不同也。云「唯哭先復，言死而哭，哭而復，冀其復反」者，唯哭先復，亦《喪大記》文。以下先鄭釋《大記》義，明始死即有復，是冀其復反而生也。云「故《檀弓》曰：復，盡愛之道也，望反諸幽，求諸鬼神之道也，北面，求諸幽之義也」者，鄭彼注云：「鬼神處幽闇，望其從鬼神所來。北面，鄉其所從來也。」引之者，廣證喪禮必有復之義。云《檀弓》又曰：君復於小寢、大寢、小祖、大祖、庫門、四郊」者，鄭彼注云：「尊者求之備也，亦他日所常有事。」引之者，證天子有復大祖四郊之事。其小祖即《祭僕》「復于小廟」是也。又案：《檀弓》庫門據諸侯法，賈《士喪禮》疏謂天子五門皆復，則不徒庫門以內矣。云《喪大記》又曰：復者朝服，君以卷，夫人以屈狄，大夫以玄纁，世婦以禮衣，士以爵弁，士妻以稅衣」者，鄭彼注云：「朝服而復，所以事君之衣也。用朝服而復之者，敬也。復用死者之祭服，以其求於神也。君以卷，謂上公也。夫人以屈狄，互言耳。上公以袞，則夫人用褱衣；而侯伯以鷩，

其夫人用揄狄；子男以毳，其夫人乃用屈狄矣。纁，赤也。玄衣赤裳，所謂卿大夫自玄冕而下之服也。其世婦亦以禮衣。」案：先鄭引此者，證王復當用五冕服也。其王后之喪，復當用褱衣以下。賈《士喪禮》疏謂婦人無外事，王后以下復，自門以內，廟寢而已。則后夫人喪無四郊復也。禮衣即展衣，稅衣即祿衣，詳《內司服》疏。又案：《大記》說復者朝服，《士喪記》同，賈前疏亦從之。《士喪禮》疏謂天子復者當皮弁服，則是服王視朝之服，此與《大記》注不合，未知墮否。引《雜記》曰「諸侯行而死於館，則其復如於其國，如於道，則升其乘車之左轂，以其綏復」者，鄭彼注云：「館，主國所致舍。如於其國，主國館賓予使有之，得升屋招用褱衣也。如於道，道上廬宿也。升車左轂，象升屋東榮。」云「大夫死於館，則其復如於家，死於道則升其乘車之左轂，以其綏復」者，亦櫟括《雜記》文。彼文兼大夫士，此不云士者，文不具。鄭彼注云：「大夫復於家以玄冕。」引此二文者，證乘車建綏之事。先鄭蓋亦從杜子春說，破故書禮為綏，後鄭則又破綏為綏，與先鄭異，並詳後。云《喪大記》又曰：為賓則公館復，私館不復」者，鄭彼注云：「不於之復，為主人之惡。」《雜記》云：「公館者，公宮與公所為也。私館者，自卿大夫以下之家也。」引此者，亦

廣證復事。云「夏采天子之官，故以冕服復于大祖，以乘車建綏復于四郊，天子之禮也」者，以天子備官，故大祖四郊之復，別以此官掌之。其諸侯則無此官，故《喪大記》云「小臣復」，注云：「小臣，君之近臣也。」又《士喪禮》注云：「復，天子則夏采，祭僕之屬，諸侯則小臣爲之。」明此夏采復專爲天子之禮也。又案：《玉府》「大喪，共復衣服」。先鄭注云：「衣裳生時服，招魂復魄於大廟至四郊。」是先鄭意，四郊復乘車建綏，仍兼用冕服。後鄭不從，故此注不備引也。後鄭彼注亦糾正先鄭義，詳彼疏。云「大祖，始祖廟也」者，大祖，對《祭僕》「小廟」爲文，以七廟之中始祖爲最尊，故謂之大祖。《王制》云：「天子七廟，三昭三穆，與大祖之廟而七。」注云「大祖，后稷」是也。周七廟以后稷爲始祖，詳《春官·敘官》及《守祧》疏。賈疏云：「餘六廟此不云復，案《祭僕》云：『大喪復于小廟。』」注云：「小廟，高祖以下。」是親廟四也。其五寢則隸僕復，故《隸僕職》云：「大喪復于小寢大寢。」注「小寢，高祖以下廟之寢也。始祖曰大寢」。唯二祧無復文者，案《祭法》，親廟四與大祖皆月祭，二祧享嘗乃止。無月祭則不復也。《禮記·檀弓》云：「復于小祖、大祖、庫門、四郊。」《周禮》不言庫門者，文不具。「云「故書綏爲禮，杜子春云當爲綏，禮非是也」者，段玉

裁云：「杜易禮爲綏，先鄭從之。故書作禮，《說文》無此字。《釋文》曰：「禮音維，徐音遂。」據徐音，疑本作旛，或作旛。《說文·㫃部》，旛即旛字。」金榜云：「《司常》：『王建大常，諸侯建旂，孤卿建旛，大夫士建物，師都建旗，州里建旗，縣鄙建旛。』此七旗蓋無羽，賓祭之所用也。其曰旛曰旗，則以有羽爲異，道車載旛，旂車載旛是也。旛旛，皆張綵幅屬旛焉，畫於綵如日月爲常已下。《夏采》：『以乘車建禮，復於四郊。』禮當爲旛。《說文》旛，亦作旛，因訛而爲禮。杜子春改綏，鄭又讀從綏，皆非。《司常》道車，謂象路。復者，求之平生常所有事之處。故以道車朝夕燕出入者，建旛以復。鄭謂乘車玉路，非也。《雜記》：『諸侯死於道，以其綏復。』又曰：『大夫士死於道，以其綏復。』綏皆旛之譌。言其旛者，明異物。天子以大常，諸侯以旂，孤卿以旛，大夫士以物。鄭君謂「去其旛，異之於生」，失之矣。」王引之云：「經本謂建旛，非爲建綏。旛與旛同。乘車建旛，亦如生時之道車載旛也。從衣作禮者，假借字耳。鄭當依故書作禮，而讀爲旛，不當沿子春之誤，徑改爲綏也。旛得借用禮字者，旛禮俱音遂故也。禮爲旛之或體者，古音遺與遂同。《地官·遺人》，劉昌宗音遂。《小雅·角弓篇》：『莫肯下遺』，《荀子·非相篇》：『遺作隧』，《南山經》：『旛山之尾，

其南有谷曰育遺。遺或作隧。《白虎通義》曰「綖之爲言遺也」是也。故綖從遂聲作綖，或從遺聲作綖，亦猶九旗之旒或作旒也。綖爲旒之假借非譌字。」案：段、金、王說是也。云「玄謂《明堂位》曰，凡四代之服器，魯兼用之」者，後鄭欲見綖爲有虞氏之旗，故先引此文，見魯有四代旗章之事。云「有虞氏之旒，夏后氏之綖」者，綖，舊本作綖，今據宋婺州本正。阮元云：「此仍當爲綖，下始云當作綖。」案：阮校是也。段玉裁、黃丕烈校，亦改作綖。彼文云：「有虞氏之旒，夏后氏之綖，殷之大白，周之大赤。」鄭彼注云：「四者旒旗之屬也。綖當爲綖，有虞氏當言綖，夏后氏當言旒，此蓋錯誤也。綖謂注旆牛尾於杠首，所謂大麾。」《王制》注說亦同。鄭意綖爲有虞氏旗，但注旆不張綖屬旒。今案：有虞氏之旒，即《司常》之交龍爲旒，《巾車》之大旂；夏后氏之綖，即《司常》之龜蛇爲旒，《巾車》之大麾。鄭互易其字，又讀綖爲綖，非也。詳《司常》疏。至《釋名·釋兵》云：「綖，有虞氏之旒也。注旆竿首，其形紫紫然也。綖，夏后氏之旒也。其形衰衰也。」案：劉亦從《明堂位》注義，而仍以綖爲夏旗，則又小異，亦不足據也。云「則旒旂有是綖者當作綖，字之誤也」者，此後鄭據《明堂位》有綖，明旒旂自有是名，但其字實當爲綖也。段玉裁云：「司農偶《雜

記》證杜說，但綖綖二字，古音同在支佳部、歌戈麻部間，而義各有當。綖者下垂之意，故系於冠纓爲飾者謂之綖，旒旗之旒亦謂之綖。鄭君《雜記》注云：「綖當爲綖，讀如蕤賓之蕤，字之誤也。綖謂旒旗之旒也。去其旒而用之，異於生也。」《明堂位》注云：「綖當爲綖，讀如冠蕤之蕤。綖謂注旆牛尾於杠首。」皆與《夏采》注正合。」汪文臺云：「綖本登車之索。鄭引《明堂位》，證是綖爲旒旗之綖，當爲綖，非車綖也。」案：段、汪說是也。《說文·糸部》云：「綖，車中把也。綖，系冠纓垂者。」旒旗之綖與冠綖，同有垂義，故鄭破綖從綖也。云「綖以旆牛尾爲之，綴於幢上」者，《後漢書·馬融傳》李注云：「幢，旒旗之竿也。」謂以旆牛尾爲綖，繫綴於竿上也。旆牛尾，詳《春官·敍官》及《樂師》疏。云「所謂注旆於干首者」者，《毛詩·邶風·干旆》傳云：「注旆於干首，大夫之旗也。」《爾雅·釋天》云：「注旆首曰旒。」郭注云：「載旆於竿頭，如今之幢亦有旒干旆。」孔疏引李巡云：「旆牛尾著干首。」案：後鄭此注及《司常》注並引「注旆於干首」，蓋即據《毛詩傳》，與《釋天》文異。賈疏謂出《爾雅》，誤。干即竿之借字，亦即幢也。注綴義亦同。《司常》注引此以釋析羽爲旒，《敍官》注亦謂染鳥羽象夏翟以爲綖，則鄭謂綖注旆牛尾，又兼注鳥羽。故賈疏云：

「案：鍾氏染鳥羽以爲王后之車飾，亦爲旌旗之綬，則旌旗亦有鳥羽。獨云旄牛尾，舉一邊而言，其實兼有也。」云「王祀四郊，乘玉路，建大常」者，據《巾車》文。言此者，欲見大喪所建之綬，即大常而去其旒者也。云「今以之復，去其旒，異之於生，亦因先王有徒綬者」者，賈疏云：「生時有旗有綬有旒，今死去旒是異。先王，有虞氏也。徒，空也。有虞氏空綬，未有在下旒旒，故云徒綬也。」案：賈所謂旒旒，謂繆也。《巾車》注說旗制云：「正幅爲繆，旒則屬焉。」旒即旒之俗。凡九旗恒制皆有繆旒，鄭意此綬則繆旒並無，注止云去旒者，文不具也。鄭又以《明堂位》云有虞氏之綬，即是徒綬無旒，此大喪復四郊所建以大常，去旒存綬，與生時所建大常不同，而實因有虞氏有徒綬之制，襲而用之也。今依金氏說，則此王喪四郊之復，當用象路建大常，而注全羽之旒，與生時祀四郊所乘車異而旗同。云「《士冠禮》及《玉藻》冠綬之字，故書亦多作綬者」者，此故書謂《儀禮》、《禮記》舊本，與注中凡言故書者異。今《士冠禮記》字作綬，彼注無作綬之文，《玉藻》注亦然，皆文不具。綬，嘉靖本作綬，段玉裁、黃丕烈校並據注疏本作綬，今從之。段云：「明冠綬字誤，則旗綬之字誤可知。」案：段說是也。然賈疏謂故書多作綬者，謂作系旁委也，則賈所見本已誤

綬矣。云「今禮家定作蕤」者，謂《禮士冠》、《玉藻》二記冠綬之字，漢時禮家說又定作蕤，亦見《玉藻》注，而《士冠》注則無文。此雖與鄭從綬異，然其不從綬則同，故亦附存其說。段玉裁云：「漢時說禮家定從蕤字。蕤者，艸木花垂兒。其音亦在支佳部，如《玉藻》『緇布冠緇綬』，注云『綬或作蕤』，是其證也。《玉藻音義》曰：『綬，本又作蕤。』是唐時《禮記》尚有作蕤者也。」

周禮正義卷十七

地官司徒第二 《鄭目錄》云：「象地所立之官。司徒主

衆徒。地者載養萬物，天子立司徒掌邦教，亦所以安擾萬民。」【疏】「地官司徒第二」者，阮元云：「第二，唐石經作第三，非。」《鄭目錄》云「象地所立之官」者，司徒於六官爲第二，次於冢宰，又掌地事，故謂之地官。《大戴禮記·千乘篇》云：「司徒典春。」《春秋繁露·五行相勝篇》，又以司徒爲西方金官，並非此經義。云「司徒主衆徒」者，《小爾雅·廣言》云：「司，主也。」《白虎通義·封公侯篇》云：「司徒主人，不言人言徒者，徒，衆也，重民衆。」《書·周官》僞孔傳云：「主徒衆，教以禮義。」《國語·周語》云：「司徒協旅。」韋注云：「司徒掌合師旅之衆。」云「地者載養萬物」者，《郊特牲》云：「地載萬物。」《藝文類聚·地部》引《春秋元命苞》云：「地者，易也，言養物懷任，交易變化，含吐應節。」是地載養萬物之義。云「天子立司徒，掌邦教，亦所以安擾萬民」

者，據《敘官》文。

周禮 鄭氏注

惟王建國，辨方正位，體國經野，設官分職，以爲民極。乃立地官司徒，使帥其屬而掌邦教，以佐王安擾邦國。教所以親百姓，訓五品。有虞氏五，而周十有二焉。擾亦安也，言饒衍之。【疏】「使帥其屬而掌邦教，以佐王安擾邦國」者，①《大宰》六典云「二曰教典，以安邦國，以教官府，以擾萬民」是也。

注云「教所以親百姓，訓五品」者，《書·舜典》云：「帝曰：契！百姓不親，五品不遜，汝作司徒，敬敷五教在寬。」不遜，《史記·殷本紀》、《後漢書·周舉傳》並作「不訓」。《御覽·職官部》引《尚書大傳》亦云「百姓不親，五品不訓，則責之司徒」。是作「訓」者爲《今文尚書》也。《史記·五帝本紀》又作「五品不馴」。《索隱》云：「《史記》馴字，徐廣皆讀曰訓。訓，順也。」裴氏《集解》引鄭《書注》云：「五品，父母兄弟子也。」云「有虞氏五而周十有二焉」者，賈疏云：「有虞氏五，即《舜典》所云『敬敷五教』。又文

①「者」，原脫，今據疏例增。

十八年云「舜臣堯，舉八元，使敷五教於四方，父義、母慈、兄友、弟恭、子孝」是也。而周十有二者，據《司徒》之職，云「二曰以祀禮教敬」以下是也。案成王《周官》云「司徒敷五典，擾兆民」，則周亦有五教，而云至周十有二者，鄭據此《周禮》之文，言十二以對於虞，其實五中雖不含十二，十二中亦含有五。」案：《書·周官》乃偽古文，非鄭所見，賈說非。云「擾亦安也」者，《大宰》注云：「擾猶馴也。」案：擾者擾之借字，擾訓馴，與安義近，此經又以安擾連文，故云亦安也。詳《大宰》疏。云「言饒衍之」者，賈疏云：「以言饒益衍長，亦是安義。」

教官之屬：

大司徒，卿一人；小司徒，中大夫二人；鄉師，下大夫四人，上士八人，中士十有六人，旅下士三十有二人，府六人，史十有二人，胥十有二人，徒百有二十人。師，長也。司徒掌六鄉，鄉師分而治之，二人者共三鄉之事，相左右也。【疏】「大司徒卿一人」者，教官之正也。《左》定四年傳：「成王封康叔，陶叔授民。」杜注云：「陶叔，司徒。」《書·顧命》成王召六卿，偽孔傳謂芮伯爲司徒。《詩·衛

風·淇奥》孔疏引鄭《書注》，則謂彤伯爲司徒。又《書敘》云：「穆王命君牙爲周大司徒。」《詩·小雅·十月之交》云：「番惟司徒。」又《鄭風·緇衣敘》謂鄭桓公、武公父子並爲周司徒。皆卽大司徒卿也。云「小司徒中大夫二人」者，教官之貳也。云「鄉師下大夫四人」者，教官之攷也。云「旅下士三十有二人」者，亦謂衆下士也。《檀弓》云「孟獻子之喪，司徒旅歸四布」，卽此下士也。注云「師，長也」者，《天官·敘官》注義同。鄉師下大夫與上士以下，至府史胥徒及諸鄉吏爲長。六官之攷，自天官夏官外，皆以師爲名，義並同。云「司徒掌六鄉」者，以六鄉附比王城，地近事重，故使大司徒總領鄉吏，又以小司徒、鄉師專掌其事，猶遂人、遂師專主六遂之事也。云「鄉師分而治之，二人者共三鄉之事，相左右也」者，賈疏云：「以其鄉師佐司徒主六鄉，故言分而治之。以鄉有六，其人有四，故二人共三鄉。云相左右者，左右，助也。以其二人共主三鄉，不得各專其鄉事，故相助而已。」詒讓案：鄉師二人共三鄉，蓋以六鄉分爲左右，左三鄉，右三鄉，各設鄉師二人以主之。

《王制》云：「命國之右鄉簡不帥教者，移之左；命國之左鄉簡不帥教者，移之右。」是鄉有左右。《左》襄九年傳，說宋左右二師令四鄉正，是宋制四鄉亦分左右，可以互證。

但鄭云相左右，則自取職掌相助之義，不謂鄉分左右。《既夕禮》注云：「遂人主引徒役，匠人主載柩窆，職相左右也。」與此注義正同，賈說得之。《管子·立政篇》云：「分國以爲五鄉，鄉爲之師。」此齊制鄉立一師，與周制異。

鄉老，二鄉則公一人；鄉大夫，每鄉卿一人；州長，每州中大夫一人；黨正，每黨下大夫一人；族師，每族上士一人；閭胥，每閭中士一人；比長，五家下士一人。老，尊稱也。王置六鄉，則公有三人也。三公者，內與王論道，中參六官之事，外與六鄉之教，其要爲民，是以屬之鄉焉。州、黨、族、閭、比，鄉之屬別。正、師、胥，皆長也。正之言政也。師之言帥也。胥，有才知之稱。《載師職》曰：「以官田、牛田、賞田、牧田任遠郊之地。」《司勳職》曰：「掌六鄉之賞地。」六鄉地在遠郊之內，則居四同。鄭司農云：「百里內爲六鄉，外爲六遂。」【疏】「鄉老，二鄉則公一人」者，賈疏云：「鄉老者，謂三公，在朝三公八命，即《典命》云『三公八命』是也。分陝而治則九命，則《大宗伯》云『九命作伯』是也。」云「鄉大夫每鄉卿一人」者，賈疏云：「六鄉則卿六人，各主一鄉之事，然總屬司徒，非六官典兼鄉大夫。」

知者，以鄭注《大司馬》云：「軍吏選於六官六鄉之吏爲之。」既六官六鄉並言，故知別置。沈彤云：「鄉老二鄉一人，注以爲三公兼之；而鄉大夫每鄉卿一人，則不以六卿兼。鄉老無專職，惟及鄉大夫帥其吏而禮賓賢能，以獻其書于王，退而以鄉射之禮五物詢衆庶而已，故三公可兼。若鄉大夫則職專而所掌多，故別置而不以六卿兼也。如或兼之，亦與公之兼鄉老，常暫殊矣。」案：沈說是也。賈氏《敘廢興》引馬融傳云：「賈逵以爲六鄉大夫，則冢宰以下。」是賈景伯以此六鄉大夫，即六官之長。《說文·壘部》云：「鄉，國離邑民所封鄉也。封圻之內六鄉，六卿治之。」蓋亦用賈說。今攷《鄉大夫》云：「正月之吉，受教法于司徒，退而頒之于其鄉吏。」明鄉大夫與六官之長異。儻如賈說，則司徒即鄉大夫之一，豈得自掌教法而自受之乎？況鄉遂內外相副，遂官之爵唯較鄉官差一等，儻鄉大夫即以六官之長爲之，則遂大夫爲中大夫，又當以六官之貳小宰小司徒等爲之乎？其亦不可通矣。又案：春官世婦每宮卿二人，是后六宮有十二宮卿，與王六官及六鄉大夫爲十二卿數同。若如賈景伯說，則后得置十二卿，王反止有六卿，豈其然乎？胡匡衷云：「《左》襄九年傳宋有鄉正，《國語·周語》有鄉長，韋、杜皆以鄉大夫釋之，則諸侯有鄉大

夫矣。《周禮》鄉大夫每鄉卿一人，諸侯以大夫爲之，亦當鄉置一人。《周禮》六鄉之大夫皆屬於司徒，諸侯則使卿分掌之。《左傳》宋二師令四鄉正，晉趙孟問其縣大夫則其屬。《國語》齊高子帥五鄉焉，國子帥五鄉焉。是諸侯之鄉大夫統於卿也。云「州長每州中大夫一人」者，《藝文類聚》引《風俗通》云：「《周禮》『五黨爲州』，州，疇也，州有長使之相周足也。」案：州長爲一州之長，故《內則》謂之州伯。沈彤云：「三十州則三十人。」賈疏云：「每鄉有五州，州長以中大夫爲之，亦四命。」云「黨正每黨下大夫一人」者，《釋名·釋州國》云：「五百家爲黨，黨，長也，一聚之所尊長也。」沈彤云：「百五十黨則百五十人。」賈疏云：「五黨爲州，黨正使下大夫爲之，亦四命。」云「族師每族上士一人」者，沈彤云：「七百五十族，則七百五十人。」賈疏云：「五族爲黨，族師使下士一人爲之，亦三命。」云「閭胥每閭中士一人」者，《說文·門部》云：「閭，里門也。」《周禮》五家爲比，五比爲閭。閭，侶也，二十五家相羣侶也。」沈彤云：「三千閭則三千人。」賈疏云：「四閭爲族，巷門爲閭。胥，有才知之稱。閭胥使中士一人爲之，亦再命。」詒讓案：《周書·嘗麥篇》云：「邑乃命百姓遂享于家，閭率里君以爲之資。」率帥古今字，閭率當卽此閭胥也。云「比長五家

下士一人」者，《釋名·釋州國》云：「五家爲伍。」又曰：「比，相親比也。」沈彤云：「萬五千比，則萬五千人。」賈疏云：「五比爲閭，比長使下士一人爲之，亦一命。特言五家者，明閭胥已上至鄉皆有家數。故其職云：五家爲比，五比爲閭，四閭爲族，五族爲黨，五黨爲州，五州爲鄉。從少至多，故於比言五家爲本也。」胡匡衷云：「《內則》：『宰告閭史，閭史書爲二，其一藏諸閭府，其一獻諸州史，州史獻諸州伯，州伯命藏諸州府。』注：閭胥、州長皆有屬吏。《內則》所記多諸侯之禮。《周禮·序官》鄉大夫以下，皆無府史胥徒；此有閭史、州史，又有閭府、州府，或《周禮》闕也。」案：胡說近是。鄉吏惟比長領五家，事少或可無屬吏。其閭胥以上，據《內則》似皆應有府史。此經並無，六遂官亦然，未詳厥故。豈因鄉遂官多逾萬，不能盡爲置屬，或就所治役民，給事無定員，故經不著邪？ 注云「老，尊稱也」者，《漢書·東方朔傳》云：「老者，人所敬也。」《士昏禮》「授老鴈」，注云：「老，羣吏之尊者。」鄉老亦是鄉吏之最尊者，故稱老也。賈疏云：「案《下曲禮》，三公於諸侯曰天子之老。此鄭注云『老尊稱』，未必是年老也。」云「王置六鄉，則公有三人也」者，以一鄉老領二鄉，六鄉則三鄉老，與三公之數正合，明鄉老卽以三公爲之也。云「三公者

內與王論道」者，賈疏云：「成王《周官》云：『茲惟三公，論道經邦。』《考工記》云：『坐而論道，謂之王公。』鄭雖言天子諸侯公中亦含三公，是其內與王論道也。」案：賈引《書·周官》，乃偽古文，非鄭所據。云「中參六官之事」者，賈疏云：「案《書傳》云：『天子三公，一曰司徒公，二曰司馬公，三曰司空公。』彼注云：『《周禮》，天子六卿，與大宰、司徒同職者則謂之司徒公，與宗伯、司馬同職者則謂之司馬公，與司寇、司空同職者則謂之司空公。一公兼二卿，舉下以爲稱。』是其中參六官之事。」案：鄭謂此鄉老卽三公而又中參六官之事者，謂上兼太師、太傅、太保，下又兼六卿之職，蓋依《周禮》舊師及《古文尚書》說也。《北堂書鈔·設官部》引《五經異義》云：「今《尚書》夏侯、歐陽說，天子三公，一曰司徒，二曰司馬，三曰司空，九卿，二十七大夫，八十一元士，凡百二十，在天爲星辰，在地爲山川。古《周禮》說，天子立三公，曰太師、太傅、太保，無官屬，與王同職，故曰『坐而論道謂之王公』。又立三少以爲之副，曰少師、少傅、少保，是爲三孤。冢宰、司徒、宗伯、司馬、司寇、司空，是爲六卿之屬，大夫、士、庶人在官者，凡萬二千臣。謹案：周公爲傅，召公爲保，太公爲師，周公、太公無爲司徒、司空文，知師保傅，三公官名也。五帝三王不同

物，此周之制也。」又云：「古《周禮》說三公無官，參職於天子，何官之有。」案：三公之官，經無明文，《異義》引古《周禮》說，以爲太師、太傅、太保。《大戴禮記·保傅篇》云：「昔者周成王幼，在襁褓之中，召公爲太保，周公爲太傅，太公爲太師。保，保其身體；傅，傳其德義；師，導之教順。此三公之職也。於是爲置三少，皆上大夫也，曰少保、少傅、少師，是與太子宴者也。」與古《周禮》說同。賈氏後疏引《鄭志》趙商問，《尚書·周官》云「大師、大傅、大保，茲惟三公」。此漢時所傳真《周官》佚文，爲東晉僞古文所本。其所說三公，亦同古《周禮》說，當可依據。故《毛詩·小雅·節南山》傳、《漢書·百官公卿表》及許君《異義》，並從其說。據後疏申《鄭志》荅趙商義，則鄭亦以爲成王以後三公之制如是也。若今文《尚書》說，以三公爲司徒、司馬、司空，《韓詩外傳》及《白虎通義·封公侯篇》、《公羊》文八年何注說竝同，則六卿之中，冢宰最尊，反不爲公，義已難通。況《韓詩外傳》及《漢表》引或說，竝謂三公司馬主天，司徒主人，司空主土；《論衡·順致篇》引《尚書大傳》，有天公、人公、地公之說，蓋伏生亦謂天公卽司馬公，人公卽司徒公，地公卽司空公，是今文家說三公之敘，司馬最尊，在司徒之上，與此經六卿尊卑敘次既乖刺不合，而司馬屬天，尤

違經義。攷《書傳》之文，本在《夏傳》、《月令》孔疏以爲是夏制，理或然也。鄭《大傳注》，據《周禮》以說夏制，以爲一公兼二卿，兼下以爲稱，則《伏傳》本義固不如是。《書·顧命》云：「乃同召太保奭、芮伯、彤伯、畢公、衛侯、毛公。」《詩·衛風·淇奥》孔疏引鄭彼注云：「公兼官以六卿爲正次。」僞孔傳亦謂太保、畢、毛稱公則三公，召公領冢宰，畢公領司馬，毛公領司空，芮伯爲司徒不爲公。足證三公者領一卿，並不以一公兼二卿；又仍以冢宰爲大保，而不以司徒爲公，皆不如《書傳》說。蓋周時三公爵在卿上，或本爲三公，而因六卿偶闕，則以三公下兼；或本爲孤卿，而功德隆重，則上兼三公。如《左》宣十六年傳：「晉侯請於王，以黻冕命士會將中軍，且爲大傅。」杜注謂大傅爲孤卿。文六年，晉有大傅陽處父、大師賈佗。又成十八年士渥濁，襄十六年羊舌肸，亦並爲大傅。孔疏謂諸侯孤卿猶天子三公。是天子以師傳爲三公，諸侯以師傳爲孤卿，亦其比例；而士會以將中軍兼大傅，尤可證卿兼保傅之事。然則上下相兼，事所固有，必不如《書傳》注說一公兼二卿，職掌參分，垂爲定制也。至鄭注《書傳》所以爲此說者，殆因周侯國官制，惟立司徒、司馬、司空三卿，而以一卿領二大夫，今文諸儒或不見佚《周官》之文，求古三公之官而不得，則

推諸侯之制於天子，以爲立司徒公、司馬公、司空公，一公兼二卿。鄭君不悟，亦偶襲其說，實則此義與《鄭志》不合。述鄭學者，以《鄭志》爲定論可矣。云「外與六卿之教」者，卽爲鄉老也。鄉老無正職掌，惟三年大比，賓賢能，與鄉大夫同與其事，故云與六卿之教。康王時，畢公爲大師，卽三公之一，而《書·畢命》云：「康王命作冊畢，分居里成周郊。」是卽畢公兼掌鄉郊爲鄉老之證。又《君陳》云：「周公既沒，命君陳分正東郊成周。」敍意與《畢命》略同。君陳，周公次子，疑亦以公孤而兼爲六卿之正長者也。云「其要爲民，是以屬之鄉焉」者，鄭意三公通參六官，無所繫屬，惟分掌六卿，則亦教民之官，故附列諸鄉官之前。明鄉老爵尊，實非司徒之屬官也。此鄉老以事類附屬地官，乃《大宰》八法官屬之變例，詳《天官·敍官·九嬪》疏。賈疏云：「三公無正職，是以三百六十官之中不見三公之任，唯此六卿之內而言三公，故云屬之鄉焉。不言三孤者，以其佐公論道，三公有事之所，亦有三孤，故不言之。」案：《異義·周禮》說三孤之義，亦此經所無，詳《掌次》疏。云「州黨族閭比，鄉之屬別」者，謂以鄉遞分爲五者，而總屬於鄉。五者之中，又各以大小自相爲屬別也。《大戴禮記·王言篇》：「昔者明王之治民有法，必別地以州之分屬而治之。」卽此義。

《釋名·釋州國》云：「萬二千五百家爲鄉。鄉，向也，衆人所向也。」又案此經之制，以比、閭、族、黨、州、鄉，與遂屬鄰、里、鄴、鄙、縣，遂相當，而爵則加彼一等。《漢書·食貨志》云：「五家爲鄰，五鄰爲里，四里爲族，五族爲黨，五黨爲州，五州爲鄉，鄉萬二千五百戶也。鄉長位下士，自此以上稍登一級，至鄉而爲卿也。」又云：「春秋出民，里胥平旦坐於右塾，鄉長坐於左塾。」案：此以遂之鄰里易鄉之比閭，而以鄉長當比長，里胥當閭胥，非此經之制，疑別有所本。遂之鄉長爲不命之士，《漢志》云下士，則仍依比長之爵次。又《國語·齊語》：「管子定民之制，五家有軌長，五十家有里有司，二百家有連長，二千家有良人，宰則萬家。制鄙，三十家爲邑，三百家爲卒，十卒爲鄉，三鄉爲縣，十縣爲率。」《管子·立政篇》則分國爲五鄉，鄉有師；分鄉爲五州，州有長；分州爲十里，里有尉；分里爲十游，游有宗。十家爲什，伍家爲伍，什伍皆有長。《鶡冠子·王鈇篇》則五家有伍長，五十家有里有司，二百家有扁長，二千家有鄉師，萬家有縣嗇夫，十萬家有郡大夫。《漢書·晁錯傳》云：「古之制邊縣，五家爲伍；伍有長；十長一里，有假士；四里一連，有假五百；十連一邑，有假候。」此並春秋以後侯國之制，雖亦略放鄉州屬別之法，而積數迥殊，與此

經不相應也。云「正師胥皆長也」者，謂此三者雖別爲官名，不稱長，而義亦略同。《天官·敘官》注云：「正，長也。」又云：「師猶長也。」賈疏云：「自州已下至比長五官，州比自稱長矣。唯有黨正、族師、閭胥不言長，故鄭云正師胥皆長也。」胡匡衷云：「《內則》『州史獻諸州伯』。伯亦長，稱州伯亦州長也。」云「正之言政也」者，《文王世子》鄭注云：「正者政也。」《夏官·敘官》注云：「政，正也。」政從正得聲，故義取於正，正義亦通於政，得互相訓也。鄭言此者，明異長言正兼取主五百家政教之義。云「師之言帥也」者，賈疏云：「以其帥領百家，故言帥也。」云「胥有才知之稱」者，《春官·敘官》注同。言以才知見擇，長二十五家也。此亦讀胥爲謂，注不言者，文不具。詳《天官·敘官》疏。引《載師職》云「以官田、牛田、賞田、牧田任遠郊之地」，又引《司勳職》曰「掌六鄉之賞地」者，賈疏云：「欲見賞地在六鄉之中，同在遠郊之內。」云「六鄉地在遠郊之內，則居四同」者，《載師》注云「遠郊之內，地居四同，三十六萬夫之地」是也。賈疏云：「案：《司馬法》『王城百里爲遠郊』。於王城四面，則方二百里開方之，二二如四，故云居四同。言此者，破賈、馬六鄉之地在遠郊五十里內，五十里外置六遂。」論讓案：鄉必在城郭外四郊以內。《書·費

誓云：「魯人三郊三遂。」三郊卽諸侯三鄉，言郊以包鄉。《王制》孔疏謂左右鄉在國城內，非也。賈、馬亦謂鄉在遠郊內，遂在遠郊外，與杜、鄭義同，而說郊制則異，當以杜、鄭爲正。詳《載師》疏。鄭司農云「百里內爲六鄉，外爲六遂」者，《遂人敘》注義同，百里內外卽遠郊之內外也。《國語·周語》韋注云：「《周禮》天子遠郊之內有六鄉，則六軍之事也。外有六隧，掌供王之貢賦。」隧與遂同。賈疏云：「以其遂人掌六遂，案《遂人職》云『掌郊之野』，郊外曰野，故知百里外爲六遂。」

封人，中士四人，下士八人，府二人，史四人，胥六人，徒六十人。聚土曰封，爲壝堦埒及小封疆也。【疏】「封人」者，掌封壝之等，是土地之事，故屬地官。此官總主畿封，其官府當在國中。《左傳》隱元年鄭穎考叔爲穎谷封人，桓十一年鄭有祭封人仲足，文十四年宋高哀爲蕭封人，昭十九年蔡有鄭陽封人，二十一年宋有呂封人華豹，《論語·八佾篇》衛有儀封人，杜注、皇疏並謂典守封疆者。彼爲有地治之小吏，與此封人不同，或春秋以後侯國之制也。云「胥六人，徒六十人」者，賈疏云：「胥徒多者，以其畿封事廣故也。」 注云「聚土曰封」者，

《王制》「不封不樹」，注云：「封謂聚土爲墳。」是聚土而高者皆謂之封也。云「謂壝堦埒及小封疆也」者，本職云：「掌設王之社壝，爲畿封而樹之。」注云：「壝謂壇及埒埒也。畿上有封，若今時界矣。」小封疆卽畿封之屬。壝堦埒，詳《掌舍》疏。

鼓人，中士六人，府二人，史二人，徒二十人。【疏】「鼓人」者，《說文·鼓部》云：「鼓，郭也。春分之音，萬物郭皮甲而出，故謂之鼓。」鼓人是樂官而屬司徒者，以其兼掌鼓役事故也。

舞師，下士二人，胥四人，舞徒四十人。舞徒，給繇役能舞者以爲之。【疏】「舞師」者，《說文·舛部》云：「舞，樂也。用足相背。」《呂氏春秋·古樂篇》云：「昔陰康氏之始，陰多滯伏而湛積，水道壅塞，不行其原，民氣鬱閼而滯著，筋骨瑟縮不達，故作爲舞以宣導之。」《左》襄十年傳，宋以《桑林》享晉侯，舞師題以旌夏，當卽此官。杜注以爲樂師，非也。舞師亦樂官，而屬司徒者，以鼓人掌鼓兵舞、帔舞，舞師與彼爲聯事，故同屬地官而次其後。賈疏謂「鼓人教六鼓四金，舞師教舞，亦是教官之類，故在此」，非也。 注云「舞徒，給繇役能舞者以爲之」者，繇

即脩之段字，詳《天官·敘官》疏。賈疏云：「餘官直言徒，此官徒言舞者，徒是給繇役之人，今兼云舞，即徒中使能舞者以充徒數也。」俞樾云：「徒給繇役，不得即以舞者爲之，疑舞下有闕文，當云舞者若干人，徒四十人。《春官·敘官·鞀師》曰『舞者十有六人，徒四十人』，《旄人》曰『舞者衆寡無數』，又曰『徒二十人』，皆其例也。傳寫奪誤，遂以舞徒連文，注家即從而爲之說，殆失之矣。」案：俞說亦通。

牧人，下士六人，府一人，史二人，徒六

十人。牧人，養性於野田者。《詩》云：「爾牧來思，何蓂

何笠，或負其鰈，三十維物，爾牲則具。」【疏】「牧人」者，掌

牧田，亦有地守，故屬地官。云「下士六人」者，莊存與云：

「牧六牲分職也。」

注云「牧人養性於野田者」者，《說

文·支部》云：「牧，養牛人也。」《左》昭十七年傳云：「馬

有圉，牛有牧。」引申之，凡養六牲者通謂之牧。《載師》「以

牧田任遠郊之地」，先鄭注云：「牧田，牧六畜之田。」即此

牧人所牧也。賈疏云：「對充人養性於國中。」引《詩》云

「爾牧來思，何蓂何笠，或負其鰈，三十維物，爾牲則具」者，

《小雅·無羊》文。鰈，《釋文》作「猴」。案：鰈正字，猴別

體。《毛詩》作鰈。傳云：「何，揭也。蓂，所以備雨。笠，

所以禦暑。三十維物，異毛色者三十也。」鄭箋云：「言此者，美牧人寒暑飲食有備，牛羊之色異者三十，則女之祭祀，索則有之。」引之者，證牧人養性野田之事。

牛人，中士二人，下士四人，府二人，史

四人，胥二十人，徒二百人。主牧公家之牛者。

《詩》云：「誰謂爾無牛，九十其牯。」牯者九十，其餘多矣。

【疏】「牛人」者，掌牧公牛，以大司徒掌奉牛牲。又《庖人》

注云：「牛屬司徒土也。」故屬地官而次牧人之後。注

云「主牧公家之牛者」者，本職云：「掌養國之公牛，以待國

之政令。」注云：「公猶官也。」明彼公牛即謂公家之牛也。

《載師》「以牛田任遠郊之地」，先鄭注亦云「牛田者，以養公

家之牛」。引《詩》云「誰謂爾無牛，九十其牯」者，牯，《釋

文》作「牯」。案：《說文·牛部》作牯，牯正字，牯隸變字。

此亦《小雅·無羊篇》文。毛傳云：「黃牛黑脣曰牯。」鄭箋

云：「誰謂女無牛，今乃牯者九十頭，言其多矣。」引以證牛

人牧牛之事。云「牯者九十，其餘多矣」者，與《詩箋》說同。

賈疏云：「證經牛多故徒有二百人牧之也。」

充人，下士二人，史二人，胥四人，徒四

十人。充猶肥也，養繫牲而肥之。【疏】「充人」者，賈疏

云：「祭祀之牲，本以諸官堪入祭祀者，送付牧人，至祭前三月，選入充人芻之，使之肥充。故其職云「祀五帝則繫于牢，芻之三月」，故與牧人連類在此也。」案：凡祭牲當由牧人共入牛人、羊人諸官，乃選入充人芻之。賈謂諸官選入牧人，非也。詳《牧人職》疏。

注云「充猶肥也，養繫牲而肥之」者，《說文·几部》云：「充，長也，高也。」引申為牲畜肥脂之稱。《特牲饋食禮》：「宗人視牲告充。」鄭彼注亦同。此充人官主祭祀之牲，故即取告充之義為名。

載師，上士二人，中士四人，府二人，史

四人，胥六人，徒六十人。載之言事也，事民而稅之。《禹貢》曰「冀州既載」。載師者，閭師、縣師、遺人、均人官之長。【疏】「載師」者，以下至均人五官，並掌土地賦役之事，故亦屬地官。

注云「載之言事也」者，《小爾雅·廣詁》云：「載，事也。」云「事民而稅之」者，賈疏云：

「案其職上云任土之法，下云近郊十一之等，是其任民而稅之者也。」引《禹貢》曰「冀州既載」者，《書》孔疏引鄭《書注》云：「載之言事，事謂作徒役也。禹知所當治水，又知用徒之數，則書於策以告帝徵役而治之。」彼載為作徒役，與此事民而稅之事雖不同，而訓則一，故引以為證。云「載師

者，閭師、縣師、遺人、均人官之長」者，賈疏云：「以其閭師、縣師徵斂之官，所斂之賦有人遺人者，均人主掌地守地職，皆與載師事通，故載師與之為長。」案：閭師、縣師皆有專掌之地治，不僅主徵斂，似非載師之屬。唯遺人掌委積，均人掌鄉遂公邑土地征役，或與載師職掌相通耳。鄭、賈說恐未瑣。

閭師，中士二人，史二人，徒二十人。主

徵六鄉賦貢之稅者。鄉官有州、黨、族、閭、比，正言閭者，徵民之稅宜督其親民者。凡其賦貢入大府，穀入倉人。

【疏】「閭師中士二人」者，掌國中四郊官之長，猶鄉遂之有鄉師、遂師，公邑之有縣師也。凡國中廛里、四郊郊里，蓋並為閭里之制，而於六鄉之外，別為地治，其屬別當亦有比閭或鄰里之等，惟不立鄉遂，而通謂之閭，故其長謂之閭師，猶脩閭氏掌國中亦以閭為名也。但經文不具，無由攷其詳耳。互詳本職疏。云「史二人徒二十人」者，此官掌徵斂，則不宜無府又無胥。竊疑此經閭師縣師屬官文，疏略特甚，當與鄉遂官無府史同屬闕文也。詳前疏。注云

「主徵斂六鄉賦貢之稅者」者，案其職云：「掌國中及四郊人民六畜之數，以時徵其賦。」六鄉之地雖內連國中，外通四郊，而此官正掌國中四郊之地治，則不得兼徵六鄉之賦

貢；況六遂賦貢即徵於遂師，公邑賦貢即徵於縣師，則六鄉賦貢即徵於鄉師，亦不必以間師兼掌之矣。鄭說未允，詳本職疏。云「鄉官有州、黨、族、閭、比，正言間者，徵民之稅宜督其親民者」者，此釋官名間師之義。賈疏云：「鄉官有五者之名，正取二十五家爲間以爲徵斂之官號者，徵民之稅，恐不能細委其民，故以近民之官爲號。」案：鄭、賈說非也。國中四郊官之長以間爲名者，以其亦爲比閭之制也。鄭惟以掌六鄉賦貢爲說，未塙。云「凡其賦貢入大府」者，賈疏云：「此貢非是大宰九貢，正是九職之貢，即其職云任農以耕事，貢九穀之類是也。此云賦，謂大宰九賦之內，則國中四郊二者是也。故其職云『掌國中及四郊之人民六畜之數』。又云『凡無職者出夫布』。是其九職之內，故云『凡其賦貢入大府』。故《大府職》云『掌九賦九貢九功之貳，以受其貨賄之入焉』。」案：賈以九賦爲口泉，故謂全入大府，實則九賦爲地稅正供，大半爲穀，入倉人也。詳《大宰》疏。云「穀入倉人」者，賈疏云：「案《倉人》云『掌粟人之藏』，故知穀入倉人也。」

縣師，上士二人，中士四人，府二人，史四人，胥八人，徒八十人。主天下土地人民已下之數，徵野賦貢也。名曰縣師者，自六鄉以至邦國，縣居中

焉。鄭司農云：「四百里曰縣。」【疏】「縣師」者，掌公邑官之長，與間師同有地治，而所領疆域，自甸達畿，距國既遠，其轄境尤廣，故次間師之後，而爵尊一等，員數亦較多也。《載師》注云：「公邑謂六遂餘地，天子使大夫治之，自此以外皆然。二百里、三百里，其大夫如州長；四百里、五百里，其大夫如縣正。」是鄭謂公邑有縣也。鄭鑄云：「王國百里外爲六遂，又其外爲家邑、小都、大都，尚有餘地則謂之公邑，天子使吏治焉，其官名曰縣師。」金榜云：「周制，鄉遂之外，有都鄙，有公邑。《縣士》注云：『都縣野之地，其邑非王子弟公卿大夫之采地，則皆公邑也，謂之縣。』縣師、稍人、縣士，治公邑之官也。」案：鄭、金說是也。江永、姜兆錫、林喬蔭說同。全經凡言縣者有四：此縣師及縣士所掌之縣，爲四等公邑之通名，一也。《小司徒》「四甸爲縣」，爲都之屬別，二也。縣正所掌二千五百家之縣，爲六遂之屬別，三也。《大宰》「邦縣之賦，即《載師》所云『以小都之田任縣地』」，爲距王城四百里地之專名，四也。但依《載師》注義，謂公邑之縣與五鄙之縣同，則是溝洫貢子之法。其說非也。今攷公邑，實當與采邑同制井田，亦爲丘甸之法。則縣之名，蓋即起於四甸之縣，猶采邑稱都名亦起於四縣之都，其義正同，與六遂之縣固不相涉也。但公邑自

甸至畺有四等，惟甸有公邑無采邑，其在稍者與家邑同處，在縣者與小都同處，在畺者與大都同處。王官所治爲公邑，公邑所居謂之縣鄙，采主所治爲采邑，采邑所居謂之都鄙，二者互相出入，制宜略同。采邑大都極於百里，不止四縣，則公邑總部之大縣，亦宜極於百里，不止四甸，可相比例也。《周書·作雒篇》說王畿云：「方千里分以百縣，縣有四郡，郡有四鄙。」又云：「大縣城方王城三之一，小縣城方王城九之一。」《說文·邑部》亦云：「周制，天子地方千里，分爲百縣，縣有四郡。故《春秋傳》曰：『上大夫受縣，下大夫受郡。』」案：《月令》亦有百縣之文，千里開方，得方百里者百。《司馬法》以百里爲一同。《載師》注云：「王畿內方千里積百同。」百同即百縣也。惠士奇云：「《周書》千里分爲百縣。昭五年《左傳》『十家九縣，長轂九百，其餘四十縣，遺守四千』。則每縣百乘，百縣萬乘，此國畿千里出車之大數也。地官有縣師，秋官有縣士。《風俗通》曰：『百里爲同，總名曰縣。』」案：惠據《作雒》及《左傳》遠啓疆語釋此縣，是也。金榜說同。蓋百縣之制，雖通王畿大較言之，然公邑總部之爲縣，則《縣士》有明文，自當即一同之縣。以《小司徒》丘甸之法言之，《作雒》之鄙即四甸之縣，郡即四縣之都，皆與此經異，而彼所謂縣，即《小司徒》注

所謂四都方八十里旁加十里爲一同者，則與《載師》大都正相應，蓋即所謂大縣；而四甸之縣則所謂小縣也。此經縣師、縣士所治，當即一同之大縣，可無疑矣。互詳《載師》、《匠人》疏。云「上士二人」者，公邑卑於六遂，故縣師爵降於遂師一等。縣數無定，二人同治之，如鄉師下大夫四人掌六鄉，遂師下大夫四人掌六遂，職相左右也。至公邑有地治之官，當亦自井邑、丘甸、縣都至四都之長，以次遞增其爵。《左》襄三十年傳，說晉絳縣人趙孟問其縣大夫，則其屬也，以爲絳縣師。杜注云：「縣師，掌地域，辨其夫家人民。」即據此官爲釋。孔疏謂守公邑之長稱大夫。案：絳時爲晉都，而得爲公邑之縣者，晉自唐叔始封以後，都已屢徙，或沿舊制不改，故絳仍如公邑，孔以縣大夫爲公邑之長，理或然也。又昭四年傳有縣人，蓋亦即縣吏之屬。杜注以爲六遂之屬，非也。但王朝公邑官名數，於此經究無文可證。《載師》注謂如州長縣正之說，蓋誤以鄉遂之法推之公邑，則不足據。《左》文十六年傳，宋有帥甸。杜注云：「帥甸，郊甸之帥。」孔疏以爲即公邑大夫。又《月令》有命四監之文。《呂氏春秋·季夏》、《季冬紀》，高注謂「周制，畿內分爲百縣，縣有四郡，郡有一大夫監之」。高說亦本《周書》。彼郡即四縣之都，都有監大夫，則亦即公邑之

吏也。二說古籍咸無可質證，附識之以備考覈。又《周書·嘗麥篇》云：「野宰乃命家邑縣都，祠于大祠及風雨。」彼野宰得兼命家邑縣都，蓋卽此縣師之屬，以家邑卑於大小都，又與公邑地相連比，故命令得及之也。公邑官吏，亦互詳《載師》疏。注云「主天下土地人民已下之數」者，

賈疏云：「案其職云：『掌邦國都鄙稍甸郊里之地域，辨其夫家六畜車輦。』是其主天下土地人民已下之數。人民之外，仍有六畜車輦，故言已下。」江永云：「注非也。天下土地人民，自有職方氏掌之，亦但知其數要耳，其詳數自在列國諸侯。若縣師者，上士中士止六人，豈能一一稽之。又四郊以內之人民田萊等，自有鄉遂之官稽之，亦非縣師之職。」案：江說是也。本職注謂縣師所主數周天下，故此注亦以天下爲言，然其說非是。今攷縣師之掌公邑，猶鄉師之掌鄉邑，遂師之掌遂邑，而亦與遂師同屬遂人。以遂人之職得通及甸稍縣都，而此官則唯專主公邑之土地人民，其典法命令雖間及於都家，而究不得侵其地治。至於外而邦國，內而郊里，則尤迴不相涉矣。云「徵野賦貢也」者，賈疏云：「案其職云『以歲時徵野之賦貢』。郊外曰野。以其二百里外至邦國，以其地廣，縣師徵之，旅師斂之，徵斂別官；百里之內，六鄉之中，閭師徵之，閭師斂之，以其地狹，

徵斂同官。」案：旅師不斂野之賦貢，賈說非。詳後疏。云「名曰縣師者，自六鄉以至邦國，縣居中焉」者，賈疏云：「自百里以至邦國分爲五等，二百里曰甸，三百里曰稍，四百里曰縣，五百里曰都，畿外邦國，是其縣居中焉。以其徵外內之賦，舉中爲名。鄭雖言自六鄉，六鄉仍舊郊內，據六鄉已外而言。」案：縣師掌公邑，此縣爲公邑之通名，義起於四甸之縣。鄭、賈謂取「甸稍縣都」縣居中爲名，未塙。鄭司農云「四百里曰縣」者，義亦與後鄭同。賈疏云：「據《載師職》，小都任縣地，在四百里中。」

遺人，中士二人，下士四人，府二人，史四人，胥四人，徒四十人。鄭司農云：「遺讀如《詩》曰『棄予如遺』之遺。」玄謂以物有所饋遺。【疏】注鄭司農云「遺讀如《詩》曰『棄予如遺』之遺」者，此擬其音也。賈疏云：「此《小雅·谷風》詩。彼謂朋友道絕，相棄如遺忘物。」云「玄謂以物有所饋遺」者，《廣雅·釋詁》云：「饋，遺也。」段玉裁云：「司農言『讀如』，非『讀爲』也。鄭君恐其義不明，因足成之。其實饋遺與遺棄，古音不別。」案：段說是也。此官所掌皆施予之事，故取饋遺爲名。

均人，中士二人，下士四人，府二人，史

四人，胥四人，徒四十人。均猶平也。主平土地之力政者。【疏】「均人」者，此官掌均鄉遂公邑土地征役，三年大比則大均，爵雖卑而職甚重，與司會總司財賦會計異官而職互相備。故《大戴禮記·盛德篇》云：「六官以爲轡，司會，均人以爲軌。」謂六官官當一轡，司會，均人又當驂內二轡也。注云「均猶平也」者，後《土均》注同。《說文·土部》云：「均，平徧也。」是均兼平徧二義。通言之，凡平並得爲均，故言猶平也。云「主平土地之力政者」者，據本職文。政當讀爲征。此官掌大司徒土均之灋，與土均職異而義同。

師氏，中大夫一人，上士二人，府二人，史二人，胥十有二人，徒百有二十人。師，教人以道者之稱也。保氏，司諫，司救官之長。鄭司農云：「《詩》云：『橋維師氏。』」【疏】「師氏」者，此官與保氏並掌小學之官也。《文王世子》云：「樂正司業，父師司成。」又云：「大司成論說在東序。」注云：「大司成，司徒之屬師氏也。」《學記》云：「古之王者，建國君民，教學爲先。」注云：「謂內則設師保以教，^①使國子學焉。外則有大學庠序之官。」據彼注則師保教於小學，與大司樂成均大學之教，內

外相備。但彼以師氏爲父師者，父師猶云大師，對保氏言之也。經傳凡云大師少師者，文各不同。如三公之大師，則位在六卿上。《書·洛誥》孔疏引《尚書大傳》云：「致仕之臣，教於州里，大夫爲父師，士爲少師。」則爲州里之師。而《大平御覽·皇親部》引《尚書大傳》云：「小師取小學之賢者登之大學，大師取大學之賢者登之天子。」彼大師蓋即大司樂，而小師蓋即師氏，故分掌大學小學，並與《文王世子》「父師」異也。互詳本職疏。《國語·魯語》有師尹，韋注引賈逵、唐固、虞翻說，亦謂即師氏，恐非。賈疏云：「以其主教，與地官掌十二教同，故亦在此。以其教國子有道藝，故使中大夫尊官爲之也。」云「徒百有二十人」者，賈疏云：「以其國子人多，使役處衆，故其徒多矣。」注云

「師，教人以道者之稱也」者，《文王世子》云：「師也者，教之以事而喻諸德者也。」《大戴禮記·保傅篇》云：「師導之教順。」賈疏云：「案其職云：『以三德教國子，一曰至德，以爲道本。』是其教人以道者之稱也。」云「保氏，司諫，司救官之長」者，賈疏云：「以其保氏佐師氏教國子，以其司諫諫萬民，司救救萬民，皆是教之義，故師氏與爲長。」鄭司農

①「教」，原脫，據《學記》鄭注補。

云「《詩》云耦維師氏」者，《小雅·十月之交篇》文。鄭彼箋云：「耦，氏。師氏，中大夫，掌司朝得失之事。」與先鄭義同。維，賈疏云述注作「惟」是也。今本作「維」，誤。詳《夏官·敘官·趣馬》疏。

保氏，下大夫一人，中士二人，府二人，

史二人，胥六人，徒六十人。保，安也，以道安人者也。《書敘》曰：「周公爲師，召公爲保，相成王，爲左右。」聖賢兼此官也。【疏】「保氏」者，賈疏云：「保氏與師氏，同教國子，官與府史別者，以其教國子雖同，館舍別所，故置官有異。」

注云：「保，安也，以道安人者也」者，

《廣雅·釋詁》云：「保，定也。」《爾雅·釋詁》云：「安，定也。」是保安義同。《說文·人部》云：「保，養也。」養與安義亦相成。本職云：「掌養國子以道。」《文王世子》云：

「保也者，慎其身以輔翼之而歸諸道者也。」《大戴禮記·保傳篇》云：「保，保其身體。」盧注云：「保謂安守之。」引《書

敘》曰「周公爲師，召公爲保，相成王爲左右」者，《君奭敘》文。《尚書釋文》引馬融《書注》云：「師氏，保氏皆大夫官，分陝爲二伯，東爲左，西爲右。」則馬季長亦以彼師保爲此師氏、保氏，鄭用師說也。云「聖賢兼此官也」者，此釋《書

敘》義也。《君奭》孔疏引鄭《書注》亦云：「此師保爲《周禮》師氏、保氏大夫之職，賢聖兼此官。」賈疏云：「召公爲賢，周公爲聖，此二人爲三公，分陝。以其周公爲聖，下兼此師氏官，召公爲賢，下兼此保氏官，故云聖賢兼此官。此鄭君之意，謂三公之號無師保之名，兼此二官得師保之稱。」

《鄭志》趙商問：「案成王《周官》，立大師、大傅、大保，茲惟三公。即三公之號，自有師保之名。成王《周官》，是周公攝政三年事，此《周禮》是周公攝政六年時，則三公自名師保，起之在前，何也？」鄭荅曰：「周公左，召公右，兼師保，初時然矣。」若如此解，周公兼師在成王《周官》前，故成王《周官》稱三公爲大師、大傅、大保。若然，大傅者，畢公爲之，兼世子之官，故稱大傅。是以《文王世子》云「大傅在前，少傅在後」。若孔君之義，三公之號自名師保，不由兼師氏保氏。案：《書·周官》，漢時今古文兩家並亡，趙商所引蓋其殘語之見於它書者，即僞古文所本也。鄭荅趙商問，語意簡晦，賈氏所述亦未得鄭指。諦繹其意，似謂初時二公爲師保，是兼此師氏保氏之官；其後成王制三公官，名大師、大傅、大保，則二公即爲三公之師保，不復兼此官也。故《書·顧命》「乃同召大保奭、芮伯、彤伯、畢公、衛侯、毛公、師氏虎臣」。《詩·淇奥》孔疏引鄭《書注》云：

「公兼官，以六卿爲正次。」則鄭亦以大保爲三公，非兼保氏之官矣。實則《君奭》所云師保，亦即指大師大保，非兼師氏、保氏，馬鄭說並未安，故孔疏亦席鄭之謬。《大戴禮記·保傅篇》及前賈疏引《五經異義》古《周禮》說，並謂召

公爲太保，周公爲太傅，太公爲太師，是爲三公。其文雖與《君奭》異，然可證其非兼師氏、保氏之官矣。至《文王世子》云「大傅在前，少傅在後」，鄭注謂太子在學時。又云「入則有保，出則有師」，鄭注謂太子燕居出入時。此與《保傅》謂三公爲太子師、三少與太子宴之文小異大同，似亦非此師氏、保氏之官。故師氏、保氏本職，但言教養國子及司王朝、守王宮門闕之事。太子入學雖與國子齒，而師氏、保氏職掌甚多，必無朝夕在太子前後及出入燕從之事。二記所言，與此經不甚相應，不可強爲傳合也。三公三少，互詳前疏。

司諫，中士二人，史二人，徒二十人。諫

猶正也，以道正人行。【疏】「司諫」者，此官與司救掌教萬民之官，卑於教國子者，故次其後。云「徒二十人」者，賈疏云：「無胥者，以得徒則了，不假長帥。上下文有徒無胥者，皆此類。」注云「諫猶正也」者，《保氏》「掌諫王惡」，

注云：「諫者，以禮義正之。」案：《說文·言部》云：「諫，証

也。」諫本爲諫諍，引申之，凡糾正萬民之事，通謂之諫。正與証字亦通。《楚辭·七諫》王序云：「諫者，正也。」云「以道正人行」者，賈疏云：「案其職云正其行，故鄭就而解之。」

司救，中士二人，史二人，徒二十人。救

猶禁也，以禮防禁人之過者也。【疏】注云「救猶禁也」者，亦引申之義。《說文·支部》云：「救，止也。」《廣雅·釋詁》云：「禁，止也。」是救禁義同。云「以禮防禁人之過者也」者，賈疏云：「案其職云：『掌萬民之衰惡過失而誅讓之，以禮防禁而救之。』是其以禮防禁人之過者。」

調人，下士二人，史二人，徒十人。調猶

和合也。【疏】「調人」者，掌和難，與教萬民事相因，故類列於教民官之後。注云「調猶和合也」者，《說文·言部》云：「調，和也。」《賈子·道術篇》云：「合得密周謂之調。」

媒氏，下士二人，史二人，徒十人。媒之

言謀也，謀合異類，使和成者。今齊人名麴黹曰媒。【疏】「媒氏」者，掌男女之判。是夫家人民之事，故屬地官。會合男女與和合事亦相近，故冢調人而次之。賈疏引《集略》

云：「配儷男女，取地道生息。」義亦通。

注云「媒之言

謀也，謀合異類，使和成者」者，《說文·女部》云：「媒，謀也。謀合二姓。」《廣雅·釋詁》亦云：「媒，謀也。」媒謀聲

類同，故義亦通。云「今齊人名麴麴曰媒」者，《說文·米部》云：「蘗，酒母也。」麴即蘗之俗。《說文》、《玉篇》並無麴

字。《釋文》音魚列反，又五結反，徐音去穢反。案魚列、五結二音與檠同。段玉裁云：「此舉方俗語證成其義也。」

《司馬遷傳》曰：「全軀保妻子之臣，隨而媒孽其短。」孽當爲檠，媒檠猶醞釀，正與此鄭注合。小顏亦曰：「齊人謂鞠餅爲媒。」此必《漢書音義》中舊說。徐仙民歠音去穢反，則

麴麴讀麴塊，非檠字也。」詒讓案：《漢書·李陵傳》作「媒檠」，注引孟康云「媒，酒教」。此麴麴即蘗檠之別體，徐音似非鄭義。賈疏云：「麴麴和合得成酒醴，名之曰媒。言

此者，欲見謀合異姓得名爲媒之意。」

司市，下大夫二人，上士四人，中士八

人，下士十有六人，府四人，史八人，胥十有

二人，徒百有二十人。司市，市官之長。【疏】「司

市」者，以下至泉府十官，並掌國市政令刑禁貨賄之事，亦有地治，故屬地官。司市亦省稱市，《王制》云：「司會以歲

之成，質於天子。大樂正、大司寇、市三官以其成，從質於天子。」注云：「市，司市也。」注云「司市，市官之長」

者，《說文·門部》云：「市，買賣所之也。」賈疏云：「市官，

謂質人已下至泉府，司市與之爲長也。以其市官之長，經紀事大，故使下大夫尊官爲之，屬官及胥徒又衆也。」

質人，中士二人，下士四人，府二人，史

四人，胥二人，徒二十人。質，平也。主平定物賈

者。【疏】「質人」者，以下至泉府九官，並司市之屬官，故次其後。注云「質，平也」者，《夏官·敘官·馬質》注

同。《爾雅·釋詁》云：「質，平，成也。」其職云：「掌成市之貨賄、人民、馬牛、兵器、珍異。」成質義亦同。云「主平定

物賈者」者，平謂抑其騰躍，定謂禁其誑豫，皆質人主之也。

廛人，中士二人，下士四人，府二人，史

四人，胥二人，徒二十人。故書廛爲壇，杜子春讀

壇爲廛，說云「市中空地」。玄謂廛，民居區域之稱。【疏】

注云「故書廛爲壇，杜子春讀壇爲廛」者，《載師》注同。惠

棟云：《管子·五輔篇》曰：「辟田疇，利壇宅。」《荀子·

王制篇》曰：「定廛宅。」是古廛字皆作壇也。丁晏云：「古壇廛聲相近。《說文·鳥部》：鷦，从鳥亼聲，籀文从廛作

鷗。云「說云中空地」者，《載師》先鄭注云：「廛，市中空地未有肆，城中空地未有宅者。」義與杜同。《文選·西京賦》薛注亦云「都邑之空地曰廛」。後鄭所不從。云「玄謂廛，民居區域之稱」者，《載師》注義同。段玉裁云：「此從杜易字而不從其說。」賈疏云：「見《遂人》云『夫一廛田百畝』及《載師》『廛里任國中之地』，皆是民之所居區域。又其職有廛布，謂貨賄停儲邸舍之稅，即市屋舍，名之爲廛，不得爲市中空地。」詒讓案：民謂四民，凡無爵者之稱。區域者，猶言界限。鄭意民居地各有界限，是謂之廛，不定爲市中空地也。蓋古書凡言廛者，猶今人所謂基地。載師之廛里園廛，遂人之夫一廛，皆指農圃牧工商賈受田者之居。廛人之廛布及司關之征廛，則指市中之邸舍。無論在里在市，已有宅肆，未有宅肆，其基地通謂之廛。此廛人唯掌市宅，不掌民宅。鄭欲綜釋全經廛字之義，故云民居區域。杜及二鄭各舉一端爲釋，義實相成也。互詳《載師》、《遂人》疏。

胥師，二十肆則一人，皆二史。賈師，二十肆則一人，皆二史。司隸，十肆則一人。司稽，五肆則一人。胥，二肆則一人。

肆長，每肆則一人。自胥師以及司稽，皆司市所自辟除也。胥及肆長，市中給繇役者。胥師領羣胥，賈師定物賈，司暴禁暴亂，司稽察留連不時去者。【疏】「胥師二十肆則一人，皆二史」者，賈疏云：「自胥師至司稽皆是府史之類，非是命士已上。胥者，有才智之稱。師，長也。肆謂行列。胥師二十肆則一人，皆有二史副之，助作文書。」

云「司隸十肆則一人」者，《文選·蕪城賦》李注引《字書》云：「隸，古文暴字。」案：暴，《說文·本部》作暴，重文無隸字。然薛尚功《鐘鼎款識·周寅簋》、《絳帖·秦詛楚文》^①並有此字。又《易繫辭》「重門擊柝，以待暴客」。《易釋文》引鄭本亦作「隸」。則隸蓋古暴字之或體，許偶失收耳。凡此經暴字多如此作，惟《大司馬》、《大司寇》、《誥士》、《禁暴氏》、《小行人》經仍作「暴」，疑皆傳寫之誤。云「肆長每肆則一人」者，賈疏云：「肆長謂行頭，每肆則一人，亦是市中給繇役者。」注云「自胥師以及司稽，皆司市所自辟除也」者，以此六官，經不言爵，則皆庶人在官者。胥師、賈師、司隸、司稽所主肆多，當視它官之府史。《天官·敘官》注云：「凡府史皆其官長所自辟除。」故知此四

①「秦」原訛「秦」，據楚本改。

官皆司市所自辟除也。云「胥及肆長市中給繇役者」者，此其所主肆尤少，復卑於胥師等四官也。《天官·敘官·胥徒》注云：「此民給徭役者。」繇，段字也。《莊子·知北遊篇》有監市，彼《釋文》引李頤云「市魁也」。以司門門徒亦稱監門例之，則監市當即此肆長之屬。賈疏云：「以其司稽已上是府史之類，明此二者與胥徒同是給繇役者也。」云「胥師領羣胥」者，師與長義同。二十肆十胥而一師，則師即什長也。《文選》張衡《西京賦》云「周制大胥」，謂此官也。云「賈師，定物賈」者，本職云：「展其成而奠其賈。」《司市》注云「奠讀爲定」，故云定物賈。《天官·敘官》注云：「賈，主市買，^①知物賈。」故主定之。亦謂之賈正，《左》昭二十五年傳，臧會奔郕，郕魴假使爲賈正。杜注云「賈正掌貨物，使有常賈，若市吏」，即此官也。云「司暴，禁暴亂」者，此注例用今字作「暴」也。本職云：「禁其鬪蹠者與其競亂者。」市人有爲暴亂擾害民者，司暴主禁止之。云「司稽，察留連不時去者」者，《說文·稽部》云：「稽，留止也。」案其職云，掌察犯禁與不物者及執盜賊等。此皆非商賈而留連市中不以時去者，此官掌察而禁之，故以司稽爲名也。

泉府，上士四人，中士八人，下士十有

六人，府四人，史八人，賈八人，徒八十人。

鄭司農云：「故書泉或作錢。」【疏】注云「故書泉或作錢」

者，《國語·周語》：「景王二十一年，將鑄大錢。」韋注云：

「古曰泉，後轉曰錢。」段玉裁云：「《外府》注云：「其藏曰

泉，其行曰布，取名於水泉，其流行無不徧。」《說文·貝部》

曰：「古者貨貝而寶龜，周而有泉，至秦而廢貝行錢。」據許

語，錢卽泉，秦時易名錢也。故《金部》錢字下曰：「銚也，

古田器。一曰貨也。」然則錢之名不始於漢。《檀弓》注

曰：「古者謂錢曰泉。」知漢時謂泉曰錢也。故書泉或作

錢，蓋假借錢字之肇端矣。徐養原云：「泉錢同聲，古蓋通

用。秦爲廢貝之始，非名錢之始也。」案：徐說是也。《漢

書·食貨志》云「劉歆言周有泉府之官」，則劉所見故書亦

作「泉」，故二鄭不從或本作「錢」。

司門，下大夫二人，上士四人，中士八

人，下士十有六人，府二人，史四人，胥四

人，徒四十人。每門下士二人，府一人，史

二人，徒四人。司門若今城門校尉，主王城十二門。

①「市買」原訛「市賈」，據《天官·敘官·庖人》注改。

【疏】「司門」者，賈疏云：「案其職云：『正其貨賄，凡物犯禁者舉之。』以其掌貨賄，與司市相連，故亦在此。」詒讓案：司門，侯國謂之門尹。《國語·周語》云「門尹除門」，韋注云：「門尹，司門也。」《左傳》僖二十八年宋有門尹般，哀二十六年又有門尹得，皆是也。云「下士十有六人」者，王引之云：「下云每門下士二人，上又云下士十有六人。若謂下士十有六人即每門下士之總數，則鄭注云「司門若今城門校尉主王城十二門」，以每門下士二人計之，十二門當有下士二十有四人，不得但言十有六人也。若謂下士十有六人在每門下士之外，則疏云每門下士二人據在門開閉者，此司門是都司總監十二門官。案：下大夫及上士、中士皆位尊於下士，故下士但分掌每門之開閉，而下大夫、上士、中士則總監十二門。如云下大夫、上士、中士之下又有下士十六人總監十二門，則其位與每門之下士相埒，何得居其上而總監之乎？」下《司關》云：「上士二人，中士四人，府二人，史四人，胥八人，徒八十人。每關下士二人，府一人，史二人，徒四人。」彼文與此略同，而中士四人之下，不言下士人數，至每關始云下士二人。然則《司門》亦但云每門下士二人，而中士八人之下，無「下士十有六人」之文明矣。遍考五官敘官，凡上士中士下士之屬，一官之中無

再見者，不得於每門下士二人之外，又言下士十有六人。蓋涉上文「泉府上士四人中士八人下士十有六人」而衍也。賈疏但云「每門下士二人據在門開閉者」，而不及下士十有六人與每門下士之同異，則所據本無「下士十有六人」之文可知。唐石經誤衍。案：王說是也。云「每門下士二人，府一人，史二人，徒四人」者，沈彤云：「王城十二門，下士則二十四人，府則十二人，史則二十四人，徒則四十八人。」詒讓案：門徒本職又謂之監門。《掌戮》云「墨者使守門」，即此守門之徒，詳《天官·敘官》疏。注云「司門若今城門校尉」者，賈疏云：「案經有每門下士二人，據在門開閉者。此司門，鄭云「若今城門校尉」，則是都司總監十二門官，故舉漢法況之。」詒讓案：《續漢書·百官志》云：

「城門校尉一人，比二千石。」本注云：「掌雒陽城門十二所。」劉注引此《司門》干注云：「如今校尉。」《志》又云：「每門候二人，六百石。」注引此每門下士二人。干注云：「如今門候。」干說足補鄭義。云「主王城十二門」者，賈疏云：「案《匠人》云：『營國九里，旁三門。』四面各三門，是有十二門。鄭注云：「十二門以通十二子。」十二子則十二辰也。」

司關，上士二人，中士四人，府二人，史

四人，胥八人，徒八十人。每關下士二人，府一人，史二人，徒四人。關，界上之門。【疏】

「司關」者，關為國境之門，故冢司門而次之。賈疏云：「案其職云：『掌國貨之節以連門市。』故同與市連類在此。此司關亦是總檢校十二關，所司在國內。」云「每關下士二人」者，賈疏云：「自在關門開閉。」沈彤云：「王畿十二關，則二十四人。」案：沈說是也。司關，《國語·周語》謂之關尹，蓋侯國之制。亦作關令尹，《史記·老子列傳》說老子見周衰，迺遂去，至關，見關令尹喜。蓋即每關下士二人。《索隱》引李尤《函谷關銘》，謂喜為函谷關尹，而崔浩及葛洪《抱朴子》則云散關令。今攷老子時，函谷關、散關皆非王畿地，則關令尹亦非周官也。互詳本職疏。云「府一人，史二人，徒四人」者，沈彤云：「府每關一人，則十二人；史每關二人，則二十四人；徒每關四人，則四十八人。」詒讓案：《掌戮》云「劓者使守關」，即此守關之徒四人。上中下士並有爵命，必不使刑人為之也。 注云「關界上之門」

者，《王制》「關執禁以譏」，注云：「關，竟上門。」《聘禮》「賓及竟，乃謁關人」，注云：「古者竟上為關，以譏異服，識異言。」界與竟義同。彼關人即此每關下士二人也。賈疏云：「王畿千里，王城在中，面有五百里，界首面置三關，則

亦十二關，故云關界上門也。」詒讓案：《管子·大匡篇》云：「桓公伐魯，魯不敢戰，去國五十里而為之關，魯請比於關內，以從於齊。」尹注云：「更立國界而為之關。」亦關在界上之證。《孟子·梁惠王篇》云「郊關」者，蓋指遠郊門言之，散文門關通也，與界上之關異。《左》昭二十年傳，說齊毀偃介之關。杜注以為迫近國都之關。彼非常制，則正關必不在四郊明矣。又賈《聘禮》疏云：「魯廢六關，半天子，則餘諸侯亦或然也。」

掌節，上士二人，中士四人，府二人，史四人，胥二人，徒二十人。節猶信也。行者所執之

信。【疏】「掌節」者，賈疏云：「案其職云：『掌守邦節，辨其用。』」在此者，以其節連於門市，故亦連類在此。云「府二人」者，呂祖謙云：「《左傳》文八年：『宋司城蕩意諸來奔，效節於府人。』即此所謂府二人者也。古者必有府人藏此節，所以效於府人。」胡匡衷云：「《書·康誥》云『越小臣諸節』。傳以為諸有符節之吏，疑即掌節也。」 注云「節猶信也，行者所執之信」者，《玉藻》「凡君召以三節」，注云：「節所以明信。」《釋名·釋兵》云：「節者，號令賞罰之節也。」節，卽之段借字，詳本職疏。

遂人，中大夫二人，遂師，下大夫四人，

上士八人，中士十有六人，旅下士三十有二人，府四人，史十有二人，胥十有二人，徒百有二十人。遂人，主六遂，若司徒之於六鄉也。六遂之地，自遠郊以達于畿，中有公邑、家邑、大都、小都焉。鄭司

農云：「遂謂王國百里外。」【疏】「遂人」者，以下至鄰長，並治六遂之官吏，故亦屬地官。此官總掌六遂及四等公

邑，舉近眡遠，故以遂人名官而列諸遂吏之前。本職云：「五縣爲遂。」案：遂卽「夫間有遂」之遂。溝洫之法始於田

首之遂，因以爲五縣之名。《左傳》襄七年有「隧正」，杜注云：「五縣爲隧。」《國語·周語》云：「晉文公既定襄王於

郊，王勞之以地，辭，請隧焉。」韋注云：「隧，六隧也。」又《漢書·王莽傳》，說莽依《周官》作六鄉六隊。隧隊並遂之

借字。云「中大夫二人」者，通掌六遂，與遂師分治三遂異也。云「遂師下大夫四人」者，以下唐石經跳行別爲一條，

誤。六遂蓋亦如六鄉分爲左右，此官亦二人共三遂之事，與鄉師掌鄉同也。

注云「遂人主六遂，若司徒之於六鄉也」者，司徒謂大小司徒也。司徒通掌邦畿土地政教之

事，而兼領六鄉國中郊里之地治，此官亦通掌遂甸以外土

地政教之事而兼領六遂公邑之地治，職秩約略相擬也。賈

疏云：「遂人主六遂，如司徒主六鄉，但官卑校一節。司徒

六命卿一人，小司徒中大夫二人，鄉師下大夫四人。此遂

人中大夫二人，當小司徒處，遂師下大夫四人，當鄉師處，

但無六命卿一人。以其六鄉爲正，六遂爲副，故尊卑不

同；以主事相似，故上士已下其數與司徒同。」云「六遂之

地自遠郊以達于畿」者，于，注例當作「於」，各本竝誤。賈

疏云：「案其職云「遂人掌邦之野」，下文「以達于畿」，是其

義也。」詒讓案：此謂六遂在遠郊之外，遂吏所治家數有

定，雖不出甸地，而遂人所掌則通於甸稍縣都。是內與遠

郊接界，而外達於五百里之畿，非謂六遂七萬五千家分居

甸稍縣都也。賈前疏引賈、馬說「六鄉之地在遠郊五十里

內，五十里外置六遂」，此與杜、鄭說郊制不合，不足據。賈

《敘周禮廢興》又引馬融《傳敘》，述賈逵義，以爲六鄉及六

遂爲十五萬家緬千里之地。然則賈景伯蓋謂六鄉七萬五

千家，自居五十里郊內；六遂七萬五千家，則分居五十里

郊外，至五百里，布滿王畿。此說與經尤不合，則馬氏已辟

其謬矣。云「中有公邑、家邑、大都、小都焉」者，謂甸公邑

與遂同處，稍縣都之公邑及家邑大小都，則遂人所兼掌也。

賈疏云：「但六遂之地只在二百里內，亦有公邑，故《載師

職云「公邑之田任甸地」。其公邑，自二百里以出至五百里，皆有焉。家邑，大夫采地，在稍地三百里；小都，卿之采地，在縣地四百里；大都，三公王子弟，在疆地五百里。故《載師職》云「家邑任稍地，小都任縣地，大都任疆地」。遂人雖專六遂，以其言掌野，郊外曰野，大摠之言，以言達于畿，故知兼掌此等焉。」鄭司農云「遂謂王國百里外」者，即遠郊百里外也。

遂大夫，每遂中大夫一人。縣正，每縣下大夫一人。鄙師，每鄙上士一人。鄼長，每鄼中士一人。里宰，每里下士一人。鄰長，五家則一人。縣、鄙、鄼、里、鄰，遂之屬別也。

【疏】遂大夫，每遂中大夫一人者，沈彤云：「六遂則六人。」詒讓案：《左傳》襄七年云：「叔仲昭伯爲隧正。」孔疏謂當此遂人。又襄九年云：「宋災，令隧正納郊保。」疏謂當此遂大夫。案：此與鄉大夫亦稱鄉正同，孔後說是也。前疏以爲遂人，誤。云「縣正，每縣下大夫一人」者，縣正、鄙師、鄼長、里宰、鄰長，唐石經皆跳行，誤。沈彤云：「三十縣則三十人。」云「鄙師，每鄙上士一人」者，沈彤云：「百五十鄙則百五十人。」云「鄼長，每鄼中士一人」者，《說文》

邑部云：「百家爲鄼。鄼，聚也。」《呂氏春秋·季秋紀》高注云：「四里爲攢。」攢鄼聲類同。沈彤云：「七百五十鄼則七百五十人。」云「里宰，每里下士一人」者，唐石經作二人，誤。《釋名·釋州國》云：「四鄰爲里，居方一里之中也。」《續漢書·百官志》劉注引《風俗通》云：「《周禮》四鄰爲里，里者止也。里有司司五十家，共居止同事，春秋通其所也。」案：此里爲二十五家，非五十家，亦不必方一里，劉、應說並誤。《周書·嘗麥篇》有「里君」，蓋即《裸記》之「里尹」。鄭注云：「里尹，閭胥里宰之屬。」《王度記》曰：「百戶爲里，里一尹，其祿如庶人在官者。」案：《王度》之里百戶，《管子·度地篇》亦云「百家爲里」，則當鄉之族、遂之鄼也。此經閭胥、鄼長以上士中士爲之，即里宰亦下士，非庶人在官者爲之。《逸禮》之言，非周制也。又《裸記》孔疏引《撰考識》云「古者七十二家爲里」。又引《尚書大傳·洛誥》傳云：「古者八家爲鄰，三鄰爲朋，三朋爲里。」鄭注云：「蓋虞夏時制。」《公羊》宣十五年何注云：「一里八十戶，其有辨護伉健者爲里正，比庶人在官。」彼似侯國井田之制。《國語·齊語》云：「管子制國，十軌爲里。」《鵠冠子·王鈇篇》云：「十伍爲里。」此並後世邑里之制，與此經皆不相應也。《左》襄九年傳、《國語·周語》並有「司里」，

乃司宅里之官，杜、韋注並謂卽此「里宰」，誤。沈彤云：

「三千里則三千人。」云「鄰長，五家則一人」者，《釋名·釋

州國》云：「五家爲伍，又謂之鄰，鄰，連也，相接連也。」沈

彤云：「萬五千鄰則萬五千人。鄰長無爵無祿，受田如農

民而去其役賦，如庶人在官者也。」詒讓案：《漢·食貨志》

有里胥、鄰長，又云「鄰長，位下士者」。彼以鄰里上承族黨

州鄉，則鄰長卽比長，故云位下士，與此異也。《玉燭寶典》

引韋昭謂彼「里胥」卽此經「里宰」，未塙，互詳前疏。賈疏

云：「此遂大夫於六遂各主一遂，似鄉大夫各主一鄉，但遂

大夫以下，其官皆卑於鄉官，命數皆減一等。是以遂大夫

每遂中大夫一人，不使卿爲之。差次至鄰長，五家則一人

者，是不命之士爲之；其鄉內比長亦五家一人，彼使下士

爲之。」詒讓案：六遂官當亦有府史胥徒，經無者，疑有闕

文，詳前疏。注云「縣、鄙、鄆、里、鄰，遂之屬別也」者，

賈疏云：「以其鄰長已上至縣正，皆屬於遂大夫，故言遂之

屬別，與上文州、黨、族、閭、比，鄉之屬別相似。」

旅師，中士四人，下士八人，府二人，史

四人，胥八人，徒八十人。主斂縣師所徵野之賦穀

者也。旅猶處也。六遂之官，里宰之師也。正用里宰者，

亦斂民之稅，宜督其親民。【疏】「旅師」者，此官與稍人、

委人、土均，並掌六遂以外征聚、賦役、委積、土地之官，故

亦屬司徒而次遂官之後。賈疏云：「六鄉之內所有賦稅，

閭師徵之，閭師斂之。此二百里以外至五百里，其地廣，故

縣師徵之，旅師斂之，徵斂別官，故官屬與胥徒多也。」案：

旅師唯主聚三粟，非征賦之官，賈說非也。凡國中六鄉四

郊之賦貢，閭師、鄉師令之，鄉郊吏斂之；六遂之賦貢，遂

師令之，遂吏斂之；公邑之賦貢，縣師令之，公邑之吏斂

之；皆非旅師所掌。詳本職疏。注云「主斂縣師所徵

野之賦穀者也」者，鄭意本職云「掌聚野之勸粟、屋粟、閭

粟」，勸粟卽野之正賦也。不知勸粟乃農民合耦者同出之

粟，與官賦不同，鄭并以爲一，誤。云「旅猶處也，六遂之官

里宰之師也」者，賈疏云：「里訓爲居，旅者衆也，衆之所

處，卽與里義同，故鄭云里宰之師也。」案：《左》襄二十八

年傳杜注云：「旅，客處也。」引申之凡居處亦謂之旅，故鄭

以爲里宰之師，非旅里同訓居處也。賈說失之。然旅師雖

主六遂以外之三粟，而不爲里宰之師，鄭說亦不塙。江永

謂旅，衆也，謂主衆毗合輸之粟。其說近是。詳本職疏。

云「正用里宰者，亦斂民之稅宜督其親民」者，此亦誤說也。

賈疏云：「遂官之內，縣鄙已下，正用里宰爲徵斂之官名

者，亦是斂民之稅，宜督其親民。若似六鄉之中，取閭名為徵斂之官，故鄭云亦，謂亦閭師也。」

稍人，下士四人，史二人，徒十有二人。

主爲縣師令都鄙丘甸之政也。距王城三百里曰稍。家邑、小都、大都自稍以出焉。【疏】「稍人」者，主公邑軍賦之

官。賈疏謂其職云掌令丘乘之政令，丘乘卽三等采地，沿注說之誤也。注云「主爲縣師令都鄙丘甸之政也」者，

賈疏云：「案其職云『若有會同師田行役之事，則以縣師之法』，故云主爲縣師令都鄙丘甸之政也。」案：鄭、賈說非也。稍人掌公邑丘乘之政令，以公邑亦制井田也。注謂掌

令都鄙，誤。詳本職疏。云「距王城三百里曰稍」者，賈疏云：「案《載師》家邑任稍地，在三百里內，故知三百里曰稍。」①云「家邑、小都、大都自稍以出焉」者，鄭意此官兼掌

縣都，而以稍名官者，舉近以略遠也。賈疏云：「以其家邑在三百里，小都在四百里，大都在五百里。從三百里向外，故言自稍以出。」

委人，中士二人，下士四人，府二人，史

四人，徒四十人。主斂甸稍芻薪之賦，以共委積者

也。【疏】「委人中士二人，下士四人，府二人，史四人，徒

四十人」者，此官掌委積，與遣人相備，故爵秩員數並同，唯無胥爲異。《孟子·萬章篇》云：「孔子嘗爲委吏矣，曰會計當而已矣。」趙注云：「委吏，主委積倉庾之吏也。」案：委吏疑卽此委人之屬。《史記·孔子世家》作「季氏史」，誤。注云「主斂甸稍芻薪之賦，以共委積者也」者，賈

疏云：「案其職云『掌斂野之賦斂薪芻，凡疏材木材，凡畜聚之物』，故鄭云主斂甸稍薪芻之賦。共與遣人在道以供賓客，故云以供委積者也。」詒讓案：本職云「凡其余聚以待頒賜」，注云：「謂縣都畜聚之物。」則此官兼掌縣都，鄭唯云甸稍者，文不具也。《大司徒》注云：「少曰委，多曰積。」此官掌芻薪之委積，與遣人委積兼有粟米芻薪者不同，故以委名官。然此官雖以薪芻共與遣人，而當官亦自有委積，但不及遣人之備耳。委積，詳《大司徒》疏。

土均，上士二人，中士四人，下士八人，

府二人，史四人，胥四人，徒四十人。均猶平

也。主平土地之政令者也。【疏】「土均」者，掌邦國都鄙

土地政令之事，與均人掌鄉遂公邑職掌互相備也。《曲禮》

①「曰」，原脫，據楚本補。

說天子六府，一曰司土，鄭彼注以爲殷制，司土於周爲土均。惠士奇云：「土均，均人皆掌均土地之政令而異其官者，一兼均力役，故曰均人；一專均土地，故曰土均。其在春秋則謂之地均。《管子·乘馬篇》所謂地均以實數者也。」案：土均掌邦國都鄙，詳《均人》及本職疏。注云

「均猶平也」者，前注同。云「主平土地之政令者也」者，《大司徒》云：「以土均之灋，辨五物九等，制天下之地征。」此官專掌其法，故即以爲名。賈疏云：「案其職云『掌平土地以均地守』，是主平土地之政令也。」

草人，下士四人，史二人，徒十有二人。

草，除草。【疏】「草人」者，此官與稻人並掌治田之事。土田爲征賦之所出，故屬司徒而次諸徵斂官之後。注云

「草，除草」者，《說文·艸部》云：「艸，百卉也。草，草斗，櫟實也。」經典通借草爲艸。《肆師》注云：「古之始耕田者，除田種穀。」除草即除田也。賈疏云：「案其職唯有糞種之文，無殺草之事。鄭云草除草者，殺草然後種之。職雖不言殺草，名爲草人，明知除草，故鄭云除草也。」惠士奇云：「芟草所以成穀，故《管子·地員》曰『草土之道，各有穀造』。」

稻人，上士二人，中士四人，下士八人，

府二人，史四人，胥十人，徒百人。【疏】「稻人」者，《初學記·寶器部》引《物理論》云：「稻者，溉種之總名。」案：稻即《食醫》之稌，詳彼疏。《曲禮》說天子六府，四曰司草。鄭彼注以爲殷制，司草於周爲稻人。云「胥十人，徒百人」者，賈疏云：「胥徒多者，以其并遣營種稻田。」

土訓，中士二人，下士四人，史二人，徒八人。鄭司農云：「訓讀爲馴，謂以遠方土地所生異物告道王也。《爾雅》云：訓，道也。」玄謂能訓說土地善惡之勢。【疏】「土訓」者，此官與誦訓並掌訓說土地圖志之事，故亦屬司徒。

注鄭司農云「訓讀爲馴」者，「爲」疑當作「如」，此擬其音也。《說文·言部》云：「訓，說教也。從言川聲。」漢時讀馴音與川蓋尤近，故先鄭讀從之。若如今本作「讀爲」，則是易其字，與下引《爾雅》文義不相屬矣。知非經文作馴先鄭讀爲訓者，以本職及下誦訓、夏官訓方氏證之，二鄭本必不作馴無疑也。惠棟云：「訓與馴古今字。《史記·五帝紀》云：『帝堯能明馴德。』徐廣曰：『馴古訓字。』《殷本紀》『帝舜命契曰：百姓不親，五品不馴。』《後漢書》又作訓。《萬石君傳》『馴行孝謹』，亦作訓。《易·坤》初六《象》曰『馴致其道』，鄭注云：『訓，從也。』徐爰音

訓，依鄭義。」云「謂以遠方土地所生異物告道王也」者，本職云「道地懸以辨地物，而原其生以詔地求」，即其事也。引《爾雅》云「訓，道也」者，《釋詁》文。此引證訓有告道義。云「玄謂能訓說土地善惡之勢」者，本職云「掌道地圖」，注云：「道，說也。說地圖九州形勢，山川所宜。」後鄭釋訓為說，與先鄭訓道略同；以先鄭唯據辨地物為說，義未咳，故增成之。《毛詩·邶風·定之方中》傳，說大夫九能，云「山川能說」。孔疏引《鄭志》荅張逸云：「或云說者，說其形勢；或云述者，述其古事。」惠士奇謂訓說兼彼二義是也。此官所職者，說其形勢；下誦訓所職者，述其古事也。

誦訓，中士二人，下士四人，史二人，徒

八人。能訓說四方所誦習及人所作為久時事。【疏】注云「能訓說四方所誦習」者，亦釋訓為說也。賈疏云：「其職云『掌道方志』，謂所識四方久遠之事，是其能訓說四方所誦習者也。」惠士奇云：「誦者，為王誦之。《韓非子·難言》云：『時稱《詩》、《書》，道法往古，則見以為誦。』《楚辭》有《惜誦》。」案：惠說是也。此官名誦訓者，謂誦述古言古事而說之也。云「及人所作為久時事」者，賈疏云：「案其職云『以知地俗』，鄭注云『博事也』。謂博知古事，是其人所作為久時事者也。」

山虞：每大山中士四人，下士八人，府二人，史四人，胥八人，徒八十人；中山下士六人，史二人，胥六人，徒六十人；小山下士二人，史一人，徒二十人。虞，度也，度知山之大小及所生者。【疏】「山虞」者，以下至澤虞四職，皆掌山林川澤之官，以有地守之事，故亦屬地官。山虞，澤虞經典通謂之虞人。《書·堯典》：「舜命益作朕虞。」《史記·五帝本紀·集解》引馬融《書注》云：「虞，掌山澤之官名。」是周亦沿唐、虞制也。《穀梁》莊二十八年「築微」傳云：「山林藪澤之利，所以與民共也，虞之非正也。」案：此經山林藪澤皆設官，但不禁民之取耳。《國語·晉語》說文王詢于八虞，韋注引賈逵、唐固云：「周八士皆在虞官。」是周文王時有虞官，不得謂非正法。《穀梁》說與經不合。山虞之屬亦謂之山人。《左》昭四年傳說獻冰，云「山人取之」，杜注云：「山人，虞官。」又《曲禮》說天子六府，二曰司木，鄭彼注以為殷制，司木於周為山虞。注云「虞，度也」者，《爾雅·釋言》文。云「度知山之大小及所生者」者，大小據高卑遠近言之，所生即下迹人、廿人諸官所掌者是也。《漢書·百官公卿表》顏注云：「虞，度也。主商度山川之事。」

亦通。賈疏云：「經文有中山，鄭唯言大小者，略言之耳。」

林衡：每大林麓下士十有一人，史四人，胥十有二人，徒百有二十人；中林麓如中山之虞；小林麓如小山之虞。衡，平也。平

林麓之大小及所生者。竹木生平地曰林，山足曰麓。

【疏】「林衡」者，《國語·齊語》云「山立三衡」，韋注云：

「《周禮》有山虞、林衡之官。」案：彼蓋兼山林官言之。三

衡者，山與林麓各有大中小三等，亦通謂之虞。故《喪大

記》云：「復有林麓，則虞人設階。」《易·屯》六三《爻辭》

云：「即鹿無虞，惟人于林中。」鹿麓字通，彼虞即謂林衡

也。山林地相比，故虞衡通稱。亦通謂之麓。《說文·林

部》云：「麓，守山林吏也。」《國語·晉語》云：「主將適虢

而麓不聞。」《左》昭二十年傳云：「山林之木，衡鹿守之。」

是也。云「每大林麓下士十有二人」者，《釋文》云：「麓，本

亦作𡵓。」案：《說文·林部》：「麓，重文𡵓，云「古文从录」。

賈疏云：「案上山虞中士四人，下士八人，相併亦十二人。

但山虞尊，使中士爲官首，下士爲之佐；此林衡卑，故下士

自爲官首。」云「胥十有二人，徒百有二十人」者，賈疏云：

「胥徒多於山虞者，以其林麓在平地，盜竊林木者多，故須

巡行者衆，以是胥徒特多也。」云「中林麓如中山之虞，小林麓如小山之虞」者，賈疏云：「胥徒不多者，以其大林麓據特大者，故胥徒特多，中小已下自如尋常法，故如山虞。」

注云「衡，平也」者，《漢書·律厯志》文。《梓人》注同。

《荀子·禮論篇》云：「衡者，平之至也。」云「平林麓之大小

及所生者」者，亦如前山虞度山之大小及所生也。《國語·

齊語》韋注云「掌平其政」，亦通。云「竹木生平地曰林」者，

《大司徒》及《職方氏》注義同。《說文·林部》云：「平土有

叢木曰林。」《詩·小雅·車輦》、《大雅·生民》並云「平

林」，毛傳云：「平林，林木之在平地者也。」此明林衡所掌

兼有平林也。《風俗通義·祀典篇》云：「《禮記》『將至泰

山，必先有事於配林。』林，樹木之所聚生也。」又《毛詩·邶

風·擊鼓》傳云：「山木曰林。」《釋名·釋山》云：「山中叢

木曰林。林，森也，森森然也。」與此義別。賈疏云：「對山

中之林，自是山虞掌，此別言林衡，故知竹木生平地者。」云

「山足曰麓」者，《柞氏》注同。此亦謂山足生竹木者也。

《說文·林部》云：「一曰：林屬於山爲麓。」《釋名·釋山》

云：「山足曰麓。麓，陸也，言水流順陸燥也。」《風俗通

義·山澤篇》云：「謹按：《尚書》堯禪舜，『納于大麓』。

麓，林屬於山者也。《春秋》『沙麓崩』，傳曰：『麓者，山足

也。〔案：《穀梁》僖十四年「沙鹿崩」，傳云：「林屬於山爲鹿。沙，山名也。」應義本於彼。沙鹿蓋即麓之大者。

川衡：每大川下士十有二人，史四人，胥十有二人，徒百有二十人；中川下士六人，史二人，胥六人，徒六十人；小川下士二人，史一人，徒二十人。川，流水也。《禹貢》曰：

「九川滌源。」【疏】「川衡」者，《曲禮》說天子六府，三曰司水。鄭彼注以爲殷制，司水於周爲川衡。川衡亦曰水虞，

詳本職疏。賈疏云：「川衡者，平知川之遠近、寬狹及物之所出。」云「胥十有二人，徒百有二十人」者，賈疏云：「官及胥多者，以其川路長遠，巡行勞役故也。中川小川之等自若常法，故差少。」云「中川下士六人」者，唐石經跳行，誤。

注云「川，流水也」者，《說文·川部》云：「川，貫穿通流水也。」《管子·度地篇》云：「水之出於他水，溝流於大水及海者，命曰川水。」《釋名·釋水》云：「川，穿也，穿地而流也。」賈疏云：「對澤爲停水。」引《禹貢》曰「九川滌源」者，僞孔傳云：「九州之川，已滌除泉源無壅塞。」引以證川爲流水也。

澤虞：每大澤大藪中士四人，下士八

人，府二人，史四人，胥八人，徒八十人；中澤中藪如中川之衡；小澤小藪如小川之衡。

澤，水所鍾也。水希曰藪。《禹貢》曰：「九澤既陂。」《爾雅》有八藪。【疏】「澤虞，每大澤大藪中士四人」者，《國語·齊語》云：「澤立三虞。」韋注云：「《周禮》有澤虞之官。虞，度也。掌度知川澤之大小及所生育者。」案：彼蓋

兼川澤官言之。三虞者，川與澤藪皆有大中小三等也。韋注亦與鄭前注義同。《文選·魏都賦》張載注引《魯詩傳》云：「古有梁騶。梁騶者，天子獵之田也。」《賈子新書·禮篇》云：「騶者，天子之囿也。虞者，囿之司獸者也。」《鍾師》賈疏引《五經異義》：「今《詩》韓、魯說，騶虞，天子掌鳥獸官。」案：《賈子》及《韓》、《魯詩》說，蓋以騶爲榘之段字。榘與藪通，騶虞即藪澤之虞也。《職方氏》：豫州「澤藪曰圃田」。《穆天子傳》云：「天子里圃田之路十虞，東虞曰兔臺，西虞曰櫟丘，南虞曰富丘，北虞曰相其。」此西周畿內大澤藪之虞也。《左》昭二十年傳：「晏子曰：澤之萑蒲，舟

鮫守之；藪之薪蒸，虞候守之。」莊述祖云：「《左傳》『舟鮫』，鮫當爲舠之譌。《呂氏春秋·上農篇》：『澤非舟虞，不敢緣名。』舟虞即舟舠也。」案：莊說是也。彼舟虞有地

守，疑卽此澤虞。但彼澤藪官名不同，蓋齊制，與此經異。賈疏云：「中士尊於川衡者，以其澤之所出物衆多。」云「胥八人，徒八十人」者，賈疏云：「胥徒少者，以其巡行處近故也。中澤小澤已下皆如川衡者，自是常法。」注云「澤，

水所鍾也」者，《大司徒》注義同。賈疏云：「鍾，聚也。謂聚水於其中，更無所注入。案《周語》：『大子晉云，山土之聚，澤水之鍾。』《纂要》亦云：『水所鍾曰澤。』」詒讓案：此對川爲流水也。《釋名·釋地》云：「下而有水曰澤，言潤澤也。」《風俗通義·山澤篇》云：「水草交厝名之爲澤，澤者言其潤澤萬物以阜民用也。」云「水希曰藪」者，《說文·日部》云：「晞，乾也。」希卽晞之段字。晞則無水，故《大宰》注云「澤無水曰藪也」。《風俗通義·山澤篇》云：「謹案：《爾雅》『藪者，澤也』。藪之爲言厚也，草木魚鼈，所以厚養人君與百姓也。」賈疏云：「案《鄭詩》云：『叔在藪，火烈具舉。』舉藪中田獵，明知無水。又案《爾雅》，藪在《釋地》之篇，不入《釋水》，故知水希曰藪。以其藪與澤，以有水無水爲異，故於經別立官掌之。案：《職方》『澤藪曰具區』之類，及毛傳云藪澤皆同爲一者，以其有水則爲澤，無水則爲藪，元是一物，故同解之。」引《禹貢》曰「九澤既陂」者，僞孔傳云：「九州之澤，已陂障，無決溢矣。」引之者，證

九州各有澤也。又引《爾雅》有八藪者，《釋地》十藪云：「魯有大野，晉有大陸，秦有楊陁，宋有孟諸，楚有雲夢，吳越之間有具區，齊有海隅，燕有昭余祁，鄭有圃田，周有焦護。」此引作八藪，未知其說。《大司徒》疏引鄭《禹貢》大陸注，亦有《爾雅》有八藪之文，疑鄭所見《釋地》本如是。郭本作十藪，乃據別本增定，非其舊也。賈疏謂「九澤，通畿內一州則有九；八藪，除畿內一州而言；《爾雅》有十者，以其周秦同在雍州，秦有楊紆，周有焦護，一州有二，故十」。其說殊迂曲，恐不足據。

迹人，中士四人，下士八人，史二人，徒四十人。迹之言跡，知禽獸處。【疏】「迹人」者，自此至掌蜃九職，並掌山澤所生物之官。《大宰》九職云「三曰虞衡，作山澤之材；四曰藪牧，養蕃鳥獸」。故各設官以取之，而次虞衡之後。注云「迹之言跡，知禽獸處」者，

《說文·辵部》云：「迹，步處也。」《漢書·季布傳》顏注云：「迹謂尋其蹤迹也。」此迹人亦掌蹤迹禽獸，知其所藏之處。跡與迹同。《左》哀十四年傳：①「迹人來告曰：逢

①「哀」，原訛「襄」，據楚本改。

澤有介麋焉。」杜注云：「主迹禽獸者。」亦同鄭義。

卅人，中士二人，下士四人，府二人，史二人，胥四人，徒四十人。卅之言礦也。金玉未成器曰礦。【疏】「卅人」者，《曲禮》說天子六府，六曰司貨。鄭彼注以爲殷制，司貨於周爲卅人。 注云「卅之言礦也」者，賈疏云：「經所云卅，是摠角之卅字。此官取金玉，於卅字無所用，故轉從石邊廣，以其金玉出於石，左形右聲，從礦字也。」王聘珍云：「《說文·石部》礦字注云：『銅鐵樸石也。从石黃聲，讀若礦。重文作卅。』」注云「古文礦，《周禮》有卅人」。是卅爲礦之古文，本爲卅人之卅，復爲總角之卅。賈疏說非是。」案：王說是也。礦卽礦之俗。依鄭說，則卅與礦聲近字異；依《說文》，則卅卽礦之古文。鄭、許說字不必盡同。賈氏於小學尤疏，未足馮也。張參《五經文字》云：「卅，《說文》以爲古卯字。」與今本《說文》不合，恐不足據。云「金玉未成器曰礦」者，與《說文》礦訓銅鐵樸石同。《廣雅·釋器》云：「鐵朴謂之礦。」未成器卽所謂樸也。

角人，下士二人，府一人，徒八人。【疏】

「角人」者，《說文·角部》云：「角，獸角也。」此官與羽人皆

無史者，以無文書之事，不用史也。《曲禮》說天子六府，五曰司器。鄭彼注以爲殷制，司器於周爲角人。

羽人，下士二人，府一人，徒八人。

掌葛，下士二人，府一人，史一人，胥二人，徒二十人。【疏】「掌葛」者，《說文·艸部》云：「葛，絺綌艸也。」

掌染草，下士二人，府一人，史二人，徒八人。染草，藍、蒨、象斗之屬。【疏】「掌染草」者，凡染

有石染，有草染，此官掌斂染色之草木，以共草染。《論語·鄉黨》皇疏引鄭《論語注》有木染，乃誤文，不足據。詳《鍾氏》疏。 注云「染草，藍、蒨、象斗之屬」者，《說文·艸部》云：「藍，染青草也。」《爾雅·釋草》云：「葢，馬藍。」

郭注云：「今大葉冬藍也。」《月令》：「仲夏，毋艾藍以染。」《爾雅》又云：「茹蘆，茅蒐。」郭注云：「今之蒨也，可以染絳。」《說文》云：「茜，茅蒐也。茅蒐、茹蘆，人血所生，可以染絳。」《詩·鄭風·東門之墀》孔疏引陸璣疏云：「茹蘆、茅蒐，蒨艸也。一名地血。齊人謂之茜，徐州人謂之牛蔓。」案：《說文》無蒨字，蓋卽茜之俗。《說文》又云：「草，草斗，櫟實也。一曰象斗子。」又《木部》云：「栩，柔也，其

阜一曰樣。樣，棚實也。」案：象斗即草斗，俗作阜斗。象正字當作樣，與象音同，故亦謂之象斗。《釋文》云：「象本又作橡。」橡即樣之俗。《詩·唐風·鶉羽》孔疏引陸疏云：「徐州人謂櫟爲杼，或謂之棚。其子爲阜，或言阜斗。其殼爲汁，可以染阜。今京洛及河內多言杼斗。」或言橡斗是也。此象斗爲木，通言之亦爲染草，互詳《大司徒疏》。賈疏云：「藍以染青，蒨以染赤，象斗染黑。案其職注云：『染草，茅蒐、橐蘆、豕首、紫葍之屬。』」二注不同者，染草既多，言不可盡，故互見略言耳。」

掌炭，下士二人，史二人，徒二十人。

【疏】「掌炭」者，《說文·火部》云：「炭，燒木未灰也。」炭出於木，故掌炭與諸徵斂草木之官同列於此。

掌荼，下士二人，府一人，史一人，徒二十人。

荼，茅莠。【疏】注云「荼，茅莠」者，本職注同。

《既夕禮》注、《詩·鄭風·出其東門》箋並云「荼，茅莠」。此莠即秀之借字。《爾雅·釋草》云：「不榮而實者謂之秀。」案：茅無實而曰秀者，謂其華采，《鄭風》孔疏以荼爲茅草秀出之穗是也。《說文·禾部》釋采爲禾成秀，即其義。《論語·子罕篇》云：「秀而不實者有矣夫。」《國語·

周語》韋注云：「榮而不實曰秀。」明秀不必皆有實也。《大觀本草》引蘇頌《圖經》云：「茅，夏生白花茸茸然。」即鄭所謂茅秀也。《釋草》別有荼，苦菜，與此異。又《大戴禮記·夏小正》亦有二荼，四月云：「取荼。荼也者，以爲君薦蔣也。」此即茅秀之荼。又七月云：「灌荼。荼，萑葦之莠也，爲蔣楮之也。」此爲萑葦之荼。據彼文，則君尊宜用茅秀之荼，故鄭《詩》、《禮》注並云茅秀，不及萑葦之荼也。

掌蜃，下士二人，府一人，史一人，徒八人。蜃，大蛤。《月令》：「孟冬，雉人大水爲蜃。」【疏】

「掌蜃」者，《左·昭二十年傳》，說齊制云「澤之鹽蜃，祈望守之」。疑即此官。注云「蜃，大蛤」者，《鼈人》注同。引

《月令》「孟冬，雉人大水爲蜃」者，證蜃爲大蛤。鄭彼注云：「大水，淮也。」

囿人，中士四人，下士八人，府二人，胥八人，徒八十人。囿，今之苑。【疏】「囿人」者，掌囿

游之官。亦有地守之事，故亦屬地官。囿游之門，別有閭人掌之，已見《天官》，故此略之。注云「囿，今之苑」

者，《天官·敘官》「囿游」注云：「囿，御苑也。」此明古之囿，即漢之苑。《漢舊儀》云：「上林苑中，廣長三百里，養

百獸。」《三輔黃圖》載，漢長安有上林苑、甘泉苑、御宿苑、思賢苑、博望苑、西郊苑、樂遊苑、宜春下苑。又引《漢儀注》云：「養鳥獸者通名爲苑，與古囿養鳥獸同。」囿制，詳《天官·敘官》疏。

場人，每場下士二人，府一人，史一人，

徒二十人。場，築地爲墀。季秋除圃中爲之。《詩》

云：「九月築場圃，十月納禾稼。」【疏】「場人」者，掌園地之官也。《載師》云「以場圃任園地」，非燕囿則謂之園，故冢囿人而次之。云「每場下士二人」者，場圃亦各有區畝，其步畝之數，經注無文。賈疏云：「以其九穀別場，故言每以殊之。」案：此場即園地，專種蔬果，與農田治穀之場別，本職亦無治穀之事。賈謂九穀別場，不足據。《孟子·告子篇》云：「今有場師，舍其梧櫨，養其槭棘，則爲賤場師焉。」趙注云：「場師，治場圃者。場以治穀。圃，園也。」案：場師亦即場人之長，場地兼樹材木，故有梧櫨也。趙誤亦與賈同。 注云「場，築地爲墀」者，《說文·土部》

云：「場，一曰田不耕，一曰治穀田也。墀，野土也。」《華嚴經音義》引《漢書音義》云：「除地平坦曰場。」《祭法》注云：「除地曰墀。」《毛詩·鄭風·東門之墀》傳云：「墀，除

田町町者。」《獨斷》云：「墀謂築土而無屋者也。」是場墀並築地之名。賈疏謂除地曰墀，築堅始得爲場，非也。云「季秋除圃中爲之」者，賈疏云：「以其春夏爲圃以種菜蔬，至季秋始爲場。」引《詩》云「九月築場圃，十月納禾稼」者，《豳風·七月篇》文。毛傳云：「春夏爲圃，秋冬爲場。」鄭彼箋云：「場圃同地。自物生之時，耕治之以種菜茹；至物盡成熟，築堅以爲場。納，內也，治於場而內之困倉也。」方苞云：「本職曰『國之場圃』，則爲載師所任，而非農家之場圃可知。注疏並誤。」案：方說是也。鄭以此場即農民納禾稼之場圃，故引《詩》以證其義。實則此場圃爲種蔬菜麻枲果木之專地，種時則爲圃，收刈之後則爲場，與《七月》詩所說農家場圃於所受廩地爲之者異。此場不必共納禾稼之用也。場亦通作唐，《呂氏春秋·尊師篇》云：「治唐圃，疾灌浸，務種樹，織葩屨，結置網，捆蒲葦。」唐圃即場圃也。《晏子春秋·問下篇》亦云「治唐園，考菲屨」。據二書之文，則場圃不種禾稼審矣。互詳《載師》疏。

廩人，下大夫二人，上士四人，中士八人，下士十有六人，府八人，史十有六人，胥三十人，徒三百人。藏米曰廩。廩人，舍人、倉人、

司祿官之長。【疏】「廩人」者，自此至稟人八官，並掌出斂米穀禾稼之事，故亦屬地官。云「徒三百人」者，賈疏云：

「此官使下大夫爲官首，徒三百人又多者，以其米廩事重，出納又多故也。」注云「藏米曰廩」者，《釋文》出「盛

米」，云「音成」，則陸本藏米作盛米，義亦通。《說文·廩部》云：「廩，穀所振人也。宗廟粢盛倉黃而取之，故謂之廩。重文廩，或从广从禾。」《漢書·五行志》云：「劉向以爲御廩，夫人八妾所舂米之藏，以奉宗廟者也。」《釋名·釋

宮室》云：「廩，矜也，寶物可矜惜者投之於其中也。」《文

選·藉田賦》李注引《月令章句》云：「穀藏曰倉，米藏曰廩。」與鄭義同。賈疏云：「對倉人藏穀曰倉。」又本職疏

云：「廩法有數名。《春秋》桓十四年八月，御廩災。天子

亦有御廩。單云廩，則平常藏米之廩。此不言御廩，則廩中可以兼之矣。《明堂位》魯有米廩，有虞氏之學，以有虞

氏尚孝，合藏粢盛之委，故名學爲米廩，非廩稱也。《詩》云

「亦有高廩」，又云「萬億及秭」。注云：「廩所以藏粢盛之

穗。」以其萬億及秭數多，非藏米之數，故以藏穗言之，與常

廩御廩又異。《論語》：「廩與倉對文則異，散文亦通。」《廣

雅·釋宮》云：「廩，倉也。」《國語·周語》韋注云：「廩，御

廩。一名神倉。」是廩倉通名。云「廩人，舍人、倉人、司祿

官之長」者，賈疏云：「以其舍人已下同掌米穀之事，皆以士爲之，故廩人下大夫與之爲長。」

舍人，上士二人，中士四人，府二人，史

四人，胥四人，徒四十人。舍猶官也，主平宮中用

穀者也。【疏】注云「舍猶官也」者，《說文·人部》云：「市

居曰舍。」引申之，凡人所居之宮，通謂之舍。云「主平宮中

用穀者也」者，賈疏云：「案其職云『掌平宮中之政』，故就

職內主平宮中用穀解之。」

倉人，中士四人，下士八人，府二人，史

四人，胥四人，徒四十人。【疏】「倉人」者，《說

文·倉部》云：「倉，穀藏也。倉黃取而藏之，故謂之倉。」

《釋名·釋宮室》云：「倉，藏也，藏穀物也。」《呂氏春秋·

仲秋紀》高注云：「圓曰困，方曰倉。」案本職云「掌粟人之

藏」，與許云「穀藏」義合。

司祿，中士四人，下士八人，府二人，史

四人，徒四十人。主班祿。【疏】「司祿」者，此職亡。

《孟子·萬章篇》：「北宮錡問曰：『周室班爵祿也如之

何？』孟子曰：『其詳不可得聞也。諸侯惡其害己也，而皆

去其籍。』趙注云：「諸侯欲恣行，憎惡其法度妨害己之所

爲，故減去典籍。今《周禮》司祿之官無其職，是則諸侯皆去之，故使不復存也。」案：據趙說，則《司祿職》亡在秦火以前，理或然也。江永云：「《司祿職》雖闕，觀其序於廩人、倉人、舍人之後，司稼之前，皆爲穀米之類，其爲頒穀祿於羣臣可知矣。諸官之授田食邑者，三公、六卿、王子母弟及諸卿之大夫、元士也。其餘散官不得有田，宜以廩人、倉人之粟給之，所謂匪頒之式也。校人等馭夫之祿，是其一隅。又案：《司士》以德詔爵，以功詔祿，以能詔事，以久奠食」。《內史》「王制祿則贊爲之，以方出之」。此授田祿者也。若食則司祿給之，當不關內史。分言之祿與食異，通言之食亦祿也，故官名司祿。食亦謂之秩，《宮伯》「月終則均秩」，《月令》「收祿秩之不當」是也。莊公十九年，惠王奪子禽，祝跪與詹父田，而收膳夫石速之秩，此散官無田有秩之證也。」案：江說是也。凡周制有世祿采地，有祿田，有祿粟，有稍食。對文祿與食異，散文則食亦通稱祿，此官蓋通掌之矣。互詳《宮正》、《內史》、《司士》疏。 注云

「主班祿」者，賈疏云：「其職既闕，未知所掌云何。但班祿者，用粟與之。司祿職次倉人，明是班多少之官，故鄭云主班祿，故與倉人連類在此。」易拔云：「《天府》曰：『若祭天之司民、司祿，而獻民數穀數，則受而藏之。』鄭謂司祿爲文

昌第六星，祿之言穀也。則以掌天下之穀數謂之司祿，亦猶掌天下之民數而秋官有司民之職。及三年大比，則以萬民之數詔司寇。及孟冬祀司民之日，獻民數於王，王拜受之。且有天府之登，知司祿之於穀數亦然。」俞樾亦云：「祿與穀古通稱，祿謂之穀，穀亦謂之祿。此司祿乃主穀數者，祀司祿之日而獻穀數，亦卽此官獻之。」案：易、俞謂司祿掌穀數是也。然掌穀數亦得兼掌班祿，以祿卽出於穀也。

司稼，下士八人，史四人，徒四十人。種

穀曰稼，如嫁女以有所生。【疏】「司稼」者，賈疏云：「在此者，其職云『巡野觀稼出斂法』，亦是徵斂地事，故連類在此。」 注云「種穀曰稼」者，《毛詩·魏風·伐檀》傳云：「種之曰稼，斂之曰穡。」案：此對文別也，散文則斂亦爲稼，詳本職疏。云「如嫁女以有所生」者，稼嫁聲類同。《稻人》「掌稼下地」，注云：「謂之稼者，有似嫁女相生。」《論語》皇疏云：「稼猶嫁也，言種穀欲其滋長田苗，如人嫁娶生於子孫也。」

春人，奄二人，女春抗二人，奚五人。女春抗，女奴能春與抗者。抗，抒臼也。《詩》云：「或春或

抗。【疏】「春人奄二人」者，《說文·白部》云：「春，擣粟也。古者雖父初作春。」賈疏云：「有奄者，以其與女奴同處故也。在此者，與倉人、廩人、饔人連事，故亦連類在此。」注云「女春抗，女奴能春與抗者」者，《司厲》其奴男子入于罪隸，女子入于春稟。鄭司農云：「謂坐爲盜賊而爲奴者，輪於罪隸，春人、稟人之官也。」此女春抗，即謂女子當爲奴，其能春抗者即入此職，上者爲女奴，下者爲奚。其不能春抗者，別人稟人矣。《墨子·天志下篇》云：「婦人以爲春酋。」春酋即此春抗也。云「抗，抒臼也」者，《說文·白部》云：「臼，抒臼也。《詩》曰：『或簸或臼。』」重文抗，臼或从手从宀。此用或體。石經从宀作抗，誤。段玉裁云：「抒，挹也。既春之，乃於臼中挹出之。」引《詩》云「或春或抗」者，《詩·大雅·生民篇》文。抗，《毛詩》作掄，《說文》作臼，《有司徹》注引《詩》亦作抗，與此注同。《毛傳》云：「掄，抒臼也。」掄即抗之借字。段玉裁云：「鄭君注《禮》多用《韓詩》，然則《韓詩》作抗也。」

饔人，奄二人，女饔八人，奚四十人。鄭

司農云：「饔人，主炊官也。」《特牲饋食禮》曰：「主婦視饔饔。」故書饔作饔。【疏】「饔人」者，賈疏云：「在此者，其職云：『凡祭祀，共盛，共王及后之六食。凡賓客，共其簠

簋。』不在天官而在此者，以其因春人，又因地道之成，故在此。」注鄭司農云「饔人，主炊官也」者，《特牲饋食記》

鄭注云：「饔，炊也。」《方言》云：「糒，熟也。自河以北，趙魏之間，氣熟曰糒。」故主炊之官名饔人也。胡匡衷云：

「《左》成十年傳：『晉侯欲麥，使甸人獻麥，饋人爲之。』疑即饔人之官，諸侯與天子異名也。」引《特牲饋食禮》曰「主婦視饔饔」者，證饔有炊義。彼注云：「炊黍稷曰饔。饔，竈也。」義與先鄭同。云「故書饔作饔」者，《說文·食部》

云：「饔，酒食也。《詩》曰『可以饔饔』。重文饔，饔或从配。糒，饔或从米。」段玉裁云：「《說文》饔或从配作饔，疑今《周禮》配下譌多火也。《特牲饋食禮》注曰：『古文饔作糒，《周禮》作饔。』」徐養原云：「饔饔乃一字也。鄭疊故書，祇疊異字，不疊重文，此其變例。」鄭注《特牲》云「饔，《周禮》作饔」，明他經無饔字。此注云「故書饔作饔」，而無所

說，於後經則竟作饔人，是今故書皆同也。饔之爲饔，已無可疑，故不曰饔當作饔。

稟人，奄八人，女稟，每奄二人，奚五

人。鄭司農云：「稟讀爲犒師之犒。主宐食者，故謂之犒。」【疏】「稟人」者，稟從禾高聲，即稟之借字，女稟同。

宋本、岳本及宋注疏本、閩本、盧本《釋文》並作稟，葉鈔《釋文》及宋本載音義又作槁，皆非鄭本之舊。今從唐石經、宋婺州本、嘉靖本。孫經世云：「經稟字即《小行人》故書稟字，本皆从禾不从木。《釋文》凡从木之稟，例苦老反；从禾之稟，例古老反。《小行人》故書稟字，《釋文》反古老，不反苦老，則从木者非。《地官·序官》，唐石經、嘉靖本字亦从禾，與《小行人釋文》形聲適相應。从禾之稟，反古老，訓禾莖，亦訓矢幹；从木之稟，反苦老，訓枯槁，轉而反苦報，則訓槁勞，音義俱別。从禾音義於《地官》、《小行人》皆不合，故注依先鄭以古老反之稟，改讀苦報反之槁，而其一旦因以改故書之經。《地官·序官》與《小行人》經，或改或否，正如授之爲受，於《司書》、《大司徒》則改，於《典婦功》、《司儀》則皆未之改耳。」案：孫說是也。《說文·禾部》云：「稟，禾稗也。」其變體爲槁。《木部》云：「稟，木枯也。」其變體爲槁。經典凡言槁勞者，即木枯引申之義，字當從木，其有作從禾之稟者，則爲段字、誤字，此二字形義之別也。《釋文》發音之例，從木之稟有苦老、苦報二音，從禾之稟則止有古老一音，此二字音讀之別也。此經《稟人》、《女稟》及《牛人》「槁牛」、《司厲》「春稟」、《小行人》「槁檜」訓義並同，其字皆當從木，音苦報反，而經本稟稟錯出

者，則以鄭本有改故書不改故書之二例也。此經兩稟字，石經並從禾，自是故書正本。先鄭因作稟義遠，且與《夏官·稟人》無別，本職又正作槁，故讀爲槁師之槁，槁即稟也。後鄭讀從先鄭，而正文則仍從故書作從禾之稟，以已著其說於注，則正文從故書無害也。此官故書作稟而注讀爲稟，《夏官·敍官·稟人》故書作稟而注讀爲稟，二注正相反，而其不改故書則同。至《小行人》「槁檜」字義與此同，故書亦作從禾之稟，則徑依先鄭讀，改經爲槁。鄭審定經字，或改或不，例本不一；至其爲注，則自有較然不捫之大例。其破字而不改正文者，則於注正其讀，而不云故書作某，以正文仍是故書，若此經是也。其破字而徑改正文者，則於注必云故書作某，而後讀爲某，以正文已改，則不得不先出故書而後著其改讀之說，若《小行人》注先出故書槁爲稟，而後引先鄭說破爲槁是也。此注既不云故書作稟，則正文未改爲槁明矣。其《槁人》本職及《牛人》「槁牛」、《司厲》「春稟」字，則故書本不誤，故二鄭並無說。彼此互校，此經兩稟字鄭本不作槁，殆無疑義。通志堂《釋文》出稟人，云「注音槁，同苦報反」。與唐石經正同。蓋稟本當音古老反，而注既改讀爲槁，則經字雖作稟，亦當從注讀苦報反也。《釋文》葉鈔作槁，盧校作稟，則字本不誤，先鄭改讀轉成冗贅。

若云後鄭所改，則注又不宜無故書作某之文。葉鈔原流雖古，此條殆不足據。全經中稟稟二字譌互甚多，故詳辯之。云「奄八人，女稟每奄二人，奚五人」者，女稟亦卽司厲之女奴，其能役稟人者，則入此職也。賈疏云：「案其職云『掌共外内朝宄食者之食』。所共處多，故有奄八人，又女稟每奄二人，奚五人也。」沈彤云：「女稟每奄二人，八奄則女稟十六人；每奄奚五人，則四十人。」詒讓案：右地官之屬，卿一人，中大夫五人，下大夫十五人，上士四十八人，中士百四十八人，下士三百二十人，府一百三人，史二百十九人，胥二百二人，徒二千六百二十八人，賈八人。鄉官：公三人，卿六人，中大夫三十人，下大夫百五十人，上士七百五十人，中士三千人，下士萬五千人。遂官：中大夫六人，下大夫三十人，上士百五十人，中士七百五十人，下士三千人，無爵者萬五千人。凡正官自卿至庶人，總四萬一千五百七十二人。又奄十二人，又奚八十五人，女奴二十六人，凡女庶人總百十一人。此外山虞：大山中士四人，下士八人，府二人，史四人，胥八人，徒八十人；中山下士六人，史二人，胥六人，徒六十人；小山下士二人，史一人，徒二十人。林衡：大林下士十二人，史四人，胥十二人，徒百二十人；中林下士六人，史二人，胥六人，徒六十人；小林下士

二人，史一人，徒二十人。川衡：大川下士十二人，史四人，胥十二人，徒百二十人；中川下士六人，史二人，胥六人，徒六十人；小川下士二人，史一人，徒二十人。澤虞：大澤大藪中士四人，下士八人，府二人，史四人，胥八人，徒八十人；中澤中藪下士六人，史二人，胥六人，徒六十人；小澤小藪下士二人，史一人，徒二十人。場人，下士每場二人，府一人，史一人，徒二十人。無爵者，胥師二十肆一人，史二人；賈師二十肆一人，史二人；司覲十肆一人，司稽五肆一人，胥二肆一人，肆長每肆一人；皆有員數，無總數，不可計。大凡可計者，總四萬一千六百九十五人。

注鄭司農云「稟讀爲犒師之犒」者，俗本稟作稟，非。犒並當作犒。《小行人》：「若國師役則令犒犢之」。注云：「故書犒爲稟。鄭司農云：稟當爲犒，謂犒師也。」犒師見《左》僖二十六年、三十三年傳。阮元云：「蓋經文作禾稟字，爲假借，故司農讀作枯犒也。《小行人》注與此正合。」惠士奇云：「稟人主宄食者，司農讀稟爲犒，蓋本《書序》·稟飫篇」。孔傳云：「稟，勞也。飫，賜也。」《左傳正義》引服虔云：「以師枯犒，故饋之飲食。」《小行人》稟犢，《大戴禮》·朝事儀亦作犒，古文也。兩傳皆作犒，似後人所改，而古無之，故《說文》不載。《公羊》莊四年何注曰：「牛酒曰犒，

加飯羹曰饗。」其文蓋起於漢歟？」嚴可均云：「《說文》無槁字，漢碑亦未有。《五經文字》：「槁，勞師也。見《春秋傳》。《周禮》借槁字爲之。」檢石經《槁人職》，正作槁字，槁與稟同。然張以爲槁，見《春秋傳》，亦但據所見本言之。《文選》謝靈運《述祖德詩》，李注引《漢書音誼》服虔曰：「以師枯槁，故餽之猶食。」^①勞苦謂之勞也。」是漢時槁師之槁正作槁。服虔《左傳》本亦正作槁，今皆作槁者，轉寫譌耳。」孫經世云：「《小行人》故書之稟，先鄭曰當爲槁。此注先鄭曰讀爲槁師之槁。『讀爲』與『當爲』，注例不分爲二。立之爲泣，先鄭於《鄉師》則云『讀爲』，於《司市》則云『當爲』。莫之爲定，杜氏於《司市》則云『當爲』，於《小史》則云『讀爲』，其歸一耳。」案：阮、惠、嚴、孫說是也。此經作從禾之稟，先鄭讀爲從木之槁，卽以正字讀段字之例。古槁師字亦本作槁。《淮南子·汜論訓》高注云：「酒肉曰餽，牛羊曰槁，共枯槁也。」與服義正同。今本此注及《左傳》並譌槁，非也。云「主亢食者故謂之槁」者，槁亦當作槁。據本職云：「掌其內外朝亢食者之食。」因其無事而給食，同於槁勞，故以名官。賈疏云：「以在朝之人不得歸家，亦枯槁，以須槁勞之，故名其官爲槁人，亦同廩人連類在此。」

① 「猶」，楚本作「酒」。

周禮正義卷十八

大司徒之職，掌建邦之土地之圖與其

人民之數，以佐王安擾邦國。土地之圖，若今司

空郡國輿地圖。【疏】「掌建邦之土地之圖與其人民之數」

者，總掌天下版圖之法，與司會、司書、職方氏、司民爲官聯也。土地之圖，圖也。人民之數，版也。建者，謂修而立

之。《續漢書·郡國志》劉注引《帝王世紀》云：「周公相成

王，致治刑錯，民口千三百七十一萬四千九百二十三人。」

此周初人民之大數也。云「以佐王安擾邦國」者，安擾義與

《敍官》同。注云「土地之圖，若今司空郡國輿地圖」

者，王應麟云：「《史記》：武帝元狩六年，御史大夫奏輿地

圖，請所立國名，立齊、燕、廣陵三王。《後漢書》：建武十

五年，封皇子，大司空上輿地圖，馬援曰「前披輿地圖，見天

下郡國百有六所」。《史記正義》：「天爲蓋，地爲輿，故云

輿地圖。」孔廣森云：「《漢書·匡衡傳》有初元元年郡國

《補三王世家》曰「御史奏輿地圖」。漢初，地圖藏御史大夫

府。元壽二年定三公官，以御史大夫爲司空，故更名司空

郡國輿地圖矣。」以天下土地之圖，周知九州之

地域、廣輪之數，辨其山、林、川、澤、丘、陵、

墳、衍、原、隰之名物。周猶徧也。九州，揚、荆、豫、

青、兗、雍、幽、冀、并也。輪，從也。積石曰山，竹木曰林，

注瀆曰川，水鍾曰澤，土高曰丘，大阜曰陵，水崖曰墳，下平

曰衍，高平曰原，下濕曰隰。名物者，十等之名與所生之

物。【疏】辨其山林川澤丘陵墳衍原隰之名物」者，《釋

文》云：「原，本又作遼。」阮元云：「《周禮》原隰字，多作

遼。此當本作古字，因注作原而改。」案：阮說是也。遼、

原古今字，經例用古字當作「遼」，注例用今字當作「原」，遼

師、遼隰，字正作遼。今本此職誤以注改經作原，《夏官·

敍官》則又以經改注作遼，二者交失之矣。此十等名物，即

山師、川師、遼師所掌，此官則執其總而辨之，以著於圖籍

也。《周書·程典篇》云：「慎地必爲之圖，以舉其物，物其

善惡，度其高下，利其陂溝，愛其農時，脩其等列，務其土

實，差其施賦。」即此知九州地域辨十等名物之事。注

云「周猶徧也」者，《司會》注同。云「九州揚、荆、豫、青、兗、

雍、幽、冀、并也」者，據《職方氏》文。云「輪，從也」者，《既

夕記：「掘坎，南順，廣尺，輪二尺。」鄭彼注同。賈疏引馬融云：「東西爲廣，南北爲輪。」《一切經音義》引《韓詩》云：「南北曰從，東西曰橫。」孔廣森云：「《越語》：『廣運百里』，韋注：『東西爲廣，南北爲運。』案：地以南北爲從，則輪之義猶運也。運聲又近隕，《毛詩》：『幅隕既長』，傳曰：『幅，廣也。隕，均也。』彼均字當讀作運。」案：孔說是也。《山海經·西山經》：「廣員百里」。輪、運、隕、員、均，聲並相近。云「積石曰山」者，對下丘爲純土也。《說文·山部》云：「山，宣也。宣氣散生萬物，有石而高。」云「竹木曰林」者，《序官·林衡》注云：「竹木生平地曰林。」云「注瀆曰川」者，賈疏云：「案《釋水》云：『注川曰谿，注谿曰谷，注谷曰溝，注溝曰澮，注澮曰瀆。』彼注云『皆以小注大，大小異名』。言注澮曰瀆者，謂以澮中水注入瀆中，使有所去。此云注瀆曰川者，《爾雅》無此言，鄭以義增之耳，謂以瀆中水注入川。案《職方》，九州皆直川，故知從瀆入川。此瀆與四瀆義異。四瀆則亦川，故《職方》云其川三江，其川江漢也。」案：賈說非也。《說文·川部》云：「川，貫穿通流水也。」《虞書》：「濬くく距川」。言深くく之水，會爲川也。」《廣韻·二仙》引《月令章句》云：「受衆流注海曰川。」案：此云注瀆曰川者，鄭意此川謂大川，與《匠人》所云「兩

山之閒必有川」者同，注瀆即謂注四瀆。蓋川水流注入瀆，瀆又獨行注海也。與《釋水》注澮之瀆異。賈引彼爲釋，誤。云「水鍾曰澤」者，《序官》注義同。云「土高曰丘」者，《爾雅·釋丘》云：「絕高謂之京，非人爲之丘。」《說文·北部》云：「北，土之高也，非人所爲也。一曰四方高中央下爲北。」《廣雅·釋丘》云：「小陵曰丘。」故此經以對大阜之陵也。云「大阜曰陵」者，《爾雅·釋地》云：「高平曰陸，大陸曰阜，大阜曰陵。」《說文·阜部》云：「陵，大阜也。」《釋名·釋山》云：「土山曰阜，大阜曰陵。陵，隆也，體隆高也。」云「水崖曰墳」者，《說文·土部》云：「墳，墓也。」《水部》云「瀆，水崖也」，引《詩》曰「敦彼淮瀆」。《尸部》云：「崖，高邊也。」此墳即瀆之借字，謂水邊崖岸高起者也。《廣雅·釋丘》云：「墳，厓也。」厓，宋本作涯。《詩·召南·汝墳》孔疏引作厓。崖、厓、涯音義並略同。云「下平曰衍」者，《釋名·釋地》云：「下平曰衍，言漫衍也。」《小爾雅·廣器》云：「澤之廣，謂之衍。」《左·襄二十五年傳》「井衍沃」，杜注云：「衍沃，平美之地。」孔疏引賈逵云：「下平曰衍，有溉曰沃。」義並與鄭同。《左·僖二十九年傳》「昌衍」，哀七年傳有「鄩衍」，《史記·封禪書》秦有「鄩衍」，並卽此。《左傳疏》云「衍地高於原」，又云「衍是高平而美者，

沃是下平而美者」。則與鄭、賈、劉諸說並不合，不可從。云「高平曰原」者，《毛詩·小雅·皇皇者華》傳文。《說文·辵部》云：「遶，高平之野，人所登，從辵，各，录。闕。」又《蟲部》云：「蠡，水泉本也。重文原，篆文从泉。」案：原即遶之借字。《小爾雅·廣器》云：「高平謂之太原。」《水經·汾水注》引《書大傳》云：「大而高平者謂之太原。」又引《春秋說題辭》云：「高平曰太原。原，端也，平而有度。」賈疏云：「案《爾雅》云『廣平曰原，高平曰陸』。不云高平曰原。此言高平曰原者，對下濕曰隰而言。其實高平即廣平者也。《爾雅》高平曰陸者，據山傍平者，故下云可食者曰原也。」詒讓案：此注云高平曰原者，別於下平曰衍也。《公羊》昭元年傳云「上平曰原」。義亦同。蓋高地之廣平者謂之原，下地之廣平者謂之衍。通釋曰廣平，則無以見其為高地，故殊異之曰高平，明與衍別也。《夏官·敍官·遶師》注云：「原，地之廣平者。」彼不以墳衍原隰對文，故直用《釋地》為訓矣。云「下濕曰隰」者，濕，明監本及毛晉本並作「溼」。案《說文·自部》云：「隰，阪下溼也。」《水部》云：「溼，幽溼也。濕，水出東郡東武陽入海。」則溼為正字，然漢以後經典通借濕為溼，今不據改。《爾雅·釋地》云：「下濕曰隰。」又云：「陂者曰阪，下者曰隰。」《詩·

秦風·車鄰》孔疏引李巡云：「下溼謂土地窊下，常沮洳，名為隰也。」《釋名·釋地》云：「下溼曰隰。隰，蟄也，蟄隰意也。」《公羊》昭元年傳云：「下平曰隰。」則與衍義同，鄭所不從。云「名物者，十等之名與所生之物」者，名若《爾雅·釋地》、《釋丘》、《釋山》、《釋水》所說地名，及所在物，即下文五土之物生是也。山林以下合之為五地，分之為十等。《說苑·辨物篇》云：「山川污澤陵陸丘阜五土之宜，聖王就其勢，因其便，不失其性，高者黍，中者稷，下者秬。」與此義略同。而辨其邦國都鄙之數，制其畿疆而溝封之，設其社稷之壇而樹之田主，各以其野之所宜木，遂以名其社與其野。千里曰畿。疆猶界也。《春秋傳》曰「吾子疆理天下」。溝，穿地為阻固也。封，起土界也。社稷，后土及田正之神。壇，壇與堦埒也。田主，田神后土、田正之所依也。詩人謂之田祖。所宜木，謂若松柏栗也。若以松為社者，則名松社之野，以別方面。【疏】「而辨其邦國都鄙之數」者，此冢上以天下土地之圖為文，亦案圖分別之，與職方氏為官聯也。邦國數，詳《職方氏》疏。都鄙，謂畿內大小都、家邑三等采地，數詳後疏。云「制其畿疆而溝封之」者，定其封疆溝洫，以

正其經界也。《封人》云：「凡封國封其四疆，造都邑之封域者亦如之。」是封人掌治封其溝。蓋掌固、司險與《冬官》匠人爲之，皆司徒授其法而命之也。賈疏云：「王畿內千里，中置王城，面有五百里，其邦國都鄙亦皆有畿界也。溝封謂於疆界之上設溝，溝上爲封樹，以爲阻固也。」云「設其社稷之壇」者，賈疏云：「謂於中門之外右邊，設大社、大稷，王社、王稷。又於廟門之屏，設勝國之社稷。其社稷外，皆有壇埒於四面也。」案：賈說未咳。社之祭，通於公私。《祭法》云：「王爲羣姓立社曰大社，王自爲立社曰王社。諸侯爲百姓立社曰國社，諸侯自爲立社曰侯社。大夫以下成羣立社曰置社。」注云：「大夫不得特立社，與民族居百家以上，則共立一社。」《荀子·禮論篇》云：「社至於諸侯，道及士大夫。」蓋通此諸社而言。此外則鄉、州、遂、縣及公邑采地之縣都等，凡大城邑所在，亦各有公社。若《州長》云「歲時祭祀州社」，《論語·先進篇》「子路使子羔爲費宰，云「有社稷焉」是也。王侯鄉遂都鄙之社，並爲公社，置社則爲私社。至《校人》又有馬社，《內宰》注謂市亦有社，則尤公社之細者。此經設其社稷之壇，家上邦國都鄙爲文，則大司徒所親設者，當爲大社、王社。其邦國以下國社、侯社、置社等，蓋亦掌其法而頒之。《晉書·禮志》引

摯虞議，謂大司徒所立者專指大社，說亦未塙。大社所在，《小宗伯》「右社稷」注謂在庫門內，雉門外之右，故賈謂在中門之外。其實當在路門外，應門內，鄭、賈說非也。詳《小宗伯》、《匠人》疏。王社所在，經無見文。《祭法》孔疏云：「或云與大社同處，王社在大社之西。崔氏云：「王社在藉田，王自所祭以供粢盛。」今從其說。故《詩·頌》云「春藉田而祈社稷」是也。其諸侯國社亦在公宮之右，侯社在藉田。」案：《御覽·禮儀部》引《五經通義》云：「王社在藉田中，爲千畝報功也。」即崔氏所本。《宋書·禮志》引王肅說，《唐書·韋叔夏議》引皇侃說，亦略同。孔及《通典·吉禮》並從其義。然鄭《載芟》箋不云祈王社，故賈疏謂王社與大社同處，與孔引或說正同。金鶚云：「夫自爲立社，與爲羣姓立社異其事，宜異其地，而並設於一處，何也？藉田爲王之田，王社亦王之社，則王社宜在藉田之中。」案：金申崔、孔義甚塙。諸社惟大社在王宮中，故《周書·作雒篇》云「乃建大社於國中」。《禮運》亦云「祀社於國，所以列地利也」。彼對祭帝於郊言之，明國謂國中也。而《宋志》引王肅論太社云：「王者布下圻內，爲百姓立之，不自立之於京師。」其說紕繆不足辯。王國四郊，惟南郊有王社。《續漢書·祭祀志》劉注引馬融說，謂「大社之外，又有

五社，東社八里，西社九里，南社七里，北社六里。」是謂近郊四方有四社。《白虎通義·社稷篇》引《尚書》逸篇說略同。其制尤與禮經不合，不可從也。詳《大宗伯》疏。其置社隨民居設之，在邑在野本無定法，故《郊特牲》孔疏云：「周之政法，百家以上得立社。其秦漢以來，雖非大夫，民二十五家以上，則得立社。又《鄭志》云：『《月令》命民社，謂秦社也。』」案：《說文·冂部》云：「社，地主也。《周禮》二十五家爲社，各樹其土所宜之木。《風俗通義·祀典篇》引《周禮說》同。據鄭則百家以上乃得有置社，若閭里二十五家則不得立社，與許、應說不同，詳《州長》疏。注云

「千里曰畿」者，《說文·田部》云：「畿，天子千里地，以逮近言之則言畿。」案：《大司馬》云：「方千里曰國畿。」又《職方氏》云：「方千里曰王畿。」所謂天子千里地也。其九畿，侯畿以外，面各五百里，兩面合之亦千里。故《小司徒》「凡建邦國，正其畿疆之封」，注通九畿言之。云「疆猶界也」者，《夏官·敘官·掌疆》注義同。《爾雅·釋詁》云：「疆、界，垂也。」《說文·畀部》云：「畀，界也。重文疆，畀或从疆土。」《田部》云：「界，境也。」《穀梁》昭元年傳云：「疆之爲言猶竟也。」案：畀界正字當作畀，此經並從或體作疆，惟《載師》、《肆師》二職作畀。鄭云「猶界」，與《穀梁》

云「猶竟」同。凡言猶者，並引申段借之義。依許說，則界卽疆之本義，一說蓋小異。《夏官》注不云猶，則與許同。又案《封人》云：「掌設王之社壇，爲畿封而樹之。凡封國，封其四疆。」彼經王國曰畿，侯國曰疆，此經制其畿疆，總家邦國都鄙爲文，亦以畿大界小，與《封人》義略同也。引《春秋傳》曰「吾子疆理天下」者，證疆界之義。《左》成二年傳「齊國佐曰，先王疆理天下」。又曰「今吾子疆理諸侯」。此注與彼不同者，鄭蓋偶誤記也。云「溝，穿地爲阻固也」者，《廣雅·釋水》云：「溝，坑也。謂穿地爲坑塹。《掌固》云：「凡國都之竟，有溝樹之固，郊亦如之。」又《司險》云：「設國之五溝五涂，而樹之林以爲阻固。」彼五溝卽《遂人》之遂、溝、洫、澮、川，則溝封之溝，亦略依溝洫之制爲之。《禮運》云：「城郭溝池以爲固。」是溝所以爲阻固也。云「封，起土界也」者，《敘官·封人》注云：「聚土曰封。」《小爾雅·廣詁》云：「封，界也。」賈疏云：「穿溝出土於岸，卽皆爲封，封卽起土界也。」云「社稷，后土及田正之神」者，賈疏云：「鄭義依《孝經緯》。社者，五土之摠神。以句龍生時爲后土官，有功於土，死配社而食。稷是原隰之神，宜五穀。五穀不可遍舉，稷者五穀之長，立稷以表神名，故號稷。棄爲堯時稷官，立稼穡之事，有功於民，死乃配稷而

食，名爲田正也。」案：賈說非也。鄭意社祭土神，稷祭田神，土神亦名后土，田神亦名田正，故以社稷爲后土、田正之神。若句龍爲后土，稷爲田正，並謂生爲土官、田官，歿而配食焉。此注后土及田正，自謂土田之神，不關配食之句龍、棄，故《大宗伯》注云「社稷，土穀之神，有德者配食焉」是也。詳彼疏。云「壇，壇與壝埒也」者，《封人》注義同。賈疏云：「經直云壇，壇即壝埒。不云壇，以壇在壇之四面爲之，明中有壇可知，故鄭兼云壇也。」案：《禮記·郊特牲》云：「君南鄉於北墉下。」鄭注云：「北墉，社內北牆。」彼社雖無室，壇外四面有壁，壁外乃有壇耳。若然，《封人》云設王之社壇者，彼官卑，主設之，此大司徒尊官，直主其制度而已。」焦循云：「《祭法》注云：『封土曰壇。』《說文》云：『埒，卑垣也。』蓋壇爲擁土之名，故壇埒均謂之壇。」案：焦說是也。《說文·土部》云：「壇，祭場也。」壇卽土堂。《周書·作雒篇》說大社云：「其壇，東青土，南赤土，西白土，北驪土，中央疊以黃土。將建諸侯，鑿取其方一面之土，燾以黃土，苴以白茅，以爲土封。」《白虎通義·社稷篇》云：「其壇大如何？《春秋文義》曰：『天子之社稷，廣五丈，諸侯半之。』其色如何？《春秋傳》曰：『天子有大社焉。東方青色，南方赤色，西方白色，北方黑色，上

冒以黃土。故將封東方諸侯，取青土，苴以白茅，各取其面以爲封社，明土謹敬潔清也。」案：《周書》之壇，卽《白虎通》之壇也。二書所說大社壇土備五色及班說天子諸侯壇廣之度，《獨斷》及《書·禹貢》孔疏引《韓詩外傳》說並同。壝埒者，其壇外周市之卑垣，卽《左》哀七年傳所謂社宮也。蓋壇者委土之名。凡委土而平築之謂之埒，於埒之上積土而高若堂謂之壇，外爲庫垣謂之壝埒。通言之，埒、壇皆得稱壇，故《鬯人》「社壇用大罍」，注云「壇謂委土爲埒壇」是也。焦循云：「《郊特牲》云「北墉」，《北堂書鈔》引《太公金匱》云：「植槐於王路之右，起兩社，築垣壇。」垣與墉同類，是壇外有垣周之也。」黃以周云：「社稷皆有壇，而外環以垣。其垣束木爲之，而塗以土。《穀梁傳》云「亡國之社，爲廟屏」，屏內束交木，而外塗之以土。亡國社可爲廟屏者，以社制本束木而塗土也。《晏子·問上》曰：「夫社束木而塗之，鼠因往託焉。熏之則恐燒其木，灌之則恐敗其塗。」是其證也。」案：焦、黃說社垣之制，近是。但此垣卽《郊特牲》之墉，與封土之壝埒不同。凡社宮外內蓋有高卑兩重垣，外卑垣爲壝埒，內高垣爲墉。壝埒以爲宮之界域，墉以藏社之石主，猶宗廟主祔藏西壁中也。又案《獨斷》云：「社稷二神同功，故同堂別壇，俱在未位。」《玉海·郊祀》引

《五經通義》，謂稷在大社西，并壇。《郊特牲》疏《條牒論》云：「稷壇在社壇西，俱北嚮，營竝壇共門。或曰在社壇北。」依此三說，則社稷之壇，蓋爲總壇一，總壇之上別爲分壇二，所謂同堂別壇也。《唐郊祀錄》引魏孔晁議云：「《召誥》始立社，牛一、羊一、豕一，無社及稷也。又《周禮·考工記》左祖右社，不言稷。《士師》亡國之社稷，但一尸，同壇並坐通祭稷。」劉熹難云：「社大稷小，無同壇並坐之義。」依孔說，則社稷同壇，社壇之外不立稷壇。《召誥》僞孔傳謂社稷共牢，蓋與孔晁說同。今案：社稷土穀別神，所配人神亦異，必無同牢之理。《召誥》所記告立社稷之禮，詳大略細，故不見稷牲。《匠人》右社，猶《小宗伯》云右社稷，亦文有詳略。士師中大夫四人，足備二尸，皆不足爲同坐通祭之證。《論語》費有社稷，是大夫采邑之社有稷也。《莊子·庚桑楚》篇，說庚桑楚北居畏壘之山，畏壘之民欲社而稷之，是民間私社亦有稷也。《通典·吉禮》載漢魏官社無稷，尤與古制不合，不爲典要。討覈經典，社稷同堂別壇，蔡氏及《五經通義》《條牒論》之說，殆不可易。惟《條牒論》謂稷壇在社壇西，或云在社壇北，以位次之，皆居社上，則似未安。焦循駁之云：「《小宗伯》疏云：『地道尊右，故社稷在右，是尚尊尊之義。』社爲五土之總神，其尊於

稷無疑，今稷壇轉居社壇之右，是尊卑之位紊矣。」其說甚是。金鶚亦謂社宜在稷西，殆近之矣。云「田主，田神后土、田正之所依也」者，賈疏云：「此田主當在藉田之中，依樹木而爲之，故云各以其野之所宜木。云田主田神者，謂《郊特牲》云「先穡」，與神農一也。若然，鄭意以田主爲神農，則無后土及田正之神，直以神農爲主祭，尊可以及卑，故使后土、田正二神憑依之，同壇共位耳。田正則《郊特牲》所云司嗇，一也。」惠士奇云：「《墨子·明鬼篇》云：『聖王建國營都，必擇國之正壇，置以爲宗廟；必擇木之脩茂者，立以爲叢位。』叢位者，社稷也。《戰國策》恒思有神叢」。蓋木之茂者神所憑，故古之社稷恒依樹木。」又云：「立主以依神，故樹田神之主，而后土、田正憑焉。非后土、田正之外，別有田神也。賈未達其義，乃云田主以神農爲主，后土、田正憑依之，同壇共位。其說支離，疑誤後學。」呂飛鵬云：「《論語》『哀公問社於宰我』。《釋文》曰：『問社，鄭本作主。云田主謂社。』則此經田主亦當爲社稷之主，故鄭釋之。云后土、田正之所依，蓋田神卽后土、田正之神。」案：惠、呂說是也。上注釋社稷爲后土、田正之神，則此云后土、田正者，卽指社稷之神。明樹在社稷壇內，以其爲神所憑依，故謂之主，亦卽《墨子》所謂叢位也。鄭言

田神者，欲見土穀之神通爲田神，其所依之樹卽謂之田主耳。凡宮中大社及藉田王社，以至國社、侯社、置社等並有樹，賈氏不從藉田王社之說，而釋此田主又謂在藉田中，則似樹田主與社稷絕不相涉者，違失經意甚矣。其社稷有樹之義，《白虎通義·社稷篇》云：「社稷所以有樹何？尊而識之，使民望見卽敬之，又所以表功也。故《周官》曰：司徒班社而樹之，各以土地所生。《獨斷》云：「凡樹社者，欲令萬民加肅敬也。各以其野之所宜之木，以名其社及其野。」並約此經爲說。《魏書·劉芳傳》亦引此經及《封人》文，證社必有樹。又引《五經通義》云：「天子大社、王社，諸侯國社、侯社，制度奈何？」曰：社皆有垣無屋，樹其中以木。有木者，土主生萬物，萬物莫善於木，故樹木也。」劉氏又云：「《白虎通》云『社稷所以有樹何』，然則稷亦有樹明矣。又見諸家禮圖，社稷圖皆畫爲樹，惟誠社誠稷無樹。」案：劉說凡社無不樹，最爲明析，鄭意亦當如此。但天子大社，諸侯國社，並在宮中，不可云田主。故此經田主，《郊特牲》疏謂指置社，《祭法》疏亦云「大夫所立社稷則田主是也」。故鄭《駁異義》引《大司徒職》「樹之田主，各以其所宜，遂以名其社與其野」。依孔說，是鄭意謂凡社通有樹，而惟置社之樹爲田主也。《說文》以此經各樹其土所宜之木，屬二

十五家之社。二十五家有社，雖鄭所不取，而以田祖爲置社，則義不異。曾釗云：「王社侯社在藉田，此云以其野之所宜木，則王社、侯社及置社也。」案：曾說是也。王社、侯社既在藉田中，則其樹亦得爲田主，不徒置社以下矣。云「詩人謂之田祖」者，據《詩·小雅·甫田》文。《風俗通義·祀典篇》云：「《周禮說》二十五家置一社，但爲田祖報求。《詩》曰：「以御田祖，以祈甘雨。」」案：應說本許氏，而以《詩》田祖釋田主則與鄭同。賈疏云：「《詩》云『以御田祖』，毛云：『田祖，先穡。』《籥章》亦云『凡國祈年于田祖』，鄭云：『田祖，始耕田者，謂神農也。』」引之者，證田主是神農也。《詩》孔疏亦引此注而釋之云：「以句龍爲后土，后稷爲田正，而言詩人謂之田祖，則田祖之文雖主於神農，而祭尊可以兼卑，其祭田祖之時，后土、田正皆在焉，故鄭摠言詩人謂之田祖也。言此田祖，其文得兼有后土、后稷；而《司徒》言田主，則其文不得兼神農。何則？彼云『設其社稷之壇而樹之田主』，則田主唯社稷，不得有神農，故鄭唯云后土、田正，其言不及神農，是其意也。」案：賈、孔二說不同，似皆未達鄭指。此經田主本專爲社稷之神所馮依，而鄭引《詩》田祖以證之者，蓋謂田神非一，兼有地祇、人鬼。土穀之神，地祇也；田祖及配食社稷之句龍、后

稷，人鬼也。仲春祈年於社，亦兼祭田祖。凡衆田神皆以田主爲憑依，故鄭亦兼以田祖釋田主也。至鄭以田祖爲神農，則不甚塙，詳《籥章》疏。云「所宜木謂若松柏栗也」者，《論語·八佾篇》：「哀公問社於宰我。對曰：『夏后氏以松，殷人以柏，周人以栗，曰使民戰栗。』」《釋文》引鄭本《論語》：「社作「主」。注云：「主，田主，謂社也。」何氏《集解》引孔安國云：「凡建邦立社，各以其土所宜之木。」《御覽·禮儀部》引《五經異義》云：「夏人都河東，宜松也。殷人都亳，宜柏也。周人都豐鎬，宜栗也。」是《論語》所云，雖三代異制，亦因其土所宜之木，故據以爲說。依許此說，則周西都大社，王社宜樹栗也。然古書說社樹者，文多乖異。《白虎通義·社稷篇》引《尚書》逸篇云：「大社惟松，東社惟柏，南社惟梓，西社惟栗，北社惟槐。」《魏書·劉芳傳》引《五經通義》、《續漢書·祭祀志》注引馬融說並同。依其說，則大社樹松。《書鈔》引《太公金匱》，又謂大社樹槐。並與周人以栗之文不合，而逸《書》五社之文，尤爲不經，不足據也。又案：鄭《論語注》釋主爲田主，即本此經，皆謂植木依神之主。其祭祀陳設之主，則自以石爲之，《小宗伯》注可證。而《淮南子·齊俗訓》云：「有虞氏社用土，夏后社用松，殷人社用石，周人社用栗。」此則以松栗並爲刻

主之木，與《論語》不同，非鄭義也。云「若以松爲社者，則名松社之野」者，謂地宜松者，以松爲社，即名松社，若宜它木亦同。《莊子·人間世》篇說齊有櫟社，即以木名社之事。云「以別方面」者，賈疏云：「但四方宜木，面各不同，或一方宜松，則以松爲社，以別餘之方面耳。」以土會之澶辨五地之物生。一曰山林，其動物宜毛物，其植物宜阜物，其民毛而方。二曰川澤，其動物宜鱗物，其植物宜膏物，其民黑而津。三曰丘陵，其動物宜羽物，其植物宜覈物，其民專而長。四曰墳衍，其動物宜介物，其植物宜莢物，其民皙而瘠。五曰原隰，其動物宜羸物，其植物宜叢物，其民豐肉而庠。會，計也。以土計貢稅之法，因別此五者也。毛物，貂狐獬貉之屬，縵毛者也。鱗物，魚龍之屬。津，潤也。羽物，翟雉之屬。核物，李梅之屬。專，圜也。介物，龜鼈之屬，水居陸生者。莢物，薺荑王棘之屬。皙，白也。瘠，羸也。羸物，虎豹貔之屬，淺毛者。叢物，萑葦之屬。豐猶厚也。庠猶短也。杜子春讀生爲性。鄭司農云：「植

物，根生之屬。阜物，柞栗之屬，今世間謂柞實爲阜斗。膏「物謂楊柳之屬，理致且白如膏。」玄謂膏當爲藁，字之誤也。蓮芡之實有藁韜。【疏】「以土會之濃辨五地之物生」者，

以下土會至本俗六，皆教官之官法也。物生即動植人民之屬，五地各有所宜。云「一曰山林」者，賈疏云：「案《大司樂》『一變而致川澤之元』。先言川澤後云山林者，彼取神之易致爲先，故先言川澤。此取尊卑高下相對，故先言山林也。又彼云『五變而致土元』。注云：『土祇，原隰及平地。』此中不見平地者，亦原隰中可以兼之也。」云「其植物宜阜物」者，阜，《釋文》作早，云「本或作阜」。宋岳珂本亦作早，唐石經作阜。阮元云：「阜者，草之俗字。《說文》，草者，「草斗，櫟實也」。自人用草爲艸木字，乃別製阜爲草斗字。岳本作早，與《釋文》合。《周禮》用假借字也。」案：阮說是也。但《夏官·敍官》及《校人》經並有阜字，今姑從石經。云「其動物宜鱗物」者，《釋文》云：「鱗，劉本作鱣，音鱗。」案：字書無鱣字，蓋即鱗之譌體。盧文弨校改爲鱣。案《集韻·十七真》云：「鱣通作鰲。」盧蓋據彼校。然《說文·魚部》云：「鰲，魚也。」與鱣音同義別。云「其民黑而津」者，《釋文》云：「津，一本作澁。」丁晏云：「《廣韻·十七真》：『澁，氣之液也。』本一作澁。」詒讓案：津，津之省。

《說文·水部》云：「津，水渡也。」非此義。津潤字當作「澁」，經典通借津爲之。澁即澁之譌，詳後。云「其民專而長」者，專，搏之借字。《考工記·矢人》、《梓人》、《廬人》搏鬪字並作「搏」。《大戴禮記·易本命篇》，盧注引此經亦作「搏」，亦詳後。云「五曰原隰」者，原亦當作「遼」，詳前疏。云「其植物宜叢物」者，叢，唐石經作「藁」，藁亦即叢之譌。今從宋本。

注云「會，計也」者，《鄉大夫》、《泉府》注並同。《天官·敍官》注云：「會，大計也。」云「以土計貢稅之法，因別此五者也」者，《天官·敍官》注云：「辨，別也。」以貢稅之法，須會計而定，故因辨別五土所生人物之異也。云「毛物，貂狐貉貉之屬，縹毛者也」者，《釋文》云：「貉，依字作貉。」賈疏云：「縹毛謂毛之細縹者也。」詒讓案：《說文·豸部》云：「貂，鼠屬，大而黃黑，出胡丁零國。貉，獸也。貉，似狐，①善睡獸也。《論語》曰：狐貉之厚以居。」又《犬部》云：「狐，狝獸也。」四獸毛尤細縹，故舉以概諸獸。賈疏據《爾雅·釋獸》云「狸狐貉貉貉」，謂鄭依彼經而所讀文異，非也。又《釋文》：「縹，一音如勇反。」則疑讀如《書·堯典》「鳥獸氄毛」之氄，《集韻·二腫》云「穉或作氄」。

①「似」，原訛「以」，今據《說文》改。

縛」是也。盧文弨謂當本亦作「縛」，亦通。云「鱗物，魚龍之屬」者，《說文·魚部》云：「鱗，魚甲也。」《大戴禮記·易本命》云：「有鱗之蟲三百六十，而蛟龍爲之長。」《梓人》注云：「鱗，龍蛇之屬。」彼主筍虞飾言之，故不云魚也。云「津，潤也」者，《說文·血部》云：「澁，氣液也。」津卽澁之段字。《一切經音義》引《三蒼》云：「津，液汁也。」物有津液，則潤澤，故人之潤澤者亦謂之津。云「羽物，翟雉之屬」者，《梓人》注云：「羽，鳥屬。」翟雉，詳《內司服》及《染人》疏。云「核物，李梅之屬」者，丁晏云：「經文作覈，注作核。《說文·面部》：『覈，實也。』《木部》：『核，蠻夷以木皮爲匣，狀如斂尊之形也。』是果實之字當用覈。鄭君作核，從今文假借字也。《曲禮》、《玉藻》皆作核，故鄭改從今字。《毛詩》「肴核維旅」，班固《典引》蔡邕注引《詩》「肴覈維旅」，是《毛詩》古文亦作覈。」案：丁說是也。覈本訓實，引申爲果覈之名。注又從今字作核。《爾雅·釋木》云「桃李醜核」，郭注云：「子中有核人。」《玉藻》云：「食棗桃李，弗致於核。」梅亦果之有人者，故云李梅之屬。云「專，圜也」者，對山林之民形方也。《春秋繁露·三代改制質文篇》云：「湯體長專。」丁晏云：「專卽圜之省文。」《說文·口部》：「圜，圜也。从口專聲。」《漢書·五行志》：「蜺再重，赤而專。」

孟康曰：「專，員也。」字又作搏，《梓人》「搏身而鴻」。注：「搏，圜也。」《楚辭·九辨》王逸《章句》：「楚人名員曰搏也。」云「介物，龜鼈之屬，水居陸生者」者，《呂氏春秋·季冬紀》「其蟲介」，高注云：「介，甲也。」《大戴禮記·易本命》云：「有甲之蟲三百六十，而神龜爲之長。」龜鼈水居陸生，故宜生墳衍，別於鱗物水居水生則宜生川澤也。賈疏云：「此陸生謂陸地生子，及生訖即入水而居，故云水居陸生也。《五行傳》云：『貌之不恭，則有龜孽。』」注云：「龜，蟲之生於水者。」亦謂生居在水中，非謂初生在水，彼生與此鄭云陸生之生義異也。」云「英物，薺英、王棘之屬」者，《說文·艸部》云：「英，艸實。」《廣雅·釋艸》云：「豆角謂之英。」賈疏云：「薺英卽今人謂之阜英。蓋誤云阜，當言薺也。王棘卽《士喪禮》云「王棘若擇棘」者是也。棘雖無英，蓋樹之枝葉與薺英相類，故并言之也。」案：賈謂阜英一名薺英，未見所出。又謂王棘無英，而鄭以釋英物，於義殆不可通。鄭珍云：「康成以王棘當英物，則有英可知。目驗今棘刺之類，唯俗名閭王刺者有英，葉如槐葉，二三月間開黃花，結實如阜角，略薄，多至十餘英一簇。幹刺直如椒葉，刺皆反勾。康成所謂王棘，卽此無疑。」俗謂王棘砭鼠，正言其刺之惡。此棘又名牛棘，又名終，見《爾雅》。

又名馬棘，見郭注。」案：子尹謂閭王刺有英，即王棘，說較賈爲近。但英物甚多，王棘是否有英，究無塙證。今以注義攷之，竊疑經注英字並當爲萊。《說文·艸部》云：「萊，莉也。」《爾雅·釋艸》云：「萊，刺。」郭注云：「艸刺針也。」《方言》云：「凡草木刺人，北燕、朝鮮之間謂之萊，自關而西謂之刺，江、湘之間謂之棘。」萊物謂草木之有芒刺者也。《說文·艸部》又云「薺，疾黎也」，引《詩》曰「牆有薺」。今《毛詩·鄘風》「薺」作「茨」。又《小雅·楚茨篇》云：「楚楚者茨，言抽其棘。」鄭《玉藻》注亦引作「楚薺」。然則此注云薺萊，即謂茨之棘也。《爾雅·釋艸》云：「茨，蒺藜。」郭注云：「布地蔓生，細葉，子有三角刺。」《說文·束部》云：「棘，小棗叢生者。」《士喪禮》鄭注云：「世俗謂王棘砒鼠。」是薺與馬棘並刺多而長，故鄭據爲說。萊與英形近，傳寫譌誤，遂不可通，陸、賈所見皆誤本也。云「皙，白也」者，《說文·白部》云：「皙，人色白也。」云「瘠，臞也」者，《說文·肉部》云：「瘠，瘦也。重文瘠，古文瘠从𠂔束。」又「臞，少肉也」。案：瘠即瘠之俗。賈疏云：「案《爾雅·釋言》云：「臞，瘠，瘠也。」注云：「齊人謂瘠瘦爲瘠。」則臞爲瘦小之貌，故鄭云瘠也。」《釋文》云：「臞，其俱反。又作臞，音稍。」與《考工記》「燿後音同」。案：臞臞形近互譌，詳《梓人》

疏。云「羸物，虎豹貔貉之屬淺毛者」者，《梓人》注義同。《說文·衣部》云：「羸，袒也。重文裸，羸或从果。」羸即羸之別體。《月令》及《管子·版法篇》字又作倮，尹注亦同鄭義。賈疏云：「《考工記·梓人職》說大獸而云「厚脣，弇口，出目，短耳，大胃，燿後，若是者謂之羸屬」。又《爾雅》有虎有豹，故知羸物有虎、豹也。但《爾雅》及諸經不見有貔，《曲禮》云「載貔貅」，此鄭云「貔貉」，貔即貅也。云淺毛者，若以淺毛言之，則入羸蟲中，故《月令》中央土，其蟲羸。鄭云「虎豹之屬恒淺毛」。若據有毛言之，即爲毛蟲，故白虎入西方毛蟲之長也。」洪頤煊云：「《史記·周本紀》：「如豺如離」，《集解》徐廣曰：「此訓與螭同。」《說文》作离，注云：「歐陽喬說，离，猛獸也。」《文選·西都賦》李善注引《歐陽尚書》說：「螭，猛獸也。」即貔字。疏以貅當之，非是。」案：洪說是也。离俗作螭，螭即貔之譌體。《釋文》音勅宜反，不誤。《梓人》注作「貔螭」，字同。貔者，《說文·豸部》云：「貔，豹屬，出貉國。」淺毛者，謂毛疏少者，對前毛物爲縟毛者也。《詩·大雅·韓奕》「鞞鞞淺幘」，毛傳云：「淺，虎皮淺毛也。」又云：「貓，似虎，淺毛者也。」《說文·虎部》云：「虬，虎竊毛謂之虬苗。竊，淺也。」《爾雅·釋獸》及郭注義同。此羸物，鄭依《梓人》義即毛物之別，古

書多說羸蟲，釋者舛舛甚衆。《呂氏春秋·觀表篇》高注云：「裸蟲，麒麟、麋鹿、牛羊之屬也。蹄角裸見，皆爲裸蟲。」《淮南子·時則訓》云：「孟夏，其蟲羸。」高注云：「羸蟲，麟爲之長。」羸亦卽羸之借字。此亦以羸爲獸類，而以蹄角裸見爲釋，則與鄭義小別。《大戴禮記·易本命篇》云：「裸之蟲三百六十，而聖人爲之長。」《曾子天圓篇》云：「唯人爲裸而後生也。」《太玄經·玄數篇》范望注云：「裸爲無鱗甲毛羽，人爲之長也。」《素問·五常政大論》云：「裸蟲靜。」王注云：「裸蟲謂人及蝦蟇之類也。」《漢書·五行志》引劉歆《洪範五行傳》云：「時則有羸蟲之孽，謂螟螣之屬也。」《續漢書·五行志》劉注引鄭注義同此說，尤爲詭異。今參互校覈，《大戴》「裸而」專屬人而言，此經民物文異，與彼本不相蒙。此外諸家異說，無可質證。惟范望、王冰以無鱗甲毛羽爲羸，足備一義。要鄭據《考工》，以記釋經，自足馮也。云「豐猶厚也」者，《說文·豐部》云：「豐，豆之豐滿也。」豐滿則厚，故引申爲凡厚之稱。《楚辭·大招》云：「豐肉微骨。」王注云：「豐，厚也。」《方言》云：「自關而西，秦、晉之間，凡大貌謂之滕，或謂之龐，豐其通語也。」云「庫猶短也」者，明與《弓人》「豐肉而短」義同也。《說文·广部》云：「庫，中伏舍。一曰屋卑。」卑者

必短，故引申爲凡短之稱。《司弓矢》「庫矢」，先鄭注讀爲人罷短之罷，與此義亦同。云「叢物，萑葦之屬」者，《說文·艸部》云：「叢，聚也。」又《艸部》云：「萑，亂也。葦，大葭也。」《文子·上德篇》云：「萑葦有叢。」《淮南子·俶真訓》高注云：「聚木曰叢。」案：萑葦聚生，枝葉繁密，故謂之叢物。云「杜子春讀生爲性」者，丁晏云：「性，从心生聲。」《大戴禮·禮三本》：「天地者，性之本也。」《史記·禮書》「性」作「生」。鄭司農云「植物根生之屬」者，《廣雅·釋地》云：「植，種也。」《文選·西京賦》薛綜注云：「植物，草木。」云「阜物，柞栗之屬，今世間謂柞實爲阜斗」者，阜亦早之譌。呂飛鵬云：「《大雅·綿》『柞械拔矣』，箋云：『柞，櫟也。』《唐風》『集于苞栩』，陸璣疏云：『今柞櫟也。徐州人謂櫟爲杼，或謂之爲栩。其子爲阜斗，其殼爲汁，可以染皂。』《小爾雅》云：『柞之實謂之櫟。』《說文》：『栩，柔也。其實阜，一曰樣。』又云：『樣，栩實。』又云：『草，草斗，櫟實。一曰橡斗。』案：《說文》無阜字，草卽阜字。橡本作象。阜斗一名象斗，《掌染草》注云「藍蒨象斗之屬」是也。胡承珙謂橡似栗而圓，近蒂處有椹臬自裹，謂之象斗，可用以染，其實如小栗而微長者爲杼，與橡相似而微異，要之皆柞實也。據此則柞似栗，故先鄭以阜物爲柞栗之屬。」案：

呂說是也。《爾雅·釋木》云：「櫟，其實棫。」郭注云：「有棫彙自裹，早即所謂棫也。」櫟一名柞，柞實與栗皆有棫彙自裹，故鄭以二者並為阜物。至後世以阜斗可以染黑，因謂黑為阜，此阜乃後起之名，非其本義。賈疏乃援柞實之皮得染阜以釋阜物，非也。云「膏物謂楊柳之屬，理致且白如膏」者，《樂記》注云：「致，密致也。」案：致即今之緻字。謂木理細致而滑白如脂膏也。《山海經·海內經》：「都廣之野，爰有膏菽、膏稻、膏黍、膏稷。」郭注云：「言好米皆滑如膏。」《淮南子·俶真訓》：「膏夏紫芝」，高注云：「膏夏，大木也。其理密白如膏。」與先鄭此注略同。然義殊迂曲，故後鄭不從。云「玄謂膏當為櫟字之誤也」者，段玉裁云：「此鄭君謂為聲之誤也。膏高聲，在古音蕭宵肴豪部，櫟咎聲在古音尤幽部，二字雙聲。」云「蓮芡之實有櫟韜」者，《毛詩·小雅·彤弓》傳云：「櫟，韜也。」《說文·櫟部》云：「櫟，車上大櫟。」《艸部》云：「蓮，芙蕖之實也。芡，雞頭也。」《爾雅·釋艸》郭注云：「蓮謂房也。」房與櫟韜並取包裹之義。因此五物者民之常，而施十有二教焉。一曰以祀禮教敬，則民不苟；二曰以陽禮教讓，則民不爭；三曰以陰禮教親，則民

不怨；四曰以樂禮教和，則民不乖；五曰以儀辨等，則民不越；六曰以俗教安，則民不偷；七曰以刑教中，則民不詭；八曰以誓教恤，則民不怠；九曰以度教節，則民知足；十曰以世事教能，則民不失職；十有一曰以賢制爵，則民慎德；十有二曰以庸制祿，則民興功。陽禮謂鄉射飲酒之禮也。陰禮謂男女之禮。昏姻以時則男不曠，女不怨。儀謂君南面臣北面、父坐子伏之屬。俗謂土地所生習也。偷謂朝不謀夕。恤謂災危相憂。民有凶患，憂之則民不解怠。度謂宮室車服之制。世事謂士農工商之事。少而習焉，其心安焉，因教以能，不易其業。慎德謂矜其善德，勸為善也。庸，功也。爵以顯賢，祿以賞功。故書儀或為義。杜子春讀為儀，謂九儀。【疏】因此五物者民之常，而施十有二教焉者，五物冢上五地物生為文，五物隨地不同，而民相與習貫，安其常居，乃可因藉而施以教法也。此十二教為教官官法之總要，兼有禮樂儀等及制爵制祿，則事通於貴賤，不專施於庶民也。《王制》云：司徒明七教以興民德。七教：父子、兄弟、夫婦、君臣、長幼、朋友、賓客。彼七教繫人言之，與十二教亦

互通也。云「一曰以祀禮教敬則民不苟」者，此於《大宗伯》五禮屬吉禮。自此至五曰儀，並與大宗伯爲官聯也。下文云「以五禮防萬民之僞，而教之中」，又鄉三物六藝以禮爲首，《王制》亦云「司徒脩六禮以節民性」，明此官敷教禮爲尤重也。賈疏云：「凡祭祀者，所以追養繼孝，事死如事生。但人於死者不見其形，多有致慢，故《禮》云『祭，極敬也』。是以一曰以祀禮教敬，死者尚敬，則生事其親不苟且也。」云「二曰以陽禮教讓則民不爭」者，此於五禮屬嘉禮。下文「鄉三物教萬民而實興之」，亦用此禮。《孝經》云：

「先之以敬讓而民不爭。」賈疏云：「謂鄉飲酒之禮，卽黨正飲酒之類是也。黨正飲酒之時，五十者堂下，六十者堂上，皆以齒讓爲禮，則無爭。」云「三曰以陰禮教親則民不怨」者，陰禮，鄭、賈並謂昏姻之禮。此於五禮亦屬嘉禮。《大宗伯》云：「以昏冠之禮親成男女。」注云「親其恩」是也。民樂其昏，則無失時之怨。云「四曰以樂禮教和則民不乖」者，王念孫云：「樂下不當有『禮』字，蓋涉上祀禮、陰禮、陽禮而衍。疏云：『樂亦云禮，若謂饗燕作樂之時，舞人周旋皆合禮節，故樂亦云禮也。』案：經言教和則民不乖，如賈疏則與教和之義無涉矣。且樂禮二字，義不相屬，若經文果有禮字，則鄭必當有注。今鄭注釋陽禮、陰禮，而不釋樂

禮，則樂下本無禮字可知。以祀禮教敬，以樂教和，其義皆人所共知，不煩訓釋，故鄭皆無注也。下文云「以六樂防萬民之情而教之和」，卽此所云「以樂教和」也，不當有禮字明矣。自賈本衍禮字，而開成石經以下皆沿其誤。《鄭風·緇衣·正義》引此作「以樂教和則民不乖」，而釋之云：「樂謂五聲八音之樂。教之和睦則民不乖戾。」據此，則孔所見本無禮字，足正賈本之誤。鈔本《北堂書鈔·帝王部》十、《設官部》四、《白帖》六十一，引此皆無禮字。」案：王說是也。上自一至三並爲禮教，此則專爲樂教，不當兼言禮也。

《呂氏春秋·仲春紀》高注引此經亦無禮字，是漢時經本無此字之塙證。六樂爲鄉三物六藝之一，故此官通掌其教，亦與大司樂爲官聯也。乖，莊之隸變。《說文·干部》云：「𠂔，戾也。」云「五曰以儀辨等則民不越」者，儀謂《大宗伯》九儀，以辨上下尊卑之等，《師氏》六儀亦通咳焉。以此爲教，則民不敢踰越其等列。《大戴禮記·少閒篇》云：「同名同食曰同等。唯不同等，民以知極。」又《朝事篇》云：「古者聖王明義以別貴賤，以序尊卑，以體上下，然後民知尊君親上，而忠順之行備矣。」案：義與儀通。《朝事》所云，卽此經之義。云「六曰以俗教安則民不偷」者，卽下文以本俗六安萬民之事。《王制》云「司徒一道德以同俗」亦

是也。賈疏云：「俗謂人之生處習學不同。若變其舊俗，則民不安而爲苟且。若依其舊俗化之，則民安其業，不爲苟且，故云以俗教安則民不愉。愉，苟且也。」云「七曰以刑教中則民不誡」者，刑卽下文鄉八刑及《大司寇》《司刑》五刑之法，此官與彼爲官聯也。誡卽暴字，詳《敍官》疏。賈疏云：「刑者禁民誡亂。今民刑得所，民得中正，不爲誡亂。」云「八曰以誓教恤則民不怠」者，《士師》五戒，一曰誓用之於軍旅，此官與彼爲官聯也。但此誓通民間大小諸事而言，皆以刑罰豫警敕之，使民知戒慎，則勤於從事。鄭訓恤爲憂，賈疏謂「民有厄喪，教之使相憂恤，則民不懈怠」，非也。云「九曰以度教節則民知足」者，度謂制度也。賈疏云：「度謂衣服宮室之等尊卑不同，以此法度教之，使知節數，民知禮節，自知以少爲足。」云「十曰以世事教能則民不失職」者，職謂四民之常職，下文十二職事通咳之。但彼世事爲巫醫卜筮之屬，與此異。詳後疏。賈疏云：「父祖所爲之業，子孫述而行之，不失本職。」云「十有一曰以賢制爵則民慎德」者，與司士爲官聯也。《王制》云：「司徒上賢以崇德。」賈疏云：「人有賢行，制與之爵，民皆謹慎矜矜於善德，以求榮寵。」云「十有二曰以庸制祿則民興功」者，與司士、司勳爲官聯也。賈疏云：「庸，功也。人有功則制祿與

之，民皆興其功業。」注云「陽禮謂鄉射飲酒之禮也」者，《白虎通義·鄉射篇》云：「二人爭勝，樂以德養也。勝負俱降，以宗禮讓，故可以選士。」《論語·八佾》皇疏引樂肇云：「君子於射，講藝明訓，考德觀賢，繁揖讓以成禮，崇五善以興教。故曰：『君子無所爭，必也射乎！』《周官》所謂陽禮教讓則民不爭者也。」《鄉飲酒義》云：「主人拜迎賓於庠門之外，人三揖而后至階，三讓而后升，所以致尊讓也。君子尊讓則不爭。」又云：「先禮而後射，則民作敬讓而不爭矣。」《大戴禮記·盛德篇》云：「凡鬪辨，生於相侵陵也。相侵陵，生於長幼無序，而教以敬讓也。故有鬪辨之獄，則飾鄉飲酒之禮也。」《經解》云：「鄉飲酒之禮廢，則長幼之序失，而爭鬪之獄繁矣。」俞樾云：「陽禮與陰禮對文，陰禮爲婦人之禮，則陽禮爲男子之禮明矣。古人行禮，凡祭祀、賓客、喪紀之禮，婦人皆得與焉，惟鄉射、飲酒，純乎男子之事，而婦人不與，故曰陽禮。」案：俞說是也。鄉射、鄉飲酒禮，詳《鄉大夫》疏。云「陰禮謂男女之禮」者，《媒氏》注云：「納幣用緇，婦人陰也。」《郊特牲》云：「昏禮不用樂，幽陰之義也。」《說文·女部》云：「禮，娶婦以昏時，婦人陰也。」故男女婚姻之禮謂之陰禮。《內宰》云：「以陰禮教六宮九嬪。」先鄭注云：「陰禮，婦人之禮。」又

云：「凡建國，佐后立市，祭之以陰禮。」注云：「陰禮，婦人之祭禮。」彼陰禮雖非婚姻之禮，然亦以婦人爲陰，與此事異而義略同。云「昏姻以時，則男不曠，女不怨」者，時謂《媒氏》男三十而娶、女二十而嫁之時。《孟子·梁惠王篇》云：「內無怨女，外無曠夫。」此不怨，通男女言之，言無失時之怨也。云「儀謂君南面臣北面，父坐子伏之屬」者，賈疏云：「案《易乾鑿度》云：『不易也者其位，天在上，地在下，君南面，臣北面，父坐子伏，此其不易也。』鄭依此言其不易也。」云「俗謂土地所生習也」者，《說文·人部》云：「俗，習也。」《釋名·釋言語》云：「俗，欲也，俗人所欲也。」《王制》云：「凡居民材，必因天地寒煖燥溼，廣谷大川異制，民生其閒者異俗。」又云：「修其教，不易其俗。」此與《大宰》、《土均》《禮俗》義同，皆謂民生其土地所習之事，順其俗以教之則安也。云「偷謂朝不謀夕」者，朝不謀夕，《左》昭元年傳文。丁晏云：「《說文·心部》：『偷，薄也。』《公羊》桓七年何注『則民不偷』，《釋文》：『本又作偷。』《詩》『他人是偷』，鄭箋：『偷讀曰偷。偷，取也。』詒讓案：偷卽偷之俗體，《說文》所無。《表記》『安肆曰偷』，注云：「偷，苟且也。」苟且卽偷薄引申之義。《論語·泰伯篇》云：「故舊不遺，則民不偷。」《國語·齊語》云：「政不

旅舊，則民不偷。」字並作偷。《說文·女部》別有媮字，訓巧黠也。與偷薄之義亦相近。云「恤謂災危相憂」者，《羣書治要》注，危作「厄」。案：賈疏釋經亦有厄喪之文，疑作厄者近是。鄭以此恤與後文六行之恤義同。《爾雅·釋詁》云：「恤，憂也。」《一切經音義》引孫炎云：「恤，救之憂也。」謂若後文「五族爲黨，使之相救，五黨爲州，使之相調」之類。云「民有凶患，憂之，則民不解怠」者，《說文·心部》云：「怠，慢也。懈，怠也。」解，懈之借字。凶患卽災危。民相憂則緩急有所恃賴，故不懈怠也。俞樾云：「教之相恤，不必以誓，注不及誓字之義，蓋亦有所疑而闕之也。今案：恤者，慎也。《詩·維天之命篇》『假以溢我』，毛傳曰：『溢，慎也。』襄二十七年《左傳》引作『何以恤我』。是恤亦有慎義矣。《書·堯典》曰：『欽哉！欽哉！惟刑之恤哉！』《多士》曰：『自成湯至於帝乙，罔不明德恤祀。』其義竝爲慎。此經以誓教恤，卽以誓教慎也。《士師》之職曰：『以五戒先後刑罰，毋使罪麗于民。一曰誓，用之于軍旅。』其實誓之用，亦不專在軍旅。《條狼氏》注曰：「誓者謂出軍及將祭祀時也。」疏又引《月令》「田獵，司徒北面以誓之」。是祭祀田獵無不用誓，誓之用廣矣。國有大事，先誓戒之，使知敬慎以役上命，故曰「以誓教恤則民不怠」。

若謂災危相憂，則與不怠之義不相屬矣。」案：俞說是也。云「度謂宮室車服之制」者，《說文·又部》云：「度，法制也。」賈疏云：「謂若《典命》云，上公九命，國家宮室車旗衣服禮儀，及侯伯子男已下，各依命數，是其制度也。」云「世事謂士農工商之事，少而習焉，其心安焉，因教以能，不易其業」者，賈疏云：「案《齊語》云：『桓公曰：『成民之事若何？』管子曰：『四民者勿使雜處，雜處則亂。昔聖王處士就閒燕，處工就官府，處商就市井，處農就田野。』」又云：「士之子恒爲士，工之子恒爲工，商之子恒爲商，農之子恒爲農，少而習焉，其心安焉。」是世事也。」詒讓案：事謂道藝曲藝之等，四民皆有之。《鄉大夫》注云：「能者，有道藝者。」故云以世事教能。後十二職事亦有世事，則惟據學士言之，與此兼四民者異，詳彼疏。云「慎德謂矜其善德，勸爲善也」者，《大戴禮記·小辨篇》云：「大夫學德別義矜行以事君。」盧注云：「矜猶慎也。」《廣雅·釋詁》云：「矜，大也。」鄭意慎德謂矜大其善德，以相勸勉。賈疏謂民能矜矜然求其善德，又相勸爲善也，似非鄭指。德卽德行，《鄉大夫》注云：「賢者有德行者。」故云以賢制爵則民慎德。云「庸，功也」者，《春官·敘官》及《眡瞭》注並同。《爾雅·釋詁》云：「庸，勞也。」《說文·力部》云：「功，以勞定國也。」

《司勳》云：「國功曰功，民功曰庸。」庸，功對文則異，散文則通。賈疏云：「此經云『以庸制祿』，《司士》云『以功詔祿』。庸卽功，其理同也。」云「爵以顯賢，祿以賞功」者，《司士》云：「以德詔爵，以功詔祿。」彼云德，卽謂賢者也。人有德則賜爵以章顯之，有功則頒祿以賞賜之。《路史·有虞紀》引《尚書大傳》云：「以賢制爵，以庸制祿，故人慎德興功，輕利而興義。」蓋卽本此經。云「故書儀或爲義，杜子春讀爲儀」者，義，儀古今字。《小宗伯》注引故書及杜讀同。黃以周云：「《小宗伯》『肆儀』，《肆師》『禮儀』注並云故書儀爲義。杜注《小宗伯》亦讀義爲儀。司農注《肆師》云：『義讀爲儀。古者書儀但爲義，今時所謂義爲誼。』則義本正字。而杜、鄭讀爲儀者，《小宰》注所謂『以多言宜從征』之例也。」詒讓案：此儀或爲義者，故書自有作儀作義兩本，全經威儀字甚多，故書不皆作義也。凡威儀字，古正作義，漢以後段儀度之儀爲之。杜、鄭皆以今段字讀古正字，取通俗也。互詳《肆師》疏。云「謂九儀」者，賈疏云：「不從故書讀，從《大宗伯》九儀，一命至九命作伯也。」以土宜之灋辨十有二土之名物，以相民宅，而知其利害，以阜人民，以蕃鳥獸，以毓草木，

以任土事。十二土分野十二邦，上繫十二次，各有所宜也。相，占視也。阜猶盛也。蕃，蕃息也。育，生也。任謂就地所生，因民所能。【疏】「以土宜之濃辨十有二土之名物」者，即辨各土人民、鳥獸、草木所宜之法也。此經土宜兼辨地形高下營建都邑之事言之。《草人》云：「掌土化之濃，以物地相其宜而爲之種。」《土方氏》云：「以辨土宜土化之濃而授任地者。」注云：「土宜謂九穀植穡所宜也。」彼二職土宜與土化並舉，故鄭專以穀土所宜爲釋，與此經義小異。云「以任土事」者，猶《小司徒》云「以任地事」。彼注云「地事謂農牧衡虞」是也。賈疏謂任人性居之，失之。注云「十二土分野十二邦，上繫十二次，各有所宜也」者，謂此十二土，即依《保章氏》之星土所屬，分爲十二也。十二邦上繫十二次，若吳越屬星紀，齊屬玄枵之屬，並詳《保章氏》注。李淳風《乙巳占·分野篇》引《春秋內事》云：「天有十二次，日月之所躔也。地有十二分，王侯之所國也。」賈疏云：「《周語》，伶州鳩云：『昔武王伐商，歲在鶉火。』又云『歲之所在，則我有周之分野』。故知分野十二邦上繫十二次，各有所宜也。若然，唐虞及夏萬國，殷周千七百七十三國，皆依附十二邦以繫十二次，若吳、越同次之類也。凡繫星之法，皆因王者所命屬焉。故昭元年《左傳》云：『晉侯

有疾，鄭公孫僑如晉聘，且問疾。叔向問焉，曰：「寡君之疾病，卜人曰實沈、臺駘爲祟。史莫之知，敢問此何神也？」子產曰：「昔高辛氏有二子，伯曰閼伯，季曰實沈，居於曠林，不相能也，日尋干戈，以相征討。后帝不臧，遷閼伯於商丘，主辰，商人是因，故辰爲商星。遷實沈於大夏，主參，唐人是因，以服事夏商。」又云：「及成王滅唐而封大叔焉，故參爲晉星。」又襄九年《晉士弱》云：「陶唐氏之火正閼伯居商丘，祀大火，相土因之，故商主大火。」是皆先王命祀之法也。案：《元命包》云：「國君王者封，上應列星之位。」注云：「若角、亢爲鄭，房、心爲宋。比其餘小國不中星者，以爲附庸。」若然，附庸不繫星，其餘皆繫星也。」《玉海·天文》引《三禮義宗》云：「星分所主，各有由序。晉屬實沈者，高辛之子，主祀參星。宋屬大火者，閼伯之墟，主祀大火。齊祀玄枵者，逢公託食。其餘國非所悉。九州之中，國數非一，是以吳越同次，燕陳共分。」案：古者侯國祀其分星，崔氏以分野本於命祀之星，理可互通。賈氏此疏亦從其說。《保章氏》疏又謂「皆其國受封之日，歲星所在之辰」，與此疏義違。夫一次之中，其國非一，豈得封日皆同。況萬國並建，興廢不常，則易姓更封，分星宜隨歲而改，何以十二次之星野古今不易？其不可通明矣。

云「相，占視也」者，《爾雅·釋詁》云：「相，視也。」《方言》云：「占視，視也。自江而北，凡相候謂之占，相民宅亦謂候視之，故云占視也。」《尚書·召誥》說營雒之事云：「惟太保先周公相宅。」《史記·周本紀》集解引鄭《書注》亦云：「相，視也。」此相民宅與彼義同。云「阜猶盛也」者，《大宰》注義同。云「蕃，蕃息也」者，《掌畜》注義同。《說文·艸部》云：「蕃，艸茂也。」引申之，凡鳥獸孳乳蕃息亦謂之蕃。《國語·魯語》云「蕃庶物也」，韋注云：「蕃，息也。」云「育，生也」者，舊本作毓，非。今據宋岳珂、余仁仲本正。《說文·大部》：「育，重文毓，云「育或从每」。漢時蓋習用育。此經作毓，注作育，亦經用古字，注用今字之例也。《廣雅·釋詁》云：「育，生也。」《國語·魯語》韋注云：「毓即育字，生也。」云「任謂就地所生，因民所能」者，《大宰》注云：「任猶傳也。」案：任傳並有立義。謂就地之力勢所生，民之材力所能，傳立之以成其功事也。辨十有二壤之物，而知其種，以教稼穡樹蓀。壤亦土也，變言耳。以萬物自生焉則言土，土猶吐也；以人所耕而樹蓀焉則言壤，壤，和緩之貌。《詩》云「樹之榛栗」。又曰「我蓀黍稷」。蓀猶蒔也。【疏】「辨十有二壤之物而

知其種」者，此即辨土宜而任土事也。

注云「壤亦土

也，變言耳」者，《說文·土部》云：「壤，柔土也。」是壤與土義同。賈疏云：「此十二壤即上十二土。上經論居人物之事，此經辨其種殖所宜，故變其文。」云「以萬物自生焉則言土，土猶吐也」者，明土為地之大名，土吐聲類同。《書·禹貢》九州有厥土厥田之異，孔疏引鄭《書注》云：「地當陰陽之中，能吐生萬物者曰土；據人功作力競得而田之，則謂之田。」與此注義同，此經之壤即可田之土也。丁晏云：《說文·土部》：「土，地之吐生萬物者也。」《白虎通義·五行篇》：「土，主吐含萬物，土之為言吐也。」《釋名·釋地》：「土，吐也，吐生萬物也。」《太平御覽·地部》引《春秋元命包》：「土之為言吐也，言子成父道吐也。」云「以人所耕而樹蓀焉則言壤，壤，和緩之貌」者，和緩即柔土之義。《釋名·釋地》云：「壤，膿也，肥膿意也。」《書·禹貢》，冀州「厥土惟白壤」。《釋文》引馬融云：「壤，天性和美也。」《九章算術·商功篇》云：「穿地四，為壤五，為堅三。」劉徽注云：「壤謂息土，堅謂築土。」蓋地率為堅土，既經人所耕種，則解散和緩，故謂之壤。《管子·臣乘馬篇》云：「一農之量壤百畝也。」壤即熟田也。引《詩》云「樹之榛栗」者，《邶風·定之方中篇》文，引以證經樹為種果木也。云「又

曰我藝黍稷」者，《小雅·楚茨篇》文，引以證經藝爲種穀也。然此經樹藝實當爲一事，鄭分爲二，非也。後文十二職事，「一曰稼穡」即《大宰》九職之「三農生九穀」，「二曰樹藝」即九職之「園圃毓草木」。彼先鄭注分別甚明，後鄭亦無異說，此文與彼同，不宜兩訓，然則稼穡爲種穀，樹藝爲種果木明矣。後鄭忘檢彼文，乃以稼穡爲耕，而分樹屬圃，藝屬農，故上云「耕而樹藝」，又引《詩》以證藝穀；不知種穀雖得稱藝，而此經樹藝則不涉種穀之事，本職自有塙證也。云「藝猶蒔也」者，《國語·周語》韋注同，亦釋藝爲種穀也。《說文·夙部》云：「藝，種也。」^①藝卽藝之俗。又《艸部》云：「蒔，更別種也。」《廣雅·釋地》云：「藝，蒔，種也。」《書·堯典》「播時百穀」，《詩·周頌·思文》孔疏引鄭《書注》云：「時讀曰蒔，種蒔五穀也。」是藝、蒔同訓種。然此經之藝，則當爲種菜茹瓜蔬之事。《左》昭六年傳云：「不樵樹，不采藝。」彼云樹卽果木也，藝卽菜茹也。以土均之灋辨五物九等，制天下之地征，以作民職，以令地貢，以斂財賦，以均齊天下之政。均，平也。五物，五地之物也。九等，駢剛赤緹之屬。征，稅也。民職，民九職也。地貢，貢地所生，謂九穀。財謂泉

穀。賦謂九賦及軍賦。【疏】「以土均之灋辨五物九等」

者，謂均平土地貢賦之法，卽均人、土均所掌是也。云「制天下之地征」者，賈疏云：「言天下則并畿外邦國所稅入天子而言也。此地征與下爲目也。」云「以作民職」者，謂依法使民起而任其職事，大宰以九職任萬民是也。凡經云「作」者，並使令興起之謂，詳《射人》疏。云「以令地貢」者，地貢卽出於九職，《大府》云「以九功之灋，令民職之財用」是也。云「以斂財賦」者，大司徒以法命鄉師、閭師、縣師、遂師、均人、稍人等官，徵斂九賦及力征也。云「以均齊天下之政」者，以上三事卽天下稅斂之政，以法治之，使皆均平齊一也。注云「均，平也」者，《敍官》注云：「均猶平也。」此

不言猶者，以均平義近，不煩展轉引申，故文省也。《小司徒》注亦同。云「五物，五地之物也」者，則上文辨五地之物生是也。云「九等，駢剛赤緹之屬」者，以《草人》駢剛赤緹等土有九種，與此數合，故據以爲釋。《書·禹貢》有九州土田之異。又《左》襄二十五年傳，以山林、藪澤、京陵、淳鹵、疆療、偃豬、原防、隰臯、衍沃爲九等。鄭不從《書》及《左傳》者，以其不見本經，故不據也。又《小司徒》均三等

①「藝」原作「蒔」，據《說文》改。

土地，注云：「正以七人、六人、五人爲率者，有夫有婦然後爲家，自二人以至於十，爲九等，七六五者爲其中。」疑舊說有以二人至十人爲九等者，鄭亦不從之也。云「征，稅也」者，《載師》、《司門》注並同。《廣雅·釋詁》亦云「征，稅也」。凡經賦稅，通謂之征。《大司徒》注云：「地征謂地職地守之稅也。」云「民職，民九職也」者，卽大宰以九職任萬民是也。此據任職之人言之，謂之民職；後分地職，據九職所宜之地言之，其義同也。云「地貢，貢地所生謂九穀」者，賈疏云：「案《大宰》以九職任萬民，卽云「一曰三農生九穀」，此經云「以作民職」爲九職，卽云「令地貢」，明貢是九穀可知。」詒讓案：九職所貢亦謂之貢，《閭師》八貢及夫布是也。後「制地貢」注云「地貢謂九職所稅也」。是地貢通含九貢。此經土均之法據穀土言之，九職之貢不盡出於地，故此注又專舉三農貢九穀爲釋。又《土均》云「以均地貢」，彼注云「諸侯之九貢」。與此注異者，彼職下文云「以和邦國都鄙之政令刑禁」，故以邦國九貢爲釋，義各有當也。云「財謂泉穀」者，《大宰》注義同。云「賦謂九賦及軍賦」者，《均人》注云：「財賦，九賦也。」案：九賦卽《大宰》「以九賦斂財賄」是也。軍賦者，《小司徒》注云：「賦謂出車徒給繇役也。」鄭意九賦有財賄，爲財賦之正。其賦中又

當兼有軍賦，以軍賦雖無財入而亦稱賦也。《均人》以力政與財賦並舉，軍賦卽力征。彼注專舉九賦爲釋，與此注義小異。以土圭之灋測土深，正日景以求地中。日南則景短，多暑；日北則景長，多寒；日東則景夕，多風；日西則景朝，多陰。土圭，所以致四時日月之景也。測猶度也，不知廣深故曰測。故書求爲救。杜子春云：「當爲求。」鄭司農云：「測土深，謂南北東西之深也。日南謂立表處大南，近日也。日北謂立表處大北，遠日也。景夕謂日跌景乃中，立表處大東，近日也。景朝謂日未中而景中，立表處大西，遠日也。」玄謂晝漏半而置土圭，表陰陽，審其南北。景短於土圭謂之日南，是地於日爲近南也。景長於土圭謂之日北，是地於日爲近北也。東於土圭謂之日東，是地於日爲近東也。西於土圭謂之日西，是地於日爲近西也。如是則寒暑陰風偏而不和，是未得其所求。凡日景於地，千里而差一寸。【疏】「以土圭之灋測土深」者，以下掌土圭測景之法，與土方氏爲官聯也。賈疏云：「案《玉人職》云：「土圭尺有五寸。」周公攝政四年，欲求土中而營王城，故以土圭度日景之法測度也。度土之深，深謂日景長短之深也。」戴震云：「測

土深以南北言。聖人南面而聽天下，古者宮室皆南嚮，故南北爲深，東西爲廣，猶之車輿以前後爲深，左右爲廣也。表景短長即南北遠近，必測之而得，故曰測土深。」案：戴說是也。云「正日景」者，《釋文》云：「景，本或作影，非。下及注同。」顏之推《家訓·書證篇》云：「《周禮》土圭測景，景朝景夕等字，皆當爲光景之景。至晉世葛洪《字苑》，傍始加夕。而世間輒改治《周禮》從葛洪字，甚爲失矣。」案：顏說是也。《說文·日部》云：「景，光也。」《大戴禮記·曾子天圓篇》云：「火日外景。」蓋日光外照爲景，因之物之成陰於日者亦謂之景。後世妄生分別，增爲影字，陸所載或本，正六朝人所妄改也。地之方位遠近不同，日景有長短、朝夕之異，故必測度而後乃得其正。云「以求地中」者，即求下文日至景尺五寸之地，爲東西南北之中也。云「日南則景短多暑，日北則景長多寒」者，此正南北之里差也。地體渾圓，以距日之遠近，爲景之長短及氣之寒暑。蓋日行出入常近赤道，中國居赤道北，若其地偏南，則於日爲近南，距日較近，日光線所射微正，故其景短，得日之光熱亦最盛而多暑。若其地偏北，則於日爲近北，距日較遠，日光線所射尤斜，故其景長，得日之光熱亦大減而多寒也。賈疏云：「周公度日景之時，置五表。五表者：於潁川陽

城置一表爲中表，中表南千里又置一表，中表北千里又置一表，中表東千里又置一表，中表西千里又置一表。今言日南景短多暑者，據中表之南表而言，亦晝漏半立八尺之表，表北得尺四寸景，不滿尺五寸，不與土圭等，^①是其日南，是地於日爲近南，景短多暑，不堪置都之事。北云日北者，據中表之北表而言，亦晝漏半表北得尺六寸景，是地於日爲近北，是其景長多寒之事也。」案：賈五表之說未塙，詳後。云「日東則景夕多風，日西則景朝多陰」者，此正東西之里差也。凡地之東西緯度同，則距日遠近亦不異，故景無長短而有朝夕，氣亦無寒暑而有燥溼。若其地偏東，則得日較早，故地中日方中而此已夕，其氣亦燥而多風。若其地偏西，則得日較遲，故地中日已中而此尚朝，其氣亦溼而多陰。但風雨爲地氣蒸盪而成，雖由日光所照，氣有漲縮聚散，而與景夕景朝則絕不相關。然則近東多風，近西多陰，蓋由測驗而知，與寒暑之繫於日行固不同也。賈疏云：「據中表之東表而言，亦於晝漏半中表景得正時，東表日已跌矣。是地於日爲近東，亦晝漏半已得夕景，故云景夕多風。云日西則景朝多陰者，據中表之西表而言，是

① 「土圭」原訛「土表」，據楚本改。

地於日爲近西，亦於晝漏半中表景得正時，西表日未中乃得朝時之景，故云日西則景朝多陰。此經皆未得所求耳。

東方多風，西方多陰，陰卽雨也。」戴震云：「日南、日北猶《堯典》之度南交、度朔方也。日東日西猶《堯典》之度嵎夷、度西也。分四方測驗，然後折取其中。日南景短，日北景長，取中而得尺有五寸，以是求南北之中；日東景夕，日西景朝，時刻差移，取中加時，以是求東西之中。所謂測土深正日景以求地中者如是。古人用土圭測黃、赤二道，猶今之測北極高下也，寒暑進退晝夜永短悉因之而隨地不同。」江永云：「測景惟能知南北之差，若東西則隨人所居而移。經謂日東則景夕、日西則景朝者，言其理當如是，非真能同時立表，知其東表日已昃、西表日未中也。西法則東西里差以月食時刻先後定之。疏立五表之說亦妄。」案：戴、江說是也。蓋土圭測景，止以求南北之差，東朝西夕則備論里差之理，固非土圭所能測矣。瞿曇悉達《開元占經》云：「日南則景短多暑者，謂夏至日躔南方井宿也。日北則景長多寒者，謂冬至日躔北方斗宿也。日東則景夕多風者，謂春分日躔東方角宿也，故秋分祭夕月也。日西則景朝多陰者，謂秋分日躔西方婁宿也，故春分祭朝日也。古來天圖，春秋二分並交婁角也。可知夕者秋分之

異名，朝者春分之別號。景長稱南至，景短稱北至，今日南則景短，日北則景長者，先論日躔宿也，後論日躔景也。」案：《占經》說與鄭、賈絕異，疑六朝天官家之別解。依其說，南北東西者，乃據日躔而言，不涉里差之法，則於測土求中之文無會，非經義也。注云「土圭，所以致四時日月之景也」者，據《典瑞》云：「土圭以致四時日月。」謂立表以得景，而以土圭度其景之長短也。《開元占經》云：「土圭者，非削土爲其圭象，訓爲度也。置圭度景謂之土圭。」

案：《占經》說與後注云「土其地猶言度其地」義同。梅穀成云：「土圭所以致日景，而辨分至、定四方也。以長短之極察之，則知二至；以長短之中裁之，則知二分；以二分出入之景揆之，則知東西；以午中之景正之，則知南北。故辨分至、定四方皆由此也。」云「測猶度也，不知廣深故曰測」者，《說文·水部》云：「測，深所至也。」《周髀算經》云：「覆矩以測深。」引申之，凡量度之事並謂之測。地廣深不可知，必量度而後得，故通云測也。然此測土深之義，當從戴說，以南北言爲正，二鄭說並未審。云「故書求爲救，杜子春云當爲求」者，段玉裁云：「救，從支求聲，古讀亦巨鳩切。《尚書》『器惟求舊』，《漢石經》作『殺舊』。《尚書》『方鳩倂功』，《說文·人部》作『方救倂功』。殺卽救，古

支與爻偏旁多通用。然則《周禮》以救爲求，古文假借字也。」鄭司農云「測土深謂南北東西之深也」者，先鄭亦以測土深兼廣深言，與後鄭說同。梅穀成云：「土圭之法乃求地中，自四邊嚮內，規方千里，以爲王畿。又自王畿嚮內，以至將建王城之地，而置表測景，以漸而進，故曰土深，猶《士冠禮》『設洗直東榮，南北以堂深』也。」云「日南謂立表處大南近日也，日北謂立表處大北遠日也」者，表即後注所云八尺之表也。中國既在赤道北，則九州皆在日北矣。而經云日南日北者，自據九州地之南北而言，不謂在日之南北，亦不謂日行之南北，故夏至日北行而云日南多暑，冬至日南行而云日北多寒也。云「景夕謂日跌景乃中，立表處大東近日也，景朝謂日未中而景中，立表處大西遠日也」者，賈疏云：「景夕，於晝漏半，東表日跌，中表景乃中。景朝，亦於晝漏半，西表日未中，而中表景乃中也。」戴震云：「自東至西，環地面各有子午卯酉。東方日中景正，西方尚在午前而爲景朝；西方日中景正，東方已過午後而爲景夕。《周髀》稱晝夜異處，加時相及。據其方戴天相距四分天周之一爲言，以率率之，周天十二次，一日十二時，去一次則差一時。地與天恒相應也，東西相差若干時，半之則爲地中與東西所差之時。日正則地中景正，而東方景夕，

西方景朝也。凡差一時，於地面繩直計之，大致得六千里，道路迴曲之數則過乎此矣。」案：戴說甚覈。日跌謂景過中而側西也。詳《司市》疏。又東西距日，行無遠近，此近日遠日，據日出地早晏言之耳，與上注文同，意實微異也。云「玄謂晝漏半而置土圭表陰陽，審其南北」者，晝漏半謂日加午時。古漏刻制，詳《挈壺氏》疏。置土圭亦謂以土圭置測景之表下以度之。賈疏云：「度景之法，冬至，夏至皆可爲之。皆據晝漏半者，以取日正午乃得其端直也。云表陰陽者，東方西方是陰陽，故別云審其南北也。」又云：「知以晝漏半者，以其《通卦驗》云：『冬至，樹八尺之表，日中視其晷。』是以知用八尺表而以晝漏半度景也。」云「景短於土圭謂之日南，是地於日爲近南也，景長於土圭謂之日北，是地於日爲近北也，東於土圭謂之日東，是地於日爲近東也，西於土圭謂之日西，是地於日爲近西也」者，義亦與先鄭同。日東日西，晷景無長短之殊，而有遲早之異，故云東於土圭，西於土圭，明對地中爲東西也。云「如是則寒暑陰風偏而不和，是未得其所求」者，賈疏云：「此言對下經地中是陰陽風雨和會，爲得所求也。」戴震云：「寒暑陰風之偏及四時天地交合，陰陽風雨和會，蓋實驗而知。先驗其偏，後求之而得其中也。」云「凡日景於地，千里而差一

寸」者，賈疏云：「案《三光考靈耀》云：『四游升降於三萬里中。』」下云「日至之景尺有五寸謂之地中」。則是半三萬里而萬五千里，與土圭等，是千里差一寸，算法亦然。言此者，欲見經日南日北之等，皆去中表千里爲術，景長景短皆差一寸耳。」詒讓案：《周髀算經》云：「周髀長八尺，句之損益寸千里。」又云：「夏至之日，晷一尺六寸。髀者，股也。正晷者，句也。正南千里，句一尺五寸；正北千里，句一尺七寸。」李淳風注引《尚書攷靈曜》云：「日永影尺五寸，日短一十三尺。日正南千里而減一寸。」又引張衡《靈憲》云：「懸天之晷，薄地之儀，皆移千里而差一寸。」又《玉燭寶典》引《孝經說》云：「立八尺竿於中庭，日中度其日晷。冬至之日，日在牽牛之初，晷長丈三尺五寸。晷進退一寸，則日行進退千里，故冬至之日，日中北至周維十三萬五千里。」《淮南子·天文訓》云：「欲知天之高，樹表高一丈，正南北相去千里，同日度其陰，北表二尺，南表尺九寸。是南千里陰短寸，南二萬里則無景，是直日下也。陰二尺而得高一丈者，南一而高五也。則置從此南至日下里數，因而五之，爲十萬里，則天高也。若使景與表等，則高與遠等也。」以上諸文，雖步算不同，而皆謂日景千里差一寸，並鄭君所本。《周髀》李注及《隋書·天文志》謂陸續、王蕃、

姜岌並同此說。斯乃古率疏闊，非由實測得之，故《隋志》駁之云：「案：宋元嘉十九年壬午，使使往交州測影，夏至之日，影出表南三寸二分。何承天遙取陽城，云夏至一尺五寸。計陽城去交州路當萬里，而影實差一尺八寸二分，是六百里而差一寸也。又梁大同中，二至所測，以八尺表率取之，夏至當一尺一寸七分彊。後魏信都芳注《周髀四術》稱，永平元年戊子，當梁天監之七年，見洛陽測景，夏至日中影，長一尺五寸八分。以此推之，金陵去洛，南北略當千里，而影差四寸，則二百五十里而影差一寸也。況人路迂迴，山川升降，方於鳥道，所校彌多，則千里之言，未足依也。」又《隋志》載劉焯上疏及《周髀》李注，《開元占經》並席日景千里差一寸之言爲非實。《舊唐書·天文志》又載，開元十二年，太史監南宮說始自滑州白馬縣至豫州上蔡武津，分地測景，謂大率二百二十六里二百七十步，影差二寸有餘。以上並糾鄭說之誤。江永云：「漢時天學未明，所謂《考靈曜》者，漢人妄作。見日行有南北，寒暑進退，求其故不得，遂爲四游之說。又謂升降於三萬里中。鄭意地中半於三萬里，遂謂景常以千里差一寸。其說甚謬。景之差，日近天頂則少，遠天頂則多，本非平差，何得限以千里差一寸。」林頤山云：「千里差一寸，其說昉自《周髀》，《淮

南》。至宋元嘉以後，已知其說之不實，再以今時憲術依次推之。自其地景零寸至一寸，景一寸至二寸，景二寸至三寸，景三寸至四寸，景四寸至五寸，景五寸至六寸，景六寸至七寸，景七寸至八寸，景八寸至九寸，太陽兩高弧較四十三分，約一度二百里，化作一百四十三里強而景差一寸。景九寸至一尺，景一尺至一尺一寸，景一尺一寸至一尺二寸，景一尺二寸至一尺三寸，景一尺三寸至一尺四寸，太陽兩高弧較四十二分，化作一百四十里而景差一寸。景一尺四寸至一尺五寸，景一尺五寸至一尺六寸，太陽兩高弧較四十一分，化作一百三十七里弱而景差一寸。然則千里差一寸，與一百四十三里強差一寸、一百四十里差一寸、一百三十七里弱差一寸相去甚遠。即古里小而今里大，亦不應相去至八九倍之遠。鄭君當後漢時，麻學尚疏，此亦時使之然。」案：江、林二說竝塙，足以證古率之疏矣。日至之景尺有五寸，謂之地中，天地之所合也，四時之所交也，風雨之所會也，陰陽之所和也，然則百物阜安，乃建王國焉，制其畿方千里而封樹之。景尺有五寸者，南戴日下萬五千里，地與星辰四游升降於三萬里之中，是以半之得地之中也。

畿方千里，取象於日一寸爲正。樹，樹木溝上，所以表助阻固也。鄭司農云：「土圭之長尺有五寸，以夏至之日，立八尺之表，其景適與土圭等，謂之地中。今潁川陽城地爲然。」【疏】「日至之景尺有五寸謂之地中」者，此明建王國必於土中之義。日至之景，夏至所測雒邑之晷景也。《月令》，仲夏日長至，仲冬日短至。《續漢書·律曆志》劉注引《月令章句》云：「夏至晷漏極長，去極極遠，晷景極短。冬至晷漏極短，去極極近，晷景極長。極者，去而還之意也。」戴震云：「測非獨夏至，夏至日中景最短，以最短爲度，及其漸長，皆用是度之。」案：戴說是也。地中者，爲四方九服之中也。《荀子·大略篇》云：「欲近四旁，莫如中央，故王者必居天下之中，禮也。」《白虎通義·京師篇》云：「王者必即土中何？所以均教道，平往來，使善易以聞，爲惡亦以聞，明當懼慎，損於善惡。」《尚書》曰：「王來紹上帝，自服於土中。」《史記·周本紀》云：「成王在豐，使視洛邑。周公復卜申視，率營築，居九鼎焉。曰：『此天下之中，四方入貢道里均。』」《御覽·帝王部》引《帝王世紀》云：「周公相成王，以豐鎬偏處西方，職貢不均，乃使邵公卜居洛水之陽，以卽土中。故《援神契》曰：『八方之廣，周洛爲中。』」賈疏云：「上經置五表於四方，四表未得所求，

今於中表夏日至亦晝漏半立八尺之表，表北得景尺有五寸，景與土圭等，謂之地中。」梅穀成云：「主於形言，天之包地，皆圓體也。天地既圓，則所謂地中者，乃天中也。此惟赤道之下，二分午中，日表無景之處爲然。以氣而言，必陰陽五行沖和會合，乃可謂中。嘗以麻法推之，窮南極北，晝夜偏贏，赤道之下，冬夏適均。惟中國之地，晷景盈縮，與時進退，二至相除，毫無餘欠，而洛邑又其中之中者。以其得天地之中氣，謂之地中，良不誣也。」云「天地之所合也，四時之所交也，風雨之所會也，陰陽之所和也」者，梅穀成云：「天地所合者，地之中氣與天之中氣合也。合故四時交而無多暑多寒之患，風雨會而無多風之患，陰陽和而無多陰之患。蓋四時風雨寒暑皆天地爲之，其交、其會、其和皆天地之合爲之也。」云「然則百物阜安」者，賈疏云：「阜，盛也。如是四時得所，則百物盛安也。」沈夢蘭云：「五種六擾皆宜也。」云「乃建王國焉」者，與《天官·敘官》「惟王建國」義同，謂於此地中之處，定建王都。《書·召誥》孔疏引馬融注云：「王國東都王城，今河南縣是也。」云「制其畿方千里」者，即《大司馬》之國畿、《職方氏》之王畿也。千里通東西都計之。《周書·作雒篇》云：「周公將致政，乃作大邑成周於土中，南繫於雒水，北因於邠山，以爲

天下之大湊。制郊甸方六百里，因西土爲方千里，分爲百縣。」鄭《詩·王譜》云：「王城者，周都王城，畿內方六百里之地。」孔疏云：「周以鎬京爲西都，故謂王城爲東都。王城卽洛邑。」《漢書·地理志》云：「初洛邑與宗周通封畿，東西長，南北短，短長相覆千里。」韋昭云：「通在二封之地，共千里也。」臣瓚按：「西周方八百里，八八六十四，爲方百里者六十四。東周方六百里，六六三十六，爲方百里者三十六。二都方百里者百，方千里也。」《秦譜》云：「橫有西周畿內八百里之地。」是鄭以西都爲八百，東都爲六百，其言與瓚同也。《鄭志》：「趙商問：『定四年《左傳》曰『曹爲伯甸』，言爵爲伯，服在甸。案：曹國實今定陶，去王城六七百里，甸服在二服，去王城一千五百里，亦復不合，敢問其故？』」答曰：「東都之畿方六百里，半之三百里，定陶去王城八百里有餘，豈六七百也。除畿內三百里，又侯五百里，定陶在外，何謂之不合。」以子魚言爲伯甸，本其始封而在甸服，明東都六百初則然矣，西都初則亦八百相通可知。《周禮》每言王畿千里者，制禮設法，據方圓而言，其實地形不可如圖也。蓋以西都先王所居，東都貢賦所均，不可竝爲二畿，故通數之共爲千里。」案：據孔說，則鄭說與《周書》、《漢志》同。云「而封樹之」者，與上文「邦國都

鄙制其畿疆而溝封之」同。不言溝而言樹者，亦文互相備也。賈疏云：「於畿疆之上而作深溝，土在溝上謂之爲封，封上樹木以爲阻固。」注云「景尺有五寸者，南戴日下

萬五千里」者，此亦依率計之，非實測也。劉徽《九章算術注序》引《周官》說同。南戴日下，謂大地之南當赤道下。

《墨子·經上篇》云：「日中，正南也。」賈疏云：「景一寸差千里，故於地中尺五寸景，去南戴日下萬五千里。」云「地與星辰四游升降於三萬里之中」者，賈疏云：「《考靈耀》文。言四游升降者，春分之時，地與星辰復本位，至夏至之日，地與星辰東南游萬五千里，下降亦然；至秋分還復正；至冬至，地與星辰西北游亦萬五千里，上升亦然；至春分還復正。進退不過三萬里，故云地與星辰四游升降於三萬里之中。」案：《月令》孔疏引鄭《考靈耀》注云：「地蓋厚三萬里。春分之時，地正當中，自此地漸漸而下。至夏至之時，地下遊萬五千里，地之上畔，與天中平。夏至之後，地漸漸向上。至秋分，地正當天之中央，自此地漸漸而上。至冬至，上遊萬五千里，地之下畔與天中平。自冬至後，地漸漸而下。」又云：「天旁行四表之中，冬南夏北，春西秋東，皆薄四表而止。地亦升降於天之中，冬至而下，夏至而上，二至上下，蓋極地厚也。地與星辰俱有四遊升降。四遊者，

自立春地與星辰西遊，春分西遊之極；地雖西極，升降正中。從此漸漸而東，至春末復正。自立夏之後北遊，夏至北遊之極，地則升降極下，至夏季復正。立秋之後東遊，秋分東遊之極，地則升降正中，至秋季復正。立冬之後南遊，冬至南遊之極，地則升降極上，冬季復正。」案：此釋地與星辰升降四遊之義尤詳析，今故備錄之。云「是以半之得地之中也」者，鄭意於四表三萬里之中，折取其半，爲萬五千里，故地中景長尺有五寸也。云「畿方千里，取象於日一寸爲正」者，《王制》「天子之田方千里」，鄭彼注云：「象日月之大，亦取晷同也。」案：鄭言此者，亦證成日景於地千里差一寸之義。賈疏云：「一寸爲正者，即是景一寸地千里，與《王制》注「晷同」一也。案《元命包》云：「日圓，望之廣尺，以應千里。」故鄭注《王制》云「象日月之大也」。云「樹，樹木溝上，所以表助阻固也」者，據《掌固》云：「凡國都之竟，有溝樹之固，郊亦如之。」又《司險》云：「設國之五溝五涂，而樹之林以爲阻固。」是畿疆皆有溝封，即於其上樹木，以表助阻固也。鄭司農云「土圭之長尺有五寸」者，據《玉人》文。云「以夏至之日，立八尺之表，其景適與土圭等，謂之地中」者，表即《匠人》所謂「置槷以縣臈以景」之槷。表以取景，圭以度景，其用不同也。依鄭《考靈耀》注

四遊之說，夏至地平適當天中，於時測地中之景，正與土圭等，因卽以是爲測景之根數也。必立八尺表者，據古天官家說以天下至地八萬里，賈疏引《考靈耀》云「從上臨下八萬里，天以圓覆，地以方載」是也。《周髀算經》云：「周髀長八尺，髀者表也。」《易緯·通卦驗》、《淮南子·天文訓》、《漢書·天文志》說測景皆用八尺之表，《九章算術》劉序說此經亦同，詳《匠人》疏。云「今潁川陽城地爲然」者，陽城縣，《續漢書·郡國志》屬豫州潁川郡，今在河南河南府登封縣東南三十五里。漢時陽城，夏至以八尺表測景，適一尺五寸，無贏朒，先鄭蓋據目驗得之。《開元占經·日占》引《晉太康地記》云：「河南陽城縣，是爲土中，夏至景尺有五寸，所以爲候也。」卽依鄭說。李吉甫《元和郡縣志》云：「河南府告成縣測景臺，在縣城內西北隅，高一丈。開元十年，詔太史監南宮說立石表焉。」唐之告城卽漢陽城地也。《周髀算經》李注云：「《大司徒職》，夏至之影，尺有五寸。馬融以爲洛陽，鄭玄以爲陽城。《尚書攷靈曜》「日永影一尺五寸，日短十三尺」。鄭玄以爲陽城。《易緯通卦驗》「夏至影尺有四寸八分，冬至一丈三尺」。劉向《洪範傳》「夏至影一尺五寸八分，冬至一丈三尺一寸四分」。是時漢都長安，而向不言測影處所，若在長安，則非晷影之正也。向又

云「春秋分長七尺三寸六分」。此卽總是虛妄。《後漢·歷志》「洛陽夏至，影一尺五寸，冬至一丈三尺」。自梁天監已前，並同此數。案：此經求地中，據建國言，則當指王城。李引馬氏云洛陽，則成周也。成周在王城東二十里，經度相等，日景自同。若先鄭云陽城，則在王城東南百八十里，以鄭千里差一寸之率求之，陽城尺五寸，則王城當贏一分強矣。據李氏說，則《漢麻》洛陽晷景與此經正同，又與先鄭說異，未知孰是。竊謂古時測算之法，本不甚密，王畿千里，通爲土中，不能決定其爲何地。是以古書言晷景者，亦各不同。《周髀》「夏至晷一尺六寸」。趙爽注云：「《周官》測景尺有五寸，蓋出周城南千里也。」斯又以長尺六寸者爲王城之景，而以千里差一寸之率減之，故謂此經尺五寸之景，爲出王城南千里。蓋皆據率臆推，非得之實測也。二鄭以陽城爲釋者，據其時目驗晷景，與此經偶合耳，亦非謂地中必在陽城，賈疏不悟，強爲之說云：「案《春秋左氏》，武王克商，遷九鼎於洛邑，欲以爲都。不在潁川地中者，武王欲取河洛之間形勝之所，洛都雖不在地之正中，潁川地中仍在畿內。若然，武王已遷鼎於洛，欲以爲都，周公又度景求地中者，武王雖定鼎訖，周公更度之者，所以審慎。」江永駁之云：「周都洛邑，欲其無遠天室，而四方人貢道理

里三十步五尺三寸六分，天徑之半而地上去天之數也。倍之得十六萬二千七百八十八里六十一歩四尺七寸二分，天徑之數也。以周率乘之，徑率約之，得五十一萬三千六百八十七里六十八歩一尺八寸二分，周天之數也。」《宋書》、《晉書》天文志並采其說，此又欲據表景之長短，推天地距數及天之周徑，尤不足據。

均。人謀則成王已遷鼎，鬼謀則周公、召公先卜河朔黎水，再卜澗東瀍西以審定之。所謂土中者，合九州道里形勢而知之，非先制尺有五寸之土圭，度夏至景與圭齊而後謂之土中也。既定洛邑，樹八尺之表，景長尺有五寸，是爲土中之景。乃制土圭以爲法，他方度景，亦以此土圭隨其長短量之，是景以土中而定，非土中因景而得也。經文本謂測景以建王國，則當時惟於東都王城測之。至漢儒乃謂潁川陽城爲然。陽城今登封縣，在洛之東南。此別有其故。蓋黃、赤道間之緯度，古闊而今漸狹。漢時王城夏至日稍偏南而景微長，必進至陽城，然後合土圭也。然《唐志》言陽城景尺四寸七分八釐，則漢時宜更短於此。漢唐人言，未知孰得其真。」今案：江說甚通，足以釋諸書之紛矣。又《開元占經·天體渾宗篇》載吳王蕃《渾天象說》，引此經注而說之云：「誠以八尺之表而有尺五寸景，是立八十而旁十五也。南萬五千里而當日下，則日當去其下地八萬里矣。從日斜射陽城，則天徑之半也。天體圓如彈丸，地上處天之半而陽城爲中，則日春秋冬夏昏明晝夜去陽城皆等，無盈縮矣。故知從日斜射陽城爲天徑之半也。以句股之法言之，旁萬五千里則句也，立八萬里則股也，從日斜射陽城則弦也。以句股求弦法人之，得八萬一千三百九十四

周禮正義卷十九

凡建邦國，以土圭土其地而制其域。諸公之地，封疆方五百里，其食者半；諸侯之地，封疆方四百里，其食者參之一；諸伯之地，封疆方三百里，其食者參之一；諸子之地，封疆方二百里，其食者四之一；諸男之地，封疆方百里，其食者四之一。土其地猶言度其地。鄭司農云：「土其地，但爲正四方耳。其食者半，公所食租稅得其半耳，其半皆附庸小國也，屬天子參之一者亦然。」故《魯頌》曰：「錫之山川，土田附庸，奄有龜蒙，遂荒大東，至于海邦。」《論語》曰：「季氏將伐顓臾，孔子曰：先王以爲東蒙主，且在邦域之中，是社稷之臣。」此非七十里所能容。然則方五百里、四百里，合於《魯頌》、《論語》之言。諸男食者四之一，適方五十里，獨此與今《五經》家說合耳。」玄謂其食者半、參之一、四之一者，土均均邦國地貢

輕重之等。其率之也，公之地以一易，侯伯之地以再易，子男之地以三易，必足其國禮俗、喪紀、祭祀之用，乃貢其餘，若今度支經用，餘爲司農穀矣。大國貢重，正之也。小國貢輕，字之也。凡諸侯爲牧正帥長及有德者，乃有附庸，爲其有祿者當取焉。公無附庸，侯附庸九同，伯附庸七同，子附庸五同，男附庸三同。進則取焉，退則歸焉。魯於周法不得有附庸，故言錫之也。地方七百里者包附庸，以大言之也。附庸二十四，言得兼此四等矣。【疏】「凡建邦國」者，此建畿外五等邦國之法也。《職方氏》說五等侯國之里數同。云「以土圭土其地而制其域」者，以土圭測景之法，定邦國之方位而正其疆域也。戴震云：「土圭之灋，不惟建王國用之，封國必以度地，以此知某國偏東、偏西、偏南、偏北，然後可定各地之分至啓閉，其疆域廣輪之實，亦於是分明不惑焉。」案：戴說是也。賈疏依千里而差一寸之率，測其封域之里數云：「假令封上公五百里，國北畔立八尺之表，夏至晝漏半得尺五寸景，與土圭等，南畔得尺四寸五分。其中減五分，一分百里，五分則五百里。」既非密率，又事涉繁碎，殆非經義。云「諸公之地，封疆方五百里，其食者半」者，此經所食者半及參之一、四之一，皆當依先鄭說，據諸侯自食言之。公五百里，開方爲方百里者二十五，即

二十五同，食者半則十二同又五終之地也。云「諸侯之地，封疆方四百里，其食者參之一」者，四百里開方，爲方百里者十六，即十六同，食者參之一，則五同三成又三分成之一也。云「諸伯之地，封疆方三百里，其食者參之一」者，三百里開方爲方百里者九，即九同，食者亦三之一，則三同也。云「諸子之地，封疆方二百里，其食者四之一」者，二百里開方爲方百里者四，即四同，食者四之一，則一同也。云「諸男之地，封疆方百里，其食者四之一」者，百里開方爲方五十里者四，食者亦四之一，則二十五成也。注云「土其地猶言度其地」者，《玉人》「土圭以致日以土地」，注云「土猶度也」。俞樾云：「土度聲近通用。《書·桀誓》『杜乃獲』，《雍氏》注引作『敷乃獲』。《說文·支部》『敷，讀若杜』。土之通作度，猶杜之通作敷矣。《土方氏職》曰『以土地相宅』，即度地相宅也。案：俞說是也。鄭司農云「土其地但爲正四方耳」者，謂土地即辨方之事也。若土圭景短，即知其國於四方爲近南，景長即知其國於四方爲近北之屬。賈疏謂五百里、四百里之等，說未咳。云「其食者半，公所食租稅得其半耳，其半皆附庸小國也，屬天子參之一者亦然」者，賈疏云：「司農意以經云其食者半與參之一、四之一，皆自食，其餘並入天子。雖不云四之一，司農意亦

四分之三，三分入天子，一分自食。」江永云：「先鄭謂其食者爲諸侯，後鄭謂其食者爲天子。以文勢言之，土其地，制其域，凡云其者皆指侯國，則其食亦當指諸侯，先鄭之義爲長。《大司馬》令賦上地食者參之二，中地食者半，下地食者參之一，亦謂其可食者也。《司勳》『凡頒賞地，參之一食』，亦謂受賞者食其參之一，其餘以食民以供上也。先鄭以其半爲附庸小國，屬天子參之一者亦然，蓋謂小國無附庸，然亦當并山川及不可食之地言之，乃近密小國，可食地少，而虛寬之數多，其猶下地萊二百畝，亦所以優之與？」王昭禹云：「諸公之地方五百里，其食者半，若其半則山林川麓不可食者也。以至侯伯子男之地，亦各以是爲差。州方千里，其地不能無肥磽之辨。凡以可食多者爲上，諸公之地可食者半，所謂上地也。侯伯之地可食者三分之一，所謂中地也。子男之地可食者四之一，所謂下地也。猶不易一易再易之地任民而已。」鄭鏐、方苞說略同。案王說即江氏所本，皆足補二鄭之義。《國語·鄭語》史伯對鄭桓公曰「主苯醜而食溱洧」，與此食字義正同。五等侯國所食之地，大多小小，非徒地有廣狹，蓋亦兼以肥磽制其衰等。《遂師》云：「經牧其田野，辨其可食者。」《管子·八觀篇》云：「凡田野萬家之衆，可食之地方五十里，可以爲足矣。」

萬家以下則就山澤可矣，萬家以上則去山澤可也。彼野悉辟而民無積者，國地小而食地淺也。田半墾而民有餘食而粟米多者，國地大而食地博也。」《國策·秦策》：「黃歇說秦昭王曰：『隨陽、右壤，此皆廣川大水山林谿谷不食之地。』皆此經食字之塙詰也。云「故《魯頌》曰，錫之山川，土田附庸，奄有龜蒙，遂荒大東，至于海邦」者，並《閼宮》篇文。毛傳云：「龜、蒙，山也。荒，有也。」鄭箋云：「策命伯禽，使爲君於魯，加賜之以山川土田及附庸，令專統之。奄，覆。荒，奄也。大東，極東。海邦，近海之國也。」引之者證魯有附庸也。又引《論語》曰「季氏將伐顓臾，孔子曰，先王以爲東蒙主，且在邦域之中，是社稷之臣」者，《季氏篇》文。《集解》引孔安國云：「顓臾，伏羲之後，風姓之國，本魯之附庸，使主祭蒙山。」魯七百里之封，顓臾爲附庸，在其域中，故此引以證附庸在邦域中也。云「此非七十里所能容」者，隱駁今文《五經》家說也。先鄭意附庸包於侯國封域，假令魯封域止七十里，則不能容附庸，明其不可信也。魯爲侯國，即依今文說亦當百里，此云七十里者，蓋別依今文《春秋》義。《白虎通義·爵篇》云：「殷家令公居百里，侯居七十里。」是今文家又有侯七十里之說，故先鄭據而破之。云「然則方五百里、四百里，合於《魯頌》、《論語》

之言」者，司農謂必如此經有方四百里五百里等國，乃能容附庸，是合於《魯頌》、《論語》之言也。云「諸男食者四之一，適方五十里」者，即二十五成之地也。云「獨此與今《五經》家說合耳」者，賈疏云：「《五經》家謂若張、苞、何休、孟子等，皆以爲周法公侯方百里，伯七十里，子男五十里。子男五十里，故男食五十里，是與《五經》家說合。若自子已上以百里、七十里國，於此經二百里已上四之一、三之一不合，故直舉男地而言。」詒讓案：《王制》云：「公侯田方百里，伯七十里，子男五十里。不能五十里者，不合於天子，附於諸侯，曰附庸。」《孟子·萬章篇》：《春秋》經露·爵國篇《文》並同。《白虎通義·封公侯篇》云：「諸侯封不過百里，象雷震百里，所潤雲雨同也。七十、五十里，差德功也。」此先鄭所謂今《五經》家說，即漢時今文經師之說也。賈疏謂若張、苞、何休、孟子等，《大宗伯》疏亦云張、苞、周、孟子、何休等不信《周禮》。張、苞、周蓋指張禹、苞咸、周氏。張禹治今文《論語》，苞、周章句並出張侯《論》，見何晏《論語集解敘》。《學而篇集解》又引苞咸說千乘之國，從《王制》義。是三家皆傳今文《論語》。《公羊》莊元年何注說三等國，並依《王制》義。《春秋公羊》亦今文學也。《周禮》爲古文之學，故今文經師皆所不從。今文之說，蓋以

《王制》、《孟子》所說爲周制，無二百里以上至五百里之國。後鄭以《王制》爲虞夏殷之制，周初因之；周公制禮，則改制如此經之說。故《王制》注云：「此地，殷所因夏爵三等之制也。殷有鬼侯、梅伯，春秋變周之文從殷之質，合伯子男以爲一，則殷爵三等者，公侯伯也。異畿內謂之子。周武王初定天下，更立五等之爵，增以子男，而猶因殷之地，以九州之界尚狹也。周公攝政致太平，斥大九州之界，制禮成武王之意，封王者之後爲公及有功之諸侯，大者地方五百里，其次侯四百里，其次伯三百里，其次子二百里，其次男百里。所因殷之諸侯，亦以功黜陟之，其不合者皆益之地爲百里焉。」又云：「《春秋傳》曰：『禹會諸侯於塗山，執玉帛者萬國。』言執玉帛，則是惟謂中國耳。中國而言萬國，則是諸侯之地有方百里，有方七十里，有方五十里者，禹承堯舜而然矣。要服之內，地方七千里，乃能容之。夏末既衰，夷狄內侵，諸侯相并，土地減，國數少，殷湯承之，更制中國方三千里之界，亦分爲九州，而建此千七百七十國焉。周公復唐虞之舊域，分其五服爲九。其要服之內，亦方七千里，而因殷諸侯之數，廣其土，增其爵耳。《孝經說》曰：『周千八百諸侯，布列五千里內。』此文改周之法，關盛衰之中三七之間以爲說也。」是鄭謂虞夏地大而國

多，故爵土爲三等，以百里、七十里、五十里爲限，殷地狹於虞夏而國少，故仍夏制，周初亦然。至周公致太平，斥大九州之界，同於虞夏，而封國之數，猶因殷舊地，增國少，故得廣土增爵，有五百里、四百里之封。此後鄭通《周官》、《王制》、《孟子》，以調停其說之意。《王制》孔疏引《五經異義》云：「古《春秋》左氏傳說，禹會諸侯於塗山，執玉帛者萬國。唐虞之地萬里，容百里地萬國，其侯伯七十里，子男五十里，餘爲天子閒田。」此亦以百里、七十里、五十里等爲虞夏之制，即後鄭所本，先鄭之意或當與彼同也。^①今攷《明堂位》說周公封曲阜地方七百里，《晏子春秋·內篇雜下》晏子曰：「昔吾先君太公受之營丘，爲地五百里。」《史記·漢興以來諸侯年表》云：「封伯禽、康叔於魯、衛地，各四百里。」並與此經合。《管子·輕重乙篇》云：「天下之旁，天子中立，地方千里，兼霸之壤三百有餘里，餽諸侯度百里，負海子男者，度七十里。」雖與此經小異，然亦不以百里爲大國，足徵周制必不如《孟子》所說。況《孟子》又言齊魯之封，儉於百里，則所說三等之國，自謂一代恒法，非周初沿殷權宜之制可知。鄭四代損益之說，不能通於《孟子》、《王

① 「當」原訛「與」，據楚本改。

制》。孔疏引鄭荅臨碩云：「孟子當赧王之際，《王制》之作，復在其後。蓋亦知二書後出，與周初典法，不無歧異也。」江永云：「諸侯之地，土田爲實封。若附庸在其封內，雖爲社稷臣，而不得有其地。名山大澤有不以封者，其餘山川、藪澤、斥鹵、磽墾之地，與夫城郭、宮室、溝塗皆不可食者，統而計之，大國宜有數百里，小國亦不下百里。此《周禮》與《孟子》、《王制》所以不能同，《周禮》就其虛寬者言之，《孟子》、《王制》惟舉土田實封耳。」又云：「《左傳》襄二十五年，子產對晉之辭曰：『昔天子之地一圻，列國一同，自是以衰。』此言與《孟子》、《王制》合，與《周禮》違，當觀其所以立言之意。此因晉人責其侵小，而晉人自有兼數圻之失，故子產不欲舉大國虛寬大數，而惟舉一同之制，以顯兼數圻之多，其言有所爲也。《王制》則述《孟子》者也。不然，孟子生近齊魯，豈真不知齊魯始封尚有餘地，而云儉於百里哉！」案：江說略本王安石、陳祥道，於義得通。金鶚黃以周亦並謂《孟子》、《王制》所言三等之封，百里七十里五十里者，除山川、附庸言之；此經五等之封，五百里、四百里、三百里、二百里、百里，爲兼山川、附庸言之。與江說略同。竊謂《孟子》謂齊、魯初封，儉於百里者，自是故言其小，以鑄切七國。大抵春秋以後人說列國封域大小，多

非其實。如昭二十三年《左傳》，^①楚沈尹戌曰：「若敖蚡冒至於武文，土不過同。」《國語·楚語》，白公子張說齊桓、晉文曰：「其人也，四封不備一同，而至於有畿田，以屬諸侯。」以楚武、文及桓、文初得國時疆域攷之，斷不止此數。《楚語》韋注亦云「方欲善美之，故尤小焉」。此與子產、孟子之言，足相比例矣。又後鄭依《王制》說附庸在方四百里、三百里、二百里、百里之外，故《職方氏》注亦謂州封五等國二百一十，其餘以爲附庸，亦不若先鄭說以附庸在封域內之允也。云「玄謂其食者半、參之一、四之一者，土均均邦國地貢輕重之等」者，後鄭以其食者半、參之一、四之一等，爲天子所食之貢，故引《土均》均地貢以破先鄭義。其說實非也。云「其率之也，公之地以一易，侯伯之地以再易，子男之地以三易」者，此鄭爲比況，以申其食者爲貢入天子之說。謂公以下貢有輕重，猶之齊民授地有一易、再易等之率耳，非謂真以此三等地封諸侯也。賈疏云：「其民受地有一易、再易，故此諸侯之地，據貢入天子以耕之者，人諸侯以易而不耕者。故以公之地貢半，似二百畝佃半也；侯伯之地，三之一貢入天子，似家三百畝，佃百畝，

①「二十三年」原作「二十五年」，據《左傳》改。

留二分，似荒廢者也；子男之地以三易，四之一貢與天子，似家得四百畝，佃百畝，留三分，似三百畝不耕者也。民但家無三易之地，直以況義耳。」云「必足其國禮俗、喪紀、祭祀之用，乃貢其餘」者，此申大國貢重、小國貢輕之義。《土均》云：「禮俗、喪紀、祭祀，皆以地嫩惡爲輕重之法而行之。」故鄭依而言也。賈疏云：「後鄭意釋公國貢半已下漸少之意。言公受地廣，稅物多，但留半自用，即足其國禮俗、喪紀及畜積之用，故以半爲餘，貢入天子。其侯伯受地差少，則其稅亦少，故三分之二留自用，乃足其國，以一分爲餘，貢入天子。其子男受地又少，其稅轉少，故四分之乃足其國，亦以一分爲餘，貢入天子。」云「若今度支經用餘爲司農穀矣」者，《漢書·食貨志》云：「大司農陳臧錢經用賦稅既竭，不足以奉戰士。」顏注云：「經，常也。」此注疑指漢時諸侯王國亦以常用所餘，儲爲司農穀，故舉以爲況。《司勳》先鄭注云「若今時候國有司農少府錢穀」是也。賈疏以度支經用，爲國家喪紀所用，餘入天子，殊誤。司農官，詳《天官·敘官》疏。云「大國貢重，正之也，小國貢輕，字之也」者，此亦申地貢大重小輕之義。《左》昭十三年傳云：「同盟於平丘。子產爭承，曰：昔天子班貢，輕重以列，列尊貢重，周之制也。卑而貢重者，甸服也。鄭伯，男也，而

使從公侯之貢。」杜注云：「列，位也。公侯地廣，故所貢者多。甸服，謂天子畿內共職貢者。」鄭蓋兼據彼文爲說。正讀與征同。字之者，《左》昭十六年傳，子產曰「非不能事大，字小之難」。又三十年傳云「字小在恤其所無」。孔疏引服虔云：「字，養也。」江永云：「諸侯固各有貢，然九貢皆貨賄服物，不貢粟米。則天子不食諸侯之地，不可謂之食；制其貢亦惟以其所有耳，豈舉其地之半、參之一、四之一而責其貢哉！後鄭正之字之，其言雖美，非實事也。」案：江說是也。地貢雖大重小輕，而此經其食者，實當爲諸侯自食，大國食多，小國食少，所以示尊卑隆殺之差，非所謂正之字之也。云「凡諸侯爲牧正帥長及有德者，乃有附庸」者，後鄭以附庸爲加賜，在封地之外，亦破先鄭說也。賈疏云：「案《王制》云：『五國以爲屬，屬有長；十國以爲連，連有帥；三十國以爲卒，卒有正；二百一十國以爲州，州有伯。』伯即牧也。此牧正帥長，皆是有功諸侯乃得爲之，有功即有附庸。又諸侯有德，雖不爲牧正帥長，亦得有附庸，故鄭總云諸侯牧正帥長及有德者乃有附庸焉。」詒讓案：鄭《王制》注云：「伯、帥、正，亦長也。凡長皆因賢侯爲之。殷之州長曰伯，虞夏及周皆曰牧。」牧即《大宰》「建牧立監」之牧。彼注云：「以侯伯有功德者，加命作州長，

謂之牧。」是有功德者並得爲牧，周牧亦通稱伯，不專屬殷制也。詳《大宰》及《大宗伯》疏。云「爲其有祿者當取焉」者，謂諸侯有國無祿，其爲牧正帥長者，則宜別優以祿，故加賜附庸，使取其貢賦以當祿也。云「公無附庸」者，賈疏云：「以其天子畿方千里，上公五百里，地極，故無附庸也。」云「侯附庸九同，伯附庸七同，子附庸五同，男附庸三同」者，賈疏云：「以其侯有功，進受公地，但公五百里，開方之，方百里者五五二十五；侯四百里，開方之，四四十六，加九同，則爲二十五同，與公等，故知侯附庸九同。伯地三百里，三三而九，加七同則爲十六同，與侯等，故知伯附庸七同也。其子有功進受伯地，加五同，與伯等；男有功受子地，男本一同，加三同，與子等。開方之皆可知。」云「進則取焉，退則歸焉」者，謂有功而進，則取此附庸入邦國；有罪而退，則歸之於王，別給有功者。賈疏謂退則歸焉者，謂爲閒田者，非。云「魯於周法不得有附庸，故言錫之也」者，釋《魯頌》之義。賈疏云：「魯雖爲侯爵，以其王子母弟，雖爲侯伯，畫服如上公，受五百里之地，與上公等。成王以周公制典法之勳，賜魯以侯伯子男四等附庸。」云「地方七百里者，包附庸，以大言之也，附庸二十四，言得兼此四等矣」者，《明堂位》云：「成王以周公爲有勳勞於天

下，是以封周公於曲阜，地方七百里。」鄭彼注云：「上公之封地，方五百里，加魯以四等之附庸，方百里者二十四，并五五二十五，積四十九，開方之，得七百里。」賈疏云：「魯本五百里，四面各加百里，四五二十，即二十同，四角又各百里，爲四同，故云附庸二十四。言周公有德，兼侯九同，伯七同，子五同，男三同，故云兼此四等矣。凡言同者皆百里，地百里則爲國，周法不滿百里乃爲附庸。今皆名附庸爲同者，但附庸實不滿百里，積集附庸成同，并數之矣。假令男附庸三同，附庸國則多矣，據成同而言三耳。自餘五同七同已上，其義可知也。」案：鄭意當如賈說。據《春秋繁露·爵國篇》說附庸，字者方三十里，名者方二十里，人氏者方五十里。是附庸不得有百里之國，鄭約言以便計算耳。但魯地方七百里，乃作記者之侈說，非其實也。依此經及《史記》言之，魯爲侯爵，則地當方四百里，附庸在封域之中，《論語》有明文，先鄭說自不可易。後鄭欲傳合《明堂位》七百里之文，遂謂魯本受五百里地，同於上公，又於封地之外，別增附庸二百里，以充其數，殆未足馮矣。凡造都鄙，制其地域而封溝之。以其室數制之。不易之地家百畝，一易之地家二百畝，再易

之地家三百畝。都鄙，王子弟、公卿大夫采地。其界

曰都；鄙，所居也。《王制》曰：「天子之縣內，方百里之國九，七十里之國二十有一，五十里之國六十有三。」此蓋夏時采地之數，周末聞矣。《春秋傳》曰：「遷鄭焉而鄙留。」城郭之宅曰室。《詩》云：「嗟我婦子，曰爲改歲，入此室處。」以其室數制之，謂制丘甸之屬。《王制》曰：「凡居民，量地以制邑，度地以居民，地邑民居，必參相得。」鄭司農云：「不易之地，歲種之，地美，故家百畝。一易之地，休一歲乃復種，地薄，故家二百畝。再易之地，休二歲乃復種，故家三百畝。」【疏】「凡造都鄙，制其地域而封溝之」者，此畿內稍、縣、甸三等采邑井田授地之法也。《縣師》云：「凡造都邑，量其地，辨其物，而制其域。」是制域爲縣師所職，司徒則以法命之，其封溝則封人、匠人等爲之。詳前疏。賈疏云：「案《載師職》：家邑任稍地，小都任縣地，大都任甸地。又下文《小司徒職》云：『四丘爲甸，四甸爲縣，四縣爲都。』家邑二十五里，小都五十里，大都百里。是造都鄙制其地域也。」云「以其室數制之」者，賈疏云：「其室在都邑之內，而云制之者，依其城內室數，於四野之中制地與之。謂若九夫爲井，四井爲邑，四邑爲丘，四丘爲甸，四甸爲縣，四縣爲都之等是也。」沈彤云：「凡造都鄙，制其地域

而封溝之，謂先量地定域也。則都邑之大小，正繫其地。

以其室數制之，乃即域內之室數，以爲縣鄙之屬，使多寡與地邑相得，民寡則徙之人，民多則徙之出。非計其室數以制都邑也。」案：沈說是也。云「不易之地家百畝」者，畝，《釋文》作畝，云「本亦作古畝字」。案：《說文·田部》作畝，云「六尺爲步，步百爲畝。从田每聲。重文畝，畝或从田十久。」畝即畝之俗體，經例皆作畝，不作畝，陸本誤。此辨都鄙授地之法。《載師》、《縣師》注以此不易、一易、再易之制，爲六鄉之法，與此經注並不合，誤也。都鄙亦當有餘夫，其授田以《遂人》三等田萊之率推約之，蓋亦當上地田二十五畝，中地田五十畝，下地田七十五畝，各視其正夫所受之田，以四分之一爲餘夫之田。經不言者，文不具也。

一注云「都鄙，王子弟、公卿大夫采地」者，《大宰》注云：「都鄙，公卿大夫之采邑，王子弟所食邑，周、召、毛、聃、畢、原之屬在畿內者。」詳彼疏。云「其界曰都，鄙，所居也」者，《大宰》注義同。謂所居治之邑曰鄙，其大都百里，小都五十里，家邑二十五里，竟界所包通曰都也。賈疏云：「三等采地皆有城郭，是其鄙所居也。據其四境，即是其界，曰都。」云《王制》曰「天子之縣內，方百里之國九，七十里之國二十有一，五十里之國六十有三，此蓋夏時采地之數」

者，鄭《王制》注云：「縣內，夏時天子所居州界名也。殷曰畿。《詩·殷頌》曰：『邦畿千里，維民所止。』周亦曰畿。畿內大國九者，三公之田三，爲有致仕者副之爲六也，其餘三，待封王之子弟。次國二十一者，卿之田六，亦爲有致仕者副之爲十二，又三爲三孤之田，其餘六亦待封王之子弟。小國六十三，大夫之田二十七，亦爲有致仕者副之爲五十四，其餘九亦以待封王之子弟。三孤之田不副者，以其無職，佐公論道耳，雖其致仕，猶可卽而謀焉。」是鄭據彼稱「縣內」，定爲夏時采地之數也。知周曰畿者，據《職方氏》云「方千里曰王畿」是也。云「周末聞矣」者，賈疏云：「案《洛誥》傳云：『天下諸侯之來，進受命於周，退見文武之尸者，千七百七十三諸侯。』」注云：「八州，州立二百一十國，畿內九十三國。」云畿內九十三國，卽此都鄙之數有文矣，而云未聞者，以無正文，故疑焉。」案《書傳》云千七百七十三諸侯，與《王制》數同，故鄭從之。畿內九十三國，卽依《王制》說也。此注以彼爲夏制，周所不用，故云未聞。蓋兩注義本異，賈合爲一，失之。又《王制》孔疏引鄭《書注》及《鄭志》答趙商，說夏初諸侯萬國，畿內四百國，此謂夏王畿千里，無鄉遂，而盡以爲五十里之國。此本非塙論，又不謂是周法，《詩·小雅·甫田》孔疏乃據彼說，謂周制郊內

亦封諸侯，尤謬舛不足論也。引《春秋傳》曰「遷鄭焉而鄙留」者，賈疏云：「案桓十一年夏五月，鄭伯寤生卒。秋七月，葬鄭莊公。九月，宋人執鄭祭仲。《公羊》云：『祭仲者何？鄭相也。古者鄭國處於留，先鄭伯有善於鄆公者，通乎夫人以取其國，而遷鄭焉而野留。莊公死，已葬，祭仲將往省于留，塗出于宋，宋人執之。』野、鄙不同者，何、鄭所見傳異也。案玄《發墨守》云：『鄭始封君曰桓公者，周宣王之母弟，國在宗周畿內，今京兆鄭縣是也。桓公生武公，武公生莊公，遷居東周畿內，國在號、鄆之間，今河南新鄭是也。武公生莊公因其國焉。留乃在陳宋之東，鄭受封至此適三世，安得古者鄭國處於留，祭仲將往省留之事乎！』是鄭君不從《公羊》。引之者，直取鄆所居爲義，其鄭居留之事，猶自不取也。所謂文取而義不取也。」詒讓案：鄭引《公羊傳》「鄙留」，何本作「野留」，蓋嚴、顏之異。何注云：「野，鄙也。」則鄙野文異而義同。云「城郭之宅曰室」者，《爾雅·釋言》云：「宮謂之室。」《釋名·釋宮室》云：「室，實也，人物實滿其中也。」引《詩》云「嗟我婦子，曰爲改歲，入此室處」者，《豳風·七月篇》文。引之者，證室在城郭內也。鄭彼箋云：「曰爲改歲者，歲終當避寒氣，而人所穹室墀戶之室而居之。」云「以其室數制之，謂制丘甸之屬」者，

明采地制井田，異於鄉遂比閭鄰里之制。云丘甸之屬，舉中言之，明上關縣都，下關井邑也。室數者，謂若采地無公田，則一井九家即爲九室，邑四井則三十六室，丘四邑則百四十四室，甸四丘則五百七十六室，縣四甸則二千三百四室，都四縣則九千二百十六室。其邦國制公田，則一井八家，即爲八室。邑則三十二室，丘則百二十八室，甸則五百十二室，縣則二千四十八室，都則八千一百九十二室。此以田室分配通率計之如是。若城郭聚居，則當視地之險夷大小而制之，或一井一邑特爲一城，或數井數邑合爲一城，皆不能豫定。都鄙城制，經無明文。攷《周書·作雒篇》云：「大縣立城，方王城三之一；小縣立城，方王城九之一。都鄙不過百室，以便野事。」彼大縣當即大都，小縣當爲家邑，不及小都者，舉大小以咳中，文不具也。以差計之，小都立城當方王城六分之一。然則王城方九里，大都城蓋方三里，小都城蓋方一里有半，家邑城蓋方一里。古者民宅不過五畝。大都三里之城，以營百室，餘地尚多，無不容之患也。引《王制》曰「凡居民量地以制邑，度地以居民，地邑民居必參相得」者，證以室數制之之法。鄭彼注云：「得猶足也。」案《王制》此文，謂若量地方一里，則爲制井，而居民八家；地方二里，則爲制邑，而居民三十二家之

類。其有盈朒方斜及不爲井者，皆以率消息之，使參相得。此邑通大小言之，不定爲四井之邑也。制邑之法，詳《里宰》疏。賈疏謂欲見邑在城外，居在城內，說誤。鄭司農云「不易之地，歲種之，地美，故家百畝」者，《漢書·食貨志》云：「民受田，上田夫百畝，歲耕種者，爲不易上田。」《國語·齊語》韋注云：「易，變易也。」凡田或種穀，或休生艸，更迭變易，故謂之易。案易即《遂人》之萊。不易地美，既不須更休，故有田無萊，家正得百畝，無副益。云「一易之地休一歲乃復種，地薄，故家二百畝」者，謂一田一萊也。《漢·食貨志》云：「中田，夫二百畝，休一歲者爲壹易中田。」賈疏云：「謂年別佃百畝，廢百畝。」詒讓案：《呂氏春秋·樂成篇》云：「魏氏之行田也以百畝，鄰獨二百畝，是田惡也。」近此一易之田也。云「再易之地休二歲乃復種，故家三百畝」者，謂一田二萊也。《漢·食貨志》云：「下田，夫三百畝，休二歲者爲再易下田。」賈疏云：「以其地薄，年年佃百畝，廢二百畝，三年再易乃徧，故云再易也。」惠士奇云：《呂氏春秋·任地》云：「凡耕之大方，力者欲柔，柔者欲力，息者欲勞，勞者欲息，棘者欲肥，肥者欲棘，急者欲緩，緩者欲急，濕者欲燥，燥者欲濕。」易之之謂也。土勞多瘠，故必休之而土乃肥。其所謂休者，非弃之也。

春萌而斫其新，夏夷而芟其陳，秋繩而敗其實，冬耜而剗其根，則有薙氏殺草之法，以治其地。土各異物，物各異宜，則有草人土化之法，以物其地。水歸其澤，澤草所生，則有稻人揚芟之法，以作其地。如是而休一歲二歲，然後復種，則土加肥美，其收數倍於歲墾之田，故曰易。」江永云：「田休一歲二歲不耕，所以養地力也。南方無休不耕之田，非盡由地美，亦由糞田之力勤。而糞田實勞且費，北方糞田尤艱，故有休田之法。」詒讓案：此上中下三等田制，與《遂人》六遂田制略同，此所謂易，即彼所謂萊，但彼上地猶有萊五十畝，非全不易者，與此小異耳。又此三等授田之法，古說以爲即爰田，故《漢·食貨志》說民受田三等，云「歲更耕之，自爰其處。」《左》僖十五年傳「晉作爰田」，孔疏引服虔、孔晁皆云「爰，易也，賞衆以田，易其疆畔。」《國語·晉語》作「輟田」，韋注引賈逵亦訓輟爲易，義與服、孔同。《說文·走部》云：「趨，趨田，易居也。」爰、輟、趨，字並通。《公羊》宣十五年何注云：「司空謹別田之高下善惡，分爲三品，上田一歲一墾，中田二歲一墾，下田三歲一墾，肥饒不得獨樂，墾墾不得獨苦，故三年一換土易居。」《孟子·滕文公篇》「死徙無出鄉」，趙注云：「徙謂爰土易居，平肥磽也。」《漢書·地理志》云：「秦孝公用商君制輟田。」顏注引

張晏云：「周制，三年一易，以同美惡。商鞅始割列田地，開立阡陌，令民各有常制。」孟康云：「三年爰土易居，古制也。末世浸廢，商鞅相秦，復立爰田，上田不易，中田一易，下田再易，爰自在其田，不復易居也。」《食貨志》曰「自爰其處而已」是也。」案：張、孟說爰田之制，周秦不同，其以三等授田及畝數多少之差，古今是一。但周制三等受田之人，彼此相易，當年耕上田百畝，二年耕中田二百畝之百畝，三年耕下田三百畝之百畝，至四年而仍耕上田百畝，是以易居爲爰田，有不易而無不爰。秦制則受上田者，常耕此不易之百畝；受中田者，常自換耕二百畝，二年而周；受下田者，常自換耕三百畝，三年而周。彼此更不相易，是以休田爲爰，則爰即此所謂易，上田不易即無爰，中下田乃有爰也。許、何、服、趙諸家釋周制，並同其說。但依孟說，則《漢志》所云自爰其處者，即秦法之爰田不易居。然《漢志》實以爲周井田之法，則班自謂周制不易居，與許、何諸說不同。孟康不辨，以爰土易居爲古制，則仍是許、何義，非班指也。今攷《小司徒》說六鄉田制，云「上地家七人，中地家六人，下地家五人」。注謂上地所養者衆，下地所養者寡。是周之授田，本以人數爲等衰。蓋家口之衆寡，與受田之肥磽，兩相劑而平，則非所謂肥饒獨樂，磽墾獨苦也。

授田既視人數，則不得分年易居。儻如許、何諸說，則是家七人受上地者，次年換受中地，更次年又換受下地，將不足以給其養；田廬改易，紛擾無已，更無論矣。然則自爰不易居，當以《漢志》爲正。張所謂周制，殆不足信。孟所說秦制，乃近周制耳。乃分地職，莫地守，制地貢，而頒職事焉，以爲地灋，而待政令。分地職，分其九職所宜也。定地守，謂衡麓虞候之屬。制地貢，謂九職所稅也。頒職事者，分命使各爲其所職之事。【疏】「乃分地職」者，以下並通冢邦國都鄙爲文，侯國采邑皆有此諸事也。云「以爲地法而待政令」者，地法卽任地之官法，大司徒脩建爲書，以授載師使職之。政令，謂王之政令，凡頒授徵斂之事皆是也。注云「分地職，分其九職所宜也」者，賈疏云：「上經既授上中下地，此經云分地職，故知分地職者是分九職所宜。九職則《大宰》云「一曰三農生九穀」是也。所宜謂若《孝經注》高田宜黍稷，下田宜稻麥之類是也。」案：賈說卽上土宜之法，非鄭意也。九職所宜當是農圃在平地，藪牧在山澤，各隨所宜授之。云「定地守謂衡麓虞候之屬」者，《均人》、《土均》注義同。《司市》、《瞽矇》、《小史》、《弓人》注並讀莫爲定。《職幣》注云：「莫，定

也。」故經云莫，注直云定。不讀爲定者，以互見於彼諸職，文不具也。《釋文》引劉昌宗莫亦音定。賈疏云：「案昭二十年《左氏傳》：「晏子云：山林之木，衡麓守之；澤之萑蒲，舟鮫守之；藪之薪蒸，虞候守之；海之鹽蜃，祈望守之。」注云：「衡麓、舟鮫、虞候、祈望，皆官名也。守之，令民不得取之，不共利。」時景公設此守以致疾，故晏子所非，非其不與民同。鄭引之者，以證地守之官。若然，此《地官》唯有衡虞，無舟鮫、祈望者，此《周禮》舉其大綱，《左氏》言其細別，故詳略不同。」云「制地貢謂九職所稅也」者，若《閭師》任農以耕事，貢九穀等，卽《大宰》九職之人所貢也。又《土均》亦云「以均地貢」，注云：「地貢，諸侯之九貢。」彼下文有邦國都鄙，故別以大宰九貢爲釋，與此異。云「頒職事者，分命使各爲其所職之事」者，《說文·支部》云：「攷，分也。」頒卽攷之段字。分命者，謂命民各脩當職之事。職，亦卽九職及下經云「頒職事十有二」是也。以荒政十有二聚萬民：一曰散利，二曰薄征，三曰緩刑，四曰弛力，五曰舍禁，六曰去幾，七曰眚禮，八曰殺哀，九曰蕃樂，十曰多昏，十有一曰索鬼神，十有二曰除盜賊。荒，凶年也。鄭

司農云：「救饑之政，十有二品。散利，貸種食也。薄征，輕租稅也。弛力，息繇役也。去幾，關市不幾也。眚禮，《掌客職》所謂凶荒殺禮者也。多昏，不備禮而娶，昏者多也。索鬼神，求廢祀而修之，《雲漢》之詩所謂「靡神不舉，靡愛斯牲」者也。除盜賊，急其刑以除之，饑饉則盜賊多，不可不除也。」杜子春讀蕃樂爲藩樂，謂閉藏樂器而不作。玄謂去幾，去其稅耳。舍禁，若公無禁利。眚禮，謂殺吉禮也。殺哀，謂省凶禮。【疏】以荒政十有二聚萬民」者，謂救荒之政也。云「三曰緩刑」者，易拔云：「緩刑，若朝士於邦凶荒則慮刑貶是也。」詒讓案：《周書·羅匡篇》云：「大荒刑罰不脩。」《管子·人國篇》云：「歲凶康，弛刑罰，赦有罪。」蓋重罪頌繫之，輕罪則赦之。云「五曰舍禁」者，謂弛關市山澤之禁。《玉藻》云：「年不順成，山澤列而不賦。」鄭彼注云：「列之言遮列也。雖不賦，猶爲之禁，不得非時人也。」若然，此云舍禁者，謂其以時人者；若非時人之，禁仍不舍也。注云「荒，凶年也」者，《大宰》注同。賈疏云：「案襄公二十四年冬，大饑。《穀梁傳》云：『五穀不升爲大饑，一穀不升謂之嗛，二穀不升謂之饑，三穀不升謂之饑，四穀不升謂之康，五穀不升謂之大侵。』大侵即大饑，一也。又案《廩人》云：『人食四鬴，上也；三鬴，中也；二鬴，

下也。若食不能人二鬴，則令移民就穀。』不能人二鬴之歲，即是大饑年也。此云荒政者，亦據大凶年爲義。案《均人》云：「凶札無力政財賦。」此既據大饑，猶云薄征者，此經雖主大饑，兼記一穀二穀不熟之歲，故有輕稅也。此鄭云荒凶年，則荒與凶一也。案《大司樂》「大札大荒大凶」，荒凶別者，其實凶荒是一，故《宗伯》云「以荒禮哀凶札」，是凶荒不異。《司樂》凶荒別文者，以凶爲凶年，以荒爲荒亂，兼見斯義，故凶荒別文也。」案：《大司樂》無「大荒」之文，賈說未詳。鄭司農云「救饑之政十有二品」者，《廣雅·釋詁》云：「品，式也。」謂救饑所行之政，有此十二事，豫設爲品式也。云「散利，貸種食也」者，《廣雅·釋詁》云：「貸，借也。」《左·襄二十九年傳》云：「宋饑。司城子罕請於平公，出公粟以貸。」《周書·羅匡篇》云：「大荒，舍用振穹，開廩同食。」《管子·人國篇》云：「歲凶康，人皆厲，多死喪，散倉粟以食之。」又《揆度篇》云：「無食者予之陳，無種者貸之新。」即貸種食之事。旅師掌三粟，亦云「散其利」，後鄭注云：「以作事業曰利。」貸種食即所以作事業，與先鄭此注義亦相成。賈疏云：「謂豐時斂之，凶時散之。其民無者，從公貸之，或爲種子，或爲食用，至秋熟還公。據公家爲散，據民往取爲貸，故云散利貸種食。」云「薄征，輕

租稅也」者，前注云「征，稅也」。賈疏云：「案《司稼》云：『巡野觀稼出斂法。』注云：『豐年從正，儉有所殺，若今十傷二三，實除減半。』是輕租稅也。」云「弛力，息繇役也」者，《說文·弓部》云：「弛，弓解也。」引申之，解釋繇役亦謂之弛。此經凡施舍字，鄭並讀爲弛，與此弛力義同。賈疏云：「案《均人》云：『豐年則公均用三日，中年則公均用二日，無年則公均用一日。』此云弛力，謂人食不能二鬴之歲，則移民就穀，無力役之事。故《均人》又云『凶札則無力政財賦』是也。」云「去幾，關市不幾也」者，幾謂苛察之。詳《宮正》及《司關》疏。賈疏云：「此後鄭不從，以其雖凶年猶幾呵，但去稅而已。」云「胥禮，掌客職所謂凶荒殺禮者也」者，葉鈔釋文引注「胥」作「省」。阮元云：「注訓殺禮，明胥爲省殺之意，故經作胥，注作省。陸所見注是省禮。今本注皆改作『胥禮』，非。」案：阮說是也。此經作胥，注作省，蓋亦經用古字，注用今字之例。胥卽省之借字。《釋名·釋天》云：「胥，省也。」《公羊》僖二十二年何注云：「殺，省也。」是胥殺同爲省減之義，故引《掌客》文爲證。但彼專據省賓禮，故後鄭補其義。賈疏謂後鄭不從先鄭，非。胥，互詳《大司馬》疏。云「多昏，不備禮而娶，昏者多也」者，賈疏云：「昏禮有六，并有玄纁束帛。凶荒爲昏，不可

備行此禮，使有女之家得減口數，有男之家易得其妻，故娶昏者多也。」詒讓案：《周書·羅匡篇》云：「大荒，嫁娶不以時。」孔注云：「不以時，秋冬也。媒氏會男女合之。」又《毛詩·衛風·有狐》序云：「古者國有凶荒，則殺禮而多昏，會男女之無夫家者，所以蕃育人民也。」又《召南》云：「野有死麕，白茅包之。有女懷春，吉士誘之。」傳云：「凶荒則殺禮，猶有以將之。」義並與此經合。云「索鬼神，求廢祀而修之」者，修，經注例並用借字作「脩」，唯此作修，疑誤。《淮南子·俶真訓》高注云：「求，索也。」是索，求義同。以凶荒，恐舊在祀典，今或廢缺，鬼神怨恫，而爲此災，故搜索修舉而祭之，覬以弭其災。若《呂氏春秋·懷寵篇》云「問其叢社大祠，民之所欲廢者，而復興之」是也。此廢祀無不搜索，其内外常祀，自有祈禱之祭可知。又案：此索鬼神謂在常祀之外者，與《黨正》「國索鬼神而祭祀」爲蜡祭異。又《六藝流別》引《尚書大傳》，說十二月各有索祀於四正、四隅之禮。於經無文，與此索廢祀亦不同也。云《雲漢》之詩所謂靡神不舉，靡愛斯牲者也」者，《詩·大雅》文。鄭箋云：「靡，無也。言王爲旱之故，求於羣神無不祭也，無所愛於三牲。」毛傳亦云：「國有凶荒，則索鬼神而祭之。」正本此經。至《左》莊二十五年傳云「凡天災，有

幣無牲」，杜注云：「天災，日月食、大水也。」是彼謂暫時遇災祈請之禮。其大荒禱祀，自牲幣兼有。賈疏謂天災之時，祈禱無牲；災成之後，即有牲體。失之。云「除盜賊，急其刑以除之，饑饉則盜賊多，不可不除也」者，賈疏云：「上文既言緩刑，其餘盜賊用急刑，乃上下文爲妨，故鄭云饑饉則盜賊多，不可不除，故須急其刑以除之。」云「杜子春讀蕃樂爲藩樂，謂閉藏樂器而不作」者，段玉裁云：「蕃藩義異。《說文》：『蕃，艸茂也。藩，屏也。』此易其字以易其義，鄭從之也。」賈疏云：「經云蕃者，是蕃育之字；故讀從藩，是藩閉之字。案《大司樂》云：『大凶大戕令弛縣。』注云：『弛，釋下之，若今休兵鼓之爲。』彼又云：『日月食，四鎮五嶽崩，諸侯薨，令去樂。』注云『去樂，藏之』，引《春秋傳》曰『壬午猶繹，萬人去籥』。萬言人，則去者不入，藏之可知。彼之二文，云令弛縣，據路寢常縣之樂釋下之；去樂，據廟中祭時暫縣之樂去而藏之。此云藩樂，謂閉藏樂器，據廟中祭祀藏去樂器而不作。若然，祭祀不作，明路寢常縣亦釋下之，互見其義。」詒讓案：《曲禮》云：「歲凶，年穀不登，君祭事不縣。」此息廟中之樂也。又《玉藻》云：「年不順成，天子食無樂。」此息路寢常縣之樂也。《周書·繹匡篇》云：「大荒，國不稱樂。」此通廟寢之樂言之也。但

此荒政蕃樂，宜與《大司樂》大凶弛縣相當。彼上文天地大災，乃云去樂。去樂與弛縣有輕重之異，則此蕃樂非即彼去樂矣。竊謂弛縣者，謂弛金石之樂，不必藏去；此藩樂者，亦謂弛縣之後，藩蔽不令人見，不必盡藏去也；若去樂，則盡斂所有樂器，藏之府庫，不徒藩之而已。杜讀蕃爲藩，甚塙。而釋爲閉藏，則與去樂義扞。賈不能辨，遂以蕃樂與去樂爲一，疏矣。云「玄謂去幾，去其稅耳」者，賈疏云：「破先鄭之義全不幾。後鄭必直去其稅猶幾之者，案《司關》云：『國凶札則無門關之征，猶幾。』明知司農之義非。」王氏《詳說》云：「門關與市異。《司市》曰：『國凶荒札喪，則市無征而作布。』去幾者，市之去幾也。門關所以防姦人之出入，不幾得乎！」案：先鄭說與《司關》文迂，後鄭破之是也。但幾是幾察，去稅不可以言去幾，後鄭說仍不可通。王說得之。蓋經云去幾，自指國中市廛言之。大凶，門關當詰姦盜，不宜無幾。若國市，爲貨賄所聚，固宜去幾，以來商賈。《司市》之「作布」，與此「去幾」，皆通商恤民之事也。云「舍禁，若公無禁利」者，《毛詩·大雅·雨無正》傳云：「舍，除也。」賈疏云：「案《左傳》襄公九年冬，公會晉侯伐鄭，同盟于戲。『晉侯歸，謀所以息民。魏絳請施舍，輸積聚以貸，自公以下，苟有積者，盡出之。』國無滯積，

亦無困人，公無禁利。」杜注云：「與民共」是也。」云「皆禮謂殺吉禮也」者，皆亦當作「省」。賈疏云：「此破先鄭之義。司農引《掌客職》『凶荒殺禮』證皆禮。後鄭之意，凶荒殺禮是總目之言，不專於吉禮。鄭知皆禮專是吉禮者，以其下有殺哀與皆禮相對，故知皆禮專是吉禮也。」案：賈說非也。後鄭亦同先鄭訓皆為殺，但先鄭引《掌客》文未備，故更足成之。吉禮對凶禮而言，凡五禮內，吉、賓、嘉諸禮通殺之，不徒如掌客殺賓禮。《雜記》云：「凶年祀以下牲。」《穀梁》襄二十四年傳云：「大侵之禮，鬼神禱而不祀。」《周書·羅匡篇》云：「年饑舉祭以薄，大荒有禱無祭，禮無樂。」是殺吉禮也。《穀梁傳》云：「大侵弛侯。」范注云：「弛，廢也。侯，射侯也。廢侯，不燕射。」《周書·大匡篇》云：「大荒，國不鄉射。」是殺嘉禮也。云「殺哀謂省凶禮」者，《廩人》注云：「殺猶減也。」《公羊》何注訓殺為省，謂減省喪禮，趨簡易也。《周書·羅匡篇》云：「大荒，喪禮無度，祭以薄資。」又《大匡篇》云：「哭不留日，庶人不獨葬。」是殺哀之事也。以保息六養萬民：一曰慈幼，二曰養老，三曰振窮，四曰恤貧，五曰寬疾，六曰安富。保息，謂安之使蕃息也。慈幼，謂愛幼少

也。產子三人與之母，二人與之餼，十四以下不從征。養老，七十養於鄉，五十異糧之屬。振窮，拊捋天民之窮者也。窮者有四：曰矜，曰寡，曰孤，曰獨。恤貧，貧無財業稟貸之。寬疾，若今癰不可事，不算卒，可事者半之也。安富，平其繇役，不專取。【疏】「以保息六養萬民」者，以下並平時安養民之政，不關凶荒之事。《大戴禮記·千乘篇》云：「司徒成長幼老疾孤寡，以時通于四疆。」《管子·入國篇》說九惠之教，亦與此六事略同。云「二曰養老」者，^①謂養庶人之老。《王制》云「司徒養耆老以致孝」是也。《羅氏》《養國老》及《外饗》、《酒正》、《槁人》云「饗耆老」，並通養四等之老。《遣人》「養老孤」，則又即《司門》「死政之老」，並與此異。注云「保息謂安之使蕃息也」者，《敘官》注云：「保，安也。」又前注云：「蕃，蕃息也。」息蕃義同。民必安而後能蕃息，故以保息連言。云「慈幼謂愛幼少也」者，《說文·心部》云：「慈，愛也。」《彖部》云：「幼，少也。」《釋名·釋言語》云：「慈，字也，字愛物也。」《月令》：「仲春，養幼少，存諸孤。」云「產子三人與之母，二人與之餼」者，《國語·越語》云：「越王句踐命人，生丈夫，二

① 「二」原訛「三」，據楚本改。

壺酒，一犬；生女子，二壺酒，一豚；生三人，公與之母；生二人，公與之餼。」韋注云：「母，乳母也。餼，食也。」鄭以周法無文，故引彼爲況。《管子·入國篇》云：「凡國都皆有掌幼。士民有子，子有幼弱不勝養爲累者，有三幼者無婦征，四幼者盡家無征，五幼又予之葆，受二人之食，能事而後止，此之謂慈幼。」亦其事也。云「十四以下不從征」者，賈疏云：「案《鄉大夫職》，國中七尺，野自六尺，皆從征。案《論語》云『可以託六尺之孤』，注云：『六尺謂年十五。』則十五從征，十四以下不從征可知。亦是愛幼之事也。」云「養老，七十養於鄉，五十異糧之屬」者，賈疏云：「案《王制》云：『五十養於鄉，六十養於國，七十養於學。』彼謂大夫士也。《王制》又云：『凡三王養老皆引年。』注云：『已而引戶校年，當行復除也。老人衆多，非賢者不可皆養。』故《食貨志》云『七十已上，上所養也』。此云七十養於鄉，亦謂有賢行者也。五十異糧者，是《王制》文。禮記常法，庶人食稷，士兼食黍，大夫又加以粱。今雖庶人，至五十，或與士大夫同食黍粱，故云異糧。」案：《王制》云：「五十異糧，六十宿肉，七十貳膳，八十常珍，九十飲食不離寢，膳飲從於遊。」鄭彼注云：「糧，糧也。」此不備引，故云「之屬」以咳之。依賈義，則庶人之老當七十養於鄉，八十

養於國，九十養於學，校大夫士之老養，遲二十年，故鄭引《王制》而易其文。《王制》孔疏引盧植、王肅說，謂五十養於鄉，即養庶人之老，非鄭義也。《羣書治要》引此注，作「七十養於學」，則疑據《王制》改，與賈本不同。又《管子·入國篇》云：「凡國都皆有掌老。年七十已上，一子無征，三月有饋肉；八十已上，二子無征，月有饋肉；九十已上，盡家無征，日有酒肉，死，上共棺槨。勸子弟，精膳食，問所欲，求所嗜，此之謂老老。」亦即養庶人之老之事。云「振窮，拊捄天民之窮者也，窮者有四，曰矜，曰寡，曰孤，曰獨」者，《釋文》云：「拊捄本亦作拯救。」《職幣》注云：「振猶拊也。」《說文·手部》云：「振，舉救也。」拊，上舉也，引《易》曰：「拊馬壯，吉。」今《易·明夷》爻辭，拊作拯。《漢書·董仲舒傳》顏注云：「捄，古救字。」是拊、拯、捄、救，字同。《左·昭十四年傳》「分貧振窮」，杜注云：「振，救也。」賈氏述注，捄亦作救，疏云：「案《王制》云：『老而無妻者謂之矜，老而無夫者謂之寡，少而無父者謂之孤，老而無子者謂之獨，此四者天民之窮而無告者也，皆有常餼。』鄭依此而言。」詒讓案：《王制》云：「司徒恤孤獨以逮不足。」《管子·五輔篇》云：「衣凍寒，食飢渴，匡貧窶，振罷露，資乏絕，此謂振其窮。」義亦通於此。云「恤貧，貧無財業稟貸

之」者，後注云：「恤，振憂貧者。」《說文·禾部》云：「粟，賜穀也。」賈疏云：「案《旅師》云：『凡用粟，春頒而秋斂之。』」注云：「困時施之，饒時收之。」是其恤貧之法。」云「寬疾，若今癰不可事，不算卒，可事者半之也」者，葉鈔《釋文》癰作「瘡」，宋婺州本同。案：《說文·疒部》云：「癰，罷病也。」瘡即癰之省。《小司徒》注云：「廢疾謂癰病也。」案：《荀子·王制篇》云：「五疾上收而養之，材而事之，官施而衣食之，兼覆無遺。」楊注云：「五疾，瘠、聾、跛、瘖、斷者、侏儒。」《管子·人國篇》云：「凡國都皆有掌養疾，聾、盲、暗、啞、跛、瘖、偏枯、握遞不耐自生者，上收而養之疾，官而衣食之，殊身而後止，此之謂養疾。」《莊子·人間世》篇說支離疏云：「上有大役，則支離以有常疾不受功，上與病者粟，則受三鍾與十束薪。」是周時寬疾不徒舍役，又給養矣。鄭引漢法者，孔廣森云：「《漢書·高帝紀》如淳注云：『律，高不滿六尺二寸已下，爲癰癰。』」是但以人癰矮者通謂之癰。若有癰疾者，別謂之癰不可事。其可事者，雖不服戎，猶任城道之役。《食貨志》曰：「常有更賦，罷癰咸出。」謂癰可事者也。」案：孔說是也。算卒即《漢書·昭帝紀》之更賦，顏注引如淳云：「更有三品，有卒更，有踐更，有過更。古者正卒無常人，皆當迭爲之，一月一更，是爲卒更

也。貧者欲得顧更錢者，次直者出錢顧之，月二千，是爲踐更也。天下人皆直戍邊三日，行者便住一歲一更，諸不行者，出錢三百人官，官以給戍者，是爲過更也。」此云不算卒，即不出更賦。可事半之，謂出更賦之半也。賈疏謂不算計以爲士卒，失之。」又案：《管子·度地篇》云：「閱其民，有錮病不可作者，疾之；可省作者，半事之。」此與漢法正同。云「安富，平其繇役，不專取」者，賈疏云：「言繇役均平，又不專取，則富者安。」以本俗六安萬民：一曰媼宮室，二曰族墳墓，三曰聯兄弟，四曰聯師儒，五曰聯朋友，六曰同衣服。本猶舊也。美，善也。謂約榘攻堅，風雨攸除，各有攸宇。族猶類也。同宗者，生相近，死相迫。連猶合也。兄弟，昏姻嫁娶也。師儒，鄉里教以道藝者。同師曰朋，同志曰友。同猶齊也。民雖有富者，衣服不得獨異。【疏】「以本俗六安萬民」者，此即上文十二教以俗教安，則民不偷之事。云「一曰媼宮室，二曰族墳墓」者，《周書·大聚篇》云：「男女有婚，墳墓相連，民乃有親；六畜有羣，室屋既完，民乃歸之。」《管子·揆度篇》云：「君終歲行邑里，其人力同而宮室美者，良萌也，力作者也，脯二束、酒一石以賜之。」即媼宮室族墳

墓之事。云「三曰聯兄弟」者，《釋文》云：「一本作聚兄弟。」阮元云：「鄭訓『連』於『兄弟』上，則作『聚』者非。」案：阮說是也。《呂氏春秋·上農篇》云：「苟非同姓，農不出御，女不外嫁，以安農也。」即此聯兄弟之事。注

云「本猶舊也」者，《廣雅·釋詁》云：「本，始也。」始與舊義近。本俗者，謂各安其舊俗也。云「美，善也」者，《士喪禮》注同。經作「媿」注作「美」者，亦經用古字，注用今字之例也。《廣韻·五旨》云：「美媿同。」錢大昕云：「媿，古美字。此字不見於《說文》。古文微與尾通，《堯典》『孽尾』，《史記》作『字微』；《論語》『微生畝』，《漢書》作『尾生畤』。媿从攷，當與媿通，《詩》『誰侑予美』，《韓詩》美作『媿』；《說文·女部》有媿字，則該乎媿矣。」案：錢說是也。《說文·女部》云：「媿，順也。」順善義亦相近。云「謂約榘攻堅，風雨攸除，各有攸字」者，約《小雅·斯干》文。彼序云：「斯干，宣王考室也。」詩云：「約之閣閣，榘之橐橐，風雨攸除，鳥鼠攸去，君子攸芋。」毛傳云：「約，束也。」鄭箋云：「約謂縮版也，榘謂搗土也。」賈疏云：「榘謂築之，橐橐用力，是其約榘攻堅。攸，所也。能使風雨所除。宇，居也。君子小人各有所居。引之者，證美宮室也。經云媿宮室，明不使華美，故以攻堅解之。」王引之云：「鄭注約舉

《詩》辭。攸字即攸芋也。鄭君注《禮》，時用《韓詩》。蓋《韓詩》芋作宇。」云「族猶類也，同宗者生相近，死相迫」者，《淮南子·俶真訓》高注云：「族，類也。」此族墳墓即《墓大夫》令民族葬之法，注云「族葬各從其親」是也。族葬蓋以先祖居中，子孫以昭穆居左右，所謂生相近，死相迫也。互詳《墓大夫》疏。云「連猶合也」者，此從今字讀聯為連也。《大宰》八法三曰官聯，先鄭注云：「聯讀為連，古書連作聯。」是聯連古今字。凡物相連屬則合并，故連引申之亦訓合也。云「兄弟，昏姻嫁娶也」者，賈疏云：「案《爾雅·釋親》云：『父之黨為宗族，母與妻黨為兄弟。』則兄弟之名，施於外親為正。又案《喪服·記》『兄弟皆在外邦』及『與兄弟居』，彼皆據同宗小功已下。知此兄弟是婚姻非是同宗者，見上云『族墳墓』是同宗，明此兄弟施於外姓婚姻，故《爾雅》又云『婦之黨為昏兄弟』。夫婦相名亦為兄弟，故《曾子問》曰『不得嗣為兄弟』。是以知兄弟是昏姻也。」詒讓案：《詩·小雅·黃鳥敍》箋云：「刺其以陰禮教親而不至，聯兄弟之不固。」孔疏引此經注而釋之云：「是謂夫婦為兄弟也。夫婦而謂之兄弟者，《列女傳》曰：『執禮而行兄弟之道。』何休亦云：『圖安危可否，兄弟之義。』故比之也。」案：孔說未咳。此經兄弟謂異姓兄弟也，與《調人》

「兄弟之讎」、「從父兄弟之讎」，《大宗伯》「以服膺之禮親兄弟之國」，專指同姓者異。夫婦有兄弟之道，因之外親相謂爲兄弟。故《釋親》云：「婦之黨爲婚兄弟，婿之黨爲姻兄弟。」郭注云：「古者皆謂婚姻爲兄弟。」《公羊》僖二十五年傳云：「宋蕩伯姬來逆婦。其言來逆婦何？兄弟辭也。」何注云：「宋魯之間，名結婚姻爲兄弟。」《穀梁》宣十年傳云：「公娶齊，齊由以爲兄弟。」《喪服·總麻三月章》云：「姑之子」，鄭注云：「外兄弟也。」此婚姻兄弟也。《釋親》又云：「從母之男子，爲從母舅弟。」《喪服·總麻三月章》云：「從母昆弟」，又云「舅之子」，鄭彼注云：「內兄弟。」是母黨之兄弟也。異姓兄弟當兼此數者。孔偏據夫婦爲釋，非經義。又案：此兄弟謂外親，蓋通於尊卑之稱。《服問》云：「有從無服而有服，公子之妻爲公子之外兄弟。」注云：「爲公子之外祖父母，從母，總麻。」是凡外親尊屬，亦得稱兄弟，不必倫敘相當矣。云「師儒鄉里教以道藝者」者，即《大宰》九兩之「師以賢得民，儒以道得民」者也。賈疏云：「以其鄉立庠，州黨及遂皆立序，致仕賢者，使教鄉閭子弟，鄉閭子弟皆相連合同就師儒，故云連師儒也。」云「同師曰朋，同志曰友」者，《白虎通義·三綱六紀篇》云：「朋者黨也，友者有也。」《禮記》曰：「同門曰朋，同志曰友。」《司諫》疏

引鄭《論語注》、《公羊》定四年徐疏引《倉頡篇》，並與《逸禮》同。《論語·學而》皇疏云：「同處師門曰朋，同執一志爲友。」然則同門與同師文異義同。云「同猶齊也」者，《毛詩·小雅·車攻》傳云：「同，齊也。」《墨子·經上篇》云：「同異而俱之於一也。」云「民雖有富者，衣服不得獨異」者，賈疏云：「士已上衣服皆有采章，庶人皆同深衣而已，故云民雖有富者衣服不得獨異，並皆齊等也。」詒讓案：《後漢書·王符傳》李注引《尚書大傳》云：「古之帝王必有命。民能敬長矜孤、取舍好讓者，命於其君，然後得乘飾車駟馬、衣文錦；未有命者，不得衣，不得乘，乘衣者有罰。」《春秋·僖公·服制篇》云：「散民不敢服雜采，百工商賈不敢服狐貉，刑餘戮民不敢服絲玄纁。」此亦同衣服之一端與？正月之吉，始和布教于邦國都鄙，乃縣教象之灋于象魏，使萬民觀教象，挾日而斂之，乃施教灋于邦國都鄙，使之各以教其所治民。正月之吉，周正月朔日也。司徒以布王教，至正歲，又書教法而縣焉。【疏】「正月之吉始和布教于邦國都鄙」者，自此至職末並大司徒當官專領之職事，所謂官常也。此以周正建子之月吉日，布教於天下。和當讀爲宣，詳《大

宰《疏》。云「乃縣教象之灋于象魏，使萬民觀教象」者，教象之法，卽十二教及鄉三物之類。司徒於布教之日，卽縣教象於象魏，使萬民觀之也。天子象魏在庫門，亦詳《大宰》疏。云「乃施教灋于邦國都鄙，使之各以教其所治民」者，賈疏云：「若據邦國，使諸侯教所治民，若據都鄙，則使公卿大夫教所治民。」注云「正月之吉，周正月朔日也」

者，《大宰》注義同。云「司徒以布王教」者，賈疏云：「案《大宰》注云『布王治之事於天下』。此不言天下，注文略。邦國都鄙則亦天下也。」云「至正歲，又書教法而縣焉」者，鄭以乃縣教象之法以下爲正歲夏正建寅月之事，與《小司徒》云「正歲則帥其屬而觀教法之象」爲一。然與經承正月之吉者不合，其說非也。詳《大宰》疏。令五家爲比，使之相保；五比爲閭，使之相受；四閭爲族，使之相葬；五族爲黨，使之相救；五黨爲州，使之相賙；五州爲鄉，使之相賓。此所以勸民者也。使之者，皆謂立其長而教令使之。保猶任也。救，救凶災也。賓，賓客其賢者。故書受爲授，杜子春云：「當爲受，謂民移徙所到則受之，所去則出之。」又云：「賙當爲糾，謂糾其惡。」玄謂受者，宅舍有故，相受寄託也。

賙者，謂禮物不備，相給足也。閭二十五家，族百家，黨五百家，州二千五百家，鄉萬二千五百家。【疏】「令五家爲比，使之相保」者，此制六鄉比伍之法也。與遂人六遂法同而名異。鄉民相聚爲小部，始於一比五家，比長治之。五家數既少，居又相比，有罪過不容不知，故使相保任。《比長》云：「五家有臯奇衰則相及。」因平時相保，故有罪過則相及矣。云「五比爲閭，使之相受」者，一閭二十五家，閭胥治之。比止五家，不能成城邑，則鄉邑蓋自二十五家爲始。既同處一邑，則宅舍得相容受以居。《比長》云「五家相受」，遂官鄰長亦同。則相受不定二十五家，經各舉一耑，事實通也。云「四閭爲族，使之相葬」者，一族百家，族師治之。相葬謂有喪葬則四閭之人會助其執紼、下棺、實土之事。《族師》云「以相葬埋」，《鄉師》云「族共喪器」；《既夕禮》云「寔實土三，主人拜鄉人」；《雜記》云「鄉人五十者從反哭，四十者待盈坎」；《荀子·禮論篇》亦云「庶人之喪，合族黨，動州里」是也。云「五族爲黨，使之相救」者，一黨五百家，黨正治之。相救謂以力相振助也。《孟子·滕文公篇》云：「鄉田同井，守望相助，疾病相扶持。」亦相救之事。賈疏云：「民有凶禍者，使民相救助。」云「五黨爲州，使之相賙」者，一州二千五百家，州長治之。相賙謂以

財相補給也。云「五州爲鄉，使之相賓」者，一鄉萬二千五百家，爲一總部，鄉大夫治之。《國語·齊語》云：管子制國以爲二十一鄉，五家爲軌，十軌爲里，四里爲連，十連爲鄉。則以二千家爲一鄉，與此經萬二千五百家爲一鄉，家數迥殊，非周制也。相賓卽《鄉師》云「三年則大比，攷其德行道藝，而興賢者能者，鄉老及鄉大夫帥其吏與其衆寡，以禮禮賓之」。注云：「以鄉飲酒之禮，禮而賓之。」又先鄭注云：「賓，敬也，敬所舉賢者，能者。」案：彼衆寡卽鄉內之民，有賢能則相與會集賓敬之也。注云「此所以勸民

者也」者，謂此經六事雖官施其令，而實則皆勸民自相爲之事也。云「使之者，皆謂立其長而教令使之」者，長卽鄉吏。謂大司徒令其長，長又各以大司徒之教令，使其所治之民也。云「保猶任也」者，《說文·人部》云：「保，養也。任，保也。」保本訓養，引申爲相保任之義。《管子·大匡篇》云：「吾權任子以死生。」尹注云：「任，保也。」《方言》郭注云：「保言可保信也。」此五家爲比，亦使之相保信不爲惡，若《大司寇》云「使州里任之」。云「救，救凶災也」者，謂有凶災之事，相與拯救也。云「賓，賓客其賢者」者，卽後文賓興之事，謂有賢者，則以鄉飲酒之禮賓客尊敬之也。云「故書受爲授，杜子春云當爲受」者，據《族師》云「使之相保相

受」，與此文同。《士師》亦云「掌鄉合州黨族閭比之聯，使之相安相受」，故杜依之改字。徐幹《中論·譴交篇》述此經作「相憂」，蓋形近而誤。段玉裁云：「此與《典婦功》同。但此經文已易，彼經文未易而出故書於注，全書體例不必畫一也。」徐養原云：「《典婦功》注以授爲聲之誤。然《周禮》受字故書多作授，古者授受通用。《掌葛》以權度受之，故書亦或爲授。」云「謂民移徙，所到則受之，所去則出之」者，《鶡冠子·王鈇篇》說制邑理都之法云：「若有所移徙去就，家與家相受，人與人相付，亡人姦物無所穿竄。」是

民移徙有相受之法也。賈疏云：「案《比長職》云「五家相受相和親」，與此文同，皆謂一閭之內無出入之法。《比長職》又云：「徙於國及郊，則從而授之。」注云：「徙謂不便其居也。或國中民出徙郊，或郊民入徙國中。」彼是出鄉閭外，與此閭內自相容受不同，故後鄭易之以爲宅舍有故，相受寄託解之。」詒讓案：杜說與《鶡冠子》合，義亦可通。至《比長》所云授者，謂官與官相授，非民間自相授受之事，與此不相涉也。云「調當爲糾」者，據《州長》云：「正月之吉，各屬其民而讀法，以考其德行道藝而勸之，以糾其過惡而戒之。」又，遂官《鄰長》云：「掌相糾相受。」此上亦有相受之文，故杜依彼二文讀調爲糾也。段玉裁云：「漢時小

篆蓋無調字，故杜易其字，如易軒爲軹之比。鄭君則取從貝周爲說，所謂就其字之聲類考訓詁，摭祕逸也。《鄉師》「調萬民之難陋」，鄭司農云：「調讀爲周急之周。」《說文》無調字，許意蓋謂周是調非。其實《論語》周字是假借，《周禮》調是正字。《孟子》作周，不從貝。丁晏云：「調糾聲相近，《說文》·木部《桐讀若り》，是其例也。」云「謂糾其惡」者，《鄰長》注云「相糾，相舉察」是也。後鄭以相調義自可通，故不從杜說。云「玄謂受者，宅舍有故相受寄託也」者，此從杜讀而義微異。《說文》·受部云：「受，相付也。」謂不安其宅舍，以人物相付託容受也。云「調者，謂禮物不備，相給足也」者，《一切經音義》引《字林》云：「調，贍也。」《鄉師》調，先鄭讀爲周。《詩》·大雅·雲漢篇「靡人不周」，毛傳云：「周，救也。」《月令》「開府庫，出幣帛，周天下」，注云：「周謂給不足也。」周調古今字。禮物不足，謂家貧不能給昏喪之禮，則同州之人出私財以給足之。云「閭二十五家以下」者，賈疏云：「案此經五家爲比，五州爲鄉，轉相增，故其家數可知。」①程瑤田云：「鄉凡萬二千五百家，如此者六，綜計之，受地凡七萬五千家也。」頒職事十有二于邦國都鄙，使以登萬民。一曰稼

穡，二曰樹藝，三曰作材，四曰阜蕃，五曰飭材，六曰通財，七曰化材，八曰斂材，九曰生材，十曰學藝，十有一曰世事，十有二曰服事。鄭司農云：「稼穡謂三農生九穀也。樹藝謂園圃育草木。作材謂虞衡作山澤之材。阜蕃謂藪牧養蕃鳥獸。飭材謂百工飭化八材。通財謂商賈阜通貨賄。化材謂嬪婦化治絲枲。斂材謂臣妾聚斂疏材。生材謂閭閻民無常職，轉移執事。學藝謂學道藝。世事謂以世事教能，則民不失職。服事謂爲公家服事者。」玄謂生材，養竹木者。【疏】「頒職事十有二于邦國都鄙，使以登萬民」者，頒訓分，詳前疏。賈疏云：「大司徒主天下人民之數，故頒下民之職事十有二條於天下邦國及畿內都鄙，使以登成萬民。此經不言鄉遂及公邑者，舉外以包內，司徒親主鄉遂公邑，頒之可知。」云「一曰稼穡」者，賈疏云：「已下即大宰九職。大宰既掌之，此又重掌者，以大宰尊官，總知其數，此司徒是主民之官，親自頒行，義各有異也。」江永云：「職事十有二，稼穡至生材，即大宰之九職。其學藝、世事、服事，此三職

① 原脫「家」，據賈疏及楚本補。

非生材之人。」案：江說是也。大宰任民，主於理財，故止有九職。此官主於教民，故十二職通頒之。以《鄉大夫職》參考之，學藝、世事即賢能，服事即服公事，三者皆有復，故爲九職民貢所不及矣。云「二曰樹藝」者，藝，石經作藝，與下學藝字同。今從宋本作藝。阮元謂唐人之例，樹藝字作「藝」，道藝字作「藝」，是也。上文「辨十有二壤之物，而知其種，以教稼穡樹藝」，字亦作藝。然依《說文》，則樹藝、學藝，字並當作「執」，藝藝皆執之俗。注鄭司農云「稼穡謂三農生九穀也」者，自稼穡至生材，先鄭皆取大宰九職爲釋。《敘官》注云：「種穀曰稼。」《說文·禾部》云：「穀可收曰穡。」《毛詩·魏風·伐檀》傳云：「種之曰稼，斂之曰穡。」故以種穀爲稼穡。云「樹藝謂園圃育草木」者，《大宰》育作毓，此作育者，亦用今字也。宋本及俗本並作毓，非。樹藝者，種果木蔬菜之通稱。賈疏據前注以藝爲種黍稷，則與稼穡文複，非也。並詳前疏。云「作材謂虞衡作山澤之材，阜蕃謂數牧養蕃鳥獸，飭材謂百工飭化八材」者，並與《大宰》文同。上文云「以阜人民，以蕃鳥獸」。此以阜蕃專屬鳥獸者，上注云：「阜猶盛也。蕃，蕃息也。」盛與息義相成，故此兼阜言之。云「通財謂商賈阜通貨賄」者，財與貨賄義通。《說文·貝部》「貨賄同訓財」。詳《大宰》疏。云

「化材謂嬪婦化治絲枲」者，絲枲卽女工所用之材，故云化材。云「斂材謂臣妾聚斂疏材」者，與《大宰》文同。云「生材謂閒民無常職轉移執事」者，賈疏云：「司農之意，此閒民在第九，當《大宰》『九曰閒民無常職』，故以閒民解生材也。但周公制禮，大宰任民無常職，於此頒職事，不可頒無常職使民行之，故後鄭易之以爲養竹木解之。」江永云：「先鄭得之。閒民執事於農工商賈虞衡之家，皆所以生材。後鄭謂養竹木者，非是。」案：江說是也。閒民雖無常職，而轉移執事卽是其職，故《大宰》列之九職，此列之十二職事，明非無職也。賈疏駁先鄭謂頒職事不可頒無職事，誤。云「學藝謂學道藝」者，《大司樂》「凡有道有德者，使教焉」。後鄭注云：「道，多才藝者。」案：學道藝謂學士也。道藝同訓。經有兼言道藝者，《宮正》及《鄉大夫》諸文是也。有單言道者，道卽兼藝，《大宰》及《保氏》、《大司樂》諸文是也。此經又單言藝，藝亦卽兼道，亦詳《宮正》疏。云「世事謂以世事教能則民不失職」者，據前十二教經爲釋。蔣載康云：「世事，累世專業相傳，凡巫醫卜筮諸藝事。與前十二教世事別，以農工商賈及士已見於前也。」江永說同。案：江、蔣說是也。《王制》云：「祝、史、射、御、醫、卜及百工凡執技以事上者，不貳事，不移官。」彼執技，自百工外，

並此所謂世事也。先鄭及賈疏並謂此與前十二教之世事同。但彼世事總指士農工商四民言之，此十二職一稼穡，五飭材，六通財，十學藝，四民已包舉無遺，則世事不得通四民言，與彼微異也。云「服事謂爲公家服事者」者，與《鄉大夫》服公事者義同。賈疏云：「謂若府史胥徒、庶人在官者，是公家服事者也。」云「玄謂生材養竹木者」者，《大宰》注云：「生猶養也。」賈疏云：「此後鄭破司農之義。案《大宰》事典云『以生萬民』，《小宰》事職云『以養萬民』，則知生爲養。山虞、林衡別官，則知此生材養竹木在於平地，林衡所掌是也。」案：養竹木已略於「三曰作材」中，不當別爲職事，後鄭及賈說非也。以鄉三物教萬民而賓興之。一曰六德，知、仁、聖、義、忠、和；二曰六行，孝、友、睦、婣、任、恤；三曰六藝，禮、樂、射、御、書、數。物猶事也，興猶舉也。民三事教成，鄉大夫舉其賢者能者，以飲酒之禮賓客之，既則獻其書於王矣。知，明於事。仁，愛人以及物。聖，通而先識。義，能斷時宜。忠，言以中心。和，不剛不柔。善於父母爲孝，善於兄弟爲友。睦，親於九族。姻，親於外親。任，信於友道。恤，振憂貧者。禮，五禮之義。樂，六樂之歌舞。

射，五射之法。御，五御之節。書，六書之品。數，九數之計。【疏】「以鄉三物教萬民而賓興之」者，此即六鄉大夫賓興賢能之事。上文云「五州爲鄉，使之相賓」。鄉三物者，教鄉學之官法，大司徒頒之六鄉之吏，使教於鄉庠、州序、黨序及四郊虞庠之等，有此三事也。《大戴禮記·王言篇》云：「昔者明王之治民有法，必別地以州之分屬而治之。然後賢民無所隱，暴民無所伏，使有司日省如時考之，歲誘賢焉，則賢者親，不賢者懼。」《漢書·食貨志》說里序之教云：「其有秀異者，移鄉學於庠序；庠序之異者，移國學於少學。」此所賓興，即賢能秀異鄉民之三物克備者也。云「一曰六德，知仁聖義忠和，二曰六行，孝友睦婣任恤」者，《師氏》注云：「德行，內外之稱，在心爲德，施之爲行。」案《師氏》云：「以三德教國子，一曰至德，以爲道本；二曰敏德，以爲行本；三曰孝德，以知逆惡。教三行，一曰孝行，以親父母；二曰友行，以尊賢良；三曰順行，以事師長。」彼三德與此六德全異，三行亦唯孝友與此六行同。又《大司樂》云：「以樂德教國子，中和祗庸孝友。」《大師》亦謂之六德。彼中和即此忠和，而孝友又取之三行，並與此不同。蓋教本多術，此官通教萬民，與大司樂教大學，師氏教小學，各舉一耑，亦互相備也。云「三曰六藝，禮樂射御

書數」者，與《保氏》同。御，《羣書治要》引作「馭」，與《保氏》「五馭」字同，是也。此經例，凡馭車字作「馭」，侍御字作「御」，二字較然不同，石經及宋以來刻本並誤。注

云「物猶事也」者，亦引申之義。《小爾雅·廣詁》云：「物，事也。」云「興猶舉也」者，《遂大夫》、《大司馬》注並同。《廣雅·釋詁》云：「興，舉也。」《鄉大夫》注云「變舉言興者，謂合衆而尊寵之」是也。云「民三事教成，鄉大夫舉其賢者能者，以飲酒之禮賓客之，既則獻其書於王矣」者，《鄉大夫》云：「三年則大比，攷其德行道藝，而興賢者能者，鄉老及鄉大夫帥其吏與其衆寡，以禮禮賓之。厥明，鄉老及鄉大夫羣吏獻賢能之書于王。」彼注釋「以禮禮賓之」云「以鄉飲酒之禮禮而賓之」，故此注亦舉鄉飲酒爲說。云「知，明於事」者，《說文·口部》云：「知，詞也。」又《白部》云：「虧，識詞也。」凡論德者，並虧之段字，隸省作智。《羣書治要》引此經注並作智。《釋名·釋言語》云：「智，知也，無所不知也。」《白虎通義·情性篇》云：「智者知也，獨見前聞，不惑於事，見微知著也。」云「仁，愛人以及物」者，《說文·人部》云：「仁，親也。」《白虎通義·情性篇》云：「仁者，不忍也，施生愛人也。」《莊子·天地篇》云：「愛人利物謂之仁。」《大玄經·玄攤》云：「同愛天下之物，無有偏私，故謂之

仁。」云「聖，通而先識」者，《說文·耳部》云：「聖，通也。」《毛詩·邶風·凱風》傳云：「聖，睿也。」《洪範》「睿作聖」，僞孔傳云：「於事無不通謂之聖。」《文獻通考·郊社考》引《五行傳》「思心之不容，是謂不聖」。鄭注云：「心明曰聖。」《白虎通義·聖人篇》云：「聖者通也，道也，聲也，道無所不通，明無所不照，聞聲知情。」案：依鄭義，此聖德即明達之稱，與知德略同。但知者事至不惑，聖則博通先識耳。《鄉飲酒義》云：「仁義接，賓主有事，俎豆有數，曰聖。」彼注亦訓爲通，即此義，並與聖神之聖異也。賈疏云：「案襄二十二年：『臧武仲如晉，雨，過御叔，御叔在邑，將飲酒，曰：焉用聖人。』何休云：『說《左氏傳》者曰：『《春秋》之志，非聖人孰能脩之。』言夫子聖人，乃能脩之。御叔謂臧武仲爲聖人，是非獨孔子。」玄箴之曰：「武仲者，述聖人之道，魯人稱之曰聖。今使如晉，過御叔，御叔不說學，見武仲而雨行，傲之云『焉用聖人爲』。」《左氏傳》載之者，非御叔不說學，不謂武仲聖與孔子同。」若然，此云聖，亦與武仲同，是皆述聖人之道。」云「義，能斷時宜」者，若《中庸》云：「義者，宜也。」《白虎通義·情性篇》云：「義者，宜也，斷決得中也。」云「忠，言以中心」者，《大戴禮記·曾子大孝篇》云：「忠者，中此者也。」《賈子·道術》云：

「愛利出中謂之忠。」《國語·周語》云：「考中度衷爲忠。」《說文·心部》云：「忠，敬也。從心中聲。」又《中部》云：「中，內也。」此注依聲爲訓，言內盡心之敬是爲忠也。《大司樂》「中和」，注云：「中猶忠也。」二字互訓，與此注同。云「和，不剛不柔」者，《大司樂》注云：「和，剛柔適也。」《春秋繁露·循天之道篇》云：「夫德莫大於和，而道莫正於中。中者天地之美達理也，聖人之所保守也。」《詩》云：「不剛不柔，布政優優」。此非中和之謂與？「董子以不剛不柔通屬中和，鄭君以不剛不柔專屬和者，彼中和通言，此中和爲六德之一，義訓各別，故鄭分釋之也。」云「善於父母爲孝，善於兄弟爲友」者，《大司樂》注義同。《爾雅·釋訓》云：「張仲孝友，善父母爲孝，善兄弟爲友。」《賈子·道術》云：「子愛利親謂之孝，兄敬愛弟謂之友。」《師氏》云「友行以尊賢良」，與此注及《爾雅》不同者，內據親屬則曰兄弟，外據朋友則曰賢良，義得互含，不相妨也。云「睦，親於九族」者，《說文·目部》云：「睦，目順也。一曰敬和也。」《坊記》云「睦於父母之黨」，鄭注云：「睦，厚也。」賈疏云：「《堯典》云「九族既睦」，是睦親於九族也。九族者，上至高祖，下至玄孫，旁及總麻之內也。」案：賈說九族，與《尚書釋文》引馬、鄭說同，蓋卽約鄭《書注》義。《後漢書·班固

傳》李注引鄭《書注》亦云「睦，親也」。云「姻，親於外親」者，《說文·女部》云：「姻，婿家也。女之所因故曰姻。重文嫺，猶文姻從嫺。」此經作嫺，注作姻，蓋亦經用古字，注用今字之例。《詩·邶風·燕燕》箋及《羣書治要》引經並作姻。《爾雅·釋親》云：「婿之父爲姻。」《左·僖五年傳：「江、黃、道、柏，方睦於齊，皆弦姻也。」杜注云：「姻，外親也。」案姻本爲外親之名，引申之，親於內外親亦謂之姻。《賈子新書·傳職篇》云：「天子不姻於親戚，不惠於庶民。」賈疏云：「上云睦施於九族，明此姻是親於外親也。」《左傳》云「士踰月，外姻至」。亦據外親之等。外親者，則妻族、母族是也。」云「任，信於友道」者，《詩·邶風·燕燕》箋云：「任，以恩相親信也。」《大戴禮記·文王官人篇》「觀其任廉」，盧注云：「任，以信相親也。」《史記·季布傳·集解》引孟康云：「信交道曰任。」賈疏云：「謂朋友有道德，則任信之，故《論語》云「信則人任焉」是也。」云「恤，振憂貧者」者，前注云：「恤謂災危相憂。」《說文·心部》云：「恤，憂也，收也。」鄭《中庸》注云：「振猶收也。」云「禮，五禮之義」者，據下經及《保氏》、《大宗伯》文。五禮通賅吉凶，其節文隆殺，各有精義，若《禮記·射義》、《燕義》之等是也。云「樂，六樂之歌舞」者，亦據下經及《保氏》、《大司樂》文。

云「射，五射之法，御，五御之節，書，六書之品，數，九數之計」者，並據《保氏》文。御，並當依《保氏》經注作馭。賈疏云：「書言品者，形聲處事，差品不同。數言計者，有多少算計。」案五禮以下名義，並詳《保氏》疏。以鄉八刑糾萬民：一曰不孝之刑，二曰不睦之刑，三曰不姻之刑，四曰不弟之刑，五曰不任之刑，六曰不恤之刑，七曰造言之刑，八曰亂民之刑。糾猶割察也。不弟，不敬師長。造言，訛言惑衆。亂民，亂名改作，執左道以亂政也。鄭司農云：「任謂朋友相任，恤謂相憂。」【疏】「以鄉八刑糾萬民」者，此即十二教以刑教中則民不誡之事。鄉八刑，刑之行於鄉中者。司徒掌六鄉，故兼掌其刑，《大司寇》五刑三曰鄉刑是也。二云「一曰不孝之刑」者，《孝經》云：「五刑之屬三千，而罪莫大於不孝。」《大司寇》鄉刑亦云「上德糾孝」，故此鄉刑亦以不孝爲首。賈疏云：「上設三物教萬民，民有不從教者，則設刑以刑之。上三物有六德、六行、六藝。六德六藝不設刑，獨於六行設刑者，鄭注《師氏》云：『在身爲德，施之爲行。』德爲在身，不施於物，六藝亦是在身之能，不施於人，故二者不設刑。其行並是施之於人，恐有愆負，故設刑以防之也。」

造言亂民，民中特害，故六行之外，別加此二刑。」注云

「糾猶割察也」者，《小宰》注義同。云「不弟，不敬師長」者，《孟子·告子篇》云：「徐行後長者謂之弟，疾行先長者謂之不弟。」趙注云：「弟，順也。」《賈子·道術篇》云：「弟敬愛兄謂之悌。」《周書·謚法篇》孔注云：「不悌，不遜順也。」悌即弟之俗。案《師氏》三行云：「二曰友行，以尊賢良；三曰順行，以事師長。」依鄭說，此不弟似兼含不順爲義。但彼師長，長當謂官長；此注則似主長老而言，義亦微異也。賈疏云：「此不弟，即上六行友是也。上文在睦姻之上，此變言弟退在睦姻之下者，上言友，專施於兄弟；此變言弟，兼施於師長，故退在睦姻之下。」云「造言，訛言惑衆」者，《大宰》注云：「造，作也。」《詩·小雅·沔水》「民之訛言」，^①箋云：「訛，僞也。」謂造作僞妄之言，以惑衆聽。《禁暴氏》禁庶民之作言語而不信者，亦其類也。云「亂民，亂名改作，執左道以亂政也」者，《王制》云：「析言破律，亂名改作，執左道以亂政，殺。」鄭彼注云：「亂名改作，謂變易官與物之名，更造法度。左道，若巫蠱及俗禁。」孔疏云：「盧云：左道謂邪道。地道尊右，右爲貴，故《漢

① 「沔」原訛「河」，據《詩經·小雅》改。

書云「右賢左愚」「右貴左賤」。故正道爲右，不正道爲左。」案：《荀子·正名篇》云：「析辭擅作名，以亂正名，使民疑惑，民多辨訟，則謂之大姦，其罪猶爲符節度量之罪也。」此即古亂民之刑也。又案：禁暴氏禁庶民之亂暴力正者，司虺掌市禁，亦有虺亂之禁，則亂民當亦兼有暴亂之民矣。鄭司農云「任謂朋友相任」者，上六行注云：「任，信於友道者。」二鄭義同。云「恤謂相憂」者，詳前疏。以五禮防萬民之僞而教之中，禮所以節止民之侈僞，使其行得中。鄭司農云：「五禮謂吉凶賓軍嘉。」【疏】「以五禮防萬民之僞而教之中」者，此即十二教「以祀禮教敬則民不苟，以陽禮教讓則民不爭，以陰禮教親則民不怨」之事。《稻人》云：「以防止水。」《經解》云：「夫禮禁亂之所由生，猶防止水之所自來也。」坊即防之俗。蓋防爲止水之隄，引申爲防檢之義。上六藝已咳五禮六樂，但彼是教民興藝之事，此更以禮樂教化萬民，故別言之。賈疏云：「案《禮記·樂記》云：『禮者著誠去僞。』故以禮防萬民之僞而教之中，使得中正也。」注云「禮所以節止民之侈僞，使其行得中」者，《王制》云：「司徒脩六禮，以節民性。」《樂記》云：「禮節民心。」《白虎通義·禮樂篇》云：「禮所以防淫

佚，節其侈靡也。」上文十二教云「以儀辨等，則民不越」，教中即使之不越禮也。鄭司農云「五禮，謂吉凶賓軍嘉」者，據《大宗伯》文。《王制》云：「六禮：冠、昏、喪、祭、鄉、相見。」彼六者以事別，與五禮亦互通也。以六樂防萬民之情，而教之和。樂所以蕩正民之情思，使其心應和也。鄭司農云：「六樂謂《雲門》、《咸池》、《大韶》、《大夏》、《大濩》、《大武》。」【疏】「以六樂防萬民之情而教之和」者，此即十二教「以樂教和則民不乖」之事。注云

「樂所以蕩正民之情思，使其心應和也」者，《樂記》云：「樂和民聲。」又云：「樂也者，可以善民心，其感人深，其移風易俗易。」《白虎通義·禮樂篇》云：「樂所以蕩滌，反其邪惡也。」即蕩正民之情思，使其心應和之事也。鄭司農云「六樂謂《雲門》、《咸池》、《大韶》、《大夏》、《大濩》、《大武》」者，《釋文》詔作招，云「本亦作韶」。又云「濩，本亦作護」。案：招、韶、護、濩，字並通。詳《大司樂》疏。凡萬民之不服教而有獄訟者，與有地治者聽而斷之，其附于刑者，歸于士。不服教，不厭服於十二教，貪冒者也。爭罪曰獄，爭財曰訟。有地治者，謂鄉州及治都鄙者也。附，麗也。士，司寇、士師之屬。鄭司農云：「與

有地治者聽而斷之，與其地部界所屬吏共聽斷之。士謂主斷刑之官。《春秋傳》曰：「士榮爲大士。」或謂歸于圜土，圜土謂獄也，獄城圜。【疏】「凡萬民之不服教而有獄訟者，與有地治者聽而斷之」者，賈疏云：「上以禮樂化民，而萬民不厭服十二教，則鬪爭起。有獄訟者，將斷割之時，恐其獄訟不審，故與其有地治者謂治民之官，共聽而斷之。」云「其附于刑者師于士」者，以司徒雖掌鄉八刑，而獄訟之事必屬之刑官也。其官刑扑罰以下，則司徒專斷之。賈疏云：「若有小罪，則司徒決之。其附於五刑，則歸於士，使秋官士師之等斷之。」注云「不服教，不厭服於十二教，貪冒者也」者，厭，賈述注作「厭」。疏云：「上以十二教教民，使不貪冒，其民有不厭服於十二教，即是貪冒之人也。厭有二種：有嫌厭，有厭厭之厭，謂若祭禮有陰厭之類是也。此言不厭服十二教者，謂不厭厭服行十二教也。」阮元云：「賈疏有嫌厭、厭厭、陰厭，字皆作古厭字，是賈氏所據鄭注作厭也。依《說文》「厭服」，字當從尸。」案：阮校是也。《釋文》：「厭，於涉反，或於驗反。」賈作厭，與陸引或音同。依陸前音，則字當作厭。《說文·尸部》云：「厭，箝也，一曰合也。」字亦作壓，《公羊》文十四年，何注云：「壓，服也。」《漢書·刑法志》云：「獄疑，於人心不厭者，輒讞

之。」此與許書合義相近。賈疏厭厭之訓，恐非鄭意。貪冒者，《左》文十八年傳「貪于飲食，冒于貨賄」。杜注云：「冒亦貪也。」云「爭罪曰獄」者，《呂氏春秋·孟秋紀》高注同。《大司寇》云「以兩劑禁民獄」，注云：「獄謂相告以罪名者。」鄭意凡言獄者，並謂以干犯罪名之事相告發，或已有罪而抵誣他人，若此者並謂之獄也。云「爭財曰訟」者，《呂氏春秋》高注同。《大司寇》云「以兩造禁民訟」，注云：「訟謂以財貨相告者。」《說文·言部》云：「訟，爭也。」《易·訟》釋文引鄭《易注》云：「辯財曰訟。」《玉燭寶典》引《月令章句》云：「獄，爭罪也。訟，爭辭也。」案：爭財謂以財貨取與相抵冒而告之官者。然經凡獄訟對文者，獄大而訟小也。鄭謂以爭罪爭財爲異，似非經義。獄訟散文亦通，詳《大司寇》疏。云「有地治者，謂鄉州及治都鄙者也」者，賈疏云：「司徒主六鄉，明知有鄉州也。案上經布教於都鄙，明地治之內兼有都鄙可知。」詒讓案：鄭意此云有地治者，猶《遂大夫》云屬其地治者，亦猶《蜡氏》云有地之官。在六鄉則爲鄉州之吏，在采地則爲都鄙之吏，此皆有聽獄訟之事，故《鄉師》云「各掌其所治鄉之教而聽其治」，又云「聽其獄訟」是也。云「附，麗也」者，《大司寇》注云：「麗，附也。」二字互訓。附於刑，猶言麗著於刑法也。詳《大司寇》疏。

云「士，司寇、士師之屬」者，司寇關大小司寇，與士師及其屬官皆刑官，故通謂之士。《孟子·梁惠王篇》云「士師不能治士」，趙注以不能治獄為釋，則獄亦得稱士矣。賈疏云：「案秋官有士師、鄉士、遂士、縣士，並主獄訟之事，故云士師之屬也。」鄭司農云「與有地治者聽而斷之，與其地部界所屬吏共聽斷之」者，與後鄭說同。部界所屬吏，即鄉州及治都鄙者也。云「士謂主斷刑之官」者，《秋官·敘官》注云：「士，察也，主察獄訟之事者。」是其義也。先鄭此義亦與後鄭同，但汎言斷刑之官，故後鄭補之。引《春秋傳》曰「士榮為大士」者，僖二十八年《左傳》：「衛侯殺弟叔武，元咺訴於晉，諸侯會於溫以討之。衛侯與元咺訟，甯武子為輔，鍼莊子為坐，士榮為大士。」杜注云：「大士，治獄官也。」引之者，證凡主斷刑之官並稱士也。云「或謂歸于圜土」者，于，當從賈疏述注作「於」。此兼存別本別說，謂書或作歸于土，義則與《司救》「三罰而歸于圜土」同也。惠棟云：「鄭以古土字有作士者，故復以圜土釋之。」《詩·周頌》云「保有厥士」，義作土。《世本·作篇》云「相士作乘馬」，即相土也。《呂覽·任地》云：「后稷曰：子能使吾土靖而剛浴土乎？」高誘曰：「士當為土。」周牧敦亦以士為土。云「圜土謂獄也，獄城圜」者，《比長》注云：「圜土者，

獄城也。獄必圜者，規主仁，以仁心求其情，古之治獄，閔於出之。《司救》及《秋官·敘官》先鄭注義並同。《初學記·政理部》引《春秋元命包》云：「為獄圜者，象斗運合。」《釋名·釋宮室》云：「獄，確也，言實確人情僞也。又謂之圜土，言築土表牆其形圜也。」《史記·天官書》云「有句圜十五星，屬杓，曰賤人之牢」，即獄城圜之象。《月令》孔疏引《鄭記》崇精問曰「獄，周曰圜土，殷曰羑里，夏曰均臺」。《詩·召南·行露》孔疏云：「鄭《異義駁》云：「獄者，圜也，囚證於圜核之處，《周禮》之圜土。」然則獄者，核實道理之名，皋陶造獄謂此也。既囚證未定，獄事未決，繫之於圜土，因謂圜土亦為獄。」案：孔說是也。此經凡言圜土者，並為頌繫罷民之獄，司救、大司寇、司圜所掌是也。其五刑之囚，則自繫鄉士、遂士、縣士諸官之獄，不入圜土。《月令》仲春省圜圜，^①注云：「圜圜，所以禁守繫者，若今別獄矣。」《白虎通義》、《獨斷》及《玉燭寶典》引《風俗通》並云獄周曰圜圜，明圜土非周獄之正名。又《墨子·尚賢下篇》說傳說居圜土之上，則殷獄羑里之外，亦別有圜土，其制不始於周。《鄭記》崇精問，似謂周凡獄通名圜土，殊失攷。祀

① 「仲春」原說「孟春」，據《禮記·月令》改。

五帝，奉牛牲，羞其肆，牛能任載，地類也。奉猶進也。鄭司農云：「羞，進也。肆，陳骨體也。」玄謂進所肆解骨體，《士喪禮》曰「肆解去蹄」。【疏】「祀五帝奉牛牲」者，

《大宰》注云：「祀五帝謂四郊及明堂。」大司徒奉牛牲，與大宗伯、大司馬、大司寇、大司空爲官聯。《小宗伯》云「毛六牲，辨其名物而頒之于五官，使共奉之」是也。經言五帝，而不及昊天上帝及方丘北郊者，文不具也。凡郊丘五帝並用犢，餘神則用牛，通謂之牛牲。《小司徒》「凡小祭祀奉牛牲」，注云：「小祭祀，王玄冕所祭。」依彼注義，則凡中祀王希冕所祭以上之牛，並大司徒奉之矣。然則此官所奉甚衆，經唯舉五帝以見義耳。注云「牛能任載，地類

也」者，《庖人》注云：「牛屬司徒，土也。」《易·說卦傳》云：「坤爲牛。」孔疏云：「坤象地，任重而順，故爲牛也。」又《月令》注云：「牛，土畜也。」孔疏引《洪範五行傳》云：「思之不睿，則有牛禍。」注云：「地，厚德載物，牛，畜之任重者也。屬思。」義與此注同。云「奉猶進也」者，《說文·収部》云：「奉，承也。」引申爲進奉之義。《廣雅·釋詁》云：「奉，進也。」《大司寇》、《小司寇》注並同。鄭司農云「羞，進也」者，《膳夫》注同。云「肆，陳骨體也」者，《春官·敘官》注云：「肆猶陳也。」謂陳骨體爲俎實。賈疏云：「骨

體，肩臂脊脅之屬。司農以肆爲「四」音讀之，故云肆陳也，謂陳牲體於俎上，即體解折節爲二十一體是也。」案：賈說非也。《詩·小雅·楚茨》「或肆或將」，毛傳云：「肆，陳也。」箋云：「有肆其骨體於俎者。」先鄭即本毛義。《小子》「羊肆」，先鄭注云：「羊肆，體薦，全烝也。」依《左傳》杜注、《國語》韋注義，則體薦半解牲體而薦之，全烝爲全升牲體而不解。先鄭《小子》注別以體解節折釋羊骹，則不以肆爲體解二十一體可知矣。云「玄謂進所肆解骨體」者，後鄭從先鄭訓羞爲進，而不從其訓肆爲陳也。《小子》「羊肆」注云：「肆讀爲鬻。羊鬻者，所謂豚解也。」是後鄭讀肆爲鬻，鬻解即豚解也。據《大宗伯》、《典瑞》注義，則肆者爲凡解牲體之通名，豚解、體解皆謂之肆。而祀五帝自血腥始，則當先進豚解，以此下注特引《士喪禮》豚解之法以證義，《小子》經則羊肆與羊骹對文，故彼注亦專舉豚解爲釋，二注意異而義同也。凡豚解，解左右股肱、脊及兩脅爲七體，詳《小子》疏。引《士喪禮》曰「肆解去蹄」者，《士喪禮》云：「特豚四鬻去蹠。」鄭彼注云：「鬻，解也。四解之，殊肩髀而已。」案：殊肩髀即解左右股肱爲四也。彼下文又云「兩胎脊」，注云：「胎，脅也。」即所謂七體。賈疏云：「彼言殊肩髀，與此骨體一也。但彼云四鬻，此云肆解。其字不同

者，鄭直以義讀之，非彼正文，此云肆當彼鬻也。案《禮運》云：「腥其俎，孰其殽。」彼注云：「腥其俎謂豚解而腥之也，孰其殽謂體解而爛之。」祭祀之法，先豚解，後體解。經云奉牛牲，謂初牽入時，即言羞其肆，明先豚解。又案：《國語》禘郊之事則有全烝。若然，則禘郊之事，先全烝始後豚解也。若宗廟之祭，則無全烝，先豚解，次體解，《禮運》所云者是也。」何紹基云：「《釋文》：『肆，託歷反。注『肆解』『肆去』同。』案注引《士喪禮》，蓋以肆易鬻，當作『四肆去蹄』。賈疏誤作『肆解去蹄』者，因上句肆解骨體而誤也。《釋文》『肆去』二字，足正其誤。」案：何校是也。孔繼汾說同。俞樾云：「此注此疏均有誤字。蓋鄭意肆即鬻之段字，其義爲解，故注《士喪禮》，以四解說四鬻，而此注則以肆解連文也。肆解者，以解訓肆也。乃引《士喪禮》曰『肆解去蹄』，本作『四肆去蹄』，蓋謂此經之肆即彼經之鬻也。故易彼經之正文，從此經之段字，使讀者易曉，此古人引經明段借之又一例也。賈疏本作「但彼云四鬻，此云四肆，其字不同」。蓋所異者，止「肆」之一字，故曰「此云肆，當彼鬻也」。注文涉上有「肆解」字，誤作「肆解去蹄」，後人又改賈疏以從之，其誤遂不可正矣。」案：賈疏亦當如俞校。《內饗》疏引《士喪禮》「四肆去蹄」，即依此注，是賈所

見本與陸同之證。《士喪禮》之鬻，正字當作鬻，詳《小子》疏。享先王亦如之。【疏】「享先王亦如之」者，賈疏云：「享先王不辨祭之大小，彼《大宗伯》四時及禘祫六者皆稱享。云亦如之者，亦如上「祀五帝，奉牛牲，羞其肆」。又不言祭地者，祭地之禮與天同。」大賓客，令野脩道委積。令，令遣人使爲之也。少曰委，多曰積，皆所以給賓客。【疏】「大賓客，令野脩道委積」者，賈疏云：「案《大行人》，諸侯朝稱賓，卿大夫來聘稱客。彼對文例，散文賓客通。此云大賓客者，唯據諸侯來朝，大司徒令遣人於野路之上，脩治道塗及委積芻薪米禾之等，以待賓客。」案：賈說是也。此云大賓客，《小司徒》云小賓客，皆君臣相對爲大小，其賓客則自不別。《大行人》注云：「大賓，要服以內諸侯。大客，謂其孤卿。」與此義別。彼大客仍在《小司徒》小賓客內，此大賓客內亦當含要服以外蕃國來朝之小賓也。野謂自四郊以至於畿，《遺人》云「郊里之委積以待賓客」是也。賈云脩治道塗者，蓋據《遂人》云「凡賓客令脩野道而委積」。《遂師》云「賓客則巡其道脩，庀其委積」，注云：「巡其道脩，行治道路也。」以彼二文證之，則此經謂道路及委積二者兼令脩之，非止謂脩道上之委積也。但遣人

不掌脩道涂之事，故方苞、蔣載康並謂脩道自大小司徒以及遂人、遂師，皆令野廬氏。其說足補鄭、賈之義。注

云：「令，令遣人使爲之也」者，賈疏云：「案《遣人》云：『十里有廬，廬有飲食；三十里有宿，宿有路室，路室有委；五十里有市，市有候館，候館有積。』故知義然也。」黃度云：

「鄭云令遣人，以遣人掌委積也。脩道非遣人之事。」案：

黃說是也。云「少曰委，多曰積」者，《遣人》注同。賈彼疏云：「據三十里言委，五十里言積，相對而言，若散文則多亦曰委，《委人》所云薪蒸亦曰委是也。」案：賈說是也。

《說文·禾部》云：「積，聚也。」《廣雅·釋詁》云：「委，積也。」蓋委積義同。凡儲聚禾米薪芻之屬，通謂之委積。

《九章算術·商功篇》有算委粟、委菽、委米及芻蕘芻童術，皆有積，是也。鄭謂多少異名，據《遣人職》爲說耳。又

案：《國語·周語》云「野有庾積」，韋注云：「庾，露積穀也。」《詩·小雅·篤公劉》云：「迺積迺倉。」蓋積本爲露積

之名，總言之，凡倉廩之屬稱積。《遣人》云「候館有積」，

《掌戮》云「髡者使守積」，皆通含倉廩，不皆露積也。云「皆

所以給賓客」者，若《遣人》路室有委，候館有積及《司儀》云上公五積，侯伯四積，子男三積等，皆以給賓客行道之用也。大喪，帥六鄉之衆庶，屬其六引，而治

其政令。衆庶，所致役也。鄭司農云：「六引，謂引喪車

索也。六鄉主六引，六遂主六紼。」【疏】「大喪帥六鄉之衆

庶，屬其六引」者，以下掌致民治役之事。大喪謂王及后之

喪。后與王禮略同，葬當亦得用六引也。世子喪蓋不備六

引，則此大喪不得闕世子以下，但其用役，亦取之鄉遂，則

亦大小司徒、遂人等致之矣。案：遂師道野役及蜃車之

役，注謂司徒使之。《稍人》云：「大喪，帥蜃車與其役以

至，以聽於司徒。」是自鄉遂以至公邑，其役政咸受治於司

徒，以其掌六鄉地事，尤爲親切，故經唯著帥六鄉衆庶之

文；若其徵令所及，實通於畿內矣。又案：《少儀》云：「適

公卿之喪，則曰聽役於司徒。」則疑公卿大臣之喪，司徒亦

使其屬官治其役事，但不親其事耳。屬六引者，謂葬行時，

屬引索於柩車之軸，以便挽引。《既夕禮》云：「乃載，屬

引。」注云：「屬猶著也。」注云「衆庶，所致役也」者，

《遂人》注云：「大喪之正棺殯啓朝及引，六鄉役之。」即此

衆庶共其役也。賈疏云：「但六鄉七萬五千家，唯取一千

人，致之使爲挽柩之役。」鄭司農云「六引謂引喪車索也」

者，《既夕禮》注云：「引，所以引柩車。在軸輻曰紼。古者

人引柩。《春秋傳》曰：『坐引而哭之三。』」案：喪車即《巾

車》之匱路，《遂師》之蜃車也。引與紼同爲大索，惟以舉

棺、引車爲異，詳《遂人》疏。又《遂人》「六紵」，注云「用紵旁六」，則此六引亦用引旁六。云「六鄉主六引，六遂主六紵」者，紵、紵同。賈疏云：「案《遂人職》云：『大喪，帥六遂之役而致之，掌其政令；及葬，帥而屬六紵。』在棺曰紵，見繩體；行道曰引，見用力，互文以見義也。」大軍旅，

大田役，以旗致萬民，而治其徒庶之政令。

旗，畫熊虎者也。徵衆，刻日樹旗，期於其下，【疏】「大軍旅、大田役，以旗致萬民，而治其徒庶之政令」者，即《大宗伯》「軍禮之大師、大田也」。因大田而起徒役，謂之大田役，

亦略有大役之事，詳《大宰》疏。賈疏云：「凡征伐田獵所用民徒，先起六鄉之衆，司徒主六鄉，田即治其徒庶之政令。」注云「旗，畫熊虎者也」者，據《司常》文。云「徵衆，刻日樹旗，期於其下」者，《釋名·釋天》云：「熊虎爲旗，旗，期也，言與衆期於下。」《說文·於部》云：「熊旗五

旂，以象罰星，士卒以爲期。」案：旗、期聲同，明用旗兼取期衆之義。賈疏云：「凡起徒役，不令而誅謂之虐。故徵衆庶，預刻集日，至日樹旗，期民於其下，衆皆至，弊旗，誅後至者也。」聶崇義云：「《輶人》云「熊旗六旂」。遂大夫四命，四旂；鄉大夫六命，則爲六旂。」案：依聶說，則大司徒

大旗亦當六旂。《司常》大閱云「孤卿建旗，帥都建旗」。《大司馬》治兵又云「軍吏載旗，百官載旗」。大司徒，卿，常法宜建旗旛，今以師田用軍法，且司徒在軍，或即爲軍將，故改建旗旛。但凡鄉遂致民，皆以大旗，似義取表事，與《司常》大閱《大司馬》治兵敘爵不同，則不定爲軍將。而期民通用旗，故《鄉師》時田云「及期，以司徒之大旗致衆庶」，《遂人》起野役亦云「以遂之大旗致之」，義並略同。《孟子·萬章篇》說諸侯招庶人以旂，疑即用旗旛也。互詳《鄉師》、《遂人》疏。若國有大故，則致萬民於王門，令無節者不行於天下。大故，謂王崩及寇兵也。節，六節。有節乃得行，防姦私。【疏】「則致萬民於王門」者，於經例當作「于」，石經及各本並誤。下同。致民者，以備非常，飭守政。萬民亦專指六鄉之正卒，非通國中四郊之民盡致之也。王門即王宮之皋門、庫門，虎賁氏所守者，對《司門》國門爲城門。《觀禮·記》云「偏駕不入王門」，亦是也。致萬民，蓋於皋門內外屬衆而待事。《國語·吳語》云：「越王命有司大令於國曰：『苟任戎者，皆造於國門之外。』彼將興兵征伐，故致民於國門；此大故備守，則致民於宮門，緩急事異也。云「令無節者不行於天

下」者，謂令鄉遂都鄙及邦國也。《司險》云：「國有故，則藩塞阻路而止行者，以其屬守之，唯有節者達之。」此官蓋亦兼令之矣。

注云「大故謂王崩及寇兵也」者，《朝士》云「若邦凶荒札喪寇戎之故」。此文荒札別見，故注不及也。《司險》注云：「有故，喪災及兵也。」此大喪及大兵事則謂之大故。《虎賁氏》云：「國有大故則守王門，大喪亦如之。」彼詳言之，故大喪與大故並舉；此通言之，則大故亦得含大喪；經注詳略，不嫌互見也。云「節，六節」者，據《小行人》六節達於天下者也。云「有節乃得行，防姦私」者，姦，宋本、嘉靖本作「奸」，即姦之俗。有節以檢察誣僞，則姦私不得售也。大荒、大札，則令邦國移民、通財、舍禁、弛力、薄征、緩刑。大荒，大凶年也。大札，大疫病也。移民，辟災就賤。其有守不可移者，則輸之穀。《春秋》定五年夏，歸粟於蔡是也。【疏】「大荒大札則令邦國移民通財」者，此與上十二荒政略同。彼舉其條目，此施其政令。又大札亦有此令，故復著之也。賈疏云：「令邦國者，謂令天下諸侯邦國也。移民，謂分口往就賤。財是米穀也。其有留守不得去者，則賤處通穀米與之。」云「舍禁、弛力、薄征、緩刑」者，並詳前疏。賈疏云：

「若據大荒，則全無征稅。今言薄征者，容有小荒，仍征稅。」注云「大荒，大凶年也」者，《大宰》注云：「荒，凶年。」此災尤重，故曰大荒。云「大札，大疫病也」者，《膳夫》注云：「大札，疫病也。」與此義同。云「移民，辟災就賤」者，《說文·禾部》云：「移，禾相倚移也。」又《走部》云：「逯，遷徙也。」經典通段移爲逯。大札則徙民避災。大荒穀貴，則徙民就穀賤之處，使易得食。《廩人》云：「若食不能人二鬴，則令邦移民就穀。」即就賤也。《孟子·梁惠王篇》：「梁惠王曰：河內凶，則移其民於河東，移其粟於河內。」即大荒移民之事。云「其有守不可移者，則輸之穀」者，前注云「財謂泉穀」，故輸穀謂之通財。有守謂有地守，或老稚守田宅不能移者，則輸穀以贖其危，《孟子》之移粟是也。《小行人》云：「若國札喪，則令賻補之；若國凶荒，則令賻委之。」亦即札荒通財之事。云《春秋》定五年夏，歸粟於蔡是也」者，《春秋經》文。先是，定四年秋，楚人圍蔡，故此年夏歸之粟。《左傳》云：「歸粟於蔡，以周亟矜無資。」賈疏云：「彼雖非荒札之事，直取歸粟一道，證經通財之義。」歲終，則令教官正治而致事。歲終，自周季冬也。教官，其屬六十。正治，明處其文書。致事，上其計簿。【疏】「歲終，則令教官正治而致事」者，此正教官之

歲會，所謂官計也。

注云「歲終，自周季冬也」者，《宰

夫》注同。此經通例，凡言歲者，並據夏正，歲終實當爲夏之季冬。鄭以爲周季冬，非也。詳《宰夫》疏。云「教官其屬六十」者，地官所屬之凡數也。云「正治，明處其文書」

者，《大宰》「歲終則令百官府各正其治」，注云：「正，正處也。」謂明審處制其文書也。云「致事，上其計簿」者，《小

宰》「歲終則令羣吏致事」，注云：「使齋歲盡文書來至，若今上計。」計簿即歲盡上計之文書也。正歲，令于教

官曰：「各共爾職，脩乃事，以聽王命。其有

不正，則國有常刑。」正歲，夏正月朔日。【疏】「正

歲令于教官」者，此就教官之屬各官府申敕之，與小司徒觀教法時所令不同，詳彼疏。云「曰各共爾職，脩乃事，以聽

王命」者，猶小宰令治官云「各脩乃職，攷乃法，待乃事，以聽王命」也。云「其有不正，則國有常刑」者，賈疏云：「謂

文書不正直而濫失，則有常刑。」案：常刑，詳《小宰》疏。

注云「正歲，夏正月朔日」者，《小宰》注云：「正歲謂夏

之正月。」賈疏云：「知是朔日者，以其正月之吉是朔日，此

雖不言之吉，亦是朔日爲始可知也。」

周禮正義卷二十

小司徒之職，掌建邦之教灋，以稽國中及四郊都鄙之夫家九比之數，以辨其貴賤、老幼、癘疾，凡征役之施舍，與其祭祀、飲食、喪紀之禁令。稽猶考也。夫家猶言男女也。鄭

司農云：「九比謂九夫爲井。」玄謂九比者，《冢宰職》出九賦者之人數也。貴謂爲卿大夫。賤謂占會販賣者。癘疾謂癘病也。施當爲弛。【疏】「掌建邦之教灋」者，謂建立教官之官灋也。賈疏云：「小司徒副貳大司徒之事。大司徒已掌十二教，故此小司徒又掌建邦之教法。言建者，非但副貳大司徒，亦得專其事。」云「以稽國中及四郊都鄙之夫家九比之數」者，《鄉大夫》注云：「國中，城郭中也。」案：四郊者，謂遠郊百里以內關六鄉也。詳《大宰》疏。不言六遂及公邑者，以內舉國中、四郊，外舉都鄙采地，則六遂公邑已包於其中，故文不具也。凡經言國中，並謂王城之中。六鄉之民分居四郊，不居國中；而四郊別有郊里，

亦不盡爲鄉州。賈疏謂國中與四郊，皆是六鄉之民所居，非也，詳後疏。夫家九比，謂人民男女及縣都九夫爲井，閭里五家爲聯之數，凡書於版者皆是也。云「以辨其貴賤、老幼、癘疾，凡征役之施舍」者，以九比之數而均役法也。凡貴者謂命士以上，賤者謂庶民，老幼謂國中六尺以下六十一以上，野五尺以下六十六以上。案《鄉大夫》云：「國中貴者，賢者，能者，服公事者，老者，疾者皆舍。」是施舍即謂貴及老幼、癘疾。而經別云征役施舍者，謂老幼癘疾之外，仍有賢者、能者、服公事者之等，經不具言，故更以施舍通咳之，猶《遂人》云「辨其老幼癘疾與其施舍者」，亦於老幼癘疾之外，別言施舍也。《遂人》之政役，亦即此征役。彼注云出士徒役，則專據力役之征言之。賈疏謂「征謂稅之，役謂繇役。施舍者，貴與老幼癘疾不科役，故言弛」。並非經注義也。云「與其祭祀、飲食、喪紀之禁令」者，賈疏云：「祭祀者，謂鄉中州祭社，黨祭禘，族祭步。飲食者，謂若行鄉飲酒及族食。喪紀者，謂若四閭爲族，使之相葬之等。祭祀已下皆有禁令，不使失禮法。」注云「稽猶考也」者，《宮正》注同。云「夫家猶言男女也」者，賈疏云：「夫是丈夫，則男也。《春秋傳》曰：『男有室，女有家。』婦人稱家，故以家爲女。」鄭司農云「九比謂九夫爲井」者，先鄭意

九夫爲井，三三相比，卽爲九比。是謂鄉遂亦同都鄙用井田法也。賈疏云：「後鄭不從者，以經掌國中及四郊，卽是六鄉之內。但鄉與公邑並爲溝洫，無井田之法，故後鄭不從。」案：賈駁先鄭說是也。後文攷夫屋，謂六遂外公邑用井田法，非鄉遂亦有井田也。但公邑當用井田法。賈申後鄭說，亦不足據。云「玄謂九比者，《冢宰職》出九賦者之人數也」者，賈疏云：「案《大宰》云：『九賦斂財賄：一曰邦中之賦，二曰四郊之賦，三曰邦甸之賦，四曰家稍之賦，五曰邦縣之賦，六曰邦都之賦。』與此文國中四郊都鄙其事相當，故知此九比出九賦者之人數。」王引之云：「所出之賦，與人數多寡無涉，九賦亦不得但謂之九。且國中惟出邦中之賦，四郊惟出四郊之賦，都鄙惟出邦甸之賦，家稍之賦，邦縣之賦，邦都之賦，不得有九也。」案：九比之義，二鄭說均未安，王氏糾之是也。竊謂經「九比」二字本平列，與「夫家」同。九者謂井田之制，九家爲一井也。比者謂比閭之法，五家爲一比也。都鄙、公邑之家數以九計之，四郊、鄉遂之家數以比計之，其法數不同，故云夫家九比之數，猶簡單衆者言卒伍也。經文本明白，說者誤以九爲比之數，遂不得其解耳。云「貴謂爲卿大夫，賤謂占會販賣者」者，賈疏云：「鄭解諸文貴賤相對，皆以爲貴謂卿大夫，賤謂士；

獨此賤爲占會販賣者，以其此經論九賦之事。案《大宰》九賦，有幣餘之賦，幣餘謂占賣國之斥幣。此經貴與老幼癘疾皆弛舍無賦，唯此賦當彼幣餘之賦；故爲販賣者解之。」案：《大宰》「九賦」注云：「關市山澤謂占會百物。」則鄭意此賦內兼有關市山澤出賦者而言，賈謂專指幣餘之賦，非鄭指也。但此經九比本與九賦無涉，則貴者當指命士以上，賤者當指庶人以下。後鄭專取九賦爲釋，亦非經義。云「癘疾謂癘病也」者，癘，宋小字本作「廢」，經注同。《說文·疒部》云：「癘，固病也。」《急就篇》云：「篤癘癘癘迎醫匠。」顏注云：「癘，四肢不收。癘，疲病也。」《王制》云：「廢疾非人不養者，一人不從政。」注云：「廢於人事。」案：「廢疾非人不養者，一人不從政。」注云：「廢於人事。」案：廢卽癘之借字。癘，詳《大司徒》疏。二云「施當爲弛」者，讀爲《大司徒職》弛力之弛，《遂人》、《遂師》、《遂大夫》、《士均》注義並同。《小宰》「斂弛之聯事」，注云：「杜子春弛讀爲施。」案：弛施聲類同，故可互讀，詳《小宰》疏。乃頒比瀦于六鄉之大夫，使各登其鄉之衆寡、六畜、車輦，辨其物，以歲時入其數，以施政教，行徵令。登，成也，成猶定也。衆寡，民之多少。物，家中之財。歲時入其數，若今四時言事。【疏】「乃頒

比澶于六鄉之大夫」者，《大胥》注云：「比猶校也。」謂校數戶口財物之法，對三年大比爲小比，卽鄉師國比、族師邦比之法也。周歲時小比不知以何月，依鄭、賈說則似四時各一行之。賈疏云：「比法謂若下經五人爲伍，五伍爲兩是也。六鄉大夫皆六命卿爲之，小司徒爲校比之法，頒與六鄉大夫。」云「使各登其鄉之衆寡、六畜、車輦」者，賈疏云：「衆寡據人民。六畜者，馬牛羊豕犬雞。車謂革車及大車。輦，人挽行。」惠士奇云：「小司徒及鄉師頒六鄉之比法，車輦登其數，馬牛辨其物，簡閱之而已，非籍而賦之。」案：惠說是也。此比法唯衆庶共軍賦口賦之等，其六畜車輦則唯以備大田大役之徵發，不以共軍旅也。六鄉出軍不出車馬，詳後疏。云「辨其物以歲時入其數」者，賈疏云：「謂辨其家中財物多少，以歲之四時具錄其數，入小司徒。」云「以施政教，行徵令」者，謂攷其數以施政治教法，徵令亦謂宣布法令，通該徵役徵賦二義言之，詳《宰夫》疏。 注云「登，成也，成猶定也」者，《鄉大夫》、《族師》、《遂人》注義並同。登，成，《爾雅·釋詁》文。《國語·周語》韋注云：「成，定也。」鄭以登本無定義，而登訓爲成，成亦訓爲定，展轉引申，則登亦得爲定，故必先以成訓登，復以定訓成，明其義之相通也。定謂定其衆寡以下凡數之實，無遺誤也。

云「衆寡，民之多少」者，賈疏云：「謂六口已上爲多，五口已下爲少。」云「物，家中之財」者，謂泉穀也。云「歲時入其數，若今四時言事」者，賈疏云：「漢承周後，皆四時入其數。今時白役簿皆在於冬，代異時殊，故有革別也。」及三年，則大比，大比則受邦國之比要。大比，謂使天下更簡閱民數及其財物也。受邦國之比要，則亦受鄉遂矣。鄭司農云：「五家爲比，故以比爲名，今時八月案比是也。要謂其簿。」【疏】「及三年則大比」者，三年大校比民數之等，小司徒總掌其事，與司書、鄉大夫、縣師、遂大夫、小司徒、司民爲官聯也。云「則受邦國之比要」者，賈疏云：「每至三年，則大案比戶口。大比之時，則天下邦國送要文書來，入小司徒，故大比則受邦國之比要也。」 注

云「大比謂使天下更簡閱民數及其財物也」者，《大司馬》注云：「簡謂比數之。」是比猶言簡閱也。賈疏云：「上經頒比法，每歲之四時簡閱衆寡及其物等；此經三年大比，并天下邦國而言。鄭不言六畜車輦者，文略，亦簡閱可知。」云「受邦國之比要，則亦受鄉遂矣」者，賈疏云：「此經但受邦國比要，上經直言頒比法於六鄉，以歲時入其數，不言三年大比，故知此文含鄉遂也。」鄭司農云「五家爲比，故以比

爲名」者，先鄭意六鄉戶數始於五家爲比，因以爲名。然大比之法通於畿內及邦國，則兼有井田九夫三屋之制，不應獨取六鄉五家之名。況此經凡言國比邦比者，皆取校比之義。先鄭說未允，後鄭引之在後，蓋亦不從其義也。云「今時八月案比是也」者，惠棟云：「《東觀漢記》：『元初四年，詔曰：方今八月，案比之時。』」李賢《後漢書·安帝紀》注云：「案比謂案驗戶口次比之也。」《續漢書·禮儀志》云：「仲秋之月，縣道皆案戶比民。」孔廣森云：「《後漢·皇后紀》曰：『八月算民。』《管子·度地篇》曰：『常以秋歲末之時閱其民，案家人比地，定什伍口數，別男女大小。』是周法校比亦以秋月。」詒讓案：此職及《鄉師》、《鄉大夫》、《州長》、《黨正》、《縣師》、《遂大夫》諸職說大比者，並不著時月。據《鄉飲酒禮》鄭注引鄉大夫大比與賢能之事而說之，云「是禮乃三年正月而一行」，則鄭謂大比在正月。然經無明文，未知是否。《管子·乘馬篇》云：「春曰書比，夏曰月程，秋曰大稽，與民數得亡。」此謂三時有比稽之事，與《度地》文又小異。《淮南子·時則訓》高注又有三月料民戶口之說，疑皆非周法也。云「要謂其簿」者，《小宰》注云：「要會謂計最之簿書。」賈疏云：「謂若今之造籍，戶口地宅具陳於簿也。」乃會萬民之卒伍而用之。五人爲

伍，五伍爲兩，四兩爲卒，五卒爲旅，五旅爲師，五師爲軍。以起軍旅，以作田役，以比追胥，以令貢賦。用，謂使民事之。伍、兩、卒、旅、師、軍，皆衆之名。兩二十五人，卒百人，旅五百人，師二千五百人，軍萬二千五百人。此皆先王所因農事而定軍令者也。欲其恩足相恤，義足相救，服容相別，音聲相識。作，爲也。役，功力之事。追，逐寇也。《春秋》莊十八年夏，公追戎于濟西。胥，伺捕盜賊也。貢，嬪婦百工之物。賦，九賦也。鄉之田制與遂同。【疏】「乃會萬民之卒伍而用之」者，此言六鄉治軍之制也。六遂軍制亦同。賈疏云：「小司徒佐大司徒以掌六鄉，六軍之士出自六鄉，故預配卒伍，百人爲卒，五人爲伍也。而用之者，即軍旅田役是也。」云「五人爲伍，五伍爲兩，四兩爲卒，五卒爲旅，五旅爲師，五師爲軍」者，《夏官·敘官》制軍文同。彼注云「軍、師、旅、卒、兩、伍，皆衆名也。伍一比，兩一間，卒一族，旅一黨，師一州，軍一鄉，家所出一人」是也。賈疏云：「凡出軍之法，先六鄉；賦不止，次出六遂；賦猶不止，徵兵於公邑及三等采；賦猶不止，乃徵兵於諸侯，大國三軍，次國二軍，小國一軍，此軍等皆出於鄉遂；賦猶不止，則諸侯有遍境出

之法，則千乘之賦是也。」江永云：「凡起徒役，毋過家一人，似家出一人爲兵，如管仲以十五鄉三萬家出三萬人之法。信如此，則天子六軍，惟取足於六鄉，何爲六遂及甸稍縣都皆有作民師田行役之事？」以此言之，小司徒會萬民之卒伍而用之，亦言其聯絡卒伍之法當如此。果有軍旅，或調遠，或調近，必有更休之法，當不令遠地獨逸，近地獨勞。上地中地下地，家家雖有可任之人，亦自有均平之法，當不令下地家五人，亦與上地家七人者同出一人爲兵也。」云「以起軍旅，以作田役」者，田役謂田獵。起徒役亦兼賅諸功作力役之事。凡軍旅起正卒，時田義卒竭作，役事作正夫，餘夫徵發，並與軍法略同。云「以比追胥」者，《宮正》注云：「比，校次其人之在否。」胥亦義卒，盡作故須校次之。云「以令貢賦」者，賈疏云：「依鄉中家數，而施政令以貢賦之事。」注云「用謂使民事之」者，賈疏云：「謂使人爲事，即軍旅田役是也。」云「伍、兩、卒、旅、師、軍，皆衆之名，兩二十五人，卒百人，旅五百人，師二千五百人，軍萬二千五百人」者，《夏官·敘官》經注義同，並詳彼疏。云「此皆先王所因農事而定軍令者也」者，賈疏云：「案《管子書》云『因內政寄軍令』。謂在鄉五家爲比，以營農事，比長領之。及其出軍，家出一人，五人爲伍，則爲伍長領之。在

家間胥領一間，在軍則爲兩司馬領之。在家爲族師，在軍爲卒長。在家爲黨正，在軍爲旅帥。在家爲州長，在軍爲師帥。在鄉爲大夫，在軍爲軍將。自伍長已上，全與此文不同者，鄭君以義言之，非彼正文也。」案：「作內政而寄軍令」，《國語·齊語》文。《管子·小匡篇》「寄軍令」作「寓軍令」，疑賈誤記。云「欲其恩足相恤，義足相救，服容相別，音聲相識」者，釋因農事定軍令之意。《齊語》：「管子曰：是故卒伍整於里，軍整於郊。內教既成，令勿遷徙。伍之人祭祀同福，死喪同恤，禍災共之。故夜戰戰聲相聞，足以不乖；晝戰目相視，足以相識。」鄭略本彼文。云「作，爲也」者，《爾雅·釋言》文。云「役，功力之事」者，《遂人》注云：「役謂師田若有功作也。」此經既云軍旅，又以田役並舉，明不兼師田，惟指起徒役功力之事。蓋散文凡起大衆之事，通謂之役，故役得含師田；對文則役與師田異也。云「追，逐寇也」者，後先鄭注及《脩閭氏》注義並同。《說文·走部》云：「追，逐也。」《公羊》莊十八年何注云：「以兵逐之曰追。」案：鄭意蓋謂追爲逐外寇，與胥爲司捕內盜賊異。然通言之，司捕亦爲追，《大戴禮記·千乘篇》云：「陳刑制辟，以追國民之不率上教者。」《管子·禁藏篇》云：「民無流亡之意，吏無備追之憂。」皆是也。引《春秋》莊十八年

「夏，公追戎于濟西」者，賈疏云：「案彼傳，戎侵魯，魯公追之出境。服氏云：『桓公爲好，莊公獨不能脩而見侵。濟西，曹地。』《穀梁》云：『其不言戎之伐我，何也？以公之追之，不使戎邇於我也。于濟西者，大之也。』引之者，證追是逐寇也。」云「胥，伺捕盜賊也」者，《士師》注云：「胥讀如宿偁之偁。偁謂司搏盜賊也。」案：伺卽司之俗，詳《師氏》疏。捕卽搏之借字，《說文·手部》云：「搏，索持也。捕，取也。」後世通以捕爲搏，義亦互通。段玉裁云：「此當云胥讀爲偁，而不言者，互見。」惠士奇云：「胥與狙通，謂伺捕盜賊，伏而候之，如狙之伺物，故曰狙候。」案：惠說亦通。云「貢，嬪婦百工之物」者，據《閭師》云：「任工以飭材事，貢器物，任嬪以女事，貢布帛。」鄭於八貢唯舉此二者，明與後井牧田野令貢爲農牧衡虞之貢，互相備也。詳後疏。賈疏云：「案《大宰》九職之貢有九，此貢獨云嬪婦百工二者，此六鄉之貢不論地事，則所令之貢亦不及地貢也，故以此二事當之。」云「賦，九賦也」者，賈疏云：「案《大宰》九賦一曰邦中，二曰四郊，二者之賦在六鄉之內。此經既論六鄉之賦，不得有三曰邦甸已下。若然，此唯有二賦而云九賦者，二賦是九賦中物，故總云九賦也。」詒讓案：賦卽地征之通名。鄭《大宰》注以九賦爲口率出泉，非也，詳

彼疏。云「鄉之田制與遂同」者，明亦爲溝洫法，不制井田也。賈疏云：「此經之內不見田制。案《遂人職》云：『夫間有遂，遂上有徑；十夫有溝，溝上有畛；百夫有洫，洫上有涂；千夫有澮，澮上有道；萬夫有川，川上有路。』是其遂制也。故云鄉之田制與遂同。案：鄭注遂之軍法如六鄉者，以其遂內不見出軍之法，唯有田制而已，故知遂之軍法如六鄉。若然，彼此各舉一邊，互見爲義。」詒讓案：六鄉授地三等田萊之制，亦當與遂同，詳《遂人》疏。乃均土地以稽其人民而周知其數。上地家七人，可任也者家三人；中地家六人，可任也者二家五人；下地家五人，可任也者家二人。均，平也。周猶徧也。一家男女七人以上，則授之以上地，所養者衆也。男女五人以下，則授之以下地，所養者寡也。正以七人六人五人爲率者，有夫有婦然後爲家，自二人以至於十，爲九等，七六五者爲其中。可任謂丁強任力役之事者。出老者一人，其餘男女強弱相半，其大數。【疏】乃均土地以稽其人民而周知其數「者，賈疏云：『以其佐大司徒掌其土地人民之數，故制上地下地等，使得均平。既給土地，則據土地計考其人民可任不可任之事。』云

「上地家七人，可任也者家三人」者，六鄉三等田制，亦與六遂同。此經計戶口之多寡，《遂人》辨土地之肥磽，兩職文相表裏。此上地即《遂人》云「田百畝菜五十畝」也。賈疏云：「七人之中，一人爲家長，餘六人在，強弱半，強而可任使者家三人。」云「中地家六人，可任也者二家五人」者，即《遂人》云「田百畝菜百畝」也。賈疏云：「六人之内，一人爲家長，餘五人在，強弱半，不可得言可任者二人半，故取兩家併言可任者二家五人。」云「下地家五人，可任也者家二人」者，即《遂人》云「田百畝菜二百畝」也。賈疏云：「五人之内，一人爲家長，餘四人在，強弱半，故云可任者家二人。」詒讓案：《公羊》宣十五年，何注云：「一夫一婦，受田百畝，以養父母妻子，五口爲一家。」《漢書·食貨志》說李悝盡地力之教，亦云一夫挾五口，治田百畝。蓋並據下地言之，此與《大司徒》都鄙三等田，衰同而制異。《載師》、《縣師》、《遂人》注並以《大司徒》所云爲六鄉之制，非也。詳《載師》疏。

注云「均，平也」者，《大司徒》注同。云「周猶偏也」者，《司會》注同。云「一家男女七人以上，則授之以上地，所養者衆也，男女五人以下，則授之以下地，所養者寡也」者，自八人以上，四人以下，經不言授地之等數，明八人以上並以七人爲率，授以上地；四人以下並以五人

爲率，授以下地也。云「正以七人、六人、五人爲率者，有夫有婦然後爲家，自二人以至於十爲九等，七六五者爲其中」者，賈疏云：「案《王制》百畝之分，上農夫食九人，其次食八人，其次食七人，其次食六人，其次食五人。彼言五等，此云七六五三等，其人不同，故鄭爲九等計之。此經皆云家，故鄭云有夫有婦乃成家。從此二人爲一等，至十人則爲九等。自二人、三人、四人，是下地之三等也。五人、六人、七人是中地之三等，八人、九人、十人是上地之三等。此經唯言七六五者，據中地之三等，則知有上地下地之三等，故鄭云「七六五者爲其中」。若然，《王制》不云上上之地食十人，又不云其次食四人，其次食三人，其次食二人，直言自九以至五，不言九等者，彼欲取下士視上農夫食九人，自府史胥徒四者食八人、七人、六人、五人五等人，與此五等農夫相當，故不言其餘四者。又襄公二十五年，楚蔣掩書土田，度山林，鳩藪澤，辨京陵，表淳鹵，數疆潦，規偃豬，町原防，牧隰臯，井衍沃，以授子木，禮也。此九等是楚之地善惡有九等，與此不同。鄭注《尚書》云：「賦之差，上上出九夫稅，上中出八夫稅。」爲九等者，以九州出賦多少不同，有九等，故鄭君以井田美惡爲九等計之，非是貢地之差也。」案：此經及《大司徒》、《遂人》、《大司馬》諸職說田

制，並止三等。《王制》及《孟子·萬章篇》、《春秋繁露·爵國篇》說上下農夫亦止五等。而鄭有九等上下之說，賈《內史》、《大司馬》疏推之，以爲：十人食上上，九人食上中，八人食上下，七人食中上，六人食中中，五人食中下，四人食下上，三人食下中，二人食下下。《王制》孔疏亦同其說。依其義，則經所云家七人者，宜食中上之地，五人者宜食中下之地。而經云上地家七人，下地家五人，與鄭所說不合。《大司馬》疏強圓其說，謂地分上下，人即據中，經以互文見義。迂曲殊甚。竊謂三等授地，自是較略之制，其細別差率，隨宜損益，不能豫定。《管子·乘馬數篇》云：「上腴之壤守之若干，閒壤守之若干，下壤守之若干，相壤定籍而民不移。」亦以三等相壤。《呂氏春秋·上農篇》云：「上田夫食九人，下田夫食五人，可以益，不可以損，一人治之，十人食之，六畜皆在其中矣。此大任地之道也。」據《呂覽》說，是十人與九人數雖有益，而田不逾上等，足明三等授田，制約而無不咳，固不必求之過密矣。云「可任謂丁強任力役之事者」者，《國語·魯語》韋注云：「任，勝也。」《廣雅·釋詁》云：「丁，強也。」《釋名·釋天》云：「丁，壯也。」言人必強壯始可勝力役之事。此任力役三等，所謂上劑、中劑、下劑。《遂人》云「以下劑致甿」，則六遂無上、中劑也。《論

語·八佾篇》云：「爲力不同科。」《集解》引馬融云：「爲力，爲力役之事也。亦有上中下，設三科焉。」似亦即據上中下三等任力法言之。云「出老者一人，其餘男女強弱相半，其大數」者，謂上地家七人，中地家六人，下地家五人，家各去老者一人，即賈疏所謂家長是也。其餘者以男女強弱相半之率約之，其可任者，如經三等之數，依鄭所推九等之法，則此經爲中地三等，其上下地各有三等，亦依此率差之：則上上地家十人，可任者二家九人也；上中地家九人，可任者家四人也；上下地家八人，可任者二家七人也；下上地家四人，可任者二家三人也；下中地家三人，可任者家一人也；下下地家二人，可任者二家一人也。賈疏云：「但一家之內，二人至十人，或男多女少，或女多男少，不可齊準，今皆以強弱半者，周公設法，據其大數故也。」凡起徒役，毋過家一人，以其餘爲羨，唯田與追胥，竭作。鄭司農云：「羨，饒也。田謂獵也。追，追寇賊也。竭作，盡行。」【疏】「凡起徒役，毋過家一人」者，徒役謂大軍大役士徒徵調之事。家一人者，正卒之數也。鄉遂不制井田，其軍賦，家以一人爲正卒，故上文，伍兩卒旅師軍，即比閭族黨州鄉所出，六軍七萬五千人，即

六鄉七萬五千家之正卒，家數與軍數正相當也。《司馬法》通三十家出土徒三人，十家而賦一人，乃丘乘之法，出於都鄙，與此不同，互詳後疏。又案：周軍賦力役，政法略同。軍法六鄉爲正，六遂爲副，皆出軍而不出車，而公邑丘甸共其車牛輦輦及任載之役。若鄉遂兵不足，徵及公邑，則出兵兼出車，井出一人爲兵，餘家共其車牛兵器及糧食。《孫子·用閒篇》云：「興師十萬，不得操事者七十萬家。」即據侯國井田有公田者言之。一家從軍，七家共其器糧，故不得操事。王國丘甸雖無公田，其法蓋不異。而《國語·魯語》說有軍旅之歲，又有井出稷禾秉芻伍米之征，亦以共軍之糧食稍秣者也。至於役法，則用民歲不過三日，《均人》公甸之法是也。大役作民徒，鄉遂視軍賦，正夫亦七萬五千，餘夫無定數，不必盡發。其就役者，以三日爲正，三日以外，凡不就役者，相與共其食以爲顧更之直，而兼共其馬牛車器。鄉遂不出車馬，而比法亦兼及六畜車輦之稽，即以備徵役也。其公邑丘甸役法，亦當如是。凡軍役之賦，有事則發之，無事則弛免，與九職地事之征亦不同，互詳《均人》疏。沈彤云：「王畿受田者，二百五十六萬家，通三等地之率，俱二家任五人，凡起徒役，無過家一人，實任二百五十六萬人。」今案：此經本專舉六鄉任民之法，沈又通

之畿內，雖與公邑丘甸之法不相應，而大總計之，於義亦通。云「以其餘爲羨」者，賈疏云：「一家兄弟雖多，除一人爲正卒。正卒之外，其餘皆爲羨卒。此謂六鄉之內，上劑致甿一人爲正卒，其餘皆爲羨卒。若六遂之內，以下劑致甿一人爲正卒，一人爲羨卒，其餘皆爲餘夫，饒遠故也。」案：賈說是也。六鄉與六遂田制軍制並同，而役法則有上劑下劑之異。《鄉大夫》云：「野自六尺以及六十有五，皆征之。」彼野通鄉遂而言，蓋六鄉之民，年十五以上皆受征役，爲餘子。二十以上有室，則受田爲餘夫。餘夫爲羨卒，從行役，《王制》疏引《易》孟氏、《韓詩》說，年二十行役是也。《詩·魏風·陟岵》云「予季行役」。毛傳云：「季，少子也。」彼詩有父、母、兄，而少子行役，是即竭作之羨卒，亦即餘夫矣。至三十以上，受正田爲正夫，《左》襄二十三年傳云「臧孫使正夫助之」是也。正夫受役則爲正徒，《左》襄九年傳云「宋災，使華臣具正徒」是也。受兵則爲正卒，鄭《內則》注所謂三十受兵是也。但六鄉正軍，家出一人，六遂副軍亦然。民三十以上，必自爲戶者，始爲正卒，若家已有父兄爲正卒，雖三十有室而不別爲戶，則仍爲餘夫。六遂亦同。六鄉之民，正卒家一人外，年十五之餘子，則受役；二十三十之餘夫，皆爲羨卒，受兵。其六遂則家一人

爲正卒、一人爲羨卒外，皆不爲卒。此其同而異者，賈尚未及別析耳。又六鄉餘夫，當於四郊受田；鄭《載師》注謂出耕遂公邑，亦非是，詳彼疏。云「唯田與追胥，竭作」者，賈疏云：「田謂田獵，追謂逐寇，胥謂伺捕盜賊，非直正卒一人，羨卒盡行，以其田與追胥之人多故也。」王鳴盛云：「田而竭作，即《郊特牲》所謂『惟爲社田，國人畢作』也。」江永云：「天子六軍，取之六鄉，而六遂與甸稍縣都亦有兵所以防守，不在六軍之中。即天子六軍，亦所以備制，若有征伐，猶徵兵於諸侯，王朝將帥，元戎十乘，以先啓行，不盡用六軍也。觀桓王伐鄭，有陳人、蔡人、衛人從，則盛時可知矣。畿內六軍與六遂甸稍縣都之兵，大抵爲防寇盜而設，故唯田與追胥竭作，畿內若有盜賊，雖羨卒猶當用之矣。竭作亦疑有更休，一歲四田，正羨盡行，得毋勞民妨農？大蒐于紅，自根牟至于商、衛，革車千乘，不常用也，《春秋》必謹而書之。若盜賊竊發，當調其近者而追之。」

注鄭司農云「羨，饒也」者，《小爾雅·廣詁》云：「饒，多也。」此正卒之外多出之卒，故曰羨。云「田謂獵也」者，《田僕》注義同。《大宗伯》云：「大田之禮，簡衆也。」《春秋繁露·深察名號篇》云：「獵禽獸者號一，曰田。田之散名：春苗，秋蒐，冬狩，夏獮。」《公羊》桓四年何注云：「田者，蒐狩之

總名也。古者肉食，衣服，捕禽獸故謂之田。」《左傳》隱五年孔疏引《白虎通》云：「四時之田，總名爲田何？爲田除害也。」《說苑·脩文篇》云：「其謂之畋何？聖人舉事必反本，五穀者以奉宗廟養萬民也。去禽獸害稼穡者，故以田言之。」案：畋即田之借字。《祭義》云：「五十不爲甸徒。」甸徒即田卒竭作者也。田禮，詳《大司馬職》。云「追追寇賊也」者，①與後鄭注同。云「竭作，盡行」者，《大傳》鄭注云：「竭，盡也。」《詩·大雅·常武》箋云：「作，行也。」謂凡可任者，不論正義，盡起而行。

凡用衆

庶，則掌其政教與其戒禁，聽其辭訟，施其賞罰，誅其犯命者。命，所以誓告之。【疏】「凡用衆

庶」者，謂大師、大田、大役聚致六鄉之民徒也。云「聽其辭訟」者，《小宰》云「聽其治訟」，治辭義略同。注云「命，

所以誓告之」者，即戒禁之命。《士師》五戒，軍旅有誓，田役有禁是也。賈疏云：「所誓告者，謂若《大司馬》羣吏聽誓於陳前，司徒北面以誓之，小子斬牲，左右以徇陳曰『不用命者斬之』。是其誓告之事也。」凡國之大事，致

①「寇」原訛「盜」，據楚本改。

民；大故，致餘子。大事謂戎事也，大故謂災寇也。

鄭司農云：「國有大事，當徵召會聚百姓，則小司徒召聚之。餘子謂義也。」玄謂餘子，卿大夫之子當守於王宮者也。【疏】「凡國之大事致民」者，謂國有軍旅之戒，則發六鄉之正卒備兵衛也。云「大故致餘子」者，謂國被災寇，則發六鄉之餘子義卒，以備守事及追胥也。餘義既發，則正卒亦發可知。又案：《周書·糴匡篇》云：「年饑，餘子倅運。」則餘子有故亦共役，不徒備守矣。

注云「大事謂戎事也」者，戎事謂征伐邦國之事，故須致衆也。《倉人》注云：「大事謂喪戎。」依《大司徒》、《司險》注，喪事當爲大故，故此注唯云戎事。《倉人》注兼及喪者，大事大故對文則異，散文可通也。賈疏云：「見《左氏》成公傳云『國之大事在祀與戎』。此言致民，明非祭祀，是戎事可知。」云「大故謂災寇也」者，謂凡大事之凶者。《宮正》先鄭注云：「故謂禍災。」《大祝》注云：「大故，兵寇也。」案：災謂水火，大災寇謂外寇侵犯及內寇竊發，二者皆有守備之事。《大司徒》注云：「大故謂王崩及寇兵也。」此後文別見大喪，故注不及王崩，互詳《司士》疏。鄭司農云「國有大事，當徵召會聚百姓，則小司徒召聚之」者，《大司馬》注云：「致謂聚衆也。」百姓即謂年三十以上爲正徒，正卒者也。凡致民皆於

王門及國門，詳《大司徒》疏。云「餘子謂義也」者，上文云「以其餘爲義」，是餘子即義卒也。賈疏云：「以其義卒唯田與追胥竭乃使之，此經大故，不合使義，故鄭不從之。」王引之云：「田與追胥，常有之事，猶須義卒偕行，災寇非常之事，豈有反不使義者乎！」《大司徒職》云「國有大故，則致萬民於王門」，此云「大故致餘子」，餘子即民之子弟，《孟子·滕文公篇》所謂餘夫也，故《大司徒》統謂之萬民。蓋國之大事，但致正卒而已，大故則不惟致正卒，又並義卒而致之，故曰「凡國之大事致民，大故致餘子」。若謂大故致卿大夫之子而非義卒，則《大司徒》何以云「國有大故則致萬民於王門乎」！案：王說是也。云「玄謂餘子，卿大夫之子，當守於王宮者也」者，破先鄭餘子即義卒之說。後鄭意此餘子即《宮伯》之士庶子、《諸子》之羣子，皆宿衛王宮者也。金榜云：「先鄭云餘子謂義者是也。後鄭謂餘子爲卿大夫之子，則當諸子帥之致于太子，宮正、宮伯令之。小司徒掌萬民，不當致卿大夫之子。」王引之云：「卿大夫之子謂之國子。國有大事，帥國子而致於大子者，諸子之職也，與小司徒何涉？後鄭蓋據宣二年《左傳》乃宦卿之適子，又宦其餘子之文。今案：民之子弟亦謂之餘子。《逸周書·糴匡篇》：『成年，餘子務藝；年儉，餘子務

穡；年饑，餘子倅運。』《管子·問篇》：「餘子父母存不養而出離者幾何人，餘子之勝甲兵有行伍者幾何人。」《莊子·秋水篇》：「壽陵餘子學行於邯鄲。」司馬彪注曰：「未應丁夫爲餘子。」《漢書·食貨志》：「餘子亦在于序室。」蘇林曰：「未任役爲餘子」是也。何必卿大夫之子而後爲餘子乎！先鄭之說爲長。案：金、王說是也。六鄉上劑致民，民年三十受兵爲正卒，其子弟六尺以上者爲餘子，二十以上已授室者受田爲餘夫，餘夫爲羨卒，亦通謂之餘子。惟十九以下未授室之餘子，則不得爲餘夫，此其異也。此經餘子，蓋亦通餘夫羨卒言之。司馬彪以餘子爲未應丁夫，蘇林又云「未任役」，似皆指十九以下未任大力役者而言，與此小異。賈疏謂鄭據《書傳》云「餘子皆入學」，知不得爲羨。今攷《儀禮經傳通解》引《尚書大傳》云：「大夫士七十而致仕，老於鄉里，大夫爲父師，士爲少師。耒鋤已藏，祈樂已入，歲事已畢，餘子皆入學，距冬至四十五日，始出學，傳農事。」鄭彼注云：「餘子猶衆子也。古者適子恒代父而仕也。」說與此注略同，故賈引以申注義。然《書傳》說餘子就學必於農隙，出學又傳農事，即《漢志》所謂餘子在序室，則仍是民之子弟。《王制》孔疏引《書傳略說》云「餘子十五入小學」，此與《鄉大夫》「野六尺以上之文正相應。蓋庶民子

第十五亦入里塾，猶國子十五入大學也。若如鄭《大傳注》說餘子爲卿大夫之子弟，則在免農之科，何必農隙而後得學乎？鄭彼注說蓋誤。《國策·秦策》：「范雎爲梁餘子」，高注云：「大夫庶子爲餘。」誤與鄭略同。至《左傳》說晉宦卿之餘子與庶子並舉，杜注云：「餘子，適子之母弟也。」則彼餘子，並不通該卿大夫之諸子，與此經餘子尤不相當矣。蓋古制，兵役之事，但致正卒，非大故，不役其子弟。《呂氏春秋·離俗篇》云：「齊晉相與戰，平阿餘子亡戟得矛。」《說苑·立節篇》云：「佛肸用中牟畔，城北餘子田基後至，袿衣將入鼎。」《國策·趙策》云：「燕趙久相攻，士大夫餘子之力盡於溝壘。」則後世酷烈之政，羨卒盡起以從軍，周初無此法也。乃經土地而井牧其田野，九夫爲井，四井爲邑，四邑爲丘，四丘爲甸，四甸爲縣，四縣爲都，以任地事而令貢賦，凡稅斂之事。此謂造都鄙也。采地制井田，異於鄉遂，重立國。小司徒爲經之，立其五溝五塗之界，其制似井之字，因取名焉。《孟子》曰：「夫仁政必自經界始。經界不正，井

①「立」原訛「高」，據《說苑》改。

地不均，貢祿不平，是故暴君姦吏必慢其經界。經界既正，分田制祿可坐而定也。」鄭司農云：「井牧者，《春秋傳》所謂井衍沃牧隰臯者也。」玄謂隰臯之地，九夫爲牧，二牧而當一井。今造都鄙，授民田，有不易，有一易，有再易，通率二而當一，是之謂井牧。昔夏少康在虞思，有田一成，有衆一旅。一旅之衆而田一成，則井牧之法先古然矣。九夫爲井者，方一里，九夫所治之田也。此制小司徒經之，匠人爲之溝洫，相包乃成耳。邑丘之屬相連比，以出田稅。溝洫爲除水害。四井爲邑，方二里。四邑爲丘，方四里。四丘爲甸，甸之言乘也，讀如衷甸之甸。甸方八里，旁加一里，則方十里，爲一成，積百井，九百夫。其中六十四井，五百七十六夫，出田稅；三十六井，三百二十四夫，治洫。四甸爲縣，方二十里。四縣爲都，方四十里。四都方八十里，旁加十里，乃得方百里，爲一同也。積萬井，九萬夫。其四千九十六井，三萬六千八百六十四夫，出田稅；二千三百四井，二萬七百三十六夫，治洫；三千六百井，三萬二千四百夫，治澮。井田之法，備於一同。今止於都者，采地食者皆四之一。其制三等：百里之國凡四都，一都之田稅入於王；五十里之國凡四縣，一縣之田稅入於王；二十五里之國凡四甸，一甸之田稅入於王。地事謂農牧衡虞也，貢謂

九穀山澤之材也，賦謂出車徒給繇役也。《司馬法》曰：「六尺爲步，步百爲畝，畝百爲夫，夫三爲屋，屋三爲井，井十爲通。通爲匹馬，三十家，士一人，徒二人。通十爲成，成百井，三百家，革車一乘，士十人，徒二十人。十成爲終，終千井，三千家，革車十乘，士百人，徒二百人。十終爲同，同方百里，萬井，三萬家，革車百乘，士千人，徒二千人。」【疏】「乃經土地而井牧其田野」者，此都鄙井田之法也。賈疏云：「此小司徒佐大司徒掌其都鄙，都鄙則三等采地是也。井方一里，兼言牧地，是次田二牧，當上地一井。授民田之時，上地不易，家百畝；中地一易，家二百畝；下地再易，家三百畝。通率三家受六夫之地，一家受二夫，與牧地同，故云井牧其田野。」江永云：「井牧其田野，衍沃用井，隰臯用牧，有此通融之法，則凡高下胠邪之地，皆可以方田之算術齊之，無地不可井矣。但有公田，無公田，其制不能畫一。孟子請野九一而助，國中什一使自賦，是有通融之法。而《小司徒》惟言九夫爲井，未及論其中區之爲公爲私。《載師》任地，近郊什一，遠郊二十而三，甸稍縣都皆無過什一，似皆無公田。《司稼》巡野觀稼，以年之上下出斂法，亦惟皆私田，乃有不定之斂法。如行助法，則惟以公田之稼歸公，不必論年之上下矣。據《司馬法》，畝百爲夫，

夫三爲屋，屋三爲井，而《小司徒》言攷夫屋，《旅師》言聚野之屋粟，是用夫三爲屋之法矣。用屋法則非八家同井之法。」案：江說是也。此經井邑丘甸縣都，是徹法，九家同井之井田；《孟子》所說是助法，八家同井之井田。助有公田，徹無公田，兩法形體雖同，而家數迥異。徹法以一井九百畝之田，分授九家，而載師以郊甸稍縣都地之遠近，司稼以年之上下，通校其差率而爲斂法。《孟子·滕文公篇》，趙注謂徹法「耕百畝者，徹取十畝以爲賦」，殆未憭其制。云「四丘爲甸」者，賈疏云：「甸方八里，旁加一里則爲十里之成。今不言十里成，而言八里甸者，成間有洫，井間有溝，旁加一里者，使治溝洫，不出稅。舉其八里之甸，據實出稅者而言。」云「以任地事」者，賈疏云：「謂若《大宰》九職任萬民，謂任役萬民使營地事。」云「而令貢賦」者，貢者，九職之力征，即《閭師》之八貢。賦者地征，即《大宰》之九賦。鄭、賈謂賦專爲軍賦出車徒之等，說未核，詳後疏。云「凡稅斂之事」者，都鄙雖制井田，而此經則是徹法，無公田，一井九家，各受田百畝，而斂其什一之稅。賈疏釋稅斂爲一井之田，一夫稅入於官，則是合徹助爲一法，非經義也。詳《匠人》疏。注云「此謂造都鄙也」者，謂三等采地爲井田法也。云「采地制井田，異於鄉遂」者，賈疏云：

「案《遂人》夫閒有遂之等，是溝洫法，鄉田之制與遂同。此經與《匠人》爲井田法，其制與鄉遂不同，故云采地制井田異於鄉遂也。此雖不言異於公邑，公邑亦與遂同，故注《匠人》云「異於鄉遂及公邑」是也。」案：采地制井田，匠人爲之溝洫；鄉遂亦有溝洫而不爲井田，其溝洫形體亦與此殊，是其異也。至公邑之在甸稍縣都者，亦當制井田，與都鄙同。鄭、賈謂公邑皆不制井田，非也。詳後疏。云「重立國」者，謂采地爲畿內國，故與畿外侯國同制井田。今案：公邑亦制井田，侯國亦有不井之田，不可一概論也。詳《匠人》疏。云「小司徒爲經之，立其五溝五塗之界」者，塗，塗之俗。《掌節》、《司險》注，「五塗」字並作涂，此疑誤。此釋經土地爲經界也。《司市》注云：「經，界也。」《遂人》「以土地之圖，經田野，造縣鄙形體之灋」。注云：「經，形體，皆謂制分界也。」與此注義同。《漢書·食貨志》亦云：「理民之道，地著爲本，故必建步立畝，正其經界。」此小司徒所經，正建步立畝正經界之事也。賈疏依《天官·敘官》「經野」注義，謂經爲之里數，即井方一里邑方二里之等。今案：里數亦包於經界之內，注義固已核矣。五溝五塗，詳《遂人》、《司險職》。云「其制似井之字，因取名焉」者，《釋名·釋州國》云：「周制，九夫爲井，其制似井字也。」《論

語·學而《皇疏》云：「名為井者，因夫間有遂，水縱橫相通，成井字也。」程瑤田云：「屋三為井，井之名命於疆，別九夫二縱二橫如井字也。」論讓案：衍沃之地可為井者，則平方如圖。其不可為井者，則以《九章》方田之術步之，使其分率均平，則雖不如井字，而步積之數亦相等也。引《孟子》者，《滕文公篇》荅畢戰問井地之語，證經土地即經界之事也。井地不均，均，宋石經及宋本《孟子》並作「鈞」。貢祿，今本作「穀祿」。姦吏，今本作「污吏」。趙注云：「經亦界也。必先正其經界，勿慢鄰國，乃可均井田，平穀祿。穀，所以為祿也。」《周禮·小司徒》曰「乃經土地而井其田野」，言正其土地之界，乃定受其井牧之處也。暴君，殘虐之君。污吏，貪吏也。慢經界，不正本也。必相侵陵，長爭訟也。分田，賦廬井也。制祿，以庶人在官者比上農夫。轉以為差，故可坐而定也。」案：趙義與鄭同。鄭司農云「井牧者，《春秋傳》所謂井衍沃牧隰臯者也」者，《左》襄二十五年傳，說楚蔣掩書九等土田之事云：「度山林，鳩藪澤，辨京陵，表淳鹵，數疆潦，規偃豬，町原防，牧隰臯，井衍沃。」杜注云：「隰臯，水岸下濕，為芻牧之地。衍沃，平美之地，則如《周禮》制以為井田。」云「玄謂隰臯之地，九夫為牧，二牧而當一井」者，兼釋此經及《左傳》義也。《王制》孔疏云：「按

《異義》《左氏》說，山林之地，九夫為度，九度而當一井；藪澤之地，九夫為鳩，八鳩而當一井；京陵之地，九夫為辨，七辨而當一井；淳鹵之地，九夫為表，六表而當一井；疆潦之地，九夫為數，五數而當一井；偃豬之地，九夫為規，四規而當一井；原防之地，九夫為町，三町而當一井；隰臯之地，九夫為牧，二牧而當一井；衍沃之地，九夫為井。賦法積百井，除山川坑斥三十六井，定出賦者六十四井；則千里之畿，地方百萬井，除山川坑斥三十六萬井，定出賦者六十四萬井，長轂萬乘。如《異義》此說，則方十里凡百井，三十六井為山川坑斥，六十四井為平地出稅。按鄭注《小司徒》，成方十里，緣邊一里治為溝洫，則三十六井；其餘方八里為甸，六十四井出田稅。與《異義》不同者，《異義》所云，通山林藪澤九等而言之；鄭注《小司徒》者，據衍沃平地而言之，所以不同也。」案《左傳》孔疏又引賈逵說，與《異義》《左氏》說同，即二鄭所本也。依《異義》及賈、鄭說，則牧即一易之田，因為隰臯九夫之名。沈彤謂即《大宰》藪牧之牧，亦即休不耕之田是也。蓋井牧猶言田萊，休不耕之田以長草萊，故杜預以為芻牧之地。《書·禹貢》青州云「萊夷既牧」，明萊田宜畜牧矣。云「今造都鄙，授民田，有不易，有一易，有再易，通率二而當一，是之謂井牧」

者，據《大司徒職》，凡造都鄙以其室數制之，不易之地家百畝，一易之地家二百畝，再易之地家三百畝。此井牧亦造都鄙之法，授田宜依彼制，故知有此三法也。賈疏云：「三家受六夫之地，是隰臯之地二牧始當一井，故云二而當一。」云「昔夏少康在虞思，有田一成，有衆一旅」者，據《左》哀元年傳文。明彼一成之田，即《匠人》之十里曰成也。云「一旅之衆而田一成，則井牧之法先古然矣」者，謂亦近二當一之率也。賈疏云：「言有田一成，有衆一旅，則地以上中下爲率者，以爲其成方十里，九百夫之地，一旅五百夫，故知是通率之。通率之法，正應四百五十人，言一旅舉成數也，亦容不易者多。鄭言此者，井牧之法，自夏而有，非祇於周。」詒讓案：此可證鄭亦謂夏與周田制不異。《孟子》謂夏五十、周百畝者，蓋畝法之異，非授田有多少也。詳《匠人》疏。云「九夫爲井者，方一里，九夫所治之田也」者，《匠人》注同。《穀梁》宣十五年傳云：「古者三百步爲里，名曰井田。井田者九百畝，公田居一。」《韓詩外傳》云：「古者八家而井，田方里爲一井，廣三百步，長三百步爲一里，其田九百畝。」《孟子·滕文公篇》、《春秋繁露·爵國篇》說並同。李翱《平賦書》以三百六十步爲里，乃唐以後法，今承用之，與古里法不同也。又古書並謂井里同步，

唯《大戴禮記·王言篇》云「三百步而里，千步而井」。此說井里步異，與古制不合，蓋文有舛誤。《穀梁》、《韓詩》、《孟子》皆據制公田者爲說，故一井田九夫，治田之人則止八家。鄭《匠人》注謂周畿內都鄙井田，不制公田，則一井田九夫，治田之人亦九家。此云九夫所治之田，九夫猶言九家也。審校鄭義，蓋計地雖有宮室塗巷三分去一及受田一易再易二而當一之率，而同井聚居，則不宜過於疏曠，自以一井九家爲定數。故後注引《司馬法》十井爲通，雖以三十家約計，而其比居，實以三十六家聚居四井之地，餘六井即宮室塗巷及一易再易所除之地，皆所不居者也。然則虛實相除，當以一通除其六井，而不以一井除其六家，明矣。賈疏乃謂「一井之內，地有九夫，中一夫人於公，四畔八夫，家治百畝，無九夫所治；況其中或有一易再易，所取數更少。鄭據地有九夫而言，非謂有九家」。既違畿內不制公田之義，復以逐井除減謂無九家，殆未達鄭愜。《漢書·食貨志》載王莽擬載師里布法，令宅不毛者出三夫之布，似劉歆等即謂方里之井，三分除二，止有三夫。《論語·公冶長》皇疏亦謂方里爲井，井有三家。蓋以一通三十家之率分除之，則一井止有此數，是漢以來已有此說，即賈氏所本。然不可以此淆鄭義也。云「此制小司徒經之，匠人爲

之溝洫」者，明井田亦有溝洫，《匠人》文足與此相備。《鄉師》注謂冬官攷有匠師，即匠人之長。此官與彼爲官聯也。賈疏云：「案《匠人》云『井閒有溝，成閒有洫，同閒有澮』。是匠人爲之溝洫也。」云「相包乃成耳」者，謂井邑溝洫互相包，乃成一成一同也。云「邑丘之屬相連比，以出田稅」者，對邑丘等以外旁加之地，治溝洫不出田稅也。賈疏云：「從井邑至縣都，從內向外界相連比，井稅一夫，故言以出田稅。」云「溝洫爲除水害」者，《匠人》爲溝洫注云「主通利田閒之水道」是也。程瑤田云：「溝洫以備潦，非備旱也。歲歲治之，務使水之來也，其涸可立而待。若以之備旱，則宜豬之，不宜溝之；宜蓄之，不宜洩之。今之遞廣而遞深也，是溝之法，非豬之法；是洩之，非蓄之也。故使溝洫之制存而不壞，豈惟原田之利，農無水潦之患，而天下之川亦因之而治矣。《管子·立政篇》『溝瀆不遂於隘，鄣水不安其藏，國之貧也』。《尚書大傳》：『溝瀆雍遏，水爲民害，則責之司空。』此皆溝洫爲除水害之證。」云「四井爲邑，方二里」者，《呂氏春秋·貴因篇》高注義同。井方一里，四井積四里，開方爲二里。《釋名·釋州國》云：「四井爲邑，邑猶侶也，邑人聚會之稱也。」案：都鄙公邑，民相聚而居，蓋始於四井三十六家，故謂之邑。《國語·齊語》：管子治

鄙，以三十家爲邑。亦與四井家數相近。凡鄉遂都鄙公邑，聚居爲城，不論家數多少，通謂之邑，詳《里宰》疏。云「四邑爲丘，方四里」者，四邑積十六里，開方爲四里。《釋名·釋州國》云：「四邑爲丘。丘，聚也。」《說文·北部》云：「古者九夫爲井，四井爲邑，四邑爲北，北謂之虛。」云「四丘爲甸，甸之言乘也」者，段玉裁云：「甸，古音陳，陳乘雙聲。《稍人職》『丘乘』注曰：『丘乘，四丘爲甸。甸讀與『維禹敷之』之敷同，其訓曰乘，由是改云。』此注甸之言乘，即其訓曰乘也。甸與乘雙聲，因以知其訓曰乘。稍人之乘即甸，故此注甸之言乘也。」詒讓案：乘即後引《司馬法》「革車一乘」之乘，鄭《坊記》注云「古者方十里，其中六十四井出兵車一乘」是也。《釋名·釋州國》云：「四丘爲甸，甸，乘也，出兵車一乘。」《管子·乘馬篇》云：「方六里爲一乘之地也。」《山至數篇》說同。又《侈靡篇》云：「乘馬甸之衆制之。」案：《管子》六里，疑皆當作八里，所言丘乘之制，與此經同也。甸乘義同，互詳《稍人》疏。云「讀如衷甸之甸」者，《左》哀十七年傳，衛渾良夫乘衷甸兩牡。杜注云：「衷甸，一轅，卿車。」段玉裁云：「讀如者，但擬其音。讀如衷甸之甸，猶讀如『維禹敷之』之敷也。衷甸古音讀衷陳。」云「甸方八里」者，甸積六十四里，開方爲八里。云「旁加一

里則方十里，爲一成者，《王制》云：「方十里者，爲方一里者百，爲田九萬畝。」案此亦申上注溝洫與邑丘等相包之義。以此四丘爲甸，既積六十四里，更加溝洫之地，積三十六里，通爲百里，開方得十里，是於甸八里旁加一里，即《匠人》云「方十里爲成」，明成中包甸。《司馬法》成甸出車異而實同，是其證也。但此所加之地，通溝洫言之，洫包甸外，而溝則交注甸內，鄭欲取整數計之，故通云旁加一里。《匠人》注又謂「緣邊一里治洫」，實則所加之地，不盡在旁邊，亦不盡治洫也。云「積百井九百夫」者，賈疏云：「但一成之內方十里，開方之得百井，井有九夫，故云九百夫。」云「其中六十四井五百七十六夫出田稅」者，即《匠人》注云「甸方八里出田稅」是也。賈疏云：「此就甸方八里而言，八里之內開方之，八八六十四，故云六十四井；井有九夫，故五百七十六夫；井稅一夫，故云出田稅。」云「三十六井三百二十四夫治洫」者，此明里外旁加之三十六井爲虛地，不出田稅者也。賈疏云：「此據甸方八里之外，四面加一里爲成而言。成有百井，中央八里，除六十四井，餘有三十六井。井有九夫，故三百二十四夫，治洫不使稅。鄭言此者，見經四丘爲甸，據實出稅而言，故不言成也。若然，方里爲井，井間有溝，溝廣四尺，深四尺；方十里爲成，成間

有洫，廣八尺，深八尺。治溝洫者皆不出稅，獨言治洫者，據外而言。其實治溝亦不出稅，摠在六十四井之內，以洫言之矣。」陳喬樞云：「夫之名有二：其連夫家爲文者，則指人也；其從田制而言，如畝百爲夫，夫三爲屋，則指地也。九夫爲井，疏云「一井之內，地有九夫」是已。鄭所云三十六井三百二十四夫治洫者，謂一成百井，其三十六井三百二十四夫之地，以爲溝洫。宋人誤解鄭義，而以旁加之夫，爲專治溝洫之人，使不出稅，失之殊甚。《匠人》注云：「夫三爲屋。屋，具也。一井之中，三屋九夫，三三相具出賦稅，共治溝也。」鄭明言共治溝，則推之洫澮，皆當共治之，安得專有治洫治澮之夫？所謂甸方八里旁加一里者，計六十四井之田方八里，其旁加有一里，縱橫合之爲方十里，即畝間之畝，田首之遂，井間之溝，成間之洫，積六十四井算之，加三十六井三百二十四夫之地。鄭於成發之者，以整數爲算法耳。成但言洫者，以成始有洫，言洫則畝遂與溝可知也。柰何以旁加一里在一甸之外而其夫專治溝洫乎？匠人之法，一成一洫，其成之一面近洫者，使之治洫，猶可言也；其成之三面，距洫已遠，獨此四旁三十六井，使之越數里之地，往來治洫，豈所以便民者哉！然一成之地猶小也，至同方百里，其旁面距澮之遠，或數十里，

或百里，其對面距澮之遠皆百里，獨使四旁十里越百里之地，專任往來治澮，有是理耶？攷《小司徒》：「會萬民之卒伍而用之，以作田役」，注謂役爲功力之事。《小司徒》又曰：「凡起徒役，毋過家一人」。竊以澮澮之事，正所謂功力之役，如三夫共一遂，九夫共一溝，遂溝小而易，故但一井共脩之；澮與澮廣而且深，則脩之者當合一成一同，而家出一人共役其事，不當專責之某井某夫也。若必以某人治溝澮，某人出賦稅，豈先王均力征之意哉！《信南山》詩箋云：「甸方八里，居一成之中。」《坊記》注云：「古者方十里，其中六十四井。」言甸在一成中，又言其中六十四井，則是一成之中，但有一甸六十四井之田，故曰「六十四井，五百七十六夫，出田稅」。其餘爲畎遂溝澮，雖有三十六井三百二十四夫之地，無田，故無可出稅也。案《司馬法》有「成方十里，出長轂一乘」之文，亦有「甸方八里，出長轂一乘」之文，是知據夫地言之，則爲一成所出；據井田言之，則爲一甸所出。二者相通，故各據一焉。匠人爲溝澮，曰成曰同，益見方十里方百里者，爲包溝澮之地也。《匠人》注云：「方十里爲成，成中容一甸，甸方八里。」若其餘里亦有夫井，何以但言容一甸乎？又云：「方百里爲同，同容四都，六十四成。」變甸言成者，明一甸卽一成也。不言百成

而言六十四成者，明一同雖百成而實但有六十四成之田也。謂旁加一里，旁加十里，非溝澮之地而何哉！今卽畎遂溝澮之地算之。一夫百畎，畎廣尺長終畝，每六畎而當一畝地，則六夫之畎當一夫之地；甸六十四井，得十井三分井之二，爲九十六夫。畎之水入於遂，遂在田首，廣二尺，三夫而共一遂，遂長終井，其當畎處，益以畎廣六分畝之一。井間有溝以受遂水，廣四尺，長終甸。成間有澮，以受溝水，廣八尺，長終成。澮之縱橫從遂，其當畎處，亦益以畎廣六分畝之一而三倍之，澮廣三倍於遂，故當畎廣處亦三倍算也。合遂溝澮之長廣地，又不下數井。溝澮以通水利，徑畛以通車徒，遂上之徑容牛馬，溝上之畛容大車，澮上之涂容乘車一軌；計其地之長廣亦不下十數井。徑畛包於溝澮，則三十六井之爲溝澮地也明甚。鄭言「三十六井，三百二十四夫，治澮」，其算法當自精覈。非然者，一夫百畎，除其畎廣，是田無六尺之畎，而夫無百畎之田矣。況一成之地，若皆爲田畎，不知溝澮又取何地以爲之邪？」案：陳說是也。鄭所謂治澮治澮者，皆指濬治澮澮所占之地言之。故《稍人》注云：「是掌令都鄙脩治井邑丘甸之溝涂，溝涂之人，井別里異，則民之家數存焉。」明治溝涂者，卽丘甸之人。儻鄭以治溝之人別在丘甸之外，則治溝涂之人

名，安得見丘甸之家數哉！陳說信足發明鄭君之微指矣。云「四甸爲縣，方二十里」者，賈疏云：「甸方八里，縣應方十六里。云方二十里，據通治洫，旁加一里爲成而言。」詒讓案：甸積六十四里，甸郊則二百五十六里，開方得十六里，旁各加一里爲二十里。《國語·周語》韋注云「四甸爲縣，縣方十六里」者，不數旁加四里也。云「四縣爲都，方四十里」者，縣實田積二百五十六里，四縣則一千二十四里，開方得實田三十二里，通虛地八里爲四十里也。《呂氏春秋·貴因篇》高注云：「《周禮》四縣爲都，都方三十二里也。」即據實田言之。云「四都，方八十里」者，都實田積一千二十四里，四都則四千九十六里，開方得實田六十四里，通虛地十六里爲八十里也。云「旁加十里乃得方百里，爲一同也」者，《王制》云：「方百里爲方十里者百，爲田九十億畝。」此亦明甸八十里面加十里，即《匠人》云「方百里爲同也」。此一同百里，亦謂之縣。《周書·作雒篇》云：「千里分以百縣，縣有四郡，郡有四鄙。」彼縣即《匠人》之同，郡即此經之都，鄙即此經之縣，名制並異，疑晚周之制。《左》哀二年傳，說晉制亦縣大郡小，與《周書》同。又此方百里中含四都，《管子·乘馬篇》云：「上地方八十里，萬室之國一，千室之都四；中地方百里，萬室之國一，千室之都四；

下地方百二十里，萬室之國一，千室之都四。以上地方八十里與下地方百二十里。」通於中地方百里。」此亦以中地百里含四都，與此同，而國數室數並不合，亦非周法也。云「積萬井九萬夫」者，同方百里，通虛實之地，爲積萬井九萬夫也。賈疏云：「據百里開方而言。百里者縱橫各百，一行方一里者百，百行故萬井，^①一井有九夫，故有九萬夫。」云「其四千九十六井，三萬六千八百六十四夫，出田稅」者，四都之實地四千九十六里，爲四千九十六井，即每甸八里，六十四井，實田所彙積而成也。賈疏云：「此據從甸方八里出田稅，四甸爲縣，縣方十六里；四縣爲都，都方三十二里；四都方六十四里。據六十四里之內開方之，縱橫各一里一截，爲六十四截；行別有六十四井，六十四行計得四千九十六井；井有九夫，四千九十六井計得三萬六千八百六十四夫，是實出田稅者。」陳喬樞云：「一同中容四都，六十四成爲六十四甸，以甸六十四井五百七十六夫計之，六十四甸爲四千九十六井，三萬六千八百六十四夫，故鄭云「其四千九十六井，三萬六千八百六十四夫出田稅也」。云二千三百四井，二萬七百三十六夫治洫」者，以一同萬井

① 原脫「百」，據楚本補。

九萬夫，除實地四千九十六井三萬六千八百六十四夫，外餘五千九百四井五萬三千一百三十夫爲虛地，分治澮及澮。此治澮二千三百四井者，卽甸外旁加之虛地三十六井所累積而成也。賈疏云：「此據甸方八里旁加一里爲成，是不出稅治澮之夫而言之也。從四成積爲一縣，縣方二十里，四縣爲都，都方四十里。四都方八十里，開方之，縱橫各一里一截，爲八十截。一行八十井，八八六十四，爲六千四百井。就裏除四千九十六井，其餘二千三百四井在。井有九夫，二千三百四井爲二萬七百三十六夫，不出稅，使之治澮也。」陳喬樞云：「以成之三十六井治澮計之，六十四甸得二千三百四井，二萬七百三十六夫，皆爲溝澮之地，故鄭云「二千三百四井，二萬七百三十六夫治澮也」。」云「三千六百井，三萬二千四百夫治澮」者，此除四都實田四千九十六井及治澮之虛地二千三百四井之外，又加此虛地以治澮也。賈疏云：「此據四成爲縣，縣方二十里，二十里更加五里，卽爲大夫家邑也。縣方二十五里，四縣是小都，五十里是六卿之采地。四都爲方百里一同，卽爲三公、王子母弟之大都也。但據百里開方之，卽爲萬井；就萬井之內，除去六千四百井，其餘三千六百井在。井有九夫，則爲三萬二千四百夫，不出稅，使之治澮。」陳喬樞云：「鄭又言三

千六百井三萬二千四百夫治澮者，以上文所算無治澮之地，恐人不知，以溝澮之地爲井澮在內，故言此以別之，明治澮之地在三千六百井之中，不在治澮地內也。此三千六百井者，卽《王制》所謂山陵、川澤、溝瀆、城郭、宮室、塗巷三分去一者也。鄭不言者，方詳井田溝澮之制，故從略耳。」詒讓案：《漢書·刑法志》云：「一同百里，提封萬井，除山川、沅斥、城池、邑居、園囿、術路三千六百井，定出賦六千四百井。天子畿方千里，提封百萬井，定出賦六十四萬井。」《漢志》一同除三千六百井，卽此注一同所除旁加之數也。《王制》孔疏引《五經異義》《左氏》說，亦與《漢志》同，班、許兩家並兼山川坑斥等計之。鄭專屬治溝澮澮言者，文不具耳。但《漢志》一同萬井，除三千六百井，存六千四百井。以算術約之，是爲二十五分而去其九，存者十六也。前注說一成以三十六井治澮，六十四井出田稅，與彼率正同，較之三分去一之率，所去已較多。此以一同包百成，百成之內既去其二千三百四井治澮，又去其外三千六百井治澮，是萬井之中去者五千九百四井，存者止四千九十六井。以算術約之，是爲六百二十五分而去其三百六十九，存者二百五十六也，較之一成所去尤多。故依鄭說，則一同定出賦者，校《漢志》少二千三百四井。蓋《漢志》據一

同總除之，而鄭則據積百成爲同節次除之，故得數不同。又此率止可施於井田，依鄭義王畿百同，自都鄙外，鄉遂等皆爲不井之田，不可以此率概之，故《載師》注說王畿百同，受田家數，止以三分去一大約計算。《漢志》以井田爲王畿之通法，其說皆未合，故鄭並不從也。又《春秋繁露·爵國篇》云：「方里而一井，方百里爲方里者萬，法三分而除其一，城池、郭邑、屋室、閭巷、街路、市、官府、園囿、菱圈、臺沼、橡采，得良田方十里者六十六，與方里六十六。天子地方千里，爲方百里者百，亦三分除其一，定得田方百里者六十六，與方十里者六十六。」案：依董子說，則一同得良田六千六百六十六井，一畿得良田六十六萬六千六百井，所得數皆贏於《漢志》三十三分之一，而三分除一之率則同。《商子·來民篇》云：「地方百里者，山陵處什一，藪澤處什一，谿谷流水處什一，都邑蹊道處什一，惡田處什二，良田處什四。」案：商君以惡田良田共處十分之六，亦與三分去一之率相近。蓋古人計地墾田，法皆如是，惟井田與不井之田算率少異，互詳《載師》疏。云「井田之法備於一同」者，井邑丘甸縣都及五溝五塗之制，至同而大備也。陳喬樞云：「同方百里，提封萬井，其中甸之地，方六十四里，爲四千九十六井；溝洫之地，方四十八里，爲二千三百四

井；合爲方八十里，六千四百井。其餘三千六百井，山川城邑之三分去一者，爲三千三百三十三井有奇；其餘井，以之治澮與澮上之道。然後溝涂備而井田成，故曰井田之法備於一同也。」云「今止於都者，采地食者皆四之一」者，賈疏云：「解此四縣爲都，據小都五十里而言，是止於都也。以其采地食者，皆四分之一稅入天子，故云采地食者皆四之一也。案上諸男之地亦四之一，故云采地食者皆四之一。」論讓案：鄭意若備一同之制，則經當云四都爲一大都；今經自以井邑以上，積至四縣爲都而止，不復及大都者，以一同之中雖含四都，然公之采地自食者止三都，以一同入王，故此文止於四縣之小都。據《左》昭十三年傳，子產曰「卑而貢重者甸服也」。杜注以爲畿內共職貢者。是采地之貢，重於外諸侯。沈彤亦據以證鄭義。今攷《左傳》亦無四之一入王之明文，鄭自隱據《大司徒》子男所食爲比例。然此實臆說，於經無塙證。《大司徒》五等國所食義，亦本不如是，詳彼疏。云「其制三等」者，據《載師》云「以家邑之田任稍地，以小都之田任縣地，以大都之田任疆地」。謂畿內采地，自百里以下，遞減爲三等，異於畿外封國，自五百里以下，遞減爲五等也。《王制》云：「公侯田方百里，伯七十里，子男五十里。天子之三公之田視公侯，天子之

卿視伯，天子之大夫視子男。」鄭彼注云：「此地，殷所因夏爵三等之制也。周公斥大九州之界，封王者之後爲公及有功之諸侯，大者方五百里，其次侯四百里，其次伯三百里，其次子二百里，其次男百里。唯天子畿內不增，以祿羣臣，不主爲治民。」又《左傳》昭十三年孔疏及《國語·周語》韋注引《鄭志》云：「畿內之諸侯，雖爵在侯伯，周之舊法皆食子男之地。」此皆鄭謂畿內三等異於畿外五等之說也。然依彼注說，周畿內仍夏殷制，爲三等之國，則當以百里、七十里、五十里爲三等；而此注文又以百里、五十里、二十五里爲三等，與《王制》注說小異，似當以此注爲正。《孟子·萬章篇》云：「天子之卿受地視侯，大夫受地視伯，元士受地視子男。」與《王制》文復差異。依其說，則卿采邑百里，大夫采邑七十里，並校此注爲贏；而元士采邑五十里，又此及《王制》經注所無。古經歧迕，無可質定。又《王制》說五等國里數，亦實非殷法，詳《大司徒》疏。云「百里之國凡四都，一都之田稅入於王」者，此即公所食之大都也。三等采地即畿內之國，故謂之百里之國。百里者，積萬里一同之地，中含四都，方八十里，積六千四百里；通治澮之地，爲方百里。以《司馬法》出車之法計之，爲百乘之地，實出車六十四乘也。鄭謂采地者皆四之一人王，故四都而以

一都之田稅入王，餘三都公自食。沈彤云：「公田二千有四十八夫，王食者五百一十二夫。」云「五十里之國凡四縣，一縣之田稅入於王」者，此即卿所食之小都也。方五十里者，積二千五百里，中含四縣，方四十里，積千六百里，仍餘九百里，爲方三十里，通爲二十五乘之地，實出車十六乘。鄭謂四之一人王，故四縣而以一縣之田稅入王，餘三縣卿自食。沈彤云：「孤卿田五百一十二夫，王食者百二十八夫。」云「二十五里之國凡四甸，一甸之田稅入於王」者，此即大夫所食之家邑也。方二十五里者，積六百二十五里，中含實田四甸，方十六里，通虛地爲四成，方二十里，積四百里，仍餘二百二十五里，爲方十五里，通爲六乘有奇之地，實出車四乘。鄭謂四之一人王，故四甸而以一甸之田稅入王，餘三甸大夫自食。沈彤云：「大夫四百二十八夫，王食者三十二夫。」程瑤田云：「縣之田才二十里，都之田才四十里，而鄭言卿大夫采地，乃云二十五里之國，五十里之國者，蓋舉一同之田四之一與十六之一而言之也。」案：程說是也。公卿大夫采地三等，各相倍半，以次遞減，故大都地正一同，而小都家邑皆有餘地，不能適合四縣四甸之里數也。依此注義，則畿內采地三等，大都百里，小都五十里，家邑二十五里。其總數，則《大司徒》注云「未聞」。

《王制》說「天子縣內大國百里，次國七十里，小國五十里，三等之國凡九十三國」。鄭不從之者，以《王制》說畿外五等國里數，既與此經不合，則畿內采地里數亦不足馮。故鄭彼注及《大司徒》注並以爲夏制，說雖不甚塙，然其不可以證此經則固無疑也。又案：此四甸之縣，凡六十四邑，通旁加之地，則曰百邑。《左》襄二十七年傳，衛公孫免餘曰：「唯卿備百邑。」《坊記》孔疏引熊安生云：「卿備百邑者，《鄭志》以爲邑方二里。」案：二里者，卽四井之邑也。孔廣森云：「百邑者，四百井也。四百井者，四成也。成出革車一乘。四成者，四乘之地也。」案：孔說足申鄭義。蓋百邑爲井四百，與此家邑四成之數正同。沈彤謂卽四甸之地，則去旁加之地計之，此足證王國大夫與侯國之卿其采地同也。而《左傳》杜注、《雜記》、《左傳》孔疏則謂百邑是一乘方十里之邑，非四井之邑。依其說則邑卽一甸，出兵車一乘，百邑卽一同也。合於《坊記》「家富不過百乘」之文，而與此注大都百里亦正同。然其說非是。《大戴禮記·禮三本篇》云：「有國者事五世，有五乘之地者事三世，有三乘之地者事二世。」五乘者五成之地，三乘者三成之地，並與此家邑相近。以此推之，夏少康有田一成，有衆一旅，而《坊記》疏引《易·訟》九二「邑人三百戶」，鄭注

云：「小國之下大夫采地，方一成，其定稅三百家。」又《論語》「伯氏駢邑三百」，注云：「齊下大夫之制。」是古邦國大家采地亦不逾此，明《鄭志》說不可易也。至春秋以後，陪臣僭侈，於是有百乘之家，而與王之大都等。至戰國且有千乘之家，而與公侯大國等，皆非古制也。侯國采地之制，《論語·公冶長》皇疏、《坊記》疏引皇氏、熊氏說，皆以意爲推次，並差異無可質證，今不詳論。云「地事謂農牧衡虞也」者，賈疏云：「謂采地之中亦有九職。農則三農生九穀，牧則數牧以蕃鳥獸，衡虞則虞衡作山澤之材。九職唯言此三者，以其經言地事，故舉以言之，其餘六者略而不言矣。」案：此地事與《載師》、《土均職》略同，詳《載師》疏。云「貢謂九穀、山澤之材也」者，卽《大司徒》地貢是也。賈疏云：「此貢還出於農衡，地事既無九職，則貢中亦無九貢也。」詒讓案：閭師八貢，此「任地令貢」，注舉農牧衡虞四事，上經「令萬民之貢」，注舉嬪婦百工者，以其非地事也。於八貢獨遺圃與商二貢不言者，以農可畎圃，工可畎商，故《均人》「地職」、《土均》「地事」注並兼舉農圃，明其互相備，文不具也。云「賦謂出車徒給繇役也」者，賈疏云：「以其采地之內，無口賦出錢入天子之法，故以賦爲軍賦解之。若然，《大宰》九賦四曰家稍之賦、五曰邦縣之賦、六曰邦都

之賦者，謂三等采地之外，皆有公邑，公邑之內，口率賦錢，入於王家。但公邑無名，故舉三等之號以表之。故《禮雜問志》云：「稍縣都鄙地有公邑之民，口率出泉於王也。邦國都無口率之賦，唯有軍賦革車匹馬士徒而已」是也。詒讓案：《大司徒》云「以斂財賦」，注云：「賦謂九賦及軍賦。」此無九賦者，鄭謂采地無口賦也。實則《大宰》九賦是地稅，非口賦，此賦當亦兼九賦言之，注說非也。九賦，詳《大宰》疏。引《司馬法》者，釋井牧軍賦之法，兼證此井邑丘甸縣都，與《匠人》通成終同同制也。《漢書·藝文志·禮家》：「《軍禮司馬法》一百五十五篇。」《史記·司馬穰苴傳》：「齊威王使大夫追論古者《司馬兵法》而附穰苴于其中，因號曰《司馬穰苴兵法》。」是《司馬法》實古軍禮之遺文，故足與《禮經》相證。賈疏及《隋書·經籍志》謂即穰苴所撰，誤也。《論語·學而·集解》馬融注及《晉書·地理志》並引《司馬法》文，與此注略同。今本《司馬法》止存五篇，無此文，蓋在佚篇中。云「六尺爲步」者，《漢·食貨志》同。《爾雅·釋宮》邢疏引《白虎通》云：「人踐三尺，法天地人，再舉足曰步，備陰陽也。」《論語·學而》皇疏云：「凡人一舉足爲跬，跬，三尺也。兩舉足曰步，步，六尺也。」案：《車人》爲末云：「六尺有六寸，與步相中也。」此兼末

木弧曲之度計之如此，其弦度亦止六尺也。惟《王制》云：「古者以周尺八尺爲步，今以周尺六尺四寸爲步。」此與《司馬法》異者，蓋步法秦漢時有改易也。《通典·軍禮》說一步五尺，此唐以後制，今承用之。互詳《車人》疏。云「步百爲晦」者，《漢·食貨志》同。《韓詩外傳》云：「廣一步，長百步，爲一畝。」《說文·田部》云：「六尺爲步，步百爲晦。秦田二百四十步爲晦。」桓寬《鹽鐵論·未通篇》云：「古者制田，百步爲畝。先帝哀憐百姓之愁苦，衣食不足，制田二百四十步而一畝。」案：《玉篇·田部》云：「秦孝公二百四十步爲晦。」蓋商鞅開阡陌時所改。漢又因秦制，其晦長於古百四十步，而廣一步則同。《九章算術·方田篇》畝法亦依秦漢制，今承用之。云「晦百爲夫」者，《漢·食貨志》同。《論語》皇疏云：「畝百爲夫，方百步也。謂爲夫者，古者賦田以百畝地給一農夫也。」案：《公羊》宣十五年何注云「一夫一婦受田百畝」，故百晦即謂之夫。一夫百晦，積萬步，方百步也。程瑤田云：「晦百爲夫，夫之名，命於受田之人也。」詒讓案：古晦法百步，步法六尺，步晦相乘得六百尺，更以六百尺自乘，得三十六萬尺，爲古百晦之積。今晦法二百四十步，步法五尺，步晦相乘得千二百尺，更以千二百尺自乘，得百四十四萬尺，爲今百晦之積。而今尺校

古尺又約贏四分之一，則今百畝大於古幾五倍矣。古今尺異同，詳《玉人》疏。云「夫三爲屋」者，《漢·食貨志》同。《論語》皇疏云：「夫三，方百步者三也；廣一里，長百步也。」案：一屋三百畝，積三萬步。《管子·乘馬篇》云：「四聚爲一離，五離爲一制，五制爲一田，二田爲一夫，三夫爲一家。」彼蓋以半畝爲一聚，以次積之，三夫爲一家，家即《司馬法》之屋也。屋，詳《匠人》疏。云「屋三爲井」者，《漢·食貨志》云：「屋三爲井，井方一里，是爲九夫。」與經云「九夫爲井」義同。一井九百畝，積九萬步。云「井十爲通」者，《漢書·刑法志》同。一通九十夫，三十屋，九千畝，積九十萬步，此含虛地而言也。以實地計之，則當爲二邑八井之地，以其二井爲虛地，并計之爲一通。《論語》皇疏云：「此十井之地，並之則廣十里，長一里也。謂爲通者，其地有三十屋相通，共出甲士一人，徒卒二人也。」賈疏云：「據一成之內，一里一截，縱橫各十截，爲行一行，十井十行，據一成一畔通頭，故名井十爲一通。」程瑤田云：「井十爲通，通之名，命於十井之溝通於洫也。」云「通爲匹馬」者，賈疏云：「十井之內，井有九夫，十井爲九十夫之地；宮室塗巷三分去一，唯有六十夫地在。不易、一易、再易，通率三夫受六夫之地，三十夫受六十夫之地，唯三十家，使

出馬一匹，故云通爲匹馬。」云「三十家，士一人，徒二人」者，受田者三十夫，一夫爲一家，故三十家也。賈疏云：「三十家出三人。士謂甲士，徒謂步卒。」詒讓案：此大略計之也。若以八井實地計之，則當有七十二夫，以三等授地之率通之，凡三十六家，校總計一通之數多六家，然其出匹馬則同。云「通十爲成」者，《漢·刑法志》云：「通十爲成，成方十里。」《論語》皇疏云：「成，方十里也。謂爲成者，兵賦法一乘成也。」案：一成百井，三百屋，九百夫，九萬畝，積九百萬步。程瑤田云：「通十爲成，成之名，命於縱橫十里，爲方百井，井田之制於是乎成也。」云「成，百井，三百家，革車一乘，士十人，徒二十人」者，賈疏云：「一成之內有十通，言三百家者，亦如前通率法。一成之內，地有九百夫，宮室塗巷三分去一，不易、一易、再易通率二而當一，故一成唯有三百家，革車一乘，士十人，徒二十人。」此亦含虛地大略計之。《司馬法》別說甸出長轂一乘者，一甸卽一成所包之實地。一甸凡五百七十六夫，以三等授地之率通之，凡二百八十八家，校總計一成者少十二家，其出革車一乘則同。《春秋》成元年作丘甲，《左傳》杜注以爲令丘出甸之軍賦，爲非法之重斂。孔疏釋甸出一乘，謂「據上地言之，若以上中下地相通，則當二甸出一乘。」是除而又除，

失之遠矣。云「十成爲終」者，《漢·刑法志》云：「成十爲終。」荀悅《漢紀》終作「衆」，字通。案：一終百通，千井，三千屋，九千夫，九十萬畝，積九千萬步。賈疏云：「謂同方百里之內，十里一截，爲縱橫各十截，爲十行，行別十成。言十成爲終，據同一畔終頭而言。」程瑤田云：「十成爲終，終之名，命於洫納百溝，行百里以入於澮，井田水道之長終於此矣。」云「終，千井，三千家，革車十乘，士百人，徒二百人」者，賈疏云：「十成，成百井，故千井三千家。」詒讓案：成有九千夫，亦如前通率法，故爲三千家，此亦含虛地大略計之也。以實地計之，則一成中包一甸，十成則十甸，凡五千七百六十夫。以三等授地之率通之，凡二千六百八十家也，校總計一終之數少三百二十家，其出革車十乘則亦同。云「十終爲同，同方百里，萬井」者，《漢·刑法志》云：「終十爲同，同方百里。」案：一同百成，千通，萬井，三萬屋，九萬夫，九百萬畝，積九萬萬步。賈疏云：「謂之爲同者，取象雷震百里所聞同，故名百里爲同。」程瑤田云：「十終爲同。同，大成也。一澮上承洫溝遂畝之水，以專達於川。」云「三萬家，革車百乘，士千人，徒二千人」者，同九萬夫，亦如前通率法，故爲三萬家，此亦含虛地大略計之也。以實地計之，則同中包四都，凡四千九十六井，三萬六千八百六

十四夫。以三等授地之率通之，凡一萬八千四百三十二家也，校之總計一同之數少一萬一千五百六十八家，其出革車百乘則亦同。又《漢·刑法志》云：「一同百里，提封萬井，定出賦六千四百井，戎馬四百匹，兵車百乘，此卿大夫采地之大者也，是謂百乘之家。」案：《漢志》亦以一同所包之實地計數。然以同中實地爲四都，而總以一同百井去其三千六百井計之，依其說則一同六千四百井，凡五萬七千六百夫也；以三等授地之率通之，凡二萬八千八百家，與四都家數不合，然其出車之數則無不同也。陳喬樞云：「《小司徒》言井牧之法，而溝洫之法詳於《匠人》。《司馬法》自六尺爲步，至屋三爲井，言夫畝之數，自井十爲通，至同方百里，言土地之數，無有異也。鄭恐人不明，故引《匠人》溝洫之制而證以《司馬法》之文如此。」詒讓案：以上並引《司馬法》文，以說井牧出軍賦之法。然彼本有二法。《詩·小雅·信南山》孔疏引《左傳》成元年服注述《司馬法》云：「四邑爲丘，有戎馬一匹，牛三頭；是曰匹馬丘牛。四丘爲甸，甸六十四井，出長轂一乘，馬四匹，牛十二頭，甲士三人，步卒七十二人，戈楯具備，謂之乘馬。」此注成出一乘，終出十乘，同出百乘；而服注則甸出一乘，縣出四乘，都出十六乘。兩法不同。賈疏云：「此謂天子畿內

采地法。鄭注《論語》「道千乘之國」，亦引《司馬法》，彼是畿外邦國法。彼革車一乘，甲士三人，步卒七十二人。甲士少，步卒多。此士十人，徒二十人，比畿外甲士多，步卒少。外內有異故也。」案：《司馬法》二文差互，鄭此注，《論語注》各據其一，無所折衷。依賈說則此注所引者，爲天子畿內采地法；《左傳》服注所引者，爲畿外邦國法。《坊記》及《左傳》成元年孔疏說並同。《穀梁》哀十二年，楊士助疏云：「甸出長轂一乘，此甸據實出賦者言之。成方十里出革車一乘者，通計治溝洫者言之，其實一也。」案：楊說與賈、孔不同，而於義爲長。黃以周云：「《左傳》曰：『晉十家九縣，長轂九百；其餘四十縣，遺守四千。』《周書·作雒解》『千里百縣』，則一縣猶一同也。四十九同，爲方七百里，出車四千九百乘，此用成出一乘之法也。《左傳》又曰：『公子無虧戍衛，帥車三百乘，甲士三千人。』此用革車一乘，士十人，徒二十人之法，亦成出一乘之法也。賈疏謂邦國用甸出一乘七十五人之法，亦與傳戾。」案：黃說亦足證賈、孔說之誤。江永云：「《司馬法》通成終同，封畿以十起數，計里也。《小司徒》井邑丘甸縣都，以四起數，制賦也。甸與乘古字通。因一乘當用四馬，其制成於六十四井，故皆以四起數，此與計里之法本不相通。而亦可相通

者，井田與道里有實數有虛數也。是以《漢志》云一同萬井，定出賦六千四百井，戎馬四百匹，兵車百乘；而一封三百一十六里出千乘，一畿千里出萬乘，亦皆以百分之六十四爲實，三十六爲虛。則一成十里亦以一甸六十四井爲實，三十六井之地爲虛矣。」案：江說亦是也。《漢志》所說一同井田實數，與四都之井數不合，積爲封畿，其不合彌多。然可證《司馬法》二文虛地實地異而實同之義。蓋此注引《司馬法》，止於一同萬井，出車百乘，是爲采邑大都之賦。《漢志》據其率推廣之，以十同爲一封，十萬井，出車千乘，是爲諸侯大國之賦；又以十封爲一畿，百萬井，出車萬乘，是爲王國之賦。然此止是大略之法，若以任地之制分別精算，則不必密合。此猶《作雒》說「王畿百縣」，止據縣鄙都鄙言之，若郊甸鄉遂，安得盡以縣法概之哉！今以此經及《司馬法》參互校之，王畿及侯國皆有鄉遂都鄙之異，鄉遂五五相比，斷不能爲井田。又《左傳》成元年疏云：「長轂、馬牛、甲兵、戈楯，皆一甸之民同共此物。若鄉遂所用車馬甲兵之屬，皆國家所共。知者，以一鄉出一軍，則是家出一人，其物不可私備故也。」據孔說，是鄉遂賦法，出兵而不出車。若依《司馬法》計井出車之制計之，則必王國侯國皆不立鄉遂而後可，其不合者一也。且都鄙雖爲井田之

制，然疆域華離及山川所限，斷不能截然正方，亦必有畸零不井之田錯乎其間，則亦不能皆符此數，其不合者二也。又《司馬法》所計夫數，皆以一井九家爲率，則不爲公田。而據鄭《匠人》注，則王畿之井田用貢法，無公田；邦國之井田用助法，有公田。有公田則一井止八家，一邑止三十家，而丘甸以上之積數，皆當大減。是侯國卽不立鄉遂，盡爲井田，亦不能充此數，其不合三也。然則作《司馬法》者，未嘗不知井與不井形體不一，但分地校量，則紛互糅糅，不便計算，故設此計里令賦大略之疏率，無論井與不井，一以此通之；不過謂地方百里可出車百乘，地方三百十六里有奇可出車千乘，地方千里可出車萬乘耳。彼本不謂盡天下皆爲井田，而說者必欲牽就井數夫數，一一校覈，求其密合，其有當乎！既知其爲大略之法，則知通成丘甸二文雖異，而同爲計里出車之法，不當如賈、孔說，以爲都鄙邦國之異制。蓋丘爲匹馬丘牛，卽通爲匹馬。《左傳》昭四年「鄭子產作丘賦」，《孫子·作戰篇》云「財竭則急於丘役」，並謂此也。丘，十六井，凡百四十四夫；以三等授地之率通之，受田者凡七十二家。此與通十井三十家數雖不合，而其出匹馬則同，但丘增出牛三頭耳。以平價論之，馬貴而牛賤，三十家而出馬一匹，與七十二家而出馬一匹，牛

三頭，其費固約略相等也。成包一甸，甸出長轂一乘，卽成出革車一乘也。甸六十四井，以率通之，凡二百八十八家，此與成百井三百家數雖不合，而其出車一乘則同。由是推之，終十成包十甸，同百成包百甸，其井及夫家之數亦皆不合，而其出車十乘、百乘則亦同。但依鄭義一同雖可容百成，而緣邊須再除其治洫之虛地，是同中實地，止包四都六十四甸，則止能出六十四乘，不足百乘之數。足證《司馬法》亦大略計之，本未以溝洫積數實除，止以百成包百甸則出車百乘，與甸出一乘之積數固無不合。故《論語注》所引甲士步卒七十五人者，依服氏所引本爲一甸所出；而《左傳疏》引《論語注》又云「成方百里所出」，則鄭亦以二者是一，可以互通，非一成所出必少於一甸所出之數也。至甲士步卒之數兩文所以不同者，江永云：「七十五人者，丘乘之本法；三十人者，調發之通制。《魯頌》『公車千乘』，「公徒三萬」，正與《司馬法》合。」金榜云：「周軍賦有正卒以起軍旅，有羨卒以作田役，比追胥。《小司徒職》：『凡起徒役，無過家一人，以其餘爲羨，唯田與追胥竭作。』此正羨二卒，以《司馬法》計之：一云通爲匹馬，三十家，士一人，徒二人；成三百家，革車一乘，士十人，徒二十人；終三千家，革車十乘，士百人，徒二百人；同三萬家，革車百乘，士

千人，徒二千人。蓋家計可任者一人，一成三百家，可任者三百人，而革車一乘，士徒凡三十人，是爲十而賦一，所謂凡起徒役無過家一人者也。一云甸出長轂一乘，馬四匹，牛十二頭，甲士三人，步卒七十二人，戈楯具備，謂之乘馬。甸六十四井，通上中下地率之，定受田二百八十八家，出長轂一乘，步卒七十二人，甲士三人者，其軍吏，所謂唯田與追胥竭作者也。前法爲正卒，後法爲通正義之卒。孫武言「興師十萬，不得操事者七十萬家」。彼以八家賦出一卒，七家相與共其用，故云不得操事，是猶略具周人任民遺意。管子治齊，作內政，寄軍令，卒伍定乎里，軍政成乎郊，其制士鄉十五，始家出一人爲卒，班孟堅所謂隨時苟合，以求欲速之功，故不能充王制者也。《春秋》成元年「作丘甲」。說者謂此甸所賦，使丘出之。丘十六井，通上中下地二而當一，爲七十二家，亦家出一人爲卒。至戰國時，蘇秦謂臨淄之中七萬戶，下戶三男子，臨淄之卒固已二十一萬，始盡役其家之正義爲卒，而禍變亟矣。」案：江、金說是也。戴震說同。七十五人者，任民之法，非卽兵車一乘之人數；三十人者，出軍之法，兵車一乘二十五人，餘五人將重車也。江氏謂七十五人者丘乘之本法，三十人者調發之通制，足正賈、孔采地邦國異制之誤。至周制，鄉遂什伍與都鄙丘

甸，法制迥異。上文正義卒，雖專據鄉遂言之，與都鄙不相冢，而丘甸調發，亦必有正義二卒，自無疑義。金氏段彼文以釋《司馬法》丘甸之制，謂三十人者爲正卒，七十五人者爲通正義之卒，通計正義，卽是丘乘本法，調發止於正卒。與江說亦足以相明。然以實地計之，通包八井，依率除之，則不止三十家，而成包一甸，則又不足三百家。終包十甸，同包四都亦然。通而計之，蓋不盈十家而賦一也。至一甸之田，依率通之，凡三十二井，二百八十八家，而出步卒七十二人，則是四家而賦一人也。及其調發，則以三十二井而出士徒三十人，是一井九家而賦一人也；尚餘二井不賦卒，使互相補助，以紓其力。則與十賦一之制，亦大略相近。是依丘甸之法則九家有奇而賦一，依通成之法則不足十家而賦一，二法略同。《管子·八觀篇》云：「什一之師，三年不解。」此與十賦一之法合者也。而《孫子·用間篇》以八家賦一人計之，蓋邦國制公田者之遺法，亦足爲井出一人之證。又案：《司馬法》二文雖異，然皆謂一成百井，出兵車一乘。依鄭除虛地計之，實一甸六十四井而出一乘，內外相含，其數同也。而《公羊》宣十五年、哀十二年何注，並謂十井出兵車一乘。《論語·學而》集解引馬融云：「千乘之賦，其地千成，居地方三百一十六里有畸，唯公侯

之封乃能容之。」包咸云：「千乘之國，百里之國也。古者井田，方里爲井，十井爲乘，百里之國適千乘也。」皇氏《義疏》以包說爲夏殷制。據賈疏則鄭《論語注》說與馬同。今攷馬、鄭說丘乘出車，合於《司馬法》，封國里數，合於此經，其義不可易也。《管子·揆度篇》云：「百乘之國，中而立市，東西南北度五十里，爲耕田萬頃，爲戶萬戶，爲開口十萬人，爲當分者萬人，爲輕車百乘，爲馬四百匹。千乘之國，中而立市，東西南北度五十餘里，爲耕田十萬頃，爲戶十萬戶，爲開口百萬人，爲當分者十萬人，爲輕車千乘，爲馬四千匹。萬乘之國，中而立市，東西南北度五百里，爲耕田百萬頃，爲戶百萬戶，爲開口千萬人，爲當分者百萬人，爲輕車萬乘，爲馬四萬匹。」此里數車乘與《司馬法》說正同。千乘之國，東西南北度五十餘里，正馬氏所云「千成地方三百一十六里有畸」者也。惟夫田、戶口之數不合耳。甸之名出於乘，明乘法始於一甸。儻如包、何說，則當二邑有半而賦一乘，一甸當賦六乘有奇，取數既畸零不整，復與甸乘名義不相應矣。況昭五年《左傳》說韓氏、羊舌氏十家九縣，長轂九百，卽《司馬法》同出革車百乘之制。又《大戴禮記》說侯國采地，有五乘三乘，依馬、鄭義，爲五百井三百井之地，與《左傳》「卿備百邑」四百井之文相近。

若如包、何說，則五乘者止五十井，不過十二邑有奇，三乘者止三十井，不過七邑有奇，與大國卿采地之制相去遠甚，其可通乎！至鄉遂一家賦一人而都鄙則一井賦一人者，六鄉之卒皆素隸軍籍，六遂雖無軍籍，而與六鄉皆出兵而不出車，故家出一人不爲多。丘乘之卒出於農民，且有出車馬甲兵之費，雖平時發軍所不及，然其所云一乘三十人，一乘七十五人者，亦必豫定其制，若有大征伐，或師不功，鄉遂兵不足用，則亦徵及之，至於田役追胥，羨卒盡行，則又與鄉遂無異，故井出一人，不爲少也。鄉遂軍制及都鄙出車徒之異，並詳《夏官·敘官》疏。乃分地域而辨其守，施其職而平其政。分地域謂建邦國，造都鄙，制鄉遂也。辨其守謂衡虞之屬。職謂九職也。政，稅也。政當作征。故書域爲邦，杜子春云：「當爲域。」【疏】「乃分地域而辨其守」者，賈疏云：「小司徒佐大司徒主土地。言分地域，謂建邦國之等，各有營域遠近疆界。辨其守，謂邦國都鄙之內所有山川，使虞衡守之。」云「施其職而平其政」者，卽問師任民，均人、土均均地政之事。注云「分地域謂建邦國、造都鄙、制鄉遂也」者，明此經不冢上造都鄙爲文也。賈疏云：「案大司徒職掌天下土地之圖，

周知人民之數，小司徒佐之，明分地域者，亦普及天下也。是以知分地域之中，有畿外邦國、畿內都鄙及六鄉六遂，鄭雖不言公邑，地域之中亦含有四等公邑可知。「云「辨其守謂衡虞之屬」者，守即所謂地守也。《大司徒》云「莫地守」，注云：「謂衡麓虞候之屬。」《均人》、《土均》「地守」注義並同。云「職謂九職也」者，《大司徒》云「分地職」，注云：「分其九職所宜也。」此職亦即地職，通大宰九職言之也。云「政，稅也」者，與《均人》之「地政」、《土均》「土地之政」義同。《大司徒》作「地征」，彼注云：「征，稅也。」云「政當作征」者，謂征稅之字，不當作政教之政也。《均人》、《土均》諸職「地政」字，注並讀爲征。凡此經征政字多通用，詳《小宰》疏。云「故書域爲邦，杜子春云當爲域」者，段玉裁云：「《說文·戈部》：「或，邦也。」域，或或字也。《口部》：「國，邦也。」蓋古三字本一字。國與邦異部而雙聲。杜必改邦爲域者，邦者統詞，域者別詞。」徐養原云：「《大司徒》「以天下土地之圖，周知九州之地域」，與此經地域同義。」案：段、徐說是也。

凡小祭祀，奉牛牲，羞其肆。

小祭祀，王玄冕所祭。【疏】「凡小祭祀奉牛牲」者，與小宗伯、小司馬、小司寇、小司空爲官聯也。云「羞其肆」者，肆，依鄭義亦當讀爲鬻，詳《小子》疏。賈疏云：「《大司徒》

云：「祀五帝，奉牛牲，羞其肆。」今於小祭祀，則小司徒奉牛牲，羞其肆。」注云「小祭祀，王玄冕所祭」者，《舞師》

注同。賈疏云：「案《司服職》云：「羣小祀則玄冕。」彼注

云：「羣小祀，林澤墳衍四方百物之屬。」其於天神，亦有小祀，則風師雨師之等。小祭祀既用牛，則王之祭祀無不用牛者。案《酒正》注以六冕差之，緇冕所祭亦入小祀中。今

鄭不言之者，以其社稷五祀於祭饌之事入次祀中，故《宗伯》云「血祭祀社稷、五祀、五嶽」。故於此奉牛牲不言緇冕

矣。詒讓案：此注與《酒正》注不同，此是也。詳《酒正》及《肆師》、《司服》疏。又案：依此經，則王國羣小祀皆用大

牢。或亦兼有特牛，《月令》孔疏謂五祀門竈等用特牛，又引熊安生謂礫攘亦用牛，是也。《郊特牲》疏又謂天神日

月、地而五祀以下常祀並用羊，王親祭乃用牛，恐非是。互詳《羊人》疏。

小賓客，令野脩道委積。 小賓客，諸

侯之使臣。【疏】「小賓客，令野脩道委積」者，令四郊以外

脩道路及委積也。注云「小賓客，諸侯之使臣」者，明

此小賓客兼《大行人》之大客、《小行人》之小客二者而言，

詳《大司徒》疏。賈疏云：「案《大司徒職》「大賓客令野脩道委積」，謂五等諸侯來朝者。此小賓客，諸侯使卿大夫來

聘，故小司徒令野脩道委積。《大司徒》注：「令，令遣人。」

此雖無注，亦與彼同。」案：遣人唯掌脩委積，其脩道當令野廬氏。賈據《大司徒》注，義未咳，詳彼疏。大軍旅，

帥其衆庶；帥，帥而致於大司徒。【疏】注云「帥，帥而

致於大司徒」者，賈疏云：「案《大司徒職》：『大軍旅以旗致萬民』，明此大軍旅帥其衆庶者，小司徒於六鄉之內，帥其衆庶致與大司徒可知。」小軍旅，巡役，治其政令。

巡役，小力役之事則巡行之。【疏】「小軍旅，巡役，治其政

令」者，賈疏云：「案大司徒大軍旅大田役而治其徒庶之政令，故此小軍旅，巡役，小司徒治其政令。」注云「巡役，

小力役之事則巡行之」者，巡行，葉鈔本《釋文》作「脩行」。

阮元云：「蓋『循行』之誤。」詒讓案：《掌固》注云：「巡，行

也。」循與巡字通。賈疏云：「此經小軍旅謂使臣征伐，對

大軍旅天子親行。此經『巡役』文承小軍旅下，故知小功役

之事則巡行之。若大功役則大司徒巡行之。」俞樾云：

「《大司徒職》云『大軍旅、大田役以旗致萬民，而治其徒庶

之政令』。故鄭君解巡役爲小力役之事則巡行之，與彼文

相配也。然此文『小軍旅巡役』，自與上文所云『大軍旅帥

其衆庶』相配，巡役即以小軍旅言，不得分爲二事。小軍旅

巡役者，謂小軍旅則巡行其徒役也。《鄉師職》云：『大軍

旅會同，正治其徒役。』疏曰：「謂六軍之外別有民徒使役，皆出於鄉。」是軍旅亦有徒役之證。」案：俞說較鄭爲長。①

大喪，帥邦役，治其政教。喪役，正棺、引窆、復土。

【疏】「大喪」者，賈疏云：「謂王喪。」案：當亦關后、世子，

詳《宰夫》疏。云「帥邦役，治其政教」者，賈疏云：「邦，國也。帥領國民，謂六鄉衆庶役使之事，因即治其政教。」方

苞云：「大司徒帥六鄉之衆庶，屬其六引，而此職又云『大喪帥邦役』，則知遂人所致六遂之役，稍人所帥公邑之役，

並致於小司徒。而所謂治其政教者，即《遂人》之六綽，《遂

師》之「抱磨、共丘籠及蜃車之役」矣。以遂與公邑之役並

致焉，故統之曰邦役。」案：方說是也。蔣載康亦謂葬時兼

督遂役。賈謂唯帥鄉役，說未咳。注云「喪役，正棺、

引窆、復土」者，《釋文》云：「窆，劉補鄧反。」孔繼汾云：

「如劉讀，即當作塋。」案：孔校是也。劉昌宗本蓋與陸、賈

本字異，而義則同。賈疏云：「鄭解經大喪所役，不據初

死，以其初死所役無多，故據葬時而言。言正棺者，謂若七

月而葬朝廟之時，正棺於廟。引謂葬時引柩車自廟至塋。

窆謂下棺於坎，天子六紼四碑，背碑挽引而下棺。云復土

① 「俞說較鄭爲長」，楚本作「俞說亦備一解」。

者，掘坎之時，掘土向外，下棺之後，反復此土以爲丘陵，故云復土也。」詒讓案：「正棺者，《既夕禮》云：『遷于祖，用軸，升自西階，正柩于兩楹間。』天子禮與土同。復土者，即《既夕禮》之實土。《史記·孝文本紀》：『發卒藏郭穿復土。』索隱云：『謂穿墳出土，下棺已而填之，即以爲墳，故云復土。復，反還也。』窆，詳《鄉師》疏。又《遂人》注云：『大喪之正棺，殯啓朝及引，六鄉役之；載及窆，六遂役之。』《遂師》『共丘籠之役』，注云：『丘籠之役，窆復土也。』此注說喪役有窆復土，則鄭意亦謂小司徒不徒治六鄉之役，實兼治六遂之役矣。凡建邦國，立其社稷，正其畿疆之封。畿，九畿。【疏】「凡建邦國，立其社稷，正其畿疆之封」者，大司徒掌辨邦國之數，制其畿疆而溝封之，設其社稷之壇，此官佐其制設之事，亦命封人立之也。賈疏云：「言邦國者，謂立畿外諸侯邦國。立其社稷者，諸侯亦有三社三稷，謂國社、侯社、勝國之社，皆有稷配之。言立其社稷，謂以文書法度與之，不可國國身往也。正其畿疆者，謂九畿畿上皆有疆界封樹以爲阻固也。」注云「畿，九畿」者，謂侯、甸、男、采、衛、要、夷、鎮、蕃九畿，詳《大司馬職》。凡民訟，以地比正之；鄭司農云：「以田畔

所與比，正斷其訟。」【疏】「凡民訟以地比正之」者，謂爭戶口、征役及子女臣妾誘逸之事。易被謂此即《小宰》八成所謂「聽政役以比居」是也。孔廣森云：「比即比居，下圖即版圖。管仲治齊，有戶籍、田結，是古圖比之法。」注鄭

司農云「以田畔所與比，正斷其訟」者，賈疏云：「六鄉之民有爭訟之事，是非難辨，故以地之比鄰知其是非者，共正斷其訟。」詒讓案：先鄭謂此以地比正民訟，猶後世斷訟以里鄰爲證左。云田畔所與比者，以經云地比，明田畔相比，則居亦相近也。然此比實當爲比居之比，與五家爲比義不同，先鄭說失之。地訟，以圖正之。地訟，爭疆界者。圖謂邦國本圖。【疏】「地訟以圖正之」者，易被謂此即《小

宰》八成所謂「聽閭里以版圖」是也。注云「地訟爭疆界者」者，謂因廛宅田園疆界相侵越而爭訟者也。云「圖謂邦國本圖」者，即《大司徒》云「邦之土地之圖」是也。賈疏

云：「凡量地以制邑，初封置之時，即有地圖在於官府，於後民有訟者，則以本圖正之。」歲終，則攷其屬官之治成而誅賞，治成，治事之計。【疏】「歲終」者，亦謂

夏之季冬建丑之月，鄭、賈並請周之季冬建亥之月，非也。詳《大宰》疏。云「則攷其屬官之治成而誅賞」者，正教官之

歲會，所謂官計、官成也。賈疏云：「屬官謂教官六十，成謂計簿。正所治計會文書而誅賞者，據其考狀，有罪則誅責之，有功則賞之。」^① 注云「治成，治事之計」者，治成

即《司會》云「以歲會攷歲成」也。成、要、會，亦通言不別。賈疏據《宰夫職》歲計言會、月計言要、日計言成，謂此成爲日計小成，失之。令羣吏正要會而致事。【疏】

「令羣吏正要會而致事」者，賈疏云：「羣吏謂當職六十官。此亦是歲終之時。此言要會，謂是月計歲計總爲簿書，而致其事之功狀以待考也。」詒讓案：此羣吏通地官諸官府言之，詳《大宰》疏。正歲，則帥其屬而觀教灋之

象，徇以木鐸曰：「不用灋者，國有常刑。」令羣吏憲禁令，脩灋糾職以待邦治。憲，表縣之。

【疏】「正歲則帥其屬而觀教灋之象」者，教灋之象即大司徒教象之灋也。此小司徒正歲建寅之月縣教象，使百官觀，與小宰帥屬觀治象略同，與大司徒正月縣教象使萬民觀者異。鄭《大司徒》注并二者爲一，非也。詳《大司徒》及《大宰》疏。又此教官之屬觀教象，疑當在治朝之旁大司徒治事之舍，故《鄉大夫》云「正歲，令羣吏攷灋于司徒以退，各憲之於其所治」。蓋攷灋於司徒，即因觀象在司徒所治

舍，故就考之；而司徒縣教灋於所治，亦猶鄉吏受教灋而憲之於其所治，足相推例也。互詳《大宰》、《小宰》疏。云

「徇以木鐸曰，不用灋者國有常刑」者，此即就觀法之處，以木鐸徇而戒之，亦與小宰徇治官同，與大司徒分令百官府者異也。詳《小宰》疏。云「令羣吏憲禁令」者，羣吏憲禁令蓋各於所治憲之，猶鄉大夫令鄉吏憲法於所治也。古凡禁令大者，皆書縣之以警衆，若小宰憲禁于王宮，士師五禁皆書而縣于門閭。此禁令者，當咳彼官禁、國禁、野禁等。縣門閭即憲法也。云「脩灋糾職以待邦治」者，糾職猶《大司寇》「官刑上能糾職」，注云「職事脩理」是也。賈疏云：「謂脩其法制，糾察職事，以待邦國有治則供之。」注云

「憲，表縣之」者，《小宰》注義同。及大比六鄉四郊之吏，平教治，正政事，攷夫屋及其衆寡、六畜、兵器，以待政令。四郊之吏，吏在四郊之內主民事者。夫三爲屋，屋三爲井，出地貢者三三相任。【疏】「及大比六鄉四郊之吏」者，即上文三年大比之事。小司徒

^① 「則」，原訛作「有」，今據楚本改。

專治六鄉四郊，而亦通掌公邑都鄙之比法，經文不具也。^①云「平教治正政事」者，賈疏云：「以其三年大比之時，大黜陟之禮，故斷其教治文書，復須正直其政事公狀。」云「攷夫屋」者，謂校考鄉遂溝洫縣鄙井田之數而著之於圖也。云「及其衆寡六畜兵器」者，亦考其人民及器物之數，著之於版。以上皆大比時，鄉郊之吏所登者，此官復通考之也。兵謂五兵，器謂車輦任器等。凡經云兵器者，兵與器並爲二，詳《玉府》疏。莊存與云：「前曰車輦，此曰兵器，互相備。」云「以待政令」者，國有軍旅賦役之政令，則依此數均平興發之。注云「四郊之吏，吏在四郊之內主民事者」

者，賈疏云：「遠郊之外爲六遂，內爲六鄉。六鄉之民非直在城中，亦在四郊，故比長閭胥六鄉之吏等布在四郊之內，主民事者也。」案：賈蓋依鄭《載師》注，說遠郊之內二十四萬夫地，六鄉受十五萬夫，餘九萬夫，以廛里、場圃、宅田、士田、賈田、官田、牛田、賞田、牧田九者，各受一萬夫，適盡九等。田里雖在六鄉之外，亦附屬六鄉，故賞田《司勳》謂之六鄉之賞地是也。是則遠郊以內盡屬六鄉，以外更無餘地，故謂四郊之吏即六鄉之吏在四郊者。審如是，則言六鄉已足該四郊，經文何其複而贅乎！今通校經注，竊謂鄉與郊，通言之則鄉包於郊內，析言之則郊自處於鄉外。賈

并爲一，非也。《王制》云：「命國之右鄉，簡不帥教者，移之左；命國之左鄉，簡不帥教者，移之右如初禮。不變，移之郊如初禮。」注云：「郊，鄉界之外者也。」是鄭意鄉界外別有郊里，本不謂四郊盡爲鄉里明矣。孫希旦云：「郊內之地四同，非六鄉所能盡，故其在鄉界之外者，亦如六遂之有公邑，設吏治民而立學焉。《小司徒》『大比六鄉四郊之吏』，言六鄉而又言四郊，即此。」案：孫說是也。蓋王國置鄉，數止於六，其家數夫數皆不容增減。九等田里，或在城郭中；其在外者，家數亦自無多，以地比附屬六鄉，固其所宜。至九等田外之餘地布在郊內者，其中皆有民居，則不屬六鄉，別謂之郊，故《遺人職》有鄉里，又有郊里。鄉里即六鄉及九等田所居，郊里即四郊所居也。至《載師》九等田里，本不必各占一萬夫，彼注自是段此大略計算，不爲定論。且六鄉七萬五千家，尚有餘夫，亦當在遠郊以內受田，則郊內鄉外必有餘地，揆之事勢，可無疑矣。郊里既非鄉吏所治，故自有主民之吏，謂之四郊之吏。其官名爵次注無文，沈彤以爲宜依縣鄙之制，有縣正以下至鄰長五等官，

① 「也」上，楚本補「義可該」三字。

② 「者」上原衍「攷夫屋」三字，今據楚本刪。

而爵則降於鄉吏二等，爲上中下士。云「《小司徒》見四郊之吏，《縣師》見都鄙稍甸郊里之羣吏，固有明文也。遂之法，計家以爲縣鄙，而郊如之，則卽其縣鄙以設官亦如遂。至官之爵等，則遞降於遂也。」案：沈說於義可通。蓋四郊在六鄉之外，與遂相接，既介乎鄉遂之間，則不爲井田可知。不爲井田，則其計家以制里也，亦當以五五相比，如鄉遂之法。制里既如鄉遂，而其地實鄉遂之畸餘，則其設官之名或與遂同，而爵自不能與遂等。但四郊除六鄉六遂外，尚有九等田之減，則其爲郊里者，究不知爲地幾何，置吏及令賦之數，均無可推校耳。云「夫三爲屋，屋三爲井」者，與前注引《司馬法》文同。云「出地貢者三三相任」者，《匠人》注云：「一井之中，三屋九夫，三三相具，以出賦稅，共治溝也。」鄭意此夫屋，並非井田之夫屋，但取三三相任出地貢，其事略同耳。賈疏云：「鄉遂之內既不爲井田，而爲溝洫之法，今云夫三爲屋屋三爲井者，以其溝洫雖爲貢，出貢之時，亦三三相保任以出穀稅，故鄭云出地貢者三三相任也。一井之內九夫，三夫爲屋，是一屋三夫自相保任，故云三三相任，據一井而言也。似一井田之法，亦八家勸一夫，稅入於公，相保任以出穀者也。」金鶚云：「鄭注《匠人》云：『采地制井田，異於鄉遂及公邑。』不知鄉遂之民皆

五家相比，故不得爲八家同井之制；公邑在野，其民非五家相比，何不可制井田乎？攷夫屋者，井田之制也。鄉遂有夫屋，蓋其餘地有公邑，公邑制井田，故攷其夫屋也。若無井田，何有夫屋乎？鄭云「出地貢者三三相任」。不知田不井者，皆五五相任，未有三三相任者也。鄭不知公邑亦爲井田，故妄作此解耳。」案：金說是也。以經攷之，王城外二百里內，六鄉六遂皆不爲井田。四郊爲六鄉之餘地，《縣師》謂之郊里，郊既稱里，則與鄉里同五五相任，亦不爲井田。《載師》云「以公邑之田任甸地」，明四等公邑自內而外，以甸爲始。是六遂之餘地始爲公邑，六鄉、四郊之餘地皆不爲公邑也。公邑稱邑，卽以四井爲名，則當以三三相任爲井田。此云攷夫屋，卽謂通考溝洫井田之制。鄉遂四郊則百畝爲夫，十夫有溝；六遂外之公邑，則三夫爲屋，三屋爲井也。蓋小司徒爲地官之貳，其職掌雖專主鄉郊，而六遂公邑亦皆其所兼統，故有攷夫屋之事。據上經注，謂大比兼受鄉遂邦國之比要，則公邑非其職掌所不及可知。此經言比吏，但舉六鄉四郊而不及六遂公邑者，文偶不具耳。鄭君不悟，以爲鄉遂餘地、甸稍縣置之公邑，皆不爲井田，故於此經不得其解。四等公邑制井田，互詳《匠人》疏。

周禮正義卷二十一

鄉師之職，各掌其所治鄉之教，而聽其

治。聽謂平察之。【疏】「各掌其所治鄉之教」者，掌鄉學

之政，凡鄉學以鄉人之有德行道藝而高年者爲之師，《鄉飲酒禮》所謂先生是也。鄉先生以三物教鄉之子弟，此官則

察其教之善否，而興其賢能，與鄉老、鄉大夫爲官聯也。賈

疏云：「鄉師四人，其鄉有六，二人共主三鄉，故言各掌其

所治鄉之教也。」云「而聽其治」者，賈疏云：「自鄉大夫以

下至伍長，各自聽斷其民。今鄉師又聽其治者，恐鄉官有

濫失，審察之。」注云「聽謂平察之」者，《小宰》注云：

「聽，平治也。」《國策·秦策》高注云：「聽，察也。」以國

比之灋，以時稽其夫家衆寡，辨其老幼、貴

賤、癘疾、牛馬之物，辨其可任者與其施舍

者，掌其戒令糾禁，聽其獄訟。施舍，謂應復免，

不給繇役。【疏】「以國比之法，以時稽其夫家衆寡」者，謂

四時小案比，與鄉大夫爲官聯也。《小司徒》云：「頒比灋

于六鄉之大夫。」此官掌受比法，而以四時計當鄉之民數

也。云「辨其可任者」者，賈疏云：「謂上地家七人，可任者

家三人等。」云「掌其戒令糾禁」者，即《士師》五戒「四曰

糾用諸國中」，五禁「三曰國禁」，四曰野禁是也。《管子·

立政篇》云：「行鄉里，視宮室，觀樹藝，簡六畜，以時均修

焉。勸勉百姓，使力作毋偷，懷樂家室，重去鄉里，鄉師之

事也。」注云「施舍謂應復免不給繇役」者，《小宰》注義

同。經云老幼、貴賤、癘疾，自幼賤二者外，皆應復免，即

《鄉大夫》云「國中貴者、賢者、能者、服公事者、老者、疾者

皆舍」是也。其幼者，則國中六尺、野五尺以下，亦舍之。

《小司徒》注云「施當爲弛」，此不破字者，以互見於彼，故不

復釋。施舍，詳《小宰》疏。大役，則帥民徒而至，

治其政令；既役，則受州里之役要，以攷司

空之辟，以逆其役事。而至，至作部曲也。既，已

也。役要，所遣民徒之數。辟，功作章程。逆猶鉤考也。

鄭司農云：「辟，法也。」【疏】「大役則帥民徒而至」者，賈

疏云：「謂築作堤防城郭等大役，使其民，鄉師則於當鄉之

內，帥民徒而至。至謂至作所也。」云「既役則受州里之役

要」者，此職「州里」二見，與《州長》、《司常》、《大司寇》義並同，謂州之所居，闢黨族間比言之，猶《遺人》云「鄉里」也。賈疏云：「所役之民，出於州里，今欲鉤考作所功程，須得所遣民徒本數，故云既役則受州里之役要。役要則役人簿要。」云「以攷司空之辟」者，此與司空爲官聯也。賈疏云：「辟謂功程。司空主役作，故將此役要以鉤考司空之功程。」沈彤云：「鄉遂郊野官，平時屬司徒。有大役，令鄉師、遂人致於司空。故《鄉師職》『大役，則帥民徒而至，治其政令；既役，則受州里之役要，以考司空之辟，以逆其役事』。《遂人職》『起野役，則令各帥其所治之民而至』。蓋當役之時，鄉自州里以下，遂及郊野自縣以下，皆受法於司空，以治民徒之役事。」又云：「《鄉師》『大役帥民徒而至』，包州長以下官，郊公邑官亦包之。」注云「而至，至作部曲也」者，大役任衆爲大宗伯軍禮之一，蓋亦以軍法部署之，故至所作之處，各就其部曲也。曲者，部之小別。《續漢書·百官志》云：「將軍、領軍皆有部曲。部下有曲，曲下有屯。」《祭義》孔疏云：「在軍旅之中時，主帥部領團曲而聚，故云部曲。」云「既，已也」者，《毛詩·召南·汝墳》傳文。《司干》注同。云「役要，所遣民徒之數」者，《大司馬》云「大役屬其植，受其要」。注云：「要，簿書也。」即此所謂

役要。又《職金》注云：「要，凡數也。」《遂人》云：「以下劑致卹。」要劑義同。云「辟，功作章程」者，即役法也，與先鄭義同。賈疏云：「功作之事，日日錄其程限，謂之章程。」云「逆，猶鉤考也」者，《司會》「以逆邦國都鄙官府之治」，注云：「逆，受而鉤考之。」此義與彼同。鉤考亦詳彼疏。賈疏云：「鉤考役事，恐有濫失。」鄭司農云「辟，法也」者，《爾雅·釋詁》文。《戎右》、《小司寇》注並同。凡邦事，令作秩敘。事，功力之事。秩，常也。敘，猶次也。事有常次，則不偏匱。【疏】「令作秩敘」者，謂爲受役民徒之次第，以授其長，課其先後，均其勞逸，使以次服役也。

注云「事，功力之事」者，即《州長》云「國作民而師田行役之事」是也。云「秩，常也」者，《酒正》注同。案：「作秩敘」當與《宮正》及《里師》兩職「行其秩敘」義同，秩敘即次敘，鄭訓秩爲常，非也。詳《宮正》疏。云「敘猶次也」者，《說文·支部》云：「敘，次第也。」云「事有常次則不偏匱」者，賈疏云：「謂營作之事，多少有常，事有次敘，則不爲偏迫，又不匱乏。」大祭祀，羞牛牲，共茅菹。杜子春云：「菹當爲菹。以茅爲菹，若葵菹也。」鄭大夫讀菹爲藉，謂祭前藉也。《易》曰：「藉用白茅，无咎。」玄謂菹，《士虞禮》所謂

「苴荊茅，長五寸，束之」者是也。祝設于几東席上，命佐食取黍稷，祭于苴，三，取膚祭，祭如初。此所以承祭，既祭蓋束而去之。《守桃職》云「既祭藏其隋」是與？【疏】「大祭

祀，羞牛牲」者，《大司徒》云「奉牛牲羞其肆」，《小子》云「羞羊肆」，注並釋羞肆為進所肆解骨體。《大司徒》疏謂：奉

牛牲謂初牽入時，羞其肆謂進骨體。此經言羞不言奉，則唯佐進骨體，不佐牽入也。賈疏謂奉牛牲鄉師亦佐大司徒，非也。云「共茅菹」者，賈疏云：「案《甸師職》：『共蕭

茅。』彼直共茅與此鄉師，鄉師得茅束而切之，長五寸，立之祭前以藉祭，故云茅菹也。」詒讓案：此與甸師為官聯也。

吉祭亦有菹者，天子禮詳，與大夫士禮異。詳《甸師》、《司巫》疏。注杜子春云「菹當為菹，以茅為菹，若葵菹也」

者，菹菹聲類同。段玉裁云：「杜讀菹為菹，易其字也。菹，酢菜也。《醢人》『苴菹』，鄭大夫讀為『茅菹』。茅初生

可為菹也。」案：段說是也。葵菹亦見《醢人》。杜意此共茅菹，與醢人為豆實也。云「鄭大夫讀菹為藉，謂祭前藉

也」者，菹藉一聲之轉，猶助藉字通也。《史記·封禪書》云：「江淮之間，一茅三脊，所以為藉也。」《公羊》宣十二年

傳「茅旌」，何注云：「斷曰藉，不斷曰旌。用茅者，取其心理順一，自本而暢乎末，所以通精誠，副至意。」呂飛鵬云：

「《說文》云：『藉，祭藉也。菹，茅菹也。』許說與鄭大夫同。」詒讓案：大夫此注與《甸師》「苴茅」注，並隱據《禮經》

之苴為釋。祭前藉亦即謂承祭之藉，與後鄭義本同，但不直以菹為苴而讀為藉，則於經不合耳。引《易》曰「藉用白

茅，无咎」者，賈疏云：「《大過》初六爻辭。引之者，證菹為藉之義。」云「玄謂菹《士虞禮》所謂苴荊茅，長五寸，束之者

是也」者，此後鄭別據《禮經》以菹為苴，破杜及鄭大夫讀。《司巫》「菹館」鄭義亦同。不云讀為苴者，菹訓藉，自是正

字；《士虞》作苴，乃段借字。鄭彼注亦云「苴猶藉也」。段玉裁云：「鄭君云茅菹即《士虞禮》之苴茅，取黍稷祭，取膚

祭，皆以此承藉，既祭束而藏之。苴菹二字古通用，皆藉也。」云「祝設于几東席上，命佐食取黍稷祭于苴，三，取膚

祭祭如初」者，此並約《士虞禮》文，證祭用苴之事。云「此所以承祭」者，謂以承藉所祭黍稷膚祭等物也。詳《司巫》

疏。云「既祭，蓋束而去之，《守桃職》云既祭藏其隋是與」者，去謂藏去也。賈疏云：「欲見此是祭神之餘，不可虛

棄，必當藏之。所藏者，即《守桃職》「既祭藏其隋」是也。言隋者，謂祭黍稷三及膚祭如初，皆隋減以祭之，故名為

隋。以其無正文，故言「蓋」與「以疑也。」惠士奇云：「康成謂《守桃》之隋即《士虞禮》之苴，非也。祭於苴者謂之

饗，《士虞記》所謂既饗祭于苴。尸與主人、主婦之祭，祝命之、佐食助之者謂之隋。隋者，神饗之後，尸祭神餘，尸飽之後，主人、主婦又祭尸餘，皆祭於豆閒及地，不於苴也。」呂飛鵬云：「後鄭謂此經之苴即《士虞禮》之苴。又引《守桃職》，云「既祭藏其隋」，蓋謂既祭束而去之者，非虛棄也，必當藏之，故引《守桃職》文以明當藏之義，非以茅苴為隋也。」案：惠氏根據《禮經》，其說甚是，而鄭意則當如呂說。蓋《禮經》之隋祭，皆在迎尸後，固與苴祭異。但諦審此注及《守桃》注意，蓋謂《禮經》隋祭以隋減得名，而《守桃》藏隋「不止藏隋祭之物，明并未迎尸以前祭苴之物亦藏之，以其亦有隋減之義，故通謂之隋也。互詳《守桃》疏。大軍旅會同，正治其徒役與其輦輦，戮其犯命者。輦，駕馬。輦，人輓行。所以載任器也，止以為蕃營。」《司馬法》曰：「夏后氏謂輦曰余車，殷曰胡奴車，周曰輻輦。輦，一斧，一斤，一鑿，一耜，一鋤。周輦加二版二築。」又曰：「夏后氏二十人而輦，殷十八人而輦，周十五人而輦。」故書輦作連。鄭司農云：「連讀為輦。」【疏】「大軍旅會同」者，賈疏云：「大軍旅謂王行征伐，大會同謂王於國外與諸侯行時會殷同也。」云「正治其徒役」者，即上之民

徒。賈疏云：「謂六軍之外，別有民徒使役，皆出於鄉，故鄉師治其徒役。」注云「輦，駕馬」者，《說文·車部》

云：「輦，大車，駕馬也。」《史記·河渠書》集解引徐廣云：「輦，直輦車也。」輦即輦之俗。蓋小車曲輦，駕馬；大車直輦，駕牛。今輦雖駕馬而依牛車直輦之制，以便任載。其制當如《車人》之大車，但以駕馬為異。鄭、許、徐三說足互相備。沈彤云：「輦謂輦屬，當亦人輓行。」江永云：「從後推之曰輦，從前輓之曰輦。輦，從共，以兩手拱而推也。今有後推之車。」案：沈、江二說亦通。《史記·夏本紀》：「山行乘輦。」輦，《河渠書》作橋。《漢書·溝洫志》作柶，顏注引韋昭云：「柶，木器，如今輿牀，人舉以行也。」彼似即今之輦。其初制，蓋有輪而無蓋，後乃增損之。古時南方已有之，中原則無是制也。云「輦，人輓行」者，《說文·車部》云：「輦，輓車也。輓，引車也。」《釋名·釋車》云：「輦車，人所輦也。」《呂氏春秋·本生篇》高注云：「人引車曰輦。」《巾車》王后五路有輦車，注亦云「為輗輪，人輓之以行」。《左》襄十年傳：「秦堇父輦重如役。」杜注云：「步輗重車以從師。」此輦輦皆所謂重車，蓋亦為輗輪。《史記·叔孫通傳》索隱引《輿服志》云：「殷周以輦載軍器，至秦，始去其輪而輿為尊也。」云「所以載任器也」者，《牛人》「兵

車以載公任器」，注云：「任猶用也。」謂軍中之用器，此家輦輦二者言之。賈疏謂輦以載輜重，輦以載任器，是以載任器專屬輦，非鄭意也。任器亦通為輜重，賈分為二，尤非。凡六軍之重車皆官給，牛人共其牛。此輦輦等則專備徒役之用，非六軍輜重，故使鄉民自具，而鄉師正治之也。云「止以為蕃營」者，蕃與藩通。《左》昭十三年傳「乃藩為軍」，杜注云：「藩，籬也。」《國語·晉語》云：「諸侯之大夫盟于宋，以藩為軍，攀輦即便而舍。」韋注云：「藩，籬落也。」謂止舍時，則以輦輦環列為藩籬營壘，即《掌舍》所云「設車宮轅門」是也。《漢書·衛青傳》「青令武剛車自環為營」，亦古之遺法。引《司馬法》曰「夏后氏謂輦曰余車，殷曰胡奴車，周曰輜輦」者，證此輦即輜輦也。以下引《司馬法》，今本並無此文，蓋在逸篇中。《北堂書鈔》及《御覽·車部》引《司馬法》、《宋書·禮志》引《傅子》，「輜輦」並作「輜車」，義亦通。《書鈔》又引《司馬法》舊注云：「人所挽曰輦，三代車各有別名也。」亦同鄭義。余車之義，未聞。《釋名·釋車》云：「胡奴車，東胡以罪没人官為奴者引之，殷所制也。輜車，載輜重卧息其中之車也。輜，廁也，所載衣物雜廁其中也。」《左傳》宣十二年，孔疏云：「輜重，載物之車也。《說文》「輜一名輶，前後蔽也」。蔽前後以載物謂

之輜車，載物必重謂之重車，人輓以行謂之輦，輜重輦一物也。云「輦，一斧，一斤，一鑿，一耜，一鋤，周輦加二版，二築」者，斧斤鑿並所以攻木，耜者所以發土。《說文·木部》云：「耜，耒也。一曰徙土輦，齊人語也。重文耜，或从里。《方言》云：「耒，東齊謂之耜。」賈疏謂耜者或解以為耒，或解以為鋤，耒亦不殊。是也。鋤者所以薅艸，《說文·金部》云：「鋤，立薅所用也。」鋤即鋤之俗。版築者，所以築壘壁。《廣雅·釋器》云：「杵謂之築。」《文選·蕪城賦》李注引《三蒼解詁》云：「版，築牆上下版。築，杵頭鐵杵。」《六韜·軍用篇》云：「銅築，銅為垂，長五尺以上，三百枚。」以上並說一輦所載任器之名數，非謂一人所需也。《管子·海王篇》云：「行服連輶輦者，必有一斤，一鋸，一錐，一鑿，若其事立。」彼連即此輦，字通。又《輕重乙篇》云：「一車必有一斤，一鋸，一釭，一鑽，一鑿，一錐，一軻，然後成為車。」釭蓋鋤之誤，軻即斧柯也。其所說並與《司馬法》略同。引又曰「夏后氏二十人而輦，殷十八人而輦，周十五人而輦」者，賈疏云：「亦是《司馬法》文。以上說所載任器，以下說輓人多少。前代寬賈，無版築，輓人多；後代狹劣，加版築，輓人少。引之者，證周輦即此輦輦，一也。又并見所載之器。」段玉裁云：「謂一輦載二十

人若十八人、十五人所需也。周加二版二築，故每輦僅容十五人所需。《正義》不了。」又云「輓人之數不可知，以《說文》輓字下云：「並行也，從二夫，輦字從此。」輦字下云：「從扶，在車前引之。」蓋二人竝行輓一輦。《爾雅》、毛傳釋《詩》皆云「徒輦者也」。案：三代輦人數，賈謂指輓車之人言之，然古輦載器少而輓人多，周輦載器多而輓人反少，於理未協。依段說則一輦止以二人輓之。今攷《淮南子·說山訓》云：「引車者二六而後之。」高注云：「輓三人，兩輓六人，故謂二六。一說十二人。」是引輦亦不必皆二人矣。沈彤則據《李衛公問對》引《曹公新書》云：「守車一隊，炊子十人，守裝五人，廩養五人，樵汲五人，共二十五人。」守車即謂輦輦，周十五人而輦，十五人當作二十五人。」今案：周軍制，二十五人為兩，兵車重車各一乘。重車即牛人所共駕牛之車。此輦輦雖亦通稱重車，然實與彼小異。曹氏《新書》之守車，似亦即牛車。《李靖問對》所引，乃唐人僞託，譌謬不足信，《夏官·敘官》疏已辯之矣。然則周時行軍是否亦二十五人共一輦，無文可證，段、沈之說，未知是否，姑兩存之，以備校覈。云「故書輦作連，鄭司農云連讀為輦」者，惠士奇云：「《易·蹇》六四，往蹇來連。」虞翻曰：「連，輦也。」《管子·立政篇》「畜連乘車」，

《海王篇》「服連輶輦」，則古輦皆作連可知矣。」段玉裁云：「《說文·辵部》：「連，負車也。」《車部》：「輦，輓車也。」案：連輦古今字。許云負車者，謂人輓車而行，如負車然，人與車相屬不絕，故引申為連屬字。《耳部》曰：「聯，連也。」《大宰》注曰：「故書連作聯。」然則聯連為古今字，連輦為古今字，假連為聯，乃專用輦為連。《巾車職》及《管子書》輦字皆作連。司農當云「連，今之輦字」。不當云「讀為輦」，此漢人以今字易古字之大例也。」徐養原云：「《巾車》輦車，《釋文》作連車，云「音輦，本亦作輦」。大喪用役，則帥其民而至，遂治之。治謂監督其事。【疏】大喪用役，則帥其民而至，遂治之」者，《宰夫》注云：「大喪，王、后、世子也。」《遂人》注云：「大喪之正棺、殯、啓朝及引，六鄉役之。」此官則屬其當鄉之民以至而治其事也。注云「治謂監督其事」者，猶上經云治其政令也。賈疏云：「謂監督督察其事。」及葬，執殯以與匠師御匱而治役。匠師，事官之屬，其於司空若鄉師之於司徒也。鄉師主役，匠師主衆匠，共主葬引。《雜記》曰：「升正柩，諸侯執紼五百人，四紼，皆銜枚，司馬執鐸，左八人，右八人，匠人執翻以御柩。」天子六引，禮依此云。鄭司農

云：「翻，羽葆幢也。《爾雅》曰：「葆，翳也。」以指麾輓柩之役，正其行列進退。」【疏】「及葬」者，賈疏云：「及至葬，引向壙。」云「執纛」者，纛，俗注疏本作「纛」，非。唐石經、宋本、嘉靖本及《釋文》葉鈔本並作「纛」，詳後。賈疏云：「纛謂葆幢也。鄉師執葆幢卻行在柩車之前。」云「以與匠師御匱而治役」者，《說文·匚部》云：「柩，棺也。重文匱，籀文柩。」案經作「匱」，注並作「柩」，亦經用古字，注用今字之例。御匱者，與匠師、喪祝爲官聯也。賈疏云：「謂在路恐有傾覆，故與匠師御正其柩。治役亦謂監督役人也。」

注云「匠師，事官之屬」者，以事官掌百工，《考工記》有匠人，明其長爲匠師，猶梓人之長爲梓師，皆事官之屬。《國語·魯語》云：「嚴公丹桓宮之楹而刻其桷，^①匠師慶言于公。」韋注云「掌匠大夫」，即此官也。匠爲攻木之工。《左》襄四年傳，定姒薨，匠慶請木作櫬。則王柩當即匠師監作之，故葬時亦與鄉師同御柩治役也。云「其於司空，若鄉師之於司徒也」者，以匠師爲司空之考，當亦以下大夫四人爲之。賈疏云：「地官之考稱鄉師，春官之考稱肆師，秋官之考稱士師，唯有天官之考稱宰夫，夏官之考稱軍司馬，自外皆稱師。此經鄉師是司徒考，明匠師亦是司空考，故云其於司空若鄉師之於司徒。」云「鄉師主役，匠師主衆匠，共主

葬引」者，《天官·敘官》注云：「師猶長也。」以官名匠師，明爲主衆匠之長。喪葬用匠，故與鄉師共主葬，爲官聯。《穆天子傳》說葬盛姬，云「大匠御柩」，大匠即匠師也。引《雜記》曰「升正柩」以下者，鄭彼注云：「升正柩者，謂將葬朝於祖，正棺於廟也。五百人，謂一黨之民。紼引同耳，廟中曰紼，在塗曰引，互言之。御柩者，居前道正之。」案：鄭意此經纛即翻，故引彼文以證義。但「匠人執翻以御柩」，今本《雜記》作「匠人執羽葆御柩」，與此注又不同。臧琳云：「據《周禮注》及賈疏，知《雜記》本作「匠人執翻以御柩」，羽葆幢三字爲翻字之義。今本誤以翻字之訓爲經，又脫「幢」以「二字，殘缺訛誤之至。考《正義》知孔氏所據即同今本，而賈氏所見獨與《周禮注》合。」案：臧說近是。但賈疏述注作「匠人執翻羽葆幢」，又釋之云「彼文唯有執翻，無羽葆幢之言，鄭因釋翻爲羽葆幢」，與注又不相應。疑賈所見注本，「匠人執翻」下脫「以御柩」至「鄭司農云翻」十六字，而誤以「執翻」與「羽葆幢」牽連讀之，故不知「羽葆幢」爲先鄭說，又於「天子六引，禮依此云」一語，全無疏述，然則賈所據《禮記》本勝於孔，而此注乃脫誤不足據之本也。

①「官」原訛「公」，據《國語·魯語》改。

云「天子六引，禮依此云」者，天子六引，見《大司徒職》。鄭言此者，以天子禮無文，約與《雜記》諸侯禮同，惟引緯數異。《遂人》注說執紼云「天子其千人與」？然則天子引增二，執引人數則倍之矣。鄭司農云「翻，羽葆幢」者，先鄭亦以羸翻爲同物也。幢，葉林宗鈔本《釋文》作幢。案：幢是也。《說文》無幢字，《木部》云：「幢，帳極也。」《玉篇·巾部》云：「幢，翳也。或作幢。」幢即《鄉射禮》翻旌之杠，鄭彼注云：「杠，幢也。」《夏采》注說綏旄，亦云「綴於幢上」。翻者，《說文·羽部》云：「翳，翳也，所以舞也。」翻即翳之隸變。字又作翳，《廣雅·釋器》云：「幢謂之翳。」《喪大記》云：「君葬用輅，御柩用羽葆。」孔疏引《隱義》云：「羽葆其象如麾。」又《雜記》疏云：「羽葆者，以鳥羽注於柄頭，如蓋，謂之羽葆。葆謂蓋也。」《漢書·高帝紀》注，李斐云：「羸，羽毛幢也。」《司馬相如傳》顏注云：「葆者即今之所謂羸頭也。」《後漢書·光武紀》李注云：「合聚五采羽，名爲葆。」《方言》云：「翻、幢，翳也。楚曰翻，關西關東皆曰幢。」《釋名·釋兵》云：「翻，陶也，其貌陶陶下垂也。幢，童也，其貌童童然也。」案：葆即蓋斗，亦即《輪人》之蓋部，蓋注鳥羽於幢首，其形下垂若蓋然，謂之羽葆幢，又謂之翻，御柩所執與舞師羽舞所持皆是物也。《鄉射禮》說「以

翻旌獲」云「以白羽與朱羽糝，杠長三仞，以鴻脰韜上二尋」。此羸與翻旌形制蓋略同，但執以指麾，杠當差短耳。引《爾雅》曰「羸，翳也」者，亦明翻與羸同物。《釋言》云：「翻，羸也。羸，翳也。」郭注云：「羸，今之羽葆幢。翳，舞者所以自蔽翳。」《詩·王風·君子陽陽》篇「左執翻」，《說文·羽部》引作「翳」。毛傳云：「翻，羸也，翳也。」孔疏引李巡云：「翻，舞者所持羸也。」孫炎云：「羸，舞者所持羽也。」案：翻亦翳之俗。羸字《說文》未收，與翻音義亦同，而字實異，故《爾雅》及《毛詩》傳以翻翻與羸相訓。此注亦翻羸兩出，二鄭各依字引之，明其本非一字。羸又作「羸」，則譌體也。唐石經、《周禮》、《毛詩》、《爾雅》竝作羸，不作羸。《王風》釋文云：「羸俗作羸。」張參《五經文字》亦云「羸作羸說」是也。云「以指麾輓柩之役正其行列進退者」，《鄉射禮》注云：「翻，亦所以進退衆者。」賈疏云：「天子六紼，千人輓之，柩車恐傾側，執翻者指麾輓柩之役人治喪者，使柩車令不傾側。又千人輓柩以持六紼，恐行列進退失所，皆以翻指麾之，故云正其行列進退也。」《雜記》諸侯禮，匠師執翻，此天子禮，鄉師執翻，尊卑不同也。案：賈說非也。匠師與鄉師同御匱，當亦同執翻，此經與《雜記》文互有詳略耳。邦國有三鄉，容諸侯禮亦兼有鄉師執翻矣。《喪祝》

云：「及祖，飾棺乃載，遂御。」注云：「御之者，執翻居前爲節度。」是凡御匱者無不執翻，不徒鄉師可知。及窆，執

斧以泣匠師。匠師主豐碑之事，執斧以泣之，使戒其

事。故書泣作立，鄭司農云：「窆謂葬下棺也。」《春秋傳》

曰「日中而備」，《禮記》所謂封者。立讀爲泣，泣謂臨視也。【疏】「及窆，執斧以泣匠師」者，與匠師、遂人、家人爲

官聯也。

注云「匠師主豐碑之事」者，《檀弓》云：「季

康子之母死，公輸若方小，斂，般請以機封，將從之，公肩假曰：不可。夫魯有初，公室視豐碑，三家視桓楹。」鄭彼注

云：「公輸若，匠師。言視者，時僭天子也。豐碑，斲大木

爲之，形如石碑，於槨前後四角樹之，穿中，於間爲鹿盧，下棺以緯繞。天子六緯四碑，前後各重鹿盧也。」賈疏云：

「天子六緯四碑，前後各一碑，各重鹿盧，兩畔各一碑，皆

單鹿盧。天子千人，分置於六緯，皆背碑負引，擊鼓以爲縱

舍之節。匠師主當之，故云匠師主豐碑之事也。」云「執斧

以泣之，使戒其事」者，《說文·斤部》云：「斧，斫也。」執斧

所以備斫伐。賈疏云：「鄉師執斧以臨之者，恐匠師不戒

其事，須有用斧之處，故執斧助之，使匠師戒其事。」云「故

書泣作立」者，《司市》、《大宗伯》注同。立泣同聲段借字。

鄭司農云「窆謂葬下棺也」者，《大僕》注同。《小爾雅·廣名》云：「下棺謂之窆。」《檀弓》孔疏云：「窆，下棺內壙中

也。」引《春秋傳》曰「日中而備」者，《左》昭十二年傳：「三

月，鄭簡公卒。將爲葬除，司墓之室有當道者，毀之則朝而

墮，弗毀則日中而墮。子太叔請毀之，子產弗毀，日中而

葬。」杜注云：「墮，下棺。」引之者，廣異文。備，舊本依《左

傳》作墮，今據宋建陽本校改。阮元云：「墮，宋本，《釋文》

葉鈔本作備。按《說文》有備墮字，無備墮字。二字從山

者，誤也。《說文》墮下亦引《左傳》「朝而墮」。《釋文》作備

者，古字段借，自是鄭注古本如此。」案：阮校是也。《遂

人》、《大僕》注引《春秋傳》墮字，宋本及葉本《釋文》亦並

从人，蓋先鄭所據《左傳》本與許、杜不同，後人依《左傳》改

此注而又譌其體耳。《士師》注載故書「邦朋」，朋字亦作

備。云「《禮記》所謂封者」者，《檀弓》「縣棺而封」，《曾子

問》「遂既封而歸」，鄭彼注並云「封當爲窆」。又《王制》「庶

人縣封而葬」，《喪大記》「凡封用紼，去碑負引」，注亦並讀

爲窆字。又《禮·既夕經》：「柩至于壙，屬引乃窆。」鄭彼

注云：「今文窆爲封。」是《禮》古文經爲窆，今文經爲封。

《周禮》多古文，故作窆；《禮記》多今文，故作封。先鄭不

引《禮經》者，以《禮經》今古文字異，不若《禮記》之畫一也。

段玉裁云：「此謂窆、塋、封，三字雖異，實一事也。《周禮》作窆，《左氏傳》作塋，《禮記》作封，皆謂葬下棺也。塋從崩聲，在古音蒸登部。窆從乏聲，在古音侵緝部。封在古音冬鍾部。其音通轉相近，故朋俗讀如蓬，窆讀方勇切，故《禮記》以封字代窆塋字也。語言斂侈而字因之異焉，不特異字同義，實一語也。故《遂人》注曰「聲相似」。《說文·穴部》曰「窆，葬下棺也」，引《周禮》及窆執斧」。《土部》曰「塋，喪葬下土也」，引《春秋傳》曰「朝而塋」，又曰「《禮》謂之封，《周官》謂之窆」。說與仲師同。蓋賈侍中諸君子說皆同也。《說文》作塋，朋聲，今《左傳》作塋，崩聲，傳寫小異也。《禮記》下棺之封，音家讀彼驗反，與窆同音。其餘封土之封，如「吾見封之若堂」等，皆不讀彼驗反。」黃以周云：「下棺曰窆，聚土曰封。《戴記》「溷淆，鄭注隨文是正。《王制》云：「庶人縣封，葬不爲雨止，不封不樹。」記文兩封字，連文不別，鄭注正之云：「縣封當爲縣窆。封謂聚土爲墳。」分割詳析。」云「立讀爲洩」者，《司市》、《大宗伯》先鄭注義並同。段玉裁云：「當云立當爲洩，字之誤也。而云讀爲者，立與洩雙聲，且立即古位字，於音亦爲同部也。依《說文·立部》「竦，臨也」，則竦是正字。經典多作洩，作莅。」徐養原云：「《說文》無洩字，洩即竦之俗字。先鄭以

俗字釋經，欲人之易曉也。古者「位」「竦」俱借用「立」字，至篆文而「立」「位」「竦」始各爲一字。後復於位傍加水作洩，或於位上加艸作莅，以代竦字，去古益遠矣。」云「洩謂臨視也」者，《天官·世婦》注云：「洩，臨也。」《爾雅·釋詁》云：「洩，視也。」臨視事相因，故鄭兼二義釋之。凡

四時之田，前期，出田灋于州里，簡其鼓鐸、旗物、兵器，脩其卒伍；田法，人徒及所當有。

【疏】「凡四時之田」者，春蒐、夏苗、秋獮、冬狩，總謂之田，具《大司馬職》。云「前期出田灋于州里」者，州里亦通比閭族黨言之。此官以法頒與州長以下羣吏，使依法以作衆庶也。云「簡其鼓鐸、旗物、兵器」者，鼓鐸包《鼓人》六鼓五金，旗物包《司常》九旗，兵包《司兵》、《司戈盾》之五兵五盾，器謂車輦及任器。凡鄉州吏卒所得用者，皆豫營辦備具，屆期則簡閱之。蓋田事羨卒竭作，不徒作六軍。肄習射獵用兵器多，而不必皆精良，故使鄉民自具，而鄉吏掌其簡閱之事。《族師》亦云「若作民而師田行役，則合其卒伍，簡其兵器，以鼓鐸旗物帥而至」是也。若巡守、會同、征伐，大起六軍，其兵器尤精良，則皆官授，非民間所共，互詳《小司徒》、《司兵》疏。兵器，詳《玉府》疏。云「脩其卒伍」者，

賈疏云：「謂百人爲卒，五人爲伍，皆須脩治，預爲配當。」

注云「田法，人徒及所當有」者，此亦注用今字作「法」

也。田法謂田事之典法，以習兵言之則曰戰法。《大司馬》

「大閱前期，羣吏戒衆庶脩戰法」。注云：「羣吏，鄉師以

下。」然則此田法，鄉師蓋受之司馬，而出之州里，《縣師》云

「若將有軍旅會同田役之戒，則受法于司馬」是也。賈疏

云：「人徒者，即經卒伍是也。及所當有者，則經鼓鐸、旗

物、兵器是也。」及期，以司徒之大旗致衆庶，而

陳之以旗物，辨鄉邑而治其政令刑禁，巡其

前後之屯而戮其犯命者，斷其爭禽之訟。司

徒致衆庶者，以熊虎之旗，此又以之，明爲司徒致之。大夫

致衆，當以鳥隼之旗。陳之以旗物，以表正其行列。辨，別

異也。故書巡作述，屯或爲臀。鄭大夫讀屯爲課殿，杜子

春讀爲在後曰殿，謂前後屯兵也。玄謂前後屯，車徒異部

也。今書多爲屯，從屯。【疏】「及期以司徒之大旗致衆

庶」者，大旗即熊旗之爲旛制者，詳《司常》疏。賈疏云：

「謂植旗期民於其下。」云「而陳之以旗物」者，賈疏云：「陳

列衆庶之時，亦植於行首。」論讓案：《國語·吳語》云：

「陳士卒百人以爲徹行百行，行頭皆官師，建肥胡；十行一

嬖大夫，建旌；十旌一將軍，載常。」此即陳軍行首植旗之

法。云「辨鄉邑」者，賈疏云：「田獵之時，非直有六鄉之

衆，亦有公邑之民，分別之。」案：賈說非也。上經云「前期

出田灋于州里」，則此及期致衆庶，所致者即州里之民。公

邑田役致民，自有縣師、稍人職之，非鄉師所掌，則經邑不

謂公邑之民明矣。《里宰》注云：「邑猶里也。」此鄉邑亦猶

言鄉里。凡六鄉，五比爲閭，則聚居爲城邑，猶之《里宰》六

遂之邑爲五鄰聚居，《小司徒》都鄙之邑爲四井聚居也。然

則辨鄉邑者，謂即六鄉之衆而辨其某鄉某邑耳。凡全經言

邑者，不必皆屬公邑，詳《里宰》疏。云「而治其政令刑禁」

者，刑禁即《士師》五戒之禁，注引軍禮無干車、無自後射之

類是也。云「巡其前後之屯，而戮其犯命者」者，賈疏云：

「謂兵衆屯聚，各有車徒，各於前後而巡行之，但民庶之等

各有軍將教命，犯命者則戮之。」云「斷其爭禽之訟」者，即

《大司馬》注所云「爭禽而不審者罰以假馬」是也。賈疏

云：「田獵得大獸公之，小禽私之，有爭禽之訟，鄉師斷

之。」注云「司徒致衆庶者，以熊虎之旗」者，《大司徒》

云「大軍旅大田役以旗致萬民，而治其徒庶之政令」是也。

詳彼疏。云「此又以之，明爲司徒致之」者，謂此鄉師致衆，

既至，仍致之於司徒，是即爲司徒致之，故因用司徒之大

旗，不改其物也。云「大夫致衆當以鳥隼之旗」者，賈疏云：「案《司常》陳九旗之次云：『通帛爲旛，雜帛爲物，熊虎爲旗，鳥隼爲旟。』又云：『孤卿建旛，大夫士建物。』大司徒既是卿官，尋常建旛，在軍建熊虎。鄉師既是大夫官，尋常建物，在旛下，明在軍當以鳥隼之旗，在熊虎下可知。」案：鄭意當如賈說。蓋因鄉師爲司徒之攷，當依大夫士建物，與鄉吏不同。今司徒致衆既用旗，則鄉師致衆當用旗，皆以降殺不用本所建之旗也。但九旗之旛物，實爲五正旗之通制。《司常》大閱，孤卿建旛，大夫士建物，即大司馬治兵之百官載旗，不得分爲三旗。又以九旗尊卑之常次論之，《輶人》旗七旛，而旗止六旛，則旗實當列旛下，不得以《司常》文之先後爲次也。若然，鄭、賈之說，皆有難通。竊謂《司常》大閱云「州里建旗」，《大司馬》治兵云「鄉家載物」，則鄉師下大夫常法應建旗物，而此致民則用旗旛，非其所得建，故經特揭之云「司徒之大旗」，明致衆用旗，義取期民，故遂人、大司馬致衆並用之。此與山虞以虞旗致禽，同爲表事。與乘車建旗敍爵，本不相涉，不必強爲之說也。互詳《大司徒》疏。云「陳之以旗物，以表正其行列」者，謂衆至，則鄉邑之人各自列爲陳，以旗物列陳前爲表識，欲其行列齊正，不使僂亂也。黃度讀「致衆庶而陳之」爲句，而

以「以旗物辨鄉邑」爲句，易拔、鄭鍔、李光坡、李鍾倫、方苞、姜兆錫、莊有可讀並同。今案：以旗物辨鄉邑，即《大司馬》中夏芟舍辨號名、中秋治兵辨旗物之事。旗物鄉邑不同，亦即《大司馬》所云「鄉以州名」也。黃讀於義亦通。云「辨，別異也」者，《天官·敍官》注云：「辨，別也。」云「故書巡作述」者，段玉裁云：「古音巡，川聲，述，木聲，同在諄文魂術物沒部，故故書作述，今書作巡。述訓循，巡訓延行兒，義亦相近也。」徐養原云：「《說文·辵部》：『述，循也。』述與循音義俱同。而循巡古亦通用，《漢書·游侠·萬章傳》『章逡循甚懼』。逡循即逡巡，故巡亦通作述。」云「屯或爲臀，鄭大夫讀屯爲課殿」者，段玉裁改「讀屯」爲「讀臀」，云：「屯聲殿聲古音同部。鄭大夫、杜子春皆從作臀之本，鄭君則曰『今書多爲屯，從屯』，故其說義不同。今本鄭大夫讀屯爲課殿，誤。臀與殿同聲，故大夫、子春皆易臀爲殿字，而其說殊。大夫易爲課殿之殿者，課殿謂課試居殿。《漢書音義》：『項岱曰：『殿，負也。最，善也。』韋昭曰：『弟上爲最，極下曰殿。』又曰：『下功曰殿，上功曰最。』然則少贖謂巡其怠玩者也。」案：段校是也。黃以周說同。此云屯或爲臀，蓋故書有二本，一作屯，一作臀。鄭大夫及杜本則皆作臀，故依聲類讀爲殿，若作屯，則義甚顯

白，不煩改讀矣。徐養原云：「《說文·尸部》：『屍，髀也。』或从骨殿聲，作臀。別無臀字。古者課殿軍後之殿，疑只作屍。殿乃擊聲，《說文》在《殳部》，非此義。然殿最乃考課之法，非所施於師田。」云「杜子春讀爲在後曰殿，謂前後屯兵也」者，賈疏云：「謂軍在前曰啓，在後曰殿，屯兵則是殿兵也。」段玉裁云：「軍在後曰大。殿。經雖兼言前後，然古人前後本末多無定稱，是在前護衛者，亦可謂之殿也。」徐養原云：「經云前後之屯，而讀爲在後曰殿，明與經義不合。」黃以周云：「鄭、杜皆用故書作臀，故杜讀爲殿，又通爲屯，與《瞽瞍》杜注帝當爲定，其字爲莫同例。」案：黃說是也。杜本亦作臀，故讀爲殿，而訓爲屯兵，以臀本無屯訓，必依聲類讀爲殿，乃可通於屯。後鄭以經云「前後之屯」，則不得爲殿後之殿，且作屯，與《大司馬》文同，於義自通，故不從大夫、子春讀也。云「玄謂前後屯，車徒異部也」者，賈疏云：「謂《大司馬》云『險野人爲主，易野車爲主』，是車徒異部也。」段玉裁云：「鄭君從屯爲說，云車徒異部，則讀如今云屯兵、屯田之屯矣。」詒讓案：車徒異部，謂車徒各自屯聚，分爲前後兩部也。《楚辭·離騷》云「屯余車其千乘兮」，王注云：「屯，陳。」《廣雅·釋詁》云：「屯，聚也。」《大司馬》冬狩禮，「旗居卒閒以分地，前後有屯

百步，有司巡其前後」。注云：「前後有屯百步，車徒異羣，相去之數也。車徒畢出和門，鄉師又巡其行陳。」即車徒異部之事。云「今書多爲屯，從屯」者，謂今書之內亦有一本，一作屯，一作臀，而爲屯者多，故後鄭從之。《大司馬》亦作屯，不作殿。凡四時之徵令有常者，以木鐸徇於市朝。徵令有常者，謂田狩及正月命脩封疆，二月命雷且發聲。【疏】「凡四時之徵令有常者，以木鐸徇於市朝」者，於經例當作「于」，唐石經及各本並誤。市朝，市謂國中及郊野之市，朝謂鄉師治事之朝。卿大夫亦有二朝，《國語·魯語》云「自卿以下合官職於外朝，合家事於內朝」是也。市朝，衆之所聚，故有徵令則以木鐸巡行警告之。注云「徵令有常者，請田狩及正月命脩封疆，二月命雷且發聲」者，徵令與《小司徒》云「行徵令」義同。《月令》：「孟春，王命布農事，命田舍東郊，皆脩封疆，審端徑術。」仲春，「先雷三日，奮木鐸以令兆民曰：『雷將發聲，有不戒其容止者，生子不備，必有凶災』」。鄭以四時田狩有徵役之事，《月令》所云並是常行之命令，故舉以爲釋。以歲時巡國及野，而調萬民之難阨，以王命施惠。歲時者，隨其事之時，不必四時也。難阨，饑乏也。鄭司農

云：「調讀爲周急之周。」【疏】「以歲時巡國及野，而調萬民之糴阨」者，與司救爲官聯也。《釋文》云：「糴，古艱字，本亦作艱。」阮元云：「經當作糴，注當作艱。」案：阮說是也。注例用今字。《羣書治要》引注作艱。糴，籀文艱字，詳《遣人》疏。巡國及野，謂行視王城及城郭外六鄉四郊之民。此國野相對，野謂國城以外，與《鄉大夫》同，與《縣師》、《遂人》之野異，詳《甸師》疏。云「以王命施惠」者，明惠出於王。《司救》注云：「施惠，調恤之。」注云「歲時者，隨其事之時，不必四時也」者，謂無定時也。《月令》季春云：「天子布德行惠，命有司發倉廩，賜貧窮，振乏絕。」即此施惠之事。但天子出令，總以季春，其有司奉行巡恤，則通於四時，不能豫定也。賈疏云：「以其糴阨是非常之事，故不得爲四時解之。」云「糴阨，饑乏也」者，《遣人》云：「鄉里之委積，以恤民之糴阨。」彼注義同。黃丕烈謂糴當作艱，云：「此亦當注用今字。下《遣人》注「艱阨猶困乏」，仍作艱。」案：黃校與阮同，是也。《爾雅·釋詁》云：

「艱，難也。」《說文·阜部》云：「阨，塞也。」《戶部》云：「阨，隘也。」經典阨亦通用，阨即阨之隸變。《一切經音義》引《蒼頡篇》云：「阨，困也。」鄭司農云「調讀爲周急之周」者，賈疏云：「讀從《論語》『周急不繼富』之周。」案：亦

詳《大司徒》疏。歲終，則攷六鄉之治，以詔廢置。【疏】「歲終」者，謂夏正建丑之月。鄭、賈謂周之季

冬，誤，詳《宰夫》疏。云「則攷六鄉之治以詔廢置」者，此正六鄉之歲會，鄉官之官計也。賈疏云：「謂鄉師責其治政文書，考其功過，有功則置之，有過則廢之。詔，告也，告王與冢宰廢置之。」案：賈謂詔爲告王與冢宰，本《司會職》文。但考《大司徒》云：「歲終則令教官正治而致事。」《小司徒》云：「歲終則考其屬官之治成而誅賞，令羣吏正要會而致事。」鄉師爲大小司徒之屬，則此詔廢置當亦兼詔大小司徒，賈義未核。王引之云：「鄉師之職，歲終則攷六鄉之治，以詔廢置。鄉大夫之職，歲終則令六鄉之吏皆會政致事。謹案：鄉師每三鄉二人，鄉大夫每鄉一人，非若大司徒、小司徒之統率六鄉也，不得言六鄉之治、六鄉之吏。六當爲「兀」，兀，古「其」字也。《玉篇》：「兀，古文其。」《墨子·公孟篇》：「魯有昆弟五人者，兀父歿，兀長子嗜酒而不葬」是也。兀與六相似，故書傳往往互譌。《史記·周本紀》「名民三百六十夫」，《索隱》引劉氏音，破六爲古其字。《管子·重令篇》「明主能勝六攻」，《淮南·地形篇》「通谷六」，《易林·蠱之臨》「周流六虛」，《說文》「沝字解引《五行傳》「若六沝作」，今本六字竝誤作其。蓋古文其字似六，故六

誤爲其，其亦誤爲六。元鄉即其鄉，謂所掌之鄉也。鄉師、鄉大夫各有所掌之鄉，故曰其鄉之治、其鄉之吏。《鄉師職》又云「各掌其所治鄉之教而聽其治」，「正歲稽其鄉器」。《鄉大夫職》又云「各掌其鄉之政教禁令」，「退而頒之於其鄉吏」，「各率其鄉之衆寡而致於朝」。皆言其鄉，而不言六鄉，是其明證。」案：王說近是。正歲，稽其鄉器，比共吉凶二服，間共祭器，族共喪器，黨共射器，州共賓器，鄉共吉凶禮樂之器。吉服者，祭服也。凶服者，弔服也。比長主集爲之。祭器者，簠簋鼎俎之屬，間胥主集爲之。喪器者，夷槃、素俎、楬豆、軼軸之屬，族師主集爲之。此三者民所以相共也。射器者，弓矢楅中之屬，黨正主集爲之，爲州長或時射於此黨也。賓器者，尊俎笙瑟之屬，州長主集爲之，爲鄉大夫或時賓賢能於此州也。吉器，若間祭器者也；凶器，若族喪器者也；禮樂之器，若州黨賓射之器者也。鄉大夫備集此四者，爲州黨族間有故而不共也。此鄉器者，旁使相共，則民無廢事，上下相補，則禮行而教成。【疏】「正歲，稽其鄉器」者，賈疏云：「正歲謂建寅之月。稽，考也。鄉師各自考校當鄉之器服。」詒讓案：鄉中所序器服，蓋亦有簿籍著之，此官

於正歲命所屬之吏，各攷其所儲器服，察其完否而各上其數，此官則案籍總攷校之也。云「比共吉凶二服」者，鄉器得有吉凶之服者，通言之，服亦謂之器也。以下鄉吏所共器服，並率民出私錢，而以官錢補助之爲器服，藏於鄉吏所治處，民有事須用，則就吏取之，用畢復歸而藏之，吏皆司其典守出入之事。云「黨共射器，州共賓器」者，黨州始有學，故使共鄉射、鄉飲酒之器也。云「鄉共吉凶禮樂之器」者，上州吏以下，已各自共，恐其有不備，此官復總共各器，以通資一鄉之用也。賈疏云：「萬二千五百家爲鄉，鄉大夫主集此四器，恐州黨已下有故不能自共，即旁相共也。」

注云「吉服者，祭服也」者，祭祀於《大宗伯》五禮屬吉禮，故祭服謂之吉服。賈疏云：「當比內無祭事。其於族祭醕、黨祭祭、州祭社之等，無過用朝服。」云「凶服者，弔服也」者，賈疏云：「若人衰裳是常服，主人自共。其弔服是暫服，可以相共，故知是弔服。其庶人弔服，無過素冠與深衣而已。」詒讓案：《周書·大聚篇》云：「以國爲邑，以邑爲鄉，以鄉爲閭，禍災相卹，資喪比服。」孔注云：「邑閭比相救卹。比服，共喪服也。」與此經義相應。云「比長主集爲之」者，比長令同比五家，集以相共也。云「祭器者，簠簋鼎俎之屬」者，賈疏云：「案《特牲》同姓用簠，《少牢》皆用

敦，同姓者乃用簋。今言簋者，況義耳。」云「閭胥主集爲之」者，閭胥令同閭二十五家，集以相共也。云「喪器者，夷槃、素俎、楬豆、軼軸之屬」者，賈疏云：「夷槃者，案《喪大記》，士併瓦盤，大夫乃用夷盤。今庶人實不得用夷盤，引之者，以況喪器，非謂庶人得用夷盤也。素俎楬豆者，案《士喪禮》，小斂有素俎，^①大斂有楬豆，兩籩無膳。此不言籩無膳者，文略也。軼軸者，案《既夕禮》，士朝廟用軼軸以載柩。此庶人，無軼軸。引之者，亦以況義。知非族內有大夫士得用夷盤軼軸者，以其大夫自有祿位，不在共限，故知引以況義。不言棺槨，亦主人自共之也，故《閭師》云「不樹者無槨」。此三者並是罰物所爲。知者，案《載師職》云：「宅不毛者有里布，田不耕者有屋粟。」鄭玄云：「罰之以共吉凶二服及喪器。」鄭不云祭器，文略，有祭器可知。鄭知必用罰物，不用官物爲之者，以其不爲官事，明不用官物可知。」案：楬，《士喪禮》作「駝」，鄭、賈作「楬」，字通。彼注云：「素俎，喪尚質。駝，白也。」又殯「升棺用軸」，注云：「軸，軼軸也。軼狀如牀，軸其輪，輓而行。」則不徒朝祖所用也。夷槃，詳《凌人》疏。云「族師主集爲之」者，族師令同族百家，集以相共也。云「此三者民所以相共也」者，吉凶二服及祭器三者，並民間自用之物，使民有無自相

共，對下賓射二器爲共官用，非民自相共也。云「射器者，弓矢楅中之屬」者，《鄉射禮》云「納射器」，注云：「射器，弓、矢、決、拾、旌、中、籌、楅、豐也。」又云：「楅猶幅也，所以承筈齊矢者。」《大史》先鄭注云：「中所以盛筈也。」案：此不舉決、拾、旌、籌、豐等，亦「之屬」中略之。賈疏云：「云之屬者，容有侯乏等。」云「黨正主集爲之」者，謂黨正自集共之也。云「爲州長或時射於此黨也」者，即所謂鄉射也，詳後《鄉大夫》疏。賈疏云：「一州管五黨。州長春秋二時射於序學，要在一黨之中，故云或時射於此黨。」云「賓器者，尊俎笙瑟之屬」者，賈疏云：「案《鄉飲酒》，三年貢士之時，行飲酒之禮，即有酒尊俎實，二人鼓瑟在堂，笙入在於堂下，故言尊俎笙瑟。言之屬者，更有籩豆之等。」云「州長主集爲之」者，亦謂州長自集共之也。云「爲鄉大夫或時賓賢能於此州也」者，即三年大比，鄉大夫賓興賢能，行鄉飲酒之事，亦詳《鄉大夫》疏。賈疏云：「一鄉管五州。鄉大夫行鄉飲酒之時，必在一州之內，此州則共之，故云或時賓賢能於此州也。」云「吉器若閭祭器者也，凶器若族喪器者也」者，賈疏云：「以其鄉大夫備集此四器，恐閭族已下

①「小」，原訛「卜」，據楚本改。

有故不得自共，故知還是閭族黨州所當共者也。」云「禮樂之器，若州黨賓射之器者也」者，賈疏云：「連州黨并言之者，以其州黨射器賓器二者皆有禮器樂器，故州黨并言之。自射器已下，皆爲國行禮，得官物所爲，不出民物。故《酒正》云「凡爲公酒者亦如之」。注云：「謂鄉射飲酒以公事作酒者，亦以式法及酒材授之，使自釀之。」酒材尚得公物，明此器等亦出官物可知，以其爲官行禮故也。」云「鄉大夫備集此四者，爲州黨族閭有故而不共也」者，^①州黨族閭當地或有災兵荒札，不能共其器，故鄉大夫又備集之以補其缺乏也。云「此鄉器者旁使相共，則民無廢事」者，上文州黨族閭所共器，並當地自共以用，不及他地；此鄉大夫所集，則此州黨族閭所共之器，得旁資他州黨族閭之用，欲令有無相通。雖有故不共，仍足以行禮，是民無廢事之患也。云「上下相補，則禮行而教成」者，賈疏云：「自比共吉凶二服，至州共賓器已上，是下之相補；鄉共吉凶禮樂之器者，是上之相補；故云上下相補。庶民乏於財物，闕於禮義，教化不成，今以器服共之，即禮行而教成也。」若國大比，則攷教、察辭、稽器、展事，以詔誅賞。考教，視賢能以知道藝與不。察辭，視吏言事，知其情實不。

展猶整具。【疏】「若國大比」者，謂三年大比，詳《小司徒》疏。云「稽器展事」者，稽器亦與正歲稽鄉器同。注云

「考教，視賢能以知道藝與不」者，經作攷注作考者，亦經用古字，注用今字也。謂考其所興賢能之士，實有道藝與不，以知其長吏所教之善不。云「察辭，視吏言事，知其情實不」者，辭即言事之辭，吏謂州長以下至比長，所言事皆察之。《士師》云：「察獄訟之辭，以詔司寇斷獄弊訟。」此察辭亦兼有獄訟之辭矣。云「展猶整具」者，後《司市》注云：「展之言整也。」又《充人》先鄭注云：「展，具也。」《少儀》注云：「展，省具也。」是展兼整具二義。展事即省視其整具與不也。

鄉大夫之職，各掌其鄉之政教禁令。鄭

司農云：「萬二千五百家爲鄉。」【疏】「鄉大夫之職」者，以其卿爵尊，故殊異其文，與正貳攷同云職也。云「各掌其鄉之政教禁令」者，即鄉師之教治及戒令糾禁是也。注

鄭司農云「萬二千五百家爲鄉」者，《大司徒》正義同。正

① 「故」原訛「時」，據楚本改。

月之吉，受教灋于司徒，退而頒之于其鄉吏，使各以教其所治，以攷其德行，察其道藝。其鄉吏，州長以下。【疏】「正月之吉，受教灋于司徒」者，賈疏云：「吉謂建子之月，月朔之日。教灋謂若《大司徒職》十二教已下，其法皆受於司徒而來。」云「退而頒之于其鄉吏，使各以教其所治」者，鄉吏通州長以下至比長，皆受此官所頒之教法，以教其民。州長、黨正則各與鄉先生教民於其學，族師以下無學，則歲時讀法亦各於其治以此法教民也。云「以攷其德行，察其道藝」者，賈疏云：「謂鄉大夫以鄉三物教萬民，遂考校其萬民，有六德六行之賢者，有六藝者，並擬賓之。」詒讓案：《國語·齊語》云：「正月之朝，鄉長復事，君親問焉。鄉長退而修德進賢。」與此法同。

注云「其鄉吏，州長以下」者，明關所屬州長、黨正、族師、閭胥、比長等通頒之也。以歲時登其夫家之衆寡，辨其可任者。國中自七尺以及六十，野自六尺以及六十有五，皆征之。其舍者，國中貴者、賢者、能者、服公事者、老者、疾者皆舍。以歲時入其書。登，成也，定也。國

中，城郭中也。晚賦稅而早免之，以其所居復多役少。野早賦稅而晚免之，以其復少役多。鄭司農云：「征之者，給公上事也。舍者，謂有復除舍不收役事也。貴者，謂若今宗室及關內侯皆復也。服公事者，謂若今吏有復除也。老者，謂若今八十九十復羨卒也。疾者，謂若今癰不可事者復之。」玄謂入其書者，言於大司徒。【疏】「以歲時登其夫

家之衆寡，辨其可任者」者，此亦謂四時小案比，因辨萬民力役之征，輕重征舍之法，與鄉師爲官聯也。此登夫家衆寡以下，並與鄉師職掌同，此官唯登人其書爲異。可任謂能受職受役也。云「國中自七尺以及六十，野自六尺以及六十有五，皆征之」者，賈疏云：「七尺謂年二十。知者：

案《韓詩傳》二十行役，與此國中七尺同，則知七尺謂年二十。六尺謂年十五，故《論語》云「可以託六尺之孤」，鄭注云：「六尺之孤，年十五以下。」彼六尺亦謂十五，鄭言已下者，正謂十四已下亦可以寄託，非謂六尺可通十四已下。鄭必知六尺年十五者，以其國中七尺爲二十對六十，野云六尺對六十五，晚校五年，明知六尺與七尺早校五年，故以六尺爲十五也。所征稅者，謂築作、挽引、道渠之役及口率出錢。若田獵，五十則免，是以《祭義》云「五十不爲甸徒」。若征伐，六十乃免，是以《王制》云「六十不與服戎」。彼二

者並不辨國中及野外之別。」惠士奇云：「《荀子·仲尼篇》曰『五尺豎子』，《管子·乘馬》曰『童五尺』，《內則》注『成童十五以上』，則六尺非童豎矣。《國策·楚策》『楚襄王使昭常守東地，悉五尺至六十，三十餘萬』，《說苑》『齊伐莒，魯下令丁男悉發，五尺童子皆至』，是老弱皆從軍矣。則六尺非童豎益明。以中人爲率，八尺爲長，六尺爲短，七尺爲中。《內經》謂丈夫年三八而長極。中人七尺亦其極也，故國中自七尺。野自六尺以上，不滿六尺者不爲夫。杞之城也，絳老與焉，清之戰也，汪僮死焉，末世之法也。是以《周官》徒役，上不及老，下不及僮。」案：惠說是也。凡國中二十以上、野十五以上，未授室者爲餘子，已授室者爲餘夫，三十以上爲正夫。皆征之，謂正夫、餘夫、餘子皆受役。此征，李光坡、方苞、江永、莊存與並從先鄭說，謂指力役之征是也。蓋當兼《大宰》九職之力征及《均人》《公甸》三日之役征言之。平時則受職而貢其功，有事則受役而任其力，皆以此爲年限也。後鄭及賈謂兼九賦口泉，失之。九賦爲地征，非口泉，惟九職閒民之夫布，略與後世口泉相類，然亦與役征異也。《大戴禮記·千乘篇》云：「治地遠近，以任民力，以節民事。」故任力有國中及野之異。《國語·魯語》云：「任力以夫而議其老幼。」故有老幼舍征之法。《大

司徒》保息六，一曰慈幼，注云「十四以下不從征」。是鄭意十四以下爲五尺以下，則十五以上爲六尺矣。《論語·泰伯篇》六尺以孤言，故彼注云「十五以下」，明有不及六尺之孤，即十四以下也。《內則》注亦以成童爲十五以上，明十五而不爲幼童，二注說無牴牾也。《後漢書·班超傳》曹昭上書云：「竊聞古者十五受兵，六十還之。」李注引此經釋之云：「征謂賦稅從征役也。《韓詩外傳》曰『二十行役，六十免役』，與《周禮》國中同，即知二十與《周禮》七尺同。禮，國中六十免役，野即六十有五，晚於國中五年。國中七尺從役，野六尺，即是野又早於國中五年。七尺謂二十，六尺即十五也。此言十五受兵，謂據野外爲言，六十還之，據國中爲說也。」案：李說與鄭、賈同。《韓詩傳》說二十行役，六十免役，與此經國中七尺至六十皆征之制，亦正合。惟據《五經異義》引《韓詩》說，則行役與受兵不同年。此經野六尺而征，是受役，非受兵，曹昭十五受兵之說，與此經無當，李傳合爲一，非也。互詳《小司徒》疏。云「其舍者，國中貴者、賢者、能者、服公事者、老者、疾者皆舍」者，貴舍謂官吏有復除，賢能舍謂學士有復除，服公事舍謂庶人在官有復除，老疾舍謂民有復除。《諸子》「國子之卒，凡國正弗及」，即貴者之舍也。《王制》「鄉論秀士，升於司徒者不

征於鄉，升於學者不征於司徒」，即賢能之舍也。又云「五十不從力征，六十不與服戎，八十者一子不從政，九十者其家不從政，廢疾非人不養者一人不從政」，即老疾之舍也。云「以歲時入其書」者，書即夫家名數之版籍。賈疏云：「此上所云，皆歲之四時，具作文書人於大司徒。」注云

「登，成也，定也」者，《小司徒》注義同。云「國中，城郭中也」者，《司士》、《脩閭氏》、《匠人》注義同。對城郭外曰野，謂王城九里、郭城二十七里之內也。《大宰》又謂之邦中，詳彼疏。云「晚賦稅而早免之，以其所居復多役少」者，後鄭以此征爲賦稅，即口泉也。賈疏云：「以其經云七尺及六十，對野中六尺至六十五，是其晚賦稅而早免之。經云國中貴者至疾者皆舍，據國中而言，是其國中復多役少也。」莊存與云：「此謂力征也。軍賦無過家一人，不皆征也。古征有三，無口率出泉，鄭君非也。」案：莊說是也。江永說同。鄭以經征之爲口賦，故《大宰》九賦注說口率出泉，亦引此職文爲證。實則古無口賦，此經之征，與九職、九賦復不同。據《王制》孔疏引鄭《駁異義》說，又不以征爲口賦，則鄭自有兩解矣。復多役少者，謂應役之人多，而受役之人少，役少則更上密而勞，故晚征而早免之。云「野早賦稅而晚免之，以其復少役多」者，此野對城郭中言之，則

郭門以外近郊遠郊之通稱。《孟子·滕文公篇》云：「請野九一而助，國中什一使自賦。」亦以野對國中言之，與此正同。經云野自六尺以及六十有五皆征之，是早賦稅而晚免之，又無舍文，是應復者少，受役者多也。但野中貴者、賢者、能者、服公事者，雖宜少於國中，其老者、疾者，則與國中無異，亦自當有舍，故鄭云「復少」，明非無復也。野受役人多，則更上疏而逸，故早征而晚免之。鄭司農云「征之者，給公上事也」者，先鄭以此征爲力征，與後鄭異，先鄭是也。《王制》疏引《五經異義》云：「《禮》戴說、《王制》云：『五十不從力政，六十不與服戎。』《易》孟氏、《韓詩》說『年二十行役，三十受兵，六十還兵』。古《周禮》說『國中自七尺以及六十，野自六尺以及六十有五，皆征之』。許慎謹按云：『五經說皆不同，是無明文所據。漢承百王，而制二十三而役，五十六而免。六十五已老，而周復征之，非用民意。』鄭駁之云：『《周禮》是周公之制，《王制》是孔子之後大賢所記先王之事。《周禮》所謂皆征之者，使爲胥徒給公家之事，如今之正衛耳。六十而不與服戎，胥徒事暇，坐息之間多其五歲，又何太違之云。徒給公家之事，云非用民意耶？《王制》所云力政，輓引築作之事；所謂服戎，謂從軍爲士卒也。二者皆勞於胥徒，故早舍之。』案：許雖不從

此經，而以征爲征役，說與先鄭略同。後鄭雖駁許，然亦以征爲使爲胥徒，給公家之事，即先鄭所謂給公上事也，則與此注義異，彼義爲允。曾釗云：「《王制》『五十不從力政』，何得國中六十野六十五尚征之！」疏謂築作挽引，正與鄭《駁異義》相反。」案：曾說是也。此征自兼賅役征，但所謂役征者，亦自有分別。年未至五十者，則共勞辱之役，鄭《駁異義》所謂挽引築作，《王制》注亦云城道之役是也。五十以上者，則唯給公家之事，鄭《駁異義》所謂爲胥徒是也。胥徒之役，國中始於二十，止於六十，野始於十五，止於六十有五。若挽引築作及田役，則通以五十爲限，還兵則通以六十爲限。賈疏謂田獵征伐，並不辨國野之別是也。《祭義》「五十不爲甸徒」，即《王制》所謂「不從力政」，明甸徒以外他小役，尚任爲之。此經與《禮記》義本相通，鄭、賈說之未析耳。又《鹽鐵論》云：「古者十五入大學，與小役；二十冠而成人，與戎事；五十以上，血脈溢剛，曰艾壯。今陛下哀憐百姓，寬力役之政，二十三始賦，五十六而免，所以輔耆壯而息老艾也。」此經所云征者，謂小役，故國中以二十爲始，六十而免，野則十五爲始，六十五而免。《鹽鐵論》說十五與小役，可與此經互證。他書所言，或據大役及戎事言之，故晚役而早免。此經與《禮記》、《孟易》、

《韓詩》文似錯互，而義則並通。又案：《孟易》、《韓詩》謂年二十行役，三十受兵，六十還兵。行役指大役，亦即《王制》之力征。《呂氏春秋·上農篇》云：「凡民自七尺以上，屬諸三官，農攻粟，工攻器，賈攻貨。」七尺即年二十，明年二十而後任受九職，則力征大役亦必二十以上可知矣。《王制》孔疏云：「其力征之事，皆二十受之；兵革之事，則三十受之。故《易》孟氏、《詩》韓氏皆云『二十行役，三十受兵』。」案：孔說是也。凡民二十爲餘夫，餘夫可爲羨卒；三十爲正夫，正夫則爲正卒。餘夫受役而正卒受兵，故受兵之年當以《孟易》、《韓詩》爲正。《白虎通義·三軍篇》說亦同。桓譚謂二十與戎事，曹昭謂十五受兵，皆非也。云「舍者，謂有復除，舍不收役事也」者，舍即施舍之舍。《小宰》注云：「施舍，不給役者。」《毛詩·大雅·雨無正》傳云：「舍，除也。」《漢書·高惠高后文功臣侯表敘》云：「求其子孫，並受復除。」《高帝紀》顏注云：「復者，除其賦役也。」《左傳》昭二十七年，孔疏云：「有復除者，謂優復其身，除其徭役。」案：《逸周書·文酌篇》云「樂生身復」，則周時已稱復。《管子·輕重甲篇》云：「民無以與正籍者，予之長假。」即此舍役之事。云「貴者，謂若今宗室及關內侯皆復也」者，惠士奇云：「《漢書》孝文四年，復諸劉有屬

籍，家無所與。《後漢書》劉瑜上書，言豐沛枝裔，被蒙復除，不給卒伍。是兩漢宗室皆復也。」詒讓案：《漢書·食貨志》：「晁錯奏曰：今民入粟受爵，至五大夫以上乃復一人。」據彼是爵九級已得復。此云關內侯有復，則二十級乃復，疑後漢所改。此經所舍貴者，當兼命士以上及王族，鄭舉漢法以況義耳。云「服公事者，謂若今吏有復除也」者，沈彤云：「服公事者，在官庶人也。」案：沈據《大司徒》十二職事「服事」賈疏義也。依其說，蓋通不命之士及府史胥徒等言之。但依《鄭志》說，則胥徒正在征之列，明此不得有胥徒，與彼義微異也。孔廣森云：「《漢書》高帝詔曰：『吏二千石，入蜀漢，定三秦者，皆世世復。』惠帝詔曰：『吏六百石以上父母妻子與同居，及故吏嘗佩將軍都尉印將兵，及佩二千石官印者，家唯給軍賦，他無有所與。』所謂吏有復除也。」云「老者，謂若今八十九十復羨卒也」者，孔廣森云：「武帝建元元年，令民年八十，復二算，九十復甲卒。賈山上文帝《至言》曰：『陛下即位，禮高年，九十者一子不事，八十者二算不事。』所謂復羨卒也。」云「疾者，謂若今癰不可事者復之」者，宋婺州本癰作「瘡」，同。《大司徒》「寬疾」注云：「若今癰不可事，不算卒。」詳彼疏。云「玄謂入其書者，言於大司徒」者，賈疏云：「知者，以其上

云受法於司徒，故知入其書者言於大司徒。」三年則大比，攷其德行道藝，而興賢者能者，鄉老及鄉大夫帥其吏與其衆寡，以禮禮賓之。賢者，有德行者。能者，有道藝者。衆寡，謂鄉人之善者無多少也。鄭司農云：「興賢者，謂若今舉孝廉。興能者，謂若今舉茂才。賓，敬也，敬所舉賢者、能者。」玄謂變舉言興者，謂合衆而尊寵之，以鄉飲酒之禮，禮而賓之。【疏】「三年則大比」者，謂大案比也，詳《小司徒職》。依鄭《鄉飲酒禮》注，則此大比賓興賢能亦在正月，與受頒教法同月，詳後。又《學記》云：「比年入學，中年考校。」注云：「中猶閒也。鄉遂大夫閒歲則考學者之德行道藝，《周禮》三歲大比乃考焉。」鄭蓋以此三年與彼中歲校比之期不同，故謂彼非周制。而孔疏引皇侃說，則謂中年考校亦周法。竊謂中年考校自是鄉遂羣吏考校之事，其鄉遂大夫大比則以三年。上文頒教法于鄉吏，亦云「攷其德行，察其道藝」。蓋或比年，或中年，或三年，其事大小不同，要通謂之攷校。官尊者校比期遠而疏，官卑者校比期近而數，《學記》與此經本不相妨，皇說較鄭爲長。云「攷其德行道藝，而興賢者、能者」者，即所謂選士也。鄉之學士其始學於州黨之學，學成則

州長、黨正論其秀者，升之鄉學，學成則鄉老、鄉大夫、鄉師論其秀者，升之司徒。故《王制》云：「司徒命鄉論秀士，升之司徒，曰選士。司徒論選士之秀者，而升之學，曰俊士。升於司徒者不征於鄉，升於學者不征於司徒，曰造士。樂正崇四術，立四教，順先王詩書禮樂以造士。」大樂正論造士之秀者以告於王，而升諸司馬，曰進士」。鄭彼注云：「秀士，鄉大夫所考有德行道藝者。進士，可進受爵祿也。」彼注又據《學記》有中年考試，九年大成出學之說。依彼經注義，則自秀士升為選士，自選士升為俊士，自俊士升為進士，凡三升而後受爵祿也。自鄉而升於司徒，自司徒而升於學，自學而升於司馬，凡三升而後登於朝也。此經則止有自鄉升司徒法，更無升學、升司馬之文。後經獻賢能之書，王受而登于天府，內史貳之，注云「內史副寫其書者，當詔王爵祿之時」。則似此升於司徒者，即可受爵祿。故《王制》孔疏謂《王制》據學者，故中年考試；《周禮》據鄉人，故三年一舉。鄉人不在學者及諸侯所貢士，亦升諸司馬，是謂鄉之秀士，有在學不在學之異。在學者則九年學成，三升而至司馬；不在學者則唯三年賓興，可由司徒而徑升於司馬矣。黃以周云：「《學記》、《周禮》所異者，一間歲，一三年耳。而鄉遂大夫所攷學士，必升諸國學，教成而後用

之。故鄭注《王制》「命鄉論秀士」，云「秀士，鄉大夫所攷有德行道藝者」，即以《鄉大夫》文言之，明其同也。孔疏以為周之選舉有二法：一由鄉舉，一由學舉。《王制》「命鄉論秀士」，鄉即鄉大夫；論謂論之於學也。鄉大夫退而以鄉射之禮五物詢衆庶，衆庶為鄉人未入學者，則其所興者為學士，所攷者亦攷之於學可知也。攷德行道藝，即司徒之三物。其職曰「受教法於司徒」，則所論之士必升名於司徒可知也。又曰「退而頒之於其鄉吏」，鄉吏即州長、黨正之屬。《州長職》曰「春秋以禮會民，而射于州序」。序，州之學也。又曰「三年大比，則大攷州里以贊鄉大夫廢興」。是亦攷之於學也。《黨正職》曰「書其德行道藝」，亦謂書之於學也。周之鄉舉里選，必入學而考之，而教之，教成而後用之；故所用之人，皆通達政事而無不知學之人也。《鄉大夫職》於賓興之後不復言入學事者，教學非其職，略之也。其曰「此謂使民興賢，出使長之，使民興能，入使治之」。為賢能終言之，非賓興後即任以官爵也。」案：黃說是也。周選舉之法，經雖言之不詳，然其先後條理亦尚可攷。以理推之，此經賓興賢能，由鄉升之司徒，亦必當由司徒升之學，而後升之司馬。司徒升之學，即成均大學，故《王制》說大學之教，俊選皆造；由大學升之司馬，乃得受爵祿。故

《司士》云「以德詔爵，以能詔事」注亦引《王制》「司馬辨論官材，論進士之賢者，以告於王，而定其論」之文以爲釋。是鄭亦謂此經與《王制》選舉之法略同，非由選士即可升司馬也。至中年考試，鄭自別據《學記》爲說，《王制》本無是文。其與經三年大比異同，本可勿論，孔疏以在學不在學強爲區別，又引熊安生說以爲殷周之異，皆非經義。又案：《漢書·食貨志》說里塾之教云：「其有秀異者，移鄉學於庠序；庠序之異者，移國學於少學。諸侯歲貢少學之異者於天子，學於大學，曰造士。行同能偶則別之以射，然後爵命焉。」班說鄉學秀異移國，仍入小學，又謂造士別爲諸侯所貢之士，皆與《王制》文迕。《公羊》宣十五年，何注說與《漢志》略同，而分鄉學與庠爲二，尤爲疏舛，皆不足據也。云「鄉老及鄉大夫帥其吏與其衆寡以禮禮賓之」者，禮即鄉飲酒禮。此經鄉老無專職，惟大比興賢能，鄉老與焉。《國語·齊語》云「合羣安，比校民之有道者」，蓋即其事也。

注云「賢者，有德行者」者，《小司寇》注義同。以經云興賢者，即承上德行而言，故知賢即有六德六行者，亦即《大宰》九兩「三曰師以賢得民」也。詳《大宰》疏。云「能者，有道藝者」者，《小司寇》注義亦同。以經云能者，即承上道藝而言，故知能即有六藝者，亦即《大宰》九兩「四曰儒

以道得民」也。亦詳彼疏。云「衆寡謂鄉人之善者，無多少也」者，明鄉人非善者不得與觀禮也。賈疏云：「謂鄉中有賢者，皆集在庠學。案《鄉飲酒》，堂上堂下皆有衆寡，不言其數。此經衆寡兩言，無問多少，皆來觀禮，故云無多少也。」鄭司農云「興賢者謂若今舉孝廉，興能者謂若今舉茂才」者，漢時，舉孝廉即有德行者，舉茂才即有道藝者，與此賢者能者約略相擬，故舉以爲況。並詳《宰夫》疏。云「賓，敬也」者，《說文·貝部》云：「賓，所敬也。」《白虎通義·五行篇》云：「賓者敬也。」云「敬所舉賢者，能者」者，敬，舊本作「賓」，非，今據余仁仲本及注疏本正。此釋經賓興之義，謂聚所舉賢能之人，以禮賓敬之也。《大司徒》注云：「賓，賓客其賢者。」與敬義亦相成。云「玄謂變舉言興者，謂合衆而尊寵之」者，《大司徒》注云：「興猶舉也。」鄭以興舉義同。《管子·八觀篇》云：「論賢不鄉舉，則士不急行。」鄉舉即賓興。此經不言舉而言興，爲合衆殊異之也。凡賓興必合衆，故《鄉飲酒禮》注云：「凡鄉黨飲酒，必於民聚之時，欲見其化，知尚賢尊長也。」亦其義。云「以鄉飲酒之禮，禮而賓之」者，謂合衆於鄉庠飲酒，而以所興賢能之人爲賓。《大司徒》云「五州爲鄉，使之相賓」，即謂此也。《鄉飲酒禮》云：「主人就先生而謀賓介。」鄭注引《大司徒職》

「以鄉三物教萬民而賓興之」及此經釋之云：「是禮乃三年正月而一行也。」又云：「主人，謂諸侯之鄉大夫也。先生，鄉中致仕者。賓介，處士賢者。古者年七十而致仕，老於鄉里，大夫名曰父師，士名曰少師，而教學焉，恒知鄉人之賢者，是以大夫就而謀之。賢者爲賓，其次爲介，其次爲衆賓，而與之飲酒，是亦將獻之，以禮禮賓之也。」^①即此經以禮禮賓之事。亦通謂之饗，《說文·食部》云：「饗，鄉人飲酒也。」《詩·豳風·七月》：「朋酒斯饗，曰殺羔羊，躋彼公堂，稱彼兕觥。」毛傳云：「饗者，鄉飲酒也。鄉人以狗，大夫加以羔羊。公堂，學校也。」亦即此禮也。賈《鄉飲酒禮》疏云：「凡鄉飲酒之禮，其名有四，案此賓賢能謂之鄉飲酒，一也。又案《鄉飲酒義》云：『六十者坐，五十者立侍。』是黨正飲酒，亦謂之鄉飲酒，二也。鄉射，州長春秋習射於州序，先行鄉飲酒，亦謂之鄉飲酒，三也。案《鄉飲酒義》，又有卿大夫士飲國中賢者，用鄉飲酒，四也。其《王制》云「習射尚功，習鄉尚齒」。還是鄉飲酒黨飲酒法。」又《鄉飲酒義》孔疏云：「鄉則三年一飲，州則一年再飲，黨則一年一飲也。所以然者，天子六鄉，諸侯三鄉，各有鄉大夫，而鄉有鄉學，鄉學每年入學，三年業成，必升於君。若天子鄉，則升學士於天子；若諸侯之鄉，則升學士於諸侯。」

凡升之，必用正月也。將用升之，先爲飲酒之禮。鄉大夫與鄉先生謀事，學生最賢使爲賓，次者爲介，又次者爲衆賓。此鄉大夫爲主人，與之飲酒而後升之。若州一年再飲者，是春秋習射因而飲之，以州長爲主人也。若黨一年一飲者，是歲十二月，國於大蜡祭，而黨中於學飲酒，子貢觀蜡是也，亦黨正爲主人也。」段玉裁云：「先儒謂鄉飲酒其用有四，其說未備。《遂大夫》「三歲大比，則帥其吏而興阡」。注云：『舉民賢者能者，如六鄉之爲。』然則亦必以禮禮賓之也，五也。六遂之縣正如州長，則縣亦有序，春秋亦必以禮會民而射於其序，六也。鄙師如黨正，鄙亦當有序，國索鬼神，亦必以禮屬民，飲酒正齒位，七也。《王制》命鄉簡不帥教者，元日習射上功，習鄉上齒以化之，八也。不變，命右鄉移左，左鄉移右，如初習二禮以化之，九也。不變，移之郊，如初習二禮於郊學以化之，十也。不變，移之遂，又爲習二禮於遂學以化之，十一也。名爲鄉飲酒，而在鄉者六，在郊者一，在遂者四。」案：鄉遂小學鄉飲酒之禮，孔、段所說略備。據《月令》孟冬「大飲烝」注，^②則鄉飲酒

① 原脫「一禮」，據《儀禮·鄉飲酒禮》鄭注補。

② 「孟」原訛「季」，據《禮記·月令》改。

之禮，惟大夫以下有之，天子諸侯有大饗，大飲而無鄉飲酒，蓋其禮迥不同也。又案：《周易·觀》李氏《集解》引鄭《易注》云：「諸侯貢士於天子，鄉大夫貢士於其君，必以禮賓之。」是諸侯亦有賓興賢能之事，但彼在國學，蓋當用大飲之禮，與鄉飲酒禮異也。鄉學名庠，詳《大司樂》疏。厥

明，鄉老及鄉大夫、羣吏獻賢能之書于王，王再拜受之，登于天府，內史貳之。厥，其也。

其賓之明日也。獻猶進也。王拜受之，重得賢者。王上其書於天府。天府，掌祖廟之寶藏者。內史副寫其書者，當詔王爵祿之時。【疏】鄉老及鄉大夫羣吏獻賢能之書于王者，論學士之秀者以告於王，而升名於司徒也。此羣吏即上文鄉吏，與《大宰》、《小宰》諸職之「羣吏」通百官府言者異，詳《大宰》及《小司寇》疏。又案《州長》云：「三年大比，則大攷州里，以贊鄉大夫廢興。」彼廢興兼興民及察吏二者言之。是此官於大比之時，并大計羣吏。故遂大夫大比，亦有屬地治、戒功事、誅賞廢興之事，可以互證。此經無計吏之事者，文不具也。詳《州長》疏。云「王再拜受之」者，拜，經例用古字，當作「擗」。唐石經及宋以來版本並誤。詳《大祝》疏。云「登于天府，內史貳之」者，王以所獻

賢能之書正本藏於天府，其副本則在內史，此官與彼二官為官聯也。注云「厥，其也」者，《爾雅·釋言》文。《桌

氏》注同。云「其賓之明日也」者，謂次日之朝，朝王而獻其書。《鄉飲酒禮》云：「明日，賓鄉服以拜賜，主人如賓服以拜辱。」又有息司正之禮，殆皆在獻書退朝之後與？云「獻猶進也」者，《廣雅·釋詁》云：「獻，進也。」云「王拜受之，重得賢者」者，重其有得賢之慶也。小司寇，司民獻民數於王，王拜受之。彼為重民數而奇拜。此獻賢能之書，王再拜受之，以禮彌重，故褒拜也。云「王上其書於天府」者，《司民》注云：「登，上也。」王致其書於天府言登者，亦重得賢。云「天府掌祖廟之寶藏者」者，《天府》云「掌祖廟之守藏」，又云「凡國之玉鎮大寶器藏焉」是也。又彼職獻民數則受而藏之，此獻賢能之書，尤重於民數，故天府亦受而藏之也。云「內史副寫其書者，當詔王爵祿之時」者，《小宰》先鄭注云：「貳，副也。」賈疏云：「內史副寫一通文書，擬授爵祿。案《內史職》，有策命諸侯羣臣之事，故使內史貳之。」詒讓案：詔爵祿者，《司士》云：「以德詔爵，以功詔祿，以能詔事，以久奠食。」即其事也。凡賢能由鄉升於司徒，更由司徒升於學，由學升於司馬，然後升於朝而受爵祿。《王制》注謂在九年大成之後，然則三年大比時，未遽

詔爵祿。凡升於司徒，升於司馬者，皆先告於王，《王制》文可互推，亦非獻於王即通籍於朝也。此注要其終言之，謂王既受此賢能之書，其後當以時予之爵祿，則內史以詔王，備遺忘耳。互詳《司士》疏。退而以鄉射之禮五物

詢衆庶：一曰和，二曰容，三曰主皮，四曰和容，五曰興舞。以，用也。行鄉射之禮，而以五物詢於

衆民。鄭司農云：「詢，謀也。問於衆庶，寧復有賢能者。和謂閨門之內行也。容謂容貌也。主皮謂善射，射所以觀士也。」故書舞爲無。杜子春讀和容爲和頌，謂能爲樂也；

無讀爲舞，謂能爲六舞。玄謂和載六德，容包六行也。庶民無射禮，因田獵分禽則有主皮。主皮者，張皮射之，無侯也。主皮和容興舞，則六藝之射與禮樂與？當射之時，民必觀焉，因詢之也。孔子射於矍相之圃，蓋觀者如堵牆。射至於司馬，使子路執弓矢，出誓射者。又使公罔之裘、序點揚觶而語。詢衆庶之儀若是乎？【疏】「退而以鄉射之

禮五物詢衆庶」者，退謂王受賢能之書，事畢，鄉大夫與鄉老則退，各就其鄉學之庠，而與鄉人習射，是爲鄉射之禮。將行鄉射，復當行鄉飲酒禮，則與獻賢能之書不同日也。凡鄉射禮，以鄉大夫詢衆庶爲主，州長亦得行焉。賈疏謂

「鄉射本爲州長之禮，鄉大夫用之」，非也。五物與《大司徒》鄉三物，事異而義同。彼注云：「物猶事也。」五事皆據射禮而言，凡大射、賓射、燕射皆有之。此經以五物專屬鄉射者，以鄉大夫詢衆庶在鄉學，惟用鄉射之禮故也。《論語·八佾篇》：「子曰，射不主皮。」《集解》引馬融云：「射有五善焉：一曰和，志體和；二曰和容，有容儀；三曰主皮，能中質；四曰和頌，合《雅》、《頌》；五曰興武，與舞同。言射者不但以中皮爲美，亦兼取和容也。」案：馬說五善，即此經五物也。二曰和容，段玉裁謂「和」爲衍文是也。其說專據射禮，較杜、鄭爲優，詳後。注云「以，用也」

者，《小爾雅·廣詁》文。《說文·巳部》云：「巳，用也。」以即巳之隸變。云「行鄉射之禮而以五物詢於衆民」者，謂鄉大夫會民射於鄉庠，而以五事詢考之也。《鄉射禮》：鄭目錄云：「州長春秋以禮會民，而射於州序之禮，謂之鄉者，州，鄉之屬，鄉大夫或在焉，不改其禮。」又彼經云：「鄉射之禮，主人戒賓。」注云：「主人，州長也。鄉大夫若在焉，則稱鄉大夫也。《周禮》鄉老及鄉大夫，三年正月獻賢能之書于王，退而以鄉射之禮五物詢衆庶。諸侯之鄉大夫，既貢士於其君，亦用此禮射而詢衆庶乎？」賈疏云：「案今《儀禮·鄉射》云：『豫則鉤楹內，堂則由楹外。』又云：『序

則物當棟，堂則物當楣。」堂謂鄉學，據鄉大夫所行射禮也。豫謂州長春秋二時習射於序。「詒讓案：《鄉射禮》射於序而用鹿中，與鄉學名庠及大夫用兕中不合，故鄭以爲諸侯州長上士春秋習射之禮，此就今所存《鄉射經》爲說耳。實則鄉射禮，自以天子鄉大夫詢衆庶之禮爲最重，鄉射之名，實起於此。州長以下並鄉大夫之屬官，禮名鄉射，足以眩之矣。鄭司農云「詢，謀也」者，《爾雅·釋詁》文。《小司寇》注同。云「問於衆庶，寧復有賢能者」者，以前此所興之賢能，既獻其書於王，其衆庶之中未登庠序者，或尚有可興之人，故復以此鄉射禮詢問之，明仍爲謀賢能，以待後三年之復興也。云「和謂閨門之內行也」者，《孔子燕居》云：「閨門之內有禮，故三族和也。」先鄭本彼爲說。云「容謂容貌也」者，《說文·宀部》云：「容，盛也。」《頁部》云：「頌，兒也。」《兒部》云：「兒，頌儀也，籀文作貌。」容貌即頌兒也。經典皆借容爲頌字。先鄭不知和容爲射禮，故泛舉行及容貌爲說，其實非也。《論語》馬注以射禮說和爲志體和，容爲有容儀。皇疏云：「和志謂將射必先正志，志和則身體和韻，故曰體和也。和容便行步，舉動和柔，所以有容儀也。」凌廷堪云：「經文明云鄉射之禮五物，然則此五者固在《鄉射禮》之中，不在鄉射禮之外也。蓋一曰和二曰容

者，即《鄉射禮》之三耦射也。獲而未釋獲，但取其容體比於禮也。是爲第一次射。」案：凌說足申馬義。蓋和專指射者之志體，容則通凡射儀之委曲綽綽者而言，志體和即《射義》所謂志正體直也，有容儀即《射義》所謂進退周還必中禮也。《周書·大聚篇》云：「立鄉以習容。」彼亦專屬習射言之。云「主皮謂善射」者，先鄭意五物之中，惟此指射，餘皆泛論容德，故特釋之。凌廷堪云：「二曰主皮者，即《鄉射禮》之三耦及賓主人大夫衆耦皆射也。司射命曰不貫不釋，蓋取其中也，故謂之主皮。馬氏《論語注》以主皮爲能中質是也。是謂第二次射。《鄉射記》云：「禮射不主皮。」鄭注：「不主皮者，貴其容體比於禮，其節比於樂，不待中爲雋也。」蓋古經師相傳之解，指第三次射而言，深得經意。不主皮爲第三次射，不鼓不釋，則主皮爲第二次射，不貫不釋可知矣。」案：凌說是也。云「射所以觀士也」者，《射義》云：「故射者，進退周還必中禮，內志正，外體直，然後持弓矢審固。持弓矢審固，然後可以言中，此可以觀德行矣。」是射者所以觀士之德行也。云「故書舞爲無」者，段玉裁云：「舞從舛，聲，故書以無爲舞，古文假借字也。」云「杜子春讀和容爲和頌，謂能爲樂也」者，段玉裁云：「頌容古今字。漢時以容爲容兒字，則以頌專爲雅頌

字。子春破和容爲和頌，釋之曰「謂能爲樂也」，蓋以樂歌對下文樂舞爲言，鄭不從也。馬季長曰「四曰和頌，合《雅》《頌》也」。從杜易字。」案：段說是也。《論語》馬注以容爲頌，雖與杜讀同，然亦主射禮言，其說實較杜爲長。皇疏云：「射時有歌樂，言雖能中質，而放捨節奏必令與《雅》《頌》之聲和合也。天子以《騶虞》爲節，諸侯以《貍首》爲節，大夫以《采蘋》爲節，士以《采芣》爲節，故孔子曰「何以聽，何以射」。言射節與樂聲合如一也。」案：皇說是也。凌廷堪亦謂此即《鄉射禮》第三次射之以樂節射，司射命曰「不鼓不釋」。並足輔馬義。云「無讀爲舞，謂能爲六舞」者，段玉裁云：「馬季長曰：『五曰興武，與舞同也。』」馬本與故書作無者不同，以舞訓武，則用杜說而不從杜字也。《論語》皇疏云：「非唯聲合《雅》、《頌》而已，乃至使射容與樂舞趣興相會，進退同也。」王引之云：「五物，五者皆鄉射之禮。杜子春及先後鄭注，唯主皮謂射，其餘則泛指他事，於射無當，固不若馬說之善也。興舞之義，馬未之及。案：《大司樂》：『大射，王出人，令奏《王夏》。及射，令奏《騶虞》。詔諸侯以弓矢舞。』《樂師》：『燕射，帥射夫以弓矢舞。』則射時有以弓矢舞之禮。以《大司樂》考之，舞當在歌樂之時，歌詠其聲，舞動其容也。《鄉射》歌《騶虞》以射，

與王大射同，則射夫亦當以弓矢舞，故曰興舞。興者，作也，起也。《舞師》「凡小祭祀則不興舞」。鄭彼注曰：「興猶作也。」皇疏非是。」案：杜云六舞即泛指《大司樂》《雲門》、《大卷》等六代之舞，其說固誤，馬說專據射禮，雖較杜說爲優，然仍是容節合樂，與和頌無大區別。惟王說據《大司樂》、《樂師》弓矢舞爲釋，其證最塢。李光地、莊有可說並同。《詩·齊風·猗嗟》云：「舞則選兮，射則貫兮。」馬瑞辰、陳奐亦謂即此五物興舞之事是也。蓋《鄉射禮》大師奏《騶虞》以射時，尚有三耦及衆耦以弓矢舞之節。今《鄉射經》不言者，以其爲射禮之細，故略之耳。云「玄謂和載六德，容包六行也」者，賈疏云：「破司農、子春之義。案《大司徒》以鄉三物教萬民，教成則興之」。明此詢者，還是三物之內，不是三物之外別有和容。又且主皮興舞，是六藝之內，明此和容是六德六行之中。在下謂之載，和在六德之下，故云和載六德。在上謂之包，容則孝也，孝在六行之上，故云容包六行。」案：鄭不知此五物爲鄉射之節，而謂與《大司徒》鄉三物爲一，故以彼一六德、二六行釋此一曰和、二曰容也。彼六行中無容，鄭云容包六行者，《廣雅·釋詁》云：「容，瀟也。」謂六行是人之法，則容可包含此六者，非以容當六行之孝也。賈謂鄭以容爲孝者，亦非

鄭指。云「庶民無射禮」者，據經無庶民射文。賈疏云：「天子至士，有大射、燕射、賓射之等，庶人則無此射禮，故云無射禮也。」云「因田獵分禽則有主皮」者，鄭不知主皮即《鄉射》第二次射，故以為庶民因田獵分禽之射也。田獵分禽有射事，詳《大司馬》注及《鄉射記》注引《書傳》文，具於後。云「主皮者，張皮射之，無侯也」者，《鄉射記》云：「禮射不主皮。主皮之射者，勝者又射，不勝者降。」鄭彼注云：「禮射謂以禮樂射也，大射、賓射、燕射是矣。不主皮者，貴其容體比於禮，其節比於樂，不待中為偶也。言不勝者降，則不復升射也。主皮者無侯，張獸皮而射之，主於獲也。《尚書傳》曰：「戰鬪不可不習，故於蒐狩以閑之也。閑之者貫之也，貫之者習之也。凡祭取餘獲陳於澤，然後卿大夫相與射也。中者雖不中也取，不中者雖中也不取。何以然？所以貴揖讓之取也，而賤勇力之取。嚮之取也於囿中，勇力之取也；今之取也於澤宮，揖讓之取也。」澤，習禮之處，非所於行禮，其射又主中，此主皮之射與？」凌廷堪云：「鄭不知主皮之射為第二次射，而下以己意，謂張獸皮而射，故雖引《尚書傳》為證，而亦不敢決之也。又考《論語》「射不主皮，為力不同科」，孔子稱為古之道者。蓋時至春秋之末，鄉射但以不貫不釋為重，而容體比於禮，節

比於樂，不復措意，故孔子歎之，以為古禮仍有不主皮之射也。為力不同科，馬融注：「力役之事，有上中下三科。」是別為一事，與上句無涉。或者謂《鄉射·記》云「主皮之射者，勝者又射，不勝者降」，則似鄉射之外，更有此射者。此殊不然。《鄉射·記》所云，即指第二次射也。凡經所未言，見於記者甚多，不獨主皮之射一節也。若貫革及張獸皮而射，尚何升降之有哉！主皮者，謂不失正鵠也。」案：凌說是也。此經五物，四射所同。主皮之名，蓋起於大射。大射張皮侯，以皮飾侯，又方制之以為鵠，故以中鵠為主皮。賓射采侯，鄉射獸侯，雖不棲皮，亦沿大射主皮之名，於義得通也。三射侯制，詳《梓人》疏。云「主皮、和容、興舞，則六藝之射與禮樂與」者，賈疏云：「以主皮當射，和容當禮，興舞當樂。」詒讓案：鄭既以上「一曰和，二曰容」，當三物之六德六行，故又以此主皮和容興舞，當三物之六藝。此亦不知五物為鄉射之節而誤說也。不可從。云「當射之時，民必觀焉，因詢之也」者，明鄉射得詢衆庶之事。賈疏云：「案《鄉射·記》「唯君有射于國中，其餘則否」。注云：「臣不習武事於君側。」以其鄉射在城外，衆庶皆觀焉，故得詢此五物。」云「孔子射於矍相之圃，蓋觀者如堵牆」者，已下並《射義》文。《釋文》云：「矍，本或作瞿。」案：

《射義》本作「矍」。鄭彼注云：「矍相，地名。樹萊蔬曰圃。」賈疏云：「天子諸侯射，先行燕禮；卿大夫士射，先行鄉飲酒之禮。時孔子為鄉大夫，鄉射之禮先行飲酒禮，故云「孔子射於矍相之圃」。矍相，地名。以其臣不得在國射，故射於矍相之圃。以其鄉內衆庶皆集在射所，故云「觀者如堵牆」。案鄭引矍相之射，證此詢衆庶，故賈謂彼亦為鄉射。《詩·大雅·行葦》孔疏說同。《射義》孔疏則以為賓射，非鄭旨。至賈謂孔子為鄉大夫，《鄉射禮》疏說同，則未詳所本，恐不足據。云「射至於司馬，使子路執弓矢出誓射者」者，彼文「誓」作「延」。鄭彼注云：「先行鄉飲酒禮，將射，乃以司正為司馬。子路執弓矢出延射，則為司射也。延，進也。出進觀者欲射者也。延或為誓。」案：此注正從或本。賈疏云：「以其飲酒之禮必立司正，於將射，變司正為司馬也。案《鄉射》、《大射》，司射執弓矢。今此云子路執弓矢，則子路為司射也。子路出誓者，以其衆庶多，不可盡與之射，故誓去之。」云「又使公罔之裘、序點揚觶而語」者，鄭彼注云：「射畢又使此二人舉觶者，古者於旅也語，語謂說義理也。」賈疏云：「案《鄉飲酒》之禮，一人舉觶為旅酬始，二人舉觶為無算爵始，射在無算爵前。今誓在無算爵後者，但射實在無算爵前，今未射之前，用此無算爵

禮，二人舉觶之法，以誓衆庶耳。非謂此射在無算爵後。」云「詢衆庶之儀若是乎」者，鄭以《射義》不言詢衆庶，而其儀相近，故引以證義。此謂使民興賢，出使長之；使民興能，入使治之。言是乃所謂使民自舉賢者，因出之而使之長民，教以德行道藝於外也。使民自舉能者，因人之而使之治民之貢賦田役之事於內也。言為政以順民為本也。《書》曰：「天聰明自我民聰明，天明威自我民明威。」《老子》曰：「聖人無常心，以百姓心為心。」如是則古今未有遺民而可為治。【疏】此謂使民興賢，出使長之，使民興能，入使治之者，明鄉大夫所賓興之賢能，亦同與司士詔爵詔事之典，即以充異日長吏之選也。凡民之有德行者，在鄉稱賢，在學為師，仕於國則為長。民之有道藝者，在鄉稱能，在學為儒，仕於國則為吏。則下無不興之賢能，上無不賢不能之長吏矣。黃以周云：「此為賢能終言之，非賓興後即任以官職也。」惠士奇云：「《大戴禮·官人篇》曰：『平仁而有慮者，使治國家而長百姓；慈惠而有理者，使長鄉邑而治父子；直慤而忠正者，使涖百官而察善否；慎而察聽者，使長民之獄訟，出納辭令；臨事而絜正者，使守內藏而治出入；慎察而挈廉者，使分財臨貨，

主賞賜，好謀而知務者，使治壤地而長百工，接給而廣中者，使治諸侯而待賓客，猛毅而度斷者，使治軍事爲邊境。因方而用，九用有徵。」所謂出使長人使治者如此。而《賈子新書·大政篇》則謂「上選吏也，必使民興焉。故民譽之，上察而舉之；民苦之，上察而去之。王者取吏，必使民唱，然後和之。故夫民者，吏之程也。察吏於民，必取其愛焉。十人愛之者，則十人之吏也；百人愛之者，則百人之吏也；千人愛之者，則千人之吏也；萬人愛之者，則萬人之吏也」。所謂使民興賢，使民興能者如此。」

注云「言

是乃所謂使民自舉賢者，因出之而使之長民，教以德行道藝於外也」者，長即《大宰》九兩之「長以貴得民」，謂出其鄉而爲王朝百官府之正長也。鄭云教以德行道藝者，蓋以出教對人治而言，實則長亦兼治民，不止教也。賈疏謂以賢者德大，故遣出外，或爲都鄙之主，或諸侯，皆可也。此以長爲都鄙之長及諸侯，蓋本《大宰》注，然非經義。《續漢書·百官志》劉注引劉劭《爵制》云：「古者天子寄軍令於六鄉，居則以田，警則以戰，所謂人使治之，出使長之，素信者與衆相得也。」《通典·職官》說同。此釋出使長之爲六鄉之吏，在軍爲軍將之等，亦非經義也。云「使民自舉能者，因人之而使之治民之貢賦田役之事於內也」者，治即九

兩之吏以治得民，謂人爲本鄉治民之吏，若州長以下皆是。《墨子·尚賢中篇》云：「可使長官者使長官，可使治邑者使治邑。」此云出使長之，即長官也；人使治之，即治邑也。

賈疏云：「以其能者德小，不可以爲大夫諸侯等，故還入鄉中，量德大小，以爲比長，鄭長已上之官，治民之貢賦田役於內也。」案：鄭長，遂官，當由遂大夫興阡之內選擇爲之，非鄉大夫所興也。賈說非。依此經說，則出長人治，以賢能而殊其人，則皆自鄉而升之司徒，升之學，升之司馬，而後授以爵祿也。云「言爲政以順民爲本也」者，明使民自興舉賢能，皆以順民爲爲政之本也。引《書》曰「天聰明自我民聰明，天明威自我民明威」者，《咎繇謨》文。「天明威」僞孔本作「天明畏」。《書·釋文》云：「馬本作威。」鄭本蓋與馬同。僞孔傳云：「言天因民而降之福，民所歸者天命之。天視聽人君之行，用民爲聰明。天明可畏，亦用民威其威。民所叛者，天討之，是天明可畏之效。」引《老子》曰「聖人無常心，以百姓心爲心」者，《老子·任德》章文。王弼注云：「動常因也。」河上公注云：「聖人重改更費，因循若自無心，百姓心之所便，因而從之。」云「如是則古今未有遺民而可爲治」者，《廣雅·釋詁》云：「遺，離也。」上既引《書》及《老子》二文，證爲政以順民爲本之義，故此又申釋之。歲

終，則令六鄉之吏皆會政致事。會，計也。致事，言其歲盡文書。【疏】「歲終」者，亦謂夏之季冬。云「則令六鄉之吏皆會政致事」者，六鄉，依王引之說，「六」當爲「斤」之誤，詳《鄉師》疏。此正六鄉之歲會，亦鄉吏之官計也。賈疏云：「年終將考其得失，則令六鄉之吏州長以下，皆計會教政之功狀，致其所掌之事於鄉大夫，鄉大夫以下致與大司徒，然後考之。」注云：「會，計也」者，《大司徒》注同。云「致事，言其歲盡文書」者，《小宰》「歲終則令羣吏致事」，注亦云「使齋歲盡文書來至」。義與此同。

正歲，令羣吏攷灋于司徒，以退，各憲之於其所治。【疏】「正歲令羣吏攷灋于司徒」者，即《小司徒》云：「正歲，則帥其屬而觀教灋之象，令羣吏憲禁令，脩灋糾職，以待邦治。」攷灋于司徒，謂觀象於司徒所治之官府，因而考論受行之羣吏，亦即上文鄉吏是也。賈疏云：「正歲建寅之月，鄉大夫令州長已下羣吏，令使考法於司徒，正謂受而考量行之。」云「以退，各憲之於其所治」者，「於」，經例當作「于」，石經及各本竝誤。宋余仁仲本「治」下衍「之」字。唐石經「所」下「大」上損闕三字，蓋與余本同。明注疏本遂以下文「國」字上屬此章，大謬。宋婺州

本、建陽本、岳本、明嘉靖本並無「之」字，今從之。《小宰》注云：「憲謂表縣之。」國大詢于衆庶，則各帥其鄉之衆寡而致於朝。「大詢」者，詢國危，詢國遷，詢立君。鄭司農云：「大詢于衆庶，《洪範》所謂謀及庶民。」

【疏】「國大詢于衆庶」者，此王以國家大事詢萬民，對前鄉老、鄉大夫以鄉射詢衆庶爲大也。云「則各帥其鄉之衆寡而致於朝」者，於，亦當作「于」，石經及各本並誤。此朝謂外朝，在皋門內庫門外者。《小司寇》云：「王南鄉，三公及州長、百姓北面。」注云：「鄉大夫在公後。」即其朝位也。

注云「大詢者，詢國危，詢國遷，詢立君」者，賈疏云：「案《小司寇》職云，掌外朝之政，以致萬民而詢焉，一曰詢國危以下，此亦云國大詢於衆庶而致於朝，故知大詢者，詢國危之等。此三者皆是國之大事，故稱大詢。」鄭司農云「大詢于衆庶，《洪範》所謂謀及庶民」者，于，注例當作「於」，各本並誤。《洪範·稽疑章》云：「汝則有大疑，謀及乃心，謀及卿士，謀及庶人，謀及卜筮。」《隸釋》載《漢石經》殘碑「人」作「民」，與先鄭所據本同。引之者，證大詢偏及衆庶之事。國有大故，則令民各守其閭，以待政令。使民皆聚於閭胥所治處。【疏】注云「使民皆聚

於閭胥所治處」者，賈疏云：「二十五家爲閭，中士爲閭胥，胥則有治政之處，以聚其民。大故謂災變寇戎之等，警急須入，故鄉大夫令州長已下，使民各守其閭胥所治處，以待國之政令。」俞樾云：「令民各守其閭者，不使出二十五家之外也。閭之下尚有比，不言各守其比者，比止五家，爲數大少，若使此比之民不得至彼此，大近煩苛，故不言比而言閭，使此閭之民不得至彼閭，所以待政令也。」莊存與云：「大司徒致民於王門，其在鄉者則守其閭，亦互相足。」案：《說文·門部》云：「閭，里門也。」蓋二十五家聚居一閭，閭中有巷，巷首則有門，故因以閭爲五比之名。依鄭《大司馬》注，謂六卿爲軍將，營治於國門，則比閭之吏當亦營治於閭門。若然，守閭胥所治處，即是守閭門，俞、莊說與注義亦相成也。《晏子春秋·外篇》云：「莊公闔門而圖莒，國人以爲有亂也，皆操長兵而立於閭。」《墨子·公輸篇》：「墨子說公輸盤無攻宋，歸，過宋，天雨，庇其閭中，守閭者不納也。」並國有故謹守閭之事。以旌節輔令，則達之。民雖以徵令行，其將之者無節，則不得通。【疏】以旌節輔令則達之」者，此亦鄉大夫命其屬稽察來往徵令之事，必以旌節爲信，以防姦僞也。《掌節》云：「掌守邦節而辨其用，以輔王命。」又云「道路用旌節」，注云：「道路者，

主治五涂之官，謂鄉遂大夫也。凡民以徵令及家徒，則鄉遂大夫爲之節。」然則此旌節即鄉大夫所爲以與之者也。輔令亦通王與百官府之徵令文書言之，與彼「輔王命」義同。注云「民雖以徵令行，其將之者無節，則不得通」者，《廣雅·釋詁》云：「達，通也。」謂民雖以應徵令而行，仍須持旌節以爲信。若無旌節，則雖有將之者，仍不得通行。《掌節》云「無節者有幾則不達」是也。

周禮正義卷二十二

州長各掌其州之教治政令之灋。鄭司農

云：「二千五百家爲州。《論語》曰：『雖州里行乎哉！』」
 《春秋傳》曰：「鄉取一人焉以歸，謂之夏州。」【疏】「各掌其州之教治政令之灋」者，州長之官法也。教者，與鄉先生以鄉三物教於州學也。教治政令，四者平列，猶《鄉大夫》云「各掌其鄉之政教禁令」也。賈疏謂治政令之法者，十二教之外所施政令皆治之，非經義。阮元云：「賈意於經『教』字一逗，然《黨正》云『政令教治』，則賈讀非也。」

注鄭司農云「二千五百家爲州」者，《大司徒》正義同。引

《論語》曰「雖州里行乎哉」者，《衛靈公篇》文。何氏《集解》

引鄭注云：「二千五百家爲州，五家爲鄰，五鄰爲里。」亦據

鄉遂爲說。又引《春秋傳》曰「鄉取一人焉以歸，謂之夏州」

者，《左》宣十一年傳云：「楚子伐陳，遂入陳，殺夏徵舒，因

縣陳，申叔時諫，乃復封陳，鄉取一人焉以歸，謂之夏州。」

杜注云：「州，鄉屬，示討夏氏所獲也。」引之者，證侯國亦

有州也。正月之吉，各屬其州之民而讀灋，以攷其德行道藝而勸之，以糾其過惡而戒之。

屬猶合也，聚也。因聚衆而勸戒之者，欲其善。【疏】「正

月之吉，各屬其州之民而讀灋」者，以下並掌當州教治之

事。賈疏云：「謂建子之月一日，對衆讀一年政令及十二

教之法，使知之。」云「以攷其德行道藝而勸之」者，與司諫

爲官聯也。德行道藝等，黨正以下各有所書，此官又總校

攷之。《說文·力部》云：「勸，勉也。」云「以糾其過惡而戒

之」者，與司救爲官聯也。過惡即《司救》之「哀惡過失，糾戒

亦與《司救》誅讓防禁事略同。注云「屬猶合也，聚也」

者，《說文·尸部》云：「屬，連也。」引申爲合聚之義。屬

聚，《遂大夫》、《大行人》注並同。云「因聚衆而勸戒之者，

欲其善」者，爲其聞之者衆，將以勸其向善之志。此與鄉大

夫合衆賓興賢能意同。若以歲時祭祀州社，則屬

其民而讀灋，亦如之。春秋，以禮會民而射

于州序。序，州黨之學也。會民而射，所以正其志也。

《射義》曰：「射之爲言釋也。釋者，各釋己之志。」【疏】

「若以歲時祭祀州社」者，賈疏云：「上云歲時，皆謂歲之四

時；此云歲時，唯謂歲之二時春秋耳。春祭社以祈膏雨，

望五穀豐熟，秋祭社者，以百穀豐稔，所以報功。」案：賈說是也。州社蓋亦有仲春、仲秋兩祭。黨正祭，族師祭，皆以春秋。蓋禮有隆殺，而時則同。此經不著時者，以下文云「春秋會民而射於州序」，變文以避復重也。凡社，歲二祭，詳《肆師》疏。州社者，州之官社。鄉遂之制，二千五百家以上始得立社也。《祭法》云：「大夫以下成羣立社，曰置社。」鄭注云：「大夫以下，謂下至庶人也。大夫不得特立社，與民族居百家以上，則共立一社，今時里社是也。」孔疏云：「《詩·頌》云『百室盈止，殺時禘牡』。故曰百家，言以上皆不限多少。故鄭《駁異義》引《州長職》曰『以歲時祭祀州社』，是二千五百家為社也。雖云百家以上，唯治民大夫乃得立社，故鄭《駁異義》云『有國及治民之大夫乃有社稷』是也。」案：以孔引《駁異義》說，參綜攷之，鄭意蓋謂周時有公社，有私社。公社斷自鄉州縣都，此經州社是也。其私社，則大夫、士、庶人族居百家以上得立之，《祭法》「置社」是也。《駁異義》謂有國及治民大夫有社稷，自指國邑公社言之，孔以為百家以上之治民大夫，非鄭指也。公社之祭，王侯及治民大夫主之，故州有社，而黨族則別祭祭酺；私社之祭，貴家大族主之，故《祭法》云「大夫以下」，明平民百家以上尚不得立社也。孔唯引鄭《駁義》

而不詳許說云何。攷《說文·冂部》云：「《周禮》二十五家為社。」《異義》說或當與彼同，但經無此文。《風俗通義·祀典篇》引作「《周禮》說」，蓋此經舊師說如是。據彼則閭里二十五家即得立社。《史記·魯世家》集解引賈逵《左傳注》、哀十五年《左傳》杜注、《呂氏春秋·慎大篇》高注、《漢書·五行志》顏注引臣瓚說、《管子·小稱篇》尹注、《史記·孔子世家》索隱、《荀子·仲尼篇》楊注，說竝同。《商子·賞刑篇》云：「里有書社。」《楚辭·天問》云：「何環穿自閭社丘陵，爰出子文。」皆閭里立社之證。然《左》哀十五年傳，齊與衛書社五百；《晏子春秋·內篇雜下》說齊桓公以書社五百封管仲；《荀子·仲尼篇》，作書社三百；《呂氏春秋·高義篇》說越以書社三百封墨子；《史記·孔子世家》，楚昭王將以書社七百里封孔子。以上諸書所云書社，或致異國，或賜諸臣，則當為都鄙采地之制。都鄙制丘甸，則不得有二十五家之里。《戰國策·秦策》云：「賜之二社之地。」高注云：「邑皆有社，二社二邑。」彼邑似即指都鄙四井之邑。《左》昭二十五年傳：「自莒疆以西，請致千社。」千社疑亦即千邑也。若然，鄉遂二十五家而立社，都鄙公邑四井而立社與？今攷《呂氏春秋·慎大篇》云：「武王勝殷，諸大夫賞以書社。」則周初已有書社，竊疑即置

社之制，與閭里之社不同。閭里二十五家立社，恐是晚周之法。許、應所稱，雖經師舊義，鄭所不從。故《郊特牲》孔疏云：「周之政法，百家以上得立社。其秦漢以來，雖非大夫，民二十五家以上則得立社，故《鄭志》云《月令》『命民社』謂秦社也。自秦以下，民始得立社也。」案：孔辯民社爲秦制，深得鄭愜。《管子·乘馬篇》又云「方六里爲社」。方六里爲積三十六里，以一里八家計之，凡二百八十八家，此疑齊制，與禮亦不合也。云「則屬其民而讀灋亦如之」者，謂正月吉日之外，復有仲春仲秋社後兩次讀法，亦有攷糾勸戒之事，如正月吉也。云「春秋以禮會民而射于州序」者，禮即鄉射之禮，《王制》云「元日習射上功」是也。亦春秋兩行，不必與祭社同月。《鄉射禮·鄭目錄》云：「州長春秋以禮會民，而射於州序之禮。謂之鄉者，州，鄉之屬，鄉大夫或在焉，不改其禮。」又《鄉飲酒義》云：「合諸鄉射，教之鄉飲酒之禮，而孝弟之行立矣。」鄭彼注云：「鄉射，則州長春秋以禮會民而射於州序之禮也。謂之鄉者，州黨，鄉之屬也。或則鄉之所居州黨，鄉大夫親爲主人焉。如今郡國下令長，於鄉射飲酒，從太守相臨之禮也。」賈疏云：「亦謂先行鄉飲酒之禮，乃射，故云『以禮』也。」注云「序，州黨之學也」者，《鄉飲酒義》正義同。賈疏云：「案下

《黨正》亦云「飲酒於序」，故知州黨學同名爲序。若鄉則立庠，故《禮記·鄉飲酒義》云「主人迎賓于庠門之外」。彼鄉大夫行賓賢能，非州長、黨正所行，故知庠則鄉學也。「詒讓案：《鄉射禮》「豫則鉤楹內，堂則由楹外，當左物，北面揖」。鄭注云：「序無室，可以深也。周立四代之學於國，而又以有虞氏之庠爲鄉學。《鄉飲酒義》曰「主人迎賓於庠門外」是也。庠之制，有堂有室也。今言豫者，謂州學也。讀如「成周宣謝災」之謝。《周禮》作「序」。凡屋無室曰謝。宜從謝。州立謝者，下鄉也。今文豫爲序，序乃夏后氏之學，亦非也。」又《鄉射記》云：「序則物當棟。」注云：「是制五架之屋也。」案：依鄭《鄉射》正義，則鄉郊之學爲庠，有室；州黨之學爲序，無室。序正字當作「謝」，又即《爾雅·釋宮》之「榭」。《書·泰誓》孔疏引孫炎云：「榭但有堂也。」其序爲大學東序之專名，具有堂室，與庠略同，不可通於州黨無室之學。經典凡說州學，作「序」作「豫」者，並聲近段借字。此經及《學記》注並不破序爲謝者，文不具也。《文王世子》云：「王乃命公侯伯子男及羣吏曰：反養老幼於東序。」注云：「羣吏，鄉遂之官。」彼注蓋並蒙侯國言之，不復析別耳。實則鄉遂不得有東序也。焦循云：「《爾雅》云：『無東西廂有室曰寢，無室曰榭。』榭蒙無東西廂言，則

視寢又無室矣。杜預注宣十六年傳云：「宣榭，講武屋，謂屋歇前。」孔疏云：「歇前者，無壁如今廳是也。」歇前，正無廂與室之屋也。《孟子》云：「夏曰校，殷曰序，周曰庠，學則三代共之。」以校序庠別於學。序乃鄉學之名，殷人尚質，其制無室而歇前，周立此制於州遂，而易鄉學爲庠也。《王制》云：「夏后氏養國老于東序，養庶老于西序。」《文王世子》於大學言東序，是大學亦有序稱。周之東序，又曰東膠。膠與校，蓋同音通用字。大學稱序校，猶鄉學名庠，而北學亦稱上庠也。歇前之制，惟在州遂者然耳。」段玉裁云：「成周學制，鄉有鄉學，其屬別爲州、黨、族、比、閭，州有州序，黨有黨序。古者仕焉而已者，歸教於閭里，朝夕坐於門側之堂，《學記》所謂家有塾也。鄉大夫等掌之，大司徒領之。自鄉而四郊。每郊有郊學，《王制》『虞庠在國之四郊』，鄭注：『周立小學於四郊。』鄉之不帥教者，『不變，移之郊』。鄭注：『爲之習禮於郊學。』《文王世子》『凡語於郊者，必取賢斂才焉』。鄭注：『謂論說於郊學。』《祭義》『天子設四學』。鄭注：『四學，謂周有四郊之虞庠也。』皆是也。亦大司徒領之。由郊而外，距郊百里內爲六遂，鄰、里、鄣、鄙、縣，皆其屬別也。每遂有學，《學記》所謂『術有序』是也。其所屬之學，當亦如鄉遂大夫等主之，亦大司徒

領之。此城中城外學之大槩也。鄉學必在百里之適中，而不在邊；虞庠乃設百里之邊，故《記》曰『在國之四郊』，注謂之郊學。命鄉簡不帥教者習禮，先在本鄉，繼右鄉移左鄉，左鄉移右鄉，繼移郊學，繼移遂學，終乃屏之遠方，由近洎遠，釐然可攷。」案：段說甚覈。周鄉遂學制，依鄭《三禮注》義，鄉學名庠，六鄉則六庠也。鄉之次爲州，州學名序，六鄉三十州，則有三十序也。州之次爲黨，黨學亦名序，六鄉百五十黨，則有百五十序也。六鄉地不逾四同，而立庠序百八十有六，國學及四郊之學，尚不與其數，教法亦甚詳矣。蓋周制自國學外，鄉學郊學並名庠，《王制》及《鄉飲酒義》所說是也。州黨及六遂之學並名序，此經及《學記》所說是也。《左》襄三十年傳，鄭有鄉校，此猶東序之或稱東膠，蓋侯國之制。至《孟子·滕文公篇》說夏校、殷序、周庠，《史記·儒林傳》同；《說文·广部》則云「庠，禮官養老，夏曰校，殷曰庠，周曰序」，《漢書·儒林傳》說同。文雖差異，要並指三代之鄉學而言。焦循說甚瑣，段玉裁、孔廣森說亦同。遂學亦名序，故《學記》云「術有序」。注云：「術當爲遂，聲之誤也。」孔疏云：「凡六鄉之內，州學以下皆爲序；六遂之內，縣學以下皆爲序也。皇氏云『遂學曰庠』，與此文違，其義非也。」陳祥道云：「《周禮》遂官各降

鄉官一等，則遂之學亦降鄉一等矣。州長爵與遂大夫同，則遂之學其名與州序同可也。」案：陳說比例極是，足申鄭、孔義。若然，六遂亦當有六序，遂之三十縣、百五十鄙，與鄉之州黨同，當亦有學。然其名不見於經。《學記》疏謂亦名序，未知然否。《漢書·食貨志》謂五比爲鄰，五鄰爲里，里有序，序有左塾右塾。《白虎通義·辟雍篇》說同。《公羊》宣十五年，何注又謂一里八十家，中里爲校室。以此例之，則似閭族里鄴亦有學。經注並無文，未知其審。段玉裁謂班、何所云，即《學記》之「家有塾」，理或然也。云「會民而射，所以正其志也」者，《射義》云「內志正，外體直」是也。引《射義》曰「射之爲言繹也，繹者各繹己之志」者，證射爲正志之義。賈疏云：「繹，陳也，言各陳繹己志。」

凡州之大祭祀、大喪，皆蒞其事。大祭祀，謂州社稷也。大喪，鄉老、鄉大夫於是卒者也。蒞，臨也。

【疏】「凡州之大祭祀、大喪，皆蒞其事」者，祭祀、喪紀皆當州之禮事，亦教治之一隅也。注云「大祭祀謂州社稷也」者，明與它職大祭祀關天地宗廟者異。賈疏云：「以上文云『歲時祭祀州社』，此經又因言州之大祭祀，故知還是上文州社也。知有稷者，以其天子諸侯三社皆稷對之，故知兼有稷也。」云「大喪，鄉老、鄉大夫於是卒者也」者，以鄉

吏之中，爵尊者無過鄉老、鄉大夫，卒於所治之州里，亦得爲喪紀之大者，明與它職大喪關王、后、世子者異也。云「蒞，臨也」者，《天官·世婦》注同。若國作民而師田行役之事，則帥而致之，掌其戒令與其賞罰。致之，致之於司徒也。掌其戒令賞罰，則是於軍因爲師帥。【疏】若國作民而師田行役之事，則帥而致之「者，賈疏云：「言若者，不定之辭。若，如也。如有國家作起其民。師謂征伐，田謂田獵，行謂巡狩，役謂役作。此數事者，皆須徵聚其民，州長則各帥其民而致之於司徒也。」

注云「致之，致之於司徒也」者，賈疏云：「謂州長致與小司徒，小司徒乃帥而致與大司徒，故《小司徒職》云『大軍旅帥其衆庶』是也。」云「掌其戒令賞罰，則是於軍因爲師帥」者，《夏官·敍官》云：「二千有五百人爲師，師帥皆中大夫。」師衆即一州二千五百家所出。《州長敍官》云「每州中大夫一人」，此又云「掌其戒令賞罰」，故知在軍就爲師帥。《左》僖十五年傳「晉作州兵」，杜注云：「使州長繕甲兵。」蓋亦師帥之事也。賈疏云：「若衆屬軍吏，別有軍吏掌之，何得還自掌之，故知因爲師帥也。但在鄉爲州長已管其民，在軍還領己民爲師帥，即是因內政寄軍令也。」歲終，

則會其州之政令，正歲，則讀教灋如初。雖

以正月讀之，至正歲猶復讀之，因此四時之正重申之。

【疏】「歲終」者，對下正歲，謂夏正一歲之終始也。凡此經

云歲終，皆爲建丑之月。賈疏謂周歲終，失之。詳《宰夫》

疏。云「則會其州之政令」者，此正當州之歲會，亦州吏之

官成也。云「正歲則讀教灋如初」者，夏正建寅之月又讀教

法，此在周正月後兩月，仲春祭社前一月，則此官一歲四讀

法也。注云「雖以正月讀之，至正歲猶復讀之，因此四

時之正重申之」者，上文正月之吉已屬州民而讀法，是建子

之月已讀之；此於正歲建寅之月又讀之，明爲四時之正，

故重複申戒，欲民之徧諭也。三年大比，則大攷州

里，以贊鄉大夫廢興。廢興，所廢退，所興進也。鄭

司農云：「贊，助也。」【疏】「三年大比則大攷州里」者，此

州吏之官計也。賈疏云：「州長至三年大案比之日則大考

州里者，謂年年考訖，至三年則大考之。言大者，時有黜陟

廢興故也。」詒讓案：大攷州里，謂攷察吏民之賢否。州里

闕黨族間比言之。詳《鄉師》疏。云「以贊鄉大夫廢興」者，

此亦兼興民察吏二者言之。鄉大夫於大比之時，有賓興賢

能之事，又因以察吏治。《遂大夫》云：「三歲大比，則帥其

吏而興毗，明其有功者，屬其地治者，凡爲邑者，以四達戒

其功事，而誅賞廢興之。」是大比民有賓興，吏有廢置，皆鄉

遂大夫總掌其事，州長、縣正以下則贊之，明大比與大計事

相因也。詳《司書》疏。注云「廢興，所廢退，所興進也」者，

《大宰》注云：「廢猶退也。」興與進義亦相成。鄭司農云

「贊，助也」者，《充人》、《大行人》注竝同。《小爾雅·廣詁》

云：「贊，助，佐也。」

黨正各掌其黨之政令教治。鄭司農云：

「五百家爲黨。《論語》曰「孔子於鄉黨」，又曰「闕黨童

子」。【疏】「各掌其黨之政令教治」者，教謂教於黨學及後

祭祀、喪紀、昏冠、飲酒之禮事是也。注鄭司農云「五

百家爲黨」者，《大司徒》正義同。引《論語》曰「孔子於鄉

黨」，又曰「闕黨童子」者，《鄉黨》、《憲問》篇文。彼魯制。

諸侯三鄉，亦五百家爲黨，故引以爲證。及四時之孟

月吉日，則屬民而讀邦灋，以糾戒之。以四孟

之月朔日讀法者，彌親民者於教亦彌數。【疏】「及四時之

孟月吉日，則屬民而讀邦灋以糾戒之」者，賈疏云：「黨正

四時孟月吉日則屬民而讀邦法者，因糾戒之，如州長之爲

也。」注云「以四孟之月朔日讀法者」者，此亦注用今字作「法」也。《大宰》注云：「吉謂朔日。」云「彌親民者於教亦彌數」者，賈疏云：「上文州長唯有建子、建寅及春秋祭社四度讀法。此黨正四孟及下文春秋祭祭并正歲，一年七度讀法者，以其鄉大夫管五州，去民遠，不讀法；州長管五黨，去民漸親，故四讀法；黨正去民彌親，故七讀法。案下族師十四度讀法，彌多於此，故鄭摠釋云彌親民者於教亦彌數也。」惠士奇云：「讀法，州長一年四，黨正七，族師十有四，間胥讀無時。」春秋祭祭，亦如之。祭，謂雩祭水旱之神。蓋亦為壇位，如祭社稷云。【疏】「春秋祭祭」者，與州春秋祭社事相擬，蓋亦以仲春、仲秋祭之。賈疏云：「黨正不得與州同祭社，故亦春秋祭祭神也。」云「亦如之」者，亦屬民而讀法也。注云「祭謂雩祭水旱之神」者，即《大祝》六祈之祭也。《祭法》云：「幽宗，祭星也。雩宗，祭水旱也。」鄭注云：「宗皆當為祭。」故此云雩祭。又《左》昭元年傳，子產云：「山川之神，則水旱癘疫之災，於是乎祭之。日月星辰之神，則雪霜風雨之不時，於是乎祭之。」《說文·禋部》云：「祭，設縣絕為營，以禳風雨雪霜水旱癘疫於日月星辰山川也。一曰，祭衛使災不生。」金鶚云：「《大祝》六祈，三曰禴，四曰祭。禴之祭主於癘疫，祭

之祭主於水旱，故《祭法》云「雩宗祭水旱」。雪霜風雨之不時，為水旱所由致，義與水旱相因也。第祭禴二祭相似，鄭注《大祝》云：「禴祭，告之以時有災變也。」是禴祭一類，故禳癘疫亦通謂之祭也。祭之祭，雖有日月星辰與山川二者，而山川較多。《楚語》曰：「諸侯祀天地三辰及其土之山川。」韋注云：「此謂二王後也。非二王後，祭分野星山川而已。」然則祭於日月星辰者，惟天子有之，非天子則祭於山川。《黨正職》云「春秋祭祭」，是祭之祭達於大夫，可知祭於山川者多也。祭祭亦及社稷，《大祝職》曰：「國有大故天裁，彌祀社稷禱祠。」鄭注：「天裁，疫癘水旱也。」是祭及社稷矣。《左傳》第言山川而不及社稷，以臺駘為汾神故也。且祭之時，亦有二。無定時者，遇災而行，所以禳水旱，則山川社稷並祭；有定時者，於春秋二仲行之，春祈雨暘之時，若秋則報之，與祭社稷之義略同，其祭則主山川而不及社稷，以社稷已自有春秋之祭也。《州長》言春秋祭社，《黨正》言春秋祭祭，社有定時則祭亦有定時可知。社稷尊於山川，故州長祭社，黨正祭祭。案：金說甚覈。此經之祭祭，《祭法》謂之雩祭，蓋因祭水旱之神通謂之雩，其實與祭雩不同。周祭雩有二：正雩為常禮，《月令》繫於五月，依鄭義則在周六月。又有旱雩，為變禮，周秋三月遇旱

則祭，不早則否。《月令》「大雩帝」之下，又有「命百縣雩祀」之文，百縣即謂畿內鄉遂公邑，則州黨得有常雩之祭，其旱雩之祭亦當有之。但二雩並無春秋再祭之法，則雩祭與常雩不同明矣。《論衡》謂古有春秋二雩，其說絕無根據，不足證此也。雩禮，詳《女巫》疏。又《晉書·禮志》引摯虞議，謂此祭祭即《書》之六宗及《月令》之天宗，其說甚誤。但摯議以此「祭祭」與《肆師》「社宗」並舉，審校文義，疑摯氏所見本「祭」實作「宗」，或據賈、馬、王諸家舊讀，故與鄭異也。云「蓋亦為壇位如祭社稷云」者，《邕人》注云：「祭謂營鄭所祭。」營鄭即謂壇之營域也。祭與社稷同為地示，故其壇位略同。社稷壇位，詳《大司徒》疏。國索鬼神而祭祀，則以禮屬民而飲酒于序，以正齒位。壹命齒于鄉里，再命齒于父族，三命而不齒。國索鬼神而祭祀，謂歲十二月大蜡之時，建亥之月也。正齒位者，《鄉飲酒義》所謂「六十者坐，五十者立侍。六十者三豆，七十者四豆，八十者五豆，九十者六豆」是也。必正之者，為民三時務農，將闕於禮，至此農隙而教之尊長養老，見孝弟之道也。黨正飲酒禮亡，以此事屬於鄉飲酒之義，微失少矣。凡射飲酒，此鄉民雖為卿大夫，必

來觀禮，《鄉飲酒》、《鄉射記》「大夫樂作不入，士既旅不入」是也。齒于鄉里者，以年與眾賓相次也。齒于父族者，父族有為賓者，以年與之相次，異姓雖有老者，居於其上。不齒者，席于尊東，所謂遵。【疏】「國索鬼神而祭祀，則以禮屬民而飲酒于序，以正齒位」者，謂行鄉飲酒之禮於黨學之序也。黨序亦無室，與州序同。《學記》云「黨有庠」，孔疏云：「州黨曰序。此云黨有庠者，是鄉之所居黨，為鄉學之庠，不別立序。庾氏云「黨有庠，謂夏殷禮，非周法」，義或然也。」焦循云：「黨與遂對舉，則鄉之通名。」案：焦說是。互詳《州長》疏。正齒位，即《王制》云「習鄉上齒」是也。《管子·八觀篇》云：「時無會同，喪烝不聚，禁罰不嚴，則齒長輯睦無自生矣。」此因蜡祭而行鄉飲酒，即會同以明齒長教輯睦之事也。賈疏云：「黨正行正齒位之禮，在十二月建亥之月為之，非蜡祭之禮。而此云國索鬼神而祭祀者，以其正齒位禮在蜡月，故言之以為節耳。當國索鬼神而祭祀之時，則黨正屬聚其民而飲酒於序學中，以行正齒位之法。」云「壹命齒于鄉里，再命齒于父族，三命而不齒」者，《祭義》文同。賈疏云：「當正齒位之時，民內有為壹命已上，必來觀禮，故須言其坐之處。此黨正是天子之國黨正，則壹命亦天子之臣。若有壹命之人來者，即於堂

下鄉里之中爲齒也。再命齒于父族，謂父族爲賓，即與之爲齒，年大在賓東，年小在賓西。若有三命之人來者，縱令父族爲賓，亦不與之齒；若非父族，是異姓爲賓，灼然不齒，位在賓東，故云不齒也。若然，《典命》雖不見天子之士命數，《序官》有上士中士下士，則上士三命，中士二命，下士壹命，則此壹命謂下士，再命謂中士，三命謂上士也。」

注云「國索鬼神而祭祀，謂歲十二月大蜡之時，建亥之月也」者，《釋文》云：「蜡，依字作蜡。」案：《月令》釋文引《字林》作「蜡」，即蜡之俗。《郊特牲》云：「天子大蜡八。蜡也者，索也。歲十二月，合聚萬物而索饗之也。蜡之祭也，主先嗇而祭司嗇也。祭百種，以報嗇也。饗農及郵表畷、禽獸，仁之至，義之盡也。古之君子，使之必報之。迎貓，爲其食田鼠也；迎虎，爲其食田豕也；迎而祭之也。祭坊與水庸，事也。」鄭彼注云：「謂求索也。歲十二月，周之正數，謂建亥之月也。饗者，祭其神也。萬物有功加於民者，神使爲之也，祭之以報焉，造者配之也。」案：鄭以此經云索鬼神，與《郊特牲》蜡索之訓正相會，故據以爲說。周十二月，於夏正爲十月，故《月令》孟冬云「是月也大飲烝」。鄭注云：「十月農功畢，天子諸侯與其羣臣飲酒於太學，以正齒位，謂之大飲，別之於他。烝，謂有牲體爲俎也。《黨正

職》曰：「國索鬼神而祭祀，則以禮屬民而飲酒于序，以正齒位。」亦謂此時也。《月令》又云：「天子乃祈來年于天宗，大割祠于公社及門閭，臘先祖五祀，勞農以休息之。」鄭注云：「此《周禮》所謂蜡祭也。天宗，謂日月星辰也。大割，大殺羣牲割之也。臘，謂以田獵所得禽祭也。或言祈年，或言大割，或言臘，互文。勞農以休息之，黨正屬民飲酒正齒位是也。」孔疏云：「此等之祭，總謂之蜡。若細別言之，天宗、公社、門閭謂之蜡，其祭則皮弁素服，葛帶榛杖。其臘先祖、五祀，謂之息民之祭，其服則黃衣黃冠。鄭注《郊特牲》云「息民與蜡異」也。按《黨正》云：「國索鬼神而祭祀，則以禮屬民，而飲酒于序，以正齒位。」則飲酒在蜡祭之後。此大飲在蜡祭之前者，若黨正屬民飲酒，在蜡之後，故下云「勞農以休息之」，注「黨正飲酒是也」。若天子諸侯羣臣大飲，在蜡祭之前，故以大飲敘在祈年之前。然鄭爲大飲之下注引黨正飲酒者，證其正齒位同在此月，不謂大飲即黨正飲酒也。」案：據鄭、孔說，則建亥之月天子先大飲烝於太學，大飲之後有蜡祭，蜡之後有臘祭，臘之後黨正乃屬民飲酒於序，正齒位：其次蓋如此。此職云「國索鬼神而祭祀」，即舉蜡祭以明黨正之飲酒在國蜡後也。索鬼神即指大蜡八神。而鄭、孔據《月令》以說蜡，謂八神

之外，又廣及日月、星辰、社、門閭等衆神。金鶚云：「《月令》多禘秦制，秦無蜡祭，而於孟冬祈天宗，祠公社、門閭，臘先祖、五祀，遂勞農休息，以倣周之大蜡，而不以蜡名之。後儒不察，而以爲周禮，誤矣。周禮孟春祈穀於上帝，仲春祭社稷，亦所以祈年，皆於本年之春行之，未有預祈於年前者也。歲終之祭，當報而不當祈；且祈年不當但祈日月星辰而不及上帝。日月從祀於圜丘南郊，又特祀於二分，未聞祀於孟冬者也。社已祀於春秋，先祖已祭於四時，此時適已烝祭，五祀已分祭於四時，乃復祭之，不病其數乎！況先祖、五祀於勞農休息，絕不相關。又先祖祭於廟，五祀祭於宮，而勞農休息則在於郊，其地隔遠，皆不合於禮。《禮運》云：「昔者仲尼與於蜡賓，事畢，出游於觀之上。」鄭注云：「謂蜡亦祭宗廟，時孔子仕魯，在助祭之中。」不知蜡祭畢必行燕禮，燕禮以大夫爲賓，孔子爲大夫，故爲蜡賓燕於寢，故事畢而出游於觀。若祭宗廟而助祭，孔子安得爲賓乎？不得據此而謂蜡亦祭宗廟者也。然則祈年於天宗以下三祭，非周禮明矣。鄭注皆指爲周之蜡祭，殊不思《郊特牲》明著八蜡之神，若蜡祭亦祭天宗、公社等神，經文何以不著乎？且經云「蜡者索也」，以八神有功於民，而非常祀之所及，故必索而祭之。若日月、星辰、社稷、宗廟，何待

索邪？」案：金謂祈年天宗、祠公社門閭非蜡祭，是也。黃以周說同。大蜡八神，皆非常祀所及，搜索而祭之，故經云「索鬼神」，與大司徒十二荒政之「索鬼神」爲修廢祀，事異而義同也。至臘爲息民之祭，與蜡同日行之，但有尊卑之別耳。通言之，臘亦得謂之蜡。其黨正飲酒正齒位，即在蜡臘之日，故《郊特牲》因蜡而及息民之祭，《月令》又因臘而及勞農休息之事，明黨飲亦與蜡臘事相因。《禘記》云：「百日之蜡，一日之澤。」鄭彼注亦引此經爲說，是其證也。蜡臘異同，詳《籥章》疏。云「正齒位者，《鄉飲酒義》所謂六十者坐，五十者立侍，六十者三豆，七十者四豆，八十者五豆，九十者六豆是也」者，案彼云「鄉飲酒之禮，六十者坐，五十者立侍，以聽政役，所以明尊長也。六十者三豆，七十者四豆，八十者五豆，九十者六豆，所以明養老也」。鄭彼注云：「此說鄉飲酒謂黨正國索鬼神而祭祀，則以禮屬民而飲酒于序，以正齒位之禮也。」孔疏云：「按鄉飲酒禮，賓賢能則用處士爲賓，其次爲介，其次爲衆賓，皆以年少者爲之。此正齒位之禮，其實介等皆用年老爲之，其餘爲衆賓。賓內年六十以上，於堂上於賓席之西，南面坐，若不盡則於介席之北，東面北上。其五十者則立於西階下，東面北上，示有陪侍之義，非即在六十者傍同南面立也。六十

者三豆至九十者六豆者，以其每十年加一豆，非正禮，故不得爲籩豆偶也。其五十者亦有豆也，但二豆而已。則鄉飲酒禮，衆賓立於堂下者皆二豆。其賓介之豆無正文，當依衆賓之年而加之也。」云「必正之者，爲民三時務農，將闕於禮，至此農隙而教之尊長養老，見孝弟之道也」者，《釋文》云：「隙，本又作郤。」案：郤即隙之借字。《白虎通義·鄉射篇》云：「所以十月行鄉飲酒之禮何？」所以復尊卑長幼之義。春夏事急，浚井茨牆，至有子使父，弟使兄，故以事閒暇，復長幼之序也。《鄉飲酒義》云：「民知尊長養老，而后乃能入孝弟。民入孝弟，出尊長養老，而后成教，成教而后國可安也。君子之所謂孝者，非家至而日見之也，合諸鄉射，教之鄉飲酒之禮，而孝弟之行立矣。」鄭亦本彼爲說。《國語·齊語》云「班序顛毛以爲民紀統」，亦謂此也。賈疏云：「春夏秋三時，務在田野，闕於齒序之節。隙，閒也。至此十月，農事且閒而教之。言尊長養老，即五十已上至九十正齒位是也。」云「黨正飲酒禮亡」者，以今《儀禮》唯有《鄉飲酒禮》，爲諸侯鄉大夫禮，無天子黨正飲酒之禮也。云「以此事屬於鄉飲酒之義，微失少矣」者，賈疏云：「《鄉飲酒義》唯五十已上豆數之言，此經唯一命已上觀禮之事，二處相兼，比於《儀禮》篇中鄉飲酒法，義理乃未足，

微失於少，故云微失少矣。」案：賈說是也。此冢上禮亡而言，微失少者，謂記雖略見其事，而文不備耳。云「凡射飲酒」者，賈疏云：「謂州長春秋行射，黨正十二月行鄉飲酒，二事俱同，故兼言射也。」云「此鄉民雖爲卿大夫，必來觀禮」者，明此三命、再命、一命，並據當鄉之民仕者而言也。賈疏云：「證此經壹命以至三命，齒與不齒之人，來在位之法也。」云「鄉飲酒，《鄉射記》大夫樂作不入，士既旅不入是也」者，《鄉飲》《鄉射》二記，並有此文，故兼引之。賈疏云：「證二事俱有壹命已上觀禮來入時節。案彼經，鄉大夫皆作樂前人，士未旅前人，故云「大夫樂作不入」，鄭彼注云「後樂賢也」；云「士既旅不入」，注云「後正禮也」。若然，大夫士來觀禮者，皆爲樂賢行禮而至，故大夫樂作不入，士既旅不入也。」云「齒于鄉里者，以年與衆賓相次也」者，于，注例當作「於」，各本並誤。《文王世子》云：「古者謂年齡，齒亦齡也。」鄭彼注云：「齒，人壽之數也。」又《祭義》注云：「齒者，謂以年次立若坐也。」賈疏云：「謂在堂下與五十已下衆賢賓客相次。以其壹命，若據天子之國，壹命爲下士；若據諸侯之國，壹命爲公侯伯之士；若據子男之士，不命，固在堂下，以其士立於下故也。」云「齒于父族者，父族有爲賓者，以年與之相次」者，亦當作「於」。

此猶《文王世子》云「不踰父兄也」。父族對異姓言之，則凡同大宗者皆齒，不徒九族也。賈疏云：「以其賓在戶牖之間，南面，若賓是同姓父族，則與之齒也。」云「異姓雖有老者，居於其上」者，賈疏云：「既言齒於父族，明異姓非父族，不齒可知。」云「不齒者，席于尊東，所謂遵」者，于，亦當作「於」。此不齒謂爵貴特居尊位，雖父族亦不以年相次。《荀子·大略篇》云：「三命，族人雖七十，不敢先。」《祭義》文略同。所謂「不齒」也，與《大司寇》「圜土罷民」不齒「義異」。遵席於尊東，亦兼據《鄉飲》、《鄉射》二禮為說。《鄉飲酒禮》云：「賓若有尊者，諸公、大夫，則既一人舉觶，乃入，席于賓東，公三重，大夫再重。」鄭彼注云：「尊者，諸公、大夫也。謂之賓者，同從外來耳。大國有孤四命，謂之公，席於賓東，尊之，不與鄉人齒也。天子之國，三命者不齒；於諸侯之國，爵為大夫則不齒矣。」又《鄉射禮》「一人舉觶後，云「大夫若有尊者，則入門左，升席于尊東。」注云：「謂此鄉之人為大夫者也。謂之尊者，方以禮樂化民，欲其遵法之也。鄉大夫士非鄉人，禮亦然，主於鄉人耳。今文遵為僕。尊東，明與賓夾尊也。」案《鄉飲》、《鄉射》遵席皆與賓夾尊。《鄉飲酒禮》遵席於賓東者，賓東即尊東，二經義不異也。賈疏云：「案《鄉飲酒》、《鄉射》皆酒尊在室戶東，房

戶西，賓主夾之。鄉人為卿大夫，來觀禮，為鄉人所遵法，謂之為遵，席位在酒尊東，公三重，大夫再重，故知不齒者席於尊東也。案鄭注《鄉飲酒》，云「此篇無正齒位之事焉」者，彼是三年一貢士，直行飲酒之禮，賢者為賓，其次為介，其次又為衆賓，賓而貢之，如此，無黨正正齒位之事。案彼注又云「天子之國，三命者不齒；於諸侯之國，爵為大夫則不齒矣」者，以其賓賢能年幾必小於卿大夫等，是以天子之國三命士及公侯伯之卿三命、大夫壹命，子男之卿再命、大夫壹命，但是大夫已上，無問命數，皆不齒，以其大夫已上爵尊故也。但諸侯之卿當天子之上士，故天子之國三命乃不齒，天子士再命已下及諸侯之士則皆齒，以其士卑立於下，故在堂下與鄉人立者齒也。彼是賓賢能禮。若黨正飲酒之禮，則此文是天子黨正飲酒法，則壹命齒於鄉里，在堂下與鄉人齒；再命齒於父族，父族為賓在堂上，則天子再命之士亦在堂上。與彼賓賢能鄉飲酒義異者，案：《鄉射·記》云：「大夫與，則公士為賓。」則此黨正飲酒，有壹命已上觀禮，則亦以公士為賓。但公家之士其年必大，故天子之士再命者，亦與之齒。若然，賓賢能天子之士再命不齒者，彼賓賢能，非正齒位法，別為一禮，故與黨正正齒位禮異也。」案：依鄭《三禮注》及賈疏義，則此黨飲酒正齒

位，雖義主尚齒，而實兼貴，故一命無不齒，再命則有齒有不齒，三命則皆不齒。其鄉飲酒賓賢能，則尊賢而兼貴，故天子中士再命仍齒於鄉里，而侯國公侯伯之大夫、子男之卿再命、子男大夫一命者，轉得與天子上士同不齒也。

至《文王世子》說天子，諸侯朝公族於內朝，則又親親而兼尚齒。故彼文云，公族「其朝於公，內朝則東面北上，臣有貴者以齒」。又云「雖有三命不踰父兄」。鄭彼注云：「唯於內朝則然。其餘會聚之事，則與庶姓同。」亦引此經為說。然則內朝，公族之朝，雖三命仍無不齒，蓋與此二禮又異矣。凡其黨之祭祀、喪紀、昏冠、飲酒、教其禮事，掌其戒禁。其黨之民。【疏】注云「其黨之民」

者，賈疏云：「此一經並是民之所行，與州之祭祀、大喪義異。此祭祀已下，雖是民之所行，民者冥也，非教不可，故黨正皆教其禮事也，因掌其戒命督禁之。」凡作民而師

田、行役，則以其灋治其政事。亦於軍因為旅

帥。【疏】則以其灋治其政事者，法即大司徒之役法，大司馬之戰法、田法。此官受彼法以治之也。注云「亦

於軍因為旅帥」者，家上州長在軍為師帥也。《夏官·敘官》云：「五百人為旅，旅帥皆下大夫。」《黨正敘官》亦每黨

下大夫一人。賈疏云：「此亦如上釋，非衆屬軍吏者。黨正在鄉各管五百家，出軍之時，家出一人，則五百人為旅，黨正還為旅帥，亦如州長因為師帥也。」歲終，則會其

黨政，帥其吏而致事。【疏】「歲終則會其黨政，帥

其吏而致事」者，此正黨之歲會，亦黨吏之官成也。歲終謂

夏之季冬，詳《宰夫》疏。賈疏云：「黨正以一黨之內有族

師以下諸官等，故歲終則會計一黨政治功狀，則帥其族師

以下之吏，致其所掌之事於州長，州長又致與鄉大夫，鄉大

夫致與大司徒而行賞罰也。」正歲，屬民讀灋而書

其德行道藝。書，記之。【疏】「正歲屬民讀灋而書其

德行道藝」者，前孟春朔日已讀灋，此月之內擇日重複讀之，因書其德行道藝，視月吉糾戒事尤詳也。注云

「書，記之」者，《廣雅·釋言》云：「書，記也。」謂記其德行道藝於版籍。《書·益稷》云「書用識哉」。記識義亦同。

賈疏云：「以其三年乃一貢，今每年正歲皆書記勸勉之，三年即貢之也。」以歲時涖校比，涖，臨也。鄭司農云：

「校比，《族師職》所謂『以時屬民而校，登其族之夫家衆寡，辨其貴賤老幼癘疾可任者，及其六畜車輦』。如今小案比。【疏】「以歲時涖校比」者，《鄭長》注云：「校猶數也。」

此即木囚之字，假借爲校數之名。《夏官·釋文》謂比校字皆當從手，非也。詳《夏官·敘官》疏。賈疏云：「案《族師職》以歲之四時校比。」此黨正管五族，至校比之時，黨正往臨之，恐其有差失故也。」注云「泣，臨也」者，《天

官·世婦》注義同。鄭司農云「校比，《族師職》所謂以時屬民而校，登其族之夫家衆寡，辨其貴賤老幼癯疾可任者及其六畜車輦」者，賈疏云：「並《族師職》文。以其黨正所臨，臨族師，故還引族師校比之法，以證成其義也。」云「如今小案比」者，《小司徒》「大比」先鄭注云：「今時八月案比是也。」蓋即大案比。其小案比不知以何月。呂飛鵬云：「《淮南子·時則訓》『三月官鄉』，注云：『三月料民戶口故官鄉也。』據此，則漢之案比亦或以三月。」詒讓案：高氏所云，或即小案比也。先鄭以此四時校比，對《小司徒》「三年大比爲小，故舉漢法爲況。然漢大案比亦每年一行，實與周制小異。賈疏謂漢小案比亦對三年大比爲小，非也。及大比，亦如之。」【疏】「及大比亦如之」者，賈疏云：「及，至也。族師至三年大案比，黨正亦泣之。」

族師各掌其族之戒令政事。政事，邦政之

事。鄭司農云：「百家爲族。」【疏】注云「政事，邦政之事」者，此讀政如字，與他職讀爲征者異。賈疏云：「謂國之征役皆是也。」鄭司農云「百家爲族」者，《大司徒》注義同。

月吉，則屬民而讀邦灋，書其孝弟睦婣有學者。月吉，每月朔日也。故書上句或無「事」字。杜子春

云：當爲「正月吉」。書亦或爲「戒令政事，月吉則屬民而讀邦法」。【疏】「月吉則屬民而讀邦灋，書其孝弟睦婣有

學者」者，賈疏云：「黨正所書，德行道藝具言。此云孝弟睦婣，惟據六行之四事。有學，即六藝也。計族師所書，亦應不異黨正。但文有詳略，故所言有異。但族師親民，故析別而言耳。」詒讓案：閭胥讀法，已書其敬敏任恤者，故此官唯書孝弟睦婣，與閭胥互相備也。注云「月吉，每

月朔日也」者，以經不著某月，明每月朔日皆讀法也。吉爲朔日，《大宰》注義同。賈疏云：「以其彌親民，教亦彌數，故十二月朔皆讀之。」云「故書上句或無事字，杜子春云當爲正月吉」者，段玉裁云：「故書或無事字，故杜易政爲正，下屬讀之。」黃以周云：「與《凌人》故書『掌冰政』，杜破政爲正，下屬『歲十有二月』，其例正同。」詒讓案：杜云當爲正月吉者，據州長讀法亦在正月之吉也。賈疏云：「但族

師親民讀法宜數，若爲正月之吉，則與州長同，於義不可。」云「書亦或爲戒令政事，月吉則屬民而讀邦法」者，此即與今書同。法，經例作灋，注例用今字故作法。蓋故書止有兩本，一本無「事」字，一本有「事」字。後鄭以有事字者爲正本，則以無者爲或本；杜以無事字者爲正本，則以有者爲或本。前後兩舉故書或作，而文不同，由鄭、杜意各有所主耳。春秋祭酺，亦如之。酺者，爲人物裁害之神。

故書酺或爲步，杜子春云：「當爲酺。」玄謂《校人職》又有冬祭馬步，則未知此世所云，螻螟之酺與？人鬼之步與？蓋亦爲壇位如雩祭云。族長無飲酒之禮，因祭酺而與其民以長幼相獻酬焉。【疏】「春秋祭酺」者，酺與釂事

相因。據《王居明堂禮》，蓋亦以仲春、仲秋，與祭社同月也。云「亦如之」者，亦屬民而讀法。仲春仲秋月朔既讀法，其祭酺之日更復讀之，是卯月酉月各兩次讀，通前爲十四讀法也。注云「酺者，爲人物裁害之神也」者，裁，注

例用今字當作災，《校人》注亦作災，此疑誤。詳《膳夫》疏。字書「酺」字無祭神之義。鄭以《黨正》祭禘及漢法約之，知酺亦與人物爲裁害之神也。云「故書酺或爲步，杜子春云當爲酺」者，賈疏云：「《校人職》云『馬步』，亦爲行步之字，而子春破之從酺者，子春亦無正文，直以疑之今此爲正，故

依之也。」段玉裁改「當爲酺」爲「當從酺」，云：「故書酺步兩有，杜從酺不從步，今本作『當爲酺』者，非也。」林頤山云：「《史記·趙世家》：『惠文王三年，大赦，置酒酺五日。』《秦始皇紀》『天下大酺』。《集解》文穎曰：『酺，《周禮》族師掌『春秋祭酺』，爲人物裁害之神。』蘇林曰：『陳留俗，三月上巳，水上飲食爲酺。』杜子春以酺見於周末，而漢時陳留人謂三月上巳水上飲食爲酺，尚沿《周禮》春秋祭酺遺俗，遂改故書祭步爲祭酺。」案：林說亦通。云「玄謂《校人職》又有冬祭馬步」者，彼注亦云「馬步，神爲災害馬者」。鄭引之者，欲證故書或作步，義亦得通也。云「則未知此世所云螻螟之酺與？」人鬼之步與「者，此據漢時民間有此二祭。螻螟之酺，即爲物裁害之神；人鬼之步，即爲人裁害之神也。賈疏云：『但此經云酺，不知何神，故舉漢法以況之。但漢時有螻螟之酺神，又有人鬼之步神，未審此經酺定當何酺，故兩言之。』徐養原云：『酺步通用，可以兩從。鄭君之說與子春小異。』惠士奇云：『《封禪書》有諸布，《索隱》引《爾雅》『祭星曰布』，非也。大祝六號，二曰鬼號。布者，鬼號也。秦漢之布，即《周官》之酺。《淮南子·汜論訓》曰：『羿除天下之害，而死爲宗布。』布猶酺也，步也。族師祭酺，校人祭步，所謂布也。酺、步、布，音相近而通。」

詒讓案：酺之爲祭，古書別無所見。步爲祭名，自《校人》「馬步」外，又見《大戴禮記·誥志篇》，云：「天子崩，步於四川，代於四山。」則祭川亦謂之步矣。又《儀禮經傳通解》引《洪範五行傳》云：「惟元祀，帝令大禹步于上帝，惟時洪祀六沔用咎于下。」此步或即祈禳六沔之祀名，與《誥志》「步四川」義略同。鄭《五行傳注》訓步爲推演天道，似失其義。至此注蠅螟之酺，人鬼之步，蓋漢時世俗祈禳小祀之名，今無可考。惠氏謂即《史記·封禪書》所載雍諸祠祀之諸布，其說近是。《爾雅·釋天》云：「祭星曰布。」郭注云：「布，散祭於地。」《公羊》僖三十一年何注亦云「日月星辰布」。此祭酺雖非祭星辰，而鄭謂亦爲壇位如雩祭，則與布散祭於地，禮正相類，故與祭星同名，猶之黨正祭祭亦與幽祭祭星同名也。《淮南書》之「宗布」，高注云：「羿，古之諸侯，有功於天下，故死託祀於宗布，祭星爲布謂此也。一曰今人室中所祀之宗布是也。或曰司命傍布也。」案：宗布疑亦即此經之祭祭、祭酺。《祭法》「幽祭」「雩祭」，字並作「宗」，即其比例。祭酺並祈禳災害之祭，羿除天下之害神，因託祀於祭酺，其義正相應。惠氏謂布即酺，而不知宗亦即祭也。《淮南注》後二說，或即此注「人鬼之步」，古制茫昧，未能定也。至《校人》「冬祭馬步」，注云「馬步，神

爲災害馬者」，字與此人鬼之步同。彼疏引此注「蠅螟之酺」，作「玄冥之步」，則傳寫譌舛，不足據也。云「蓋亦爲壇位，如雩祭云」者，《釋文》云：「祭，本亦作榮。下黨祭同。」案：祭榮，聲之誤。此謂祭酺之禮，約與黨正雩祭之祭同也。云「族長無飲酒之禮」者，賈疏云：「案上州長春秋習射有飲酒禮，黨正十月農功畢亦有飲酒禮，皆得官物爲之。今此族卑，不得官物爲禮，故云族無飲酒禮也。」云「因祭酺而與其民以長幼相獻酬焉」者，明酺與釂事相因也。賈疏云：「鄭必知因祭酺有民飲酒之禮者，案《禮記·禮器》云：『周旅酬六尸，曾子曰：周禮其猶釂與？』鄭注彼云：『合錢飲酒爲釂，旅酬相酌似之也。』即引《明堂禮》『乃命國釂』。鄭據《禮器》、《明堂禮》皆有釂法，釂即合錢飲酒，以不得官酒，故須合錢耳。」徐養原云：「《漢書·文帝紀》『初即位，酺五日』。注：文穎曰：『漢律，三人以上無故羣飲酒，罰金四兩。今詔橫賜得令會聚飲食五日也。』此酺又與祭酺不同。祭酺雖亦飲酒，然非賜酺也。故《良耜》正義謂因此祭酺聚錢飲酒，故後世聽民聚飲皆謂之酺。是聚飲之酺，乃後起之義。周制酺爲祭名，釂乃爲飲酒，事雖相因，實則異也。」林頤山云：「周制有酺無釂。《禮器》及注引《王居明堂禮》有釂無酺。《說文·酉部》：『酺，王德布大

飲酒也。醕，會飲酒也。」漢制，醕是詔賜曠典。族師春秋祭醕，乃與醕會飲酒相近。《詩·周頌·良耜》：「以開百室」，鄭彼箋云：「百室，一族也。出必共洫閒而耕，人必共族中而居，又有祭醕合醕之歡。」後鄭箋《詩》，舉合醕以足祭醕之義。其故由於州長黨正有飲酒禮，飲酒之錢皆官長所供給；此之族師本無飲酒禮，特因祭醕而合錢飲酒，乃合民間私錢爲之，即《禮器》及《王居明堂禮》所謂醕也。《漢·食貨志》上，李悝以爲一夫治田百畝，社閒嘗新，春秋之祠，用錢三百。又即族師春秋祭醕合民間之錢爲醕，得一佐證。劉向《列女傳·魯母師傳》：「醕醕醉飽」，則祭醕自古然矣。」案：徐、林說是也。黃佐《六藝流別》引《尚書大傳》亦云「仲秋乃命民畋醕」，與鄭引《明堂禮》同。鄭以《逸禮》說醕亦在中秋，與此經春秋祭醕時合，故謂祭醕後有與民飲酒之事，《詩箋》所言甚析。後世沿襲，遂以醕亦專爲會飲，而失其祭神之義，乃與醕無復區別，非其本也。以

邦比之灋，帥四閭之吏，以時屬民而校，登其族之夫家衆寡，辨其貴賤、老幼、癘疾可任者，及其六畜車輦。登，成也，定也。【疏】「以邦比之灋」者，與《鄉師》國比之法義同，即《小司徒》云「頒比

法於六鄉之大夫」是也。此亦小案比，四時行之，與小司徒三年大比事異。云「帥四閭之吏」者，賈疏云：「族師管四閭，閭胥皆中士，又有二十比，比長皆下士，是帥四閭之吏也。」云「以時屬民而校」者，賈疏云：「謂屬聚其民而校比之也。」云「及其六畜車輦」者，《月令》季春云「犧牲駒犢，舉書其數」，即六畜之校比也。六畜之馬牛及車輦，所以備田役之用，不以共師旅，以鄉遂出兵而不出車也。詳《小司徒》、《鄉師》、《鄉大夫》疏。注云「登，成也，定也」者，

《小司徒》正義同。五家爲比，十家爲聯；五人爲伍，十人爲聯；四閭爲族，八閭爲聯；使之相保相受，刑罰慶賞相及相共，以受邦職，以役國事，以相葬埋。相共，猶相救相調。

【疏】「五家爲比，十家爲聯，五人爲伍，十人爲聯」者，即士師所掌鄉合州黨族閭比之聯，與其民人之什伍之法也。賈疏云：「在家爲有五家爲比，比長領之，無十家爲聯相管之法；今云十家爲聯者，以在軍之時有十人爲什，本出於在家，故并二比爲十家爲聯，擬入軍時相并，故覆云五人爲伍，十人爲聯，明是在軍法耳。」案：據《士師》說鄉合之法云：「使之相安相受，以比追胥之事，以施刑罰慶賞。」則此

并比族爲聯者，欲使之相與佐助保任，乃在鄉之常法，賈謂是在軍法，非是。鄉邑當自一閭二十五家始，然邑之小者或二比十家，亦可自爲保聚。《論語·公冶長篇》、《大戴禮記·曾子制言篇》、《穀梁·莊九年傳》並云「十室之邑」，是亦可爲聯，不必軍法也。《周書·大聚篇》云：「發令以國爲邑，以邑爲鄉，以鄉爲閭，禍災相卹，資喪比服。五戶爲伍，以首爲長；十夫爲什，以年爲長；合閭立教，以威爲長；合族同親，以敬爲長。飲食相約，興彈相庸，耦耕俱耘，男女有婚，墳墓相連，民乃有親。」即平時比伍閭族相爲合聯之事。云「四閭爲族，八閭爲聯」者，八閭，二百家也。若然，在軍蓋亦百人爲卒，二卒爲聯，經文不具也。賈疏云：「張逸問：『族百家，安得有八閭？』鄭荅：『并之爲聯耳。』」若然，亦如二比爲聯之類也。」云「使之相保相受」者，《大司徒》云：「令五家爲比，使之相保；五比爲閭，使之相受。」此又以二閭二族相聯保受，其事同也。彼注云：「保猶任也。受者，宅舍有故，相受寄託也。」云「刑罰慶賞相及相共」者，鄭、賈讀「相及」句斷，案當讀相及相共爲句。賈疏云：「案趙商問：『《族師》之義，鄰比相坐；《康誥》之說，門內尚否。《書》、《禮》是錯，未達旨趣。』鄭荅：『《族師》之職，周公新制禮，使民相共勅之法。《康誥》之時，周法未

定，又新誅三監，務在尚寬以安天下。先後異時，各有云爲，乃謂是錯。』莊存與云：「鄭君言，非至理也。夫罪有不相及者，其惡在身，雖父子兄弟不能化之使正也。如石礫之於石厚是也。有相及者，其惡非一人所能獨爲，非鄰里佐助，相與比周，則立敗矣，故令相及以孤惡人之黨類也。如經所謂造言亂民之等是也。」案：莊說是也。又《管子·立政篇》云：「十家爲什，五家爲伍，罰有罪不獨及，賞有功不專與。」又《禁藏篇》云：「輔之以什，司之以伍，伍無非其人，人無非其里，里無非其家，故奔亡者無所匿，遷徙者無所容。」與此義略同。云「以受邦職」者，民各有職，各受而任之，若《大宰》九職、《大司徒》十二職事之屬。云「以役國事」者，《州長》云「若國作民而師田行役之事」是也。《士師》鄉合云「以比追胥之事」，亦其一隅。云「以相葬埋」者，《釋文》云：「埋，本或作𡯂。」阮元云：「經當用𡯂字，此淺人以俗字改之。」案：阮說是也。埋正字當作「𡯂」，經並借𡯂爲之，詳《鼈人》疏。此即《大司徒》云「四閭爲族，使之相葬」也。注云「相共猶相救相調」者，《羊人》注云：「共猶給也。」賈疏云：「案《大司徒職》云：『五族爲黨，使之相救；五黨爲州，使之相調。』此所戒勅，亦與彼同，故引爲證也。」俞樾云：「相共猶相及，蓋既使之互相保受，故有

罪而刑罰，有善而慶賞，亦相及相共也。鄭君誤以相共爲相救相調，賈疏遂斷刑罰慶賞相及爲句，皆非經旨。」案：俞說於義爲長。若作民而師田行役，則合其卒

伍，簡其兵器，以鼓鐸旗物帥而至，掌其治令、戒禁、刑罰。亦於軍因爲卒長。【疏】「若作民而

師田行役，則合其卒伍」者，賈疏云：「族師主百家，家出一人，即爲一卒，卒長還使族師爲之。」云「簡其兵器」者，兵謂五兵，器謂車輦任器之屬。此亦謂田役追胥羨卒竭作，民間自備兵器。若大師發六軍，其兵器皆官授，非鄉里所自共。詳《鄉師》、《司兵》疏。云「以鼓鐸旗物帥而至」者，鼓鐸旗物亦簡閱備具，而後帥其衆而至所期之處也。亦詳《鄉師》疏。賈疏云：「族師以帥士卒具備，帥至於鄉師，以致司徒也。」注云「亦於軍因爲卒長者，冢上黨正在軍爲旅帥也。《夏官·敍官》云：「百人爲卒，卒長皆上士。」卒衆即一族百家所出。族師，《敍官》亦每族上士一人，故知在軍就爲卒長也。賈疏云：「亦釋經掌其治令已下，亦非衆屬軍吏，還是自爲卒長者也。」歲終，則會政致事。【疏】「歲終則會政致事」者，此正族吏之歲會，亦族師之官成也。

閭胥各掌其閭之徵令。鄭司農云：「二十五

家爲閭。【疏】「各掌其閭之徵令」者，與宰夫掌百官府之徵令同，亦通該徵役、徵賦二義，詳彼疏。賈疏云：「即下文歲時以下之事是也。」詒讓案：閭胥在軍亦因爲兩司馬，注不言者，文略。注鄭司農云「二十五家爲閭」者，《大

司徒》注義同。以歲時各數其閭之衆寡，辨其施舍。凡春秋之祭祀、役政、喪紀之數，聚衆庶；既比，則讀灋，書其敬敏任恤者。祭祀，謂州社、黨禴、族酺也。役，田役也。政若州射黨飲酒也。喪紀，大喪之事也。四者及比皆會聚衆民，因以讀法以勅戒之。故書既爲暨，杜子春讀政爲征，暨爲既。【疏】

「以歲時各數其閭之衆寡」者，謂當閭案比之事。賈疏云：「謂歲之四時，閭胥各自數當閭之內戶口多少。」云「辨其施舍」者，即《鄉師》云「辨其可任者與其施舍者」。此不云可任者，文不具，亦辨之可知。云「凡春秋之祭祀、役政、喪紀之數，聚衆庶」者，「役政」《釋文》作「政役」。阮元云：「注先釋役，後釋政，《釋文》蓋誤倒。」王引之云：「祭祀、役政、喪紀，不得言數。蓋因本篇屢言某某之數，若《大司徒》「人

民之數」「地域廣輪之數」之類而誤也。數當爲事，《州長》云「師田行役之事」，《鄴長》云「喪紀祭祀之事」，此亦當云「春秋之祭祀役政喪紀之事」。惟有事，故聚衆庶；若作數，則文義不可通矣。鄭注賈疏皆不解數字，則其爲「事」字可知。事字易明，無須作解也。唐石經始誤作數。「案：王說是也。此春秋惟據祭祀言，凡州社、黨祭、族酺皆以春秋是也。」^①其餘役政、喪紀皆無定時。凡因事聚衆庶，即是屬民，故任在何時皆與之讀法。賈疏云：「謂州長、黨正、族師祭祀及役政與王家喪紀，閭胥皆爲之聚衆庶，以待驅使也。」云「既比則讀灋」者，比亦謂四時小案比，即上數衆寡之事，亦即《族師》云「以邦比之法，帥四閭之吏，以時屬民而校，登其夫家衆寡」之等是也。賈疏云：「上族師已上，官尊，讀法雖稀稠不同，皆有時節；但閭胥官卑，而於民爲近，讀法無有時節，但是聚衆庶比之時，即讀法。」云「書其敬敏任恤者」者，賈疏云：「以上書其德行道藝；今此閭胥親民更近，故除任恤六行之外，兼記敬敏者也。」詒讓案：敬即《大司徒》十二教「以祀禮教敬」，敏即《師氏》三德之「敏德以爲行本」是也，任恤則《大司徒》六行之二。錯舉此四者，以明教民德行條目匪一，皆互相備也。注云「祭祀謂州社、黨祭、族酺也」者，明當閭無祭祀之事，經

言祭祀，謂佐州黨族祭祀之事也。云「役，田役也」者，謂因田而發徒役，與凡役事異，詳《鼓人》疏。賈疏云：「上文師田行役並言，則役是役作。但田是國之常事，田重於功作，此文不云田，故知役是田役也。」云「政若州射黨飲酒也」者，鄭讀政如字。經注皆不言閭有學，則當閭無特爲射飲之法，惟於州長、黨正射飲時，閭胥則與其事也。王引之云：「役政即政役，杜子春讀政爲征是也。後鄭分役政爲二，以爲政若州射黨飲酒，失之。上祭祀，下喪紀，皆二字爲一事，何役政獨爲二事乎？」案：王說是也。役政即《小宰》八成之「聽政役以比居」，政亦當讀爲征，詳彼疏。云「喪紀大喪之事也」者，賈疏云：「此大喪，王之喪也。知者，以其聚衆庶，明非上「州之大喪」，故以王之喪解之。」云「四者及比皆會聚衆民，因以讀法以勅戒之」者，此亦注用今字作「法」也。比亦謂小案比。四者謂一祭祀，二役，三政，四喪紀，與比爲五，皆聚衆庶，則皆讀法以勅戒之。依王說政役爲一，則止有四事。經云「既比則讀法」，既當訓爲已，謂歲時案比事竟，因衆庶未散，遂留與之讀法也。注云四者及比皆會聚衆民者，以經先言祭祀、政役、喪紀聚衆

① 「黨祭族酺」原作「黨酺族祭」，據鄭注改。

庶，而後云既比，嫌比不聚衆庶，故云「及」以類舉之，非以「及比」詁「既比」也。勅即敕之借字，詳《大宰》疏。云「故書既爲暨」者，《說文·丞部》云：「臬，衆詞與也。」暨即臬之俗，與「既」聲類同。云「杜子春讀政爲征，暨爲既」者，皆依聲類破字。鄭讀政如字，不從杜，而「暨」從今書作「既」，與杜讀同。政讀爲征，《均人》注義同，互詳《小宰》疏。凡事，掌其比鱣撻罰之事。鱣撻者，失禮之罰也。鱣用酒，其爵以兕角爲之。撻，扑也。故書或言「鱣撻之罰事」。杜子春云：「當言鱣撻罰之事。」【疏】「凡事掌其比鱣撻罰之事」者，《小胥》注云：「比猶校也。」此比爲一事，鱣撻罰爲一事。賈疏云：「言凡，非一，則是鄉飲酒及鄉射飲酒有失禮者，須罰之。掌其比者，人聚則有校比之法，皆掌之。凡有失禮者，輕者以鱣酒罰之，重者以楚撻之，故雙言鱣撻罰之事。」注云「鱣撻者，失禮之罰也」者，《小胥》云：「掌學士之徵令而比之，鱣其不敬者，巡舞列而撻其怠慢者。」此間胥掌比鱣撻罰，與彼事相類，失禮即不敬怠慢之事也。《鄉射記》云：「射者有故則撻之。」亦失禮之罰。云「鱣用酒，其爵以兕角爲之」者，《小胥》注云：「鱣，罰爵也。」《說文·角部》云：「鱣，兕牛角可以飲者也。其狀鱣鱣，故謂之鱣，

重文觥。」俗鱣从光，《詩·周南·卷耳篇》「我姑酌彼兕觥」，毛傳云：「兕觥，角爵也。」《左·昭元年傳》云：「穆叔，子皮及曹大夫興拜，舉兕爵。」杜注云：「兕爵所以罰不敬。」《詩·卷耳》孔疏云：「《異義》：『《韓詩說》：一升曰爵，爵，盡也，足也。二升曰觚，觚，寡也，飲當寡少。三升曰觶，觶，適也，飲當自適也。四升曰角，角，觸也，不能自適，觸罪過也。五升曰散，散，訕也，飲不自節，爲人謗訕。總名曰爵。其實曰觴，觴者餉也。觥亦五升，所以罰不敬，觥，廓也，所以著明之貌。君子有過，廓然著明，非所以餉，不得名觴。』《詩》毛說觥大七升。許慎謹案：觥罰有過，一飲而盡，七升爲過多。」由此言之，則觥是觚、觶、角、散之外，別有此器。故《禮器》曰：「宗廟之祭，貴者獻以爵，賤者獻以散，尊者舉觶，卑者舉角。」《特牲》二爵、二觚、四觶、一角、一散，不言觥之所用，是正禮無觥，不在五爵之例。《禮圖》云：「觥大七升，以兕角爲之。」先師說云：「刻木爲之，形似兕角。」蓋無兕者用木也。案：孔引《舊禮圖》說與《毛詩》義同，是也。先師說於古無徵，疑不足據。鱣以兕角爲之，故亦通稱角。《少儀》云「不角」，注云：「角謂觥，罰爵也。」此與四升之爵異。又案：《爾雅·釋獸》云：「兕似牛。」郭注云：「一角

青色，重千斤。」《左傳》宣二年孔疏引劉欣期《交州記》云：「兕出九德，有一角，角長三尺餘，形如馬鞭柄。」依郭、劉說，則兕角甚長，故可制爵矣。云「撻，扑也」者，《司市》注云：「扑，撻也。」二字互訓。《小胥》注云：「撻猶扶也。扶以荆扑。」《說文·手部》云：「撻，《鄉飲酒》『罰不敬，撻其背』。重文虛，古文撻。《虞書》曰：『虛以記之。』《鄉射禮》云：『司射取扑撻之。』」注云：「扑，所以撻犯教者。《書》云：『扑作教刑。』互詳《司市》、《小胥》疏。云「故書或言鱣撻之罰事，杜子春云當言鱣撻罰之事」者，段玉裁云：「所以必從杜者，嫌鱣撻之外別有罰事也。」詒讓案：鱣撻並為罰事，故以鱣撻罰連文，《司市》市刑有扑罰，即此撻罰也。

比長各掌其比之治。五家相受相和

親，有臯奇衰則相及。衰猶惡也。【疏】「五家相

受相和親」者，賈疏云：「宅舍有故崩壞，相寄託；五家之內有不和親，則使之自相和親。」云「有臯奇衰則相及」者，《釋文》云：「臯，本亦作罪。」案：臯罪古今字，經例用古字作臯，或本非。詳《甸師》疏。此即《族師》云「刑罰

慶賞相及也」。有罪則刑，奇衰則罰，不及慶賞之事者，文不具。賈疏云：「五家有罪惡則連及，欲使不犯。」莊存與云：「奇衰謂造言亂民之類也。匿不以告，故相及耳。」詒讓案：比長在軍，亦因為伍長。注不言者，文略。

注云「衰猶惡也」者，衰，注例用今字當作「邪」，各本並誤。《宮正》注云：「奇邪，譎觚非常。」《司救》云：「掌萬民之衰惡過失而誅讓之。」注云：「衰惡謂侮慢長老、語言無忌而未麗於罪者。」衰惡與奇衰義同，互詳《宮正》疏。徙于國中及郊，則從而授之。徙謂不便其居

也。或國中之民出徙郊，或郊民入徙國中，皆從而付所處之吏，明無罪惡。【疏】「徙于國中及郊則從而授之」者，此治五家內遷徙之事，所以檢察逃亡也。注云

「徙謂不便其居也」者，《說文·辵部》云：「徙，移也。遷徙也。」徙即徙之隸變。《廣雅·釋言》云：「徙，移也。」

不便其居，謂民不便安其故居，則隨時有遷徙也。《詩·魏風·碩鼠》云：「三歲貫女，莫我肯顧。逝將去女，適彼樂土。」鄭箋云：「古者三年大比，民或於是徙。」案：《詩箋》蓋以三年大比釋《詩》「三歲貫女」之文，不謂非大比

①「禮」原訛「記」，下文見《鄉射禮》。

之期民即不得出徙也。賈疏輒據彼箋，謂古者必三歲大比之年乃有遷徙，固矣。云「或國中之民出徙郊，或郊民入徙國中」者，賈疏云：「周法，遠郊百里內并國中，共爲六鄉，此國中及郊所徙者，並不離當鄉之內。」案鄭、賈意，鄉地亘國中及四郊，此徙於國中及郊，並謂同在一鄉屬地之中，對下文「徙於他」爲異鄉爲文，然其說非也。六鄉七萬五千家，計家定里，蓋內不及國中，外不盡四郊。《書·費誓》說魯三鄉爲三郊，明國中非鄉民所居。《遣人》鄉里郊里兩舉，明鄉里之外別有郊里。此云徙于國中及郊者，謂出鄉里而徙於國中及郊里也。《詩·碩鼠》又云「適彼樂郊」，毛傳云：「郭外曰郊。」彼詩即謂徙於郊。以毛義推之，郭內即國中，郭外即郊。蓋國中及郊里雖已出鄉，而地尚與鄉相近，故惟比長授之，不必以旌節行之。國中、郊有授，則其自此鄉徙彼鄉，或不出當鄉者，亦有授可知矣。鄭、賈說並非經義。又《泉府》、《朝士》賈疏謂國中即六鄉，郊即六遂，亦非是。凡六鄉不及國中與郊里，互詳《縣師》、《鄉士》、《遂士》疏。云「皆從而付所處之吏，明無罪惡」者，《鄰長》注云：「授猶付也。」所處之吏，謂所徙處當地之官吏。比長以徙者付之。若然，五家之內，既有出徙，則不成伍，當於比外更

徙入一家以補之，亦自有彼處之吏來授，此比長則受之矣。賈疏云：「若有罪惡，則下文「無授無節，圜土內之」。其人私逃，有何付授之也。今伍長自往付授，明無罪惡，直是不便其居耳。」若徙于他，則爲之旌節而行之。徙於他，謂出居異鄉也。授之者有節乃達。【疏】

「若徙于他，則爲之旌節而行之」者，與掌節爲官聯也。

注云「徙於他，謂出居異鄉也」者，賈疏云：「對上經直言國中及郊爲鄉內，此言徙於他，明是出居異鄉也。」

案：鄭、賈說亦非也。此徙於他者，謂由鄉遷於六遂及都鄙公邑者也。以其距鄉道里較遠，不可徒授，故必待旌節乃行。若如鄭說，出居異鄉，則仍不出六鄉界內，上文徙國中及郊已足咳之矣。云「授之者有節乃達」者，賈疏云：「鄭欲見上經鄉內徙者有授無節，此徙外鄉，非直有授，兼亦有節乃可行，故鄭言此有節亦授之者也。此節即道路用旌節，一也。」若無授無節，則唯圜土內之。鄉中無授，出鄉無節，過所則呵問，繫之圜土，考辟之也。圜土者，獄城也。獄必圜者，規主仁，以仁心求其情，古之治獄，閔於出之。【疏】注云「鄉中無授，出鄉無節」者，賈疏云：「上釋出鄉有授兼節，此注釋鄉中無授、

出鄉無節者，以其出鄉雖兼有授，直舉有節以對鄉內有授也。」云「過所則呵問，繫之圜土，考辟之也」者，葉鈔本《釋文》「呵」作「荷」。案：葉本《釋文》是也。《宮正》注「幾荷」字亦作「荷」，荷即訶之段字，呵俗體也。詳《宮正》疏。繫之圜土，謂歸之司圜，使繫治之。賈疏云：「謂所過之官司，見即呵問之。必知有呵問之者，若不呵問窮詰，則虛實難明，故知呵問也。繫之圜土，謂繫在獄中。辟，法也。考量以法，推問無授無節之由也。」云「圜土者，獄城也」者，《大司徒》注同。云「獄必圜者，規主仁，以仁心求其情，古之治獄，閱於出之」者，釋獄城圜之義。《詩·小雅·沔水》敍箋云：「規者，正圓之器也。規主仁恩也。」孔疏引《援神契》云「春執規」。《淮南子·天文訓》云：「東方木，其帝大暉，其佐句芒，執規而治春。」《中庸》注云：「木神則仁。」是規與仁，於五方同屬木，故規主仁也。《漢書·刑法志》云：「孔子曰：今之聽獄者，求所以殺之；古之聽獄者，求所以生之。」閱於出之亦謂求所以生而有之也。

封人掌設王之社壇，爲畿封而樹之。

壇謂壇及堦埒也。畿上有封，若今時界矣。不言稷者，

稷，社之細也。【疏】「掌設王之社壇」者，賈疏云：「謂王之三社三稷之壇及壇外四邊之壇，皆設置之。直言壇不云壇，舉外以見內，內有壇可知也。」案：賈說三社三稷者，謂大社、大稷，王社、王稷，及戒社亦有稷也。《晉書·禮志》引摯虞奏，謂封人所設者專指王社，非也。云「爲畿封而樹之」者，此與掌固爲官聯也。《大司馬》云：「方千里曰國畿。」賈疏云：「謂王之國外四面五百里，各置畿限，畿上皆爲溝塹，其土在外而爲封，又樹木而爲阻固。」案：賈說樹專屬畿封，據《掌固》文也。今攷凡社稷亦皆有樹，經「樹之」當冢社壇畿封二者而言。《魏書·劉芳傳》引此經以明社稷之有樹，可證。互詳《大司徒》疏。注云「壇謂壇及堦埒也」者，《大司徒》注義同。凡委土爲壇及卑垣之堦埒，通謂之壇。《周書·作雒篇》云「封人社壇」，下即言大社壇備五色土之制，蓋謂壇也。《史記·夏本紀》集解引鄭《書注》云：「土五色者，所以爲大社之封。」是鄭亦謂大社備五色土。若然，王社土依方色，則西都以白土，東都以黃土與？互詳《大司徒》疏。云「畿上有封，若今時界矣」者，《大司徒》注云：「千里曰畿。封，起土界也。」崔氏《古今注》云：「封疆畫界者，封土爲臺，以表識疆境也。畫界者，於二封之間，又爲壇

埒，以畫分界域也。」依鄭、賈義，此畿封據距王國五百里大界言之，實則近郊遠郊及甸稍縣都亦皆有封。《大戴禮記·王言篇》云：「五十里而封。」蓋王國近郊之封也。經唯云畿封者，文不具爾。云「不言稷者，稷，社之細也」者，《魏書·劉芳傳》引此注「不言稷者」下有「王主於社」四字，疑劉氏所增。賈疏云：「案《大司徒》及下文皆社稷俱言，此獨言社不言稷，故解之。按《孝經緯》，社是五土摠神，稷是原隰之神。原隰即是五土之一耳，故云「稷，社之細」。舉社則稷從之矣，故言社不言稷也。」案：稷爲穀神，鄭、賈以爲原隰之神，非也。但穀生於土，穀神自卑於土神，鄭此注義自不誤。《宋書·禮志》引晉傅咸表云：「《周禮·封人》『掌設社壇』，無稷字。今帝社無稷，蓋出於此。然國主社稷，《周禮》『王祭社稷則絺冕』，此王社有稷之文也。封人設壇之無稷字，說者以爲略文，從可知也。」義與鄭此注同。

凡封國，設其社稷之壇，封其四疆。封國，建諸侯，立其國之封。【疏】

「凡封國，設其社稷之壇」者，建侯國亦立三社三稷也。賈疏云：「案《禹貢》，徐州貢五色土。孔注云：『王者封五色土爲社，建諸侯則各割其方色土與之，使立社，燾以黃土，苴以白茅，茅取其潔，黃取王者覆四方。』是封諸侯

立社之法也。」案：賈引《書》孔傳說，亦本《周書·作雒篇》。彼說大社備五方之土，云：「將建諸侯，鑿取其方一面之土，燾以黃土，苴以白茅，以爲社之封，故曰受列土于周室。」《白虎通義·社稷篇》、《史記·三王世家》引《春秋大傳》，說並略同。《白虎通》又引《春秋文義》云：「天子之社稷廣五丈，諸侯半之。」此並邦國社稷之制。云「封其四疆」者，《夏官·敘官》注云：「疆，界也。」此以侯國之界爲疆，別於王國之界爲畿。通言之，王畿亦曰疆，《載師》云「以大都之田任置地」是也。賈疏云：「諸侯百里以上至五百里，四邊皆有封疆而樹之。」注云

「封國建諸侯」者，以下別出都邑，明封國指畿外侯國，不關內諸侯也。云「立其國之封」者，亦據侯國大界而言。實則侯國皆有郊縣等，亦各有小封也。造都邑之封域者亦如之。【疏】「造都邑之封域者亦如之」者，此

建內諸侯采邑之法，與縣師、量人爲官聯也。《膳夫》注云：「造，作也。」謂作立都邑。賈疏云：「造都邑者，謂大都、小都、家邑之等采地，有百里、五十里、二十五里，皆有四邊封域，亦如上諸侯有四疆也。」詒讓案：都邑亦有社稷，經不言設其壇者，文略。又《左·宣十一年傳》：「楚令尹蔣艾獵城沂，使封人慮事以授司徒。」杜注云：「封

人，司徒之屬官。《大司馬》：「大役與慮事，屬其植。」注亦以封人為釋。若然，此官掌造都邑，并掌治其築作城郭之役，不徒正其封域矣。令社稷之職。將祭之時，令諸有職事於社稷者也。《郊特牲》曰：「唯爲社事單出里，唯爲社田國人畢作，唯爲社丘乘共粢盛，所以報本反始也。」【疏】注云「將祭之時，令諸有職事於社稷者也」者，賈疏云：「春秋祭社，日皆用甲。未祭之前，令諸有職事於社稷者也。令之者，使各依職司而行。」引《郊特牲》曰「唯爲社事單出里」者，鄭彼注云：「單出里，皆往祭社於都鄙。二十五家爲里。」孔疏亦謂據采地言之。案依鄭、孔說，則此爲祭都鄙之社，與下丘乘之制相應。賈疏以此爲據六鄉州長之社與下爲三處之社，非也。但都鄙制丘乘，則不得有二十五家之里，鄭彼注說亦微誤。云「唯爲社田，國人畢作」者，鄭彼注云：「畢作，人則盡行，非徒羨也。」賈疏云：「鄭云非徒羨，謂在六遂之中，以下劑致甿，當家之內，一人爲正卒，一人爲羨卒，其餘爲餘夫。但田與追胥竭作，餘夫亦行，故云非徒羨也。」案：依鄭說，此亦都鄙之社。賈謂據六遂，亦誤。云「唯爲社，丘乘共粢盛」者，鄭彼注云：「丘，十六井也。四丘六十四井，曰甸，或謂之乘。乘者，以於車賦出長轂一乘。」賈疏

云：「此據三等采地之中，故有丘甸井田之法。案《小司徒職》云：『九夫爲井，四井爲邑，四邑爲丘，四丘爲甸。』甸方八里，旁加一里則爲一成。成百井，九百夫。一井之地九夫，八家各治一夫，自入其治，一夫稅入於君，以共粢盛而祭社，故云丘乘共粢盛也。」案：賈謂一井九夫，八家治之，據侯國都鄙制也。若畿內都鄙，無公田，則一井當九家治之，其丘甸共粢盛則一也。云「所以報本反始也」者，賈疏云：「社稷爲上神，是民之本；句龍、后稷，是民之始。反亦報也。命民共之者，所以報本反始也。引之者，證祭社各有職事。」案：《郊特牲》疏載皇、熊二義不同，賈依熊說。皇氏則云「國人畢作是報本，而丘乘共粢盛是反始。言粢盛是社所生，故云反始也」。今案：本始文義略同，皇、熊曲爲分別，義似並未塙。凡祭祀，飾其牛牲，設其楅衡，置其絃，共其水稟，飾謂刷治絜清之也。鄭司農云：「楅衡，所以楅持牛也。絃，著牛鼻繩，所以牽牛者，今時謂之雉，與古者名同。皆謂夕牲時也。」杜子春云：「楅衡所以持牛，令不得抵觸人。」玄謂楅設於角，衡設於鼻，如楸狀也。水稟，給殺時洗薦牲也。絃字當以豸爲聲。【疏】「凡祭祀飾其牛牲」

者，天地大祭用犢，它大祀、中祀用大牢，皆有牛牲也。

賈疏云：「謂王之天地宗廟先大次小之祭祀非一，故云

「凡」以廣之。」云「置其絳」者，《釋文》云：「絳，本又作

紉。」案：紉，正字，絳，別體，詳後。云「共其水稟」者，稟，

唐石經誤稟，葉鈔本《釋文》同。今依宋岳本、婺州本、嘉

靖本正。

注云「飾謂刷治潔清之也」者，《說文·巾

部》云：「飾，馭也，讀若式。」《又部》云：「馭，飾也。」轉相

訓。刷，即馭之借字。《釋名·釋言語》云：「飾，拭也，物

穢者拭其上使明，由他物而後明，猶加文於質上也。」《爾

雅·釋詁》云：「拭，刷，清也。」郭注云：「拭，拭掃刷，皆所

以爲潔清。」拭，飾聲義亦同。《大史》「飾中」、《小子》「飾

牲」、《羊人》「飾羔」、《校人》「飾幣馬」「飾黃駒」，凡云飾

者，義並如是。陳祥道、曾釗並謂飾爲文飾，引《莊子·

列禦寇篇》「犧牛衣以文繡」爲證。案：祭牲必先刷治潔

清而後被以文繡，陳、曾說亦經義所該，然非其本義也。

鄭司農云「楅衡，所以楅持牛也」者，賈疏云：「司農意以

衡爲持，故云「所以楅持牛」，以楅衡共一物解之，與子春

同。後鄭不從之矣。」論讓案：《說文·角部》云：「衡，牛

觸，橫大木其角。」《木部》云：「楅，以木有所逼束也。」又

所以告人也。《易》曰：「僮牛之告。」據許說，則「楅衡」與

「楅告」異名同物，並爲角械，與先鄭說同。《廣雅·釋詁》

亦云：「楅、楅衡、楅也。」正本許說。又《毛詩·魯頌·

閟宮》「秋而載嘗，夏而楅衡」。傳云：「楅衡，設牛角以楅

之也。」鄭彼箋云：「楅衡其牛角，爲其觸觚人也。」陳祥道

云：「楅衡以木爲之，橫設於角則楅幅其角，猶射以楅幅

其矢也。」曾釗云：「楅，逼也。衡，橫也。橫逼於角，以防

牛觸。衡，《說文》在角部，則非設於鼻之物。《魯頌》「夏

而楅衡」，毛義即先鄭所本。康成《詩箋》亦同毛。此獨

爲異解，失之。」案：陳、曾說是也。《文選·東京賦》薛注

云：「橫木於牲角端，以備抵觸，謂之楅衡。」李氏《周易集

解》引虞翻云：「楅謂以木楅其角，繩縛小木，橫著牛角，

故曰童牛之楅。」又引侯果云：「楅，楅也，以木爲之，橫施

於角上，止其觚之威也。」並同毛、許、先鄭義。云「絳著

牛鼻繩，所以牽牛者」者，原本顧氏《玉篇·糸部》云：

「絳，字書亦紉字也。」《說文·糸部》云：「紉，牛系也。

讀若狄。《祭統》云：「及迎牲，君執紉。」注云：「紉所以

牽牲也。《周禮》作絳。」孔疏云：「紉，牛鼻繩，君自執

之，人繫於碑。」又《少儀》云：「犬則執縹，牛則執紉，馬

則執鞅。」注云：「縹、紉、鞅，皆所以繫制之者。」《廣雅·

釋詁云：「紉，繫也。」又《釋器》云：「紉，索也。」云「今時謂之雉，與古者名同」者，謂漢時名牛鼻繩爲雉，與絳音同。段玉裁云：「絳字从糸彡聲，音直氏反，漢時謂之雉。古音彡在支佳部，雉在脂微部，部分最近，又雙聲，故司農曰名同也。晉太子申生雉經而死，蓋謂以繩自縊也。」曾釗云：「絳，《說文》無之，蓋即紉字。又謂之雉，雉从矢聲。《爾雅》：「矢，雉，引，陳也。」矢引聲同，故引可作絳，亦可謂雉，蓋皆一物也。」案：曾說是也。《匠人》：「量宮城之度以雉」。亦絳之段借也。云「皆謂夕牲時也」者，謂飾馭及設楅衡、置絳三事，皆在夕牲時。夕牲即充人之展牲也。賈疏云：「但夕牲在祭前之夕，正祭在厥明，一時皆有此事，明據在前夕牲時而言也。」案：賈謂正祭時亦有此事，是也。但據《魯頌·閟宮》文，則牲始繫時即設楅衡，是亦應有置絳。而先鄭謂此經專屬夕牲時者，以牲始繫，宜充人設置之；此祭前一日夕牲，則封人更特設置之，以臨祭彌敬謹也。杜子春云「楅衡所以持牛，令不得抵觸人」者，賈疏云：「子春意楅衡唯設於角，與司農義同，後鄭亦不從也。」云「玄謂楅衡設於角」者，即先鄭、子春所云「楅持牛之木也」。云「衡設於鼻」者，賈疏云：「衡者，橫也。謂橫木於鼻，今之馳猶然，故知設於

鼻，破先鄭、子春之義。」詒讓案：後鄭以衡別爲一物，與楅衡所設異處。然此義經典未見。《說文·木部》云：「棊，牛鼻中環也。」此別爲穿牛鼻之環，與鄭說衡爲橫木不同。云「如楸狀也」者，賈疏云：「漢時有置於犬之上，謂之楸，故舉之以爲況。」惠士奇云：「楸一作柳，馬融《廣成頌》曰「柳天狗」。《三秦記》曰：「麗山西有白鹿原，原上有狗柳堡。」案：惠說是也。《管子·戒篇》云：「管仲曰：東郭有狗噬噬，旦暮欲齧我，楸而不使也。」尹注「楸」作「柳」，云「謂以木連狗」。柳即楸也。《說文·辵部》云：「遡，遡互令不得行也。」楸柳並遡之借字。云「水稟，給殺時洗薦牲也」者，明唯此非夕牲時所共也。《說文·禾部》云：「稟，稗也。稗，禾莖也。」謂祭日二裸之後，王親射牲殺之，此官則共水以洗牲體，又以稟薦之。《祭統》說祭祀君迎牲事，云「士執芻」，注云：「芻謂稟也，殺牲時用薦之。」亦引此文爲證。賈疏云：「其牛將殺，不須飼之。又充人已飼三月，不得將殺始以水稟飲飼。水所以洗牲，稟所以薦牲，故雙言洗薦牲也。」云「絳字當以彡爲聲」者，正其字之形聲也。段玉裁云：「《釋文》：「絳，本又作紉。」案：《少儀》「牛則執紉」，《祭統》「君執紉」。鄭君此注曰字當以彡爲聲，正謂不當從《禮記》以引爲聲也。鄭意蓋駁《說文》、《說文·糸部》

有紉無紉。」歌舞牲及毛炮之豚。謂君牽牲入時，隨歌舞之，言其肥香以歆神也。毛炮豚者，爛去其毛而炮之，以備八珍。鄭司農云：「封人主歌舞其牲，云博碩肥腍。」

【疏】注云「謂君牽牲入時」者，人謂二裸之後，王迎牲入廟門時也。賈疏云：「案《禮記·祭義》云：『君牽牲，穆荅君，卿大夫序從。』是君牽牲入時也。」云「隨歌舞之，言其肥香以歆神也」者，《說文·欠部》云：「歆，神食氣也。」明封人隨牲後歌舞，為求神之歆享。舞蓋亦以手袖為威儀，若《樂師》之人舞也。云「毛炮豚者，爛去其毛而炮之」者，謂封人助爛毛之事也。賈疏云：「經直云毛炮，恐人以并毛炮之。案《禮記·內則》有炮豚、炮牂，皆編萑以苴之，塗之以墁塗，孰乃擘去之。彼雖炮，亦不言去毛炮之。鄭知去毛者，牂豚之毛於牲無用，空以汙損牲體，故知凡炮者皆去毛也。」詒讓案：《內則》注云：「炮者，以塗燒之為名也。」又《禮運》注云：「炮，裹燒之也。」《祭義》注云：「湯肉曰爛。」鄭意蓋謂炮與燔炙同為燒肉，惟炮以有包裹為異。依《禮運》正義，凡牲皆先豚解而腥之，後體解而爛之。則亨豚常法，腥時解為七體，已鬻去其毛；此毛炮之豚，則不解鬻而爛之湯，既爛，乃去其毛，而包裹全體燒孰之。此經炮豚與《內則》炮豚牂同物，而經兼言毛炮，明是以湯火去毛

而後裹燒之，與《內則》義互相備也。《說文·火部》云：

「炮，毛炙肉也。」《毛詩·小雅·瓠葉》「炮之燔之」，傳云：

「毛曰炮。」又《魯頌·閟宮》「毛魚載羹」，傳云：「毛魚豚也。」《廣韻·五肴》云：「魚炮字同。」尋毛、許之義，當亦以

毛為去毛，《詩》之「毛魚」即此經之毛炮也。蓋凡燔炙之

屬，皆制割肝肉而後火熟之；炮則不制割而以全體包裹燒之，其牂豚之屬有毛者，則先去其毛而燒之，謂之毛炮，故

《詩》、《禮》並特著「毛」文，以示別異。毛、許亦皆隱據「毛

炮」為訓，實則炮从包，以聲兼義，當以鄭訓裹燒為正。凡

單言炮者，不必皆有毛，故《詩·小雅·六月》、《大雅·韓

奕》並云「魚鼈」，《韓奕》箋云：「以火熟也。」孔疏及陸《釋

文》並讀為魚。《大射儀》注引作「炮鼈」，《釋文》載或本作

炆、魚。《詩疏》又引《字書》云：「魚，毛燒肉也。魚，烝

也。」《通俗文》云：「燥煑曰魚。」明其義別。陸、孔意蓋泥

於毛、許毛炮之訓，謂魚炮同字，魚炆同字，嫌鼈無毛不可

言魚，故改讀從魚，不知豚有毛須去則云毛炮，鼈無毛可

去，亦不妨云魚，其字實同。或作魚者，乃通借字。故《漢

書·楊惲傳》云：「烹羊魚羔。」顏注云：「毛炙肉也。即今

所謂燂也。」《齊民要術》作鱠魚脯術云：「草裹泥封，燂灰

中燂之。」《漢書》之魚羔猶此毛炮豚，《要術》之燂魚猶《詩》

之炮鼈，可互證也。《禮運》「燔黍稷豚」，《鹽鐵論·散不足篇》作「燔豚」。《廣雅·釋器》云：「燔謂之魚。」魚亦與炮通。疑西漢禮家說有謂燔豚即炮豚者。若然，祭祀有毛炮之豚，或沿用上古法與？云「以備八珍」者，據《內則》文。鄭司農云「封人主歌舞其牲，云博碩肥腍」者，博碩肥腍，《左》桓六年傳，隨季良語，詳《充人》疏。彼告神即充人碩牲之辭，此封人歌舞牲辭，約與彼同，故先鄭依以爲說。知唯歌舞牲不歌舞豚者，以八珍非正饌，事輕，且豚君不親牽，不當有歌舞之事也。凡喪紀、賓客、軍旅、大

盟，則飾其牛牲。大盟，會同之盟。【疏】「凡喪紀、

賓客、軍旅、大盟，則飾其牛牲」者，賈疏云：「言凡，凡此下四事。王之喪紀有牲者，除朝夕奠用脯醢以外，大小斂、朔月、月半、薦新奠、祖奠、大遣等皆有牲牢。賓客有殺牲者，唯據致飧及饗餼饗食皆有殺牲之事。軍旅殺牲者，謂饗獻軍吏。大盟謂天子親往臨盟。此一經皆用牛牲，故摠云飾其牛牲也。」詒讓案：軍旅又有師祭，亦當用牛牲也。

注云「大盟，會同之盟」者，《玉府》云：「若合諸侯則共珠槃玉敦。」《司盟》云：「凡邦國有疑會同，則掌其盟約之載。」是合諸侯時見曰會，殷見曰同，並有盟法。以王親蒞諸侯盟，故謂之大盟。其十二年巡守殷國，亦有盟法。會同大

盟，當關彼諸事，注義亦通駭之矣。詳《玉府》疏。《國語·齊語》云：「與諸侯飾牲爲載，以約誓於上下庶神。」《左》襄十年傳：「瑕禽曰：昔平王東遷，吾七姓從王，牲用備具，王賴之，而賜之駢旄之盟。」杜注云：「駢旄，赤牛也。舉駢旄者，言得重盟，不以犬雞。」是王重盟必用牛牲也。其小盟，則有用羊馬豕犬雞者。詳《秋官·敘官》及《司盟》疏。

周禮正義卷二十三

鼓人掌教六鼓四金之音聲，以節聲樂，以和軍旅，以正田役。音聲，五聲合和者。

【疏】「掌教六鼓四金之音聲」者，賈疏云：「言掌教者，必教他官。案《眡瞭職》發首云『掌凡樂事，播鼗，擊頌，磬，笙，磬』，下又云『掌大師之縣，鼗，愷，獻亦如之』。雖不云擊鼓，上下文參之，其五鼓是眡瞭擊之，則此所教者，當教眡瞭也。其晉鼓當教鈔師，故其職云『掌金奏之鼓』。此下文云『以晉鼓鼓金奏』，故彼鄭注云『主擊晉鼓』是也。」

詒讓案：此所教雖教眡瞭、鈔師，然鼓人亦自教其徒屬。鄭《大射儀》注說獻樂人有鼓人，則此官非徒教而不奏可知矣。其《大司馬》大閱之鼓，亦鼓人鼓之，鄭彼注以鼓人爲中軍之將，非也。況眡瞭、鈔師皆樂官，專掌奏樂，其非樂事之鼓及金，則亦鼓人自掌之矣。賈說未備。云「以節聲樂」者，謂祭饗作盛樂，以鼓及金爲節也。云「以和軍旅」者，賈疏云：「下云以鼗鼓鼓軍事是也。」云「以正

田役」者，田役謂起徒役以田獵，亦略諸功作力役之事，詳《大宰》及後疏。賈疏云：「下云以鼗鼓鼓役事是也。田獵所以習戰，則田鼓當與軍事同。案《大司馬》云『王執路鼓，諸侯執黃鼓，軍將執晉鼓』之等是也。」注云

「音聲，五聲合和者」者，《大司馬》云「文之以五聲，播之以五音」是也。賈疏云：「案《禮記·學記》云：『鼓無當於五聲，五聲不得和。』則五聲須鼓乃和，故鄭云五聲合和者。鄭不解音者，單出曰聲，和比曰音，音聲相將之物，故釋五聲則含得音，故不重云音也。」教爲鼓而辨其聲用，教爲鼓，教擊鼓者大小之數，又別其聲所用之事。【疏】注云「教爲鼓，教擊鼓者大小之數」者，明「爲鼓」謂擊鼓，與《韞人》「爲鼓」異。凡六鼓各以制大小別其差次也。云「又別其聲所用之事」者，《天官·敘官》注云：「辨，別也。」賈疏云：「則下文雷鼓及四金聲之所用各不同是也。」以雷鼓鼓神祀，雷鼓，八面鼓也。神祀，祀天神也。【疏】「以雷鼓鼓神祀」者，雷鼓爲鼓名，下鼓爲擊鼓。《小師》注云：「出音曰鼓。」通言不別也。《大司馬》作「鼗鼓」。《說文·鼓部》引《周禮》同。雷即雷之隸省。此疑當經作雷，注省作雷，與《大司馬》經注

字例同。今本蓋後人依注改經，非其舊也。《大司樂》又有雷鼗、靈鼗、路鼗，蓋小師教瞽矇眡瞭播之，非此官所教，故經不具。《明堂位》云：「夏后氏之鼓足，殷楹鼓，周縣鼓。」《春秋繁露·三代改制質文篇》亦云「主地法文而王樂縣鼓」。則此六鼓當皆爲縣鼓。《大僕》云「建路鼓于大寢之門外」，建鼓即殷之楹鼓不縣者。彼鼓以達窮遽，非樂縣所用也。《大射儀》樂縣亦用建鼓者，賈彼疏以爲用殷法。《禮器》說諸侯祭樂，云「縣鼓在西，應鼓在東」，蓋指軒縣北方一列，應鼗在鼓東也。孔疏引熊安生云：「大射謂射禮也，此謂祭禮也。」案：依熊說，則周制惟祭樂當用縣鼓，其他或皆建而不縣，如大射法。《詩·周頌·有瞽》云「始作樂而合乎祖也」，而云「應田縣鼓」，是亦祭樂用縣鼓之見於經者。互詳《大僕》疏。

注云「雷鼓，八面鼓也」者，《說文·鼓部》云：「《周禮》六鼓，鼗鼓八面。」《風俗通義·聲音篇》、《文選·東京賦》薛綜注、《魏書·禮志》崔逸說並同。《大司樂》先鄭注云：「雷鼓、雷鼗，皆謂六面有革可擊者也。」是先鄭謂雷鼓六面，與後鄭異。賈疏云：「雖無正文，案《韞人》爲皋陶，有晉鼓、鼗鼓、皋鼓，三者非祭祀之鼓，皆兩面；則路鼓祭宗廟，宜四面；靈鼓祭地祇，尊於宗廟，宜六面；

雷鼓祀天神，又尊於地祇，宜八面，故知義然也。」案：雷鼓、靈鼓、路鼓，二鄭並以爲一鼓而有數面。《大僕》賈疏謂軍事王執路鼓，王與大僕、戎右各擊一面，是多面皆可擊矣。然其造作之度，與攷擊之法無見文。聶崇義《三禮圖》則以雷鼓爲八小面，偁而共抵；靈鼓六面，路鼓四面亦然。其制甚不經。《文獻通考》載宋祁議，謂此三鼓雖擊之皆不成聲，則前制必不如是。胡彥昇謂三鼓並止二面，制與《韞人》晉鼓同。未知是否。云「神祀，祀天神也」者，若《大宗伯》禋祀、實柴、粢稷三祀，皆祀天神也。《大司樂》圜丘天神亦用鼗鼓，賈疏云：「天神稱祀，地祇稱祭，宗廟稱享。案下靈鼓鼓社祭，又案《大司樂》以靈鼓祭澤中之方丘，大地祇與社同鼓，則但是地祇，無問大小皆靈鼓，則此雷鼓鼓神祀，但是天神皆用雷鼓也。」詒讓案：祀天神謂圜丘南郊以下。《御覽·文學部》引孔融《與諸卿書》，稱鄭康成以爲郊天之鼓，必當麒麟之皮。疑漢季有此妄說，抑或文舉未窺鄭學，段設此以獻嘲。要鄭諸經注，實無是義，不可誣也。以靈鼓鼓社祭，靈鼓，六面鼓也。社祭，祭地祇也。【疏】注云「靈鼓，六面鼓也」者，《冥氏》注同。《說文·鼓部》云：「靈鼓六面。」《文選·東京賦》薛注說同。《大司樂》先鄭注云「靈鼓四面」，與後鄭異。云「社祭，祭地

祇也」者，①《中庸》云：「郊社之禮，所以事上帝也。」鄭注云：「社祭地神。」與此義同。此舉社以咳衆地祇。《大司樂》方丘地祇亦用靈鼓，賈疏云：「郊特牲云『社祭土，神地之道』，則《孝經緯》云『社是五土之摠神』，是地之次祀，故舉社以表地祇。《大宗伯》亦云『血祭，祭社稷五祀』，亦舉社以表地祇，其實地之大小之祭皆用靈鼓也。」金鶚云：「天子大社，祭九州地祇，王社祭畿內地祇，是亦祭地也。故北郊亦通謂之社。《中庸》言『郊社之禮所以事上帝』，《仲尼燕居》、《曾子問》皆言『郊社』，而《郊特牲》明言社所以神地之道，社通於地明矣。」又云：「社地對文則別，散文則通。凡經典郊社並稱者，皆祭地之通名。《周官》祭地與社多互見。血祭祭社稷，則祭地亦血祭可知。兩圭，《咸池》祀地，則社稷可知。」案：金說是也。經典凡言郊社者有二義：《中庸》所云，可咳方丘北郊大地后土之祇。《禮運》云：「祭帝於郊，所以定天位也；祀地於國，所以列地利也。」則專指大社言之。若方丘北郊，則不得祀於國中。此經雖不對郊爲文，而義與《中庸》略同。互詳《大宗伯》疏。以路鼓鼓鬼享，路鼓，四面鼓也。鬼享，享宗廟也。【疏】注云「路鼓四面鼓也」者，《說文·鼓部》云：

「路鼓四面。」《風俗通義·聲音篇》同。《大司樂》先鄭注云

「路鼓兩面」，與後鄭異。云「鬼享，享宗廟也」者，六享所用也。《大司樂》宗廟大禘亦用路鼓。賈疏云：「案《大宗伯》宗廟有六享，則禘祫及四時皆言享先王，則皆是大祭。縱有享先公爲次祀，祭殤爲小祀，皆用此路鼓，以其天神地祇大小同鼓故也。」以鼗鼓鼓軍事，大鼓謂之鼗，鼗鼓長八尺。【疏】「以鼗鼓鼓軍事」者，賈疏云：「案《大司馬》云：『春辨鼓鐸，王執路鼓，諸侯執鼗鼓，軍將執晉鼓。』」鄭注云：「王不執鼗鼓，尚之於諸侯。」則在軍以鼗爲正，無妨兼有路鼓、晉鼓之等也。」詒讓案：《大司馬職》又有師帥執提，旅帥執鼗。此職不見者，以其形制較小，非軍事所重，經文不具也。注云「大鼓謂之鼗」者，《爾雅·釋樂》文。《韞人》注亦同。《說文·鼓部》云：「鼗鼓、皋鼓、晉鼓，皆兩面。」又云：「大鼓謂之鼗，八尺而兩面，以鼓軍事。从鼓責省聲，重文韞，鼗或从革責不省。」案《大司馬》「諸侯執鼗鼓」注引此經同。《詩·大雅·靈臺》亦云「責鼓」，責即韞之省，《靈臺》毛傳云：「責，大鼓也。」孔疏云：「責，大也，故謂大鼓爲責鼓。」詒讓案：《爾雅·釋詁》云：「墳，大也。」鼗、責、墳聲類同，故並有大義。賈疏云：「此唯兩面

① 原脫「一祭」，據注文補。

而已而稱大者，此不對路鼓已上，以其長八尺，直對晉鼓六尺六寸者爲大耳。」云「鼗鼓長八尺」者，賈疏云：「《韞人》文。」以鼗鼓鼓役事，鼗鼓長丈二尺。【疏】「以鼗鼓鼓役事」者，《說文·鼓部》云：「鼗，大鼓也。」《韞人》作「皋鼓」。《明堂位》「皋門」鄭注云：「皋之言高也。」此鼓又大於鼗，其聲尤高大，故以爲名字。亦省作咎，《後漢書·馬融傳·廣成頌》云「伐咎鼓」，李注云：「咎鼓，大鼓也。」賈疏云：「案《緜》詩云「鼗鼓弗勝」。鄭云：「鼗鼓不能止之。」此云「鼓役事」，謂擊鼓起役事。與彼不同者，但起役止役皆用鼗鼓，兩處義得相兼耳。」注云「鼗鼓長丈二尺」者，《韞人》云：「爲皋鼓，長尋有四尺。」八尺爲尋，尋有四尺即丈二尺也。以晉鼓鼓金奏，晉鼓長六尺六寸。金奏謂樂作擊編鍾。【疏】注云「晉鼓長六尺六寸」者，賈疏云：「亦《韞人》文。」云「金奏謂樂作擊編鍾」者，《鍾師》「掌金奏」，注云：「金奏，擊金以爲奏樂之節。金謂鍾及鐃。先擊鍾，次擊鼓，以奏《九夏》。」又《鐃師》注云「謂主擊晉鼓以奏其鍾鐃也」。案：金奏於樂始作時奏之，故《國語·魯語》云「先樂金奏」。綜攷鄭義，蓋先擊編鍾，次擊鐃，而後以晉鼓和之。詳《鍾師》疏。賈疏云：「案《磬師》

云「擊編鍾」。鄭注云：「磬亦編，於鍾言之者，鍾有不編，不編者鍾師擊之。」若然，則磬師擊編鍾，鍾師擊不編鍾。又案《鐃師》云「掌金奏之鼓」。鄭注云「主擊晉鼓」，則是晉鼓和金奏。但鍾之編與不編，作之皆是金奏，晉鼓皆和之矣。鄭唯言編鍾，據《磬師》而言，其實不編者亦以晉鼓和之。故《鍾師》云「以鍾鼓奏《九夏》」，鄭云「先擊鍾，次擊鼓」。是不編之鍾亦有鼓，鼓即晉鼓也。」案：賈說是也。鍾之不編者即鐃，亦謂之鋪。據《詩·小雅·鼓鍾》云「鼓鍾伐鼗」，又《大雅·靈臺》云「賁鼓惟鋪」，是奏樂亦有以鼗鼓、鼗鼓和鍾鐃者，不定用晉鼓也。以金鐃和鼓，鐃，鐃于也。圖如碓頭，大上小下。樂作，鳴之與鼓相和。【疏】「以金鐃和鼓」者，以下辨四金之用，皆與鼓相將，軍事所用也。金鐃亦以和樂。注云「鐃，鐃于也，圖如碓頭，大上小下」者，賈疏以爲此名制並出漢大予樂官。《釋文》云：「碓，本又作椎。」案：《說文·石部》云：「碓，春也。」圖而大上小下，正確頭之形。《宋書·樂志》云：「鐃于圖如碓頭，大上小下，今民間猶時有其器。」沈約亦同鄭義。《釋文》或本及《初學記·樂部》引《古今樂錄》述此注義並作椎。《山海經·中山經》郭注亦云「鐃于形如碓頭」。蓋皆傳寫之誤。碓頭即《玉人》之「終葵首」。《玉藻》注說

琕，云「方如椎頭」，是其形微方。此注云「圓」，則不得如椎頭矣。《國語·晉語》：「趙宣子曰：是故伐備鍾鼓，聲其罪也；戰以鐔于丁寧，傲其民也。」韋注云：「鐔于，形如碓頭，與鼓相和。唐尚書云『鐔于鐔也』，非也。鐔與鐔于各異物。」又《吳語》云：「吳王乃秉枹，親就鳴鍾鼓、丁寧、鐔于，振鐸。」注說同。案：韋說亦作碓頭。此經金鐔、金鐔，其用各異，明唐固說誤，韋席之是也。鐔于，《說文·金部》鐔字注作「淳于」。《南史·齊始興王鑑傳》云：「時有廣漢什邡人段祖以淳于獻鑑，古禮器也。高三尺六寸六分，圍三尺四寸，圓如筩，銅色黑如漆，甚薄。上有銅馬，以繩懸馬，令去地尺餘，灌之以水，又以器盛水於下。以芒莖當心跪注淳于，以手振芒，則聲如雷，清響良久乃絕。古所以節樂也。」又《後周書·斛律徵傳》云：「樂有鐔于者，近代絕無此器，或有自蜀得之，皆莫之識。徵見之，曰『此鐔于也』。衆弗之信。徵遂依干寶《周禮注》以芒筒捋之，其聲極振，衆乃歎服。」董道《廣川書跋》引干注云：「去地一尺，灌之以水，又以其器盛水於下，以芒當心跪注，以手震芒，其聲如雷。」案：董所引與《南史》及《後周書》所說正同。然宋時干注已佚，非董氏所得見，書跋所引，疑即摭拾二史爲之，非干注舊文也。又《御覽·樂部》引《樂書》云：「鐔

于者，以銅爲之，其筩象鍾，頂大，後攔，口弁，上以伏獸爲鼻，內懸子銅鈴舌。凡作樂，振而鳴之，與鼓相似。」此說又與鄭、干小異，未詳所據。云「樂作，鳴之與鼓相和」者，《小師》「掌六樂聲音之節與其和」，注云：「和鐔于。」則鄭以和鼓專爲作樂之事。賈疏云：「案下三金皆大司馬在軍所用，有文。此金鐔不見在軍所用，明作樂之時與鼓相和。」陳祥道云：「《國語》曰『戰以鐔于丁寧』。又黃池之會，吳王親鳴鍾鼓丁寧鐔于，則兵法固用鐔矣。」案：陳說是也。江永說同。《淮南子·兵略訓》亦云「兩軍相當，鼓鐔相望」。賈說失之。以金鐔節鼓，鐔，鉦也，形如小鍾，軍行鳴之，以爲鼓節。《司馬職》曰：「軍行鳴鐔。」【疏】「以金鐔節鼓」者，賈疏云：「此謂在軍之時所用，與鼓爲節也。」注云「鐔，鉦也，形如小鍾」者，《宋書·樂志》、《初學記·樂部》引《古今樂錄》說並同。《說文·金部》云：「鐔，鉦也。軍法司馬執鐔。」《國語·晉語》宋庠《補音》引韋注云：「丁寧，令丁，謂鉦也。」案：韋以令丁爲鉦，與《說文·金部》鈴字說解同。依鄭說則鐔即鉦，依韋說則鉦即鈴，蓋三者形制大同。《大司馬》疏引《司馬法》云「十人之長執鉦」，與公司馬執鐔之文相當。《左傳》襄十三年，孔疏引又作「執鈴」，亦可證三者同物。《廣雅·釋器》云：「鐔，

鐸、鉦、鐃、鍾、鈴也。蓋鐸、鐃雖與鐃形制大小不同，然其匡皆與鍾相似，故張揖遂以鈴通釋諸器矣。但鈴形雖亦似小鍾，而中有金舌與鐸同。鄭此注以鉦釋鐃，不云即鈴，亦不云有舌，則與韋說異。《說文》雖亦以鐃爲一，而釋鉦之形制，乃與鄭金鐃說解同，義蓋亦微異，詳後疏。云「軍行鳴之以爲鼓節，《司馬職》曰，軍行鳴鐃」者，據《大司馬》文。彼云「鼓行鳴鐃，車徒皆作」，即此節鼓之事。鄭引作軍行者，以義改之。凡鳴鐃時，鼓亦暫止，故《詩·小雅·采芑》云「鉦人伐鼓」，毛傳云：「鉦以靜之，鼓以動之。」蓋鼓一戒一止，鐃爲之節，即所謂靜之也。賈疏疑《詩傳》「鉦以靜之」與此軍行所用不同，非也。以金鐃止鼓，鐃如鈴，無舌有秉，執而鳴之，以止擊鼓。《司馬職》曰：「鳴鐃且卻。」【疏】「以金鐃止鼓」者，賈疏云：「此案《春秋》左氏傳：『曹劌云，一鼓作氣，再而衰，三而竭。』哀公傳：『陳書曰：吾聞鼓而已，不聞金矣。』是進軍之時擊鼓，退軍之時鳴鐃。」注云「鐃如鈴，無舌有秉，執而鳴之，以止擊鼓」者，《釋文》云：「秉，本又作柄。」案：柄正字，秉聲近段借字。《說文·木部》柄或作棟。古書多借秉爲之，後「帔舞」注亦云「有秉」。《宋書·樂志》、《初學記·樂部》引《古今樂錄》，說並與鄭同，秉亦皆作柄。《釋名·釋樂器》云：

「鐃，聲譟譟也。」《說文·金部》云：「鐃，小鉦也。軍法卒長執鐃。」又云：「鉦，鐃也。似鈴，柄中，上下通。」《通典·樂》云：「鐃如編鍾而無舌有柄，搖之以止鼓。編鍾與鈴形制亦相近。」段玉裁云：「鐃鈴鉦鐃，四者相似而有不同。鉦似鈴而異於鈴者，鐃鈴似鍾，有柄，爲之舌以有聲，鉦則無舌，柄中者，柄半在上，半在下，稍稍寬其孔，爲之抵拒，執柄搖之，使與體相擊爲聲。鄭說鐃形與許說鉦形合。《詩·采芑》傳曰「鉦以靜之」，與《周禮》止鼓相合。」詒讓案：鄭意鐃鉦同物，而鐃與鐃不同，許則謂鐃爲小鉦，是鉦亦可謂之大鐃矣。此與鄭義必不能強合者。《詩·小雅·采芑》孔疏云：「鐃似小鍾，鐃是鈴，是有大小之異耳，俱得名鉦。」案：孔說與許小鉦義略同。鈴，詳《巾車》疏。引《司馬職》曰「鳴鐃且卻」者，彼文云「乃鼓退，鳴鐃且卻」。注云：「軍退，卒長鳴鐃以和衆，鼓人爲止之也。」案：依《大司馬》大閱之禮，則軍進鳴鐃，軍退鳴鐃。凡鳴鐃鳴鐃，鼓皆爲之暫止，其義同也。鐃以進軍，故云節鼓；鐃以退軍，故云止鼓。實則二者並爲止鼓，以軍進退變文耳。以金鐃通鼓。鐃，大鈴也。振之以通鼓。《司馬職》曰：「司馬振鐃。」【疏】「以金鐃通鼓」者，賈疏云：「此是金鈴

金舌，故曰金鐸，在軍所振，對金鈴木舌者爲木鐸，施令時所振。言通鼓者，兩司馬振鐸，軍將已下即擊鼓，故云通鼓也。」

注云「鐸大鈴也」者，謂鐸即鈴而形制較大也。

《說文·金部》云：「鐸，大鈴也。軍法五人爲伍，五伍爲兩，兩司馬執鐸。鈴，令丁也。」《釋名·釋兵》云：「鐸，度也，號令之限度也。」《小宰》注云：「武事奮金鐸。」亦詳彼疏。云「振之以通鼓」，《司馬職》曰，「司馬振鐸」者，彼文云「司馬振鐸，羣吏作旗，車徒皆作，鼓行」。注云：「司馬，兩司馬也。振鐸以作衆。」鄭以彼所云，即此所謂通鼓。《說文·辵部》云：「通，達也。」以鼓者非一人，故振鐸，令其一人先鼓，衆人徧應之。通者，傳達周徧之謂。《大僕》「田役，贊王鼓」，注云「王通鼓，佐擊其餘面」，亦謂王鼓一面爲倡，贊鼓者乃徧鼓餘面也。又下注引《司馬法》鼓四通，三通，五通，並謂聲節一終，與此義亦相近。凡祭祀百物之神，鼓兵舞帔舞者。兵謂干戚也。帔，列五采繒爲之，有秉。皆舞者所執。【疏】「凡祭祀百物之神」者，謂祭物彪及蜡祭也，與《大宗伯》「以醴辜祭四方百物」同。賈疏云：「上文神祀社祭鬼享，文局不及小神，故此更廣見小神之事，故云凡祭祀百物之神也。」云「鼓兵舞、帔舞者」者，

擊鼓以爲舞節，《籥師》云「祭祀則鼓羽籥之舞」，注云「鼓之者，恒爲之節」是也。賈疏云：「天地之小神，所舞不過此兵舞帔舞二事。案下《舞師》，山川用兵舞，社稷用帔舞。今此小神等，若義近山川者舞兵舞，義近社稷者舞帔舞，故六舞之中唯言此二舞而已。」案：依賈說，百物之神匪一，蓋無專用之舞。若坊水庸之屬，則用兵舞；若郵表畷之屬，則用帔舞。於舞師興舞時，此官則爲之鼓也。注

云「兵謂干戚也」者，此武舞之小者，《樂師》謂之干舞。干戚即兵事所用之干戚，無飾者也。《祭統》說大嘗禘，云「朱干玉戚以舞《大武》」。彼謂大舞，故干戚以朱玉爲飾。《司兵》云「祭祀授舞者兵」，注云「授以朱干玉戚之屬」。彼亦據大舞而言。此小舞之干戚，乃司戈盾所授，無朱玉之飾者。賈疏謂此干戚即朱干玉戚，非也。云「帔，列五采繒爲之，有秉」者，《說文·刀部》云：「列，分解也。」《樂師》注云：「帔，析五采繒。」列、析義同。謂剪列五采繒以爲舞具；有秉者，使可執也。《說文·羽部》云：「翬，樂舞執全羽以祀社稷也。讀若紱。」與後鄭字義並別。曾釗云：「《說文·巾部》帔注云「一幅巾」，與帨帨並列，不以爲舞器，則許君所據古文《周禮》作翬，不作帔。」論讓案：依後鄭說，帔列五采繒爲之，則以作帔爲正。方言云：「帔

纓，毳也。陳、宋、鄭、衛之間謂之帟纓。」郭注云：「帟纓謂物之行敝也。」帟舞列繒，疑亦取破敝之義。《樂師》先鄭注以帟爲全羽，則與許同，詳彼疏。帟字又作紱，《史記·孔子世家》云：「會於夾谷，齊有司趨而進曰：『請奏四方之樂。』於是旄旌羽袂，矛戟劍撥，鼓譟而至。」《索隱》云：「被謂舞者所執。」字又作紱，《御覽·禮儀部》引桓子《新論》云：「昔楚靈王信巫祝之道，齊戒潔鮮，以祀上帝，禮羣神，躬執羽紱，起舞壇前。」紱紱並帟之借字。云「皆舞者所執」者，謂干戚及帟，皆就所執以名舞也。凡軍旅，夜鼓

鼙，鼙，夜戒守鼓也。《司馬法》曰：「昏鼓四通爲大鼙，夜半三通爲晨戒，旦明五通爲發响。」【疏】「凡軍旅夜鼓鼙」者，與鈔師爲官聯也。鼓鼙者，《鈔師》注云：「鼓之以鼗鼓。」《宋書·樂志》云：「鼓長丈二尺者曰鼙鼓，凡守備及役事則鼓之，今世謂之下鼙。」案：依沈說，則鼓鼙以鼗鼓，與鄭義不合，疑不足據。又案《後漢書·明帝紀》李注引《韓詩章句》云：「應門擊柝，鼓人上堂。」此宮中警夜之事，雖非軍旅，疑亦此官之屬鼓之。經不言者，文不具也。

注云「鼙，夜戒守鼓也」者，《掌固》杜注云：「謂擊鼓行夜戒守也。」《說文·壹部》云：「鼙，夜戒守鼓也。讀若戚。」此

鼙即鼙之異文。戒守者，謂夜閒警戒爲守備也。引《司馬法》曰「昏鼓四通爲大鼙，夜半三通爲晨戒，旦明五通爲發响」者，即《鈔師》所謂夜三鼙也。引之者，證鼙爲夜戒守鼓之事。今《司馬法》無此文，蓋在佚篇中。《釋文》云：「响，本又作响，亦作煦。」案《說文·日部》云：「响，日出温也。」《火部》云：「煦，蒸也。」《肉部》云：「响，脯挺也。」發响字當從响，注疏本《釋文》响作「响」，誤。又《說文·壹部》鼙字注云：「禮，昏鼓四通爲大鼓，夜半三通爲晨戒，旦明五通爲發明。」段玉裁云：「大鼓」當依注作「大鼙」，謂大行夜也。」阮元云：「發明」爲「發响」之誤，當從《禮》注校正。」丁晏云：「《漢書·藝文志》禮家《軍禮司馬法》百五十五篇。故許君稱之曰禮。」詒讓案：「晨戒」「戒晨」義通，未知孰是。《御覽·兵部》引《李衛公兵法》及李筌《太白陰經·嚴警鼓角篇》，並云凡搥鼓三百三十三椎爲一通。未知周制亦然否。賈疏云：「欲取從初夜即爲警戒之意，故擊鼓四通，使大憂戚也。夜半三通爲晨戒者，警衆豫使嚴備，侵早當行。旦明五通爲發响者，旦明五通，晨响之時當發，故云發响也。」案：鼙戚音同，然大鼙不取大憂戚之義，賈望文生訓，不足據。軍動，則鼓其衆，動且行。

【疏】「軍動則鼓其衆」者，賈疏云：「尋常在道，欲行之時

所擊之鼓，則上注「五通發响」是也。今別言軍動，則據將臨陳之時，軍旅始動，則擊鼓以作士衆之氣，故曹劌云「一鼓作氣」。

注云「動且行」者，且，舊本譌旦，今據宋建陽本、岳本正。賈疏述注亦作且，云「謂行前向陳時也」。

汪文臺云：「《大司馬職》云：『鼓人三鼓，車徒皆作，鼓行，鳴鐃，車徒皆行，及表乃止。』所謂動且行也。軍前向陳，不可徑行，步伐進止，皆有定法。經言動，注云且行，其義一也。各本注作「旦行」，疏作「且行」，亦疏附注異本之證。」案：汪說是也。

田役亦如之。【疏】「田役亦如之」

者，田役謂起徒役以田獵也。凡時田講武，其事嚴重，與軍旅同，此官亦鼓其衆。《大僕》云「田役贊王鼓」，是大田王親鼓，此官又別鼓之。若他役事，則王所不與，無親鼓之法，惟此官鼓之，即上云「以鼙鼓鼓役事」是也。此文以軍旅、田役、救日月三者並舉，與《大僕》文略同，明田役止爲田事，不兼含大役也。《大司馬》中冬大閱狩田，鼓人主鼓，詳彼疏。賈疏云：「田獵圍合之時必擊鼓，象對敵，故《大司馬職》云「鼓遂圍禁」是也。」救日月，則詔王鼓，救日月食，王必親擊鼓者，聲大異。《春秋傳》曰：「非日月之眚，不鼓。」【疏】「救日月則詔王鼓」者，與大僕爲官聯也。

《大宰》注云：「詔，告也。」賈疏云：「謂日月食時，鼓人詔告于王擊鼓，聲大異以救之。」案《大僕職》云「軍旅田役贊王鼓」。鄭注云：「佐擊其餘面。」又云「救日月食亦如之」。大僕亦佐擊其餘面。鄭既云「佐擊其餘面」，則非只兩面之鼓。案上解祭日月與天神同用雷鼓，則此救日月亦宜用雷鼓，八面，故《大僕》與《戎右》俱云贊王鼓，得佐擊餘面也。」案：救日月所用之鼓，經無正文，賈謂同用雷鼓，《書·胤征》孔疏說同。賈《大僕》疏云：「日食陰侵陽，當與鼓神祀同用雷鼓也。若然，月食當用靈鼓。」則謂月食別用靈鼓，又與此疏說異。案《庭氏》注，謂「救日用枉矢，救月用恒矢」。則救月之與救日，禮有降殺，或當如《大僕》疏說也。又《穀梁》莊二十五年傳云：「天子救日，置五麾，陳五兵、五鼓，諸侯置三麾，陳三鼓、三兵，大夫擊門，士擊柝，言充其陽也。」范注云：「凡有聲，皆陽事，以壓陰氣。」楊疏云：「五鼓者，糜信、徐邈並云東方青鼓，南方赤鼓，西方白鼓，北方黑鼓，中央黃鼓。案五兵，兵有五種，未審五鼓是一鼓有五色，爲當五種之鼓也。何者？《周禮》有六鼓，雷鼓、靈鼓、路鼓、鼗鼓、鼙鼓、晉鼓之等。若以爲五種之鼓，則不知六鼓之內竟去何鼓。若以爲一種之鼓，則不知六鼓之內竟取何鼓。又《周禮》云「雷鼓鼓神祀」，則似救日之鼓用雷

鼓，但此用之於社；《周禮》又云「靈鼓鼓社稷祭」，則又似救日食之鼓用靈鼓：進退有疑，不敢是正。檢糜、徐兩家之說，則以五鼓者非六鼓之類，別用方色鼓而已。諸侯三者，則云降殺以兩，去黑黃二色，是非六鼓之類也。」案：依楊說，則六鼓之外，別有方色之鼓。又《曾子問》云：「如諸侯皆在而日食，則從天子救日，各以其方色與其兵。」孔疏引《隱義》云：「東方用戟，南方用矛，西方用弩，北方用楯，中央用鼓。」此以鼓爲五兵之一，復與《穀梁》不合，亦恐不足據。

注云「救日月食，王必親擊鼓者，聲大異」者，《荀子·天論篇》云：「日月食而救之，天旱而雩，卜筮然後決大事，非以爲得求也，以文之也。」《春秋繁露·必仁且知篇》云：「有不常之變者謂之異，異者，天之威也。」鄭意古以日月食爲天之著異示威，故王親鼓，聲告其異。案：日月之道，經緯同度則有掩食，但古麻家未有豫推日月食之術，故《詩·大雅·十月之交》孔疏謂周魯麻無考日食法。是必臨食始見，驚爲災異，故王親鼓以警衆，而後內外吏民咸鼓，賊而救之。攷日食用鼓之事見於《春秋》者，莊二十五年、三十年，文十五年，經並云「日有食之，鼓用牲于社」。《左》文十五年、昭十七年傳，並云「日有食之，天子不舉，伐鼓于社；諸侯用幣于社，伐鼓于朝」。然則天子之禮，王親

擊鼓於大社也。《左傳》杜注云：「伐鼓于社，責羣陰；伐鼓于朝，退自責。」《公羊》莊二十五年傳云：「日食則曷爲鼓用牲于社？求乎陰之道也。以朱絲繫社。」何注云：「社者，土地之主也。月者，土地之精也。上繫于天而犯日，故鳴鼓而攻之，脅其本也。」《白虎通義·災變篇》云：「日食必救之何？陰侵陽也。鼓用牲于社，社者衆陰之主，以朱絲繫之，鳴鼓攻之，以陽責陰也。」諸家說並謂擊鼓爲責陰，與鄭聲大異之義，亦互相成。又《續漢書·禮儀志》劉注引干寶云：「朱絲繫社。社，太陰也；朱，火色也；絲，維屬。天子伐鼓於社，責羣陰也。諸侯用幣於社，請上公也。伐鼓于朝，退自攻也。此聖人厭勝之法也。」案：劉引干說，即《周禮注》佚文，然不知繫何職，其所釋伐鼓于社及朱絲繫社，與《左氏》、《公羊》說救日食禮同，疑即釋此經也。引《春秋傳》曰「非日月之眚，不鼓」者，《左》莊二十五年傳文。引之者，證救日月用鼓爲聲大異也。杜注云：「眚猶災也。月侵日爲眚。陰陽逆順之事，聖賢所重，故特鼓之。」賈疏云：「案莊二十五年《左氏傳》：『夏六月辛未朔，日有食之，鼓用牲于社，非常也。唯正月之朔，慝未作，日有食之，於是乎用幣于社，伐鼓于朝。』若然，此救日食用鼓，惟據夏四月陰氣未作，純陽用事，日又太陽之精，於正

陽之月，被食爲災，故有救日食之法也。月似無救理。《尚書·胤征》季秋九月日食，救之者，上代之禮，不與周同。」案：賈說非也。《左》昭十七年傳云：「季平子曰：『唯正月朔，慝未作，日有食之，於是乎有伐鼓用幣，禮也。其餘則否。』」又大史曰：「日過分而未至，三辰有災，於是乎百官降物，君不舉，辟移時，樂奏鼓，祝用幣，史用辭。故《夏書》曰：『辰不集于房，瞽奏鼓，嗇夫馳，庶人走。』」此並謂夏四月、周六月始有救日之禮，餘月則否。又不見救月食之事。然此經救日月之文，《鼓人》、《大僕》、《庭氏》三見，並不著時月，又日月並舉，則不問何月日食月食，並有救法，與《左氏》義不同。疑此經爲周初之制，《左氏》所說乃後王所更定。況彼云「瞽奏鼓」，而此經則王親鼓，雖遠符《夏書》而近乖周典，兩文自不相應。賈氏轉據《左氏》謂此經亦指夏四月，又疑月食無救法，並謬。又《白虎通義·災變篇》云：「月食救之者，陰失明也，故角尾交日。月食救之者，謂夫人擊鏡，孺人擊杖，庶人之妻楔搔。」《御覽·天部》引《荊州占》云：「月蝕，后自提鼓階前，把槌擊鼓者三中，良人、諸御者宮人皆擊柝救之。月已蝕，后乃入齋，服縞素，三日不從樂，以應其祥。此先王之所以免天地之災，而解四境之患也。」此並救月食之事，與此經可互證。大喪，

則詔大僕鼓。始崩及窆時也。【疏】「大喪」者，謂王及后喪也。云「則詔大僕鼓」者，亦與彼爲官聯也。注云「始崩及窆時也」者，賈疏云：「案《大僕職》云：『大喪，始崩，戒鼓，傳達于四方，窆亦如之。』是鄭所據也。」

舞師掌教兵舞，帥而舞山川之祭祀；教帔舞，帥而舞社稷之祭祀；教羽舞，帥而舞四方之祭祀；教皇舞，帥而舞旱暵之事。羽，析白羽爲之，形如帔也。四方之祭祀，謂四望也。旱暵之事，謂雩也。暵，熱氣也。鄭司農云：「皇舞，蒙羽舞。書或爲聖，或爲義。」玄謂皇，析五采羽爲之，亦如帔。【疏】「掌教兵舞，帥而舞山川之祭祀」者，與樂師、籥師爲官聯也。此所教四舞，亦皆小舞也。賈疏云：「掌教兵舞，謂教野人使知之。國有祭山川，則舞師還帥領往舞山川之祀，已下皆然。案《春官·樂師》有六舞，並有旄舞施於辟雍，人舞施於宗廟。此無此二者，但卑者之子不得舞宗廟之耐，祭祀之舞亦不得用卑者之子。彼樂師教國子，故有二者；此教野人，故無旄舞、人舞。」注云「羽，析白羽爲之」者，《樂師》先鄭注云：「羽舞者，析羽。」鄭知用白羽者，

以其直名羽，明其羽色與皇染五采異也。《詩·陳風·宛丘》云「值其鸞羽」，又云「值其鸞翮」。毛傳云：「鸞鳥之羽，可以爲翳。」箋云：「翳，舞者所持，以指麾。」孔疏引陸璣疏云：「鸞，水鳥也。好而潔白，故謂之白鳥。」又《詩·邶風·簡兮》孔疏引《五經異義》云：「《公羊》說，樂萬舞以鴻羽，取其勁輕，一舉千里。」《公羊》隱六年傳「初獻六羽」，何注亦云「羽者，鴻羽也，所以象文德之風化疾也」。此注云析白羽，蓋亦謂析鸞鴻之羽，注之檀首以爲翳也。翳亦謂之翮，《鄉師》先鄭注所謂「羽葆幢」。《司常》云「析羽爲旌」，《鄉射禮》「翻旌」，亦以白羽朱羽爲之。羽舞之翮蓋與彼相似也。云「形如帔也」者，羽舞與帔舞所持之翳，形制亦相類，惟一用析羽，一用析繒不同，亦俱有秉可執也。帔形制，詳《鼓人》疏。云「四方之祭祀謂四望也」者，四望即五嶽、四鎮、四瀆及海也。此皆大山川，與上山川爲中小山川異。《公羊》僖三十一年傳云：「天子有方望之事，無所不通。」是四方四望可通稱。《祭法》云：「四坎壇祭四方也。」注云：「四方即謂山林川谷丘陵之神也。」彼四坎壇亦當含有四望也。依鄭義，此四方與《大宗伯》「禘辜祭四方百物」及《大司馬》「祀祊」並異。又《詩·邶風·簡兮篇》云「方將萬舞」，毛傳云：「方，四方也。以干羽爲萬舞，用之

宗廟山川，故言於四方。」案：宗廟不得稱四方，陳旻以爲衍文，是也。以山川爲四方，蓋亦據四望言之。但萬爲大舞，與此兵舞、羽舞不同，毛或別有所據，與此經義不相應也。四方四望，並詳《大宗伯》疏。云「早暎之事謂零也」者，《稻人》云「早暎共其零斂」，又《女巫》云「早暎則舞零」，故知早暎之事即零也。但周之零禮有二：一正零，每歲建巳月行之；一旱零，則於周秋三月遇旱乃行之，不早則否。正零，天子曰大零。《月令》仲夏之月，「大零帝，用盛樂」。其上文云「是月也，命樂師脩鞀鞀鼓，均琴瑟管簫，執干戚戈羽，調竿笙箎簧，飭鍾磬祝敔」。注云：「爲將大零帝習樂也。」又云：「自鞀鞀至祝敔皆作，曰盛樂。凡他零，歌舞而已。」是大零祭五帝用盛樂，當依《大司馬》祀天神之禮，用大舞。此皇舞爲樂師小舞之一，則所謂舞早暎之事者爲旱零可知。蓋即《月令》注所謂「他零歌舞而已」是也。若大零之舞，授器，備干戚戈羽，豈徒皇羽哉！互詳《司巫》疏。云「暎，熱氣也」者，《說文·日部》云「暎，乾也，耕暴田曰暎」，引《易》曰「燥萬物莫暎乎火」。今《說卦》作「煖」。《易釋文》引王肅云「火氣也」。又引徐本作「暎」，云「熱暎也」。暎煖字亦通。鄭司農云「皇舞，蒙羽舞」者，段玉裁謂皇當作聖。《樂師》先鄭注云：「皇舞者，以羽冒覆頭上，衣

飾翡翠之羽。」此蒙羽即謂蒙首也。《說文》釋翌爲以羽翳首，義亦同。又《說文·雨部》：「雩，羽舞也。」羽舞亦即謂此皇舞。賈疏云：「先鄭之意，蓋見《禮記·王制》有虞氏皇而祭，皇是冕，爲首服，故以皇爲鳳皇羽蒙于首，故云『蒙羽舞』。自古未見蒙羽于首，故後鄭不從。」案：一鄭義皆與《王制》皇冕略同。然《掌次》「皇邸」先鄭注，亦釋爲皇羽，而不辨何鳥。依《樂師》先鄭注義，則似謂覆頭亦以翡翠羽。至後鄭乃有鳳皇羽之說，故注《王制》云「皇，冕屬也，畫羽飾焉」。先鄭固不以羽爲畫羽，亦未必以皇爲鳳皇也。賈說未允。惠士奇謂皇舞，皇謂冠，即《文選·東京賦》所謂「冠華秉翟，列舞八佾」者，亦即《獨斷》之建華冠。飾以羽，若有虞氏之皇，故名曰皇，先鄭所謂蒙羽舞者，即此。又謂宗廟冕而舞，早嘆皇而舞。《說文·鳥部》：「鵠，知天將雨鳥」。故舞早嘆則冠之以禱焉。案：《爾雅·釋言》云：「皇，華也。」《獨斷》及《續漢書·輿服志》並以建華冠爲即鵠冠，是皇華同訓，鵠翠一鳥，惠舉證先鄭說，未嘗不可通。然此職四舞，《樂師》六舞，並據手執舞器爲名，未有言冠者，故後鄭不從也。云「書或爲翌」者，皇翌聲類同。《王制》「有虞氏皇而祭」，彼《釋文》亦作「翌」。段玉裁改爲「書或爲皇」，云：「《說文·

羽部》云：「翌，樂舞以羽翳自翳其首，以祀星辰也。從羽王聲，讀若皇。」案此用鄭司農說也。或賈侍中說亦如是與？《樂師》注曰：「故書皇作翌。」鄭司農云：「翌讀爲皇。書亦或爲皇。」是則仲師、叔重皆從翌。此《舞師》注當云「鄭司農云，翌舞，蒙羽舞，書或爲皇」。鄭君經文從皇，引仲師說則先翌後皇，今本淺人所改也。《樂師》後司農云：「皇，雜五采羽，如鳳皇色，持以舞。」是後司農謂其羽似鳳皇色，故定從皇也。案：以此及《樂師》兩注通校之，段校近是。云「或爲義」者，徐養原云：「義即威儀字。《書》曰：『簫韶九成，鳳皇來儀。』《易》曰：『鴻漸于陸，其羽可用爲儀。』是舞之容儀在羽，故謂羽舞爲義舞。」詒讓案：義與皇翌聲義俱遠，蓋字之誤，二鄭皆不從也。云「玄謂皇，析五采羽爲之，亦如帔」者，《樂師》注云：「皇舞，雜五采羽，如鳳皇色，持以舞。」析羽即裸衆羽也。後鄭意此皇舞亦執羽，不蒙於首，破司農蒙羽舞之說。《掌次》「皇邸」注云：「染羽象鳳皇羽色以爲之。」此皇舞所持蓋亦染羽也。鳳皇羽備五采，詳《掌次》疏。又《詩·簡兮》疏引《異義》云：「《詩》毛說，萬以翟羽；《韓詩》說，以夷狄大鳥羽。謹案：《詩》云『右手秉翟』。《爾雅》說翟，鳥名，雉屬也。知翟羽舞也。」案：翟羽亦五采。《穀梁》隱五年，范注釋舞夏云：「夏，大也。大

雉，翟雉」。《左·襄十年傳》云：「宋公享晉侯於楚丘，請以《桑林》。舞師題以旌夏。」杜注云：「旌夏，大旌也。題，識也。以大旌表識其行列。」案：旌夏疑亦析翟羽爲旌，《天官·敍官》注云「夏采，夏翟羽色」是也。鄭此注必知象鳳皇者，以其名皇也。亦如帔者，明羽舞皇舞同制，惟以色爲異。《續漢書·禮儀志》云：「早，公卿官長以次行雩禮，求雨，立土人舞僮二佾。」劉注引《周禮》曰：「翟舞，帥而舞早暎之事。」鄭玄曰：「翟，赤皐染羽爲之也。早暎，注陽也。用假色，欲其有時而去之。」案：劉氏所引經，從故書作翟，注又與鄭異，當是誤記，惠士奇以爲干寶注。案《續漢志》注屢引干注，惠說近是。赤皐之皐，毛晉本《續漢志》作「草」，草即皐本字。赤草染羽，未聞其說。《鍾氏》「染羽以朱湛丹秫」，先鄭注以丹秫爲赤粟。疑「赤草」又當爲「赤粟」也。訓早暎爲「注陽」，亦難通，疑當爲「恒暘」之誤。

凡野舞，則皆教之。野舞，謂野人欲學舞者。【疏】「凡野舞則皆教之」者，與旄人爲官聯也。注云「野舞謂野人欲學舞者」者，以別於舞徒四十人爲在官之舞人也。《旄人》「掌教舞散樂」，注云：「散樂，野人爲樂之善者，自有舞。」然則凡野人欲學舞者，先教以散樂之舞；野舞既閑習，乃教以《樂師》六小舞，《大司樂》六大舞也。賈《司巫》

疏謂《論語》曾皙云「春服既成，童子六七人，冠者五六人」，謂舞師誨野人能舞者，兼有童子、冠者。說亦通。凡小祭祀，則不興舞。小祭祀，王玄冕所祭者。興猶作也。【疏】注云「小祭祀，王玄冕所祭者」者，《小司徒》注同。賈疏云：「案上文云「凡祭祀百物之神，鼓兵舞帔舞」。又案《司服》云「羣小祀則玄冕」。注云：「羣小祀，林澤墳衍四方百物之屬。」如是則小祭祀有兵舞，帔舞；而云不興舞者，小祭祀雖同玄冕，若外神林澤之等則有舞，若宮中七祀之等則無舞，此文是也。」云「興猶作也」者，《爾雅·釋言》云：「興，起也。」《說文·人部》云：「作，起也。」是興作同義。

牧人掌牧六牲而阜蕃其物，以共祭祀之牲牷。六牲謂牛、馬、羊、豕、犬、雞。鄭司農云：「牷，純也。」玄謂牷，體完具。【疏】「掌牧六牲而阜蕃其物」者，物猶言種類也。《雞人》注云：「物謂毛色也。」案：凡牲畜區別毛色，各爲種類，通謂之物。質人三馬，①《校人》六

① 顏、汪二先生謂「質人」當爲「馬質」，甚是。

馬，馬各爲一物。《詩·小雅·無羊》云：「三十維物，爾牲則具。」毛傳云：「異毛色者三十也。」阜蕃，詳《大司徒》疏。

云「以共祭祀之牲牷」者，《詩·小雅·無羊》孔疏云：「牧

人」注云：「掌養牲於野田者。」其職曰「掌牧六牲而阜蕃其物」，則六畜皆牧人主養。其餘牛人、羊人之徒各掌其事，

以供官之所須，則取於牧人，非放牧者也。《羊人職》曰：

「若牧人無牲，則受布於司馬，買牲而供之。」是取於牧人之事也。江永云：「遠郊有牧田，以授九職中之藪牧，使牧六

牲，即以牲物爲貢，牧人掌之，國有祭祀，牧人共之。於王

朝，牛人地官牛人、充人及司門；羊人夏官羊人，豕人冬官

豕人，犬人秋官犬人而豢於地官之槁人，雞人春官雞人，馬入夏官圉人。馬牲唯有事於四海山川及喪祭遣奠用之。

將祭祀則各官供之，小宗伯毛而辨之，頒之司徒、宗伯、司

馬、司寇、司空，使共奉之。牛爲大牲，所用者多，則遠郊又

有牛田，牛人掌之，養國之公牛，而祭事用牛者，與牧人並共也。十二閑之馬，別有校人諸官掌之，非牧人之職也。

《羊人》云：「若牧人無牲，則受布於司馬，使其賈買牲而共之。」此謂牧人有時偶乏羊牲，則於長官受布買牲，以共王

朝之用，非謂共之於牧人也。」案：孔、江說是也。此牧人

是養牲之官，牛人等是共牲之官，共牲當由牧人共入牛人

等。賈疏謂牛人、羊人、犬人、豕人之等，擇取純毛物者以供牧人，牧人又供與充人芻之三月，失之。注云「六牲

謂牛馬羊豕犬雞」者，《膳夫》注義同。此六牲即《庖人》之

六畜也。六牲去馬，亦謂之五牲。《左》昭十一年傳云：

「五牲不相爲用。」《大戴禮記·曾子天圓篇》云：「序五牲

之先後貴賤。」杜、盧注並云「五牲，牛羊豕犬雞」，與《月令》

五時牲合，是也。《詩·無羊》孔疏云：「馬是國之大用，特

立牧師、圉人，使別掌之。則蓋擬駕用者屬牧師，令生息者

屬牧人。」鄭司農云「牷，純也」者，《犬人》先鄭注同。《說

文·牛部》云：「牷，牛純色。禮，祭祀牷牲。」曾釗云：「下

經云：「凡時祀之牲，必用牷物；凡外祭毀事，用羴可也。」

《犬人》：「凡祭祀共犬牲用牷物；凡幾珥沈辜，用羴可

也。」《玉人》：「天子用全，上公用龍。」皆以全與羴對言，羴

爲雜，則牷是純可知。」案：曾說是也。牷爲牛純色，引申

之，凡牲純色並謂之牷。先鄭及許說得之。此後鄭注別爲

「體完具」，不從先鄭；然《犬人》注引先鄭說，仍不破之。

又《表記》「牲牷」，後鄭注亦云「牷猶純也」，則亦兼取純色

之訓矣。云「玄謂牷體完具」者，不從先鄭說也。《犬人》賈

疏云：「案《尚書·微子》云：『犧牷牲用。』」注云：「犧，純

毛。牷，體完具。」彼牷與犧相對，是犧爲純毛，牷爲體完

具。」詒讓案：後鄭意，牲从全得聲，聲亦兼義。《說文·人部》云：「全，完也。」《牛部》云：「牲，牛完全也。」完具與完全義同。《書·微子》僞孔傳、《山海經·西山經》郭注、《大戴禮記·曾子天圓篇》盧注，說並與後鄭同。又《左》桓六年傳云「吾牲牷肥腍」，杜注云：「牷，純色完全也。」則兼用二鄭之義。曾釗云：「《說文》牲訓體完具，牷訓純色。此經牲牷對言，牲安有又訓完具之理。牷，色之純；牲，體之具也。」案：曾釋牲牷二字義，得之。今以諸經及《說文》通校之，凡言牲牷犧牲者，牲謂角體完具，牷謂毛羽純色，犧則祭牲角體完具而又兼毛羽純色也。蓋單言牲，則純厯兼有，而角體則無不完具者。《穀梁》哀元年傳云：「全曰牲，傷曰牛。」明不完具則不可以爲牲也。言牲又言牷，則以牷見其牲之爲純色，明不徒取完具而已。至祭祀之牲，擇之尤精，則特取體全色純之美名謂之犧牲，明其無不備也。三者之義，各有所取，而說者不憚，遂滋乖互，故略辨之。凡陽祀，用騂牲毛之；陰祀，用黝牲毛之，望祀，各以其方之色牲毛之。騂牲，赤色。毛之，取純毛也。陰祀，祭地北郊及社稷也。望祀，五嶽、四鎮、四瀆也。鄭司農云：「陽祀，春夏也。黝讀爲幽。幽，黑也。」

玄謂陽祀，祭天於南郊及宗廟。【疏】「凡陽祀用騂牲毛之，陰祀用黝牲毛之」者，黝，當從段玉裁校改「幽」，詳後。以下並辨祭祀用牲毛物之異也。 注云「騂牲，赤色」

者，《說文·馬部》無騂字，新附有騂字，云「馬赤色也」。騂與騂同。案：凡經典騂字，正字並當爲埤。埤爲赤土，引申爲凡赤牲之稱，詳《草人》疏。賈疏云：「見《明堂位》『周人騂剛』，《檀弓》云『周人牲用騂』，周尚赤而云用騂，故知騂是赤也。」詒讓案：依鄭義，周郊祭受命帝即蒼帝，則周以木德王而尚赤者，《五行大義》引《春秋感精符》云：「周以天統服色尚赤者，陽道尚左，故天左旋；周以木德王，火是其子，左行用其赤色也。」《家語·五帝篇》說五德之色云：「所尚各從其所王之德次，周人以木德王，尚赤，牲用騂。」王肅注亦謂「木家尚赤者，脩其母，致其子」。鄭意或與彼同。又《後漢書·章帝紀》李注引《禮緯》說，周爲天正，色尚赤。《春秋繁露·三代改制質文篇》、《公羊》隱元年何注、《白虎通義·三正篇》引《尚書大傳》，說並同。此別從三正所尚，與論德運者異，而以周爲尚赤則一也。又古說或云周火德，詳《大司樂》疏。云「毛之，取純毛也」者，即下云「牲物」是也。《小宗伯》「毛六牲」，注云：「毛，擇毛也。」《國語·楚語》云：「毛以示物。」《山海經·南山經》「凡雉

山之首，其祠之禮毛」。郭注云：「毛言擇牲取其毛色也。」《祭義》云：「古者天子諸侯必有養獸之官，及歲時，齊戒沐浴而躬朝之，犧牲祭牲必於是取之，君召牛納而視之，擇其毛而卜之吉，然後養之。」此毛之即所謂擇其毛也。擇牲取其純色謂之毛，故《公羊》文十二年傳，以不純色爲不毛矣。云「陰祀，祭地北郊及社稷也」者，《漢書·郊祀志》：「王商、師丹、翟方進等議云：『祭地於太折在北郊，就陰位也。』《神仕》注云：『地物，陰也。』此但舉地而不及物，彪者，以百物入後時祭用牲物內，不定用黝牲也。北郊祭地，祭九州之總帀，詳《典瑞》疏。賈疏云：「但天神與宗廟爲陽，地與社稷爲陰。案：《大宗伯》云『蒼璧禮天，黃琮禮地』，謂圜丘、方澤。下云『牲幣各放其器之色』，則昊天與崑崙牲用蒼用黃，四時迎五方天帝，又各依其方色牲，則非此騂牲黝牲。惟有郊天地及宗廟、社稷一等，不見牲色，在此陽祀陰祀之中可知。案：《郊特牲》云『社祭土而主陰氣也』，是社稷稱陰。《孝經緯鉤命決》云：『祭地於北郊，就陰位。』彼對郊天就陽位，則是神州之神在北郊而稱陰，以是知陰祀中有祭地於北郊及社稷也。」《南齊書·禮志》云：「何佟之奏：『《牧人》云『凡陽祀用騂牲，陰祀用黝牲』。《祭法》云：『燔柴於泰壇，祭天也；瘞埋於泰折，祭地也。用騂

犢。」鄭云：「地陰祀用黝牲，與天俱用犢，故連言之耳。」知此祭天地即南北郊矣。」詒讓案：此陽祀當兼圜丘及五帝，陰祀當兼方丘及五帀言之。大宗伯禮天地四方，牲各依玉色，乃告禮方明，非正祭也。鄭彼注以爲圜丘方丘祭天地，與南北郊異牲，失之。詳彼疏。又案：賈疏謂社稷亦用黝牲，是也。《詩·周頌·良耜》云：「秋報社稷也。」其詩云「殺時惇牡」，毛傳云：「黃牛黑脣曰惇。」孔疏云：「社稷用黝牛，色以黑而用黃者，蓋正禮用黝；至於報功，以社是土神，故用黃色，仍用黑脣也。」案：秋報即祭社稷之正禮，孔說非也。《爾雅·釋畜》云：「黑脣惇。」郭注云：「此宜通謂黑脣牛。」然則詩言惇牡，不妨爲黝牛黑脣。毛云黃牛，以牛黃者多耳，此與社稷用黝牲之義，固不相礙矣。云「望祀，五嶽、四鎮、四瀆也」者，即《大宗伯》之四望也。詳彼疏。四望牲用方色者，若祀岱嶽、沂山、洙瀆，則牲用青色，餘並放此。又案《男巫》亦云「望祀」，彼注疏謂祭類造禴祭之神，則不專屬四望，與此望祀義微異，亦詳彼疏。鄭司農云「陽祀，春夏也」者，《春秋繁露·官制象天篇》云：「四時天之四選：春者少陽之選也，夏者太陽之選也，秋者少陰之選也，冬者太陰之選也。」是春夏爲陽也。又《史記·封禪書》載秦祠雍四時上帝、陳寶，牲並春夏用

駢，秋冬用駢。漢時蓋猶沿其制，故先鄭以此陽祀用駢爲春夏，則陰祀用黝爲秋冬也。其說於經無徵，故後鄭不從。云「黝讀爲幽，幽，黑也」者，《守桃》注同。段玉裁改經「黝牲」爲「幽牲」，注爲「幽讀爲黝，黝，黑也」，云：「經文注文當如是。今本經作『黝』，注幽黝互譌，由或以注改經，復或以已改之經改注之故也。《守桃職》曰「幽聖之」，注：「鄭司農幽讀爲黝，黝，黑也。」引《爾雅》地謂之黝。今本譌舛，與此正同。《釋文》兩云「黝，司農音幽」，然則其誤在陸氏已前矣。《說文》：「幽，隱也。」幽有黑意，不得徑訓黑也。《玉藻》「一命緼紱幽衡，再命赤韞幽衡」。鄭君云：「幽讀爲黝，黑謂之黝。」以《禮記》證《周禮》，事甚顯白。《鷄人》注「陽祀用駢，陰祀用黝」。不作幽，又其證也。又案：《小雅·隰桑》「其葉有幽」，毛傳：「幽，黑色也。」然則幽黝古今字，先後鄭皆以今字讀古字。」案：段說是也。《南齊書·禮志》何佟之議引此注，直云「黝，黑也」。疑所見本尚不誤。黝訓黑者，《爾雅·釋器》云：「黑謂之黝。」郭注云：「黝，黑貌。」《說文·黑部》云：「黝，微青黑色。」云「玄謂陽祀，祭天於南郊及宗廟」者，《神仕》注云：「天、人、陽也。」南郊祭天，祭受命帝也。詳《典瑞》疏。《春秋繁露·三代改制質文篇》說周正赤統，郊牲駢，祭牲駢牡。又《郊

事對》云「魯郊用純駢犗」。並與鄭說同。賈疏云：「案《郊特牲》云：「郊之祭也，大報天而主日。兆于南郊，就陽位也。牲用駢。」是南郊用駢也。《檀弓》云：「殷尚白，周尚赤。」是祭宗廟用赤也。據此而言，則祭天於南郊及宗廟用駢也。後鄭先解陰祀，後釋陽祀者，陽祀待先鄭釋訖，隨後破之故也。」詒讓案：《詩·魯頌·閟宮》云：「皇皇后帝，皇祖后稷，享以駢犧。」箋云：「皇皇后帝，謂天也。成王以周公功大，命魯郊祭天亦配之以君祖后稷，其牲用赤牛純色，與天子同也。」此郊祀用駢之證。《書·洛誥》云：「烝祭歲，文王駢牛一，武王駢牛一。」《詩·周頌·烈文》孔疏引鄭《書注》，以爲特袷祭文武。《白虎通義·三正篇》云：「《詩》曰「清酒既載，駢牡既備」，言文王之牲用駢，周尚赤也。」案：班所引者，《大雅·旱麓》篇文。《小雅·信南山》亦有「清酒駢牡」之文。毛傳義與班同。據《詩》《書》所言，則周祭宗廟，后稷、文、武並用駢。而《公羊》文十三年說魯牲云：「周公用白牡，魯公用駢犗，羣公不毛。」何注云：「白牡，殷牲也。駢犗，赤脊，周牲也。不毛，不純色。」《詩·閟宮》亦云「白牡駢剛」，毛傳同《公羊》。是魯廟牲有三等，周公用殷牲。楊子《法言·君子篇》云：「牛玄駢白睟而角，其升諸廟乎！」蓋通三統言之。周廟牲則先王先

公用騂，當無異也。又周制，凡郊丘配食之人皆用騂牲。

四月大雩，九月大饗，亦陽祀，其牲並同。《郊特牲》孔疏謂各依方色，非也。互詳《大宗伯》疏。又案：《史記·封禪

書》云：「秦襄公既侯，居西垂，自以爲主少皞之神，作西時，祠白帝，其牲用騂駒、黃牛、羝羊各一云。」此祀白帝亦不用方色牲，騂黃與騂色相近，或亦陽祀用騂之意與？

凡時祀之牲，必用牲物。時祀，四時所常祀，謂山川以下至四方百物。【疏】「凡時祀之牲必用牲物」者，亦

謂純色也。賈疏云：「對上方色是隨其方色，下用龍，龍是雜色，則此牲物者，非方非雜，雖不得隨方之色，要於一身之上其物色須純，其體須完，不得雜也。假令東方或純黃、純黑，南方或純白、純青，皆得也。」注云「時祀，四時所

常祀，謂山川以下至四方百物」者，謂祀有定時，著在常典者也。賈疏云：「案《司服》山川羣小祀，林澤四方百物在

四望下。此文云「天地四望」，此「時祀」又在「四望」下。

又四方山川之等亦依四時而祀，故知時祀是山川至百物，鄭唯據地之時祀。若天之時祀，日月已下亦在此時祀中

也。」案：依鄭、賈說，則山川林澤以下牲無定色，但不用龍而已。王氏《訂義》引崔靈恩說，謂祭山川牲玉各放其方之色，則凡山川牲亦依方色，與四望等。《論語·雍也》皇疏

義同。《大戴禮記·曾子天圓篇》云：「山川曰犧牲。」盧注云：「色純曰犧。體完曰牲。山川謂岳瀆。以方色，角尺。其餘用麋索之。」此謂餘山川皆用麋，並與鄭義不合。又

《南齊書·禮志》云：「劉繪議：『《語》云：「犁牛之子騂且角，雖欲勿用，山川其舍諸？」未詳山川合爲陰祀不？若

在陰祀，則與黝乖矣。』何佟之議：『《周禮》以天地爲大祀，四望爲次祀，山川爲小祀。周人尚赤，自四望以上牲色各

依其方者，以其祀大，宜從本也。山川以下牲色不見者，以其祀小，從所尚也。則《論》、《禮》二說豈不合符。』案：依

何議，則山川降於四望，牲雖不依方色，而當從周所尚之色用騂牲。此說亦與鄭不合。惠士奇云：「犁牛之犢，體純

騂而角繭栗，此天牲也。未有歆於上帝而吐於山川者，故曰山川其舍諸。說者據此以爲山川用騂牲，誤矣！」案：

惠說是也。凡外祭毀事，用龍可也。外祭謂表貉

及王行所過山川用事者。故書毀爲龍，龍作龍。杜子春云：「龍當爲毀，龍當爲龍。龍謂雜色不純，毀謂副辜侯禳

毀除殃咎之屬。」【疏】注云「外祭謂表貉及王行所過山川

用事者」者，賈疏云：「知外祭中有表貉者，據上文外神之中，已云天地至四方百物，依時而祭者已盡，此別言外祭，

則外祭中唯有表貉之等。案《大司馬》，田獵之時，立表而

貉祭。《司几筵》云「貉用熊席」。又知外祭中有王行所過山川用事者，案《校人》云：「凡將事于四海山川，則飾黃駒。」《大祝》云：「大會同，過大山川則用事焉。」亦是非常外祭之事。若然，此云龍，校人用黃駒者，從地色黃，亦據龍中有黃色者用之，不必純。」案：表貉，詳《肆師》疏。云「故書毀爲甌，龍作龍，杜子春云甌當爲毀，龍當爲龍」者，段玉裁云：「此皆字之誤也。甌毀相似，龍龍相似。」《巾車》「龍勒」，龍，駢也。「駢車」，故書駢作龍。《玉人》「上公用龍」，龍當爲龍。然則經文龍雜字多作龍。」徐養原云：「《說文·自部》：「陞，危也。从自从毀省。班固說：不安也。《周書》曰：邦之既陞。」又《出部》：「甌，樂甌，不安也。《易》曰：樂甌。」又《瓦部》：「甌，康瓠破罍，从瓦甌聲，或从執作甌。《易》之「樂甌」即《書》之「既陞」，既與甌同，陞與樂同。陞字既从毀，而樂字古文假借以爲甌字。甌从甌或又从執，是从毀从甌从執之字，互相爲用。又甌爲破罍，《廣雅》云「裂也」。破裂亦即毀缺之義。《說文·土部》：「毀，缺也。」又《缶部》：「缺，器破也。」故毀字可轉爲甌。」又云：「《巾車》與《犬人》俱作駢，《玉人》與此經俱作龍，駢龍古亦通用。」云「龍謂雜色不純」者，《玉人》注義同。《犬人》字作駢。先鄭注亦云「謂不純色也」。《說文·犬部》云：

「龍，犬之多毛者。」又《馬部》云：「駢，馬面類皆白也。」《牛部》云：「犛，白黑雜毛牛。」龍駢犛聲同，義並相近。凡毛物一色者謂之純，雜二色以上謂之龍，《論語·雍也》謂之犁，即《公羊》文十三年傳所謂不毛也。《國語·晉語》云「以龍衣純」，韋注亦云「雜色曰龍」。云「毀謂副辜侯懷毀除殃咎之屬」者，賈疏云：「案《宗伯》云「驅辜祭四方百物」，而引九門磔攘。又案《小祝職》云：「將事侯懷。」皆是禱祈除殃咎非常之祭用龍之類，故引以爲證也。」詒讓案：杜謂此毀事即《鬯人》所云鬯事也。《犬人》云「凡幾珥沈辜用駢可也」，此云「副辜」，與彼辜同。毀者，毀折性體之言。幾珥沈辜及此注之侯懷，皆有披磔性體，即《大戴禮·曾子天圓篇》所云「割列懷瘞」，故並謂之毀事。《國語·周語》隨會問穀烝，云「吾聞王室之禮無毀折」，與此事異而義同。杜以毀除殃咎爲釋，殊未當。「副辜」《大宗伯》作「鬯辜」，副篆文，鬯籀文，詳《大宗伯》疏。又案：《犬人》沈辜，沈謂祭川，辜謂祭四方百物。依上注義，山川四方百物用牲物者，謂四時常祀不得用龍。此毀事及《犬人》沈辜，內山川四方百物有用龍者，謂非時而祭，則得用龍。二文不相妨也。凡祭祀，共其犧牲，以授充人繫之。犧牲，毛羽完具也。授充人者，當殊養之。周景王時，賓起見雄

雞自斷其尾，曰「雞憚其爲犧」。【疏】「以授充人繫之」者，繫，疑當作「馭」，下同，詳《司門》疏。賈疏云：「牧人養牲，臨祭前三月，授與充人繫養之。」案：此當牧人共牲與牛人、羊人等，又與牛人、羊人等同授充人也。賈說未析。

注云「犧牲，毛羽完具也」者，《說文·牛部》云：「犧，宗廟之牲也。」《詩·魯頌·閟宮》「享以騂犧」，毛傳云：「犧，純也。」《曲禮》「天子以犧牛」，注云：「犧，純毛也。」賈《犬人》疏引鄭《書注》，義同。《御覽·職官部》引韋昭《辯釋名》云：「充六牲，取其毛純者別養之，以奉祭祀。純色者少，故名犧。犧，希也。」案：韋訓犧爲純色，《書·微子》「僞孔傳」《月令》孔疏引王肅《大戴禮記·曾子天圓篇》盧注，說並同。此與鄭純毛義亦不異。此注兼言完具，則當含角體言之，校《曲禮》注義尤備也。賈疏云：「犧牲不云牲，則惟據純毛者；而鄭云完具者，祭祀之牲若直牲，未必純犧，若犧則兼牲可知，故鄭以完具釋犧。」詒讓案：祭牲必毛純體完，諸說多偏舉一隅。實則《禮經》凡賓客膳羞之牲，得稱牲牲，而不得稱犧，明犧爲祭牲之專名。許解與此經膾合，足通該諸義。《左》昭二十五年傳云：「爲六畜五牲三犧以奉五味。」彼三犧蓋指牛羊豕。杜注云「祭天地宗廟三者謂之犧」，義未允。孔疏引服虔以爲雁鶩雉，則尤謬說

也。云「授充人者，當殊養之」者，若《充人》云繫于牢，繫於國門，是殊別於牧羣也。云「周景王時，賓起見雄雞自斷其尾，曰雞憚其爲犧」者，賈疏云：「此《春秋左氏傳》昭二十二年：『王子朝、賓起有寵于景王，王與賓孟說之，欲立之。』」又云：「賓孟適郊，見雄雞自斷其尾，問之，侍者曰：『自憚其犧也。』」遽歸告王，且曰：『雞其憚爲人用乎？人異於是。』」注：「犧者，以喻人之有純德，實宜爲君。」彼直云「自憚其犧」，不云「雞」，鄭以義增之耳。引之者，證犧是純色之意也。」案：賈所引《左傳注》，與杜注異，蓋賈、服舊注。此引《左傳》者，證犧牲必毛羽完具之意，賈謂證純色，非。又案：凡牲皆貴牡，故《傳》云「雄雞」，經典凡說祭牲，云玄牡、白牡、騂牡皆是也。《月令》：「孟春，乃修祭典，命祀山林川澤，犧牲毋用牝。」注云：「爲傷妊生之類。」孔疏云：「以山林川澤其祀既卑，餘月牲皆用牝，唯此月不用。若天地宗廟大祭之時，雖非正月，皆不用牝。」依孔說，則凡大祀牲皆用牡，中小祀以下則間有用牝者。《詩·小雅·伐木》說燕牲，云「肥牡」，則賓客饗食燕牲亦貴牡與？凡牲不繫者，共奉之。謂非時而祭祀者。【疏】「凡牲不繫者共奉之」者，直送祭有司，不授充人也。注云

「謂非時而祭祀者」者，據《充人職》散祭祀之牲亦有繫，則

常祀不辨大小皆繫牲。明不繫者非歲時常祀，蓋因事告祭及祈禱之屬。賈疏云：「謂若上文凡外祭毀事用牝可也。」

牛人掌養國之公牛以待國之政令。公猶

官也。【疏】「以待國之政令」者，謂共性及役，有司以法令此官共之也。

注云「公猶官也」者，《巾車》注同。公牛謂在官之牛，別於私家畜牧也。凡祭祀，共其享牛、

求牛，以授職人而芻之。鄭司農云：「享牛，前祭

一日之牛也。求牛，禱於鬼神，祈求福之牛也。」玄謂享，獻也。獻神之牛，謂所以祭者也。求，終也。終事之牛，謂所

以繹者也。宗廟有繹者，孝子求神非一處。職讀爲犧。犧謂之牼，可以繫牛。犧人者，謂牧人、充人與？芻，牲之

芻。牛人擇於公牛之中而以授養之。【疏】「凡祭祀共其

享牛、求牛」者，共內外大祭祀之牛牲也。《王制》云：「祭

天地之牛，角繭栗；宗廟之牛，角握。」《公羊》僖三十一年，

何注云：「禮，祭天牲角繭栗，社稷、宗廟角握，六宗、五嶽、

四瀆角尺。」《禮器》孔疏引《禮緯稽命徵》，說同。《穀梁》哀

元年傳說郊牲云：「我以六月上甲始庀牲，十月上甲始繫

牲。」然則凡祭祀，皆先庀牲而後授繫。此牛人共祭祀之

牛，蓋受牲於牧人，亦先庀之而後授繫之也。注鄭司

農云「享牛，前祭一日之牛也」者，謂將祭之夕，夕牲之牛也。賈疏云：「若以此爲祭前一日夕牲時而言，仍是正祭

牛，則不應以正祭而云前祭一日。若不據祭祀，以爲齊時

所食，齊則十日，不應惟止一日而已。其言無據，故後鄭不

從也。」云「求牛，禱於鬼神，祈求福之牛也」者，《說文·示

部》云：「祈，求福也。」謂若《大祝》之六祈，後鄭彼注云「造

類禴祭皆有牲」是也。賈疏云：「案上文「凡牲不繫者共奉

之」，謂非時而祭則不繫之。此經授職人繫之，明非禱祈非

時祭者，故後鄭亦不從也。」云「玄謂享，獻也」者，《爾雅·

釋詁》文。《大祝》、《玉人》注並同。詳《大宗伯》疏。二云「獻

神之牛，謂所以祭者也」者，即正祭之牛牲也。獻神，關天

神、地祇、人鬼言之。賈疏引《宗伯》六享爲釋，則似專屬享

先王之牛，非也。云「求，終也」者，《爾雅·釋詁》文。云

「終事之牛，謂所以繹者也」者，《爾雅·釋天》云：「繹，又

祭也。周曰繹，商曰彤，夏曰復昨。」《春秋》宣八年經：「夏

六月辛巳，有事于大廟。仲遂卒于垂。壬午猶繹。」《穀梁

傳》云：「繹者，祭之旦日之享賓也。」《公羊》何注云：「禮，

繹繼昨日事，但不灌地降神爾。天子諸侯曰繹，大夫曰賓

尸，士曰宴尸。」又《毛詩·周頌·絲衣序》云：「繹，賓尸

也。」鄭彼箋云：「繹，又祭也。天子諸侯曰繹，以祭之明日。卿大夫曰賓尸，與祭同日。」後鄭意，繹爲正祭之明日，尋繹而復祭，因以賓尸，祭事至此而終，故云終事也。《有司徹》載大夫之禮，同日賓尸而無又祭，故惟云「燾尸俎」，明不特殺。此天子禮，異日又祭而後賓尸，當別用牲，則牛人特共之。故《絲衣》云「自羊俎牛」，鄭箋釋爲視牲從羊之牛反告充。是天子諸侯禮與大夫以下異也。繹禮亦詳《司几筵》疏。陳祥道云：「《郊特牲》曰：『帝牛不吉，以爲稷牛，稷牛唯具。』享牛卜而後用，求牛具而不必卜。求牛猶《曲禮》所謂『索牛』，《左傳》所謂『索馬牛』也。」劉敞說同。惠士奇云：「凡祭祀前三日擇牲，君召牛納而視之，擇其毛而卜之，是爲求牛。求猶擇也。卜吉而後養之，是爲享牛。《曲禮》『天子以犧牛，諸侯以肥牛，大夫以索牛』。康成云：「犧，純毛也。肥，養於滌也。索，求得而用之。」孔疏謂此皆上得兼下，下不得僭上。《公羊》云：「帝牲必在滌三月，稷牛唯具。」稷有災故臨時得別求之，是天子諸侯得有索牛。然則求牛即索牛歟？」案：陳、惠說校二鄭爲長。蓋凡大祭祀，牛必卜繫，其別擇以備臨時有故更易者，則不卜繫，此即享牛、求牛之義。但天子求牛，雖不卜繫，然亦必用犧牲。《曲禮》及《左傳》索牛之義，與求牛義雖互通，

然天子祭牲與大夫索牛，種物實不同也。云「宗廟有繹者，孝子求神非一處」者，《司几筵》注云：「王祭宗廟，裸於室，饋食於堂，繹於祊。」是三者各異處，故云求神非一處。《禮器》云：「設祭于堂，爲祊于外。」鄭彼注云：「祊祭，明日之繹祭也。謂之祊者，於廟門之傍，因名焉。其祭之禮，既設祭於室，而事尸於堂，孝子求神非一處也。」彼注義與此同。然《禮器》乃正祭之祊，實與繹異，鄭合爲一，未安，亦詳《司几筵》疏。又案：此注云孝子求神非一處者，泛釋宗廟之祭必有繹之義，非以求神釋經之求牛也。蓋鄭既據《爾雅》訓求爲終，又申之曰終事之牛，則不謂求牛取求神之義可知。賈疏謂《郊特牲》云「祭於祊尚曰求諸遠者與」，是名繹祭爲求也，亦非鄭指。云「職讀爲犧」者，《肆師》注同。段玉裁云：「以職爲犧，同音假借字也。」孔廣森云：「《牛人》、《肆師》兩見『職人』之文，注並讀職爲犧。蓋古文字少，別無犧之職字也。《國語·周語》曰『牧協職』，可證此職人之義。」云「犧謂之杙，可以繫牛」者，犧謂之杙，《爾雅·釋宮》文。郭注云「繫也」。《說文·木部》云：「犧，弋也。杙，劉杙。」又《厂部》云：「弋，繫也。象折木袞銳著形。厂，象物挂之也。」案：劉杙，木名，見《爾雅·釋木》。段借爲繫弋字，正字當作弋。《儀禮經傳通解續》引《尚書

大傳云：①「繫竈者有容，椓杙者有數，大廟之中續乎其猶模繡也。」鄭彼注云：「杙者，繫牲者也。」蓋機弋者，折木褻銳，可椓於地。廟中凡牲皆繫於弋，不徒牛也。《莊子·人間世篇》云：「拱把而上，求狙猴之杙者斬之。」則繫獸亦用杙矣。云「機人者，謂牧人充人與」者，賈疏云：「與，疑辭。疑之者，凡牲堪祭祀者，則牛人選入牧人。臨祭之前，牧人乃授充人，充人乃繫養之。今若即以機人為充人，則隔牧人，故連牧人而言之。明先至牧人，乃至充人，經據後而言之耳。」段玉裁云：「牧人授充人繫之，充人繫祭祀之牲牲，繫必有杙，故謂牧人充人為機人也。」詒讓案：《肆師》「大祭祀展犧牲，繫于牢，頒于職人。」注云：「職人謂充人及監門人。」彼注職人有監門人無牧人者，以經無正文，故兩解小異，亦以凡掌養繫牲者，並得為職人與？凡牲未殺之前，皆繫於職，充人唯特繫祭祀耳，非在牧人便不繫於職也。《周語》「牧協職」，韋注亦謂即此經牧人。又《孟子·萬章篇》云：「孔子嘗為乘田矣，曰牛羊茁壯長而已矣。」趙注云：「乘田，苑囿之吏也。主六畜之芻牧者也。」《史記·孔子世家》則云「嘗為司職吏，而畜蕃息」。司職吏蓋即職人，亦即牧人也。《孟子》云「乘田」者，「乘甸」之段字，凡野田通稱甸。載師以牛田牧田任近郊之地，牧人於

彼芻牧謂之乘田，猶掌近郊藉田之官謂之甸師矣。但牧人雖可稱職人，而此經職人則似不兼牧人，當以《肆師》注為正。凡牲牛，皆牧人以共牛人，牛人以授充人等，不得牛人復授牧人也。賈說失之，詳《牧人》疏。云「芻，牲之芻」者，《說文·艸部》云：「芻，刈艸也。」《小爾雅·廣物》云：「稌謂之稗，稗謂之芻，生曰生芻。」是凡以草及禾稌飢牲，並謂之芻。正字當作櫛，詳《充人》疏。云「牛人擇於公牛之中，而以授養之」者，謂於公牛之中，擇其中祭祀之用者，以授職人，使芻而養之。凡賓客之事，共其牢禮積膳之牛，牢禮，飧饗也。積，所以給賓客之用，若《司儀職》曰「主國五積」者也。膳，所以閒禮賓客，若《掌客》云「殷膳大牢」。【疏】「凡賓客之事，共其牢禮積膳之牛」者，以下二經並共賓客之牛也。《曲禮》云：「賓客之牛角尺。」賈疏云：「謂五等諸侯來朝，兼有臣來聘，皆共牢禮積膳之牛也。」注云「牢禮，飧饗也」者，謂賓客始至則致飧，既朝聘則致饗，皆有牲牢，故云牢禮。《郊特牲》云：「諸侯適天子，天子賜之禮大牢。」亦謂是也。飧饗，詳《宰夫》、《外饗》

①「通解」原誤倒，今乙正。

疏。賈疏云：「此一經皆謂致與賓客者。下云饗食，是速賓之禮也。案：《大行人》、《掌客》皆云「上公飧五牢，饗餼九牢，五積；侯伯飧四牢，饗餼七牢，四積；子男飧三牢，饗餼五牢，三積」。積之多少，各視飧牢，其膳則五等諸侯皆大牢，故云牢禮飧饗也。」云「積，所以給賓客之用」者，積即委積也。《宰夫》注云：「委積，牢米薪芻，給賓客道用也。」又《掌客》上公五積等云「皆眠飧牽」，注云：「牽牲以往，不殺也。」是賓客之積有牲牢，其牛亦牛人共之。云「若《司儀職》曰，主國五積者也」者，證賓客有致積。彼說諸公相朝之禮，天子待朝聘賓客禮亦略同。云「膳，所以閒禮賓客」者，賈疏云：「謂賓客未去之間致禮也。」云「若《掌客》云殷膳大牢」者，賈疏云：「彼注云「殷，中也」，中間未去，即是閒禮賓客也。」饗食、賓射，共其膳羞之牛；羞，進也，所進賓之膳。《燕禮》，小臣請執冪者與羞膳者，至獻賓而膳宰設折俎。王之膳羞亦猶此。【疏】「饗食賓射」者，《小臣》注云：「賓射，與諸侯來朝者射。」凡賓射於朝，詳《大宗伯》疏。經舉饗食而不及燕，舉賓射而不及燕射者，天子諸侯燕有不射，而射無不燕，故舉射可以見燕也。賈疏云：「饗者，亨大牢以飲賓，獻依命數。食者，亦亨大牢以食，食禮九舉、七舉、五舉，亦依命數，無酒獻酬

耳。皆在於廟以速賓。射者，謂大射及與賓客射于朝。天子諸侯射先行燕禮，皆有殺俎，故有牛也。」案：據賈說，則經又兼見大射膳羞之牛，亦足補注義也。云「共其膳羞之牛」者，賈疏云：「謂獻賓時宰夫所進俎是也。」注云

「羞，進也」者，《膳夫》先鄭注同。云「所進賓之膳」者，明經膳羞同物也。云《燕禮》小臣請執冪者與羞膳者，至獻賓而膳宰設折俎，王之膳羞亦猶此」者，賈疏云：「案《燕禮》立賓後，公卿大夫升就席，小臣阼階下北面請執冪者與羞膳者。注云「執冪者，執瓦大之冪也。方罍壺無冪。羞膳者，羞於公，謂庶羞」云云。至主人獻賓，「賓西階上拜，筵前受爵，反位，主人賓右拜送爵。膳宰薦脯醢。賓升筵，膳宰設折俎」。此王與賓饗及賓射，設俎時節及設人無文，故云王之膳羞亦猶此也。若然，饗食有牛俎。至於射禮，天子諸侯皆先行燕禮，其牲猶得有牛者，但天子諸侯雖用燕禮，直取一獻之禮，未旅而行射節，其用牲，則《左傳》云「公當饗」，雖然，燕禮亦用牛，與饗同。若然，云膳羞則庶羞也。不言正俎之牛者，據庶羞而言，其實兼正俎矣。」案：《燕禮記》云：「其牲狗也。」《鄭目錄》以彼為諸侯燕羣臣之禮。此經天子射前之燕有牛，故賈謂天子禮異。《詩·小雅·伐木》云：「燕朋友故舊也。」其詩云「既有肥羜」，孔疏謂天子燕禮異於諸侯。以《詩》及此經相參證，天子燕牲

其用大牢與？^①案：鄭說膳羞同物，故賈謂即庶羞也。

今攷膳，當即《膳夫》所云「膳用六牲」，謂正俎也。羞當即《膳夫》之「羞用百二十品」，乃專指庶羞言之。饗食燕並以正俎爲重，經不當以庶羞駭正俎，鄭、賈說非經情。軍

事，共其槁牛；鄭司農云：「槁師之牛。」【疏】「軍事共

其槁牛」者，共軍旅勞賜之牛也。槁，舊本誤「槁」。唐石經

及宋余仁仲本、小字本、宋注疏本、葉鈔《釋文》並不誤。賈

疏云：「謂將帥在軍枯槁之賜牛，謂之槁牛也。」阮元云：

「經注皆本作槁，賈疏未誤。《序官·稟人》疏亦云「枯槁須

槁勞之，故名其官爲槁人」。案：阮說是也。注鄭司

農云「槁師之牛」者，槁，舊本亦誤「槁」，今依余本正。賈疏

云：「案《左氏傳》僖公三十三年，^①秦師襲鄭，鄭商人弦高

將市於周，遇之，以乘韋先牛十二槁師。雖非己之軍師，亦

是槁師之牛，故引以爲證也。」喪事，共其奠牛。謂殷

奠、遣奠也。喪所薦饋曰奠。【疏】「喪事共其奠牛」者，此

共喪奠之牛牲，以屬凶禮，故不與前祭祀共牛爲類。

注云「謂殷奠遣奠也」者，賈疏云：「喪中自未葬已前無尸，

飲食直奠停置于神前，故謂之爲奠。朝夕之奠，無尊卑，皆

脯醢酒而已，無牲體。殷，大也。唯有小斂、大斂、朔月、月

半、薦新、祖奠及遣奠時有牲體。大遣奠非直牛，亦有馬牲

耳。詒讓案：喪奠有十，其始死及朝夕奠無牲體；小斂奠

以下禮盛，有牲體，故謂之殷奠；大遣奠禮尤盛，故於殷奠

之外別言之。殷奠，詳《籩人》疏。遣奠，詳《大史》疏。云

「喪所薦饋曰奠」者，《說文·丁部》云：「^②奠，置祭也。从

酋，酋，酒也。下其丁也。禮有奠祭者。」《釋名·釋喪制》

云：「喪祭曰奠。奠，停也，言停久也。亦言樸奠，合體用

之也。」凡會同、軍旅、行役，共其兵車之牛，與

其牽徬，以載公任器。牽徬，在轅外輓牛也。人御

之，居其前曰牽，居其旁曰徬。任猶用也。【疏】「凡會同、

軍旅、行役」者，賈疏云：「會同軍旅兼言行役，謂王行巡守

皆六軍從也。」云「共其兵車之牛」者，此共任載之牛也。賈

疏云：「但兵車駕四馬之外，別有兩轅駕牛以載任器者，亦

謂之爲兵車。」案：賈說是也。此兵車即《車人》之大車，直

轅駕牛，與《輪人》兵車曲輶駕馬者異，《司馬法》又謂之重

車。天子六軍重車之數，無文。吉天保《孫子集注》引曹

操、杜牧說及《李靖問對》引《曹公新書》，並謂兵車一乘，重

① 原脫「僖」，據楚本補。

② 「丁」原訛「酋」，據《說文》改。

車亦一乘，是六軍之重車凡三千乘也。《韓非子·外儲說篇》說一車之任不過三十石。兵車一乘凡二十五人，此其衣裝、任器、糗糧、芻茭爲數甚多，固宜專車以載之矣。況以丘乘出車之法校之，《詩·小雅·信南山》孔疏引《司馬法》說，甸出長轂一乘，馬四匹，牛十二頭。彼牛多於馬至二倍，雖不必盡以駕車，然可證重車之數必不減於兵車也。鄉遂車牛出於公家，與丘甸不同，六軍之牛，大數當有萬餘。蓋皆此官共以授鄉遂七萬五千家養之，臨用又掌其簡比之事。互詳《夏官·敘官》疏。

注云「牽傍，在轅外輓牛也」者，《說文·車部》云：「輓，引車也。」謂在轅外引車之牛。賈疏云：「上云兵車之牛，據在轅內者；別言與其牽傍，故云在轅外輓牛也。」云「人御之，居其前曰牽，居其旁曰傍」者，釋牽傍之名義也。《罪隸》注云：「在前曰牽，在旁曰傍。」《說文·牛部》云：「牽，引而前也。」又《彳部》云：「傍，附行也。」《廣雅·釋言》云：「牽，挽也。」案大車駕牛之數，經注並無文。竊謂任載輜重不當減於駟馬車，疑亦駕四牛。但車人大車止一隔，與馬車二轅不同，則轅內止容一牛，與馬車輓下二服亦異。其三牛蓋分列轅外之前及兩旁，在旁者猶馬車之驂，其在前者亦不必正直轅前，當亦稍偏，或左或右，但較兩驂略前耳。大車之御，亦

當居車上以御轅內之牛。其轅外三牛，別以二人於車下御之，或牽引於前，或附傍於旁，因謂其牛爲牽傍。然則牽傍者即輓車之牛，而實據人御之而爲名。《罪隸》云：「牛助爲牽傍。」注云：「罪隸牽傍之。」《詩·小雅·黍苗篇》：「我任我輦，我車我牛。」箋云：「營謝轉餉之役，有負任者，有輓輦者，有將車者，有牽傍牛者。」將車即將轅內之牛者，牽傍即牽轅外之牛者。彼並據人而言。此經云「共其牽傍」，則據牛而言。牽傍之人，取諸罪隸，非牛人所共也。賈疏謂「以其在轅外，將御爲難，故特言人御之」。殊非鄭愜。云「任猶用也」者，《司隸》注同。《既夕禮》云：「用器：弓矢、耒耜、兩敦、槃匱。」此任器，猶彼言用器也。但彼用器，不盡軍旅行役所用；若軍旅用器，則《六韜·軍用篇》所說是也。凡祭祀，共其牛牲之互與其盆簠，以待事。鄭司農云：「互謂樞衡之屬。盆簠皆器名。盆所以盛血，簠受肉籠也。」玄謂互，若今屠家縣肉格。【疏】注鄭司農云「互謂樞衡之屬」者，《說文·竹部》云：「筥，可以收繩也。重文互，筥或省。」先鄭蓋讀互如邇互之互，故以樞衡釋之。衡邇樞互，並詳《封人》疏。云「盆簠皆器名」者，《說文·木部》云：「有所盛爲器，無所盛爲械。」

肉格六牲同名互矣。

充人掌繫祭祀之牲牷。祀五帝，則繫

于牢，芻之三月。牢，閑也。必有閑者，防禽獸觸齧。

養牛羊曰芻。三月，一時，節氣成。【疏】「掌繫祭祀之牲

牷」者，繫，疑當作「繫」，下同，詳《司門》疏。繫牲，即《牧

人》注所謂「殊養之」。《墨子·明鬼篇》云「犧牲不與昔聚

羣」是也。牷亦謂純色也。云「祀五帝則繫于牢」者，賈疏

云：「上云掌繫祭祀之牲牷，則摠養天地宗廟之牲。下別

言祀五帝，則略舉五帝而已。其實昊天及地祇與四望，社

稷之等外神，皆繫之也。」注云「牢，閑也」者，《說文·

牛部》云：「牢，閑養馬牛圈也。」《晏子春秋·諫上篇》云：

「牛馬老于欄牢。」案：此牢以養牲，與《校人》十有二閑以

養馬二者義同。繫帝牲之牢，《郊特牲》及《公羊》宣三年傳

並謂之滌，鄭《禮記注》云：「滌，牢中所搜除處也。」又《公

羊》何注云：「謂之滌者，取其滌蕩潔清。」此經言牢不言滌

者，統言之，滌亦是牢也。云「必有閑者，防禽獸觸齧」者，

防所繫之禽獸自相觸齧也。《祭義》云：「三月繫，七日戒，

三日宿，慎之至也。」云「養牛羊曰芻」者，以芻養牲，因謂之

盆簋是器，別於互爲械也。云「盆所以盛血」者，《陶人》

云：「盆實二鬴，厚半寸，唇寸。」《說文·皿部》云：「盆，盎

也。」《方言》云：「甑謂之盎，自關而西或謂之盆，或謂之

盎。」《急就篇》「甑缶盆盎甕盎壺」，顏注云：「缶盆盎一類

耳。缶即盎也，大腹而斂口。盆則斂底而寬上。」案：盆瓦

器，故可以盛血。云「簋，受肉籠也」者，《說文·竹部》云：

「簋，宗廟盛肉竹器也。」《周禮》：「供盆簋以待事。」又，「籠，

一曰簋也。」《廣雅·釋器》云：「簋，簋，籠也。」云「玄謂互

若今屠家縣肉格」者，《文選》張衡《西京賦》云：「置互擺

牲。」薛綜注云：「互所以挂肉。」《一切經音義》引《蒼頡篇》

云：「格，槌架也。」《詩·小雅·楚茨》孔疏引此注，格作

「架」，蓋以義改之。又《爾雅·釋宮》云：「櫨謂之杙，長者

謂之閣。」格與閣聲同字通。縣肉格即挂肉長杙也。《呂氏

春秋·過理篇》云「肉圃爲格」，即此。賈疏云：「但祭祀殺

訖即有薦爛薦孰，何得更以肉縣于互乎？然當是始殺解

體未薦之時，且縣于互；待解訖乃薦之，故得有互以縣肉

也。故《詩》云「或剥或亨，或肆或將」。注云：「肆，陳也。」

謂陳於互者也。」案：賈引《詩》注，約《小雅·楚茨》毛傳

文。今本《詩傳》作互者，即互之別體。《易·大畜》六五爻

辭云：「豮豕之牙。」彼《釋文》引鄭注云「牙讀爲互」。蓋縣

芻。正字當作「櫛」，《說文·牛部》云：「櫛，以芻莖養牛也。」《墨子·天志上篇》云：「櫛牛羊，豢犬彘。」賈疏云：「此經云繫于牢芻之，惟據牛羊；若犬豕，則曰豢，又不繫之矣。」案：賈說非也。祭祀之犬，豢於槁人，非此官所掌。豢豕經雖無文，據《少牢饋食禮》注云：「禮，將祭祀，必先擇牲，繫於牢而芻之。羊豕曰少牢。」是鄭意豕亦先繫。後疏引《國語》孔晁注，說豕亦繫之三月，韋昭說同。《莊子·達生篇》云：「祝，宗人玄端以臨牢筴，說彘曰：吾將三月憐汝，十日戒，三日齋，藉白茅，加汝肩尻乎彫俎之上。」是豕非不繫之牆證也。云「三月一時，節氣成」者，《大戴禮記·本命篇》盧注云：「三月萬物一成。」賈疏云：「釋必以三月之意。案宣三年《公羊》云：『帝牲在于滌三月。』何休云：『滌，官名，養帝牲三牢之處也。三牢者各主一月，取三月一時，足以充其天性。』是其三月之義也。」詒讓案：《獨斷》云：「帝牲牢三月，在外牢一月，在中牢一月，在明牢一月，謂近明堂也。三月一時，已足肥矣；徙之三月，亦其潔也。」《鹽鐵論·毀學篇》云「郊祭之牛，養食耆年」，則與禮不合，不足據。

享先王，亦如之。【疏】「享先王亦如之」者，此繫內祭祀宗廟六享之牲也。《郊特牲》云：「帝牛不吉，以爲稷牛，帝牛必在滌三月，稷牛唯具，所以別事

天神與人鬼也。」彼指郊天以后稷爲配，稷雖人鬼，牛亦繫於滌三月，但有不吉，可以未繫者易之。故孔疏云：「凡帝牲稷牲，尋常初時皆卜取其牲，繫於牢，芻之三月。若臨時有故，乃變之也。」《公羊》宣三年，何注說稷牛云：「視其身體具無災害而已，不特養於滌官，所以降稷尊帝。」《家語·郊問篇》王注又云：「別祀稷時，牲亦芻之三月，配天之時，唯具之也。」此並謂配帝之稷牛不特繫，其說非也。此享先王亦人鬼，牲亦繫之三月，有故則易之，與郊之稷牛同。《詩·魯頌·閟宮》云：「秋而載嘗，夏而福衡。」箋云：「秋將嘗祭，於夏則養牲。」是廟享先時養牲之事也。凡散祭祀之牲，繫于國門，使養之。散祭祀，謂司中、司命、山川之屬。國門，謂城門司門之官。鄭司農云：「使養之，使守門者養之。」【疏】「凡散祭祀之牲，繫于國門，使養之」者，賈疏云：「不言三月，則或一句之內而已，不必三月也。其諸侯祭祀養牲，案楚昭王問于觀射父曰：『芻豢幾何？』對曰：『遠不過三月，近不過浹日。』孔注云：『遠，牛羊豕。近，犬雞之屬。』則諸侯祭祀養牲亦得三月及旬，則天子亦有浹日之義。若然，此散祭祀亦可浹日而已。」案：賈引《國語·楚語》文，韋注義與孔晁同。《檀弓》孔疏

述《國語》義，則謂牛羊必在滌三月，犬豕不過十日。二義小異。竊謂繫牲之遠近，當視其祭之大小，不以牲別。王涇《唐郊祀錄》云：「凡祭祀之牲，大祀在滌九十日，中祀二十日，小祀十日。」唐制最與古合。賈謂散祭祀浹日，則不辨大小牲，亦不盡從韋、孔說也。 注云「散祭祀謂司

中、司命、山川之屬」者，鄭意散祭祀即小祭祀，散者亞次於上之言也。《肆師》云「立小祀用牲」。彼注以爲司中、司命、風師、雨師、山川、百物。此注與彼義同。散義，詳《鹽人》疏。賈疏云：「見上文陽祀、陰祀、望祀皆云毛之，社稷、四望已入毛之科內。下別云凡時祀用牲物，其中無社稷、四望，唯有天神司中司命以上，地神山川以下，此散祭祀，則上時祀之神也。故知散祭祀，是司中以下。言之屬者，其中兼有林澤百物之等也。」案：賈謂此散祭祀即《牧人》時祀之神。彼時祀內有日月，故賈云「天神司中司命以上」。然鄭《肆師》注，以日月入次祀，則不得爲散祭祀可知。蓋鄭本不以此散祭祀與《牧人》時祀爲一，賈強合之，非鄭意也。但鄭注《酒正》「小祭」，與《肆師》「小祀」，義亦自相交互，詳《肆師》疏。云「國門謂城門司門之官」者，《司門》云「祭祀之牛牲繫焉」是也。官即官府，謂每門下士所治之處。鄭司農云「使養之，使守門者養之」者，明非司門

大夫士等自養之。《司門》云「監門養之」，注云「監門，門徒」是也。展牲，則告牲；鄭司農云：「展，具也。具牲，若今時選牲也。充人主以牲牲告展牲者也。」玄謂展牲，若今夕牲也。《特牲饋食之禮》曰「宗人視牲告充，舉獸尾告備」。近之。【疏】「展牲則告牲」者，牲謂純色，則亦告牲體完具可知。 注鄭司農云「展，具也」者，《鄉師》

後鄭注云：「展猶整具。」《肆師》「展犧牲」，後鄭注云：「展，省閱也。」與先鄭此注義亦相成，詳彼疏。云「具牲，若今時選牲也」者，先鄭以漢法凡祭祀之前有選牲之事，即此展牲，故舉以爲況。《肆師》「大祭祀，展犧牲，繫于牢，頒于職人」。彼亦繫頒之前展牲之事也。《祭義》說祭牲云：「君召牛納而視之，擇其毛而卜之吉，然後養之。君皮弁素積，朔月月半君巡牲，所以致力，孝之至也。」《穀梁》哀元年傳云：「郊牛日展。」又云：「我以六月上甲始庀牲，十月上甲始繫牲。」范注云：「庀，具也。」先鄭此注蓋兼《祭義》視牲、擇毛、巡牲及《穀梁》庀牲、展牲諸事言之。賈疏云：「先鄭以爲選牲時，後鄭不從者，若是選牲時，應在牧人，牧人選訖，始付充人；今既在繫養之下，乃言「展牲則告牲」，明非初選牲，故不從。」云「充人主以牲牲告展牲者也」者，謂展牲之有司若肆師之屬，方展時，充人則以牲牲告之。

云「玄謂展牲若今夕牲也」者，王應麟云：「《丙吉傳》：『子顯從祠高廟，至夕牲日，乃使出取齋衣。』顏師古注：『未祭一日，其夕展視牲具，謂之夕牲。』」詒讓案：後鄭意，經言展牲者有二。《肆師》之展犧牲，在繫牲之前，即先鄭所謂選牲也。蓋直視而擇之，無告牲之事。此展牲有告牲，乃《禮經》之視牲，《大宗伯》、《小宗伯》又謂之省牲，展、省、視，義並同也。蓋將繫則選牲，將用則視牲，二者皆得謂之展。《穀梁》云「郊牛日展」，則凡祭前巡視之事，通謂之展，展固非一次矣。此展牲行於將祭前一日之夕，故漢禮謂之夕牲。《續漢書·禮儀志》：「正月天郊夕牲。」劉注云：「《周禮》展牲，干寶曰『若今夕牲』。又，郊儀，先郊日，未晡五刻夕牲。太祝吏牽牲入，到榜，廩犧令跪曰：『請省牲。』舉手曰：『膺。』太祝令繞牲，舉手曰：『充。』是漢禮亦以夕牲爲省牲，又有告牲之事，與此同，故鄭及干氏並舉以爲況也。又案：此展牧即夕牲，告牲是告於人，與下碩牲告於神異。《公羊》成十七年，何注說郊禮云：「夕牲告牲后稷。」徐疏謂：「古禮郊之前日午后，陳其牲物，告牲之牲於后稷。」案：郊祀雖亦當有夕牲告牲之禮，然不當告於后稷，何、徐說並不足據。云「《特牲饋食之禮》曰，宗人視牲告充，舉獸尾告備，近之」者，彼注云：「充猶肥也。備，具。」賈疏云：

「以其天子禮亡，故舉以言焉。案彼宗人視牲告充，亦謂祭前之夕夕牲時。云舉獸尾者，士用兔腊，言獸尾止謂兔也。彼謂士禮，引證天子法，故云近之。」《禮運》孔疏云：「案《特牲禮》：陳鼎于門外，北面；獸在鼎南，東首；牲在獸西，西上北首。其天子諸侯夕省之牲，亦陳于廟門外，橫行西上。」碩牲，則贊。贊，助也。君牽牲入，將致之，助持之也。《春秋傳》曰：「故奉牲以告曰，博碩肥腍。」【疏】「碩牲則贊」者，碩牲謂祭日二裸後，王迎牲而入，有司以牲之肥碩告於神也。與上「展牲告牲」告於展牲之人異。賈疏云：「上經夕牲時，此經據正祭時。言碩牲者，謂君牽牲入廟，卿大夫贊幣而從，皆云博碩肥腍。此充人既是養牲之官，當助持牛紉而牽之。」注云「贊，助也」者，《州長》先鄭注同。云「君牽牲入，將致之，助持之也」者，致謂告而致之於神。《禮器》云：「君親牽牲，大夫贊幣而從。」又云：「納牲詔於庭。」注云：「納牲於庭時，當用幣告神而殺牲。」是其事也。此充人贊持紉，與大夫贊幣事異。引《春秋傳》者，《左》桓六年傳隨季梁語。彼下文又云：「謂民力之普存也，謂其畜之碩大蕃滋也，謂其不疾癘蠹也，謂其備腍咸有也。」杜注云：「膺亦肥也。博，廣也。碩，大也。」與此碩牲義正相應。依鄭義，此官助牽牛，不助告詔，則告碩

自有他官掌之。又此碩牲時，兼有封人歌舞牲之事，《封人》先鄭注謂亦云「博碩肥腍」。蓋告碩直誦言告之，故《左傳》云「奉牲以告」。封人則爲之歌舞，事異而辭略同。

周禮正義卷二十四

地官司徒下

周禮

鄭氏注

載師掌任土之灋，以物地事，授地職，

而待其政令。任土者，任其力勢所能生育，且以制貢

賦也。物，物色之，以知其所宜之事，而授農牧衡虞，使職

之。【疏】「掌任土之灋」者，即大司徒之地法，此官所受以

爲官法者也。賈疏云：「即下經云廩里任國中之地以下是

也。」云「而待其政令」者，賈疏云：「謂因其職事使出賦貢，

即下經園廩二十而一以下是。」

注云：「任土者，任其

力勢所能生育」者，《大宰》注云：「任猶傳也。」力謂性力肥

磽，勢謂形勢高下。生育若農田生九穀，場圃育草木，山澤

各有生育之材物，皆任之以傳，立其功事也。《書·禹貢

敘》云：「任土作貢。」孔疏引鄭《書注》云：「任土謂定其肥

磽之所生。」亦即此義。云「且以制貢賦也」者，賈疏云：

「因民九職以制貢。但地之所出，唯貢而已。口率出錢及

軍法乃名賦。鄭并言賦者，以民有地貢，即有錢賦及軍賦，

故鄭兼言賦也。且《禹貢》地貢亦名賦，故云「厥賦惟上上」

之等也。」案：古無口率出泉之法，鄭、賈釋大宰九賦爲口

賦，非也。此經任土，當有田賦、軍賦，無口賦，詳《大宰》

疏。云「物，物色之，以知其所宜之事」者，《保章氏》注云：

「物，物色也。」《草人》「掌土化之灋以物地，相其宜而爲之

種」。此義與彼同。賈疏云：「此言出於《孝經緯援神契》，

云：「五岳藏神，四瀆含靈，五土出利，以給天下。黃白宜

種禾，黑墳宜種麥，蒼赤宜種菽，洿泉宜種稻。」但《草人》所

云物地者，據觀形色布種所宜，故二處皆云物地也。」詒讓

案：地事與《小司徒》「以任地事」，《土均》「以均地事」，義

並同。《小司徒》注云：「地事謂農牧衡虞也。」《土均》注

云：「地事，農圃之職。」彼二文言事不言職，故事即爲職。

此文地事與地職別言，則地事謂農牧衡虞之地，對地職謂

農牧衡虞之人也。云「而授農牧衡虞使職之」者，以經云地

職，則主有事於地者言之，故於九職唯舉農牧衡虞，不通舉

餘職，亦與地事義相應也。不言圃者，以農可畎圃，文不具

也。以廩里任國中之地，以場圃任園地，以

宅田、士田、賈田任近郊之地，以官田、牛

田、賞田、牧田任遠郊之地，以公邑之田任甸地，以家邑之田任稍地，以小都之田任縣地，以大都之田任疆地。故書廛或作壇，郊或爲蒿，稍或作削。鄭司農云：「壇讀爲廛。廛，市中空地未有肆，城中空地未有宅者。民宅曰宅。宅田者，以備益多也。士田者，士大夫之子得而耕之田也。賈田者，吏爲縣官賣財與之田。官田者，公家之所耕田。牛田者，以養公家之牛。賞田者，賞賜之田。牧田者，牧六畜之田。」《司馬法》曰：「王國百里爲郊，二百里爲州，三百里爲野，四百里爲縣，五百里爲都。」杜子春云：「蒿讀爲郊。五十里爲近郊，百里爲遠郊。」玄謂廛里者，若今云邑居里矣。廛，民居之區域也。里，居也。圃，樹果麻之屬，季秋於中爲場。樊圃謂之園。宅田，致仕者之家所受田也。《士相見禮》曰：「宅者在邦則曰市井之臣，在野則曰草茅之臣。」士讀爲仕。仕者亦受田，所謂圭田也。《孟子》曰：「自卿以下，必有圭田，圭田五十畝。」賈田，在市賈人其家所受田也。官田，庶人在官者其家所受田也。牛田、牧田，畜牧者之家所受田也。公邑，謂六遂餘地，天子使大夫治之，自此以外皆然。二百里、三百里，其大夫如州長；四百里、五百里，其大夫

如縣正。是以或謂二百里爲州，四百里爲縣云。遂人亦監焉。家邑，大夫之采地，小都，卿之采地，大都，公之采地，王子弟所食邑也。疆，五百里王畿界也。皆言任者，地之形實不方平如圖，受田邑者，遠近不得盡如制，其所生育賦貢，取正於是耳。以廛里任國中，而《遂人職》授民田，夫一廛，田百畝，是廛里不謂民之邑居在都城者與？凡王畿內方千里，積百同九百萬夫之地也。有山陵、林麓、川澤、溝瀆、城郭、宮室、塗巷，三分去一，餘六百萬夫。又以田不易、一易、再易上中下相通，定受田者三百萬家也。遠郊之內，地居四同，三十六萬夫之地也。三分去一，其餘二十四萬夫。六鄉之民七萬五千家，通不易、一易、再易，一家受二夫，則十五萬夫之地，其餘九萬夫。廛里也，場圃也，宅田也，士田也，賈田也，官田也，牛田也，賞田也，牧田也，九者亦通受一夫焉，則半農人也，定受田十二萬家也。《食貨志》云：「農民戶一人已受田，其家衆男爲餘夫，亦以口受田如比。士工商家受田，五口乃當農夫一人。」今餘夫在遂地之中，如此則士工商以事人在官，而餘夫以力出耕公邑。甸稍縣都合居九十六同，八百六十四萬夫之地。城郭宮室差少，塗巷又狹，於三分所去六而存一焉，以十八分之十三率之，則其餘六百二十四萬夫之地，通上中下六家而受十

三夫，定受田二百八十八萬家也。其在甸七萬五千家爲六遂，餘則公邑。【疏】「以廛里任國中之地，以場圃任園地」者，以下任土令賦，與《大宰》九賦正相應。國中即彼邦中，通城郭中而言，園地則在城外郭內，故次國中也。賈疏云：「此一經論任土之法。但天子畿內千里，中置國城，四面至疆各五百里，百里爲一節，封授不同。今則從近向遠，發國中爲始也。」云「以宅田、士田、賈田任近郊之地，以官田、牛田、賞田、牧田任遠郊之地」者，即《大宰》所謂四郊也。賈疏云：「但自遠郊百里之內，置六鄉七萬五千家；自外餘地，有此廛里，以至牧田九等所任也。」江永云：「近郊遠郊七種之田，皆農田外之閒田。農田自近郊以外皆有之，不定在近郊遠郊，故不言。下經近郊什一，遠郊二十而三，則農田在其中矣。」案：江說是也。農田自近郊始，故《詩·衛風·碩人》云「說于農郊」，毛傳云「農郊，近郊」是也。四郊亦有廛里，通言之六鄉即在四郊之內，析言之則郊在鄉里之外，鄉家數有定，郊家數則無定也。詳《小司徒》、《縣師》疏。云「以公邑之田任甸地」者，即《大宰》所謂邦甸也。賈疏云：「郊外曰甸。甸在遠郊之外，其中置六遂七萬五千家，餘地即九等之人所受以爲公邑也。但自此以至畿疆，四處皆有公邑，故據此而言也。」案：《爾雅·釋

地》：「郊外謂之牧。」《釋文》引李巡本牧作田，田甸字通。甸地自六遂七萬五千家之外，餘地悉爲公邑，猶六鄉之餘地爲郊里，不必皆九等之人所居也。賈說誤。云「以家邑之田任稍地」者，即《大宰》所謂家削也。稍，《說文·邑部》引作「郛」，詳後。賈疏云：「謂天子大夫各受采地二十五里，在三百里之內也。名三百里地爲稍者，以大夫地少，稍稍給之，故云稍也。」云「以小都之田任縣地」者，即《大宰》所謂邦縣也。四百里內，公邑采邑制井田，純爲縣都之制，故謂之縣。賈疏云：「謂天子之卿各受五十里采地，在四百里縣地之內也。」云「以大都之田任疆地」者，《說文·畺部》，疆或作疆。此經畿疆字並作疆，惟此作疆。此即《大宰》所謂邦都也。賈疏云：「謂三公及親王子母弟，各受百里采地，在五百里疆地之中也。五百里爲疆者，以外畔至五百里畿疆，故以疆言之。」程瑤田云：「六鄉之田在郊，宅田、士田、賈田、官田、牛田、賞田、牧田則六鄉之餘地；六遂之田在甸，公邑則六遂之餘地也。家邑之田在稍，小都之田在縣，大都之田在疆；稍縣疆皆有餘地，亦謂之公邑。今於郊甸言餘地，於稍縣疆言其正田，既互相足，亦以鄉遂形體詳《司徒》、《遂人職》中，不煩復言其正田也。」案：程說是也。此經任土之文，由內而外，自國中至疆，皆互相

備。如廛里所任，自國中始，場圃所任自城外附郭始，而郊甸稍縣都，凡民居所在皆有之；七等田所任自郊始，而甸稍縣都亦皆有之；公邑所任自甸始，而稍縣都亦皆有之。經各舉其一，餘不備詳。而六鄉任郊地，六遂任甸地，則又以其爲經野之大端，衆所共知，不煩更舉，故文不具也。又此經自國中至疆，即《大宰》九賦前六賦；彼又有關市山澤，則亦通包於此任地八者之中，唯幣餘一賦出於官府，非任地所及耳。

注云「故書廛或作壇」者，詳《敍官》。

廛人《疏》云「郊或爲蒿」者，徐養原云：「郊蒿古字通用。」

《春秋》桓十五年，《穀梁經》曰：「公會齊侯于蒿。」《公羊》作鄙。又文三年《左氏傳》曰：「秦伯伐晉，取王官及郊。」

《史記·秦本紀》郊作鄙。是郊蒿同音，故並與鄙通也。」云

「稍或作削」者，段玉裁云：「稍，《說文·邑部》作鄙，云：

「國甸，大夫稍稍所食邑，從邑，肖聲。」《周禮》曰「任鄙地，在天子三百里之內。」案：今《周禮》無鄙字，疑故書削即鄙之譌字。鄭君從稍，許從鄙。《大宰》「家削之賦」，《音義》

云：「本又作鄙。」案：互詳《大宰》《疏》。鄭司農云「壇讀爲廛」者，《敍官》杜注同。云「廛市中空地未有肆，城中空地

未有宅者」者，《敍官》杜注亦云「市中空地」。案：市亦在城中，此別言者，以肆宅異之。依先鄭《遂人》注云「廛，居

也」，則亦以廛爲民居所在。而此注云空地者，蓋謂此經廛里相對爲文，凡可居之地，未有宅肆者謂之廛，已有宅肆者謂之里。後鄭意則凡民居之地，不論宅肆有無，其區域並謂之廛，先鄭義未昧，故不從也。凡民占城市地擬爲肆宅者，雖空地亦當有稅。賈疏謂「空地何因有二十而稅」，則非也。云「民宅曰宅，宅田者，以備益多也」者，《說文·宀部》云：「宅，所託也。」《爾雅·釋言》云：「宅，居也。」賈疏云：「司農意，以宅本一夫受一區，恐後更有子弟國中不容，故別受宅田於近郊，以備於後子弟益多出往居之。」惠士奇云：「古有掌宅之官。」《管子·大匡》「弗鄭爲宅，凡仕者近宮，不仕與耕者近門，工賈近市」。是謂國宅。《國語·魯語》「文公欲弛孟文子之宅，云：欲利子於外地之寬」。《韓非子》「景公欲更晏平仲之宅，云：請徙子於豫章之圃」。則國宅不皆官署，宅田不盡民居也。詒讓案：凡廛宅皆計戶而授，未有不居而豫授田以備益多者。又凡官宅民宅，國中與郊並有之。郊之民宅即是廛里，郊亦有廛里，不必皆在國中也。既有廛里，則不得又有宅田，先鄭說於情事未協，故後鄭不從。云「士田者，士大夫之子得而耕之田也」者，先鄭意，士大夫之子，賢者得世祿，不賢者則歸之農，《荀子·王制篇》云：「雖王公士大夫之子孫，不能屬

於禮義，則歸之庶人。」是也。賈疏云：「後鄭不從者，以此士字言之，不得兼大夫。又《禮記》士之子不免農，大夫之子免農矣，不得爲大夫子得而耕之田。」云「賈田者，吏爲縣官賣財與之田」者，謂在官之賈人，若庖人、大夫、玉府、職幣、典婦功、典絲、泉府、馬質、羊人、巫馬、犬人諸職所屬賈人是也。先鄭意，國中賈人在官者，本身亦受田。賈疏云：「後鄭不從者，依《周禮》之內云賈人者，皆仕在官，府史之屬，受祿於公家，何得復受田乎？」案：賈說非也。周制，凡賈人無論在官在市，本身皆不受田，其家則受田。先鄭說未允，故後鄭不從。云「官田者，公家之所耕田」者，謂民受庸爲公家耕田，斂其禾粟，以共官府之用，若南郊藉田千畝，甸師徒二百人耕之是也。后公桑在北郊，亦同。俞樾云：「《牛人》《公牛》《巾車》《公車》，注並曰「公猶官也」。然則官田猶公田矣。」賈疏云：「後鄭不從者，下云近郊十一，皆據此士官田之等；若官田是公家所耕，何得有稅乎？」案：賈說非也。近郊雖有十一之稅，不害官田無稅，猶塵與國宅同在國中，而塵有稅，宅無稅，固兩不相礙矣。此不足以破先鄭之說也。但邦國米粟出於九賦及九職三農之貢，則自近郊藉田外，未必更有公家自耕之田在遠郊，先鄭說究難通耳。云「牛田者，以養公家之牛」者，《牛人》云「掌

養國之公牛」，即公家之牛也。云「賞田者，賞賜之田」者，《說文·貝部》云：「賞，賜有功也。」《月令》云：「賞公卿諸侯大夫於朝。」注云：「賞謂有功德者，有以顯賜之也。」《左傳》哀二年，趙簡子克敵之賞，云「土田十萬」，即此賞田也。又僖三十三年，晉文公「以再命命先茅之縣賞胥臣」。成七年「楚圍宋之役，師還，子重請取於申呂以爲賞田」。彼賞邑在都鄙，與賞田在鄉遂異，而賞功之典則同，故亦通云賞田矣。賈疏云：「此即《夏官·司勳》云賞田，一也，故後鄭從之。」江永云：「《司勳》又有加田，無國征，蓋亦在賞田之中。」惠士奇云：「祿田之外，有功而賞曰賞田。《魏策》：公叔痤爲將，與韓、趙戰而勝，禽樂祚，魏王說，以賞田百萬祿之。然則賞田亦謂之祿也。」云「牧田者，牧六畜之田」者，《敍官·牧人》注云「養牲於野田」是也。《牧師》云：「掌牧地皆有厲禁而頒之。」彼牧地專屬牧馬之地，蓋即於牧田中分別授之。賈疏云：「司農意，此即牧人掌牧六牲者也。」江永云：「牛田牧田兼用先、後鄭之說，皆是授民以田而爲公家畜牧，即九職之「藪牧養蕃鳥獸」，《閭師》之「任牧以畜事貢鳥獸」者也。牛田，牛人掌之；牧田，牧人掌之。若十二閑之馬，當自有牧地，蓋亦在近郊遠郊。此不言者，主於田也。」段玉裁云：「《小雅·出車》曰「我出我車，于彼牧

矣。』我出我車，于彼郊矣。傳曰：「出車，就馬於牧地。」箋曰：「牧地在遠郊。」然則詩之牧郊是一處，主謂遠郊百里竟上，即《周禮》之「以牧田任遠郊之地」也。《魯頌·駟》曰：「駟駟牧馬，在坰之野。」傳曰：「坰，遠野也。邑外曰郊，郊外曰野，野外曰林，林外曰坰。」箋曰：「必牧於坰野者，辟民居與良田也。」引《周禮》牧田任遠郊證之。是則牧田在野，野在百里外。《駟》言在野者，《出車》則謂之郊，野距郊不遠也。故《爾雅》言邑外曰郊，郊外曰牧，牧外曰野。《詩》毛傳、《周禮注》言邑外曰郊，郊外曰野。較少四字而實無異。析之則爲郊、牧、野、林、坰，合之則牧、野、林、坰，皆得統謂之郊。牧田在野得稱郊者，自遠郊以至六遂之餘地，皆有牧田，《周禮》舉近以包遠也。案：江、段說是也。先鄭此義，後鄭所不從，然注《大宰》「藪牧」云「牧之田在遠郊畜牧之地」，《詩》箋亦引此經牛田牧田以證郊牧，並仍從先鄭義。竊謂此牧田即《大宰》之「藪牧」，亦即《爾雅》之郊牧。《詩·邶風·靜女篇》云「自牧歸荑」，毛傳鄭箋並以牧田爲釋。又《國語·周語》云「國有郊牧」，韋注云：「國外曰郊。牧，放牧之地。」又云「商之亡也，夷羊在牧」，注云：「牧，商郊牧野。」《詩·大雅·大明》孔疏引鄭《書注》云：「牧野，紂南郊地名。」《說文·土部》作坰，云

「朝歌南七十里地。」南郊七十里地與牧田在遠郊正合。《左·隱五年傳》亦云「鄭人侵衛牧」，此並遠郊牧田謂之牧也。《釋地》云：「郊外謂之牧。」彼郊即指近郊言之。蓋畜牧當辟民居與良田，必在近郊之外。故王國牧田自遠郊始，自此以外，甸稍縣疆亦皆有之。魯之牧田，別在坰野，明不止遠郊有牧也。遠郊牧田專得牧名，其地蓋尤廣，公私畜牧咸萃於是，公牧固無稅，私牧則有稅也。賈疏偏主後鄭，謂公家養牛及畜牧之田不當有稅，殆未達其旨。至畜牧之人有餘力可以耕者，則亦受田如後鄭之說，故《魯頌》疏謂以牧人之牧六畜，常在遠郊之外，因近其牧處而給之田。然則牛田、牧田當兼畜牧之地及牛人、牧人所耕之田言之，可無疑矣。引《司馬法》者，今本《司馬法》佚此文。《縣士》注義亦同。引之者，證彼郊即此遠郊，州即此甸，野即此稍，縣與此同，都即此疆也。《王制》孔疏引《司馬法》作「二百里野」，誤。金鶚云：「大宰九賦，有家稍邦縣邦都。邦都即疆地，以其在五百里爲疆界之地，故曰疆。以其大都所在，爲都之宗，故曰都。」《司馬法》「五百里爲都」是也。又曰三百里爲野，以二百里之內有六遂，不純爲野，故在三百里。杜子春云「蒿讀爲郊」者，杜以遠蒿近蒿，於義無取，故讀從郊也。云「五十里爲近郊，百里爲遠郊」者，

《肆師》注及《詩·魯頌·駉》疏引《白虎通義》同。此皆謂郊之遠界，郊門之所在也。《聘禮》云「賓至于近郊」，又云「賓及郊」。鄭注云：「郊，遠郊也。周制，天子畿內千里，遠郊百里，以此差之，遠郊上公五十里，侯四十里，伯三十里，子二十里，男十里也。近郊各半之。」賈疏云：「後鄭義亦然，故《書序》云：『周公既沒，命君陳分正東郊成周。』」鄭注云：「天子之國，五十里爲近郊，今河南、洛陽相去則然。」是近郊五十里之驗也。子春又云遠郊百里，此與《司馬法》同，故後鄭從之也。案：《魏書·劉芳傳》引宋氏《含文嘉注》云：「《周禮》王畿千里，二十分其一以爲近郊，近郊五十里，倍之爲遠郊。」與杜、鄭說同。《說文·邑部》云「距國百里爲郊」，據遠郊言也。《大戴禮記·盛德篇》說天子明堂在近郊，云「近郊三十里」。《詩·駉》疏引服虔、《書·牧誓》僞孔傳，說並同。《敍官》賈疏引賈、馬說「遠郊五十里」。《文選·西京賦》薛注云：「五十里爲之郊，百里爲甸。」二說不同，而與《司馬法》義並不合。《公羊》桓元年，何注云：「古者天子邦畿千里，遠郊五百里。」則又以置爲郊，其說尤謬不足據也。其侯國二郊遠近之法，《爾雅·釋地》云：「邑外謂之郊，郊外謂之牧，牧外謂之野，野外謂之林，林外謂之坰。」《詩·駉》疏引孫炎云：「邑，國都也。」

設百里之國五者之界，界各十里。」孫謂百里之國，十里爲郊，蓋據男國言之，亦同後鄭《聘禮》注義。《詩疏》又引《書傳》云：「百里之國，二十里之郊，七十里之國，九里之郊，五十里之國，三里之郊。」孔謂是夏殷諸侯之國郊，與周異。《周書·大聚篇》又云「五里有郊」，則疑小國或都邑之制。段玉裁云：「郊之爲言交也，謂鄉與遂相交接之處也。故《說文》曰「距國百里爲郊」，此郊之本義也，謂必至百里而後爲郊也。而《爾雅》曰「邑外謂之郊」。邑者，國也。是則自國中而外至於百里，統謂之郊矣。此引伸之義也。國外郊內爲六鄉之地，故《周禮》立文多言國中及四郊，以包六鄉。其有單言六鄉者，其事不涉國中者也。言四郊可以包鄉，故《爾雅》曰「邑外謂之郊」。《柴誓》三郊三遂，即三鄉三遂。《周禮》又於百里之中，立近郊之名，皆由是也。既有近郊，則不得不謂百里爲遠郊矣。」云「玄謂廛里者，若今云邑居里矣」者，《漢書·食貨志》云：「在墾曰廛，在邑曰里。」《公羊》宣十七年，何注義同。邑居里，蓋漢人常語，故舉以爲況。《漢書·高祖紀》云：「沛豐邑中陽里人也。」豐爲沛之鄉邑，中陽爲邑中之里，即所謂邑居里也。邑居里省文則曰邑居，亦曰居里，詳後。云「廛，民居之區域也」者，《敍官·廛人》注義同。鄭意里謂民居，廛是

其區域，有里則有廛，通而言之是爲廛里也。云「里，居也」者，《小爾雅·廣言》文。《說文·里部》同。方苞、沈彤並謂此里爲國宅，對廛爲民宅、市宅。金鶚亦云：「鄭以里廛皆指民居，非也。廛里二字當分爲二：廛是民所居，里是百官所居也。」《孟子》云：「願受一廛而爲氓。」又云：「廛無夫里之布，則天下之民皆悅而願爲之氓。」是廛爲民居之證。又云：「臣去三年不反，然後收其田里。」是里爲百官所居之證。」案：方、沈、金說是也。此廛里二鄭說並未析。蓋通言之，廛里皆居宅之稱；析言之，則庶人農工商等所居謂之廛。若後文「園廛」之廛，則專指民宅、市宅而言，《遂人》之廛，則專指農民之宅舍而言；《廛人》、《司關》之廛，則又專指市與關工商之宅舍而言是也。士大夫等所居謂之里，《詩·大雅·韓奕》說蹶父所居，云「於蹶之里」。《左·昭二十一年傳》云：「翟僕新居于新里，華姓居于公里。」公里即宋公宮旁之宅里。又昭三年傳，晏子辭徙室，曰：「敢煩里旅。」《國語·魯語》，邱敬子言宅命於司里。又《周語》云：「敵國賓至，司里授館。」是國宅稱里，故掌於司里也。後經國宅無征，廛征二十而一，而里征之有無不見，亦國宅即里之證。國宅亦省稱宅，《荀子·王制篇》云「定廛宅」，廛宅即此廛里也。但國宅不得稱廛，而民宅市

宅則通稱宅，亦可通稱里，故後經云「宅不毛者有里布」，《遂人》云「以田里安甿」，又頒田里而云「夫一廛」，《孟子·公孫丑篇》亦云「廛無夫里之布」，是皆民宅市宅之通稱。《國語·魯語》韋注亦云「里，廛也」。要此經廛與里並舉，後經又與國宅並舉，則廛之內不得兼含國宅明矣。云「圃，樹果蔬之屬」者，《大宰》注義同。此爲種果木之專地，賈謂「即廬舍二畝半，田首爲之」，非鄭指也。詳《匠人》疏。云「季秋於中爲場」者，《敘官》注義同。江永云：「以場圃任園地，謂城外有可爲園圃之地，授九職中藝園圃者，使貢草木果蔬之屬，場人掌之。非農民築場圃納禾稼之場圃也。農家場圃自於廛地作之，與此無涉。」方苞云：「以經次之，則園地附郭之地也。」沈夢蘭云：「園地，《管子》所謂唐園可樹果蔬者也。地在國郊之間。」案：江、方、沈說是也。國中居人至衆，必有專地以樹蔬菜麻枲果木，乃足備用。此園地在國中及近郊之間，蓋於國門之外郭門之內空間之地爲之。《管子·輕重甲篇》云：「桓公憂北郭民之貧，召管子而問曰：「北郭者盡屨縷之甿也。以唐園爲本利，爲此有道乎？」管子對曰：「請以令禁百鍾之家不得事輶，千

①「一」原訛「三」，據楚本改。

鍾之家不得爲唐園，去市三百步者不得樹葵菜。若此，則空間有以相給資，則北郭之甿有所饑其手搔之功，唐園故有十倍之利。」唐園即場園。此即園地在郭門空間地之塙證。《莊子·讓王篇》：「顏回曰：『回有郭外之田五十畝，足以給飢粥；郭內之田十畝，足以爲絲麻。』」彼郭內之田，即種桑麻之場圃也。亦足與《管子》互證。上廛里分處城郭中，故云「任國中之地」；此場圃則唯在郭內，不在城內，故別云「任園地」。若農家場圃，則受田之家自於田中爲之，不得以當園圃之專地也。《閭師》云：「任農以耕事，貢九穀；任圃以樹事，貢草木。」農圃事不相兼，其不可合爲一明矣。互詳《敘官》疏。云「樊圃謂之園」者，《大宰》正義同。云「宅田，致仕者之家所受田也」者，據《士相見禮》，破先鄭民宅之說。《學記》孔疏引《尚書大傳》云：「大夫七十而致仕，而退老歸其鄉里。」《公羊》宣元年傳云，閔子「退而致仕」，何注云「致仕還祿位於君」是也。此宅田，蓋凡士大夫之退居者所受。以其退居則無祿，而嘗仕則不可同於齊民，故別以田給其家。凡侯國賢士大夫或寄居於是者，當亦以此田養之矣。引《士相見禮》曰「宅者在邦則曰市井之臣，在野則曰草茅之臣」者，鄭彼注云：「宅者謂致仕者也。致仕者去官而居宅，或在國中，或在野外。」引《周禮》此文

爲證。又《書·酒誥》云「越百姓里居」，僞孔傳云：「於百官族姓及卿大夫致仕，居田里。」《逸周書·商誓》亦云「百官里居」。然則致仕去官而居宅。謂之宅者，猶《書》云里居矣。沈彤云：「致仕官之所食，於經無考。《白虎通·致仕篇》云：『三分其祿，以一與之。』」又引《王度記》云：「臣致仕于君者，養之以其祿之半。」前說當謂食大夫以上，後說當謂食元士以下也。若其家，則皆別受田五十畝耳。中下士家已受五十畝，致仕而家復有所受，致仕則祿薄，而子惟自食其力，當更足之以五十畝也。若元士以上，則致仕而其家始受田。蓋仕之時祿厚，子爲學士或任官，無庸別受田；致仕則子孫之不才者，將不免於農，故亦稍授田使習之也。」案：致仕者受田等數，於經無文，沈以意推之，未知是否。《王制》注又說天子縣內，有致仕百里大國三，七十里次國六，五十里小國二十七。彼自據異代制爲說，與此近郊內宅田不合也。云「士讀爲仕」者，士仕聲類同。丁晏云：《隸釋·馬江碑》「仕喪儀宗」，洪适云：「仕讀爲士。」賈疏云：「後鄭之意，單士恐不兼卿大夫，故破從仕宦之仕。」云「仕者亦受田，所謂圭田也」者，圭田據《孟子》文。《匠人》注云：「圭之言珪，絜也。《周禮》謂之士田。」與此義同。又《王制》云：「夫圭田無征。」鄭彼注云：「夫

猶治也。征，稅也。治圭田者不稅，所以厚賢也。此則《周禮》之土田，以任近郊之地，稅什一。」案：彼注引此土田，不破字。賈疏云：「《王制》是殷法，圭田無稅人天子法，故言無征；此是周法，故有近郊十一而稅。」案：近郊田甚多，縱有圭田，其數蓋少，不害其爲無征。鄭、賈謂周圭田有征，恐未塙。引《孟子》曰「自卿以下必有圭田，圭田五十畝」者，《滕文公篇》文。彼文無「自」字，《匠人》注引同，此蓋鄭所增。趙注云：「古者卿以下至於士，皆受圭田五十畝，所以供祭祀。圭，絜也。士田，故謂之圭田，所謂惟士無田則亦不祭，言緇士無挈田也。井田之民，養公田者受百畝，圭田半之，故五十畝。」趙說亦以圭田爲士田，蓋即本鄭義而亦不破字。沈彤云：「禮，國君大夫之子免農，士之子皆不免農。《少儀》云：『問大夫之子長幼，長則曰「能從樂人之事矣」。幼則曰能正於樂人，未能正於樂人。問士之子長幼，長則曰「能耕矣」；幼則曰能負薪，未能負薪。』是其徵也。王之士之子有免農者，惟上士之子耳。上士即元士，故元士之適子、衆子，並學於諸樂官也。若中士下士，祿以遞薄，則子當業農以自食其力，故《載師》有土田，其家亦各受五十畝。」案：沈說亦不破字，於義近是。竊謂此土田，當兼二鄭及沈義乃備。蓋卿大夫命士之圭田，士

之子及未仕之士家所受田，皆以五十畝爲率。士餘子弟亦受田，則止二十畝。《漢·食貨志》所謂「士家受田，五口乃當農夫一人」是也。此數者通謂之士田，以卿大夫亦得稱士也。後鄭破士爲仕，義轉偏隘，當依《王制》注不破字爲是。《國語·魯語》云：「大夫食邑，士食田。」韋注云：「受公田也。」彼大夫食邑謂采邑，則士食田謂命士身所食之祿田。此士田，則命士之子等所受田。祿田不親耕，士田則親耕，所謂不免農也。大夫以上既有采邑，其子免農，不當受田。學校之士，已命者當受祿田，未命者則當免農而廩食於官，亦不身受田，其子則皆受田也。又案：卿大夫士得世祿者受采地，即大小都家邑是也。其不得世祿者，則賦田斂粟以爲祿，所謂祿田也。祿田不得世守，亦不自耕，其數衆多，蓋亦當於甸公邑取之。唯圭田數少，或當在此近郊士田之內耳。祿田與采地異，詳《大宰》疏。云「賈田，在市賈人其家所受田也」者，破先鄭爲在官賈人所受田。後鄭意，在官賈人家所受田，當即後官田，不入此賈田內。在市賈人，即《大宰》注所謂「處曰賈」是也。賈人身在市，不得爲農，其家有子弟任農者，則授以田。江永云：「《漢志》「工商家亦以口受田，則在民間爲工者，亦予以田，如賈人之例。」案：江說是也。依《漢志》說，工亦受田，而經無

工田者，工賈職事相等，故經舉賈以核工，文不具也。至在官之工，則當廩食於官，不當受田，詳後。云「官田，庶人在官者其家所受田也」者，謂各職府史胥徒及在官工賈之類，其家所受田，破司農公家自耕田之義。黃以周云：「庶人之在官者，給以稍食，祿足以代耕。其身免農，其子不免農。」案：黃說是也。凡庶人在官者，本身受稍食於官，而其家則別受田，所謂官田也。《國語·晉語》云：「工賈食官。」韋注云：「工，百工也。賈，官賈也。食官，官廩之。」彼工賈亦謂在官之工賈，韋謂官廩之，即稍食也。與此經官田異。云「牛田、牧田，畜牧者之家所受田也」者，謂爲官畜牧者其家所受田，破先鄭直爲養牛牧六畜之田也。黃以周云：「畜牧者亦免農，子不免農。後鄭爲長。」論讓案：此當兼用先、後鄭義，詳前。云「公邑，謂六遂餘地」者，明遠郊以外，距王國二百里甸地之內，除六遂七萬五千家外，並爲公邑。《大戴禮記·王言篇》云：「百里而有都邑。」蓋即指公邑言之。王鳴盛云：「遂之餘地即公邑，《縣士》注所謂封則爲采地，未封則爲公邑也。蓋公邑雖稱餘地，實多於遂幾倍。準之稍縣都，亦多於采地幾倍也。」云「天子使大夫治之者，明與采邑屬私家臣治之者異也。云「自此以外皆然」者，謂稍縣置除大都小都家邑之外，其餘地並

爲公邑如甸。《縣士》注云：「距王城二百里以外，至三百里，曰野；三百里以外至四百里，曰縣；四百里以外至五百里，曰都。都縣野之地，其邑非王子弟、公卿、大夫之采地，則皆公邑也，謂之縣。」是也。賈疏云：「以《大宰》九賦有邦甸家稍邦都之賦，非采地，是公邑可知。又三百里以外，其地既廣，三等采地所受無多，故唯九十三國，明自外皆是餘地爲公邑也。若然，是公邑之地有四處也。」案：《王制》說天子縣內九十三國，其餘以爲閒田。彼閒田即此公邑也，故賈據以爲釋。但《王制》所說，鄭以爲夏制，故《大司徒》注謂「畿內國數未聞」。《小司徒》注說三等采地里數，亦不從彼文。賈說非鄭悖也。詳《大司徒》、《小司徒》疏。云「二百里三百里，其大夫如州長，四百里五百里，其大夫如縣正」者，賈疏云：「此約《司馬法》二百里曰州、四百里曰縣而言。則從二百里向外有四百里，二百里爲一節。故二百里、三百里，大夫治之，尊卑如州長，中大夫也。四百里、五百里，尊卑如縣正，下大夫也。」案：依鄭、賈說，二百里三百里公邑大夫如州長，則似亦爲州黨族間比之制，其官則州長以下至比長也；四百里五百里公邑大夫如縣正，則似亦爲縣鄙鄰里鄰之制，其官則縣正以下至鄰長也。蓋鄭謂公邑不制井田，與鄉遂同，則亦以五五相比之。

法，制其邑居，不必計三等田萊以通其率，故可依放鄉遂之成法，而無勞更易。今攷：不井之田，唯甸公邑容或有之；其稍以外公邑，皆錯居都鄙之間，則無不制井田之理。至所定二百里以外爲州，四百里以外爲縣，則又徒比傳《司馬法》州縣之文，於經實無塙證。但鄭雖謂公邑爲州縣，而吏大夫止於州長、縣正，則無鄉遂也。《論語·八佾》皇疏乃云二百里外至王畿五百里之內，並同六遂之制，《郊特牲》孔疏亦謂公邑之屬有遂，則是六遂之外，又有無數之遂，此於理必不可通，鄭亦無是義也。金鶚云：「公邑之官，自二百里至五百里，當無尊卑，乃附會《司馬法》區而別之，殊無謂矣。但公邑之官，宜尊於采邑，縣邑宰當爲中大夫，甸邑宰當爲下大夫，以鄉大夫官尊，不得與之並，宜從遂大夫之列也。縣師掌公邑，故以縣名。又《月令》有百縣之文，《王制》言天子之縣，而公邑之止於縣可知矣。」案：金說近是而未盡也。公邑官之見於經者，有縣師、縣士，與鄉師、鄉士掌六鄉，遂師、遂士掌六遂同，是即公邑止於縣之證。依鄭說，公邑不制井田，則縣如五鄙之縣；依金說，公邑制井田，則縣即四甸之縣。二說不同，以金爲長。但《月令》百縣，亦見《周書·作雒》，乃以王畿千里百同爲百縣，是縣方百里，與四甸封域迥殊。蓋井田之法，四甸爲縣；

公邑所治，則以四都爲一總部，通謂之縣。縣有大小，猶四縣爲都，而采邑之大都則四都，在采邑爲大都，在公邑則爲總縣，里數同也。若然，公邑總縣，大夫統四都，而都縣甸丘邑井之吏咸屬焉，蓋與遂官略同，縣師通治諸縣亦與遂師同，但縣吏爵等員數不可攷耳。互詳《敘官》及《匠人》疏。云「是以或謂二百里爲州，四百里爲縣云」者，鄭意二百里以外，公邑官如州長，故《司馬法》或謂之州；四百里以外，官如縣正，故此經及《司馬法》並謂之縣也。金鶚云：「《司馬法》謂二百里曰州，以六遂如州在二百里也。四百里曰縣，與《周官》同。」云「遂人亦監焉」者，賈疏云：「案《遂人》云『掌野』，鄭云『郊外野』。大摠言之，則自百里外置六遂爲野，自百里外至五百里畿皆曰野，是以彼下又云『夫間有遂』云云，而言以達于畿。但鄉遂及公邑皆爲溝洫法，是以遂人亦監焉。」案：遂人兼監公邑者，以四等公邑皆自六遂以外，地相聯比也。至公邑田制，則與都鄙同爲井田。鄭賈謂爲溝洫，誤也。詳《匠人》疏。云「家邑，大夫之采地，小都，卿之采地，大都，公之采地」者，以公卿大夫爵次尊卑差之，尊者采地大而距國遠，卑者采地小而距國近也。但此大都小都通爲采邑，是都亦稱邑。《左·隱元年》傳有大都、中都、小都。彼中都即此小都，而小都即此

家邑，是邑亦稱都。蓋二者大小異名，散文則通，故《大宗伯》注謂卿有家邑，皆通言不別也。金鶚云：「《左氏》云：『邑有先君之廟曰都，無曰邑。』先君之廟有二。公卿大夫之采邑，得立大祖廟；士無大祖，是無先君之廟矣。親王子弟采邑，有賜之得立出王廟者，是亦先君廟也。故王國公卿采邑稱大都，大夫采邑稱小都，士則稱邑而已。」又云：「經不言元士之采地所在，疑亦在稍地中也。」案：金說近是。《縣士》先鄭注云：「掌三百里至四百里大夫所食。晉韓須爲公族大夫，食縣。」則先鄭以爲大夫食縣。以次差之，則當命士食稍，公卿同食畺，與後鄭異也。賈疏云：「此經有家邑、小都、大都之文。《小司徒》有四丘爲甸，四甸爲縣，四縣爲都。彼據稅入天子而言，此總據采地大小而言。則家邑二十五里，小都五十里，大都百里，通治溝洫及澮而言也。」程瑤田云：「公之采地四都者，一同之地，故曰大都；卿之采地四縣者，一都之地，故曰小都；大夫之采地四甸者，一縣之地，故曰家邑。」沈彤云：「家邑即縣，注云大夫之采地，包乎中下。小都即都，注云卿之采地，兼乎孤。《小宰》『聽祿位以禮命』，明制祿之多寡，本以爵等而兼命數也。命數同者，雖爵異而祿亦同。故孤卿皆六命，則皆食都；中下大夫皆四命，則皆食縣。」詒讓案：

公食四都，實田方六十四里，并虛地計之，爲八十里，更旁加十里，則一同方百里也。卿食四縣，實田方三十二里，并虛地計之，爲四十里，更加餘地，則方五十里也。大夫食四甸，實田方十六里，并虛地計之，爲二十里，更加餘地，則方二十五里也。凡公卿大夫所食里數，並以倍半遞減，故於四都四縣四甸之地，皆有所羨餘，虛地以治溝洫，實田則盡以自食。《小司徒》注謂三等采地竝四分之一，入其一於王，乃臆說也。賈疏亦沿其誤。並詳《小司徒》疏。云「王子弟所食邑也」者，此關三等采地而言。《大宰》注云「周、召、毛、聃、畢、原之屬，在畿內者」是也。賈疏云：「王子弟者，據《春秋》之義，凡言弟者，皆王之同母弟。則母弟與王之庶子與公同，食百里，地在畺，稍疏者與卿同，食五十里，地在縣；又疏者與大夫同，食二十五里，地在稍。故在下別言王子弟所食邑。」詒讓案：《白虎通義·京師篇》說天子太子亦食采百里，則與王子弟同，未知然否。云「畺五百里，王畿界也」者，《大司徒》云：「制其畿疆而溝封之。」注云：「疆猶界也。」畺本字，疆或字。王畿千里，王城居中，四面距界各五百里，所謂畺也。云「皆言任者，地之形實不方平如圖」者，如圖謂近郊五十里，遠郊百里，以外甸、稍、縣、都，大小相包，各以百里爲界，以次迭增，是正方也。然

地有偏邪錯互，其勢不能皆正方，其任之姑以此爲率耳。《管子·宙合篇》云：「千里之路不可扶以繩，萬家之都不可平以準。」亦此意也。云「受田邑者，遠近不得盡如制」者，地不方平，則受田邑者彼此出入，或遠或近，自不能盡如常制。鄭言此者，明此經所言遠近之差，皆據常制；若授田，則又當因地制宜，不能拘執也。云「其所生育賦貢，取正於是耳」者，即謂任之不得不取正於方平以爲率也。賈疏云：「此鄭還釋任義，非直任其形，實兼解任其生育賦貢取正也。是以上注云『任其生育，且以制賦貢也』。」云「以廛里任國中，而《遂人職》授民田，夫一廛，田百畝，是廛里不謂民之邑居在都城者與」者，亦申民居區域之說。《鄉大夫》注云：「國中，城郭中也。」都城亦謂在城郭中。後鄭意，此廛里與《遂人》「夫一廛」，地異而義則同。凡卿大夫士及四民所居宅，大總言之，通謂之廛里。此廛里在國城中，雖當以百官及士工商等等居宅爲多，然近郊負郭之農亦容有居城郭中者。《管子·大匡》所謂耕者近門，亦與仕者及工賈同居城郭中，即其證也。遂人之廛在野，與田同授，則當爲農人所居宅，然各在其城邑中則一也。其鄉遂以外，凡都邑所在，皆有官吏及四民之宅，亦同謂之廛里。經惟云以廛里任國中之地者，主其多者言之；猶之公邑有

四等，惟甸最多，經遂繫公邑於甸地矣。又案：國中廛里，蓋亦計戶而授之。其數無文，以《遂人》注「六遂之廛」約之，或亦當如《孟子》五畝宅之制與？云「凡王畿內方千里」者，賈疏云：「據《大司徒》、《大司馬》皆云王畿千里而言也。」云「積百同，九百萬夫之地也」者，四郊以內包六鄉，共四同；甸六遂、公邑，共十二同；稍公邑、家邑，共二十同；縣公邑、小都，共二十八同；置公邑、大都，共三十六同。并之總百同也。國中四郊三十六萬夫，甸百八萬夫，稍百八十萬夫，縣二百五十二萬夫，置三百二十四萬夫，并之總九百萬夫也。通虛實之地，爲田九百萬畝。故《國語·鄭語》云：「王者居九畝之田，收經人以食兆民。」九畝即九萬萬畝，一圻之大數也。韋注以爲九州之數，誤。賈疏云：「王畿千里，開方之，方千里爲方百里者百，百里爲一同，故云積百同。一同百成，成九百夫，十成九千夫，百成九萬夫，百同故九百萬夫之地也。」云「有山陵、林麓、川澤、溝瀆、城郭、宮室、涂巷，三分去一，餘六百萬夫」者，賈疏云：「此瀆非四瀆，其溝亦非田閒廣深四尺之溝，直是通水之溝瀆也。城謂方十二里。郭謂郭郭。宮室謂城郭之內官民宮室。涂巷謂城內九經九緯及民間街巷之等。三分去一謂九百萬夫之中三分去一，故云餘六百萬夫也。案

洛邑千里之中，山林之等多於平地，而鄭以三分去一，據大較而言也。」案：王城當方九里，賈謂方十二里，非是，詳後。王鳴盛云：「三分去一之法，凡古人論田制舉其大略者，皆以此爲例。《王制》云：『方百里者，爲田九十億畝，山陵、川澤、溝瀆、城郭、宮室、涂巷三分去一，其餘六十億畝。』此舉其大略者也。」注與《王制》合。詒讓案：《漢書·食貨志》云：「李悝爲魏文侯作盡地力之教，以爲地方百里，提封九萬頃，除山澤邑居參分去一，爲田六百萬畝。」其率與此注「百同九百萬夫，三分去一，餘六百萬夫」同，皆據不井之田言也。《漢書·刑法志》說，一同萬井，除山川、沅斥、城池、邑居、園囿、術路三千六百井，定出賦六千四百井。以其率推之，百同爲田六十四萬井，爲夫五百七十六萬。此據井田言也，與《小司徒》注「一成除旁加十里爲四都實田正同，其率蓋二十五分而去其九，校此注三分去一爲稍強。鄭以王畿百同，自都鄙外皆不爲井田，故不盡從《漢志》也。互詳《小司徒》疏。云「又以田不易、一易、再易上中下相通」者，賈疏云：「此相通三家受六夫之地也。」云「定受田者三百萬家也」者，程瑤田云：「六百萬夫，以家受二夫通之，實受田三百萬家。」詒讓案：此兼據《司馬法》說。同方百里，萬井三萬家，積之百同，則得此數，故知有

此三分去一及以三等地相通之法。云「遠郊之內，地居四同，三十六萬夫之地也」者，賈疏云：「以其遠郊百里內置六鄉，四面相距二百里，二二而四，故四同，每同有九萬夫，四九三十六，故知三十六萬夫之地。」云「三分去一，其餘二十四萬夫」者，此亦如前三分去一之率計之，四同之內三十六萬夫，三分去一，去十二萬夫，是餘二十四萬夫也。云「六鄉之民七萬五千家」者，賈疏云：「鄉有萬二千五百家，六鄉故七萬五千家。」云「通不易、一易、再易，一家受二夫，則十五萬夫之地」者，程瑤田云：「遠郊之內受田之法，以不易、一易、再易之制通之，三家六百畝，是家受二夫也。六鄉定受田七萬五千家，計十五萬夫。」云「其餘九萬夫」者，賈疏云：「據二十四萬夫除十五萬夫，故餘九萬夫也。」云「廛里也，場圃也，宅田也，士田也，賈田也，官田也，牛田也，賞田也，牧田也，九者亦通受一夫焉，則半農人也」者，賈疏云：「鄭意九者未必各整萬家，以大抵九者各爲萬家解之，據整數而言耳。其中亦有不易、一易、再易相通，而各受一夫焉。農人相通各受二夫之地，此受一夫，故云半農人也。」趙春沂云：「農人以上中下相通，各受二夫之地，折實爲一百畝。此云受一夫，半農人，則其爲五十畝可知。」案：賈、趙說是也。鄭意蓋謂九等田約九萬家，授田

半農人，則不易田家五十畝，一易之田家百畝，再易之田家百五十畝，通計之三家而受三夫之地，故云通受一夫也。鄭必知九等田半農人歲耕五十畝者，以上引《孟子》圭田五十畝以釋土田，欲符其數也。依鄭此說，則遠郊之內六鄉餘地九萬夫，以九等田里任之，適盡此九者。雖在六鄉七萬五千家之外，亦附屬六鄉，故《司勳》注云「賞田在遠郊之內，屬六鄉焉」是也。今攷：九等田里雖屬六鄉，然不必盡九萬夫之地，遠郊之內尚有餘地，《小司徒》所謂「四郊」、《縣師》所謂「郊里」是也。鄭說遠郊以內盡屬鄉，失之，詳《小司徒》及《縣師》疏。又案：匠人營國，方九里。九九自乘，凡八十一里，爲地七百二十九夫，此國城中地之大數也。《周書·作雒》王城之郭，方二十七里。以二十七自乘，凡七百二十九里，除國城八十一里，凡六百四十八里，爲地五千八百三十二夫，此郭中地之大數也。兩相并總六千五百六十一夫。以任廛里場圃，尚有王宮、官府、朝市、倉庫、學校、城垣、涂巷、冢墓、溝瀆之減，則其爲廛里場圃者，夫數蓋亦無多。而鄭以二者皆一萬夫者，城郭之外，鄉里、郊里亦各有廛里場圃之地；且以九等田均分，約計爲此數，固不必一一密合也。王國城郭里數，互詳《大宰》疏。云「定受田十二萬家也」者，此通六鄉及九等田里之數也。

賈疏云：「此鄭摠計六鄉七萬五千家，此九者二夫爲一夫，九萬爲四萬五千，四萬五千添七萬五千，爲十二萬夫。據實授地爲定數，故云定也。」詒讓案：依鄭說，九等田家受一夫，則九萬夫即有九萬家；而此仍以四萬五千家折半計之者，亦以九萬家本是約計，不必實數如此，故仍以二夫爲一夫爲率耳。引《食貨志》云「農民戶一人已受田，其家衆男爲餘夫，亦以口受田如比」者，《漢書·食貨志》文。比，舊本譌「此」，今依《釋文》及宋婺州本正，與《漢志》合。顏注云：「比，例也。」賈疏云：「引之者，證六鄉七萬五千家，家以七夫爲計，餘子弟多，三十壯有室，其合受地，亦與正夫同，故《遂人》云：「夫一廛，田百畝，餘夫亦如之。」是其餘衆男爲餘夫，亦以口受田，如正夫之比類。若然，案《孟子》云：「圭田五十畝，餘夫二十五畝。」彼餘夫與正夫不同者，彼餘夫是年二十九已下，未有妻，受口田，故二十五畝；若三十有妻，則受夫田百畝。故鄭注《內則》云「三十受田，給征役」。《鄉大夫》注亦云「有夫有婦乃成家」。何休亦云「一夫一婦受井田百畝」。案：餘夫受田實二十五畝，止得正夫四分之一，無受百畝之法。班《志》謂亦受田如比，後鄭及《遂人》先鄭注並從其說，非也。《孟子》餘夫與《遂人》同，賈分爲二，以調停孟子及班、鄭之說，亦非也。

詳《遂人》疏。又案：受田之年，經無明文，賈據鄭《內則》注義，謂三十受田。《後漢書·劉寵傳》李注引《春秋井田記》同。而《漢·食貨志》云「民年二十受田，六十歸田」，則校鄭說早十年。陳奐云：「古者二十受餘夫之田，三十受一夫之田，六十歸田於公。大凡三十取室生子，子年三十，父年必六十，是父歸田乃子受田矣。」案：陳說足證鄭義。蓋夫家之名，起於一夫一婦，則受田者無論正夫餘夫，年二十三十，必已取室而後謂之夫。賈氏謂二十九以下未有妻者，得爲餘夫，非也。媒氏之法，男子三十而取，自是極限，是年二十多已取妻，間有未取者，則不得爲餘夫，又安得竟受一夫之田乎？況六鄉十五萬夫之田，以養六軍，六遂副六鄉亦然，則凡受夫田者，必任受兵。《鄉大夫》職國中七尺，止任力役，尚未受兵，此尤未受夫田之塙證。《王制》孔疏引《易》孟氏、《詩》韓氏說云：「二十行役，三十受兵，六十還兵。」受田歸田與受兵還兵年，必正相準。《內則》注說，不可易也。大抵男子年二十或已授室，則受餘夫之田，餘夫任行役，《小司徒》「田與追胥羨卒竭作」是也。至三十而丁衆成家，別自爲戶，則爲正夫，受田百畝，正夫任受兵，即六軍及丘甸之卒是也。餘夫爲羨卒，正夫爲正卒，受田與受役、受兵，事亦正相當也。若二十以上，或未授室，則

從父兄而耕，不得爲餘夫受田。其已授室受田之餘夫，雖年過三十，或尚從父兄，不自爲戶，則仍爲餘夫，不得爲正，以「起徒役毋過家一人」。一家無二正卒，即一戶不得兩受正田也。古正夫餘夫受田之法，蓋約略如是。鄭謂三十受田，自指正夫自爲戶者言之。其從父兄爲戶者，固不得同受田。而《漢志》二十受田，則又自據餘夫言之，明受田自此始耳，非必二十即爲正夫也。《國語·魯語》韋注云：「三十者受田百畝，二十者受田五十畝，六十還田。」此似亦謂二十受餘夫之田，三十受正夫之田，其說近是，但餘夫受田不得有五十畝，韋說仍與經不合耳。餘夫，互詳《遂人》疏。云「士工商家受田，五口乃當農夫一人」者，亦《漢志》文。賈疏云：「此謂士與工商之家，丈夫成人受田各受一夫，則上云半農人者是也。其家內無丈夫，其餘家口不得如成人，故五口乃當農夫一人矣。」沈彤云：「五口謂餘子弟。蓋士與工商別爲業，家有丈夫成人亦受田，半農夫；其餘子弟不得如成人，故五口當一農夫，各受田二十畝。」案：沈說是也。士工商餘子弟，猶農人之有餘夫也。其授田，蓋不易之田口二十畝，一易之田口四十畝，再易之田口六十畝，當農夫五分之一，其視《孟子》餘夫田減五之一。若依班、鄭說，餘夫受田與正夫等，則亦止五分之一

矣。鄭引之者，證士工商不惟本身受田，半農人，即其子弟受田，亦不得與農餘夫等也。但上士工賈等家受田，鄭意並依圭田例，以五十畝爲正。《漢志》所說，乃五十畝外別有所受，蓋亦當於士田賈田內授之，與農之餘夫異。經文所云，或亦含此，故舉以爲釋耳。云「今餘夫在遂地之中」者，此據《遂人》三等頒田有餘夫，而《小司徒》說六鄉授地之法，不見餘夫，故意鄉遂雖同有餘夫，而授田則皆在遂地中也。賈疏云：「謂百里內置六鄉，以九等受地，皆以一夫爲計，其地則盡；至於餘夫，無地可受，則六鄉餘夫等，並出耕在遂地之中，百里之外。其六遂之餘夫，並亦在遂地之中受田矣。」云「如此則士工商以事人在官」者，明士工商本身不受田，其家雖受田，而與農民餘夫異也。賈疏云：「案《食貨志》，士農工商四民有業。但農已於上鄉遂公邑受地，故此唯說士工商三者也。其身得祿免農，其子不免農，故《禮記》問士之子，長曰能耕矣。大夫已上之子則免農矣，故《禮運》云「大夫有田以處其子孫」。然士既有祿，沾及子弟，故其家田亦五口乃當農夫一人也。其工商比農民爲賤，故其家人亦五口乃當農夫一人。此工商則與上賈人別，彼賈人仕在官，若府史，但異名耳。此工商，有事時復爲官所使，故云以事人在官。」案：賈說非鄭指也。此工

商當通包在官在市二者言之。《內宰》云：「凡建國，佐后立市。」是市舍皆官建以授民，故在市之工商，亦得通謂之在官。《國語·齊語》云「處工就官府」，亦其義也。鄭意蓋謂士工商等以事在官，則其家人亦隨父兄在國，故士田、官田、賈田等皆於郊內授之耳。此沿《漢志》四民之文，故唯舉士工商，其實商中亦當兼有賈。賈謂「此工商與上賈人別」，亦失之。云「而餘夫以力出耕公邑」者，鄭意餘夫既在遂地中，而六遂七萬五千家數有定，其餘地盡爲公邑，明餘夫必於公邑受田也。此餘夫，蓋通該鄉遂之餘夫，即上云在遂地中者。《敘官》注云：「六遂之地，自遠郊以達于畿，中有公邑、采邑、小都、大都焉。」是鄭意公邑雖非遂，而亦附屬遂人、遂師，故通以公邑爲遂地也。賈疏云：「還是五口之內有丈夫，非士工商之身，即曰餘夫。百里內既置六鄉及九等，無地可居，故知亦出耕公邑也。」案：此餘夫專據農民之餘夫，不含士工商子弟也。賈謂專指士工商家言，誤。金鶚云：「九等之田，非必各有一萬夫，安得謂餘夫無地可受乎？且農夫之耕，必與其家相近；若去家甚遠，朝夕往來，田且荒蕪矣。若使別居，離其父兄，亦非情理。是六鄉餘夫，必不出耕於遂地也。公邑亦制井田，皆每夫受田百畝，何待鄉遂之餘夫來耕乎？餘夫與正夫同

居，鄉遂公邑都鄙；隨處有之，豈必在遂地之中哉！竊謂古者地廣人稀，田不盡井，隨地皆有閒田餘地，授萊田取之於此，圭田及餘夫之田亦取之於此。且生齒日增，已井之田不足以給，亦取於此以授之，每夫百畝，不必盡爲井田之制也。此無公田，當用貢法。餘夫之田，亦宜用貢。然則周之兼用貢法，不特鄉遂爲然。觀司稼巡野觀稼，以年之上下出斂法，可知鄉遂之外，亦有用貢者矣。如盡行助法，則惟以公田之稼歸公，何必論年之上下乎？案：金說是也。六鄉之餘夫，當授以四郊之田；六遂之餘夫，當授以甸公邑之田。鄭謂遠郊之地除六鄉及九等田里外，無餘地，故無以處餘夫，而謂出耕公邑，非也。云「甸稍縣都合居九十六同，八百六十四萬夫之地」者，即據前百同九百萬夫之地，除郊內四同三十六萬夫，餘得此數也。云「城郭、宮室差少，涂巷又狹」者，鄭意甸以外城郭宮室分布其間，不若郊內之多。又《匠人》云：「經涂九軌，環涂七軌，野涂五軌。野涂以爲都經涂。」是野涂狹於國中經涂、環涂，都經涂與國野涂等，則都野涂益狹可知。是涂巷又狹。此三者既占地校少，則田宜增多，故不用郊內三分去一之率也。云「於三分所去，六而存一焉，以十八分之十三率之」者，賈疏云：「但百里之內，則三分所去六不存一，今於此三分所

去之中，六內而存取其一，則十八分之十三率之是也。言十八分之十三率之者，若不六而存一，則十八分之三十六十八，去一分有十二存。今於所去六中存取其一，以益十二，則所去者五，所存者十三，故云十八分之十三率之也。案：張逸問：「注十八分之十三率之，何謂？」鄭答曰：「六鄉之民，上地不易，家百畝，一易家二百畝，再易家三百畝，相通三夫六百畝。六遂之民，上地家百畝，萊五十畝；中地家百畝，萊百畝；下地家百畝，萊二百畝；相通三夫而六百五十畝。以三分去一之法，當餘十二；遂地以有五十畝萊，於三分去一，乃得十三。」若據此而言，則於三分所去六而存一，唯據上地有萊五十畝而說；而鄭云城郭宮室差少涂巷又狹者，但六而存一，指據六夫受十三夫地而言，今言城郭少涂巷狹者，鄭意遠郊外上地有萊五十畝，故言於城郭少涂巷狹中出此萊地焉。云「則其餘六百二十四萬夫之地」者，賈疏云：「三分所去六而存一之法，即於同上計之。先取九十同，更別借取九十同，添爲百八十同，是十八分之十三率之，所得者百三十，所去者五十。向者借半，今於百三十中還半，餘有六十五同存。仍有六同未分。爲六同別借取十二同，添六爲十八同，三分所去六而存一，則得十三同，所去者五同。向借十二同，是三分借二分，今還他

二分，則十三同中取十二同，還他八同，得四同。一同者分爲九萬夫，還他六萬夫，得三萬夫。將此四同三萬夫，添前六十五同，摠爲六十九同三萬夫矣。一同九萬夫，取六十同，六九五十四，爲五百四十萬夫。又有九同，同有九萬夫，九九八十一，又爲八十一萬夫。通前三萬夫，爲八十四萬夫。又添五百四十萬夫，摠爲六百二十四萬夫之地，故云十八分之十三率之，則其餘六百二十四萬夫也。」程瑤田云：「遠郊之內，除所去之數，實田二十四萬夫。甸稍縣都除所去之數，實田六百二十四萬夫。綜計之，所去止二百五十二萬夫，所餘有六百四十八萬夫。所餘夫數六百萬夫外，實羨四十八萬夫。然以所羨數爲六家加一夫之數，適加四十八萬夫。大共計之，百同定受之田，實止三百萬家。」云「通上中下，六家而受十三夫」者，賈疏云：「上地家百畝，萊五十畝；中地家百畝，萊百畝；下地家百畝，萊二百畝。云六家而受十三夫者，以上地有萊五十畝，故三夫受六夫半，六夫受十三夫矣。」程瑤田云：「《大司徒職》：『凡造都鄙，制其地域而封溝之，以其室數制之。不易之地家百畝，一易之地家二百畝，再易之地家三百畝。』《小司徒職》：『乃經土地，而井牧其田野，九夫爲井，四井爲邑，四邑爲丘，四丘爲甸，四甸爲縣，四縣爲都。』鄭注云：『隰臯

之地，九夫爲牧，二牧而當一井。今造都鄙授民田，有不易，有一易，有再易，通率二而當一，是之謂井牧。』據此則鄭是以都鄙授井田，爲不易、一易、再易之地，與經所謂以室數制之者無異義矣。乃其注《載師職》之任地，則又以易不易之田歸之六鄉，以上中下有萊之田歸之甸稍縣都。且《縣師》注云：「郊內謂之易，郊外謂之萊，爲善言近。」《遂人》注云：「六遂之民奇受廬，土地有萊，爲所以饒遠也。」不但與經相戾，即與其自注亦不相蒙矣。豈謂遂人所掌之野，得包甸稍縣都，授以有萊之地，爲從其類，而易不易之田在大司徒，司徒主六鄉，因以所制田授之與？」案：程說是也。前賈疏引《鄭志》說，亦與此注同誤。云「定受田二百八十八萬家也」者，賈疏云：「以六家受十三夫，則六十萬家受百三十萬夫，百二十萬家受二百六十萬夫之地，又倍之，二百四十萬家受五百二十萬夫之地。餘有四十八萬家，於上借十二萬家，爲六十萬家，是五分借一，整數計之，則六十萬家受百三十萬夫之地。向五分借一，今還五分除一，六十除十二，餘有四十八萬家在。地亦五分除一，百三十除二十六萬夫，餘有一百四萬夫地在。將此四十八萬家，添前二百四十萬，爲二百八十八萬家；又將此一百四萬夫地，添前五百二十萬夫，摠爲六百二十四萬夫矣。」程

璠田云：「甸稍縣都受田之法，以上中下三等有萊之制通之，三家六百五十畝，是六家受十三夫也。甸居十二同，除所去之數，實田七十八萬夫。六遂定受田七萬五千家，計十六萬二千五百夫，餘六十一萬七千五百夫，以六家十三夫之通率計之，爲定受田二十八萬五千家，以爲公邑，綜計之，爲定受田三十六萬家。稍居二十同，縣居二十八同，都居三十六同，除所去之數，實田五百四十六萬夫，以六家十三夫之通率計之，爲定受田二百五十六萬家。其三等采地，鄭所未聞，故正田無定數，以其餘爲公邑者亦無定數。合甸稍縣都，定受田二百八十八萬家，加遠郊內之十二萬家，百同定受之田三百萬家也。」云「其在甸七萬五千家，爲六遂，餘則公邑」者，即謂甸一百八萬夫地，以鄭三分所去六而存一之法除之，又以六家受十三夫之率通之，六遂七萬五千家外，餘受地二十八萬五千家，並爲公邑也。賈疏云：「鄭既摠計畿內遠郊之外訖，別更計二百里之中者，以三百里已外封三等采地，采地多少不定，不可計；其六遂與六鄉相對，故特計之，以其六遂家數與六鄉相似。但六鄉之內餘地有九等所居，六遂餘地既無九等，故以餘地爲公邑也。」凡任地，國宅無征，園廩二十而一，近郊十一，遠郊二十而三，甸稍縣都皆無過

十二，唯其漆林之征二十而五。征，稅也。言征者，以共國政也。鄭司農云：「任地，謂任土地以起稅賦也。國宅，城中宅也。無征，無稅也。」故書「漆林」爲「柰林」，杜子春云：「當爲漆林。」玄謂國宅，凡官所有宮室，吏所治者也。周稅輕近而重遠，近者多役也。園廩亦輕之者，廩無穀，園少利也。古之宅必樹，而置場有瓜。^①

【疏】「凡任地」者，此周徹法任地令賦遠近輕重之差也。云「國宅無征，園廩二十而一」者，賈疏云：「園即上經『場圃任園地』，廩即上經『廩里任國中之地』。并言之者，以其出稅同故也。」沈彤云：「國宅無征，園廩二十而一，則凡國以外之宅皆無征，國以外之園廩皆二十而一矣。」案：沈說是也。《管子·幼官篇》云：「三會諸侯，令曰：田租百取五。」即所謂二十而一也。《管子》以田租而從此園廩之率，蓋令賦之尤輕者，非恒法也。云「近郊十一，遠郊二十而三」者，謂六鄉民田及七等田之賦。凡十一者，並謂十中稅一，詳《匠人》疏。賈疏云：「近郊即上經宅田、士田、賈田任在近郊者，同什一而稅也。遠郊即上經官田、牛田、賞

① 「場」，原譌「場」，據下文引注改。「瓜」，原譌「爪」，據楚本改。

田、牧田任遠郊之地，同二十而稅三也。」云「甸稍縣都皆無過十二」者，謂六遂及四等公邑民田之賦。賈疏云：「即上經公邑之田任甸地已下，至任量地，四處皆無過十而稅二。但此四處出稅不同。據上文直言公邑之田任甸地，則甸地之中兼有六遂矣。其稍縣都，上文惟言家邑小都大都三等采地爲井田助法，不見公邑，則三者之中皆有公邑，故上注云「自此已外皆然」。若然，則此云十二者，除三等采地而言，以其鄉遂公邑皆爲夏之貢法故也。」詒讓案：鄉遂郊里制溝洫，四等公邑制井田，通以此「十一」、「二十而三」、「十二」三等之率征之。采地賦稅雖入於其主，其率亦視此。周徹法通於畿內，稍縣都采地公邑皆制井田，而無公田，則亦不用助法。賈謂采地用助法，公邑用夏之貢法，乃沿《匠人》注之誤，非也。公邑制井田，亦詳《匠人》疏。云「唯其漆林之征二十而五」者，《釋文》漆作泰，云：「泰本又作漆，劉本作泰，字之變也。」案：泰正字，漆段字，泰即泰之變體。經注例皆作漆，詳後。漆林者，亦於園地樹之。《史記·老子韓非傳》說莊周嘗爲蒙漆園吏是也。蓋園征雖二十而一，其種漆林者，則當二十而五，不可以一率齊也。賈疏云：「上之三等爲輕近重遠法。此漆林之稅特重，以其漆林，自然所生，非人力所作故也。」又云：「《異義》第五《田

稅》：『今《春秋公羊說》，十一而稅，過於十一，大桀小桀，減於十一，大貉小貉。十一稅，天下之中正，十一行而頌聲作。故《周禮》國中園廩之賦，二十而稅一，近郊十而稅一，遠郊二十而稅三。有軍旅之歲，一井九夫百畝之賦，出禾二百四十斛，芻秉二百四十觔，釜米十六斗。案《公羊》十一稅，遠近無差。漢制收租田有上中下，與《周禮》同義。』《玄》之聞也，《周禮》制稅法，輕近而重遠者，爲民城道溝渠之役，近者勞遠者逸故也。其授民田，家所養者多，與之美田，所養者少，則與之薄田。其調均之而足，故可以爲常法。漢無授田之法，富者貴美且多，貧者賤薄且少，美薄之收不通相倍蓰，而云上中下與《周禮》同義，未之思也。又《周禮》六篇，無云軍旅之歲，一井九夫百畝之稅，出禾芻秉釜米之事，何以得此言乎？」若然，《周禮》稅法據王畿，《公羊》稅法據諸侯邦國。諸侯邦國無遠近之差者，以其國地狹少，役賦事暇，故無遠近之差也。」陳壽祺云：「《魯語》：仲尼言先王制土，其歲，收田一井出稷禾秉芻缶米，不是過也。許偁《周禮》，蓋出此。《說文·禾部》：『秬引《周禮》曰：二百四十斤爲秉，四秉曰筥，十筥曰稷，十稷曰秬，四百秉爲一秬。』案：此《聘禮記》文，惟彼斤字作斗，疑許所見本異。又疑此出《周禮說》，故《異義》據之。《說文》：『偁《周

禮》，皆屬《周禮說》，非《周禮》六篇文。」案：陳說是也。《異義》云「故周禮」，當作「古周禮說」。此經爲古文家說也。「有軍旅」以下，自是舊師參合《魯語》及《聘記》補此經之義，鄭駁蓋偶失攷。依舊師說，則此職爲任地正稅之法，《魯語》所云別爲軍賦之法，故韋注及《家語·正論篇》王注並謂其歲收爲有軍旅之歲，明其非正稅，無軍旅則不征也。惟《魯語》本云稷禾秉芻缶米，而《周禮說》則據《聘記》釋其義。今攷彼記說秉米、車米、秉禾三文雖相屬，而各自計數，義實不相冢，既與《魯語》文數不同，而《周禮說》及韋注又并記文之不相冢者爲一，以傳合《魯語》之義，實不可通。然則舊師之說，實未足馮，宜鄭之不從也。又《魯語》云一井所出，而《周禮說》則云百畝之賦，似據侯國都鄙公田九一之法；若畿內都鄙無公田，則當以一井九百畝通計，而爲賦法，不當井賦百畝也。此其尤難通者矣。《漢書·食貨志》引李悝盡地力之教云：「一夫挾五口，治田百畝，歲收畝一石半，爲粟百五十石；除十一之稅十五石，餘百三十五石。」下又云：「上賦斂又未與此。」亦是正稅外別有軍役賦斂之證。然此經自是任地之正賦，不開軍賦之事。近郊十一者，即李悝所謂百畝歲收粟百五十石，十一之稅十五石。蓋據下地平歲之稅計之，雖地有肥磽，年有豐儉，而

其率略同。依此推之，則遠郊二十而三，百畝稅二十二石五斗也。甸稍縣都無過十二，百畝稅三十石也。《公羊》、《穀梁》宣十五年傳、《孟子·告子篇》、《文選·報孫會宗書》李注引《尚書大傳》並以十一爲賦稅之正法，不得有多少，而此經則不盡然。賈疏以爲王畿邦國之異，說殊不塙。江永云：「《國語》載孔子之言曰：『先王制土，藉田以力，而砥其遠邇。』是田賦有遠近取平之法。《禹貢》甸服五百里，近者貢粗而且服，遠者貢精而不服，是虞夏砥遠邇之法也。《載師》近郊十一，遠郊二十而三，甸稍縣都皆無過十二，是《周官》砥遠邇之法也。取民固不過十一，然力役先取諸近，近者多而遠者少，其勢不得不然。益遠民之賦，以補近民之力，政乃均平，使可一槩而施，則禹時何不以粟米責之三百里內，以總程秸服均之三百里外乎？多乎什一，大桀小桀，此爲法制外橫征者言之。若通融遠近，以立均平之法，乃王政也，非橫斂也。」俞樾云：「周稅漆林獨重，故經文用『唯其』二字，見此不在常科之內。若自國宅至甸稍縣都，通率之適合十一之數。何也？園廩二十，近郊十，遠郊二十，甸稍縣都十，其數六十。園廩稅一，近郊稅一，遠郊稅三，甸稍縣都稅二，其數七。是爲六十而稅七，稍浮於十一。然有國宅一分無稅，則適是十而稅一矣。」

《公羊》據其大數言之，《周禮》以通率言之，二者雖異而實同。案：江、俞兩說足以釋此經與《公》、《穀》、《孟子》之紛。《國語·齊語》云：「管子曰：相地而衰征，則民不移。」《荀子·王制篇》亦云：「相地而衰政，理道之遠近而致貢。」此與《魯語》孔子之言合，皆足與此經互證也。

注云「征，稅也」者，《大司徒》注同，謂地稅也。云「言征者，以共國政也」者，征稅所以共給國政之用。征政字通，詳《小宰》疏。鄭司農云「任地謂任土地以起稅賦也」者，任地猶上文任土，後鄭云「任其力勢所能生育，且以制貢賦」是也。云「國宅，城中宅也」者，《士師》注云：「國，城中也。」故此國宅先鄭以為城中宅，即卿大夫及四民居宅之通稱。賈疏云：「先鄭意，廛既為空地，非民宅，則此國宅城中宅謂民宅也。後鄭不從者，後鄭意以廛里既為民宅，則此國宅非民宅，是以為官府治事處解之。」詒讓案：先鄭說雖可通，而所含大廣，民宅不得盡無征也。云「無征，無稅也」者，說與後鄭同。云「故書漆林為漆林，杜子春云當為漆林」者，《說文·漆部》云：「漆，木汁可以髹物也。」《水部》云：「漆水出右扶風杜陵岐山，東入渭也。」經典通借漆為漆，故杜亦從之。此以借字易正字，猶《鍾師》故書「內夏」，內自是正字，而杜從借字易為納；《玉人》故書「稍氣」，氣

亦是正字，而杜從或體易為餽也。《釋文》作漆，雖正字，而與注不合。蓋此經與注自有常用之字例，不能盡以正字繩之。通校全經，凡漆字之見於經者，《司几筵》、《巾車》、《職方氏》、《輪人》、《弓人》、《角人》、《鬯人》、《司几筵》、《小師》、《笙師》、《巾車》、《輪人》、《鬯人》、《弓人》亦皆不作漆。其漆漆錯出者，惟此職，《釋文》或本作漆，《巾車》注則作漆者七，作漆者三，自是傳寫錯互，不足以淆經注之通例也。云「玄謂國宅，凡官所有宮室吏所治者也」者，沈彤云：「國謂城中，宅即公卿大夫士之所居也。此宅與宅田之宅同，專指下士以上言。所以無征者，於貴者優之也。」金鶚云：「百官所居，當在城中。蓋古者每日必朝，朝辨色始入，其登車在夜未旦，城門必天明乃啓。若在城外，不及朝矣。羣士亦必入朝，是公卿大夫士皆必居城內也。王宮方千二百步，兩旁宜為羣士之宅，蓋宿衛王宮者皆士也，居此便於宿衛。東西南三面近城門，皆當為公卿大夫士之宅。其北近城皆工商所居，蓋工商居宜近市也。四隅之地，非貴者所宜居，庶人在官者當居此也。士所居亦有近市者，《孟子》所謂在國曰市井之臣，指士言也。晏平仲之居近市，景公故欲更其宅歟？」案：金說甚覈。古者田宅皆官授，《國語·魯語》云：「文公欲弛

孟文子之宅，使謂之曰：「吾欲利子於外之寬者。」又云：「公欲弛邱敬子之宅，對曰：先臣惠伯以命於司里。」是公卿大夫士之宅咸官授之，其世官者亦世居是宅。唯罷黜或去國，則宅當還之官，故《孟子》有三年收其田里之說，里即所謂國宅也。《魯語》韋注以彼宅爲有司所居，與鄭此注說同。攷《大司馬》注云「古者軍將，蓋爲營治於國門」，引魯東門襄仲、宋桐門右師爲證。《詩·鄭風·緇衣》孔疏引鄭《書注》又云：「卿士之私朝在國門。」鄭意亦謂公卿大夫以居宅爲私朝，即是治事之寺舍，非如後世私室與官署迥異也。凡吏宅既皆官所授，故無征，鄭說與《國語》義合，自是此經國宅之塙詰。而賈援《匠人》九室以釋之，則非鄭指。九室在宮內，乃卿士公朝之次，豈宅里之謂乎！云「周稅輕近而重遠，近者多役也」者，賈疏云：「以其城內及城外近城者，給公吏使役多，於稅上輕而優之；遠城者役少，故於稅上重而苦之，故不依十一而稅。唯近郊之內當十一耳。」云「園廬亦輕之者，廬無穀，園少利也」者，《國語·魯語》云：「賦里以人而量其有無。」韋注云：「里，廬也。以人，計其利人多少，而量其財業有無，以爲差也。」與此經義合。賈疏云：「以其廬則五畝之宅在國中，則《孟子》云「五畝之宅，樹之以桑麻」，是廬無穀也。此園則百畝田畔，家

各二畝半，以爲井竈、種葱、韭及瓜。是園少利，故亦輕之。」案：賈說非也。園自爲種草木之地，非於田畔爲之。家二畝半之說，又鄭所不取，詳前疏。云「古之宅必樹」者，釋民宅有稅之義。明廬征即征其所樹也。宅必樹，詳後。云「而置場有瓜」者，賈疏云：「是《信南山》詩，云「中田有廬，置場有瓜」。鄭云：「中田，田中。作廬以便其事。於其畔種瓜，瓜成又入其稅，天子剝削淹漬以爲菹，獻之皇祖。」是其園廬皆有稅之事也。」案：置場與園廬異地，鄭、賈並合爲一，誤也。詳前疏。凡宅不毛者，有里布；凡田不耕者，出屋粟；凡民無職事者，出夫家之征。鄭司農云：「宅不毛者，謂不樹桑麻也。里布者，布參印書，廣二寸，長二尺，以爲幣，貿易物。《詩》云「抱布貿絲」，抱此布也。或曰：布，泉也。《春秋傳》曰：「買之百兩一布。」①又《廬人職》：「掌斂布之次布、儼布、質布、罰布、廬布。」《孟子》曰：「廬無夫里之布，則天下之民皆說而願爲其民矣。」故曰宅不毛者有里布，民無職事出夫家之征，欲令宅樹桑麻，民就四業，則無稅賦以勸之

①「布」原訛「市」，據《周禮注疏》改。

也。故《孟子》曰：「五畝之宅，樹之以桑，則五十者可以衣帛。」不知言布參印書者何？見舊時說也。」玄謂宅不毛者，罰以一里二十五家之泉，空田者罰以三家之稅粟，以共吉凶二服及喪器也。民雖有閒無職事者，猶出夫稅家稅也。夫稅者，百畝之稅。家稅者，出土徒車輦，給繇役。

【疏】「凡宅不毛者有里布，凡田不耕者出屋粟」者，以下並任土任民賦稅之餘法也。里布屋粟者，任土之餘也。宅不毛田不耕者，蓋兼惰民受田宅而蕪廢不治，及富貴家之廣占田宅以爲游燕者言之。云「凡民無職事者出夫家之征」者，任民之餘也。凡惰民之不要事者，則令出征賦以示罰。

注鄭司農云「宅不毛者，謂不樹桑麻也」者，《廣雅·釋草》云：「毛，草也。」《穀梁》定元年傳云「毛澤未盡」，注：

「范邵云，凡地之所生謂之毛。」《公羊》宣十二年傳云「錫之不毛之地」，何注云：「境墉不生五穀曰不毛。」此宅不毛與田不耕對文，則非不可種五穀，故據《孟子》爲不樹桑麻。《遂人》注說王莽時，城郭中宅不樹者爲不毛。莽法即放此經。云「里布者，布參印書，廣二寸，長二尺，以爲幣，貿易物」者，此說里布爲即布帛之布。《漢書·食貨志》說周布帛，以廣二尺二寸，長二丈爲度。此廣長各取十分之一，裁制之以爲幣。布參印書者，蓋謂書布之上而加璽印。《漢

書·平帝紀》如淳注引《漢律》，傳信用五寸木，封以御史大夫印章，其乘傳參封之。參，三也。此布參印書，疑亦參印布書之上，以檢姦僞也。但此當有正文，今未詳所出。云「《詩》云抱布貿絲，抱此布也」者，抱布貿絲，《鄘風·氓》篇文。毛傳云：「布，幣也。」鄭箋云：「幣者，所以買買物也。」案：《毛詩傳》亦無布參印書之說，先鄭或據三家詩也。云「或曰布泉也」者，此又一說，後鄭亦從之，《外府》注同。引《春秋傳》曰「買之百兩一布」者，昭二十六年《左傳》：申豐從女賈以幣錦二兩適齊師，高齋以錦示子猶曰：「魯人買之，百兩一布。」杜注云：「言魯人買此甚多，布陳之，以百兩爲數。」賈疏云：「杜以爲布爲陳，不爲布泉。此先鄭以彼布與此布及《外府》邦布皆爲泉，與杜義異也。」云「又《塵人職》掌斂市之次布、僂布、質布、罰布、塵布」者，亦證布爲泉也。彼職「次」作「紬」、「僂」作「總」。杜子春讀總爲僂，故先鄭從之，詳彼疏。引《孟子》曰「塵無夫里之布，則天下之民皆說而願爲其民矣」者，《公孫丑篇》文。「願爲其民」，今本作「願爲之氓」。趙注云：「里，居也。布，錢也。夫，一夫也。」《周禮·載師》曰：「宅不毛者有里布，田不耕者有屋粟，凡民無職事者出夫家之征。」孟子欲使寬，獨夫去里布，則人皆樂爲之氓矣。氓，民也。」趙

說亦與先鄭同。江永云：「《孟子》夫布即《閭師》之夫布，里布即《載師》之里布。蓋戰國時爲一切之法，凡居廛之民，不問其有職無職，而皆使出夫布；亦不問其毛與不毛，而皆使出里布。此爲額外之征，故欲其除之。」案：江說是也。《孟子》里布與此同，而夫布則別見《閭師》，此夫家征內亦兼有之，故先鄭引以證義。《管子·輕重甲篇》云：「澤魚之征，伯倍異日，則無屋粟邦布之籍。」彼邦布當即此經里布、夫布。蓋春秋時已額外責屋粟、里布、夫布之征，故管子亦欲去之也。云「故曰宅不毛者有里布，民無職事出夫家之征，欲令宅樹桑麻，民就四業，則無稅賦以勸之也」者，明爲罰賦欲勸民之就業也。四業即《諸子》注「四民之業」，《漢書·食貨志》亦云「四民有業」。賈疏謂即《閭師》畜、耕、樹、蠶四業，又引或說以爲四時之業，並謬。云「故《孟子》曰，五畝之宅，樹之以桑，則五十者可以衣帛」者，《梁惠王篇》文。趙注云：「廬井邑居各二畝半以爲宅，冬入保城二畝半，故爲五畝也。樹桑牆下，古者年五十乃衣帛矣。」引之者，證宅當樹桑麻也。案《漢書·食貨志》說井田之制，云「還廬樹桑」。《公羊》宣十五年，何注亦云「還廬舍種桑萩棹菜」。並與《孟子》說同。趙氏廬井邑居各二畝半之說，亦本《穀梁》宣十五年傳及《漢·食貨志》，鄭所

不從，詳《匠人》疏。云「不知言布參印書者何見，舊時說也」者，布參印書，先鄭亦自不得其義，但見舊時有此說，遂據以爲釋，故又自發此疑。舊時說，蓋即《詩》、《禮》舊師說也。云「玄謂宅不毛者，罰以一里二十五家之泉」者，從先鄭後一說，訓布爲泉也。後鄭意，此里與《遂人》「五鄰之里」義同，泉即謂口泉。賈疏引《鄭志》云：「趙商問：『《載師職》凡宅不毛乃罰以一里布，田不耕者罰屋粟。商以田不耕其罪莫重，宅不毛其罰當輕，宅不毛乃罰以二十五家之布，田不耕則罰之三家之稅粟。未達罰之云爲之旨，輕重之差。』鄭荅：『此法各當罰其事於當其有故，何以假他輕重乎！』」案：鄭荅辭意簡晦，未審其義。惠士奇云：「罰一家而使出二十五家之布，勢必不能。宅之所處爲里，里者居也，《量人》所謂『軍社之所里』是也。蓋宅在里，故宅不毛者出一家之里布。里布者，一家之里也。」江永云：「里字之義有三：一爲三百步之里，一爲二十五家之里，一爲里居之里。里布者，里居之里。此經『以廬里任國中之地』，《遂人》『以田里安甿』，《王制》『田里不粥』，《孟子》『收其田里』，皆此義，即謂其所居之宅也。」孔廣森云：「里布非得二十五倍之罰，蓋別有計里出布之法，正《國語》所云『賦里以人而量其有無』者。」蔣載康云：「里即廬里，里布，

一廛之布。」案、惠、江、孔、蔣說是也。《孟子》趙注說里布，亦訓里爲居，則漢儒已有此說矣。里與宅同，里布即廛征，亦猶《廛人》之廛布。孔氏援《魯語》「賦里以人」以釋此里字，最塢。蓋當依其宅占地之多少，而差其征。大約五畝之宅，以廛征二十而一之率計之，則所征里布與田征四分畝之一數，當略相等，其所征當甚少。而鄭謂「不論其宅之大小，概令出二十五家之布」，無此理也。《漢·食貨志》載王莽擬《周官》法，城郭中宅不樹藝者爲不毛，出三夫之布。蓋以里爲「方里而井」之里，一井九夫，三分減二，止有三夫；抑或九夫開方，一面亦適三夫也。此雖不以爲二十五家之里，然數仍太多，且與屋粟義混，經義必不如是也。云「空田者，罰以三家之稅粟」者，謂此屋與《小司徒》「攷夫屋」義同。彼注引《司馬法》云：「夫三爲屋。」三夫即三家所受之田，故以屋粟爲三家之稅粟。《漢·食貨志》載王莽擬《周官》法，凡田不耕爲不殖，出三夫之稅，即鄭所本。江永云：「屋粟又見《旅師》，自是當時征稅之名，不知其多少也。田不耕有多少，當量田而出粟，豈可限以三夫。」案：江說是也。田不毛者所出之粟，亦當依常稅十一至十二五等之率，計畝征其粟。以屋爲井田之小成，故假以名之耳，非謂不論其空田之多少，而概令出一屋之粟也。

凡此經里布、屋粟、夫家之征，皆即就地征力征之恒法以爲罰，明其雖不任征而不在弛舍之例耳。豈於常征之外別勘罰征之色目，亦豈於恒額之外增溢罰征之等數哉！云「以共吉凶二服及喪器也」者，此鄭以意推之，謂罰征之布粟等不給國用也。賈疏云：「案《鄉師職》云：『比共吉凶二服，間共祭器，族共喪器，黨共射器，州共賓器。』但射器、賓器等爲國行禮，故出官物爲之。惟吉凶二服及喪器，是民自共用，不可出官物，故比族主集此罰物爲之。故鄭唯據此二事而言之。」云「民雖有閒無職事者，猶出夫稅家稅也」者，後鄭意，此無職事即《閭師》之無職者也。賈疏云：「此則《大宰》『閒民無常職轉移執事』之人，雖不事當家田宅，無可賦稅，仍使出夫稅家稅之征以勸之，使樂業也。」孔廣森云：「民無職事者，謂閒民之游惰不給轉移執事者。」朱大韶云：「無職事，謂既無職而又不事事者，即所謂惰游之士也。無職而又不事事，故罰以夫家之征，與『宅不毛者有里布，凡田不耕出屋粟』同列，此九職所不任也。鄭以無職事即無職之閒民，不特與上二句不一例，且與《閭師》之無職者出夫布不合。」姜兆錫、黃以周說同。案：孔、朱說是也。職事義雖同，而此「無職事」與《閭師》「無職者」義實小異。蓋閒民雖無職，而「轉移執事」即其事，惰民并「轉移執

事」而無之，則信無職事矣。鄭、賈并爲一說，殊未審。《漢·食貨志》載王莽擬《周官》法，民浮游無事，出夫布一匹。蓋劉歆等亦以此「無職事」與《閭師》「無職者」爲一，故竟以夫布當此夫家之征。後鄭義略本於彼。不知此惰民出夫家之征者，乃泉粟兩出，爲罰征；彼閭民出夫布，唯出口泉，爲九職之常征。夫布爲閭民惰民所同出，閒粟則爲惰民所獨出，二法固不同也。云「夫稅者，百晦之稅」者，謂出百晦什一之稅粟。《閭師》疏引《鄭志》荅劉琰云：「夫征田稅，如今租是也。」此即《旅師》所謂閒粟。《孟子》趙注說夫布，亦以夫爲一夫，與鄭義同。然出百晦之稅，於數太多，似不足據。《管子·乘馬篇》說土農工商皆與功，而云「不可使爲功，則視貸離之實而出夫粟」。彼夫粟即此閒粟也。但彼云視貸離之實而出之，則夫粟自有輕重之差，不定出百晦之稅明矣。云「家稅者，出土徒車輦給繇役」者，謂出軍賦力役之征。《均人》云：「均人民牛馬車輦之力政。」《左傳》昭四年，孔疏謂即出丘甸之軍賦，是也。江永云：「諸經凡言夫家者，猶云男女。無妻者爲夫，有妻者爲家。」案：此夫家之義，當從江爲正。《小司徒》注云：「夫家猶男女也。」全經言夫家者甚多，其義竝同，詳《小司徒》及《縣師》疏。此注獨分爲二，與《小司徒》注自相違伐，非

也。夫家之征，惠士奇、黃以周並謂出夫布，其說甚是。然當兼鄭稅粟爲釋，方爲賅備。蓋凡平民既授室受田，則成夫家。任職事者有地征，九賦之稅是也；又有力征，九職之貢是也。自賢能、癯疾、貴者、服公事者外，無人不出此征。此無職事，浮游不任農圃，故罰使出閒粟以當地征；惰窳不任役，故罰使出夫布以當力征。夫布與《閭師》「無職者」之征同，但彼爲九職之閒民，本非不任職者，故唯出夫布，而不受田則不令出粟。此無職事，則九職所不任者，既以不任役，罰使出布，又雖不受田，仍罰令出粟。上里布屋粟之罰，出布者不出粟，出粟者不出布。此夫家之征，則布粟兼出，故經不質言布粟而通謂之征。鄭亦知此夫家征內兼有晦稅及力征，然不謂亦出夫布，而謂家征爲出土徒車輦給繇役。夫惰民罷弱，於本身職事尚不能任，豈任受邦國師田之役乎？以時徵其賦。【疏】「以時徵其賦」者，賈疏云：「閭師徵斂六鄉之賦貢，遂師、旅師斂六遂已外之賦貢，自有常官。但徵斂事重，以載師既掌畿內地事，因亦徵其賦，相左右也。案下《閭師》注「賦謂九賦及九貢」，則此賦貢含有也。至於里布、屋粟及閭民夫家之征，亦可斂之。」詒讓案：《敘官》注云：「載師者，閭師、縣師、遺人、均人官之長。」則此官實總掌賦法。所云徵其賦者，

亦依任土之法，令閭師等官徵之，而理董鉤考其當否。徵斂煩辱之事，殆非所親也。賈疏謂載師盡徵畿內之賦貢，此豈上士二人、中士四人所能給乎？又，旅師唯掌三粟，不掌六遂正賦之事，賈說亦失之。又案：此經上文里布、屋粟、夫家之征，三種罰賦，在鄉郊者，蓋閭師及鄉吏徵之；在六遂以外者，則旅師徵之。此官亦唯總掌其法，不掌徵斂之事也。

周禮正義卷二十五

閭師掌國中及四郊之人民、六畜之數，

以任其力，以待其政令，以時徵其賦。國中及

四郊，是所主數六鄉之中，自廛里至遠郊也。掌六畜數者，農事之本也。賦謂九賦及九貢。【疏】「掌國中及四郊之

人民、六畜之數」者，主國中郊里版籍之法，與司民爲官聯也。此官爲國中及四郊吏之長，而兼掌六鄉賦貢之事。

《脩閭氏》「掌比國中」，注云：「令其閭內之閭胥、里宰之屬。」是國中廛里及郊里雖在六鄉之外，而亦用比閭法，五家爲聯，與鄉遂同，故通屬閭師。四郊即郊里，詳《遺人》疏。賈疏云：「閭師徵斂百里內之賦貢，以其人民是出賦之數，其六畜是營作之本，故須知數也。」云「以任其力」者，謂九職任民之事，其六畜亦任其役貢也。此官掌國中四郊，亦有地治，則亦當有校比之法，與鄉師、遂師、縣師同，經文不具也。云「以待其政令」者，賈疏云：「政令謂賦役皆是也。」注云「國中及四郊，是所主數六鄉之中自廛

里至遠郊也」者，以經言國中，即《載師》所云「以廛里任國中之地」；言四郊，即《載師》之近郊、遠郊。四郊中有六鄉，是六鄉之中自廛里至遠郊，閭師並掌之。鄭言此者，欲別於下縣師所主數不止國中四郊也。賈謂閭師直知其人數，不施政教，非鄭旨也。又案：《敘官》注云：「閭師，主徵六鄉賦貢之稅者。」則鄭意國中四郊並通屬六鄉。今攷《載師》云「以賞田任遠郊之地」，《司勳》云「掌六鄉之賞地」，明郊里得附六鄉，而國中亦可類推。但六鄉夫家及官吏之數皆有定限，自三十州七萬五千家之外，所增益者，咸非鄉吏所治，則皆此官專掌之。《小司徒》云「四郊之吏」，即此官之屬吏也。蓋國中、四郊之政治，與鄉多相通貫，故官吏職事與鄉吏亦得相佐助，而其部居固自顛然不混也。亦詳《大宰》疏。云「掌六畜數者，農事之本也」者，《庖人》注云：「六畜，六牲也。始養之曰畜，將用之曰牲。」此據民間字養言之，故亦云六畜。但六畜任力者，以馬牛爲主，此大總計之耳。賈疏云：「六畜謂馬牛羊豕犬雞，則唯牛可爲農事，而鄭摠云農事之本者，羊馬犬雞雖不用爲農事，皆是人之相資藉以爲用，故摠入農事之中，是以閭師主徵斂亦摠知其數也。」云「賦謂九賦及九貢」者，賈疏云：「案下又陳貢，故知賦中兼有貢。經直言賦者，以賦爲主耳。賦

謂口率出泉。然，案《大宰》九賦，從邦中以至幣餘，爲九等；此國中及四郊於九賦之中，惟有二賦，而言九賦者，亦大摠而言也。其九貢又與《大宰》別。彼九貢者，與《小行人》「春人貢」爲一，謂諸侯之九貢。此即《大宰》九職之貢，與下文貢九穀之等是一也。」案：賦者徵斂之大名，故九賦九貢通謂之賦。九賦即地稅，鄭、賈謂口率出泉，非也，詳《大宰》疏。凡任民：任農以耕事，貢九穀；任圃以樹事，貢草木；任工以飭材事，貢器物；任商以市事，貢貨賄；任牧以畜事，貢鳥獸；任嬪以女事，貢布帛；任衡以山事，貢其物；任虞以澤事，貢其物。貢草木，謂葵韭果蓏之屬。【疏】「凡任民」者，此任民作貢，即《大宰》九職之力征，亦即《大府》、《內府》之九功，《司會》所謂「以九功之法令民職之財用」是也。任民之法通於畿內，而其頒行則自國中始，故於此官備列其法。賈疏云：「案《大宰》以九職任萬民」，謂任使萬民，各有職事，有職事必有功，有功即有貢，故此論貢之法也。」云「任農以耕事，貢九穀」者，《大宰》注云：「貢，功也，九職之功所稅也。」《大府》亦云「凡萬民之貢，以充府庫」。此以下並與《大宰》九職文相

應。耕爲三農所任之職事，九穀即耕田所成之功，官以職事授之民，而使各以其功爲貢，所以儆其惰而不強責其所無也。云「任嬪以女事，貢布帛」者，賈疏云：「《大宰》云『七曰嬪婦化治絲枲』，故還使貢布帛，女即彼嬪婦也。」詒讓案：此嬪婦布帛之貢，爲民家女口之力征，即《管子·入國篇》所謂婦征，亦即《孟子》所謂布縷之征也。《月令》「蠶事既畢，乃收繭稅，以桑爲均」。注謂外命婦就公桑蠶室而蠶，收以近郊之稅。彼則公桑之地征，與此嬪婦之貢異也。云「任衡以山事，貢其物，任虞以澤事，貢其物」者，山澤雖有農圃牧諸職，若掌葛葛征草貢之等，所貢匪一，故通言其物以略之。賈疏云：「《大宰》云『三曰虞衡作山澤之材』。材即物也。以其山澤所出物多，故云物，若《禹貢》云『海物』然也。《序官》山澤稱虞，川林稱衡。此文云『任衡以山事』，山不稱虞者，欲見山中可以兼川林，亦貢物，故互見爲義也。此文次第與《大宰》不同者，彼依事大小爲次，此不依彼爲次者，欲見事無常故也。且彼有九職，仍并山澤爲一；此文分山澤爲二，唯有八者。任九職有臣妾及閭民，此無者，以周公設經，任之則有臣妾，使得自生；若貢稅則無，以其聚斂疏材無可稅故也。其閭民，《載師》已見出夫家之征，故於此不言之矣。其分山澤爲二者，以山澤所貢

不同，故分爲二以充八，通閒民爲九耳。」江永云：「九職中惟臣妾不貢疏材。《委人》之薪芻、疏材、木材，《掌茶》之疏材，自是取之於虞衡及山澤之農。九職除臣妾，析虞衡爲二，仍是九，故《大府》言九功之人。」案：江說是也。此任民之法，校之《大宰》九職之人，唯無臣妾耳。蓋臣妾最賤，雖受職而不貢功，即無口賦也。至下文夫布，即閒民之貢。賈因鄭以夫布入九賦，故謂此經閒民無貢，不足據也。此力征之貢，與九賦地稅不同，與《均人》公旬三日之力役亦不同。凡民國中自七尺以及六十，野自六尺以及六十有五，於法既任力役，則於身應計口出賦，故令各以其所能受職，而貢其功以爲征。不受職則爲惰民，而有罰。其老幼及貴者、賢能、癯疾、服公事者，皆不受力役，則亦不征其職貢。此任民作貢，與後世丁口賦正同，但出物而不出泉，與後世法小異耳。《漢書·食貨志》載王莽擬《周官》法，「諸取衆物鳥獸魚鼈百蟲於山林水澤及畜牧者，嬪婦桑蠶織紝紡績補縫，工匠醫巫卜祝及它方技商販賈人坐肆列里區謁舍，皆各自占所爲於其在所之縣官，除其本，計其利，十一分之，而以其一爲貢。」蓋比傳此經而失其本意者。九貢任民，其征甚輕，安得以地稅十一之法提之邪？凡力征與地征、力役並不同，互詳《大宰》、《鄉師》、《載師》、《均人》

疏。注云「貢草木謂葵韭果蓏之屬」者，葵韭蓏爲草，果爲木。葵韭共爲蒞，見《醢人》。果蓏，詳《甸師》疏。草木可貢者多，故約舉四者以咳之。凡無職者出夫布。獨言無職者，掌其九賦。【疏】「凡無職者出夫布」

者，賈疏云：「無職非一，故言凡。此無職，即《大宰》「閒民無常職轉移執事」者也。轉移執事即是有職，而言無職者，爲有職者執事，當家塵地不事，即無職也。出夫布者，亦使出夫口稅之泉也。」莊存與云：「夫布，一人之力征也。」江永云：「此經凡無職者，與農圃等并列，即九職中之閒民。夫布亦是閒民本身正職，與今時丁錢相似。《孟子》「塵無夫里之布」，夫布即此經之夫布。」案：莊、江說得之。凡力征皆以夫計，故《國語·魯語》云「任力以夫而議其老幼」。韋注云「力謂繇役，以夫家爲數」是也。上農圃工商之貢，皆計率以征其物，但此閒民則不貢物而出泉耳。此夫布即漢之口泉，計夫出之，故謂之夫布。唯閒民無功可貢，乃有此泉征，鄭以通釋九賦，則非也。注云「獨言無職者，掌其九賦」者，賈疏云：「上皆論貢不言賦，惟此無職之人言夫布，夫布即賦也。以其掌九賦者上雖直云貢，九賦亦掌之，故云掌其九賦。案劉琰問：『《載師》職云：「凡民無職事者，出夫家之征。」《甸師》職云：「凡無職者出

夫布。』夫家之征與夫布，其異如何？』鄭答云：『夫家之征者，田稅，如今租矣。夫布者，如今算斂，在九賦中者也。』以此言之，今租即夫征，不得兼言家，鄭連言家，挾句耳。劉琰又問：『《閭師職》云「凡任民，任農以耕事，貢九穀」，下至任虞，凡八貢，不道九賦。下言「凡無職者出夫布」，注云「獨言無職者，掌其九賦」。若此者，豈上八貢者復出八賦，與無職所出夫布，凡爲九？將自布賦不同，重計八貢？未之能審也。』鄭荅曰：『讀《天官·冢宰職》則審矣。無職在九賦中。今此不言其餘，獨言此者，此官掌斂賦，嫌無職者不當出算，故言耳。』鄭云讀《天官·冢宰》則審者，案《冢宰職》，九職、九賦別。九賦，自邦中以至邦都六也，加以關市、山澤及幣餘爲九。九職不言服數，或一服之中而有九職，安得八賦依八貢出之乎？言審矣者，審八賦不依九職爲九可知，故云審矣。若然，無職在賦中，其句下讀爲義，不連於上也。欲明無職之人，非直在九職中，亦在九賦中，故云無職在九賦中也。』詒讓案：鄭意上八貢所任之人，或受田，或受功，皆有常職，出貢復出賦，賦即口泉。此無職者，既不受田，復無常職，則唯出賦不出貢。今攷《載師》，無職事者出夫家之征，爲田稅及力征，力征亦即口泉；此無職者出夫布，則專爲口泉，而無田稅。鄭分別二

者甚精，但不知夫布與八貢並爲九職之貢，九賦爲地稅之總名，不得爲口泉，口泉亦唯閭民出之，八貢所任之人非閭民，貢物而不出泉，則義尚未審耳。朱大韶云：『《載師》云「無職事者」，《閭師》云「無職者」，兩義迥別，不得合爲一。無職事謂既無職而又不事事者，無職乃九職之無常職也。《冢宰》謂之閭民者，無職而轉移執事，是仍有職業者也。鄭司農云：「轉移爲人執事，若今傭賃也。」故令出夫布，泉也，謂出一夫之泉。閭師所任，即冢宰所任。於農圃工商牧獮虞衡八者，皆云貢其物，於無職者云出夫布者，蓋八者皆有物可貢，轉移執事之閭民，但有一夫力征，故令出一夫之布。自「凡任民」至「無職者出夫布」爲一節，合之即《冢宰》之九職，亦即《司會》之九功。冢宰分其職，閭師徵其賦，司會給其用，不得但云八貢。下別言凡民不畜、不耕、不樹、不蠶、不績者，與《載師》「凡宅不毛者」節同，載師罰之，閭師則恥之。經於無職者不云民，明與上八者合爲九職。賈沿注說，乃云其句下讀爲義，非也。至鄭以無職在九賦中，尤屬非是。」案：朱說是也。此經無職與《載師》無職事者，義雖互通，而人實迥異也。凡庶民，不畜者祭無牲，不耕者祭無盛，不樹者無椁，不

蠶者不帛，不績者不衰。掌罰其家事也。盛，黍稷也。椁，周棺也。不帛，不得衣帛也。不衰，喪不得衣衰也。皆所以恥不勉。【疏】「凡庶民不畜者，祭無牲」者，此明庶民喪祭所需及衣服，皆資所業以自共，其情不事事者，則罰令不得備禮利用也。《王制》云：「庶人祭於寢。」賈疏云：「案《孟子》云：『庶人五母雞，二母彘，無失其時。』是以不畜者當罰之，故死後祭無牲也。庶人用牲之法，若《王制》云：『韭以卵，麥以魚，黍以豚，稻以雁。』」注云「庶人無常牲，取以新物相宜而已」是也。案：依賈說，則庶民自祭得用雞豚爲牲。《國語·楚語》云「庶人祀以魚」，魚亦《膳夫》六牲之一也。但此無牲無盛等，皆罰情民本身，使不得備禮，則凡自祭祖禰皆無之。賈並謂其人死後乃罰之，殆非經意也。云「不耕者，祭無盛」者，《大戴禮記·曾子天圓篇》云：「無祿者稷饋，稷饋者無尸。」盧注云：「庶人無常牲，故以稷爲主。」是庶民耕者，祭以稷爲盛。今不耕則罰之，并不得稷饋也。云「不樹者無椁」者，《雜記》云：①「士雜木椁。」注云：「夫子制於中都，使庶人之椁五寸。」《公羊》宣十五年，何注云：「還廬樹桑菽，死者得葬焉。」菽即楸借字，亦棺椁材也。據鄭義，則庶民得有五寸之椁，蓋亦以所樹雜木爲之。今不樹則罰之，死者有棺而無椁也。云

「不蠶者不帛」者，賈疏云：「蠶則得帛。《孟子》云『五十可以衣帛』。以不蠶故身不得衣帛。」云「不績者不衰」者，《說文·糸部》云：「績，緝也。」凡麻枲之事謂之績，故《詩·陳風·宛丘》云：「不績其麻。」《豳風·七月》孔疏云：「績，緝麻之名。」案：衰以麻爲之，故不績則喪不得制衰也。

注云「掌罰其家事也」者，祭無牲無盛，葬無椁，衣不帛，喪不衰，並制殺其家之禮事以示罰也。云「盛，黍稷也」者，《甸師》注云：「盛，盛，祭祀所用穀也。粢，稷也，在器曰盛。」蓋齋爲祭穀，實於器則謂之盛，散文則祭穀謂之粢，亦通稱盛，此注以黍稷爲釋，互詳《甸師》疏。云「椁，周棺也」者，《說文·木部》云：「櫛，葬有木亭也。椁即櫛之隸變。《檀弓》云：『棺周於衣，椁周於棺，土周於椁。』」又云：「殷人棺椁。」注云：「椁，大也。以木爲之，言椁大於棺也。」《白虎通義·崩薨篇》云：「櫛之爲言廓，所以開廓辟土，無令迫棺也。」《釋名·釋喪制》云：「櫛，廓也，廓落在表之言也。」案：周棺者，謂周棺之四圍，若上下則不周，故《檀弓》孔疏云「椁不周，下有茵，上有抗席」是也。云「不帛，不得衣帛也」者，《說文·帛部》云：「帛，繒也。」帛，織絲

①「士雜木椁」，見《喪服大記》。

爲之，故不蠶者得衣帛也。任大椿云：「《雜記》注：『麻衣，白布深衣。』《深衣》注：『庶人吉服深衣。』考《管子·立政篇》：『刑餘戮民不敢服絲。』然則非刑餘戮民可以服絲矣。又《春秋·緇露·制服篇》：『散民不敢服采，刑餘戮民不敢服絲。』然則散民不敢服采耳，絲得服也。又《緇露·度制篇》：『古者庶人衣縵。』縵，無文帛也。又《尚書大傳》：『命民得衣文錦，未有命者不得衣，衣有罰。庶人衣布帛。』然則命民亦得衣文矣，不命之民亦得衣帛，與鄭注「庶人白布深衣」異說。今攷鄭注，深衣爲庶人之吉服，言其常服當布也。若行盛禮，或當攝盛，則衣絲也。《管子》、《春秋·緇露》、《尚書大傳》謂庶人衣絲，非常制也。疏引《孟子》「五十可以衣帛」，以不蠶故身不得衣帛。然則不蠶雖五十不得衣帛，蠶而未五十亦不得衣帛，則庶人布深衣其常也。《鹽鐵論》：「古者庶人耄老而後衣絲，其餘則麻枲而已，故命曰布衣。」云「不衰，喪不得衣衰也」者，衰，縗之借字，詳《內司服》疏。《釋名·釋喪制》云：「成服曰衰。衰，摧也，言傷摧也。」《喪服·記》云：「負，廣出於適寸。適，博四寸，出於衰。衰，長六寸，博四寸。」注云：「負，在背上者也。適，辟領也。前有衰，後有負版，左右有辟領，孝子哀戚無所不在。」案：此不衰謂五衰之服皆不得制也。

江永云：「斬衰、齊衰，當心前長六寸廣四寸之布謂之衰。不績之人遇有斬齊之喪，其衰服不設此布以恥之，非不服喪服。」云「皆所以恥不勉」者，因其惰游不勉事正業，故爲此罰以恥之，冀其知恥而改也。

縣師掌邦國都鄙稍甸郊里之地域，而辨其夫家、人民、田萊之數及其六畜車輦之稽。三年大比，則以攷群吏而以詔廢置。郊里，郊所居也。自邦國以及四郊之內，是所主數周天下也。萊，休不耕者。郊內謂之易，郊外謂之萊，善言近。【疏】「掌邦國都鄙稍甸郊里之地域」者，此官爲掌公邑吏之長，四等公邑之地域，甸稍縣疆，外與邦國都鄙，內與郊里甸遂相連比者，其疆界互相出入，故此官通掌其地域。縣都亦有公邑，經唯言稍甸者，文不具也。又《王制》說畿外封國之餘以爲閒田，天子亦置吏治之，疑亦隸此官矣。江永云：「謂邦國與都鄙，稍甸與郊里，其間相連之地域，縣師主分別之，不得侵越。」云「而辨其夫家人民田萊之數」者，主公邑版圖之法。自以下並專治稍甸縣都公邑之政法，與邦國都鄙郊里不相涉也。《小司徒》注云：「夫家猶男女

也。」王引之云：「夫家，以婚配者言之也。其餘老弱孤獨不得謂之夫家，則以人民該之。賈疏以人民爲奴婢，非也。謂奴婢爲人民者，惟見《質人》、《朝士》之文，其餘則否。」案：王說是也。曾釗說同。江永云：「甸稍縣都，地廣民衆，縣師上士二人，中士四人，所以能辨稽者，都家公邑亦放鄉遂各有親民之吏，以邦比之法校登之，縣師則按籍辨之稽之耳。」云「及其六畜車輦之稽」者，《均人》云「均人民牛馬車輦之力政」，故六畜車輦亦有稽，即《小宰》八成「聽師田以簡稽」是也。云「三年大比，則以攷群吏而以詔廢置」者，三年大校比民數，則正公邑官之官計，凡大比與大計，事相因也。詳《司書》疏。江永云：「攷群吏者，攷甸稍縣都之群吏也。」案：江說是也。此羣吏專指公邑之吏，與《大宰》《小宰》諸職之「羣吏」通百官府言者異，詳《大宰》疏。詔廢置，亦謂詔王及冢宰及大小司徒，詳《鄉師》疏。

注云「郊里，郊所居也」者，《載師》注云：「里，居也。」

故郊所居謂之郊里。《書·畢命》云：「康王命作冊畢，分居里成周郊。」即治郊里之事。賈疏云：「謂六鄉之民布在國中，外至遠郊，故有居在郊者也。案《遺人》云「鄉里之委積」，又云「郊里之委積」。彼云鄉里據國中，云郊里據在郊，與此同也。必知鄉民有居在郊者，見《比長》云「徙于國

中及郊，則從而授之。若徙于他，則爲之旌節而行之」。國中及郊不云他，明郊與國中同是鄉民也。」王昭禹云：「郊里在鄉遂之間。」林喬蔭云：「六鄉內屬國中，外界於郊。《司勳》云「掌六鄉賞地之法」，而《載師》賞田在遠郊，則鄉之界於郊明矣。然未可以郊即爲鄉也。《遺人》既有鄉里之委積，又有郊里之委積，則郊非即鄉矣。《費誓》《魯人三郊三遂》，則郊又非遂矣。《王制》「命左鄉簡不率教者移之右，命右鄉簡不率教者移之左。不變移之郊」，^①不變移之遂。則鄉在郊以內，遂在郊以外，而鄉不在郊矣。《比長》云「徙于國中及郊則從而受之」，是鄉既不在郊，亦不在國中矣。故《大司馬》云「鄉家載物，郊野載旄」。既言鄉，又言郊，以明二者之異。」案：王、林說是也。遠郊之內，地凡四同，其稍近者，六鄉七萬五千家所居，《遺人》、《司諫》所謂鄉里，《鄉師》、《州長》、《司常》所謂州里是也。六鄉之內外，則爲《載師》之場圃及七等田地，其外尚有餘地爲民居者，則別謂之郊里；猶之甸地除六遂七萬五千家外，餘地別爲公邑也。郊里者，里間通稱，郊民所居，亦什伍相比，

① 「不變移之郊」上原衍「不變移之左」五字，與《王制》文不合，據楚本刪。

與鄉遂同，與四等公邑井田之制異，故不爲公邑，而與鄉里同稱里。鄉里之地在四郊，各爲小城邑，《左》襄八年傳所謂「郊保」是也。亦置吏以治之，《小司徒》云「四郊之吏」，即此鄉里之羣吏也。全經散文言郊者，或通六鄉言之，其以鄉與郊對文者，則鄉爲鄉里，郊爲郊里，二者迥異。秋官四郊之獄，掌於遂士而不屬鄉士，《王制》四郊之學在鄉學之外，皆絕不相混。鄭《王制》注云：「郊，鄉界之外者也。」即此郊里之塙。賈氏不悟，乃以爲六鄉之民居於郊者。若謂在七萬五千家及七等田之內，則仍是六鄉之里，何以別屬之郊？若謂在七萬五千家及七等田之外，則本不屬於鄉，何得尚爲六鄉之民乎？其不可通甚矣。云「自邦國以及四郊之內，是所主數周天下也」者，賈疏云：「邦國則六服，四郊則兼國中，故云周徧天下也。」江永云：「縣師以縣爲名，所主者甸稍縣都。然縣都外連邦國，甸稍內連郊里，其間四等公邑，犬牙相錯，故通邦國郊里與稍甸都鄙之地域言之，正所以別其爲甸稍縣都之地域，以爲辨稽張本也。縣師實不掌邦國，亦不及郊里。下言「辨其夫家人民田萊之數，與其六畜車輦之稽」，又云「作其衆庶」，所謂其者，指縣師所主者言之耳。鄭謂縣師主數周天下，謬矣。」金榜云：「周制，鄉遂之外有都鄙，有公邑。《縣士》注云：

「都縣野之地，其邑非王子弟公卿大夫之采地，則皆公邑也，謂之縣。」縣師、稍人、縣士，治公邑之官也。鄉遂之外，甸稍縣都皆有公邑，其域內連郊里，外比邦國，而家邑、大都、小都之地，又牙錯其間。故《縣師職》云「掌邦國都鄙稍甸郊里之地域」，謂與公邑相連比者，縣師主辨其地域，非縣師所掌得內及郊里、外及邦國都鄙也。」案：江、金說致塙，足正鄭君之誤。林喬蔭說同。云「萊，休不耕者」者，《遂人》注義同。彼經云「上地田百畝，萊五十畝」。以萊對田言之，田爲當歲耕者，則萊爲休不耕者也。謂之萊者，《王制·釋文》引何胤云：「草所生曰萊。」又引庾氏云：「萊，草也。」案：萊本爲草，因之田休不耕但生草者，謂之萊。其山澤野地，草之所生，棄之不耕者，有田事則除草，爲防於其中，而教戰校獵，亦謂之萊。《山虞》云「萊山田之野」，《澤虞》云「萊澤野」，《大司馬》云「萊所田之野」是也。放火焚草謂之焚萊，《司燿》、《牧師》所云是也。全經之中，生草與除草、焚草，同謂之萊，其事異而由草得義則同。云「郊內謂之易，郊外謂之萊，善言近」者，賈疏云：「郊外言萊，即此經田萊，據郊而言，《遂人》亦云萊五十畝百畝之類，是萊爲草萊穢污之稱也。郊內謂之易，無文。案《大司徒》云「凡造都鄙，制其地域」，云上地不易，中地一易，下地

再易。司徒主六鄉，則六鄉之地從易可知。不言萊直言易者，善言近也。」詒讓案：鄭《小司徒》注云：「鄉之田制與遂同。」則六鄉亦當有田有萊，與《遂人》上地萊五十畝，中地萊百畝，下地萊二百畝，六遂之制同，與《大司徒》造都鄙之制異。此注謂郊內言易，郊外言萊，又以言易者屬之六鄉，言萊者屬之六遂，是鄉田制不與遂同，既與《大司徒》經文相牾，又與《小司徒》注義自相違伐，非也。《載師》及《遂人》注亦與此注同誤，詳《載師》疏。若將有軍旅，會同、田役之戒，則受灋于司馬，以作其衆庶及馬牛車輦，會其車人之卒伍，使皆備旗鼓兵器，以帥而至。受法於司馬者，知所當徵衆寡。

【疏】「若將有軍旅會同田役之戒」者，此治公邑之軍賦役征也。賈疏云：「言若，謂若有若無，不定之辭。將有謂事未至，軍旅謂征伐，會同謂時見，殷見，田役謂四時田獵，戒者謂有此數事則豫戒令之。」詒讓案：會同常禮，不出郊甸，不必作衆庶。此謂巡守殷國，王於方岳侯國行大會同之禮，六軍從行，役及公邑，此官則戒作之也。田役謂因田獵起徒役，亦略諸功作力役之事。詳《大宰》疏。云「則受灋于司馬，以作其衆庶及馬牛車輦」者，師役軍賦法並掌於

大司馬，此官則受而行之。所作者公邑之軍賦，出徒并出車馬兵器也。公邑亦制井田，故軍賦同都鄙之制，與鄉遂出兵不出車異。賈《大司馬》疏謂公邑出軍之法與鄉遂同，非也。《詩·小雅·信南山》孔疏引《司馬法》說井田出車之制，丘出戎馬一匹，牛三頭，甸出長轂一乘，馬四匹，牛十二頭，甲士三人，步卒七十二人，戈楯具備，即司馬官法之遺。此衆庶即彼甲士步卒等，馬牛車輦即彼戎馬長轂及牛等，下兵器即彼戈楯等是也。詳《小司徒》疏。云「會其車人之卒伍」者，謂衆庶既集，則以軍法部署之，車以百二十五乘爲伍，三十乘爲卒。詳《司右》疏。賈疏云：「人則百人爲卒，五人爲伍。」云「使皆備旗鼓兵器以帥而至」者，賈疏云：「旗謂若《司馬》云「秋辨旗物，王載大常」已下，鼓謂《司馬》云「春辨鼓鐸，王執路鼓」已下，兵器謂弓矢殳矛戈戟也。《鄉師》云「以旗致萬民」，此云而至者，謂帥而至鄉師也。」江永云：「《稍人》言「作其同徒輦輦，帥而以至」，是稍人自帥也。此言「使皆備旗鼓兵器以帥而至」，是使都家公邑之長帥，而縣師不帥也。《稍人職》以縣師之法作之，則是縣師受法於司馬，稍人受法於縣師。縣師是中閒稟令施令之人，不惟不帥師徒，而致於鄉師者亦非其職。疏「帥而致於鄉師」，則於經文「以帥而至」者不協，又侵稍

人之職矣。」案：江說是也。兵器當分爲二，器謂任器之屬。賈以兵器通爲五兵，非也。詳《玉府》疏。 注云

「受法於司馬者，知所當徵衆寡者，此亦注用今字作「法」，即《大司馬》之戰法也。《鄉師》之田法，亦其細別。此官則受之以爲官法，故《稍人》即謂之縣師之法，《方士》亦謂之縣法也。軍旅、會同、田役，事有大小，所徵衆寡之數不同，司馬頒其法於縣，縣師則受法從而徵之。凡造都邑，

量其地，辨其物，而制其域。物謂地所有也。名

山大澤不以封。【疏】「凡造都邑」者，賈疏云：「都謂大都

小都，邑謂家邑也。」云「量其地，辨其物，而制其域」者，與封人、量人爲官聯也。賈疏云：「量其地者，家邑二十五

里，大都百里，小都五十里也。域即疆域大小是也。」江永云：「職首通掌地域，謂與甸稍縣都相連已定之地域。此

則新制之地域也。」金榜云：「《量人》『掌建國之法，造都邑亦如之』。是量其地者，量人職也。《封人》『凡封國，封其

社稷之壇，封其四疆。造都邑之封域者亦如之』。是制其

域者，封人職也。於公邑之地造都鄙，縣師掌公邑之地域，

故於其造都鄙也，亦掌其事。」案：金說是也。凡造都邑，

其土地取之公邑，其除絕也則又歸之公邑，故此官得制其

域。至都邑既建以後，則其政治貢賦，咸都家之君自主之，

此官不復參與，唯其典法命令間有及於都家者，故《方士》

掌都家而云脩其縣法。《周書·嘗麥篇》亦云：「野宰乃命

家邑縣都，祠於大祠及風雨。」野宰即縣吏也。 注云

「物謂地所有也」者，即《大司徒》云「以土會之法，辨五地之

物生，以土均之法，辨五物九等」之事。凡山川民物等，皆

其地之所有也。云「名山大澤不以封」者，《王制》文。鄭彼

注云：「與民同財，不得障管，亦賦稅之而已。」言此者，釋

辨物制域之義。以歲時徵野之賦貢。野謂甸稍縣

都也。所徵賦貢與閭師同。【疏】注云「野謂甸稍縣都也」

者，《遂人》注義同。《縣士》「掌野」注云：「郊外曰野，大總

言之。」是遠郊以外，距王城二百里甸，至五百里都，通得野

稱也。亦詳《甸師》及《縣士》疏。江永云：「六遂以外通名

野，此謂徵公邑之民賦也。公邑之民賦，邑大夫徵之，縣師

以入大府。其疏材等物，委人斂之。若謂縣師親徵民賦，

則公邑民賦繁多，豈上士二人中士四人所能徵哉！」云「所

徵賦貢與閭師同」者，賈疏云：「但閭師徵六鄉賦貢并斂

之，此縣師所徵四處賦貢與閭師同，若斂野之賦貢，是遂

師、旅師也，故直云徵之同，明斂則異也。」案：鄭、賈說並

未安。此野之賦貢，即《遂師》之野職、野賦，所掌地異而法

略同。此官主公邑，不主三等采地之賦貢，采地賦貢亦非遂師、旅師所斂。互詳《旅師》疏。

遺人掌邦之委積，以待施惠。鄉里之

委積，以恤民之羸阨；門關之委積，以養老孤；郊里之委積，以待賓客；野鄙之委積，以待羈旅；縣都之委積，以待凶荒。委積者，

廩人、倉人計九穀之數足國用，以其餘共之，所謂餘法用也。職內邦之移用，亦如此也，皆以餘財共之。少曰委，多曰積。鄉里，鄉所居也。羸阨猶困乏也。門關以養老孤，人所出入，易以取餼廩也。羈旅，過行寄止者。待凶荒，謂邦國所當通給者也。故書「羸阨」作「擯阨」，「羈」作「寄」。

杜子春云：「擯阨當爲羸阨，寄當爲羈。」【疏】「掌邦國之委積以待施惠」者，掌王畿米粟薪芻等之委積，皆於九式所用之外，就地儲庠，以待施惠之事，與鄉師、司救、委人爲官聯也。江永云：「遺人、委人皆掌委積，而所主不同。遺人兼有薪芻，而所主者粟米之積；委人主薪芻、疏材、木材，凡畜聚之物之積。遺人之委積，自鄉里至縣都皆掌之，但所主者粟米，非委人之所聚者耳。」案：江說是也。云「鄉里

之委積以恤民之羸阨」者，以下並掌委積官之官法也。賈疏云：「此下數者，皆謂當年所稅多少，摠送帳於上。在上商量計一年足國用外，則隨便留之，以爲恤民之羸阨之等也。羸阨謂年穀不熟，民有困乏，則振恤之。」案：賈說非也。年穀不熟，自在凶荒之科。此云民羸阨者，《鄉師》云：「以歲時巡國及野，而賙萬民之羸阨，以王命施惠。」蓋隨時察問，民有困乏不給者則賙恤之，不係於年之上下也。云「門關之委積以養老孤」者，賈疏云：「門謂十二國門，關謂十二關門，出入皆有稅。所稅得者，亦送帳多少，足國用之外，留之以養老孤。故《司門》云：『以其財養死政之老與其孤。』」注云：「財所謂門關之委積也。」是其所留之財也。云「郊里之委積以待賓客」者，郊里謂六鄉外四郊所居，與鄉里異。賈疏謂即六鄉之民居遠郊者，失之，詳《縣師》疏。賓客委積即《大行人》上公五積、侯伯四積、子男三積之等。出入道路，隨宜供致。以其自國而出，以郊爲始，故此職以郊里之委積待之，而委人則又以稍聚待賓客，明道路所出，隨在皆有，不必皆出郊里。大、小《司徒》並有賓客令野脩道委積之文，彼野蓋通郊甸稍縣都言之，與此下文野鄙亦不同也。云「野鄙之委積以待羈旅」者，賈疏云：「上既言郊里據遠郊，則此野鄙據六遂。在郊外曰野，六遂

中有五百家鄙，以鄙表六遂耳，則野鄙中可以兼得公邑在甸地者也。旅，客也。謂客有羈繫在此未得去者，則於此惠之。但羈旅處處皆有，獨於此見惠者，但甸地在二百里中，於外內有羈旅皆得取之，故獨見於此也。」詒讓案：此職野鄙不兼縣都，與縣師之野異。然當兼甸稍言之，《司會》、《質人》注並云「野，甸稍也」是也。羈旅謂畿外客民，與上民爲六鄉土著異。蓋畿外之民來至王國者，皆於六遂外之公邑暫時寄居。以鄉遂夫家有定，國中四郊，士民萃處，皆無容羈旅之地，故必於野鄙受廩，而即以野鄙之委積待之，委人亦以甸聚待羈旅，皆是意也。至客民之留居不反者，則亦於公邑受田，故《旅師》掌野之興積，而云「凡新阡之治皆聽之」。暫止則爲羈旅，久居則爲新阡，其實一也。云「縣都之委積以待凶荒」者，賈疏云：「縣謂四百里，都謂五百里。不見稍三百里，則縣都中可以兼之。凶荒謂年穀不熟，則《曲禮》云「歲凶年穀不登」是也。特於此三處見凶荒，其凶荒則畿內畿外皆有，若畿外凶荒則人向畿內取之，畿內凶荒則向畿外取之。是以鄭君通給解之，故於近畿三百里之外言待凶荒之事也。案：稍當在野鄙內，賈謂在縣都中，亦非是。」注云「委積者，廩人、倉人計九穀之數，足國用，以其餘共之，所謂餘法用也」者，賈疏云：

「倉人主藏穀，廩人主藏米。自「計九穀之數」，至「餘法用」，皆約《倉人》文。案《倉人》云：「辨九穀之物，以待邦用。若穀不足，則止餘法用，有餘則藏之，以待凶而頒之。」注：「止猶殺。餘法用，謂道路之委積，所以豐優賓客之屬。」又案：《廩人》云：「掌九穀之數，以待國之分頒。」謂若委人之職，諸委積以稍聚待賓客，以甸聚待羈旅，是《廩人》亦云委積。若然，穀不足止餘法用，則此鄉里已下，皆無人委積之事，故云止餘法用也。雖無新物以入委積，其舊委積所藏者，則給糴阨老孤之等，故《倉人》云「藏之以待凶而頒之」。《掌客》云：「凶荒則殺禮者」，謂除道路委積之外也。」案：鄭、賈意，蓋謂此官所掌委積，以米穀爲主，即《倉人》所謂「穀積」是也。凡委積皆出於式用之餘。《管子·輕重乙篇》云：「請取君之游財，而邑里布積之。」游財亦即餘法用也。云「職內邦之移用亦如此也」者，《職內》注云：「移用謂轉運給他。」此鄉里之委積等，亦以法用所餘，轉運別儲，以給糴阨諸用，是與彼移用義正同也。賈疏云：「《職內》所云，亦謂本司所用，有餘乃移於他處，故云亦如此也。」云「皆以餘財共之」者，餘財即國用之餘也。云「少曰委，多曰積」者，《大司徒》注同。案委積皆倉廩積聚之通稱，詳《大司徒》疏。云「鄉里，鄉所居也」者，謂六鄉七

萬五千家所居之里也。此經及《司諫》謂之鄉里，《鄉師》謂之州里，義並同。其地同在遠郊以內，而非七萬五千家所居者，則別謂之郊里，故《縣師》注以郊里爲郊所居，義亦與此同。云「艱阨猶困乏也」者，阨，危之借字。《鄉師》注云：「艱阨，飢乏也。」詳彼疏。經作羶注作艱者，阮元云：「亦經用古字，注用今字之證。」賈疏云：「案《書傳》云：『行而無資謂之乏，居而無食謂之困。』」云「門闢以養老孤，蓋人所出入，易以取餼廩也」者，此老孤專指死政之老孤，蓋春饗秋食之外，又給餼廩。其人孤獨耗弱，不可令遠取餼廩於官，以門闢人所常出入，故令就給之也。惠士奇云：「古者軍營在門，故死事之老孤，養以門闢之委積。蓋就其地而養之，所以勵士而勸功也。文十一年《左傳》：『鄭瞞伐宋，司徒皇父禦之，彤班爲御，以敗狄於長丘，宋以門賞彤班，使食其征。』征者，門闢之委積，彤班食之，因謂之彤門。」案：惠說亦通。軍營在門，詳《大司馬》注。云「羶旅，過行寄止者」者，《說文·网部》云：「羶，馬絡頭也。」①重文羶，羶或从革。此羶即羶之譌體。《史記·陳杞世家》集解引賈逵《左傳注》云「羶，寄旅客也」。然則羶旅謂行客經過因而寄止其地者也。云「待凶荒謂邦國所當通給者也」者，《大府》注云：「待猶給也。」又《大司徒》云：「大荒則命邦

國移民通財。」是無論畿內畿外，凡有凶荒，悉彼此相通給之，故以縣都之委積待之也。云「故書艱阨作羶阨，羶作寄，杜子春云羶阨當爲艱阨，寄當爲羶」者，羶，舊本誤羶，今依宋建陽本、互注本及《釋文》正。段玉裁云：「《說文·革部》：『革，黏土也。艱，土難治也，從革艮聲，羶，籀文艱，從喜。』《周禮》故書作羶，羶見《說文·手部》，『師也』，於此不可通，故子春易之。不易爲艱而易爲羶者，據《鄉師》有羶阨之文，故知當從籀體，連阨言之，以見同《鄉師》也。易寄爲羶，亦依字之聲類。」徐養原云：「羶，羶，羶寄，各以同音相通。注云『羶旅過行寄止』者，則羶寄義亦同也。」宋世榮云：「《王制》『東方曰寄』。《呂覽·慎勢》注『寄作羶』。《論語》：『子春易經字爲羶，而注仍作艱者，亦用今字也。俗本注亦作羶，非。』《委人》『羶旅』注云：『故書羶作寄。』羶，寄，奇，聲類同。凡賓客、會同、師役，掌其道路之委積。凡國野之道，十里有廬，廬有飲食；三十里有宿，宿有路室，路室有委；五十里有市，市有候館，候館有積。

①「絡」原訛「駱」，據楚本改。

廬，若今野候，徒有庠也。宿，可止宿；若今亭，有室矣。候館，樓可以觀望者也。一市之間，有三廬一宿。【疏】

「凡賓客、會同、師役，掌其道路之委積」者，賈疏云：「上經委積隨其所須之處而委積，此經所陳委積，據會同師役行道所須，故分布於道路，遠處須多故有積，近處須少故有飲食及委也。」云「凡國野之道，十里有廬，廬有飲食」者，此野謂城郭外，自近郊至五百里畿，凡道路所出皆有此制，與上文野鄙專指甸稍異。廬即野廬氏所巡行宿息之等。云「三十里有宿，宿有路室，路室有委」者，《呂氏春秋·不廣篇》云「軍行三十里爲一舍」，故三十里有宿。路室儲侍多於廬，故有委。《管子·大匡篇》云：「三十里置遽委焉，有司職之。從諸侯欲通，吏從行者，令一人爲負以車。若宿者，令人養其馬，食以委積。」注云：「遽，今之郵驛也。委謂當有儲，擬以供過者。」此與三十里路室有委合。又據《管子》，則路室似兼爲傳遽之舍。《續漢·輿服志》云：「驛馬三十里一置。」周法或與漢同。云「五十里有市，市有候館，候館有積」者，《荀子·大略篇》云「吉行五十里」，故五十里有市，候館儲侍尤多，故有積。《大戴禮記·王言篇》云：「五十里而封，百里而有都邑，乃爲畜積衣裘焉，使處者恤行者，有與亡。」此與五十里候館有積合。注云「廬若

今野候，徒有庠也」者，《釋名·釋宮室》云：「廬，慮也，取自覆慮也。」《圉師》注云：「廬，廡也。」①《廣雅·釋宮》云：

「庠、廡、廬，舍也。」廬制最疏略，惟爲長廣之周屋，以便晝息。漢時野候蓋正如此，故舉以爲況。徒有庠者，明其無房室不可野宿也。庠即廡，詳《圉師》疏。又《國語·周語》云：「國無寄寓。」韋注云：「寓亦寄也。無寄寓者，不爲廬舍可以寄寓羈旅之客。」案《說文·广部》云：「廬，寄也。」則寄寓當即此經之廬。《國語》又云「立鄙食以守路」。注云：「鄙，四鄙。十里有廬，廬有飲食。則此廬亦即彼鄙食之制。」云「宿，可止宿，若今亭有室矣」者，《說文·宀部》云：「宿，止也。」又《高部》云：「亭，民所安定也。亭有樓。」蓋宿有路室，其制視廬加詳，具有房室，可以夜宿。漢時亭亦有室可宿，《史記·李廣傳》，霸陵尉止廣宿亭下，是其證。《御覽·居處部》引《風俗通》云：「謹案：《春秋國語》『置有寓望』，謂今亭也。漢家因秦，大率十里曰亭。亭，留也，蓋行旅宿食之所館也。」據應說，則漢之亭兼周路室、候館之制矣。又《周書·大聚篇》云：「五里有郊，十里有井，二十里有舍，舍有委。」蓋邦國都鄙路室之制，與此經

①「廬」，據《圉師》注當爲「庠」之訛。

異。云「候館，樓可以觀望者也」者，《聘禮》「及郊」，又云「及館」，注云：「館，舍也。遠郊之內有候館，可以小休止，沐浴。」《說文·人部》云：「候，伺望也。」又《食部》云：「館，客舍也。《周禮》五十里有市，市有館，館有積，以待朝聘之客。」又《木部》云：「樓，重屋也。」《魯語》云「宿於重館」，韋注云「館，候館」，引此經。案：館與觀聲近字通，《釋名·釋宮室》云：「觀，觀也，於上觀望也。」《楚辭·大招》王注云：「觀猶樓也。」蓋候館之制尤備，不徒有室，又有高明樓榭，足供候望觀眺，惠士奇謂即《周語》所謂寓望是也。云「一市之間有三廬一宿」者，賈疏云：「十里二十里有廬，三十里有宿，四十里又有一廬，五十里有市，是其一市之間三廬一宿。凡廬有四義：十里有廬，一也；中田有廬，二也；《易·剝》之上九云：『君子得與，小人剝廬。』」注云：「小人傲狠，當剝徹廬舍而去。」三也；《公劉》詩云：「於時廬旅。」鄭云：「廬舍安民，館舍施教令。」四也。案：依鄭、賈說通計之，則自王城外至於畿內，約有十市十宿三十廬。其廬宿市左右旁自相距里數，則無攷。又案：通言之，宿、市、路室、候館等皆謂之野廬，故《野廬氏》「掌比國郊及野之道路、宿息、井樹」是也。凡委積之事，巡而比之，以時頒之。【疏】「凡委積之事，巡而比

之」者，委積分儲各處，此官則巡行比較之，恐有闕乏也。云「以時頒之」者，賈疏云：「則以待者是也。」

均人掌均地政，均地守，均地職，均人

民、牛馬、車輦之力政。政讀爲征。地征謂地守地

職之稅也。地守，衡虞之屬。地職，農圃之屬。力征，人民

則治城郭、涂巷、溝渠，牛馬車輦則轉委積之屬。【疏】「掌

均地政，均地守，均地職」者，《大司徒》云：「以土均之法，

辨五物九等，制天下之地征。」此以下所均，即土均之法也。

賈疏云：「均人所均地政已下，總均畿內鄉遂及公邑。均

地政者，謂均地守地職二者之稅，使皆十一而出稅，又均人

民已下力征之事。若然，《土均》云「掌平土地之政，以均地

守，以均地事，以均地貢」，注云「所平之稅，邦國都鄙也」，

與此鄉遂及公邑別。彼又云「地貢」，鄭云「謂諸侯之九

貢」，與此九職之貢又不同也。」案：均人掌均鄉遂公邑之

地事，與土均掌均邦國都鄙之地事，職掌內外遠近互相備

也。地政雖是十一之稅，然當爲九賦，非九職也。鄭、賈說

並誤。注云「政讀爲征」者，《土均》注同。此據《大司

徒》土均之法云地征，故讀從之。凡此職地政、力政，政並

讀爲征，即《小宰》注所云「征字或作政」者也。云「地征謂地守地職之稅也」者，《大司徒》注云：「征，稅也。」鄭意此地征即地稅，對口泉爲民稅也。今案：當爲九賦，即下云「財賦」是也。九賦是地稅，非口泉，詳《大宰》疏。《管子·乘馬篇》云：「地之不可食者，山之無木者，百而當一；涸澤，百而當一；地之無草木者，百而當一；楚棘雜處，民不得入焉，百而當一；藪，鎌纏得入焉，九而當一；蔓山，其木可以爲材，可以爲軸，斤斧得入焉，九而當一；汎山，其木可以爲棺，可以爲車，斤斧得入焉，十而當一；流水，網罟得入焉，五而當一；林，其木可以爲棺，可以爲車，斤斧得入焉，五而當一；澤，網罟得入焉，五而當一。命之曰地均。」又云：「十仞見水不大潦，五尺見水不大旱。十一仞見水，輕征，十分去一；二則去二，三則去三，四則去四，五則去半，比之於山。五尺見水，十分去一，四則去二，三則去三，二則去四，一尺而見水，比之於澤。」即此均地征之法也。惠士奇云：「遂人以土均平政，均人、土均皆掌土地之政令，《管子·乘馬篇》所謂地均以實數者也。《左》襄二十五傳，楚蔣掩所書九度、八鳩、七辨、六表、五數、四規、三町、二牧、一井之土，亦不外是矣。山虞、澤虞、林衡、川衡之山林，林麓川澤之土，升人之金玉錫石之土，場人之場圃

之土，凡在大司徒土地之圖者，十有二土之名，十有二壤之物，皆以土均之法均之，則皆與土均聯事而分掌之者也。」云「地守，衡虞之屬」者，《土均》注同。林衡掌林麓，川衡掌川澤，並云「平其守」，注云「平其地之民，守林麓之部分」。此均地守，即所云平其守也。賈疏云：「亦謂畿內川衡、林衡、山虞、澤虞，皆遣其地之民守護之；及其入山林川澤取之者，使出稅以當邦賦。」云「地職，農圃之屬」者，與《載師》「授地職」義同，亦據有事於地者，故不通舉九職。《載師》注釋爲「農牧衡虞」，此衡虞別人地守，又不及牧，故云「之屬」以略之。云「力征，人民則治城郭、涂巷、溝渠，牛馬車輦則轉委積之屬」者，此力征即任役，有事則征之，與九職之力征爲民貢之常征異。賈疏云：「人民并車輦，並是力之征稅。」凡均力政，以歲上下。豐年則公旬用三日焉，中年則公旬用二日焉，無年則公旬用一日焉。豐年，人食四鬴之歲也。人食三鬴爲中歲。人食二鬴爲無歲，歲無贏儲也。公，事也。旬，均也。讀如「營營原隰」之營。《易》「坤爲均」，今書亦有作旬者。【疏】「凡均力政，以歲上下」者，此均力役之官法也。賈疏云：「此所均力政者，即上人民之力征，不通牛馬車輦，故

《禮記·王制》云：「用民之力，歲不過三日。」是此亦據人而言也。以歲上下者，上即豐年，下即儉年也。」王引之云：「以歲上下，則在農功既畢之後可知。」注云「豐

年，人食四鬴之歲也。人食三鬴爲中歲，人食二鬴爲無歲，歲無贏儲也者，賈疏云：「案《庾人》云「人四鬴上也，人三鬴中也，人二鬴下也」而知之。彼又云「不能人二鬴，則令邦移民就穀」，此時則無力征矣。若然，此食二鬴而言無年，無年者，鄭云「無贏儲」，仍未移民就賤。此無年與彼不能人二鬴之歲不同，彼不能人二鬴，自然無贏儲也。」案：賈說是也。《玉藻》云：「年不順成，土功不興。」孔疏亦云：「謂人食不得滿二鬴之歲。若人食二鬴，則猶興土功也。」云「公，事也」者，《爾雅·釋詁》文。云「句，均也」者，《爾雅·釋言》云：「洵，均也。」句洵聲類同。《詩·大雅·桑柔篇》：「苑彼桑柔，其下侯甸。」毛傳云：「句句陰均也。」鄭意役法當均勞逸，故謂之公句，即取役事均平之義，猶市賈謂之月平也。云「讀如營營原隰之營」者，即《小雅·信南山篇》「畇畇原隰」之異文。段玉裁云：「讀如營，說其音也。營營，今《詩》作「畇畇」。營從田熒省聲。熒在庚耕清青部，句畇在真臻部，二部古字合用也。」呂飛鵬云：「鄭蓋引《韓詩》也。《詩·大雅》「來句來宣」，箋云「句當作

營」。營營爲同聲字，句可讀作營，亦可讀如營也。」江永云：「公句者，公家力役之程日也。力役以句計，《左傳》宣十一年，^①楚令尹蔣艾獵城沂，三句而成，不愆于素。定元年，士彌牟營成周，量事期，三句而畢。公句即此句字，舊讀均，非是。力役或一句二句三句，而一夫不過三日，三日之外，他役代之。」案：江讀是也。王昭禹、陳祥道、鄭鏐、方苞、王引之並讀句如字，與江略同。蓋鄉師大役有役要，亦案日校計，句者日之小成，《宰夫》所謂「句終則令正日成」是也。役要計日受功，故亦謂之公句。依江說，則不論功役之多少，而一人一年止用三日二日一日，與《王制》及賈申鄭義並合，於義爲允。《大戴禮記·王言篇》亦有「使民之力歲不過三日」之文，蓋力役大小遲速，不能豫定，而一人應直之役，歲必以三日爲正。其中興發，亦自有更遞及顧代之法，不慮其廢事而厲民也。又案：此力征謂興作大役，與九職任民之征異。以《小司徒》、《遂人》經文攷之，六鄉六遂致民，雖有上劑下劑之異，而家皆以一人爲正卒。國有大功，小司徒、大司馬計用役之數，書以授鄉遂之吏以致民。其正卒來供役，在公句三日之內者，蓋受役而自齎

①「一」原訛「六」，據楚本改。

其食，若三日之外，未受代，則其不來共役者，計公旬三日之食，相與共而給之，以當顧役之直。蓋或共役，或出泉，自有均平之法，其馬牛車輦之等亦然，此官皆當均而治之矣。云「《易》坤爲均，今書亦有作旬者」者，「坤爲均」，《易·說卦》文。《內則》注云：「旬當爲均，聲之誤也。」《易·說卦》「坤爲均」，今亦或作旬也。」段玉裁云：「《易》坤爲均」，亦有作「爲旬」者，則旬讀爲均，此《周禮》旬亦讀爲均也。《內則》「旬而見」，鄭讀「均而見」。古文均字作𠂔。《說文》「𠂔」字，他書作𠂔，𠂔字今作筠，知旬勻古通用不別。」凶札則無力政，無財賦，無力征，恤其勞也。無財賦，恤其乏困也。財賦，九賦也。【疏】「凶札則無力政，無財賦」者，賈疏云：「凶謂年穀不孰，札謂天下疫病，則無力征及財賦二事，此即《廩人》云「不能人二鬴」之歲」。王昭禹云：「無力政，則《大司徒》十二荒政所謂弛力也。無財賦，則荒政所謂薄征也。」案：王說是也。無力政者，謂并公旬一日之役亦弛而不徵，大凶札尤重於無年也。此力政亦謂興役，非九職之力征。注云「無力征，恤其勞也，無財賦，恤其乏困也」者，征，舊本並作政。宋建陽本作征，與前注合，今據正。以凶札民勞而財乏，不可重困之，故無力征財賦以恤其災。云「財賦，九賦也」者，《大宰》云

「以九賦斂財賄」，注云：「財，泉穀也。」賈疏云：「此即大宰九賦，謂口率出泉。知賦中惟是九賦者，以下文有地守地職，故此惟有九賦也。若然，上均地政，不言均九賦，亦均之可知。」案：九賦乃地稅之正，鄭、賈以爲口泉，非也。財賦雖爲九賦，當兼有《載師》里布、《閭師》夫布及《廩人》五布之等。《司市》云「國凶荒札喪則市無征」，是其一端也。又案：《大司徒》注云：「財賦謂九賦及軍賦。」此不言軍賦者，上力政已含軍賦，明財賦內無軍賦也。不收地守、地職，不均地政。不收山澤及地稅，亦不平計地稅也。非凶札之歲當收稅，乃均之耳。【疏】注云「不收山澤及地稅，亦不平計地稅也」者，謂虞衡不收山澤之稅，農圃不收田園之稅，既不收稅，即不須平計之。但此地職乃九職之貢，上注云農圃之屬是也，與地政爲九賦地稅之正不同，鄭并爲一，非也。云「非凶札之歲當收稅，乃均之耳」者，明此土均平計地之稅之事，皆非凶札之歲乃舉之也。三年大比，則大均。有年無年，大平計之。若久不脩，則數或闕。【疏】「三年大比則大均」者，此贊小司徒大比民數，而因以稽攷地政、地守、地職、力政，大總校計均平之，使無勞逸也。惠士奇云：「三年大比則大均，故《大宗

伯《有大均之禮以恤衆》。《論語》「爲力不同科」，馬融曰：「爲力者，力役之事，有上中下三科，謂歲有豐凶，地有遠近，時有久暫。周衰政失，力役不均，故孔子傷之。」公句之有均，即力役之有科也。」注云「有年無年，大平計之」者，賈疏云：「經既云大均，明知有年及無年皆須大平均計之也。」云「若久不脩，則數或闕」者，明大均不得踰三年之意。

師氏掌以嫺詔王。告王以善道也。《文王世子》曰：「師也者，教之以事而諭諸德者也。」

【疏】「掌以嫺詔王」者，嫺，古美字，詳《大司徒》疏。注云「告王以善道也」者，《大宰》注云：「詔，告也。」《大司徒》注云：「美，善也。」謂以善道告王使之行之。《通典·吉禮》引馬融注云：「嫺，嫺道也。告王以善道。」與鄭注同。引《文王世子》曰「師也者，教之以事而諭諸德者也」者，詔告以善道，即諭諸德之事。論，《禮記》作喻，義同。《通典》引馬注云：「師者，教人以事而諭諸德也。」亦約《文王世子》文。

《荀子·儒效篇》說周公教誨開導成王，使諭於道，即師道也。以三德教國子：一曰至德，以爲道本；二曰敏德，以爲行本；三曰孝德，以知逆惡。

教三行：一曰孝行，以親父母；二曰友行，以尊賢良；三曰順行，以事師長。德行，內行之稱。在心爲德，施之爲行。至德，中和之德，覆燾持載含容者也。孔子曰：「中庸之爲德，其至矣乎！」敏德，仁義順時者也。《說命》曰：「敬孫務時敏，厥脩乃來。」孝德，尊祖愛親，守其所以生者也。孔子曰：「武王、周公其達孝矣乎！夫孝者，善繼人之志，善述人之事者也。」孝在三德之下，三行之上，德有廣於孝，而行莫尊焉。國子，公卿大夫之子弟，師氏教之，而世子亦齒焉，學君臣、父子、長幼之道。【疏】「以三德教國子」者，三德三行皆此官掌小學教國子之官法也。凡小學，在國中王宮南之左。《大戴禮記·保傅篇》云：「古者，年八歲而出就外舍，學小藝焉，履小節焉。束髮而就大學，學大藝焉，履大節焉。」案：外舍即小學也。師氏教以德行，保氏教以道藝。學小成而後升於大學，大司樂教之。三官爲聯事，所教亦互相備也。云「三曰孝德，以知逆惡」者，《通典·吉禮》引馬注云：「教以孝德，使知逆惡之不可爲也。」賈疏云：「善父母爲孝，以孝德之孝以事父母，則知逆惡不行也。」案：賈略本馬義。俞樾云：「逆惡之事，無取乎知之，知當讀爲折。《荀子·勸學

篇：「鏤而舍之，朽木不折。」《大戴記·勸學篇》作「朽木不知」，知即折之段字也。知與折古音相近。《中庸》既明且哲，《釋文》曰：「哲，徐本作知。」知之通作折，猶知之通作哲也。孝德以折逆惡者，言其孝德折其逆惡之心也。折猶制也。《論語·顏淵篇》「片言可以折獄者」，鄭注曰：「魯讀折爲制。」是折與制義通。有子曰：「其爲人也孝弟，而好犯上者鮮矣。不好犯上而好作亂者，未之有也。」是謂孝德以折逆惡。」案：俞說亦通。云「教三行」者，教國子以躬行之事，其要有三也。云「一曰孝行以親父母，二曰友行以尊賢良」者，《通典》引馬注云：「教以朋友之行，使擇益友。」《鄉大夫》注云：「賢，有德行者。」《宰夫》注云：「良猶善也。」案：《大司徒》六行，亦以孝友爲首，但彼無順行，而有睦姻任恤，與此異。又《大司樂》：「樂德教國子中和祗庸孝友。」彼通言之，故以孝友爲德，猶此三德六行皆有孝也。又案：依馬說，此友行據朋友爲義，故云以尊賢良；而《大司徒》、《大司樂》兩職注，並據《爾雅》「善兄弟爲友」義，不同者，善朋友、善兄弟兩義可互通，經注各舉一端以見義，實不相妨也。云「三曰順行以事師長」者，《通典》引馬注云：「師，德所不如也。長，老者。」案此師長，當與《調人》「師長之讐」兄弟義同，即《大宰》九兩之「師以賢得

民，長以貴得民」。事長謂事官府都邑之長，亦當盡禮，《孝經》云「以敬事長則順」是也。《士冠禮》冠禮畢，云「遂以摯見于卿大夫、鄉先生」。彼卿大夫即長，鄉先生即師。蓋成人亦重事師長，不徒小學之教也。馬以爲長老，雖亦經義所該，然不得在復讐之科，不可通於《調人》矣。賈疏謂朋友之長者，尤誤。注云「德行，內外之稱，在心爲德，施之爲行」者，《通典》引馬注同。《說文·彳部》云：「德，升也。」又《心部》云：「惠，外得於人，內得於己也。」經典通以德爲惠，經例多以德行通言，故《大司樂》注云：「德，能躬行者。」唯此以三德三行分教，故鄭特分別釋之。《大戴禮記·盛德篇》云：「能得德法者爲有德，能行德法者爲有行。」是德者心蘊於內，行者身履於外之名也。賈疏云：

「案《禮記》云：『恥有其德而無其行』，則德在內行在外也。又見經至德敏德道行爲本，道行是施之於外之名。又孝德知逆惡，行亦是在外之事，則知三德皆在內，與外行爲本。又三行云親父母之等，故云施之爲行也。」云「至德，中和之德」者，《中庸》云：「喜怒哀樂之未發謂之中，發而皆中節謂之和。中也者，天下之大本也；和也者，天下之達道也。致中和，天地位焉，萬物育焉。」鄭據彼爲說。又鄭《中庸目錄》云：「名曰中庸者，以其記中和之爲用也。」是中和爲

德，中庸爲用，故不云中庸之德，而云中和之德。《大司徒》六德，知、仁、聖、義、中、和，依鄭說則此至德兼彼二德也。《通典》引馬注云：「至德者，中德也。」《中庸》曰：「天命之謂性，率性之謂道。」失中庸則無以至道，故曰以爲道本。」亦據《中庸》爲說，與鄭同。云「覆燾持載含容者也」者，《中庸》云：「辟如天地之無不持載，無不覆幬。」鄭彼注云：「幬亦覆也。幬亦作燾。」此注即本彼文，明中和所以爲至德也。云「孔子曰，中庸之爲德，其至矣乎」者，賈疏云：「此是《論語·雍也》之文。引之者，證此至德與中庸之德爲一之意。」案鄭《中庸》注云：「庸，常也，用中爲常道也。」云「敏德，仁義順時者也」者，《書·康誥》云：「丕則敏德。」《說文·支部》云：「敏，疾也。」順時即敏疾之義。《論語集解》引孔安國云：「敏，行之疾也。」故以爲行本。引《說命》曰「敬孫務時敏，厥脩乃來」者，《學記》引《兑命》文。兑說字通。鄭彼注云：「敬孫，敬道孫業也。敏，疾也。厥，其也。學者務及時而疾，其所脩之業乃來。」案：僞古文《說命》襲此文，作「惟學遜志務時敏，厥脩乃來」，非鄭所見。此引之者，證敏爲仁義順時之義。云「孝德，尊祖愛親，守其所以生者也」者，《大司徒》「六行」注云「善於父母爲孝」，所謂愛親也。此復廣言孝德之盛，故兼尊祖言之。引孔子

曰「武王、周公其達孝矣乎，夫孝者，善繼人之志，善述人之事者也」者，證尊祖愛親，守其所以生之義。賈疏云：「是《禮記·中庸》文，言二人通達行孝者也。」案《中庸》上文云「無憂者其惟文王乎！父作之，子述之」，則善繼人之志。據周公以成王時未大平，不得制禮作樂，周公攝政六年，大平，乃制作禮樂，爲善繼文王之志，則《尚書》云「考朕昭子刑，乃單文祖德」是也。善述人之事者，據武王能述父以伐紂之事，則《尚書序》云「惟十有一年，武王伐殷」是也。《中庸》孔疏云：「善繼人之志者，謂若文王有志伐紂，武王能繼而承之。善述人之事者，言文王有文德爲王基，而周公制禮以贊述之。此是武王、周公繼孝之事。」案：繼志述事，賈孔二疏，義正相反，孔說爲允。云「孝在三德之下，三行之上，德有廣於孝而行莫尊焉」者，《孝經》云：「子曰：天地之性人爲貴，人之行莫大於孝。」是行莫尊於孝也。《大司樂》樂德亦以孝友爲下。賈疏云：「三德以孝德爲下，故云德有廣於孝，則至德敏德，是二德廣於孝德也。三行之中，孝行施於父母爲上，順行友行施於外人爲下，故云而行莫尊焉。」案：此經之義，當如鄭、賈說。但德行上下，亦非一揆，不容泥也。《大戴禮記·衛將軍文子篇》：「孔子曰：孝，德之始也；弟，德之序也；信，德之厚也；

忠，德之正也。」盧注云：「天道曰至德，地道曰敏德，人道曰孝德。《四代》曰：有天德，有地德，有人德。夫學天地之德者，皆以無私爲能也。動而樂施者，天德也。安而待化者，地德也。故天地之德有廣狹矣。自餘禮義忠信已下，皆爲人德，因事則爲禮，厚其行則爲孝也。」案：盧意蓋以此孝德對天地二德則爲下，而爲人德之重，故彼記又以爲德之始，說亦可通。但以此三德爲即《四代記》「天地人三德，則不免牽合，恐未足馮耳。」云「國子，公卿大夫之子弟」者，《漢書·禮樂志》說同，即後云「國子弟」是也。《大司樂》云：「掌成均之法，以治建國之學政，而合國之子弟焉。」注云：「國之子弟，公卿大夫之子弟，當學者謂之國子。」並本班義。賈疏云：「此經直言國子。」案《禮記·王制》云：「春秋教以禮樂，冬夏教以詩書。」下文云：「王太子、王子、羣后之太子、卿大夫元士之適子、國之俊選，皆造焉。」故知國子之中有卿大夫之子也。鄭不言王太子及元士之適子者，略言之，其實皆有也。《王制》惟言太子、適子，不言弟，鄭知兼有弟者，《大司樂》及此文皆云「教國子弟」，連弟而言，故鄭兼言弟也。」案：《御覽·皇親部》引《尚書大傳》云：「古之帝王，必立大學小學，使王太子、王子、羣后之子，以至公卿大夫元士之適子，十有三年始入小

學，年二十入大學。」與《王制》文略同，並鄭所據。《國語·周語》云：「宣王欲得國子之能導訓諸侯者，樊穆仲曰：『魯侯孝。』乃命魯孝公於夷宮。」韋注：「賈侍中云：『國子，諸侯之嗣子。』或云『國子，諸侯之子』。昭謂國子，同姓諸姬也。凡王子弟謂之國子。」據《周語》則王子、羣后之子皆爲國子，與《王制》、《書傳》文合。此注不言王子及諸侯子，賈謂略言是也。金榜云：「天子立四學，王太子、王子及諸侯卿大夫之子學焉，謂之國子。其鄉人子弟不得學於王宮小學，父師、少師教之門塾之基，所謂家有塾也。國子由小學入大學，鄉人子弟由家塾入鄉學，其俊選之士乃得升於大學，是其貴賤之差。」又云：「《師氏》、《大司樂》鄭注皆云『公卿大夫之子弟謂之國子』，不下及於士。」《燕義》：「古者周天子有庶子官，庶子官職諸侯、卿、大夫、士之庶子之卒。」鄭注《諸子職》依用其說，兼數士之子，蓋據王族言之。《大傳》：「公子有宗道，公子之公，爲其士大夫之庶者，宗其士大夫之適者。」此公族有大夫復有士之說也。然《喪服經》齊衰以下，大夫以尊降，公之昆弟以旁尊降；凡於爲大夫者，則得服其親服。《穀梁春秋》曰：「公子之重視大夫。」然則在王族者，不更別以大夫士審矣。故鄭注或云公卿大夫之子弟，或兼舉士之子，義得兩通。」詒讓案：

此經有國子，有門子，二者不同。國子者，即國之貴游子弟，此通乎適庶而言者也。《小宗伯》云：「其正室謂之門子。」則專指王族及公卿大夫之適子言之，此不兼庶子者也。《王制》及《書傳》所云適子者，乃專指入學之門子言之。《管子·大匡篇》^①云「國子之義，人與父俱，出與師俱，上與君俱」是也。蓋古多世官，故人學者以適子爲尤重，實則宦族支庶子弟亦無不入學者，故此經通言國子弟，而《王制》、《書傳》則止舉適子，義不相核也。至元士雖爵秩較卑，然在王族則有門子，在庶姓亦多世官，其適子雖不得爲門子，然亦必入學。此注不及元士之子，亦是文略，賈說深得鄭旨。至鄉遂俊選，則唯入大學，不入小學，故此注不及也。又案：依《尚書大傳》說，則此經之國子爲年十三以上者，《大司樂》之國子爲年二十以上者，長幼不同。《管子·小問篇》云：「昔者吳干戰，未齠者不得入軍門，國子擣其齒，遂入，爲吳國多。」是國子不論年齒長幼之證。但國子入學之年，禮經無文。《內則》云：「十年出就外傅，朝夕學幼儀，請肄簡諒。十有三年，學樂，誦《詩》，舞《勺》。成童，舞《象》，學射御。二十而冠，始學禮，舞《大夏》。」鄭注云：「成童，十五以上。」《大戴禮記·保傳篇》則謂年八歲而出就外舍，束髮而就大學。盧注云：「束髮謂成童，

《白虎通》曰「八歲入小學，十五入大學」是也。此太子之禮。《尚書大傳》曰：「公卿之大夫、元士嫡子，年十三始入小學，見小節而踐小義。年二十入大學，見大節而踐大義。」此世子入學之期也。又曰「十五年入小學，十八入大學」者，謂諸子姓晚成者至十五入小學，其早成者十八入大學。《內則》曰「十年出就外傅，居宿於外，學書計」者，謂公卿已下教子於家也。案：依盧說，則《保傳》八歲入小學，十五入大學，爲王太子之禮；《內則》、《書傳》說十三入小學，二十入大學，爲諸侯世子及卿大夫士嫡子之禮。其或遲三年十五入小學，或早二年十八入大學，爲世子以下晚成早成之別制。今攷《保傳》上文，自據王太子言之，固當如盧說；然《白虎通義·辟雍篇》、《漢書·食貨志》說並與彼同，而不云有貴賤之異。《公羊》僖十年何注則云：「禮，諸侯之子，八歲受之少傅，教之以小學；十五受大傅，教之以大學。」是諸侯子入學之年，又與王太子同。至十三入小學，二十入大學，據《御覽》引《書傳》，自通王太子以下言之。《王制》孔疏引《書傳略說》，又云「餘子十五入小學，十八入大學」。則盧說皆非伏君之旨。《賈子·容經》又謂

① 「大匡」原說「立政」，據《管子》改。

「古者年九歲入小學」，視《保傳》、《內則》復遲早各較一年。衆說乖異，未能臆定。要王侯之子始就傅即入小學，自宜較早；公卿以下之子，必先教於家塾而後入小學，自宜較遲，此則揆之理而可信者耳。云「師氏教之，而世子亦齒焉，學君臣、父子、長幼之道」者，賈疏云：「此約《文王世子》文也。案彼云：『行一物而三善皆得者，唯世子而已，其齒於學之謂也。故世子齒於學，國人觀之曰：『將君我而與我齒讓，何也？』曰：『有父在則禮然。』然而衆知父子之道矣。其二曰：『將君我而與我齒讓，何也？』曰：『有君在則禮然。』然而衆著於君臣之義矣。其三曰：『將君我而與我齒讓，何也？』曰：『長長也。』然而衆知長幼之節矣。」是世子與國人學，生齒焉之事。」居虎門之左，司王朝。虎門，路寢門也。王日視朝於路寢門外，畫虎焉以明勇猛，於守宜也。司猶察也。察王之視朝，若有善道可行者，則當前以詔王。【疏】「居虎門之左」者，此官朝位居路門外之東方。《特牲饋食禮》注云：「凡鄉內，以人爲左右；鄉外，以出爲左右。」此據出路門鄉外言之，故亦以東爲左也。云「司王朝」者，當以嫩詔王也。惠士奇云：「師氏、保氏同居門左，各司王朝。保氏不言者，省文可

知。」注云「虎門，路寢門也」者，即五門之路門也。

《左》昭十年傳，齊陳鮑伐樂高，子良伐虎門，晏平仲端委立于虎門之外。孔疏亦以爲路寢門。又引或說謂是宮之外門，則非也。賈疏云：「鄭知者，其路寢庭朝及庫門外之朝，非常朝之處，司士所掌路門外，是常朝，日所朝之所。經云司王朝，明據此朝，故鄭以路寢門外解之。」詒讓案：師氏教國子於小學，在王宮南之左。其居虎門左司王朝，則專據朝位言之，不涉教學之事。鄭《學記》注云：「內則設師保以教，使國子學焉；外則有大學庠序之官。《王制》注謂『周制，大學在王宮之左，小學在郊』，則《學記》注所謂師保教於內者，不在王宮左之學。鄭說學制雖不埒，然亦不謂師保之教即在虎門之左右。而漢以來，多以虎門爲小學所在，如《蔡邕集·明堂月令論》謂《周官》有門闈之學，師氏守王門，保氏守王闈。《魏書·劉芳傳》又引蔡氏《勸學篇》云：「周之師氏居虎門左，敷陳六藝以教國子。」與《月令論》說同。《詩·大雅·靈臺》孔疏引袁準《正論》云：「周置師保之官，居虎門之側，然則學宮非一處也。」《大戴禮記·保傳篇》盧注云：「小學謂虎門師保之學也。」《玉海·學校》引《三禮義宗》云：「《內則》云：『人君之子，十年出就外傳』，謂就外室而受教也。外室在虎門之左，師

氏之旁而築宮焉。《廣韻·二十三》引《周禮》云：「公卿大夫之子，入王端門之左，教以六藝，謂之門子。」蓋亦據此經舊注義。諸說並因師氏朝位居虎門左，與《王制》「小學在公宮左」方位偶同，遂謂小學即在於彼。金鶚云：「天子諸侯小學皆在宮南大門內之左。中門以內路門之外則有宗廟，不得爲學也。師氏掌小學之教，保氏副之，師氏又以嫺詔王，故居虎門之左，司王朝，以治朝在虎門外也。或據此文，遂謂天子小學在虎門之左，不知經文但言師氏居虎門之左，未嘗謂小學在虎門左也。」案：金說是也。王國小學自當如《王制》說，在王宮南之左，即皋門內之左也。師保教小學，其宮雖不及大學之廣，然王太子、王子及諸侯卿大夫之子咸在，其人數甚衆，則亦必不甚隘。路門之左，既有宗廟，必無更容小學之地。蔡、盧諸說，殆不可通，鄭亦無是義也。大學、小學制，詳《大司樂》疏。云「王日視朝於路寢門外」者，明虎門之外即三朝之治朝，司士所掌是也。天子門朝制，詳《閹人》及《朝士》疏。云「畫虎焉以明勇猛，於守宜也」者，獸之勇猛者莫如虎，路門爲師氏守衛之所，故畫其象以示威嚴也。劉敞謂王在國則虎賁氏守王宮，蓋居此門，指虎賁而言，故曰虎門。案：司士治朝之位，虎士在路門右，蓋虎士分守五門，自內而出，以路門爲始。劉說

亦足備一義。《五行大義論·禽蟲篇》云：「《考異郵》云：『參伐虎之德，義主斬刈。』所以學門謂之虎門。乃畫虎於門者，以兌居西方，兌是說，言主講說，故又金有殺伐之威，虎有毒害之猛，故金義扶虎。」案蕭所述，疑六朝禮家義，蓋亦沿門闢小學之誤，說與鄭義違，不可據。云「司猶察也」者，《媒氏》及《禁殺戮》注並同。《說文·司部》云：「司，臣司事於外者。」引申爲占察之義。《一切經音義》引《字林》云：「伺，察也。」伺即司之俗。云「察王之視朝，若有善道可行者，則當前以詔王」者，以此官掌以美詔王，明「司王朝」亦爲詔以善道也。王位在路門外之廷，師氏之位在其左略後，與大僕、大右位相次，蓋亦南面西上。司士正朝儀，王還揖門左，即此位也。門左在王後，故王揖須還向之，明此官詔王必去其本位，趨前至王位，乃得詔告之也。《國語·楚語》，左史倚相述衛武公曰，「位宁有官師之典」，韋注云：「中庭之左右謂之位，門屏之間謂之宁。」案：韋義本《爾雅·釋宮》。天子宁在路門外，諸侯亦然。位宁即治朝之位，詳《司士》疏。惠士奇謂官師即師氏、保氏是也。掌國中失之事，以教國子弟。教之者，使識舊事也。中，中禮者也。失，失禮者也。故書中爲得，杜子春云：「當爲得，記君得失若《春秋》是也。」疏：「掌國中失

之事，以教國子也者，此於三德三行之外，更教以通知掌故之學也。賈疏云：「以其師氏知德行，識其善惡得失，故掌國中禮失禮之事，以教國之子弟。國之子弟即王太子已下，言弟即王庶子。以其諸侯已下，皆以適子入國學，庶子不入故知也。」案：國子弟亦通諸侯以下庶子言之，賈說非，詳前疏。注云「教之者，使識舊事也」者，國中失之事，即國家舊所行之政治，故以教告國子使識之。云「中，中禮者也，失，失禮者也」者，謂中失皆以禮之當否為斷也。云「故書中為得，杜子春云當為得」者，黃以周云：「故書『中』下脫『或』字。杜用故書本作『中』，故云『當為得』，據書或字以正故書也。若故書本作得，何必改讀。」段玉裁改「當為」為「當從」，云：「此鄭君從今書作中，杜從故書作得也。『當從』今本作『當為』，誤。杜鄭說各異，其實中得雙聲，兩皆可從。」惠棟云：「《史記索隱》引《三倉》曰：『中，得也。』《封禪書》云：『康后與王不相中。』《周勃傳》：『勃子勝之尚公主，不相中。』皆訓為得。《呂覽·行論篇》云：

『禹為司空，以通水潦，顏色黎黑，步不相過，竅氣不通，以中帝心。』高誘曰：『中猶得。』然則中失猶得失，故鄭用杜說而不改字。」王念孫云：「《管子·國蓄篇》曰：『大國之君不相中，舉兵而相攻。』謂不相得也。《齊策》『是秦之計

中而齊、燕之計過矣。」高注亦曰「中，得也」。中得義相同，故二字可以互用。宋玉《風賦》曰：「中脣為脣，得目為瞋。」《韓詩外傳》曰：「動作中道，從容得禮。」《漢書·京房傳》曰：「麻中甲庚，律得參陽，性中仁義，情得公正貞廉。」是也。中得聲相近，故二字可以通用。《呂氏春秋·至忠篇》「荆莊哀王獵於雲夢，射隨兕，中之」。《說苑·立節篇》作「射科雉得之」。《淮南·齊俗篇》「天之員也不得規，地之方也不得矩」。《文子·自然篇》「得作中」。是也。然則或改字，或不改字，義得兩通也。案：黃、段、惠、王說是也。《毛詩·小雅·十月之交》，箋云「師氏掌司朝得失之事」，則鄭亦兼從故書矣。云「記君得失，若《春秋》是也」者，《春秋繁露·竹林篇》云：「《春秋》記天下之得失，而見所以然之故。」此杜所本。《詩·商頌·玄鳥》孔疏引鄭《禘祫志》云：「《春秋》者，書天子諸侯中失之事。」此從今書作「中失」，而義與杜同。凡國之貴遊子弟，學焉。貴遊子弟，王公之子弟。遊，無官司者。杜子春云：「遊當為猶，言雖貴猶學。」《疏》「凡國之貴遊子弟學焉」者，遊，俗游字。《說文·舛部》：「游，古文作逌。」此經游觀字並作游，

① 案引文見《翼奉傳》。

或省作序。唯此職及《司競》、《諸子》、《司寤氏》字作遊，蓋皆遵之變體。學謂就王宮南左小學之宮而學也，師氏保氏爲之師而教之。

注云「貴遊子弟，王公之子弟」者，賈疏云：「此即《王制》云『王太子、王子、羣后之太子、卿大夫元士之適子』。公即三公羣后。卿大夫元士之子略言之也。」詒讓案：此貴遊子弟即上文之國子，與《諸子》「國子存遊倅」義亦同，並統卿大夫之子而言。蔡氏《月令論》引《古大明堂禮》云：「王日中出南門，見九侯及門子。」門子即適子之在小學者也。鄭以經云貴遊，故止舉王公之子弟最貴者爲釋，其實義得兼咳也。云「遊無官司者」者，《諸子》注云：「遊倅，倅之未仕者。」無官司即未仕者也。賈疏云：「言遊者，以其未仕，而在學遊暇習業。」杜子春云「遊當爲猶，言雖貴猶學」者，段玉裁云：「此鄭不易字，杜改字也。後杜說者，存其說也。杜意謂遊爲聲之誤。」詒讓案：杜意疑讀爲「凡國之貴子弟猶學焉」。依杜說則於文不順，故後鄭不從。

凡祭祀、賓客、會同、喪紀、軍旅，王舉則從。舉猶行也。故書舉爲與，杜子春云：「當爲與」，謂王與會同喪紀之事。【疏】「凡祭祀、賓客、會同、喪紀、軍旅，王舉則從」者，賈疏云：「祭祀則郊廟及山川社

稷摠是也。賓客謂諸侯及卿大夫來朝聘，或在朝，或在廟。會同亦或在畿內，或在畿外。軍旅謂出畿外征伐。此數事，王行之時，師氏則從，以王所在皆須詔王以美道故也。」

注云「舉猶行也」者，《說文·手部》云：「舉，對舉也。」引申之，亦爲行。《國語·魯語》韋注云：「舉，動也。」行與動義亦相近。云「故書舉爲與，杜子春云當爲與，謂王與會同喪紀之事」者，黃以周謂故書「舉」下脫「或」字。段玉裁改「爲」爲「從」，云：「此鄭君從今書作舉，杜從故書作與也。」徐養原云：「《禮記·禮運》『選賢與能』，《大戴禮·王言篇》『選賢舉能』，舉與古字通。《无妄·象傳》『物與无妄』，虞翻注：『與謂舉也。』《楚辭·九章》『與前世而皆然兮』，言舉前世而皆然也。《七諫》『與世皆然兮』，王逸注：『與，舉也。』《墨子·天志篇》『天下之君子，與謂之不詳』，言舉謂之不詳也。今案：鄭從今書訓舉爲行，與杜義異。然與舉古既通用，則凡舉皆可通作與。觀《禮運》之舉，與《易象》《楚辭》《墨子》初非同義，則此經鄭杜二義，皆可作舉，亦皆可作與也。」王引之云：「作與者是也。王與其事，則親往可知矣。《大宗伯職》曰：『若王不與祭祀，則攝位。』《祭僕》曰：『凡祭祀王之所不與，則賜之禽。』是吉凶之事，王有與有不與也，故曰『王與則從』。與，本字也；

舉，借字也。《保氏》「王舉則從」，亦當爲與。」案：王申杜義是也。聽治亦如之。謂王舉於野外以聽朝。【疏】

注云「謂王舉於野外以聽朝」者，與《大宰》云「砥四方之聽朝」義同。野外謂野舍，未至國邑也。賈疏云：「即上數事，王所在皆有朝以聽治之，故從王，亦如上虎門之左同。」

使其屬帥四夷之隸，各以其兵服守王之門外，且蹕。兵服，旃布弓劍不同也。門外，中門之外。

蹕，止行人不得迫王宮也。故書隸或作肆，鄭司農云：「讀爲隸。」【疏】「使其屬帥四夷之隸，各以其兵服守王之門外」者，《司隸》云：「掌帥四翟之隸，使之皆服其邦之服，執其邦之兵，守王宮與野舍之屬禁。」然則師氏使其屬帥之者，蓋與司隸同帥之，二官爲聯事也。四夷之隸，即蠻隸、閩隸、夷隸、貉隸。彼夷隸，專指東夷之隸；通言之，則蠻閩夷貉皆爲夷，故此總謂之四夷之隸。《毛詩·大雅·雲漢》傳云：「歲凶年穀不登，則師氏弛其兵。」兵即謂此四夷之隸所持兵也。賈疏云：「使其屬者，屬即《序官》『師氏中大夫之下』，有屬官上士二人，并有府史胥徒之等。使此人帥四夷之隸，若秋官蠻隸之等，各使四夷隸以其本國之兵器及其服，以守王之門外，以衛王宮。」云「且蹕」者，與閭

人，隸僕爲官聯也。

注云「兵服，旃布弓劍不同也」者，

即《司隸》所說其邦之服與兵也。旃，氈之借字。《王制》說西戎衣皮，北狄衣羽毛。氈即皮毛之服也。賈疏云：「東方南方其服布，其兵劍；西方北方其服旃，其兵弓矢。」論讓案：《周書·王會篇》云：「周公旦主東方，其守營牆者，衣青，操弓執矛。」此即會同守壇墮宮之隸也。彼東方之兵有弓矛，與賈說異。又據彼文，則守衛之服亦依方色與？云「門外，中門之外」者，謂王宮中門之外。賈疏云：「案閭人掌中門之禁，則中門內他人不得入，明在中門之外。」論讓案：依鄭《閭人》注義，中門爲雉門。然王宮五門，庫門之內，萬民即不得入，閭人中門之禁，當據庫、雉、應諸門言之。此官掌教，小學在庫門外之左，則守王門外，亦當爲庫門外，以其當三詢外朝之北，萬民得至，譏察尤嚴，故特使師氏守之也。互詳《閭人》、《保氏》疏。云「蹕止行人，不得迫王宮也」者，《閭人》注云：「蹕，止行者。」謂禁止行人不得迫近王宮，使無闌入也。云「故書隸或作肆，鄭司農云讀爲隸」者，據《司隸》「帥四翟之隸」，明此經亦當作隸也。徐養原云：「肆，《說文》作隸，从長隶聲。隸，从隶柰聲。二字形相似。」朝在野外，則守內列。內列，蕃營之內者也。其屬亦帥四夷之隸守之，如守王宮。【疏】「朝在

野外，則守內列者，亦與司隸爲官聯也。賈疏云：「朝在野外，即上文聽治是也。」注云「內列，蕃營之在內者也」者，蕃與藩同。《國語·晉語》韋注云：「藩，籬落也。」王野舍，蕃營蓋有兩重，故《掌舍》「掌王之會同之舍，設櫪柅再重。」注云「以周衛有內外列」是也。王引之云：「列即厲禁之厲。《司隸職》『守野舍之厲禁』，鄭注曰：「厲，遮例也。《釋文》：『例，本又作列，同音烈。』是厲與列同。《祭法》『厲山氏』，《魯語》作『列山氏』。《蠻隸職》『在野外則守厲禁』，亦與此同意，但彼在外此在內爲異耳。《山虞職》『物爲之厲，而爲之守禁』，鄭司農云：「厲，遮列守之。」《典祀職》『帥其屬而守其厲禁』，鄭司農云：「遮列禁人不得令人。」《墓大夫職》『帥其屬而巡墓厲』，鄭注云：「厲，埜限遮列處。」皆其證也。」案：王說是也。凡周衛所在，通謂之列。《左》文元年傳「楚潘崇掌環列之尹。」杜注云：「宮衛之官，列兵而環王宮。」則國內宿衛亦得稱列，不徒野舍矣。云「其屬亦帥四夷之隸守之，如守王宮」者，賈疏云：「案《司隸職》云『守野舍之厲禁』，上文云『使其屬帥四翟之隸』，則二處皆帥四夷隸守之。」莊存與云：「其外列則司馬帥六師守之。」

周禮正義卷二十六

保氏掌諫王惡。

諫者，以禮義正之。《文王世

子》曰：「保也者，慎其身以輔翼之，而歸諸道者也。」【疏】

「掌諫王惡」者，此官掌教小學而兼爲王之諫官也。《呂氏春秋·勿躬篇》云：「管子曰：蚤入晏出，犯君顏色，進諫必忠，不辟死亡，不重貴富，臣不若東郭牙，請置以爲大諫臣。」《管子·小匡篇》作「鮑叔牙爲大諫」。大諫臣疑即此保氏之職，與下《司諫》「糾萬民之德」異也。注云「諫

者，以禮義正之」者，《序官·司諫》注云：「諫猶正也，以道正人行。」此注與彼義同。《王制》云：「天子齊戒受諫。」注云：「歲終羣后奏歲事，^①諫王當所改爲也。」此保氏亦隨時諫王惡，使改爲之。引《文王世子》曰「保也者，慎其身以輔翼之，而歸諸道者也」者，鄭彼注云：「慎其身者，謹安護之。」引之者，證保氏即彼保，諫王惡即輔翼而歸諸道也。而養國子以道：乃教之六藝，一曰五禮，二曰六樂，三曰五射，四曰五馭，五曰六書，六

曰九數；乃教之六儀，一曰祭祀之容，二曰賓客之容，三曰朝廷之容，四曰喪紀之容，五曰軍旅之容，六曰車馬之容。養國子以道者，

以師氏之德行審諭之，而後教之以藝儀也。五禮，吉凶賓軍嘉也。六樂，《雲門》、《大咸》、《大韶》、《大夏》、《大濩》、《大武》也。鄭司農云：「五射，白矢、參連、剡注、襄尺、井儀也。五馭，鳴和鸞、逐水曲、過君表、舞交衢、逐禽左。六書，象形、會意、轉注、處事、假借、諧聲也。九數，方田、粟米、差分、少廣、商功、均輸、方程、贏不足、旁要。今有重差、夕桀、句股也。祭祀之容，穆穆皇皇；賓客之容，嚴恪矜莊；朝廷之容，濟濟跄跄；喪紀之容，涕涕翔翔；軍旅之容，闐闐仰仰；車馬之容，顛顛堂堂。」玄謂祭祀之容，齊齊皇皇；賓客之容，穆穆皇皇；朝廷之容，濟濟翔翔；喪紀之容，纍纍顛顛；軍旅之容，暨暨諮諮；車馬之容，匪匪翼翼。【疏】「而養國子以道」者，此官居小學，教國子以道藝，與師氏教德行互相備也。《說文·食部》云：「養，供養也。」引申爲教養。《文王世子》云：「立太傅少傅以養之，

①「后」，據《王制》注當是「臣」之訛。

欲其知父子君臣之道也。」注云：「養猶教也。言養者，積浸成長之。」《孟子·離婁篇》云：「中也養不中，才也養不才。」《大戴禮記·曾子事父母篇》云：「兄之行若中道，則兄事之；兄之行若不中道，則養之。」《說文·支部》云：「育，養子使作善也。」引《虞書》曰「教育子」。並即此經養國子之義。云「乃教之六藝」者，此與六儀皆教小學之官法也。《大戴禮記·保傅篇》說，王子年八歲學小藝，束髮而學大藝。此六藝蓋通大小藝言之。《內則》云：「十年學書計，成童學射御，又十年學幼儀，十有三年學樂、誦《詩》、舞《勺》，成童舞《象》。」即此六藝六儀之小者也。注云

「養國子以道者，以師氏之德行審諭之，而後教之以藝儀也」者，賈疏云：「案《文王世子》云：『大傅審父子君臣之道以示之，少傅奉世子以觀大傅之德行而審諭之。師也者，教之以事而諭諸德者也；保也者，慎其身以輔翼之而歸諸道者也。』不云保氏以師氏之德行審諭之者，鄭以義約之，少傅既以大傅之德行審諭之，明保氏亦以師氏之德行審諭之可知，故鄭言之耳。」案：鄭以經先言養，後言教，故以養為審諭德行之事，非以道為德行也。實則養之與教，事本相成，經言道即指藝儀等，對師氏所掌三德三行為德。《太平御覽·工藝部》引馬融注云：「道，六藝。」最得其義。

鄭意亦當與馬同，故《大司樂》注云：「道，多才藝者。德，能躬行者。」分別道德甚析。賈疏謂此道即上三德三行，故鄭以師氏之德審諭之乃教之，非經注義也。道藝義同，詳《宮正》疏。云「五禮吉凶賓軍嘉也」者，據《大宗伯》文。云「六樂，《雲門》、《大咸》、《大韶》、《大夏》、《大濩》、《大武》也」者，據《大司樂》文。案《內則》云：「十三學樂、誦《詩》、舞《勺》，成童舞《象》，二十舞《大夏》。」此保氏教小學，所教者即成童以下舞《象》、舞《勺》之國子，樂師教國子小舞，正謂此也。而得教六大舞者，蓋誦其樂章；至二十，乃列舞位肄其節奏也。《墨子·公孟篇》云「舞《詩》三百」，是即舞之樂章。《周書·世俘篇》云：「籥人奏《崇禹》、《生開》三終。」當即《大夏》之詩。時武王初滅殷，未作《大武》，故用夏樂也。六樂名義，詳《大司樂》疏。鄭司農云「五射，白矢、參連、剡注、襄尺、井儀也」者，《釋文》云：「襄音讓，本作讓。」案：《白氏六帖·射部》引亦作「讓」。賈疏云：「白矢者，矢在侯而貫侯過其鏃白。參連者，前放一矢，後三矢連續而去也。剡注者，謂羽頭高鏃低而去剡剡然。襄尺者，臣與君射，不與君並立，襄君一尺而退。井儀者，四矢貫侯如井之容儀也。」惠士奇云：「《廣韻·四十禡》，『白矢』作『白勺』，『襄尺』作『讓尺』。賈云『襄君一尺而退』，則

襄讀爲讓，古今文也。《新序·雜事》曰：「左把彈，右攝丸，定操持，審參連。」《吳越春秋》曰：「射之道，從分望敵，合以參連。」《莊子·田子方篇》云「適失復沓」，注云：「矢，去也。箭適去，復畎沓也。」然則復沓猶參連也。《列子·仲尼篇》曰：「善射者，能令後鏃中前括，發發相及，矢矢相屬，前矢造準而無絕落，後矢之括猶銜弦，視之若一焉，是爲參連。」後漢陳王寵善弩射，十發十中，皆同處，其法以天覆地載參連爲奇。」黃以周云：「襄尺，襄古攘字，今用讓。《鄉射·記》曰，大夫與士射，耦少退於物，君爲下射，退於物一筭。筭三尺，少退於物即襄尺也。井儀，井古作并，侯有上下舌，其形如井，中設正方二尺，如井之。」《詩·行葦》曰：「既挾四鍬，四鍬如樹。」樹謂儀表，言四矢之發悉如井儀，言其中的之正也。」論讓案：白矢義頗難通，賈望文爲訓，殆未必塙。《廣韻》作「白勺」，疑勺當爲「勺」之誤。《詩·小雅·賓之初筵》云：「發彼有的。」毛傳云：「的，質也。」的，《詩釋文》作勺，即的之省。白勺似言射時審擬的質而發，但《廣韻》多譌舛，恐仍未足信耳。參連，惠說足申賈義。《詩·齊風·猗嗟》云「四矢反兮」，鄭箋云：「反，復也。每射四矢，皆得其故處。」即所謂參連也。據《新序》、《後漢書》則彈及弩射亦有參連之法。《六韜·軍用篇》有

參連大黃弩，則近《淮南子·汜論訓》所謂連弩者，乃弩之別制，與射法不相涉也。黃說井儀，與賈小異，義亦得通。云「五馭，鳴和鸞，逐水曲，過君表，舞交衢，逐禽左」者，賈疏云：「鳴和鸞者，和在式，鸞在衡。案《韓詩》云：『升車則馬動，馬動則鸞鳴，鸞鳴則和應。』先鄭依此而言。逐水曲者，謂御車逐水勢之屈曲而不墜水也。過君表者，謂若毛傳云：『褐纏旂以爲門，裘纏質以爲楸，閒容握，驅而入，聲則不得入。』《穀梁》亦云：『艾蘭以爲防，置旂以爲轅門，以葛覆質以爲檠，流旁握，御轍者不得入。』是其過君表即褐纏旂是也。舞交衢者，衢，道也，謂御車在交道中，車旋應於舞節。云逐禽左者，謂御驅逆之車，逆驅禽獸使左，當人君以射之，人君自左射。故毛傳云：『故自左膘而射之，達於右膊，爲上殺。』又《禮記》云：『佐車止則百姓田獵。』是也。」案：鳴和鸞者，《大馭》云「凡馭路儀以鸞和爲節」是也。①賈引《毛詩·小雅·車攻》傳以釋過君表，然葛纏旂以爲門，不得謂之君表，其說殆不可通。君表猶言君位，《左》昭十一年傳云：「朝有著定，會有表。會朝之言，必聞于表著之位。」杜注云：「野會，設表以爲位。」蓋會同師田，

①「儀」，原脫，據楚本補。

君在則必有表位，凡車過之，當別有儀以致敬，故五御有過君表之法，猶人治朝者申過位之敬矣。《晏子春秋·諫下》篇云：「縣愛槐之令，載過者馳，步過者趨，威儀擬乎君。」然則過君表者，車當馳與？《詩·鄭風·大叔于田》云：「兩驂如舞。」毛傳云：「驂之與服，和諧中節。」所謂舞交衢也。又《秦風·駟驥》云：「公曰左之，舍拔則獲。」鄭箋云：「左之者，從禽之左射之也。」亦即逐禽左之法。云「六書，象形、會意、轉注、處事、假借、諧聲也」者，《說文敘》云：「《周禮》八歲入小學，保氏教國子，先以六書。一曰指事。指事者，視而可識，察而可見，上下是也。二曰象形。象形者，畫成其物，隨體詰詘，日月是也。三曰形聲。形聲者，以事爲名，取譬相成，江河是也。四曰會意。會意者，比類合誼，以見指撝，武信是也。五曰轉注。轉注者，建類一首，同意相受，考老是也。六曰假借。假借者，本無其字，依聲託事，令長是也。」《漢書·藝文志》云：「《周官》保氏掌養國子，教之六書，謂象形、象事、象意、象聲、轉注、假借，造字之本也。」案：處事，許作指事，班作象事。諧聲，許作形聲，班作象聲，次第先後亦與先鄭差異，要其義一也。《晉書·衛恒傳·四體書勢》云：「夫指事者，在上爲上，在下爲下。象形者，日滿月虧，效其形也。形聲者，以

類爲形，配以聲也。會意者，止戈爲武，人言爲信是也。轉注者，以老壽考也。假借者，數言同字，其聲雖異，文意一也。」案：衛說足申許義，惟假借者，一字數義，古無異音，衛言聲異，殆未達古音矣。徐鍇《說文繫傳》云：「轉注者，建類一首，同意相受，謂老之別名，有耆，有耄，有耄，又孝子養老是也。一首者，謂此等諸字，皆取類于老，則皆從老。轉注之言，若水之出原，分岐別派，爲江爲漢者，受其名，而本同主于一水也。」江聲云：「《說文解字》一書，分部五百四十，即建類也。始一終亥，即一首也。云凡某之屬皆從某，即同意相受也。」案：徐、江說是也。云「九數，方田、粟米、差分、少廣、商功、均輸、方經、贏不足、旁要」者，《九章算術》云：「方田以御田疇界域，粟米以御交質變易，衰分以御貴賤稟稅，少廣以御積算方圓，商功以御功程積實，均輸以御遠近勞費，盈不足以御隱雜互見，方經以御錯糅正負，句股以御高深廣遠。」李籍《音義》云：「諸田不等，以方爲正，故曰方田。粟者，米之未舂。諸米不等，以粟爲率，故曰粟米。衰，差也。以差而平分，故曰衰分。少廣從多，以從之多，益廣之少，故曰少廣。商，度也。以度其功庸，故曰商功。均，平也；輸，委也。以均平其輸委，故曰均輸。盈者滿也，不足者虛也，滿虛相推，以求其適，

故曰盈不足。方者左右也，程者課率也，左右課率，總統羣物，故曰方程。句，短面也；股，長面也。短長相推，以求其弦，故曰句股。」案差分即衰分，旁要即句股，古今異名耳。先鄭說並本《九章》。劉徽《九章算術注敘》亦云：「周公制禮而有九數，九數之流則九章是矣。」與先鄭說同。孔廣森云：「旁要即今三角法也。凡三角必有三邊，其兩斜邊謂之大腰、小腰。要即腰字。其直邊今謂之底，古謂之旁，蓋立觀之則爲旁，偃觀之則爲底，猶古句股本立形，西法偃之，號爲直角也。三角可以御句股，句股不可以盡三角，故周公《九章》舉旁要而不舉句股。至漢，旁要法亡。始以重差、句股足之。」張文虎云：「今《九章算術》缺旁要，惟楊輝《九章算法詳解》句股容方第一問，引句股旁要法，孔氏以爲即三角法。案《釋名》云：「在邊曰旁。」《史記·扁鵲倉公傳》索隱云：「方猶邊也。」孔說近之。」云「今有重差、夕桀、句股也」者，賈疏云：「此漢法增之。」馬氏注以爲「今有重差夕桀」。夕桀亦是算術之名，與鄭異。案今《九章》，以句股替旁要，則旁要，句股之類也。」臧琳云：「《釋文》：「夕桀，音的，沈祥易反。此二字非鄭注。」又《少儀》正義云：「今有重差句股者，鄭司農指漢時云。今世於九數之內，有重差、句股二篇，其重差即與舊數差分一也。去

舊數旁要而以句股替之，爲漢之九數，即今之《九章》也。先師馬融、干寶等更云，今有夕桀，各爲一篇，未知所出。」據此，知鄭司農注，本云「今有重差句股」，賈、孔所見本並同。馬融、干寶注作「今有重差夕桀」，沈重、陸德明本則與馬、干同，故皆爲夕字作音。今注中疏中，句股上皆有「夕桀」二字，又後人據《釋文》所加。」案：臧說是也。今本注並有「夕桀」二字，誤。重差者，《九章算術》劉序云：「凡望極高、測絕深而兼知其遠者，必用重差，句股則必以重差爲率，故曰重差也。」李氏《音義》云：「重，復也。差，不齊也。重差，句股名也。」孔廣森云：「重差者，重兩句股，取其影差，異乘同除，以知比例，若劉徽《海島經》是也。《少儀》正義以重差當差分，誤矣。」張文虎云：「夕桀，惟秦九韶《數學九章》第四篇《望敵圓營術》有其名，云「以句股求之，夕桀入之」。亦即句股容圓術也。重差者，重疊測望而知其差也。劉徽《海島算經序》云：「度高者重表，測深者累矩，倂離者三望，離而又旁求者四望。」此即所謂重差也。旁要、夕桀，蓋皆測望中之一事，旁要測方，夕桀測圓。夕桀云者，《廣雅·釋詁》云：「夕，衰也。」桀者揭也，《文選》謝靈運《擬劉楨詩》注，桀與揭音義同。又《東京賦》薛注：「揭猶表也。」蓋樹表而邪望之，即劉徽所云倂離者也。疑

重差、夕桀，古人本以旁要該之，其實此三者皆不離於句股，後人強爲之分析耳。」案：孔、張說是也。云「祭祀之容穆穆皇皇」者，《說文·頁部》云：「頌，兒也。」容即頌之段字。《詩·周頌·離》「天子穆穆」。鄭箋云「穆穆，美也」。《離》序云「禘太祖也」。是祭祀之容也。皇皇，見《少儀》，詳後。云「賓客之容嚴恪矜莊」者，先鄭以意言之。云「朝廷之容濟濟跄跄」者，《曲禮》云：「大夫濟濟，士跄跄。」荀子·大略篇》云：「朝廷之美，濟濟鎗鎗。」楊注云：「鎗與跄同。濟濟，多士貌。跄跄，有行列貌。」即先鄭所本也。云「喪紀之容涕涕翔翔」者，亦先鄭以意言之。云「軍旅之容闐闐仰仰」者，《詩·大雅·常武》「闐如虓虎」，箋云：「闐然如虎之怒。」仰，釋文云：「本又作印。」案：印仰古通用。《詩·大雅·卷阿》疏引孫炎《爾雅注》云：「印仰，志氣高遠也。」云「車馬之容顛顛堂堂」者，《莊子·馬蹄篇》云：「其視顛顛。」《釋文》引崔譔注云：「顛顛，專一貌。」《論語·子張篇》「堂堂乎張也」。何氏《集解》引鄭注云：「言子張容儀盛。」賈疏云：「先鄭以意所釋，不依經典，故後鄭不從。」云「玄謂祭祀之容齊齊皇皇，賓客之容穆穆皇皇，朝廷之容濟濟翔翔」者，《齊齊皇皇》，《釋文》作「濟濟皇皇」。《北堂書鈔·禮儀部》引同。案《少儀》云：「言語之

美，穆穆皇皇；朝廷之美，濟濟翔翔；祭祀之美，齊齊皇皇。」鄭彼注云：「齊齊皇皇，讀如歸往之「往」，「美」皆當爲「儀」，字之誤也。」又《玉藻》云：「廟中齊齊，朝廷濟濟翔翔。」注云：「齊齊，恭怒貌也。濟濟翔翔，莊敬貌也。」云「喪紀之容纍纍顛顛，軍旅之容暨暨詒詒」者，《玉藻》云：「喪容纍纍，色容顛顛；戎容暨暨，言容詒詒。」注云：「纍纍，羸憊貌也。顛顛，憂思貌也。暨暨，果毅貌也。詒詒，教令嚴也。」云「車馬之容匪匪翼翼」者，《少儀》文。注云：「匪讀如四牡駢駢。」孔疏云：「翼翼匪匪，馬之嚴正。」凡祭祀、賓客、會同、喪紀、軍旅，王舉則從。聽治亦如之。使其屬守王闔。闔，宮中之巷門。【疏】「凡祭祀、賓客、會同、喪紀、軍旅，王舉則從」者，此並與師氏職同。「王舉」舉亦當讀爲「與」，詳《師氏》疏。云「使其屬守王闔」者，與師氏守王門爲官聯，皆以助宿衛，備非常，與小學之事無涉。注云「闔，宮中之巷門」者，《說文·門部》云：「闔，宮中之門也。」又《邑部》云：「闔，里中道也。篆文作巷。」巷即巷之隸省。《爾雅·釋宮》云：「宮中之門謂之闔。」《左傳》哀十四年，杜注云：「闔，宮中小門。」孔疏引孫炎云：「宮中相通小門也。」《釋宮》又云：「巷

門謂之閤，宮中舊謂之壺。」《左傳》襄九年疏引孫炎云：「巷，舍間道也。」王肅云：「今後宮稱永巷。」成十七年疏引李巡云：「閤，巷頭門也。」案：巷與巷同。里中道謂之巷，宮中巷謂之壺。有巷則有門。宮中壺之有閤，猶里中巷之有閤也。焦循云：《考工記》云：「廟中容大廟七個，闔門容小廟參个。」注云：「廟中之門曰闔。」《雜記》記夫人之奔喪云：「人自闔門，升自側階。」以階例門，則闔亦在側。《爾雅》云：「宮中之門謂之闔，其小者謂之閤，小閤謂之閤。」《公羊》宣六年傳，于內朝達外朝之門爲閤，蓋在路門之旁者。師氏守王門，保氏守王閤。守門者守其中門，守閤者守其左右之闔門。《士虞禮》注云：「闔門如今東西掖門。」又注《保氏》王閤，云「宮中之巷門」。然則朝廟之外皆有巷相通，其巷側之門曰闔，而在巷頭者曰閤。惟其在巷側，故在朝廟之東西壁，婦人由巷而入廟，故出自闔門也。」金鶚云：「闔者，門之小者也。大廟、路寢，宮旁一門，各居四旁之中，羣廟亦然。凡在南者皆稱門，其餘稱閤。廟寢之外，周圍牆垣，亦有闔門，其在南者，天子曰皋門，諸侯曰庫門，大夫士曰外門。或曰大門，則上下通稱也。門亦各居正中，《左》哀十四年傳云：『子我歸，屬徒攻闔，及大門。』先言闔，後言大門，可知非宮中之闔，此闔蓋屬於外

牆，徒兵自外攻之也。保氏守王閤，此闔屬於外牆，與大門同類。凡人得至，故須守之。《內則》云：「深宮固門，闔寺守之。」是宮中小寢之門，皆闔寺所守。保氏所守之闔，非宮中之闔也。」又云：「闔與閤散文亦通，《公羊》宣六年傳云：『趙盾與諸大夫立於朝，有人荷畚自閤而出者。』閤蓋小寢之門也。大夫小寢門亦曰閤，《公羊傳》又云：『勇士入其大門，則無人門焉者。入其閤，則無人閤焉者。上其堂，則無人焉。俯而窺其戶，方食魚飧。』此敍靈公使人殺趙盾之事。大夫亦恒居小寢，小寢門小，故曰閤也。《樂記》『閤門之中』，亦當指小寢門。」案：焦、金說是也。諸經凡言閤門者蓋有三：一爲廟中巷門及寢門，《匠人》及《雜記》所云是也。一爲宮內巷門及小寢門，《釋宮》所云是也。一爲宮旁之側門，此經所云是也。凡王五門，諸侯三門，並據宮南正中之門言之。其北與東西三面必尚有旁出之側門。《大戴禮記·虞戴德篇》云：「天子之宮四通。」是四面有門也。《聘禮》云：「請觀，訝帥之自下門入。」下門亦即側門。蓋凡不由大門入者，皆入下門矣。側門亦謂之闔，故《左傳》說子我攻闔及大門皆不勝。子我未入大門而得攻闔，則闔爲宮中外達內之側門，非宮內之巷門可知。《左傳疏》謂公宮非止一門是也，而謂子我蓋從別門而入，兵

得至闔，故與大門並攻，則於事情不合。凡三門五門，皆有旁出之側門，通得闔名。此保氏守王闔，亦即王宮之側門，而注以爲宮中之巷門者，鄭以師氏、保氏所守者爲雉門外，自皋門之內，通爲宮中，而凡側門之內，必別有巷以達於內宮，故側門亦得稱巷門也。但保氏與師氏同教庫門外之小學，則所守亦必與學相近，當皆在庫門外。鄭、賈謂專屬雉門，殊不埒耳。闔，通言之亦得稱閤。《周書·皇門篇》云：「周公格于左閤門。」孔注云：「路寢左門。」此即路門旁之闔門也。《左》成十七年傳：「齊慶克與婦人蒙衣乘輦而入于閤。」杜注云：「閤，巷門。」此亦齊公宮之闔門。是闔閤通稱，不拘巷頭巷側也。至蔡氏《明堂月令論》云：「禮記《古大明堂之禮》曰：『日出居東門，膳夫是相。日中出南門，見九侯及門子。日側出西闔，視五國之事。日入出北闔，視帝猷。』《爾雅》曰：『宮中之門謂之闔。』《王居明堂之禮》，又別陰陽門，東南稱門，西北稱闔。故《周官》有門闔之學，師氏教以三德守王門，保氏教以六藝守王闔。然則師氏居東門南門，保氏居西門北門也。」案：《逸禮》以闔爲西門北門，與諸經並不合，蓋禮家之駁文，不爲典要，蔡氏輒據以釋此經，疏矣。蔡氏謂此經有門闔之學，亦臆說，不可信，詳《師氏》疏。

司諫掌糾萬民之德而勸之朋友，正其行而強之道藝，巡問而觀察之，以時書其德行道藝，辨其能而可任于國事者。朋友，相切磋以善道也。強猶勸也。《學記》曰：「強而弗抑則易。」巡問，行問民間也。可任於國事，任吏職。【疏】「掌糾萬民之德」者，《小宰》注云：「糾猶察也。」云「而勸之朋友」者，此即《大司徒》本俗六之聯朋友也。云「以時書其德行道藝」者，此與鄉遂之吏爲官聯也。賈疏云：「此萬民時所習，即《大司徒》所云：『以鄉三物教萬民，一曰六德，知、仁、聖、義、忠、和；二曰六行，孝、友、睦、婣、任、恤。』此德行也。彼又云：『三曰六藝，禮、樂、射、御、書、數。』即此道藝也。」云「辨其能而可任于國事者」者，于石經及舊本並誤「於」，今從宋婺州本、嘉靖正本。上文書其德行道藝，是兼咳賢能，此唯辨其能者。《司士》云「以能詔事」，《大司寇》官刑亦云「上能糾職」，注云：「能，能其事也。」是有能即可任事，不必皆賢也。賈疏云：「案《鄉大夫職》云『興賢者能者』，賢謂德行，能謂道藝。彼則賢能俱興，此直言辨其能可任于國事，不言賢者，既辨其能，則賢者自然亦辨而

舉之可知也。」事士奇云：「比長教和親，閭胥聚衆庶，書其敬敏任恤者，族師每月屬民，書其孝弟睦姻有學者，是爲德行道藝。黨正歲屬民而書之，州長正月屬民而攷之，然後入之於鄉大夫；鄉大夫三年大比，則復加攷，而舉其賢者能者，而獻其書；司諫復以之攷鄉里之治，而詔廢置。蓋比閭族黨州鄉或有書之未備，攷之未精，舉之未審者，司諫巡問而觀察之，以進退其鄉之吏。由是窮居側陋之士，無不上聞，言行必達，皆登於書。」

注云「朋友，相切磋以善道也」者，賈疏云：「案鄭注《論語》『同門曰朋，同志曰友』，則彼其共在學者，切磋以道義。此勸萬民爲友朋，則若孟子所云『守望相助出入相友』者同，故鄭云切磋以善道也。」云「強猶勸也」者，明與勸朋友義略同。《說文·力部》云：「勞，迫也。勸，勉也。」強即勞之段字。但經強字疑當作「彊」，詳《草人》疏。《淮南子·脩務訓》高注云：「彊，勉也。」強彊字通。強勸同有趣迫勉厲之義。《大戴禮記·曾子立事篇》云：「君子攻其惡，求其過，彊其所不能。」《漢書·食貨志》云：「十一以上，上所強也。」顏注云：「勉強勸之，令習事也。」義並與此同。引《學記》曰「強而弗抑則易」者，證強有勸義。鄭彼注云：「抑猶損也。」孔疏引賀氏云：「師但勸強其神識，而不抑之令曉，則受者和易，和易

亦易成也。」云「巡問，行問民間也」者，《掌固》注云：「巡，行也。」《管子·問篇》云：「問子弟以孝聞於鄉里者幾何人？鄉子弟力田爲人率者幾何人？處士脩行足以教人可使帥衆涖百姓者幾何人？士之急難可使者幾何人？」即巡問之事也。云「可任於國事任吏職」者，即《鄉大夫》云「使民興能，入使治之」。吏即鄉吏。賈疏謂使爲比長，閭胥，族師之類是也。以攷鄉里之治，以詔廢置，以行赦宥。因巡問勸強萬民，而攷鄉里吏民罪過，以告王所當罪不。【疏】「以攷鄉里之治」者，此官兼贊鄉吏之官計，與鄉師爲官聯也。《遺人》注云：「鄉里，鄉所居也。」云「以行赦宥」者，^①赦，唐石經初刻作赦，磨改作赦。案：《說文·支部》云：「赦，置也。重文赦，赦或从亦。」今經典並作赦。注云「因巡問勸強萬民，而考鄉里吏民罪過，以告王所當罪不」者，此亦注用今字作「考」也。經廢置主吏言，赦宥主民言。賈疏云：「由上文巡問，即察官民善不也。以巡問觀察萬民，則知吏之治不，故鄭兼吏民總言之。」

①「者」，原脫，據疏例補。

司救掌萬民之袞惡過失而誅讓之，以

禮防禁而救之。邪惡，謂侮慢長老、言語無忌而未麗

於罪者。過失，亦由邪惡醜營好訟，若抽拔兵器，誤以行傷

害人麗於罪者。誅，誅責也。古者重刑，且責怒之，未即罪

也。【疏】「掌萬民之袞惡過失而誅讓之」者，此掌教救羅

民之事。《說文·言部》云：「讓，相責讓。」賈疏云：「袞惡

謂坐嘉石之罷民，不入圜土者。過失謂不坐嘉石，入圜土

者也。誅讓即下二文三讓是也。」云「以禮防禁而救之」者，

申明禮法，以防禁其爲非，即所以救其陷罪。《大司徒》

云：「以五禮防萬民之僞而教之中。」《學記》云：「教也者，

長善而救其失者也。」注云「邪惡，謂侮慢長老、語言無

忌而未麗於罪者」者，邪，宋本及舊注疏本並作袞。今從嘉

靖本正，下並同。阮元云：「《釋文》出經之袞，云「注作邪，

同」。此經作古袞字，注作今邪字之明證。今本皆依經改

作袞矣。下同。」案：阮說是也。此亦經用古字、注用今字

之例。《大司寇》注亦並作「邪惡」可證，互詳《官正》疏。侮

慢長老，語言無忌，皆邪僻之事，故謂之邪惡，即下文之恥

諸嘉石者。《大司寇》云：「以嘉石平罷民，凡萬民之有罪

過而未麗於法而害於州里者。」此云未麗於罪，猶云未麗於

法。析言之，奇袞輕於過失；通言之，袞惡亦爲罪過也。

莊存與云：「此未麗於法者。若禁暴氏、禁殺戮所掌，則已

麗於法者也。」云「過失亦由邪惡醜營好訟，若抽拔兵器誤

以行傷害人麗於罪者」者，《說文·西部》云：「醜，醉營也。

營，醜酒也。」醜即醜之俗。《書·無逸》僞孔傳云：「以酒爲

凶謂之醜。」又《微子》孔疏云：「醜營，謂飲酒醉而發怒。」

此醜營好訟謂因飲酒醉而爭訟。抽拔兵器誤以行傷害人，

即《司刺》注所說是也。二者俱由袞惡不悛，成是過失，以

其過失重於袞惡，故麗於輕罪，即下文之歸於圜土者也。

其不由邪惡醜營好訟之過失，則徑宥之，不入圜土。《司

刺》三宥，再有曰過失，注云「過失，若舉刃欲斫伐而軼中人

者」是也。云「誅，誅責也」者，《大宰》注云：「誅，責讓也。」

與此義同，並謂責讓輕罰，非誅殺也。云「古者重刑且責怒

之，未即罪也」者，責怒即誅讓也。賈疏云：「未即罪者，此

圜土對五刑之刑人，則是未即罪也。以其未入五刑之罪，

且役之耳。」凡民之有袞惡者，三讓而罰，三罰

而士加明刑，恥諸嘉石，役諸司空。罰謂撻擊

之也。加明刑者，去其冠飾，而書其邪惡之狀，著之背也。

嘉石，朝士所掌，在外朝之門左，使坐焉以恥辱之，既而役

諸司空，使事官_傳之也。坐役之數，存於司寇。【疏】「凡民之有袞惡者，三讓而罰」者，此治袞惡之罷民，與朝士爲官聯也。三讓三罰，即此官防禁之事。云「三罰而士加明刑，恥諸嘉石，役諸司空」者，讓罰而改則釋之，若三罰不悛，則歸之司寇，使朝士恥之，司空役之也。事具《大司寇職》。

注云「罰謂撻擊之也」者，《說文·刀部》云：「罰，臯之小者，从刀从罫，未以刀有所賊，但持刀罵罫則應罰。」案：撻擊即扑罰。《司市》云「大刑扑罰」，注云：「扑，撻也。」云「加明刑者，去其冠飾，而書其邪惡之狀，著之背也」者，《大司寇》注云：「明刑，書其罪惡於大方版，著其背。」是也。賈疏云：「案《司圜》云：『凡害人者弗使冠飾。』彼據過失人圜土者。但冠尊，不居肉袒之體，豈嘉石之罷民而著冠乎？明其去冠飾也。」莊存與云：「此即所謂象刑惟明。」云「嘉石，朝士所掌，在外朝之門左，使坐焉以恥辱之」者，據《朝士》云「左嘉石」，謂在庫門外外朝之左也。云「既而役諸司空，使事官作之也」者，以司空爲事官，役事繁猥，故罰罷民使其共其勞役。《大司寇》注云：「坐日訖，使給百工之役也。」《御覽·刑法部》引《風俗通》云：「《周禮》，凡萬民之有罪過未離於法者，桎梏以上，坐諸嘉石，役諸司空，令平易道路也。」

案：應說役司空爲平易道路，亦通。云「坐役之數，存於司寇」者，賈疏云：「《司寇》云：『重罪旬有三日坐，替役；其次九日坐，九月役；其次七日坐，七月役；其次五日坐，五月役；其下罪三日坐，三月役。』是其坐役之數也。」其有過失者，三讓而罰，三罰而歸于圜土。圜土，獄城也。過失近罪，晝日任之以事而收之，夜藏於獄，亦加明刑以恥之。不使坐嘉石，其罪已著，未忍刑之。【疏】「其有過失者，三讓而罰」者，此治過失之罷民，與司圜爲官聯也。亦三讓三罰之。云「三罰而歸於圜土」者，三罰不悛則歸之司寇，使司圜恥役之事，亦具《大司寇》、《司圜》職。

注云「圜土，獄城也」者，《大司徒》注義同，即司圜所掌之獄也。云「過失近罪」者，賈疏云：「謂對袞惡未近罪，此圜土之刑人，近五刑之罪，故入圜土也。」云「晝日任之以事而收之」者，據《司圜》云「任之以事而收教之」。謂晝則於近圜土之地，相聚罰作，此司圜所掌，則任之以事亦即使共司圜之役。賈疏謂亦使司空使之，誤。云「夜藏於獄」者，獄即圜土也。謂頌繫之，禁其亡逸。云「亦加明刑以恥之」者，據《大司寇》「圜土罷民及《司圜》皆云明刑。是圜土之罷民

亦加明刑，與嘉石同也。云「不使坐嘉石，其罪已著，未忍刑之」者，賈疏云：「彼坐嘉石者，罪輕未著，須坐嘉石，使衆人知之。此等罪重已著，不須坐嘉石也。比五刑之罪又輕，故未忍刑之也。」

凡歲時有天患民病，則以節巡國中及郊野，而以王命施惠。天患，謂災害也。節，旌節也。施惠，賙恤之。【疏】「則以節巡國中及郊野」者，郊謂四郊，內包六鄉；野謂六遂，外關四等公邑。《遂人》云「掌邦之野」，注云：「郊外曰野，此野謂甸稍縣都」是也。蓋自國中以至五百里，此官通巡行之矣。

郊野互詳《大司馬》疏。云「而以王命施惠」者，此與鄉師、遺人、旅師、委人爲官聯也。注云「天患謂災害也」者，

裁，《羣書治要》引作「災」。案：注例用今字，當作「災」，詳《小宰》疏。《樂記》注云：「患，害也。」水旱疾疫皆天所降之災害，故謂之天患。云「節，旌節也」者，《掌節》云：「道路用旌節。」賈疏云：「此經巡國及郊野，是道路之事，故知旌節也。」蔣載康云：「節，珍圭。《典瑞》：「珍圭以恤凶荒。」案：蔣說亦通。云「施惠，賙恤之」者，《旅師》注云：「以賙衣食曰惠。」《說文·心部》云：「惠，仁也。」《孟子·滕文公篇》云：「分人以財謂之惠。」《月令》「行慶施惠」，注

云：「謂惠恤其不足也。」案：凡以財物與人，並謂之惠。此施惠，蓋謂施給衣食及醫藥等，若《鄉師》云「以歲時巡國及野，而賙萬民之艱阨，以王命施惠」是也。

調人掌司萬民之難而諧和之。難，相與爲

仇讎。諧猶調也。【疏】「掌司萬民之難而諧和之」者，《師氏》注云：「司猶察也。」《表記》云：「以怨報怨則民有所懲。」故古者不禁報讎，而有調和之令，此官主司察而治之。

注云「難，相與爲仇讎」者，《典瑞》注云：「難，仇讎也。」《御覽·人事部》引馬融注云：「難謂相與爲仇也。」鄭本馬義。賈疏云：「言仇讎者，案《左氏》桓公傳云「怨耦曰仇」，則仇是怨也。讎謂報也，即下文父之讎已下，皆是怨，當報之。」云「諧猶調也」者，《爾雅·釋詁》云：「諧，和也。」《說文·言部》云：「諧，詒也。調，和也。」是諧調義通。凡過而殺傷人者，以民成之。過，無本意也。成，平也。鄭司農云：「以民成之，謂立證佐成其罪也。一說：以鄉里之民共和解之，《春秋傳》曰「惠伯成之」之屬。」【疏】「凡過而殺傷人者，以民成之」者，殺即《掌殺戮》所謂斬殺戮也。傷即《掌殺戮》所謂傷人見血也。《荀子·正論

篇云：「殺人者死，傷人者刑，是百王之所同也。」惠士奇云：「殺人者死，傷人者刑，乃秋官所弊而謀，非調人之所和而釋。所謂過而殺傷人者，吉人良士，本無殺傷之心，時有過誤，不幸陷離者耳。調人乃教民之官，故以其民共聽而成之。」注云「過，無本意也」者，《廣雅·釋詁》云：

「過，誤也。」謂本意不欲殺傷人，而誤殺之傷之也。與《司救》、《司刺》「過失」義同。《鄉射記》云：「射者有過則撻之。」注云：「過謂矢揚中人。凡射時矢中人，當刑之。今鄉會聚衆賢，以禮樂勸民，而射者中人，本意在侯，去傷害之心遠，是以輕之，以扑撻於中庭而已。」即無本意之義，互詳《司刺》疏。云「成，平也」者，《司市》、《質人》、《方士》、《大行人》、《小行人》注並同。《詩·大雅·緜》「虞芮質厥成」，毛傳亦云「成，平也」。平謂斷其是非，使兩得其當，息其爭訟也。凡成平皆兼有聽斷之事，《訝士》云：「四方有亂獄，則往而成之。」與此義略同。鄭司農云「以民成之，謂立證佐，成其罪也」者，《史記·張湯傳》云：「使吏捕湯左田信等。」《集解》引《漢書音義》云：「左，證左也。」證佐與證左同。謂以民之與知其事者為證佐，以平定其罪之輕重也。先鄭意蓋謂雖無本意而殺傷人，仍當科輕罪。後鄭則謂無罪，故不從也。云「一說，以鄉里之民共和解之」者，先

鄭後注云「成之謂和之也」，即從此義。和解亦謂先斷其是非，而後釋其仇怨也，與下文「令勿讎」異。賈疏云：「先鄭雖為兩說，後鄭以後說為是，故下注云「上說立證佐成其罪，似非」也。」云《春秋傳》曰，惠伯成之之屬」者，賈疏云：「《左氏》文七年傳云：「魯穆伯娶於莒，曰戴己，其娣聲己。戴己卒，又聘於莒，莒人以聲己辭，則為襄仲聘焉。」又云：「且為仲逆，及鄆陵，登城見之，美，自為娶之。仲請攻之，公將許之，叔仲惠伯諫，公止之，惠伯成之。」注云「平二子」。「使仲舍之，公孫敖反之，復為兄弟如初。」是其事也。」鳥獸亦如之。過失殺傷人之畜產者。【疏】注云

「過失殺傷人之畜產者」者，賈疏云：「亦謂過誤殺傷人之鳥獸，若鷹隼牛馬之屬，亦以民平和之。案：今殺傷人牛馬之等，償其價直耳。」凡和難，父之讎辟諸海外，兄弟之讎辟諸千里之外，從父兄弟之讎不同國；君之讎眡父，師長之讎眡兄弟，主友之讎眡從父兄弟。和之使辟於此，不得就而仇之。九夷、八蠻、六戎、五狄，謂之四海。主，大夫君也。《春秋傳》曰：「晉荀偃卒而視不可含，宣子盥而撫之曰：事吳敢不如事主。」【疏】「父之讎辟諸海外」者，賈疏云：「以下皆

是殺人之賊，王法所當討，即合殺之。但未殺之間，雖以會赦，猶當使離鄉辟讎也。」云「從父兄弟之讎不同國」者，《釋文》出「從兄」二字，則陸所見經本蓋並作「從兄弟」，無「父」字。《爾雅·釋親》云：「兄之子，弟之子，相謂為從父兄弟。」郭注云：「從父而別。」然則上云兄弟者，謂親兄弟。但此經「從父兄弟」，當兼有「從父」，經從字貫父及兄弟為文。荀悅《申鑒·時事篇》說依古復讎之科，云「從父從兄弟之讎，避諸異縣百里」，即隱據此經義也。賈疏云：「不同國，別國即得。」云「國君之讎眡父」者，賈疏云：「謂同國人殺君，眡猶比，比父亦辟之海外。」云「師長之讎眡兄弟」者，即《大宰》九兩之「二曰長以貴得民，三曰師以賢得民」。師長之讎，謂從學之師、官府都邑之長為人所殺，而弟子、吏民為之報讎。漢人有掾史部民為府主守令復讎者，尚與經義合。此經長與師當為二，說者多誤合之，非也。互詳《師氏》疏。云「主友之讎眡從父兄弟」者，即九兩之「六曰主以利得民」，「八曰友以任得民」。《韓非子·五蠹篇》云：「今兄弟被侵必攻者，廉也；知友辱隨仇者，貞也。」即為兄弟主友報讎之事。主友義，詳後。賈疏云：「此經略言，其不言者皆以服約之；伯叔父母、姑姊妹女子子在堂及兄弟子、衆子、與兄弟同。其祖父母、曾祖父母、高祖父

母，其孫承後，皆斬衰，皆與父同；其不承後者，祖與伯叔同，曾祖高祖斬衰三月，皆與從父兄弟同，以其同繩屨故也。自外不見者，據服為斷也。其兄弟及從父兄弟、師、長、主、友皆為無子，復無親於己者，故據己親疏為遠近；若有子及親於己，則自從親為斷。」案：賈據服屬補經義，甚覈。惟《禮記》說復讎之法，文多差異。《曲禮》云：「父之讎弗與戴天，兄弟之讎不反兵，交遊之讎不同國。」鄭彼注云：「父者，子之天，殺己之天，與共戴天，非孝子也，行求殺之乃止。不反兵，恒執殺之備。不同國，讎不吾辟則殺之。交遊或為朋友。」又《檀弓》云：「子夏問於孔子曰：『居父母之仇如之何？』夫子曰：『寢苦枕干，^①不仕，弗與共天下也。遇諸市朝，不反兵而鬪。』曰：『請問居昆弟之仇如之何？』曰：『仕弗與共國。銜君命而使，雖遇之，不鬪。』曰：『請問居從父昆弟之仇如之何？』曰：『不為魁。主人能則執兵而陪其後。』」《大戴禮記·曾子制言篇》云：「父母之讎不與同生，兄弟之讎不與聚國，朋友之讎不與聚鄉，族人之讎不與聚鄰。」《白虎通義·誅伐篇》論復仇，略依《檀弓》說，而云「朋友之仇不與同朝，族人之仇不共鄰」。

①「干」，原譌「塊」，據《檀弓》改。

《公羊》莊四年何注又云：「禮，九族之讎不同鄉黨，朋友之讎不同市朝。」諸文並與此經互有異同。又此經同姓之親止於從父兄弟，而曾子及班、何說並廣及族人，尤為不合。《曲禮》孔疏云：「《檀弓》云：『父母之仇不仕，弗與共天下也。』而《調人》云『父之讎辟諸海外』，則得與共戴天。此不共戴天者，謂孝子之心不許共讎人戴天，必殺之乃止。《調人》謂逢遇赦宥，王法辟諸海外，孝子雖欲往殺，力所不能。《檀弓》云：『父母之讎不反兵，兄弟之讎仕弗與共國。』而此云兄弟不反兵者，父母不反兵，於普天之下也；兄弟不共國，謂不同中國也。而亦不反兵者，父母仇讎，則不仕，不辟市朝；兄弟仇讎，則猶仕而辟市朝也。而亦同不反兵，則同體重之也。而《調人》云『兄弟之讎辟諸千里之外』。二文不同者，《調人》亦謂會遇恩赦之法，辟諸千里之外。《檀弓》又云：「銜君命而使，雖遇之不鬪。」雖同不反兵，與父母讎異也。交遊之讎不同國者，交遊，朋友也。不同國者，謂不共五等一國之中也。而《調人》云『從父母兄弟之讎不同國』，與此同。又《調人》云『主友之讎視從父兄弟』，是主友亦同。此與《調人》皆謂會赦故不同國，雖不同國，國外百里二百里則可。其兄弟仕不與共國者，必須相去千里之外，故《調人》云『兄弟之讎辟諸千里之外』是也。

但從父兄弟及交遊主友報讎之時，不自為首，故《檀弓》云「從父兄弟之仇，不為魁，主人能，則執兵而陪其後」也。」江永云：「若是殺人而義者，不當報，報之則死。如殺人而不義者，正法當討，不當教之辟也。此辟讎者，皆是過失殺人，於法不當死，調人為之和難，而讎家必不肯解者，乃使之辟也。」阮元云：「《調人》專言過殺，非本意殺，故調人得使之遠避，平成之，與孔、曾所言有意辱殺之讎不同。」案：江、阮說足申此經之義。黃度、王與之、李光坡、李鍾倫、方苞、莊存與、孫希旦、蔣載康亦並謂此經冢上過而殺人者而言，是也。賈、孔禮疏並以會赦為釋，非周法也。

注云「和之使辟於此，不得就而仇之」者，《說文·走部》云：「避，回也。」辟即避之段字。謂辟之使相遠，則欲報仇者不得就而報之也。云「九夷、八蠻、六戎、五狄，謂之四海」者，《職方氏》注引《爾雅》同，詳彼疏。賈疏云：「案漢時徐州刺史荀文若問玄，《周禮》父之讎辟之海外，今青州人讎在遼東，可以王法縱不討乎？當問之時，玄已年老，昏耄，意忘九夷八蠻六戎五狄謂之四海。然則《周禮》在四海之外，辟之如是，亦是遠矣。近則青州、遼東作難，未達周公聖意所趣。若文若之難海水為四海，故今明之。然讎近東夷之人，當辟之西戎，餘皆放此。趙商問：『《調人職》

稱，父之讎辟諸海外，君亦然。注「使辟於此，不得就而讎之」。商以《春秋》之義，子不復讎，非子；臣不討賊，非臣。楚勝之徒猶言「鄭人在此，讎不遠矣」。不可以見讎而不討，於是伐之。臣感君恩，孝子思其親，不得不報，和之而已。子夏曰：「居父母之仇如之何？」孔子曰：「寢苦枕干，不仕，不與共天下，遇諸市朝不反兵」。天下尚不反兵，海內何爲和之？豈宜不達二禮所趣？小子曰惑，少蒙解說。鄭荅曰：「讎在九夷之東，八蠻之南，六戎之西，五狄之北，雖有至孝之心，能往討不乎？子之所云，偏於此義。」若然，鄭云「雖有至孝之心，能往討之不乎」者，欲明孝子雖會赦，恒有復讎之心，故避之海外，使絕忠臣孝子心，使無往之緣。其孔子云「寢苦枕干不仕」者，可通之會赦之後恒然，其君亦然，恐來入中國則殺之也。復讎之法，依《異義》古《周禮》說，復讎可盡五世，五世之內。五世之外，施之於己則無義，施之於彼則無罪。所復者惟謂殺者之身，及在被殺者子孫可盡五世得復之，鄭從之也。案：文若，荀彧字。其與鄭君問難語，未詳所出。據《後漢書》、《三國志》彧傳，皆不云爲徐州刺史，疑有舛誤。依賈說，則鄭意以海外爲四海之外，所辟絕遠。荀以海水爲難，殆未達鄭旨，賈糾之是也。但以會赦爲說，則仍非經義。又《曲

禮》疏引《五經異義》云：「《公羊》說，復百世之讎。古《周禮》說，復讎之義，不過五世。許慎謹案：魯桓公爲齊襄公所殺，其子莊公與齊桓公會，《春秋》不譏。又，定公是魯桓公九世孫，孔子相定公，與齊會於夾谷，是不復百世之讎也。從《周禮》說。」孔引尤備。所稱古《周禮》說，蓋此經舊師佚義。復讎盡五世，即謂高祖至玄孫。賈前疏義，本於彼也。云「主，大夫君也」者，謂家臣及采邑之民稱其君爲主也。《大宰》注云：「主謂公卿大夫。」此注不云公卿者，《喪大記》云：「大夫君，不迎於門外。」鄭依彼成文，亦以公卿得通大夫也。《坊記》云：「大夫不稱君。」鄭注亦引此經爲釋。引《春秋傳》者，襄十八年《左傳》文。證大夫君得稱主也。杜注云：「大夫稱主。」亦依鄭義。王引之云：「宣子所云，乃同官相尊之詞，非大夫君之謂也。惟仕於家者，以大夫爲君。《晉語》曰：「三世仕家，君之，再世以下主之。」則家臣之於大夫，義與君臣相等，故《喪服》大夫之臣爲大夫服斬衰。大夫君之讎，宜與君同；而今乃輕於師長，無是理也。案《曲禮》曰：「交遊之讎不同國。」主友蓋皆交遊之屬，主謂適異國所主之人也。羈旅相依，有朋友之道，故與友並言之。《大戴禮·曾子制言》上篇曰：「曾子門弟子或將之晉，曰『吾無知焉』。曾子曰：『何必然，往

矣。有知焉謂之友，無知焉謂之主。」盧注曰：「且客之而已。」是其證。主之讎不同國者，謂爲所主者或爲人所害，則與害所主者之人不同國而居也。」案：王說是也。此主友即《大宰》九兩之主友。主者對客之稱，注並誤，詳《大宰》疏。弗辟，則與之瑞節而以執之。瑞節，玉節之剡圭也。和之而不肯辟者，是不從王命也。王以剡圭使調人執之，治其罪。【疏】「弗辟，則與之瑞節而以執之」者，江永云：「使之辟而不辟，則有逆命之罪，於是調人與報者以瑞節爲信，使其執至官而治之也。」注云「瑞節，玉節之剡圭也」者，阮元云：「剡，當從《典瑞》、《玉人》作「琰」。非此經用古字注用今字之例，直是譌字耳。下同。」

案：阮校是也。鄭言此者，明與《大行人》「達瑞節」通玉節及金竹六節言者異。凡玉節通謂之瑞節，《左》文十二年傳，以聘玉爲瑞節可證，詳《掌節》疏。《掌節》注云：「邦節，珍圭、牙璋、穀圭、琬圭、琰圭也。知此瑞節必爲琰圭者，《典瑞》云：「琰圭以易行，以除慝。」此執罪人，與除慝義相應，故知用琰圭也。《典瑞》又有穀圭以和難。此官掌和難，知不用穀圭者，以經云執之，則不復和之矣，明當用除慝之玉也。云「和之而不肯辟者，是不從王命也」者，《公羊》桓十年，何注云：「弗者，不之深也。」法當辟而弗辟，則

是違王命，故治其罪也。云「王以剡圭使調人執之，治其罪」者，剡亦當作「琰」。鄭意典瑞、玉節並是王使之瑞節，此瑞節亦當爲王與調人執之也。治其罪，賈疏謂執付秋官而與之罪。案：當亦歸於朝士而治之。江永云：「注非也。如調人當執，則以官法執之可矣，何必王與瑞節？節必使讎人自執者，欲伸其報仇之情也。執至官而治之，則亦不許其殺也。經無王與調人瑞節之文，故知是調人與仇家。」案：江說本葉時，是也。莊有可說同。此冢上文，亦謂過失殺人，罪不當死，而不從相辟之命，故使報仇之人執以歸之官，而治其罪。若不義殺人，於法當死者，則《朝士》所云「凡報仇讎者書於士，殺之無罪」是也。鄭此及《朝士》注並未得其義。凡殺人有反殺者，使邦國交讎之。反，復也。^①復殺之者，此欲除害弱敵也。邦國交讎之，明不和，諸侯得者即誅之。鄭司農云：「有反殺者，謂重殺也。」【疏】注云「反，復也」者，《說文·又部》云：「反，覆也。」復覆義通。謂己殺人，其黨欲報讎，己復殺之也。云「復殺之者，此欲除害弱敵也」者，《公羊》定四年傳云：

① 「反復」二字原倒，今乙正。

「復讎不除害。」何注云：「取讎身而已，不得兼讎子，復將恐害己而殺之。」注義本於彼。賈疏云：「謂既殺一人，其有子弟復殺之，恐後與己爲敵而害己。」云「邦國交讎之，明不和，諸侯得者即誅之」者，明其罪大，調人不得復和而解之，所逃至之國，得即誅之，示惡之甚也。鄭司農云「有反殺者，謂重殺也」者，《論語·述而》皇疏云：「反猶重也。」《左》桓十七年傳云：「高伯其爲戮乎，復惡已甚矣。」杜注云：「復，重也。」是反復並得訓重，先鄭義與後鄭同。凡

殺人而義者，不同國，令勿讎，讎之則死。

義，宜也。謂父母兄弟師長嘗辱焉而殺之者，如是爲得其宜，雖所殺者人之父兄，不得讎也。使之不同國而已。

【疏】「凡殺人而義者不同國，令勿讎」者，殺人而義，於法宜殺者也。不宜更令相辟，而不同國。江永謂「不同國」三字衍。案：此疑當作「同國令勿讎」，謂雖同國亦不得讎也。經蓋涉上文而誤衍「不」字。《左》襄二十二年傳云：

「鄭游販將如晉，遭逆妻者，奪之，以館于邑。其夫攻殺之，以其妻行。子展求亡妻者，使復其所，使游氏勿怨。」使復其所，即同國也。使游氏勿怨，即令勿讎也。可證此經之義。云「讎之則死」者，此調人之官刑也。蓋比故殺人之

罪，亦歸於朝士使刑之。

注云「義，宜也」者，《中庸》

文。云「謂父母兄弟師長嘗辱焉而殺之者，如是爲得其宜」者，謂子弟、弟子、僚屬，爲父母、兄弟、師長被大辱而殺其人，是於情爲不容已，即是得其宜也。此鄭略舉一端爲義。

劉敞謂若《朝士職》凡盜賊軍鄉邑及家人，殺之無罪。江永謂戰陳殺人，或爲姦盜被殺之類。並得備一義。云「雖所殺者人之父兄，不得讎也」者，父兄被殺，子弟本宜復讎，

以其義殺，故令不得讎也。云「使之不同國而已」者，鄭時經本已有「不」字，故謂與前從父兄弟及主友之讎同，辟諸異國而已。

凡有鬪怒者，成之；不可成者，則書之，先動者誅之。鬪怒，辯訟者也。不可成，不可

平也。書之，記其姓名、辯本也。鄭司農云：「成之謂和之也。和之，猶今二千石以令解仇怨，後復相報，移徙之。此

其類也。」玄謂上言「立證佐成其罪」，似非。【疏】「凡有鬪怒者成之」者，鬪怒之讎，輕於殺人，此官亦主調和之也。

云「先動者誅之」者，不可成而先發難，則是違和難之令，故有誅，亦謂責讓撻罰之也。

注云「鬪怒，辯訟者也」者，

《說文·鬥部》云：「鬥，兩士相對，兵杖在後，象鬥之形。

鬪，遇也。」此鬪即鬥之段字。賈疏云：「言鬪怒，則是言語

忿爭，未至毆擊，散成之。若相毆擊，則當罪之也。」案：經云鬪，則亦容有毆擊，但未至傷人，則不科罪耳。賈說未析。云「不可成，不可平也」者，亦訓成爲平，謂兩家不願和解也。云「書之，記其姓名，辯本也」者，記辯訟之姓名及釁端所本起也。《墨子·號令篇》云：「必謹問父老吏大夫，

諸有怨仇讎不相解者，召其人明白爲之解之，守必自異其人而藉之。」又《雜守篇》云：「民相惡，吏所解，皆札書藏之。」與此經「有鬪怒不可成者書之」，法略同。鄭司農云「成之謂和之也」者，亦謂和解之。《國策·秦策》高注云：

「和，平也。」先鄭訓和，與後鄭訓平義同。云「和之猶今二千石以令解仇怨，後復相報，移徙之，此其類也」者，惠棟云：「何休《公羊》僖二十七年注云：『古者諸侯有難，王者若方伯和平之，後相犯，^①復故罪。』此調人成之之法也。

成之者何？和之也。《御覽》引王褒《僮約》注云「漢時官不禁報怨」，故二千石以令解之。令者，漢令有和難之條。

《後漢書》桓譚疏曰：「今人相殺傷，雖已伏法，而私結怨讎，子孫相報，後忿深前，至於滅戶殄業，而俗稱豪健，故雖怯弱，猶勉而行之。此爲聽人自理而無復法禁者也。今宜申明舊令，若已伏官誅而私相傷殺者，雖一身逃亡，皆徙家屬於邊，其相傷者加常二等，不得雇山贖罪，如此則仇怨自

解。」譚所云舊令，即先鄭所云移徙之法也。云「玄謂上言立證佐成其罪，似非」者，此破先鄭上注說，明成當爲平斷和解之義。先鄭前注兩說義異，此注與後鄭並從後義，故別白辯正之。

媒氏掌萬民之判。判，半也。得耦爲合，主合

其半，成夫婦也。《喪服傳》曰：「夫妻判合。」鄭司農云：

「主萬民之判合。」【疏】「掌萬民之判」者，謂治百族婚姻之事。《士昏禮》云「昏禮下達」，注云：「達，通也。將欲與彼合婚姻，必先使媒氏通其言。」案：昏有六禮，通於尊卑，媒妁通辭，各有黨友，此官特掌其禮法政令耳。《士昏》注所云媒氏，自廣咳民間媒妁言之。賈彼疏謂指侯國媒氏官，非也。王畿千里，受田者三百萬家，此官止下士二人，豈能盡通其婚姻媒妁之言。揆之事理，昭較無疑。《春秋》桓八年冬，祭公來，遂逆王后于紀。《公羊傳》謂使魯爲媒。若然，王納后尚特使諸侯爲媒，則此官不必親掌通言之事亦明矣。注云「判，半也」者，《朝士》注云：「判，半分而

① 原「後」下衍「復」，據《公羊傳》何注刪。

合者。《說文·刀部》云：「判，分也。」云「得耦爲合，主合其半，成夫婦也」者，《釋名·釋親》屬云：「耦，遇也，二人相對遇也。」是二人爲耦，一人爲半，合之乃成夫婦，故曰判也。引《喪服傳》曰「夫妻判合」者，《喪服·齊衰不杖期》傳文。今本判作「胖」，宋本《儀禮釋文》作「胖」。《一切經音義》云：「判，古文又作胖，同。」《集韻·二十九換》云：「胖，半也。《字林》胖合，合其半以成夫婦也。或省作片。」案：鄭引《喪服傳》者，證判爲合半之義。呂忱詁胖字亦即本此注。但胖从片从半，譌俗不體，其字不見《說文》，玄應謂是判古文，殊謬。以鄭、賈二《禮》注疏覈之，《喪服》故書當從《釋文》作胖爲正。《說文·肉部》云：「胖，半體肉也。」《廣雅·釋詁》亦云：「片，胖，半也。」蓋胖判聲同字通。鄭於《喪服傳》胖合雖無釋，其意則謂當讀爲判。此經作判爲得其正，故注引彼傳徑易爲判，以就此經。胖判義皆爲半，校讀者或即省爲半。半又與片音義相近，故《喪服》賈疏云「半合」，又云「片合」，《酒正》疏亦然。《莊子·則陽篇》又云「雌雄片合」。此並傳習省易，而《禮經》則固未有作半合、片合之本也。鄭司農云「主萬民之判合」者，即依《喪服傳》爲訓。凡男女，自成名以上，皆書年月日名焉。鄭司農云：「成名謂子生三月，父名

之。【疏】「凡男女自成名以上，皆書年月日名焉」者，謂生子之家，三月命名，則以年月日名告之媒氏，媒氏則書之於版，以備嫁娶時校其年齒也。及男八月女七月生齒，則又書於司民之版，二官相與爲官聯，法亦互相備也。注

鄭司農云「成名謂子生三月，父名之」者，賈疏云：「案《內則》、三月之末，父執子右手，孩而名之。又云：『夫告宰名，宰辯告諸男名，書曰：某年某月某日某生，而藏之。』」注引《春秋書》桓六年，九月丁卯，子同生是也。令男三十而娶，女二十而嫁。一二者，天地相承覆之數也。

《易》曰「參天兩地而奇數」焉。【疏】「令男三十而娶，女二

十而嫁」者，此言男女嫁娶年之極也。《說文·女部》云：「娶，取婦也。嫁，女適人也。」《昏義》孔疏云：「案《異義》：『大戴說，男三十女二十有昏娶，合爲五十，應大衍之數，自天子達於庶人，同一也。』古《春秋左氏》說，國君十五而生子，禮也；二十而嫁，三十而娶，庶人禮也；禮爲夫婦之長，長殤，長殤十九至十六，知夫年十四、十五，見《士昏禮》也。許君謹案：舜年三十不娶，謂之鰥。文王十五而生武王，尚有兄伯邑考，知人君早昏娶，不可以年三十，所以重繼嗣也。」若鄭意，依正禮，士及大夫皆三十而後娶，及

《禮》云爲夫姊長殤者，闢異代也。或有早娶者，非正法矣。天子諸侯昏禮則早矣。」賈疏引《聖證論》王肅曰：「《周官》云『令男三十而娶，女二十嫁』，謂男女之限，嫁娶不得過此也。三十之男，二十之女，不待禮而行之，所奔者不禁，娶何三十之限。前賢有言丈夫二十不敢不有室，女子十五不敢不有其家。《家語》，魯哀公問於孔子：『男子十六精通，女子十四而化，是則可以生民矣。聞禮男三十而有室，女二十而有夫，豈不晚哉？』孔子曰：『夫禮言其極，亦不是過。男子二十而冠，有爲人父之端；女子十五許嫁，有適人之道。於此以往，則自昏矣。』然則三十之男，二十之女，中春之月者，所謂言其極法耳。」又引馬昭曰：「《禮記·本命》曰：『中古男三十而娶，女二十而嫁，合於中節。大古男五十而有室，女三十而嫁。』《尚書大傳》曰：『孔子曰：男三十而娶，女二十而嫁，通於織紵紡績之事，黼黻文章之美，不若是，則上無以孝於舅姑，而下無以事夫養子。』《穀梁傳》曰：『男子二十而冠，冠而列丈夫，三十而娶。』尹更始云：『男三十而娶，女十五許嫁，笄，二十而嫁。』《曲禮》：『三十曰壯，有室。』盧氏云：『三十盛壯，可以娶女。』《內則》：『三十而有室，始理男事。女子十五笄，二十而嫁，有故，二十三而嫁。』經有『夫姊之長殤』，舊說三十而娶

而有夫姊長殤者何？闢盛衰。一說闢畏厭溺而殤之。盧氏以爲衰世之禮也。張融從鄭及諸家說。又《春秋外傳》，越王句踐蕃育人民，以速報吳，故男二十而娶，女十七而嫁，如是足明正禮男不二十娶，女不十七嫁可知也。《穀梁》文十二年傳云：『男子三十而娶，女子十五而許嫁，二十而嫁。』范注云：『譙周曰：『國不可久無儲貳，故天子諸侯十五而冠，十五而娶，娶必先冠，以夫婦之道，王教之本，不可以童子之道治之。禮十五爲成童，以次成人，欲人君之早有繼體，故因以爲節。《書》稱成王十五而冠，著在《金縢》。』《周禮·媒氏》曰：『令男三十而娶，女二十而嫁。』《內則》云：『女子十五而笄。』說曰許嫁也。是故男自二十以及三十，女自十五以及二十，皆得以嫁娶。先是則速，後是則晚。凡人嫁娶，或以賢淑，或以方類，豈但年數而已。若必差十年乃爲夫婦，是廢賢淑方類，苟比年數而已，禮何爲然哉！則三十而娶，二十而嫁，說嫁娶之限，蓋不得復過此爾。故舜年三十無室，《書》稱曰齔，《周禮》云『女子年二十未有嫁者，仲春之月，奔者不禁』。奔者，不待禮聘，因媒請嫁而已矣。甯謂禮爲夫之姊妹服，長殤年十九至十六，如此男不必三十而娶，女不必二十而嫁，明矣。此又士大夫之禮。』《通典·嘉禮》云：『今案：三十二而嫁娶

者，《周官》云「掌萬民之判」，即衆庶之禮也。故下云「於是時也，奔者不禁」。《服經》爲夫婦之長殤，士大夫之禮也。《左傳》「十五而生子」，國君之禮也。且官有貴賤之異，而婚得無尊卑之殊乎？則卿士大夫之子，十五之後皆可嫁娶矣。」^①論讓案：此經及《禮大戴記·本命》、《小戴記·曲禮》、《內則》、《春秋穀梁》文十二年傳，並有男子三十娶、女子二十嫁之文。漢魏諸儒，說者互異。以爲天子以下至於庶人，同男三十娶女二十嫁者，許君引大戴說及伏生、班固、盧植、馬昭、張融之說，《淮南子·汜論訓》亦云「禮，三十而娶。文王十五而生伯邑考，非法也」是也。以爲大夫士以上，不拘年數，惟庶人男三十而娶，女二十而嫁者，許推《春秋左氏》說及譙周、范甯、杜佑之說是也。以爲男十六以上可娶，女十四以上可嫁，三十娶二十嫁言其極法者，王肅及肅所私定《家語》之說，^②《大戴禮記·本命》盧注亦以十六、十四爲嫁娶之期是也。竊謂通校羣經，並無男未三十女未二十不可嫁娶及天子以下至於庶人同法之明文。^③況譙、王諸家所舉未三十二而嫁娶者，證驗繁夥，非盡衰世之法，則王氏三十二言極法之說，未嘗不可通。鄭《曲禮》注云：「人年二十，弱冠，成人，有爲人父之端。」許君《五經異義》引《左氏》「國君十五生子」之文，以駁《禮》

大戴說，而《詩·召南·標有梅》孔疏謂鄭君無駁，則許、鄭所見本同，亦未嘗謂未三十二必不可以嫁娶也。俞正燮云：「媒氏掌萬民之判，令男三十而娶，女二十而嫁。此令也，非禮也。禮不下庶人，令言其極不是過。」《墨子·節用上》云：「昔者聖王爲法曰：『丈夫年二十，毋敢不處家；女子年十五，毋敢不事人。』此聖王之法也。聖王既沒，於民次也。其欲早處家者，有所二十年處家；其欲晚處家者，^④有所四十年處家。」《大戴·本命》云：「男二十八，然後精通，然後其施行；女二十七，然後其化成。」《韓詩外傳》云：「男子十六而精化小通，女子十四而精化小通。不肖者精化小具，而生氣感動，觸情縱欲，反施亂化，是以年壽亟夭而性不長。」然則十六十四足以反施亂化，亦足任爲夫婦。是知三十二之令，爲民之無力者言其極。士以上婚有禮，禮無嫁娶年者，國家各有事故、政役、喪紀，不可

- ① 楚本於此下挖版，增二十七字：「又凶禮引袁準束皙並云二十三十禮之大斷若形知夙成不在此限。」
- ② 楚本於此句下補七字：「袁準束皙並從之。」
- ③ 此句二十八字及下句「況」字，共二十九字，楚本刪。
- ④ 「欲」原作「所」，據楚本改。

豫期也。案：《詩·豳風譜》正義云：「依《文王世子》篇，

文王十五而生武王，武王尚有兄伯邑考。」《呂氏春秋》云：

「文王十二而生子。」《詩·大明》正義云：「《大戴》稱文王

十三生伯邑考。」是文王娶太姒，年不過十二。襄九年《左

傳》云：「國君十五而生子」，其娶亦當在十二三。孔子十九

娶，見之《史記·仲尼弟子列傳》。顏淵少孔子三十歲，其

父路親受業孔子之門，則路亦非三十始娶。《韓非子·外

儲說右》云：「齊桓公令男二十而室，女十五而嫁。」《越語》

云：「越王令男二十，女十七，不嫁娶其父母有罪。」皆防其

極，故皆曰令。然則令著三十二十者何也？女子精化早

通，止於四十九，故以二十為極；男精化通遲，止於六十

四，故以三十為極。女至二十，或嫁二十之男，或不及二十

之男，或三十之男，或七十為宗子之男。男至三十，或娶十

五之女，或二十之女，或有故二十三年而嫁之女。男女配

合，萬有不齊，各舉所極，非比較年數也。」案：俞說足以釋

諸家之紛矣。注云「二三」者，天地相承覆之數也「者」，

鄭意男年三十，女年二十，為嫁娶之正年，法天數三地數

二，地承天覆，相配合。《大戴禮記·本命篇》云：「中古男

三十而娶，女二十而嫁，合於五也。」盧注云：「男女合於五

十。《周書·武順篇》云：「男生而成三，女生而成兩，五以

成室。」《白虎通義·嫁娶篇》云：「男三十而娶，女二十而

嫁何？陽數奇，陰數偶也。男長女幼者何？陽道舒，陰

道促。男三十，筋骨堅強，任為人父，女二十，肌膚充盛，任

為人母，合為五十，應大衍之數生萬物也。故《禮·內則》

曰「男三十壯有室，女二十壯而嫁」。七歲之陽也，八歲之

陰也，七八十五，陰陽之數備，有相偶之志。故《禮記》曰

「女子十五，許嫁，笄而字，禮之稱字」。陰繫於陽，所以專

一之節也。陽尊無所繫，二十五繫者，就陰節也。陽舒而

陰促，三十數三終，奇，陽節也。二十數再終，偶，陰節也。

陽小成於陰，大成於陽，故二十而冠，三十而娶。陰小成於

陽，大成於陰，故十五而笄，二十而嫁也。」案：諸說與鄭義

並通。惟《說文·包部》云：「元氣起於子，人所生也。男

左行三十，女右行二十，俱立於巳，為夫婦。」《淮南子·汜

論訓》高注說同。此別據五行為說，非鄭義也。云「《易》

曰，參天兩地而奇數焉」者，《釋文》云：「奇，本或作倚。」

案：王弼本《易·說卦》作「倚」，陸所見或本蓋依王本改，

宋婺州本同。《易釋文》云：「蜀才作奇。」賈疏云：「案：

《易·繫辭》云「天一地二，天三地四，天五地六」，是就奇數

之中，天五度生，地二度生。象天三覆地二，故云天地相承

覆之數也。」案：《周易》孔疏引鄭《易注》云：「天地之數備

於十，乃三之以天，兩之以地，而倚託大衍之數五十也。必三之以天兩之以地者，天三覆，地二載，欲極於數，庶得吉凶之審也。」臧庸云：「《易正義》引鄭云『倚託大衍之數』，是鄭、王皆作『倚數』。鄭注《易》與注《禮》所據本不同，注《易》是費氏本。本傳云『始通《京氏易》』。注《禮》在注《易》之前，則《周禮注》作『奇』字，所據蓋《京氏易》也。蜀才作奇，與《周禮注》正合。」凡娶判妻人子者，皆書之。書之者，以別未成昏禮者。鄭司農云：「人子者，謂

嫁女者也。」玄謂言人子者，容媵姪娣不娣之者。【疏】「凡

娶判妻人子者，皆書之」者，鄭以此爲正昏禮，則「判妻」即取夫妻判合之義，謂正妻也。人子亦與納女義同。江永

云：「娶判妻謂娶人所出之妻，人子謂再嫁而攜其女人後夫之家者。書之者，防其爭訟也。」莊存與云：「《左》襄二

十七年傳云『東郭姜以孤入』，《喪服》有『從爲之服』之文，則人子古有之矣。書之使不亂族也。」黃以周云：「判妻即

嫁妻。夫妻爲判合，妻而嫁，合者又判矣。人子，即從母適人者。」案：江、莊、黃說並與鄭異而義較長。王昭禹、鄭

鏐、李光坡、方苞、莊有可說判妻，姜兆錫、蔣載康說人子，並同江說。今攷，判妻，蓋兼夫在而被出與夫亡而再嫁二

者而言，人子亦關男女。《喪服》注云「凡言子者，可以兼男女」是也。二鄭說並未安。《聖證論》孔晁說，又以此經爲據霜降嫁娶之候，尤非。詳後疏。 注云「書之者，以別

未成昏禮者」者，鄭意此娶判妻人子，並指尋常嫁娶而言。上「成名以上」之男女，是未成昏禮者；此所書，是已成昏禮後，更書之也。《曲禮》說昏禮云「日月以告君」，注云：

「《周禮》，凡娶判妻人子者，媒氏書之以告君，謂此也。」然則鄭意書之者，并書其嫁娶日月矣。鄭司農云「人子者，謂

嫁女者也」者，《國策·秦策》高注云：「入，納也。」先鄭以人子猶云納女，亦即後文之嫁子也。云「玄謂言人子者，容

媵姪娣不娣之者」者，娣，今本並作「聘」，今從宋本、嘉靖本。《說文·女部》云：「娣，問也。」娣正字，聘段字。賈疏

云：「案成公九年春二月，伯姬歸于宋；夏，晉人來媵。是媵也。姪娣而書者，謂待年於父母者也。隱二年冬，伯姬

歸于紀；七年春三月，叔姬歸于紀。何休云：「叔姬者，伯姬之媵也。至是乃歸者，待年父母國也。婦人八歲備數，

十五從嫡，二十承事君子。媵賤書者，後爲嫡，終有賢行。」鄭君或與何休異。如是言娶判妻，姪娣後去者則存焉，故

人子謂媵與姪娣後去者也。案《昏禮》云「雖無娣，媵先」，則媵與姪娣一也。此鄭云媵姪娣，不止是一者，既言媵，又

云姪娣，故知別。且媵與姪娣相對，則姪娣無媵稱。故莊公十九年秋，公子結媵陳人之婦于鄆。《公羊》云：「媵者何？諸侯娶一國，則二國往媵之，以姪娣從。」是其義也。媒氏掌萬民之判，得有媵與姪娣者，庶人或無妾，亦容有者。且媒氏所掌雖以萬民爲主，亦容有尊者娶法，故鄭云容媵姪娣不聘也。知不聘者，見《內則》云「聘則爲妻，奔則爲妾」故也。《論語》案：《釋名·釋親屬》云：「姪娣曰媵，承也，承事嫡也。」是謂姪娣即媵。《春秋公羊》說，則謂媵與姪娣是二，故隱元年何注云：「禮，適夫人無子，立右媵，右媵無子，立左媵，左媵無子，立嫡姪娣，嫡姪娣無子，立右媵姪娣，右媵姪娣無子，立左媵姪娣。」是嫡與左右媵並有姪娣也。蓋媵與姪娣，對文則異，散文則通。天子諸侯媵與姪娣皆備。大夫士以下，或止有媵，或止有姪娣，故姪娣即稱媵也。云不娉者，《左》成十二年傳云：「聲伯之母不聘。」杜注云：「不聘，無媒禮。」後鄭意，姪娣從嫡而來，不具六禮，故經不云娶，而云人也。此說與先鄭不同，然亦非經義。

中春之月，令會男女，中春，陰陽交，以成昏禮，順天時也。【疏】「中春之月，令會男女」者，《爾雅·釋詁》云：「會，合也。」此謂男女已議昏，或納采、問名、納吉、納徵諸禮已備，惟請期、親迎之禮未行，則令其及

時備禮而會合之。

注云「中春陰陽交，以成昏禮，順天

時也」者，鄭以中春爲嫁娶之正期。《詩·召南·標有梅》、《鄭風·野有蔓草》、《唐風·綢繆》、《陳風·東門之楊》、箋義並同。《白虎通義·嫁娶篇》云：「嫁娶必以春何？春者天地交通，萬物始生，陰陽交接之時也。《詩》云：「士如歸妻，迨冰未泮。」《周官》曰：「仲春之月，令會男女。」《夏小正》曰：「二月，冠子娶婦之時也。」班說與鄭同。賈疏及《玉燭寶典》引王肅《聖證論》云：「吾幼爲鄭學之時，爲謬言，尋其義，乃知古人皆以秋冬。自馬氏以來，乃因《周官》而有二月。《詩》《東門之楊》，其葉詳詳，毛傳曰：「男女失時，不逮秋冬。」三星，參也，十月而見東方，時可以嫁娶。又三時務業，因向休息而合昏姻，萬物閉藏於冬，而用生育之時，娶妻入室，長養之母，亦不失也。孫卿曰：「霜降逆女，冰泮殺止。」董仲舒曰：「聖人以男女陰陽，其道同類天道，向秋冬而陰氣來，向春夏而陰氣去。故古人霜降而逆女，冰泮而殺止。與陰俱近，與陽遠也。」《詩》曰：「將子無怒，秋以爲期。」《韓詩傳》亦曰：「古者霜降逆女，冰泮殺止，士如歸妻，迨冰未泮。」爲此驗也。而玄云「歸，使之來歸於己，謂請期時。」來歸之言，非請期之名也。或曰親迎用昏，而曰「旭日始旦」何用哉？《詩》以鳴雁之時納采，

以昏時而親迎，而《周官》中春令會男女之無夫家者，於是時奔者不禁，則昏姻之期盡此月矣，故急期會也。《孔子家語》曰：「霜降而婦功成，嫁娶者行焉；冰泮而農業起，昏禮殺於此。」又曰：「冬合男女，春班爵位也。」《通典·嘉禮》引馬昭非肅曰：「《周禮》仲春令會男女。《殷頌》：『天命玄鳥，降而生商。』《月令》：『仲春玄鳥至之日，祀於高禩。』玄鳥孚乳之月，以爲嫁娶之候。」孔晁答曰：「《周官》云『凡娶判妻人子者皆書之』，此謂霜降之候，冰泮之時，正以禮昏者也。次言『仲春令會男女，奔者不禁』，此昏期盡，不待備禮。玄鳥至，祀高禩，求男之象，非嫁娶之候。」昭又難曰：「《詩》云『有女懷春，吉士誘之』，『春日遲遲，女心傷悲』，『嘒彼小星，三五在東』，『綢繆束楚，三星在隅』，『我行其野，蔽芾其樗』，『倉庚于飛，嘒燿其羽』。凡此皆興於仲春，嫁娶之候。」晁曰：「有女懷春，謂女無禮，過時故思。春日遲遲，蠶桑始起，女心悲矣。嘒彼小星，喻妾侍從夫人。三星在隅，孟冬之月，參見東方，舉正昏以刺時。蔽芾其樗，喻行遇惡夫。嘒燿其羽，喻嫁娶盛飾。皆非仲春嫁娶之候。玄據期盡之教，以爲正婚，則奔者不禁，過於月。」昭又曰：「肅引經『秋以爲期』，此乃淫奔之詩矣。」賈疏又引張融評云：「《夏小正》曰：『二月，綏多士女，交

昏於仲春。』《易·泰卦》：『六五，帝乙歸妹，以祉元吉。』鄭說，六五爻辰在卯，春爲陽中，萬物以生，生育者嫁娶之貴，仲春之月，嫁娶男女之禮，福祿大吉。《易》之《咸卦》，柔上剛下，二氣感應以相與。皆說男下女。《召南·草蟲》之詩，夫人待禮，隨從在塗，采蠶者以詩自興。又云：「士如歸妻，迨冰未泮。」舊說云：士如歸妻，我尚及冰未泮定納。其篇義云：嫁娶以春，陽氣始生萬物，嫁娶亦爲生類，故《管子·時令篇》云「春以合男女」。融謹案：《春秋》魯逆夫人，嫁女，四時通用，無譏文。然則孔子制素王之法，以遺後世，男女以及時盛年爲得，不限以日月。《家語》限以冬，不附於《春秋》之正經，如是則非孔子之言。嫁娶也以仲春，著在《詩》、《易》、《夏小正》之文，無仲春爲期盡之言；又《春秋》三時嫁娶，何自違《家語》冬合男女窮天數之語也。《詩》、《易》、《禮》傳所載，《咸》、《泰》、《歸妹》之卦，《國風·行露》、《綢繆》「有女懷春」，「倉庚于飛，嘒燿其羽」，「春日遲遲」，「樂與公子同歸」之歌，《小雅》「我行其野，蔽芾其樗」之歎，此春娶之證也。禮，諸侯越國娶女，仲春及冰未散請期，乃足容往反也。秋如期往，淫奔之女，不能待年，故設秋迎之期。《標有梅》之詩，殷紂暴亂，要失其盛時之年，習亂思治，故嘉文王能使男女得及其時。陳晉棄周

禮，爲國亂悲傷，故刺昏姻不及仲春。玄說云「嫁娶以仲春」，既有羣證，故孔晁曰：「有女懷春，毛傳云：『春，不暇待秋。』春日遲遲，女心傷悲，謂蠶事始起，感事而出。蔽芾其樗，喻遇惡夫。熠燿其羽，喻嫁娶之盛飾。三星在隅，孟冬之月，參見東方，舉正昏以刺時。」此雖用毛義，未若鄭云「用仲春爲正禮」爲密也。是以《詩》云「匏有苦葉，濟有深涉」。箋云：「匏葉苦而渡處深，謂八月時，時陰陽交會，始可以爲昏禮，納采問名。」又云「士如歸妻，迨冰未泮」。箋云：「歸妻，使之來歸於己，謂請期。冰未散，正月中以前，二月可以爲昏。」然則以二月爲得其實，惟爲有故者，得不用仲春。」案：以上王鄭異同及馬孔等論難，並《聖證論》佚文。賈疏所載，貿亂失次，復多捩誤。今依《玉燭寶典》、《通典》及臧琳所校補正。昏期之說，荀子以爲始於霜降，終於季冬，毛公、韓太傅依以詁《詩》，董子《春秋繁露·循天之道篇》、《易林·復之履》、《家人之損》說並同，此王肅秋冬嫁娶之說所本。《家語·本命篇》注又云：「二月農事始起，會男女之無夫家者，奔者不禁，期盡此月故也。」此又孔晁說所本。《通典·嘉禮》引束皙云：「《春秋》二百四十年，魯女出嫁，夫人來歸，大夫逆女，天王娶后，自正月至十二月，悉不以得時失時爲褒貶，何限於仲春季秋以相非

哉！夫《春秋》舉秋毫之善，貶纖芥之惡，故春狩於郎，書時，禮也；夏城中丘，書不時也。此人間小事猶書得時失時，況婚姻人倫端始，禮之大者，不識得時失時不善者邪？若婚姻季秋，期盡仲春，則隱二年冬十月，夏之八月，未及季秋，伯姬歸於紀；周之季春，夏之正月也，桓九年春，季姜歸於京師；莊二十五年六月，夏之四月也，已過仲春，伯姬歸於紀。或出盛時之前，或在期盡之後，而經無貶文，三《傳》不譏，何哉？凡詩人之興，取義繁廣，或取譬類，或稱所見，不必皆可以定時候也。又案：《桃夭篇》敘美婚姻以時，蓋謂盛壯之時，而非日月之時，故「灼灼其華」，喻以盛壯，非爲嫁娶當用桃夭之月。其次章云「其葉蓁蓁，有蕢其實，之子于歸」，此豈在仲春之月乎？又《標有梅》三章，注曰「夏之向晚」；迨冰未泮，正月以前；草蟲嚶嚶，未秋之時。或言嫁娶，或美男女及時，然咏各異矣。《周禮》以仲春會男女之無夫家者，蓋一切相配合之時，而非常人之節。《曲禮》曰：「男女非有行媒，不相知名，故日月以告君，齊戒以告鬼神。」若常人必在仲春，則其日月有常，不得前却，何復日月以告君乎？夫冠婚笄嫁，男女之節，冠以二十爲限，而無春秋之期，笄以嫁而設，不以日月爲斷，何獨嫁娶當繫於時月乎？王肅云「婚姻始於季秋，止於仲春」，不言

春不可以嫁也。而馬昭多引《春秋》以爲之證，反詩相難，錯矣！兩家俱失，義皆不通。通年聽婚，蓋古正禮也。」杜佑又申其義云：「案《士昏禮》請期之辭云，『唯是三族之不虞』。卜得吉日，則可配合。婚姻之義，在於賢淑，四時通用，協於《詩》《禮》，安可以秋冬之節，方爲好合之期？先賢以時月爲限，恐非至當。束氏之說，暢於禮矣。」惠士奇云：「《管子·幼官》：春三𡗗，十二始𡗗，十二中𡗗，十二小𡗗，而始𡗗合男女。秋三𡗗，十二始𡗗，十二中𡗗，十二小𡗗，而始𡗗合男女。《輕重己》：冬夏兩至後九十二日，謂之春秋兩至。春至十日之內，室無處女。蓋始𡗗合男女者，白露下，收聚之初。始𡗗之辰，《荀子》所謂『霜降逆女』是也。始𡗗合男女者，清明後，出耕之日，始𡗗之辰，《媒氏》所謂『中春之月令會男女』是也。春至即春分，十日之內，三𡗗之中，中春之月，會男女之時。於是時也，奔者不禁，故曰室無處女，謂女盡行。過此則非婚姻之時，荀卿所謂冰泮殺止，《家語》所謂冰泮而農事起。昏禮殺於此，衆說皆同，康成獨異，而《管子》尤合《周官》。」又云：「《夏小正》『二月綏多士女』，《太玄》『內婦始秋分』，自秋至春，皆嫁娶之時矣。《左傳》襄二十二年十一月，鄭游販將如晉，未出竟，遭逆妻者，奪之。則春秋民間嫁娶，亦在秋冬也。」

案：惠說與束、杜略同。《詩》、《禮》諸經及《管》、《荀》諸子所說昏時，錯互難合。竊謂《士昏禮》不著時月，則本無定時可知。荀卿所說始於季秋，殺於中春者，蓋謂齊民之家，及時趨暇，大略如是，非必著爲令也。《夏小正》「二月綏多士女」及此經中春會男女，亦因時已近夏，民間昏事漸殺，故令其及時成禮，孔晁謂是期盡之法，說自可通。其士以上，無農事之限，則昏娶卜吉，通於四時，既非限於中春，亦不必在秋冬。《夏小正》冠子在二月，而《士冠禮》有「夏葛屨、冬皮屨」之文，不限常月，亦其比例。鄭、王紛紛詰難，皆不及束、杜之闕通矣。於是時也，奔者不禁。重天時，權許之也。【疏】「於是時也奔者不禁」者，於經例當作「于」，《石經》及各本並誤。亦謂男女已議昏而未及備禮者也。《國語·周語》云：「共王游於涇上，密康公從，有三女奔之。」韋注云：「奔，不由媒氏也。」《穀梁》文十二年，范注引譙周云：「奔者，不待禮聘，因媒請嫁而已矣。」《玉燭寶典》引董勛《問禮俗》云：「《周禮》仲春奔者不禁，謂不備禮而行，非謂淫佚奔者，如姪娣不娉之例。」案：譙說是也。此奔亦由媒氏，但禮不備耳。韋昭所云「則淫佚踰禮，不由媒氏」，與此異也。胡培翬云：「《內則》云：『聘則爲妻，奔則爲妾。』聘謂以禮娶也，奔則不備禮之謂。此經奔

字當如是解。昏禮有納采、問名、納吉、納徵、請期、親迎六者。康成注《禮》《箋》《詩》，俱以仲春爲昏月之正，故謂當此時而有六禮不備者，許之，恐其過時，則傷司徒荒政十四多昏。先鄭謂不備禮而娶，亦此意也。賈疏違失注意。」案：胡說本葉時、戴震，亦足申譙、董兩家義。《坊記》注云：「仲春之月，會男女之時，不必待幣。」蓋不備禮者，謂六禮之中，或一二禮未備，或不俟親迎而從權昏嫁耳，非謂六禮全闕也。《毛詩·召南·摽有梅》傳云：「三十之男，二十之女，禮未備則不待禮會而行之者，所以蕃育民人也。」鄭箋云：「女年二十而無嫁端，則有勤望之憂，不待禮會而行之者，謂明年仲春不待以禮會之也。時禮雖不備，相奔不禁。」毛以男年三十、女年二十，即可不備禮而行；鄭以過三十、二十，明年而後可不備禮而行。二義微不同。要兩君皆隱據此經義，其以奔爲不待禮則一也。注云「重天時，權許之也」者，賈疏云：「於是時，謂是仲春時。此月既是娶女之月，若有父母不娶不嫁之者，自相奔就，亦不禁之。」鄭云「權許之」，其實非正禮也。戴震云：「中春之令，專爲不備六禮之民，糾察其殺禮之由。凡昏娶備六禮者，常也，常則不限其時月；其殺禮不聘者，權也，權則限以時月。」案：戴說與鄭小異，於義亦通。若無故而不用

令者，罰之。無故，謂無喪禍之變也。有喪禍者娶，得用非中春之月。《雜記》曰：「己雖小功，既卒哭，可以冠子娶妻。」《疏》：「若無故而不用令罰之」者，此媒氏之官刑也。賈疏云：「言令者，即上「中春之月令會男女」。男女有喪禍之故，得不用中春令。無故不用令，則罪罰之也。」戴震云：「凡三十之男，二十之女，非有故而後期者，爲不用令；非仲春不禁之時而不行六禮者，爲不用令。」汪中云：「令者，媒氏令男子三十而娶，女子二十而嫁之令也。若其有故，雖不用令可也。《內則》所謂「有故二十三而嫁」是也。」案：戴、汪說足補鄭義。蓋經言不用令，即冢上三十而娶二十而嫁及中春會男女兩「令」字爲文，鄭、賈偏舉一耑，義尚未備也。注云「無故謂無喪禍之變也」者，《宮正》「國有故則令宿」，注云：「故，凡非常也。」故知故謂喪禍非常之變，《內則》注云「故謂父母之喪」是也。云「有喪禍者，娶得用非中春之月」者，有喪禍過期不得娶，喪禍終則宜亟娶，故鄭謂得用非中春之月也。鄭釋不用令，偏據中春而言，亦經義所咳。但不用令，當謂不備禮而奔者，唯中春權許之耳，餘月則有禁罰；若備禮嫁娶，通於四時，雖非中春之月，不得爲不用令也。鄭說未析。引《雜記》曰「己雖小功，既卒哭，可以冠子娶妻」者，賈疏云：「證喪禍

之故，於月數滿，雖非中春，可以嫁娶也。云「已雖小功者，彼上文有父小功之末可以冠娶，故云已雖小功也。」論讓案：彼文云：「大功之末，可以冠子，可以嫁子。父小功之末，可以嫁子，可以娶婦。已雖小功，既卒哭，可以冠娶妻。」則冠娶妻，據身自冠娶而言，此引作「冠子娶妻」，則文義並乖，疑傳寫誤衍。司男女之無夫家者而會之。司猶察也。無夫家，謂男女之鰥寡者。【疏】「司男

女之無夫家者而會之」者，此亦家上中春之月爲文也。《詩·召南·行露》、《鄭風·野有蔓草》箋並引此經：「中春之月，會男女之無夫家者。」《家語·本命篇》王注及《北史·李業興傳》並以此爲夏正二月事。皆其證也。陳旻云：「《管子·人國篇》云：『凡國都皆有掌媒，丈夫無妻曰鰥，婦人無夫曰寡，取鰥寡而合和之，予田宅而家室之，三年然後事之，此之謂合獨。』《管子》合獨，亦即行《周禮》會男女法。古者未三十男亦行娶，未二十女亦行嫁，三十二十爲年盡。若踰時無夫家，則爲鰥寡矣。嫁娶以中春之月爲期盡，以年盡之男女，於期盡之月行之，此雖禮不備，而亦會而行之者也。若遇凶荒，亦得行此。《衛風·有狐》序云：『古者凶荒則殺禮而多昏，會男女之無夫家者，所以蕃育人民也。』案：陳說是也。此會即謂會而行之，與上會

男女義同。

注云「司猶察也」者，《師氏》注同。云「無

夫家謂男女之鰥寡者」者，賈疏云：「上文已云令會男女，謂無夫家者也。今又言司察男女無夫家，是嘗已有匹配，故鄭云無夫家謂男女之鰥寡者也。」莊存與云：「無居室從人之端，古亦謂之鰥寡。」呂飛鵬云：「《詩·行露》箋引此經『令會男女』，并及『無夫家者』。若然，則無夫家者即指三十之男、二十之女而言，不必定爲鰥寡也。」案：莊、呂說是也。鄭以鰥寡釋無夫家者，蓋指凡男女過時未有室家及貧不能嫁娶者而言。《書·堯典》孔疏引《尚書大傳》：「孔子對子張曰：舜父頑母嚚，無室家之端，故謂之鰥。」是不必嘗有匹配而後謂之鰥寡，與《王制》「老而無妻者謂之矜，老而無夫者謂之寡」義異。賈及《詩·召南·行露》孔疏並謂此據已昏之鰥寡言之。再娶再嫁雖法所不禁，亦何必官司察而會之哉！凡嫁子娶妻，人幣純帛，無

過五兩。純，實緇字也。古緇以才爲聲。納幣用緇，婦

人陰也。凡於娶禮，必用其類。五兩，十端也。必言兩者，欲得其配合之名。十者，象五行十日相成也。士大夫乃以玄纁束帛，天子加以穀圭，諸侯加以大璋。《雜記》曰：「納幣一束，束五兩，兩五尋。」然則每端二丈。【疏】「人幣純

帛，無過五兩者。著昏禮之通法，以防侈也。入幣即內幣，入內字通。《士昏禮》謂之納徵，鄭彼注云：「徵，成也。使使者納幣以成昏禮。」《春秋》莊二十二年「冬，公如齊納幣」。《公羊》何注云：「納幣即納徵，《禮》曰「主人受幣，士受儷皮」是也。《禮》言納徵，《春秋》言納幣者，《春秋》質也。」案：此經入幣，亦質言之。《左傳》文二年，杜注云：「士昏六禮，納徵始有玄纁束帛，諸侯則謂之納幣。」此謂尊卑異稱，貳說不足據。注云「純實緇字也，古緇以才爲聲」者，《玉藻》云：「大夫佩水蒼玉而純組紃。」鄭彼注云：「純當爲緇，古文緇字或作系旁才。」又《祭統》云：「王后蠶於北郊，以共純服。」注云：「純以見緇色。」並以純爲緇，說與此同。《毛詩·召南·行露》傳云：「昏禮純帛不過五兩。」彼《釋文》及孔疏引定本並作「紃」字，疑後人依此注改之，毛鄭讀不必同也。賈疏云：「緇以系爲形，才爲聲，故誤爲純字。但古之緇有二種：其緇布之緇，系旁留，後不誤，故禮有緇布冠、緇布衣，存古字；若以絲帛之緇，則系旁才，此字諸處不同。絲理明者即破爲色，此「純帛」及《祭統》「蠶事以爲純服」，又《論語》云「麻冕，禮也，今也純儉」，如此之類，皆絲理自明，即爲色解之。《昏禮》云：「女次純衣。」鄭云：「純衣，絲衣。」以《昏禮》直云純衣，絲理不明，

故爲絲衣解之也。」段玉裁云：「云實緇字者，俗謂爲純絲字，實則緇字也。緇字作純者，蓋古文緇以才爲聲，作紃，篆作𦵏，純篆作𦵏，隸作純，形略相似，是以誤爲純字也。《說文》無紃字，蓋失之。」詒讓案：鄭意蓋謂紃即緇之古文或體，實一字也。以純字與緇形遠，與紃形近，故不破爲緇而破爲紃。《說文》緇字重文無紃字，許鄭義不同也。賈謂緇布字作緇，緇帛字作紃，《士冠禮》疏及《詩·小雅·都人士》孔疏說並同，恐非鄭意也。然鄭破爲紃，義實未塢。惠士奇讀純如字，云「純猶全也」，其說最允。莊有可、黃以周說並略同。蓋此純帛爲長二丈之全帛，對《聘禮》、《既夕禮》之制幣，爲長丈八尺減少之幣，即《內宰》所謂純制也。又《史記·蘇秦傳》「錦繡千純」，裴氏《集解》云：「純，匹端名。」亦引此經爲釋。據裴說，則晉、宋禮家說，有讀此純如字而釋爲端束者。《戰國策·秦策》高注云「純，束也」。即其義。但一匹兩端，十端一束，純制通有此稱，段令純即是一束，經不宜復云無過五兩。此雖六朝古說，義不可通也。互詳《內宰》疏。云「納幣用緇，婦人陰也，凡於娶禮，必用其類」者，《說文·糸部》云：「緇，帛黑色也。」《釋名·釋采帛》云：「緇，滓也，泥之黑者曰滓，此色然也。」緇色黑，屬陰，以婦人陰，故幣色用其類也。云「五兩，十端也」者，賈

疏云：「古者二端相向卷之，共爲一兩，五兩故十端也。」詒讓案：兩與匹同。《說文·匸部》云：「匹，四丈也。」《左》閔元年傳云：「重錦三十兩。」杜注云：「以二丈雙行，故曰兩。三十兩，三十四也。」又昭二十六年傳云：「申豐以幣錦二兩，縛一如瑱。」注云：「二丈爲一端，二端爲一兩，所謂匹也。」《小爾雅·廣度》云：「倍丈謂之端，倍端謂之兩，倍兩謂之匹，匹二有半謂之束。」案：《小爾雅》當云「兩謂之匹」，今本衍「倍」字，則匹爲二兩，與古義不合。其說端兩束之數則不誤。五兩總束之，故《士昏禮》謂之束帛。彼注云：「束帛，十端也。」端，《雜記》注謂之「个」，兩，《既夕》注謂之「合」，義並同。云「必言兩者欲得其配合之名」者，《大宰》注云：「兩，耦也。」以取其配耦判合之名，故不云十端而云五兩，亦用其類之意。云「十者象五行，十日相成也」者，賈疏云：「《左傳》云：『天有六氣』，降生五行，行各有二日。東方木爲甲乙，南方火爲丙丁，中央土爲戊己，西方金爲庚辛，北方水爲壬癸，是十日。言相成者，木八爲金九妻，火七爲水六妻，土十爲木八妻，金九爲火七妻，水六爲土五妻，所尅者爲妻，是夫妻相成之數。」云「士大夫乃以玄纁束帛」者，據《士昏禮》「納徵，玄纁束帛，儷皮」。鄭彼注云：「用玄纁者，象陰陽備也。」《公羊》莊二十二年何注

云：「玄纁，取其順天地也。」又隱元年注云：「束帛謂玄三纁二，玄三法天，纁二法地。」《白虎通義·嫁娶篇》說同。陳奐云：「《士昏禮》言玄纁束帛，《媒氏》入幣純帛，不及玄纁者，五兩即玄纁也。」黃以周云：「庶人用緇，於文無見，從《白虎通義》。」案：陳、黃說是也。納幣用玄纁，蓋通於尊卑，故班、何說納徵並無異幣。天子諸侯雖加以圭璋，而用玄纁則與大夫士同。鄭既破純爲紃，以其與《士昏禮》用玄纁不合，故以此紃帛爲庶人禮，純用緇而無纁，而以玄纁兼用者爲士以上禮。今定純如字讀，純帛五兩，即玄纁束，士庶人禮同。雷學淇云：「每束之率，類皆三玄二纁，雖凶禮之襲贈尚然，豈有昏之嘉禮純用緇帛者！」其說足以鍼鄭之失矣。云「天子加以穀圭，諸侯加以大璋」者，賈疏云：「《玉人》文。謂加於玄纁束帛之上以行禮。」云《雜記》曰，納幣一束，束五兩，兩五尋，然則每端二丈者，鄭彼注云：「十个爲束，貴成數。兩，兩者合其卷，是爲五兩。八尺曰尋。一兩五尋，則每卷二丈也。合之則四十尺。今謂之匹，猶匹偶之云與？」賈疏云：「證五兩兩五尋四十尺之意。尋八尺，則一兩四十尺。五兩，四五十，總二百尺，故鄭云『然則每端二丈』。若餘行禮，則用制幣丈八尺，取儉易共。此昏禮每端二丈，取誠實之義，故以二丈整數

爲之也。」詒讓案：依鄭義，則端二丈，匹四丈，此爲布帛之常法，吉凶禮同。《說苑·修文篇》說贈以束帛：天子五匹，玄三纁二，各五十尺；諸侯亦如之，各三十尺；大夫玄一纁二，各三十尺；士玄一纁一，各二丈；降及下士庶人，綵縵布帛各一匹而已。依劉說，則天子每端二丈五尺，每匹五丈；諸侯大夫端丈五尺，匹三丈；士端一丈，匹二丈，端束並以尊卑遞降。則與《禮經》布帛常度不合，恐不足據。

禁遷葬者與嫁殤者。遷葬，謂生時非夫婦，死既葬，遷之使相從也。殤，十九以下未嫁而死者。生不以禮相接，死而合之，是亦亂人倫者也。鄭司農云：「嫁殤者，謂嫁死人也。今時娶會是也。」**【疏】**禁遷葬者與嫁殤者，此并正男女合葬之禮也。注云「遷葬謂生時非夫婦，死既葬，遷之使相從也」者，賈疏云：「遷葬謂成人鰥寡，生時非夫婦，死乃嫁之。」案：鄭、賈意，此遷葬與嫁殤皆是會合死人之事，而嫁殤特著殤文，明遷葬爲非殤，故謂據成人鰥寡而言。方苞謂遷葬或出母改適無子，而前子欲遷以祔父。劉毓崧云：「成人鰥寡，生非夫婦，死而合葬者，其類有二。一則生前爲名分所限，不得稱爲夫婦，而死後以合葬逞其私者。如《國策》、《漢書》所載，秦之宣太后欲魏醜夫殉葬，漢之館陶主與董偃會葬是也。一則生前恩

義已絕，不得復爲夫婦，而死後以合葬遂其情者。如《通典·凶禮》所載，或父在繼母亡，前家子取喪柩去，與前夫合葬；或父卒繼母還前親子家，亡後與前夫合葬；或父卒繼母還前繼子家，亡後與前夫合葬，是也。」今案：方、劉說最詳析。蓋此等成人鰥寡，或生時本非夫婦，或嘗爲夫婦而中絕，是皆不得謂之嫁，直遷柩相從而已，故經謂之遷葬也。知非禮經改葬者，陳立云：「禮有『改葬總』之文，則改葬本非所禁。況改葬之禮，當家人、墓大夫職之，無緣屬之媒氏。」其說是也。云「殤，十九以下未嫁而死者」者，《喪服傳》云：「年十九至十六爲長殤，十五至十二爲中殤，十二至八歲爲下殤，不滿八歲以下皆爲無服之殤。」鄭注云：「殤者，男女未冠笄而死可傷者。女子子許嫁不爲殤也。」賈疏云：「嫁殤者，生年十九以下而死，死乃嫁之。不言殤娶者，舉女殤，男可知也。」黃式三云：「嫁殤者，謂生前有婚議，女未嫁而死，死而歸葬於男家，必禁之也。」云「生不以禮相接，死而合之，是亦亂人倫者也」者，人倫之正，必生時備六禮而相接，死乃合葬。今生既未以禮相接，死乃合之，則是亂人倫，故禁之也。黃式三云：「曾子問曰：『女未廟見而死，則如之何？』孔子曰：『不遷于祖，不祔于皇姑，壻不杖不菲不次，歸葬于女氏之黨。示未成婦也。』夫

女既娶近三月，夫妻已成矣，未廟見舅姑，雖成妻，未成婦，主既不祔于皇姑，墓亦不葬于夫家。彼遷葬嫁殤者，墓已合葬之，將主亦祔之乎？主不祔而合葬之，合葬而主亦祔之，禮之無一可者也。」鄭司農云「嫁殤者，謂嫁死人也」者，此謂生時本無昏議，男女兩殤，因嫁而合葬之。此亦事之所有，故引之於後。云「今時娶會是也」者，先鄭舉漢法爲況。洪适《隸釋·漢相府小史夏堪碑》云：「娉會謝氏并靈合柩。」娶會即所謂娉會也。以彼碑文推之，則謝氏亦已死而移柩以嫁者，與先鄭義正同。

凡男女之陰訟，

聽之于勝國之社；其附于刑者，歸之于士。

陰訟，爭中冓之事以觸法者。勝國，亡國也。亡國之社，奄其上而棧其下，使無所通。就之以聽陰訟之情，明不當宣露。其罪不在赦宥者，直歸土而刑之，不復以聽。士，司寇之屬。《詩》曰：「牆有茨，不可埽也。中冓之言，不可道也。所可道也，言之醜也。」【疏】注云「陰訟，爭中冓之事以觸法者」者，以男女淫泆陰事之訟，故謂之陰訟，與《大司徒》陰禮義略同。中冓，詳後。《春秋釋例·內外君臣逆女例》云：「諸侯娶嫡夫人及左右媵，各有姪娣，參骨肉至親，所以息陰訟。」杜意蓋以此陰訟爲妒媚之訟，與鄭義異而亦

得通。云「勝國，亡國也」者，《喪祝》云：「勝國邑之社稷。」注云：「勝國，所誅討者。社稷者，若亳社是矣。」《左》文十五年傳云：「凡勝國，曰滅之。」《書敘》云：「湯既勝夏，欲遷其社。」賈疏云：「此社有四名。若此往勝得彼國，將社來，謂之勝國，即此文是也。若據彼國喪亡，則謂之亡國之社，引《公羊傳》者是也。又名喪國之社，《郊特牲》云「喪國之社必屋之」是也。據其地則曰亳社，則《左傳》云「亳社裁」是也。」云「亡國之社，奄其上而棧其下，使無所通」者，《公羊》哀四年傳云：「亡國之社蓋揜之。揜其上而柴其下。」揜，奄字通，柴棧義同。《喪祝》注亦云「蓋揜其上而棧其下。」《白虎通義·社稷篇》引《公羊傳》亦作奄。何休注云：「揜柴之者，絕，不得使通天地四方，以爲有國者戒。」《漢書·王莽傳》，劉嘉奏云：「四牆其社，覆上棧下，示不得通。」賈疏云：「奄其上者，即《郊特牲》「屋之，不受天陽」者是也。棧其下者，謂於下著柴以棧之，使不通陰故也。」焦循云：「《論衡》亦云：「亡國之社，屋其上，棧其下，絕於天地。」此即《公羊》說，而易柴爲棧。《說文》云：「棧，棚也。」《一切經音義》引《通俗文》云：「板閣曰棧。」《管子·內業篇》云：「傳馬棧最難：先傳曲木，曲木又求曲木，曲木已傳，直木無所施矣。先傳直木，直木又求直木，直木已

傳，曲木亦無所施矣。」考諸說，蓋編木爲壁，蔽其四面，如今之柵欄也。」案：亡國之社在廟門外，詳《喪祝》疏。云

「就之以聽陰訟之情，明不當宣露」者，賈疏云：「以其勝國社上下不通，是不宣露；中葺之言亦不宣露，故就而聽之也。若然，案《詩》召伯聽男女之訟於小棠之下，不在勝國社者，彼謂周公未制禮前，此據制禮之後，故不同。」案：召伯非媒氏，則聽男女之訟，不必於戒社。賈謂制禮以前法，固矣。云「其罪不在赦宥者，直歸士而刑之，不復以聽」者，《釋文》「聽」上無「以」字，義亦通。鄭意媒氏直主聽訟，不主刑。凡訟既聽之後，辨其罪之大小，其小罪可赦宥者，則媒氏專決而釋之；其大罪不可赦宥，當入五刑者，則媒氏不再聽，直歸之秋官也。《大司徒》云：「凡萬民之不服教而有獄訟者，與有地治者聽而斷之，其附于刑者歸于士。」此經義與彼同。蓋大罪人五刑歸於士者，亦媒氏先聽之，非謂直歸不聽也。云「士，司寇之屬」者，《大司徒》注義同。亦關士師、鄉士、遂士、縣士、方士等官言之也。引《詩》者，《鄘風·牆有茨篇》刺公子頑之詩。毛傳云：「中葺，內葺也。」鄭彼箋云：「內葺之言，謂宮中所葺成頑與夫人淫昏之語。」彼《釋文》引《韓詩》云：「中葺，中夜，謂淫僻之言也。」《漢書·文三王傳》晉灼注引《魯詩》義同。鄭注《禮》

時，未見《毛詩》，當用《魯》、《韓》義也。引之者，證經陰訟是爭中葺之事，以其言醜，故不可宣露也。

周禮正義卷二十七

司市掌市之治、教、政、刑、量度、禁令。

量，豆、區、斗、斛之屬。度，丈尺也。【疏】「掌市之治、教、政、刑、量度、禁令」者，賈疏云：「治，下文云『聽大治小治』是也。教，即此文『以次敍分地』之等，謂教之處置貨物是也。政者，即下文云『以政令禁物靡』等是也。刑者，即下文云『以刑罰禁競』是也。量度，即下文云『以量度成賈』是也。禁令者，即下文云『以賈民禁僞』是也。」案：教者，當教以通財阜貨及會計贏絀、鑒別良楮之事，賈謂教處置貨物，義殊未咳。注云「量，豆區斗斛之屬」者，《漢書·律曆志》云：「量者，龠、合、升、斗、斛也，所以量多少也。本起於黃鐘之龠，用度數審其容，以子穀秬黍中者千有二百實其龠，以井水準其粟。合龠爲合，十合爲升，十升爲斗，十斗爲斛，而五量嘉矣。」此舉斗斛，以咳五量。豆區亦量名。斗斛以十積數，豆區以四積數，二者不同，故鄭兼舉之。互詳《內宰》疏。云「度丈尺也」者，《內宰》注同。

以次敍分地而經市，次謂吏所治舍，思次、介次也。若今市亭然。敍，肆行列也。經，界也。【疏】「以次敍分地而經市」者，以下並市官之官法也。經市者，建國立市，必先治市地而定其界域也。賈疏云：「司市之官以次敍二事，分地而置之，而以經界其市，使各有處所，不相雜亂也。」林喬蔭云：「即《內宰》所謂『設其次，置其敍』，及本職所謂『大市日昃而市，百族爲主；朝市朝時而市，商賈爲主；夕市夕時而市，販夫販婦爲主。』使各以其地，各以其時，而攬越素雜之弊不行矣。」注云「次謂吏所治舍，思次、介次也」者，並據下文爲釋。凡官吏治事處，通謂之次。

《宮正》「以時比宮中之官府次舍」，注云：「次，諸吏直宿舍者所居寺。」此下經司市洫思次，胥師、賈師洫介次，皆市吏治事處，故亦謂之次。但宮正次舍分爲二，宮伯、士庶子所止八次、八舍亦同。此注以舍釋次者，散文得通也。思次爲市官總治之所，介次爲分治之所，因之所部之市肆，亦通謂之次。《敍官》胥師、賈師皆二十肆則一人，是二十肆有一介次，即爲一次。故《大戴禮記·曾子疾病篇》云：「與小人遊，賦乎如入鮑魚之次。」此分地經市，亦通官吏所洫及市民所居言之也。云「若今市亭然」者，丁晏云：《史記·三代世表》「臣爲郎時，與方士考功會旗亭下」。注：「旗

亭，市樓也。立於上，故取名焉。《文選·西京賦》：「廓開九市，通闌帶闌，旗亭五重，俯察百隧。」薛綜注：「旗亭，市樓也。」後文「思次」注：「若今市亭也。」「介次」注：「市亭之屬別，小者也。」先鄭注：「次，市中候樓也。」詒讓案：《續漢書·百官志》，雒陽有市長，蓋即於市亭爲官寺，與周制略同，故鄭舉以爲況。云「敍，肆行列也」者，王昭禹云：「所謂各於其地之敍是也。」案：王說是也。《說文·支部》云：「敍，次第也。」肆行列前後有次第，謂之敍。蓋即各肆行首，當市朝之處。每肆市舍多少無定數，其行首爲巷門，門外即市朝也。自朝望之，各肆次第分列。十肆則有司，五肆則有司稽，二肆則有胥，一肆則有長，皆於門爲治，所謂敍也。下文云：「凡萬民之期于市者，辟布者，量度者，刑戮者，各于其地之敍。凡得貨賄六畜者亦如之。」刑戮宜於市朝。《朝士》云：「凡得獲貨賄、人民、六畜者，委于朝，告于士。」是遺物亦宜置於朝。是即敍近市朝之證也。敍既近市朝，又胥長所治，故辟布諸事，咸就是治之矣。《內宰》「置其敍」，注釋敍爲介次，是以敍爲總次，大於二十肆，與彼經文及此注義並乖異，非也。肆行列，謂數肆之地合成行列；下文「陳肆」，爲分陳貨物，令各異肆。其事不同。互詳《內宰》疏。云「經，界也」者，《孟子·滕文公

篇「經界不正」，趙注云：「經亦界也。」《說文·田部》云：「畛，境也。」三市，市別一夫，於中分地爲次，分次成敍，分敍成肆，各有界域，所謂經也。與經野義畧同。以陳肆辨物而平市，陳猶列也。辨物，物異肆也。肆異則市平。【疏】以陳肆辨物而平市者，崔氏《古今注》云：「肆所以陳貨鬻之物也。肆，陳也。」案：陳肆辨物，謂列肆以物相從，不相雜廁，所以察良楮也。注云「陳猶列也」者，《肆師》、《掌客》注義並同。《說文·自部》云：「陳，列也。」陳即陳借字。云「辨物，物異肆也」者，謂肆各從其物，陳列爲一處。《鄉師》注云：「辨，別異也。」蓋別異衆物，使以類相從，若後注云貨之肆、馬之肆及《肆長》所云「令陳其貨賄，名相近者相遠也，實相近者相爾也」，皆陳肆辨物之事也。每物爲肆，肆長治之。云「肆異則市平」者，物各異肆，則種別相校，易以定其功沽，而價不至騰躍，故市得其平。以政令禁物靡而均市，物靡者易售而無用，禁之則市均。鄭司農云：「靡謂侈靡也。」【疏】以政令禁物靡而均市者，林喬蔭云：「即本職所謂「害者使亡，靡者使微」，則奇袤無益者不作，而虛耗之弊絕矣。」注云「物靡者易售而無用，禁之則市均」者，賈疏云：「司市出政令

而禁其物貨細靡者，但物貨細靡，人買之者多，貴而無用，令使羸物買之者少而賤，使市買不平，令禁之則市物均平，故云均市也。」鄭司農云：「靡謂侈靡也」者，《小爾雅·廣言》云：「靡，細也。」《賈子新書·道術篇》云：「費弗過適謂之節，反節爲靡。」《說文·人部》云：「侈，奢也。」凡物之細靡者必奢，故云侈靡。《王制》注云：「質則用物貴，淫則侈物貴」，是也。以商賈阜貨而行布，通物曰商，居賣物曰賈。阜猶盛也。鄭司農云：「布謂泉也。」【疏】「以商賈阜貨而行布」者，招致商賈，使貨內聚而布外流，所以通市政也。林喬蔭云：「即本職所謂『亡者使有，利者使阜』，則有無懋遷以相通，而居奇之弊絕矣。」賈疏云：「由此二等之人，或通貨，或在市賣之，故貨賄阜盛而布泉得行。」注云「通物曰商，居賣物曰賈」者，《大宰》注云：「行曰商，處曰賈。」義與此同。《考工記》云：「通四方之珍異以資之，謂之商旅。」《漢書·食貨志》云：「通財鬻貨曰商。」互詳《大宰疏》。云「阜猶盛也」者，《大宰》注義同。鄭司農云「布謂泉也」者，《外府》注義同。以量度成賈而徵價，徵，召也。價，買也。物有定賈則買者來也。【疏】「以量度成賈而徵價」者，即下文之「展成莫賈」，賈師所掌

是也。成賈，謂定其賈直。《左》昭十六年傳云：「韓宣子有環，其一在鄭商，宣子買諸賈人，既成賈矣。」與此義略同。賈疏云：「量以量穀梁之等，度以度布絹之等。成，定也。二物以量度以定物賈。」注云「徵，召也」者，《爾雅·釋言》文。《典祀》注同。俞樾云：「僖二十七年《左傳》曰：『民易資者，不求豐焉，明徵其辭。』即此經徵字之義。徵之言明徵也，謂不相欺也。」案：俞據《左傳》釋此徵爲徵辭，義亦得通。云「價，買也」者，後注及《賈師》注同。《胥師》先鄭注又云：「價，賣也。」賈疏云：「以言徵召買者，故以價爲買。此字所訓不定。案下文所云『貴價者』，鄭注『貴賣之』。鄭亦望文爲義，故注不同也。」段玉裁云：「《說文·人部》：『價，見也。』鄭訓買，後文又訓賣，皆見之義也。價觀古今字。」孫經世云：「《司市》以下諸價字，皆讀爲賣。《說文》賣作賈，從貝齋聲，衍也。價作價，從人賣聲，見也。此即以價當賣者，或形近致譌，抑聲近通借也。賣爲行且賣，亦可直訓爲賣，又可轉訓爲買。『徵價』『賣價』『與貴價』『飾行價惡』，義若錯出，正如『賈用不售』與『賈害』『賈余餘勇』、『沽酒市脯』與『求善賈而沽諸』，義各有當耳。」案：孫說是也。《釋文》載劉昌宗音育，與《說文》賣讀爲育同，此讀價爲賣也。又載聶音笛，此讀價爲覲也。

段從聶音，孫從劉音，以義攷之，劉讀爲允。價本訓賣，而亦通訓買，後文及《質人》、《賈師》並云「賣價」，價與賣對文，則價有買訓可知。云「物有定賣，則買者來也」者，物賣定一，不相詐豫，則買者樂至也。以質劑結信而止

訟，質劑，謂兩書一札而別之也。若今下手書，言保物要還矣。鄭司農云：「質劑，月平。」【疏】「以質劑結信而止訟」者，即質人所掌者是也。凡市皆以質劑爲要信，故《小宰》八成云「聽賣買以質劑」。謹而治之，所以清辯訟之原也。賈疏云：「質劑謂券書，恐民失信，有所違負，故爲券書結之，使有信也。民之獄訟，本由無信，既結信則無訟，故云止訟也。」注云「質劑謂兩書一札而別之也」者，賈

疏云：「古者未有紙，故以札書。」《小宰職》注云：「兩書一札，同而別之。」此不云同，明亦有同義也。」案：亦詳《小宰》疏。云「若今下手書，言保物要還矣」者，賈疏云：「漢時下手書，即今畫指券，與古質劑同也。」孔廣森云：「要讀如『原始要終』之要。言人相借貸物，爲之中者，保其必還，過時不還則責保者也。」鄭司農云「質劑，月平」者，《小宰》先鄭注亦云：「質劑，謂市中平賈，今時月平是也。」賈疏云：「先鄭解以爲月平，若今之市估文書，亦得爲一義，故

後鄭引之在下也。」案：月平亦詳《小宰》疏。以賈民禁

僞而除詐，賈民，胥師、賈師之屬。必以賈民爲之者，知物之情僞與實詐。【疏】「以賈民禁僞而除詐」者，葉鈔本

《釋文》出「賈氏」云：「劉音嫁，聶、陳音古，注『賈氏』同。」

案：「賈氏」義難通，疑傳寫之誤。《說文·人部》云：「僞，詐也。」賈疏云：「司市之官用賈民知物真僞者，使禁物之僞，而除去人之詐虛也。」注云「賈民，胥師、賈師之屬」

者，《胥師》云：「察其詐僞飾行價隱者而誅罰之。」《賈師》

云：「各掌其肆之貨賄之治，辨其物而均平之。」即禁僞除詐之事。《敍官》胥師、賈師等並無爵，注謂皆司市所自辟

除，又云「胥及肆長，市中給繇役者」。然則此賈民，即謂胥

師至肆長諸市吏；以其辟役在市之賈人爲之，別於它官府之府吏胥徒等爲庶人在官者，故謂之賈民。鄭云之屬者，

約略咳舉之詞，明兼有司諲、司稽、胥、肆長諸官也。賈疏

則以屬爲官屬，而謂賈民屬胥師、賈師，受其役使。案：胥

師之屬即胥，賈師之屬即肆長；而《賈師》「凡國之賣價，各

帥其屬而嗣掌其月」，彼疏又謂賈師之下有羣賈，二肆則一

人者，則似賈師之屬，別有羣賈，爲《敍官》所未載者，殆即

隱據此賈民爲釋。其說無徵，亦非鄭悞也。云「必以賈民

爲之者，知物之情僞與實詐」者，賈疏云：「直依經解之。情則真也。情僞既據物而言，則言實詐據人而說也。」黃以周云：「荀子·儒效」曰：「通財貨，相美惡，辨貴賤，君子不如賈人。」《周官》以市屬胥師、賈師，蓋謂非其人不能辨物，亦不能治市。」以刑罰禁競而去盜，刑罰，憲、徇、扑。【疏】「以刑罰禁競而去盜」者，禁競即司競所禁者是也。去盜，即《司稽》「掌執市之盜賊，以徇且刑之」是也。此皆所以爲市除害而護商。競即暴字，詳《敍官》疏。

注云「刑罰，憲、徇、扑」者，《釋文》「扑」下有「也」字，各本並無。此明刑罰即市刑，非五刑亦非罰布也。賈疏云：「司市所施，惟施於市中者，故下云：『小刑憲罰，中刑徇罰，大刑扑罰，其附於刑者歸於士。』故知惟有此三者也。」以泉府同貨而斂賒。同，共也。同者，謂民貨不售，則爲斂而買之；民無貨，則賒賁而予之。【疏】「以泉府同貨而斂賒」者，即泉府所掌者是也。斂謂斂之人官，賒謂賁之與民。市貨不售則斂之，民有急求則賁之，或斂或賒，謂之同貨，所以通有無而齊贏絀之數也。《朝士》「凡民同貨財者」，義與此略同。凡市官以公貨同之於民，其事掌於泉府，而司市亦總其成焉。賈疏謂「司市之官，以泉府所藏之

布物，與民同行其貨，而民無財者，賒而予之，後斂取其直」。非也。注云「同，共也」者，《墨子·經上篇》云：

「同異而俱於之一也。」言官與民有無相通，若同共有此貨也。云「同者，謂民貨不售則爲斂而買之」者，賈疏云：「民賣物不售，則以泉府之物買取之，釋經同貨也。」案：鄭意蓋謂斂賒二者，總爲同貨之事。此云民貨不售則爲斂而買之者，據《泉府》「斂市之不售，貨之滯於民用者，以其買賣之」之文，釋經斂賒之斂也。賈謂以斂買專屬同貨，經斂賒別謂斂所賒之直，非鄭指也。云「民無貨則賒賁而予之」者，《泉府》先鄭注云：「賒，賁也。」賈疏云：「此謂所買得之物，民有急須而無貨者，則賁予之，有時斂取其直，釋經斂賒也。」案：此據《泉府職》釋經之賒，不及斂取其直之事，賈說亦失之。大市，日昃而市，百族爲主；朝市，朝時而市，商賈爲主；夕市，夕時而市，販夫販婦爲主。日昃，昃中也。市，雜聚之處。言主者，謂其多者也。百族必容來去，商賈家於市城，販夫販婦朝資夕賣，因其便而分爲三時之市，所以了物極衆。鄭司農云：「百族，百姓也。」【疏】「大市日昃而市，百族爲主」者，以下論以次敍分地而經市，以陳肆辨物而平市之事。

日廼而市，謂自禺中至跌中，即《易·繫辭》云「日中爲市」，市之最盛時也。云「朝市朝時而市，商賈爲主，夕市夕時而市，販夫販婦爲主」者，朝謂平旦至食時，夕謂下側至黃昏也。惠士奇云：「行人之儀，不朝不夕」。《晏子雜篇》云「室夕」。《管子·七法篇》云「立朝夕」。古語皆以朝夕爲東西。賈疏云：「案下文「市朝一夫，各方百步」。就百步而分爲三時之市，恐不可。若然，則一夫者，據市亭置次與敝，司市及賈師、胥師聽事之處，取其列行肆之處，則居地多矣。此三市皆於一院內爲之，大市於中，朝市於東偏，夕市於西偏，《郊特牲》所云是也。」案：《郊特牲》云：「朝市之於西方，失之矣。」注云：「朝市宜於市之東偏。」此即賈說所本。但三市當於王北宮後垣之外，平列三區，不於一院內爲之。又市朝一夫，亦即列行肆之處，不徒爲市吏次舍。賈說並失之。詳《匠人》疏。注云「日廼，跌中也」

者，《釋文》云：「廼，本又作昃。」案：昃即廼之變體。賈疏云：「廼者傾側之義，昃者差昃之言，故以昃解廼也。是以《尚書·無逸》云：「文王至於日中廼，不遑暇食。」是中後稱廼也。」阮元云：「《大司徒》注云：「日跌景乃中。」此跌當作跌。跌跌二字，上正下俗。」案：阮校是也。跌中者，日過中而側西，別於日未中而側東爲禺中也。《說文·日部》

云「廼，日在西方時側也」，引《易》曰「日廼之離」。又《矢部》云：「昃，日西也。」廼昃聲義並同。《廣雅·釋詁》云：「昃，跌也。」廼跌並傾側之言。《郊特牲》注引此經作「日側」。《既夕禮》亦云「日側」，注云：「側，跌也，謂將過中之時。」皇甫謐《甲乙經》謂「時加未爲日跌」是也。《續漢書·五行志》劉注引《洪範五行傳》鄭注云：「平旦至食時，爲日之朝；禺中至日跌，爲日之中；下側至黃昏，爲日之夕。」據鄭說，則日廼者，謂日中而微側向西之時，雖將過中而離中未遠，故亦通謂之日中。日跌中爲側，更向西則謂之下側，即《春秋》定十五年經所謂「日下昃」，《公羊》何注云「下昃，蓋晡時」是也。蓋禺中不可言跌中，而禺中、跌中則可通言日中，鄭《五行傳》注所說甚明。《郊特牲》孔疏引皇侃說，以日側爲日將中而未中，猶在東側，是誤以禺中爲跌中，非古訓也。云「市，雜聚之處，言主者，謂其多者也」者，明百族、商賈、販夫、販婦並雜聚於市，三時咸有，經云爲主，但就其時來者較多言之耳。《大司馬》田法云：「險野人爲主，易野車爲主。」先鄭注釋「爲主」爲居前，與此義異。云「百族必容來去」者，百族人衆，若令以朝市，或不能畢至，夕市或不及畢去，故必以日昃而市，容其來去也。賈疏云：「百族或在城內，或在城外者，容其來往，故於日廼以

後主之。」云「商賈家於市城」者，《大宰》注云：「行曰商，處曰賈。」以賈居於肆，商雖行，亦有邸舍在城市，不須逐日來去也。云「販夫販婦朝資夕賣」者，《說文·貝部》云：「販，賈賤賣貴者。」《國語·鄭語》說有夫婦鬻糜弧箕服者，即所謂販夫販婦也。《考工記·總敘》注云：「資，取也，操也。」朝資夕賣，謂所齋不多，無肆立持，不豫儲，不久居，於夕市爲宜也。云「因其便而分爲三時之市，所以了物極衆」者，賈疏云：「以分爲三市者，欲了其所賣之物，極盡其衆也。」鄭司農云「百族，百姓也」者，《國策·秦策》高注云：「族，姓也。」百姓謂平民自齋貨物買賣於市者。後「僞飾之禁在民者十有二」，即百族也。賈疏云：「欲見此百族異於《秋官·司寇》『戒於百族』。彼百族是府史以下。此據市人稱百族，明據天下百姓，亦非百官百姓，對則正姓與氏族異，通而言之，氏族則庶姓，故以百姓爲百族。」論讓案：《大司寇》之百族，雖與此市人少異，然後鄭彼注亦引《禮運》百姓爲釋，與先鄭此注義略同也。凡市人，則胥執鞭度守門。市之羣吏平肆展成奠賈，上旌于思次以令市，市師蒞焉，而聽大治大訟；胥師、賈師蒞于介次，而聽小治小訟。凡市人，謂三時

之市市者人也。胥，守門察僞詐也。必執鞭度，以威正人衆也。度謂段也，因刻丈尺耳。羣吏，胥師以下也。平肆，平賣物者之行列，使之正也。展之言整也。成，平也，會平成市物者也。奠讀爲定，整勅會者，使定物賈，防誑豫也。上旌者，以爲衆望也，見旌則知當市也。思次，若今市亭也。市師，司市也。介次，市亭之屬別，小者也。故書蒞作立。杜子春云：「奠當爲定。」鄭司農云：「思，辭也。次，市中候樓也。立當爲蒞。蒞，視也。」玄謂「思」當爲「司」字，聲之誤也。【疏】「凡市人，則胥執鞭度守門」者，《說文·門部》云：「闔，市門也。」《文選·蜀都賦》劉逵注云：「闔，市巷也。闔，市外內門也。」案：三市每市蓋各有總門，其內分設各次，次內又分列各肆，肆有一巷。是三市之中，內外分合，其門不一。胥二肆一人，則所守之門，當爲肆門也。云「市之羣吏平肆展成奠賈」者，江永云：「平肆者，平其肆之貨賄，不使其名實相紊也。胥師、賈師、肆長三職皆言平，而肆長尤其專職。展成奠賈，則賈師之專職也。展成，即《質人》『掌成市之貨賄』之成，謂以所買賣之物，書之質劑，成其交易；奠賈亦以其物之賈，書之質劑：皆賈人省之定之也。」云「上旌于思次以令市」者，《司常》云：「析羽爲旌。」思次爲市官所蒞，其旌當用司市之物。

依《大司馬》治兵，羣云「百官載旗」，則思次所縣當爲旗而注析羽者也。司市縣旌於所治之次，使市者望而聚於其處，日莫市散則下之。云「市師涖焉，而聽大治大訟，胥師、賈師涖于介次，而聽小治小訟」者，治謂以事咨辯陳請，訟謂爭訟，大事則爲大治大訟，小事則爲小治小訟。詳《小宰》疏。莊存與云：「司市聽大治大訟，質人佐之；胥師聽小治小訟，賈師佐之。」治讓案：市官聽大小治訟者，各於其市朝。凡思次、介次皆於市中爲寺舍，其外爲朝，以聽治訟及爲刑肆罪人之所，其地當與百官府治事之朝署相擬。《史記·孟嘗君傳》云：「朝趣市者，明旦，側肩爭門而入；日暮之後，過市朝者掉臂不顧。」即此。《索隱》謂市之行列如朝，故曰市朝，失之。

注云「凡市人，謂三時之市市者入也」者，謂日昃朝夕，市人湊集入市門時。云「胥，守門察僞詐也」者，據《胥師》文。謂市人有爲僞飾虛詐者，察而糾之。以市門爲市人所出入，易以司察，故使吏守之。云「必執鞭度，以威正人衆也」者，《國語·晉語》韋注云：「鞭所以擊馬。」案：繫革於木，以擊人馬，通謂之鞭。《書·舜典》云：「鞭作官刑。」據此則市刑亦用鞭矣。賈疏云：「鞭以威人衆，度以正人衆，故并言之也。」云「度謂爰也，因刻丈尺耳」者，王引之云：「《方言》曰：『僉，宋魏之間謂之』」

攝爰，或謂之度。」郭璞注曰：「僉，今連枷，所以打穀者。爰亦杖名也。今江東呼打爲度。」《廣雅》曰：「爰、度，杖也。」然則古人謂爰爲度，以打得名，故鄭云「以威正人衆也」。又云因刻丈尺耳者，以上文云「以量度成賈而徵價」，故并及之。其實鞭度但供撻戮，下文《胥職》云「執鞭度而巡其前，凡有罪者，撻戮而罰之」是也。若均平物賈，則當兼操權量，不得獨持丈尺矣。賈不解謂爰爲度之義，乃云「一物以爲二用，若以繫鞬於上則爲鞭，以長丈二，因刻丈尺則爲度」。失之。案：王說是也。云「羣吏，胥師以下也」者，賈賈師、司璣、司稽、胥、肆長諸官言之。賈疏云：「見下《胥職》云「執鞭度而巡其前」，此亦執鞭度，故知是胥師以下。《敘官》云：「胥師二十肆則一人，胥二肆則一人。」鄭云：「胥師，領羣胥。」則胥師已下，非直巡行肆，亦更來守門，故鄭摠云「胥師已下」。云「平肆，平賣物者之行列，使之正也」者，黃以周云：「謂辨其物類，各陳諸肆，所謂「以陳肆辨物而平市」是也。」云「展之言整也」者，《鄉師》注云：「展猶整具。」《說文·支部》云：「整，齊也。」云「成平也」者，《調人》注同。云「會平成市物者也」者，言市者聚會平定市中列肆之物，成其買賣。黃以周云：「展如《聘禮》「展幣」之展，謂校錄之。展成奠賈，謂展視所成之物，

以定其賈，所謂「以量度成賈而徵價」是也。」案：黃說亦通。云「莫讀爲定」者，《小史》、《弓人》注並同。丁晏云：「《職幣》皆辨其物而莫其錄」，注：「莫，定也。」《禹貢》「莫高山大川」，《史記·夏本紀》「莫作定」。《匠人》「凡行莫水」，先鄭云：「莫讀爲停。」《釋名》：「停，定也，定於所在也。莫，停也，言停久也。」古莫、定、停並聲近通用。「云」整勅會者，使定物賈，防誑豫也」者，勅，宋注疏本疏述注作「敕」。案：整勅之勅當作「敕」。疏作敕，不體。《易·噬嗑·象辭》云：「先王以明罰勅法。」《易釋文》引鄭云：「勅，理也。」一云整也。」此注云「整勅」，與鄭《易注》義合，皆借勅爲敕。敕勅音義迥別，詳《宰夫》疏。賈疏云：「恐有豫爲誑欺，故云防誑豫。」王引之云：「賈未解豫字之義，故云豫爲誑欺。如賈說，則當言「豫誑」，不當言「誑豫」也。今案：豫亦誑也。《晏子·問篇》曰：「公市不豫，宮室不飾。」《鹽鐵論·力耕篇》曰：「古者商通物而不豫，工致牢而不僞。」不豫謂不誑也。又《禁耕篇》曰：「教之以禮，則工商不相豫。」謂不相誑也。連言之則曰誑豫矣。《荀子·儒效篇》：「仲尼將爲司寇，魯之鬻牛馬者不豫賈。」亦謂市賈皆實，不相誑豫也。楊倞注：「豫賈，豫定爲高價也。」誤與賈疏同。《淮南·覽冥篇》：「黃帝治天下，市不豫賈。」

《史記·循吏傳》：「子產爲相，市不豫賈。」《索隱》曰：「謂臨時評其貴賤，不豫定賈。」誤亦與賈疏同。《說苑·反質篇》：「徒師沼治魏，而市無豫賈。」義並與《荀子》同。說者皆讀豫爲凡事「豫則立」之豫，望文生義，失其傳久矣。」案：王說是也。云「上旌者，以爲衆望也，見旌則知當市也」者，謂樹旌以表市，使衆望而可知。《韓非子·外儲說》云：「宋人有酤酒者，縣幟甚高著。」漢市樓名旗亭，蓋亦立旗於上。旌即旗幟也。云「思次若今市亭也」者，前注同。此爲司市總治市政之次。云「市師，司市也」者，以司市掌治教，爲市官之長，故謂之市師。《敍官·鄉師》注云：「師，長也。」《漢書·食貨志》說王莽更名市令、市長爲司市師，蓋即放此制。云「介次，市亭之屬別，小者也」者，上思次，司市所蒞，聽大治大訟；此介次，胥師、賈師所蒞，聽小治小訟。思次爲市亭，明介次爲市亭之屬別而小者，爲胥師、賈師分治市政之次。《聘禮》注云：「介，副也。」謂小次爲大次之副。屬別與《敍官》注云「鄉之屬別」「遂之屬別」義同。黃以周云：「《說文》：「介，畫也。从人从八。」八之言分，分主市次者胥師、賈師，故胥師、賈師蒞於介次。」詒讓案：分與副義亦相成。云「故書蒞作立」者，《鄉師》注同。杜子春云「莫當爲定」者，段玉裁云：「讀爲定者，就其

聲類而易其字義也。當爲定者，直謂爲字誤聲誤而改之也。其意不同，故兼存。鄭司農云「思，辭也」者，《詩·大雅·文王篇》「思皇多士」，毛傳云：「思，辭也。」案：《詩》多以思爲發語辭，故先鄭據以爲釋，後鄭不從也。云「次，市中候樓也」者，《遣人》云：「市有候館。」又《三輔黃圖》云：「長安九市，夾橫橋大道，市樓皆重屋。」是漢時市有市樓，爲市吏候望之所。先鄭蓋舉漢制以爲況也。云「立當爲泣」者，段玉裁云：「《鄉師》云立讀爲泣，此云當爲泣。案：古者立位同字，則讀立爲泣，即讀位爲泣也。後世立位二字韻部迥別。」案：詳《鄉師》疏。云「泣，視也」者，《爾雅·釋詁》文。《大宗伯》注亦同。云「玄謂思當爲司字，聲之誤也」者，賈疏云：「下云『介次』不爲辭，明『思』不得爲辭，直是思司聲同，故誤爲思也。此思司聲同，不得爲字誤。今有本云『字聲之誤』，兼有『字』者，讀當云『思當爲司字』，字絕讀之，乃合義也。」段玉裁云：「據疏知賈本本無『字』字，無者爲長。注例『當爲某』之下，未見有贅『字』字者也。今本注內有『字』字，淺人增之。」黃以周云：「思司音近義通。《釋名·釋言語》云：『司，思也。』《毛詩傳》云：『司，主也。』干寶《周禮注》云：『司者，總其領也。』總主市肆者市師，故上旌於思次，市師泣焉。」凡萬民之

期于市者，辟布者、量度者、刑戮者，各于其地之敘。期，謂欲賣買期決於市也。量度者，若今處斗斛及丈尺也。故書辟爲辭。鄭司農云：「辭布，辭訟泉物者也。」玄謂辟布，市之羣吏考實諸泉人及有遺忘。【疏】

「凡萬民之期于市者」者，萬民即上文之百族，通市中諸往來賣買者而言。下三者，皆期於市者所有事也。云「刑戮者」者，即下文市刑憲徇扑三罰，亦通謂之戮。《胥》云「撻戮」，即扑罰也。凡司競、司稽所搏執犯禁及盜賊，胥師所戮有罪者，皆於當敘行其刑戮也。云「各于其地之敘」者，賈疏云：「敘則諸物行肆之所也。」詒讓案：敘即上文「次敘」之敘，蓋諸肆行首當市朝之處，胥及肆長所治者。凡辟布以下三事，各就其敘治之，取其近而衆見之也。注

云「期謂欲賣買期決於市也」者，謂欲賣與欲買者，兩相爲期，約至市決其售否。曾釗引《史記·孟嘗君傳》「所期物忘其中」，《索隱》「期物謂入市心中所期之物利」，證此經義，是也。賈疏謂人各自爲期限，使了市事於市，失之。云「量度者，若今處斗斛及丈尺也」者，謂敘有市吏泣之，宜有官度量法式，凡市人有以斗斛丈尺差異爭訟者，則就其行肆校驗平壹之。漢時市官蓋亦有此法。凡鄭言「處」者，多

爲審察是正之義。《大宰》注云「正，正處也」，《大史》注亦有「處吉凶」之語，皆其證。賈疏謂斗斛處置於米粟之肆，丈尺處置於絹布之肆，非鄭指也。云「故書辟爲辭」者，徐養原云：「《說文·辛部》：『辭，訟也。』又《辟部》：『辟，法也。』二字形雖相近，音義迥別，故二鄭各就其字之本義解之。」鄭司農云「辭布，辭訟泉物者也」者，此訓辭爲訟，與《說文》同。先鄭意，布即泉也，因爭泉物而辭訟，謂之辭布。賈疏云：「先鄭從故書辟布爲辭訟之布。後鄭不從而爲羣吏考實諸泉人者，若辭訟之布，當歸其本主，何得各有地之敘乎？明不得爲辭訟之布也。」云「玄謂辟布，市之羣吏考實諸泉人」者，《說文》辟訓法，此引申爲考案之義。泉人即謂廛人所斂五布入泉府者。市吏各就其敘，以考案市人所入布，與法數當相應，不得有羨闕也。賈疏云：「謂民將物來於肆賣者，肆長各考量物數得實，稅入於市之泉府。知民將物來於市有稅者，案下文云『國凶荒，市無征』，明不凶荒有征矣。其實者則宜置於地之敘，欺者沒入官，是其法也。」案：此泉人不專指物稅，賈說非是。云「及有遺忘」者，即謂五布之人數或有遺忘，亦就其敘考問之也。賈疏云：「謂羣吏考實泉之處有遺忘者，便歸令本主識認之。下文得貨賄六畜之等，是依列肆失者，與此文別也。」案：

賈似以遺忘爲遺失泉布者，則與下文得貨賄事略同，非經注義也。但鄭說亦似未塙。洪頤煊謂《宰夫職》「凡失財用，物辟名者，以官刑詔冢宰而誅之」。注云：「辟名，詐爲書以空作見，文書與實不相應也。」此辟布當與彼同義。其說似近是。蓋凡萬民買賣，賈直既定，而所與泉布或與所約之數不相應，或已付賈而物主詐稱未付者，皆就其敘，案問其是非也。凡得貨賄六畜者亦如之，三日而舉之。得遺物者，亦使置其地，貨於貨之肆，馬於馬之肆，則主求之易也。三日而無識認者，舉之沒入官。【疏】「凡得貨賄六畜者亦如之」者，此治市中拾遺之令也。亦置於其敘，以俟辨識，以敘近市朝，又市官所治故也。與朝士得獲貨賄六畜者委於朝同。彼文有人民，此無者，文不具也。賈疏云：「此謂在列肆遺忘闕失者，使各歸本肆，使主識認取之。」注云「得遺物者亦使置其地，貨於貨之肆，馬於馬之肆，則主求之易也」者，經云亦如之，即蒙上文「各於其地之敘」而言。貨之肆，馬之肆，其行首即所謂敘也。云「三日而無識認者，舉之沒入官」者，《呂氏春秋·樂成篇》云：「物之遺者，民莫之舉。」高注云：「舉，取也。」故凡物沒入官謂之舉，《司門》注亦同。《朝士》云：「旬而舉之，

大者公之，小者屬民私之。」此三日即舉者，以市肆囂雜，不容久留也。没人官，即彼云大者公之。其小者當亦得入私，經文皆不具也。凡治市之貨賄、六畜、珍異，亡者使有，利者使阜，害者使亡，靡者使微。利，利於民，謂物實厚者。害，害於民，謂物行沽者。使有使阜，起其賈以微之也。使亡使微，抑其賈以卻之也。侈靡細好，使富民好奢微之而已。鄭司農云：「亡者使有，無此物則開利其道，使之有。」【疏】「凡治市之貨賄、六畜、珍異」者，治謂市官設法以治之，所以察良楮而握盈朒之柄也。珍異，詳《質人》疏。李光坡云：「此以政令禁物靡而均市也。」注云「利，利於民，謂物實厚者」者，實厚謂誠實堅厚者也。云「害，害於民，謂物行沽者」者，沽，《釋文》作「苦」，宋婺州本及舊注疏本並同。段玉裁云：「行，今俗所謂行貨，不精者也。《方言》注謂之「行敝」，今譌爲「扞蔽」。《唐書·韓琬傳》謂之「行廡」，今「行」譌「汗」。沽，猶也。」王引之云：「古人謂物脆薄曰行，或曰苦。苦與鹽同。《唐風·鶉羽》毛傳曰：「鹽，不攻緻也。《小雅·四牡》傳曰：「鹽，不堅固也。《齊語》及《管子·小匡篇》並云「辨其攻苦」。韋昭注曰：「功，牢也。苦，脆也。」尹知章注曰：

「功謂堅美，苦謂濫惡。」是苦亦行濫之稱，故後鄭又謂之「行苦」。《漢書·禮樂志》：「夫婦之道苦而淫辟之罪多。」孟康曰：「苦音鹽。夫婦之道行鹽不固也。」行鹽即行苦。」案：段、王說是也。沽苦字通。苦見《鹽人》、《典婦功》、《典臬》三職，彼杜及先鄭注並讀爲鹽。而沽見《酒正》、《司裘》、《巾車》、《司兵》諸注，則注例用「沽」不用「苦」。然沽義亦當與鹽同，王說得之。行訓惡，亦詳《胥師》疏。云「使有使阜，起其賈以微之也」者，賈疏云：「總釋經亡者利者。云起其賈者，謂增起其賈，引物自然來，故使有使阜盛也。」云「使亡使微，抑其賈以卻之也」者，謂抑貶其賈，則售者無利，所以卻退之，使人不得齎其物也。云「侈靡細好，使富民好奢微之而已」者，《小爾雅·廣言》云：「靡，細也。」《方言》郭注云：「靡，細好也。」《祭義》注云：「微，少也。」使微者，減損之使微少而已，對使亡爲卻絕，竟不得市也。鄭司農云「亡者使有，無此物則開利其道，使之有」者，《士喪禮》注云：「亡，無也。」市無此物，則開利其致來之道，使商樂齎，與後鄭「起其賈」，義亦相成。賈疏謂二鄭義異，失之。凡通貨賄，以璽節出入之。璽節，印章，如今斗檢封矣。使人執之以通商。以出貨賄者，王之司市也；以內貨賄者，邦國之司市也。【疏】「凡通貨，以璽節出入之」

者，李光坡云：「此以商賈阜貨而行布也。」案：李說是也。此專據商賈言之。《大宰》九職云「六曰商賈阜通貨賄」是也。凡商賈所齎物，並以璽節通之。^① 注云「璽節，印

章」者，《掌節》注云：「璽節，今之印章也。」《職金》注云：

「璽者，印也。」《說文·土部》云：「璽，^②王者印也。重文

璽，籀文从玉。」《印部》云：「印，執政所持信也。」《廣雅·

釋器》云：「印謂之璽。」《釋名·釋書契》云：「璽，徙也，封

物使可轉徙而不可發也。印，信也，所以封物為信驗也；

亦言因也，封物相因付也。」《漢舊儀》云：「秦以前民皆佩

綬，以金、玉、銀、銅、犀、象為方寸璽，各服所好。漢以來，

天子獨稱璽，又以玉，羣臣莫敢用也。」《獨斷》云：「璽者印

也，印者信也，古者尊卑共之。《月令》曰：「固封璽。」《春

秋左氏傳》曰：「魯襄公在楚，季武子使公冶問璽書，迫而

與之。」此諸侯大夫印稱璽者也。秦以來天子獨以印稱

璽。」《國語·魯語》云：「襄公在楚，季武子取卣，使季冶逆

卣而予之璽書。」韋注云：「璽，印也。古者大夫之印，亦稱

璽。璽書，印封書也。」案：衛、蔡、韋三說是也。《周書·

殷祝篇》云：「湯放桀，取天子之璽，置天子之坐。」則夏殷

時已有璽，但三代時為尊卑印信之通稱。許說據秦以後

制，不可以說經。章亦印也，《文選·漢高祖功臣頌》李注

云：「章，印章也。」依鄭說，蓋刻璽為文，印之竹帛以為節。

《職金》云：「辨其物之嫩惡與其數量，楬而璽之。」彼為璽

書楬著物，與璽節異，而其形制略同。云「如今斗檢封矣」

者，賈疏云：「案漢法，斗檢封，其形方，上有封檢，其內有

書；則周時印章上書其物，識事而已。」丁晏云：「《說文·

木部》：「檢，書署也。」《釋名·釋書契》：「檢，禁也，禁閉

諸物，使不得開露也。」《後漢書·公孫瓚傳》：「袁紹矯刻

金玉以為印璽，每有所下，輒皁囊施檢。」章懷注：「檢，今

俗謂之排。」排，如今言標簽耳。《續漢書·祭祀志》：「尚

書令奉玉牒檢，皇帝以二分璽親封之。」詒讓案：漢斗檢

封，名制不可攷。云「使人執之以通商」者，謂使商賈之人，

自執此璽節，以通其貨賄也。云「以出貨賄者，王之司市

也」者，賈疏云：「以其商旅買貨賄於市，以出向邦國，故知

是王之司市給璽節也。」云「以內貨賄者，邦國之司市也」

者，賈疏云：「以其貨賄從邦國來，當人王畿，故知還是邦

國之司市給璽節也。此經直云人之，鄭雖云「內貨賄者邦

國之司市」，亦容有從畿內入市者，故下《掌節》云「貨賄用

① 「璽」，原與下「土部云璽」之「璽」互訛，今正。

② 「璽」，原與上「璽節通之」之「璽」互訛，今正。

璽節」，鄭云：「司市言貨賄者，貨賄非必由市，或資於民家。」若然，商資於民家得出向邦國，若資於民家亦容入來向王市賣之，則璽節受之於門關矣。國凶荒札喪，則市無征，而作布。有災害，物貴，市不稅，爲民乏困也。金銅無凶年，因物貴，大鑄泉以饒民。【疏】「國凶荒札喪」者，即《膳夫》之大荒大札也。札喪是一事，賈疏謂「札謂疫病，喪謂死喪」，分爲二義，失之。云「則市無征而作布」者，《均人》云：「凶札則無財賦，故市無征。」市征即《大宰》九賦之市賦也。注云「有災害，物貴，市不稅，

爲民乏困也」者，物貴而市不蠲稅，則物益貴，民將重困，故無征，即謂不斂次布、總布等也。云「金銅無凶年」者，賈疏云：「以其凶年穀則貴，金銅凶年亦賤，故云無凶年。」云「因物貴，大鑄泉以饒民」者，《外府》注云：「布，泉也。」王聘珍云：「管子·山權數篇」曰：「湯七年旱，禹五年水。湯以莊山之金鑄幣，而贖民之無檀賣子者。禹以歷山之金鑄幣，而贖民之無檀賣子者。」《國語·周語》單穆公曰：「古者天降災戾，於是乎量資幣，權輕重以振救民。民患輕，則爲作重幣以行之，於是乎有母權子而行，民皆得焉。若不堪重，則多作輕而行之，亦不廢重，於是乎有子權母而

行，小大利之。」詒讓案：《周書·大匡篇》云：「維周王宅程三年，遭天之大荒，幣租輕，乃作母以行其子，易資貴賤，以均游旅使無滯。」亦古者遇天災鑄泉之事。蓋泉布爲民間通行之貨，無市征，則官之泉入大減，無以給民用，故作布以濟其乏，而采升冶金，兼使閭民得庸賃之資以自給，亦所以饒之也。凡市僞飾之禁，在民者十有二，在商者十有二，在賈者十有二，在工者十有二。鄭司農云：「所以俱十有二者，工不得作，賈不得粥，

商不得資，民不得畜。」玄謂《王制》曰：「用器不中度，不粥於市；兵車不中度，不粥於市；布帛精麤不中數，幅廣狹不中量，不粥於市；姦色亂正色，不粥於市；五穀不時，果實未孰，不粥於市；木不中伐，不粥於市；禽獸魚鼈不中殺，不粥於市。」亦其類也。於四十八則未聞數十二焉。【疏】「凡市僞飾之禁」者，《月令·季春》云：「百工咸理，監工日號：毋悖于時，毋或作淫巧以蕩上心。」注云：「淫巧，謂僞飾不如法也。」李光坡云：「此以賈民禁僞而除詐也。」云「在民者十有二」者，民即上文百族，謂平民也。十有二者，禁書之條目有此數，下並同。注鄭司農云「所以俱十有二者，工不得作，賈不得粥，商不得資，民不得畜」

者，賈疏云：「謂民與商賈及工四者皆同十二。」工匠主營作，故云不得作。其處曰賈，賈主賣粥，故云不得粥。商主通貨賄，貨賄皆當豫資貯，故云不得資。萬民非作、非粥、非資，故以畜聚而言也。」云「玄謂《王制》曰，用器不中度，不粥於市」者，以下並引《王制》證市禁之事。鄭彼注云：「用器，弓矢、耒耜、飲食器也。度，丈尺也。」賈疏云：「耒耜長六尺，弓長六尺六寸之等，矢長三尺之類，皆有長短度數也。」云「兵車不中度，不粥於市」者，賈疏云：「案《考工記》，輪人爲兵車乘車之輪，崇六尺六寸。成出革車一乘，出於民間，故民亦有粥兵車之法。」云「布帛精麤不中數，幅廣狹不中量，不粥於市」者，狹，《釋文》作「夾」。案《禮記》作「狹」。夾即狹之借字。鄭注云：「數，升縷多少。」賈疏云：「布之精麤，謂若朝服十五升，斬衰三升，齊衰有三等，或四升，或五升，或六升；大功已下，有七升、八升、九升；小功有十升、十一升、十二升；緦麻有十五升抽去半。其帛之升數，禮無明文。布幅則廣二尺二寸。其縵幅則依朝貢禮，廣二尺四寸。」云「姦色亂正色，不粥於市」者，姦色即五方之閒色也。《五行大義》引穎子嚴《春秋釋例》云：「東方閒色綠，南方閒色紅，西方閒色縹，北方閒色紫，中央閒色驪黃。」云「五穀不時，果實未孰，不粥於市」者，注云：

「物未成，不利人。」云「木不中伐，不粥於市」者，注云「伐之非時不中用」，又引《周禮》「仲冬斬陽木，仲夏斬陰木」。見《山虞》文。云「禽獸魚鼈不中殺，不粥於市」者，注云：「殺之非時不中用。《月令》季冬始漁，《周禮》春獻鼈蜃。」云「亦其類也」者，賈疏云：「《王制》所云不中度之類，是在工者；不中數，不中量，姦色亂正色，是在商者；不時及未熟，是在農者。此等亦兼有在賈者，故云亦其類也。」案依賈說，則後鄭以《王制》諸云不粥者，分屬民商賈工，與先鄭以不得粥專屬賈者異。《王制》又云：「有金璧圭璋不粥於市，命服命車不粥於市，宗廟之器不粥於市，犧牲不粥於市，戎器不粥於市，錦文珠玉不粥於市，珠玉成器不粥於市，衣服飲食不粥於市。」此不引者，以彼諸物不粥者各自有取義，不關僞飾，故不具引也。云「於四十八則未聞數十二焉」者，經民商賈工數各十二，通爲四十八也。賈疏云：「《王制》之文從用器爲一，兵車爲二，布三，帛四，姦色五，五穀六，果實七，木八，禽九，獸十，魚十一，鼈十二，是聞之十二矣。於四十八則未聞三十六，故云未聞數十二也。」案：注疏說頗難通。《王制》約舉市禁，本未細計凡數，賈強以充十二事，分合既未當，且依其說，則是所聞數止十二，而注云未聞數十二，於文義亦復乖迕。竊疑鄭意止略

舉《王制》以況義並非以當此十二禁之一。此注當云「於四十八則未聞」，明《王制》文於此經未必相當，此四十八禁實全未聞也。「數十二焉」四字，疑後人未明鄭義，據經妄增，賈緣誤爲說，遂多牽強爾。市刑，小刑憲罰，中

刑徇罰，大刑扑罰，其附于刑者，歸于士。

徇，舉以示其地之衆也。扑，撻也。鄭司農云：「憲罰，播其肆也。」故書附爲拊，杜子春云：「當爲附。」【疏】市刑者，司市之官刑。以其事小法輕，不過此三者也。李光坡云：「此以刑罰禁競而去盜也。」云「大刑扑罰」者，扑，唐石經作朴，形近而誤。今據宋本及嘉靖本正。扑罰，謂扑之以示罰，猶《閭胥》云「撻罰」，與《廛人》罰布異。云「其附于刑者歸于士」者，以司市不掌五刑也。賈疏云：「此刑各有所對言之，市刑雖輕，亦名爲刑，若對五刑，則五種者爲刑，故云附於刑歸於士。士謂秋官士師、鄉士、遂士之屬。其人屬彼者各歸之，使刑官斷之也。」注云「徇，舉以示其地之衆也」者，《說文·彳部》云：「徇，行示也。」徇即徇之俗。謂列其所犯，揭著其身，使周行市廛，以示衆爲戒也。云「扑，撻也」者，《閭胥》注云：「撻，扑也。」《說文·支部》云：「支，小擊也。从又卜聲。」阮元云：「支之隸變爲扑，

手即又也。扑訓擊，因而名擊之物曰扑。凡經典扑改朴者，非。」案：阮說是也。《廣雅·釋詁》云：「扑，撻，擊也。」《大射儀》云：「司射遂取扑撻之。」注云：「扑，所以撻犯教者。」《書·舜典》「扑作教刑」，《史記·五帝本紀》集解引鄭《書注》云：「扑，撻楚也。」案：扑以撻楚撻人，因謂撻楚爲扑。《國語·魯語》云：「薄刑用鞭扑。」此市刑輕，故雖大刑亦不過扑也。唐石經此經及《尚書》、《儀禮》初刻皆誤作木皮之扑。唐玄度《九經字樣·手部》謂扑即《說文》撲字，亦謬。鄭司農云「憲罰，播其肆也」者，《小宰》注云：「憲謂表縣之，若今新有法令云。」此憲罰亦謂書其犯禁之狀，表縣於肆門，宣播其罰，與表縣法令同。賈疏云：「憲是表顯之名，徇既將身以示之，則此憲是以文書表示於肆，若布憲之類也。」云「故書附爲拊，杜子春云當爲附」者，段玉裁云：「附麗字，周書多作付，此作拊，皆假借字也。」《高宗彤日》「天既付命正厥德」，《今文尚書》作「附命」。《說文》訓附爲附婁，訓拊爲益也，似以拊爲附麗正字。國君過市則刑人赦，夫人過市罰一幕，世子過市罰一帑，命夫過市罰一蓋，命婦過市罰一帷。謂諸侯及夫人、世子過其國之市，大夫、內子過其都

之市也。市者，人之所交利而行刑之處，君子無故不游觀焉。若游觀則施惠以爲說也。國君則赦其刑人。夫人、世子、命夫、命婦，則使之出罰，異尊卑也。所罰謂憲徇扑也。必罰幕帘蓋帷，市者衆也。此四物者，在衆之用也。此王國之市而說國君以下過市者，諸侯之於其國，與王同，以其足以互明之。【疏】注云「謂諸侯及夫人、世子過其國之市」者，明據無事而自過其所封國都之市而言。若以事至王國及它國，過市則無罰也。云「大夫、內子過其都之市也」者，亦據無事而過其所食采地之市而言。若以事過王國及它都市，則亦無罰。命夫，謂有采地命士以上至三公。命婦者，卿大夫士妻之通稱。賈疏云：「大夫中含有卿，內子，卿之妻，含大夫之妻命婦也，故經云命婦，注云內子也。若然，此經大夫命婦，是諸侯科中，不見天子卿大夫，則天子卿大夫與諸侯卿大夫及命婦，亦是互見爲義也。」詒讓案：對文則卿妻爲內子，大夫妻爲命婦，散文則卿妻亦爲命婦，詳《內宰》疏。都即大小都，亦兼家邑等言之。云「市者，人之所交利而行刑之處，君子無故不游觀焉，若游觀，則施惠以爲說也」者，《釋文》云：「說，解說也。」鄭意市者，爲賈民與刑人所聚之處，國君爵尊體崇，不當非時游觀於市，故設此法以示解說，實以禁其佚遊也。云「國君則赦其

刑人」者，刑人謂市人之犯大刑者，即上云「其附于刑者歸于士」是也。國君過市時，適遇有當附刑之人，則赦之。《晏子春秋·外篇》云：「晏子曰：刑死之罪，日中之朝，君過之則赦之。」案《易·繫辭》云「日中爲市」。日中之朝即市朝也。晏子所說與此經合。若然，此刑人通該附五刑，凡大辟以下皆赦之，非唯市刑憲徇扑等。但五刑既赦，則憲徇扑等小刑亦赦可知。此乃設法以禁國君之遊市，非縱有罪也。云「夫人、世子、命夫、命婦則使之出罰」者，謂罰幕帘之等。云「異尊卑也」者，明國君與夫人以下尊卑異，故或施惠以爲說，或罰以示警也。云「所罰謂憲、徇、扑也」者，賈疏云：「其憲徇刑之輕者而赦之，使出帷幕難備之物者，出物雖重而無恥，憲徇雖輕而有愧，故以出物爲輕也。」案：依賈說，則鄭意夫人、世子、命夫、命婦等過市，亦仍赦刑人，但所赦者止屬憲徇扑等輕刑，且不得徒赦，必罰令出物乃赦之。若然，是所罰幕帘蓋帷等，乃使所赦憲徇扑之刑人出之。但憲徇扑刑有大小，而所罰物並同，於義既未協，且審釋經文，國君則云刑人赦，夫人世子以下則云罰，二文不相冢，恐不當如鄭、賈說。江永謂即使夫人世子等遊市者出罰物，義似較允也。云「必罰幕帘蓋帷，市者衆也，此四物者在衆之用也」者，賈疏云：「案幕人」云「掌供

帷幕幄帘綬，帷幕用布，幄帘用繒，在上曰幕，在旁曰帷，帘承塵。其蓋當是於衆中障暑雨之蓋，未必是輪人所作蓋，弓二十有八，在車者也。」江永云：「幕帘蓋帷皆所障蔽之物，罰之以示不當遊市，所以恥之也。若衛靈公與夫人同車，宦者參乘，而招搖過市，尤不知恥者也。」案：江說是也。幕帘蓋帷皆行道及野舍所用，貴人出游，蓋必齎此諸物以行。故過市時，應時即罰令出此，留之列次，以共衆用，亦取其易辦也。段使憲徇扑市人出之，則當令出泉買作諸物，非應時所能猝辦，足知其非矣。云「此王國之市而說國君以下過市者，諸侯之於其國與王同，以其足以互明之者，謂此司市實掌王國之市，而經說國君等侯國之法者，明王與國君同，后與夫人同，王世子與諸侯世子亦同，其過市亦有赦刑人及罰幕帘之法，經舉侯國，互文以見義也。凡會同師役，市司帥賈師而從，治其市政，掌其賣價之事。市司，司市也。價，買也。會同師役必有市者，大衆所在，來物以備之。」【疏】「凡會同師役，市司帥賈師而從」者，唐石經作「市司胥師賈師而從」。嚴可均云：「疏云不帥胥師者，胥師不知物賈，則經當無胥師。」案：嚴說是也。宋以來版本，「胥師」並作「帥」，今從

之。師役，謂軍旅起徒役也。賈疏云：「王與諸侯行會同及師役征伐之等，或在畿內，或在畿外，皆有市，則市司帥賈師而從，以其知物賈，故使從。不帥胥師者，胥師不知物賈，於事緩，故不從也。」注云「市司，司市也」者，與上文稱市師同，以其非正官名，故或曰市師，或曰市司，無定稱也。鄒漢勛謂此即宰夫八職之二曰師，三曰司。若然，則似市師爲長，而市司別爲所屬士，亦通。云「價，買也」者，前注同。賣價猶《小宰》云賣買也。俞樾云：「價者賣之段字，訓賣不訓買。鄭君訓價爲買，誤也。惟價既訓賣，則不得復與賣連文；而此云「掌其賣價之事」，《質人》云「凡賣價者質劑焉」，《賈師》云「凡國之賣價，各帥其屬而嗣掌其月」，皆連言之曰賣價，義似可疑。乃鄭君於《賈師》注云「故書賣爲買」，是知經文本作「買價」，當以故書爲正。

《胥師職》曰：「察其詐僞飾行價，惡者而誅罰之。」鄭司農云：「價，賣也。惡，惡也。」後鄭亦以行賣惡物解之。《賈師職》曰：「凡天患，禁貴價者。」先鄭無注，後鄭釋爲貴賣。夫賣之與買，截然異義，豈有價之一字，既可訓買，又可訓賣者乎！且《賈師》一職，前云「禁貴價者」，後云「凡國之賣價」，同在一簡之中，乃貴價之價則訓爲賣，賣價之價則訓爲買，此其違失尤爲顯然。今定價爲賣之段字，其音爲

育，其義爲賣。凡經言賣賈者，皆從故書作買賈，則字義正而經義亦明矣。」案：俞說亦通。但此經賣賈之文三見，鄭唯於《賈師》注云故書賣爲買，則此與《質人》二經，故書今書似同作賣賈，不必作買賈也。云「會同師役必有市者，大衆所在，來物以備之」者，以會同師役，皆聚大衆，食用之物恐有不給，故司市爲招來市物，以備其缺乏也。易拔云：「所謂市者，非特國市而已。《遺人》『五十里有市，市有候館』，則所以待賓客會同師役之事。《量人》『營軍之壘舍，量其市朝、州涂、軍社之所里』，則軍亦有市矣。」

質人掌成市之貨賄、人民、牛馬、兵器、

珍異。成，平也。會者平物賈而來，主成其平也。人民，奴婢也。珍異，四時食物。【疏】「掌成市之貨賄、人民、牛馬、兵器、珍異」者，賈疏云：「此質人若今市平準，故掌成平市之貨賄已下之事。」江永云：「《王制》『戎器不粥於市』，此得賣兵器者，弓矢、佩刀、服劍之類，皆常用器，宜不在禁限。戎器，其謂甲冑戈盾之類與？《王制》又言『兵車不中度不粥於市』，則兵車中度者亦可粥也。」案：江說是也。但此經凡云兵器，並當分爲二物，兵謂五兵，器則車輦

用器之屬，《內府》所謂良兵良器是也。鄭、賈並以兵器爲即戎器，失之。互詳《玉府》疏。注云「成，平也」者，

《調人》注同。云「會者平物賈而來，主成其平也」者，賈疏云：「會謂市人會聚買賣，止爲平物而來，質人主爲平定之，則有常估，不得妄爲貴賤也。」云「人民，奴婢也」者，謂私家奴婢，即《大宰》九職之臣妾也，與凡泛言人民指平民言者異。《說文·女部》云：「奴，奴婢，古之皐人也。」則古者奴婢，皆皐人之家没人官者爲之。然此職之人民，則鬻於市者，蓋古私家自有鬻買臣妾奴婢之法。《莊子·徐無鬼篇》說南伯子綦之子綰遇盜，刖而鬻之於齊。《曲禮》云：「買妾不知其姓則卜之。」《檀弓》云：「子碩請鬻庶弟之母。」是也。至《國語·越語》云：「王命有司大徇於軍曰：謂二三子歸而不歸，處而不處，進而不進，退而不退，左而不左，右而不右，身斬妻子鬻。」則古皐人没人官者，亦或轉鬻私家爲奴婢矣。惠士奇云：「價人民者，掌之質人；獲人民者，告之朝士。古無奴婢，謂之臣妾，亦曰人民。」云「珍異，四時食物」者，《塵人》注同。據《賈師》云「四時之珍異」是也。食物珍異，蓋若《內饗》所云珍物之屬。《公羊》昭三十一年傳云：「有珍怪之食。」何注云：「珍怪猶奇異也。」《荀子·正論篇》云：「食飲則重太牢而備珍

怪。」並與此義同。賈疏云：「見下《塵人》云『凡珍異之有滯者，斂而入于膳府』，即果實及諸食物依四時成熟者也。」

凡賣債者質劑焉，大市以質，小市以劑。鄭司

農云：「質劑，月平賣也。質大賈，劑小賈。」玄謂質劑者，

爲之券藏之也。大市，人民、馬牛之屬，用長券；小市，兵

器、珍異之物，用短券。【疏】「凡賣債者質劑焉」者，即司

市以質劑，結信而止訟之事，謂就此官所治處，定其質劑也。

賣債，債亦買也，詳《司市》注。 注鄭司農云「質劑，月

平賣也」者，《小宰》、《司市》先鄭注義並同。云「質大賈，劑

小賈」者，先鄭意質劑並爲平賣，以市大小異名。《文選》左

思《魏都賦》：「質劑平而交易。」劉逵注亦依先鄭義。云

「玄謂質劑者，爲之券藏之也」者，破先鄭月平之說。《小

宰》注云：「質劑，今言券書也。」詳彼疏。云「大市，人民馬

牛之屬，用長券，小市，兵器珍異之物，用短券」者，《小宰》

注亦云：「長曰質，短曰劑。」謂人畜等物重賈貴，則用長券

之質；器用等物輕賈賤，則用短券之劑。賈疏謂若人民則

未成甃已下，牛馬未著齒已前，亦得爲小者也。恐非鄭意。

又《曲禮》云：「獻田宅者操書致。」王引之謂「致」即「質」，

古字通。若然，市田宅者亦用質與？惠士奇云：「質人賣

債人民用長券，謂之質。王褒《僮約》，石崇奴券，古之質

歟？質許贖，魯人有贖臣妾於諸侯者，而逋逃之臣妾皆得

歸其主焉。有主來識認，驗其質而歸之。」掌稽市之書

契，同其度量，壹其淳制，巡而攷之，犯禁者

舉而罰之。稽猶考也，治也。書契，取予市物之券也。

其券之象，書兩札刻其側。杜子春云：「淳當爲純。純謂

幅廣，制謂匹長也。皆當中度量。」玄謂淳讀如「淳尸盥」之

淳。【疏】「同其度量，壹其淳制」者，惠棟云：「淳制，《管

子·君臣篇》作「綽制」，云「衡石一稱，斗斛一量，丈尺一綽

制，戈兵一度」。上經注云：「量度若今處斗斛及丈尺」。

愚謂斗斛屬量，戈兵屬度，《管子》是也。詒讓案：綽淳字

同，詳《內宰》疏。云「犯禁者舉而罰之」者，禁謂犯質劑者

之禁也。《荀子·王霸篇》云：「質律禁止而不偏，如是則

商賈莫不敦慤而無詐矣。」楊注云：「質律，質劑也。可以

爲法，故言質律也。禁止而不偏，謂禁止姦人不偏聽也。」

案：依楊說，質律蓋即此官糾禁之著爲官法者也。舉罰之

者，猶《司關》云「凡貨不出於關者，舉其貨，罰其人」。彼注

云：「沒其財而撻其人。」但此舉亦謂没人其貨。罰，依鄭

義，爲罰令出布，故《塵人》注以質布爲此官所罰犯質劑者

之泉，而《司關》注則以罰爲撻，是即《司市》市刑之扑罰，二

義不同也。至罰泉，在塵人五布當爲罰布，非質布，詳彼疏。惠士奇云：「犯禁者罰之，謂用器，兵車不中度，布帛精麤不中數，幅廣狹不中量，則淳制不壹，度量不同，故舉其貨而罰之。」注云「稽猶考也，治也」者，稽考，《宮正》

注同。賈疏云：「并取治質劑并解之，故兼云治也。」云「書契，取予市物之券也」者，賈疏云：「案《小宰職》云「聽取予以書契」。經既云書契，故知與彼同，非上質劑之市買者也。」云「其券之象，書兩札刻其側」者，《書敍》孔疏引鄭《易注》云：「書之於木，刻其側爲契，各持其一，後以相考合。」

《說文·刀部》云：「券，契也。券別之書，以刀判契其旁，故曰契券。」《釋名·釋書契》云：「契，刻也，刻識其數也。」案：此謂符券之書契也。書兩札，各持其一，則有左右，故《曲禮》云「獻粟者執右契」，注云：「契，券要也。」《老子》云：「聖人執左契，而不責於人。」右契左契合之即兩札也。刻其側者，蓋依其取予之數，刻札旁爲紀。《墨子·備城門篇》云：「必數城中之木，十人之所舉爲十挈，五人之所舉爲五挈，凡輕重以挈爲人」。數挈契字古通。十挈五挈，即刻以紀數者。亦謂之齒，《管子·輕重甲篇》云：「子大夫有五穀菽粟者，請以平買取之子，與之定其券契之齒。」《列子·說符篇》云：「宋人有遊於道，得人遺契者，歸而藏

之，密數其齒。」張湛注云：「刻處似齒，《易林·大畜》之未濟》云「符左契右，相與合齒」是也。」蓋書契與傳別質劑形制畧同，惟以兩札刻側爲異，互詳《小宰》疏。杜子春云「淳當爲純，純謂幅廣，制謂匹長也」者，此依《天子巡狩禮》爲說。《內宰》杜注義同。云「皆當中度量」者，中其廣狹長短之度量。云「玄謂淳讀如淳尸盟之淳」者，賈疏云：「後鄭不從杜子春純者，純止可爲絲爲緇，不得爲幅廣狹，故讀從《士虞禮》「淳尸盟」之淳。」段玉裁云：「讀如淳尸盟者，擬其音也。」案：段說是也。據《內宰》注，故書作敦，今書作淳，子春依《禮》逸經作純。此經則故今書並作淳，後鄭於二職並依作淳之本，淳純字通，不煩破字，故義同子春，而字則仍而不改，但引《士虞禮》以擬其音。賈說非是。凡

治質劑者，國中一句，郊二句，野三句，都三月，邦國朞。期內聽，期外不聽。謂齋券契者來訟也，以期內來則治之，後期則不治，所以絕民之好訟，且息文書也。郊，遠郊也。野，甸稍也。都，小都、大都。【疏】「凡治質劑者，國中一句」者，謂以抵冒質劑成訟者，

①「甲」原訛「乙」，據《管子》改。

此官則量其所屬之遠近，爲約期以聽之。此與《朝士》云「凡士之治有期日」遠近之期略同。蓋賣債取予之訟，當就此官平決，其附于刑者則當歸于士，二官相與爲官聯，其官法亦相因也。國中，據王國都城言之，《鄉大夫》注云：「國中，城郭中也。」云「邦國耆」者，耆，《釋文》作「基」，云「本或作耆」。阮元云：《士虞禮》注云：「古文耆皆作基。」近人以耆年字別於期會，直是俗字，然自《廣韻》已如此分別，非也。詒讓案：《說文·月部》云：「期，會也。」又《禾部》云「稭，復其時也」，引《唐書》曰：「稭，三百有六旬」。此「邦國耆」之正字當作「稭」，經典通段期爲之。基期雖聲類相通，而訓義各別。儻經果作基字，則鄭不宜無釋矣。《釋文》基當本作「期」，《朝士》「邦國耆」《釋文》作「期」，是其證也。蓋鄭本經文三「期」字本同，後人妄生分別，改邦國期字爲「耆」，惟《釋文》尚存鄭本之舊。今本《釋文》作「基」，乃傳寫之誤。

注云「謂齋券契者來訟也」者，賈疏云：「此經摠上質劑與書契來訴者。」詒讓案：《司市》云「大治大訟，小治小訟」，彼治與訟異。鄭知此治質劑即爲訟者，以與《朝士》「士治有期日」同，散文訟亦得謂之治。《公羊》僖二十八年傳云：「叔武爲踐土之會，治反衛侯。」又成十六年傳云：「公子喜時外治諸京師而免之。」何注並釋治爲

訟治，是訟治義得通也。云「以期內來則治之，後期則不治，所以絕民之好訟，且息文書也」者，此官既與訟者爲期，俾自來聽鞠，如逾期而訟主不至，則是譎詐不實，故不復聽，以絕其好訟，且省文書之煩也。云「郊，遠郊也」者，謂距國百里以內，關六鄉也。賈疏云：「以其內有國中，外田野，野，遠郊之外，明知郊是遠郊也。」云「野，甸稍也」者，《司會》注同。此文野與都別，則與《縣師》、《遂人》、《縣士》之野兼甸稍縣都言者異，詳《甸師》及《司會》疏。依此注義，則此野與《朝士》異，彼野通四等公邑，則縣置亦在野內，而六遂屬郊，稍家邑則又屬都。此經則距國二百里至三百里，無論六遂公邑家邑並屬野，而縣置之公邑則又屬都，其分合迥不同也。賈疏云：「下有都，都是四百、五百里，明此是二百里甸、三百里稍可知。」云「都，小都、大都」者，據《載師》「以小都之田任縣地，以大都之田任置地」，明通含彼二等都也。但此都與《朝士》之都亦異，彼通該三等采地，則內兼稍家邑而不及公邑；此則於大小都外，兼含縣置公邑，而稍家邑則屬野，其界域亦不同也。

廛人掌斂市歛布、總布、質布、罰布、廛

布，而入于泉府。布，泉也。鄭司農云：「歛布，列肆之稅布。」杜子春云：「總當爲僂，謂無肆立持者之稅也。」玄謂總讀如租稷之稷。稷布謂守斗斛銓衡者之稅也。質布者，質人所罰犯質劑者之泉也。罰布者，犯市令者之泉也。塵布者，貨賄諸物邸舍之稅。【疏】「掌斂市歛布、總布、質布、罰布、塵布」者，王念孫云：「市」下有「之」字，而今本脫「之」，自唐石經已然。上文《質人》云「掌成市之貨賄、人民、牛馬、兵器、珍異」。下文《泉府》云「掌斂市之不售貨之滯於民用者」。此文云「掌斂市之歛布、總布、質布、罰布、塵布」。三「之」字文同一例。《載師》注、《載師》疏及《序官》疏三引此文，皆有「之」字。」案王說是也。《釋文》云：「歛，本或作次。」丁晏云：「歛，段借字。《說文·糸部》：「歛，績所緝也。」非此經之義。」詒讓案：《釋文》或本是也。《載師》先鄭注引此經亦作「次布」，與或本正同。此作歛者，疑涉下總布而誤增糸形。江永云：「歛布者，市之屋稅；總布者，貨賄之正稅；塵布者，市之地稅也。古者建國，王立朝，后立市，國中大小之肆，皆是公家之財所成，故有屋稅。塵者，停貨物於此，則有地稅。《閭師》云：「任商以市事，貢貨賄。」總布正是貨賄之稅。」又云：「官獨以塵名者，舉塵以該肆也。五布惟總布最多，地稅有定，質劑物

微，罰布無常。貨賄充牣市塵，源源而至，非塵人所能盡稽，故必使每肆之肆長斂之，入於塵人。此總布是商賈之正賦，《大宰》所謂市賦，《閭師》所謂商賈貨賄者，此也。布即貨賄。」案：江說是也。凡商賈有屋稅，塵稅，又有所齋貨物之稅，此三者爲九賦之市賦，乃正稅也。此外又有力征，即九職貨賄之貢。總布者，以貨物稅爲正，而亦兼有貢，故謂之總，明通賅賦貢也。市征雖亦有它物，而以泉布爲多，故有五布，即《泉府》所云「市之征布」也。《管子·戒篇》云「市正而不布」，蓋非周法，與此經不合。五布之義，以江爲允，今從之。詳後疏。 注云「布，泉也」者，《外

府》注同。鄭司農云「歛布，列肆之稅布」者，歛亦當作「次」，此即市肆之屋稅也。賈疏云：「謂在行肆坐賣物之常稅也。」丁晏云：「歛依字當爲次，即思次、介次之稅，故先鄭以爲列肆之稅布。」江永云：「列肆有稅，猶民之塵里有稅。」杜子春云「總當爲僂」者，《肆長》杜注同。《載師》先鄭注引此經作「僂布」，亦從杜讀。段玉裁云：「杜蓋謂爲聲之誤，二字雙聲也。」云「謂無肆立持者之稅也」者，《說文·人部》云：「僂，僂互不齊也。」《曲禮》「毋僂言」，鄭注云：「僂猶暫也。」《國語·周語》韋注云：「僂，進退上下無列也。」杜以無肆立持者僂互不齊，故其稅謂之僂布也。江

永云：「周官所注者，征諸商賈也。若無肆，立持者販夫販婦，鬻賣小物，暫立即去耳，豈征其貨乎？」案：江說是也。云「玄謂總讀如租稔之稔」者，段玉裁云：「鄭君讀如稔者，擬其音耳，非讀爲也。」「租稔」當是「組總」之譌，見《巾車職》，轉寫譌從禾也。」云「總布謂守斗斛銓衡者之稅也」者，斗斛銓衡爲市中公用之器，使人守之，或有出稅也。銓衡，詳《大行人》疏。王與之云：「總布，肆長總斂在肆之布也。貨入於肆，肆長隨其所貨之物收其稅，總而計之，其數非一，謂之總布。」江永云：「杜、鄭二說皆非。守斗斛銓衡，乃閒民傭力於商賈者。轉移執事之人，本身自有夫布，不當征其稅。王說得之。肆長陳其貨賄，辨其名實而平正之，又斂其總布，正是貨物之布。貨有貴賤，賄有輕重，舉其總數以計布，故謂之總布。」案：王、江說是也。莊存與、蔣載康、莊有可說並同。互詳《肆長》疏。云「質布者，質人所罰犯質劑者之泉也」者，即《質人》云「犯禁者舉而罰之」是也。賈疏云：「謂犯質劑違券書罰泉也。」王與之云：「質布，質人所稅質劑者之布也。質人賣價之質劑，如今田宅，官給券以收稅，謂之質布。」江永云：「罰則當入罰布，何爲別名質布？此即償質劑之布也。古未有紙，大券小券當以帛爲之，交易以給買者，而賣者亦藏其半。質劑蓋

官作之，其上當有璽印，是以量取買賣者之泉以償其費，猶後世契紙有錢也。」案：王、江說亦是也。莊存與、蔣載康、曾釗、莊有可說並同。云「罰布者，犯市令者之泉也」者，《職金》「掌受士之金罰貨罰」，注云：「罰，罰贖也。」此罰布亦即市中罰贖之泉，所謂貨罰。《周書·大匡篇》說均市之法云「以罰助均」，亦謂此也。賈疏云：「謂司市有教令，其人犯之，使出泉。」江永云：「罰布有三：質人罰度量淳制之犯禁者，一也；胥師罰詐僞飾行價隱者，二也；胥罰有罪者，三也。而凡犯禁之類，如不當粥而粥，乘天患而貴價，皆有罰布可知矣。鄭注謂罰犯市令者之泉是矣，而質人罰犯質劑者之泉，即是詐僞飾行價隱者之罰，乃別之人質布，則罰布之類不該矣。」案：江說亦是也。云「塵布者，貨賄諸物邸舍之稅」者，《王制》「市塵而不稅」，注云：「塵，市物邸舍。」《說文·人部》云：「市居曰舍。」賈疏云：「謂在行肆，官有邸舍，人有置物於中，使之出稅，故云塵布也。」詒讓案：《孟子·公孫丑篇》趙注云：「塵，市宅也。」蓋凡民居在里爲民宅，在市爲邸舍，其區域並謂之塵。此塵人所斂者，市中之塵布，故鄭偏舉貨物邸舍爲釋。邸舍即市宅也。詳《敘官》疏。江永云：「塵與歛異者，歛是賣物之肆，塵是停儲貨物之舍，賣者買者皆有之，今時謂之棧

房。賣者肆中不能容，則停貨物於廛；買者當時不能即運，又或儲之以待時鬻，亦須廛。此廛亦是官物，故當有稅。」案：江說固是，但市肆狹隘，止容販物，商賈之家人或於肆外近市之地別居者，則亦當納廛布，猶農民之受廛者有里布，則廛固不徒儲藏貨物之舍矣。凡屠者，斂其

皮角筋骨，入于玉府。以當稅，給作器物也。其無皮角及筋骨不中用，亦稅之。【疏】「凡屠者，斂其皮角筋

骨，入于玉府」者，《說文·尸部》云：「屠，剝也。」屠六畜者亦於市為肆。《莊子·讓王篇》：「屠羊說曰：『願復反吾屠羊之肆』」是也。凡殺牛羊等，則有皮角筋骨，故亦斂之，與玉府、掌皮為官聯也。賈疏云：「屠者謂屠殺豕羊之類，其人亦有地稅。因其屠，即取皮角筋骨堪飾器物者，使人玉府也。」注云「以當稅，給作器物也」者，據《角人》「徵齒

角」，《羽人》「徵羽翮」，並云「以當邦賦之政令」。通言之，賦即稅也。屠者居肆，有牲畜之物稅，又有市廛之地稅，本身又有民職之貢，故使人皮角筋骨等以當之。既入則輸之玉府，給作器物也。此賦稅各有定限，儻所斂者多，溢於所當賦稅之數，則亦依平價以官泉償之矣。云「其無皮角及筋骨不中用，亦稅之」者，賈疏云：「謂若羊牛有皮角及筋

骨，其豕則無之類，是不中用，亦使出物之稅，以當邦賦之處。」凡珍異之有滯者，斂而入于膳府。故書滯或作廛。鄭司農云：「謂滯貨不售者，官為居之。貨物沈滯於廛中，不決，民待其直以給喪疾，而不可售賈賤者也。廛謂市中之地未有肆而可居以畜藏貨物者也。《孟子》

曰：『市廛而不征，法而不廛，則天下之商皆說而願藏於其市矣。』謂貨物儲藏於市中而不租稅也，故曰「廛而不征」。其有貨物久滯於廛而不售者，官以法為居取之，故曰「法而不廛」。玄謂滯讀如沈滯之滯。珍異，四時食物也。不售而在廛，久則將瘦臞腐敗。為買之人膳夫之府，所以紓民事而官不失實。【疏】「凡珍異之有滯者，斂而入于膳府」者，此與膳夫、泉府為官聯也。但此為滯物之珍異，中王后世子之膳羞者；泉府所斂者，則為滯物之中民用者，不必珍異也。賈疏云：「謂官以泉府之財買取之，入于膳夫之府，以供官食。」注云「故書滯或作廛」者，謂故書有二

本，一本作滯，一本作廛也。曾釗云：「《泉府》滯，故書作廛。《詩》『下民卒瘁』。《釋文》『本又作廛，沈本作瘁』。《載師》及此職序官注皆云「廛故書作壇，杜子春讀為廛」。俾與滯形近，故滯書為俾，變作瘁；瘁與廛聲近，又書為廛。」徐養原云：「此經以滯為廛，《泉府》以滯為瘁。廛在

仙韻，瘴在早韻，一韻本通。滯在祭韻，古祭、泰、夬、廢，往往與元、寒、桓、刪、山、仙相出入，如讞從獻聲，蟬讀如芮是也。然則塵瘴與滯，古蓋通用。」案：徐說是也。鄭司農云「謂滯貨不售者，官爲居之」者，謂如後《泉府》云「斂市之不售貨之滯於民用者」也。先鄭雖以貨物沈滯爲說，然從故書或本作塵，又以珍異爲貨，與後鄭義並異。《國語·晉語》：「叔向曰，假貸居賄。」韋注云：「居，蓄也。」《史記·呂不韋傳》云：「此奇貨可居。」《漢書·貨殖傳》云：「廢居居邑。」注：如淳云：「居賤物於邑中，以待貴也。」此官爲居之，亦謂官以直收蓄之，以待用也。云「貨物沈滯於塵中不決，民待其直以給喪疾，而不可售賣賤者也」者，此釋故書或本作塵之義。謂貨物沈滯不可售，積貯塵中者，即謂之塵也。民之齋物求售者，或急待其直，以給喪疾之費；今既沈滯，則將抑賈以冀速售，故官爲以平賈居之，使民喪疾得給，而官用亦不求而備也。云「塵謂市中之地未有肆而可居以畜藏貨物者也」者，即前後鄭注所謂貨賄諸物邸舍也。《載師》先鄭注云：「塵，市中空地，未有肆。」此爲邸舍，故不云空地。後鄭不從作塵之本，故不用先鄭義。賈疏謂「但塵雖非肆，是官之邸舍，不得爲空地，故後鄭不從」。蓋不知先鄭此注義與《載師》注小異，若空地全無舍，

豈可以畜藏貨物乎？引《孟子》曰「市廛而不征，法而不廛，則天下之商皆說而願藏於其市矣」者，《公孫丑篇》文。先鄭以彼塵亦市中畜藏貨物之處，故引以證故書塵字之義。賈疏云：「周則廛有征，上文廛布是也。云不征者，非周法。又云「法而不廛」，則與此經同，故先鄭引之，後鄭增成其義也。」案：《孟子》之廛，爲市之地稅，賈謂即廛布是也。《孟子》之征，爲市之正稅，亦即上文之總布是也。與廛征異。依此經則市有廛，又有征，《孟子》之文不可通於此也。云「謂貨物儲藏於市中而不租稅也，故曰廛而不征」者，《釋文》云：「褚，本或作貯，又作褚。藏，劉本作葬。」丁晏云：「《集韻》：「貯，積也。或作褚，著，通作褚。」後《賈師》注亦有褚字。阮元云：「褚，从宁者聲，宁之或字也。宁者，辨積物也。」詒讓案：《說文·貝部》云：「貯，積也。」與宁聲義同，褚即貯之俗。褚，聲近段借字。《左傳》襄三十一年「取我衣冠而褚之」，杜注云：「褚，畜也。」藏葬亦聲之誤。先鄭引《孟子》證故書之廛，又以此經轉釋《孟子》之義，欲其互相證明也。依先鄭義，貨物儲藏於市中，所謂廛也，不租稅，所謂不征也。不征，通廛稅貨物稅言之。《孟子》趙注云：「廛，市宅也。古者無征，衰世征之。《王制》曰「市廛而不稅」。《周禮·載師》曰「國宅無征」。案：趙

義蓋亦以征爲即廛稅，與先鄭說略同。攷《王制》與《大戴禮記·王言篇》、《管子·五輔篇》並有「市廛而不稅」之文，與《孟子》正同。《王制》上文又云「公田藉而不稅」，則是殷之助法，故後鄭彼注及孔疏以市不稅亦是殷制。彼注又云：「廛，市物邸舍，稅其舍，不稅其物。」則廛即爲地稅，征自爲貨物之稅，後鄭不從先鄭說。尋文究義，當以後鄭爲允。又《載師》「國宅無征，廛征二十而一」。國宅不得關市廛，趙引彼爲證，亦失之。云「其有貨物久滯於廛而不售者，官以法爲居取之，故曰法而不廛」者，亦以此經與《孟子》互相釋。謂以法爲居取之，即此經斂珍異之有滯者，及《泉府》「斂市之不售，貨之滯於民用者」是也。不廛，謂不令久滯於市。《孟子》趙注云：「法而不廛者，當以什一之法征其地耳，不當征其廛宅也。」案：趙以「法」爲征地稅什一之法，與先鄭說異。地稅十一者，蓋兼據《遂人》「上中下地，皆奇受一廛爲釋。不知《孟子》之廛，專屬市宅，不與夫田並授；若市宅之地稅，則又昧於《載師》「園廛二十而一」之內，不得謂廛宅之征外，別有地稅什一之法。趙說與此經不合，不足據。云「玄謂滯讀如沈滯之滯」者，後鄭從今書作滯，破先鄭說。《說文·水部》云：「滯，凝也。」沈滯與凝義相近。段玉裁云：「鄭君從滯讀如沈滯，不獨擬其音，

亦取其義同也。」云「珍異，四時食物也」者，《質人》注同。以經云「入于膳府」，故知爲食物中之珍異也。云「不售而在廛，久則將瘦臞腐敗」者，《釋文》云：「瘦，本又作臞。臞，又作臞。」案：《說文·疒部》云：「瘦，臞也。」瘦臞字同。《集韻·四十九有》云：「瘦，或作臞。」臞，賈疏述注亦作臞，云：「《考工記·梓人》云『大胃臞後』。臞是細小之義，故云瘦臞腐敗，是以爲買之。」呂飛鵬云：「疏所據注作臞。《釋名》：『臞，約少之言也。』《太平御覽》引作臞瘦。」詒讓案：臞瘦字當作臞。作臞者，字形相近而譌。詳《大司徒》及《梓人》疏。云「爲買之，入膳夫之府」者，明此斂珍異爲以平賈買之，不爲當賦稅也。珍異共膳羞，故人膳夫之府。《天官·敘官》膳夫有府二人，是有府藏也。云「所以紓民事而官不失實」者，《說文·糸部》云：「紓，緩也。」民貨不滯則其急紓，官得珍異，是不失實也。桓寬《鹽鐵論·本議篇》云：「開委府于京，以籠貨物，賤即買，貴則賣，是以縣官不失實，商賈無所貿利，故曰平準。」此正義本於彼。

周禮正義卷二十八

胥師各掌其次之政令，而平其貨賄，憲

刑禁焉。憲，表縣之。【疏】「各掌其次之政令」者，次謂

二十肆之介次也。詳《司市》疏。賈疏云：「案《序官》云

「胥師二十肆則一人」，故云「各掌其次之政令」。」云「憲刑

禁焉」者，賈疏云：「刑謂市中之刑憲徇扑，禁謂市中之禁。

謂司市當時設禁令，非士師五禁也。」案：賈說是也。禁即

司市偽飾之禁四十八之屬，此與《小司寇》《布憲》所憲刑

禁，通咳五禁者異。注云「憲，表縣之」者，《小宰》注義

同。此謂書揭市刑市禁，表縣市門，豫相戒敕。司市市刑

之憲罰，則謂市人犯刑禁者，書縣其姓名罪狀以示戮，與此

表縣同而事異也。察其詐偽、飾行、僞慝者，而

誅罰之。鄭司農云：「僞，賣也。慝，惡也。謂行且賣姦

僞惡物者。」玄謂飾行僞慝，謂使人行賣惡物於市，巧飾之，

令欺誑買者。【疏】「察其詐偽、飾行、僞慝者而誅罰之」

者，此即司市以賈民禁僞而除詐之事也。誅謂以司市市刑

憲徇扑之刑施之，罰謂罰令出泉，即《塵人》之「罰布」是也。

注鄭司農云「僞，賣也」者，此經云飾行僞慝，明僞據賣者而言，故從本義為賣。《司市》、《賈師》為買者，其轉訓

也。詳《司市》疏。云「慝，惡也」者，《毛詩·小雅·民勞》

傳文。《小行人》注同。云「謂行且賣姦僞惡物者」者，先鄭

讀行如字。《說文·貝部》云：「賁，徇也。」《行部》云：「徇，

行且賣也。」僞賣字同，故先鄭亦以行且賣為釋。賈疏云：

「先鄭云「謂行且賣姦僞惡物」，以「且」閒之，則行是「行步」

之行，不為「行濫」之行，故後鄭不從，以為「行濫」解之。」武

億云：「據此，先鄭解行字，不與飾連文，是讀從飾字絕句，

「行僞慝」者又為句。《司市》「以賈民禁僞而除詐」，又云

「凡市偽飾之禁」，可證先鄭讀。」案：先鄭釋行為「行步」，

則與「飾」文義不屬，其意當如武讀，但於文不順，不如後鄭

以「飾行」屬讀之允也。云「玄謂飾行僞慝，謂使人行賣惡

物於市，巧飾之，令欺誑買者」者，李光坡云：「行，不堅固

也。」王引之云：「後鄭注乃淺陋人所改，非其原本也。案

疏，是後鄭以「行」為「行濫」，與先鄭異。若如今本，云「使

人行賣」，則與先鄭同矣，疏何以云「後鄭不從」乎？又

案：《釋文》「行，下孟反」，若是行步之行，不得有「下孟」之

音。《司市》「凡治市之貨賄、六畜、珍異，利者使阜，害者使

亡」。後鄭注云：「利，利於民，謂物實厚者。害，害於民，謂物行苦者。」《釋文》：「行，遐孟反。又如字。聶，胡剛反。苦音古。」遐孟即下孟也。行濫即行苦也。古人謂物脆薄曰行，或曰苦，或曰行苦，或曰行敝，或曰行濫。《九章算術·盈不足章》：「醇酒一斗，直錢五十；行酒一斗，直錢一十。」行酒謂薄酒也。《潛夫論·浮侈篇》曰：「以完爲破，以牢爲行。」行與牢正相反，以牢爲行，猶言以堅爲脆也。《方言》：「揄鋪、輹輹、輹輹、輹輹，輹輹也。」郭璞注曰：「皆謂物之行敝也。」《唐律·雜律》曰：「諸造器用之物及絹布之屬，有行濫短狹而賣者，杖六十。」注曰：「不牢謂之行，不真謂之濫。」濫即《方言》之輹輹。輹輹爲行敝，故又謂之「行濫」。後鄭以行爲行濫，正謂此也。今京師人謂貨物不牢曰「行貨」，與聶氏胡剛反之音正合。取行苦之物，飾以欺人，故曰「飾行」。張衡《西京賦》說市曰「鬻良雜苦，蚩眩邊鄙」，則飾行之謂也。「飾行」與「價廉」相對爲文，後鄭之說善矣。案：王說深得注指。此注舊本疑當作：「謂使人賣行惡物於市。」今本誤到其文，遂失其義耳。聽其小治小訟而斷之。【疏】「聽其小治小訟而斷之」者，賈疏云：「上《司市》已云「胥師、賈師洫於介次，而聽小治小訟」。上總言之，此正當職，故申敘之也。」

賈師各掌其次之貨賄之治，辨其物而均平之，展其成而奠其賈，然後令市。辨，別也。【疏】「各掌其次之貨賄之治」者，亦謂介次也。賈疏云：「案《序官》云「賈師二十肆則一人」，與胥師數同，故云各掌其次之貨賄之治也。」云「辨其物而均平之」者，即《胥師》云「平其貨賄」，二官相佐助也。云「展其成而奠其賈」者，莫亦當爲「定」。鄭不釋者，以冢上《司市》注，略之。賈疏云：「以其知物價故也。」注云「辨，別也」者，《天官·敘官》注同。凡天患，禁貴儻者，使有恒賈，恒，常也。謂若諸米穀棺木，而睹久雨疫病者貴賣之，因天災害阨民，使之重困。【疏】「凡天患」者，與《司救》云「凡歲時有天患」，義同。彼注云：「謂裁害也。」注云「恒，常也」者，《說文·二部》云：「恆，常也。」恒即恆之隸變。云「謂若諸米穀棺木，而睹久雨疫病者，貴賣之，因天災害阨民，使之重困」者，此亦訓儻爲賣也。諸即貯字，見《塵人》注。久雨則米穀貴，疫病則棺木貴。《漢書·刑法志》云：「諺曰「鬻棺欲歲之疫」，非憎人欲殺之，利在於人死也。」四時之珍異亦如之。薦宗廟之物。【疏】「四時之

珍異亦如之」者，此亦謂食物，與《質人》、《廛人》珍異義同，亦禁其貴價，使有恒賈也。

注云：「薦宗廟之物」者，賈

疏云：「案《月令》，四時有珍異之物，皆云先薦寢廟，故鄭以爲薦宗廟，舉重而言也。」凡國之賣價，各帥其屬而嗣掌其月。價，買也。故書賣爲買。鄭司農云：

「謂官有所斥賣，賈師帥其屬而更相代直月，爲官賣之，均勞逸。」【疏】注云「價，買也」者，《司市》注同。價兼賣買二義，詳《司市》疏。云「故書賣爲買」者，段玉裁云：「此從今書作賣也。必從今書者，價雖可訓賣，但此經以官斥賣爲言，則賣在上，價在下，訓買爲長，不當云賣價也。」詒讓

案：《司市》、《質人》並有「賣價」之文，故後鄭不從故書作「買價」。鄭司農云「謂官有所斥賣」者，賈疏云：「斥謂指斥出之。故鄭注《大宰》亦云：『幣餘，謂占賣國之斥幣。』義與此同也。」案：斥賣，詳《大宰》疏。徐養原云：「若從故書賣爲買，則價仍訓賣，故先鄭云『有所斥賣』，正釋價字之義。」云「賈師帥其屬而更相代直月，爲官賣之，均勞逸」者，《詩·小雅·杕杜》云：「繼嗣我日。」鄭箋云：「嗣，續也。」《爾雅·釋詁》云：「嗣，繼也。」直月，謂人當一月。《國語·晉語》云：「臣敢煩當日。」韋注云：「當日，直日

也。」直月與直日義同。謂帥其屬每月相繼續更代當直，爲官掌賣價之事也。賈疏云：「賈師之下有羣賈，亦二肆則一人者，使之更互相代也。」李鍾倫云：「屬，蓋即肆長是也。疏言『賈師下有羣賈，二肆則一人』，於經無之。」案：李說是也。《司市》「以賈民禁僞而除詐」，賈彼疏謂「賈民爲屬於賈師諸官者」。故此疏又謂賈師之屬別有羣賈，蓋隱據彼賈民爲說，實則兩疏皆非也。凡師役會同，亦如之。【疏】「凡師役會同亦如之」者，謂道路之市及軍市所在，亦從司市而治其市事也。賈疏云：「此亦從行所在當直，爲官賣買也。」

司隸掌憲市之禁令，禁其鬪蹶者與其

蹶亂者，出入相陵犯者，以屬遊飲食于市者。蹶，謹也。鄭司農云：「以屬遊飲食，羣飲食者。」

【疏】「掌憲市之禁令」者，此官掌市刑，即司市以刑罰禁蹶之事也。憲亦謂表縣之，以示十肆之人也。云「禁其鬪蹶者與其蹶亂者，出入相陵犯者」者，此掌市中亂民、罷民之禁。鬪蹶，謂爭鬪而蹶蹶，《調人》注云「鬪怒辯訟者也」，與此義略同。蹶，古暴字。《說文·本部》云：「暴，疾有所趣

也。」引申爲暴戾字。暴亂，以暴作亂者。《禁暴氏》云：「掌禁庶民之亂暴力正者。」此禁市民之暴亂，與彼爲官聯也。陵，交之段字。《說文·攴部》云：「交，越也。」云「以屬遊飲食于市者」者，禁市中惰遊之民也。遊，游之俗，詳《師氏》疏。

注云「蹕，謹也」者，《說文·器部》云：「蹕，聲也。」又《言部》云：「謹，謹也。」《一切經音義》引《三倉》云：「謹，言語詢詢也。」是蹕謹同義。《銜枚氏》云：「掌司蹕，禁蹕呼歎鳴于國中者，行歌哭于國中之道者。」此禁市民之蹕蹕，亦當通蹕蹕呼歎鳴及行歌哭之等，與彼爲官聯也。鄭司農云「以屬遊飲食，羣飲食者」者，《州長》注云：

「屬猶聚也。」聚羣義同。謂羣聚遊於市而相共飲食也。

《書·酒誥》云：「厥或誥曰：羣飲，汝勿佚，盡執拘以歸於周，予其殺。」又《大戴禮記·曾子立事篇》盧注引《尚書大傳》云：「古者聖帝之治天下也，五十以下，非蒸社不敢遊飲，唯六十以上遊飲也。」此即古屬遊飲食之禁。賈疏云：

「此屬遊飲食，謂聚而羣遊飲食者禁之，若不羣遊則得飲。」洪頤煊云：「《管子·立政篇》：『圜屬羣徒不順於常者，閭有司見之，復無時。』屬遊與『圜屬』義同。」若不可禁，

則搏而戮之。【疏】「若不可禁，則搏而戮之」者，《說

文·手部》云：「搏，索持也。」案：搏猶今言捕也。戮即《司市》市刑憲徇扑，《胥》云「撻戮」是也。

司稽掌巡市，而察其犯禁者與其不物者而搏之。不物，衣服視占不與衆同及所操物不如品

式。【疏】「掌巡市而察其犯禁者」者，即犯司市、質人、胥師、賈師、司隸五官之禁者。此官常巡行五肆之敘，司察之也。云「與其不物者而搏之」者，此則在司市諸官市禁之外者，故特舉之。王應電云：「搏之歸於胥師。」注云「不

物，衣服視占不與衆同及所操物不如品式」者，《司門》注同。又《野廬氏》注云：「不物，謂衣服操持非比常人也。」

義亦同。《方言》云：「占，視也。凡相竊視，南楚或謂之占。」案：占，覘之段字，詳《掌次》疏。物猶法也，不物謂不如常法。《左》隱五年傳云：「講事以度軌量謂之軌，取材以章物采謂之物，不軌不物謂之亂政。」與此不物文異而義略同。此皆形迹詭異，或爲姦褻，故搏之。掌執市之

盜賊，以徇，且刑之。【疏】「掌執市之盜賊，以徇且

刑之」者，此即司市以刑罰去盜之事也。賈疏云：「上《司市》市中之刑，無過憲徇扑，附於刑者歸於士，此亦無過小

盜徇扑而已，故徇以徇且刑之。若直徇者，不必有刑，其刑者必徇，故徇刑兩言之也。」

胥各掌其所治之政，執鞭度而巡其前，

掌其坐作出入之禁令，襲其不正者。作，起也。

坐起禁令，當市而不得空守之屬。故書襲爲習，杜子春云：「當爲襲，謂掩捕其不正者。」【疏】「各掌其所治之政」者，此官所治之地，蓋即內宰、司市之敘，詳《司市》疏。賈疏云：「案《序官》『胥二肆則一人』，故亦云『各掌其所治之政』，則一人掌二肆者也。」云「執鞭度而巡其前」者，謂巡行肆前近市門之處，《司市》云「凡市入則胥執鞭度守門」是也。鞭度，亦詳彼疏。云「掌其坐作出入之禁令」者，與司虢所憲禁令同。注云「作，起也」者，《大司馬》、《考工記總目》、《梓人》注並同。《說文·人部》云：「𠂔，起也。」作即𠂔之隸變。云「坐起禁令，當市而不得空守之屬」者，蓋謂無肆立持者，索市不得，乃空守其所齋之物。《荀子·哀公篇》云「好肆不守折」，即空守之義。《野廬氏》云「以幾禁行作不時者」，注云：「不時，不夙則莫者也。」此經坐作出入，猶彼云行作，三市各有定時，當亦兼有不時之禁矣。

云「故書襲爲習，杜子春云當爲襲」者，徐養原云：「襲，習古字通。掩襲與重襲義雖異，而音則同，故亦通作習。《左傳》襄十三年『歲習其祥』，《禮記·表記》注引傳『習』作『襲』。」云「謂掩捕其不正者」者，《國語·晉語》韋注云：「襲，掩也。」《方言》云：「掩，索取也。」謂伺其不意而捕取之，恐其逸失也。凡有罪者，撻戮而罰之。罰之使出布。【疏】「凡有罪者，撻戮而罰之」者，罪，經例用古字，當作「皐」，詳《甸師》疏。撻即司市市刑之大刑扑罰也。此謂市人有罪而未麗於刑者，故戮而罰之，不歸於士。注云「罰之使出布」者，以經於撻戮之外，別言罰之，故知爲罰布，非市刑三罰也。賈疏云：「即上《廛人職》云『罰布』，一也。故彼注云：『罰布者，犯市令之布也。』」

肆長各掌其肆之政令。陳其貨賄，名

相近者相遠也，實相近者相爾也，而平正之。爾亦近也。俱是物也，使惡者遠善，善自相近。鄭司

農云：「謂若珠玉之屬，俱名爲珠，俱名爲玉，而賈或百萬，或數萬，恐農夫愚民見欺，故別異令相遠，使賈人不得雜亂以欺人。」【疏】「各掌其肆之政令」者，賈疏云：「此肆長，

謂一肆立一長，使之檢校一肆之事，若今行頭者也。」云「陳其貨賄，名相近者相遠也，實相近者相爾也，而平正之」者，此即司市以陳肆辨物而平市之事也。 注云「爾亦近也」者，爾即邇之借字。《爾雅·釋詁》云：「邇，近也」。

《燕禮》、《特牲》、《少牢饋食禮》注並云「爾，近也」。「云「俱是物也，使惡者遠善，善自相近」者，謂物別爲肆，同肆之中，又辨其善惡，使同實者相從也。《淮南子·覽冥訓》云：

「若韋之與革，遠之則邇，近之則遠。」即此經名實遠近之義。鄭司農云「謂若珠玉之屬，俱名爲珠，俱名爲玉，而賈或百萬，或數萬，恐農夫愚民見欺，故別異令相遠，使賈人不得雜亂以欺人」者，與後鄭義同。 斂其總布，掌其

戒禁。 杜子春云：「總當爲僂。」【疏】「斂其總布」者，江

永云：「塵人有斂布、總布、塵布。總布者，貨賄之正稅，三布中總布最多，故使每肆一人之肆長，隨時斂之以歸塵人，而塵人以入泉府也。」案：江說是也。亦詳《塵人》疏。

注杜子春云「總當爲僂」者，《塵人》杜注同。彼後鄭注不從子春說，別釋爲守斗斛銓衡者之稅，則此職義亦當與彼同。今引杜說而不破者，蓋以已詳於彼，故不復出，非於此轉從杜讀也。賈疏謂此肆長各一肆，故罰其無肆立持之布，以爲後鄭從杜，失之。

泉府掌以市之征布斂市之不售貨之滯

於民用者，以其賈買之，物褐而書之，以待不時而買者。買者各從其抵，都鄙從其主，國人郊人從其有司，然後予之。故書滯爲瘡，杜

子春云：「瘡當爲滯。」鄭司農云：「物褐而書之，物物爲揃書，書其賈，褐著其物也。不時買者謂急求者也。抵，故賈也。主者，別治大夫也。然後予之，爲封符信，然後予之。」

玄謂抵實抵字，抵，本也。本謂所屬吏主有司是。【疏】

「掌以市之征布」者，即大宰九賦市賦之泉也。賈疏云：

「即上《塵人》斂布已下之布，並入泉府而藏之，故摠云征布也。」惠士奇云：「在國曰邦布，外府掌之。在市曰征布，泉

府掌之。」云「斂市之不售貨之滯於民用者」者，於，段玉裁校改「于」，又云：「售者，讎之俗字，不當施於經文，當改正。」案：段說是也。於，經例用古字，皆作「于」。售與《調

人》仇讎字同而義異。《漢書·食貨志》說王莽擬《周官》法，並作讎字，亦經本作讎之證。此即司市以泉府同貨而

斂賒之事，亦與塵人爲官聯也。謂若《國語·越語》云：

「賈人夏則資皮，冬則資絺，早則資舟，水則資車。」夏皮冬

締，旱舟水車，則滯於民用之物，不能急售者也。云「都鄙從其主、國人郊人從其有司」者，賈疏云：「都鄙者，可兼大小都及家邑。國人者，謂住在國城之內，即六鄉之民也。郊人者，即遠郊之外，六遂之民也。」案：國即國中，謂城郭中。郊，六鄉外之餘地。經言國人，以該國外之六鄉；言郊人，以該郊外之六遂公邑。《秋官·鄉士》掌國中，遂士掌四郊，亦其比例也。賈說未析。

注云：「故書滯爲痺，

杜子春云，痺當爲滯」者，故書滯誤爲痺，猶《塵人》故書滯或作塵也，詳彼疏。杜意蓋謂經云「斂市之不售貨之滯於民用」，爲民不急用之貨，故沈滯而不售，則官爲斂之。《漢·食貨志》載王莽時，令衆民賣買五穀布帛絲縣之物，周於民用而不讎者，均官有以考檢厥實，用其本賈取之。莽制正本此經。審繹彼文，疑劉歆所傳《周官經》，滯於民用，滯亦作痺，而讀爲痺，痺與周義相近。杜氏之學受之於歆，而此讀與《漢志》異，則杜君不盡墨守其師說矣。鄭司農云「物褐而書之，物物爲揃書，書其賈，褐著其物也」者，褐，嘉靖本誤「揭」，今據岳本正。《職幣》云：「以書褐之。」注云：「褐之，若今時爲書以著其幣。」《說文·巾部》云：「前，幡幟也。」又《竹部》云：「箋，表識書也。」案：前箋聲義亦略同。揃即前之俗。《集韻·二仙》云：「菓，箋識也。」

或从手。」又《說文·木部》云「褐，褐櫟也」，引《春秋傳》曰：「褐而書之」。《一切經音義》引《說文》云：「褐，櫟杙也。」又《周禮》云：「褐而書之也。」蓋許君即引《周禮》此文。今本作「春秋傳」者，傳寫之誤。此云物褐而書之，謂每物揃書其賈直於杙，附著其物之側以表識之也。亦詳《職金》疏。云「不時買者，謂急求者也」者，謂來買無定時，急求待用，若下祭祀，喪紀是也。《漢·食貨志》載王莽時，劉歆言周有泉府之官收不贖，與欲得，即《易》所謂理財正辭禁民爲非者也。先鄭云急求，即劉歆所謂欲得者也。云「抵，故賈也」者，《國策·中山策》高注云：「抵，當也。」謂依故賈入時相當之賈直予買者。凡貨滯不售而官取之，其賈必賤，民買之，官仍依其故賈者，不欲取其贏以病民。若本賈貴而今賤，則民不必從官買矣。賈疏謂「假令官前買時貴，後或賤，今依故賈與之，即損民，故不得依故賈以解抵」。此不足以破先鄭之義也。但此文云「各從其抵」，與下經「從其主」「從其有司」文例正同，故後鄭不從先鄭而謂抵即主、有司耳。云「主者，別治大夫也」者，謂治三等采邑之官，即《公羊》定十一年傳所謂「采宰」。《天官》釋文引鄭云：「宰，主也。」故邑宰亦謂之主。《大宰》云：「乃施則于都鄙，而建其長，立其兩，設其伍。」謂采邑之君，立兩卿五

大夫。此主則別治各邑之大夫，與五大夫異，故云「別治大夫也」。云「然後予之，爲封符信，然後予之」者，賈疏云：「封符信，謂有符信文書，皆封題之。計買者得主及有司，然後賣不須封信文書，但於理無害，故後鄭不破之也。」案：賈說非也。此謂欲買官物者，必從其所屬主有司爲封符信，致之泉府，泉府乃以物予之，所以防檢猾商用賤直販官物，而貴賣之以病民也。後鄭亦同此義。云「玄謂抵實抵字，抵，本也」者，段玉裁云：「實抵字者，猶《媒氏》云「純實紃字也」。才聲誤爲屯聲，從木誤爲從手，其理一也。《說文》云：「抵，木根也。」韓非·解老曰：「直根者，書之所謂抵也，木之所以建生也。」云「本謂所屬吏主有司是」者，賈疏云：「鄭欲解抵與主有司爲一，故云主有司是也。」江永云：「自比長、鄰長以上，皆可謂之主有司。其爲公邑稍縣都，倣鄉遂之制，各有其主，不必公邑大夫與食采大夫然後謂之主也。從泉府買一不時須之物，必關白大夫，恐難乎其爲買矣。」案：江說是也。

凡賒者，祭祀無過旬日，喪紀無過三月。鄭司農云：「賒，賁也。以祭祀、喪紀，故從官賁買物。」【疏】「凡賒者」者，亦以所斂市之滯物，轉賁與民也。

注鄭司農云「賒，賁也」者，

《說文·貝部》云：「賒，賁買也。賁，貸也。」案：此經以凡賒者與凡民之貸者並言，賒即所謂賁買，貸即所謂賁也。賒者，先賁物而後償直，是雖賁而仍買，故許兼云賁買。賁者，先賁泉物而後仍償以泉物，則是徒賁，故許唯云貸也。凡賒，從官買物，而約期以付賁，不得過旬日、三月，而不取息。貸則從官借物，而約期以償物，得過旬日三月而有息。此其事異，而所以利民則一也。云「以祭祀、喪紀，故從官賁買物」者，明惟此二事得從官賁買物，它小事不得也。《漢書·食貨志》載王莽令民欲祭祀喪紀而無用者，錢府以所入工商之賁但賒之。顏注云：「但，空也，徒也。言空賒與之不取息利也。」莽制正本此經。

凡民之貸者，與其有司辨而授之，以國服爲之息。有司，其所屬吏也。與之別其貸民之物，定其賁以與之。鄭司農云：「貸者，謂從官借本賁也，故有息，使民弗利，以其所賁之國所出爲息也。假令其國出絲絮，則以絲絮償；其國出絺葛，則以絺葛償。」玄謂以國服爲之息，以其於國服事之稅爲息也。於國事受園廬之田而貸萬泉者，則替出息五百。王莽時民貸以治產業者，但計贏所得受息，無過歲什一。

【疏】「凡民之貸者，與其有司辨而授之」者，此則以市之征

布及所斂市之^一物，貸民以治產業也。《左》文十四年傳云：「齊公子商人驟施於國而多聚士，盡其家貸於公，有司以繼之。」彼貸公財者，公有司主之，疑即此泉府之屬。賈疏云：「貸者，即今之舉物生利，與上文不同。辨而授之，謂別其所授之物以與之。」云「以國服爲之息」者，息即《小宰》注所謂貸子。《管子·輕重丁篇》云：「凡稱貸之家，出泉參千萬，出粟參千萬鍾，受子息民參萬家。」《史記·孟嘗君傳》云：「使人出錢於薛，歲餘不入，貸錢者多不能與其息。」《索隱》云：「息猶利也。」注云「有司，其所屬吏也」者，賈疏云：「此則上文有司，一也。若然，此經不言都鄙主者，有司中兼之，故上注亦云本所屬吏，是祇本中兼二者。」惠士奇云：「有司，鄉遂之吏也。」《周書·大匡》云：

「賦酒其幣，鄉正保貸。」酒謂散之貸者，鄉正保焉。」案：惠說是也。云「與之別其貸民之物，定其賈以與之」者，《天官·敘官》注云：「辨，別也。」鄭意此貸者，即謂貸前所收市中不售之物，故須別物定賈也。辨即所謂別其物，與司市、賈師「辨物」義同。江永云：「辨者，辨其人之可貸與否也。如其人有生業，不爲游惰，是可貸者也。否則貸不能償，當不許其貸矣。此所貸者是貸泉，非貸滯於民用之物。」案：江謂貸專爲貸泉，亦得通。後注云「受園廩之田

而貸萬泉」，則鄭亦謂兼貸泉矣。但經云「辨而授之」，固當辨其人，然亦當泉府與其有司辨所貸泉物多寡，以定出息之數，慮償者或有抵冒也。鄭、江二義相兼乃備。鄭司農云「貸者，謂從官借本賈也」者，《廣雅·釋詁》云：「貸，借也。」《說文·貝部》云：「貸，施也。貸，從人求物也。」依許說，則從人求段，字當作「賁」；以物段予人，字當作「貸」。二字小異，經典多通用。《廣韻·二十五德》云：「賁，謂從官借本賈也。」義本此注，字正作賁。先鄭謂民欲行賈而無本，則從官借泉爲本以賈也。金榜云：「先鄭說是也。泉府，市官之屬，以受市之征布爲職。其以市之征布貸於賈人以賈，與上經以征布斂市之滯貨同義，二者皆恤商阜貨，泉府之職也。其言凡民之貸者，對下有司言之謂之民，泉府不得與國人爲貸。」《旅師職》云：「掌聚野之勸粟、屋粟、閒粟。凡用粟，春頒而秋斂之。」此貸於國人者，不令出息，爲其無所取贏也。賈人貸官財，以權子母之利，則有息。」案：金說是也。此民即賈人，猶司市以賈師、胥師之屬爲賈民也。蓋二鄭說不同，而謂從官貸則一。《漢志》王莽法亦同。此民對有司爲文，金釋甚塢。知非民間自相稱賈者，民自貸一泉物，其事猥細，不必泉府與有司辨而授之也。云「故有息，使民弗利」者，貸泉行賈，與上供喪祭異，

法當內息，使民勿專以此爲利也。云「以其所賣之國所出爲息」者，先鄭蓋釋國服與《書·酒誥》「肇牽車牛遠服賈」義同。必以所出爲息者，取其易得，且官不失利也。云「假令其國出絲絮，則以絲絮償，其國出絺葛，則以絺葛償」者，謂以諸物償還所貸泉之外，更入其贏爲息也。云「玄謂以國服爲之息，以其於國服事之稅爲息也」者，《爾雅·釋詁》云：「服，事也。」於國服事，即九職農圃等事。稅云服者，若《書·禹貢》「三百里納秸服」是也。賈疏云：「先鄭以所賣之國所出爲息已下，後鄭不從者，凡言服者，服事爲名，此經以民之服事，唯出稅是也。則《載師》云「二十而一」已下是也。」金榜云：「後鄭說是也。農民受田，計所收者納稅。賈人貸泉，計所得者出息。其息或以泉布，或以貨物，輕重皆視田稅爲差，是謂以國服爲之息。」云「於國事受園廬之田而貸萬泉者，則替出息五百」者，賈疏云：「萬泉出息五百，計當二十而取一。若然，近郊十一者，萬泉替出息一千；遠郊二十而三者，萬泉替出息一千五百；甸稍縣都之民，萬泉替出息二千。鄭直云園廬者，略舉以言之也。」金榜云：「輕者二十而一，重者無過二十而五也。」案：金說是也。後鄭據《載師》稅法等衰，釋此經國服義，自不可易；但又牽傳受田爲釋，則非也。儻如其說，則同此稱賈

出息，而甸稍縣都之民必重於郊里，遠郊之民亦必重於近郊，果何說乎？且國宅無征，則貸泉亦當無息，更不可通矣。蓋貸息輕重，不能一率，自當隨民間所便。但其等衰，約區五等，或二十而一，或十一，或二十而三，或十二，或二十而五，以此爲限，明不得逾溢耳。與分地差征之法，固絕不相蒙也。云「王莽時民貸以治產業者，但計贏所得受息，無過歲什一」者，《漢·食貨志》云：「王莽時，民或乏絕，欲貸以治產業者，均授之，除其費，計所得受息，毋過歲什一。」即其事也。又《王莽傳》云：「令市官收賤賣貴，賒貸予民，收息百月三。」似亦參用此經賒貸之法，而賁息則增二倍，非古法也。賈疏云：「此則與周少異。周時不計其贏所得多少，據本徵利。王莽時，雖計本多少爲定，及其後科，唯據所贏多少。假令萬泉歲還，贏萬泉徵一千，贏五千徵五百，餘皆據利徵什一也。」凡國事之財用取具焉，歲終，則會其出入而納其餘。會，計也。納，入也。入餘於職幣。【疏】「凡國事之財用取具焉」者，此官爲市征受藏受用之府，故有國事於此取財用，與《大府》云「凡邦之賦用取具焉」義同。賈疏云：「言事，謂有司爲國家之事，興作用財物者，皆來向泉府取爲具焉。泉府

財盡，乃於餘府取焉。」金榜云：「經言凡國事之財用取具焉，指所受市之征布，《大府》所云『關市之賦以待王之膳服』是也。外府職之。」云「歲終則會其出入而納其餘」者，此正市布之歲會，亦市官之官成也。《王制》云：「司會以歲之成質於天子，冢宰齊戒受質，大樂正、大司寇、市三官以其成，從質於天子。」彼注以市爲「司市」。案：此經司市無會計之文，唯此職有歲終出入之會。疑此官爲司市之屬，此歲會即上於司市，以從司會而質於王者與？賈疏云：「出謂出府會計用財，入謂於《塵人》斂取歛布已下。」注云「會，計也」者，《大司徒》注同。云「納，入也」者，《公羊》莊九年傳云：「納者何？入辭也。」《說文·門部》云：「內，入也。」納，內之借字。凡此經通例，內外字作「內」，出內字則借「納」爲之，詳《鍾師》疏。云「入餘於職幣」者，以職幣掌式法，以斂凡用邦財者之幣，是掌幣餘之官，故知入其餘即入於彼也。賈疏云：「若國家來取財，不盡而有餘，則納與天官職幣，職幣別出與人也。」

司門掌授管鍵，以啓閉國門。鄭司農云：

「鍵讀爲蹇。管謂籥也。鍵謂牡。」【疏】「掌授管鍵以啓閉

國門」者，謂晨則授管以啓門，昏則授鍵以閉門也。《墨子·號令篇》云：「昏，諸門亭皆閉之。晨見掌文，諸城門吏各入，請籥開門，已輒復上籥。」此即授管鍵啓閉門之法。賈疏云：「謂用管籥以啓門，用鍵牡以閉門。國門，則王城十二門者也。」注鄭司農云「鍵讀爲蹇」者，段玉裁以

「讀爲」爲「讀如」之譌，近是。鍵者，鍵之借字。古書鍵字常見，而先鄭以「蹇」擬其音者，杜、鄭注例，習見之字亦間有發讀也。賈疏謂讀爲蹇，取蹇澀之意，則緣誤本爲說，謬。云「管謂籥也」者，《月令》「孟冬脩鍵閉，慎管籥」。注云：「管籥，搏鍵器也。」孔疏云：「管籥，此物以鐵爲之，似樂器之管籥，播於鑼內，以搏取其鍵也。」又《檀弓》疏云：「管謂夾取鍵，今謂之鑰匙。」案：鄭、孔以《月令》鍵閉爲二物，管籥爲一物。《左》僖三十二年傳：「秦杞子曰：鄭人使我掌其北門之管。」杜注亦釋管爲籥。《鬼谷子·內樞篇》云：「以變求內者，若管取鍵。」鍵與鍵通。是管所以取鍵出之，而管非即鍵。《檀弓》注云：「管，鍵也。」又以管鍵爲一者，蓋鑰匙入牝以開，鑰須入牝以閉，其物雖異，以同是牡之類，故名亦得通。若對文則異，此經及《月令》是也。云「鍵謂牡」者，《月令》注云：「鍵，牡；閉，牝也。」孔疏云：「凡鑰器，入者謂之牡，受者謂之牝，若禽獸牝牡然。」

而何胤云：「鍵是門扇之後樹兩木，穿上端爲孔。閉者，謂將扇關門以內孔中。」按《漢書·五行志》每云「牡飛」及「牡亡」，謂失其鑰須，須則牡也。何胤云「兩邊樹木」，非其義也。」又《檀弓》疏云：「鍵謂鎖之內者，俗謂之鎖須。」案：依孔說，則鍵即今銅鐵鎖之須。依何說，則鍵爲木鎖，即今之門櫪，其字正作「鍵」。《說文·木部》云：「鍵，距門也。」《淮南子·繆稱訓》云：「匠人斲戶，無一尺之鍵，不可以閉藏。」顏氏家訓引《月令章句》云：「鍵，關牡也。所以止扉，或謂之剡移。」《說文·門部》云：「關，以木橫持門戶也。闔，關下牡也。」此闔與鍵爲一物，與古書凡言籥爲管者不同。《方言》云：「戶鑰，自關而東，陳楚之間謂之鍵，自關而西謂之鑰。」此鑰鍵亦闔鍵之段字，非謂鎖匙也。金鎖與木鎖器異，而其用以開閉則同。此經注所云則皆金鎖，與《月令》同也。幾出入不物者，正其貨賄，凡財物犯禁者舉之，不物，衣服視占不與衆同及所操物不如品式者。正讀爲征。征，稅也。犯禁，謂商所不資者，舉之没人官。【疏】「幾出入不物者」者，幾謂苛察也。詳《宮正》及《司關》疏。注云「不物，衣服視占不與衆同及所操物不如品式者」者，《司稽》注同。賈疏云：

「見《王制》云『關執禁以幾，禁異服，識異言』；《閭人》云『潛服賊器不入宮，奇服怪民不入宮』。明此司門亦然，故鄭以不物衣服之等解之。」云「正讀爲征」者，正征聲類同，詳《小宰》疏。鄭知此正當爲征者，以《司關》云「司貨賄之出入者，掌其治禁與其征塵」，門關職事略同，明此正即征字，與《肆長》「陳其貨賄而平正之」義不相涉也。云「征，稅也」者，《大司徒》注同。賈疏云：「下文云『國凶札無關門之征』，明無凶札之時有征稅，故讀從征稅之字也。」江永云：「《司關》明言『凶札無門關之征』，而《遺人》『以門關之委積養老孤』，則門關皆有征明矣。文十一年《左傳》：『宋公以門賞郟班，使食其征，謂之郟門。』門征之見於傳者也。」云「犯禁謂商所不資者」者，謂於法不合販鬻，則商所不資操者，即《司市》所云「僞飾之禁在商者十有二」是也。云「舉之没人官」者，《司市》注同。以其財養死政之老與其孤。財，所謂門關之委積也。死政之老，死國事者之父母也。孤，其子。【疏】注云「財，所謂門關之委積也」者，據《遺人》文。彼注云：「門關以養老孤，人所出入，易以取餼廩也。」云「死政之老，死國事者之父母也」者，明與《外饗》、《酒正》、《槁人》諸職饗耆老兼養國老庶老者異

也。死國事，謂凡勤勞王事而死者。《月令》云：「立冬之日，天子迎冬於北郊，還反，賞死事，恤孤寡。」鄭彼注云：「死事，謂以國事死者。若公叔禺人、顏涿聚者也。孤寡，其妻、子也。」《管子·入國篇》云：「士民死上事，死戰事，使其知識故人，受資於上而祠之。」據此則凡勤勞上事而死者，並得爲死事。鄭《月令》注惟云死戰事者，舉其重者言之耳。老，鄭謂其父母。《吳子·勵士篇》云：「有死事之家，歲使使者勞賜其父母，著不忘於心。」顧炎武云：「死國事者之父，如《史記·平原君傳》，李同戰死，封其父爲李侯是也。」案：顧說是也。此死政之老，或兼有死事者之祖父，《王制》孔疏云「皇侃云，子孫爲國難而死，王者養死者父祖」是也。云「孤，其子」者，《外饗》云「邦饗耆老孤子」，注云：「孤子者，死王事者之子也。」詳彼疏。祭祀之牛牲繫焉，監門養之。監門，門徒。【疏】「祭祀之牛牲繫焉」者，《釋文》繫作「轂」，云「本又作繫」。阮元云：「古繫字多作轂。《易繫辭》本作轂。」詒讓案：轂即轂之隸變。《說文·攴部》云：「轂，相擊中也。」《糸部》云：「繫，繫纆也。一曰惡絮。」又《彳部》云：「係，繫束也。」凡繫縛字，正字當作係，轂繫並聲近段借字。此職及《占人》、《校人》繫字，《釋文》並作轂，疑經系束字本作轂，與《大宰》「繫聯」

《瞽矇》、《小史》「世繫」字爲系之段字異，注則皆作繫字。《漢書·景帝紀》「農桑轂畜」，顏注云：「轂謂食養之。轂，古繫字。」蓋漢以後繫字通行，轂繫又爲古今字。此經作轂，注作繫，亦經用古字注用今字之例也。《廬人》、《弓人》又以轂爲擊，《考工記》字例與經不同也。云「監門養之」者，賈疏云：「牧人六牲，至祭前三月，則使充人繫而養之。若天地宗廟，則繫於牢，芻之三月。若其散祭祀之牲，則不在牢，遣此監門門徒養之，不必三月也。」詒讓案：《穀梁》哀元年傳，說郊牛卜之不吉，繫而待六月始庀牲，然後左右之。范注引此經，謂未左右時，監門者養之。然則大祀之牲，凡不繫於滌者，亦於門養之，與散祭祀同也。注云

「監門，門徒」者，《毛詩·小雅·節南山》傳云：「監，視也。」《孟子·萬章篇》「抱關擊柝」，趙注云：「監門之職也。」《荀子·榮辱篇》云：「監門御旅，抱關擊柝。」楊注云：「監門，主門也。抱關，門卒也。」案《史記·信陵君傳》云：「魏侯嬴爲大梁夷門監者。」又云：「嬴乃夷門抱關者也。」是抱關即監門。《荀子》重舉之，楊倞遂分爲二，非是。凡門徒主守視國門，故謂之監門。《敍官》「司門有徒四十人」，又「每門徒四人」，即所謂門徒也。凡歲時之門，受其餘。鄭司農云：「受祭門之餘。」【疏】「凡歲時之

門」者，賈疏云：「若《月令》秋祭門者，是祭廟門。此門亦謂國門十二者，除四時祭外，仍有爲水祈禱，故《左氏》莊公二十五年秋，大水，有用牲于門之事。」案：賈引《左傳》大水用牲於門，即《鬯人》「祭門用瓢齋」是也。此外尚有《祭法》「王立七祀，三曰國門」，是門之正祭。又《月令》季春，「命國難，九門磔攘」，據鄭彼注爲攘四方之神，非祭國門。《月令》孟冬又有大割祠于公社及門閭，彼蓋秦法，非周制也。

注鄭司農云「受祭門之餘」者，餘，與《大宰》「幣餘之賦」、《職幣》「振掌事者之餘財」義同。謂祭門有餘財，則此官受而儲之，猶《司書》云「受其幣」，《泉府》云「納其餘」也。凡四方之賓客造焉，則以告。造，猶至也。

告，告於王而止客以俟逆。【疏】注云「造猶至也」者，《大司寇》注義同，此引申之義。《廣雅·釋言》云：「造，詣也。」《文選·洞簫賦》李注引《蒼頡篇》云：「詣，至也。」蓋造訓爲詣，詣則有所至，故造亦訓至矣。云「告，告於王而止客以俟逆」者，賈疏云：「謂四方諸侯來朝覲，至關，關人告王；至郊，郊人告王；至國門，門人告王。王得告，皆遣人往迎，故云止客以俟逆也。」論讓案：止客者，止客於館以待也。凡門皆有客館，與郊關同。必止客俟逆者，恐倉卒逆者不至，於禮有關。又《國語·周語》云：「敵國賓至，

門尹除門。」韋注云：「門尹，司門也。除門，掃除門庭也。」此經不言除門者，亦文不具。

司關掌國貨之節，以聯門市。貨節，謂商

本所發司市之璽節也。自外來者，則案其節，而書其貨之多少，通之國門，國門通之司市。自內出者，司市爲之璽節，通之國門，國門通之關門。參相聯以檢猾商。【疏】注云「貨節，謂商本所發司市之璽節也」者，《司市》云：「凡通貨賄，以璽節出人之。」是國貨之節即司市之璽節也。凡商之貨，本出於市。自內出者，齋司市之璽節，由門而達關；由外人者，齋邦國司市之璽節，由關達門，以至於王國之市。其出入不越國畿者，亦各齋璽節達於所至鄉邑之吏。此司市，通王國及邦國之司市言之。賈疏謂鄭先從邦國司市解之，誤。云「自外來者，則案其節而書其貨之多少，通之國門，國門通之司市，自內出者，司市爲之璽節，通之國門，國門通之關門」者，賈疏云：「將送商人，而執節者別有過所文書，若下文節傳，當載人年幾及物多少。至關至門，皆別寫一通，入關家門家，乃案勘而過。其自內出者義亦然。」云「參相聯以檢猾商」者，賈述注聯作連。阮元云：

「注當本用連，改聯，非。」案：阮校是也。凡經例作聯，注例作連。經云聯門市者，即《大宰》之官聯，《小行人》注云「門關者與市聯事」是也。彼注聯亦當作連，詳《大宰》疏。《後漢書·周黃徐姜申屠傳》，李注云：「檢猶察也。」《一切經音義》引《三蒼》云：「猾，黠惡也。」賈疏云：「司市與關及門三處相連，恐姦猾商人或以多爲少，或隱而不出而避稅，故相連以檢括之也。其遠郊近郊雖不置官掌之，亦應有人幾問，但無稅法，故不言耳。」惠士奇云：「管子·問篇》曰：『市者，天地之財具也，而萬人之所和而利也。關者，諸侯之險隧也，而外財之門戶也，萬人之道行也。征於關者勿征於市，征於市者勿征於關，虛車勿索，徒負勿入，以來遠人。』此司關聯門市之法也。自外人者征於關，關移之門，門移之市，所謂征於關者勿征於市也。自內出者征於市，市移之門，門移之關，所謂征於市者勿征於關也。若自內而不由於市，自外而不出於關，然後舉而罰之。」司貨賄之出入者，掌其治禁與其征塵。征塵者，貨賄之稅與所止邸舍也。關下亦有邸客舍，其出布如市之塵。【疏】「司貨賄之出入者」者，《師氏》注云：「司猶察也。」謂凡民齎貨賄出入關門者，皆察之。賈疏云：「司，主也。主貨賄出入。」非經義。云「掌其治禁」者，

治謂求請辭訟，禁謂刑禁。黃以周云：「《王制》所謂『關執禁以譏』。禁者，禁其非法之物也。」云「與其征塵者，惠士奇云：『管子·幼官篇』：『三會諸侯，令曰：市賦百取二，關賦百取一。』此《周官》關市之征也。」論讓案：《管子》所言，足證關市有賦，但百取一二，則與此經法未必合耳。

注云「征塵者，貨賄之稅與所止邸舍也」者，《大司徒》注云：「征，稅也。」凡商賈及平民之齎百物過關者，皆有稅。《韓非子·外儲說左上篇》云：「兒說乘白馬而過關，則顧白馬之賦。」是即六畜之稅。注唯云貨賄者，文不具也。塵猶《塵人》之「塵布」，注云「塵布者，貨賄諸物邸舍之稅」是也。二者通爲《大宰》九賦之關賦，互詳《塵人》疏。江永云：「此征塵是一事：征者，貨賄之稅也；塵者，貨賄停關邸舍之稅也。若不停關，則無塵布矣。」案：江說是也。賈疏謂「征即稅，塵即邸舍，一事雙言」，失之。云「關下亦有邸客舍，其出布如市之塵」者，賈疏云：「案上文《塵人》有塵布，鄭云『塵，邸舍』。此關旁亦有邸舍，商人於關停止則有稅，故云如市之塵也。」江永云：「關上宜無塵而亦有塵者，謂貨賄物多，暫有停關，以待有司之稽察也。物少則不必停於塵。」論讓案：邸客舍者，明關上兼有客舍，不徒商賈之舍也。凡貨不出於關者，舉其貨，罰其人。

不出於關，謂從私道出辟稅者，則沒其財而撻其人。【疏】

「凡貨不出於關者」者，於，經例當作「于」，石經及各本並誤。注云「不出於關，謂從私道出辟稅者」者，辟與避

同。謂私從關旁它道而出，越關以辟征稅也。云「則沒其財而撻其人」者，《司市》注云：「舉之，没人官。」是舉其貨謂沒其財入官。撻即《司市》市刑之大刑扑罰。《閭胥》

云：「掌其比閭撻罰之事。」是撻即爲罰也。案：《質人》

云：「犯禁者舉而罰之。」《塵人》注以彼罰爲罰泉，與此文

同而義異者，鄭以經云「罰其人」，不云罰財，故與彼注不同

也。賈疏云：「案上憲罰之等皆是撻，但舉其貨已是罰物，

故知罰其人是撻之可知也。」凡所達貨賄者，則以

節傳出之。商或取貨於民間，無璽節者至關，關爲之璽

節及傳出之。其有璽節亦爲之傳。傳，如今移過所文書。

【疏】「凡所達貨賄者，則以節傳出之」者，明不徒有璽節，

兼有傳也。注云「商或取貨於民間，無璽節者至關，關

爲之璽節及傳出之」者，賈疏云：「若本由王市而出，則司

市爲之璽節。商或於民間者，或在郊內、關內民間買得物

貨，不得向司市取璽節，故因向關外則便於關取節而出。

若在城內民間資貨者，司門爲璽節以出之。授節者即授傳

與之。」云「其有璽節亦爲之傳」者，謂其本由王市而出，已

有司市之璽節者，司關仍爲之傳以出之。若徒有璽節而無

傳，仍不得行也。云「傳如今移過所文書」者，《後漢書·陳

蕃傳》李注云：「傳，謂符也。」《漢書·文帝紀》云：「十二

年三月，除關無用傳。」注：「張晏云：傳，信也。若今過所

也。」《古今注》云：「程雅問曰：「凡傳者何也？」答曰：「凡

傳皆以木爲之，長五寸，書符信於上。又以一版封之，皆封

以御史印章，所以爲信也。如今之過所也。」《釋名·釋書

契》云：「過所，過至關津以示之。或曰傳。傳，轉也，轉移

所求，執以爲信也。」案：今本《釋名》舛互不可讀，今依畢

沅校正。劉云「過所」，即此注所云「移過所文書」也。《唐

六典》李林甫注亦云：「古書帛爲繡，刻木爲契，二物通謂

之傳，傳如今過所。」則唐時尚有過所之稱。蓋凡傳必有文

書，即《掌節》注云「說所齋操及所適」是也。西漢時用傳，

東漢時則爲移過所文書。凡所過關津，必案驗文書乃得

行，因即稱其文書爲過所，蓋當時相沿俗語如此。《韓非子

·說林上篇》云：「田成子去齊，走而之燕，鷗夷子皮負傳

而從。」則傳亦書於竹木，與符節之制相近，故可負而行矣。

國凶札，則無關門之征，猶幾。鄭司農云：「凶，

謂凶年饑荒也。札，謂疾疫死亡也。越人謂死爲札。《春

秋傳》曰「札瘥天昏」。無關門之征者，出入關門無租稅。猶幾，謂無租稅猶苛察，不得令姦人出入。《孟子》曰：「關幾而不征，則天下之行旅皆說而願出於其塗。」【疏】「國凶札則無關門之征」者，賈疏云：「此司關所掌兼言門者，門關同類，無征是同，司門既不言，故於關并言門也。」

注鄭司農云「凶謂凶年饑荒也」者，饑，宋本、嘉靖本作「飢」，非。《說文·凶部》云：「凶，惡也。」此凶札即《大司徒》之大荒大札，凶荒義同。《墨子·七患篇》云：「一穀不收謂之饑，二穀不收謂之旱，三穀不收謂之凶，四穀不收謂之饑，五穀不收謂之饑。」此凶年通謂饑荒，不必如《墨子》三穀不收之說也。云「札謂疾疫死亡也」者，《膳夫》注云：「大札，疫癘也。」與此義同。云「越人謂死爲札」者，段玉裁云：「舉方俗語言以證之也。鄭君於《大宗伯》云「札讀爲戠」。案：札，古文假借字。呂忱《字林》乃有殍字，從步止聲。」引《春秋傳》曰「札瘥天昏」者，《左》昭十九年傳：「鄭子產曰，寡君之二三臣札瘥天昏。」杜注云：「大死曰札，小疫曰瘥，短折曰夭，未名曰昏。」孔疏引賈逵注同。此引以證札爲疾疫之義。然彼札瘥對文，故有大死小疫之異，此札總爲疾疫死亡，不別大小，散文通也。云「無關門之征者，出入關門無租稅」者，此亦釋征爲租稅也。《玉藻》云：

「年不順成，關梁不租。」凶札，弛出入關門之征，所以矜其災也。云「猶幾謂無租稅猶苛察，不得令姦人出入」者，姦，《釋文》作「奸」，即姦之俗。《王制》云：「關執禁以譏，禁異服，識異言。」注云：「譏，苛察。」《廣雅·釋詁》云：「何、幾，問也。」幾、譏，苛、何，字並通用。苛，詳《官正》疏。《儀禮經傳通解》引《尚書大傳》云：「遂郊之門執禁，以譏異服，譏異言。」彼文與《王制》略同，而云遂郊之門，或即近關之禁與？引《孟子》曰「關幾而不征，則天下之行旅皆說而願出於其塗」者，《公孫丑篇》文。今本「幾」作「譏」，「行旅」作「旅」，「塗」作「路」。案：塗俗字，當作涂。趙注云：「言古之設關，但譏禁異言，識異服耳。不征税出入者也。故《王制》曰「古者關譏而不征」。《周禮·大宰》曰九賦，「七曰關市之賦」。《司關》曰「國凶札則無關門之征，猶譏」。《王制》謂文王以前也。文王治岐，關譏而不征。《周禮》有征者，謂周公以來。孟子欲令復古去征，使天下行旅悅之也。」案：《孟子》關幾而不征之說，《王制》及《大戴禮記·王言篇》、《國語·齊語》、《管子·小匡篇》、《荀子·王制篇》說並同。依後鄭《王制》注說，則彼爲殷制，故《王制》與「公田藉而不稅」之文並舉。趙岐亦以《孟子》所云，非周公之制。且彼以不征爲常法，不關凶札。先鄭引之者，明無

征爲恤行旅耳，實則彼文與此經本不相應也。凡四方

之賓客敬關，則爲之告。謂朝聘者也。叩關，猶謁

關人也。鄭司農說以《國語》曰：「周之《秩官》有之曰：

「敵國賓至，關尹以告，行理以節逆之。」【疏】「凡四方之

賓客敬關，則爲之告」者，賈疏云：「敬猶至也。畿外諸侯

來朝，使卿大夫來大聘，小聘，但至關門，皆先謁關人。關

人止客，則奔告王。王使小行人逆勞於畿也。」詒讓案：

《大傳》鄭注云：「古者郊關皆有館焉。」蓋賓客至關，則止

於館，俟關人告王遣勞而後入也。注云「謂朝聘者也」

者，朝者爲大賓、小賓，聘者爲大客、小客。賈疏云：「案

《小行人》云：「凡諸侯入王，則逆勞於畿。」《聘禮》，使者

至，謁關人。此經亦摠云「賓客敬關則爲之告」。是以鄭云

謂朝聘者也。」云「叩關猶謁關人也」者，叩，敬之俗。宋岳

本、董本及注疏本並作「敬」。今從宋婺州本、建本、互注

本、嘉靖本，與賈疏同。《典同》注亦作「叩」。疑漢時已有

此字，注例用今字，不必與經同也。《說文·支部》云：

「敬，擊也。」《聘禮》：「賓及竟，乃謁關人。」鄭彼注云：

「謁，告也。」案：此謂賓至關，先告每關司關下士，下士來

告司關上士，上士爲之告王。關人即司關，通長屬言之故

稱人。《周書·大聚篇》云：「遠旅來至，關人易資。」亦與

《禮經》同。《說文》敬訓擊，本與謁異。以《聘禮》所云，事

與此同，故用以況義。云「鄭司農說以《國語》曰，周之《秩

官》有之曰，敵國賓至，關尹以告，行理以節逆之」者，《周

語》云：「定王使單襄公聘於宋，遂假道於陳以聘於楚。火

朝覲矣，道弗不可行也。候不在疆，司空不視涂。單子歸

告王曰：「陳侯不有大咎，國必亡矣。」王曰：「何故？」對

曰：「周之《秩官》有之曰：敵國賓至，關尹以告，行理以節

逆之。」韋注云：「《秩官》，周常官篇名。關尹，司關，掌四

方賓客叩關則爲之告。理，吏也。逆，迎也。執瑞節爲信

而迎之也。行理，小行人。」賈疏云：「引之者，《國語》云

「關尹以告」，則此經司關爲之告，一也。行理以節逆之者，

證關尹告王，王使小行人以節迎之也。」胡匡衷云：「關人

之長，天子謂之司關，諸侯謂之關尹，其職掌一也。」有外

內之送令，則以節傳出內之。有送令，謂奉貢獻

及文書，以常事往來。環人之職，所送迎通賓客來至關，則

爲之節與傳以通之。【疏】「有外內之送令，則以節傳出內

之」者，明非朝聘，凡外內臣民以常事往來，亦爲節傳出內

之也。此節謂旌節，與上「達貨賄用璽節」異。凡外內臣民

至關無節者，此爲之旌節及傳出內之；其有旌節者，此官亦爲之傳以輔之，與達貨賄節異而事同也。賈疏云：「有外之送令者，則以節傳內之，謂從諸侯之國畿外而入者，則關人以節及傳內之。至王有內之送令，則以節傳出之，謂有王命從王國而出，則亦以節傳出之，送至畿上也。」

注云「有送令，謂奉貢獻及文書以常事往來」者，貢獻謂邦國所貢獻，文書謂內外文報，皆尋常往來之事。云「環人之職所送迎通賓客來至關，則爲之節與傳以通之」者，賈疏云：「案《秋官·環人職》云：『掌送逆邦國之通賓客，以路節達諸四方。』」注云：「路節，旌節也。四方，圻上。」與此義同，故引以言之。」

掌節掌守邦節而辨其用，以輔王命。邦

節者，珍圭、牙璋、穀圭、琬圭、琰圭也。王有命，則別其節之用，以授使者。輔王命者，執以行爲信。【疏】「掌節掌守邦節而辨其用」者，段玉裁云：「《說文·卩部》曰：『卩，瑞信也。守邦國者用玉卩，守都鄙者用角卩，使山邦者用虎卩，土邦者用人卩，澤邦者用龍卩，門關者用符卩，貨賄用璽卩，道路用旌卩。』」案：許所據《掌節》、《小行人》二職，

字作卩，蓋故書本爾。《說文·竹部》云：「節，竹約也。」符節字當作卩，經典皆借節爲之。許所據，疑是故書或本，用正字也。賈疏云：「此一經論王國之節，對下文邦國是諸侯，故此王國文單言邦也。」江永云：「此經爲下文諸節提綱。玉、角、虎、人、龍固邦節，而符璽旌通行於民者亦邦節也。辨其用，下文所云是也。」案：江謂邦節兼爲下諸節爲目，得之。但邦節自當有王所用瑞節珍圭之等，經不言者，以文已具《典瑞》，此官與彼爲官聯，詳略足互相備也。

注云「邦節者，珍圭、牙璋、穀圭、琬圭、琰圭也」者，賈疏云：「皆約《典瑞》言之。案《典瑞》云：『珍圭以徵守，以恤凶荒，牙璋以起軍旅，以治兵守；穀圭以和難，以聘女；琬圭以治德，以結好；琰圭以易行，以除慝。』是其邦節也。不數自外璧羨以起度之等，以其彼是王國所用，非使者之節，故不言之。」《說文》案：珍圭以下四者，天子所用之玉節也，亦謂之瑞節。《調人》云：「弗辟，則與之瑞節而以執之。」注云「瑞節，玉節之琰圭也」是也。凡節並掌於掌節，而玉節又兼掌於典瑞。經凡言瑞者，不兼金竹之節，言節者得兼玉節之瑞。《左》文十二年傳：「秦伯使西乞術

① 「逆」，原訛「迎」，今據楚本改。

來聘，襄仲辭玉，荅曰：「不腆先君之敝器，使下臣致諸執事以爲瑞節。」此即圭璋亦得爲節之塙證。鄭以經不見王使人所用之節，故補之。云「王有命，則別其節之用，以授使者」者，《天官·敘官》注云：「辨，別也。」賈疏云：「此釋經『而辨其用』，故《典瑞》注亦皆云王使之瑞節也。」江永云：「單子述周之《秩官》曰：『敵國賓至，關尹以告，行理以節逆之。』此謂行理以節爲信，將其逆賓之命，非謂以節授賓，使其道路爲信也。豈有王使諸侯，須侯國沿途授節而後可歷門關哉！」云「輔王命者，執以行爲信」者，《廣雅·釋詁》云：「輔，助也。」《敘官》注云：「節猶信也，行者所執之信。」王使傳命於四方，慮人不信，又各以其節輔助之，亦所以絕矯誣而昭明信也。

守邦國者用玉節，守都鄙者用角節。 謂諸侯於其國中，公卿大夫、王子弟於其采邑，有命者亦自有節以輔之。玉節之制，如王爲之，以命數爲小大。角用犀角，其制未聞。【疏】「守邦國者用玉節，守都鄙者用角節」者，以下辨內外侯國及官吏所用之節，並掌節之官法也。江永云：「此謂諸侯與都鄙大夫，遣使不出竟內者用之。」注云「謂諸侯於其國中」者，《詛祝》注云：「邦國，諸侯國也。」《書·舜典》《僞孔傳》云：「諸侯爲天

子守土，故稱守。」云「公卿大夫、王子弟於其采邑」者，《大宰》注云：「都鄙，公卿大夫之采邑，王子弟所食邑。」是也。賈疏云：「畿內公卿大夫，亦是畿內之國，但對畿外諸侯爲尊，故公卿已下言都鄙也。此云都鄙用角節，注謂『公卿大夫王子弟於其采邑』，是都鄙之主。案：《小行人》『都鄙用管節』，注謂公之子弟及卿大夫之采地之吏也，故用管節。與此不同。彼諸侯采地亦同用管節，亦異外內也。若天子公卿大夫采邑之吏，下注約入道路用旌節。」黃以周云：「《掌節》云『掌守邦節』，言王官之節。《小行人》云『達天下之六節』，是侯國之節。其節異外內，亦職有大小。」江永云：「《小行人》『都鄙用管節』，管節與角節異者，角節，都鄙大夫遣使之節；管節，都鄙之吏授民之節。然此經道路用旌節，亦兼都鄙；而《小行人》旌節、管節別異之，是侯國之都鄙異於畿內之都鄙也。」案：依鄭義，則《小行人》『都鄙用管節』，據邦國之都鄙言之。彼都鄙之主與吏同用一節，王國都鄙則主與吏異節，二者不同。然經無正文，未知是否。江說雖與鄭異，而義可兩通。云「有命者，亦自有節以輔之」者，有命令施於其竟內，亦執節以行爲信也。賈疏云：「亦如上文王有命有節以輔之。」云「玉節之制，如王爲之，以命數爲小大」者，王，舊本譌玉，今據宋本正。此謂邦

國玉節，亦如王珍圭五者之制，但有大小耳。賈疏云：「以邦國與王同稱玉節，故知邦國亦有數等之節，亦皆以玉爲之。以其諸侯國內，亦有徵守、好難、起軍旅之等，故知與王同。知以命數爲小大者，以其命圭之等依命數，故知亦以九以七以五爲節也。其天子玉節，自以大小爲數，故琬圭、琰圭俱同九寸，穀圭、牙璋俱七寸，唯有珍圭無文，鄭云『大小當與琬琰相依』。」惠士奇云：「《公羊》哀四年傳，齊陳乞遣陽生，與之玉節而走之。秦安國君刻玉符，約立子楚爲適嗣。《呂氏春秋·上德篇》：『孟勝善荆之陽城君，陽城君令守於國，毀璜以爲符。』哀十四年《左傳》：『司馬牛致邑與珪而適齊。』皆玉節也。」案：惠說是也。《周書·允文篇》云：「執彼玉珪以居其宇。」亦守邦國用玉節也。此與公侯伯命圭不同。云「角用犀角」者，《說文·牛部》云：「犀，南徼外牛，一角在鼻，一角在頂，似豕。」《爾雅·釋獸》云：「犀，似豕。」郭注云：「形似水牛，豬頭，大腹，庫脚，脚有三蹠，黑色。三角，一在頂上，一在額上，一在鼻上。鼻上者即食角也，小而不櫛。好食棘。亦有一角者。」案：據《漢舊儀》說，秦以前民以金、玉、銀、銅、犀、象爲璽，即後之璽節，明此角節亦用犀也。云「其制未聞」者，賈疏云：「以其邦國之玉節，可約以王之玉節；都鄙之角

節，無可依約，既無舊制，故云其制未聞。」凡邦國之使節，山國用虎節，土國用人節，澤國用龍節，皆金也，以英蕩輔之。使節，使卿大夫聘於天子諸侯，行道所執之信也。土，平地也。山多虎，平地多人，澤多龍，以金爲節，鑄象焉。必自以其國所多者，於以相別，爲信明也。今漢有銅虎符。杜子春云：「蕩當爲帑，謂以函器盛此節。或曰：英蕩，畫函。」【疏】「凡邦國之使節」者，此辨侯國使臣出竟之節也。凡國使往來，必有節乃得達。《孫子·九地篇》云：「夷關折符，無通其使。」節符義同。云「山國用虎節，土國用人節，澤國用龍節」者，《說文·卩部》引「國」並作「邦」，義同。三節蓋亦以命數爲小大，如玉節而形制不同。云「皆金也」者，別於後符節、旌節用竹也。云「以英蕩輔之」者，蕩，乾隆石經作「蕩」，從干義也，詳後。嚴可均云：「朱申《句解》本蕩作蕩。《通典》卷五十七引作蕩。」馮登府云：「《釋文》但作蕩，古从竹从艸，字通。」注云「使節，使卿大夫聘於天子諸侯，行道所執之信也」者，使即據邦國之君使臣聘而言。賈疏云：「大聘

① 下引文見《公羊》哀公六年傳。

使卿，小聘使大夫，或於天子，或於諸侯，故並言之也。」江永云：「此即《小行人》之虎、人、龍節。鄭彼注謂『使之四方，亦皆齋法式以齊等之』是也。列國之使，各用其虎、人、龍節，以爲行道之信。觀其用虎節，知其自山國而來，人、龍亦然。注所謂自其國象是也。若王朝遣使邦國，則必用玉節，豈因其所使之國而從彼國之象哉！」案：江說是也。《說文》謂此三節爲使山邦等所用，《左傳》文八年孔疏說三節，亦謂王使之使於土國之等，並非鄭義也。云「土，平地也」者，賈疏云：「對山澤非平地也。」云「山多虎，平地多人，澤多龍」者，釋三節取此爲象之意。山國、澤國，即《管子·山至數篇》所謂有山處之國、有汜下多水之國，是也。云「以金爲節，鑄象焉」者，謂鑄虎、人、龍之象於節也。云「必自以其國所多者，於以相別，爲信明也」者，明三等之節，各鑄國所多之物以象之，欲其視而可識，信驗明白也。云「今漢有銅虎符」者，證三節用金爲之，金即銅也。《續漢書·百官志》劉注引干注亦云「漢之銅虎符則其制也」。與鄭義同。賈疏云：「案《太史公·本紀》：『漢文帝二年九月，初與郡國守相爲銅虎符、竹使符。』應劭曰：『銅虎符第一至第五，國家當發兵，遣使者至郡國合符，符合乃聽受之。竹使符者，皆以竹箭五枚，長五寸，鐫刻篆書第一至第

五。』張晏曰：『符以代古之圭璋，從簡易也。』鄭引之者，欲明漢時銅虎符本出於此也。」杜子春云「蕩當爲帑，謂以函器盛此節」者，段玉裁云：「《說文·巾部》：『帑，金幣所藏也。從巾奴聲。』案：此字乃都反，亦讀蕩蕩反。古音魚虞模部，其入聲爲藥鐸；陽唐部，其入聲亦爲藥鐸。是以奴聲而以蕩蕩反之也。帑者，藏金布之府，引申爲函器。《吳越春秋》『甘蜜九欒』，即此字。」云「或曰英蕩，畫函」者，賈疏云：「其函猶是蕩，但以英華有畫義，故更云畫函也。經云輔之者，以函輔此法，使不壞損也。案昭二十九年，公在鄆，賜公衍羔裘，使獻龍輔於齊侯。注：『龍輔，玉名』所以輔龍節，與此別也。」段玉裁云：「帑言英者，謂畫也。榮而不實謂之英，故凡華飾謂之英。《鄭風》『重英』，《魯頌》『朱英』皆是也。」丁晏云：「《詩》『二矛重英』，傳謂有英飾，鄭箋謂畫飾，故又以英蕩爲畫函。《續漢·百官志》劉注引干注云：『英，刻書也。蕩，竹箭也。刻而書其所使之事，以助三節之信。則漢之竹使符者，亦取則於故事也。』惠士奇云：『干說是。英蕩者，傳也。凡達節皆有傳，傳所以輔節，節以金，傳以竹。康成謂傳若漢之移過所文書。』詒讓案：干釋蕩爲竹箭者，蓋讀蕩爲蕩也。《爾雅·釋艸》云：「簕，竹。」郭注云：「竹別名。」《書·禹貢》孔疏引李巡

云：「竹節相去一寸曰簞。」孫炎云：「竹闕節者曰簞。」《說文·竹部》云：「簞，大竹也。」陳祥道亦以簞爲竹函，即本干說。此「以英蕩輔節」下，又云「以傳輔節」，英蕩似與傳相近。若如子春說爲函器，函節相將，非所以言輔。干義長於杜。至《左傳》昭二十九年之「龍輔」，杜注本不謂即龍節，孔疏乃云「謂鑄金爲龍，以玉爲函，輔盛龍節，謂之龍輔」。又引玄卿云「盛龍節之玉函耳」。其說殊謬。門關用符節，貨賄用璽節，道路用旌節，皆有期以反節。門關，司門、司關也。貨賄者，主通貨賄之官，謂司市也。道路者，主治五涂之官，謂鄉遂大夫也。凡民遠出至於邦國，邦國之民若來人，由門者司門爲之節，由關者司關爲之節，其商則司市爲之節，其以徵令及家徙，則鄉遂大夫爲之節。唯時事而行不出關，不用節也。變司市言貨賄者，璽節主以通貨賄，貨賄非必由市，或資於民家焉。變鄉遂言道路者，容公邑及小都大都之吏皆主治五涂，亦有民也。符節者，如今宮中諸官詔符也。璽節者，今之印章也。旌節，今使者所擁節是也。將送者執此節以送行者，皆以道里日時課，如今郵行有程矣。以防容姦，擅有所通也。凡節有法式，藏於掌節。【疏】門關用符節者，以

下辨王國人民通行畿內外之節也。

注云「門關，司門、

司關也」者，賈疏云：「以其人之出入，必由門由關，而授節者，非門關之官不可輒授，故知主守門及關者，故以司門、司關解之也。」云「貨賄者，主通貨賄之官，謂司市也」者，《司市》云「凡通貨賄以璽節出入之」是也。故璽節，司關亦謂之國貨之節。云「道路者，主治五涂之官，謂鄉遂大夫也」者，《小行人》正義同。賈疏云：「謂以其授節非官不可。言路，即《遂人》徑畛涂道路之涂也。鄉之田制與遂同，故知旌節是鄉遂大夫所授也。」案：賈說非也。依後注義，則五涂之制，通於畿內，不關田制異同。鄭蓋據《鄉大夫》、《比長職》皆用旌節，故知用旌節者，是鄉遂大夫也。又《布憲》云「正月之吉，執旌節以宣布於四方，而憲邦之刑禁」。《行夫》云「凡其使也，必以旌節」。是凡道路之事，悉用旌節，故《秋官·環人》又謂之路節。據鄭說，殆皆受節於鄉遂大夫與？云「凡民遠出至於邦國，邦國之民若來人，由門者司門爲之節，由關者司關爲之節」者，賈疏云：「據此注，凡民出至邦國，若宅在國城中，先由門，則司門授之節。若宅在關內者，則由關，司關授之節也。若邦國之民來人，則先由關，司關授之節。若然，邦國之民人，其節直由關，不由門；亦云由門者，因王國之民出由門，故摠言

之，於義無妨也。」云「其商則司市爲之節」者，賈疏云：「此王之掌節，而言貨賄用璽節，明是王之司市，非邦國之司市。其實商徒從邦國來，即邦國司市爲節，故上《司關》注云：「貨節，謂商本所發司市之璽節。自外來者，即案其節。」是邦國之璽節也。」詒讓案：《小行人》有門關用符節，而無貨賄用璽節。彼注云：「其有商者，通之以符節，如門關。」亦所以異於畿內也。依彼注及《司關》正義，是凡商自侯國人王畿者，則侯國之司市授璽節以達之。其於己國往來及從己國至它侯國者，則侯國之司市授符節以達之。蓋邦國通貨賄，雖同用符節，然亦有璽節之法式存於其國，故商自侯國人王畿者，仍得用璽節，從王國之制也。云「其以徵令及家徙，則鄉遂大夫爲之節」者，《小行人》正義同。賈疏云：「知徵令有節者，見《鄉大夫》云：『國有大故，以旌節輔令則達之。』」注云：「民雖以徵令行，其將之者，無節不得通。」是徵令有節之事。又知家徙有節者，見《比長》云：「若徙於佗，則爲之旌節而行之。」是家徙有節也。」云「唯時事而行，不出關，不用節也」者，時事，謂歲時常事。賈疏云：「時事行，若《比長》云徙於郊，徙於國，當鄉徙及非徵令，皆不須節。兼言不出關者，關內當都當邑當行不出關，皆不須節也。」云「變司市言貨賄者，璽節主以通貨賄，貨賄

非必由市，或資於民家焉」者，明璽節容有非司市所授者，即《司關》注云「商或取貨於民間，無璽節者至關，關爲之璽節及傳出之」是也。賈疏云：「司市本出璽節授商，今不言市而變言貨賄，故鄭云「璽節主以通貨賄，貨賄非必由市，或資於民家。」則由門者司門與之節，由關者司關授之節，故變言貨賄也。」云「變鄉遂言道路者，容公邑及小都大都之吏皆主治五涂，亦有民也」者，明有地治之官，皆得授旌節，不徒鄉遂大夫也。如凡徵令及家徙，在公邑及都鄙，則亦其吏授以旌節。其小都大都之主，則自用角節，不用旌節也。鄉遂爲溝洫法，公邑采地爲井田法，田制不同，而皆有五涂。賈疏謂公邑爲溝洫法，非也。詳《匠人》疏。云「符節者如今宮中諸官詔符也」者，《說文·竹部》云：「符，信也。漢制以竹長六寸，分而相合。」黃以周云：「漢宮中諸官詔符，長尺二寸，用鐵印文。崔豹《古今注》云：「籍，尺二竹牒，記人之年、名字、物色，縣之宮門，案省相應，乃得人司馬門。」《續漢書·百官志》云：「凡居宮中者，皆有口籍，於門之所屬宮名兩字，爲鐵印文符，案省符乃內之。」是也。」詒讓案：《續漢志》劉注引胡廣云：「符用木長尺二寸，鐵印以符之。」與崔說用竹不同，未知孰是。鄭必舉宮中諸官詔符爲況者，以其亦縣宮門爲符驗，與此經門關所

用略同也。《說文》所說符，則剖竹爲之，近所謂竹使符者，非官中所用。鄭《小行人》注云：「管節，如今之竹使符也。」案：鄭不以此符節爲竹使符，而於管節乃援彼爲況者，蓋以管節亦竹所爲，故以竹使符況之。實則符管兩節，皆全竹，不半分，與漢竹使符咸不相似，鄭釋兩節亦並不取析竹之義也。陳祥道則謂析竹爲符節，全竹爲管節，此又隱據漢竹使符以釋符節，與鄭義異。《荀子·儒效篇》云：「張法而度之，則晻然若合符節。」楊注云：「《周禮》門關用符節，蓋以全竹爲之，剖之爲兩，各執其一，合之以爲驗也。」案：楊氏亦謂符節剖全竹爲之，陳義疑即本於彼。但《荀子》符節，似通舉瑞節言之，非必專指門關之節，楊說亦恐未允也。云「璽節者，今之印章也」者，《司市》注義同。秦以前，官私印得通稱璽。漢因秦制，璽爲天子印之專稱。私印爲印章，不得稱璽。詳《司市》疏。惠士奇云：「古者刻符摹印，皆曰璽書。」《呂氏春秋·執一篇》：「吳起謂商文曰：『置質爲臣，其主安重；釋璽辭官，其主安輕。』」《韓非子·外儲說左下》：「西門豹爲鄴令，期年上計，君收其璽。是印爲璽也。」《戰國策》：「楚攻韓，泠向求救于秦。公孫昧曰：『其言收璽，實猶有約。』」注云：「璽，軍符。收之者，言欲止楚之攻韓。」是符爲璽也。」江永云：「《小行人》不言璽

節，璽節非以竹爲，鄭注「今之印章」是也。」案：江說是也。《漢舊儀》謂秦以前璽以金、玉、銀、銅、犀、象爲之。此璽節蓋亦以金銅爲之。《王制》有金璋，孔疏引皇侃以爲用金爲印章。《書·康王之誥》「上宗奉同瑁」。^①《三國志·虞翻傳》裴松之注引翻奏載或本同作銅，訓爲天子副璽。並以金銅爲璽印也。云「旌節今使者所擁節是也」者，《玉藻》注云：「今漢使者擁節。」孔疏云：「擁，持也。」《史記·高祖紀·索隱》引韋昭云：「節，使者所擁也。」《後漢書·光武紀》李注云：「節，所以爲信也。以竹爲之，柄長八尺，以旄牛尾爲其旄，三重。」蘇鶚《演義》引《三禮義宗》云：「節長一尺二寸，秦漢以還，易之旌幢之形，其制漸長數尺餘。」案：李崔所言，皆秦漢節之制也。古玉節爲圭璋，金節、符節爲符，璽節爲印章，形制不一，亦不皆以竹爲之。惟旌節與漢節形制相近，而度較短。《司常》云「析羽爲旌」。旌節蓋即以竹爲幢，又析羽綴幢以爲節，^②其異於九旗者，無繆旂也。漢節即放古旌節爲之，故鄭舉以相況。古旌節綴羽，蓋亦兼有旄，若漢節之有旄。孔廣森云：「桓十六年

① 案此句見《顧命》。

② 疑「節」爲「飾」之訛。

《左傳》：衛侯使急子如齊，壽子載其旌以先。《衛世家》作「盜其白旄而先」。明急子以白旄爲節，所謂旌節也。」案：孔說得之。《毛詩·邶風》「二子乘舟」傳，說壽子事云「竊其節而先往」；孔疏亦謂以白旄爲旌節，是也。云「將送者，執此節以送行者，皆以道里日時課，如今郵行有程矣」者，《釋文》云：「郵作卸，誤。」《漢書·主父偃傳》顏注云：「程，課也。」王聘珍云：「《漢舊儀》云：『秦璽書使者乘馳傳。其驛馳也三騎行，晝夜千里爲程。』《續漢書·輿服志》云：『驛馬三十里一置。』劉昭注云：『東晉猶有郵驛共置，承受旁郡縣文書。承驛吏皆條所受書，每月吉至州郡。』此皆郵行有程之證。」云「以防容姦，擅有所通也」者，慮送行者，或容姦人，法不得通者，擅以節通之，故以其道里日時，著爲程品，使逾期則不得通，易以檢察也。云「凡節有法式，藏於掌節」者，法式，謂玉角虎龍以下等差異同之式，藏於掌節。邦國都鄙及諸官府之授節者，皆依法式自爲之。《大行人》云：「十有一歲達瑞節。」亦齋掌節所藏之法式，往至邦國齊等之也。凡通達於天下者，必有節，以傳輔之。必有節，言遠行無有不得節而出者也。輔之以傳者，節爲信耳，傳說所齋操及所適。【疏】「凡通達

於天下者，必有節，以傳輔之」者，於，經例當作「于」，石經及各本並誤。賈疏云：「此經摠解上經門闕諸有節，并有傳輔成信驗。」①或有節無傳，或有傳無節，或節傳俱無，則不得通達於天下也。」案：賈知此節謂門闕諸節者，以《司關》云：「凡所達貨賄者，則以節傳出之。」又上文虎人龍三節，云「以英蕩輔之」，則不必更以傳輔之，明此節內無彼三節矣。注云「必有節，言遠行無有不得節而出者也」者，遠行謂郊畿以外，達於都鄙邦國，必有節乃得出也。云「輔之以傳者，節爲信耳，傳說所齋操及所適」者，傳即文書，故得說所齋操及所適。齋操，謂貨幣、車馬之屬。所適，謂所至國地。節以爲信，無此等文字，故復以傳輔助之。無節者，有幾則不達。圜土內之。【疏】「無節者，有幾則不達」者，此冢上爲文。有幾謂門闕及有地治之吏幾察得之也。注云「圜土內之」者，賈疏云：「見《比長》云「無授無節圜土內之」故也。」

①「并」原訛「非」，據楚本改。

周禮正義卷二十九

遂人掌邦之野。郊外曰野。此野謂甸、稍、縣、

都。【疏】注云「郊外曰野」者，《甸師》注同。謂遠郊百里外也。云「此野謂甸稍縣都」者，《縣師》注義同。謂甸距王城二百里，於中制六遂，自遂至都，通稱野也。賈疏云：「從二百里至五百里皆名野者，此遂人不言掌遂，又見下文云『以達于畿』，明遂人掌野通至畿疆也。但遂人雖專掌二百里之中，乃兼掌三百里以外，其有溝洫井田之法，皆知之也。」案：野詳《甸師》、《縣師》疏。以土地之圖經田

野，造縣鄙形體之灋。五家爲鄰，五鄰爲里，四里爲鄣，五鄣爲鄙，五鄙爲縣，五縣爲遂，皆有地域，溝樹之，使各掌其政令刑禁，以歲時稽其人民，而授之田野，簡其兵器，教之稼穡。經、形體，皆謂制分界也。鄰、里、鄣、鄙、縣、遂，猶郊內比、閭、族、黨、州、鄉也。鄭司農云：「田野

之居，其比伍之名，與國中異制，故五家爲鄰。」玄謂異其名者，示相變耳。遂之軍法，追胥起徒役，如六鄉。【疏】「以土地之圖經田野，造縣鄙形體之灋」者，此六遂比伍之制也。田野猶言田萊，詳《司書》疏。縣鄙即遂之屬別，與《宰夫》、《司常》、《大司馬》、《司士》、《朝士》諸職之縣鄙爲公邑者異。賈疏云：「遂人以土地之圖，據圖以經界其田野。田野謂田在百里之外，野中所經界者，即造縣鄙已下是也。」云「皆有地域溝樹之」者，地域謂遂邑之疆界，《封人》云「凡封國，封其四疆，造都邑之封域者亦如之」是也。溝樹以爲阻固，《掌固》云「掌脩城郭溝池樹渠之固」是也。亦兼有田野之溝，下文五溝是也。云「使各掌其政令刑禁」者，賈疏云：「五家則鄰長施政令，五鄰則里宰施政令，已上皆施之。」云「以歲時稽其人民而授之田野」者，謂四時小案比，以任民授田也。賈疏云：「稽，計也。人民猶言夫家。夫家，男女也。以歲之四時，計其所管男女多少而損益之。」云「簡其兵器」者，兵謂五兵，器謂車輦用器等，下文有「時器」，《遂大夫》有「稼器」，皆是。詳《玉府》疏。《鄉師》云「稽其鄉器」，又云「鄉共吉凶禮樂之器」。此官掌遂，則亦稽遂器矣。凡經云兵器者，兵與器皆爲二，賈疏謂若《族師》旗鼓兵革，義未暇。注云「經、形體，皆謂制分

界也」者，《天官·敘官》「體國經野」，注云：「體猶分也，經謂爲之里數。」《司市》注云：「經，界也。」《國語·楚語》云：「且夫制邑若體性焉，有首領股肱，至於手拇毛脈。」蓋縣鄙疆界，若形體之分列，故《天官》注即釋體爲分矣。云「鄰里鄙鄙縣遂，猶郊內比間族黨州鄉也」者，此六遂之地在甸，與郊內六鄉制同而名異。鄉自五家爲比，積至五州而爲鄉，猶自鄰積而成遂也。大小相包，六遂亦通受地七萬五千家，其數與鄉同。鄭司農云「田野之居，其比伍之名，與國中異制，故五家爲鄰」者，以六遂在遠郊外，故云田野之居。比伍之名，即謂鄰里等五五相比之名。先鄭亦止謂比伍名與國中六鄉異，而云異制者，設文偶不審耳，實不謂異制也。賈疏乃謂先鄭以六遂之內，夫一廛，田百畝，及上地有萊五十畝，并下劑致甿等，爲制異。不知廛及田萊等，皆與比伍之名無涉，先鄭意本不如此也。云「玄謂異其名者，示相變耳」者，後鄭以先鄭云「比伍之名與國中異制」，嫌名異制亦異，故更釋之。明鄉遂但異名，以示相變，制實不異也。云「遂之軍法，追胥起徒役，如六鄉」者，明六遂七萬五千家，亦家出一人，爲六軍之副，是軍制遂與鄉亦不異，不徒居之比伍也。賈疏云：「案《小司徒》云：『乃會萬民之卒伍而用之，五人爲伍，五伍爲兩，四兩爲卒，五卒

爲旅，五旅爲師，五師爲軍。以起軍旅，以作田役，以比追胥，以令貢賦。』但彼鄉中唯見出軍，無田制，此遂人唯見田制，無出軍法，故鄭彼注云「鄉之田制與遂同」。此遂之軍法，追胥起役，如彼六鄉，互見其義，明彼此皆有也。但彼此雖相如，據大較而言，細論之仍有少異，以其六鄉上劑致民，六遂下劑致甿，六鄉上地無萊，六遂上地有萊，是其稍異也。」案：六鄉上地亦當有萊，與六遂同，賈說非，詳後。賈《大司馬》疏又謂公邑出軍之法亦與鄉遂同，其說亦非，詳彼疏。凡治野，以下劑致甿，以田里安甿，以樂昏擾甿，以土宜教甿稼穡，以興勸利甿，以時器勸甿，以彊予任甿，以土均平政。變民言甿，異外內也。甿猶懵，懵，無知貌也。致猶會也。民雖受上田、中田、下田，及會之，以下劑爲率，謂可任者家二人。樂昏，勸其昏姻，如媒氏會男女也。擾，順也。時器，鑄作耒耜錢鏹之屬。彊予，謂民有餘力，復予之田，若餘夫然。政讀爲征。土均掌均平其稅。鄭大夫讀勸爲藉。杜子春讀勸爲助，謂起民人令相佐助。【疏】「凡治野」者，以下八事皆治野民之法，即遂官之官法也。云「以下劑致甿」者，宋本《釋文》出「致氓」，則此章七「甿」字，陸並作

「氓」。《說文·康部》耬字注引《周禮》曰「呂興耬利萌」，字又作「萌」。段玉裁云：「《白帖》二十二、二十三引致氓、安氓、任氓、利氓，《旅師》新氓，字皆作氓，不作𡵓。《開成石經》皆作𡵓。《詩》『氓之蚩蚩』，《石經》亦作𡵓，避氓爲亡民也。《詩》、《禮》作𡵓，自唐石經始，所當更正。」又云：「𡵓字作萌，《說文》爲勝。許君《民部》曰：『民，衆萌也，萌而無識也。』漢人謂民爲萌，如《列女傳·魯臧孫母傳》：『斂小器投諸台，言取郭外萌內之於城中也。』《漢書·霍去病傳》及厥衆萌，《劉向傳》『民萌何以勸勉』。皆可證。今《周禮·遂人》𡵓字凡七，《遂大夫》一，《旅師》一。宋本《周禮音義》、《詩·衛風》正義、《白帖》所引《周禮》皆作氓。然則唐初《周禮》本作氓，後改爲𡵓。實則漢時《周禮》本作萌，後改爲氓。」丁晏云：「萌古字與民通。《管子·揆度篇》：『其人同力而宮室美者，良萌也。』《說文·田部》：『𡵓，田民也。从田亡聲。』《廣雅·釋詁》云：『𡵓，癡也。』古氓、𡵓、萌、民，聲近通用。《五經文字·田部》：『𡵓，莫鄧反，又音盲。』張參此書作於大厯十一年，在開成石經之先，已有𡵓字矣。《周頌》『侯彊侯以』，箋引《周禮》『以彊予任民』。民與氓古通用。」詒讓案：此經之𡵓爲野民，與《說文》𡵓訓田民正合。《說文·民部》又有氓字，云：「民也，

讀若盲。《孟子·公孫丑篇》云：「則天下之民皆說而願爲之氓矣。」此與《旅師》新𡵓之義亦合。則𡵓氓二字並可通。但據宋本《釋文》，則此經注諸𡵓字並當作氓。今本作𡵓，自是後人所改者。《說文》引作萌，則是段借字。疑漢時自有此別本，鄭注之本，未必與許同也。云「以田里安𡵓」者，賈疏云：「田則爲百畝之田，里則五畝之宅，民得業則安，故云安𡵓也。」云「以土宜教𡵓稼穡」者，《大司徒》云「以土宜之灋，辨十有二土之名物」。又云「辨十有二壤之物，而知其種，以教稼穡樹藝」。凡草人所掌是也。云「以彊予任𡵓」者，①彊，《釋文》作「疆」，宋建陽本同，並誤。民有餘力以治田，謂之彊予，亦任民之餘法也。云「以土均平政」者，《大司徒》云：「以土均之灋，辨五物九等，制天下之地征。」此官掌六遂以外之地征，亦以土均之法平之。注云「變民言𡵓，異外內也，𡵓猶𡵓，𡵓，無知貌也」者，𡵓亦當作「氓」。《釋文》云：「𡵓，本又作𡵓。」賈疏云：「此案大司徒、小司徒主六鄉，皆云民，不言𡵓；此變民言𡵓者，直是異外內而已，無義例。以其民者冥也，𡵓者𡵓，皆是無知之兒也。」案：賈本亦作「𡵓」，𡵓、氓、𡵓一聲之轉。《說文》

① 原誤重「者」字，據注文刪。

讀氓若盲，蓋亦以聲兼義。《賈子·大政下篇》亦云「民之爲言瞶也，萌之爲言盲也」。賈子以盲詰萌，與許以盲詰氓正同。此注懵，當從陸所載別本作「懵」爲正。《說文·心部》云：「懵，不明也。」《爾雅·釋訓》云：「懵懵，洄洄，惛也。」彼《釋文》亦云「懵字或作懵」。鄭以懵釋氓，而訓爲無知貌，與《說文》、《爾雅》訓義及《廣雅》「眊癡」、《賈子》「萌盲之詰並通」。又案：民爲兆民，四民之通名，眊氓字通，並爲田野農民之專稱，故《說文》訓眊爲田民。田必在野，故《國策·秦策》高注云：「野民曰氓。」《孟子·滕文公篇》趙注云：「氓，野人之稱。」田野必在國外，故此經六遂以外之民稱氓。《史記·三王世家》索隱引《三蒼》云：「邊人曰眊。」《墨子·尚賢上篇》云：「國中之衆，四鄙之萌人。」四鄙即邊邑在甸外者也。又古制，凡外來新民，皆於六遂外之公邑受田，故亦謂之氓，《旅師》「新眊」是也。通言之，氓亦謂之民，故此經與《旅師》並氓民錯出。《旅師》云「以質劑致民」，即此經「以下劑致氓」也。《毛詩·衛風·氓》傳及《說文》亦以民訓氓，偶未別白言之耳。云「致猶會也」者，《說文·攴部》云：「致，送詣也。」《廣雅·釋詁》云：「致，會，至也。」此會字，《釋文》音古外反。《旅師》「以質劑致民」，注亦釋致爲會。賈彼疏以「會計」爲釋，鄭意或當如是。蓋

致本有會聚之義，會聚則可會計，故又引申爲會計之會也。云「民雖受上田、中田、下田」者，賈疏云：「即此下文夫一廛以下是也。」云「及會之，以下劑爲率，謂可任者家二人」者，即《小司徒》云「下地家五人，可任也者家二人」是也。遂地雖亦有家七人受上地，家六人受中地，其會計之時，則皆以家二人任之，是以下地爲率，減於六鄉也。賈疏云：「對六鄉之中，其家一人爲正卒，已下皆爲羨卒；此六遂之中，家一人爲正卒，第二者爲羨卒，自外並爲餘夫，家取二人，爲下劑致眊也。」惠士奇云：「六鄉役民以上劑，六遂役民以下劑，劑者州里之役要，而司空之辟也。」案：惠說是也。劑即徒役之凡要，以所任之多少爲上下，故《鄉師》謂之役要。要劑名異而義同。但鄭訓致爲「會計」，於經義究似未協。竊疑「致眊」當與《大司徒》「致萬民」《小司徒》「致民」義同，彼「致民」先鄭注訓爲「徵召會聚」是也。下劑致眊，謂依下等役法徵聚遂徒，輕其力役以惠遠也。云「樂昏，勸其昏姻也」者，《呂氏春秋·爲欲篇》高注云：「勸，樂也。」是樂勸義同，謂勸成其昏姻，使之相愛樂也。云「如媒氏會男女」者，《媒氏職》「中春之月，令會男女」，遂官亦以是令民也。云「擾，順也」者，《大宰》注云：「擾猶馴也。」馴順字通。《書·皋陶謨》「擾而毅」，僞孔傳亦云「擾，順也。」

昏姻相樂則民和順，故云擾民。賈疏謂順民意，失之。云「時器，鑄作耒耜錢鎛之屬」者，《詩·周頌·臣工篇》「庠乃錢鎛」，毛傳云：「錢，銚。鎛，鑿。」此與耒耜皆田器，鑄金爲之，以供歲時之用，故謂之時器。《遂大夫》又謂之「稼器」，《考工記·段氏》爲鎛器，亦即此也。云「彊予，謂民有餘力，復予之田，若餘夫然」者，《詩·周頌·載芟篇》「侯彊侯以」，毛傳云：「彊，彊力也。以，用也。」鄭箋云「彊，有餘力者」，引《周禮》曰「以彊予任民」。以謂閒民，今時傭賃也。《春秋》之義，能東西之曰以。孔疏云：「彊有餘力，謂其人彊壯，治一夫之田仍有餘力，能佐助他事者也。」案：據注及《詩》箋疏說，蓋謂凡民一夫受百畝之田，其彊有餘力者，則不以百畝爲限，當於百畝之外，復予之田，若餘夫受田之比也。若然，則授田有逾常制，於經亦別無可徵，未知搞否。竊疑「彊予」，當爲治田之人有餘力，官勸其相佐助而耕者。馬瑞辰謂此彊予，即《遂師》之「巡其稼穡而移用其民」，其說近是。馬氏又謂此「予」亦即《詩》之「侯以」，予以古通用，予即謂傭賃也。莊有可說同。此與鄭釋《詩》、《禮》義並不同，而亦可通。若然，彊謂農民自相助，予殆即閒民受庸治田，若《國語·晉語》所謂隸農者，或亦任民之一端與？又案：《詩箋》宋本彊作「強」，疑此注例

用今字，亦當作強，詳《草人》疏。云「政讀爲征」者，詳《小宰》疏。云「土均掌均平其稅」者，《土均》云：「掌平土地之政，以均地守，以均地事，以均地貢。」注云：「政讀爲征。所平之稅，邦國都鄙也。」案：六遂及公邑之稅，均人均之；邦國都鄙之稅，土均均之。但均人與土均官異，而同用大司徒土均之法，故鄭通言之，非謂土均得內掌六遂也。云「鄭大夫讀耨爲藉，杜子春讀耨爲助，謂起民人令相佐助」者，《里宰》云：「以歲時合耦于耨。」司農，子春注義與此同。《孟子·滕文公篇》云：「助者，藉也。」案：大夫、子春並據《里宰》合耦爲說，耨、藉、助，聲義並相近，而耨从助得聲，於義尤切，故杜讀爲助，後鄭亦從之也。段玉裁云：「此可不易其字，直云耨，藉也，助也，合於詁訓之法。《說文·末部》耨字下曰：「殷人七十而耨。耨，藉稅也。從末助聲。」引《周禮》曰興耨利萌。耨字下曰：「古者使民如借，故謂之藉。」然則藉藉一字也。許君以藉訓耨，勝於杜、鄭之易字。許先稱商人七十而耨，釋之曰藉稅也者，此發明《孟子》之義，《孟子》言稅法也。後引《周禮》者，《周禮》之興耨不言稅，但謂民人自相借力佐助，故許君以爲引申之義。」論讓案：許蓋亦釋此耨爲藉，與鄭大夫說同，故引此文爲證。官借民力以治田，與民自相借以耦耕，事異而

義同也。謂起民人令相佐助，亦杜說，《里宰》注可證。賈以爲後鄭說，誤。《爾雅·釋言》云：「興，起也。」又《小爾雅·廣詁》云：「助，佐也。」故杜釋爲起民人相佐助也。江永云：「此即《旅師職》興發耨粟，頒之於民，施其惠，散其利，至秋而斂之者也。若里宰以歲時合耦于耨，以治稼穡，趨其耕耨，此當在以時器勸耨之中。農民最患無蓋藏，秋斂之粟，歷冬及春已欲盡，東作方興，室如懸磬，數口之家，嗷嗷苦饑，將稱貸於兼并之家，則有倍稱之息，至秋而斂，僅足以償，曾未幾時，而又告匱矣。耕三餘一，耕九餘三，安能比戶如此哉！故令野有耨粟之法，豫爲之儲，旅師聚之，又兼屋粟、閒粟以益之。其用之也，春頒而秋斂，并不令其出息。於是農人無半歲之饑，田功無荒廢之患，而餘一餘三之積，亦由此基之。此大有利於田耨之事，故此職特言以興耨利耨，在時器勸耨之先，正是旅師春頒出粟以散利之事。若其春耕已不足，雖欲以時器勸之，亦不能枵腹而秉耒矣。」案：依江說，則此興當如《旅師》注「縣官徵聚物曰興」之義。興耨利耨，亦與彼職興積散利文相應，於義似較長也。互詳《里宰》、《旅師》疏。辨其野之土，上地、中地、下地，以頒田里。上地，夫一

廛，田百畝，菜五十畝，餘夫亦如之；中地，夫一廛，田百畝，菜百畝，餘夫亦如之；下地，夫一廛，田百畝，菜二百畝，餘夫亦如之。菜，謂休不耕者。鄭司農云：「戶計一夫一婦而賦之田，其一户有數口者，餘夫亦受此田也。廛，居也。楊子雲有田一廛，謂百畝之居也。」玄謂廛，城邑之居，《孟子》所云「五畝之宅，樹之以桑麻」者也。六遂之民奇受一廛，雖上地猶有菜，皆所以饒遠也。王莽時，城郭中，宅不樹者爲不毛，出三夫之布。【疏】「辨其野之土，上地、中地、下地，以頒田里」者，此六遂受地之制也。《小司徒》注云：「鄉之田制與遂同。」此言六鄉亦爲溝洫也。實則三等田菜之制，鄉亦當與遂同。其大司徒都鄙井牧之法，則以不易、一易，再易爲三等；而不易之田家百畝，無菜，與此少異。《載師》、《縣師》及此注，又以三等田菜爲都鄙之制，非也。賈疏云：「此據在六遂之中爲野，故以野言之。此直言上中下地，亦當如《小司徒》云上地家七人，中地家六人，下地家五人。」云「上地，夫一廛，田百畝，菜五十畝」者，沈彤云：「大司徒之頒田於都鄙也，不易之地家百畝，一易之地家二百畝，再易之地家三百畝。遂人之頒田於野也，中地田百

晦，而萊百晦，即易之晦數也；下地田百晦而萊二百晦，即再易之晦數也；唯上地田百晦，而萊五十晦，乃與不易之晦數異，而康成則謂其有所饒。考諸《大司馬》之職，上地食者參之二，中地食者半，下地食者參之一。夫食者參之二，謂三分百五十晦而歲種其二也。食者半，謂歲種二百晦者半也。食者參之一，謂歲種三百晦者一也。歲種二百晦之半，三百晦之一，固皆百晦也。三分百五十晦而歲種其二，亦曷嘗饒於不易之晦數哉！抑百五十晦而歲種其三之二，則歲休其一也。休其一而種其二，則是不易者多而易者寡，易止一歲而不易連二歲，其地特稍遜於皆不易者耳。此又上地與不易者之等，所以異而同者也。」王鳴盛云：「《載師》疏《鄭志》荅張逸，六遂之民，上地家百晦，萊五十晦；中地田百晦，萊百晦；下地田百晦，萊二百晦。相通三夫六百五十晦，又三分去一之法，十八當餘十二。遂地以有五十晦萊，於三分去一，乃得十三。據此則甸地共十二同，內六遂二同五十成，二十二萬五千夫，十八分而去五，得十六萬二千五百夫。六遂七萬五千家，通率六家而受十三夫，則受此十六萬二千五百夫之地也。下劑致畛，可得十五萬人。」注云「萊謂休不耕者」者，《縣師》注義同。鄭司農云「戶計一夫一婦而賦之田」者，戶以一夫

一婦爲率，所謂夫家也。其所賦之田百晦，即謂之夫。云「其一戶有數口者，餘夫亦受此田也」者，此據《漢書·食貨志》云：「農民戶一人已受田，其家衆男爲餘夫，亦以口受田如比。」釋經餘夫亦如之。謂一家之中，正夫止一人，正夫之外，若有子弟任耕種者，口數羨多，是爲餘夫；凡餘夫一人，亦受此一夫所賦百晦之田，是餘夫與正夫等也。後鄭亦同此義，故《載師》注亦引《漢志》爲釋。《孟子·滕文公篇》則云「餘夫二十五畝」，不云亦受百晦。《公羊》宣十五年何注及《後漢書·劉寵傳》李注引《春秋井田記》，並云「一夫一婦受田百畝，以養父母妻子，五口爲一家，多於五口名曰餘夫，餘夫以率受田二十五畝。」與《孟子》說同。賈《載師》疏謂彼餘夫是二十九以下，未有妻，故受二十五畝，若三十有妻，則受夫田百畝，以調停《孟子》及二鄭之說。今案：《孟子》趙注云：「餘夫者，一家一人受田，其餘老小尚有餘力者，受二十五畝。受田者，田萊多少，有上中下。《周禮》曰「餘夫亦如之」，亦如上中下之制也。」趙說較二鄭及班《志》爲長。陳祥道申趙說云：「餘夫之田，不過二十五晦，以其家既受田百晦，而又以百晦予之，則彼力有所不逮矣。故其田四分農夫之一而已。禮所謂如之者，如田萊之多寡而已，非謂餘夫亦受百晦之田如正農夫也。」王鳴盛

云：「陳解甚確。蓋上地田二十五畝，萊十二畝半；中地田二十五畝，萊亦二十五畝；下地田二十五畝，萊五十畝也。」莊存與云：「餘夫亦如之者，據餘夫應受之地，而亦配以萊也。若云別有田有廬，則與正農無異，何爲餘夫。」案：陳、王、莊三說，並足申趙義。方苞、姜兆錫、金鶚說亦同。但餘夫之名，與正夫皆起於一夫一婦。凡十五以上未授室者，《小司徒》通謂之餘子，而不得爲餘夫。參校《漢志》及鄭、何說，餘夫皆專據已授室之子弟言之。蓋一家五口，除母妻外，男子止有三人，本身已受田，父老既不任耕，子少又未授室。必子已長及有壯弟，乃爲餘夫。《漢志》衆男，亦不外此。趙氏兼舉老小，說殊未審。又此餘夫之田，當與正夫同以率輸稅。趙氏據《王制》「夫圭田無征」之文，謂餘夫與圭田皆不出征賦，則非《王制》義，尤不足據。《國語·魯語》韋注又云：「三十者受田百畝，二十者受五十畝。」此蓋以二十者爲餘夫，與賈說同，而受田之數復異，亦非也。又案《小司徒》計口授田之法，上地家七人，中地家六人，下地家五人。依《漢志》及先鄭、趙邠卿說，則無論上中下地，皆家一人受正田，其餘男子任耕者，悉爲餘夫，別受田，是餘夫即在七人六人五人之內，而受田則在正田之外也。依何邵公說，則以五口爲一家，蓋舉下地爲率，五口

之外衆男，乃爲餘夫。以是推之，似上地家七口，中地家六口，其餘夫亦必在七口、六口之外。二說少異。金鶚云：「《小司徒》所謂家七人、家六人，正合子弟計之。蓋子弟助父兄以耕，同食於百畝之田，《詩》所謂「侯亞侯旅」是也。《小司徒》云：「凡起徒役，毋過家一人。以其餘爲義，唯田與追胥竭作。」此義卒即餘夫也。義卒在家七人之中，其不受百畝之田可知矣。」案：金謂餘夫即義卒，在家七人之內，是也。但義卒雖不受百畝之正田，而得受二十五畝之餘田。蓋義卒者別於正卒之言，餘夫者亦別於正夫而言也。正卒必年三十受兵，而家以一人爲斷，正夫亦然。則所謂餘夫者，亦必二十以上有室而後受餘田，又必至三十別爲戶，而後得爲正夫，受正田可知矣。若然，經餘夫當有二：一爲二十九以下，有室而未任受兵者；一爲家已有一人爲正卒，年三十以上不別爲戶者。二者皆當從父兄之爲正卒者爲戶，則必在五、六、七人之內可知。何說五口，通父母妻子，餘夫在其外，亦謂子幼不得爲餘夫耳。若子長至二十，已有室，與義卒竭作之列，豈得因其在五口之內，而不授以二十五畝之田乎？然則何說與先鄭說，亦可互通，不容泥也。互詳《載師》疏。云「廬，居也」者，《說文·戶部》云：「廬，二畝半也。一家之居。」《方言》云：

「廬，厠也。東齊海岱之間或曰廬。」《毛詩·魏風·伐檀》傳云：「一夫之居曰廬。」案：先鄭所謂廬者，謂夫受田百畝，於中爲居，所謂二畝半爲廬舍者也。依後鄭義，則六遂無公田，又不從廬舍二畝半之說，詳《匠人》疏。云「楊子雲有田一廬，謂百畝之居也」者，《漢書·揚雄傳》述雄自序云：「揚氏漢元鼎間，避仇，遯江上，處嶧山之陽曰郛，有田一壥，有宅一區。」顏注引晉灼云：「《周禮》，上地夫一廬，一百畝也。」案：壥即廬字。先鄭蓋謂此經夫一廬，謂田中之居。揚雄有田一廬，直謂田百畝。二者雖異，然亦以古制田百畝而中有廬，因謂百畝之田爲一廬，義足相證，故舉以爲況也。云「玄謂廬，城邑之居」者，破先鄭居在田中之說。知廬在城邑者，即《載師》云「以廬里任國中之地」是也。但此廬里不在國城之中，城邑者泛指六遂之城邑言之。《孟子·滕文公篇》，許行曰「願受一廬而爲氓」。蓋凡受宅者皆一廬矣。互詳《敘官》及《載師》疏。賈疏云：「此經上中下地皆云『夫一廬田百畝』，百畝與一廬別言之，則此廬與《廬人》皆謂廬綿於其中，則此乃是廬里任國中之地一也，不得同爲百畝之田。《詩》所云『三百廬兮』者，自是三百家之稅，故亦廬表稅也。」云《孟子》所云五畝之宅，樹之以桑麻者也」者，詳《載師》疏。《孟子》「桑」下無「麻」字。

呂飛鵬云：「此及《載師》、《閭師》疏，皆較《孟子》增一麻字。《梁書》張充與王儉書，有『五畝之宅，樹以桑麻』句。」詒讓案：《載師》注引亦無「麻」，此疑後鄭所加。引此者，證廬即五畝之宅，破先鄭百畝之居之說也。《荀子·大略篇》亦云：「故家五畝宅，百畝田，務其業而勿奪其時，所以富之也。」與《孟子》義同。後鄭意，五畝之宅皆在城邑中。《孟子》趙注則據二畝半在邑，二畝半在田爲說，後鄭所不取，詳《匠人》疏。云「六遂之民奇受一廬，雖上地猶有萊，皆所以饒遠也」者，賈疏云：「經『餘夫亦如之』，則餘夫皆有田有廬，是餘夫奇別更受廬，備後離居之法，故奇受一廬也。對六鄉不言餘夫之廬，上地又無萊，故云皆所以饒遠也。」李鍾倫云：「鄭以六鄉餘夫不別受廬，又上地不復加萊。據《大司徒》『造都鄙』注，不易、一易、再易即此上中下地。彼不言餘夫亦如之，又無萊五十畝。此法見於司徒，而司徒主六鄉，故以爲鄉之田制如此。然彼實都鄙法，鄉當從遂。鄭於田法軍法既以鄉遂爲類矣，而又以鄉與都鄙爲一法，何也？」案：李說是也。鄭謂此上田有萊等，爲甸稍縣都之通制，故云饒遠。《縣師》注云：「郊內謂之易，郊外謂之萊，善言近。」亦以郊外之遠，對郊內之近言之。然三等田萊之法，鄉遂制實同，而都鄙公邑則異。此以有萊

者爲郊外六遂及都鄙之制，而以不易、一易、再易三等爲六鄉之制，與《大司徒》經文及《小司徒》注義並相悞，詳《載師》、《縣師》疏。又案：後鄭以經云「亦如之」，「家上廩田爲文」，故謂餘夫奇受一廩。然《春秋》、《孟子》、《漢志》及先鄭、何、趙諸儒說，並止謂餘夫受田，不云受廩。《大戴禮記·曾子制言篇》云：「君子之爲弟也，近市無賈，在田無野。」盧注云：「田無廩也。」則子弟不得與父兄同受廩明矣。經云如者，亦止謂田萊耳，後鄭殆誤會，非經義也。云「王莽時，城郭中宅不樹者爲不毛，出三夫之布」者，亦證廩在城邑也。《漢書·食貨志》云：「王莽以《周官》稅民，城郭中宅不樹藝者爲不毛，出三夫之布。」案：莽制即放《載師職》「宅不毛者有里布」法爲之。凡治野，夫閒有遂，遂上有徑；十夫有溝，溝上有畛；百夫有洫，洫上有涂；千夫有澮，澮上有道；萬夫有川，川上有路，以達于畿。十夫，二鄰之田。百夫，一鄰之田。千夫，二鄙之田。萬夫，四縣之田。遂、溝、洫、澮，皆所以通水於川也。遂，廣深各二尺，溝倍之，洫倍溝。澮，廣二尋，深二仞。徑、畛、涂、道、路，皆所以通車徒於國都也。徑容牛馬，畛容大車，涂容乘車一軌，道容

二軌，路容三軌。都之野涂與環涂同，可也。萬夫者，方三十里少半里，九而方一同。以南畝圖之，則遂從溝橫，洫從澮橫，九澮而川，周其外焉。去山陵、林麓、川澤、溝瀆、城郭、宮室、涂巷三分之制，其餘如此，以至于畿，則中雖有都鄙，遂人盡主其地。【疏】「凡治野」者，王念孫云：「野」下原有「田」字，於田中設五溝五涂以治之，故曰「治野田」。「凡治野」三字已見上文，此文自作「凡治野田」，與上文不同。自唐石經始脫「田」字，而各本皆沿其誤。《周頌·噫嘻》箋及《魯頌·駉》正義引此並作「凡治野田」。《噫嘻》正義釋之云：「言凡治郊外野人之田。」案：王說是也。此記六遂治溝洫以制地之制也。六鄉之制亦同。惟都鄙公邑制井田，與此異。云「夫閒有遂，遂上有徑」者，賈疏云：「已下五溝所以通水入川，五涂所以通道向都及國城也。」程瑤田云：「遂人之不爲井田，確有可證。《周頌·噫嘻》之詩曰：『駿發爾私，終三十里，亦服爾耕，十千爲耦。』駿發曰私，是不畫井，無公田之證也。耦曰十千，是萬夫之證也。里曰三十，是萬夫之田，方三十三里又少半里，舉成數之證也。」注云「十夫，二鄰之田」者，以下並以家授田一夫計之，明授田與制邑夫家數必相應，故《王制》云：「凡居民量地以制邑，度地以居民，地邑民居，必參

相得也。」上文「夫授田百畝，是一夫即一家所受。六遂五家爲鄰，二鄰爲聯，則有十家，《論語》所謂「十室之邑」是也。居同邑，耕同野，故十夫爲二鄰之田。凡十夫，爲田千畝，不成方，其長十萬步。云「百夫，一鄰之田」者，百家爲鄰，其邑百室，受田百夫，故云一鄰之田。凡百夫，爲田萬畝，方十萬步。云「千夫，二鄰之田」者，五百家爲鄰，二鄰爲聯，則有千家，《論語》所謂「千室之邑」是也。千室受田千夫，故千夫爲二鄰之田。凡千夫，爲田十萬畝，亦不成方，其長千萬步。云「萬夫，四縣之田」者，二千五百家爲縣，其邑萬室，受田萬夫，故云四縣之田。凡萬夫，爲田百萬畝，方千萬步。此並據遂人治六遂而言。若鄉之田制與遂同，^①則十夫爲二比之田，百夫爲一族之田，千夫爲二黨之田，萬夫爲四州之田。故《詩·周頌·良耜》云「以開百室」，鄭箋云：「百室，一族也。百室者，出必共洫閒而耕，人必共族中而居。」百室之田即百夫，故得共一洫也。云「遂溝洫澮皆所以通水於川也」者，即《司險》所謂五溝也。《匠人》注云：「遂者，夫閒小溝。」《說文·水部》云：「溝，水瀆，廣四尺，深四尺。洫，十里爲成，成閒廣八尺，深八尺，謂之洫。」又《水部》云：「洫，水流澮澮也。方百里爲洫，廣二尋，深二仞。」又《川部》云：「川，貫穿通流水也。」

《虞書》曰：「濬洫距川。」言深洫之水，會爲川也。」案：澮即洫之借字。遂亦作術，《月令》「審端徑術」，注云：「術，《周禮》作遂。遂，小溝也。」洫字又作減，《毛詩·文王有聲篇》「築城伊減」，傳云：「減，成溝也。」此五者，散文通謂之溝，亦謂之洫。《左》襄十年傳，鄭子駟爲田洫。又三十一年傳云「田有封洫」，杜注云「洫，田畔溝也」是也。通水於川，即《小司徒》注云「溝洫爲除水害」是也。《論語·學而》皇疏云：「畝度六尺，以一尺耕，伐地爲溝，通水流，水流吠然，因名曰吠也。遂，取其水始遂也。溝，取其漸深有溝洫也。《釋名》云：「田閒之水曰溝。溝，構也，縱橫相交構也。」程瑤田云：「禹之治水也，濬洫澮以入於川，是故水之行於地中也，小大之形，三者而已。故制字以象形，一水爲洫，二洫爲澮，衆澮爲川。及其盡力於溝洫也，則以爲非多其廣狹淺深之等，不足以盡疏濬之理。於是由川而澮，又等而增之，而洫，而溝，而遂，乃以承夫百畝中之畝，然後一旦雨集，以大受小，遞相承焉，不崇朝而盡達於川矣。其承畝者名之以遂，何也？慮其蓄而弗暢也，故遂之。曷爲承之以溝也？一縱一橫，乃見交暢之義，溝，轉

①「鄉」，原訛「鄰」，據楚本改。

也，縱橫之說也，名之曰溝，所以象其形。洫字從血，以洫承溝，謂是血脉之流通也。澮，會也，會上衆水以達於川，初分終合，所以盡水之性情，而不使有泛溢之害也。」云「遂廣深各二尺，溝倍之，洫倍溝，澮廣二尋，深二仞」者，竝依《匠人》文爲說。澮廣深亦倍洫，而依彼文云廣二尋深二仞，不云倍者，鄭說仞爲七尺，則二仞爲丈有四尺，與廣不相等。其說非也，詳彼疏。賈疏云：「此雖溝洫法，與井田異制，其遂溝洫澮廣深，亦與井田溝澮廣深同，故鄭還約《匠人》井田之法而言也。」云「徑畛涂道路皆所以通車徒於國都也」者，即《司險》所謂五涂也。《說文·彳部》云：「徑，步道也。」《田部》云：「畛，井田間陌也。」《辵部》云：「道，所行道也。」《足部》云：「路，道也。」《釋名·釋道》云：「徑，經也，人所經由也。涂，度也，人所由得通度也。道，蹈也，路，露也，言人所踐蹈而露見也。」《詩·周頌·載芟》「千耦其耘，徂隰徂畛。」毛傳云：「畛，場也。」①鄭箋云：「畛，謂舊田有徑路也。」鄭言此者，欲見五涂向外則達於畿，向內則通於國都也。此徑畛等，即所謂阡陌，都鄙井田之涂亦同，故《說文》以畛爲井田間陌。散文涂道路亦通稱。孔廣森云：「楚國以畛記田，故《楚辭》曰『田邑千畛』。《戰國策》葉公子高食田六百畛，殆因周十夫有溝，其徑名

畛，遂謂十夫之地千畝爲畛歟？」云「徑容牛馬，畛容大車，涂容乘車一軌，道容二軌，路容三軌」者，賈疏云：「此從川上有路差之，②凡道皆有三塗，川上之路則容三軌，道容二軌，塗容一軌，軌皆廣八尺。其畛差小，可容大車一軌，軌廣六尺。自然徑不容車軌，而容牛馬及人之步徑，是以《春秋》有『牽牛蹊』，蹊即徑也。」論讓案：徑容牛馬，故《說文》謂之步道，鄭《月令》注亦云「步道曰徑」，明才容徒行不容車也。畛容大車者，鄭依《車人》說大車徹廣六尺，則畛廣六尺，侈於溝二尺也。《說文·田部》云：「畷，兩陌間道也。廣六尺。」許說畷與此畛廣正同。涂容乘車一軌者，依《匠人》注說，乘車軌廣八尺，則涂廣一尋，與洫正同，廣於畛二尺也。道廣二尋，與澮正同，倍於涂也。路廣三尋，廣於道三之一也。惟徑之度無可考，以次減之，徑其廣四尺，侈於遂二尺與？知徑非廣二尺與遂廣同者，周尺一尺，校今尺不及八寸，二尺止一尺六寸弱，於度太狹，不足以容牛馬。以畛之廣侈於溝二尺例之，則徑廣亦不必正與遂同也。鄭釋五涂廣度，於衰分不誤；唯《車人》大車徹廣，疑

①「場」原訛「場」，據《詩·載芟》毛傳改。

②原脫「從」，據賈公彥《周禮注疏》補。

當作八尺，則畛廣六尺尚未能容大車耳。詳彼疏。又，凡鄭所云容大車乘車幾軌者，必容方軌並行，若必適如每軌八尺之數，則方軌並行，不能無輦互之患。蓋此注及《匠人》說道涂之廣，凡度以軌者，皆主築治之地而言。至道涂兩旁，既臨溝田，必非階厓斗絕，自當留不築治之餘地，以爲隱固，故二軌之道，兩車往來，足相容讓。但餘地之廣，既不占正軌之度，則當隨地勢爲之，不可豫定尺寸，故注不備論耳。云「都之野涂與環涂同，可也」者，明此五涂與五溝相並，而《匠人》野涂，則爲野之大路，二者小異。但都之野涂，不過三軌，此川上之路亦三軌，與彼畧同也。其郊甸之野涂則五軌，廣於川路二軌。賈疏云：「案《匠人》云：『環涂以爲諸侯經涂，野涂以爲都經涂。』」鄭注云：「經亦謂城中道，諸侯環涂五軌，其野涂及都環涂，野涂皆三軌。」彼注亦與此注同，皆以爲都之野涂與環涂同。依《內則》云：「道有三涂，男子由右，女子由左，車從中央。」是以鄭解川上之路及都之野涂，皆容三軌也。云「萬夫者，方三十三里少半里」者，《詩·周頌·噫嘻》箋義同。孔疏云：「計此萬夫之地，一夫百畝，方百步，積萬夫方之，是廣長各百夫，以百百乘之，是萬也。既廣長皆百夫，夫有百步，三夫爲一里，則百夫爲三十三里；餘百步，即三分里之一，爲少半

里。」賈疏云：「此解經萬夫有川之意。從西北隅北畔至東頭，有十洫，一洫百夫，十洫千夫，千夫萬步，萬步有三十三里百步，百步是少半里，以九澮摠而言之，則萬夫矣。故云萬夫者三十三里少半里矣。」云「九而方一同」者，同，方百里。里有九夫，一同有九萬夫。此云萬夫有川，以九乘之，與一同夫里之數正相等，但溝洫之體不同耳。賈疏云：

「案《匠人》云『廣尺深尺謂之畝』，以至『方百里爲同，同間廣二尋，深二仞』。彼井田法，溝澮稀少而云同。此雖溝洫法，溝澮稠多，與彼井田相準擬而言也。」云「以南畝圖之，則遂從溝橫，洫從澮橫，九澮而川周其外焉」者，賈疏云：

「案《詩》有『今適南畝』，又云『南東其畝』，故以南畝圖之。其田南北細分者，是一行隔爲一夫，十夫則於首爲橫溝。十溝即百夫，於東畔爲南北之洫。十洫則於南畔爲橫澮，九澮則於四畔爲大川。此川亦人造，雖無丈尺之數，蓋亦倍澮耳。此川與《匠人》澮水所注川者異，彼百里之間一川，謂大川也。」程瑤田云：「畝，長畝也。一夫之田，析之百畝，以爲百畝。南畝者，自北視之，其畝橫陳於南也。南畝故畝橫，洫流於遂，故遂縱。遂在兩夫之間，故謂之夫間，夫間，東西之間也。其南北之間則溝橫連十夫，故曰十夫有溝。不可謂二十夫之間，故變間言夫也。溝經十夫，流

入於洫，洫之長如溝，縱承十溝，十溝之水皆入焉，故曰百夫有洫也。洫之水入澮，澮長十倍於洫，而橫承十洫之分布千夫中者，故曰千夫有澮也。澮十之橫貫萬夫之中，十澮之水並入於川，故曰萬夫有川，澮橫川自縱也。鄭謂九澮而川周其外，恐不然矣。川上有路以達於畿，安得有縱路，復有橫路耶？其橫者，則二萬夫間之道也。澮但言九，亦考之不察矣。」案：程說是也。晦制南東，各視其土宜爲之。南晦則畎橫遂從，溝橫洫從，澮橫川從。東晦則畎從遂橫，溝從洫橫，澮從川橫。五涂之從橫，與五溝同。鄭止圖南晦者，以東晦與南晦從橫正相反，可以類推也。至萬夫有川，鄭謂九澮而川周其四旁，程則謂十澮而川流其一面。蓋鄭意，萬夫之田，縱橫皆有二川夾注其外，故中止容九澮；若爲十澮，則當羨千夫之田，於數不合也。然如鄭說，萬夫九澮，則其一面近川，千夫十澮，遂無所入之澮。若以十澮之水徑注於川，則五溝皆由小注大，由淺注深，以次灌輸，斷無十澮越澮而注川之理。至萬夫之川，一面爲之，已足承十澮之水，若四周爲川，則占地遽增三倍，而又無益於用，其誤殆無疑矣。《詩·周頌·噫嘻》疏又謂遂溝洫皆以九積數，蓋襲鄭九澮之說，而誤益甚矣。又案：遂人之溝洫，以十積數爲鄉遂不井之田溝洫之制；

《匠人》之溝洫，以八積數爲都鄙井田溝洫之制。其形體之異，互詳《匠人》疏。又案：遂從在夫間，長竟一夫，凡六十丈也。溝橫承十遂，其長十倍於遂，竟十夫，凡六百丈。加以十遂二丈，十徑四丈，通六百零六丈，爲一溝之長。洫從與十溝爲方，積百夫，長亦竟十夫六百丈；加以十溝四丈，十畛六丈，通六百一十丈，爲一洫之長。澮橫承十洫，其長十倍於洫，竟百夫六千丈；加以十洫十涂共十六丈，又加百遂百徑六十丈，通六千零七十六丈，爲一澮之長。川從與十澮爲方，積萬夫，長亦竟百夫六千丈；加以十澮十道共三十二丈，又加百溝百畛共百丈，通六千一百三十二丈，爲一川之長。川竟百夫六千丈，即三十三里少半里也。云「去山陵、林麓、川澤、溝瀆、城郭、宮室、涂巷三分之制，其餘如此」者，此言六遂受地之法，亦據《王制》「三分去一之率通計之也。鄉遂皆爲不井之地，故同用此法。其都鄙制井田，則所去不止三分之一，詳《小司徒》、《載師》疏。云「以至於畿，則中雖有都鄙，遂人盡主其地」者，于注例當作「於」，各本並誤。賈疏云：「遂人主六遂，與司徒主六鄉同，唯在二百里以內；今經云以達于畿，明畿以內之中，雖有都鄙作井田之法，遂人亦盡主其地，公邑之中爲溝洫之法與鄉遂同，遂人盡主之可知也。」案：公邑亦當爲井田，

賈依鄭說，謂公_圖爲溝洫，誤也。經言以達于畿者，明道路四達無阻耳，非謂遂人溝洫之制達於五百里之疆地也。詳

《匠人》疏。

以歲時登其夫家之衆寡及其六畜

車輦，辨其老幼癘疾與其施舍者，以頒職作

事，以令貢賦，以令師田，以起政役。登，成也，

猶定也。夫家，猶言男女也。施讀爲弛。職，謂民九職也。

分其農牧衡虞之職，使民爲其事也。《載師職》云「以物地

事授地職」，互言矣。貢，九貢也。賦，九賦也。政役，出土

徒役。【疏】「以歲時登其夫家之衆寡及其六畜車輦」者，

謂四時小案比也。蓋亦以國比之法行之，與六鄉同制。云

「辨其老幼癘疾與其施舍者」者，猶《小司徒》云「以稽國中

及四郊都鄙之夫家九比之數，以辨其貴賤老幼癘疾，凡征

役之施舍」也。六遂征役之法，與六鄉畧同。據《鄉大夫》

經舍征之法，老幼癘疾之外，尚有貴者、賢者、能者、服公事

者之屬。經不具言，故更以「其施舍者」通駭之。《鄉師》國

比之法，又云「辨其可任者與其施舍者」。《遂師》亦然。此

及《小司徒》並不云可任者，亦文不具也。注云「登，成

也，猶定也，夫家猶言男女也，施讀爲弛」者，《小司徒》注義

並同。凡經云施舍者，注並讀爲弛舍，詳《小宰》疏。云「職

謂民九職也」者，九職見《大宰》，此即《大司徒》、《載師》之

地職是也。賈疏云：「以其頒職而作事，是民之九職，使之

作事而遣出九貢也。」云「分其農牧衡虞之職，使民爲其事

也」者，《說文·支部》云：「攷，分也。」頒即攷之借字。《象

胥》注云：「作，使也。」鄭意經作事即《大司徒》之土事，《小

司徒》之地事是也。農牧衡虞亦約舉九職之三，與《載師》

地職注義同。云「《載師職》云，以物地事授地職，互言矣」

者，謂經云職事，即是分職使民爲其事，職事相貫，而《載

師》則以地職與地事分舉，明是互文見義，實無二事也。賈

疏謂「彼云物地事，不云貢，此云令貢賦，不云物地事，地事

與貢賦相互」，非鄭旨也。云「貢，九貢也」者，據《閭師》任

民之貢有九，亦即《大司徒》之「地貢」是也。九貢即大宰九

職所出，而彼職之九貢，則與土均之地貢，並爲邦國貢，與

此異也。云「賦，九賦」者，據《大宰》九賦三曰邦甸之賦，

即六遂及公邑所出。其關市山澤幣餘之賦，甸遂亦有之，

是則不備九賦，鄭通言之耳。云「政役，出土徒役」者，政亦

當讀爲征，與《小司徒》之「征役」及《均人》「力政」義同。賈

疏云：「即上注「遂之軍法如六鄉」者是也。」若起野役，

則令各帥其所治之民而至，以遂之大旗致

之，其不用命者誅之。役，謂師田，若有功作也。遂之大旗，熊、虎。【疏】「若起野役」者，猶後云「六遂之役」。不云六遂者，容甸以外公邑之役亦治之。賈疏云：「若《小司徒》『凡起徒役毋過家一人』之類也。」云「則令各帥其所治之民而至」者，賈疏云：「謂令縣正已下。」《縣正》云：「若將用野民師田、行役、移執事，則帥而至，治其政令。」是縣正受遂人之令也。」沈彤云：「野，公邑官亦包之。」論讓案：遂吏帥民而至，亦致之於司空，與鄉師大役帥民徒事同。云「以遂之大旗致之」者，依《司常》大閱云「帥都建旗」，《大司馬》治兵云「軍吏載旗」。攷彼二經，帥爲軍將，都爲大小都之長，軍吏爲六軍諸將帥，咸與遂吏無涉。唯鄭注《司常》帥都云：「六鄉六遂大夫也。」而《大司馬》云「帥都載旟」，注又專主遂大夫爲釋。其說實不塙。依經義，遂大夫當在《大司馬》「郊野載旟」中，又爵爲中大夫，則尤不得建大旗之旟。而此云遂之大旗者，蓋義取期民，以旗表事，故不依遂吏建旗恒法。《敍官》注云：「遂人主六遂，若司徒之於六鄉也。」鄉師時田，以司徒之大旗致衆庶，六遂爲六鄉之副，故起野役，亦同用大旗也。此與司常、大司馬建旗敍爵不同，詳《大司徒》疏。賈疏云：「以其遂人雖是大夫，合用鳥隼之旗致衆，今遂人掌衆，與大司徒

同，故致衆得用熊虎爲旗也。」案：賈說本《鄉師》注義，未塙，詳彼疏。注云「役謂師田若有功作也」者，《小宰》注云：「役謂發兵起徒役也。」又《小司徒》注云：「役，功力之事。」《閭胥》注云：「役，田役也。」是師田及他功作起徒役之事，通謂之役。《遂師》大喪亦云「道野役」是也。賈疏云：「以其《縣正》所云『用野民師田行役移執事』，爲此事致之，明此役與彼同。其云功作，則移執事之等是也。」云「遂之大旗熊虎」者，據《司常》九旗，熊虎爲旗。案：此遂之大旗，蓋即熊旗之旟。聶崇義云四旟。詳《大司徒》、《司常》疏。凡國祭祀，共野牲，令野職。共野牲，入於牧人以待事也。野職，薪炭之屬。【疏】「凡國祭祀，共野牲，令野職」者，此官掌令遂師共野牲，令委人共野職也。若然，野牲言共，亦令之；野職言令，亦共之；皆互文見義。注云「共野牲，入於牧人以待事也」者，野牲，即九職中藪牧所養之鳥獸，其在遂地者，則遂師共之，《遂師》云「凡國祭祀共其野牲」是也。賈疏云：「謂牛羊豕在六遂者，故曰野牲。」《牧人》云「掌牧六牲以共祭祀」，故知此野牲亦入牧人以待事也。」云「野職，薪炭之屬」者，此野職唯據祭祀所用，故知薪炭之屬，與《遂師》云「入野職于玉府」者爲貨賄異也。賈疏云：「此官令之，委人斂之，故下《委

人《云》「掌斂野之賦」，又云「斂薪芻，凡疏材木材，凡畜聚之物」。言之屬者，兼此諸物也。「凡賓客，令脩野道而委積。委積於廬宿市。」【疏】「凡賓客令脩野道而委積」者，此贊大小司徒也。賈疏云：「案《大司徒》云：『令野脩道委積。』彼謂摠令遣人。此於百里外野道，又令之，是亦令遣人也。」案：賈據《大司徒》注義。方苞、蔣載康謂脩道當令野廬氏。二說相兼乃備，詳彼疏。又案：此野道，即《遣人》云「國野之道」，蓋通該《匠人》「野涂五軌」及甸以外公邑采邑野涂三軌。凡賓客往來所出道路，此官並令脩之，與上文野田五涂異也。 注云「委積於廬宿市」者，

並據《遣人》文。大喪，帥六遂之役而致之，掌其政令。及葬，帥而屬六綽。及窆，陳役。致役，致於司徒，給墓上事及窆也。綽，舉棺索也。葬舉棺者，謂載與說時也。用綽旁六執之者，天子其千人與？陳役者，主陳列之耳，匠師帥監之，鄉師以斧洩焉。大喪之正棺、殯、啓、朝及引，六鄉役之；載及窆，六遂役之，亦即遠相終始也。鄭司農云：「窆，謂下棺時。遂人主陳役也。《禮記》謂之封，《春秋》謂之備，皆葬下棺也。聲相似。」【疏】「大喪帥六遂之役而致之」者，大喪亦謂王及后之喪。

知不關世子者，世子喪當用諸侯禮，不得備六綽也。云「及葬，帥而屬六綽」者，謂葬載及窆時，以索舉柩，亦帥遂役屬著舉下之也。云「及窆陳役」者，《釋文》作「及窆」，云：

「劉，昌絹反，穿也。本作窆。戚，彼驗反，與注相應。」阮元云：「陸從劉昌宗作窆，與注乖。當從戚衮本作窆，今本是也。」段玉裁云：「劉本大誤，與注不相應。或云注有『給墓上事及窆』之文。然窆爲穿地，窆爲下棺，事各不同。致役爲墓上事及窆，陳役爲窆，蓋六遂分任其役也。」案：阮、段說是也。此云「及窆陳役」，猶《遂師》云「及窆抱磨」也。劉、陸本，蓋涉注文而誤。 注云「致役，致於司徒，給墓上事及窆也」者，賈疏云：「以其殯及引皆六鄉役之，其墓上事及窆等六遂役之，故知致役給墓上。墓上則說載下棺之等。窆謂穿壙之等。不言在廟載事，亦六遂役之。不言者，略也。必致於司徒者，司徒雖主六鄉，以其地官之卿，掌徒庶之役，亦兼掌六遂之役故也。」云「綽，舉棺索也」者，綽與紼同。《白虎通義·崩薨篇》云：「紼者，所以牽持棺者也。」《雜記》注云：「綽引同耳。廟中曰綽，在塗曰引。」

《檀弓》「弔於葬者必執引，若從柩及壙皆執紼」。注云：「車曰引，棺曰紼。」《喪大記》言葬用輶，四綽，注云：「在棺曰綽，行道曰引，至壙將窆又曰綽。」《既夕禮》注云：「引，

所以引柩車。在軸輻曰紼。《左》宣八年傳：「冬，葬敬嬴，旱無麻，始用葛芻。」杜注云：「芻所以引柩，殯則有之，以備火，葬則以下柩。」孔疏云：「《禮》芻字或作紼，或作紼，繩之別名也。紼者，所以引柩。於殯則已有之，繫於輻車，以備火災，有災則引柩以避火。及葬則用之以下柩也。」案：孔說是也。統覈諸經注，蓋紼與引同爲大索，以麻爲之。柩殯於廟時，則繫於輻車，以備遷舉。及將葬，載柩於車時，亦以紼舉而載之。既至壙，又以紼繫於輻車，舉而下窆也。析言之，則在廟在壙舉柩之索謂之紼，在道引車之索謂之引。引屬於柩車之軸，紼屬於輻車，其用不同，故《大司徒》注詁引爲「引喪車索」，與此紼訓「舉棺索」異。通言之，則紼引同物，故《既夕》及《雜記》並以紼引通稱，先鄭《大史》注云「引，六紼」，《曲禮》注孔本亦云「紼，引車索」是也。《釋名·釋喪制》云：「從前引之曰紼，紼，發也，發車使前也。縣下壙曰紼，紼，捋也，徐徐捋下之也。」案：劉釋紼爲發車使前，亦即以引爲紼；其所云「縣下壙曰紼」，乃正是《禮注》之紼，紼紼字通，故《喪大記》注亦云「紼或爲率」，率即紼也。云「葬舉棺者，謂載與說時也」者，載謂舉棺載於柩車，《既夕禮》遷祖正柩後，云「乃載」，注云「乃舉柩卻下而載之」是也。說謂說下棺於地，《既夕》在廟載及

至壙，兩云屬引，後引即紼，故注云「於是說載除飾，更屬引於緘耳」是也。二者一升一降，並當舉棺，故皆用紼，詳《喪祝》疏。云「用紼旁六執之者，天子其千人與」者，賈疏云：「案《雜記》，諸侯執紼五百人，大夫三百人。以此約之，天子千人。無正文，故云「與」以疑之。」案：《檀弓》孔疏引何胤說，與鄭、賈同。《白虎通義·崩薨篇》說天子之制云：「臣子更執紼，晝夜常百二十二人。」《御覽·禮儀部》引作「千二百人」，義較今本爲長。蓋鄭據倍諸侯數，班據王禮之大數，說雖異，義並得通。至《呂氏春秋·節喪篇》云：「世俗之行喪引紼者，左右萬人以行之。」此則戰國之侈制，不足以證禮也。云「陳役者，主陳列之耳」者，《司市》注云：「陳猶列也。」賈疏云：「以其經云及窆，窆謂下棺。下棺之時，千人執紼，背碑負引，須陳列其人，故知謂陳列之也。」云「匠師帥監之，鄉師以斧涖焉」者，《鄉師》云：「大喪用役，則帥其民而至，遂治之。」及葬，執纛以與匠師御匱而治役。及窆，執斧以涖匠師。鄭言此者，明三官相與爲官聯，非遂人所專治也。云「大喪之正棺、殯、啓、朝及引六鄉役之，載及窆六遂役之，亦即遠相終始也」者，賈疏云：「知義然者，案《大司徒職》云：『大喪帥六鄉之衆庶，屬其六引。』此《遂人》云：『帥六遂之役，屬六紼，及窆陳役。』鄭據

此二文言之。以鄉近，使主殯及啓、朝，爲始；在祖廟之中將行，載棺於輿車，屬六綽，則六遂爲終也。至於在道言引，則還使六鄉爲始；至壙窆之下棺，則還使六遂爲終。以二處合自共爲終始，故云即遠相終始也。是以《大司徒》注云「六鄉主六引，六遂主六綽也。」詒讓案：《檀弓》云：「飯於牖下，小斂於戶內，大斂於阼，殯於客位，祖於庭，葬於墓，所以即遠也。」此注即據彼文。正棺，謂正柩於兩楹之間，詳《小司徒》疏。啓謂啓殯，朝謂朝祖，並詳《喪祝》疏。鄭司農云「窆謂下棺時，遂人主陳役也，《禮記》謂之封，《春秋》謂之備，皆葬下棺也，聲相似者，《鄉師》、《大僕》注義並同。聲相似者，謂窆封備三字聲類並相近。備，舊本並作「塋」，宋本作「備」，葉鈔《釋文》同，今據改。案：正字當作「塋」，借作「備」，塋備皆譌。並詳《鄉師》疏。凡事，致野役，而師田作野民，帥而至，掌其政治禁令。

遂師各掌其遂之政令戒禁。以時登其夫家之衆寡、六畜、車輦，辨其施舍與其可任者。經牧其田野，辨其可食者，周知其數

而任之，以徵財征。作役事則聽其治訟。施讀亦弛也。經牧，制田界與井也。可食，謂今年所當耕者也。財征，賦稅之事。【疏】「各掌其遂之政令戒禁」者，賈疏云：「以遂師下大夫四人所掌六遂，亦如鄉師主六鄉，亦二人共主三遂，故云各掌其遂之政令戒禁。」云「以時登其夫家之衆寡、六畜、車輦，辨其施舍與其可任者」者，即四時小案比之事，亦當以國比之法治之，與鄉師同。賈疏云：「已下皆如鄉師之職。但《鄉師》云「輦」，又云「老幼貴賤癘疾」，此不言之；此云「經牧其田野」之等，彼不言之；皆是互換爲義，故設文不同也。」云「周知其數而任之，以徵財征」者，《大宰》九賦章注引此職文作「以徵其財征」，疑此挽「其」字。任之，謂授職事，作徒役，凡任民之事皆是。財征，則兼九功民職之力征、九賦田野之地征言之。二者皆有財賄，亦皆校計民數田數而爲徵令也。賈疏謂「任之據人民之數，徵財征據田野之數」。未析。云「作役事則聽其治訟」者，唐石經「作」上有「以」字，各本並無。案：疏述經無「以」字。以文義校之，亦不當有。今從宋本。賈疏云：「役事中可兼軍役、田獵、功作之等，皆聽其治訟也。」江永云：「遂師，遂大夫、縣正皆聽治訟，其獄訟之大者，遂士聽斷之。」注云「施讀亦弛也」者，《大司徒》注義同。段玉

裁云：「亦者，亦《遂人職》而言。」阮元云：「『亦』下當脫『爲』。《遂大夫》、《土均》注云：『施讀亦爲弛也。』可證。」云「經牧，制田界與井也」者，經訓界，與《遂人》經田野義同。牧即井牧，詳《小司徒》疏。賈疏云：「但六遂制溝洫法，上文所云者是。今以爲制界與井也，又爲井田法者，以其遂人兼掌采地，故上云掌野鄙，兼言稍縣都。以采地有井田法，故此經云經牧其田野，與《小司徒》文同，故鄭亦兼言井也。」案：遂人兼掌甸以外公邑，公邑亦制井田也。鄭賈謂公邑用溝洫法，非是，詳《匠人》疏。云「可食謂今年所當耕者也」者，即《遂人》上中下地三等田萊，每年各有當耕之田也。江永云：「衍沃隰皋，可食者也。京陵淳鹵之類，不可食。」案：江說是也。《爾雅·釋地》云：「可食者曰原。」郭注云：「可種穀給食。」是可食即謂可耕之地，通三等田萊言之，非必當年所耕也。惟磽确不可耕者，乃爲不可食，詳《大司徒》疏。云「財征，賦稅之事」者，《小宰》注云：「政謂賦也，字或作征。」又《大司徒》注云：「征，稅也。」賈疏云：「征是賦稅，財是地稅，故云財征賦稅之事也。雖以地稅爲正，其中亦兼有口率出泉也。」案：此財征當通九賦九職而言。賈分征屬賦稅，財屬地稅，固非；又以賦稅爲口泉，亦沿《大宰》「九賦」注之誤。周法無口泉，

詳《大宰》疏。巡其稼穡，而移用其民，以救其時事。移用其民，使轉相助，救時急事也。四時耕耨、斂艾、芟地之宜，晚早不同，而有天期地澤風雨之急。【疏】注云「移用其民，使轉相助，救時急事也」者，移，移之段字。《廣雅·釋詁》云：「移，轉也。」《漢書·食貨志》云：「力耕數耘，收穫如寇盜之至。」所謂救時急事也。農事急迫之時，民力有不給者，則移其力之有餘者，使轉相佐助，即《遂人》所謂「以彊予任甿」，與《大司徒》「移民」事異也。《管子·山國軌篇》云：「春十日不害耕事，夏十日不害芸事，秋十日不害斂實，冬十日不害除田；此之謂時作。」即經所謂時事也。云「四時耕耨，斂艾、芟地之宜，晚早不同」者，賈疏云：「其地有宜早種早收，有宜晚種晚收，故云晚早不同。」云「而有天期、地澤、風雨之急」者，天期有寒溫，地澤有枯潤，風雨有緩驟，皆須趣時以畢事也。凡國祭祀，審其誓戒，共其野牲。審亦聽也。【疏】「凡國祭祀，審其誓戒者，賈疏云：『案：《冢宰職》云『大祭祀掌百官之誓戒』。大司寇泄誓百官并戒百族。此官主審其戒，戒遂之民，故不同也。』云『共其野牲』者，謂受令於遂人，而取六遂以外戴牧所養之牲而共之。《委人》注說野賦，云

「其牧則遂師以禁野牲」是也。

注云「審亦聽也」者，亦

上文聽其治訟而言。《說文·宀部》云：「家，悉也，知家諦也。重文審，篆文家从番。」《鄉師》注云：「聽謂平察之。」

《爾雅·釋詁》云：「察，審也。」是審聽同爲平察之義。人

野職、野賦于玉府。民所入貨賄，以當九職、九賦，

中玉府之用者。【疏】注云「民所入貨賄，以當九職九賦」

者，賈疏云：「野職，謂民九職之貢。野賦，謂民九賦，自邦

甸家稍縣都之等，口率出泉。以其在遠郊之外，故皆以野

言之也。」詒讓案：野職者，六遂中九職之民貢也。野賦

者，九賦邦甸之賦也。《委人》「掌斂野之賦」，注謂野之工

商嬪婦之賦，遂師以入玉府。彼經注雖云野賦，實據九職

之貢言之，與此小異。凡貢賦以泉穀財物爲正，或不出正

貢賦而以他物當之，若角人、羽人、掌葛所征之物，以當邦

賦是也。鄭以正貢賦穀物當人廩人，泉布當人外府、泉府，

鳥獸草木當人膳府等，不必皆入玉府，故兼當貢賦之物言

之。凡九賦皆地稅，鄭、賈以爲口率出泉，則失之。云「中

玉府之用者」者，明野職野賦不盡共玉府，此官唯選其中用

者人之也。賈疏云：「亦是遂師自當徵其穀稅泉，以入大

府，分之衆府也。若然，案《大府職》云：「式貢之餘財，以

共玩好之用，入於玉府。」彼入於玉府者，是式貢之餘財，財

之美者，由大府乃入玉府。此徑入玉府者，非財之美，不堪

王之玩好者也。案：賈說非鄭意也。職賦中泉穀等自入

大府，此官但擇中王服御器物之用者入王府耳。賈乃謂非

財之美者，誤矣。賓客，則巡其道脩，庀其委積。

巡其道脩，行治道路也。故書庀爲比。鄭司農云：「比讀

爲庀。庀，具也。」【疏】「賓客則巡其道脩，庀其委積」者，

《釋文》出「庀其」二字，云「又作庀」。段玉裁云：「《說文》

有「庀」無「庀」，疑庀庀一字也。如「妣」籀作「妣」。案：段

說近是。此亦贊大小司徒，而與野廬氏、遺人爲官聯也。

賈疏云：「《大司徒》云「野脩道委積」，據國外曰野，在六鄉

之中者。此據六遂之中者。」注云「巡其道脩，行治道

路也」者，《掌固》注云：「巡，行也。」《廣雅·釋詁》云：

「脩，治也。道脩，即《遂人》之「令脩野道」，《野廬氏》之「脩

除道路」。蓋野廬氏脩之，此官則巡行董趣之。云「故書庀

爲比，鄭司農云，比讀爲庀」者，本職後注及《春官·世婦》、

《大胥》先鄭讀並同。徐養原云：「當以庀爲正。庀俗體，

比則庀之省文。」云「庀，具也」者，《小爾雅·廣詁》文。《春

官·世婦》及《大胥》、《大司馬》注並同。大喪，使帥其

屬以幄帟先，道野役；及窆，抱曆，共丘籠及蜃車之役。使以幄帟先者，大宰也。其餘司徒也。幄帟先，所以爲葬窆之間先張神坐也。道野役，帥以至墓也。丘籠之役，窆復土也。其器曰籠。蜃車，柩路也。柩路載柳，四輪迫地而行，有似於蜃，因取名焉。行至壙，乃說，更復載以龍輅。蜃，《禮記》或作「搏」，或作「輅」。役，謂執紼者。鄭司農云：「抱曆，曆下車也。」玄謂曆者，適歷執紼者名也。遂人主陳之，而遂師以名行校之。【疏】「大喪，使帥其屬以幄帟先」者，《宰夫》注云：「大喪，王、后、世子也。」以幄帟先者，與幕人爲官聯也。先，謂先柩行，至墓豫張設之。云「及窆抱曆」者，抱即衰之借字。《說文·衣部》云：「衰，裋也。」《國策·秦策》高注云：「抱，持也。」賈疏云：「及，至也，謂柩車至壙。窆，下棺也。下棺之時，遂帥帥其執紼者之人名，歷適而校數之也。」云「共丘籠及蜃車之役」者，役即上野役，此冢丘籠蜃車二者爲文，丘籠以取土，蜃車以載柩，二者皆須徒役，此官則於所作野役中，簡選以共之。賈疏云：「土曰丘，謂共爲丘之籠器，以盛土也。蜃車之役，謂在祖廟中將行，共蜃車以載柩之役人也。」案：賈意蓋謂共役并共籠車之器。今攷蜃車即《巾

車》柩路，此王之柩路，當亦巾車共之。《稍人》注謂王柩路遂人共之，非也。又廟中將行，載柩屬六引當用鄉役，不當使遂官共之。鄭雖謂遂出柩路，而此注兩言執紼，則自謂共蜃車說載之役，非在道引行之役也。又丘籠似亦非遂官所共。賈疏說皆未塙。詳後及《稍人》疏。注云「使以幄帟先者，大宰也」者，賈疏云：「以其天官幕人掌共帷幕幄帟綬，屬大宰，故知使幕人以幄帟先是大宰也。」詒讓

案：幄帟雖幕人所掌，然但主共張，其奉而致之墓者，仍是六遂徒役之事。然則帥其屬者，即遂師自帥其所屬官及徒役，特聽大宰之使令耳。賈謂大宰使幕人，非經注意也。云「其餘司徒也」者，謂道野役以下諸事，皆司徒使遂師爲之。《大司徒》云：「大喪，帥六鄉之衆庶，而治其政令。」《稍人》云：「大喪，帥屬車與其役以至，掌其政令，以聽于司徒。」是大喪之役事，自鄉遂以至公邑，司徒盡掌治之矣。云「幄帟先，所以爲葬窆之間先張神坐也」者，《幕人》注云「帟在柩上」，此別爲神坐，上亦有帟也。幄則在旁。賈疏云：「謂柩至壙，脫載除飾，柩則在地，未葬窆之間，須有凶靈神坐之所，故知大幕之下，宜有幄之小帳，小帳之內，而有帟之承塵，以爲神坐也。」云「道野役，帥以至墓也」者，賈疏云：「以其云『導』，導是帥引之言，故知從廟帥引，往至

墓所也。」云「丘籠之役，窆復土也」者，《家人》云「以爵等爲丘封之度」，又云「及窆，以度爲丘隧」。《小宗伯》注云：「窆謂葬穿墳也。」復土，詳《小司徒》疏。賈疏云：「窆謂穿地。復土謂下棺之後，以墳上土反復，而爲丘壟。皆須籠器以盛土也。」云「其器曰籠」者，《說文·竹部》云：「籠，舉土器也。」《淮南子·精神訓》云：「負籠土。」高注云：「籠，受土籠也。」云「蜃車，柩路也」者，據《巾車》云「小喪共匱路」，即此蜃車也。匱柩古今字，互詳《巾車》疏。《雜記》孔疏云：「凡在路載柩，天子以下至士，皆用蜃車，與輜車同。故《周禮》遂師共蜃車之役，是天子也。」《既夕》云：「遂匠納車於階間。」注云：「車載柩車，《周禮》謂之蜃車。」是士用蜃車也。《雜記》云：「大夫載以輜車。」輜車則蜃車也。是大夫用蜃車，則諸侯不言亦可知。」云「柩路載柳，四輪迫地而行，有似於蜃，因取名焉」者，賈疏云：「謂在祖廟中，遂匠納車於階間，卻而上載之，乃加帷荒。帷荒即柳也。四輪迫地而行，即輅車以二軸而貫四輪，即許氏《說文》云「無輻曰輅」者也。」詒讓案：蜃車之制，《既夕·記》注云：「其車之輦狀如牀，中央有輶，前後出，設前後輅，輦上有四周，下則前後有軸，以輅爲輪。」又《雜記》注云：「輅崇，蓋半乘車之輪。」據此，則凡蜃車皆四輪輅，崇三尺三寸，故云

迫地而行。以其載柳，故亦謂之柳車。聶氏《三禮圖》引《阮湛圖》云：「柳車，四輪一輶，車長丈二尺，廣四尺，高五尺。」柳，詳《縫人》疏。又案：據《雜記》注，則凡柩車輅輜皆無輻。《雜記》疏謂但大夫輜車不用輻，則似天子諸侯蜃車有輻，說與鄭違，非也。云「行至墳，乃說，更復載以龍輜」者，賈疏云：「以其天子諸侯殯時用輜車，即《檀弓》所云「葢塗龍輜，天子之禮」是也。諸侯不龍其輶而已。殯既用輜，明葬時用輜可知。」詒讓案：謂行時載柩以蜃車，既至墳，說載，乃更以龍輜載柩入隧。《檀弓》注云：「天子殯以輜車，畫輶爲龍。」鄭言此者，欲見蜃車爲在道所用，與輜車異。亦見經云蜃車之役，實爲輜車之役，以其由蜃車說下載之，故通云蜃車耳。輜亦作輶，《說文·車部》云「下棺車曰輶」是也。云「蜃，《禮記》或作輶，或作輅」者，輶，舊本誤輶，今據余本、岳本、宋注疏本正。《雜記》「輜車」注云：「輶讀爲輅，或作輶。」許氏《說文解字》曰：「有輻曰輪，無輻曰輅。」《周禮》又有蜃車，天子以載柩。蜃輅聲相近，其制同乎。」又《喪大記》：「君葬用輶，大夫葬用輜，士葬用國車。」鄭注云：「大夫廢輶，此言輜，非也。輜皆當爲載以輅車之輅，聲之誤也。輅字或作輶。是以文誤爲國。輅車，柩車也。」《既夕》注亦云：「車載柩車，《周禮》謂之蜃車，

《雜記》謂之團。或作輅，或作輅，聲讀皆相附耳。未聞孰正。曾釗云：「《說文》輅字注云：『蕃車，下庫輪也。』《既夕·記》、《雜記》注說正與《說文》庫車之說合，則字實以輅爲正。輅、團、輅、輅，皆聲近通用之字耳。云『迫地而行，有似於輅，因取名焉』，非也。」案：曾說是也。鄭《雜記》注依別本讀輅爲輅，又引許書以證其義，則亦以輅車之正字當作輅。凡輅、輅、輅、輅、團諸字，並輅之聲誤。《喪大記》「國車」，又「團」之形誤也。然此注又不破輅爲輅，與《雜記》注異。《既夕》注亦謂輅、團、輅、輅，聲讀相附，未聞孰正。蓋鄭自有兩解，要當以《雜記》注爲塙訖矣。又《莊子·達生篇》云：「死得於豚楯之上，聚僂之中。」《釋文》引司馬彪云：「豚猶篆也。」案：《莊子》之「豚楯」，當即「輅輅」之異文。《呂氏春秋·節喪篇》云：「世俗之行喪，載之以大輅。」輅亦即載輅之輅車，與龍輅異也。云「役謂執紼者」者，明與鄉役執紼異，即《遂人》云「帥六遂之役屬六紼」，注謂載與說時是也。凡王柩在殯在廟，並載以龍輅，至葬將行時，說輅而載於輅車，至壙將窆，又說輅車，復載於龍輅以下窆。其在輅載說之時，並輅以六紼，遂役執之。其輅車行在道，六鄉役執六引，非此官所共治也。鄭司農云「抱輅，輅下車也」者，《說文·手部》云：「桴，引取也。

重文抱，桴或从包。」又《石部》云：「磨，石聲也。」磨下車，義未詳。攷《方言》云：「繼車，趙魏之間謂之輓輓車。」《廣雅·釋器》云：「繼車謂之麻鹿。」《墨子·備蛾傅篇》，有「下磨車」。又《備高臨篇》說連弩車之法，云「以磨鹿卷收」。磨鹿即鹿盧語之轉耳。《檀弓》「公室視豐碑」，注云：「豐碑，斲大木爲之，形如石碑，於槨前後四角樹之，穿中於間爲鹿盧，下棺以繚繞。天子六緯四碑，前後各重鹿盧也。」先鄭此注疑即讀抱爲桴，磨下車或即指抱引下棺之鹿盧矣。云「玄謂磨者，適歷執紼者名也」者，此讀磨爲歷，破先鄭義也。賈疏云：「謂天子千人，分布於六緯之上。謂之適歷者，分布稀疏得所，名爲適歷也。」王應麟云：「《史記·樂毅書》：『故鼎反乎曆室。』徐廣注：『曆，歷也。』《戰國策·燕策》、《新序·雜事》作「歷室」，蓋古字通用。」惠士奇云：「曆當作秣。《說文》：『秣，稀疏適秣也。從二禾，讀若歷。』適者，適均。《呂覽·辨土篇》曰「秣疏而不適」，謂分布不均。故二禾相比，稀疏乃適也。然則執紼者千人，分布於六緯，如禾稼有行，勿使疏密，正其行，齊其力，巡行校錄，遂師執書數之，名曰抱秣。秣借爲曆，歷曆皆以秣得聲。《漢書》議郎耿育疏曰：「太伯見歷知適，遂循固讓。」王充謂太王亶父以王季當立，故易名爲歷。歷

者，適也。大伯覺悟去而避之。合觀衆說，則適秣之義明矣。」孔廣森云：「《魏書·蔣濟傳》云：『船本歷適數百里中。』歷適猶適歷，疏密均布之謂。曆者，執紼人名籍，取適歷之義以爲稱也。古者發大役，必籍其名而稽數之，師則拱稽，喪則抱曆。」案：孔說是也。此經云抱曆，與《大史》「大師抱天時，大遷國抱法」義同，並謂抱持圖籍之書。曆者，即校次執紼者之名籍。《周書·世俘篇》云：「馘曆億有十萬七千七百七十有九。」馘曆亦即校數俘馘之籍，可與此經互證。又《月令》季冬，「命宰歷卿大夫至於庶民土田之數，而賦犧牲，以共山林名川之祀」。注云：「歷猶次也。」《效特性》云：「簡其車賦而歷其卒伍。」注云：「簡歷，謂算具陳列之也。」此歷與彼歷聲義並同。蓋因簡歷人役，遂稱其簿書爲曆，猶《小宰》八成「聽師田以簡稽」，即簡閱稽計士卒之簿書也。云「遂人主陳之」者，賈疏云：「案上《遂人》云『及窆陳役』是也。」云「而遂師以名行校之」者，賈疏云：「但執紼之人，背碑負引而退行，遂師抱持版之名字，巡行而校錄之，以知在否，故云抱曆也。」軍旅田獵，平野民，掌其禁令，比敘其事而賞罰。平，謂正其行列部伍也。鄭司農云：「比讀爲庀。」【疏】「軍旅田

獵平野民」者，即《遂人》云「師田作野民」，此官帥而平之。云「比敘其事而賞罰」者，賈疏云：「遂師校比次敘其行伍，而行賞罰也。」注云「平謂正其行列部伍也」者，《大司馬》仲冬教大閱，云「左右陳車徒，有司平之」，即田獵平民之事。彼注亦訓平爲正，蓋正其行列，使不踰越，正其部伍，使不混淆，亦以軍法部署之。鄭司農云「比讀爲庀」者，前注同。此比爲校比之義，不當爲庀，故後鄭不從。

遂大夫各掌其遂之政令。以歲時稽其

夫家之衆寡、六畜、田野，辨其可任者與其可施舍者，以教稼穡，以稽功事，掌其政令、戒禁，聽其治訟。施讀亦爲弛。功事，九職之事，民所以爲功業。【疏】「各掌其遂之政令」者，賈疏云：「此一經與《遂師職》意同，但互見其義耳。」詒讓案：以下至鄰長，皆六遂之吏，與鄉吏鄉大夫至比長地治不同，而職掌相等。鄉吏職詳而此略者，亦以其可互推，文不具也。

注云「施讀亦爲弛」者，亦冢《遂人》、《遂師》而言，詳《小司徒》疏。云「功事，九職之事，民所以爲功業」者，賈疏云：「《大宰》以九職任萬民」，彼云任，即此功事，謂任之使有

功者也。」詒讓案：《大宰》九職，《大府》謂之九功，故知功事即九職之事。令爲邑者，歲終則會政致事。

不言其遂之吏，而言爲邑者，容公邑及卿大夫王子弟之采邑政令戒禁，遂大夫亦施焉。【疏】「令爲邑者歲終則會政致事」者，歲終謂夏之季冬，詳《宰夫》疏。此正遂吏之歲會，亦即此官之官成、官計也。

注云「不言其遂之吏而言爲邑者，容公邑及卿大夫王子弟之采邑政令戒禁，遂大夫亦施焉」者，據《鄉大夫》云：「歲終，則令六鄉之吏皆會政致事。」此官與彼職事同而文異，故鄭意此邑兼含都鄙四井之邑而言。公邑，謂六遂以外甸稍縣置四等公邑，即《載師》注所云「二百里三百里其大夫如州長，四百里五百里其大夫如縣正」者是也。采邑亦即《載師》之家邑，小都大都之吏是也。賈疏云：「言之者，若直言遂之吏，則不容公邑與采邑。今《遂大夫》不言遂之吏，變云「爲邑」，則遂中可以兼公邑采邑二者，故云「政令戒禁遂大夫亦施焉」。以其

《遂人》云「掌野」，又云「以達於畿」，故知亦施政令戒禁。」案：鄭意當如賈說。但此官爲遂吏，唯主當遂一萬二千五百家，與遂人、遂師通掌甸稍縣置者異，則其政令不得及於公邑、采邑。此經云「爲邑」，當與《里宰》、《鄰長》諸職凡言邑者同，即鄰、里、鄴、鄙、縣所治之邑里也。鄭、賈說未塙，

詳《里宰》疏。正歲，簡稼器，脩稼政。簡，猶閱也。

稼器，耒耜其之屬。稼政，孟春之《月令》所云皆脩封疆，審端徑術，善相丘陵阪險原隰土地所宜，五穀所殖，以教道民，必躬親之。【疏】注云「簡猶閱也」者，《小宰》注同。云

「稼器，耒耜其之屬」者，茲其，宋婺州本作「鉏其」，賈疏作「鉏基」。案《雍氏》注亦作「茲其」。賈本及宋本似並非是。《月令》季冬，脩耒耜，具田器。鄭彼注云：「田器，鉏其之屬。」此脩稼器，蓋通彼耒耜田器備脩之。《國語·魯語》韋注云：「耨，茲其也。」管子·小匡篇尹注云：「耨，鉏其也。」《廣雅·釋器》云：「鉏其，鉏也。」《一切經音義》引《倉頡篇》云：「鉏，茲其也。」《說文·木部》云：「櫛，斫也。齊謂之鉏其。」孟子·公孫丑篇：「雖有鉏基，不如待時。」趙注云：「鉏基，田器，耒耜之屬。」案：茲、鉏，其、基、鉏，字並通。依《月令》注「茲其」與「耒耜」異，趙岐說非。云「稼政，孟春之《月令》所云，皆脩封疆，審端徑術，善相丘陵阪險原隰土地所宜，五穀所殖，以教道民，必躬親之」者，鄭彼注云：「封疆，田首之分職。術，《周禮》作遂，遂，小溝也。步道曰徑。相，視也。」案：彼上文云「王命布農事，命田舍東郊」。亦是命田官脩稼政之事，故引以爲

證。三歲大比，則帥其吏而興甿，明其有功者，屬其地治者。興甿，舉民賢者能者，如六鄉之爲也。興猶舉也，屬猶聚也。又因舉吏治有功者，而聚勅其餘以職事。【疏】「三歲大比，則帥其吏而興甿」者，亦謂每三年正月，大案比而興遂民，詳《小司徒》、《鄉大夫》疏。賈疏云：「三歲大比以下，若鄉大夫三歲大比興賢者能者，其義同，變之耳。吏則遂大夫已下，縣正至鄰長。」云「明其有功者」者，此六遂之官計也。大比與大計事相因，故興甿之時兼察吏也。云「屬其地治者」者，地治，猶《大司徒》云「有地治者」，《蜡氏》云「有地之吏」，即上「爲邑者」是也。

注云「興甿，舉民賢者、能者，如六鄉之爲也」者，此亦變民言甿也。經注甿字，亦並當作「氓」，詳《遂人》疏。此謂行鄉飲酒之禮於遂序，以興遂之賢能，如鄉大夫賓興六鄉賢能之禮。《王制》說，大司徒命鄉簡不帥教者，移之郊，移之遂。注亦謂遂大夫掌之，爲習禮於遂之學，是也。又案：六遂與六鄉治教相擬，此遂大夫興甿，即用鄉飲酒之禮；其屬縣正如州長，則縣亦當有春秋以禮會民射於縣學；鄙師如黨正，則鄙亦當有國索鬼神，屬民飲酒正齒位之禮。經唯於此職著興甿之典者，文不具也。凡遂學降於鄉學一

等，與州黨之學同爲無室之序，詳《州長》疏。賈疏云：「此文不具，故鄭就鄉大夫解之。彼以鄉飲酒興賢能者，厥明，獻賢能之書於王，王拜而受之，登於天府，內史貳之。此職亦然也。」云「興猶舉也」者，《大司徒》注同。云「屬猶聚也」者，《州長》注同。云「又因舉吏治有功者，而聚勅其餘以職事」者，《國語·周語》云「尊貴明賢」，韋注云：「明，顯也。」此明其有功，亦謂舉而顯異之，與八統達吏義同。勅亦敕之借字，詳《大宰》疏。《呂氏春秋·孟春紀》「田事既飭」，高注云：「飭讀作勅。勅督田事。」是勅有戒督之義。其餘，謂所明之外，凡無功無過者也。賈疏云：「謂當興舉之時，因舉治民之吏，鄰長以上吏之有功者而升之。又聚其地治鄰長以上，勅之以職事，使之不慢也。」凡爲邑者，以四達戒其功事，而誅賞廢興之。四達者，治民之事，大通者有四：夫家衆寡也，六畜車輦也，稼穡耕耨也，旗鼓兵革也。【疏】「凡爲邑者以四達戒其功事」者，賈疏云：「謂將四通之事，以戒勅其功事。功事即上注九職之功業也。」云「而誅賞廢興之」者，此六遂之官計、官刑也。賈疏云：「此亦如《大宰》注：大有功不徒興又賞之，大無功不徒廢又誅之。」注云「四達者，治民之事大通者有

四」者，《廣雅·釋詁》云：「達，通也。」云「夫家衆寡也，六畜車輦也，稼穡耕耨也，旗鼓兵革也」者，賈疏云：「此無正文，唯約上下文而知義爾。案《遂師》云「夫家衆寡六畜車輦」，此《遂大夫》亦云夫家衆寡，以教稼穡。《鄭長》云「以旗鼓兵革帥而至」，又云「趨其耕耨」。鄭據而言，故以四事當此四達。黃度云：「四達，謂達之於四疆。」案：鄭訓達爲通是也。而以夫家衆寡等充四達之數，則未安。四達之義，似當以黃說爲長。《大戴禮記·千乘篇》云：「司徒典春，以教民之不時、不若、不令。成長幼老疾孤寡，以時通於四疆。有闕而不通，有煩而不治，則民不樂生，不利衣食。」《鶚冠子·道端篇》云：「近親遠附，明達四通。」皆此經四達之埒詁也。

縣正各掌其縣之政令徵比，以頒田里，以分職事，掌其治訟，趨其稼事而賞罰之。

徵，徵召也。比，案比。【疏】「各掌其縣之政令徵比」者，賈疏云：「謂政教號令、徵發校比之等也。」云「以頒田里」者，亦依遂人上中下地三等之法頒授之也。云「以分職事」者，《荀子·王霸篇》云：「農分田而耕，賈分貨而販，百工

分事而勸。」所謂分其職事也。賈疏云：「即九職之功事也。」云「趨其稼事而賞罰之」者，《釋文》趨作「趣」，云「本又作趨」。案：陸本是也。《說文·走部》云：「趨，走也。趣，疾也。」趣趨聲近，經典亦多通用。經例，凡趨走字作趨，催促字作趣，與《說文》正同。《職喪》云「趣其事」，字亦作趣可證。《鄭長》、《里宰》並云「趨其耕耨」，蓋皆傳寫譌混。稼事即耕耨，謂疾督其田事，而課其勤惰，以爲賞罰也。注云「徵，徵召也」者，《司市》注義同。云「比，案比」者，謂案戶比民。漢制以八月案比，所謂小案比也。詳《小司徒》疏。若將用野民師田、行役、移執事，則帥而至，治其政令。移執事，移用其民。鄭司農

云：「謂轉相佐助。」【疏】「若將用野民師田、行役、移執事」者，賈疏云：「言將，事未至之時，預徵召野民也。言師田，謂出師征伐及田獵也。言行役，謂若巡狩及功役。」

注云「移執事，移用其民」者，王安石云：「若《遂師》所謂巡其稼穡，而移用其民，以救其時事也。」詒讓案：此與《大宰》九職「閒民無常職，轉移執事」，事異而義同。方苞云：「移執事，謂《掌固》之移甲役，其職云「與國有司帥之」，即縣正也。若移用其民以救時事，則遂師掌之，帥之者則鄭

長，里宰耳。」案：方說亦通。鄭司農云「謂轉相佐助」者，亦與《遂師》後鄭注義同。既役，則稽功會事而誅賞。【疏】「既役則稽功會事而誅賞」者，此縣吏之官計、官刑也。賈疏云：「此經結上文功役之事，事訖乃稽考其功多少，當計會其事之可否，而有功者賞，無功者誅也。」

鄙師各掌其鄙之政令、祭祀。

【疏】注云「祭祀，祭祭也」者，賈疏云：「鄙與六鄉黨

同，黨祭祭，故知此鄙所祭祀謂祭祭也。」凡作民，則掌其戒令。作民，謂起役也。【疏】注云「作民謂起役也」

者，《胥》注云：「作，起也。」鄙師在遂，與六鄉黨正相等，《黨正》云「凡作民而師田行役，則以其灋治其政事」，與此作民事同，起役即師田行役之事也。賈疏云：「案下《鄭長》云：『若作其民而用之，則以旗鼓兵革帥而至。』又上文每云野役，故知此作民亦是起役事也。」以時數其衆庶，而察其媿惡而誅賞。時，四時也。【疏】「以時數其衆庶，而察其媿惡而誅賞」者，媿，古美字，詳《大司徒》疏。數其衆庶，亦即小案比，猶《黨正》云「以歲時涖校比」

也。《王制》孔疏云：「六鄉州學主射，黨學主正齒位。遂則縣與州同，鄙與黨同，縣正主射，鄙師主正齒位，亦應與鄉不異。但周禮不備耳。」注云「時，四時也」者，《官正》注同。蔣載康云：「據黨正四孟讀法聚民也。」詒讓案：鄭意周法一歲四時有小比，詳《小司徒》疏。歲終，則會其鄙之政而致事。【疏】「歲終則會其鄙之政而致事」者，此正鄙之歲會，亦鄙吏之官成、官計也。歲終，謂夏之季冬，詳《宰夫》疏。

鄼長各掌其鄼之政令，以時校登其夫

家，比其衆寡，以治其喪紀、祭祀之事。校，猶

數也。【疏】「以時校登其夫家，比其衆寡」者，亦謂四時小案比也。云「以治其喪紀祭祀之事」者，賈疏云：「謂民之喪紀，若《鄉師》所云「族共喪器」之類，祭祀謂若族祭酺之類。若然，縣當祭社，與州同。縣正、鄙師、鄼長皆不言所祭神者，六遂與六鄉互見其義也。」注云「校猶數也」者，明與《縣正》「數衆庶」義同。《說文·木部》云：「校，木囚也。」段借爲校數。《史記·平準書》：「京師之錢累巨萬，貫朽而不可校。」裴氏《集解》引如淳云：「校，數也。」又

《漢書·嚴助傳》顏注云：「校，計也。」《虞人》注云：「數猶計也。」是校數同訓計。凡全經云「校比」者，義並同。《夏官·釋文》謂「比校」字當從手旁，非也。詳《夏官·敘官》疏。若作其民而用之，則以旗鼓兵革帥而至。若歲時簡器，與有司數之。簡器，簡稼器也，兵器亦存焉。有司，遂大夫。【疏】「若作其民而用之，則以旗鼓兵革帥而至」者，兵革猶兵甲，《國語·齊語》「定三革」，韋注云：「甲、冑、盾也。」賈疏云：「謂師田及巡守之等。直言以旗鼓兵革，不言車輦，文不具。」注云「簡器，簡稼器也」者，賈疏云：「見《遂大夫職》云「正歲簡稼器，脩稼政」，則此官與遂大夫共簡之。」云「兵器亦存焉」者，以鄭長爲遂人之屬，其在遂又與六鄉族師職掌相等，《遂人》、《族師》並云「簡其兵器」，則知此簡器亦當兼有兵器也。但《遂人》、《族師》兵器並當分爲二，鄭則謂即戎器，義尚未埒耳。兵器，詳《玉府》疏。惠士奇云：「鄭長簡兵器以備追胥，非以供軍旅會同之用也。」案：惠說是也。此簡兵器亦兼有時田，以田事義卒竭作。兵器亦民閒自共，與大師異也。六遂副六鄉，亦出軍而不出車馬兵甲，詳《小司徒》疏。云「有司，遂大夫」者，以鄭長即遂大夫之屬，明

當佐彼同簡稼器等也。凡歲時之戒令皆聽之，趨其耕耨，稽其女功。聽之，受而行之也。女功，絲枲之事。【疏】「趨其耕耨，稽其女功」者，趨當作「趣」，詳《縣正》疏。賈疏云：「此鄭長彌親民，故趨其耕耨，並稽考女功之等事。」詒讓案：《公羊》宣十五年，何注云：「五穀畢入，民皆居宅。里正趨緝績，男女同巷，相從夜績，至於夜中。故女功一月得四十五日。」彼說井田一里八十戶，里正爲之長，蓋與鄭長爵秩畧相擬，故稽女功之事亦略同也。注云「聽之，受而行之也」者，《國策·秦策》高注云：「聽，受也。」賈疏云：「知非聽斷之者，以鄭長中士官，惟承受遂人已下之事，不得專聽斷，故知聽謂受聽而行之也。」云「女功，絲枲之事」者，即《大宰》九職「嬪婦化治絲枲」之事。《九嬪》「婦功」義亦同。《六韜·農器篇》云：「丈夫治田有畝數，婦人織紵有尺度。」《管子·山國軌篇》亦云：「某鄉女勝事者，終歲績其功業若干。」即稽女功之事。

周禮正義卷三十

里宰掌比其邑之衆寡與其六畜、兵器，

治其政令。邑，猶里也。【疏】「掌比其邑之衆寡」者，

此亦四時小案比也。云「與其六畜、兵器」者，兵謂五兵，器謂車輦用器之等，詳《玉府》疏。

注云「邑猶里也」者，

明此邑即一里二十五家之邑也。《爾雅·釋言》云：「里，

邑也。」郭注云：「謂邑居。」金鶚云：「云邑者，民居之所聚

也。《釋名》云：「邑猶偃也，邑人聚會之稱也。」《說文》

云：「邑，國也。」謂國都所在也。邑爲民居所聚，民居有多

少，故邑有大小。極其大而言之，則爲王都之邑；極其小

而言之，則《論語》有十室之邑。其間大小不等，未可枚舉

也。邑之制，在國中則始於一里二十五家，在野則始於四

井三十二家。在國中者，二十五家爲一里，里有巷，巷口有

閭，一里之人聚居於此，故謂之邑也。在野者，四井之田，

凡三千六百畝，其民居計三十二家，聚於一處，猶今之村落

然。如地狹勢偏，不足四井，則或三井，或二井，或一井，皆

可爲邑。《孟子》云：「鄉田同井，出入相友，守望相助，疾病相扶持，則百姓親睦。」此可見一井亦可爲邑矣。《論語》謂「十室之邑」，即一井之邑，一井八室，言十室，舉大數也。

鄉遂之邑，以二十五家爲制，如有不足，或四鄰，或三鄰，或二鄰，皆可爲邑。五家爲鄰，二鄰則十室也。十室之邑，此至小者，下此不可以爲邑矣。六鄉五家爲比，五比爲閭，四閭爲族，五族爲黨，五黨爲州，五州爲鄉。六遂五家爲鄰，五鄰爲里，四里爲鄴，五鄴爲鄙，五鄙爲縣，五縣爲遂。自閭以至鄉，自里以至遂，皆邑也。每閭每里，星羅棋布，徧於百里之間。《縣師職》云：「掌邦國都鄙稍甸郊里之地域。」鄭注云：「郊里，郊所里也。」賈疏言郊里，據從遠郊至國中六鄉之民也。郊而曰里，明是以一里爲一邑，里與閭亦通稱。案：金說甚覈。但依鄭說，畿內井田不制公田，則上地一井有九家，四井之邑有三十六家，中下地依率遞減。金從賈《稍人》疏說，謂「一井八室」，乃侯國制公田之法，畿內無此也。又案：凡鄉遂公邑之民，皆聚居於邑里，而耕其邑外之田。其邑里之大小，則以夫家之數爲之，雖視地形爲分合，然大率一家如受廬宅五畝，則二十五家之邑，民宅占地百二十五畝也；三十六家之邑，民宅占地百八十畝也。涂巷官府不在此數，其地則固包於三分去一之

內矣。以歲時合耦于耨，以治稼穡，趨其耕耨，行其秩敘，以待有司之政令，而徵斂其財賦。《考工記》曰：「耜廣五寸，二耜爲耦。」此言兩人相助耦而耕也。鄭司農云：「耨讀爲藉。」杜子春云：「耨讀爲助，謂相佐助也。」玄謂耨者，里宰治處也，若今街彈之室。於此合耦，使相佐助，因放而爲名。季冬之《月令》：「命農師計耦耕事，脩耒耜，具田器。」是其歲時與？合人耦，則牛耦亦可知也。秩敘，受耦相佐助之次第。【疏】

「以歲時合耦于耨」者，賈疏云：「歲時者，亦謂歲之四時。」云「趨其耕耨」者，趨，亦當作「趣」，詳《縣正》疏。云「以待有司之政令而徵斂其財賦」者，賈疏云：「以六遂之賦稅，縣師徵之，旅師斂之；則此財賦言待有司徵斂者，謂縣師、旅師也。」方苞云：「遂之財賦，遂師徵之，疏誤。」案：方說是也。《遂師》云「以徵財征」，則此官所待者，即遂師之徵令及司稼之斂法是也。財賦者，《大司徒》「以土均之灋以斂財賦」，注云：「財謂泉穀，賦謂九賦及軍賦。」此財賦義與彼同，然亦當兼九職之力征言之。縣師掌公邑，旅師掌聚耨粟、屋粟、閒粟，咸不掌六遂之賦稅，賈說並非是。詳《縣師》、《旅師》疏。注云「《考工記》曰，耜廣五寸，二

耜爲耦，此言兩人相助耦而耕也」者，彼注云：「古者耜一金，兩人併發之。」此合耦即謂兩人併發一尺之畝也。惠士奇云：「古者二耜爲耦，而輓犁以耕。《管子·乘馬》：『丈夫二犁，童五尺一犁。』」程瑤田云：「耜之長，自本至末，只有一寸，其本廣五寸。本有銎，以受耒者也。用以耕，一人之力能任一耜，而不能以一人勝一耜之耕，何也？無佐助之者，力不得出也。故必二人並二耜而耦耕之，合力同奮，刺土得勢，土乃迸發，以終長畝不難也。故后稷之爲畝田，亦必用二耜爲耦、廣尺深尺之法也。里宰以歲時合耦於耨，言農事最重，必於先年季冬之月，合耦於里宰治處。合耦者，察其體材，齊其年力，比而選之，使能彼此佐助以耦耕也。《周頌》曰：「亦服爾耕，十千維耦。」又曰：「其耕澤澤，千耦其耘。」言耕者必言耦，以非耦不能善其耕也。耦之爲言並也，共事並行，不可相無之謂耦。鄭司農云「耨讀爲藉」，杜子春云「耨讀爲助，謂相佐助也」者，《遂人》云：「以興耨利甿。」注云：「鄭大夫讀耨爲藉，杜子春讀耨爲助，謂起民人令相佐助。」義並與此同。賈疏云：「藉，借也，非相佐助之義，故後鄭不從之也。杜子春讀耨爲助，謂相佐助也。於義合，但文今不足，故後鄭增其義也。」云「玄謂耨者，里宰治處也」者，即里宰之官府治事處也。段玉裁

云：「鄭君說與《遂人》異者，以經文言「于耜」，則耜必有其地，故訓爲里宰治處。」云「若今街彈之室」者，賈疏云：「鄭以漢法況之。漢時在街置室，檢彈一里之民。」王應麟云：「《金石錄》有《漢都鄉正街彈碑》。《水經》魯陽縣有《南陽都鄉正街彈碑》，平氏縣有《南陽都鄉正街彈碑》。《隸釋》亦以爲衛彈勸碑，蓋未攷此注也。《酸棗令劉熊碑》云：「愍念烝民，勞苦不均，爲作正彈，造設門更。」惠士奇云：「《周書·大聚》云：「五戶爲伍，以首爲長；十夫爲什，以年爲長；合閭立教，以威爲長；合旅同親，以敬爲長。飲食相約，興彈相庸，耦耕俱耘。」此里宰合耦之法也。興彈相庸者，興起而檢彈之，以佐助其功也。漢於街立室，名曰街彈，蓋取之此。」云「於此合耦，使相佐助，因放而爲名」者，後鄭亦從杜讀。謂里宰治處名耜者，亦兼取合耦相佐助之義。以里宰爲親民之官，合耦於民事尤重，故因以耜名其治處，猶王侯親耕之田，藉民力治之，即謂之藉也。段玉裁云：「《遂人》耜字，其本義；《里宰》耜字，其引伸之義也。放，讀如《公羊傳》「放於此乎」之放。」云「季冬之《月令》，命農師計耦耕事，脩耒耜，具田器，是其歲時與」者，鄭彼注云：「田器，耜其之屬。」彼文云命農，此引作農師者，鄭以意增之，引彼文證合耦之時也。云「合人耦，則牛耦亦

可知也」者，賈疏云：「周時未有牛耦，至漢時，搜粟都尉趙過始教民牛耕。今鄭云合牛耦可知者，或周末兼有牛耦，至漢趙過乃絕人耦，專用牛耦，故鄭兼云焉。」王應麟云：「《山海經》：「后稷之孫叔均始作牛耕。」《月令》季冬「出土牛」，示農耕早晚。賈誼《新書》、劉向《新序·雜事》，俱載鄭穆公云「百姓飽牛而耕」，何待趙過！過特教人耦犂共二牛，費省而功倍爾。」案：王說是也。云「秩斂，受耦相佐助之次第」者，秩斂即次第也，詳《宮伯》疏。《左》昭十六年傳云：「庸次比耦，以艾殺此地。」杜注云：「庸，用也。用次更相從耦耕。」即此以次第受耦之義。賈疏云：「或家有一夫，二夫共耦，若長沮、桀溺耦而耕，或先後次第相佐助爲之也。」

鄭長掌相糾相受。相糾，相舉察。【疏】「掌相

糾相受」者，鄭長在遂，與鄉之比長職掌相等。《比長》云：「各掌其比之治，五家相受相和親，有臯奇衰則相及。」此云相糾，即糾其有臯奇衰者；有不舉者，則亦相及也。《大司徒》注云：「受者，宅舍有故，相受寄託也。」注云「相糾，相舉察」者，《廣雅·釋詁》云：「糾，舉也。」《小宰》注

云：「糾猶察也。」是糾兼舉察二義。凡邑中之政相

贊。長短使相補助。【疏】「凡邑中之政相贊」者，賈疏

云：「邑中者，亦謂一里之內。有上政令徵求，則五鄰共相

贊助。」案：賈蓋以此邑即里宰之邑。但邑亦大小通稱，凡

一鄰五家不能成邑，二鄰則可爲邑，所謂十室之邑，不必積

五鄰而後爲邑也。詳《里宰》疏。注云「長短使相補

助」者，《州長》先鄭注云：「贊，助也。」謂以長補短使無闕

乏。徙于他邑，則從而授之。從猶隨也。授猶付

也。【疏】「徙于他邑，則從而授之」者，或於本遂之邑，或

於他遂之邑，要不出六遂之界，則鄰長從而授之。猶《比

長》云：「徙于國中及郊，則從而授之。」以國中及郊附於六

鄉，雖徙猶不出鄉界也。若由遂而徙於鄉郊及公邑都鄙

者，則當如《比長》所云「若徙于他，則爲之旌節而行之」。

經文不具耳。賈疏謂徙于他邑亦當以旌節行之，則非也。

互詳《比長》疏。注云「徙猶隨也」者，《公羊》隱八年何

注云：「隨者，隨從也。」云「授猶付也」者，①《廣雅·釋詁》

云：「授、付，與也。」此即《比長》注云「從而付所處之吏」

是也。

旅師掌聚野之糶粟、屋粟、閒粟野，謂遠郊

之外也。糶粟，民相助作，一井之中所出九夫之稅粟也。

屋粟，民有田不耕，所罰三夫之稅粟。閒粟，閒民無職事者

所出一夫之征粟。【疏】「掌聚野之糶粟、屋粟、閒粟」者，

《說文·廌部》云：「聚，會也。」此官掌野民興積之事，故主

聚此三粟。聚者對下散利爲文，謂會合儲積之以待用也。

此三粟本非農賦之正法，賈疏謂此旅師斂六遂之稅，非是。

六遂之正稅，非旅師所掌，詳後疏。注云「野謂遠郊之

外也」者，《委人》正義同，詳《甸師》疏。案：此野當通六遂

及公邑言之，鄭、賈謂唯據六遂，說未咳。云「糶粟，民相助

作，一井之中所出九夫之稅粟也」者，此亦讀糶爲助，與《遂

人》、《里宰》杜注同。賈疏云：「六鄉、六遂與公邑三處皆

爲溝洫法，三等采地乃爲井田。今此六遂之中，鄭云「一井

之中出九夫之稅粟」，以爲井田，與例違者，但鄉遂之中，雖

爲溝洫法，及其出稅，亦爲井田稅之。是以《小司徒職》云

「考夫屋」，注云：「夫三爲屋，屋三爲井，出地貢者，三三相

任。」是出地稅亦取井有九夫，三三相保而稅之，故以井言

之。」江永云：「旅師所掌，即遂人以興糶利甿之事。糶粟

① 原脫「者」，據疏例增。

者，農民合出之，因合耦于耨，故名耨粟。正猶隋唐社倉、義倉，每歲出粟少許，貯之當社，以待年饑之用者也。旅師所聚，以耨粟爲主。耨粟無多，恐不足以給，又以載師之屋粟、閒粟益之。注謂耨粟，民相助作，近之，謂一井之中九夫之稅粟，非也。稅粟當入縣師。旅師惟聚此三粟，非徵賦之官。《委人》注言野之農賦，旅師徵之，亦誤。」案：江說是也。方苞、曾釗說同。六遂之稅粟當入遂師，公邑之稅粟當入縣師，皆非此官所掌。此三粟即下文所謂興積，故言聚不言征；明聚民之粟而仍散之民，與賦民粟以共國用者異也。鄭誤以爲正稅之粟，而以耨粟爲一井之稅，則與《小司徒》、《匠人》注鄉遂不制井田之說，自相戾矣。賈知其不合，而又援《小司徒》「攷夫屋」之文，以曲證其說，不知三三相任，仍不可以言井，況彼文本指六遂外公邑制井田之法，並非謂鄉遂出地貢之法也。云「屋粟，民有田不耕，所罰三夫之稅粟，閒粟，閒民無職事者，所出一夫之征粟」者，皆罰粟也。賈疏云：「此並《載師職》文。但彼云「出夫家之征」，彼注云「夫稅者，百畝之稅。家稅者，出土徒車輦」。此經云粟，無取於家征之義，故略不言也。」案：鄭、賈並據《載師》爲釋。但彼經云「民無職事者出夫家之征」，爲惰民罰粟，與《大宰》九職閒民無常職者唯出口泉

異。通而言之，惰民亦得謂之閒民，故罰粟亦稱閒粟。《管子·乘馬篇》說士農工商皆與功，而云「不可使而爲工，則視其貸離之實而出夫粟」。此足爲閒粟即夫粟之證。又案：屋粟閒粟雖以屋夫爲名，其徵斂亦各有輕重之等，不定以三夫一夫爲率也。互詳《載師》疏。而用之，以質劑致民，平頒其興積，施其惠，散其利，而均其政令。而讀爲若，聲之誤也。若用之，謂恤民之艱阨，委積於野，如遺人於鄉里也。以質劑致民，案人稅者名，會而貸之。興積，所興之積，謂三者之粟也。平頒之，不得偏頗有多少。縣官徵聚物曰興，今云「軍興」是也。是粟縣師徵之，旅師斂之而用之。以調衣食曰惠，以作事業曰利。均其政令者，皆以國服爲之息。【疏】「而用之」者，此當屬上爲句。王安石云：「掌聚野之耨粟屋粟閒粟而用之者，聚此三粟而用以頒以散也。」江永云：「此粟不必爲凶年之用。即不饑之歲當東作時，皆用此粟頒之，待秋而斂之。」注云「而讀爲若，聲之誤也」者，鄭以此云「而用之」爲更尚之語，不當云「而」，故破爲「若」也。段玉裁云：「而、如、若，一聲之轉。宋本作「讀實若」，實蓋「曰」之誤，曰譌日，又譌實也。讀曰與讀爲同。」王引之云：「而猶若

也。若與如同聲，故而訓爲如，又訓爲若。《書·康誥》「若有疾」，《荀子·富國篇》「若」作「而」。《詩·甫田篇》「突而弁兮」，《猗嗟篇》「碩而長兮」，《正義》「而」並作「若」。《都人士篇》「垂帶而厲」，《淮南·汜論篇》注「而」作「若」。襄三十年《左傳》「子產而死」，《呂氏春秋·樂成篇》「而」作「若」。江永云：「舊讀『而用之』，而字爲若。今詳文勢及經意，當讀本音，與上連爲一句。此粟歲歲皆用，非謂有時而用也。」案：江說本王安石，是也。王昭禹、王與之、王應電、姜兆錫、方苞、莊存與、武億、莊有可讀並同。云「若用之，謂恤民之艱阨，委積於野，如遺人於鄉里也」者，賈疏云：「案《遺人》云：『鄉里之委積，以恤民之艱阨。』此六遂即鄉里也，故鄭云委積於野如遺人之於鄉里也。」案：賈說非也。鄭意旅師以野積恤艱阨，猶遺人以鄉里委積恤艱阨耳。鄉里自是六鄉，不關六遂，不得并爲一也。云「以質劑致民，案人稅者名，會而貸之」者，《遂人》云：「以下劑致民。」注云：「致猶會也。」賈疏云：「所聚之粟，還擬凶年振恤所輸入之人。欲與之粟，還案人稅者之人名，會計多少以貸之。簿書若市券有長短，故云質劑也。」案：依賈說，則鄭釋致爲會計之會，與《遂人》注同。此勸粟徵斂時，蓋與民爲質劑以爲信，故頒予時，亦案質劑以授之。但致民

當爲會聚之義，鄭、賈釋爲會計，義恐未協，互詳《遂人》疏。質劑，詳《小宰》疏。江永云：「質劑猶今之契券，所以爲授受之驗，一半給民，一半存官，待其秋斂，合符於官也。民即田野之民，平日合出勸粟者。」案：江說亦是也。云「興積，所興之積，謂三者之粟也」者，謂所興起之粟，別爲儲積，即上勸粟、屋粟、閒粟是也。《管子·權脩篇》云：「凡牧民者，以其所積者食之。」《左》襄九年傳云：「晉魏絳請施舍，輸積聚以貸。自公以下，苟有積者，盡出之，國無滯積，亦無困人。」是公私皆有積，與《遺人》「委積」義同。此旅師所頒者，自是當官所興之三粟，故經特言興積。凡粟米儲藏於倉庾，通謂之積，詳《大司徒》疏。云「平頒之，不得偏頗有多少」者，舊本《書·洪範》云：「無偏無頗。」僞孔傳云：「偏，不平。頗，不正。」平頒則無不平不正之弊。今《書》頗作「陂」，乃唐人所改，非是。江永云：「平頒者，其數皆均，無偏饒偏乏也。必平頒者，勸粟本均輸，頒之有不平，則人不肯出勸粟矣。」云「縣官徵聚物曰興」者，縣官猶言公家，鄭用漢時常語，詳《載師》疏。賈疏謂「六遂已外，縣師徵之，故云縣官徵聚物曰興」，大誤。云「今云軍興是也」者，亦據漢時常語也。孔廣森云：「漢言軍興，猶今言軍需也。《司馬相如傳》曰『發軍興制』，《趙廣漢傳》曰『乏

軍興」云「是粟縣師徵之，旅師斂之而用之」者，賈疏云：

「案上《縣師職》云『歲時徵野之賦貢』，故知也。」案：縣師掌公邑之官，不掌聚三粟。三粟非九賦九貢之正稅，亦旅師自徵之耳。注疏說誤。云「以調衣食曰惠，以作事業曰利」者，《司救》注云：「施惠，調恤之。」又《大司徒》荒政十二，一曰散利，先鄭注云：「散利，貸種食也。」貸種以資稼穡，亦作事業之一端也。賈疏云：「以衣食先當時用，不生其利，故云惠。所爲事業，後即有利，故云利。此對文，惠利兩有，故爲此釋。若通而言之，惠利爲一，故《論語》孔子云『因民所利而利之，不亦惠而不費』。是惠利通也。」江永云：「此粟補民不足，貸而無息，是惠利也。施之散之，農民皆蒙惠利也。」云「均其政令者，皆以國服爲之息者，鄭以此貸民粟，與泉府貸民泉物同，故亦以國服爲之息，詳彼疏。江永云：『均其政令者，毋有貸而不償，抵冒侵欺諸弊也。』曾釗云：『《泉府》『以國服爲之息』，乃貸於賈者。先鄭注彼經云『從官借本賈，故有息』是也。此旅師主惠民，所用粟春頒秋斂，不言息，則不同泉府明矣。竊謂平政令，即平施惠散利之政令，所以防侵漁、察欺盜也。」案：江、曾說是也。此貸粟不當使出息，注說失之。凡用粟，春頒而秋斂之。困時施之，饒時收之。【疏】凡用粟，

春頒而秋斂之」者，江永云：「此申明用粟之時與斂粟之法。粟不斂則無以繼，歲歲又有合出之糶粟，與增入之屋粟，閒粟，故此粟可不收息也。」案：江說是也。此與上平頒興積是一事，賈疏謂上經所云是貸而生利，此經是直給不生利，失之。

注云「困時施之，饒時收之」者，春耕種之時，粟少民困則施之，秋收穫之時，粟多民饒則收之，所以通盈胸而均斂散也。《管子·均藏篇》云：「當春三月，貸無種與無賦，所以勸弱民。」與此春頒義合。凡新甿之治皆聽之，使無征役，以地之媿惡爲之等。新甿，新徙來者也。治，謂有所求乞也。使無征役，

復之也。《王制》曰：「自諸侯來徙於家，期不從政。」以地美惡爲之等，七人以上授以上地，六口授以中地，五口以下授以下地，與舊民同。旅師掌斂地稅，而又施惠散利，是以屬用新民焉。【疏】「凡新甿之治皆聽之」者，此兼掌野外新甿之治也。云「以地之媿惡爲之等」者，媿，古美字，詳《大司徒》疏。注云「新甿，新徙來者也」者，經注甿字亦並當作「氓」，此亦變民言氓也。《孟子·公孫丑篇》云：「則天下之民皆說，而願爲之氓矣。」又《滕文公篇》：「許行自楚之滕，踵門而告文公曰：願受一廛而爲氓。」彼氓即指

新民也。氓，古文作「萌」，《呂氏春秋·高義篇》說，墨子於越欲自比於賓萌。賓萌猶言客民，亦新民之謂。蓋古者外來之民，士工商皆於國邑受廩，而農則受田於野。鄉遂夫家有定，不容增減，四郊地又無多，則客民受田，宜於遂外之公邑可知。《周書·大聚篇》云：「乃令縣鄙商旅曰：能來三室者，與之一室之祿。」此即招外民以實縣鄙之意。然則新氓之治，旅師專掌之，職是故耳。新氓，互詳《遂人》疏。云「治謂有所求乞也」者，《墨子·經上》云：「治，求得也。」賈疏云：「以其無征役可治，又新來未有業次，故知治是求乞也。」云「使無征役，復之也」者，《鄉大夫》注云：「舍者，謂有復除，舍不收役事也。」《左》宣十二年傳云，「旅有施舍」，復即所謂舍也。引《王制》曰「自諸侯來徙於家，期不從政」者，以證新氓無征役亦有期限也。彼文云：「將徙於諸侯，三月不從政，自諸侯來徙家，期不從政。」注云：「自，從也。」孔疏云：「自諸侯來徙於家者，謂諸侯之民來徙於大夫之邑。以大夫役多地狹，欲令人貪之，故期不從政。按《旅師》云：「新氓之治皆聽之，使無征役。」鄭注引此文以證之，是據民之遷徙。王肅及庾氏等以為據仕者從大夫家出仕諸侯，從諸侯退仕大夫，非鄭義也。」云「以地美惡爲之等，七人以上授以上地，六口授以中地，五口以下授

以下地，與舊民同」者，此亦注用今字作美也。賈疏云：「此皆據《小司徒職》文。此三等據中地而言，故注云：『有夫有婦乃成家，自二人以至十人爲九等，七六五者爲其中。』但彼六鄉上地無萊，此據六遂上地有萊五十畝，已外中地地下地外內同，皆三百畝耳。」案：鄉遂田制同。賈謂六鄉上地無萊，非也。詳《遂人》疏。云「旅師掌斂地稅，而又施惠散利，是以屬用新民焉」者，明此官兼掌治新氓者，以其新來徙，須授以廩地并同其惠利也。然旅師不掌地稅，但掌三粟耳。鄭誤以勸粟爲地稅，故有此誤。

稍人掌令丘乘之政令。丘乘，四丘爲甸。甸

讀與「惟禹殲之」之殲同，其訓曰乘，由是改云。是掌令都鄙脩治井邑丘甸縣都之溝涂。云丘甸者，舉中言之。溝涂之人，井別邑異，則民之家數存焉。【疏】「掌令丘乘之政令」者，此井田出車徒之法也。稍人爲主公邑之官。四等公邑制井田，故亦爲丘甸出車之制，即《小司徒》注引《司馬法》文是也。鄭《匠人》注謂公邑不制井田，則無丘乘，故以此官所令者，爲令都鄙采邑溝涂之法。《敘官》注亦云「稍人主爲縣師令都鄙丘甸之政也」。賈疏說亦同。不知

此職專掌公邑，~~不~~掌都鄙也。《坊記》孔疏謂公邑出軍與鄉遂同，亦非。稍人掌公邑，詳《縣師》疏。公邑制井田，詳《匠人》疏。

注云「丘乘，四丘爲甸」者，據《小司徒》井田法，讀乘爲甸也。云「甸讀與惟禹數之之數同」者，《詩·

小雅·信南山篇》「維禹甸之」，鄭彼箋云：「六十四井爲甸，甸方八里，居一成之中，成方十里，出兵車一乘，以爲賦法。」此引甸作數者，賈疏云：「鄭先通《韓詩》，此據《韓詩》而言數，數是軍陳，故訓爲乘。」惠棟云：「數，古文陳，見《義雲章》，《小司徒》注云：「甸之言乘也。讀如中甸之甸。」又《甸祝》注云：「甸之言田也。」《小宗伯》注云：「甸讀爲田。」古陳田字同，陳又訓乘，又與甸通。」丁晏云：「《說文》：「田，陳也。」《阜部》「陳，从阜从木，申聲。」《支部》：「數，列也。从支部陳聲。」《玉篇·阜部》：「陳，列也。或作數。」《廣韻·十七真》：「陳，數古文。」《爾雅》：「郊外謂之田。」《釋文》引李巡注：「田，數也。謂數列種穀之處。」《急就篇》顏注：「陳完奔齊，亦爲田氏。」蓋以陳田聲相近。」云「其訓曰乘，由是改云」者，謂甸之名，本取與乘同義，故丘甸改爲丘乘也。甸訓乘，《小司徒》注義同。《郊特牲》「唯社丘乘共粢盛」，注云：「甸或謂之乘。乘者，以其於車賦，出長轂一乘。」亦以丘甸爲丘乘，與此義同，互詳

《小司徒》疏。鄭必破乘爲甸者，以《司馬法》丘出戎馬一匹，甸出長轂一乘，乘非丘之所出。況《郊特牲》以「丘乘共粢盛」，彼共者爲丘甸之人，無與車乘事。經記互證，則丘乘爲丘甸之借字明矣。云「是掌令都鄙脩治井邑丘甸縣都之溝涂」者，鄭意丘甸是都鄙制井田之法也。賈疏云：「此據《小司徒》職云「四井爲邑，四邑爲丘，四丘爲甸，四甸爲縣，四縣爲都」而言也。知直令爲溝涂者，以下文云：「若有會同，則以縣師之法作其同徒。」彼是令軍法，明此惟令治溝涂而已。」云「云丘甸者，舉中言之」者，以丘甸上有縣都，下有井邑，丘甸在其中，故經舉之以咳上下也。云「溝涂之人，井別邑異，則民之家數存焉」者，《小司徒》注云：「一成積百井，其中六十四井出田稅，三十六井治洫。」謂成中實地一甸，六十四井，受田者三百家。甸外虛地三十六井，爲溝涂之地，仍使甸民三百家治之。同包四都，亦放此而遞增其家數。是校計治溝涂之人，而井邑丘甸縣都之家數，已咳於其中也。賈疏謂甸方八里，其中六十四井，使出田稅，外加一里三十六井，使治溝洫，不出稅，三十六井治溝涂人名，在於一成之中。非鄭指也。又說井邑家數，謂假令土地一井，地有九夫，中央一夫助人公，傍八夫各治一夫以自入，則一井地有九夫，家則有八，四井爲邑，

三十二家。今案：依鄭《匠人》注義，畿內不制公田，與畿外侯國制異，則上地一井九夫，即爲九家，一邑凡三十六家。賈以公田爲釋，尤違鄭義。互詳《小司徒》、《里宰》、《匠人》疏。若有會同、師田、行役之事，則以縣師之灋作其同徒、輦輦，帥而以至，治其政令，以聽於司馬。有軍旅、會同、田役之戒，縣師受法於司馬，邦國都鄙稍甸郊里，唯司馬所調。以其法作其衆庶及馬牛車輦，會其車人之卒伍，使皆備旗鼓兵器，以帥而至，是以書令之耳。其所調若在家邑、小都、大都，則稍人用縣師所受司馬之法作之，帥之以致於司馬也。同徒，司馬所調之同。凡用役者，不必一時，皆徧以人數調之，使勞逸遞焉。【疏】「若有會同、師田、行役之事，則以縣師之灋，作其同徒輦輦」者，此掌公邑調發車徒之事，與縣師、縣士爲官聯也。賈疏云：「若者，此等或有或無，故云若，爲不定之辭也。會同者，謂時見曰會，殷見曰同。師田者，謂出師征伐及田獵。行役者，謂巡守及興役。稍人屬縣師，縣師屬大司馬。大司馬得王進止，縣師即受法於司馬；縣師既得法，稍人又受法於縣師，故云以縣師之法作其同徒也。」云「以聽於司馬」者，於經例當作「于」，石經及各本並

誤。《都司馬》注云：「聽者，受行其所徵爲也。」此官非司馬之屬，以大事作徒役爲司馬所專掌，故以連事通職，暫聽於司馬也。賈疏云：「既作同徒，乃致與大司馬。」注

云「有軍旅、會同、田役之戒，縣師受法於司馬」者，據《縣師》文。云「邦國都鄙稍甸郊里，唯司馬所調」者，欲見司馬調發周於天下，縣師亦然。賈疏云：《縣師》注云：「郊里，郊所居也。」謂六鄉之民，布在國中，外至遠郊，故有居在郊者也。金榜云：「公邑謂之縣，縣師掌公邑之地域，稍人治公邑丘甸之政，故以縣師之法，作其同徒輦輦，以聽於司馬。都家之戒令，則都司馬、家司馬掌之，以聽於國司馬。縣師之法，不及於都家。注以稍人主爲縣師令都鄙丘甸之政，非也。」案：金說是也。《縣師》云：「掌邦國都鄙稍甸郊里之地域。」注謂縣師所主數周天下，故此注亦以縣師之法，爲統邦國都鄙稍甸郊里。不知縣師惟掌公邑，此外皆非其所掌也。又郊里爲六鄉之餘地，非即六鄉之民居國中及遠郊者，賈疏亦誤。並詳《縣師》疏。云「以其法作其衆庶及馬牛車輦，會其車人之卒伍，使皆備旗鼓兵器，以帥而至」者，亦據《縣師》文。賈疏云：「欲見縣師受法於司馬，稍人又受法於縣師之意也。」云「是以書令之耳」者，此家上引《縣師職》，亦謂縣師以書令之。賈疏謂稍人書而

令之，誤。云「其所調若在家邑、小都、大都，則稍人用縣師所受司馬之法作之，帥之以致於司馬也」者，鄭意縣師所主周天下，但稍人唯主都鄙，所作所帥者，即三等采地之車徒；其邦國公邑鄉遂之車徒，則非稍人所作也。今案：此稍人專主公邑，其所作所帥並專指公邑之車徒言之。鄭謂令三等采地，亦誤。云「同徒，司馬所調之同」者，此釋同爲均同之義也。鄭鏐謂同即百里之同。金榜云：「《說文》云：『周制，王畿千里，分爲百縣。』稍人以縣師之法作其同徒，謂作其一縣之徒役，其縣方一同歟？」《春秋傳》，蒍啓疆言晉之九縣，長轂九百，其餘四十縣，遺守四千。以《司馬法》「同方百里，革車百乘」計之，縣之里數，與《周官經》符合。」案：金據《司馬法》十終爲同釋此同徒，是也。沈夢蘭說同。此稍人掌丘乘之政令，同徒者，丘乘所出之徒。丘乘之法，終於一同，其徒即所出革車百乘，士千人，徒二千人者也。經曰同徒，明公邑制軍，不用鄉遂伍兩之制矣。互詳《敘官》疏。云「凡用役者，不必一時皆徧，以人數調之，使勞逸遞焉」者，《釋文》云：「遞，本又作適。」賈疏云：「此釋其同徒，同其勞逸遞等也。」案：賈本亦作「遞」，不誤。遞，又見《掌固》注。《說文·辵部》云：「遞，更易也。」《爾雅·釋言》云：「遞，迭也。」謂更迭受役，均其勞逸也。

鄭不知同徒之同，即十終之名，而釋以均同，故此又申其義。大喪，帥蜃車與其役以至，掌其政令，以聽於司徒。蜃車及役，遂人共之。稍人者野監，是以帥而致之。《既夕禮》曰：「既正柩，賓出，遂匠納車于階間。」則天子以至于士，柩路皆從遂來。【疏】「大喪，帥蜃車與其役以至」者，《宰夫》注云：「大喪，王、后、世子也。」賈疏云：「此經釋天子之喪，將葬，使稍人帥蜃車及役人使至之事。」云「以聽於司徒」者，於，亦當作「于」。此以職事聽於本官之正，乃大宰八法官屬之常例；以冢上文，嫌亦聽於司馬，故經特著之。賈疏云：「以其司徒地官卿，掌徒庶之政令，故稍人帥衆以聽於司徒也。」注云「蜃車及役，遂人共之」者，賈疏云：「案《遂人職》云：『大喪，帥六遂之役而致之。』又云：『及葬，帥而屬六綽。』又《遂師職》亦共丘籠及蜃車之役，故知遂人共之也。」曾釗云：「《遂師》云『共蜃車之役』，則共其役，非共其車也。竊謂車受於巾車，稍人則役其人將之以至遂師，遂師又帥之至司徒也。」案：曾說是也。云「稍人者野監，是以帥而致之」者，賈疏云：「此欲釋得在稍人之意。以其監三等采地，是野監，故得并監六遂蜃車之事也。」案：《縣師》注云：「野謂甸稍縣都也。」

三等采地自稍以出，故鄭謂稍人爲野監也。然稍人掌公邑，不主采地，廛車亦非公邑采地所出。蓋六遂之餘地，卽爲公邑，故稍人以役助遂吏致之耳。鄭說亦失之。引《既夕禮》曰「既正柩，賓出，遂匠納車于階間者，《既夕記》文。鄭彼注云：「遂匠，遂人、匠人也。遂人主引徒役，匠人主載柩，職相左右也。車，載柩車，《周禮》謂之廛車。」引之者，欲證遂人共廛車之事。云「則天子以至于士，柩路皆從遂來」者，于注例當作「於」，各本並誤。賈疏云：「此經上舉天子，《既夕》下舉士，則其中有諸侯、卿大夫之喪，廛車柩路皆從遂入而來可知。」案：鄭、賈說亦非也。《巾車》云「小喪共置路」，明大喪亦共之，互文以見義也。鄭謂天子至士，柩路皆從遂來，與《巾車》文不合。《既夕記》「遂匠納車」，亦謂共役，不足證士喪遂出柩路也。又卿大夫士柩車，不得稱路，此冢天子爲文，故通謂之柩路。天子至士，葬並用廛車，詳《遂師》疏。

委人掌斂野之賦，斂薪芻，凡疏材、木材，凡畜聚之物。野，謂遠郊以外也。所斂野之賦，

謂野之園圃、山澤之賦也。凡疏材，草木有實者也。凡畜

聚之物，瓜瓠葵芋，^①禦冬之具也。野之農賦，旅師斂之。工商、嬪婦，遂師以入玉府。其牧，則遂師又以共野牲。【疏】「掌斂野之賦」者，此與下文爲目。賦謂九賦之貢，與《遂師》「野賦」爲九賦之地稅異。《釋文》出「賦斂」二字，云「力豔反」。岳珂云：「注疏以「掌斂野之賦」爲一句，以斂薪芻屬之下句。《釋文》則以「掌野之賦斂薪芻」爲一句。案：《釋文》惟「稅斂」「賦斂」之斂力豔反；至「斂弛」「斂市」斂布」「斂其皮角」「斂總布」「斂市之不售」「春頒秋斂」，與此「斂野」之斂，皆無音，謂當如字，讀從上聲也。若照注疏，則此斂皆當從上聲。」案：岳說是也。《釋文》音讀並誤。云「斂薪芻，凡疏材木材」者，此並野賦也。《說文·木部》云：「材，木挺也。」薪以共爨，芻以共秣，疏材木材以共食用。此所斂，蓋斂之於虞衡及掌茶諸官也。《月令》云「季夏，命澤人納材葦」；「仲冬，山林薮澤有能取蔬食者，野虞教道之」。蓋彼官以薪芻、疏材、木材等來入，此官皆受而儲之也。江永云：「委人惟斂薪芻、疏材、木材，凡畜聚之物，不掌粟米、布帛、泉貨諸物之賦也。」注云「野謂遠郊以外也」者，《旅師》注義同。此亦通六遂及四等公

①「瓠」原作「匏」，據楚本改。

邑言之，故下文有甸稍縣都之聚，而不及六鄉四郊。蓋附郭場圃之疏材，場人掌之；遠郊以內之薪蒸疏材，甸師掌之；此官則專掌六遂以外，與彼二官互相備也。《月令》云：「季夏，命四監大合百縣之秩芻，以養犧牲。」又，「季冬，乃命四監收秩薪柴，以共郊廟及百祀之薪燎。」注云：「四監，主山林川澤之官。百縣，鄉遂之屬。今《月令》四爲田。」案：彼四監官，於經無所見；而百縣共薪芻等，則與此官斂野薪芻事同。竊疑當從今《月令》爲「田監」。田甸字通。此官掌斂六遂及公邑之薪芻，六遂在甸，故亦謂之甸監，百縣即公邑也。賈疏云：「委人所斂，皆據六遂已外至王畿，故鄭摠言之也。」云「所斂野之賦，謂野之園圃山澤之賦也」者，明此野賦內無農賦也。賈疏云：「此則九職所出貢，貢賦通言之，九職之中有園圃毓草木，又有虞衡作山澤之材，故以園圃山澤言之也。」云「凡疏材，草木有實者也」者，賈疏云：「疏是草之實，材是木之實，故鄭並言之。九職中有臣妾聚斂疏材，鄭彼注云：『疏材，百草根實。』」不以木解材，文略也。彼臣妾聚斂，雖無貢法，要知此疏材亦是草木有根實者。鄭不言根，亦略言之也。」案：賈說非鄭悒也。木根不可以充疏，故此注不言根。《大宰》注不言木者，文偶不具。凡草木之實，通謂之疏。疏材，謂百疏之

材，材猶物也。疏強爲分別，失之。云「凡畜聚之物，瓜、瓠、葵、芋，禦冬之具也」者，畜即蓄之段字。《說文·艸部》云：「蓄，積也。」《廣雅·釋詁》云：「蓄，聚也。」《大戴禮記·夏小正》云：「八月剥瓜，畜瓜之時也。」《月令》云：「仲秋，乃命有司趣民收斂，務畜菜，多積聚。」注云：「始爲禦冬之備。」《呂氏春秋·仲秋紀》作「務蓄菜」，高注云：「蓄菜，乾苴之屬。」賈疏云：「《七月》詩：『八月斷壺。』壺，瓠也，有甘可食者。《信南山》詩：『疆場有瓜。』《士喪禮》又有葵菹芋，故知畜聚物中有瓜瓠葵芋之等。但《士喪禮》籩豆差之葵菹芋，芋爲長菹，不得爲芋子；其南方有芋子堪食，與《士喪禮》芋別也。」案：諦審注意，芋似即指賈所謂芋子，與《士喪禮》「葵菹芋」異。《說文·艸部》云：「芋，大葉實根，駭人，故謂之芋也。」禦冬之具者，《詩·邶風·谷風》云：「我有旨蓄，亦以御冬。」箋云：「蓄聚美菜者，以禦冬月之無時也。」依鄭說，凡畜聚之物，亦即疏材，爲其可儲畜以共食，故鄭特別出之也。云「野之農賦，旅師斂之」者，亦明此委人不兼斂農賦也。然此說非也。旅師三粟，非農賦。野之農賦，六遂當爲遂師斂之，公邑當爲縣師斂之，詳《旅師》疏。云「工商、嬪婦，遂師以入玉府」者，明委人亦不兼斂工商、嬪婦之賦也。賈疏云：「案《遂師》云：

「入野職野賦於玉府。」雖不言工商、嬪婦，但遂師既入野之賦貢，明嬪婦工商之賦也。知者，以其玉府掌玩好之物，其工商嬪婦所作，堪為玩好，故入玉府者，工商嬪婦也。」云「其牧，則遂師又以共野牲」者，明委人又不兼斂蕝牧之賦也。賈疏云：「上《遂師》云：『凡國祭祀，共其野牲。』是知九職之中蕝牧養鳥獸者，遂師共之也。」以稍聚待賓客，以甸聚待羈旅，聚，凡畜聚之物也。故書羈作奇。杜子春云：「當為羈。」【疏】「以稍聚待賓客，以甸聚待羈旅」者，《遺人》云：「郊里之委積以待賓客，野鄙之委積以待羈旅。」此官掌委積，雖與遺人為官聯，而唯掌斂野賦，則內不及郊里，故自甸稍以外，與彼不同。江永云：「與遺人之待賓客羈旅者別異，委人無遺人之粟米，而遺人無委人所聚之物也。」案：江說是也。距王國二百里為甸，三百里為稍，其地則六遂及公邑也。詳《載師》疏。注云「聚，凡畜聚之物也」者，據上文，亦謂疏材禦冬之具也。今案：當兼有薪芻等，此聚與遺人委積義亦略同。江永云：「聚者，通薪芻、疏材、木材，凡畜聚之物言之者，皆隨地儲待，主其地者守以待賓旅道路之用也。」云「故書羈作奇，杜子春云當為羈」者，段玉裁云：「《遺人職》作「寄」。

古者奇、寄、羈同部。」徐養原云：「《遺人》羈作奇。此作奇，其寄之譌字邪？抑寄之省文邪？羈字俗從奇作羈，其誤蓋有由也。《後漢書·馬援傳》，援鑄銅馬式，依儀氏鞞中。鞞字又即羈之省文，《說文》所無。」凡其余聚以待頒賜。余當為餘，聲之誤也。餘謂縣都畜聚之物。

【疏】「凡其余聚以待頒賜」者，此亦與遺人職掌互相備。頒為常賜，即《遺人》恤羸阨、養老孤之等。《莊子·人間世篇》：「支離疏曰：上與病者粟，則受三鍾與十束薪。」《晏子·諫上篇》云：「無委積之氓，與之薪燎，使足以畢霖雨。」是凡疾病災荒，受粟者必兼受薪蒸之證。賜為好賜，則恩澤所加，非由恒秩，或亦有受薪蒸、疏材之法矣。頒賜義別，詳《膳夫》疏。注云「余當為餘，聲之誤也」者，段

玉裁云：「此蓋亦古文假借字。《職方氏》『昭餘祁』，《淮南子》作『昭余』。徐鍇《說文》亦作『余』。」云「餘謂縣都畜聚之物」者，賈疏云：「以其委人掌斂野物，從二百里至王畿，上已云甸稍，明此言餘聚，是縣四百里、都五百里中畜聚之物，如上稍甸畜聚之物也。」以式灋共祭祀之薪蒸木材，賓客，共其芻薪，喪紀，共其薪蒸木材，軍旅，共其委積薪芻凡疏材，共野委兵

器，與其野圉財用。式法，故事之多少也。薪蒸，給

炊及燎。麤者曰薪，細者曰蒸。木材給張事。委積薪芻者，委積之薪芻也。軍旅又有疏材以助禾粟。野委，謂廬宿止之薪芻也。其兵器，謂守衛陳兵之器也。野圉之財用者，苑囿藩羅之材。【疏】「以式灋共祭祀之薪芻木材」者，

謂依式法之等數，共而致之所用之處也。賈疏云：「此一經以委人掌斂野賦，故所有委積皆供之。」云「賓客共其芻薪」者，蓋通道路及致饗餼言之。上云以稍聚待賓客，亦當有芻薪。此又共之者，凡云待者，皆豫儲以俟求索；此云共，則臨時奉而致之客館以給用，故立文有異也。江永云：「芻禾又見於《舍人》。蓋委人共其物，而舍人載之於車，猶《春人》、《舍人》各言共米也。薪則委人自載之與？」

注云「式法，故事之多少也」者，此亦注用今字作「法」也。式法，即大宰九式之法。謂此祭祀以下五事，所共多少之節度，並依故事爲之，不得有羨缺也。云「薪蒸，給炊及燎」者，薪以給內外饗及饌人之炊爨，蒸以給大宗伯及闔人、司烜氏之燎燭也。云「麤者曰薪，細者曰蒸」者，《甸師》注云：「木大曰薪，小曰蒸。」與此義同。云「木材給張事」者，若帳橦之屬，張事詳《掌次》疏。賈疏云：「以其祭祀而云木材等，案《掌次》云張大次、小次及幕，並須木材，明據

此所用，故云給張事。」案：賈專據祭祀言之。經喪紀亦共

木材者，掌次喪事有帷幕帟等，亦以木材給張事。又喪車飾亦用木材，《縫人》云「衣袞柳之材」是也。云「委積薪芻者，委積之薪芻也」者，此委積與《遣人》義同。以軍旅車徒既衆，所用薪芻尤多，非平時道路委積所能給，故諸官特於所出道涂別爲委積。《書·費誓》云：「魯人三郊三遂，峙乃芻茭，無敢不多。」僞孔傳云：「鄉遂多積芻茭，供軍牛馬。」是其事也。若然，有軍旅則此官共其薪芻，其米穀則遣人與廩人、倉人共之，亦與彼爲官聯也。《墨子·旗幟篇》云：「凡守城之法，樵薪有積，菅茅有積，萑葦有積，木有積，松柏有積，蓬艾有積。」此亦軍事城守時，薪芻之委積，其數尤多。彼又有木材之積，《費誓》亦云「峙乃楨榦」，此經文不具也。賈疏謂「大行人、掌客委積中有牲牢米禾薪芻之屬，委人惟共其薪芻」，則非經注之指。大行人、掌客之委積，當在上文「賓客共其薪芻」內，不關軍旅之事也。又案：凡委積之處，米穀與芻薪各別爲積，《漢書·天文志》如淳注云：「芻藁積爲廩」，《九章算術·商功篇》有芻藁芻童之積，皆是也。云「軍旅又有疏材以助禾粟」者，賈疏云：「以其疏材是百草根實，可得助禾粟，以供馬牛，故云助禾粟。」云「野委謂廬宿止之薪芻也」者，謂廬宿人所止舍

之處，有新芻之聚，謂之野委也。賈疏云：「案《遣人》云：『十里有廬，廬有飲食；三十里有宿，宿有委；五十里有市，市有積。』委積之中有新芻，在野外，故云野委也。其六鄉之廬宿委積薪芻，自六鄉供之。」案：依賈說，則此注兼廬宿市言之是也。竊謂鄭意，蓋以遣人宿有委，市有積，委少亦有米穀，而以薪芻為主；積多亦有薪芻，而以米穀為主。經云野委，不云野積，故注亦唯據廬宿而略市。實則委積散文亦通。野道既有市積，則亦須有守器，此官自當備共之矣。然則此云野委，乃是省文，實當兼有積，《國語·周語》云「野有庾積」是也。云「其兵器謂守衛陳兵之器也」者，賈疏云：「其文承野委之下，明與野委同為賓客所用，故知是守衛賓客陳兵之器也。」案：賈說亦非，經注，惟也。此「野委兵器」與下「野囿財用」，文例正同。注云「其兵器」，其字即冢野委為文，明其為野委所用兵器也。《掌戮》云：「髡者使守積。」是凡委積皆須使人監守。野委兵器者，蓋謂廬宿市有委積之地，平時陳之，以為守衛，防盜賊竊略，非以守衛賓客也。但經例凡云兵器者，兵與器並當為二，此兵謂五兵，器則輦輦及任器之屬。若然，兵以資守衛，器以供運載儲庠，各有所用，鄭誤以兵器為一，故專屬守衛耳。詳《玉府》疏。云「野囿之財用者，苑囿藩羅之

材」者，《釋文》羅作蘿，云「本亦作羅」。案：羅蘿字通。宋建陽本、岳本、明注疏本，並作蘿。《土方氏》「巡守則樹王舍」，注亦云「為之藩羅」。《方言》云：「羅謂之離，離謂之羅。」郭注云：「謂行列地也。」羅與離一聲之轉。《國語·楚語》云：「為之關籥藩離。」韋注云：「藩離，壁落也。」《廣雅·釋宮》云：「藩、櫺、落、柅也。」柅即離字。《司險》注云：「樹之林作藩落也。」蓋藩羅即藩櫺，藩離亦即藩落。野外苑囿亦有守衛遮迺，故須樹藩羅。材亦謂木材也。賈疏云：「委人所為皆據二百里，上經稍聚待賓客據三百里。此囿，故知在野，故鄭以野囿言之。古者田獵皆在囿，故《書傳》云：『嚮之取於囿，是勇力取；今之取於澤，是揖讓取。』若然，田在澤，澤中有囿；田在山，山中有苑。其苑囿藩羅以遮禽獸，故云野囿也。」案：賈說是也。六遂以外，亦有苑囿為田獵之所，對囿人所掌郊內之囿言之，謂之野囿，此官則共其藩羅之財用也。凡軍旅之賓客館焉。館，舍也。必舍此者，就牛馬之用。【疏】「凡軍旅之賓客館焉」者，賈疏云：「謂諸侯以軍旅助王征討者，故謂之軍旅之賓客也。」注云「館，舍也」者，《司儀》注同，謂野之路室候館之等。《左傳釋文》引《字林》云：「館，客舍

也。」案：《秋官·環人》云：「舍則授館。」館者，人所止舍，故亦謂之舍。館舍對文義異，散文則通。云「必舍此者，就牛馬之用」者，此官掌委積之薪芻，軍旅之賓客牛馬須芻秣，故就委人儲備委積之處為館舍，取便飢養也。

土均掌平土地之政，以均地守，以均地事，以均地貢。政讀為征。所平之稅，邦國都鄙也。

地守，虞衡之屬。地事，農圃之職。地貢，諸侯之九貢。

【疏】「注云政讀為征」者，《均人》「掌均地政」，注亦云「政讀為征，地征謂地守地職之稅也」。詳《小宰》疏。云「所平之稅，邦國都鄙也」者，賈疏云：「案下文云『以和邦國都鄙』者，故知此平者亦據邦國都鄙。若六鄉六遂及公邑征稅，自均人平之。」詒讓案：土地之征，當為九賦地稅。《均人》注以為即地守地職之稅，此注義亦當同，非經義也。詳彼疏。云「地守，虞衡之屬」者，《均人》注同。云「地事，農圃之職」者，《小司徒》云：「以任地事。」注云：「地事，謂農牧衡虞也。」此止云農圃者，以虞衡別人地守也。又《均人》云「均地職」，與此地事相當，故知事即職也。彼注亦云「地職，農圃之屬」。又《載師》云：「以物地事授地職。」職事不

同者，對文則異，散文則通。云「地貢，諸侯之九貢」者，明與《大司徒》「地貢」為九職之貢異也。賈疏云：「此土均均邦國都鄙，而云均地貢，明據大宰九貢而言。」詒讓案：《大司徒》五等邦國公食者半，侯伯食者參之一，子男食者四之一。鄭亦據此官均地貢為釋，詳《大宰》、《大司徒》疏。以

和邦國都鄙之政令刑禁與其施舍，禮俗、喪紀、祭祀，皆以地嫩惡為輕重之灋而行之，掌其禁令。施，讀亦為弛也。禮俗，邦國都鄙民之所行，先王舊禮也。君子行禮不求變俗，隨其土地厚薄，為之制豐省之節耳。《禮器》曰：「禮也者，合於天時，設於地財，順於鬼神，合於人心，理萬物。」【疏】「以和邦國都鄙之政令刑禁」者，賈疏云：「土均主調，即是和義，故土均以和畿外邦國、畿內都鄙之政令。」案：和與《大宰》「正月之吉始和布治於邦國都鄙」義同，亦當讀為宣，謂宣布政令刑禁及以下諸事也。賈說誤。和宣字通，詳《大宰》疏。凡邦國諸侯，都鄙采長，其政令刑禁，雖得自專主之，然其典法，則咸稟於王國。故此官依六官治法，參以邦國都鄙土地所宜，宣布頒示，使遵行之也。云「與其施舍」者，《小司徒》云「以辨其貴賤、老幼、癈疾，凡征役之施舍」是也。謂賦役施

舍之事，亦依土地所宜，制爲法令，宣布之邦國都鄙，使依行之。若大宰八法治都鄙，五曰賦貢以馭其用，八曰田役以馭其衆，皆有施舍之法是也。云「禮俗、喪紀、祭祀，皆以地嫩惡爲輕重之灋而行之」者，嫩，古美字，詳《大司徒》疏。此三事亦依王國之法，宣布邦國都鄙使行之。《大宰》八則治都鄙，「一曰祭祀以馭其神」，「六曰禮俗以馭其民」。《大宗伯》云：「乃頒祀于邦國都家鄉邑。」《小行人》云：「其禮俗、政事、教治、刑禁之逆順爲一書。」明邦國都鄙之禮俗、喪紀、祭祀，咸攷於王官，此官掌均地之嫩惡，故治其輕重之法也。賈疏云：「自禮俗、喪紀、祭祀三事，皆以地之美惡輕重者，地美則重行之，地惡則輕行之，以其禮許儉不非無故也。」案：依賈說，則以地美惡爲輕重之法，唯此三事。《大司徒》注說侯國地貢，謂必足其國禮俗、喪紀、祭祀之用，乃貢其餘。即據此經爲釋，則鄭意當如賈說。今審玩經筭「皆以」之文，似當通包上政令刑禁以下言之。蓋此官職掌與均人略同，唯大司徒土均之法是其專職，本不掌政刑禮俗之等。因以上諸事，皆須以地美惡爲輕重之法，則與土均法相通貫，故兼使此官脩定等差宣布之，則此章諸事，咸依地制法明矣。云「掌其禁令」者，謂禮俗以下三者別有禁令，以警敕其不如法，與上刑禁異，猶《小司徒》云

「祭祀飲食、喪紀之禁令也」。注云「施讀亦爲弛也」者，段玉裁云：「亦者，亦《遂人》、《遂師》而言。岳本無亦字。」案：《遂大夫》注亦同，詳《小司徒》疏。云「禮俗，邦國都鄙民之所行先王舊禮也」者，《大宰》注云：「禮俗，昏姻喪紀舊所行也。」謂非當代所行之禮，從其舊俗不變者也。案：此禮俗當分爲二，即《大司徒》十二教之陽禮教讓，陰禮教親，及以俗教安也。鄭并爲一事，未安，詳《大宰》疏。云「君子行禮不求變俗」者，《曲禮》文。鄭彼注云：「求猶務也。不務變其故俗，重本也。謂去先祖之國，居他國。」孔疏云：「此謂大夫出在他國，不變己本國之俗。案鄭荅趙商，以爲衛武公居殷墟，故用殷禮，即引此云「君子行禮，不求變俗」。如鄭之意，不變所往之國舊時風俗，與此不同。」又引熊氏云：「《王制》云「修其教，不易其俗」。又《左傳》定四年封魯公，因商奄之人，封康叔於殷虛，啓以商政，封康叔於夏虛，啓以夏政，皆因其舊俗也。」案：據孔、熊說，則鄭釋《曲禮》，本有兩解。此注引證禮俗，《誦訓》先鄭注引證地俗，並與荅趙商義同。又《士昏禮》云：「若不醴，則醢用酒。」鄭彼注云：「若不醴，謂國有舊俗可行，聖人用焉不改者也。」亦引《曲禮》彼文爲證，與此注同。云「隨其土地厚薄，爲之制豐省之節耳」者，賈疏云：「以厚薄解經

嫩惡，豐省解經爲輕重之法也。」江永云：「以地嫩惡爲輕重之等，如居沃土者，當禁其奢侈，示之以儉；居瘠土者，當救其鄙陋，示之以禮。」引《禮器》曰「禮也者，合於天時，設於地財，順於鬼神，合於人心，理萬物」者，證此以地嫩惡爲輕重之法，即設於地財之義。

草人掌土化之灋以物地，相其宜而爲

之種。土化之法，化之使美，若汜勝之術也。以物地，占其形色爲之種，黃白宜以種禾之屬。【疏】注云「土化之法，化之使美」者，此亦注用今字作「法」也。土化之法，即草人之官法。謂土地磽瘠，則察其土質所含異同羸胸，糞擁和齊，而變其質，化之使和美也。云「若汜勝之術也」者，《漢書·藝文志》農家《汜勝之》十八篇，本注云：「成帝時爲議郎。」顏注引劉向《別錄》云：「使教田三輔，有好田者師之，徒爲御史。」案：《汜書》今佚。賈思勰《齊民要術》引《汜書》云：「凡耕之本，在於趨時，和土務糞澤。」有強土弱之，弱土強之之說甚詳。又有浸種法，亦其一隅也。云「以物地占其形色爲之種」者，《載師》《物地事》，注云：「物，物色之以知其所宜之事。」《左》成二年傳：「國佐曰：

先王疆理天下，物土之宜，而布其利。」杜注云：「播殖之物，各從土宜。」此與彼義同。占者，《廣雅·釋詁》云：「視也，諡也。」謂諡視其土之形色，以定其所宜之種。種即《職方氏》豫州宜五種，兗州宜四種之等是也。《詩·小雅·大田》箋云：「將稼者，必先相地之宜，而擇其種。」爲種與擇種，義亦同。云「黃白宜以種禾之屬」者，賈疏謂依《孝經緯·援神契》而言。案文見《載師》疏。禾者，即九穀之梁也。凡糞種，騂剛用牛，赤緹用羊，墳壤用麋，渴澤用鹿，鹹洧用貍，勃壤用狐，埴壚用豕，彊藥用蕢，輕爨用犬。凡所以糞種者，皆謂糞取汁也。赤緹，緹色也。渴澤，故水處也。洧，鹵也。貍，貓也。勃壤，粉解者。埴壚，黏疏者。彊藥，強堅者。輕爨，輕脆者。故書騂爲挈，墳作盆。杜子春挈讀爲騂。謂地色赤而土剛強也。鄭司農云：「用牛，以牛骨汁漬其種也，謂之糞種。墳壤，多盆鼠也。壤，白色。蕢，麻也。玄謂墳壤，潤解。【疏】「凡糞種」者，糞，《釋文》作「蕢」，云「本亦作蕢」。案：《說文·艸部》云：「蕢，棄除也。从収，推蕢棄采也。官溥說，似米而非米者矢字。」嚴可均云：「蕢作糞，蓋隸變。漢碑有糞字，《釋文》作蕢，不體。」案：

嚴說是也。糞種即土化之法。《月令》季夏云：「可以糞田疇。」孔疏云：「糞，壅苗之根也。」案：依二鄭義，則此爲糞穀之子種，或子種苗根兩壅之與？云「疆樂用糞」者，疆樂，《釋文》作疆樂，云「樂，本又作墜」。俗注疏本疆亦作疆，《羣經音辨》同。嚴可均云：「《釋文》『疆，其兩反』。轉寫之誤，疆不得音『其兩』也。《月令》『可以美土疆』，鄭彼注引作『強樂』。強與疆同，蓋讀如倔強之強，故此注爲疆堅者矣。」案：嚴說亦是也。云「輕爨用犬」者，爨不體，《釋文》作「爨」。阮元云：「《釋文》與篆體合。」孔廣森云：「注於《大司徒》五物九等，即引此駢剛赤緹之屬當之。《管子·地員》九州之土爲九十物，則又因九等而區別之，上土三十物，中土三十物，下土三十物。此經鹹渴次於渴澤，赤緹次於駢剛，皆從色狀相似者類列之，不以土物上下爲次。」案：孔說是也。《地員》之九十物，與此九土，大致相同，並詳後。

注云「凡所以糞種者，皆謂糞取汁也」者，《荀子·富國篇》云：「多糞肥田。」《廣雅·釋詁》云：「糞，饒也。」謂糞取汁，壅培諸穀種，使之肥饒。《漢書·郊祀志》載王莽種五梁米於殿中，鬻毒冒犀玉二十餘物漬種。《齊民要術》引《汜勝之書》，有剉馬牛羊豬麋鹿骨，糞取汁澆種法，云「骨汁肥使稼耐旱」，是鄭所本也。云「赤緹，線

色也」者，《酒正》「緹齊」注云：「緹者，成而紅赤。」《說文·糸部》云：「緹，帛丹黃色也。線，帛赤黃色。」《廣雅·釋器》云：「線，謂之紅。緹，赤色也。」《喪服記》鄭注云：「線，淺絳也。」《爾雅·釋器》云：「一染謂之線，再染謂之窺，三染謂之纁。」蓋赤爲窺纁之通語。緹即線，爲赤之淺者，乃一染之專名，故鄭直釋爲線色。《釋名·釋地》云：「土赤曰鼠肝，似鼠肝色也。」孔廣森云：「《地員》『五弘，其色如鼠肝』，所謂赤緹者也。」云「渴澤，故水處也」者，《說文·水部》云：「渴，盡也。」《爾雅·釋詁》云：「涸，渴也。」案：渴今通作竭字，與訓欲飲之漱別。渴澤猶竭澤也。澤故有水，今涸渴則無水，而可耕種，故云故水處。《禹貢》揚、荆二州，厥土惟塗泥，近此所謂渴澤，《管子·乘馬篇》亦云「涸澤百而當一」是也。云「渴，鹵也」者，《說文·鹵部》云：「鹵，西方鹹地也。安定有鹵縣，東方謂之陂，西方謂之鹵。此渴即陂之俗。《禹貢》『海濱廣斥』，《史記·夏本紀》、《漢書·地理志》『斥』並作『渴』。《史記集解》引徐廣云，「渴又作斥」。又引鄭《書注》云，「斥謂地鹹鹵」。《史記·河渠書》云「澤鹵」，《索隱》云：「澤一作渴，本或作斥。」又《貨殖傳》云「渴鹵」，《漢書·溝洫志》作「烏鹵」，顏注云：「烏鹵即斥鹵也，謂鹹鹵之地也。」《文選》木華《海

賦云「襄陵廣鳥」，李注云：「《尚書》『廣斥』，《史記》『斥』爲『鳥』，古今字也。」案：據說文，則鹹渴正字當作庌，庌隸變爲斥，或段鳥爲之，或又加水爲渴，實一字也。《左》襄二十五年傳「表淳鹵」，^①孔疏引賈逵云：「淳，鹹也。」淳鹵即此鹹渴。惠士奇、孔廣森、呂飛鵬並以《地員》所云「五桀之狀，甚鹹以苦」爲鹹渴是也。^②孔又以《地員》之「五鳧」，亦即此鹹渴，然則彼鳧字或即鳥之譌與？云「狃，貓也」者，讀狃爲獾也。賈疏云：「案《爾雅》云狃子貓，或曰狃，故以狃貓爲一也。」案：賈說非也。《釋獸》云：「狃子狃，貓子狃。」郭注云：「貓，豚也，一名獾。」《說文·豸部》云：「狃，豹之類。貓，獸也。獾，野豕也。」《爾雅釋文》引《字林》云：「貓似豕而肥。」據《釋獸》則狃貓非一獸。郝懿行云：「《方言》云：『獾，關西謂之貓。』郭注：『獾，豚也。』《廣雅》：『貓，獾也。』貓獾同，故古通名。《草人》注：『狃，貓也。』《淮南·齊俗訓》云：『狃貉得埴防，弗去而緣。』高注：『狃，狃豚也。』是皆借狃爲獾，賈疏失之。」案：郝說是也。王念孫說同。《詩·魏風·伐檀》箋云「貉子曰狃」，不云貓，則此注以狃爲獾之借字明矣。云「勃壤，粉解者」者，《說文·邑部》云：「地之起者曰郭。」《一切經音義》引《通俗文》云：「埴土曰坳。」勃、郭、埴，聲類並同。《大司徒》注

云：「壤，和緩之貌。」地勃發而和緩，則解釋如粉，故云粉解。《說苑·復恩篇》，淳于髡曰「蟹堞者宜禾」，蟹即解之段字。蟹堞即粉解也。呂飛鵬以《地員》「五沙之狀，粟焉如屑塵厲」爲勃壤是也。云「埴壚，黏疏者」者，《考工記總敘》注云：「埴，黏土也。」《禹貢》：「徐州『厥土亦埴埴』。《考工記》賈疏引鄭《書注》說同。又豫州『下土埴埴』，僞孔傳云：「壚，疏也。」此注蓋亦以黏訓埴，以疏訓壚也。《釋名·釋地》云：「土黃而細密曰埴，埴，職也，黏肥如脂之職也。土黑曰盧，盧然解散也。」案：盧與壚通，《淮南子·墜形訓》亦云「盧土」，劉以職釋埴，以解散釋盧，亦與黏疏義相應；但釋埴爲細密，則與壚疏不合。《說文·土部》又云：「壚，黑剛土也。」鄭、許、劉各偏舉一義，不能強同也。《呂氏春秋·辨土篇》云：「凡耕之道，必始於壚，爲其寡澤而後枯。」又云「壚埴冥色」。《齊民要術》引《汜勝之書》云：「春地氣通，可耕堅硬強地黑壚土。」《玉燭寶典》引崔寔《四民月令》云：「雨水中，急菑強土黑壚之田。」是皆壚爲黑剛土之證。《六韜·戰車篇》云：「圯下漸澤，黑土黏

① 「五」原訛「四」，據《左傳》改。

② 「苦」原訛「若」，據《管子·地員》改。

埴者，車之勞地也。」黑土黏埴，殆所謂埴墟矣。呂飛鵬云：「《地員》『五疆之狀，強力剛堅。五埴之狀，甚澤以疏離，坻以臞瘠』。墟墟、埴埴同聲，蓋言墟埴也。」案：呂說是也。惠、孔說同。《地員》又有斥埴、黑埴及五臈黑土黑落，蓋亦埴墟之屬。云「疆樂，強堅者」者，宋本及注疏本疆作強，宋婺州本強又作疆，未知孰是。惟嘉靖本述經作疆，釋義作強，今姑從之。《釋文》載經別本樂作「墜」。《廣韻·四十九敢》云：「墜，土地之堅也。樂同，引《周禮注》云：『強樂地之堅者。』《集韻·四十九敢》云：『樂，堅土也。』或作墜，亦書作墜。」案：以字形考之，樂當即墜之變體，俗又作墜。墜墜與堅亦一聲之轉，故注訓爲堅。《廣韻》引《周禮注》，疑馬、干諸家佚義，亦與鄭同。《說文·毌部》云：「堅，剛也。」《九章算術·商功篇》云：「穿地四，爲壤五，爲堅三。」蓋堅者謂之樂，與解者謂之壤正相反也。《月令》，季夏「可以美土疆」。注云：「疆，強樂之地。」孔疏云：「強是不軟，樂是罅闕，並謂礫礪磊砢之地也。」又《左傳》襄二十五年「數疆潦」，孔疏云「賈逵以疆爲疆樂礫確之地」，蓋土強則礫確。賈、鄭義亦同。惠氏、孔氏、呂氏並引《地員》「五疆之狀，芬焉若糠以肥」說此疆樂，是也。《地員》又云「五悲之狀」，^①廩焉如墜，疑亦疆樂之類，尹注

云：「墜猶強也。」義即本此經。又案：此以強堅釋疆樂，經注字異。《月令》注強樂字同。攷《說文·弓部》云：「疆，弓有力也。」《虫部》云：「強，蜥也。」《力部》云：「勇，迫也。」今字並借作強。通校全經六篇，《遂人》「疆予」字，經注並作疆。《司諫》「強之道藝」，《車人》「強不足」，《弓人》「目也者必強強者在內」，「維幹強之」，經注並作強。《梓人》「強飲強食」經同。《掌次》、《禁暴氏》、《輿人》注亦並作強。諸文錯出，必有譌舛。以意求之，疑此及《司諫》、《遂人》皆當經作疆，注作強，即經用古字，注用今字之例。惟《考工記》字例，與五官不甚同，或自作強，則未可定耳。云「輕輿，輕脆」者，輿亦當作輿。丁晏云：「《說文·火部》：『輿，火飛也。』《廣韻·四宵》：『輿今作票，同。』引申之爲輕票之意。《釋名·釋地》：『土白曰漂。漂，輕飛散也。』漂票聲相近。」案：丁說是也。《漢書·五行志》，谷永言成帝「崇聚輕票無誼之人」，與此義同。輿漂聲類同。《說文·水部》云：「漂，浮也。」土性輕浮，則不韌韌，故鄭以輕脆釋之。《玉燭寶典》引《四民月令》云「三月可菑沙白輕土之田」，可證《釋名》「土白曰漂」之說。惠士奇謂輿與剽通，引

①「悲」原訛「杰」，據楚本改。

《地員》「五剽」爲釋，孔、呂說並同。案：《地員》說五剽云「如芬以脈」，脈當即胞字，形近而誤。云「故書駢爲挈」者，段玉裁云：「《說文·馬部》無駢字，徐鉉新附字作駢，云『從馬，鮮省聲』。案：《土部》曰：『埤，赤剛土也。從土，鮮省聲。』此《周禮》駢剛正字。且《牧人》『駢牲』，《魯頌》『駢剛』，皆宜借用從土之埤。今皆從馬，則爲倒置。」徐養原云：「駢剛之駢，本作埤，埤鮮音同，故又借用鮮。」《說文·角部》『鮮，角低仰便也』，引《詩》曰『鮮鮮角弓』。又有犛字，「一角仰也，从角刂聲」，引《易》曰『其牛犛』。今《易》作挈。蓋鮮與犛義類相近，故鮮字轉爲犛。犛與挈俱从刂，挈與犛俱从手，挈犛挈三字其音亦相近，是其輾轉相變之因也。」云「墳作盆」者，聲近段借字。徐養原云：「盆與墳古字通。《春秋左氏經》『叔弓帥師敗莒師於蚡泉』，《穀梁》作『賁泉』，是賁與蚡同也。蚡即盆字。凡古書多假借，今書多用本字。故書借盆爲墳，盆壤猶曰墳壤。當以後鄭之說爲長。」云「杜子春挈讀爲駢，謂地色赤而土剛強也」者，杜讀與《說文》埤字說解同，依其義，則駢剛土色與赤緹略同，惟以剛強爲異。呂飛鵬云：「《地員篇》『赤墟歷強肥，五種無不宜』，蓋言埤剛也。」案：呂說是也。《地員》又有五粟，云「剛而不穀」，孔氏以當此駢剛，亦通。鄭司農云

「用牛，以牛骨汁漬其種也，謂之糞種」者，此即汜勝之法，與後鄭前說同。江永云：「種字當讀去聲。凡糞種，謂糞其地以種禾也。後鄭謂煮取汁，先鄭謂用汁漬其種，是讀種爲上聲。凡糞，當施之土；如用獸，則以骨灰洒諸田；用麻子，則用搗過麻油之渣布諸田；若土未化，但以汁漬其種，如何能使其土化惡爲美，此物理之易明者。今人糞田，未見有煮汁漬種者。農家歲歲糞田，欲其肥美多穀也。若駢剛諸土，未經變化，恐非一歲所能化，況又惟漬其種乎。」案：江說本項安世，於義近是。經說糞種而辨九等土宜之異，則糞宜謂施之土者。若然，此糞種，宜讀如「黃白宜以種禾」之種，與上經「爲之種」之種不同。但二鄭漬種之說，自是古農家遺法，今雖不承用，未敢輕破也。云「墳壤，多盆鼠也」者，段玉裁校改「墳壤」爲「盆壤」云：「此依故書作盆，如其字解之，今各本云『墳壤多盆鼠』，殊誤。」案：段說是也。盆鼠者，《爾雅·釋獸》「鼯鼠」，郭注云：「地中行者。」《釋文》云：「字亦作蚡。」《說文·鼠部》云：「鼯，地中行鼠，伯勞所作也。一曰偃鼠。重文蚡，或從虫分。」盆與蚡同。《本艸名醫別錄》云：「鼯鼠在土中行。」陶注云：「俗中一名隱鼠，一名鼯鼠，形如鼠，大而無尾，黑色長鼻，甚強，常穿地中行，討掘即得。」《方言》云：「蚍蜉，隤

鼠之場，謂之坻。」郭注云：「穊鼠，蚡鼠也。」《穀梁》隱三年傳：「吐者外壤，食者內壤。」楊疏云：「壤，徐邈亦作場。麋信云：『齊魯之間謂鑿地出土、鼠作穴出土，皆曰場。』」先鄭意盆壤謂盆鼠穴行地中，起土上出，浮解成壤，即《方言》所謂穊鼠之場。《莊子·天道篇》亦云「鼠壤有餘蔬」是也。此乃望文爲訓，故後鄭不從。云「壤白色」者，《禹貢》冀州「厥土惟白壤」，先鄭蓋據彼爲說。賈疏云：「《禹貢》有黃壤，則此壤不得專據色白解之，故不從也。」云「黃，麻也」者，《廣雅·釋艸》云：「廣，麻也。」廣正字，黃段借字。《邈人》注云：「黃，泉實也。」云「玄謂墳壤，潤解」者，段玉裁云：「鄭君則依今書作墳，釋墳壤爲潤解，潤訓墳，壤訓解，別於勃壤爲粉解。」詒讓案：《禹貢》：兗州「厥土黑墳」，僞孔傳云：「色黑而墳起。」《釋文》引馬融云：「墳，有膏肥也。」冀州白壤，僞孔傳云：「無塊曰壤。」《說文·土部》云：「壤，柔土也。」案馬云有膏肥，即所謂潤；孔云無塊，即所謂解也。呂飛鵬云：「《地員》『五壤之狀，芬然若澤若屯土』。注言其土得澤，則墳起爲堆，故曰屯土，蓋言墳壤也。」案：呂說是也。孔氏說同。

稻人掌稼下地。以水澤之地種穀也。謂之稼

者，有似嫁女相生。【疏】「掌稼下地」者，掌隰農稼穡之事。下地即澤地，亦即《左》襄二十五年傳之隰皋，與《小司徒》、《遂人》三等地之「下地」義異。注云「以水澤之地

種穀也」者，水澤謂澤地之有水者，對《草人》「渴澤」爲無水者也。《載師》賈疏引《孝經援神契》云：「洿泉宜種稻。」《說苑·辯物篇》云：「高者黍，中者稷，下者稭。」又《復恩篇》云：「下田洿邪，得穀百車。」下地即洿泉下田。凡稻皆種於水田，《內則》有「陸稻」，《管子·地員篇》謂之「陵稻」，《齊民要術》謂之「旱稻」，則稻之別種也。云「謂之稼者，有似嫁女相生」者，《敍官》注云：「種穀曰稼，如嫁女以有所生。」與此義同。以豬畜水，以防止水，以溝蕩水，以遂均水，以列舍水，以澮寫水，以涉揚其芟作田。鄭司農說豬防以《春秋傳》曰「町原防，規偃豬」。以列舍水，列者非一，道以去水也。以涉揚其芟，以其水寫，故得行其田中，舉其芟鉤也。杜子春讀蕩爲和蕩，謂以溝行水也。玄謂偃豬者，畜流水之陂也。防，豬旁隄也。遂，田首受水小溝也。列，田之畦埒也。澮，田尾去水大溝。作，猶治也。開遂舍水於列中，因涉之，揚去前年所芟之草，而治田種稻。【疏】「以豬畜水」者，以下並掌下地

治水之事。云「以澮寫水」者，《說文·六部》云：「寫，置物也。」引申爲輪寫之義。《廣雅·釋詁》云：「寫，除也。」俗輪寫字作瀉，非。云「以涉揚其芑作田」者，此於澤地芑草治田之事，與上六者爲禦水行水事異。程瑤田云：「稻人掌稼下地，即所云稼澤也。蓋水澤下隰之地，一遇淫雨，漫沒隨之，內水難出，外水易入，無減水之法，斯不得與水爭地。於是豬以畜之，使難出者有所歸，防以止之，使易入者不內汎。夫然後疆理其地爲遂，於是每夫之田首，則水之偏鍾於最下之地者，今皆以共遂分而受之，所謂均水也。其水之在百畝中者，則爲陂以居之。陂必成列，是謂以列舍水。遂中之水，受之以溝，溝深於遂，水乃流行無所滯，是曰蕩水。而澮又深於溝，其承溝水也，隨納隨消，是曰寫水。如此則以澮承溝，以溝承遂，以遂承列，遞相受焉，水乃不爲田害，而因以涉揚其芑以作田也。此治溝澮，亦專爲除水害。蓋芒種雖資於水，而大浸亦必傷其稼。故稻人之治之也，既先有事於豬防，以去其漫沒之大患，而後爲溝澮，使水盡由地中行，水由地中，田乃可作。涉揚其芑，蓋治溝澮之餘事，順而撫者也。」

注云「鄭司農說豬防以《春秋傳》曰：町原防，規偃豬者，《左》襄二十五年傳文。杜注云：「偃豬，下濕之地。規度其受水多少。廣平曰原。」

防，隄也。隄防閒地，不得方正如井田，別爲小頃町。」先鄭意，此經之豬防二者，與彼正同，故引以爲說。云「以列舍水，列者非一，道以去水也」者，《說文·刀部》云：「列，分解也。」《廣雅·釋詁》云：「列，布也。」《國語·楚語》韋注云：「舍，去也。」先鄭意，水道分布衆多，泄之外出，因謂之列也。賈疏云：「先鄭以舍爲舍去之舍。後鄭以爲止舍之舍，以澮是寫去水，以舍爲止水於其中，故不從先鄭也。」云「以涉揚其芑，以其水寫，故得行其田中，舉其芑鉤也」者，《說文·林部》云：「楸，徒行厲水也。重文涉，篆文从水。」《艸部》云：「芑，刈草也。」《詩·鄘風·載馳》傳云：「水行曰涉。」《小爾雅·廣言》云：「揚，舉也。」《肆師》注云：「芑，芑草除田也。」先鄭意，涉爲行田中之稱，冢澮寫水爲文，以田水既寫去，則泥淺可以徒行，乃得舉芑鉤以去草也。《國語·齊語》韋注云：「芑，大鎌，所以芑草也。」芑鉤即謂鉤鎌，所以迫地芑草，詳《雜氏》疏。江永云：「下地之田，田中常有水，足涉水，揚舉除草之器以芑之。若水盡寫，不得謂之涉。」案：江說是也。云「杜子春讀蕩爲和蕩」者，段玉裁云：「和蕩如滌器之盪，搖動而令之去也。」云「謂以溝行水也」者，《釋名·釋言語》云：「蕩，盪也，排盪去穢垢也。」以溝行水，亦排盪使去，故謂之蕩水也。云「玄

謂偃豬者，畜流水之陂也。者，後鄭從先鄭說以豬爲偃豬，而申其義。《書·禹貢》「滎波既豬」，孔傳釋爲「遏豬」，遏偃一聲之轉。《書釋文》又引馬融云：「水所停止深者曰豬。」《水經·涑水》酈注云：「水澤所聚謂之都，亦曰豬。」《宮人》注云：「偃豬謂雷下之池，受畜水而流之者。」與此事異而義同。凡五溝皆以通水，此豬則以雍障停畜，故云畜流水之陂也。《廣雅·釋地》云：「陂，池也。」《月令》注云：「畜水曰陂。」偃，詳《宮人》疏。云「防，豬旁隄也」者，《說文·自部》云：「防，隄也。隄，唐也。」《月令》，季春「脩利隄防」。鄭意隄防所以障止水，使蓄於豬而不外泄，故經云以防止水。防字俗作坊，《經解》云：「坊止水之所自來。」《郊特牲》「蜡祭坊與水庸」。水庸即蕩水之溝也。防，詳《匠人》疏。江永云：「後鄭解防字未確。此職專掌稼下地，凡下地常憂潦，田間之水欲其易出，外流之水欲其不入。以豬畜水，所以分減內水也；以防止水，所以堵截外水也。」《匠人》云：「凡行奠水，磬折以參伍，欲爲淵則句于矩。」此豬即所謂淵也。於溝中作之，視其地勢，句曲過於矩之處，掘深之，令水洄復畜聚於此而成淵。溝中爲淵之處多，則田中之水減矣。下地常濱大川大澤，必爲隄以闌之，今江南之圍田是也。後鄭解爲豬旁隄，則是陂塘之隄，

畜水以備灌溉，此平原憂旱之地，非下澤憂潦之地矣。」案：江說是也。云「遂，田首受水小溝也」者，即《遂人》云「夫間有遂」是也。匠人爲溝洫，田首廣二尺，深二尺，謂之遂，故云田首受水小溝，五溝以遂爲最小也。云「列，田之畦埒也」者，《莊子·天地篇·釋文》引李頤云：「埒中曰畦。」《楚辭·招魂》王注云：「畦，區也。」《廣雅·釋丘》云：「埒，厓也。」埒即埒之俗。田中爲區畛，厓畔分列，故謂之列。《說文·土部》云：「塍，稻田畦也。」列蓋即塍。程瑤田謂即畝，亦是也。沈夢蘭謂《大戴禮·主言篇》云：「三井而句烈。」烈通作列，水道也，即此以列舍水，言三井而一溝也。案：沈說可備一解。但井田之法，三夫共一遂，九夫共一溝，此經溝遂列並出，則列非即溝遂也。《大戴》所言，與井田溝洫兩制並不相應，所未詳也。云「澮，田尾去水大溝」者，即《遂人》云「千夫有澮」是也。《匠人》云：「同間廣二尋，深二仞，謂之澮。」溝洫之法，始於遂，終於澮，澮則達川矣。對遂爲田首小溝言之，故云田尾大溝。五溝自遂注溝，自溝注洫，自洫注澮，自澮注川。此經唯舉遂溝澮而無洫者，洫亦畛於溝澮也。云「作猶治也」者，《說文·人部》云：「作，起也。」引申爲治作。《淮南子·主術訓》高注云：「治猶作也。」云「開遂舍水於列中，因涉之，揚

去前年所芟之草，而治田種稻」者，此破先鄭說也。《司戈盾》注云：「舍，止也。」後鄭意，此芟即下文「夏以水殄草而芟夷之」之芟，謂開遂放水，使人止於田畦埒，因涉水，播揚前年夏所芟之宿草，而後可以治田種稻也。《詩·王風》、《唐風》並云「揚之水」，箋云：「波流湍疾，洗去垢濁。」此揚與《詩》義略同，皆激揚播盪之意。依先鄭說，則田故有水，寫之令出，而後可以芟新生之草；依後鄭說，則田故無水，放之令人，而可以播揚所已芟之宿草。二說迥異。凡稼澤，夏以水殄草而芟夷之。殄，病也，絕也。鄭司農說芟夷以《春秋傳》曰「芟夷蕞崇之」。今時謂禾下麥爲夷下麥，言芟刈其禾，於下種麥也。玄謂將以澤地爲稼者，必於夏六月之時，大雨時行，以水病絕草之後生者，至秋水涸，芟之，明年乃稼。【疏】「凡稼澤」者，謂農民於澤地受田而耕稼，即《角人》、《羽人》、《掌葛》之「澤農」是也。云「夏以水殄草而芟夷之」者，夷，唐石經及各刻本並作「蕞」，《釋文》同。惟宋婺州本及明錢求赤所藏宋本、宋注疏本作「夷」，與注及《雜氏》文合，今據正。此亦謂澤地必先芟草，乃可種稻，與雜氏爲官聯。雜氏夏夷秋芟，分屬二時，此不分者，通言之其義同也。注云「殄，病也，絕也」者，《國

語·魯語》云：「固民之殄病是待。」殄即病也。又《越語》云：「疾殄貧病。」《詩·大雅·雲漢篇》「胡寧殄我以旱」，①箋云：「殄，病也。」《釋文》：「殄，《韓詩》作疹。」殄與疹，聲類並相近。又《爾雅·釋詁》云：「殄，絕也。」故鄭兼二義爲釋。凡陸艸不耐濕，故可以水病絕之。《毛詩·曹風·下泉》傳云：「稂，童粱，非溉草，得水而病。」亦其義也。云「鄭司農說芟夷以《春秋傳》曰，芟夷蕞崇之」者，隱六年《左傳》云：「鄭伯請成於陳，陳侯不許，五父諫曰：『周任有言曰：爲國家者見惡，如農夫之務去草焉，芟夷蕞崇之，絕其本根，勿使能殖。』」杜注云：「芟，刈也。夷，殺也。蕞，積也。崇，聚也。」先鄭引彼證此經芟夷即刈草，義與杜同。《說文·艸部》云：「發，以足蹋夷艸。」《春秋傳》曰：「發夷蕞崇之。」據《說文》，則許所見《左傳》古文作「發夷」。據先鄭此注，則所見《左傳》自作「芟夷」，與此職及《肆師》、《雜氏》諸文同。許、鄭本自不同也。芟夷，互詳《秋官·敘官》及《雜氏》疏。云「今時謂禾下麥爲夷下麥，言芟刈其禾，於下種麥也」者，亦證夷爲刈草之義。段玉裁云：「司農於《雜氏》曰：『今俗閒謂麥下爲夷下，言芟夷其

①「早」原訛「早」，據楚本改。

麥，以其下種禾豆也。」文互相足。」云「玄謂將以澤地爲稼者，必於夏六月之時，大雨時行，以水病絕草之後生者」者，據《月令·季夏》云：「大雨時行，燒薶行水利以殺草，如以熱湯。」明以水殄草必在六月也。凡殺草，蓋於夏初先芟夷之，《薙氏》所謂「夏日至而夷之」。《管子·度地篇》亦云「大暑至，利以疾薶殺草薶」是也。芟夷之後，恐有復生者，故於六月更行水以病絕之，故云絕病草之後生者也。江永云：「夏月草盛長，乘其水熱殄草之時芟夷之，則根易絕，明年可稼也。」案：此即《薙氏》所謂以水火變之也，詳彼疏。云「至秋水涸，芟之，明年乃稼」者，此謂夏以水殄草之後，如尚有未殄之草，則秋時水涸更芟之，此第二次芟也。既經水殄，復有此二芟，則無不殄之草，則土亦肥，故明年可稼也。澤草所生，種之芒種。鄭司農云：「澤草之所生，其地可種芒種。芒種，稻麥也。」【疏】注鄭司農云「澤草之所生，其地可種芒種」者，賈疏云：「但水鍾曰澤，有水及鹹鹵，皆不生草，即不得芒種，故云草所生。」云「芒種，稻麥也」者，《說文·艸部》云：「芒，草耑。」芒種，謂有芒束之種也。《漢書·東方朔傳》顏注云：「稻，有芒之穀總稱也。」《說文·麥部》云：「麥，芒穀，秋種厚薶，故謂之麥。」《來部》云：「來，周所受瑞麥來粦，一來二縫，象芒束

之形，天所來也。」《詩·周頌·思文》孔疏引鄭《書·大誓》注云：「《禮說》曰『武王赤烏穀芒應』，穀蓋牟麥也。」案：麥宜於陸地，而亦有宜於澤地者，故《孝經》敍《邢疏》引鄭《孝經注》云：「下田宜稻麥。」《公羊》昭元年何注亦云「隰宜麥」。^①九穀之菰，亦宜澤地，經不言者，以菰非常用之穀，所種較稻麥爲少，文不具也。旱暵，共其零斂。稻人共零斂，稻急水者也。鄭司農云：「零事所發斂。」【疏】「旱暵，共其零斂」者，《舞師》注云：「暵，熱氣也。」《司巫》注云：「零，旱祭也。」案：禮有正零，有旱零，經云旱暵，則謂夏五月、六月、七月遇旱而零，非四月之正零。正零之財用，取之官，不斂於民。賈疏謂旱零及四月龍見而零，二種零皆供零斂，非也。一零禮，詳《司巫》疏。注云「稻人共零斂，稻急水者也」者，《月令》孔疏引服虔《左傳注》云：「零，遠也，遠爲百穀祈膏雨。」是零之爲祭，兼爲百穀。而稻爲水穀，待水尤急，故此官特共旱零之斂也。鄭司農云「零事所發斂」者，脩零所需財用，官不能盡共，則斂之民，故曰零斂。《晏子春秋·諫上篇》云：「齊大旱逾時，景公召羣臣問曰：『天不雨久矣。吾使人卜，云祟在高山廣水。

① 「昭」原訛「定」，據《公羊傳》改。

寡人欲少賦斂以祠靈山，可乎？」殆即所謂零斂矣。喪

紀，共其葦事。葦以闔墻，禦濕之物。【疏】「喪紀，共

其葦事」者，此因掌稼澤，并使共澤艸，與澤虞爲官聯也。

注云「葦以闔墻，禦濕之物」者，《說文·艸部》云：

「葦，大葭也。」《大戴禮記·夏小正傳》云：「葦，未莠爲

蘆。」案：葦即今之蘆，互詳《司几筵》疏。《掌蜃》「共闔墻

之蜃」，注云：「闔猶塞也。將井椁，先塞下以禦濕也。」賈

疏云：「鄭言禦水之物，則在棺下用之。或以抗席即是禦

土，與禦水義乖，恐非也。」案：據《澤虞》注，則抗席蓋用

蒲，不用葦，賈駁或說是也。然《司几筵》云：「凡喪事設葦

席。」注云：「喪事，謂凡奠也。」則喪奠自有葦席，但非入墻

之抗席耳。又《既夕記》有葦苞，以苞牲體。此共葦事，當

亦兼共席苞之材，鄭不備舉耳。

土訓掌道地圖，以詔地事。道，說也。說地

圖，九州形勢山川所宜，告王以施其事也。若云荆揚地宜

稻，幽并地宜麻。【疏】「掌道地圖」者，地圖即《司書》、《大

司徒》「土地之圖」，《職方氏》「天下之圖」，彼藏其書，此官

則爲王道之，與彼爲官聯也。

注云「道，說也」者，《廣

雅·釋詁》同。《毛詩·鄘風·定之方中》傳，說大夫九能，

云「山川能說」，即其義。云「說地圖九州形勢山川所宜，告

王以施其事也」者，九州形勢山川所宜，若《職方氏》所述各

州山鎮、澤藪、川浸及畜穀所宜之屬。《大宰》注云：「詔，

告也。」施其事，謂施職貢之事，與《小司徒》、《載師》、《均

人》諸職「地事」義異。賈疏云：「其九州地圖乃是諸國所

獻，以入職方。今土訓乃於職方取九州地圖，依而說向王，

使依而責其貢獻之物。」云「若云荆揚地宜稻，幽并地宜麻」

者，《釋文》云：「麻，一本作糜。李及聶氏亡皮反。劉、沈

皆作糜，音紀倫反。案：注辨土所宜，荆揚皆言穀，幽并不

應論獸，「紀倫」之音恐非。」段玉裁云：「以李、聶之反語訂

之，則當云「一本作糜」也。糜從黍，麻聲，或省作糜，是以誤

糜。」程瑤田云：「此糜字必糜字之譌。蓋注所謂「若云」

者，實據《職方氏》。《職方》荆、揚但云宜稻，與此注合。而

幽州宜三種，并州宜五種，注皆有黍無麻，是麻當作糜。

《說文》：「黍，禾屬而黏者也。糜，稌也。」禾屬而黏者黍，

禾屬而不黏者糜，對文異，散文則通稱黍，糜即謂黍，二字

可互通也。」案：段、程說是也。道地慝，以辨地物

而原其生，以詔地求。地慝，若障疊然也。辨其物

者，別其所有所無。原其生，生有時也。以此二者告王之

求也。地所無及物未生，則不求也。鄭司農云：「地慝，地所生惡物害人者，若虺蜮之屬。」【疏】注云「地慝，若障蠱然也」者，賈疏云：「謂土地所生惡物，障即障氣，出於地也；蠱即蠱毒，人所爲也。」詒讓案：《玉篇·犴部》云：「瘴，瘴癘也。」古止作「障」。《三國志·公孫瓚全琮傳》，日南、蒼梧、南海並有障氣是也。蠱，詳《庶氏》疏。云「辨其物者，別其所有無」者，謂辨地所有善物也。《天官·敘官》注云：「辨，別也。」善物此有彼無，若《職方》九州之利，皆當別而志之。《尚書大傳》云：「太子十八曰孟侯，於四方諸侯來朝，迎於郊，問其土地所生美珍怪異，人民之所好惡，山川之所有無。」與此辨地物原其生之事略同。云「原其生，生有時也」者，原，猶察度也。《墨子·非命上篇》云：「原察百姓耳目之實。」賈疏云：「雖是當州所有，而生有時也。」云「以此二者告王之求也」者，《淮南子·俶真訓》高注云：「求，索也。」《國語·周語》云：「阜其財求。」此謂王於九貢之外，特有所求，若《春秋》王使求金求車之屬，必依地所有，時所生也。云「地所無及物未生，則不求也」者，謂其地所不產及非其時，則王不得妄求。《禮器》云：「天時有生也，地理有宜也，故天不生，地不養，君子不以為禮。」亦其義。鄭司農云「地慝，地所生惡物害人者，若虺蜮

之屬」者，《胥師》注云：「慝，惡也。」《爾雅·釋魚》云：「虺蜮博三寸者，大如擘。」《說文·虫部》云：「虫，一名蜮，博三寸，首大如擘指。」蜮即虫之借字，蜮與障蠱同爲地所生惡物，二鄭義足互相備。王巡守，則夾王車。巡守，行視所守也。天子以四海爲守。【疏】「王巡守則夾王車」者，此與誦訓爲官聯也。夾王車者，從行備顧問。《既夕禮》注云：「在左右曰夾。」巡守，王行在道，此官則左右夾王車而行，猶旅賁氏掌執戈盾，夾王車而趨也。注云「巡守，行視所守也，天子以四海爲守」者，《說文·辵部》云：「巡，視行兒。」《儀禮經傳通解續》引《尚書大傳》鄭注云：「巡，行也，視所守也。天子以天下爲守。」與此注同。守字或作「狩」，《孟子·梁惠王篇》云：「晏子曰：天子適諸侯曰巡狩。巡狩者，巡所守也。」《公羊》隱八年，何注云：「巡猶循也，守猶守也，循行守視之辭。」《風俗通義·山澤篇》云：「巡者循也，狩者守也，道德大平，恐遠不同化，幽隱有不得所者，故自親行之也。」《白虎通義·巡狩篇》云：「王者所以巡狩者何？巡者循也，狩者牧也，爲天下循行守牧民也。」《文選·東都賦》李注引《禮記》、《逸禮》說同。此並以巡爲循，又以守爲牧，皆別爲一義。鄭謂所守者，即指四海爲王自所守之地言之。《書·舜典》僞孔傳

云：「諸侯爲天子守土，故稱守，巡行之。」《左》莊二十一年傳云：「王巡號守。」並以守據諸侯守土言之，此與鄭訓同，而義小異。賈疏謂巡守中，含諸侯爲天子守土，天子自守天下二義，非鄭意也。巡守年歲，詳《大行人》疏。

誦訓掌道方志，以詔觀事。

說四方所識久遠之事，以告王觀博古。所識若魯有大庭氏之庫，殺之二陵。【疏】注云「說四方所識久遠之事，以告王觀博古」者，亦訓道爲說，詔爲告也。方志，即《外史》四方之志，所以識記久遠掌故。外史掌其書，此官則爲王說之，告王使博觀古事，二官爲聯事也。志識字同，詳《小史》及《保章氏》疏。云「所識若魯有大庭氏之庫，殺之二陵」者，賈疏云：「《左氏傳》昭十八年：『宋、衛、陳、鄭皆火，梓慎登大庭氏之庫以望之。』」注云：「大庭氏，古亡國之君，在黃帝前。其處高顯。」案：賈引《左傳》注，據服義也。杜注云：「大庭氏，古國名，在魯城內，魯於其處作庫。」孔疏云：「先儒舊說，皆言炎帝號神農氏，一曰大庭氏。服虔云在黃帝前，鄭玄《詩譜》云：『大庭氏在軒轅之前。』亦以大庭爲炎帝也。」又僖三十二年傳：「秦蹇叔曰：『殺有二陵焉。其南陵，夏后

皋之墓也；其北陵，文王之所辟風雨也。」杜注云：「殺在弘農澠池縣西。大阜曰陵。皋，夏桀之祖父。」此並四方所識久遠之事，若後世地志所謂古蹟，誦訓所道亦其類也。掌道方慝，以詔辟忌，以知地俗。方慝，四方言語所惡也。不辟其忌，則其方以爲苟於言語也。知地俗，博事也。鄭司農云：「以詔辟忌，不違其俗也。《曲禮》曰：『君子行禮，不求變俗。』」【疏】「掌道方慝，以詔辟忌」者，此亦詔王也。《國語·楚語》左史倚相述衛武公曰：「倚几有誦訓之諫」，即此官也。韋注以誦訓爲工師之諫，書之於几，失之。

注云「方慝，四方言語所惡也」者，亦訓慝爲惡也。四方各有鄙惡之語，爲人所惡，故謂之方慝也。惠士奇云：「《王制》：『大史典禮，執簡記，奉諱惡。』蓋四方所諱所惡，謂之方慝。」云「不辟其忌，則其方以爲苟於言語也」者，辟與避同。《韓詩外傳》云：「指緣謬辭謂之苟。」謂王言若不辟其方之忌，則聞者將竊議其言之苟謬。若《大戴禮記·保傳篇》云：「天子荅遠方諸侯，不知文雅之辭」是也。云「知地俗，博事也」者，上詔觀事，是博古事；此知地俗，是博今事也。鄭司農云「以詔辟忌，不違其俗也」者，《曲禮》云：「人竟而問禁，入國而問俗，入門而問諱。」注云：「俗，謂常所行與所惡也。」此辟忌，即謂方俗所

惡，故告之，使不違。引《曲禮》曰「君子行禮，不求變俗」者，證不違其俗之事，詳《土均》疏。王巡守，則夾王車。【疏】「王巡守則夾王車」者，與土訓爲官聯也。

周禮正義卷三十一

山虞掌山林之政令，物爲之厲而爲之

守禁。物爲之厲，每物有蕃界也。爲之守禁，爲守者設禁令也。守者，謂其地之民占伐林木者也。鄭司農云：「厲，遮列守之。」【疏】「掌山林之政令」者，山林之地，有任農授地，取卅伐材及田獵征賦，此官皆掌其政令也。賈疏云：「案下文，林自有衡官掌之，今《山虞》兼云林者，彼林是竹木生平地者，林衡掌之；此山林并云者，自是山內之林，卽山虞兼掌之。」云「物爲之厲而爲之守禁」者，明山林等皆設守也。《林衡》、《川衡》並云「平其守」，《澤虞》云「使其地之人守其財物」，卽《大司徒》、《小司徒》、《均人》、《土均》所謂「地守」也。江永云：「凡山林川澤，皆國所有。使其地之人各占其地，種蓀草木，長養魚鼈，卽九職中虞衡之民，是謂之守，而官爲之禁令。當取物之時，各入其物，以爲地職之貢，《閭師》所謂「任衡以山事貢其物，任虞以澤事貢其物」者也。人貢之餘，卽是民所自有，猶必令其取物有

時，取之有節。若官自取物，不在禁限。此二虞二衡之通法也。」注云「物爲之厲，每物有蕃界也」者，蕃，藩之借字。每物各就其地爲蕃籬界限，使人不得妄入。《國語·

晉語》韋注云：「蕃，籬落也。」賈疏云：「但山內林木、金玉、錫石、禽獸所有，不問每物，各有蕃界，設禁亦不同。」云「爲之守禁，爲守者設禁令也」者，謂侵蕃界、違時日及焚萊諸事，並有誅罰，設爲禁令也。《管子·立政篇》云：「脩火憲，敬山澤林藪積草，天財之所出，以時禁發焉，使足於宮室之用，薪蒸之積，虞師之事也。」《荀子·王制篇》說略同。

云「守者，謂其地之民占伐林木者也」者，賈疏云：「案下《澤虞職》云：『使其地之人，守其財物，以時入之于玉府，頒其餘于萬民。』」彼是其地之民，^①占取澤物者守之，明此山虞所守亦然。是以此下文亦「令萬民時斬材，有期日」，明是守山林之人也。」詒讓案：占，卽《大宰》注所謂「占會百物」。占伐林木，謂民有隱度林木之多少，入貢於官，伐賣之而取其贏者也。官既以林木授占伐之民，因使自守其地，是謂之守。鄭司農云「厲，遮列守之」者，惠士奇云：

「厲，古列字，《玉藻》所謂「山澤列而不賦」也。古厲列同

① 「彼」原作「使」，據《周禮注疏》改。

音，列山氏一作厲山氏。《詩》「垂帶如厲」，《左傳》「鞶厲游纓」，康成皆訓厲爲裂。漢《郊祀歌》「泄萬里」，晉灼曰：「泄，古迺字，讀爲厲。」阮元云：「《說文》「辵部」作迺，迺者遮也。列厲皆段借字。」案：惠、阮二說是也。《續漢書·輿服志》云：「遮列出入。」《文選·赭白馬賦》李注引《通俗文》云：「天子出，虎賁伺非常，謂之遮迺。」後鄭《玉藻》注亦云：「列之言遮列也。」《典祀》、《墓大夫》注，並訓厲爲遮列。《司隸》注又作「遮例」。列字亦作烈，《詩·鄭風·大叔于田》「火烈具舉」，毛傳云：「烈，列也。」《孟子·滕文公篇》云：「益烈山澤而焚之。」迺、厲、列、例、烈，並通。

仲冬斬陽木，仲夏斬陰木。鄭司農云：「陽木，春夏生者。陰木，秋冬生者，若松柏之屬。玄謂陽木，生山南者；陰木，生山北者。冬斬陽，夏斬陰，堅濡調。」

【疏】「仲冬斬陽木，仲夏斬陰木」者，仲當作中，凡經注「四中」字例皆作「中」，不作「仲」。《輪人》注約此經亦作中可證。石經及各本並誤。以下斬木材之法，卽山虞之官法，林衡亦受焉。《檀弓》注云：「斬，伐也。」

注鄭司農云「陽木春夏生者，陰木秋冬生者」者，《文選·閒居賦》李注引《神農本草》云：「春夏爲陽，秋冬爲陰。」後鄭《王制》注說同，故先鄭以春夏生爲陽木，秋冬生爲陰木。云「若松柏

之屬」者，據秋冬生之木而言。賈疏云：「後鄭不從者，案《月令》，十一月日短至，伐木取竹箭。竹箭秋冬生，不用仲夏斬之，故知先鄭之義非也。」云「玄謂陽木生山南者，陰木生山北者」者，《柞氏》注義同。此破先鄭以四時分陰陽之說。《穀梁》僖二十八年傳云：「水北爲陽，山南爲陽。」范注云：「日之所昭曰陽。」《說文·阜部》云：「陰，闇也。水之南，山之北也。」《山海經·南山經》郭注云：「山南爲陽，山北爲陰。」《爾雅·釋山》云：「山西曰夕陽，山東曰朝陽。」若然，生山南及東西，通得爲陽木，唯生山北者爲陰木矣。云「冬斬陽，夏斬陰，堅濡調」者，阮元云：「《釋文》：『堅濡，戚如充反，又音柔。』案：據戚衰音如充反，則『濡』本作『栗』。《考工記》『需』字如充反，陸氏皆本戚音。又音柔，則仍濡字之音。」案：阮說是也。此濡與栗同。《說文·人部》云：「便，弱也。」其字俗又作輓，戚音得之。《詩·大雅·桑柔》箋，亦有「柔濡」之語，則濡不當讀柔明矣。《弓人》「厚其帑則木堅，薄其帑則需」。彼需當作栗。此云「堅濡」，猶彼云「堅栗」也。凡從需聲栗聲字，經注多互譌，詳《輶人》、《鮑人》疏。後鄭意，冬夏斬木違其時，則木或過堅強，或過濡弱，恐不任用；惟各依時斬之，則堅濡適調。《呂氏春秋·仲冬紀》高注謂「是月竹木調切」，亦此

義也。凡服耜，斬季材，以時人之。季猶釋也。

服與耜宜用釋材，尚柔刃也。服，牝服，車之材。【疏】「凡服耜斬季材」者，耜即車人所爲耒也。耒長六尺六寸，以木爲之。耜爲耒頭之金，則不用木，而云斬季材者，通言之耒亦得稱耜也。耒與服，用材大小同，故於《考工》同屬車人，互詳彼疏。云以時人之者，人之工官車人等也。賈疏云：「以其須堅，故須依上文仲冬、仲夏之時也。」注云「季猶釋也」者，《說文·子部》云：「季，小偁也。」《禾部》云：「釋，幼禾也。」《廣雅·釋詁》云：「季，稚，少也。」釋稚古今字。云「服與耜宜用釋材，尚柔刃也」者，服與耜，材小而用勞，故尚柔刃也。賈疏云：「二物皆須堅刃，故斬季材少木爲之。」刃，《釋文》作忍，段玉裁云：「刃，韌古今字。賈疏作『堅刃』，是賈本作刃也。岳本因之。陸本作忍。《考工記》注：『則刃白且明也。』亦疏作刃，《釋文》作忍。」論讓案：

《輶人》：《車人》注，「堅刃」字亦作刃，與此同。《一切經音義》引《字林》云：「韌，柔也。」《詩·鄭風》釋文以韌爲正字，但《說文》無此字，漢人皆段「忍」「刃」字爲之。鄭此注，今本刃忍錯出。《月令》注云「柔刃」，《詩·小雅·白華》、《大雅·抑》箋並云「柔忍」。又《易·革》王弼注作「堅刃」，《呂氏春秋·仲冬紀》高注作「調韌」。蓋本無正字，故諸書

互異矣。云「服，牝服，車之材」者，《車人》：「牝服二柯有參分柯之二」，注云：「牝服長八尺，謂較也。」鄭司農云：「牝服，謂車箱，服讀爲負。」《詩·小雅·大車》云：「不以服箱。」毛傳云：「服，牝服也。」《既夕禮》：「賓奠幣於棧左服」，注云：「服，車箱。」是牝服可省稱服，即大車較閒木，其圓徑蓋當與與人駟馬車較圍略同，故亦以釋材爲之，亦詳《車人》疏。令寓民時斬材，有期日。時斬材，斬材之時也。有期日，入出有日數，爲久盡物。【疏】注云「時斬材，斬材之時也」者，賈疏云：「案《禮記·王制》云：『草木零落，然後入山林。』彼據萬民伐木之時，謂十月之中。此云萬民時斬材，亦謂十月時。」云「有期日，入出有日數，爲久盡物」者，謂依其所用木之多少，爲其出入山之日數，恐其逾期多采，則財物罄盡，故爲期限以節之。凡邦工入山林而掄材，不禁。掄猶擇也。不禁者，山林國之有，不拘日也。【疏】「凡邦工入山林而掄材，不禁」者，邦工，謂國之工事，若匠人建國營國之屬，須用木材者也。賈疏云：「上文云『仲冬斬陽木，仲夏斬陰木』，彼據堅刃之極時。但國家須材，不要在仲冬、仲夏，故此邦工入山林不禁。又不言時節，須即取足之故也。」注云「掄猶擇也」

者，《說文·手部》云：「掄，擇也。擇，東選也。」《國語·齊語》「論比協材」，韋注云：「論，擇也。」論與掄通。案：注云「猶」，則鄭以擇爲引申段借之義，非其本義，蓋與許異。云「不禁者，山林國之有不拘日也」者，《釋文》云：「拘，本亦作佺。」案：《說文·人部》云：「佺，務也。」於義無取，或本非。賈疏云：「此對萬民不得非時人，人又有日數。」春秋之斬木不入禁，非冬夏之時，不得人所禁之中斬木也。斬四野之木可。【疏】「春秋之斬木不入禁」者，禁即

上文之厲，謂山林遮列之處。以其地有守禁，因稱之爲禁也。注云「非冬夏之時不得人所禁之中斬木也」者，

《周書·大聚篇》云：「禹之禁，春三月，山林不登斧，以成草木之長。」謂春不斬木也。《月令》：孟春，禁止伐木。季夏，樹木方盛，乃命虞人人山行木，毋有斬伐。注云：「爲其未堅刃也。」案：此經秋斬木不入禁中，夏得斬陰木，彼季夏禁斬伐者，季夏與秋時相接，秦法與周略同。賈疏云：「上經云『邦工入山林不禁』，此又云『春秋之斬木不入禁』，與上違者，上文據國家使工取擇木，故非冬亦得入山林；此據萬民取木，故十月入山，春秋之斬木不入禁。」云「斬四野之木可」者，四野平地所生之木，既無厲禁，故春秋

亦得人斬也。賈疏云：「雖斬四野木，至於三月，不得伐桑柘，故《月令》季春云『無伐桑柘』，彼注『愛蠶食也』。」凡竊木者，有刑罰。竊，盜也。【疏】「凡竊木者有刑罰」者，賈疏云：「此謂非萬民入山之時，而民盜山林之木，與之以刑罰。」詒讓案：萬民入山之時，占伐林木者各有部界，越界私伐者，亦爲竊也。注云「竊，盜也」者，《廣雅·釋詁》同。《說文·穴部》云：「盜，自中出曰竊。」《書·微子》陸氏《釋文》引馬融《書注》云：「往盜曰竊。」若祭

山林，則爲主，而脩除且蹕。爲主，主辨護之也。脩除，治道路場壇。【疏】「若祭山林則爲主」者，即《大宗

伯》「以狸沈祭山林川澤」是也。此山虞爲主者，謂就山林而祭之。其四望總祭五嶽，四鎮兆於四郊，自有祭有司主之，非山虞所職。賈疏云：「此山林在畿內王國四方，各依四時而祭，主謂主當祭事者也。」云「而脩除且蹕」者，賈疏云：「謂掃除糞灑，且復蹕止行人也。」注云「爲主主辨護之也」者，賈疏云：「案《中候握河紀》堯受《河圖》云：『帝立壇，磬折西向，禹進迎，舜、契陪位，稷辨護。』注云：『辨護者，供時用，相禮儀。』則此云辨護者，亦謂共時用相禮儀者也。」案：賈引《中候》注，義尚未核。辨即今之辨治

字，《漢書·李廣傳》顏注云：「護謂監視之。」此辨護，亦謂辨治監視其事，不定供用相禮也。《墨子·號令篇》云：「養吏一人，辨護諸門。」《公羊》宣十五年，何注云：「其有辨護伉健者爲里正。」辨辯字同。《說文·辨部》云：「辨，治也。」於義亦通。是辨護並辨治監視之謂也。云「脩除，治道路場壇」者，《檀弓》注云：「脩猶治也。」又《曲禮》注云：「除，治也。」是脩除並有治訓。賈疏云：「案《守祧職》云：『其廟則有司脩除之。』鄭云『有司恒主脩除』。謂掃除糞灑。場謂墀，即除地之處。壇，神位之所也。」詒讓案：祭山林亦爲壇墀營兆。《管子·侈靡篇》云「若樊神山祭之」是也。若大田獵，則萊山田之野，及弊田，植虞旗于中，致禽而珥焉。萊，除其草萊也。弊田，田者止也。植，猶樹也。田止樹旗，令獲者皆致其禽而校其耳，以知獲數也。山虞有旗，以其主山，得畫熊虎，其仞數則短也。鄭司農云：「珥者，取禽左耳，以效功也。」《大司馬職》曰：「獲者取左耳。」【疏】「若大田獵則萊山田之野」者，賈疏云：「言大田獵者，謂王親行。若田在山，則山虞芟萊草木於可陳之處。」云「及弊田，植虞旗于中，致禽而珥焉」者，此與獸人、甸祝爲官聯也。依鄭義，此旗不注

羽，與《澤虞》「虞旌」異。今攷虞旌亦當爲熊旗，則此旗或亦有注羽，兩經互文見義耳。疑不必以山澤異物也。賈疏云：「使民得禽牲者望見之，致禽於其所。」注云「萊，

除其草萊也」者，《王制釋文》引庾氏云：「萊，草也。」引申之，凡芟草焚草通謂之萊，詳《縣師》疏。山田之野，其地廣博，山虞於其外芟草，以爲田之大界。《毛詩·小雅·車攻》傳云「田者大艾草以爲防」是也。其防之中，擬田獵處不芟，惟於防南別除地三四百步，其中爲四表之地，南北二百五十步，東西廣各容三軍，以爲教戰列陳之頃。此萊野蓋兼彼二者而言之，賈疏偏據除教戰之地爲釋，疏矣。詳《大司馬》疏。又此萊野，謂芟草，與焚萊別，其焚萊亦山虞兼掌之。故《牧師》「凡田事贊焚萊」，注云「焚萊者山澤之虞」是也。《澤虞職》同。云「弊田，田者止也」者，《獸人》注云：「弊，仆也。仆而田止。」詳《大司馬》疏。云「植猶樹也」者，《田僕》注義同。《說文·木部》云：「植，戶植也。」引申爲凡樹立之義。《方言》云：「樹植，立也。燕之外郊，朝鮮洌水之間，凡言置立者，謂之樹植。」云「田止樹旗，令獲者皆致其禽而校其耳，以知獲數也」者，即《獸人》「云」及幣田令禽注于虞中，《田僕》云「及獻比禽」是也。既通注虞中，不知所獲孰多，故又各校其所取之左耳，以知其數而

計其功。云「山虞有旗，以其主山，得畫熊虎，其仞數則短也」者，賈疏云：「案《司常》云：『師都建旗，大夫士建物。』此山虞是士，不建物而建旗者，以其主山，山多熊虎，故得有旗。《禮緯》：『旌旗之杠，天子九仞，諸侯七仞，大夫五仞，士三仞。』若軍吏是卿大夫，則杠長五仞。今山虞是士，雖有熊虎爲旗，仞數則短，宜三仞。」案：賈兼據大司馬治兵，軍吏載旗爲釋也。蓋鄭意，此官既非師都，又非軍吏，而得建旗者，特取畫熊虎之義。今攷《大司徒》注，旗與期聲義同，故令虞官樹之田處以表獲，因謂之虞旗，猶鄉師以司徒之大旗致衆庶，遂人起野役亦然。蓋義取表事，與乘車建旗敍爵不同。又今攷定，廬物爲諸旗通制，則此虞旗，當卽熊旗之物。鄭、賈說似未塙。又賈引《禮緯》說旌旗之杠，天子以下仞數亦難信，詳《節服氏》、《輿人》疏。鄭司農云「珥者，取禽左耳以效功也」者，《獸人》注義同。《說文·刀部》云：「珥，斷耳也。」珥珥音義相近。賈疏云：「必取左耳者，以其聽鄉任左，故皆取左耳也。」又云「珥當爲珥」。案：賈蓋以此珥與《肆師》、《小子》、《羊人》、《士師》、《司約》、《犬人》諸珥字同。然彼爲釁禮之事，故鄭讀爲珥。此經珥爲斷耳，則與珥別。且珥珥有羊犬，則用家畜不用野牲，與田事之祭亦迴不相涉也。賈失之。引《大司馬職》曰

「獲者取左耳」者，證珥爲取禽左耳之事。

林衡掌巡林麓之禁令，而平其守，平其守

者，平其地之民，守林麓之部分。【疏】「掌巡林麓之禁令」者，麓，《釋文》作「禁」。案：禁卽麓之古文，詳《敍官》疏。賈疏云：「此林衡兼麓者，以《爾雅》山足曰麓，雖連於山，山虞不掌，以麓上有林，故屬林衡也。」案：山足曰麓，今《爾雅》無此文。賈《敍官》及《載師》、《柞氏》疏引並同，未詳所據。注云「平其守者，平其地之民，守林麓之部分」者，與《均人》、《土均》「均地守」義同。賈疏云：「部分，謂部伍有多少遠近之分也。」以時計林麓而賞罰之。計林麓者，計其守之功也。林麓蕃茂，民不盜竊則有賞，不則罰之。【疏】「以時計林麓而賞罰之」者，此林衡之官計也。注云「計林麓者，計其守之功也，林麓蕃茂，民不盜竊則有賞，不則罰之」者，據《山虞》云「凡竊木者有刑罰」，明不盜竊者有賞也。賈疏云：「林衡之官既平民之守，護林麓，而會計民有功者賞之，損麓之財者罰之。」若斬木材，則受灋于山虞，而掌其政令。法，萬民入出時日之期。【疏】「若斬木材，則受灋于山虞，而掌

其政令」者，賈疏云：「上山虞官尊，故設之，是以此林衡若斬木材，期於虞邊受焉。」

注云「法，萬民人出時日之期」者，此亦注用今字作「法」也。賈疏云：「案《山虞》云仲冬、仲夏、春秋，是時之期；號令萬民斬材有期日，是日之期也。」

川衡掌巡川澤之禁令，而平其守，以時

舍其守，犯禁者執而誅罰之。舍其守者，時案視

守者，於其舍申戒之。【疏】「掌巡川澤之禁令」者，《荀

子·王制篇》云：「污池淵沼川澤，謹其時禁，故魚鼈優多，

而百姓有餘用也。」即所謂川澤之禁也。賈疏云：「川注瀆

者皆是也。水鍾曰澤，澤與川不同官，今川衡兼云澤者，澤

與川連者，則川衡兼掌之。謂若濟水溢爲滎澤，滎澤則與

濟連，則管濟川者兼滎澤掌之，如此之類皆是。」云「而平其

守」者，亦謂平其地之民，守川澤者之部分也。注云

「舍其守者，時案視守者，於其舍申戒之」者，鄭意舍即守者

止宿之處，以案視守者於其舍，即謂舍其守也。賈疏云：

「此舍其守，謂川衡之官，時復巡行所守之民，當案視其所

守，守人當於其舍申重戒勅之也。」俞樾云：「如注義，則當

云「以時戒其守」，不當云「以時舍其守」，注義非也。舍猶置也。《廣雅·釋詁》：「捨，置也。」舍捨古通用。襄十四年《左傳》曰：「秦人竊與鄭盟，而舍戍焉。」此經舍字，與彼同義。舍戍即置戍，以時舍其守猶以時置其守也。案：俞說亦通。祭祀賓客，共川奠。川奠，籩豆之實，魚鱸蜃蛤之屬。【疏】「祭祀賓客共川奠」者，與獻人、醢人爲官聯也。《說文·丁部》云：「奠，置祭也。」引申之，凡薦羞通謂之奠，故賓客饗食亦得有川奠。《國語·魯語》云：「水虞講眾留，取名魚，登川禽，而嘗之寢廟。」韋注云「水虞掌川澤之禁」，則即謂川衡也。注云「川奠，籩豆之實，魚鱸蜃蛤之屬」者，謂川中所產之物可以共奠者，此官則共與籩人、醢人實之。賈疏云：「鄭此注皆據《醢人》及《籩人》而言。案：《籩人職》云：「朝事之籩，有膾鮑魚鱸。」《醢人》云：「饋食之豆，有蜃醢醢醢。」蜃醢是蛤，則魚鱸及蜃皆川中所生之物，故引證川奠也。具有羸醢，亦是川奠，故云「之屬」。

澤虞掌國澤之政令，爲之厲禁，使其地之人守其財物，以時入之于玉府，頒其餘于

萬民。其地之人占取澤物者，因以部分使守之。以時入之于玉府，謂皮角珠貝也。人之以當邦賦，然後得取其餘以自爲也。入出亦有時日之期。【疏】「掌國澤之政令」者，賈疏云：「案上《山虞》、《林衡》、《川衡》皆不言國，獨《澤虞》云『國澤』者，周公設經，二虞二衡，文有不同，皆是互見爲義故也。」云「爲之厲禁」者，亦謂遮列守之而設其禁也。云「以時入之于玉府，頒其餘于萬民」者，賈疏云：「亦據中所出，入玉府者多，故特言之，無妨山虞川衡之等亦入玉府，亦是互見其義也。」

注云「其地之人占取澤物者，因以部分使守之」者，謂近澤之人，隱度澤中所產財物而取之，澤虞因別其部分，使各守其所占之界，不得相侵越也。云「以時入之于玉府，謂皮角珠貝也」者，于注例當作「於」，各本並誤。據《獸人》云「皮毛筋角入于玉府」，《塵人》云「凡屠者斂其皮角筋骨入于玉府」，又《玉府》云「掌王之金玉玩好」。此四者，皆澤物之中器用者，故入之也。賈疏云：「但萬民入澤，雖無正文，案《王制》『獺祭魚，然後虞人入澤梁；草木零落，然後入山林』，則萬民入澤可同時。皮謂犀皮，角，麋角、犀角，珠出於蚌蛤，在澤，其貝亦出澤水，故知之也。」云「人之以當邦賦」者，據《角人》、《羽人》、《掌葛》，皆以所征當邦賦，即《大宰》九賦「八曰山澤之賦」，

亦即遂師入玉府之野賦。此官國澤財物入玉府，不云「當邦賦」，《角人》等以所征當邦賦，不云入玉府，亦皆互文見義，故鄭取彼爲釋。但依鄭《大宰》九賦注義，賦爲口泉，彼注云「各入其所有穀物以當賦泉之數」是也。實則九賦當爲地稅，非口泉。此經所云當邦賦者，賦又當兼地稅及力征言之，二者通得稱賦也。詳《大宰》疏。《王制》云「名山大澤不以封」，注云：「與民同財，不得障管，亦賦稅而已。」《月令》云「孟冬，乃命水虞漁師收水泉池澤之賦」，是山澤有常賦。《玉藻》云「年不順成，關梁不租」，明成年澤梁有租，與關市同，租即賦也。《大戴禮記·王言篇》云：「入山澤以時，有禁而無征。」《荀子·王制篇》亦云：「山林澤梁以時禁發而不稅。」《王制》則又云：「林麓川澤以時入而不禁。」諸文錯異，皆與此經不合，非周制也。云「然後得取其餘以自爲也」者，謂入賦之餘，所占取之人，乃得取以自爲也。云「入出亦有時日之期」者，賈疏云：「亦如《山虞職》所云也。」凡祭祀賓客，共澤物之奠。澤物之奠，亦籩豆之實，芹茆菱芡之屬。【疏】注云「澤物之奠，亦籩豆之實，芹茆菱芡之屬」者，此蒙上《川衡》《川奠》而言，亦共與籩人、醢人實之。賈疏云：「案《籩人職》，加籩之實有菱芡，《醢人》朝事之豆有茆菹，加豆之實有芹茆，是皆澤中

所出，故引證澤物之奠也。兼有深蒲、昌本之等，故云之屬。喪紀，共其葦蒲之事。葦以闔墻，蒲以爲席。

【疏】「喪紀，共其葦蒲之事」者，共葦，與稻人爲官聯也。

《周書·文傳篇》云：「潤澤不穀，樹之竹葦莞蒲。」《月

令》：「季夏，命澤人納材葦。」注云：「蒲葦之屬，此時柔刃可取作器物也。」彼謂歲時之常共，故有定時。此喪紀則據用時納之，不必季夏也。

注云「葦以闔墻」者，《稻人》

注同。云「蒲以爲席」者，《既夕禮》云：「抗木橫三縮三，加

抗席三。」《閒傳》云：「既虞，卒哭，芻剪不納。」注云：「芻，

今之蒲苴也。」又《裸記》云：「士轉蒲席以爲裳帷。」《司几

筵》有蒲筵，乃吉席，非喪紀所用，然亦當澤虞共之，經止舉

喪紀者，文不具也。蒲，詳《醢人》疏。若大田獵，則

萊澤野，及弊田，植虞旌以屬禽。屬禽，猶致禽

而珥焉。澤虞有旌，以其主澤，澤鳥所集，故得注析羽。

【疏】若大田獵則萊澤野者，凡王大田獵，必於大澤藪。

若西都則於弦蒲，岐陽石鼓文是其事也。東都則於圃田，

《詩·小雅·車攻》、《吉日》二篇是其事也。將田之前，此

官則於澤田之野，芟除野草爲田之大防，又於防中別除草

爲教戰之地，詳《山虞》疏。云「及弊田，植虞旌以屬禽」者，

此與獸人、甸祝爲官聯也。

注云「屬禽猶致禽而珥焉」

者，賈疏云：「案《山虞》『致禽』之義，謂輪之於公，當致之

於虞旗之中，而珥焉以效功。此云屬禽者，謂百姓致禽訖，

虞人屬聚之，別其等類，每禽取三十焉。若然，則致禽與屬

不同。而鄭云屬禽猶致禽者，鄭欲明《山虞》、《澤虞》文皆

不足，故互見爲義。」案：賈說是也。《甸祝》『致禽于虞中，

乃屬禽」。彼注云：「致禽於虞中，使獲者各以其禽來致於

所表之處。屬禽，別其種類。」是屬與致義小異。鄭言此

者，明致屬事相因，各舉一事，足以相駭耳。若《大司馬》

注，釋獻禽與致禽，屬禽爲一，則失之。詳彼疏。云「澤虞

有旌，以其主澤，澤鳥所集，故得注析羽」者，析羽爲旌，據

《司常》文。鄭意此澤虞用旌，與上山虞用旗不注羽異，明

以澤是鳥之所集，故依其事類，使建析羽之旌。又案：此

旌亦以熊虎之旗，而注析羽。凡五旗皆有注羽不注羽之

別，詳《司常》疏。

迹人掌邦田之地政，爲之厲禁而守之。

田之地，若令苑也。【疏】「掌邦田之地政」者，掌公私田獵

之地之政令也。與《均人》「地政」政爲征之借字異。云「爲

之厲禁而守之」者，賈疏云：「有禽獸之處，則爲苑囿，以材木爲藩籬，使其地之民遮厲守之。」

注云「田之地，若今苑也」者，此謂大田獵在近郊山澤多禽獸之處，與山虞、澤

虞所掌大田獵之地異也。《敘官·圉人》注云：「圉，今之苑。」漢時養鳥獸之地，通名爲苑，詳彼疏。

凡田獵者

受令焉。令，謂時與處也。【疏】「凡田獵者受令焉」者，

亦通公私小田獵者言之。凡王四中大田獵，皆在四孟時祭

之後，蓋止以給乾豆，不能給鮮也。其四時大祭祀、大賓客

有用鮮者，則臨時必於郊內苑囿，田取禽獸。公卿大夫以

逮庶民等，亦有小田獵之事。《月令》云：「仲冬，山林藪澤

有能田獵禽獸者，野虞教道之。」彼野虞卽山虞、澤虞，蓋此

官與彼同令之也。方苞云：《春秋傳》：鄭申豐將祭，請

田。子產曰：「唯君用鮮，衆給而已。」則公卿王子弟宜得

用鮮。凡田獵者，或王子弟公卿有宗桃之事，而王賜以

田；或喪紀、賓客、春秋之膳獻，有司時取，亦如斬材之有

期日。凡此類皆迹人令之。疏謂夏官主田獵者受令，非

也。四時鄉師出田法，致衆庶，以聽令於司馬，先期，虞人

萊所田之野，無受令於迹人之義。案：方說是也。

注

云「令謂時與處也」者，時謂田獵所宜及禽獸茁壯之時，與

《大司馬》大田定在四中月者異。處亦謂苑囿所在之地也。

禁麇卵者與其毒矢射者。爲其夭物且害心多也。

麇，麋鹿子。【疏】「禁麇卵者」者，賈疏云：「此謂四時常

禁。案《月令》孟春云：「不麇不卵。」又《曲禮》云「國君春

田不圍澤，大夫不掩羣，士不取麇卵」者，彼以春時生乳，特

禁之。」案：賈說是也。《庖人》「禽獻秋行犢麇」，士相見

禮《注》亦云「禮有秋獻麇」，則麇非不得取，但非時及它獸之

麇則有禁耳。云「與其毒矢射者」者，賈疏云：「其《月令》

季春云「餒獸之藥，毋出九門」者，彼亦崇其春時。彼鄭注

云：「凡諸罟及毒藥，禁其出九門，明其常有，時不得用

耳。」注云「爲其夭物且害心多也」者，《王制》云：「不

麇，不卵，不殺胎，不殀夭。」注云：「重傷未成物。殀，斷

殺。」此天與《王制》殀義同。賈疏云：「且害心多，釋毒矢

射者也。」云「麇，麋鹿子」者，《說文·鹿部》云：「麇，鹿子

也。《爾雅·釋獸》云：「麇其子麇，鹿其子麇。」是麇子別

名麇，此以麇爲麋鹿子者，對文則麇爲鹿子，散文則麋鹿子

通稱麇，《曲禮》孔疏云「麇乃鹿子之稱，而凡獸子亦得通

稱」是也。

升人掌金玉錫石之地，而爲之厲禁以守之。錫，釧也。【疏】「掌金玉錫石之地」者，江永云：「升

人與秋官職金聯事。升人掌金玉錫石之守禁，而職金受其入征，以入於諸府也。此不言丹青者，文不具。」詒讓案：

金，五金之總名，詳《職金》疏。彼職又有丹青，卽染石也。

又凡磬石、砭石及美石可飾佩器者，經言石，皆足以咳之

矣。地，其所產之處，若《職方氏》揚州金錫，荊州丹銀，雍

州玉石；及《書·禹貢》青州岱畎鉛怪石，徐州泗濱浮磬，

揚州金三品，又揚州瑤琨，荊州厲砥砮丹，豫州磬錯，梁州

鏐鐵銀鏤砮磬，雍州球琳琅玕之屬是也。云「而爲之厲禁

以守之」者，亦有藩界禁令。《管子·地數篇》云：「山有鐵

有銀者，謹封而爲禁。有動封山者，罪死而不赦；有犯令

者，左足入，左足斷，右足入，右足斷。」此所謂厲禁也。賈

疏云：「亦謂使其地之民遮護守之。」注云「錫，釧也」

者，丁晏云：「《爾雅·釋器》『錫謂之釧』，郭注『白鐵』。

《職方氏》注：『錫，鐵也。』《說文·金部》：『錫，銀鉛之間

也。釧，錫也。』《急就篇》顏注：『錫在銀鉛之間，卽今白鐵

也。』若以時取之，則物其地，圖而授之。物

地，占其形色，知鹹淡也。授之，教取者之處。【疏】注云

「物地，占其形色，知鹹淡也」者，淡，《釋文》作啖，云「本亦作淡」。案：啖卽淡之譌，陸本不足據。占其形色，與《載

師》「物地事」、《草人》「掌土化之濃以物地」義同。知鹹淡，

似言地土之鹹淡，然未詳其說云何。《管子·地數篇》云：

「伯高對黃帝曰：上有丹沙者，下有黃金；上有慈石者，下

有銅金；上有陵石者，下有鉛錫赤銅；上有赭者，下有

鐵；此山之見榮者也。」惠士奇云：「榮者，山之精神，徵爲

形色。占其氣，知其味，謂之物地。知鹹淡卽知金玉，金鹹

而玉淡，故洗金以鹽。」案：惠以鹹淡爲金玉，亦未知是否。

云「授之，教取者之處」者，《管子·地數篇》、《山海經·中

山經》、《廣雅·釋地》並云出銅之山四百六十七山，出鐵之

山三千六百九山，此取之之處也。升人既物地，而知金玉

錫石所生之處，乃以圖授其徒，教使取之。巡其禁令。

行其禁，明其令。【疏】注云「行其禁，明其令」者，《掌固》

注云：「巡，行也。」禁謂厲禁及禦止爭奪，令謂采取之政

法。升人主巡行其地，誅其違禁令者，使無失用而病民也。

角人掌以時徵齒角凡骨物于山澤之農，以當邦賦之政令。山澤出齒角骨物，大者犀象，

其小者麋鹿。【疏】「掌以時徵齒角凡骨物于山澤之農」者，山澤亦有可耕之土，其近地之民亦以率受田，是為山澤之農。《大宰》先鄭注以平地山澤為三農，即據此經為釋。山澤之農，受田而耕，或就地田獵畜牧，則有齒角骨物等之征也。賈疏云：「角人止應徵角物，兼言齒骨者，以其齒骨並是角類，以細小之事，因類兼掌之。」云「以當邦賦之政令」者，賈疏云：「言農，則皆有夫田出稅。今以此農近山澤，^①山澤有此骨角及齒，此三者國之所須，故使以時入採而稅之，以當地稅也。」江永云：「此為三農之職，別於虞衡，《閭師》言『貢九穀』者，正賦也，有他物亦可代之。」案江說是也。賈以經云山澤之農，故專據田稅言之，即九賦之地征也。實則此邦賦當兼有九職之力征，《閭師》注云「賦謂九賦及九貢」是也。而地征則夫田之外，或兼有占會山澤之地者，亦別科租稅。此數者，或征泉穀，或貢其物，大總言之，通謂之賦矣。下《羽人》、《掌葛》邦賦，義並同。至《大宰》「九賦」注，以賦為口泉，則非經義，詳彼疏。注云「山澤出齒角骨物」者，明經徵齒角骨物，必於山澤之農，因是其所出之地也。云「大者犀象，其小者麋鹿」者，犀及麋鹿皆有角，象則有齒，四者皆有骨物可用者，故特數之。以度量受之，以共財用。骨人漆浣者，受之以量。

其餘以度度所中。【疏】注云「骨人漆浣者，受之以量」者，段玉裁云：「浣當作坭，字之誤也。《說文·土部》云：『坭，以黍和灰丸而髹也。從土完聲。』許云灰者，謂骨灰也。《通俗文》：『燒骨以漆曰坭。』《巾車》注：『杜子春曰：軟讀為黍坭之黍，直謂髹黍也。』案：段說是也。王聘珍、曾釗、黃丕烈說同。黍坭蓋取碎骨以燒灰，故以量受之，較其多少而已，不度其長短也。云「其餘以度度所中」者，齒角骨物，長大者中為大器，短小者中為小器，故必以度度之。若《弓人》所云「角長二尺有五寸」之類，是其度也。

羽人掌以時徵羽翮之政于山澤之農，以當邦賦之政令。翮，羽本。【疏】「掌以時徵羽翮

之政于山澤之農」者，政，亦當讀為征。賈疏云：「此羽人所徵羽者，當入於鍾氏，染以為后之車飾及旌旗之屬也。」

注云「翮，羽本」者，《爾雅·釋器》云：「羽本謂之翮。」

郭注云：「鳥羽根也。」《說文·羽部》云：「羽，鳥長毛也。」

①「今」原訛「令」，據《周禮注疏》改。

翮，羽莖也。」案：翮卽鳥翼間長羽有莖者。《韓詩外傳》云：「夫鴻鵠一舉千里，所恃者六翮耳。背上之毛，腹下之毳，益一把，飛不爲加高，損一把，不爲加下。」是也。凡受羽，十羽爲審，百羽爲搏，十搏爲縛。審、搏、縛，羽數束名也。《爾雅》曰：「一羽謂之箴，十羽謂之縛，百羽謂之緼。」其名音相近也。一羽則有名，蓋失之矣。【疏】「凡受羽」者，山澤之農以羽來入，此官則受之也。

注云「審、搏、縛，羽數束名也」者，羽無度量可計，故入羽時以束計而受之。引《爾雅》曰「一羽謂之箴，十羽謂之縛，百羽謂之緼」者，《釋器》文。郭注云：「別羽數多少之名。」云「其名音相近也」者，段玉裁云：「謂箴與審、縛與搏、緼與縛皆相近也。」洪頤煊云：「《穆天子傳》郭璞注：『十羽爲箴，百羽爲縛，十縛爲緼。』見《周官》。《廣韻》注引《周禮》『百羽爲搏，十搏爲緼』。是箴審同聲字，搏當作縛，縛當作緼。《釋文》：『縛，劉音古本反。』劉昌宗本字作緼。」李鍾倫說同。俞樾云：「就本經論之，搏縛並從專聲，古音相同，乃以爲百羽千羽之異名，殊不可解。疑《周禮》原文本作十搏爲緼，蓋搏卽《爾雅》之縛，揮卽《爾雅》之緼，《爾雅》並從糸，《周禮》並從手也。鄭公孫揮字子羽，其義卽取

諸此。後人因《爾雅》緼字從糸，因改此經揮字作緼，而傳寫又誤爲縛耳。」案：洪、俞說並通，未知孰是。《爾雅》之緼，《說文·橐部》作「橐」。《穆天子傳》云：「天子於是載羽百緼。」字與《爾雅》同。竊疑此經劉昌宗音讀縛爲緼，從《爾雅》讀耳，所據本未必果作緼也。郭注《穆傳》亦似依《爾雅》以改。此經依鄭說，則《爾雅》與此經字異而音相近，各從其舊可也。云「一羽則有名，蓋失之矣」者，以其一羽不能成束也。《爾雅釋文》云：「孫同鄭意，云『蓋誤』。」郭云：「凡物數無不從一爲始，以《爾雅》不失，《周官》未爲得也。」案：今郭注無此語，蓋郭《音義》之佚文。依鄭及孫炎義，則《爾雅》當云：「十羽謂之箴，百羽謂之縛，千羽謂之緼。」今本十羽誤爲一羽，以下積數遂遞誤。郭則謂一羽亦得有名，說雖可通，但一羽古謂之翬，《九章算術·粟米篇》云：「買羽二千一百翬。」劉注云：「翬，羽本也。」若然，一羽不名箴，足證鄭義矣。

掌葛掌以時徵絺綌之材于山農，凡葛征，徵草貢之材于澤農，以當邦賦之政令。草貢出澤，蹟紆之屬可緝績者。【疏】「掌以時徵絺綌之材

于山農」者，《詩·周南·葛覃》毛傳云：「葛所以爲絺綌，精曰絺，麤曰綌。」《說文·艸部》云：「葛，絺綌艸也。」《糸部》云：「絺，細葛也。綌，粗葛也。」《周書·文傳篇》云：「礪石不可穀，樹之葛木，以爲絺綌，以爲材用。」是葛爲絺綌之材也。賈疏云：「所以徵絺綌于山農者，以其葛出于山故也。其徵絺綌之材，卽葛是也。」云「凡葛征」者，江永云：「葛之材惟中絺綌，而又言「凡葛征」，蓋蔓草之類如葛者亦征之。」云「徵草貢之材于澤農」者，此卽《閭師》八貢「任虞以澤事，貢其物」也。農當貢九穀而貢草木者，澤農兼樹藝之事，與常農不同也。注云「草貢出澤，璫紵之屬可緝績者」者，《典泉》「掌布總縷紵之麻草之物」，注云：

「草，葛璫之屬。」是草貢之材，卽謂璫紵，諸草皆澤所生，故於澤農征之。璫紵，並詳《典泉》疏。以權度受之。以

知輕重長短也。故書受或爲授，杜子春云：「當爲受。」

【疏】注云「以知輕重長短也」者，賈疏云：「上《角人》齒角不須稱，直言度量。此經葛草不須量，故以權度受之，便知斤兩長短也。」詳《大司徒》疏。云「故書受或爲授，杜子春云當爲受」者，段玉裁云：「當爲受」之「爲」，當作「從」。」案：段說是也。杜蓋以《角人》、《羽人》及《掌染草》、《掌炭》諸職並云受，故定從之，詳《大司徒》疏。

掌染草掌以春秋斂染草之物，染草，茅蒐、

橐蘆、豕首、紫荊之屬。【疏】「掌以春秋斂染草之物」者，染草種類不一，或以春，或以秋，各隨其時斂之也。王安石云：「掌染草至掌蜃所徵，亦必當邦賦之政令，而不言者，則以《角人》、《羽人》、《掌葛》見之。」注云「染草，茅蒐、

橐蘆、豕首、紫荊之屬」者，首，舊本誤「目」，今據宋本正。《敍官》注云：「染草，藍、蒨、象斗之屬。」此別言茅蒐等者，染草衆多，故鄭錯互舉之。茅蒐卽蒨，詳《敍官》疏。橐蘆者，《說文·木部》云：「櫨，一曰宅櫨木，出弘農山也。」《文選·南都賦》李注引郭璞注《上林賦》云：「櫨，橐蘆。」《玉篇·木部》又作「托櫨」。橐、宅、托、蘆、櫨，聲並相近，皆卽一物。橐蘆蓋木類，其葉可染，故通謂之染草。《敍官》注之「象斗」，亦木也。劉向《列仙傳》云：「陸通食橐蘆木實。」是爲木類之證。《史記·司馬相如傳》索隱云：「櫨，今黃櫨木也。」《證類本草》引陳藏器《日華子》云：「黃櫨堪染黃，生商洛山谷，葉圓木黃。」疑卽是木矣。豕首者，賈疏云：「《爾雅》云：「荊藿，豕首。」郭注云：「《本草》曰「蒺藜，一名蟾蜍蘭」。今江東呼豕首，可以燭蠶蛹。」郭

氏雖有此注，不害可染何色，未審鄭之所據也。」詒讓案：

《神農本草經》云：「天名精，一名蝦蟇藍，一名豕首。」鍾襄謂豕首卽染藍之草是也。紫荊者，《爾雅》云：「藐，此草。」

郭注云：「可以染紫，一名此茺。」《廣雅·釋草》云：「此茺，此草也。」《神農本草經》云：「紫草，一名紫丹，一名紫芙。」

陶注云：「今染紫者。」案：紫、茺、茺，並音近字通。《說

文·草部》別說染駟黃之草，單名茺，與此茺異物。《續漢書·輿服志》劉注引徐廣云：「緇，草名也。以染似綠，又似紫。」此合此茺與茺爲一，誤。以權量受之，以待

時而頒之。權量，以知輕重多少。時，染夏之時。

【疏】「以待時而頒之」者，莊有可云：「頒之於染人也。」

注云「權量以知輕重多少」者，染草又不計長短，故不用度也。云「時，染夏之時」者，據《染人》云：「夏纁玄，秋染夏。夏爲五色，以草染，故知以其染之時頒之。不言染纁玄之時者，彼注謂纁玄以石染，不用草染故也。」

掌炭掌灰物炭物之徵令，以時人之，灰，

炭，皆山澤之農所出也。灰給澣練。炭之所共多。【疏】

「掌灰物炭物之徵令，以時人之」者，《月令》云：「季秋，草

木黃落，乃伐薪爲炭。」此炭物之徵，蓋亦以季秋入之。此徵令專據徵斂之令而言，詳《宰夫》疏。 注云「灰、炭，

皆山澤之農所出也」者，灰炭皆燒草木爲之，故出於山澤之

農。賈疏云：「灰炭既出山澤，不云徵於山澤之農者，義可知，經略而不言也。」云「灰給澣練」者，《說文·水部》云：

「澣，濯衣垢也。」澣卽澣之俗。謂以灰濯布縷，若《雜記》說

緇加灰爲錫，《深衣》注謂用十五升布鍛濯灰治是也。練謂

以灰漚絲帛，若《幌氏》「漚絲以浼水」，注謂用灰泔水，又漚

帛以欄爲灰是也。詳《染人》、《幌氏》疏。云「炭之所共多」

者，若宮人共鑪炭之屬，其待用者衆，故所共者亦多也。

以權量受之，以共邦之用，凡炭灰之事。

【疏】「以共邦之用」者，惠士奇云：「掌炭掌灰物炭物，以

共邦用；掌茶掌聚茶及疏材之物，以待邦事；掌蜃掌斂互

物、蜃物，以共闡壙之蜃。蓋皆畜聚之物，一時不可猝辦，

故平時聚而斂之，以待邦用邦事，兼以共喪。」

掌茶掌以時聚茶，以共喪事。共喪事者，

以著物也。《既夕禮》曰：「茵著用茶。」【疏】掌以時

聚茶者，依《大戴禮記·夏小正》說，取茅茶以四月，取萑

葦茶以七月，是其時也。

注云「共喪事者，以著物也」

者，《士喪禮》注云：「著，充之以絮也。」案：凡衣服茵席之複者，中空而以物充之，並謂之著。《夏小正》四月記茅秀

之茶云：「取茶。茶也者，以爲君薦蔣也。」又七月記萑葦

之茶云：「灌茶。茶，萑葦之莠，爲蔣褚之也。」褚與著義

同，蔣卽茵也。據《小正》說，則二者之茶，皆可以著物矣。

引《既夕禮》曰「茵著用茶」者，證喪紀用茶著物之事。賈疏

云：「案《既夕禮》，爲茵之法，用細翦布。謂淺黑色之布各

一幅，合縫，著以茶。柩未入壙之時，先陳於棺下，縮二於

下，橫三於上，乃下棺於茵上是也。」徵野疏材之物，

以待邦事，凡畜聚之物。茶，茅莠，疏材之類也，因

使掌焉。徵者，徵於山澤，入於委人。【疏】「徵野疏材之

物以待邦事」者，明此官別掌徵斂野生疏材，以共祭祀賓客

及王以下之庶羞也。云「凡畜聚之物」者，《委人》文同。彼

注云：「瓜瓠葵芋，禦冬之具也。」詳彼疏。江永云：「醫師

聚毒藥以共醫事。藥物，草木爲之多。疏材畜聚中，當有

藥物入於醫師。」注云「茶，茅莠」者，《敍官》注同。云

「疏材之類也，因使掌焉」者，以茶是草，亦疏材之類，故并

使掌野疏材之徵也。云「徵者，徵於山澤」者，謂亦徵之於

山澤之農也。云「入於委人」者，賈疏云：「以其委人掌斂野之賦，凡疏材木材，所斂者衆，故知此掌茶所徵亦入委人也。」

掌蜃掌斂互物蜃物，以共闔壙之蜃。

互物，蚌蛤之屬。闔，猶塞也。將井椁，先塞下以蜃禦濕也。

鄭司農說以《春秋傳》曰「始用蜃炭」，言僭天子也。【疏】

「掌斂互物蜃物」者，斂之於澤漁，與斂人、鼈人爲官聯也。

賈疏云：「以其互物是蜃之類，故因類使兼掌之。蜃物者，

共百事之蜃，與下共闔壙之蜃別。」注云「互物，蚌蛤之

屬」者，蚌，《鼈人》注作「蚌」，同。蚌蛤並詳彼疏。賈疏

云：「案《鼈人》云「掌取互物」，先鄭云：「互物，謂有甲兩

胡，龜鼈之屬。」此後鄭互物爲蚌蛤者，彼下文別有廬，廬卽

蛤，故從先鄭爲龜鼈，至此則爲蚌蛤，亦是有甲兩胡故也。」

云「闔猶塞也」者，《說文·門部》云：「闔，城曲重門也。」

《土部》云：「堊，塞也。」此闔卽堊之借字。《淮南子·兵略

訓》「扞闔要遮」，許注云：「闔，塞也。」云「將井椁，先塞下

以蜃，禦濕也」者，禦，《釋文》作御，云「本亦作禦」。案：御

禦字通。《稻人》注亦作禦，則陸本非是。井椁者，《士喪

禮「既井椁」，注云：「匠人爲椁，刊治其材，以井構於殯門外也。」賈疏云：「案《士喪禮》，筮宅，還井椁於殯門之外。」注云：「既哭之，則往施之窆中。」是未葬前，井椁材乃往施之壙中，則未施椁前，已施蜃灰於椁下，以擬禦濕也。」云「鄭司農說以《春秋傳》曰，始用蜃炭，言僭天子也」者，《左》成二年傳云：「宋文公卒，始厚葬，用蜃炭。」杜注云：「燒蛤爲炭以瘞壙。」賈疏云：「雖二王之後，不得純如天子亦用蜃，故被譏。引之者，證天子之宜也。」祭祀，共蜃器之蜃。飾祭器之屬也。《邕人職》曰：「凡四方山川用蜃器。」《春秋》：「定十四年秋，天王使石尚來歸蜃。」蜃之器以蜃飾，因名焉。鄭司農云：「蜃可以白器，令色白。」【疏】注云「飾祭器之屬也」者，賈疏云：「鄭摠云祭器，則宗廟社稷皆用蜃飾之。知義然者，《左氏》石尚來歸蜃，是祭社之器爲蜃也。《大行人》云：「歸脤以交諸侯之福。」彼則宗廟社稷之器物，謂之爲脤。是其宗廟、社稷之器，皆蜃灰飾之事也。」案：後鄭說蜃器不以蜃灰飾，賈說未審。引《邕人職》曰「凡四方山川用蜃器」者，彼文無「器」字。鄭彼注引杜子春云：「蜃，水中蜃也。」又自爲說云：「蜃，畫爲蜃形」，則不爲蜃飾。此注引以證飾蜃之器，則仍從杜說，

與本職注義小異。引《春秋》定十四年秋，天王使石尚來歸蜃者，三家經「蜃」並作「脤」，《大宗伯》、《司士》兩注引亦並作「脤」，與此異者，蓋鄭因脤肉盛以蜃器，遂改字引之。《詩·大雅·緜》箋云：「《春秋傳》曰：蜃宜社之肉。」彼引《左氏》說，亦改「脤」爲「蜃」，與此同。《左傳》杜注云：「脤，祭社之肉，盛以蜃器，以賜同姓諸侯親兄弟之國，與之共福。」此引以證祭祀用蜃之事。云「蜃之器以蜃飾，因名焉」者，嫌蜃器即以全蜃之甲爲器，故釋之，明以蜃甲爲飾也。《爾雅·釋器》云：「弓以蜃者謂之珧。」《說文·玉部》云：「珧，蜃甲也。所以飾物也。禮云：佩刀，天子玉琕而珧珌。」又云：「珌，蜃屬。禮，佩刀，士琕琕而珧珌。」蜃器之蜃，即珧珌之屬，取其甲以綴祭器，爲文飾也。鄭司農云「蜃可以白器，令色白」者，先鄭直謂以蜃灰飾器令白，不爲蜃甲飾器，後鄭不從，故引其說於後。共白盛之蜃。盛，猶成也。謂飾牆使白之蜃也。今東萊用蛤，謂之叉灰云。【疏】注云「盛猶成也」者，盛成聲同義通。《匠人》注云：「盛之言成也。以蜃灰墜牆，所以飾成宮室。」義與此同。丁晏云：「《易·繫辭傳》：『成象之謂乾。』蜀才作『盛』。《公羊》莊八年傳：『成者盛也。』」云「謂

飾牆使白之蜃也」者，《爾雅·釋宮》云：「牆謂之堊。」《守祿》先鄭注云：「堊，白也。」王廟寢悉爲堊牆，即用此蜃灰爲飾也。云「今東萊用蛤謂之又灰云」者，蛤卽蜃之小者。《鼈人》「簠魚鼈龜蜃」，先鄭注云：「簠謂以杈刺泥中搏之。」又杈字同。《續漢書·郡國志》，東萊郡屬青州。賈疏云：「蜃蛤在泥水之中，東萊人又取以爲灰，故以蛤灰爲又灰也。」

囿人掌囿游之獸禁，囿游，囿之離宮小苑觀處

也。養獸以宴樂視之。禁者，其蕃衛也。鄭司農云：「囿游之獸，游牧之獸。」【疏】注云「囿游，囿之離宮小苑觀處也」者，《天官·敘官》注云：「囿，御苑也。游，離宮也。」《敘官》注云：「囿，今之苑。」蓋鄭意囿本爲大苑，於大苑之中，別築藩界爲小苑，又於小苑之中爲宮室，是爲離宮。以其是囿中游觀之處，故曰囿游也。賈疏云：「言離宮者，謂於王宮之外，於苑中離別爲宮，故名離宮。以宮外爲客館，亦名離宮也。」案《孟子》「文王之囿七十里，芻蕘者往焉」，天子之囿百里，並是田獵之處。又《書傳》云：「鄉之取於囿，是勇力取；今之取於澤，是揖讓取。」是爲蒐狩之常處也。今此云禁，故知非大囿，是小苑觀處也。」案：賈說非

鄭意也。此囿自畎郊內靈囿言之，唯游別爲小苑，與囿不同耳。《委人》別有野囿，在六遂以外，則似非此官所掌，詳《天官·敘官》疏。云「養獸以宴樂視之」者，宴，《釋文》作「燕」，字通。明此獸非徒共祭祀、喪紀、賓客俎豆之實，亦以備王宴樂觀視之也。云「禁者，其蕃衛也」者，謂囿游皆有藩離爲禁衛，使內獸不得奔逸，外人亦不得私人。《文選·西京賦》薛注云：「禁，禁人妄入也。」《委人》注亦謂苑囿有藩羅。蕃藩字通。賈疏云：「卽非守門者也。其守門則墨者，故《閭人》云「王宮每門四人，囿游亦如之」。鄭云「墨者使守門」是也。」鄭司農云「囿游之獸，游牧之獸」者，賈疏云：「此與後鄭義異，謂獸之游，非人游觀。」詒讓案：先鄭以游爲游散，繫牧爲義，然《天官·敘官》閭人囿游不言獸，則游不主謂獸可知。牧百獸。備養衆物也。今掖庭有鳥獸，自熊虎孔雀，至於狐狸鳧鶴備焉。【疏】「牧百獸」者，與服不氏爲官聯也。賈疏云：「此於小囿中牧養百獸。言百者，舉成數而言。」注云「備養衆物也」者，經言百獸，明其種物衆多。云「今掖庭有鳥獸，自熊虎孔雀，至於狐狸鳧鶴備焉」者，《釋文》云：「鶴又作鵠。」《太平御覽·居處部》引《漢官典職》云：「宮中苑育麋鹿麕鳥獸百種。」賈疏云：「雖以百獸爲主，其中亦有飛鳥，故鄭注引

漢之掖庭有鳥獸爲證也。」祭祀、喪紀、賓客，共其生獸、死獸之物。【疏】「祭祀、喪紀、賓客，共其生獸、死獸之物者，獸，謂《庖人》之六獸中膳羞者。《白虎通義·諫諍篇》說王者凶荒減膳之事，引《禮》云「四穀不升損圉獸」，是王共膳之獸取之圉也。《獸人》亦云：「凡祭祀、喪紀、賓客，共其死獸、生獸。」蓋圉人主牧養，獸人主搏取，或圉中所無，則獸人別共之，二官相與爲官聯也。

場人掌國之場圃，而樹之果蓏珍異之物，以時斂而藏之。

果，棗李之屬。蓏，瓜瓠之屬。珍異，蒲桃、枇杷之屬。【疏】「掌國之場圃，而樹之果蓏珍異之物者，即《載師》云「以場圃任園地」是也。其地在郭門之內，凡種樹蔬菜、麻枲、果木以共食用者，咸萃於是。經唯言樹果蓏者，舉其一端，互文以見義。果蓏爲疏材之屬，此官掌樹郭內場圃之疏材，與甸師共四郊之果蓏，委人斂六遂以外之疏材，職掌皆互相備也。賈疏云：「場圃連言，場圃同地耳。春夏爲圃，秋冬爲場，其場因圃而爲之，故並言之也。」案：賈據《敍官》注義也。凡園地，種時則爲園，收刈之後則爲場，與田首之場圃異，詳《敍官》及《載師》

疏。云「以時斂而藏之」者，賈疏云：「案《閭師》云：「任圃以樹事，貢草木。」此場人又掌之者，此據祭祀、喪紀、賓客者，場人徵斂藏之，其餘則閭師徵斂之也。」案：賈說非也。閭師總掌九職之貢，場人則爲掌園地之專官。草木之貢，當閭師以法使場人斂之，非場人唯掌其祭祀、喪紀、賓客之物也。《呂氏春秋·仲秋紀》云：「乃命有司趣民收斂，務蓄菜，多積聚。」高注云：「有司，於《周禮》爲場人，場協人也。」案：「場協人」，《國語·周語》文，韋注亦云：「場人掌場圃委積之珍物，斂而藏之。」即本此經爲說。 注云

「果，棗李之屬，蓏，瓜瓠之屬」者，《甸師》注云：「果，桃李之屬。蓏，瓜瓠之屬。」《說文·瓜部》云：「瓠，瓢也。」棗亦木實，瓠與瓠同爲瓜類，此注與彼義同。云「珍異，蒲桃、枇杷之屬」者，皆果中之珍貴者。《文選·上林賦》云：「櫻桃蒲陶，枇杷檮柿。」李注引郭璞云：「蒲陶似燕薊，可作酒。」又引張揖云：「枇杷似斛樹，長葉，子如杏。」《漢書·西域傳》云：「大宛左右以蒲陶爲酒。」蒲桃即蒲陶也。凡祭祀、賓客，共其果蓏，享亦如之。享，納牲。【疏】「凡祭祀、賓客，共其果蓏」者，與甸師爲官聯也。共之，以與籩人爲籩實也。 注云「享，納牲」者，賈疏云：

「享納牲，謂祭祀宗廟，二灌後，君迎牲納之於庭時，后夫人薦朝事之豆籩，豆籩中有果蓏之物，故云享亦如之。若然，上言祭祀，餘祭祀也。」案：此注可疑。依賈說，則經云享者，專指宗廟之祭，即大宗伯之六享也。然上云祭祀，廟享當已咳於其中；至祭有納牲，宗廟及天地大祭所同。《大宰》云：「祀五帝，納亨，贊王牲事，祀大神亦如之。」鄭彼注亦以「納牲」釋亨是也。今此注但云納牲，則無以見其必為宗廟；況廟享后夫人薦朝事之豆籩，雖正在迎牲之時，然薦豆籩與納牲自是二事，今但云納牲，亦無以見朝事之有豆籩。又籩人四籩之實，朝事之籩無果蓏，用果蓏者乃是饋食之籩，則與納牲節次尤不相當，注說究不可通，所未詳也。今以經文攷之，祭祀之外別有所謂享，疑專指宗廟薦新言之，亦即《大宗伯》六享之「以饋食享先王」也。凡果蓏珍異新出，或薦於寢廟，若《月令》仲夏「嘗黍羞以含桃」是也。其禮殺於祭祀，無迎尸裸獻之事，故經云享亦如之，明所共與祭祀同，而禮則異爾。薦新亦通稱享，互詳《大宗伯》疏。

廩人掌九穀之數，以待國之匪頒、賙

賜、稍食。匪讀為分。分頒，謂委人之職諸委積也。賙賜，謂王所賜予，給好用之式也。稍食，祿稟。【疏】「掌九穀之數」者，總計一年穀人之數，為簿書，若《月令》云「舉五穀之要」。但此官總掌九穀之數要，而所藏則為米，故《明堂位》魯有米廩。《少牢饋食禮》注亦云：「廩人掌米入之藏者」是也。賈疏云：「廩人掌米，倉人掌穀。今《廩人》云九穀者，以廩人雖專主米，亦兼主穀，故以九穀言之也。」云「以待國之匪頒、賙賜、稍食」者，《國語·周語》云「廩協出」，韋注云：「廩人掌九穀出用之數。」案：此以待匪頒賙賜稍食者，即協出之事也。沈彤云：「穀為米粟委積之通稱。凡官所食，與之田而令自取，惟封邑頒掌地為然，其餘則皆收其穀而給之。廩人掌九穀之數，以待國之匪頒、賙賜、稍食。倉人掌粟入之藏，辨九穀之物，以待邦用。邦用即匪頒、賙賜、稍食之屬。匪頒中，祿居大半，稍食則食之小者。是藏米於廩，藏粟於倉，積委積於場，以待分給也。《楚語》觀射父云：「天子之田九畝，以食兆民，王取經人焉以食萬官。」正謂是也。」注云「匪讀為分」者，段玉裁云：「匪頒」字始見於《大宰》九式注，鄭司農云：「匪，分也。」此則徑讀匪為分，與仲師說小異，亦令互相足也。非字有分背之義，微與文二韻字多互轉，匪得讀為分，猶疊分

聲得讀爲微也。」案：段說是也。匪卽箕之段借字，詳《大宰》疏。云「分頒，謂委人之職諸委積也」者，《大宰》「匪頒之式」注云：「王所分賜羣臣也。」江永、沈彤、金榜、曾釗並謂匪頒當爲羣臣之祿，是也。蓋匪頒本以頒祿爲最大，而稍食及委積賜賚之有常秩者，亦通含於其中。此經雖別出稍食，而祿賜則不容略；注唯舉委積者，似鄭誤以百官之祿屬稍食，義殊不及《大宰》注之咳。又注云「委人之職諸委積」，江永、曾釗並謂委人無粟米，疑其未塙。沈彤則謂「委人」當爲「遣人」之誤。沈校是也。《遣人》云：「掌國之委積，以待施惠。」有鄉里、門閭、郊里、野鄙、縣都諸委積。鄭彼注云：「委積者，廩人、倉人計九穀之數足國用，以其餘共之。」與此注義相應。彼職末又云：「凡委積之事，以時頒之。」故鄭據以釋此匪頒。若《委人》之委積，既無粟米文，又不及《遣人》之備，鄭不當舍彼而從此矣。又案：《遣人》諸委積，首云「鄉里之委積以恤民之羸阨」，則於此經當在賙賜之科。又《委人》云「凡其余聚，以待頒賜」。賜爲好賜，與頒爲常賜不同，則此匪頒、賙賜二者之內，通有委積；注專以委積釋匪頒，於義亦未析也。云「賙賜謂王所賜予」者，賙與《鄉師》云「賙萬民之羸阨」義同，謂臣民有不足，則王賙給之。賜謂以恩澤賜之，卽《大府》之「賜予」。

《內饗》之「好賜」是也。《孟子·萬章篇》云：「周之則受，賜之則不受，何也？」趙注云：「周者，謂周急，稟貧民之常科也。賜者，謂禮賜橫加也。周與賙同。」若然，賙賜二事小異，鄭通釋之耳。《呂氏春秋·季春紀》高注云：「周，賜也。」亦以賜釋周，與鄭義略同。經凡云賜者，並爲好賜，詳《大宰》、《膳夫》疏。云「給好用之式也」者，謂賙賜當人好用之式。賈疏云：「此卽九式之中「九曰好用之式」是也。故彼注「好用，燕好所賜予也」。」云「稍食，祿稟」者，《宮正》注同。賈疏云：「此卽《司士》「以功詔祿」。又《王制》云：「下士視上農夫九人祿，中士倍下士」之類是也。」江永云：「統言匪頒，則稍食在其中；分言之，則諸臣之祿爲匪頒，在官工役之稟爲稍食。」案：江說是也。稍食猶言稟食，與祿異。《孟子·萬章篇》云「廩人繼粟」，此卽廩人掌稟食之證，鄭、賈說並非是，詳《宮正》疏。以歲之上下數邦用，以知足否，以詔穀用，以治年之凶豐。數，猶計也。【疏】「以歲之上下數邦用，以知足否」者，《禮器》云：「禮之厚薄，與年之上下。」注云：「用年之豐凶也。」案《周書·糴匡篇》，有成年、年儉、年饑、大荒四等登降之法，卽以年上下數邦用之事。賈疏云：「上下卽豐凶。」

廩人之官，以歲之豐凶得稅物多少之帳，計國之用，以知足否。若歲凶，稅物少而用多，則不足。」云「以詔穀用，以治年之凶豐」者，賈疏云：「廩人既知多少足否，乃詔告在上用穀之法，以治年之凶豐。此則《王制》云「制國用必於歲之杪」者是也。」

注云「數猶計也」者，《說文·支部》云：「數，計也。」此云猶者，鄭蓋以數本爲算數，引申爲計算之義，與許少異。凡萬民之食食者，人四鬴，

上也；人三鬴，中也；人二鬴，下也。此皆謂

一月食米也。六斗四升曰鬴。【疏】「凡萬民之食食者」

者，此即上文所謂「以歲之上下數邦用，以知足否」。邦用之豐殺，與民食之足否，事常相因也。賈疏云：「此謂給萬民糧食之法。食食謂民食國家糧食者。」江永云：「通計萬民之食，非謂國家之糧食者也。疏誤。」案：江說是也。曾釗說同。云「人四鬴上也，人三鬴中也，人二鬴下也」者，賈疏云：「上謂大豐年也，中謂中豐年，下謂少儉年。雖此列三等之年，以中年是其常法。」孔廣森云：「《漢·食貨志》曰：『一夫挾五口，治田百畝，歲收畝一石半，爲粟百五十石。食，人月一石半，五人終歲爲粟九十石。歲有上中下孰，上孰其收自四，中孰自三，下孰自倍。』此經月食二鬴

者，爲粟一石二斗八升，尚未能及月一石半，故謂之下歲矣。」

注云「此皆謂一月食米也」者，《膳夫》「食用六穀」，注云：「食，飯也。」謂通計民每口一月所食米之數也。

賈疏謂頒祿，古今皆月月給請，故知此皆一月食米，失之。

云「六斗四升曰鬴」者，《桌氏》、《陶人》注義並同。《說文·

鬲部》云：「鬴，鍤屬也。重文釜，鬴或从金父聲。」《左》昭

三年傳，晏子曰：「齊舊四量，豆區釜鍾，四升爲豆，各自其

四，以登于釜，釜十則鍾。陳氏三量，皆登一焉。」杜注謂齊

舊量，釜六斗四升，陳氏新量，釜八斗。鄭以齊舊量即周

量，故據以爲釋。一釜凡爲區者四，爲豆者十六，通六斗四

升也。以此計之，則月食四鬴者，二石五斗六升；以三十

日除之，日食八升五合又三分合之一。月食三鬴者，一石

九斗二升，日食六升四合。《靈樞經》云：「人食一日中五

升。」與此相近。月食二鬴者，一石二斗八升，日食四升二

合又三分合之二。《既夕記》說喪食歡粥，朝一溢米，夕一

溢米。鄭注云：「二十兩曰溢，爲米一升二十四分升之

一。」是喪食日二升一合弱。此下歲之食，倍於彼也。沈彤

云：「《律呂新書》漢量與周同，而漢量有容二斗七升者，當

今五升四合；有容六升者，當今一升二合；是古之十當今

之二也。」閻若璩說同。案：依沈說，則此經上歲人日食一

升七合有奇，中歲人日食一升二合有奇，下歲人日食八合有奇也。至《左傳》陳氏新量之釜，杜云容八斗，實當爲十斗。《管子·海王篇》云：「鹽百升而成釜」，即十斗之釜與石同，故《國蓄篇》云：「中歲之穀，糶石十錢，大男食四石，大女食三石，吾子食二石。」與此經四鬴、三鬴、二鬴差數雖巧合，然以《漢志》李悝說「人食月一石半」計之，大男月食必無四石之多，《管子》之說，殆不可信，非徒釜數與此經不相應也。詳《桌氏》疏。若食不能人二鬴，則令邦移民就穀，詔王殺邦用。就穀，就都鄙之有者。殺，猶減也。【疏】「若食不能人二鬴」者，謂不及下歲，則當治荒政而節法用。云「則令邦移民就穀」者，即《大司徒》大荒令移民之事。云「詔王殺邦用」者，謂殺九式之用，若十二荒政之皆禮及《士師》荒貶之法皆是也。注云「就穀，就都鄙之有者」者，《大司徒》注云「辟災就有」是也。《逸周書·文酌篇》云「因親就年」，亦此義。賈疏云：「此據天子畿內，六鄉六遂及公邑，純屬天子，與三等采地不同。若民有不能人二鬴之歲，移民就賤，當先嚮都鄙三等采地之中；都鄙亦凶，乃出嚮畿外也。故知就都鄙者也。」云「殺猶減也」者，《廣雅·釋詁》云：「殺，減也。」此亦引申

之義，故云猶。凡邦有會同師役之事，則治其糧與其食。行道曰糧，謂糒也。止居曰食，謂米也。

【疏】「凡邦有會同師役之事，則治其糧與其食」者，與遣人、委人爲官聯也。師役，謂軍旅起徒役。大會同百官六軍從行，故皆須治糧食。《晏子春秋·問下篇》、《孟子·梁惠王篇》並云「師行而糧食」是也。王昭禹云：「《莊子·逍遙游篇》曰：『適百里者宿春糧，適千里者三日聚糧。』謂計口而爲之糧食也。」注云「行道曰糧，謂糒也」者，《說

文·米部》云：「糧，穀也。糒，乾飯也。」《釋名·釋飲食》云：「干飯，飯而暴乾之也。」《孟子·梁惠王篇》云：「《詩》云『乃積乃倉，乃裹糒糧，于橐于囊。』故居者有積倉，行者有裹囊也，然後可以爰方啓行。」趙注云：「裹盛乾食之糧於橐囊也。」賈疏云：「《尚書·費誓》云『峙乃糒糧』，即糒也。」程瑤田云：「《方言》：『凡以火乾之穀之類，關西、隴冀以往謂之糒。』《公羊傳》：『魯昭公走之齊，高子執筆食與四脰脯，國子執壺漿，曰：『吾寡君聞君在外，餒饗未就，敢致糒於從者。』何休注：『糒，糒也。』疏云：『若今之糯米。』屈原賦：『播江離與滋菊兮，願春日以爲糒芳。』王逸注：『糒，糯米也。』《說文》：『糒，乾也。』蓋即《方言》火乾之糒也。」

云「止居曰食，謂米也」者，賈疏云：「案《書傳》云：『行而無資謂之乏，居而無食謂之困。』是止居曰食，謂此廩人米也。」大祭祀，則共其接盛。接讀爲「一扱再祭」之

「扱」。扱以授春人春之。大祭祀之穀，藉田之收藏於神倉者也，不以給小用。【疏】「大祭祀」者，亦謂天地宗廟之等。云「則共其接盛」者，《釋文》出「則接」二字，云「依注音扱」。盧文弨云：「陸所見本，當是『則接盛』，無『共其』二字。觀注云『扱以授春人春之』，《春人職》云『祭祀共其盛之米』，然即非廩人共之明矣。注疏本係誤衍。」案：盧說近是。賈疏云：「此即廩人兼掌御廩所藏藉田之收，以共祭祀之用者也。」注云「接讀爲一扱再祭之扱」者，

一，宋婺州本、嘉靖本作壹。各本並作一，與《釋文》合，今據正。惠士奇云：「《祭禮始扱一祭，又扱再祭」。《士昏禮記》文。賈疏謂讀如《特性》、《少牢》，誤。」段玉裁云：「及聲在古音侵鹽添部，妾聲在古音覃談咸銜嚴凡部，聲類同也。」云「扱以授春人春之」者，賈疏云：「此廩米與春人春之，當須扱與春人。」詒讓案：《說文·手部》云：「扱，收也。」《廣雅·釋詁》云：「扱，取也。」謂扱取穀粟於倉，以授春人。《公羊》文十三年傳，說魯祭周公盛，魯公燾，羣公廩。何注云：「盛者，新穀。燾者，故上一新也。廩者，連

陳於新上，財令半相連爾。」此王國大祭祀之盛，當皆用新者，其春而亦尤精潔。《詩·大雅·召旻》鄭箋云：「米之率，糲十，稗九，鑿八，侍御七。」然則祭祀之盛，其侍御米與？云「大祭祀之穀，藉田之收藏於神倉者也」者，《月令》：「季秋，乃命冢宰，農事備收，舉五穀之要，藏帝藉之收於神倉，祇敬必飭。」鄭彼注云：「重粢盛之委也。帝藉，所耕千畝也。藏祭祀之穀爲神倉。」是也。《國語·周語》：「號文公說藉田之禮云，『廩於藉東南，鍾而藏之，而時布之于農。』韋注云：『廩，御廩也。一名神倉。鍾，聚也。』謂爲廩以藏王所藉田以奉粢盛也。」《穀梁》桓十四年傳云：「甸粟而納之三宮，三宮米而藏之御廩。」范注云：「三宮，三夫人也。宗廟之禮，君親割，夫人親春。」此經無三宮春米之文。依《穀梁》說，則御廩所藏者，亦已春之米。鄭云穀者，穀與米散文則通。御廩既藏米，又與春人者，或當如賈說，廩藏廩米，將用，復與春人更精春之與？云「不以給小用」者，明它小用之穀，別廩藏之，不入御廩神倉也。賈疏云：「《祭義》云：『天子藉田千畝，諸侯藉田百畝，以事天地、社稷、先公，敬之至也。』是不給小用也。」

舍人掌平宮中之政，分其財守，以灋掌

其出入。政謂用穀之政也。分其財守者，計其用穀之數，分送宮正、內宰，使守而頒之也。而行出於廩人，其有空缺，則計之還人。【疏】「掌平宮中之政」者，莊存與云：「舍人有米有粟，平宮中之政，王宮也，北宮也，外內朝穴食也。司祿則給百官百執事之分頒稍食也。其廩廡各不同。」賈疏云：「舍人摠主給米之事，而掌平王宮中之政，謂平其給米多少，不得特多特少也。」云「分其財守」者，賈疏云：「財即米也。故《喪大記》云『納財朝一溢米』，亦謂米爲財。謂分米與宮正、內宰守禁之所，使頒與所使守之人。」云「以灋掌其出入」者，灋即《大宰》九式「匪頒之式」，此官所掌以爲官法者也。賈疏云：「出謂米出於廩人，以出給；人謂其有空缺，則還入廩人。皆當以法，不可虛也。」注云「政謂用穀之政也」者，即後注云「用穀之多少」是也。謂計其人數多寡，爵秩高下，以定祿食用穀多少之法數。云「分其財守者，計其用穀之數，分送宮正、內宰，使守而頒之也」者，《大宰》注云：「財，泉穀也。」沈彤云：「古者穀幣貨賄通謂之財，此則專指穀也。」賈疏云：「必送米與宮正、內宰者，此二官皆有宿衛之人，須米料之數故也。」案：鄭、賈以宮正掌宮中衆寡之稍食，內宰掌王正內之稍食，亦各有府藏，故知分送二官，使守而頒之。云「而

行出於廩人」者，以廩人掌匪頒稍食之穀，宮正、內宰特依數爲書契頒之，其穀則出於廩人也。云「其有空缺，則計之還人」者，謂官吏有遷黜、物故、更代者未上，則爲空缺，不須給祿食，舍人則計其數收還，仍入於廩人也。凡祭祀，共簠簋，實之，陳之。方曰簠，圓曰簋，盛黍稷稻粱器。【疏】「凡祭祀共簠簋，實之陳之」者，賈疏云：

「天地宗廟大次小祭，皆有黍稷於簠簋實之陳之，故云『凡以廣之也』。」江永云：「簠盛黍稷爲正饌，簋盛稻粱爲加饌。天子八簠，諸侯六簠。簠之數未聞。凡賓客之禮，簠皆少於簋，則祭時宜亦放此。天子蓋四簠，諸侯蓋二簠。天子用六粢，有麥、苽，蓋亦盛之於簠。」案：江說甚覈。但《祭統》說天子祭禮，《詩·小雅·伐木》說天子饋食，皆云八簠，而盛穀無文。唯《秦風·權輿》說諸侯食禮，每食四簋。毛傳云：「四簋，黍稷稻粱。」《玉藻》注說諸侯朔月四簋，義同。孔疏謂天子朔月當六簋，黍稷稻粱麥苽；若盛食則八簋，當加以稻粱也。依毛、鄭、孔說，則六穀通盛於簋。《玉藻》疏引皇侃說，則謂稻粱宜盛於簋，與《掌客》注義合。江氏略本皇義。兩說並通，未知孰是也。注云「方曰簠，圓曰簋」者，賈疏云：「皆據外而言。」案《孝經》云：「陳其

簠簋。」注云「內圓外方，受斗二升者」，直據簠而言。若簋則內方外圓。知皆受斗二升者，《旅人》云「爲簠實一穀，豆實三而成穀」，豆四升，三豆則斗二升可知。但外神用瓦簠，宗廟當用木，故《易·損卦》云「二簠可用享」。《損卦》以《離》巽爲之，《離》爲日，日圓，《巽》爲木，木器圓，簠象，是用木明矣。」案：賈所述《易·損》彖義，並據鄭《易注》文。《論語·公冶長》皇疏說同。凡器方圓並當據外言，錢亦內方外圓，而稱圓法，是其比例。賈說深得鄭指。《毛詩·小雅·伐木篇》「陳饋八簠」，傳云：「圓曰簠。」是鄭所本。《說文·竹部》云：「簠，黍稷圓器也。簋，黍稷方器也。」又《淮南子·泰族訓》許注云：「器方中者爲簠，圓中者爲簋也。」是許君謂外圓內方者爲簠，內圓外方者爲簋，其說與鄭正相反，蓋師說不同。陸氏《詩·秦風》釋文從鄭義，《禮·聘禮》釋文從許義。案：《聘禮》「二竹簠方」，注云：「器名也，以竹爲之，狀如簠而方。」依《禮經》文，則鄭義塙不可易，否則竹簠不當特言「方」，爲殊異之詞矣。聶氏《三禮圖》引《舊圖》云：「外方內圓曰簠，內方外圓曰簋，足高二寸，挫其四角，漆赤中。」此說亦與鄭同。至《御覽·器物部》引《三禮圖》云：「簠受一升，下足高一寸，中方外圓，漆丹中，蓋龜形，諸侯飾以象，天子玉飾，盛黍稷。」簠受一升，足高一寸，中圓外方，挫其四角，漆赤中，蓋亦龜形，其飾如簠，盛稻粱。」案：此所說簠簋形制，既違鄭義，又與《禮經》不合，或《御覽》傳寫互譌。其云「蓋象龜形」，尤誤。戴震云：「《禮器》管仲鏤簠」，注云：「鏤簠，謂刻而飾之，大夫刻爲龜爾。諸侯飾以象，天子飾以玉。」《雜記》注云：「鏤簠，刻爲蟲獸也。」《少牢饋食禮》「敦皆南首」，注云：「敦有首者，尊者器飾也。飾蓋象龜。周之禮，飾器各以其類，龜有上下甲。」歐陽氏《集古錄》曰：「簠容四升，其形外方內圓而小，似龜，有首，有尾，有足，有甲，有腹。今禮家作簠，亦外方內圓，而其形如桶，但於其蓋刻爲龜形，與真占簠不同。」案：《集古》所云「但於其蓋刻爲龜形」者，即《三禮圖》之敦與簠簋，皆以蓋頂作一小龜是也。其說始於《儀禮疏》誤解鄭注「飾蓋象龜」一「蓋」字。蓋之爲言意擬未定之辭，無正文也。」案：戴說極精，足正舊說之誤。胡培翬說同。云「盛黍稷稻粱器」者，《掌客》注云：「簠，稻粱器也。簋，黍稷器也。」此摠言之，故云黍稷稻粱器。許說與鄭亦相反，鄭是也。詳《掌客》疏。賓客，亦如之，共其禮，車米、筥米、芻禾。禮，致饗餼之禮。【疏】「賓客亦如之」者，賈疏云：「亦有簠簋實之陳之

事。言實之陳之，則據饗餼及饗食之時也。」

注云「禮，

致饗餼之禮」者，據《聘禮記》以致饗餼爲歸大禮，故知禮卽致饗餼也。又《掌客》注以殮積爲致賓客之小禮，亦有車米芻禾。此禮內當亦咳之矣。賈疏云：「案《聘禮》曰：『致

饗，使卿韋弁歸饗餼，米百筥設於中庭，車米三十車陳於門外，禾三十車，芻薪倍禾。』又案《掌客》，上公米百有二十筥，車米四十車，禾五十車，芻薪倍禾；侯伯米百筥，車米三十車，禾四十車，芻薪倍禾；子男米八十筥，車米二十車，禾三十車，芻薪倍禾；皆言陳。是其饗餼車米、筥米、芻禾所陳多少之事。」詒讓案：《國語·周語》云：「周之

《秩官》曰：『敵國賓至，廩人獻餼，司馬陳芻。』韋注云：

「生曰餼。禾，米也。」案：饗餼之禾米，本舍人共致之，彼云廩人者，以舍人卽廩人之屬，故通言之也。芻亦此官共之，司馬但主其陳設之事。凡賓客車米筥米芻禾陳數，並詳《掌客》疏。喪紀，共飯米、熬穀。飯所以實口，不

忍虛也。君用梁，大夫用稷，士用粱，皆四升，實者唯盈。

熬穀者，錯于棺旁，所以惑蚍蜉也。《喪大記》曰：「熬，君四種八簋，大夫三種六簋，士二種四簋，加魚腊焉。」【疏】

「喪紀，共飯米熬穀」者，與典瑞、大祝、小祝爲官聯也。凡大喪，共飯米與大祝，共熬穀與小祝。飯米謂生米，故《荀

子·禮論篇》云「飯用生稻」，明天子用黍米亦生可知。熬穀則未春之穀，《說文·火部》云：「熬，乾煎也。」

注云

「飯所以實口，不忍虛也」者，《檀弓》云：「飯用米貝，弗忍虛也，不以食道，用美焉爾。」鄭彼注云：「尊之也。食道

喪，米貝美。《白虎通義·崩薨篇》云：「所以有飯含何？

緣生食，今死不欲虛其口。」故云所以實口不忍虛也。凡喪

禮，有飯有含，二者不同，天子飯用玉襍米，不用貝，並詳

《典瑞》疏。云「君用梁，大夫用稷，士用粱」者，據《喪大記》

云「君沐梁，大夫沐稷，士沐粱」爲說也。賈疏云：「彼據沐

時所用，今引證飯者，但飯米、沐米，與重鬲所盛用米皆同，

是以《士喪禮》云，「貝三實于筭，稻米一豆實於簋」，據飯含

所用；下卽云「祝淅米，管人受潘，煮于俎，外御者沐」，又

云「鬻餘飯，盛以二鬲」。是其三者用米同，故引沐法以證

飯也。但《喪大記》注，「士沐粱，蓋天子之士」，以其《士喪

禮》諸侯之士沐稻。《喪大記》注又云，「差率而上，天子沐

黍與」？則天子飯用黍也。」案：賈據《喪大記》注及《士喪

禮》，謂天子士與諸侯士所用米異，是也。《檀弓》孔疏說

同。《穀梁》隱元年楊疏謂大夫士同用稷，非鄭義也。云

「皆四升」者，一豆之實也。《士喪禮》云：「稻米一豆，實于

簋。」鄭彼注云：「豆，四升。」鄭意飯米雖貴賤所用不同，然

其實筐，則無貴賤，並用一豆，故云皆四升也。云「實者唯盈」者，其實之以盈口爲度，不必盡四升也。《士喪禮》云：「主人左扱米，實于右，三實一貝。左中亦如之。」又「實米唯盈」，鄭彼注云「唯盈，取滿而已」是也。云「熬穀者，錯于棺旁，所以惑蚍蜉也」者，于注例當作「於」，各本竝誤。《小祝》注義同。鄭《喪大記》注云：「熬者，煎穀也。將塗，設於棺旁，所以惑蚍蜉，使不至棺也。」孔疏云：「謂火熬其穀使香，欲使蚍蜉聞其香氣，食穀不侵尸也。」詒讓案：錯於棺旁者，《論語·爲政篇》集解引包咸云「錯，置也」。謂大斂後，殯棺於西階，而置此熬於棺之四旁也。引《喪大記》曰「熬，君四種八筐，大夫三種六筐，士二種四筐，加魚腊焉」者，賈疏云：「見尊卑用筐穀多少不同之意。鄭彼注引《士喪禮》曰：『熬，黍稷各二筐。』又曰『設熬，旁一筐，大夫三種，加以粱；君四種，加以稻。四筐則首足皆一，其餘設於左右』。若然，天子當加麥苽六種十筐，首足亦各一筐，其餘亦設於左右也。」詒讓案：《籩人》有饔飩白黑，即熬麥稟稻黍。若然，天子熬穀或當有蕡與？

以歲時縣種秬之種，以共王后之春獻種。縣之者，欲其風氣燥達也。鄭司農云：「春王當耕于藉，則后獻其種也。」

后獻其種，見《內宰職》。【疏】「以歲時縣種秬之種，以共王后之春獻種」者，賈疏云：「《內宰》注云：『先種後執謂之種，後種先執謂之秬。』彼內宰上春后獻種，示不敗壞，且助王耕事；此云歲時縣者，從納禾治得子，即縣之，以至春獻之。」注云「縣之者，欲其風氣燥達也」者，凡穀種得溼鬱，則萌蘖而微敗，故必高縣之，使其風氣燥達，則種良而易生也。《齊民要術·收種篇》云：「凡五穀種子，溼鬱則不生，生者亦尋死。粟黍稷粱秫，常歲歲別收選好穗純色者，剉刈高縣之，至春治取別種，以擬明年種子。」即縣種之事。鄭司農云「春王當耕于藉，則后獻其種也」者，于亦當作「於」，各本並誤。此釋經春獻種之義。明王所耕於藉田者，即此舍人所縣后所獻之種也。云「后獻其種，見《內宰職》者，《內宰》云：『上春，詔王后帥六宮之人，而生種秬之種，而獻之于王。』是也。

掌米粟之出入，辨其物。九穀六米別爲書。【疏】「掌米粟之出入」者，謂諸穀米粟出入之事也。已春者爲米，未春者爲粟。《說文·米部》云：「米，稟實也。」《鹵部》云：「稟，嘉穀實也。孔子曰：『稟之爲言續也。』」米粟本專屬稟，假借爲諸穀之通稱。程瑤田云：「以粟主九穀，因爲諸穀之總名，義與《倉

人職》同。賈不知，乃云「正言稌即粢也」。夫粢，稷也。以粟爲粢，是以稌爲稷，此說蓋據《爾雅》郭注云「江東呼粟爲稷」，孫炎注亦云「稷即粟也」，乃漢世訓詁相承之語。孔穎達於《曲禮》「稷曰明粢」，亦釋之曰「稷，粟也」，蓋承其誤矣。」又云《說文》「秬字注：『秬一秬，爲粟二十升。禾黍則一秬，爲粟十六升大半升。』稻黍之實亦曰粟，假借通稱也。」案：程說足正賈疏之誤。粟之本義，即九穀之梁，非稷也。詳《大宰》及《倉人》疏。

注云「九穀六米別爲書」者，賈疏云：「九穀之名，已見《大宰》注。今云六米者，九穀之中，黍、稷、稻、粱、菰、大豆，六者皆有米，麻與小豆、小麥，三者無米，故云九穀六米別爲書，釋經辨其物也。」程瑤田云：「考《小宗伯》及《春人》注，並以麥爲簠簋實，是麥有米明矣。光武自無蕒亭至南宮，馮異復進麥飯菟肩，飯則米爲之也。《說文》記陳楚之間，相謁食麥飯曰糒。《方言》亦曰「陳楚之內，相謁而食麥饘謂之糒」。《說文》言麥飯，《方言》言麥饘，蓋皆言麥有米也。但今世麥皆礱之爲麪，其春米炊飯，則久失其節度矣。若豆大小雖異，其無米則一。余以爲穀中無米者，或指麻與大小豆耳。六米斷指食醫之六穀。賈釋鄭義，恐未得其審。」案：程說是也。後《饌人》「六食」注云「六穀之飯」。《膳夫》「食用六穀」，先鄭

注亦依食醫爲釋，有麥無大豆，則賈說之誤明矣。歲終，則會計其政。政，用穀之多少。【疏】「歲終則會計其政」者，正米粟之歲會，亦即此官之官成也。注云「政，用穀之多少」者，此官掌穀用出人之政，故歲終總會計之，則知其多少之凡目也。

倉人掌粟人之藏。

九穀盡藏焉，以粟爲主。

【疏】「掌粟人之藏」者，謂凡入粟於國者，並藏於倉人也。

莊存與云：「倉藏粟，不藏米。」

注云「九穀盡藏焉，以

粟爲主」者，以下文云「辨九穀」，而此云「掌粟人之藏」，偏舉其一，故釋之也。程瑤田云：「禾實曰粟，粟實曰米，米名曰粱。鄭注《大宰》九穀中無粟，此言九穀以粟爲主，則是粱即粟矣。《史記》索隱載《三倉》云：「粱，好粟。」其證也。」案：程說是也。賈疏亦以粟爲稷，誤，詳《舍人》疏。辨九穀之物，以待邦用。若穀不足，則止餘瀾用；有餘，則藏之，以待凶而頒之。止，猶殺也。殺餘法用，謂道路之委積，所以豐優賓客之屬。【疏】「以待邦用」者，即匪頒、賙賜、稍食之用，詳《廩人》疏。注云「止猶殺也」者，猶《廩人》「殺邦用」之殺，謂減省之

也。云「殺餘法用，謂道路之委積，所以豐優賓客之屬」者，此亦注用今字作「法」也。賈疏云：「案上《遣人》注：『委積者，廩人、倉人計九穀之數足國用，以其餘共之，所謂餘法用也。』則彼委積是法用，以此餘者爲之，是豐優賓客者。今倉人穀不足，故止彼餘法用，故鄭據《遣人》而言焉。彼《遣人》注云：『《職內》邦之移用，亦如此也。』今穀不足亦止之，故云之屬。」惠士奇云：「凶年則鄉里、門閭、郊里、野鄙、縣都皆不入委積。蓋凶荒札喪則國無征，故止餘法用，而以豐年之所藏頒之。」詒讓案：法用之正者，即《外府》云「邦之用凡有法者」是也。鄭以經云「止餘法用」，明邦用之正者不殺，與《廩人》「食不能二鬴殺邦用」異也。凡國之大事，共道路之穀積、食飲之具。大事，謂喪、戎。【疏】「共道路之穀積食飲之具」者，穀積謂九穀之委積，《國語·周語》云：「野有庾積。」韋注云：「庾，露積穀也。」此官掌倉庾，故共穀積，別於委人所共爲「芻藁之積」。遣人掌道路之委積，十里廬有飲食，三十里路室有委，五十里候館有積，此官與彼爲官聯也。注云「大事謂喪戎」者，賈疏云：「案：《左氏》成公傳『國之大事，在祀與戎』，不言喪事。今此喪戎，不言祀者，此經云共道路，惟

軍戎及喪在外，行於道路，故據而言焉。祭祀遠無過在近郊之內，無在道共糧之事，故不言祭祀也。」

司祿闕。

司稼掌巡邦野之稼，而辨種陸之種，周知其名與其所宜地，以爲灋，而縣于邑閭。

周，猶徧也。徧知種所宜之地，縣以示民，後年種穀用爲法也。【疏】「掌巡邦野之稼」者，程瑤田云：「《詩·伐檀》傳云：『種之曰稼，斂之曰穡。』此對文稼穡異也。《司稼》云

「巡野觀稼」，則兼種與斂言之。《詩·甫田》「曾孫之稼，如茨如梁」。箋云：「稼，禾也。謂有稟者也。」是斂亦可曰稼，蓋散文則通矣。」案：程說是也。《說文·禾部》云：「稼，禾之秀實爲稼。一曰在野曰稼。」許亦據斂時言之。

云「周知其名，與其所宜地」者，穀類衆多，大總言之，《大宰》謂之九穀。每穀又各有物色種別之異，此官皆徧知其名。《吳越春秋》云：「稷相五土之宜，青赤黃黑，陵水高下，粢、稷、黍、禾、粱、麥、豆、稻，各得其理。」是也。云「以爲灋而縣于邑閭」者，法謂稼法，亦此官之官法也。《秋

官·敘官·脩閭氏》注云：「閭謂里門。」此邑閭亦即邑中之里門，與《小司徒》「四井爲邑」、《大司徒》「五比爲閭」並異。

注云「周猶徧也」者，《司會》注同。云「徧知種所宜之地，縣以示民，後年種穀用爲法也」者，此亦注用今字作「法」也，下同。種所宜之地，若《大司徒》「五地十有二壤及《職方氏》九州。凡水陸鹹淡堅柔，各有所宜之種，故縣以示之，用爲種植之法。縣即謂縣法，與《舍人》「縣種植之種」事異。《月令》：「孟春，王命布農事，命田舍東郊，皆脩封疆，審端徑術，善相丘陵阪險原隰土地所宜，五穀所殖，以教道民，必躬親之。」注云：「田謂田畯，主農之官也。」案：此經無田畯，疑是冬官之屬。此官蓋亦與彼爲官聯也。

巡野觀稼，以年之上下出斂澶。斂法者，豐年從正，凶荒則損。若今十傷二三，實除減半。【疏】「巡

野觀稼，以年之上下出斂澶」者，賈疏云：「此觀稼，亦謂秋熟時觀稼善惡，則知年上下豐凶，而出稅斂之法。」詒讓案：斂法謂賦斂之正供，亦此官之官法，又即周之徹法也。

載師任地之法，近郊十一，遠郊二十而三，甸稍縣都皆無過十二，此以地之遠近爲稅法之差也。司稼以年之上下出斂法，此又以年之豐歉爲稅法之差也。二官蓋互相備。依《漢書·食貨志》引李悝說，百畝，平歲收百五十石，十一之

稅十五石。以此率準之，則平歲百畝之斂，近郊十五石，遠郊二十二石五斗，甸稍縣都約三十石。而歲豐，所收增於平歲，則所斂亦增；歲歉，所收減於平歲，則所斂亦減。蓋皆以地遠近與年上下互劑之，此周徹法雖不及殷助法，而實善於夏之貢法也。徹爲周賦斂之正法，自來說者皆止援《孟子》爲釋，而不知求其義於此，遂多誤解，互詳《載師》、《匠人》疏。

注云「斂法者，豐年從正」者，賈疏云：「年雖豐，與中平一，皆從正法十一而稅之也。」案：正法即《載師》所說十一至二十三等法是也。依鄭、賈說，蓋謂豐歲亦依平歲所斂之數，不增也。然此經斂法，有定率而無定數，與夏貢法不同，則豐年之斂，似宜增於平歲。《穀梁》宣十五年傳云：「古者稅什一，豐年補敗。」《孟子·滕文公篇》，龍子亦謂「樂歲粒米狼戾，多取之而不爲虐」是也。依《漢志》李悝說，上孰，百畝收六百石，則十一之斂，宜六十石；中孰收四百五十石，則斂宜四十五石；下孰收三百石，則斂宜三十石。然所斂雖倍增，而於十一之率則固無所溢，是亦不得謂之非正法也。《管子·大匡篇》云：「案田而稅，二歲而稅一，上年什取三，中年什取二，下年什取一，歲飢不稅。」此雖非周法，然亦可證稅法隨年上下，不無增減矣。云「凶荒則損」者，《大司徒》「十二荒政，二曰薄征」，先

鄭注云「薄征，輕租稅」是也。賈疏云：「凶荒，謂年穀不熟，則減於十一而稅之。」案：依《漢志》李悝說，小饑百畝收百石，則十一之斂宜十石；中饑收七十石，則斂宜七石；大饑收三十石，則斂宜三石。然則饑年所斂雖大損，而於十一之率則亦無所減，惟大饑或當弛征，不必有三石之斂耳。鄭、賈謂歉歲減於十一之率，是小饑收百石，而斂不及十石，似非周之本法也。云「若今十傷二三，實除減半」者，賈疏云：「鄭舉漢法以況義。十傷二三，謂漢時十分之內，傷二分三分，餘有七分八分在。實除減半者，謂就七分八分中爲實在，仍減去半不稅，於半內稅之，以凶荒所優饒民法也。」孔廣森云：「《前漢·成帝紀》曰：『郡國被災十四已上，毋收田租。』後漢和帝永元四年詔：『郡國秋稼爲旱蝗所傷，其什四已上，勿收田租芻粟，有不滿者，以實除之。不滿即謂傷十分之二三者，就其餘見，減半稅之也。何武爲清河太守，坐郡中被災害什四已上免。至安帝永初七年，蝗災傷稼十五已上，乃得勿租。是則漢之末造，征斂稍稍重矣。』掌均萬民之食，而調其急，而平其興。均，謂度其多少。調，稟其艱阨。興，所徵賦。」

【疏】「掌均萬民之食」者，亦冢上以年之上下爲文。均食

者，謂平民閒糴興積之法，與上斂法爲賦稅異。《周書·大匡篇》云：「數口以食，食均有賦。」即凶荒均民食之事也。《漢·食貨志》引李悝云：「一夫治田百畝，歲收畝一石半，爲粟百五十石。善平糴者，必謹觀歲有上中下孰。上孰，其收自四，餘四百石；中孰自三，餘三百石；下孰自倍，餘百石。小饑則收百石，中饑七十石，大饑三十石。故大孰則上糴三而舍一，中孰則糴二，下孰則糴一，使民適足，賈平則止。小饑則發小孰之所斂，中饑則發中孰之所斂，大饑則發大孰之所斂而糴之。故雖遇饑饉水旱，糴不貴而民不散，取有餘以補不足也。」李悝平糴之法，亦此官均民食之一也。云「而調其急，而平其興」者，此即旅師興積之事。凡民食不足，則以所積者調貸之。其有贏餘者，則案法數平其興發之政，使無不均之患。注云「均謂度其多少」者，《釋文》「度」下有「平」字，疑今本誤脫。《內宰》「均其稍食」，注云：「均猶調度也。」此義與彼同。多少，若《廩人》所云四鬴、三鬴、二鬴之屬。云「調，稟其艱阨」者，《鄉師》云「調萬民之艱阨」是也。稟謂給其食。調與周同，詳鄉師、廩人疏。云「興所徵賦」者，旅師注云「縣官徵聚物曰興，今云軍興」是也。江永云：「興，起也，發也。謂調急之時，平其所興發之廩食，猶《旅師》『平頒其興

積」也。注謂興所徵賦，非也。」案：江說本王與之，是也。方苞說同。賈疏謂「當各計十一而稅，不得特多特少」，則仍是出斂法之事，非所謂平興矣。

舂人掌共米物。

米物，言非一米。

【疏】「掌共米物」者，謂舂穀成米而共之也。

注云「米物，言非一米」者，《舍人》注九穀有六米，此舂人並共之也。

祭祀，

共其盥盛之米，盥盛，謂黍稷稻粱之屬，可盛以爲簠簋

簋實。【疏】「祭祀共其盥盛之米」者，共謂舂人共生米與

饔人炊之也。《釋文》云：「盥音粢，注同。本亦作粢。」

案：經當作盥，注當作粢。陸、賈本經注並作盥，或本經注並作粢，皆非也。詳《甸師》、《小宗伯》疏。

注云「盥

盛，謂黍稷稻粱之屬，可盛以爲簠簋實」者，阮元云：「當作粢盛。」案：阮校是也。凡經作盥，注並讀爲粢，《甸師》、

《小宗伯》、《肆師》、《大祝》注並同。粢，稷也，因爲祭穀之通稱，亦詳《甸師》疏。賈疏云：「器實曰盥，則黍稷稻粱

是也。在器曰盛，則簠簋是也。故鄭摠言「盥盛，謂黍稷稻粱之屬」。屬中兼有麥苽，可盛以爲簠簋之實也。」賓客，

共其牢禮之米，謂可以實筐筥。【疏】「賓客，共其牢

禮之米」者，賓客至，致禮有牢者也。《牛人》云：「凡賓客之事，共其牢禮積膳之牛。」注云：「牢禮，飡饗也。」此經牢禮則有饗而無飡，以飡無筐筥之米也。其積有筐米，則亦舂人共之。

注云「謂可以實筐筥」者，凡禮之通例，致禮於賓客等，孰食並實於簠簋，生米並實於筐筥。實筥者，

即《舍人》之筥米，致饗餼時所陳者也。實筥者，《掌客》注說致積云，「簠簋之實，米實於筥」是也。賈疏云：「鄭云

「實筐筥」，知非車米者，以其公車米四十，侯伯車米三十，子男車米二十，非舂人所供，故知惟謂筐筥者也。若然，車

米出於民稅，故《禹貢》云「五百里納米」是也。」凡饗食，

共其食米。饗有食米，則饗禮兼燕與食。【疏】「凡饗

食共其食米」者，此亦謂共與饔人炊之。

注云「饗有食

米，則饗禮兼燕與食」者，謂若《大行人》上公饗禮九獻，食禮九舉。食禮無獻，饗則兼有食，蓋大饗與祭祀同，亦有饋

食之節，是九獻之外，兼有食之九舉矣。其燕禮尤輕，則唯有獻而無食也。鄭以《饗禮》今亡，故據此文推之。賈疏

云：「燕禮無食米，食禮無飲酒，若饗禮，有飲酒，有食米，故云饗禮兼燕與食也。」掌凡米事。【疏】「掌凡米事」

者，謂凡舂抗之事，舂人悉掌之也。

饌人掌凡祭祀共盛。炊而共之。【疏】「饌人」

者，饌饕字同。《敍官》故書亦如是，而鄭從今書作饕，此古今書蓋同作饌，故鄭亦從之。嘉靖本依《敍官》改饕，非也。《稿人》注亦作饌可證。詳《敍官》疏。注云「炊而共

之」者，對《春人》「祭祀共其盥盛之米」爲生米不炊者也。凡祭祀之齊盛，皆於竈炊之。《士虞禮》、《特牲饋食禮》謂之「饕饌」，《少牢饋食禮》謂之「廩饌」是也。此官既於饕饌炊米爲食，則共與舍人實之。共王及后之六食。六

食，六穀之飯。【疏】「共王及后之六食」者，亦炊而共之也。此官亦掌共世子之食，經不言者，文略。注云「六

食，六穀之飯」者，《膳夫》云：「食用六穀。」注云：「食，飯也。」詳彼疏。凡賓客，共其簠簋之實，謂致飧饗。

【疏】注云「謂致飧饗」者，賈疏云：「下云「饗食亦如之」，故知此是飧饗也。」饗食亦如之。

稿人掌共外内朝亢食者之食。外朝，司寇

斷獄弊訟之朝也。今司徒府中，有百官朝會之殿云，天子與丞相舊決大事焉，是外朝之存者與？內朝，路門外之朝也。亢食者，謂留治文書，若今尚書之屬，諸直上者。

【疏】「稿人」者，稿，嘉靖本作稟，今從《釋文》、唐石經，宋本、余本、婺本正。岳本作稿，尤非。《敍官》作「稟人」，先鄭讀爲「稿師」之稿，此作「稿人」，與彼異者，此故書本不誤，故二鄭不著其改讀之說。唐石經《敍官》作稟，此作稿，兩文不同，自是鄭本之舊。凡本職字與《敍官》不必皆相應。若上「饌人」，《敍官》作「饕人」，即其比例。嘉靖本蓋後人依《敍官》改，非其舊也。若鄭本作稟，則注不宜無「稟讀爲稿」之文，足以明之。今定從石經爲正，詳《敍官》疏。

注云「外朝，司寇斷獄弊訟之朝也」者，即《小司寇》「掌外朝之政」，《朝士》「掌邦外朝之法」是也。《朝士》注云：「外朝在庫門之外，皋門之內。」詳彼疏。賈疏云：「天子三朝：路寢庭朝，是圖宗人嘉事之朝，大僕掌之；又有路門外朝，是常朝之處，司士掌之；又有外朝，在皋門內，庫門外，三槐九棘之朝，是斷獄弊訟之朝，朝士掌之。今言外內朝，明據三槐與路門外二者，以其路寢庭，非常朝之處也。」云「今司徒府中，有百官朝會之殿云，天子與丞相舊決大事焉，是外朝之存者與」者，鄭舉漢法爲況。《朝士》注云：「今司徒府有天子以下大會殿，亦古之外朝哉。」說與此同。王應麟云：《續漢·麻志》：「熹平四年，馮光、陳晃言麻元不正，詔以羣臣會司徒府議。」注：「《蔡邕集》載：三月九

日，百官會府公殿下，東面；校尉南面；侍中、郎將、大夫、千石、六百石重行北面；議郎、博士西面；戶曹令史當坐中而讀詔書，公議。蔡邕前坐侍中西北，^①近公卿，與光晃相難問是非焉。」又《百官志》注：「蔡質《漢儀》曰：「司徒府與蒼龍闕對，厭於尊者，不欲號府。」應劭曰：「丞相舊位在長安時，府有四出門，明帝本欲依之，迫於大尉司空，但爲東西門耳。國每有大議，天子車駕親幸其殿。殿西王侯以下更衣併存。每歲州郡聽採長吏臧否，民所疾苦，還條奏之，是爲舉謠言者。掾屬令史都會殿上，主者大言某州郡行狀。」《周禮》「外朝」，干寶注曰：「禮，司徒府中，有百官朝會殿，天子與丞相決大事，是外朝之存者。」」詒讓案：據劉昭所引，則干注說與鄭同，疑晉時猶沿漢制也。鄭言此者，謂漢亦有外朝，與宮內之朝爲二，故舉以與周制外內朝相況。實則周外朝無宮室，與漢大會殿小異也。云「內朝，路門外之朝也」者，即《大宰》、《宰夫》之「治朝」也。對庫門外之朝，則爲內朝，詳《大宰》及《朝士》疏。云「亢食者，謂留治文書，若今尚書之屬諸直上者」者，《說文·宀部》云：「亢，桷也。从宀，人在屋下，無田事。」《周書》曰：「宮中之亢食。」段玉裁云：「《周書》蓋「周禮」轉寫之誤。」《宮中之亢食》，似涉《校人》「宮中之稍食」而誤。」賈疏云：

「亦引漢法說之。謂以次當直，留在朝宿不還，須以食供之。亢食者，亢，散也，外內朝上直諸吏，謂之亢吏，亦曰散吏。以上直不歸家食，稟人供之，因名亢食者。」孔廣森云：「尚書散屬，漢時號亢官。《申屠嘉傳》曰「外墀垣，故亢官居其中」是也。官無常員，其給食亦無常例就，謂之亢食。成帝河平四年，詔避水它郡國在所亢食之。文穎注：「亢，散也。」案：孔說是也。此亢食，即在官府服公事之人，以事留外內朝者，故官共其食，以其爲散吏，故謂之亢食也。其公卿大夫等，以事留宮中，不遑退食者，則內饗共之，非稿人所掌。詳《內饗》疏。若饗耆老孤子士庶子，共其食。士庶子，卿大夫士之子弟，宿衛王宮者。【疏】「若饗耆老、孤子、士庶子，共其食」者，此與外饗爲官聯也。共其食者，亦饗兼食禮之證。耆老，通四等之老言之。賈疏謂專指死王事者之父，說未咳，詳《外饗》疏。

注云「士庶子，卿大夫士之子弟宿衛王宮者」者，明士庶子衆多，不宿衛者無饗禮也。《宮伯》「掌王宮之士庶子」，先鄭注云：「庶子，宿衛之官。」後鄭注云：「王宮之士，謂

①「侍」原訛「待」，據《續漢書·律曆志》劉昭注改。

王宮中諸吏之適子也。庶子，其支庶也。」此注云「卿大夫士之子弟」，亦即指諸吏之適子、庶子也。今案：凡卿大夫士之子，已命者爲士，未命而在官者爲庶子。後鄭以適庶分士庶子，非也，詳《宮伯》疏。掌豢祭祀之犬。養犬豕曰豢。不於鯀人言者，共至尊，雖潘瀾羹餘，不可褻也。

【疏】「掌豢祭祀之犬」者，此亦謂將祭之前別繫者，與充人爲官聯也。注云「養犬豕曰豢」者，《說文·豕部》云：

「豢，以穀圈養豕也。」又《口部》云：「囹，豕廁也。」豢即豢之隸變。《少儀》云：「君子不食囹腴。」①注云：「《周禮》作豢，謂犬豕之屬食米穀者也。」《史記·夏本紀·集解》引賈逵《左傳注》云：「豢，養也。穀食曰豢。」《孟子·告子篇》

趙注云：「草食曰芻，穀食曰豢。」是豢本爲養豕之名。通言之，凡穀食之性皆謂之豢，以對草食之性謂之芻。故養

犬亦稱豢，《墨子·天志上篇》云「莫不牒牛羊，豢犬彘，繫爲粢盛酒醴，以祭祀上帝鬼神」是也。此不言豢豕者，司空



奉豕，疑冬官別有豕人豢之。云「不於鯀人言者，共至尊，雖其潘瀾羹餘，不可褻也」者，《釋文》云：「潘，本或作蕃。

羹，本亦作殘。」案：《內則》云：「燂潘請醕。」鄭注云：「潘，米瀾也。」《說文·水部》云：「潘，浙米汁也。瀾，潘也。」

《廣雅·釋器》云：「泔，潘，瀾也。」瀾與瀾通。羹餘者，

《易·賁》爻辭「束帛戔戔」，《釋文》引子夏傳，作「殘殘」。《呂覽·權勳篇》高注云：「殘，餘也。」《說文·白部》云：「𦔻，禽獸所食餘也。」戔、殘，並𦔻之借字。賈疏云：「以其鯀人所炊米，爲祭祀及共王與后，並是至尊，故雖米之潘瀾羹餘，亦不得褻之與犬，故於此言之也。」

①「腴」原訛「腹」，據《禮記·少儀》改。



ISBN 978-7-301-11757-6



9 787301 117576

定價：1200.00元

[General Information]

书名=14577859

SS号=14577859